

Se-nānā Diosē nanā sā' me rá catūū  
nimán ní' a

Copala Triqui New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

San Mateo .....	4
San Marcos .....	53
San Lucas .....	83
San Juan .....	132
Hechos .....	167
Romanos .....	210
I Corintios .....	230
II Corintios .....	249
Gálatas .....	261
Efesios .....	269
Filipenses .....	276
Colosenses.....	281
1 Tesalonicenses .....	286
2 Tesalonicenses .....	290
1 Timoteo .....	293
2 Timoteo .....	299
Tito.....	303
Filemón .....	306
Hebreos.....	308
Santiago .....	322
1 Pedro .....	327
2 Pedro .....	333
1 Juan.....	336
2 Juan.....	341
3 Juan.....	342
Judas .....	343
Apocalipsis.....	345

# San Mateo

Nana nihánj taj xna'anj che'é nij xii Jesucristó nij síí m̄an ḡaa naá a

**1** Yanj nihánj me taj xna'anj che'é nij xii Jesucristó a. Veé xii Jesucristó me síí cu'naj David síí cane ḡaa naá, ne xii David me síí cu'naj Abraham síí cane ḡaa naá adonj.

<sup>2</sup> Dan me se síí cu'naj Abraham me rej síí cu'naj Isaac, ne Isaac me rej síí cu'naj Jacob, ne Jacob me rej nij tinuj síí cu'naj Judá, <sup>3</sup> ne Judá me rej síí cu'naj Fares ḡa síí cu'naj Zara, ne chana cu'naj Tamar me nii roj so' a. Ne Fares me rej síí cu'naj Esrom, ne Esrom me rej síí cu'naj Aram, <sup>4</sup> ne Aram me rej síí cu'naj Aminadab, ne Aminadab me rej síí cu'naj Naasón, ne Naasón me rej síí cu'naj Salmón, <sup>5</sup> ne Salmón me rej síí cu'naj Booz, ne nii Booz me chana cu'naj Rahab a. Ne Booz me rej síí cu'naj Obed, ne nii Obed me chana cu'naj Rut a. Ne Obed me rej síí cu'naj Isaí, <sup>6</sup> ne Isaí me rej síí cu'naj David, ne síí cu'naj David ro', me síí nicaj suun rey uun chij rihaan nij yuvii israelitá ḡaa cane so' adonj.

Ne David me rej síí cu'naj Salomón, ne nii Salomón me nicaj síí cu'naj Urías a. <sup>7</sup> Ne Salomón me rej síí cu'naj Roboam, ne Roboam me rej síí cu'naj Abías, ne Abías me rej síí cu'naj Asa a. <sup>8</sup> Ne Asa me rej síí cu'naj Josafat, ne Josafat me rej síí cu'naj Joram, ne Joram me rej síí cu'naj Uzías a. <sup>9</sup> Ne Uzías me rej síí cu'naj Jotam, ne Jotam me rej síí cu'naj Acáz, ne Acáz me rej síí cu'naj Ezequías a. <sup>10</sup> Ne Ezequías me rej síí cu'naj Manasés, ne Manasés me rej síí cu'naj Amón, ne Amón me rej síí cu'naj Josías a. <sup>11</sup> Ne Josías me rej nij tinuj síí cu'naj Jeconías, ne cayáan nij so' yo' qui'yaj canaán nij síí m̄an Babilonia rihaan nij yuvii israelitá, ne ca'anj nicaj nij so' man nij yuvii israelitá chiháan nij so' guun nij yuvii israelitá mozó rihaan nij so' adonj.

<sup>12</sup> Guun naá doj, ne guun Jeconías rej síí cu'naj Salatiel, ne Salatiel me rej síí cu'naj Zorobabel, <sup>13</sup> ne Zorobabel me rej síí cu'naj Abiud, ne Abiud me rej síí cu'naj Eliaquim, ne Eliaquim me rej síí cu'naj Azor, <sup>14</sup> ne Azor me rej síí cu'naj Sadoc, ne Sadoc me rej síí cu'naj Aquim, ne Aquim me rej síí cu'naj Eliud, <sup>15</sup> ne Eliud me rej síí cu'naj Eleazar, ne Eleazar me rej síí cu'naj Matán, ne Matán me rej síí cu'naj Jacob, <sup>16</sup> ne Jacob me rej síí cu'naj José, ne José me síí xcaj man chana cu'naj Mariá, ne no' me nii síí cu'naj Jesús, ne síí ca'néé Diose tinanii man yuvii m̄an rihaan chumii nihánj rihaan sayuun me Jesús adonj.

<sup>17</sup> Dan me se asij síí cu'naj Abraham ndaa síí cu'naj David síí xca'anj xii síí cu'naj Jesucristó a. Ne asij síí cu'naj

David ndaa ca'anj nicaj nij síí m̄an Babilonia man nij yuvii israelitá chiháan nij so' síí yo'ó xca'anj xii síí cu'naj Jesucristó a. Ne asij ca'anj nicaj nij síí m̄an Babilonia man nij yuvii israelitá chiháan nij so' ndaa ca'n-gaa síí cu'naj Jesucristó, ne síí yo'ó xca'anj nij xii Jesucristó uún adonj.

Nana nihánj taj xna'anj daj guun ḡaa ca'ngaa Jesucristó rihaan chumii nihánj a

<sup>18</sup> Ne nihánj me se vaa guun asij rque ḡaa ataa ca'ngaa Jesucristó a. Dan me se nii Jesucristó me chana cu'naj Mariá a. Gaa asino yaan guun ya rá no' ḡa síí cu'naj José se vaa xcaj tuvi' roj so' a. Tzaj ne ataa cunyu rcua'aa roj so' a. Tzaj ne xcaj no' cuentá se vaa aj nari' no' ne'ej qui'yaj Nimán Diose a. <sup>19</sup> Dan me se síí cu'naj José me síí xcaj man chana cu'naj Mariá, ne xcaj so' cuentá se vaa aj nuû rque no' ne'ej a. Che'é dan nuchruj raa so', ne guun rá so' se vaa tanáj yuve so' man no' adonj. Dan me se sij vaa nicaj nimán me so', ne guun rá so' cataj xna'anj so' rihaan nij síí nicaj suun, tzaj ne guun vij rá so', ne ne ca'vej rá so' cutá' so' cacun' xráa chana cu'naj Mariá rihaan nij síí nicaj suun a. <sup>20</sup> Dan me se nuchruj raa so' daj qui'yaj so', gaa ne rej nij ca'mii nej rihaan so' a. Dan me se cotoj so', ne naqui'yaa rihaan so' se vaa ca'na' yo'ó se-mozó síí 'nij ra'a man ní', ne cataj se-mozó síí 'nij ra'a man ní' rihaan so' a:

—Cunó so' ca'mii 'unj, José. 'O se ta'nij si'nó síí cu'naj David síí cane ḡaa naá mé so' adonj. Se cuchu'ví' so' xcaj so' man chana cu'naj Mariá ma'. Ne tumé no' cacun' ma'. Maa se nayón ne'ej rque no' qui'yaj Nimán Diose adonj. <sup>21</sup> Dan me se cuchruj no' ne'ej snó'o cunii, ne asa' cuchruj no' ne'ej, ne Jesús tucu'náj so' man ne'ej yo' á. Danj tucu'náj soj man so', che'é se guun so' síí tinanii man nij tuvi' so' rihaan chrej chi'ii uun chij nimán nij so' adonj. —Danj ca'mii se-mozó síí 'nij ra'a man ní' rihaan síí cu'naj José a.

<sup>22</sup> Nu' nihánj me se vaa qui'yaj síí 'nij ra'a man ní' a. Qui'yaj guee so' nu' nana cataj xna'anj so' gaa naá rihaan 'o síí nata' se-nana Diose rihaan yuvii, ne nihánj me nana ca'mii so' rihaan síí nata' se-nana Diose yo' a: <sup>23</sup> "Quene'en soj se vaa quinari' 'o chana yaan ne'ej, ne cuchruj no' ne'ej snó'o cunii, ne Emanuel cu'naj ne'ej adonj". Danj ca'mii síí 'nij ra'a man ní' gaa naá rihaan síí nata' se-nana Diose, ne nana "Emanuel" taj se vaa cané ma'an Diose ḡa ní' adonj.

<sup>24</sup> Veé dan, ne quinanuû rá síí cu'naj José, ne qui'yaj so' nu' ndaa vaa cataj xna'anj se-mozó síí 'nij ra'a man

ní' rihaan so', ne xcaj so' man chana cu'naj Mariá a.  
<sup>25</sup> Tzaj ne ne cotoj so' ga no' ndaa se quisij cuchruj no' ne'ej sn'o cunii a. Ne tucu'náj José Jesús man ne'ej adonj.

**Nana nihánj taj xna'anj che'é nij sí tucu'yón ndo'o che'é yati' a**

**2** Dan me se ca'ngaa Jesucristó chuman' Belén chuman' naj estadó Judea, ne sí cu'naj Herodes me sí nicaj suun rey uun hij rihaan chuman' rej ca'ngaa Jesucristó a. Quisij ca'ngaa Jesucristó, gaa ne ca'na' nij sí tucu'yón ndo'o che'é yati' chuman' cu'naj Jerusalén, ne nij sí cavii rej síj güii me nij so' a. <sup>2</sup> Ne xná'anj nij so' man nij sí man Jerusalén, cataj nij so':

—Ne'ej guun sí nicaj suun rey guun hij rihaan nij yuvi israelitá ro', me rej ca'ngaa so' ga. Quene'en núj yati' taj xna'anj yo' se vaa ca'ngaa so' nanj á. Cavii yati' yo' xtá' rej síj güii, ne che'é dan ca'na' núj quina'vij núj rihaan so' adonj —taj nij sí tucu'yón ndo'o che'é yati' a.

<sup>3</sup> Gaa ne cuchi' nana rihaan sí nicaj suun rey cu'naj Herodes se vaa xná'anj ndo'o nij sí tucu'yón ndo'o che'é yati' me rej ca'ngaa ne'ej yo', gaa ne cuchu'vi' ndo'o so' se vaa cachij ne'ej yo', ne ca'ne' ne'ej yo' se-suun so' ra'a so' vaa güii, rá so' a. Ne cuchu'vi' ndo'o nij sí man chuman' Jerusalén se vaa caxrii yuvaa Herodes man ma'an nij so' a. <sup>4</sup> Veé dan, ne cunuu chre' taran' nij xrej atá suun nocco doj cunuu chre' nij sí naqui'yaj cu se-tucuanj Moisés rihaan nij yuvi cunuu chre' rihaan so', qui'yaj so', ne xná'anj Herodes man nij so' me rej ca'ngaa sí ca'nej Diosé tinanii man yuvi man rihaan chumii rihaan sayuun a. <sup>5</sup> Gaa ne cataj nij so' rihaan Herodes a:

—Ca'ngaa so' chuman' Belén chuman' naj estadó Judea a —taj nij so' rihaan sí nicaj suun rey cu'naj Herodes a.

Danj ca'mii nij so' che'é nana nihánj nana cachrón sí nata' se-nana Diosé rihaan yanj a: <sup>6</sup> “Ne mā'án so', chuman' Belén chuman' naj estadó Judea ro', chuman' sa' ndo'o 'nij ra'a man tuvi' chuman' naj estadó Judea mé so' á. Dan me se vaa sí guun chihanj man so', ne guun hij uxrá so', ne uxrá cütumé so' man nij yuvi israelitá yuvi cuné' 'unj canoco' manj a”. Nihánj me nana cachrón sí nata' se-nana Diosé rihaan yanj gaa naá a.

<sup>7</sup> Cuno sí nicaj suun Herodes nana ca'mii nij so', gaa ne ca'née yuve so' nana rihaan nij sí tucu'yón ndo'o che'é yati' se vaa ca'na' nij so' rihaan Herodes a. Gaa ne xná'anj Herodes man nij so' me yavii curuvi' naca yati' taj xna'anj che'é ne'ej yo', taj Herodes a. Gaa ne cataj xna'anj nij so' rihaan Herodes a. <sup>8</sup> Gaa ne ca'née Herodes man nij so' ca'anj nij so' chuman' Belén, ne ca'ne' Herodes suun rihaan nij so', ne cataj Herodes:

—Nanó' uxrá soj man ne'ej yo', ne asa' nari' soj man ne'ej, ne cataj xna'anj soj rihanj me rej ne ne'ej yo', gaa ne ca'anj mā'anj quina'vij mā'anj rihaan ne'ej yo' adonj —taj Herodes rihaan nij sí tucu'yón ndo'o che'é

yati', ca'mii ne so' rihaan nij sí tucu'yón ndo'o che'é yati' a.

<sup>9</sup> Quisij cuno nij so' nana cataj xna'anj sí nicaj suun rey rihaan nij so', gaa ne curihanj nij so', ca'anj nij so', gaa ne quene'en uún nij so' man yati' yo' a. Yati' aj quene'en nij so' rej síj güii me yati' yo', ne dan me se vaj yati' yo', ne yo'q canoco' nij so' man yati' yo', ndaa se canicun' yati' yo' rej xtá' rej yanj ne'ej yo' a. <sup>10</sup> Gaa quene'en nij so' man yati' yo', gaa ne uxrá guun nihá' rá nij so', <sup>11</sup> gaa ne catúj nij so' rá ve' rej canicun' yati' xtá', gaa ne nari' nij so' man ne'ej ga nii ne'ej chana cu'naj Mariá, gaa ne canicun' ruj nij so', ne quina'vij nij so' rihaan ne'ej yo' a. Veé dan, gaa ne nuxra' nij so' se-chrunj nij so', gaa ne rqué ndo'o nij so' rasuun sa' rihaan ne'ej yo' a. Dan me se aga' oró mí' do', squí' cu'naj incienso do', squí' cu'naj mirra do', rqué uun nij so' rihaan ne'ej yo' a. <sup>12</sup> Ne rej nii ca'mii nej rihaan nij so', ne cataj xna'anj Diosé rihaan nij so' se vaa se canicaj uún nij so' ca'anj nij so' rihaan sí nicaj suun rey cu'naj Herodes, taj nej rihaan nij so' a. Che'é dan yo'ó chrej canicaj nij so' quinan' nij so' chiháan nij so' a.

**Nana nihánj taj xna'anj se vaa ca'anj nicaj José ga Mariá man Jesucristó rej cu'naj Egiptó a**

<sup>13</sup> Quisij quinan' nij sí tucu'yón ndo'o che'é yati', gaa ne rej nii ca'mii nej rihaan sí cu'naj José a. Dan me se naqui'yaa yo'q se-mozó sí 'nij ra'a man ní' rihaan so', ne cataj se-mozó sí 'nij ra'a man ní' rihaan so' a:

—Naxagaa so', ne nicaj so' man roj nii ne'ej, ne cunanj so' ca'anj so' rej cu'naj Egiptó, ne cayáan so' Egiptó ndaa güii ca'mii uún 'unj rihaan so' á. 'Q se nanó' ndo'o sí nicaj suun rey cu'naj Herodes man ne'ej, ne ticavi' so' man ne'ej yo' vaa taj so' adonj —taj se-mozó sí 'nij ra'a man ní' rihaan sí cu'naj José a.

<sup>14</sup> Gaa ne naxagaa sí cu'naj José, ne nicaj so' man roj nii ne'ej, ne rej nii cavii nij so' ca'anj nij rej so' Egiptó, <sup>15</sup> ne cane nij so' Egiptó yo' ndaa se cavi' sí nicaj suun rey cu'naj Herodes a.

Dan me se quisij ya nu' nana ndaa vaa cataj xna'anj sí 'nij ra'a man ní' rihaan 'o sí nata' se-nana Diosé gaa naá, se vaa cataj so': “Canacúun 'unj man ta'nij se vaa cavii so' Egiptó ca'na' so' adonj”. Danj taj Diosé gaa naá che'é ta'ní' so' Jesucristó adonj.

**Nana nihánj taj xna'anj se vaa cavi' ndo'o ne'ej man chuman' Belén, qui'yaj sí nicaj suun cu'naj Herodes a**

<sup>16</sup> Quisij ca'anj nij rej Jesucristó rej cu'naj Egiptó, gaa ne xcaj sí nicaj suun rey cu'naj Herodes cuenta se vaa aj tiha' yu'unj nij sí tucu'yón che'é yati' man so', gaa ne ca'maan ndo'o rá so', ne che'é dan ca'ne' so' suun rihaan tanuu se vaa ticavi' tanuu man nu' ne'ej sn'o cunii yanj nu' anicaj chuman' Belén a. Ne'ej vaj vij yo' rej rque ro', cavi', taj so' a. Danj qui'yaj so', gaa ne cavi' ne'ej ca'mii yati' che'é taj nij sí tucu'yón che'é yati' rihaan so', rá so' a.

<sup>17</sup> Danj qui'yaj so', ne quisij ya nu' nana cataj xna'anj sí nata' se-nana Diosé gaa naá sí cu'naj Jeremías, se

vaa cataj so': <sup>18</sup> "Cunḡ nii ta'vee ndo'o chanaḡ man chuman' cu'naj Ramá a. Ase vaa chanaḡ cu'naj Raquel chanaḡ cane gaa naá gaa nij chanaḡ, ta'vee ndo'o nij no' che'é ta'níi nij no' a. Ne se ca'vej uxrá rá nij chanaḡ naqui'yaj niha' no' nimán no', che'é se navij ta'níi nij no' cavi' nanj adonj". Dənj ca'mii síi cu'naj Jeremías gaa naá a.

**Nanaḡ nihánj taj xna'anj se vaa curihanj uún nij rej Jesucristó rej cu'naj Egiptó, ca'anj nij so' chuman' Nazaret a**

<sup>19</sup> Gaa quisij cavi' síi nicaj suun rey cu'naj Herodes, gaa ne naqui'yaa uún yo'ḡ se-mozó síi 'nij ra'a man ní rihaan síi cu'naj José gaa yáan so' Egiptó gaa otoj so' rej nij a. <sup>20</sup> Ne cataj xna'anj se-mozó síi 'nij ra'a man ní rihaan José a:

—Naxagaa so', ne nicaj so' roj nii ne'ej, ne ca'anj so' rej cu'naj Israel á. 'Ḡ se yaj me se cavi' nij síi me rá ticavi' man ne'ej yaj nanj adonj —taj se-mozó síi 'nij ra'a man ní rihaan síi cu'naj José a.

<sup>21</sup> Gaa ne naxagaa síi cu'naj José, ne nicaj uún so' roj nii ne'ej ca'anj so' rej cu'naj Israel a. <sup>22</sup> Ne cuchi' nana rihaan so' se vaa síi cu'naj Arquelao guun síi nicaj suun rey uun hij rihaan estadó Judea a. Dan me se nayón síi cu'naj Arquelao rihaan rej so' síi cu'naj Herodes a. Che'é dan cuchu'vi' ndo'o síi cu'naj José ca'anj so' estadó Judea, gaa ne ca'mii nej rihaan uún so' se vaa se ca'anj so' estadó Judea ma'. Che'é dan ca'anj so' estadó Galilea, <sup>23</sup> ne cuchi' so' chuman' Nazaret, ne cayáan so' chuman' yo' a. Dan me se cayáan nij so' chuman' Nazaret, ne quisij yaḡ nu' nana cataj nij síi nata' se-nanaḡ Diose gaa naá, se vaa síi cavii Nazaret me síi ca'nej Diose tinanii man yuvii rihaan sayuun adonj. Inanj dənj ca'mii nij síi nata' se-nanaḡ Diose gaa naá yo' a.

**Nanaḡ nihánj taj xna'anj daj vaa ca'mii natáj síi cu'naj Juan síi cuta' ne yuvii a**

**3** Dan me se yo'ḡ yáan Jesucristó chuman' Nazaret, ne cavii síi cu'naj Juan tacaan estadó Judea, ne ca'mii natáj ndo'o so', <sup>2</sup> cataj so':

—Nuchran' nimán soj, ne tanáj soj chrej chi'ii ei. 'Ḡ se nichrun' guun hij Diose rihaan chumii nihánj nanj adonj —taj so', a'mii natáj so' a.

<sup>3</sup> Síi nata' se-nanaḡ Diose rihaan yuvii gaa naá síi cu'naj Isaias ro', cataj xna'anj che'é síi cu'naj Juan, cataj so': "Nucuaḡ ndo'o ca'mii natáj 'ḡ so' rej tacaan, ne cataj so' se vaa nuchran'nimán yuvii, ne ve'é ca'mii nij yuvii gā síi 'nij ra'a man ní asā' ca'na' so' a", taj síi cu'naj Isaias gaa naá a.

<sup>4</sup> Dan me se síi cu'naj Juan me se nuu so' yatzij nuj xcuu camelló ne 'nij catuun so' merqueḡ nuj, ne chá so' inanj rquíi, ne catzi' xtaan man quij co'o so' adonj. <sup>5</sup> Ne curihanj ndo'o yuvii man chuman' Jerusalén do', yuvii man nu' estadó Judea do', yuvii man nij chuman' naj tu'va chráa cu'naj Jordán do', ca'na' rihaan síi cu'naj Juan, <sup>6</sup> gaa ne cata' ne nij yuvii rá chráa cu'naj Jordán,

qui'yaj Juan a. Dan me se nata' yaḡ nij yuvii che'é nu' cacun' tumé nij yuvii, gaa ne cata' ne nij yuvii adonj.

<sup>7</sup> Gaa ne quene'en síi cu'naj Juan se vaa ca'na' ndo'o nij síi fariseo do', nij síi saduceo do', me rá nij so' cuta' ne Juan man nij so' a. Gaa ne ca'mii natáj so' rihaan nij so', cataj so':

—Ase vaa xcuáa yuvaḡ vaa soj á. Me síi cataj xna'anj rihaan soj cunanj soj, ne quinanii soj rihaan sayuun qui'yaj Diose gā. Asā' ca'vee quinanii soj rihaan sayuun, qui'yaj inanj na cata' ne soj gā. <sup>8</sup> Sese yaḡ cunuu sa' nimán soj, ne ca'anj soj qui'yaj soj ndaa vaa 'yaj yuvii cunuu sa' nimán á. <sup>9</sup> Ne tadó soj sese quisij rá soj cataj soj se vaa ta'níi ta'nij si'no' síi cu'naj Abraham síi cane gaa naá me soj, ne ne tumé soj cacun', cataj soj á. Se ca'mii soj daj chihaa mij dənj ma'. Maḡ se cataj xna'anj 'unj rihaan soj se vaa nuveé se ya'anj tiha' ta'níi ta'nij si'no' síi cu'naj Abraham me soj a ma'. Maḡ se sese Diose rá, ne ca'vee nicaj Diose náa guun yahij naj rihaan yo'óo nihánj, ne qui'yaj Diose man 'ḡ ta'níi ta'nij si'no' síi cu'naj Abraham adonj. Che'é dan canoco' yaḡ soj man Diose á.

<sup>10</sup> "Ḡ se nichrun' qui'yaj Diose sayuun man nij síi na'vej rá cunḡ rihaan so' nanj á. Ase vaa síi oro' aga' a'ne' chruun, ne oro' so' aga' ca'ne' so' chruun ro', dənj vaa Diose cuano' ei. Che'é dan ase vaa 'yaj nii man chruun ro', ta'nga' dənj qui'yaj Diose man nij síi ne uno rihaan so' a. Dan me se a'ne' nii chruun nuvi' chruj sa' raḡ, ne araa nii man chruun yo' rihaan ya'an a. Ta'nga' dənj qui'yaj Diose man nij síi na'vej rá canoco' chrej sa' adonj.

<sup>11</sup> "Ḡ Unj nihánj me síi cuta' ne uun man soj sij nuchran' nimán canoco' chrej sa' a. Tzaj ne vaa yo'óo síi ca'na', ne sij sca' doj guun so' rihanj a. Che'é dan me aj ne nó xcunj nachej nuj correá 'nij tacanj so' ma'. Ne ca'na' so', ne ca'na' Nimán Diose gā so', ne caxrii ya'an so' man soj sij na'vej rá cunḡ rihaan Diose, ne cacaa soj adonj. <sup>12</sup> Dan me se ase vaa síi oro' chruun palá vaa so' cuano' adonj. Dan me se síi nicaj chruun palá ro', rii nu' 'núú trigó naj rihaan yo'óo, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne anicaj so' araa so' squij ni'ya xráa trigó rihaan ya'an a. Ne ase vaa síi nicaj palá man cuano' ro', dənj qui'yaj síi ca'na', ne naqui'yaj chre' so' man cunudanj nij síi cunuu sa' nimán, ne caraa so' man nij síi chi'ii rihaan ya'an, ne cacaa nij so' nu' cavii nu' ca'anj, ne daj chihaa mij se quina'áj ya'an yo' a man adonj. —Dənj ca'mii síi cu'naj Juan rihaan nij yuvii yo' a.

**Nanaḡ nihánj taj xna'anj se vaa cata' ne Jesucristó a**

<sup>13</sup> Gaa ne curihanj Jesucristó estadó Galilea ca'anj so' chráa cu'naj Jordán rihaan síi cu'naj Juan, ne cuta' ne Juan man Jesucristó, rá so' a. Dan me se cuchi' Jesucristó rihaan síi cu'naj Juan, <sup>14</sup> tzaj ne veé dan me se ne ca'vej rá síi cu'naj Juan cuta' ne so' man Jesucristó ma'. Maḡ se cataj síi cu'naj Juan rihaan Jesucristó a:

—Me che'é 'ná' so' cuta' ne 'unj man so' gā. Tananj ma'an so' me síi vaa che'é cuta' ne man ma'anj nanj á.

Tzaj ne x̄a' 'un̄j me se ne nó xcúún 'un̄j cut̄a' nej mán so' ma' —taj síí cu'n̄aj Juan rihaan Jesucristó a.

<sup>15</sup> Ḡaa ne cataj Jesucristó rihaan so' a:

—Ca'vej so' cut̄a' ne so' manj ei. D̄anj qui'yaj ní', che'é se n̄o xcúún ní' qui'yaj ní' nu' se vaa me rá Dios̄e qui'yaj ní' ad̄onj —taj Jesucristó rihaan síí cu'n̄aj Juan, ḡaa ne ca'vej rá so', ḡaa ne cut̄a' ne so' man Jesucristó a.

<sup>16</sup> Quis̄ij cata' ne Jesucristó, ḡaa ne curih̄anj so' rá na, ḡaa ne taj ni'yón naxra' rej xt̄a', ne quene'en so' se vaa nanij Nimán Dios̄e rej xt̄a', ne ase vaa cha'aan ro', vaa Nimán Dios̄e, curuvi' yo' rej xt̄a' nanij yo' rāa Jesucristó a. <sup>17</sup> Ḡaa ne rej xt̄a' ca'mii Dios̄e rihaan Jesucristó, ne cuno nij síí nicun' ḡa Jesucristó nan̄a ca'mii Dios̄e, ne dan me se cataj Dios̄e a:

—Ta'níí 'un̄j síí 'ēe ndo'o raj man mé so', ne nih̄a' ndo'o raj ni'yaj 'un̄j mán so' ad̄onj —taj nan̄a cavii rej xt̄a' ca'mii Dios̄e rihaan Jesucristó a.

#### Nan̄a nihánj taj xna'an̄j se vaa guun ndo'o rá síí ch̄ree tih̄a' yu'un̄j síí ch̄ree man Jesucristó a

**4** Ḡaa ne ca'an̄j Jesucristó rej tacaan, qui'yaj Nimán Dios̄e, che'é rej ca'vee guun rá síí ch̄ree tih̄a' yu'un̄j síí ch̄ree man Jesucristó a. <sup>2</sup> Ne vij chih̄aa ya güii quis̄ij Jesucristó toco' Jesucristó x'naa man ma'an so' che'é se aráj gūee so' rihaan Dios̄e, ḡaa ne quina'aan ndo'o rque Jesucristó a. <sup>3</sup> Dan me se cuchi' síí ch̄ree rihaan Jesucristó, ḡaa ne guun rá so' tih̄a' yu'un̄j so' man Jesucristó, che'é se guun rá so' canoco' Jesucristó man so' ad̄onj. Che'é dan cataj so' rihaan Jesucristó, ne:

—Sese ya ya ta'nij Dios̄e mé so', ne cataj so' rihaan yahij nihánj se vaa guun yo' rachrúún ch̄a so' á —taj síí ch̄ree rihaan Jesucristó a.

<sup>4</sup> Ḡaa ne cataj Jesucristó rihaan síí ch̄ree a:

—Tzaj ne danj Dios̄e taj: “Nuveé in̄anj se chá me se achiin rihaan yuvij, ne ca'vee cayáán sa' yuvij ma'. Tan̄anj achiin cunud̄anj se-n̄an̄a Dios̄e cun̄o yuvij, ne ve'é cayáán yuvij ei”. In̄anj danj taj danj Dios̄e —taj Jesucristó rihaan síí ch̄ree yo' a.

<sup>5</sup> Ḡaa ne ca'an̄j nicaj síí ch̄ree man Jesucristó chuman' gūee chuman' Jerusalén, ne tacavii so' man Jesucristó rāa nuvíí noc̄o, <sup>6</sup> ne cataj so' rihaan so':

—Sese ya ta'nij Dios̄e mé so', ne güej so', ne nanij gūee so' rihaan yo'óó á. 'O se danj Dios̄e taj: “Yo' o a'ne' Dios̄e suun rihaan nij se-mozó so' se vaa c̄utumé nij so' mán so', ne caráán ra'a nij so' mán so', se gaa nan̄j cac̄o' che'é so' yahij a”. In̄anj danj a'mii danj Dios̄e —taj síí ch̄ree rihaan Jesucristó ad̄onj.

<sup>7</sup> Ḡaa ne cataj Jesucristó rihaan so' a:

—Tzaj ne ne nó xcúnj qui'yaj danj ma'. 'O se taj uún danj Dios̄e: “Se guun qui'ri'yun̄j so' man Dios̄e síí 'nij ra'a man ní' ne tih̄a' so' man so' ma’”. In̄anj danj a'mii danj Dios̄e rihaan ní' ad̄onj —taj Jesucristó rihaan síí ch̄ree a.

<sup>8</sup> Ḡaa ne nicaj síí ch̄ree man Jesucristó ca'an̄j so' rāa 'o qui' xcāan ndo'o uún a. Ne tih̄aan so' man nu' chuman' man rihaan cun̄u' chumij rihaan Jesucristó, ne ti-

haan so' rihaan Jesucristó se vaa ve'é ndo'o vaa nu' chuman' yo' ad̄onj. <sup>9</sup> Dan me se cataj uún síí ch̄ree rihaan Jesucristó a:

—Guun chij so' rihaan cunud̄anj chuman' naj rihaan chumij, qui'yáá 'un̄j, sese canicun' ruj so' quina'vij so' rihaan 'un̄j á —taj síí ch̄ree yo' rihaan Jesucristó a.

<sup>10</sup> Ḡaa ne cataj xna'an̄j Jesucristó rihaan síí ch̄ree a:

—Nax̄un̄ yanij so' mán so', Satanás. 'O se danj Dios̄e taj: “Rihaan orún' Dios̄e síí 'nij ra'a man ní' canicun' ruj so', ne a 'ó rihaan tuví' so' se ca'vee na'vij so' ma’”. D̄anj taj danj Dios̄e ad̄onj —taj Jesucristó rihaan síí ch̄ree yo' a.

<sup>11</sup> Ḡaa ne tan̄aj síí ch̄ree man so', ca'an̄j síí ch̄ree yo', ḡaa ne cuchi' nij se-mozó Dios̄e rihaan Jesucristó, rque nij so' me ma'an̄ se cachiin rihaan Jesucristó a.

#### Nan̄a nihánj taj xna'an̄j se vaa ca'an̄j Jesucristó estadó cu'n̄aj Galilea a

<sup>12</sup> Cuchi' nan̄a rihaan Jesucristó se vaa quita'aa nij tanuu man síí cu'n̄aj Juan, caxr̄ij tanuu taga' man so', ne che'é dan ca'an̄j Jesucristó estadó Galilea, <sup>13</sup> tzaj ne ne cayáán so' chuman' Nazaret ma'. Cavii so' chuman' Nazaret yo', ne ca'an̄j so' cayáán so' chuman' Capernaum chuman' naj tu'va na lacuaná a. Chuman' yo' naj rihaan to'óó nij ta'níí ta'nij si'n̄o síí cu'n̄aj Zabulón d̄o', síí cu'n̄aj Neftalí d̄o', síí man ḡaa naá yo' a.

<sup>14</sup> Dan me se danj qui'yaj Jesucristó ca'an̄j so' rej yo', ḡaa ne guun ya nu' ndaa vaa cataj síí cu'n̄aj Isaías síí nata' se-n̄an̄a Dios̄e ḡaa naá se vaa cataj so': <sup>15</sup> “To'óó nij ta'níí ta'nij si'n̄o Zabulón d̄o', to'óó nij ta'níí ta'nij si'n̄o Neftalí d̄o', me yo'óó naj tu'va na lacuaná rej rnej tu'va chráá cu'n̄aj Jordán, ne estadó Galilea estadó yan̄j nij síí yanij me uún yo' a. <sup>16</sup> Ne nij síí man rej yo' ro', guun que'ee yo' ne quene'en uxrá nij so' ras̄un̄ che'é Dios̄e ma'. Māan se ase vaa yuvij ne rej rm̄i' ro', danj vaa nij so' ne nij so' nan̄j ad̄onj. 'O se vaa güii, ne cav̄i' un̄ nij so', ne danj uun ma'an̄, rá nij so' ad̄onj. Tzaj ne ca'na' 'o ya'an, ne cuchugun̄ rej yan̄j nij so', qui'yaj ya'an yo', ne ve'é ndo'o xc̄aj nij so' cuentá ad̄onj”. Yo' me se vaa cataj síí cu'n̄aj Isaías ḡaa naá a.

<sup>17</sup> Ḡaa ne guun che'e Jesucristó ca'mii nat̄aj so' rihaan yuvij, ne cataj so':

—Nuchran' nimán soj ei. 'O se nichrun' quis̄ij güii ca'na' Dios̄e guun chij Dios̄e rihaan chumij nihánj nan̄j ad̄onj. —In̄anj danj ca'mii nat̄aj Jesucristó rihaan nij yuvij a.

#### Nan̄a nihánj taj xna'an̄j se vaa cataj xna'an̄j Jesucristó rihaan ca'an̄j síí rii xcuaj se vaa canoco' nij so' man Jesucristó a

<sup>18</sup> 'O güii cachén Jesucristó tu'va na lacuaná cu'n̄aj na Galilea, ne quene'en so' man roj tinuj roj so' a. Yo' o so' me síí cu'n̄aj Simón, ne Pedró cu'n̄aj yo'ó se-chuvij síí cu'n̄aj Simón yo' a. Ne tinúú so' me síí cu'n̄aj Andrés a. Dan me se ḡaa quene'en Jesucristó man roj so', ne nicun' roj so' tu'va na lacuaná, ne tiguíj roj so' nan̄j

rque na, ne dan me se síi rii xcuj me roj so' a. <sup>19</sup> Ne cataj Jesucristó rihaan roj so' a:

—Canoco' roj soj manj á. 'O se síi naqui'yaj chre' xcuj me roj soj, tzaj ne rej rihaan ní' me se guun roj soj síi naqui'yaj chre' yuvii, qui'yáj, ne canoco' nij yuvii manj a —taj Jesucristó rihaan roj tinuj roj so' a.

<sup>20</sup> Ne nu' canicaj roj so' tanáj roj so' xnánj roj so', ne canoco' roj so' man Jesucristó ca'anj roj so' nanj adonj.

<sup>21</sup> Veé dan, ne cachéé nij so' doj, ne quene'en Jesucristó man yavij roj tinuj roj so' a. Yo' o so' me síi cu'naj Jacobo, ne tinúú so' me síi cu'naj Juan, ne ta'níi síi cu'naj Zebedeo me roj tinuj roj so' a. Dan me se nuu roj so' rque rihoo chéé rihaan na ga rej roj so' síi cu'naj Zebedeo, ne naqui'yaj sa' nij so' nanj rii xcuj, ne canacúun Jesucristó man roj tinuj roj so' canoco' roj so' man Jesucristó a. <sup>22</sup> Veé dan, ne canicaj roj so' tanáj roj so' rihoo do', rej roj so' do', ne canoco' roj so' man Jesucristó ca'anj roj so' nanj adonj.

#### Nana nihánj taj xna'anj se vaa nahuun ndo'o yuvii, qui'yaj Jesucristó a

<sup>23</sup> Veé dan, ne cachéé Jesucristó nu' estadó Galilea, ne tucu'yón so' se-nana Diosé man nij yuvii nuu chre' rá ve' tucu'yón nij yuvii israelitá se-tucuanj Moisés, ne ca'mii natáj so' nana sa' rihaan nij yuvii che'é yan guun chij Diosé rihaan chumii nihánj me nana sa' ca'mii natáj so' a. Ne nahuun cunudanj nij yuvii ran' do', cunudanj nij yuvii ninaj do', qui'yaj so' a. <sup>24</sup> Ne cuchii' nana che'é so' nu' estadó Siria, gaa ne nicaj ndo'o nij yuvii tuvi' nij yuvii síi ran' ndo'o, ca'anj nij yuvii rej vaj Jesucristó a. Dan me se nij yuvii ran' ndo'o qui'yaj chi'li do', nij yuvii a'ngaj ndo'o cúu man do', nij yuvii nuu nana chree nimán do', nij yuvii snúu qui'yaj yavii do', nij yuvii na'vee cachee do', cuchii' rihaan Jesucristó, qui'yaj tuvi' nij yuvii, ne nahuun cunudanj nij so', qui'yaj Jesucristó nanj adonj. <sup>25</sup> Veé dan, ne canoco' que'ee ndo'o yuvii man so', ne dan me se yuvii man estadó Galilea do', yuvii man rej cu'naj Chi' Chuman' do', yuvii man chuman' Jerusalén do', yuvii man estadó Judea do', yuvii man ndaa rnej tu'va chraá cu'naj Jordán do', canoco' man so' nanj adonj.

#### Nana nihánj taj xna'anj se vaa cavii Jesucristó raq quij ga nij yuvii, ne nago' so' chrej man nij yuvii a

**5** Quene'en Jesucristó man ndo'o yuvii nu' anicaj x'núu so', ne che'é dan cavii so' ca'anj so' raq 'o quij, ne ndaa dan ca'anj cayáán so', gaa ne cuchii' nij síi tucu'yón se-nana so' rihaan so' a.

#### Nana nihánj taj xna'anj me yuvii cavii sa' doj a

<sup>2</sup> Gaa ne guun che'e Jesucristó tucu'yón Jesucristó rihaan nij so', cataj so':

<sup>3</sup> —Cavii sa' taran' nij síi vaa nicaj' nimán adonj. 'O se nij so' me síi cayáán ga Diosé güii guun chij Diosé rihaan chumii nihánj adonj.

<sup>4</sup> "Cavii sa' taran' nij síi nanó ndo'o rá adonj. 'O se guun niha' nimán ma'an nij so', qui'yaj Diosé vaa güii adonj.

<sup>5</sup> "Cavii sa' taran' nij síi ni'yanj a'mii adonj. 'O se guun to'óo ma'an nij so' man nu' chumii vaa güii adonj.

<sup>6</sup> "Cavii sa' taran' nij síi me ndo'o rá cunuu sa' nimán adonj. 'O se cunuu sa' ma'an nij so' vaa güii, qui'yaj Diosé adonj.

<sup>7</sup> "Cavii sa' taran' nij síi 'ee rá man tuvi' adonj. 'O se cunuu 'ee rá Diosé man ma'an nij so', ne taj sayuun quiran' nij so', qui'yaj Diosé a man adonj.

<sup>8</sup> "Cavii sa' taran' nij síi vaa sa' nimán adonj. 'O se quene'en ma'an nij so' man Diosé vaa güii adonj.

<sup>9</sup> "Cavii sa' taran' nij síi nacaj man síi me rá cunuu' adonj. 'O se ase vaa Diosé ro', danj gaa ma'an nij so' vaa güii adonj.

<sup>10</sup> "Cavii sa' taran' nij síi ran' sayuun 'yaj tuvi' che'é se ve'é 'yaj sa' nij so' adonj. 'O se cayáán ma'an nij so' ga Diosé güii guun chij Diosé rihaan chumii nihánj adonj.

<sup>11</sup> "Ne cavii sa' ndo'o soj sese ca'mii yuvii nana nij rihaan soj do', sese qui'yaj yuvii sayuun man soj do', sese ca'mii ne yuvii cataj yuvii se vaa tumé ndo'o soj cacun' do', che'é se me soj síi nocó' mán 'unj adonj. Ne quene'en soj se vaa ya cavii sa' soj adonj. <sup>12</sup> Gaa ne no xcúun soj guun niha' uxrá rá soj, che'é se uxrá naru'vee Diosé rihaan soj asa' nucui' soj rej xtá' adonj. 'O se ase vaa 'yaj nii sayuun man soj ro', ta'nga' danj qui'yaj nii sayuun man nij síi nata' se-nana Diosé rihaan yuvii gaa naá uún adonj.

#### Nana nihánj taj xna'anj se vaa ase vaa yaan do', ase vaa ya'an chuguun do', danj vaa ní' a

<sup>13</sup> "Ase vaa yaan ga chraa ro', danj vaa soj ga chumii nihánj ei. Dan me se sese ne 'ne' chá yaan yo', gaa ne taj se qui'yá' cunuu sa' yaan gaa a ma'. Taj se gún' man yaan yo' gaa ma'. Maan se quiri'ij nii man yaan yo' xe', ne cachee yun yuvii xraá yaan yo' nanj ei. Ne danj vaa uún soj ei. Sese taj se gún' man soj rihaan chumii nihánj, ne daj chihaa mij se cavii sa' soj a man adonj.

<sup>14</sup> "Ne ase vaa ya'an vaa soj chuguun soj rihaan chumii nihánj a. Ne'en soj se vaa sese naj 'o chuman' raq tacaan, ne quene'en cunudanj yuvii naj chuman' yo' raq tacaan ei. <sup>15</sup> Ne gaa rmi', ne a 'ó yuvii uta' ya'an raq aga' ya'an ne axríj yuve nij so' rque 'o chrúun ma'.

Sese rmi', ne achrón nii ya'an raq aga' ya'an ne uta' nii aga' yo' rej xtá', ne daj a nij yuvii atúj rá ve' ro', chuguun ni'yaj nij so' adonj. <sup>16</sup> Ne veé danj vaa guue soj, ne ase vaa aga' ya'an ro', vaa soj rihaan chumii nihánj, ne sese sa' qui'yaj soj, ne sa' doj xcuj yuvii cuentá, qui'yaj soj ei. Che'é dan se guun na'aj soj quene'en yuvii danj vaa 'yaj soj ma'. Tananj guun niha' rá soj quene'en yuvii se vaa ve'é 'yaj soj, ne che'é dan danj nanj ve'é ca'mii nij yuvii che'é Rej ní' Diosé, qui'yaj soj nanj adonj.



**Nana nihánj taj xna'anj se vaa no xcuún ndo'o ní' cunq ní' se-nana Jesucristó a**

<sup>17</sup> "Se guun rá soj se vaa ca'ná' 'unj tírí' 'unj se-tucuanj Moisés tucuáán cuchruj so' gaa naá ma'. Se guun rá soj se vaa ca'ná' 'unj tírí' 'unj nana ca'mii natáj nij síí nata' se-nana Diose gaa naá ma'. Nuveé che'e yo' ca'naj ma'. Tananj ca'naj che'é rej quinavij quisij nu' tucuáán yo', gaa ne narí' nu' soj daj me rá Diose qui'yaj soj adonj. <sup>18</sup> Ya uxrá cataj xna'anj 'unj rihaan soj se vaa gaa ataa navij chumii nihánj do', gaa ataa navij xta' nihánj do', ne qui'yaj Diose nu' se vaa me rá Diose qui'yaj Diose rihaan chumii nihánj, ne che'é dan se tanáj xco ní' a 'o nana rqué Diose rihaan ní' canoco' ní' ma'. <sup>19</sup> Dan me se me ma'an 'o síí tírí' 'o nana le'ej a'mij nihánj ne ino vaa nana tijaan so' man nij tuvi' so', ne asa' guun chij Diose, ne guun so' síí le'ej uxrá rihaan Diose nanj adonj. Tzaj ne sese me ma'an 'o síí 'yaj ya ndaa vaa taj 'unj nihánj ne tijaan ya so' man tuvi' so' ndaa vaa taj 'unj nihánj, ne síí nihánj ro', me síí guun síí chij rej guun chij Diose vaa güii adonj.

<sup>20</sup> "Q se cataj xna'anj 'unj rihaan soj, ne sese nij síí naqui'yaj cuu se-tucuanj Moisés rihaan yuvij ga nij síí fariseo me se 'yaj sa' nij so' rihaan yuvij, rá nij so', tzaj ne sese se qui'yaj sa' soj doj rihaan nij yuvij ndaa vaa 'yaj nij síí naqui'yaj cuu se-tucuanj Moisés ga nij síí fariseo, gaa ne daj chihaa mij se cayáán soj ga Diose asa' guun chij Diose rihaan chumii nihánj a man adonj.

**Nana nihánj taj xna'anj se vaa sese axríj yuvaa ní' man tuvi' ní', ne tumé ní' cacun' a**

<sup>21</sup> "Aj ne'en soj nana nihánj nana ca'na' rihaan nij síí man gaa naá ei: "Se ticavi' soj man yuvij ma'. Dan me se qui'yaj Diose sayuun man cunudanj yuvij ticavi' tuvi' adonj", me nana ca'na' rihaan nij so' a. <sup>22</sup> Tzaj ne 'unj nihánj me se cataj xna'anj 'unj, ne a me ma'an 'o síí ca'maan rá ni'yaj man tinúú, ne aj tumé so' cacun' rihaan Diose, ne veé danj qui'yaj Diose sayuun man so' uún adonj. Ne a me ma'an síí cataj rihaan tuvi': "Síí snúú rma'an mé so' ei", cataj so' rihaan tinúú so', ne aj tumé ndo'o so' cacun' rihaan Diose nanj adonj. Ne a me ma'an 'o síí cataj rihaan tuvi' se vaa mayán tuvi' so' me se vaa che'é ca'anj ma'an so' rihaan ya'an cacaa so' nanj adonj.

<sup>23</sup> "Che'é dan me sese ca'anj nicaj so' rasuun rihaan chraan altar, rque so' rasuun guex rihaan Diose, rá so', ne sese ninuj rá so' se vaa qui'yáá so' cacun' man tinúú so', <sup>24</sup> ne se guun go' so' rasuun yo' rihaan Diose ma'. Maan se cuchruj so' rasuun yo' rihaan yo'óó, ne ca'anj so' rej yanj tinúú so', gaa ne na'mii sa' so' ga so', gaa ne canicaj so' rej naj si'yáá so', gaa ne rque so' si'yáá so' rihaan Diose adonj.

<sup>25</sup> "Ne so' me se sese vaa síí taj se vaa nij qui'yáá so' rihaan so', ne gaa tihaj vaj so' chrej ga so', ne ve'é ca'mii so' ga so', cataj so' rihaan so' se vaa: "Ca'ne' rá so', ne se cutá' so' cacun' xraj ma'", cataj so', ne ve'é ca'mii so' ga so' á. Ne sese se qui'yáá so' danj ve'é

ca'mii so' ga so' gaa tihaj vaj soj chrej rihaan chumii nihánj, ne nicaj so' man so' ca'anj so' rihaan cuese, ne cuese yo' ro', tachuachén man so' ra'a síí tumé taga', ne so' me síí caxrii taga' man so', <sup>26</sup> ne yo' me se guun raan ndo'o so', ne ndaa navij naru'vee so' nu' cacun' qui'yáá so', gaa ne curihaan so' taga' nanj adonj.

**Nana nihánj taj xna'anj se vaa tumé ní' man ní' se qui'yaj ní' cacun' ga yo'ó chana a**

<sup>27</sup> "Aj ne'en soj nana nihánj a: "Orún' nica soj cotoj ga soj á", me nana ca'na' rihaan soj gaa naá a. <sup>28</sup> Ne cataj xna'anj 'unj rihaan soj se vaa naj guun síí ni'yaj ni'yaj man yo'ó chana, ne che'é rej guun ndo'o rá so' cotoj so' ga no' ro', ase vaa nimán síí otoj ga yo'ó chana ro', ta'nga' danj vaa nimán síí ni'yaj ndo'o man yo'ó chana yo' nanj adonj. Ne tumé ya so' cacun' adonj. <sup>29</sup> Danj nanj uún, ne sese 'o rlij rihaan so' rej nuva' so' me rá qui'yaj cacun', ne táá a se quirii so' man yo', ne taj se 'yaj ma'. Ca'vee a doj quirii' orún' yo' ne se cacaa nu' nee man so' ma'. <sup>30</sup> Danj nanj uún, ne sese 'o ra'á so' rej nuva' so' me rá qui'yaj cacun', ne táá a se ca'ne' so' man yo', ne taj se 'yaj ma'. Ca'vee a doj ca'anj ni'ya orún' yo' ne se ca'anj ni'ya cunudanj nee man ma'an so' ma'.

**Nana nihánj taj xna'anj che'é síí me rá quirii'ij nica a**

<sup>31</sup> "Ne gaa naá me se ca'na' nana nihánj a: "Sese me rá yo'ó so' quirii'ij so' nica so', ne naxcaj so' 'o yanj cataj xna'anj se vaa ya quirii'ij so' nica so' á". Danj vaa nana ca'na' rihaan nij yuvij ei. <sup>32</sup> Ne cataj xna'anj 'unj rihaan soj se vaa sese quirii'ij yo'ó so' man nica so', ne sese nuvi' cacun' tumé no' se vaa cotoj no' ga yo'ó chii, ne ma'an síí ri'ij man no' qui'yaj tumé no' cacun' gaa ei. Ne che'é se quirii'ij nica chana man no', che'é dan xcaj no' yo'ó snó'o, ne ase vaa chana otoj ga naj guun snó'o ro', danj gaa ma'an no', qui'yaj síí quirii'ij man no' adonj. Ne síí xcaj man chana quirii'ij nica me se ase vaa síí otoj ga nica yo'ó snó'o ro', vaa uún so' adonj.

**Nana nihánj taj xna'anj se vaa ca'mii ya ní' a**

<sup>33</sup> "Ne aj ne'en soj nana nihánj nana ca'na' rihaan nij síí man gaa naá adonj: "Sese cata' tu'vá so' rihaan síí 'nij ra'a man ní' se vaa qui'yáá so', ne se ca'ne' rá so' qui'yáá so' danj ma'. Maan se ya qui'yáá so' nu' se vaa cataj xna'anj so' rihaan so', gaa ne ca'vee nanj adonj". <sup>34</sup> Ne cuano nihánj ro', cataj xna'anj 'unj rihaan soj se vaa asa' ca'mii soj 'o nana guun ya ya rá soj, ne daj chihaa mij se cuta' soj raq xta' ma'. 'O se xta' ro', nicun' ma'an Diose ya ya nanj adonj. <sup>35</sup> Ne raq chumii se cuta' soj ma'. 'O se chumii nihánj me rej taj tacóó Diose nanj adonj. Ne raq chuman' Jerusalén se cuta' soj ma'. Ése chuman' yo' ne ma'an Diose síí nicaj yu'unj man ní' nanj adonj. <sup>36</sup> Ne raq ma'an soj se cuta' soj ma'. 'O se se guun nucuaj soj naqui'yaj catzii soj yo'ó yuvé raq soj, ne se guun nucuaj soj naqui'yaj maruuj soj yo'ó yuvé raq soj ma'. <sup>37</sup> Veé dan, ne sese ya a'mii soj, rá soj,

ne cataj soj: "Ya ei". Ne sese ne ya vaa 'o nana, rá soj, ne cataj soj: "Ne ya ma", cataj soj á. Inanjan danj ca'mii soj ei. Sese nana' soj yo'ó nana, ne chi'ii vaa nimán soj nanjan adonj.

#### Nana nihánj taj xna'anj daj qui'yaj ní' rihaan yuvii 'yaj chi'ii rihaan ní' a

<sup>38</sup> "Aj ne'en soj nana nihánj nana ca'na' gaa naá a: "Sese curihanj rlij rihaan so' qui'yaj tuví' so', ne ca'vee quirii so' rlij rihaan tuví' so' á. Ne sese curihanj cúu yán' so', qui'yaj tuví' so', ne ca'vee quirii so' cúu yan' tuví' so' á". Danj vaa nana ca'na' rihaan yuvii nanjan adonj. <sup>39</sup> Tzaj ne cuano nihánj ro', cataj xna'anj 'unj rihaan soj se vaa se qui'yaj soj sayuun man sí' 'yaj sayuun man soj ma'. Tananj sese vaa sí' coxro nichrej xruú so', gaa ne ca'ne' rá so' coxro so' nichrej xruú so' uún ei. <sup>40</sup> Ne sese me rá yo'ó so' cuta' so' cacun' xraá so' rihaan cuesé ca'neé so' cotoó nuu so', ne go' uun so' cotoó yo' do', ndaa se-rotó so' do', go' so' man so' ei. <sup>41</sup> Ne sese ca'ne' yo'ó so' suun rihaan so' ca'anj tanáj so' si'yaj so' yo'ó kilómetro, ne ca'vej so' ca'anj tanáj so' si'yaj so' ndaa vij kilómetro ei. <sup>42</sup> Sese achíin yo'ó so' rasuun mán so', ne go' so' se achiin man so' ei. Ne sese me rá yo'ó so' racuúj so' sa'anj man so', ne se cataj so' se vaa taj vaj sa'anj ma'. Racuúj so' man so' ei.

#### Nana nihánj taj xna'anj daj qui'yaj ní' gaa 'ee rá ní' man nij sí' taj ri'yunj man ní' a

<sup>43</sup> "Aj ne'en soj nana nihánj nana ca'na' gaa naá a: "Gaa 'ee rá so' man tuví' so', tzaj ne se guun gaa 'ee rá so' man nij sí' taj ri'yunj mán so' ma". Danj vaa nana ca'na' gaa naá nanjan adonj. <sup>44</sup> Tzaj ne cuano nihánj me cataj xna'anj 'unj rihaan soj se vaa no xcúun soj cunuun 'ee rá soj ni'yaj soj man nij sí' taj ri'yunj man soj, ne cachinj ni'yaj soj rihaan Diose che'é nij sí' 'yaj sayuun man soj á. <sup>45</sup> Gaa ne guun soj ta'ní' Rej soj Diose sí' nicun' xtá' ei. 'O se Diose 'yaj síj güii, ne o' naán rihaan to'óo nij sí' chi'ii do', rihaan to'óo nij sí' sa' do', 'yaj Diose, ne aman' rihaan to'óo nij sí' 'yaj sa' do', rihaan to'óo nij sí' 'yaj chi'ii do', 'yaj uún Diose adonj. <sup>46</sup> 'O se sese 'ee rá soj man inanj nij sí' 'ee rá man soj, gaa ne me che'é naru'vee Diose rihaan soj, rá soj ga. 'O se ne'en soj se vaa ndaa nij sí' tiha' yu'unj man soj che'é puextó ro', 'ee rá nij so' man tuví' ma'an nij so' adonj. <sup>47</sup> Che'é dan, sese ve'é a'mii soj ga inanj tinúú soj, ne sa' doj vaa soj rihaan yo'ó nij yuvii, rá soj na'. Taj ma'. Ne ndaa nij sí' ne ne'en daj vaa Diose ro', ne'en soj se vaa 'ee rá nij so' man tuví' ma'an nij so' nanjan á. <sup>48</sup> Che'é dan sese nuveé sij tiha' yu'unj do', sij yanij do', me soj, ne no xcúun soj guun soj sí' vaa sa' inanj nimán adonj. Ne ase vaa sí' sa' inanj me Diose ro', danj gaa ma'an soj, sí' sa' inanj guun soj adonj.

#### Nana nihánj taj xna'anj daj qui'yaj ní' gaa rque ní' sa'anj man nij sí' nique a

**6** "Ne cütumé soj man soj gaa 'yaj soj se sa' do', se luj do' á. Se guun rá soj quene'en yuvii man soj ne

cataj nij yuvii che'é soj se vaa sí' sa' inanj me soj ma'. Sese danj qui'yaj soj, ne daj chihaa mij se rque Rej soj sí' nicun' xtá' a doj rasuun sa' man soj a man adonj. <sup>2</sup> Che'é dan sese me rá so' rque so' sa'anj man nij sí' nique, ne se guun rá so' ca'yanj nii chruun a'yanj qui'yáa so', ne ni'yaj yuvii go' so' sa'anj man sí' nique, ne cataj nij yuvii se vaa ve'é qui'yáa so' ma'. 'O se inanj danj 'yaj nij sí' nucui' rá gaa vaj nij so' rá ve' tucu'yón ní' se-tucuaj Moisés do', rihaan nij callé do', ne uno cunudanjan yuvii, 'yaj nij so' adonj. Ya ya cataj xna'anj 'unj rihaan soj se vaa aj ve'é ca'mii yuvii che'é nij so', tzaj ne a 'ó rasuun se quirii' uún nij so' a ma'. A 'ó xco' se naru'vee Diose rihaan nij so' man adonj. <sup>3</sup> Tzaj ne so' ro', sese me rá so' rque so' sa'anj man nij sí' nique, ne se natá' so' rihaan yuvii daj 'yáa so' ma'. Dan me se daj chihaa mij se cataj xna'anj so' rihaan ra'á so' rej nichruun so' se vaa rque ra'á so' rej nuva' so' ma'. <sup>4</sup> Asa' quisij rque yuve so' sa'anj yo', gaa ne orún' Réé so' Diose me sí' quene'en daj qui'yaj yuve so', gaa ne so' me sí' naru'vee rihaan so' quene'en cunudanjan yuvii nanjan adonj.

#### Nana nihánj taj xna'anj daj qui'yaj ní' gaa achíin ni'yaj ní' rihaan Diose a

<sup>5</sup> "Ne gaa achíin ni'yaj soj rihaan Diose, ne se qui'yaj soj se vaa 'yaj nij sí' nucui' rá ma'. 'O se niha' rá nij so' canicun' nij so' rá ve' tucu'yón yuvii se-tucuaj Moisés, ne niha' rá nij so' canicun' nij so' rej nuná tuvi' chrej ca'aan nocoo, ne achíin ni'yaj nij so' rihaan Diose, tzaj ne inanj me rá nij so' quene'en yuvii man nij so', ne ve'é ca'mii yuvii che'é nij so', rá nij so' adonj. Ya ya cataj xna'anj 'unj rihaan soj se vaa aj ve'é ca'mii yuvii che'é nij so', ne aj navij quirii' nij so' tu'vee nij so' vaa, ne a 'ó xco' se naru'vee uún Diose rihaan nij so' a ma'. <sup>6</sup> Tzaj ne so' ro', gaa me rá so' cachinj ni'yáa so' rihaan Diose, ne asino catuú so' rá ve', gaa ne caráán so' ta'yaa, gaa ne cachinj ni'yaj yuve so' rihaan Rej ní' Diose á. Ne Rej ní' Diose me sí' ne'en se vaa achíin ni'yaj niganj so' rihaan so', ne naru'vee so' rihaan so' adonj. <sup>7</sup> Ne gaa achíin ni'yaj soj rihaan Diose, ne se qui'yaj soj se vaa 'yaj nij sí' ne ne'en daj vaa Diose ma'. Dan me se a'mii rma'an ndo'o nij so' nana, tzaj ne ne ne'en nij so' me taj nana yo' ma'. Maan che'é se a'mii a'mii nij so', che'é dan guun niha' rá Diose ne cunoo Diose nu' nana a'mii nij so', rá nij so' nanjan adonj. <sup>8</sup> Che'é dan se qui'yaj soj danj ma'. 'O se asij ataa cachinj ni'yaj soj rihaan Rej soj Diose, ne aj ne'en so' nu' se vaa achiin man soj nanjan adonj. <sup>9</sup> "Che'é dan asa' achíin ni'yaj soj, ne nihánj cataj soj á: "Ataj Chij sí' nicun' xtá', me rá núj xcaj yuvii cuentá se vaa inanj sa' 'yáa so' a. <sup>10</sup> Ne me rá núj quisij güii guun chij so' rihaan chumii nihánj, ne me rá núj qui'yaj yuvii nu' se vaa me rá so' qui'yaj yuvii a. Dan me se ase vaa 'yaj nij sí' man xtá' nu' se vaa me rá so' qui'yaj nij so' ro', danj gaa qui'yaj núj sij man rihaan chumii nihánj nu' se vaa me rá so' qui'yaj núj, rá núj a. <sup>11</sup> Ne rque so' nu' rasuun achiin rihaan núj cha núj cuan' á. <sup>12</sup> Ne caraa x'naa so' che'é xcúun taj xraá núj rihaan

so' á. Dan me se ase vaa qui'yaj núj caráj x'naa núj che'é cacun' qui'yaj tuvi' núj rihaan núj ro', ta'nga' dānj qui'yáá so' che'é ma'ān núj carāā x'naa so' rihaan núj á. <sup>13</sup> Dan me se caráán ra'á so' xráá núj rihaan chrej chi'ii á. Ne tinanii so' man núj se guun qui'yaj núj cacun' a". Inānj dānj ca'mii soj cachinj ni'yaj soj rihaan Diose adōnj. <sup>14</sup> 'O se sese carāā x'naa soj che'é cacun' qui'yaj tuvi' soj rihaan soj, ne dānj qui'yaj uún Rej soj sí nicun' xtā', ne carāā x'naa so' rihaan soj uún adōnj. <sup>15</sup> Tzaj ne sese se ca'vej rá soj carāā x'naa soj che'é cacun' qui'yaj tuvi' soj rihaan soj, ne daj chihāā mīj se tinavij Rej soj Diose cacun' tumé ma'ān soj ā man adōnj.

**Nana nihánj taj xna'anj daj qui'yaj ní' gaa carāā guee ní' rihaan Diose a**

<sup>16</sup> "Ne gaa toco' soj x'naa man soj che'é se aráj guee soj rihaan Diose, ne se qui'yaj soj ndāa vaa 'yaj nij sí nucui' rá ma'. Dan me se gaa aráj guee nij so', ne ase vaa rihaan sí nanó ndo'o rá ro', vaa rihaan nij so', 'yaj nij so', ne anó ndo'o nacaj rihaan nij so', 'yaj uún nij so', ne me inānj rá nij so' quene'en yuvii man nij so' daj 'yaj nij so' gaa ne xcaj nij yuvii cuentá se vaa aráj guee nij so' rihaan Diose, rá nij so' nanj adōnj. Ya ya catāj xna'anj 'unj rihaan soj cuano se vaa āj quiri' nij so' tu'vee nij so' vaa, ése āj ve'é ca'mii yuvii che'é nij so' nanj adōnj. Ne ā 'ó rasuun se quiri' nij so' rihaan Diose ā ma'. <sup>17</sup> Tzaj ne soj ro', ino qui'yaj soj á. Gaa toco' soj x'naa man ma'ān soj che'é se aráj guee soj rihaan Diose, ne canāān soj rihaan soj ne caxrii soj casté raā soj á. <sup>18</sup> Dan me se se guun rá soj quene'en yuvii se vaa aráj guee soj ā ma'. Ne ca'vee se taj vaj yuvii quene'en man soj aráj guee soj, tzaj ne quene'en Rej soj Diose daj 'yaj soj, ne so' me sí naru'vee rihaan soj nanj adōnj.

**Nana nihánj taj xna'anj se vaa qui'yaj suun ní' che'é yan cumān si'yaj ní' rej xtā' a**

<sup>19</sup> "Se qui'yaj suun soj cumān ndo'o si'yaj soj rihaan chumii nihánj ma'. 'O se rihaan chumii nihánj mán ndo'o xcuu xlúú xij rasuun do', tacunj yoo do', chá si'yaj yuvii nihánj a. Ne vaa sí ituu atúj rá ve' ne 'yaj ituu si'yaj tuvi' uún a. <sup>20</sup> 'O se taj che'é naqui'yaj ru'vee soj man soj nihánj ma'. Tanānj qui'yaj suun ndo'o soj che'é yan cumān si'yaj soj rej xtā' á. Dan me se xtā' ro', taj se chá si'yaj soj ma'. Ne taj sí qui'yaj ituu si'yaj soj man adōnj. <sup>21</sup> Ne sese inānj che'é rasuun mān rihaan chumii nihánj qui'yaj suun soj, gaa ne veé mān rihaan chumii nihánj quināj nimán soj gaa nanj adōnj. Ne sese inānj che'é rasuun mān xtā' ro', qui'yaj suun soj, gaa ne veé rej xtā' ro', ca'anj nimán soj nanj adōnj. Me rej ma'ān araa sa' soj rasuun, ne veé rej dānj vaj nimán soj nanj adōnj.

**Nana nihánj taj xna'anj se vaa no xcuún ní' xcaj ní' cuentá daj qui'yaj ní' a**

<sup>22</sup> "Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne nuu sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', dānj chuguun man ní' gaa sa' rihaan ní' adōnj. <sup>23</sup> Tzaj ne sese rlij rihaan ní' ro', ni'yaj yo' ne inānj uun chi'ii rá yo', gaa ne nu' nee man ní' ro', uun chi'ii rá, gaa ne adi' sí nicun' yan rmi' ne cunudānj man so' ro', rmi', ne dānj vaa sí uun chi'ii rá, ne rmi' uxrá nu' man so' adōnj.

**Nana nihánj taj xna'anj se vaa se guun nucuaj ní' ca'nej nucuaj ní' nimán ní' qui'yaj suun ní' se-suun Diose, sese me rá ní' qui'yaj suun ní' che'é sa'anj a**

<sup>24</sup> "Taj vaj sí guun nucuaj qui'yaj suun sa' rihaan vij ru'vee ma'. Sese qui'yaj suun 'o so' rihaan vij ru'vee, ne nachri' so' ni'yaj so' man 'o ru'vee yo', ne carān' rá so' ni'yaj so' man yo'ó ru'vee yo' a. Se guun nucuaj so' carān' rá so' ni'yaj so' man vij ru'vee ma'. Ne xā' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun mān rihaan chumii nihánj ā ma'.

**Nana nihánj taj xna'anj se vaa ne nó xcuún ní' nano ndo'o rá ní' che'é se chá ní' do', che'é yatzij cunuú ní' do' a**

<sup>25</sup> "Che'é dan catāj xna'anj 'unj rihaan soj se vaa taj che'é nano ndo'o rá soj che'é soj ma'. Ne che'é dan se nanó rá soj che'é se chá soj do', che'é yan quiri' soj se caráán xráá soj do', se nanó rá soj ma'. Dan me se āj ne'en soj vaa i'na' soj, qui'yaj Diose, ne se guun nucuaj Diose rque Diose se chá soj, rá soj gaa ā na'. Daj chihāā mīj se guun dānj rá soj ma'. Ne Diose me sí ca'vee rque se chá soj ei. Ne Diose me sí qui'yaj nee man soj, ne se guun nucuaj Diose rque Diose yatzij caráán xráá soj, rá soj gaa ā na'. Daj chihāā mīj se guun dānj rá soj ma'. Ne Diose me sí ca'vee rque se caráán xráá soj ei.

<sup>26</sup> "Xcaj soj cuentá daj 'yaj nij xtāj vaj xtā', ne ne unō nij xo' 'núú, ne ne rii nij xo' naā, ne ne araa nij xo' tan' rá cuchruu, tzaj ne Rej soj sí nicun' xtā' ro', a'vee rque se chá nij xo' ei. Ne táá ā soj, ne sa' doj vaa soj rihaan xtāj ne'en Diose ā adōnj. Ya sa' doj vaa soj chuguānj. <sup>27</sup> Ne ndā' se nanó ndo'o rá soj che'é yan chre' vaa soj, tzaj ne ā 'ó xco' se guun nucuaj soj cachij xcaān soj doj qui'yaj ma'ān soj ma'. Māān Diose ro', me sí ne'en daj gaa cachij soj, ne che'é dan taj che'é nano rá soj ā ma'.

<sup>28</sup> "Ne me che'é nanó rá soj che'é yatzij caráán xráá soj gā. 'O se xcaj soj cuentá ni'yaj soj nij yāj mān tacaan se vaa ve'é ndo'o vaa nij yāj mān tacaan ei. Ne 'yaj suun nij yāj, tzaj ne ma'ān Diose ro', me sí sa' ndo'o vaa qui'yaj man nij yāj adōnj. Ne ne rii nij yāj yu'vej ma'. <sup>29</sup> Tzaj ne adi' se vaa sí ru'vee ne sa' uxrá vaa saān' so' ro', vaa nij yatzij nuu nij yāj adōnj. Dan me se catāj xna'anj 'unj rihaan soj se vaa sí cu'naj Salomón sí cane gaa naá, ne ve'é uxrá vaa yatzij nuu so',

qui'yaj cunudanj sa'anj vaa rihaan so', tzaj ne nij doj vaa yatzij nuu so' rihaan nij yaj man tacaan yo', qui'yaj Diose adonj. <sup>30</sup> Dan me se danj nanj nij yaj man tacaan yo', tzaj ne sa' uxrá vaa nij yatzij nuu nij yaj yo', 'yaj Diose, ne cuan' ro', man nij yaj tacaan, tzaj ne a'yuj ne ca'ne' nii man nu' coj do', yaj do', man tacaan, ne caraa nii man yo' rihaan ya'an, ne cacaa nu' nij yaj yo' nanj adonj. Ne a' doj yu'vee taj nó yaj yo' a' ma'. Táa a' soj yuvii, ne se nanó rá soj ma'. Diose me sí rque sagán' soj adonj. Tzaj ne ne guun ya sa' rá soj se vaa Diose me sí raculij ya man soj man adonj.

<sup>31</sup> "Dan me se se nanó ndo'o rá soj cataj soj: "Me se chá ní' ga. Me se co'q ní' ga. Me se caráán xráá ní' ga". Se guun rá soj danj ma'. <sup>32</sup> 'Q se nij sí ne ne'en daj vaa Diose ro', inanj 'yaj suun ndo'o nij so' che'é rasuun man rihaan chumii nihánj adonj. Tzaj ne nu' rasuun achiin man soj ro', aj ne'en Rej soj sí nicun' xtá' se vaa achiin nu' rasuun yo' man soj adonj. <sup>33</sup> Che'é dan nanó soj rej daj qui'yaj soj ne guun chij Diose nimán soj ne cunuu sa' nimán soj, gaa ne rque Diose nu' rasuun yo' man soj ei. <sup>34</sup> Che'é dan se nanó rá soj che'é se vaa cachijn rihaan soj a'yuj ma'. 'Q se vaa sayuun 'na' daj a' 'q 'q güii adonj. Che'é dan xcaj soj cuentá daj qui'yaj soj güii cuan', ne se nanó rá soj che'é se vaa qui'yaj soj güii a'yuj ma'.

**Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a**

**7** "Se guun niha' rá soj cutá' soj cacun' xráá tinúú soj, gaa ne taj cacun' cutá' Diose xráá ma'an soj man adonj. <sup>2</sup> Dan me se sese guun niha' rá soj cutá' soj cacun' xráá tinúú soj, ne cutá' Diose cacun' yo' xráá ma'an soj ei. Ne sese se cuta' soj cacun' xráá tinúú soj, ne cunuu 'ee rá Diose man ma'an soj uún nanj adonj. <sup>3</sup> Me che'é guun chree rá so' ni'yaj so' ni'ya nuu rihaan tinúú so' ga. Ne ne ni'yaj so' chruun manj nuu rihaan ma'an so' a. <sup>4</sup> Asa' ca'vee cataj so' rihaan tinúú so', "rque so' rihaan so' quirij 'unj ni'ya á". Se guun a' doj cataj so' danj tihá' so' man tinúú so' ma'. 'Q se ni'yaj so', ne chruun manj vaa guue nuu rihaan so' ei. <sup>5</sup> Sí nucuí' rá mé so' ei. Asino quirij so' chruun manj nuu rihaan so', gaa ne ca'vee quirij so' ni'ya nuu rihaan tinúú so' adonj. Dan me se ase vaa aráán ni'ya rihaan yuvij ro', danj vaa aráán rihaan yuvij 'yaj cacun' atá yuvij adonj.

<sup>6</sup> "Tzaj ne ne'en soj se vaa ne nó xcúún soj go' soj rasuun guue man chuvee ma'. Ne se caraa soj chruj perlá tu'vee ndo'o rihaan xcáá ma'. 'Q se chuvee yo' ro', canicaj ne chá man soj, ne xcáá yo' ro', tuguáj che'é xcáá man se sa' yo', ne quinavij nu' yo' xtun', qui'yaj xcáá nanj adonj. Ne se sa' yo' me chrej noco' ní' adonj. Che'é dan sese na'vej uxrá rá yuvij cunó yuvij chrej nago' soj rihaan nij yuvij, ne ase vaa xcáá do', ase vaa chuvee do', danj vaa nij yuvij ei. Ne se nago' soj doj chrej sa' man nij yuvij 'yaj danj a' ma'.

**Nana nihánj taj xna'anj se vaa no' xcúún ní' cachinj ni'yaj ní' rihaan Diose che'é rasuun achiin man ní' ei**

<sup>7</sup> "Cachinj soj se vaa achiin man soj rihaan Diose, ne so' me sí rque man soj, ne nanó' soj rasuun achiin man soj, ne nari' soj rasuun yo', ne ase vaa 'yaj sí tica'mii ta'yaa tucúá tuvi' ro', danj qui'yaj soj ga Diose, ne ca'nuu Diose ta'yaa yo', ne rque Diose rasuun achiin man soj adonj. <sup>8</sup> 'Q se sí achín rasuun rihaan Diose ro', quirij so' rasuun achiin man so', ne sí nano' rasuun achiin man ro', quirij so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quirij sí tica'mii ta'yaa rasuun achiin man so' adonj. <sup>9</sup> Xcaj soj cuentá se vaa ma'an soj, nanj yuvij me soj, tzaj ne sese achín ta'ní yo' soj chraa chá yo' man soj, ne se ca'vee nanó' soj yahij ne caxrij soj ston yo' ma'. <sup>10</sup> Ne sese achín ta'ní soj nee xcuaj chá yo' man soj, ne se ca'vee nanó' soj xcuáá ne caxrij soj ston so' ma'. <sup>11</sup> Dan me se danj nanj soj, ne sí chí'ii nimán me soj, tzaj ne ne'en soj rque soj se sa' chá ta'ní soj ei. Che'é dan táa a' Rej soj sí nicun' xtá', ne sij sa' inanj me so', ne so' me sí rque ya rasuun sa' man nij sí achín rasuun man so' nanj adonj.

**Nana nihánj taj xna'anj daj qui'yaj ní' rihaan tuvi' ní' a**

<sup>12</sup> "Dan me se daj se uun rá soj qui'yaj sa' yuvij rihaan soj ro', ta'nga' danj qui'yaj sa' soj rihaan tuvi' soj á. Sese danj qui'yaj soj rihaan tuvi' soj, ne sí uno nu' se-tucuanj Moisés me soj, ne sí uno nu' se-nana' nij sí nata' se-nana' Diose gaa naá me uún soj adonj.

**Nana nihánj taj xna'anj che'é vij chrej a**

<sup>13</sup> "Ase vaa vij chrej vaa rej vaa rihaan soj, ne dan me se chrej ca'aan me yo'q chrej yo', ne caxra' ndo'o vaa rej nayón yuvij, ne rihaan ya'an ro', vaj chrej yo' nanj adonj. Ne man uxrá yuvij vaj chrej yo' ei. Se ca'anj soj chrej yo' ma'. Nanj vaa chrej ca'anj soj ei. Chrej catuun me chrej ca'anj soj, <sup>14</sup> ne chruj vaa rej nayón yuvij a. Sayuun ndo'o vaa vaj yuvij chrej yo', tzaj ne vaj chrej yo' rej gaa i'na' yuvij cayáán yuvij ga Diose nu' cavii nu' ca'anj adonj. Tzaj ne doj nij yuvij nari' chrej catuun nanj ei.

**Nana nihánj taj xna'anj daj gaa qui'yaj ní' quene'en ní' daj vaa nimán yuvij a**

<sup>15</sup> "Vaa yuvij taj se vaa me nij so' sí nata' se-nana' Diose, tzaj ne ne ya' a'mii nij so' ma'. Cütumé soj man soj, se gaa nanj qui'yaj nij so' sayuun man soj á. Dan me se vaa güii cuchij' nij so' rihaan soj, ne ase vaa matzinj ro', danj gaa nij so' cuchij' nij so' rihaan soj, ne ni'yanj ndo'o ca'mii nij so' rihaan soj, tzaj ne nimán nij so' ro', ase vaa nimán xca'yanj ca'nu' ro', gaa nimán nij so', guun rá nij so' qui'yaj nij so' sayuun man soj nanj adonj. <sup>16</sup> Che'é dan xcaj soj cuentá ni'yaj soj man nij so' daj qui'yaj nij so', gaa ne quene'en nij soj daj vaa nimán nij so' ei. Uta nii chruj chá raá chruun tanj, rá soj na'. Taj ma'. Ne uta nii chruj chá raá coj yaj ya'aa, rá

soj na'. Taj ma'. <sup>17</sup> Dan me se chruun sa' ro', mán chruj chá raá a. Ne chruun tanj ro', man chruj xnaj raá uún a. Sese cuchruu chruun, ne se cumán chruj sa' raá chruun yo' a ma'. <sup>18</sup> Chruun sa' ro', se guun cumán chruj nij raá ma'. Ne chruun nij ro', se guun cumán chruj sa' raá ma'. Ase vaa chruun yo' ro', danj vaa nimán yuvii, ne ase vaa chruj yo' ro', danj vaa rasuun 'yaj yuvii adonj. <sup>19</sup> Ne sese nuvi' chruj sa' raá 'o chruun, ne a'ne' nii man chruun yo', ne axrj ya'an nii man chruun yo' nanj adonj. Ne ase vaa ran' chruun yo' ro', ta'nga' danj quirán' uún nij yuvii 'yaj se chi'ii nanj adonj. <sup>20</sup> Dan me se sese xcaj soj cuentá ni'yaj soj man yuvii, gaa ne quene'en soj daj vaa nimán nij yuvii, gaa ne quene'en soj daj yuvii me nij so' adonj.

**Nana nihánj taj xna'anj me síi cayáán ga Diose asa' gu-un hij Diose rihaan chumii nihánj a**

<sup>21</sup> "Ne'en soj se vaa man ndo'o yuvii taj rihanj se vaa uno nij so' rihanj, tzaj ne tu'va rma'an ta'aj nij so' nanj á. Nuveé cunudanj nij síi taj ne'en manj ca'anj cayáán ga Diose asa' guun hij Diose rihaan chumii nihánj ma'. Tananj orún' me se inanj nij síi uno rihaan Réé 'unj síi nicun' xta' me síi cayáán ga so' nanj adonj. <sup>22</sup> Ne güii ca'ne' 'unj cacun' che'é yuvii me se cumán ndo'o yuvii cataj rihaan 'unj: "Síi uno rihaan so' me núj, Señor. Aj nata' núj nana rqué so' man núj rihaan yuvii á. Ne cata' tu'va núj se-chuvií so', ne quirii núj nana chree nimán yuvii á. Ne qui'yaj suun ndo'o núj suun sa' che'é so' adonj". Danj ca'mii nij yuvii yo' rihaan 'unj vaa güii nanj adonj. <sup>23</sup> Gaa ne cataj yá 'unj rihaan nij yuvii a: "A 'ó güii ne ne'éen 'unj man soj ma'. Maan síi 'yaj inanj cacun' me soj nanj adonj. Naxuun soj man soj rihanj á". Danj cataj 'unj rihaan nij síi 'yaj cacun' vaa güii nanj adonj.

**Nana nihánj taj xna'anj daj quirán' nij síi uno rihaan Jesucristó do', nij síi ne uno rihaan Jesucristó do' a**

<sup>24</sup> "Dan me se a me ma'an síi uno sa' nana nihánj nana cataj xna'anj 'unj rihaan soj ne 'yaj so' ndaa vaa taj 'unj, ne ase vaa 'o síi cune' ve' tucua' rihaan yuvej vaa so' ei. Síi cune' ve' yo' me se síi acaj ndo'o cuentá me so', ne cune' so' ve' yo' rihaan 'o yuvej adonj. <sup>25</sup> Gaa ne ca'na' maan, ne go' ndo'o maan raá ve', ne cavii ni'yoj chráá, ne ca'na' go' tacóo ve', ne ca'na' uxrá nana yuvaá, ne go' rihaan ve' yo' a. Tzaj ne ne canee ve' yo' a ma'. 'O se raan inanj ne ve' yo' rihaan yuvej nanj adonj. <sup>26</sup> Tzaj ne síi na'vej rá cunō nana nihánj nana cataj xna'anj 'unj rihaan soj me se ase vaa síi cune' ve' rihaan yo'óo vaa so' adonj. Ne síi ni'yon rmii me so', ne cune' so' ve' rihaan yo'óo chruu, <sup>27</sup> ne veé dan, gaa ca'na' uxrá maan yuvaá go' yo' xráá ve', ne cavii ni'yoj chráá, ne ca'na' na xee go' na xee tacóo ve', ne ca'na' uxrá nana yuvaá ne go' xráá ve' yo' a. Veé dan, ne canee nu' ve' tucua' síi ni'yon yo' nanj adonj. Che'é dan xcaj soj cuentá, ne ve'é cunō soj nana nihánj, ne se quirán' soj sayuun ma'. —Inanj

nana nihánj ca'mii Jesucristó rihaan nij síi tucu'yón se-nana so' a.

<sup>28</sup> Veé dan, ne quisj tucu'yón Jesucristó nu' nana nihánj rihaan nij yuvii, gaa ne caráya'anj ndo'o nij yuvii nocō' man so' che'é nana nihánj, nana cataj xna'anj Jesucristó rihaan nij so' a. <sup>29</sup> 'O se xcaj nij yuvii cuentá se vaa ase vaa a'mii 'o síi nicaj suun avii tu'va ro', vaa a'mii Jesucristó, rá nij so' a. Ne cuu doj vaa se-nana so' ga se-nana nij síi naqui'yaj cuu se-tucuaj Moisés, rá nij so' a.

**Nana nihánj taj xna'anj daj vaa nahuun sa' 'o síi ran' luj ri'yuj, qui'yaj Jesucristó a**

**8** Gaa ne nanij Jesucristó quij yo', ne cachéé ndo'o yuvii ga so' a.

<sup>2</sup> Dan me se cuchi' yo' o síi ran' luj ri'yuj rihaan Jesucristó, ne canicun' ruj so' rihaan Jesucristó, ne cataj so':

—Sese me rá so', ne ca'vee ca'nee so' chi'ii xráj, Señor —taj so' rihaan Jesucristó a.

<sup>3</sup> Gaa ne cuta' Jesucristó ra'a Jesucristó raá síi ran', ne cataj Jesucristó:

—Me raj qui'yáj danj ei. Nahuún so', qui'yáj adonj —taj Jesucristó rihaan so' a.

Nu' danj cataj Jesucristó, ne nu' quinavij luj xráá síi ran' a. <sup>4</sup> Gaa ne cataj Jesucristó rihaan so' a:

—Cutumé so' mán so' se cataj xna'anj so' rihaan yuvii che'é se qui'yáá 'unj che'é so' ma'. Maan se cuchi' so' rihaan xrej, ne tijaán so' mán so' rihaan xrej se vaa nahuún so', ne rque so' rihaan Diose se vaa cataj síi cu'naj Moisés gaa naá ndaa vaa nō xcúun so' rque so' rihaan Diose á. Gaa ne xcaj nij xrej cuentá se vaa nahuún so' qui'yáj adonj —taj Jesucristó rihaan síi nahuun yo' a.

**Nana nihánj taj xna'anj se vaa nahuun se-mozó yo' o tanuu capitán, qui'yaj Jesucristó a**

<sup>5</sup> Dan me se cuchi' Jesucristó chuman' Capernaum, ne catúj so' chuman' yo', ne cuchi' yo' o tanuu capitán rihaan so' a. Ne so' ro', me síi rii ta'nga' rihaan 'o cientó tanuu adonj. Dan me se cachíin ni'yaj so' rihaan Jesucristó, <sup>6</sup> cataj so':

—Canó chi'ii man se-mozó 'unj, Señor. Ne ne nasqui' so' ma'. 'O se yo' o naj so' rá ve', ne ran' uxrá so' sayuun, 'yaj chi'ii nanj á —taj tanuu capitán yo' rihaan Jesucristó a.

<sup>7</sup> Ne cataj Jesucristó rihaan so':

—Ca'anj ní, gaa ne nahuun so', qui'yáj á —taj Jesucristó a.

<sup>8</sup> Gaa ne cataj uún tanuu capitán yo':

—'O se nuveé sij sa' mé 'unj ma'. Ne nó xcúun 'unj catuu so' rá ve' tucua' qui'yáj a ma'. Maan se ca'ne' uun so' suun se vaa nahuun se-mozó 'unj, gaa ne nahuun ma'an so' adonj. <sup>9</sup> 'O se vaa síi rii ta'nga' rihaan 'unj, ne rii ta'ngá' 'unj rihaan tanuu, ne taj xna'anj 'unj rihaan tanuu se vaa ca'anj nij so', ne 'anj nij so', ne taj xna'anj 'unj rihaan nij so' se vaa ca'na' nij

so', ne 'na' nij so' rihaan 'unj, ne taj xna'anj 'unj daj qui'yaj nij so', ne veé danj 'yaj tanuu adonj. Ne ne'én 'unj se vaa ase vaa rii ta'ngá' 'unj rihaan nij tanuu nocó' manj ro', danj rii ta'nga' guee so' rihaan chi'ii anó man yuvii nanj á —taj tanuu capitán yo' rihaan Jesucristó a.

<sup>10</sup> Dan me se, gaa cuno Jesucristó nana ca'mii tanuu capitán yo', ne ca'anj rá Jesucristó, ne cataj so' rihaan nij síi nocó' rej xcó so' a:

—Ya ya cataj xna'anj 'unj rihaan soj se vaa taj vaj a 'ó rej ne narij man yo'ó síi israelitá síi cuchumán ndo'o rá nana a'mii 'unj ndaa vaa amán rá tanuu capitán nihánj a ma'. <sup>11</sup> Ne cataj xna'anj 'unj rihaan soj se vaa güii guun hij Diöse rihaan chumii nihánj ro', ca'na' ndo'o yuvii man cunú' chumii, ne cayáan nij so' rihaan se-mesa Diöse, ne cha nij so' chraa ga síi cu'naj Abraham do', ga síi cu'naj Isaac do', ga síi cu'naj Jacob do', adonj. <sup>12</sup> Ne nij síi israelitá ro', no xcúun nij so' cuchumán rá nij so' ni'yaj nij so' manj, ne sese cuchumán rá nij so' ni'yaj nij so' manj, ne ca'vee cané nij so' uún ga Diöse nanj á. Tzaj ne na'vej rá nij so' a man adonj. Che'é se na'vej rá nij so' qui'yaj nij so' danj, che'é dan qui'rij gan' ndo'o nii man nij so' rej rmi', ne ta'vee uxrá nij so', ne ndaa cha ruj ma'an nij so' cúu yan' nij so' nanj adonj. Danj quirán' nij so' che'é se na'vej rá nij so' cuchumán rá nij so' ni'yaj nij so' manj nanj á —taj Jesucristó rihaan nij yuvii canoco' man so' a.

<sup>13</sup> Canicaj uún Jesucristó cataj Jesucristó rihaan tanuu capitán:

—Ca'vee ca'anj so' yaj a. Ya cuchumán rá so' se vaa nahuun se-mozó so' qui'yaj a. Ne nahuun so' ei —taj Jesucristó rihaan so' a.

Ne veé maan orá yo' ro', nahuun se-mozó tanuu capitán yo', qui'yaj Jesucristó adonj.

**Nana nihánj taj xna'anj daj qui'yaj Jesucristó, nahuun nii chej Pedró do', que'ee uxrá yo'ó yuvii do', qui'yaj Jesucristó a**

<sup>14</sup> Gaa ne ca'anj Jesucristó tucúa síi cu'naj Pedró, ne quene'en so' se vaa naj nii chej Pedró ran' no', ne caxrij uxrá cachi' man no' a. <sup>15</sup> Ne quita'aa Jesucristó ra'a no', gaa ne veé maan orá dan nahuun no', qui'yaj Jesucristó, ne naxagaa no', ne qui'yaj chuvii no' cha nij so' nanj adonj.

<sup>16</sup> Rej ca'anj güii cuchi' yuvii rihaan Jesucristó a. Dan me se nicaj nij yuvii man que'ee uxrá síi nuu nana chree nimán, cuchi' nij yuvii rihaan Jesucristó, ne cataj xna'anj uun Jesucristó rihaan nij nana chree se vaa naxuun nij so' man nij so', gaa ne, veé dan, ne curihanj nij nana chree nimán nij yuvii, gaa ne cunuu sa' nimán nij yuvii yo' cuaj nanj adonj. Ne quinahuun sa' cunudanj nij síi ran', qui'yaj uún Jesucristó a.

<sup>17</sup> Dan me se quisj ya nu' nana nihánj nana ca'mii síi cu'naj Isaías síi nata' se-nana Diöse gaa naá, se vaa cataj so': "Ninaj ní, ne canó chi'ii man ní, tzaj ne nahuun ní, qui'yaj síi ca'na' vaa güii nanj adonj", taj síi cu'naj Isaías gaa nata' so' adonj.

**Nana nihánj taj xna'anj daj ca'mii Jesucristó rihaan vij síi tihaj guun rá canoco' man so' a**

<sup>18</sup> Quene'en Jesucristó se vaa man ndo'o yuvii anicaj rej nicun' so' ni'yaj man so' a. Che'é dan ca'ne' so' suun rihaan nij síi tucu'yón se-nana so' se vaa ca'anj nij so' ga so' ndaa rej na lacuaná cu'naj Galilea a.

<sup>19</sup> Gaa ne cuchi' yo'ó so' rihaan Jesucristó a. So' ro', me síi naqui'yaj cuu se-tucuanj Moisés rihaan yuvii adonj. Ne cataj so' rihaan Jesucristó a:

—Canocó' 'unj man so' daj rej ma'an vaj so', maestro —cataj so' rihaan Jesucristó a.

<sup>20</sup> Gaa ne cataj ya Jesucristó se vaa ran' so' chéé so' a:

—'O se nij chunee ro', otoj sa' nij xo' rá yu'uj taj rque yo'ó, ne nij xtâ chéé xtâ' ro', vaa saca' nij xo' a. Ne xa' 'unj sij ca'née Diöse nicaj yu'unj man yuvii, tzaj ne taj a 'ó rej quináa 'unj cotoj 'unj a ma' —taj Jesucristó rihaan so' a.

<sup>21</sup> Ne vaa yo'ó síi tucu'yón se-nana Jesucristó cuchi' rihaan so', ne cataj so':

—Ca'vej so' nanj tucua, ne ndaa cavi' réj, gaa ne cachin' 'unj man réj, gaa ne canocó' 'unj man so', Señor —taj yo'ó so' a.

<sup>22</sup> Tzaj ne cataj Jesucristó rihaan so' a:

—Ca'ne' rá so' cachin' ma'an nij síi cavi' nimán man tuvi' so' xngá á. Tzaj ne cuano nihánj ro', no xcúun so' yo'ó canocó' so' manj adonj —taj Jesucristó rihaan yo'ó so' a.

**Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a**

<sup>23</sup> Gaa ne catúj Jesucristó rque rihoo chéé rihaan na, gaa ne catúj nij síi tucu'yón se-nana so' rque rihoo ga so' a. <sup>24</sup> Veé dan, ne nasqui' nucuaj ndo'o rihaan na lacuaná, ne me ndo'o rá na yo' guun nucuaj yo' caráan yo' xráá rihoo a. Ne veé dan vaj Jesucristó, ne cotoj so' adonj. <sup>25</sup> Gaa ne ca'anj nij síi tucu'yón se-nana Jesucristó rej naj so' cotoj so', ne narii nij so' nej rihaan so', ne cataj nij so':

—Tinani so' man ní' se cavi' nu' ní', man Señor —taj nij so' rihaan Jesucristó a.

<sup>26</sup> Dan me se ma'an Jesucristó cataj, ne:

—Me che'é chu'vi' ndo'o nimán soj ga. Yo' me rej ataa cuchumán sa' rá soj ni'yaj soj manj adonj —taj Jesucristó rihaan nij so' a.

Gaa ne canicun' caya so', ne caxrij yuva so' man na do', man nana do' a. Gaa ne canicun' dínj uxrá rihaan na lacuaná yo', qui'yaj Jesucristó nanj adonj.

<sup>27</sup> Ne chuchu'vi' nij snó'o yo' ni'yaj nij so' man Jesucristó, cataj nij so':

—Daj sij me síi nihánj ga. 'O se ndaa nana ndaa na uno a'mii so' ason —taj nij so' rihaan tuvi' nij so' a.

**Nana nihánj taj xna'anj se vaa quirii Jesucristó man nij nana chree nimán vij snó'o a**

<sup>28</sup> Gaa ne cuchi' Jesucristó ndaa rnej na lacuaná yo' rej ne nij síi man chuman' cu'naj Gadara a. Ne vaa yu'uj yujej, rej cachin' nij yuvii xngá a. Dan me se cavii vij snó'o yu'uj yujej yo', ne cuchi' roj so' rihaan Jesucristó a. Roj so' me síi nuu nana chree nimán, ne yu'vaa ndo'o roj so' adonj. Che'é roj so' na'vee cachin yuvii rej yo' a ma'. <sup>29</sup> Dan me se caguáj roj so' rihaan Jesucristó, cataj roj so':

—Veé ne'en núj se vaa ta'nij Diosé mé so' á. Me che'é ca'ná' so' rej ne núj ga. Ca'ná' so' qui'yáá so' sayuun man núj na'. 'Q se ataa doj quisij güii qui'yáá so' sayuun man núj adonj —taj roj so' rihaan Jesucristó a.

<sup>30</sup> Dan me se rej xco roj so' ro', vaj que'ee xcáá chá coj man tacaan a. <sup>31</sup> Ne nij nana chree nuu nimán roj snó'o yo' ro', cachíin ni'yaj nij so' rihaan Jesucristó, cataj nij so':

—Sese quirii so' man núj nimán roj snó'o nihánj, ne qui'yáá so' se ndo'o ca'nej so' man núj, catuu núj nimán xcáá yo' ruguanj —taj nij nana chree yo' rihaan Jesucristó a.

<sup>32</sup> —Ca'anj soj cuaj á —taj Jesucristó rihaan nij so' a.

Gaa ne ca'anj nij so' catúj nij so' nimán xcáá yo', ne dan me se ruvaa uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree nimán nij xcáá yo' me se cunánj ndo'o nij xo' ca'anj xo', ne veé danj vaj nij xo', ne quini cunudanj nij xo' rque na, ne canó xráá nij xo', qui'yaj na nanj adonj. <sup>33</sup> Ne nij síi tumé xcáá yo' ro', cunánj nij so' ca'anj nij so' ndaa chuman', ne catúj nij so' chuman', ne cataj xna'anj nij so' rihaan nij síi man chuman' yo' nu' se vaa quiran' roj snó'o do', nij xcáá do' a. <sup>34</sup> Gaa ne curihanj cunudanj nij síi man chuman' yo', guun rá nij so' narí' nij so' man Jesucristó a. Dan me se quene'en nij so' man so', ne cachíin ni'yaj nij so' rihaan so' se vaa curihanj so' rej yanj nij so' ca'anj so' rej yanj a.

**Nana nihánj taj xna'anj se vaa nahuun sa' 'o síi na'vee cachee, qui'yaj Jesucristó a**

**9** Gaa ne cavii Jesucristó rihoo chéé rihaan na, ne ca'anj so' chuman' cayáan so', ne catúj so' chuman' yo' a. <sup>2</sup> Ne veé nicaj nii man 'o síi na'vee cachee táá rihaan yuvéé, ne ca'na' nii rihaan Jesucristó a. Ne quene'en Jesucristó se vaa cuchumán uxrá rá nij yuvii se vaa nahuun sa' síi na'vee cachee yo' qui'yaj so' a. Che'é dan cataj so' rihaan síi ran' yo' a:

—No xcúun so' guun niha' rá so' che'é se navij cacun' xráá so', nanj tinuj —taj Jesucristó rihaan síi na'vee cachee yo' a.

<sup>3</sup> Dan me se cane doj síi naqui'yaj cyu se-tucuanj Moisés rihaan yuvii rá ve' ga Jesucristó, ne cataj nij so' rihaan tuvi' nij so' a:

—Nij vaa nana ca'mii síi nihánj rihaan Diosé á. 'Q se orún' Diosé no xcúun cataj se vaa navij cacun' xráá yu-

vii á —taj nij síi tucu'yón se-tucuanj Moisés ni'yaj nij so' man Jesucristó a.

<sup>4</sup> Ne quene'en Jesucristó me nana guun rá nij so' ca'mii nij so', ne che'é dan cataj so':

—Me che'é avii ndo'o nana chi'ii raá soj ga. <sup>5</sup> Tu'va ruma'án 'unj se vaa navij cacun' xráá síi nihánj, rá soj a na'. Ca'vee cataj uun ní' navij cacun' xráá síi nihánj na'. Ase ca'vee doj cataj ní' naxagaa so', ne cachee so' cuaj, cataj ní' xa'. <sup>6</sup> Dan me se me rá 'unj xcaj soj cuentá se vaa síi ca'née Diosé nicaj yu'unj man yuvii mej ne no xcúun 'unj tinavii 'unj cacun' xráá nij yuvii man rihaan chumii nihánj adonj —taj Jesucristó rihaan nij so' a.

Dan me se cataj Jesucristó rihaan síi na'vee cachee a: —Nacue so' tuvée so', ne nan' so' tucua so' á —taj Jesucristó rihaan síi naj rihaan yuvéé yo' a.

<sup>7</sup> Gaa ne naxagaa so', ne cavii so', ne quinan' so' tucua so' adonj. <sup>8</sup> Ne quene'en nij yuvii se vaa nahuun sa' so', qui'yaj Jesucristó, ne che'é dan cuhu'vi' nimán nij so', quene'en nij so' Jesucristó, ne ve'é ndo'o ca'mii nij so' che'é Diosé, se vaa guun nucuaj Jesucristó racuíj ndo'o Jesucristó man yuvii, qui'yaj Diosé adonj.

**Nana nihánj taj xna'anj se vaa cataj xna'anj Jesucristó rihaan síi cu'naj Mateo se vaa canoco' so' man Jesucristó a**

<sup>9</sup> Gaa ne cavii Jesucristó rej yo', ne quene'en so' man yo' o síi yanj 'o ve' a'néj nii puextó man yuvii a. Mateo cu'naj síi ne rej yo' a.

Dan me se cataj Jesucristó rihaan so', ne:

—Canoco' so' manj, ca'anj ní' á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

**Nana nihánj taj xna'anj se vaa me rá Jesucristó racuíj so' man nij síi tumé cacun' a**

<sup>10</sup> Dan me se 'o güii cayáan Jesucristó rá ve', ne ca'na' ndo'o tuvi' so' síi a'néj puextó do', yo'ó nij síi tumé ndo'o cacun' do', ne catúj nij so' rá ve', ne ca'anj cayáan nij so' ga Jesucristó, ne dan me se man rcua'aan nij síi tucu'yón se-nana Jesucristó do', ne chá cunudanj nij so' chraa a. <sup>11</sup> Ne quene'en nij síi fariseo se vaa chá Jesucristó chraa ga nij síi a'néj puextó do', ga yo'ó nij síi tumé ndo'o cacun' do', ne xná'anj nij so' man nij síi tucu'yón se-nana Jesucristó, cataj nij so':

—Síi tucu'yón nana rihaan soj ro', me che'é chá so' chraa ga nij síi a'néj puextó do', ga yo'ó nij síi tumé ndo'o cacun' do', rá núj a —taj nij síi fariseo rihaan nij síi tucu'yón se-nana Jesucristó a.

<sup>12</sup> Ne cuno Jesucristó nana ca'mii nij so', ne cataj so' rihaan nij so' a:

—Síi vaa nucuaj ro', ne nano' nij so' man doctor ma'. Maan síi ran' ro', me síi nano' man doctor adonj. Gaa ne ase vaa síi ran' ro', danj vaa nij síi nihánj adonj. <sup>13</sup> 'Q se vaa che'é ca'anj soj tucu'yón soj daj taj nana nihánj nana no rihaan danj Diosé á: "Ne uun niha' rá 'unj ni'yaj 'unj yuvii nago' xcuu rihaan 'unj ma'. Tananj uun

niha' rá 'un̄j ni'yāj 'un̄j yuvii 'ēe rá man tuvi' adon̄j". In-  
an̄j dan̄j me se-nanā Diosē nanā tucu'yón soj á. Dan  
me se xcaj soj cuentá se vaa ne ca'na' 'un̄j canacun̄j  
'un̄j man síi sa' ma'. Che'é nij síi tumé cacun' ca'naj se  
vaa canoco' nij so' se-nan̄aj adon̄j. Tzaj ne sese síi sa'  
me soj, rá soj, ne nuveé sij canacun̄j 'un̄j man me soj  
ma' —taj Jesucristó rihaan nij so' a.

**Nanā nihánj taj xna'an̄j me che'é ne toco' nij síi tu-  
cuyón se-nanā Jesucristó x'naa man ma'an̄j nij so' a**

<sup>14</sup> Gaa ne nij síi tucu'yón se-nanā síi cu'naj Juan cuchi'  
rihaan Jesucristó, ne xná'an̄j nij so' man so', cataj nij  
so':

—Me che'é, ne toco' núj x'naa man ma'an̄j núj che'é  
se aráj guēe núj rihaan Diosē, ne toco' nij síi fariseo x'-  
naa man ma'an̄j nij so' uún, tzaj ne nij síi tucu'yón  
se-nanā so' me se ne toco' nij so' x'naa man ma'an̄j nij  
so' ga —taj nij so' rihaan Jesucristó a.

<sup>15</sup> Gaa ne cataj Jesucristó rihaan nij so' a:

—Ase vaa síi cuchruij sa'an̄j vaa 'un̄j, ne asa' ca'vee  
toco' nij síi man̄ gaj x'naa man ma'an̄j nij so', rá soj ga.  
Ase vaa síi cataj xcaj man chanā ne man tuvi' so' do',  
dan̄j vaa nij síi man̄ nihánj cuano, ne anū ndo'o  
cha'an̄j man̄ nij so', ne se ca'vee toco' nij so' x'naa  
man ma'an̄j nij so' ma'. Tzaj ne vaa güii, ne guun yan̄j  
'un̄j rihaan nij so' qui'yāj yuvii, gaa ne nan̄o rá nij síi ni-  
hánj, gaa ne toco' nij so' x'naa man ma'an̄j nij so'  
adon̄j.

**Nanā nihánj taj xna'an̄j se vaa nij síi noco' tucuáán nga  
ro', se guun nucuaj nij so' cun̄o nij so' se-nanā Jesu-  
cristó ma'**

<sup>16</sup> "Tzaj ne ase vaa yatzíj sin' vaa tucuáán nga noco'  
soj, ne se guun na'nej ní' mantá nacā man yatzíj nga  
yo' ma'. 'O se sese qui'yāj ní' dan̄j, ne güii quin̄anj yuvii  
yatzíj yo', gaa ne nagüej mantá nacā yo', ne sese cuxu-  
un̄ yuvii man yatzíj yo', ne quisin' yo', gaa ne cun̄u xij  
doj yu'uj aj taj man yatzíj nga yo' nan̄j adon̄j. <sup>17</sup> Ne dan  
me se ase vaa nuj nga nuj araa nii na vinó vaa uún soj  
a. Ne se ca'vee tucu'yón 'un̄j se-tucuaj 'un̄j rihaan soj  
ma'. 'O se ase vaa na vinó nacā vaa nanā tucu'yón  
'un̄j, ne se guun caraa yuvii na vinó nacā rque nuj nga  
ma'. Sese dan̄j qui'yāj yuvii, ne cuyan̄j na vinó cun̄u  
xēe na vinó, ne se cacuā nuj nga ma'. Che'é dan can̄u  
yo', ne cayan̄j na vinó rihaan yo'óo a. Che'é dan araa  
nii na vinó nacā rque nuj nacā, ne 'o mán sa' na vinó  
rque nuj yo' a. Che'é dan in̄anj rihaan síi nacā síi ne  
noco' tucuáán nga tucu'yón 'un̄j se-nan̄aj nan̄j adon̄j  
—taj Jesucristó rihaan nij síi tucu'yón se-nanā síi cu'naj  
Juan yo' a.

**Nanā nihánj taj xna'an̄j che'é chalā cunii do', che'é  
chanā chij do', nahuun sa', qui'yāj Jesucristó a**

<sup>18</sup> Asij ca'mii Jesucristó nanā yo' rihaan nij síi tu-  
cuyón se-nanā síi cu'naj Juan, ne cuchi' 'o síi nicaj su-  
un rihaan Jesucristó, ne canicun' ruj so', cachíin ni'yāj  
so' rihaan Jesucristó, cataj so':

—Cuan̄o cavi' ta'nij chalā cunii a. Tzaj ne qui'yáá so'  
se ndo'o, ca'an̄j ní', ne cuta' so' ra'á so' xraá no', ne  
cun̄u i'na' uún no' nan̄j ruguan̄j —taj so', cachíin  
ni'yāj so' rihaan Jesucristó a.

<sup>19</sup> Gaa ne naxumaan̄ Jesucristó, ne canoco' so' do', nij  
síi tucu'yón se-nanā so' do', man síi nicaj suun yo' a.

<sup>20</sup> Gaa ne ca'na' 'o chanā rej xco Jesucristó, ne quisíj  
'o chujij yo' xra' ton man chanā yo', ne canó ra'a no'  
doj tu'va sagan' Jesucristó a. <sup>21</sup> 'O se: "Sese can̄o ra'aj  
sagan' Jesucristó, ne nahuun sa' 'un̄j nan̄j adon̄j", gu-  
un rá no' a.

<sup>22</sup> Gaa ne canicaj Jesucristó quene'en Jesucristó man  
no', ne cataj so':

—No xcuún so' guun niha' rá so', nocoj. 'O se che'é  
se amán rá so' ni'yāj so' manj ro', che'é dan nahuun  
sa' so' á —taj Jesucristó rihaan chanā yo' a.

Ne veé maan̄ ora dan nahuun sa' tu' chanā yo' adon̄j.

<sup>23</sup> Gaa ne ca'an̄j Jesucristó ve' tucuá síi nicaj suun yo',  
ne catúj so' rá ve', ne quene'en so' se vaa man síi o'  
chra' man rihuu flauta, ne quene'en so' se vaa man  
ndo'o yuvii rá ve', ne nanó ndo'o rá nij yuvii che'é se  
cavi' chalā cunii yo' adon̄j. <sup>24</sup> Gaa ne cataj so':

—Curihan̄j soj xe' á. 'O se ne cavi' chalā cunii nihánj  
ma'. Maan̄ se otoj uun no' nan̄j á —taj Jesucristó ri-  
haan nij yuvii man rá ve' yo' a.

Gaa ne ca'nga' nacoō nij yuvii ni'yāj nij so' man Jesu-  
cristó a.

<sup>25</sup> Gaa quisíj quirii Jesucristó man cunudanj nij yuvii  
xe', ne catúj Jesucristó rej táá chalā cunii yo', ne  
quita'aa so' ra'a no', ne cunuu i'na' uún chalā cunii, ne  
naxagaa no' adon̄j. <sup>26</sup> Ne cuchi' nanā rihaan cunudanj  
nij yuvii man̄ rej yo' che'é se vaa qui'yāj Jesucristó, se  
vaa cunuu i'na' chalā cunii yo' qui'yāj so' adon̄j.

**Nanā nihánj taj xna'an̄j se vaa naxra' rihaan vij síi  
tuchrii, qui'yāj Jesucristó a**

<sup>27</sup> Dan me se gaa cavii Jesucristó tucuá síi nicaj suun  
yo', ne canoco' vij síi tuchrii man so' a. Ne caguáj roj  
so', cataj roj so':

—Ne'en rój se vaa tuvi' síi cu'naj David síi cane gaa  
naá mé so' á. Che'é dan cun̄u 'ēe rá so' man rój  
ruguaj —taj roj so', caguáj roj so' a.

<sup>28</sup> Dan me se catúj Jesucristó rá ve', ne cuchi' roj síi  
tuchrii yo' rihaan so' a. Gaa ne cataj Jesucristó rihaan  
roj so':

—Amán rá roj soj se vaa guun nucuaj naxra' rihaan  
roj soj qui'yáj na' —taj Jesucristó, xná'an̄j Jesucristó  
man roj so' a.

—Amán rá rój, Señor —taj roj so' rihaan Jesucristó a.

<sup>29</sup> Gaa ne cuta' ra'a Jesucristó rihaan roj so', ne cataj  
Jesucristó:

—Che'é se amán rá roj soj, ne che'é dan naxra' ri-  
haan roj soj adon̄j —taj Jesucristó a.

<sup>30</sup> Veé dan, ne naxra' rihaan roj so' nan̄j adon̄j.

Gaa ne caxríj yuvaa Jesucristó rihaan roj so', ne cataj  
Jesucristó rihaan roj so' a:

—Cutumé uxrá roj soj man roj soj, ne a' ó yuvii se  
cuno se vaa qui'yáá 'un̄j che'é roj soj á. —Dan me se



nucuaj ndo'o ca'mii Jesucristó nana yo' rihaan roj so' a.

<sup>31</sup> Tzaj ne curihanj roj so' ca'anj roj so', ne uxrá nata' roj so' rihaan cunudanj nij yuvii man rej yo' che'é yan qui'yaj sa' Jesucristó che'é roj so' nanj adonj.

**Nana nihánj taj xna'anj se vaa ca'vee ca'mii 'o síf ya'mii, qui'yaj Jesucristó a**

<sup>32</sup> Dan me se tanáj roj so' man Jesucristó, gaa ne ca'anj Jesucristó, gaa ne cuchi' yuvii rihaan so' a. Dan me se nicaj nij yuvii man 'o síf ya'mii cuchi' nij yuvii rihaan Jesucristó a. Síf ya'mii yo' me se nana chree nuú nimán so', ne che'é dan ne ca'mii so', qui'yaj nana chree yo' a. <sup>33</sup> Dan me se quirii Jesucristó man nana chree yo' nimán so', gaa ne guun che'e síf ya'mii ca'mii so' nanj adonj. Veé dan quene'en nij yuvii, ne caráya'anj uxrá nij yuvii, ne cataj nij so':

—Xa' ní' sij israelitá, tzaj ne a 'o síf 'yaj danj ne quene'en ní' ma' —taj nij yuvii che'é Jesucristó a.

<sup>34</sup> Tzaj ne nij síf fariseo cataj me se:

—Guun nucuaj so' quirii so' man nana chree, che'é se a'mii so' ga ma'an síf chree uun chij adonj —taj nij síf fariseo, ca'mii ne nij so' che'é Jesucristó a.

**Nana nihánj taj xna'anj daj qui'yaj Jesucristó gaa cunuu 'ee ndo'o rá so' man nij yuvii a**

<sup>35</sup> Gaa ne ca'anj Jesucristó nu' nij chuman' nocoo nu' nij chuman' cunii nu', ne tucu'yón so' rihaan nij yuvii man rá ve' tucu'yón nij yuvii israelitá se-tucuanj Moisés, ne ca'mii natáj so' nana sa' che'é güii guun chij Dioso rihaan chumii nihánj, ne nahuun sa' taran' nij síf ran' do', nij síf ninaj do', qui'yaj uún so' adonj.

<sup>36</sup> Ne quene'en so' man cunudanj nij yuvii, ne cunuu 'ee rá so' man nij yuvii yo' a. 'O se quene'en so' se vaa ase vaa matzinj vaj ma'an vaa nij yuvii, nuvi' síf tumé man nij so', ne aj quiran' ndo'o nij so' sayuun, ne ninaj ndo'o nij so' adonj. <sup>37</sup> Gaa ne cataj so' rihaan nij síf tucu'yón se-nana so' a:

—Ya uxrá, ne vaa ndo'o suun rihaan ní', ne nij síf 'yaj suun me se doj nij so' nanj adonj. <sup>38</sup> Ne cachinj ni'yaj ní' doj nij síf qui'yaj suun rihaan Dioso síf uun chij 'nij ra'a suun, gaa ne ca'nej so' doj yuvii qui'yaj suun se-suun so' adonj —taj Jesucristó rihaan nij síf tucu'yón se-nana so' a.

**Nana nihánj taj xna'anj se vaa ca'neé Jesucristó man chuvij nij síf tucu'yón se-nana so' ca'anj ca'mii natáj nij so' a**

**10** Gaa ne canacúun Jesucristó man chuvij nij síf tucu'yón se-nana so', ne cuchi' nij so' rihaan so', ne go' so' rej nucuaj man nij so', gaa ne ca'vee qui'yaj canaán nij so' rihaan nij nana chree a. Dan me se guun nucuaj nij so' quirii nij so' man nij nana chree nimán yuvii, ne guun nucuaj nij so' nahuun sa' yuvii ran' do', yuvii ninaj do', qui'yaj uún nij so' a.

<sup>2</sup> Ne nihánj me se-chuvii chuvij nij apóstol cune' Jesucristó man nata' rihaan yuvii che'é so' a. Yo'q so' me síf

cu'naj Simón, ne Pedró cu'naj yo'ó se-chuvii síf cu'naj Simón a. Ne yo'ó so' me tinúu Simón, síf cu'naj Andrés a. Ne yo'ó so' me síf cu'naj Jacobo, ne ta'níí síf cu'naj Zebedeo me so' a. Ne yo'ó so' me tinúu Jacobo, síf cu'naj Juan a. <sup>3</sup> Ne vaa síf cu'naj Felipe vaa síf cu'naj Bartolomé vaa síf cu'naj Tomás vaa a. Ne yo'ó so' me síf cu'naj Mateo síf ca'néj puextó man yuvii a. Ne yo'ó so' me síf cu'naj Jacobo uún, ne ta'níí síf cu'naj Alfeo me so' a. Ne yo'ó so' me síf cu'naj Lebeo, ne Tadeo cu'naj yo'ó se-chuvii síf cu'naj Lebeo a. <sup>4</sup> Ne yo'ó so' me síf cu'naj Simón uún, ne so' me tuvi' nij síf me rá cunu' ga gobiernó man Romá a. Ne yo'ó so' me síf cu'naj Judas Iscariote, ne so' me síf tacuachén man Jesucristó rihaan nij síf taj ri'yunj man Jesucristó a.

<sup>5</sup> Dan me se ca'neé Jesucristó man chuvij nij snó'o yo', ne cataj xna'anj so' rihaan nij so' daj qui'yaj nij so' a:

—Se ca'anj nij soj rej man nij síf yaníj ma'. Se ca'anj soj chiháan nij yuvii samaritana ma'. <sup>6</sup> Rihaan orún' nij yuvii israelitá ca'anj soj á. 'O se ase vaa daán Dioso matzinj vaa nij so', tzaj ne ca'anj ni'ya' nij so', ne ne no-co' sa' nij so' man Dioso ma'. <sup>7</sup> Dan me se ca'anj soj, ne ca'mii natáj soj rihaan nij so', cataj soj: “Nichrun' quisij güii guun chij Dioso rihaan chumii nihánj adonj”. Danj cataj soj á. <sup>8</sup> Nahuun sa' nij síf ran', qui'yaj soj, ne cunuu i'na' uún nij síf cavi', qui'yaj soj, ne nahuun sa' nij síf ran' luj ri'yuj, qui'yaj uún soj, ne quirii soj man nij nana chree nimán nij yuvii á. Cuanó nihánj me rquej rej nucuaj man soj qui'yaj soj danj a. Che'é dan nihánj me cataj xna'anj 'unj rihaan soj se ca'néj soj sa'anj man nij yuvii ma'.

<sup>9</sup> “Se nano' soj aga' oró míí do', aga' platá catzii do', naj guun sa'anj do', caraa soj rque se-caxran' soj a ma'. <sup>10</sup> Se nicaj soj xnánj soj ma'. Se ca'anj vij cotoó ga soj ma'. Se qui'nij tacóo soj canj ma'. Ne chruun garroté se coró' soj cachee soj ma'. Maan se gaa uun soj ca'anj soj á. 'O se no xcúun yuvii rque yuvii chraa cha soj che'é suun sa' 'yaj suun soj nanj adonj. <sup>11</sup> Asa' catúj soj chuman' nocoo do', chuman' ra'a do', ne xna'anj soj man nij yuvii me síf ne chuman' yo' me síf sa', gaa ne cuchi' soj tucua' síf sa' yo', ne cayáan soj tucua' so' ndaa se cavii uún soj ca'anj soj á. <sup>12</sup> Asa' cuchi' soj tucua' síf sa' yo', ne ve'é ca'mii soj nana sa' rihaan nij síf tucua' yo', cataj soj se vaa dínj gaa cumán nij so' á.

<sup>13</sup> Ne sese ya' síf sa' me nij síf tucua' yo', ne ya' dínj gaa cumán nij so', qui'yáj a. Tzaj ne sese nuveé sij sa' me nij so', ne canicaj uún nana sa' ca'mii soj rihaan ma'an soj, qui'yáj, tzaj ne se cavii sa' nij síf tucua' yo' a ma'.

<sup>14</sup> Ne naj guun yuvii se ca'mii sa' ga soj do', naj guun yuvii se ca'vej rá cunó nana a'mii soj do', cavii soj ve' tucua' so' cavii soj chiháan so' cavii soj, ne nacunan' soj tacóo soj tucua'yuu soj yo'óo tachruu avii chuman' yo' rihaan yo'óo, ne ndaa dan, gaa ne quene'en yuvii se vaa síf man chuman' yo' tumé cacun' se vaa ne uno nij so' rihaan Dioso ma'. <sup>15</sup> Ya ya' cataj xna'anj 'unj rihaan soj se vaa güii ca'ne' 'unj cacun' che'é nij yuvii, gaa ne quiran' yuvii man chuman' yo' doj sayuun rihaan nij síf

chi'ij man chuman' Sodoma do', rihaan yuvij man chuman' Gomorra do' adonj.

**Nana nihánj me taj xna'anj Jesucristó rihaan nij síf tucu'yón se-nana so' daj gaá sayuun quirán' nij so' a**

<sup>16</sup> "Dan me se ca'nej 'unj man soj rej man síf me rá qui'yaj sayuun man soj a. Ase vaa matzinj vaj rej man xca'yanj ca'nu' ro', danj gaá soj adonj. Che'é dan gaá cuu raá soj á. Ase cacuij raá xtaa ro', danj cacuij gaá raá soj á. Tzaj ne ase vaa taj vaj cacun' tumé cha'aan ro', danj gaá soj, se cutumé soj cacun' ma'. <sup>17</sup> Cutumé ndo'o soj man soj se qui'yaj yuvij sayuun man soj ma'. Dan me se ca'anj nicaj nij yuvij man soj rihaan cuese, ne go' ndo'o nij so' vará xráá soj rá ve' tucu'yón nij so' se-tucuanj Moisés a. <sup>18</sup> Ne ca'anj nicaj nij yuvij man soj rihaan síf nicaj suun do', rihaan síf nicaj suun rey do', che'é se me soj síf noco' manj a. Ne cataj xna'anj soj rihaan nij síf nicaj suun do', rihaan nij síf yanij do', che'ej a. <sup>19</sup> Asa' tacuachén nij so' man soj rihaan nij síf nicaj suun, ne se nanó rá soj daj ca'mii soj rihaan nij so' ma'. Maañ Nimán Diose rque nu' nana ca'mii soj maañ orá yo' nanj adonj. <sup>20</sup> 'Q se nuveé ma'an soj me nij síf ca'mii rihaan nij so' ma'. 'Q se Nimán Rej ní' me síf rque nana ca'mii soj nanj adonj.

<sup>21</sup> "Dan me se ca'anj nicaj snó'o man tinúú snó'o rihaan yuvij, ne ticavi' nii man tinúú snó'o yo', qui'yaj ma'an so' nanj adonj. Ne ca'anj nicaj snó'o man ta'níí snó'o rihaan yuvij, ne ticavi' nii man ta'níí snó'o yo', qui'yaj so' ei. Ne cunu' xnii gaá rej xnii, ne ca'anj nicaj xnii man rej xnii rihaan yuvij, ne ticavi' nii man rej xnii yo', qui'yaj xnii ei. <sup>22</sup> Ne quitaj ri'yunj cunudanj yuvij man soj che'é se me soj síf noco' manj a. Tzaj ne síf yo'q canoco' manj ndaa se quisij nu' sayuun yo' ro', ve'é cavii sa' so' rihaan Diose adonj. <sup>23</sup> Ne sese qui'yaj nij síf man yo'q chuman' sayuun man soj, ne cunanj soj ca'anj soj yo'q chuman' á. Ya ya cataj xna'anj 'unj rihaan soj se vaa se canó cunudanj nij chuman' man nij yuvij israelitá ca'anj soj, ne ca'na' uún 'unj sij ca'née Diose nicaj yu'unj man yuvij rihaan chumii nihánj adonj.

<sup>24</sup> "Dan me se tucu'yón 'unj se-nanaj rihaan soj, ne noco' soj se-nanaj a. Ne ase vaa uno mozó rihaan se-ru'vee mozó ro', danj vaa uno soj rihanj nanj á. Ne ne'en soj se vaa ase vaa 'yaj yuvij man síf tucu'yón nana rihaan tuvi' ro', danj qui'yaj uún nij yuvij man síf noco' nana yo' a. Ne ase vaa 'yaj yuvij man nij ru'vee ro', danj qui'yaj uún nij yuvij man se-mozó ru'vee yo' a. <sup>25</sup> Dan me se ne'en síf noco' nana ne'en mozó ne'en daj qui'yaj yuvij man ma'an so', tzaj ne me inanj rá so' guun so' ndaa vaa síf tucu'yón nana man so' do', ndaa vaa se-ru'vee so' do' a. Dan me se tucu'náj nij yuvij Beelzebú manj, cataj nij yuvij se vaa síf chree mej a. Ne ase vaa rej soj vaa 'unj a. Che'é dan danj ca'mii nij yuvij nana vaa danj che'é ma'an soj nanj adonj.

**Nana nihánj taj xna'anj se vaa se cuchu'vi' ní' quene'en ní' yuvij ma'**

<sup>26</sup> "Che'é dan se cuchu'vi' soj ni'yaj soj yuvij me rá qui'yaj sayuun man soj ma'. 'Q se nu' nana ca'mii yuve nij yuvij do', nu' se vaa qui'yaj yuve nij yuvij do', nu' yo' ro', nurihanj quene'en cunudanj yuvij vaa güii adonj.

<sup>27</sup> Nana a'mii yuve 'unj rihaan soj cuano ro', ca'mii ran-ga' soj á. Ne nu' se vaa a'mii 'unj xrée soj ro', cavii soj rej quene'en yuvij man soj, ne ca'mii natáj soj nana yo' á.

<sup>28</sup> "Ne se cuchu'vi' soj quene'en soj nij síf guun nu-cuaj ticavi' man inanj nee man soj ma'. 'Q se se guun nucuaj nij so' ticavi' nij so' man nimán soj a ma'. Tzaj ne vaa che'é cuchu'vi' soj ni'yaj soj Diose nanj á. 'Q se so' me síf guun nucuaj qui'yaj cacaa nimán soj cacaa nee man soj cacaa rihaan ya'an adonj.

<sup>29</sup> "Ne'en soj daj vaa nij xtâj chrin' se vaa vij un' yo' nó yo'q sa'anj nii cuartó a. Tzaj ne se guun cavii yo'q xo' quinij xo' rihaan yo'óó, sese na'vej Rej soj síf nicun' xtâ' cavii yo'q xo' ma'. <sup>30</sup> Ne Diose me se vaa cuentá yuvé raá soj 'yaj so', ne ne'en so' me daj yuvé raá soj, <sup>31</sup> ne che'é dan se cuchu'vi' soj che'é sayuun qui'yaj yuvij man soj ma'. 'Q se uxrá vaa yu'vee doj nó soj rihaan xtâj chrin' yo', 'yaj Diose adonj.

**Nana nihánj taj xna'anj se vaa no xcuún ní' cataj xna'anj ní' rihaan yuvij che'é Jesucristó a**

<sup>32</sup> "Che'é se tumé Diose man soj, che'é dan no xcuún soj nata' ya soj rihaan yuvij se vaa me soj síf noco' manj, ne nu' síf 'yaj danj ro', vaa güii, ne nata' 'unj rihaan Réé 'unj síf nicun' xtâ' se vaa sij noco' manj me so' a. <sup>33</sup> Ne síf taj xna'anj rihaan yuvij se vaa ne noco' so' manj ro', vaa güii, ne cataj xna'anj 'unj rihaan Réé 'unj síf nicun' xtâ' se vaa nuveé sij noco' manj me so' a ma'.

**Nana nihánj taj xna'anj se vaa cunu' ndo'o yuvij ga tu-vi' yuvij che'é Jesucristó a**

<sup>34</sup> "Se guun rá soj se vaa ca'ná' 'unj rihaan chumii nihánj che'é rej dínj doj cayáán nij yuvij man rihaan chumii nihánj ga tuvi' yuvij ma'. Ne qui'yaj danj ma'. 'Q se che'é se ca'ná' 'unj rihaan chumii nihánj, che'é dan cunu' ndo'o yuvij ga tuvi' yuvij adonj. <sup>35</sup> 'Q se ca'ná' 'unj che'é rej nata' 'unj se-nanaj rihaan yuvij, tzaj ne se cuno cunudanj nij yuvij rihanj ma'. Che'é dan cunu' snó'o gaá rej ma'an so', ne xa' chana, tzaj ne cunu' no' gaá nii no' do', gaá nii chej no' do', che'ej a. <sup>36</sup> Ne nij tuvi' yuvij síf man rá ve' tucua yuvij cunu' ga yuvij nanj á.

<sup>37</sup> Sese guun rá yo'q so' se vaa sa' doj vaa rej so' do', nii so' do', rihanj, ne taj che'é cataj so' se vaa sij noco' manj me so' ma'. Ne sese guun rá yo'q so' se vaa sa' doj vaa ta'níí so' rihanj, ne taj che'é cataj so' se vaa sij noco' manj me so' ma'. <sup>38</sup> Ne síf na'vej rá quirán' sayuun che'é se me so' síf noco' manj ro', taj che'é cataj so' se vaa me so' síf noco' manj ma'. <sup>39</sup> Síf cavii sa' nimán rihaan chumii nihánj ro', cavii nu' so' a. Ne síf cavii

che'é se nocq' so' manj ro', so' me síf gaa i'na' nimán nu' cavii nu' ca'anj adonj.

**Nana nihánj taj xna'anj daj quirán' nij yuvij racuif man nij síf 'yaj suun rihaan Diose a**

<sup>40</sup> "Sese a'mii sa' yo'q so' ga soj, ne sij a'mii sa' gaj me so' adonj. Ne sese a'mii sa' so' gaj, ne sij a'mii sa' ga síf ca'née manj rihaan chumij nihánj me uún so' adonj. <sup>41</sup> Sese a'mii sa' yo'q so' ga 'o síf nata' se-nana Diose, che'é se ve'é 'yaj so' nata' so' se-nana Diose, ne rá se vaa ma'an síf nata' se-nana Diose vaa so' uún adonj. Dan me se 'o cuyaán naru'vee Diose rihaan so' ga ma'an síf nata' se-nana Diose ei. Ne sese a'mii sa' yo'q so' ga yo'q síf sa' 'yaj, ne naru'vee Diose rihaan so' uún adonj. 'O cuyaán naru'vee Diose rihaan so' ga ma'an síf sa' 'yaj ei. <sup>42</sup> Dan me se a me ma'an yo'q síf rqué doj na acoj co'q yo'q nij síf nocq' uun nihánj che'é se-chuvif 'unj, ne ya ya cataj xna'anj 'unj rihaan soj se vaa daj chihaa mij se quinavij se sa' naru'vee Diose rihaan síf rqué doj na yo' ma'.

**11** Dan me se quisij nana yo' nana cataj xna'anj Jesucristó rihaan chuvij nij síf tucu'yón se-nana so', ne curihanj Jesucristó rej yo', ne ca'anj so' chiháan nij yuvij israelitá tucu'yón so' rihaan nij so' ne ca'mii natáj so' rihaan nij so' a.

**Nana nihánj taj xna'anj che'é nana ca'mii Jesucristó che'é síf cu'naj Juan síf cuta' ne man yuvij a**

<sup>2</sup> Dan me se 'nij síf cu'naj Juan síf cuta' ne man yuvij taga', ne cuchi' nana rihaan so' che'é nu' se vaa qui'yaj Jesucristó a. Che'é dan ca'née so' vij tuvi' nij síf tucu'yón se-nana so' rihaan Jesucristó a. <sup>3</sup> Ne nana nihánj ro', xna'anj roj so' man Jesucristó, qui'yaj síf cu'naj Juan a:

—So' me síf ca'na' tñanii man yuvij rihaan sayuun na'. Ase na'vij ní' ca'na' yo'ó so' xa'. —Dan me nana me rá síf cu'naj Juan xna'anj roj so' man Jesucristó a.

<sup>4</sup> Gaa ne cataj xna'anj Jesucristó rihaan roj so' a:

—Cavij roj soj cuchí' uún roj soj rihaan síf cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. <sup>5</sup> Dan me se nij síf tuchrij ro', naxra' rihaan, ne nij síf na'vee cachee ro', chée nij so', ne nij síf ran' luj ri'yuj ro', nahuun sa', ne nij síf so'q ro', nachuguun xrée nij so', ne nij síf cavi' ro', cunuu i'na' uún, ne nij síf níque ro', uno nij so' nana sa' a. Nu' nihánj cataj xna'anj roj soj rihaan síf cu'naj Juan yo' á. <sup>6</sup> Ne cataj uún roj soj rihaan síf cu'naj Juan se vaa cavij sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan síf cu'naj Juan yo' á —taj Jesucristó rihaan roj síf tucu'yón se-nana Juan yo' a.

<sup>7</sup> Dan me se ca'anj roj so', gaa ne guun che'e Jesucristó ca'mii so' rihaan cunudanj nij yuvij che'é síf cu'naj Juan síf cuta' ne man yuvij a:

—Asij ca'anj soj rej tacaan quene'en soj man síf cu'naj Juan ro', ne daj gaa so' quene'en soj, rá soj ga. Ase vaa yo'q rcoo naan ndo'o 'yaj nana vaa so', rá soj na'.

Guun vij nimán so' che'é tucuáan nocq' so', rá soj na'. Taj ma'. <sup>8</sup> Maan se daj gaa so' rá soj, asij ca'anj soj quene'en soj man so' ga. Sij nuu yatzij laruu ndo'o me so', rá soj na'. Taj ma'. 'O se nij síf nuu yatzij laruu ro', yanj rá ve' tucua síf nicaj suun rey adonj. <sup>9</sup> Maan se daj gaa síf cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij síf nata' se-nana Diose adonj.

<sup>10</sup> "O se nana nihánj nana no rihaan danj Diose ro', taj xna'anj che'é síf cu'naj Juan a: "Vaa síf ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvij ve'é ca'mii nij yuvij ga so', qui'yaj so' a". Danj taj danj Diose che'é síf cu'naj Juan se vaa nuchran' nimán yuvij ve'é ca'mii nij yuvij ga síf ca'na' tñanii man nij yuvij rihaan sayuun, qui'yaj síf cu'naj Juan, taj danj Diose, ne danj qui'yaj so' adonj.

<sup>11</sup> "Ya ya cataj xna'anj 'unj rihaan soj cuano se vaa sij sa' doj rihaan cunudanj nij yuvij man rihaan chumij me síf cu'naj Juan síf cuta' ne man yuvij a. A 'ó yuvij ne vaa sa' doj rihaan so' ma'. Tzaj ne cuano ro', uun chij Diose nimán yuvij man rihaan chumij nihánj, ne naj guun yuvij uun chij Diose nimán ro', me síf sa' doj rihaan síf cu'naj Juan a. <sup>12</sup> Dan me se asij tucu'yón síf cu'naj Juan rihaan yuvij ndaa cuano me se naqui'yaj ino ndo'o yuvij se-nana Diose se vaa guun chij so' rihaan chumij nihánj, ne vaa síf sca' ndo'o síf me inanj rá cataj daj qui'yaj Diose asa' guun chij Diose adonj. <sup>13</sup> 'O se nij síf nata' se-nana Diose rihaan yuvij gaa naá do', nu' se-tucuanj Moisés do', ndaa ma'an síf cu'naj Juan do', cataj xna'anj ndo'o nij so' che'é güii guun chij Diose nimán yuvij man rihaan chumij nihánj nanj á. <sup>14</sup> Dan me se aj ne'en soj se vaa síf cu'naj Elías síf nata' se-nana Diose rihaan yuvij gaa naá ro', ca'na' uún so' rihaan chumij nihánj, taj danj Diose a. Dan me se sese me rá soj guun ya rá soj cunq soj nana nihánj, ne cataj xna'anj 'unj rihaan soj se vaa síf cu'naj Juan me síf ata' se-suun síf cu'naj Elías síf cane gaa naá yo' á. <sup>15</sup> Sese taj yu'uj xrée soj, ne cunq soj nana nihánj ei.

<sup>16</sup> "Ne daj vaa yuvij man rihaan chumij nihánj cuano, rá soj ga. Dan me se cataj xna'anj 'unj rihaan soj á. Ase vaa xnii ca'anj rihaan yu'vee ne tico ga tuvi' ro', vaa nij yuvij man rihaan chumij nihánj adonj. Dan me se yáan nij xnii yo' rihaan yo'óo, <sup>17</sup> ne aguáj nij xnii rihaan tuvi' xnii, taj nij xnii: "Nicaj núj ta'ánj núj, go' núj chra' chocq', tzaj ne me che'é ne ra'anj soj ga. Ne go' núj chra' xngá, tzaj ne me che'é ne ta'vee soj ga. Me che'é ne 'yaj soj ndaa vaa me rá núj ga", taj nij xnii rihaan tuvi' nij so' a. <sup>18</sup> 'O se ca'na' síf cu'naj Juan síf cuta' ne man yuvij, gaa ne ne cha' so' do', ne co'q so' do', ma'. Ne che'é dan taj nij yuvij se vaa nuu nana chree nimán so', taj nij yuvij a. <sup>19</sup> Ne ca'ná' 'unj sij ca'née Diose nicaj yu'unj man yuvij, gaa ne niha' rá 'unj chá 'unj do', co'o 'unj do', gaa ne che'é dan taj uún nij yuvij se vaa síf cachén chá do', síf cachén co'o do', mé 'unj, taj uún nij yuvij a. Ne taj uún nij so' se vaa tuvi' 'unj me síf a'néj puextó man yuvij do', yo'óo nij síf tumé cacun'

do', taj nii a. Danj tu'va nij so', tzaj ne ne ne'en uxrá nij so' ma'. Sese xcaj yuvij cuentá daj vaa 'yaj rój, ne guun ya rá nij yuvij se vaa sij cyu raq me rój ga síí cu'naj Juan yo' adonj —taj Jesucristó rihaan nij yuvij a.

**Nana nihánj taj xna'anj se vaa cataj xna'anj Jesucristó che'é sayuun quirán' yuvij man va'nuj chuman' yuvij ne ca'vej rá cunq se-nana Jesucristó a**

<sup>20</sup> Síj, gaa ne guun che'e Jesucristó cuta' Jesucristó cacun' xráá nij yuvij man va'nuj chuman' a. Dan me se cuta' so' cacun' xráá nij so' se vaa guun nichraj nimán nij so' a. Dan me se nda' se doj a vaa suun sa' qui'yaj suun so' chiháán nij so' quene'en nij so' rihaan suun sa' qui'yaj suun so' yo'ó chuman', tzaj ne ne canicaj nimán nij so' a ma', taj Jesucristó a. <sup>21</sup> Ne nihánj me nana ca'mii Jesucristó che'é nij yuvij man nij chuman' yo' a:

—Nique soj sij man chuman' Corazín a. Nique soj sij man chuman' Betsaida a. 'Q se quirán' uxrá soj sayuun nanj á. Dan me se nij síí man chuman' Tiro do', nij síí man chuman' Sidón do', me síí chi'ii nimán nanj á. Tzaj ne sese ca'anj 'unj chiháán nij so' ne sese qui'yáj suun sa' nocqo ni'yaj nij so', gaa ne cuno nij so' se-nana, ne guun ya rá nij so' se vaa tumé nij so' cacun', ne canicaj nimán nij so', ne quinanó ndo'o rá nij so' che'é cacun' tumé nij so', ne ndaa yatzij ya' cunuú nij so', ne ndaa yaj chruun acaa ruvaj caraa nij so' raq nij so', che'é se quinanó rá nij so' che'é cacun' tumé nij so' asuun saj adonj. Nihánj, ne ne ca'anj 'unj ma'. Maan inanj chiháán soj 'naj, ne qui'yáj suun sa' nocqo quene'en ma'an soj, tzaj ne ne canicaj nimán nij soj a ma'. <sup>22</sup> Dan me se yaj cataj xna'anj 'unj rihaan soj se vaa güii ca'ne' 'unj cacun' che'é nij yuvij ro', doj a gaa sayuun quirán' soj rihaan sayuun quirán' nij síí chi'ii man chuman' Tiro do', man chuman' Sidón do' adonj.

<sup>23</sup> Ne vaa soj sij man chuman' Capernaum uún á. Ne síí sa' inanj me ma'an soj, rá soj na'. Nuveé sij sa' me soj ma'. Síí ca'anj rihaan ya'an guun soj á. Dan me se nij síí man chuman' Sodoma ro', me síí chi'ii nimán a. Tzaj ne sese ca'anj 'unj chiháán nij so' ne sese qui'yáj suun sa' nocqo ni'yaj nij so', ne cuno nij so' se-nana, ne guun ya rá nij so' se vaa tumé nij so' cacun', ne canicaj nimán nij so', ne ne cacaa chiháán nij so' ma'. Ne naj chiháán nij so' ndaa cuano asuun saj a. Tzaj ne ne ca'anj 'unj ma'. Maan se inanj chiháán soj 'naj, ne qui'yáj suun sa' nocqo yo' quene'en ma'an soj, tzaj ne ne canicaj nimán nij soj a ma'. <sup>24</sup> Dan me se cataj xna'anj 'unj rihaan soj se vaa güii ca'ne' 'unj cacun' che'é nij yuvij ro', doj a gaa sayuun quirán' soj rihaan sayuun quirán' nij síí chi'ii man chuman' Sodoma yo' adonj —taj Jesucristó che'é nij yuvij ne ca'vej rá cunq se-nana so' a.

**Nana nihánj taj xna'anj me síí nari' sa' se-nana Jesucristó a**

<sup>25</sup> Dan me se güii yo' cachíin ni'yaj Jesucristó rihaan Diose, cataj so':

—Síí 'nij ra'a xtá' do', síí 'nij ra'a chumij do', mé so', Ataj Chij. Ne sa' uxrá qui'yáá so' caráán so' rihaan nij síí avii raq do', rihaan nij síí acaj cuentá do', se vaa se cuno nij so' se-nana ma'. Maan nij síí vaa nica' nimán ro', ve'é cuno nij so', qui'yáá so' á. <sup>26</sup> Danj inanj qui'yáá so', che'é yan danj me rá so' qui'yáá so', Ataj —taj Jesucristó rihaan Rej so' Diose a.

<sup>27</sup> Canicaj Jesucristó ca'mii so' rihaan nij yuvij, cataj so' a:

—Aj rqué Réé 'unj Diose cunudanj rasuun rihanj á. Ne a 'ó síí ne ne'en daj vaa 'unj; maan orún' Réj ne'en a. 'Q se ta'níí so' mej adonj. Ne a 'ó yuvij ne ne'en daj vaa Réj ma'. Maan orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'ó nij yuvij daj vaa Réj, ne quene'en yo'ó nij so' uún adonj. <sup>28</sup> Ne sese vaa síí navij ndo'o rá che'é yan nano' uxrá so' tucuáán sa' do', sese vaa síí nanó ndo'o rá che'é yan ne guun nucuaj so' qui'yaj so' nu' tucuáán sa' tucuáán nocqo so' do', ne ca'na' nij síí vaa danj rihanj á. 'Q se naraan rá nij síí vaa danj, qui'yáj nanj á. <sup>29</sup> Dan me se canocq' soj manj, ne qui'yaj soj tucuáán tucu'yón 'unj man soj á. 'Q se síí vaa nica' nimán mej, ne quinarí' soj chrej quinaraan rá soj adonj. <sup>30</sup> 'Q se ne sayuun vaa tucuáán cuchruj 'unj canocq' soj ma'. 'Q se guun nucuaj soj qui'yaj soj cunudanj adonj —taj Jesucristó a.

**Nana nihánj taj xna'anj che'é güii naránj rá ní' a**

**12** Dan me se naca ca'mii Jesucristó nana yo', ne 'o güii naránj rá nij yuvij israelitá me yo', ne vaj Jesucristó rque 'o naa 'núú trigó a. Vaj nij síí tucu'yón se-nana so' ga so' a. Veé dan vaj nij so', ne na'aan rque nij so' a. Che'é dan me guun che'e nij so' cuta nij so' doj 'núú trigó chá nij so' a. <sup>2</sup> Tzaj ne quene'en nij síí fariseo se vaa cuta nij so' doj 'núú trigó, ne cataj nij so' rihaan Jesucristó a:

—Ni'yaj so' ei. Güii naránj rá yuvij me güii cuan' á. Ne nó xcúún nij síí tucu'yón se-nana so' cuta' nij so' 'núú trigó cuan' a ma' —taj nij so' rihaan Jesucristó a.

<sup>3</sup> Gaa ne cataj Jesucristó rihaan nij so' a:

—Me che'é, ne ne nayaá soj rihaan danj Diose daj qui'yaj síí cu'naj David gaa naá a. Gaa quina'aan rque nij tuvi' nij so', <sup>4</sup> gaa ne catúj nij tuvi' nij so' rá nuvíí, ne chá nij so' rachrúún taj rihaan se-mesa Diose a. Ne ne nó xcúún nij so' cha' nij so' rachrúún yo'; maan se orún' nij xrej nó xcúún cha' rachrúún yo' a. Tzaj ne maan che'é se rque nij so' na'aan uxrá, gaa ne chá nij so' rachrúún yo' nanj adonj. Tzaj ne ne cataj Diose se vaa tumé síí cu'naj David cacun' ma'.

<sup>5</sup> Ne ne nayaá soj me taj se-tucuanj Moisés che'é nij xrej 'yaj suun nuvíí na'. 'Q se che'é se-suun nij so', 'yaj nij so' se vaa ne nó xcúún yuvij qui'yaj yuvij güii naránj rá ní' sij israelitá ma'. Tzaj ne ne tumé nij so' cacun' che'é se vaa 'yaj nij so' ma'. <sup>6</sup> Ne cuano nihánj me cataj xna'anj 'unj rihaan soj se vaa vaa síí nicun' rihaan soj cuano, ne sa' doj vaa so' rihaan nuvíí yo' adonj. <sup>7</sup> Ne vaa yo'ó nana no' rihaan danj Diose taj: "Ne uun niha' rá 'unj ni'yaj 'unj síí rqué xcuu rihaan 'unj ma'. 'Q se

uun niha' rá 'un̄j ni'yaj 'un̄j yuvij 'eē rá man tuvi' adonj". Yo' me se-nan̄a Diose nan̄a n̄o rihaan yanj yo' a. Sese cuno soj me taj nan̄a yo', n̄e ne cut̄a' soj cacun' xráá nij síi nihánj saj ma'. N̄e ne tumé nij síi nihánj cacun' ma'. <sup>8</sup> 'O se síi ca'néé Diose n̄icaj yu'unj man yuvij mej, n̄e n̄o xcúnj quirii ta'ngaj daj qui'yaj yuvij güii naránj rá yuvij adonj —taj Jesucristó rihaan nij síi fariseo yo' a.

**Nan̄a nihánj taj xna'an̄j se vaa nahuun sa' 'o síi nacoo ra'a, qui'yaj Jesucristó a**

<sup>9</sup> Gaa n̄e curihan̄j Jesucristó rej naj naa yo', n̄e catúj so' rá ve' tucu'yón nij síi man̄ chuman' yo' se-tucuan̄j Moisés a. <sup>10</sup> Dan me se yáán 'o síi nacoo ra'a rá ve' yo' a. N̄e xná'an̄j nij síi fariseo man Jesucristó sese n̄o xcúún yuvij qui'yaj cono'ó yuvij man tuvi' yuvij güii naránj rá yuvij a. D̄anj tu'va nij so' rihaan Jesucristó, che'é yan me rá nij so' cut̄a' nij so' cacun' xráá Jesucristó che'é nan̄a ca'mii Jesucristó adonj. <sup>11</sup> Gaa n̄e cataj Jesucristó rihaan nij so' a:

—Sese vaa daán yo' o soj matzinj, n̄e sese quini x̄o' rá yu'uj güii naránj rá yuvij, n̄e cuxuun síi daan man x̄o' quirii so' man x̄o' rque yu'uj yo', raj a. <sup>12</sup> N̄e sa' uxrá doj vaa yuvij rihaan matzinj yo' adonj. Che'é dan n̄o xcúún yuvij racuíj yuvij man tuvi' yuvij güii naránj rá yuvij á —taj Jesucristó rihaan nij síi fariseo yo' a.

<sup>13</sup> Canicaj Jesucristó cataj Jesucristó rihaan síi nacoo ra'a yo':

—Tycuá so' ra'á so' á —taj Jesucristó rihaan so' a.

Gaa n̄e tucuá so' ra'a so', n̄e cunuu sa' ra'a so', n̄e ase vaa guēē nichrej ra'a so' rej vaa sa' ro', d̄anj vaa guēē nichrej ra'a so' uún a.

<sup>14</sup> Dan me se curihan̄j nij síi fariseo rá ve' yo', n̄e ca'an̄j nij so' rej yanij, n̄e guun rá taran' nij so' daj gaa qui'yaj nij so' n̄e cavii' Jesucristó a.

**Nan̄a nihánj taj xna'an̄j se vaa ca'ne' Jesucristó suun rihaan yuvij se vaa se nata' nij yuvij rihaan tuvi' yuvij che'é so' a**

<sup>15</sup> Tzaj n̄e quene'en Jesucristó daj me rá nij síi fariseo qui'yaj nij so' man Jesucristó a. Che'é dan cavii so' rej yo', n̄e ca'an̄j ndo'o yuvij ga so', n̄e nahuun cunud̄anj nij síi ran' v̄aj ga nij yuvij, qui'yaj Jesucristó a. <sup>16</sup> N̄e ca'ne' so' suun rihaan nij yuvij se vaa se nata' nij yuvij rihaan tuvi' yuvij che'é yan vaa 'yaj so' a.

<sup>17</sup> D̄anj ca'mii Jesucristó, gaa n̄e quisij ya nu' nan̄a nihánj nan̄a cataj xna'an̄j Diose rihaan yuvij gaa naá a. Dan me se ca'mii Diose nan̄a nihánj cuno síi cu'n̄aj Isaías síi nata' se-nan̄a Diose gaa naá, n̄e nata' síi cu'n̄aj Isaías nan̄a nihánj rihaan yuvij che'é Diose a. Nan̄a ca'mii ma'an̄ Diose, cataj xna'an̄j Diose che'é Jesucristó me nan̄a nihánj a: <sup>18</sup> "Xc̄aj soj cuentá se vaa síi nihánj me síi 'yaj suun rihan̄j a. Narii 'un̄j man so' cunuú so' rihan̄j, n̄e 'eē rá 'un̄j man so', n̄e aran' raj ni'yaj 'un̄j man so' a. Ca'nej 'un̄j Nimanj nimán so', n̄e nata' so' rihaan nij síi yanij se vaa ve'é ca'ne' 'un̄j cacun' che'é nij so' a. <sup>19</sup> Se cunu' so' ga yuvij ma'. Se caguáj so' ri-

haan yuvij ma'. Se canicun' so' chrej ca'aan̄ ca'mii natáj so' rihaan yuvij ma'. <sup>20</sup> N̄e sese nari' so' man yo' o síi quiri' rá síi ne uun nucuaj noco' chrej sa', n̄e se tiri' nu' so' man síi quiri' rá yo' ma'. 'O se racuíj so' man so' adonj. Dan me se ca'vee se ase vaa rcoo xtun' do', ca'vee se ase vaa aga' ya'an navij na acaa rque do', vaa síi quiri' rá yo', tzaj n̄e racuíj so' man so', yan cunuu sa' so' adonj. Dan me se qui'yaj canaán nan̄a ya ca'mii síi 'yaj suun rihan̄j gaa ve'é ca'ne' so' cacun' che'é yuvij nan̄j adonj. <sup>21</sup> N̄e gaa nucuaj rá nij síi yanij man so' se vaa racuíj so' man nij síi yanij adonj", taj Diose gaa naá a.

**Nan̄a nihánj taj xna'an̄j se vaa cuta' nij síi fariseo cacun' rmi' xráá Jesucristó se vaa ca'mii Jesucristó ga síi chree a**

<sup>22</sup> Guun naá doj, gaa n̄e ca'na' yuvij rihaan Jesucristó, n̄e nicaj nij yuvij man 'o síi ya'mii aráan̄ rihaan nuu nan̄a chree nimán a. Xa' síi nuu nan̄a chree nimán, tzaj n̄e caráan̄ rihaan so', n̄e ya'mii so' a. N̄e nahuun nu' so', qui'yaj Jesucristó, n̄e naxra' rihaan so', n̄e ca'mii so' adonj. <sup>23</sup> Dan me se quene'en nij yuvij se vaa nahuun sa' so' qui'yaj Jesucristó, n̄e guun niha' rá nij yuvij, n̄e cataj nij yuvij:

—Síi nihánj me tuvi' síi cu'n̄aj David gaa naá, rá soj na'. Síi t̄janii man ní' rihaan sayuun me síi nihánj, rá soj na' —taj nij yuvij, xná'an̄j nij yuvij man tuvi' yuvij me síi me Jesucristó a.

<sup>24</sup> Tzaj n̄e cuno nij síi fariseo daj ca'mii nij yuvij che'é Jesucristó, n̄e cataj nij so':

—Nuveé ma'an̄ síi nihánj rii nan̄a chree ma'. Maan̄ se a'mii so' ga síi chree uun chij síi cu'n̄aj Beelzebú, n̄e che'é dan rii so' nij nan̄a chree nimán yuvij adonj —taj nij síi fariseo che'é Jesucristó, ca'mii n̄e nij so' a.

<sup>25</sup> Dan me se quene'en Jesucristó daj vaa nimán nij síi fariseo yo', gaa n̄e ca'mii so' rihaan nij síi fariseo a:

—Ne'en soj se vaa sese vaa 'o nación, n̄e sese xra' ta'aj nij síi uun chij rihaan nación yo' n̄e cunú' nij ma'an̄ nij so' ga tuvi' nij so', n̄e vaa güii, n̄e nu' nación yo' quiri' nu' nan̄j adonj. N̄e sese cunú' ta'aj nij yuvij man ma'an̄ chuman' ga tuvi' yuvij, n̄e vaa güii quiri' nu' chiháan̄ nij so', qui'yaj nij so' nan̄j adonj. N̄e sese cunú' ta'aj nij yuvij man 'o barrió ga ma'an̄ tuvi' yuvij síi man ma'an̄ barrió yo', n̄e vaa güii quiri' nu' barrió yo', qui'yaj nij so' nan̄j adonj. <sup>26</sup> Che'é dan me sese racuíj síi chree síi cu'n̄aj Satanás manj rii 'un̄j tuvi' so' nan̄a chree nimán nij yuvij, gaa n̄e asa' ca'vee guun chij ndo'o so' rihaan nij yuvij man rihaan chumii nihánj, rá soj ga. <sup>27</sup> Dan me se sese rii 'un̄j nan̄a chree nimán nij yuvij, 'yaj síi chree cu'n̄aj Beelzebú, che'é se a'mii 'un̄j ga so', rá soj a. Tzaj n̄e nij síi tucu'yón se-nan̄a soj me se veé d̄anj rii uún nij so' nij nan̄a chree nimán yuvij uún á. N̄e asa' a'vee 'yaj nij so' d̄anj, rá soj ga. N̄e vaa nij so' vaa, veé d̄anj a'mii nij so' ga síi chree, rá soj gaa na'. Che'é nan̄a ca'mii soj me se ma'an̄ nij síi tucu'yón se-nan̄a soj cut̄a' cacun' xráá soj se vaa ca'mii n̄e soj adonj. <sup>28</sup> Tzaj n̄e 'un̄j me se ya Nimán Diose me síi racuíj manj rii 'un̄j nan̄a chree nimán yuvij adonj.

Che'é dan xcaj soj cuentá se vaa aj guun che'e Diose uun chij Diose rihaan chumii nihánj adonj.

<sup>29</sup> "Ne sese me rá yo' o so' catuy so' rá ve' tucua sí ru'vee qui'yaj ituy so' si'yaj sí ru'vee yo', ne asino numij so' man sí ru'vee yo', gaa ne canicaj so' catzij so' tucua sí ru'vee yo' ei. Ne ase vaa 'yaj sí atúj tucua sí ru'vee ro', danj 'yáj man sí chree yo' chuguanj. Dan me se numij 'unj man so', ne cuano nihánj a'néj 'unj man nu' nij sí 'nij ra'a so' adonj.

<sup>30</sup> "Naj guun sí na'vej rá qui'yaj suun ga 'unj ro', sí taj ri'yunj manj me so' a. Ne naj guun sí ne racuj manj naqui'yaj chre' 'unj man yuvij canoco' man Diose ro', so' me sí ticha'nuu man nij yuvij, ne aráan so' rihaan nij yuvij se canoco' nij yuvij man Diose ei. <sup>31</sup> Che'é dan cataj xna'anj 'unj rihaan soj se vaa nu' cacun' tumé yuvij do', nu' nana chi'ii ca'mii yuvij do', ca'vee tinavij Diose cacun' yo' che'é nij yuvij a. Tzaj ne sese nachri' yo' o so' ni'yaj so' man Nimán Diose, ne daj chihaa mij se quinavij cacun' yo' xraá so' a ma'. <sup>32</sup> Dan me se 'unj sij ca'néé Diose nicaj yu'unj man yuvij ro', ca'vee se ca'mii yo' o so' nana chi'ii che'ej, tzaj ne ca'vee navij cacun' yo' xraá so' qui'yaj Diose ei. Tzaj ne sese ca'mii chi'ii yo' o so' che'é Nimán Diose, ne daj chihaa mij se tinavij Diose cacun' yo' xraá so' a ma'. Dan me se ca'vee se rihaan chumii nihánj do', ca'vee se ndaa cavi' so' do', tzaj ne se quinavij cacun' yo' nu' cavii nu' ca'anj xraá so' a ma'.

**Nana nihánj taj xna'anj se vaa ase vaa nimán yuvij ro', danj vaa nana a'mii yuvij a**

<sup>33</sup> "Sese sa' vaa 'o chruun ne sa' vaa chruj man raa chruun yo' a. Sese chi'ii vaa 'o chruun ne chi'ii vaa chruj man raa chruun yo' a. Dan me se sese ne'en yuvij se vaa vaa sa' chruj man raa chruun, ne ne'en yuvij se vaa chruun sa' me yo' a. Ne sese ne'en yuvij se vaa vaa chi'ii chruj man raa chruun, ne ne'en uún yuvij se vaa chruun chi'ii me yo' adonj. <sup>34</sup> 'O se ase vaa xcuáa yuvaa vaa soj ei. Chi'ii vaa nimán soj, ne chi'ii vaa nana a'mii soj ei. 'O se ase vaa se man nimán yuvij ro', danj vaa nana avii tu'va yuvij adonj. <sup>35</sup> Dan me se sí sa' ro', man ndo'o se sa' nimán so', ne inanj nana sa' a'mii so' adonj. Sí chi'ii ro', man ndo'o se chi'ii nimán so', ne inanj nana chi'ii a'mii so' adonj. <sup>36</sup> Ne cuano nihánj me cataj xna'anj 'unj rihaan soj se vaa nu' nana a'mii ne nij yuvij ro', cataj xna'anj nij yuvij rihaan Diose me che'é ca'mii nij yuvij nana vaa danj asa' quisij güii ca'ne' Diose cacun' che'é cunudanj nij yuvij man rihaan chumii nihánj adonj. <sup>37</sup> 'O se sese sa' vaa nana ca'mii so', ne cataj Diose se vaa ne tumé so' cacun' ma'. Ne sese chi'ii vaa nana ca'mii so', ne cuta' Diose cacun' xraá so' adonj —taj Jesucristó rihaan nij sí fariseo yo' a.

**Nana nihánj me taj xna'anj Jesucristó me suun sa' no-coo me qui'yaj Jesucristó, gaa ne guun ya rá yuvij se vaa ya vaa nana a'mii so' a**

<sup>38</sup> Cachén doj, gaa ne ca'na' uún doj sí naqui'yaj cuu se-tucuanj Moisés ga doj sí fariseo rihaan Jesucristó, ne cataj nij so':

—Qui'yáa so' 'o suun sa' nocoo quene'en núj, maestro. Gaa ne guun ya rá núj se vaa ya a'mii so' á —taj nij so' rihaan Jesucristó a.

<sup>39</sup> Gaa ne cataj Jesucristó rihaan nij so' a:

—Xa' soj sij 'na' inanj rej chi'ii do', rej cacun' do', me se me rá gaa soj qui'yaj suun sa' nocoo ni'yaj soj, tzaj ne daj chihaa mij se qui'yaj ndaa vaa me rá soj ma'. Maan se quene'en soj se vaa ase vaa quiran' sí cu'naj Jonás sí nata' se-nana Diose gaa naá ro', danj quirán' 'unj, vaa güii, ni'yaj soj adonj. <sup>40</sup> 'O se ase vaa cunuú sí cu'naj Jonás va'núj ya güii rque xcuu xij vaj rque na ya'anj ro', ta'nga' danj gaa va'núj ya güii nuvij nigan' quináa 'unj rque yo'óo quene'en soj adonj. <sup>41</sup> Nij sí man chuman' cu'naj Nínive ro', canicun' nij so' ga ma'an soj sij vaa i'na' rihaan chumii nihánj cuano asa' quisij güii ca'ne' Diose cacun' che'é yuvij, ne cuta' nij sí man chuman' Nínive yo' cacun' xraá soj adonj. Cuno nij so' nana ca'mii natáj sí cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan sí cu'naj Jonás yo', tzaj ne taj se qui'yá' nuchran' nimán soj ma'. <sup>42</sup> Ne güii ca'ne' Diose cacun' che'é yuvij ro', cuchí' chana nicaj suun reiná guun chij rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cuta' no' cacun' xraá soj adonj. 'O se gan' ndo'o cachéé no' cuchí' no' rihaan sí cu'naj Salomón, ne cuno no' nana cuu tu-cu'yón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan sí cu'naj Salomón yo' a adonj. Tzaj ne na'vej rá soj cunq soj nana a'mii 'unj rihaan soj a man adonj.

**Nana nihánj taj xna'anj daj 'yaj nana chree gaa anicaj uún nana chree nimán yuvij a**

<sup>43</sup> "Ne gaa tihaj yuun avii yo' o nana chree nimán snó'o, ne chéé rma'an nana chree yo' nano' so' rej cayáan so', tzaj ne taj se qui'yá' quirí' nana chree yo' rej cayáan so', gaa ne me rá uún nana chree yo' canicaj so' rej cavii so' gaa naá a. Dan me se taj nana chree yo': "Canicaj uún 'unj nan' 'unj rej cavii 'unj a. Ve'é nanj vaa tucuj, ne naruvii rá ve' tucuj cuano, ne uun yaj yanj rá ve' tucuj cuano adonj", taj nana chree yo' a. <sup>45</sup> Gaa ne dan me se anicaj uún nana chree yo' nimán snó'o yo', ne nano' nana chree yo' yo'óo chij tuvi' nana chree yo' sí chi'ii doj, ne 'na' nique uún so' nimán snó'o yo', gaa ne cayáan taran' nij nana chree yo' a. Dan me se gaa naá gaa cayáan orún' nana chree yo', ne man ta'nga' quij vaa nimán snó'o yo', tzaj gaa namán yo'óo chij nana chree yo', gaa ne doj a tico nana

chree man so', ne doj a quij vaa nimán snó'o yo', 'yaj nana chree yo' a adonj.

"Ne ase vaa ran' snó'o yo' ro', ta'nga' danj quiran' soj sij israelitá sij na'vej rá cunō se-nana 'unj ei. 'O se che'é se natá 'unj se-nanaj rihaan soj ro', che'é dan doj a gaa sayuun quiran' soj rihaan sayuun quiran' nij síí ataa cunō se-nanaj adonj —taj Jesucristó rihaan nij síí naqui'yaj cyu se-tucuanj Moisés do', rihaan nij síí fariseo do' a.

**Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', ase vaa ra'vij Jesucristó do', vaa nij síí uno rihaan Diose a**

<sup>46</sup> Ataa quisij ca'mii Jesucristó rihaan nij yuvij, ne cuchii' nii Jesucristó do', tinúú Jesucristó do', rihaan ve' a. Nanó rá nij so' daj qui'yaj nij so' ca'mii nij so' ga Jesucristó a. <sup>47</sup> Ne cataj yo'q so' rihaan Jesucristó a:

—Xe' ro', nicun' níí so' nicun' tinúú so' nicun', ne me ndo'o rá nij so' ca'mii nij so' ga so' á —taj so' rihaan Jesucristó a.

<sup>48</sup> Ne cataj uún Jesucristó rihaan síí cataj xna'anj rihaan Jesucristó a:

—Me chana me níí 'unj rihaan 'unj, rá so' ga. Me síí me tinúú 'unj rihaan 'unj, rá so' ga —taj Jesucristó rihaan so' a.

<sup>49</sup> Ne ticun' so' ra'a so' rihaan nij síí tucu'yón se-nana so', ne cataj so':

—Ni'yaj so' ei. Ase vaa níí 'unj do', ase vaa tinúú 'unj do', vaa nij síí nihánj adonj. <sup>50</sup> 'O se yuvij uno rihaan Réé 'unj síí nicun' xtá' ro', ase vaa tinúú 'unj do', ase vaa ra'vij 'unj do', ase vaa níí 'unj do', vaa nij so' rihanj adonj —taj Jesucristó a.

**Nihánj me cuentó nanó Jesucristó che'é 'núú trigó tix'nuu yo'q so' a**

**13** Dan me se guun naá doj, ne curihanj Jesucristó rá ve', ne cane so' tu'va na lacuaná, <sup>2</sup> ne ca'na' ndo'o yuvij rihaan so', ne che'é dan cavii so' rque 'o rihoo chéé rihaan na, ne ca'anj canē so' rque rihoo yo', ne canicun' nij yuvij tu'va na lacuaná yo' a. <sup>3</sup> Ne nanó ndo'o Jesucristó cuentó rihaan nij yuvij, cataj so':

—Dan me se curihanj 'o síí me rá cuchruj naa 'núú trigó, ne tix'nuu so' 'núú trigó yo' rihaan yo'óó, <sup>4</sup> ne cayuu doj 'núú trigó yo' rá chrej chéé yuvij, ne ca'na' xtâj chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj.

<sup>5</sup> Ne yo'ó ta'aj 'núú trigó yo' ro', cayuu rihaan yuvej rej taj catun' yo'óó a. Che'é dan cuaj xra' stanj le'ej a.

<sup>6</sup> Veé dan, ne quisij güii, ne cuchrii naa le'ej, qui'yaj naán, che'é se ne ca'vee ca'anj nij yáa naa le'ej yo' a man adonj.

<sup>7</sup> Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj yo' nanj adonj. <sup>8</sup> Ne yo'ó ta'aj 'núú trigó yo' ro', cayuu rihaan yo'óó sa', ne naa yo' ro', cachij sa' a. Dan me se rihaan ta'aj yo'óó sa' yo' cientó ya 'núú cavii, qui'yaj 'o 'o 'núú le'ej nii quinij rihaan yo'óó sa' yo', ne

rihaan yo'ó ta'aj yo'óó sa' yo' va'nuj chihaa ya 'núú cavii, qui'yaj 'o 'o 'núú le'ej nii quinij rihaan yo'óó sa' yo', ne rihaan yo'ó ta'aj yo'óó sa' yo' icō chí' ya 'núú trigó cavii, qui'yaj 'o 'o 'núú le'ej nii quinij rihaan yo'óó sa' yo' nanj adonj.

<sup>9</sup> "Sese taj yu'uj xréé soj, ne cunō soj nana nihánj ei. —Veé dan quisij cuentó yo' cuentó nanó Jesucristó a.

**Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvij a**

<sup>10</sup> Gaa ne quinichrun' nij síí tucu'yón se-nana Jesucristó rihaan so', ne xná'anj nij so' man Jesucristó a: —Me che'é nanó so' cuentó che'é nij rasuun rihaan nij yuvij ga —taj nij so', xná'anj nij so' man Jesucristó a.

<sup>11</sup> Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose asa' guun chij Diose rihaan chumii nihánj adonj. Dan me se nana ne ne'en cunudanj yuvij me nana tihaan Diose rihaan soj adonj. Ne ne racuj Diose man yo'ó ta'aj nij yuvij quene'en nij yuvij daj qui'yaj Diose asa' guun chij Diose rihaan chumii nihánj ma'.

<sup>12</sup> 'O se síí aj nari' nana ro', doj a nari' uún so', ne uxrá quene'en ndo'o so', qui'yaj Diose nanj adonj. Ne síí na'vej rá nari' sa' nana ro', tananj ca'nee Diose doj nij nana nari' so' man so', ne quinaj yun so' nanj adonj.

<sup>13</sup> Che'é dan nanó cuentó che'é nij rasuun rihaan nij yuvij yo', che'é se ni'yaj nij so' do', nanó xrej nij so' do', tzaj ne ne ne'en nij so' do', ne acaj nij so' cuentá do', ma'. <sup>14</sup> Ne ase vaa nana nihánj nana nata' síí cu'naj Isaías che'é Diose gaa naá ro', veé danj vaa nij yuvij ne veé danj 'yaj nij yuvij cuano ei: "Catuy uxrá nana xréé soj, tzaj ne se xcaj soj cuentá ma'. Ne ni'yaj uxrá soj, tzaj ne se quene'en soj ma'. <sup>15</sup> 'O se caráan ma'an nij yuvij nihánj rihaan nij so', che'é rej na'vej rá nij so' quene'en ma'an nij so', ne caráan nij so' xréé nij so', che'é rej na'vej rá nij so' cunō nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' a ma'. 'O se na'vej uxrá rá nij so' quinahyun sa' nimán nij so' qui'yáa 'unj a man adonj". Yo' me se-nana Diose nana nata' síí cu'naj Isaías che'é ma'an Diose gaa naá a.

<sup>16</sup> "Tzaj ne vaa che'é gaa naha' rá soj che'é rihaan soj do', che'é xréé soj do' ei. 'O se aj quene'en soj se vaa qui'yaj, ne aj cuno soj nana ca'mij á. <sup>17</sup> Ya ya cataj xna'anj 'unj rihaan soj se vaa man ndo'o síí man gaa naá síí nata' se-nana Diose do', síí sa' do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cunō nij so' se vaa uno soj, tzaj ne ne cunō nij so' man adonj —taj Jesucristó rihaan nij síí tucu'yón se-nana so' a.

**Nana nihánj taj xna'anj me taj cuentó che'é 'núú trigó yo' a**

<sup>18</sup> Gaa ne cataj uún Jesucristó:

—Che'é dan cunō ma'an soj, cataj xna'anj 'unj rihaan soj me taj cuentó che'é 'núú trigó tix'nuu síí cuchruj naa yo' á. <sup>19</sup> Cunudanj yuvij uno nana che'é daj qui'yaj

Diose asá' guun chij Diosé rihaan chumij ro', sese ne acaj sá' nij so' cuentá, ne 'na' síi chree, ne a'néj síi chree nana yo' nimán yuvij yo' a. Dan me se ase vaa 'núú trigó cayuu rá chrej chée yuvij vaa yuvij yo' a. <sup>20</sup> Ne 'núú trigó cayuu rihaan yo'óo taj rihaan yujej ro', ase vaa síi uno se-nana Diosé vaa yo', ne cuaj uun ni-ha' rá so' canoco' so' nana yo', <sup>21</sup> tzaj ne ataa xcaj sá' so' cuentá, ne gaa uun che'e yuvij 'yaj yuvij sayuun man so' che'é nana noco' so', ne cuaj nu' uun na'aj so', ne tanáj so' nana yo' cuaj nanj adonj. <sup>22</sup> Ne 'núú trigó cayuu sca'núj coj tanj ro', ase vaa síi uno se-nana Diosé vaa yo', tzaj ne nanó ndo'o rá so' che'é rasuun man rihaan chumij nihánj, ne me ndo'o rá so' qui'yaj canaán so' sa'anj, ne che'é dan tiha' yu'unj so' man ma'án so' che'é sa'anj a. Che'é dan me taj se 'yá' canoco' sá' so' nana nari' so', ne ne nuu sá' nimán so' rihaan Diosé ma'. <sup>23</sup> Ne 'núú trigó cayuu rihaan yo'óo sá' ro', ase vaa síi uno se-nana Diosé vaa yo', ne xcaj sá' so' cuentá, ne nuu sá' nimán so' rihaan Diosé a. Ne sá' uxrá 'yaj ta'aj nij so', ne sá' doj 'yaj yo'óo ta'aj nij so', ne sá' doj tzin' 'yaj yo'óo ta'aj nij so' nanj adonj. —Veé danj quisij nana ca'mii Jesucristó che'é cuentó yo' a.

#### Nihánj me cuentó nanó Jesucristó che'é coj cachij sca'núj 'núú trigó a

<sup>24</sup> Ne nanó so' yo'óo cuentó nii rihaan nij so', cataj so': —Ase vaa qui'yaj 'o síi tix'nuu 'núú trigó sá' to'óo so' ro', danj gaa qui'yaj Diosé asá' guun chij Diosé rihaan chumij nihánj adonj. <sup>25</sup> Dan me se quisij tix'nuu so' 'núú trigó yo', ne rej nij orá otoj yuvij catúj 'o síi taj ri'yunj man so' to'óo so', ne tix'nuu síi chi'ij yo' caán coj chi'ij rihaan yo'óo naj 'núú trigó yo', ne veé dan me se ca'anj uún so', <sup>26</sup> ne dan me se xra' 'núú trigó xra' coj xra', gaa ne quichihón caa raá 'núú trigó do', raá coj do', ne xcaj nij se-mozó síi to'oj yo' cuentá se vaa nuveé 'nuj trigó me nu' naá a. Maan se man uxrá coj rque naá yo' nanj adonj. <sup>27</sup> Che'é dan cuchí' nij se-mozó síi to'oj yo' rihaan síi to'oj, ne cataj xna'anj nij so' rihaan so', cataj nij so': "Ya inanj 'núú trigó sá' tix'nuu so' na'. Me rej cavii coj chi'ij nihánj ga, señor", taj nij mozó rihaan síi to'oj yo' a. <sup>28</sup> Gaa ne cataj so' rihaan nij se-mozó so' a: "Síi taj ri'yunj manj me síi tix'nuu caán coj chi'ij rihaan to'ój ei", taj so' rihaan nij se-mozó so' a. "Ne me rá so' quirihaa núj coj ne naqui'yaj chre' núj coj na'", taj nij mozó rihaan ru'vee yo' a. <sup>29</sup> "Taj che'é qui'yaj soj danj ma'. Sese quirihaa soj man coj yo', gaa ne quirihaa uún soj man ta'aj 'núú trigó yo' gaa nanj adonj. <sup>30</sup> Maan se ca'ne' rá soj cachij rcua'aaan coj yo' ga 'núú trigó yo', gaa ne yavii quirij ni' naá trigó, gaa ne cataj xna'anj 'unj rihaan nij síi quirij naá se vaa asino naqui'yaj chre' nij so' coj yo', gaa ne numij nij so' coj yo', gaa ne cacaa coj yo' adonj. Gaa ne naqui'yaj chre' nij so' 'núú trigó sá', gaa ne caraa sá' nij so' man yo' rá cuchruu adonj", cataj síi to'oj rihaan se-mozó so' a —cataj Jesucristó rihaan nij yuvij a.

#### Nihánj me cuentó nanó Jesucristó che'é caán cuêj mostazá xlá a

<sup>31</sup> Ne nihánj me yo'óo cuentó nanó Jesucristó rihaan nij yuvij a:

—Ase vaa achij caán cuêj mostazá xlá ro', danj gaa guun chij Diosé rihaan chumij nihánj adonj. Dan me se nicaj yo' o so' man caán cuêj mostazá xlá, ne axrij so' caán yo' rihaan to'óo so' a. <sup>32</sup> Dan me se le'ej doj vaa caán cuêj mostazá xlá rihaan cunudanj nij caán, tzaj ne asá' cachij yo', ne xij doj vaa yo' rihaan nu' coj man tacaan, ne ase vaa chruun vaa yo' a. Dan me se ayuu nij xtâj vaj rej xtâ' raá cuêj yo', ne 'yaj nij xo' se-sca' nij xo' raá cuêj yo' adonj. —Danj ca'mii Jesucristó rihaan nij so' a.

#### Nihánj me cuentó nanó Jesucristó che'é levadura se 'yaj naraa nana rque rachruún a

<sup>33</sup> Ne nihánj me yo'óo cuentó nanó Jesucristó rihaan nij yuvij a:

—Dan me se naqui'yaj ní' 'o chana caxrij yo'óo levadura rque cunj hariná gaa 'yaj no' rachruún a. Dan me se ase vaa 'o chana, ne cuxra' ta'aj no' 'o va'nuj ya aga' yo'óo hariná, ne caxrij ndo'o no' yo'óo levadura, ne caxrij yuve no' man yo' ndaa navij naraa ndo'o nana rque yo' a. Ase vaa uun chij yo'óo levadura rihaan cunj hariná ro', danj gaa guun chij Diosé rihaan chumij nihánj adonj. —Danj ca'mii Jesucristó rihaan nij so' a.

#### Nana nihánj taj xna'anj se vaa inanj cuentó nanó Jesucristó rihaan nij yuvij a

<sup>34</sup> Inanj cuentó che'é nij rasuun nanó Jesucristó rihaan nij yuvij, gaa ne a'vee nata' so' rihaan nij yuvij a. <sup>35</sup> Danj qui'yaj so', che'é yan me rá so' qui'yaj so' nu' se vaa cataj 'o síi nata' se-nana Diosé gaa naá, cataj so': "Inanj cuentó che'é nij rasuun nana 'unj rihaan yuvij, ne dan me se cataj xna'anj 'unj rihaan nij so' che'é se vaa qui'yaj Diosé asij qui'yaj Diosé man nu' chumij nihánj adonj". Danj ca'mii síi nata' se-nana Diosé gaa naá a.

#### Nana nihánj taj xna'anj me taj cuentó che'é coj cachij sca'núj 'núú trigó yo' a

<sup>36</sup> Gaa ne na'née Jesucristó chrej man nij yuvij, ne catúj so' rá ve', gaa ne cuchí' nij síi tucu'yón se-nana so' rihaan so' a. Ne xna'anj nij so' man so', cataj nij so': —Cataj xna'anj so' rihaan núj me taj cuentó che'é coj cachij sca'núj 'núú trigó yo' á —taj nij so' rihaan Jesucristó a.

<sup>37</sup> Gaa ne cataj xna'anj Jesucristó rihaan nij so', cataj so':

—Síi tix'nuu 'núú trigó sá' rihaan yo'óo ro', ase vaa 'unj sij ca'née Diosé nicaj yu'unj man yuvij vaa so', <sup>38</sup> ne ase vaa chumij nihánj vaa yo'óo yo', ne 'núú trigó sá' ro', ase vaa nij síi cayáan ga Diosé asá' guun chij Diosé rihaan chumij vaa yo', ne ase vaa coj chi'ij yo'



ro', vaa nij síi noco' man síi chree, <sup>39</sup> ne ase vaa síi tix'nuu caân coj chi'ii rihaan yo'óo yo' ro', vaa ma'an síi chree yo', ne ase vaa güii ca'ne' Diose cacun' che'é yuviij man rihaan chumii nihánj ro', danj vaa güii quirii nii naa yo', ne ase vaa nij se-mozó Diose vaa nij síi quirii naa yo' á. <sup>40</sup> Dan me se ase vaa naqui'yaj chre' nii man coj yo' ne cacaa yo' rihaan ya'an ro', danj gaa quiran' nij síi noco' man síi chree güii ca'ne' Diose cacun' che'é yuviij man rihaan chumii nihánj adonj. <sup>41</sup> Dan me se síi ca'née Diose nicaj yu'unj man yuviij mej, ne güii dan ca'nej 'unj man nij se-mozó 'unj, ne nariij nij so' man nij síi chi'ii 'nij sca'núj nij yuviij guun chij 'unj rihaan a. Dan me se nu' síi tumé cacun' do', nu' síi na'vej rá cunó rihaan Diose do', quirii nij se-mozó 'unj man nij so' rihaan chumii nihánj, <sup>42</sup> ne ca'nej nij so' man nij síi chi'ii rque chrúun acaa ndo'o nanj adonj. Ne yuviij cumañ rej yo' me se ta'vee ndo'o nij so', ne ndaa chá ruj ma'an nij so' cúu yan' nij so' nanj adonj. <sup>43</sup> Gaa ne cuchuguun nij síi sa' yo' adonj. Dan me se ase vaa chuguun güii ro', danj gaa cuchuguun nij so', ne guun chij Rej nij so' síi nicun' xtá' rihaan nij so' ei. "Dan me se sese taj yu'uj xréé soj, ne cunó soj nana nihánj ei.

#### Nihánj me cuentó nanó Jesucristó che'é chrúun sa'anj nari' yo'ó so' a

<sup>44</sup> "Ase vaa 'o chrúun sa'anj 'nij yuve rque yo'óo vaa rej rihaan soj se vaa cayáán soj gá Diose asa' guun chij Diose rihaan chumii nihánj adonj. Dan me se nari' 'o snó'o man chrúun sa'anj yo', gaa ne naráán uún so' yo'óo xráá yo', ne guun niha' uxrá rá so' che'é chrúun sa'anj nari' so', ne ca'anj so' cutu'vej so' nu' si'yaj so', ne nicaj so' sa'anj, ca'anj so', quiránj so' nu' yo'óo 'nij chrúun sa'anj yo' nanj adonj.

#### Nihánj me cuentó nanó Jesucristó che'é chruj perlá tu'vee ndo'o a

<sup>45</sup> "Ne ase vaa síi ne tiendá ne nano' chruj perlá tu'vee ndo'o quiraa ro', danj vaa síi cayáán gá Diose asa' guun chij Diose rihaan chumii nihánj adonj. <sup>46</sup> Dan me se nari' síi ne tiendá yo' 'o chruj perlá sa' uxrá doj rihaan yo'óo perlá, gaa ne ca'anj so' cutu'vej so' cunudanj si'yaj so', ne nicaj so' sa'anj, quiránj so' man chruj perlá sa' doj yo' nanj adonj.

#### Nana nihánj me cuentó nanó Jesucristó che'é xcuaj atúj rque nanj tiguíj nii rá na a

<sup>47</sup> "Ne ase vaa quiran' xcuaj catúj rque nanj tiguíj nii rá na ro', danj gaa quiran' yuviij asa' guun chij Diose rihaan chumii nihánj ei. Dan me se tiguíj yuviij man nanj yo' rque na, ne dan me se me ma'an xcuaj catúj rque nanj yo' a. <sup>48</sup> Ndaa síj gaa caraa nanj yo', gaa ne cuxuun nij yuviij man nanj yo' ndaa tu'va na yo', gaa ne ca'anj cayáán nij so' rihaan yo'óo, gaa ne narii nij so' man xcuaj sa', ne narii nij so' man xcuaj nij uún a. Gaa ne xcuaj sa' yo' me se caraa nij so' man xcuaj sa' yo' rá scaa a. Tzaj ne xcuaj nij me se quiri'ij uun nij so' man

yo' nanj ei. <sup>49</sup> Ne ase vaa quiran' nij xcuaj yo' ro', danj quiran' yuviij asa' ca'ne' Diose cacun' che'é yuviij, ne cavii nij se-mozó Diose ne cuxra' ta'aj nij so' man nij síi chi'ii gá nij síi vaa sa', <sup>50</sup> ne quiri'ij nij so' man nij síi chi'ii yo' rque chrúun ya'aan ndo'o, gaa ne dan me se ta'vee uxrá nij so', ne ndaa chá ruj ma'an nij so' cúu yan' nij so' nanj adonj —taj Jesucristó rihaan nij síi tucuyón se-nana so' a.

#### Nana nihánj taj xna'anj che'é síi ne'en cunudanj se-nana Diose a

<sup>51</sup> Ne xna'anj Jesucristó man nij síi tucuyón se-nana so', cataj so':

—Cuno soj nu' cuentó nanó 'unj cuano na' —taj Jesucristó, xna'anj so' man nij síi tucuyón se-nana so' a.

—Cuno núj nu' cuentó yo' á —taj nij so' a.

<sup>52</sup> Ne cataj Jesucristó rihaan nij so' a:

—Che'é dan cataj xna'anj 'unj rihaan soj se vaa nij síi naqui'yaj cuu se-tucuanj Moisés me se sese nari' uún nij so' nana che'é güii guun chij Diose rihaan chumii nihánj, ne síi ne'en nu' nana me nij so', ne síi cuu raá guun nij so', qui'yaj nu' nana nari' nij so' adonj. Dan me se ase vaa síi ru'vee ne man rasuun nga do', rasuun naca do', rihaan ro', danj gaa nij so', ne cavii sa' uxrá nij so' nanj adonj —taj Jesucristó rihaan nij síi tucuyón se-nana so' a.

#### Nana nihánj taj xna'anj se vaa ne ca'vej rá nij síi man chiháán Jesucristó chuman' cu'naj Nazaret cunó nij so' nana ca'mii Jesucristó ma'

<sup>53</sup> Dan me se quisij nanó Jesucristó nu' cuentó nihánj rihaan yuviij, ne curihanj so' rej yo', ne ca'anj so' a.

<sup>54</sup> Gaa ne nucui' so' rej chiháán so', ne ca'anj so' ve' tucuyón nij síi man chiháán so' se-tucuanj Moisés, ne tucuyón so' man nij síi man rá ve' yo' a. Dan me se caraya'anj nij so', ne cataj nij so':

—Me rej nari' síi nihánj nana cuu avii raá síi nihánj gá. Me rej nari' so' suun sa' 'yaj suun so' gá. <sup>55</sup> Nuveé ta'nij síi acój chruun síi ne chiháán ní' me so' na'. Ne nii so' me chana cu'naj Mariá á. Ne tinúú so' me síi cu'naj Jacobo do', síi cu'naj José do', síi cu'naj Simón do', síi cu'naj Judas do' á. <sup>56</sup> Ne nij ra'vij so' me chana ne chiháán ní' á. Tzaj ne ne ne'enj me rej me nari' so' suun nihánj qui'yaj suun so' ma' —taj nij síi man chiháán Jesucristó rihaan tuvi' nij so' a.

<sup>57</sup> Ne guun nacoó rá nij so' ni'yaj nij so' man Jesucristó a. Ne cataj Jesucristó rihaan nij so' a:

—Me rej ma'an vaj 'o síi nata' se-nana Diose, ne aráj cochroj nij yuviij rihaan so', tzaj ne nij yuviij man chiháán so' do', nij tuvi' so' síi yanj tucua' so' do', na'vej rá caraa cochroj rihaan so' ma' —taj Jesucristó rihaan nij síi man chiháán so' chuman' cu'naj Nazaret yo' a.

<sup>58</sup> Ne doj vaa suun sa' qui'yaj suun Jesucristó chiháán so', che'é se ne cuchuman rá nij síi man chiháán so' ni'yaj nij so' man so' a.

Nana nihánj taj xna'anj se vaa cavi' Juan síf cuta' ne man yuvi, qui'yaj síf nicaj suun cu'naj Herodes a

**14** Dan me se cachén doj güii, gaa ne cuchi' nana rihaan síf nicaj suun cu'naj Herodes che'é nu' se vaa qui'yaj Jesucristó a. <sup>2</sup> Gaa ne cataj so' rihaan nij se-mozó so' a:

—Síf cu'naj Jesucristó ro', ya síf cu'naj Juan síf cuta' ne man yuvi me so' á. Dan me se cunuu i'na' ya uún síf cu'naj Juan, raj á. Ése síf cu'naj Juan me síf guun nu-cuaj qui'yaj nij suun sa' nocoo yo' nanj adonj —taj Herodes rihaan nij se-mozó so' a.

<sup>3</sup> Danj ca'mii síf cu'naj Herodes, che'é se gaa rque doj, ne so' me síf qui'yaj quita'aa nij tanuu man síf cu'naj Juan, ne numij nij tanuu man síf cu'naj Juan, ne caxrij síf cu'naj Herodes taga' man síf cu'naj Juan gaa rque doj a. Danj qui'yaj so' che'é chana cu'naj Herodías nicaj tinúu Herodes síf cu'naj Felipé a. <sup>4</sup> Dan me se xcax síf cu'naj Herodes man no', ne cataj xna'anj síf cu'naj Juan rihaan so' se vaa ne nó xcúun so' xcax so' man chocó' so' ma'. <sup>5</sup> Che'é se cataj síf cu'naj Juan rihaan so', gaa ne guun ndo'o rá síf cu'naj Herodes cavi' síf cu'naj Juan yo' a. Tzaj ne cuchu'vi' so' se vaa ca'maan rá nij yuvi a. 'Q se síf nata' se-nana Diose me síf cu'naj Juan, rá nij yuvi a.

<sup>6</sup> Dan me se quisij güii canuú se-cha'anj ma'an síf cu'naj Herodes, gaa ne quira'ánj ndo'o ta'níí chana cu'naj Herodías ni'yaj cunudanj nij síf ca'na' a. Ne guun nihá' rá síf cu'naj Herodes quene'en so' man chana yaan quira'ánj, <sup>7</sup> gaa ne che'é dan cata' tu'va so' se vaa ya uxrá rque so' rihaan no' me ma'an rasuun cachinj no' rihaan so' a. <sup>8</sup> Dan me se cataj xna'anj chana cu'naj Herodías rihaan ta'níí no' daj ca'mii no' rihaan síf cu'naj Herodes, gaa ne canicun' chana yaan yo' rihaan síf cu'naj Herodes, qui'yaj nii no' chana cu'naj Herodías a. Ne cataj chana yaan yo':

—Ca'nej so' cúu yave síf cu'naj Juan rque aga' rco'oo, ne rque so' manj nihánj á —taj chana yaan yo' rihaan síf cu'naj Herodes, qui'yaj nii no' chana cu'naj Herodías a.

<sup>9</sup> Gaa ne quinanó ndo'o rá síf cu'naj Herodes yo' gaa cuno so' nana yo' a. Quinanó rá so' se vaa cuno cunudanj nij síf ca'na' nana ca'mii so' se vaa rque so' me ma'an rasuun rihaan chana yaan yo' a. Tzaj ne cataj xna'anj so' se vaa nicaj ya chana yaan se vaa cachíin no' rihaan so' nanj á. <sup>10</sup> Ne ca'ne' so' suun rihaan tanuu ca'anj tanuu taga' ca'ne' tanuu cúu yave síf cu'naj Juan yo' a. Ne danj qui'yaj nij tanuu a. <sup>11</sup> Ne ca'née nij tanuu cúu yave Juan rque aga' rco'oo, ne ca'anj nicaj nij tanuu cúu yave Juan rihaan chana yaan yo', ne caxrij nij so' man yo' ston chana yaan yo' a. Ne ca'anj nicaj chana yaan yo' man cúu yave Juan rihaan nii no' a.

<sup>12</sup> Gaa ne cuchi' nij síf tucu'yón se-nana Juan taga', ne ca'anj nacaj nij so' cúu man síf cu'naj Juan, ne cachin' nij so' man so' rque yo'óo a. Gaa ne ca'anj nij so', cataj xna'anj nij so' rihaan Jesucristó se vaa cavi' síf cu'naj Juan yo' a.

Nana nihánj taj xna'anj se vaa ca'vee quirii Jesucristó se chá 'un' mij snó'o a

<sup>13</sup> Dan me se cuno Jesucristó daj cataj síf cu'naj Herodes che'é so', ne che'é dan curihanj Jesucristó rej yo', ne dan me se cavii so' rque rihoo chée rihaan na, ne ca'anj so' rej quij rej taj vaj yuvi mán a. Ne cuno nij yuvi nana se vaa ca'anj so' rej quij yo' a. Che'é dan curihanj nij yuvi chiháan nij yuvi, ne cachée tacoj nij yuvi tu'va na lacuaná, ne ca'anj nij yuvi rej ca'anj Jesucristó a. <sup>14</sup> Ne nanij Jesucristó rá rihoo, ne quene'en so' se vaa aj mán uxrá yuvi, ne cunuu 'ee rá so' man nij yuvi, ne nahuun sa' taran' nij síf ran' ca'na', qui'yaj so' nanj adonj.

<sup>15</sup> Dan me se cachén ndo'o orá, ne nanij güii, ne cuchi' nij síf tucu'yón se-nana Jesucristó rihaan so', ne cataj nij so':

—Rco' quij uun me nihánj, ne taj se chá chá nij yuvi nihánj, ne cachén ndo'o orá nanj á. Qui'yáá so' se ndo'o, ne na'nej so' chrej man nij yuvi, ca'anj nij yuvi chuman' quiraan nij yuvi se chá nij yuvi á —taj nij so' rihaan Jesucristó a.

<sup>16</sup> —Taj che'é ca'anj nij yuvi ma'. Maan se go' ma'an soj se chá chá nij yuvi á —taj Jesucristó rihaan nij so' a.

<sup>17</sup> —Tzaj ne taj se chá rihaan núj nihánj ma'. Maan grún' 'un' rachruún do', vij guje xcuaj do', vaa rihaan núj nanj á —taj nij so' rihaan Jesucristó a.

<sup>18</sup> —Rque soj man yo' rihanj nihánj á —taj Jesucristó rihaan nij so' a.

<sup>19</sup> Gaa ne ca'ne' Jesucristó suun rihaan nij yuvi ca'anj cayáan nij yuvi rihaan coj chrin', gaa ne coró' so' 'un' nij rachruún ne vij roj xcuaj, ne ni'yaj so' rej xta', ne nago' so' gracia rihaan Diose, gaa ne cuxra' ta'aj so' man rachruún yo', ne caxrij so' ston nij síf tucu'yón se-nana so', ne caxrij nij so' ston nij yuvi a. <sup>20</sup> Gaa ne chá taran' nij yuvi, ne caraa rque cunudanj nij so', ne ndaa quináj ndo'o se chá, qui'yaj nij yuvi a. Gaa ne naqui'yaj chre' nii man se quináj tu'va nij yuvi, ne caraa yo'óo chuvij ya scaa a. <sup>21</sup> Ne nij snó'o rque Jesucristó chraa me se 'un' mij snó'o me nij so', ne ne qui'yaj contá nii man chana man xnii man chá se chá yo' ma'.

Nana nihánj taj xna'anj se vaa cachée Jesucristó rihaan na a

<sup>22</sup> Gaa ne ra'yanj ca'ne' Jesucristó suun rihaan nij síf tucu'yón se-nana so' se vaa cavii nij so' rihoo chée rihaan na ca'anj nij so' rej xco na lacuaná yo', quitaj yaan nij so' rihaan Jesucristó, ne dan me se ma'an Jesucristó na'nej chrej man nij yuvi, taj Jesucristó rihaan nij síf tucu'yón se-nana so' a. <sup>23</sup> Dan me se ca'anj nij so', ne cataj Jesucristó rihaan nij yuvi se vaa ca'vee ca'anj nij yuvi a. Gaa ne cavii grún' so' raaj quij, ne cachíin ni'yaj so' rihaan Diose a. Ne daj doj cata' güii raaj quij, ne so' me se quináj so' raaj quij yo' a.

<sup>24</sup> Dan me se gan' uxrá vaj rihoo nuu nij sí tucu'yón se-nanā Jesucristó rihaan na, ne güéj ndo'o rihoo yo' rihaan na, qui'yaj nanā, che'é se go' nanā rej rihaan rihoo yo' a. <sup>25</sup> Dan me se yan' si'nu' ca'anj Jesucristó rej vaj nij so', chéé tacqj uun so' rihaan na yo', vaj so' nanj adonj. <sup>26</sup> Ne quene'en nij sí tucu'yón se-nanā so' man so' se vaa chéé uun so' rihaan na, ne cuchu'vi' ndo'o nimán nij so' a.

—Ta'naj me yo' ei —taj nij so' rihaan tuvi' nij so', ne caguáj nij so', che'é se cuchu'vi' nij so' a.

<sup>27</sup> Veé dan, ne nu' cataj Jesucristó rihaan nij so' a:

—Naqui'yaj nucaj soj nimán soj ei. 'Unj 'na' ei. Se cuchu'vi' soj ma' —taj so' rihaan nij so' a.

<sup>28</sup> Gaa ne cataj Pedró rihaan so' a:

—Sese ya ya veé so' 'na', ne qui'yáá so' se ndo'o, ne ca'vee cachee 'unj rihaan na qui'yáá so', Señor —taj Pedró rihaan Jesucristó a.

<sup>29</sup> —Ca'vee ca'na' so' á —taj Jesucristó rihaan Pedró a.

Ne nanij Pedró rá rihoo, ne cachéé so' rihaan na, ne ca'anj so' rihaan Jesucristó a. <sup>30</sup> Tzaj ne ni'yaj so' na se vaa cavii ndo'o nanā yo', ne cuchu'vi' so', ne guun che'e so' ca'anj nij so' rque na yo' a. Che'é dan caguáj so' rihaan Jesucristó, cataj so':

—Tīnani so' manj rihaan na, Señor —taj so' a.

<sup>31</sup> Veé dan, ne nu' quita'aa Jesucristó ra'a Pedró, ne quirii Jesucristó man so' rque na, ne cataj Jesucristó:

—Doj amán rá so' ni'yaj so' manj á. Me che'é guun vij nimán so' ga —taj Jesucristó rihaan so' a.

<sup>32</sup> Gaa ne catúj roj so' rque rihoo chéé rihaan na, gaa ne canicun' nanā yo' a. <sup>33</sup> Gaa ne canicun' ruj nij sí man rque rihoo rihaan Jesucristó, ne cataj nij so':

—Ya ta'nij Diose mé so' á —taj nij so' a.

**Nanā nihánj taj xna'anj se vaa nari' nucaj nij sí ran' man rej cu'naj Genesaret, qui'yaj Jesucristó a**

<sup>34</sup> Gaa ne cuchi' nij so' tu'va na lacuaná, ne ca'anj nij so' rej cu'naj Genesaret a. <sup>35</sup> Ne nuu yaan nij sí man rej yo' man Jesucristó, ne ca'néé nij so' nanā rihaan cunudanj nij sí yanj nu' anicaj se vaa ca'na' Jesucristó a. Ne nicaj nii man cunudanj nij sí ran' yanj rej yo' ca'na' nii rihaan Jesucristó a. <sup>36</sup> Ne cachíin ni'yaj uxrá nij yuvij rihaan Jesucristó se vaa ca'vej Jesucristó cano' ra'a nij so' doj tu'va sagan' so' a. Ne nu' nij sí cano' ra'a doj tu'va sagan' so' ro', nahuun sa' cunudanj nij so' cuaj nanj adonj.

**Nanā nihánj taj xna'anj me che'é ne na'ya' nij sí tucu'yón se-nanā Jesucristó gaa chá nij so' chraa a**

**15** Gaa ne quinichrun' sí fariseo do', quinichrun' sí naqui'yaj cuu se-tucañj Moisés do', rihaan Jesucristó, ne sí cavii chuman' Jerusalén me nij so' a. Ne xná'anj nij so' man Jesucristó, cataj nij so':

<sup>2</sup> —Nij sí tucu'yón se-nanā so' ro', me che'é ne uno nij so' nanā cataj xna'anj nij sí man gaa naá ga. 'O se ne na'ya' nij so' gaa chá nij so' chraa ma' —taj nij so' rihaan Jesucristó a.

<sup>3</sup> Gaa ne cataj Jesucristó rihaan nij so' a:

—Danj nanj ma'an soj, ne me che'é ne uno ma'an soj se-nanā Diose 'yaj ma'an tucuáan noco' soj ga. <sup>4</sup> 'O se ca'ne' Diose suun se vaa: “Carāā cochróo so' rihaan rée so' do', rihaan ní so' do' á”. Ne: “Sí a'mii chree rihaan rej do', rihaan nii do', me se vaj so' ne nu' che'e caví' so' á”. Danj vaa nanā cataj xna'anj Diose rihaan ní á. <sup>5</sup> Tzaj ne taj soj se vaa sese cataj yo'o so' rihaan rej so' do', rihaan nii so' do', se vaa aj rque so' nu' si'yaj so' rihaan Diose ne che'é dan se ca'vee racuíj so' man rej so' do', man nii so' do', <sup>6</sup> ne daj chihāā mīj ne nó xcúún so' racuíj so' man rej so' do', man nii so' do', taj soj a. Dan me se danj inanj a'mii soj gaa tucu'yón soj se-nanā nij sí man gaa naá, ne axríj yuve soj man se-nanā Diose nanj adonj.

<sup>7</sup> Dan me se sí tu'va rma'an me soj nanj á. Dan me se ca'mii natáj sí cu'naj Isaías se-nanā Diose gaa naá, ne cataj xna'anj so' daj sij me soj a. Cataj so': <sup>8</sup> “Yuvij nihánj ro', ase vaa nanā a'mii sí aráj cochroj rihanj vaa nanā a'mii nij so', tzaj ne tu'va rma'an nij so' nanj á. Nimán nij so' me se ino' vaa nanj adonj. 'O se ne noco' uxrá nimán nij so' manj ma'. <sup>9</sup> Na'víj rma'an nij so' rihanj nanj á. 'O se nanj se-nanā yuvij me nanā tucu'yón nij so' nanj adonj”. Dan me se-nanā Diose nanā a'mii che'é soj á —taj Jesucristó rihaan nij sí fariseo do', rihaan nij sí naqui'yaj cuu se-tucañj Moisés rihaan yuvij do' a.

<sup>10</sup> Gaa ne canacúún Jesucristó man nij yuvij ca'na' nij yuvij rihaan so' a. Gaa ne cataj so' rihaan nij yuvij:

—Cunō soj nanā nihánj, ne xcāj soj cuentá nedí'.

<sup>11</sup> Nuveé se atúj tu'va yuvij me se 'yaj chi'ii man yuvij ma'. Se avii tu'va yuvij ro', 'yaj chi'ii man yuvij adonj —taj Jesucristó rihaan nij yuvij a.

<sup>12</sup> Gaa ne cuchi' nij sí tucu'yón se-nanā Jesucristó rihaan Jesucristó, ne cataj nij so':

—Ne'én so' se vaa ca'maan rá nij sí fariseo che'é nanā ca'mii so' rihaan nij so' na' —taj nij so', xná'anj nij so' man Jesucristó a.

<sup>13</sup> Gaa ne cataj Jesucristó:

—Xa' nij so', tzaj ne ase vaa coj xra' ma'an vaa nij so' do', vaa nanā tucu'yón nij so' do' adonj. Nuveé sij tucu'yón se-nanā Diose me nij so' ma'. Che'é dan, ase vaa tiri' nii man coj xra' ma'an ro', danj gaa tiri' Diose man nij so' ga nanā tucu'yón ma'an nij so' nanj adonj.

<sup>14</sup> Tanáj nij soj man nij so' á. Me rá nij so' catāj xna'anj nij so' rihaan yuvij daj qui'yaj yuvij á. Tzaj ne ase vaa sí aráán rihaan vaa nij so' adonj. Dan me se ne'en soj se vaa sese guun rá sí tuchrij racuíj so' man yo'ó sí tuchrij nari' so' chrej ca'anj so', ne quini roj sí tuchrij yo' rá yu'uj nanj ei —taj Jesucristó rihaan nij sí tucu'yón se-nanā so' a.

<sup>15</sup> Gaa ne cataj Pedró rihaan so' a:

—Cataj xna'anj so' rihaan núj me taj nanā ca'mii so' che'é se atúj tu'va yuvij á —taj Pedró a.

<sup>16</sup> Gaa ne cataj Jesucristó:

—Vaa soj vaa, ne ataa xcāj ma'an soj do' cuentá a na'. <sup>17</sup> Ne ne'en soj se vaa nu' se atúj tu'va yuvij ro', achén yo' rque yuvij, ne urihanj yo' gaa re'é yuvij nanj

á. <sup>18</sup> Tzaj ne se urihanj tu'va yuvij ro', yo' me nana avii nimán yuvij, ne nana yo' me 'yaj chi'ii ndo'o man yuvij adonj. <sup>19</sup> 'O se nihánj me se chi'ii avii nimán yuvij a: se chi'ii do', yan ticavi' man tuvi' do', yan cotoj ga nicá tuvi' do', che'é yan qui'yaj ityu si'yaj tuvi' do', che'é yan ca'mij ne che'é tuvi' do', che'é yan nachri' ni'yaj man tuvi' do', me nu' se avii nimán yuvij, <sup>20</sup> ne nu' yo' me se vaa 'yaj chi'ii man yuvij nanj adonj. Tzaj ne che'é nu' se chá yuvij me se ca'vee se ne na'ya' yuvij gaa chá yuvij chraa, tzaj ne se qui'yaj chi'ii yo' man yuvij ma' —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa cuchumán rá 'o chana cananea se vaa racuíj Jesucristó man no' a**

<sup>21</sup> Gaa ne curihanj Jesucristó rej yo', ne ca'anj so' rej naj chuman' cu'naj Tiro do', chuman' cu'naj Sidón do' a. <sup>22</sup> Gaa ne curihanj 'o chana cananea chana ne rej yo' a. Ne caguáj ndo'o no' rihaan Jesucristó, cataj no':

—Ne'enj se vaa tuvi' sí cu'naj David sí cane gaa naá mé so', Señor. Che'é dan cunu 'ee rá so' manj á. 'O se canó uxrá nana chree man ta'nij chalá cunii nanj á —taj chana yo', caguáj no' rihaan Jesucristó a.

<sup>23</sup> Tzaj ne a 'ó nana ne ca'mij Jesucristó rihaan no' a. Gaa ne cuchi' nij sí tucu'yón se-nana Jesucristó rihaan so', ne cachíin ni'yaj nij so' rihaan so', cataj nij so':

—Qui'yáa so' se ndo'o, ne cataj xna'anj so' rihaan chana yo' se vaa ca'anj chana yo' nanj ruguanj. 'O se nocó' uxrá no' man ní, ne aguáj ndo'o no' nanj asanj —taj nij so' a.

<sup>24</sup> Gaa ne cataj so':

—Nanj chana yanij me no', ne inanj rihaan nij yuvij israelitá ca'née Diose manj nanj á. 'O se ase vaa daán Diose matzinj ro', vaa nij sí israelitá rihaan Diose, ne aj ca'anj ni'ya uxrá nij so', ne che'é yan nang' 'unj man sí ca'anj ni'ya 'naj nanj adonj —taj Jesucristó rihaan nij so' a.

<sup>25</sup> Gaa ne cuchi' chana yo' rihaan Jesucristó, ne canicun' ruj no' rihaan Jesucristó, ne:

—Racuíj so' manj, Señor —taj no' a.

<sup>26</sup> Gaa ne cataj so':

—Dan me se ne'én so' se vaa se ca'vee cata'aa ní co'oo man rihaan nij xnii ne go' ní' chá nij chuvee ma'. Che'é dan ne nó xcúnj racuíj man soj sij yanij a man adonj. Maan se inanj ma'an nij yuvij israelitá me no xcúun 'unj racuíj 'unj nanj adonj —taj Jesucristó rihaan chana yo' a.

<sup>27</sup> Gaa ne cataj no':

—Veé danj vaa guée, Señor. Ne nij chuvee ro', chá nij xo' tachruu ayuu tu'va se-xqui' nij xo' nanj á. Ne ase vaa chuvee chá tachruu vaa 'unj rihaan so' nanj adonj. Che'é dan me ndo'o raj racuíj so' doj manj, raj nanj adonj —taj chana yo' rihaan Jesucristó a.

<sup>28</sup> Gaa ne cataj Jesucristó:

—Cuchumán uxrá rá so' ni'yaj so' manj, nocoj. Che'é dan qui'yáj se vaa achíin so' rihanj nanj ei —taj Jesucristó rihaan no' a.

Ne veé maan orá dan nahuun sa' ta'níi chana yo' a.

**Nana nihánj taj xna'anj se vaa nahuun sa' uxrá yuvij, qui'yaj Jesucristó a**

<sup>29</sup> Gaa ne curihanj Jesucristó rej yo', ne cachén so' na lacuaná cu'naj Galilea, gaa ne cavii so' raá 'o quij, ne ca'anj cayáán so' rihaan yo'óo a. <sup>30</sup> Ne cuchi' uxrá yuvij rihaan so', ne ca'na' nij yuvij nicaj nij yuvij man tuvi' nij yuvij sí ran' rihaan so' a. Dan me se sí chéé rengó do', sí tuchrij do', sí ya'mij do', sí anó chi'ii do', cuchi' rihaan Jesucristó, qui'yaj nij yuvij, ne cuchruj nij yuvij man nij sí ran' yo' tacóo Jesucristó, ne nahuun sa' nij so', qui'yaj Jesucristó a. <sup>31</sup> Ne caráya'anj ndo'o nij yuvij quene'en nij yuvij se vaa ca'mii nij sí ya'mij yo' do', se vaa cachéé sa' nij sí rengó do', se vaa nachuguun rihaan nij sí tuchrij do' a. Ne sa' uxrá ca'mii nij yuvij che'é Diose se vaa ve'é ndo'o vaa Diose sí nocó' nij yuvij israelitá man a.

**Nana nihánj taj xna'anj se vaa go' Jesucristó se chá rihaan ca'anj mij snó'o a**

<sup>32</sup> Gaa ne canacúun Jesucristó ca'na' nij sí tucu'yón se-nana so' rihaan so', ne cataj so':

—Cunuu 'ee raj man nij yuvij nihánj nanj á. 'O se quisij va'núj güii mán nij so' gaj, ne taj yan vaj se chá nij so' a ma'. Ne na'vej raj ca'nej 'unj man nij so' ca'anj nij so' ma'. 'O se vaj nij so' chrej, ne na'aan rque nij so', ne ninaj nij so' rá chrej, rá 'unj nanj adonj —taj Jesucristó a.

<sup>33</sup> Ne cataj nij sí tucu'yón se-nana so' rihaan so' a:

—'O se rco' quij yun me nihánj, ne me rej quirí' ní' rachrúun chá cunudanj nij yuvij nihánj ga —taj nij so' a.

<sup>34</sup> —Me daj rachrúun vaa rihaan soj ga —taj Jesucristó, xna'anj so' man nij sí tucu'yón se-nana so' a.

—Daj 'o chij rachrúun ne daj doj xcuaj le'ej nii ne, vaa rihaan núj nanj adonj —taj nij so' a.

<sup>35</sup> Gaa ne ca'ne' Jesucristó suun rihaan nij yuvij se vaa cayáán nij yuvij rihaan yo'óo a. <sup>36</sup> Gaa ne nicaj so' chij rachrúun yo' ne doj xcuaj, ne nago' so' graciá rihaan Diose, gaa ne cuxra' ta'aj so' man rachrúun yo' do', man nee xcuaj yo' do', ne caxrj so' ston nij sí tucu'yón se-nana so', ne rqué nij so' rihaan nij yuvij a.

<sup>37</sup> Gaa ne chá cunudanj nij yuvij, ne ndaa caraa rque nij so' a. Gaa ne naquiyaj chre' nii se vaa quináj tu'va nij yuvij yo', ne quisij 'o cunu' chij ya scaa caraa qui'yaj se quináj tu'va nij yuvij yo' a. <sup>38</sup> Dan me se cunudanj nij so' chá, ne quisij ndaa ca'anj mij nij snó'o chá, ne ino me se chá nij chana do', nij xnii do', nanj adonj. <sup>39</sup> Gaa ne na'née Jesucristó chrej man nij yuvij, ne cavii so' rá rihoo chéé rihaan na, ne ca'anj so' rej cu'naj Magadán a.

**Nana nihánj taj xna'anj se vaa cachíin nij sí fariseo do', nij sí saduceo do', qui'yaj Jesucristó 'o suun sa' nocóo quene'en nij so' a**

**16** Gaa ne cuchi' nij sí fariseo cuchi' nij sí saduceo cuchi' rihaan Jesucristó, ne me rá nij so'

quene'en nij so' sese ya sí ca'née Diose me Jesucristó a. Che'é dan cachíin ni'yaj nij so' rihaan Jesucristó se vaa raçuíj Diose man Jesucristó, ne qui'yaj Jesucristó 'o suun sa' nocõo quene'en nij so', gaa ne guun ya rá nij so' se vaa sí ca'née ya Diose me Jesucristó, rá nij so' a.<sup>2</sup> Gaa ne ca'mii Jesucristó rihaan nij so', cataj so':

—Dan me se gaa ata' güii, ne ni'yaj soj xtá', ne sese marée vaa xtá', ne: "Xraj, ne x'nuu a'yuj", taj soj á. <sup>3</sup> Ne rej na'yaan ni'yaj soj xtá', ne sese marée vaa rej xtá', ne sese aráán ndo'o ngaa rej xtá', ne: "Corá caman' uxrá maan", taj uún soj á. Dan me se ne'en soj xcaj soj cuentá che'é se vaa ne'en soj rej xtá', tzaj ne ne ne'en soj xcaj soj cuentá che'é sayuun quirán' soj sij man rihaan chumii nihánj vaa güii a ma'.

<sup>4</sup> "Maan che'é se yuvii 'na' rej chi'ij na'vej rá canocõ' sa' man Diose me soj sij israelitá, ne che'é dan me rá soj qui'yáj suun sa' nocõo á. Tzaj ne se qui'yáj suun sa' nocõo ma'. Maan se quene'en soj se vaa ase vaa quirán' sí cu'naj Jonás sí nata' se-nana Diose gaa naá ro', danj quirán' 'unj, vaa güii nanj á —taj Jesucristó rihaan nij sí fariseo do', rihaan nij sí saduceo do' a. Gaa ne tanáj Jesucristó man nij so', ne ca'anj so' a.

**Nana nihánj taj xna'anj se vaa ne ca'vej rá Jesucristó cunõo nij sí tucu'yón se-nana so' man nana tucu'yón nij sí fariseo do', nij sí saduceo do' a**

<sup>5</sup> Gaa ne ca'anj nij sí tucu'yón se-nana Jesucristó rej xcõ na lacuaná, gaa ne xcaj nij so' cuentá se vaa quini'yón nij so', ne nicaj nij so' rachrúun chá nij so' a.

<sup>6</sup> Gaa ne cataj Jesucristó rihaan nij so' a:

—Cütumé soj man soj se gaa nanj quirán' soj sayuun, qui'yaj se-levadura nij sí fariseo do', nij sí saduceo do' á —taj Jesucristó no nij so' a.

<sup>7</sup> Ne nuchruij raá ndo'o nij sí tucu'yón se-nana Jesucristó che'é nana ca'mii so', ne:

—Che'é se taj rachrúun nicaj ní', ne che'é dan a'mii so' che'é levadura se 'yaj naraa nana rque rachrúun nanj adõnj —taj nij so' a.

<sup>8</sup> Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj gá. 'O se doj amán rá soj ne'en soj manj vaa gaa nanj asan. <sup>9</sup> Me che'é ataa xcaj soj cuentá gá. Ne ne nuú rá soj gaa vaa daj 'o 'un' guée rachrúun rihaan ní' tzaj ne quisij chá cunü' 'un' mój snó'o, qui'yáj a. Ne ndaa que'ee scaa se chá quináj tu'va yuvii gaa naqui'yaj chre' soj a. <sup>10</sup> Ne me che'é quini'yón soj che'é chij rachrúun gá. Ne nuú rá soj gaa vaa daj 'o chij guée rachrúun rihaan ní' tzaj ne quisij chá cunü' ca'anj mój snó'o, qui'yáj a. Ne ndaa que'ee scaa se chá quináj gaa naqui'yaj chre' uún soj a. <sup>11</sup> Daj me che'é ne ne cunõ soj gá. Nuveé che'e nanj rachrúun ca'mij rihaan soj ma'. Maan se cütumé soj man soj se gaa nanj quirán' soj sayuun qui'yaj se-levadura nij sí fariseo do', nij sí saduceo do' adõnj —taj Jesucristó rihaan nij so' a.

<sup>12</sup> Gaa ne xcaj nij so' cuentá se vaa nuveé che'e nanj levadura se 'yaj naraa nana rque rachrúun me cataj xna'anj Jesucristó rihaan nij so' se vaa cütumé nij so'

man nij so'; maan ne 'o se che'e se ne ca'vej rá Jesucristó tihá' yu'unj nij sí fariseo do', nij sí saduceo do', man nij so' gá se-nana nij so' ro', che'é dan ca'mii Jesucristó nana vaa danj rihaan nij sí nocõ' man so' nanj adõnj.

**Nana nihánj taj xna'anj se vaa cataj xna'anj Pedró me sí me Jesucristó a**

<sup>13</sup> Gaa ne ca'anj Jesucristó rej nanj chuman' cu'naj Cesarea de Filipo, gaa ne xná'anj so' man nij sí tucu'yón se-nana so', cataj so':

—Daj taj nij yuvii che'é 'unj sij ca'née Diose nicaj yu'unj man yuvii gá. Ne me sí mé 'unj, taj nij yuvii gá —taj Jesucristó, xná'anj so' man nij so' a.

<sup>14</sup> —Vaa sí taj se vaa sí cu'naj Juan sí cuta' ne man yuvii mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa sí cu'naj Jeremías do', yo'ó sí nata' se-nana Diose gaa naá do', me uún so' xa'. 'O se danj taj 'o 'o nij yuvii che'é so' nanj adõnj —cataj nij so' rihaan Jesucristó a.

<sup>15</sup> —Ne ma'an soj, gaa ne me sí mé 'unj, rá ma'an soj gá —taj Jesucristó, xná'anj so' man nij sí tucu'yón se-nana so' a.

<sup>16</sup> Gaa ne cataj sí cu'naj Simón Pedró:

—Sí ca'née Diose tinanii man yuvii rihaan sayuun mé so', ne ta'nij Diose sí vaa i'na' ya mé so' ei —taj so' rihaan Jesucristó a.

<sup>17</sup> Gaa ne cataj Jesucristó rihaan Pedró a:

—Qui'yaj uxrá Diose se luj che'é so', Simón ta'nij sí cu'naj Jonás á. 'O se nuveé nana cataj xna'anj yuvii rihaan so' me nana ca'mii so' cuano ma'. 'O se Réé 'unj sí nicun' xtá' me sí racuíj mán so' narí' so' nana yo' nanj adõnj. <sup>18</sup> Ne cuano nihánj me se cataj xna'anj 'unj rihaan so' se vaa ya Pedró cu'naj so', che'é se ase vaa yuvej ne tacóo ve' ro', vaa so', ne sí nucuaj ndo'o nimán mé so' ei. Che'é dan, ase vaa 'yaj nii une' nii ve' xráa yuvej ro', danj gaa qui'yáj, cuné' 'unj man nij sí nocõ' manj, se vaa guun nucuaj rá nij so' mán so', ne nicaj yu'unj so' man nij so', qui'yáj nanj adõnj. Ne se cavi' nü' soj sij nocõ' manj a ma'. 'O se gaa i'na' soj nü' cavii nü' ca'anj nanj adõnj. <sup>19</sup> Ne cuné' 'unj mán so' se vaa guún so' sí qui'yaj cayáan yuvii gá Diose asa' guun chij Diose rihaan chumii nihánj, ne nanj guun rasuun cataj xna'anj so' se vaa ne nó xcúun yuvii qui'yaj yuvii me se veé danj ma'an Diose na'vej qui'yaj yuvii danj ma'. Ne nanj guun rasuun cataj xna'anj so' se vaa ca'vee qui'yaj yuvii me se veé danj ma'an Diose a'vej qui'yaj yuvii danj adõnj. —Inanj danj ca'mii Jesucristó rihaan sí cu'naj Pedró a.

<sup>20</sup> Gaa ne cataj xna'anj Jesucristó rihaan nij sí tucu'yón se-nana so' se vaa se nata' nij so' rihaan a 'ó yuvii se vaa sí ca'née Diose tinanii man yuvii rihaan sayuun me so', taj so' a.

Nana nihánj taj xna'anj se vaa cataj xna'anj Jesucristó se vaa caví' so', ne cunuu i'na' uún so' a

<sup>21</sup> Dan me se güii yo' guun che'e Jesucristó cataj xna'anj Jesucristó rihaan nij sí tucu'yón se-nana so' se vaa no xcúun so' caví' so' chuman' Jerusalén, ne quirán' ndo'o so' sayuun qui'yaj nij sí uun chij do', nij xrej atá suun nocoo doj do', nij sí naqui'yaj cuu se-tucuaj Moisés rihaan nij yuvií do' a. Ne ticaví' nii man so', ne cachén va'nuy güii, gaa ne cunuu i'na' uún so', cataj so' a. <sup>22</sup> Gaa ne quirii yaníj sí cu'naj Pedró man Jesucristó, ne guun che'e so' cataj so' se vaa ne nó xcúun Jesucristó ca'mii Jesucristó danj a. Ne cataj Pedró:

—Cunuu 'e'e rá Diose mán so', Señor. Daj chihaa míj se quirán' so' danj ma' —taj Pedró rihaan Jesucristó a.

<sup>23</sup> Gaa ne canicaj Jesucristó, ne ca'mii so' rihaan Pedró a:

—Naxuun so' mán so' rihanj á. Na'vej raj quene'enj mán so' ma'. 'O se ase tu'va sí chree sí cu'naj Satanás ro', danj tu'vá so', ne aráan so' chrej rihanj cunoj rihaan Diose ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvií nanj adonj —taj Jesucristó rihaan sí cu'naj Pedró yo' a.

<sup>24</sup> Gaa ne cataj Jesucristó rihaan nij sí tucu'yón se-nana so' a:

—Sese me rá yo'o so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quirán' uxrá so' sayuun do', ca'vee se ndaa cachron nii man so' rihaan rcutzé do', tzaj ne yo'o qui'yaj suun so' che'ej, ne yo'o canoco' raan so' manj adonj. <sup>25</sup> Tzaj ne sese vaa 'o sí me rá tinanii man ma'an rihaan sayuun, ne vaa güii yo'o caví' nimán so' adonj. Tzaj ne sese caví' yo'o so' che'é se vaa me so' sí nocoo' manj, ne vaa güii cunuu i'na' uún so' adonj.

<sup>26</sup> Ne a me se quirii 'o so' sese qui'yaj canaán so' nu' rasuun man rihaan chumii nihánj ne ca'anj ni'ya nimán so', rá soj ga. Daj chihaa míj se ca'vee cavii sa' so', qui'yaj rasuun man rihaan chumii nihánj a ma'. Tzaj ne ca'vee se navij nu' si'yaj yo'o so' rihaan chumii nihánj, tzaj ne sese gaa i'na' nimán so' nu' cavii nu' ca'anj, ne quinano rá so', rá soj na'. Daj chihaa míj se quinano rá so' a ma'. 'O se cavii sa' uxrá so' nanj adonj.

<sup>27</sup> 'O se ya ya ca'na' 'unj sij ca'née Diose nicaj yu'unj man yuvií, ne uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj nanj adonj. Gaa ne naru'vee 'unj rihaan 'o 'o so' che'é suun qui'yaj suun 'o 'o so' nanj adonj. <sup>28</sup> Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano me se gaa ataa a caví' ta'aj soj, ne ya quene'en ta'aj soj asa' ca'ná' 'unj guun chij 'unj rihaan chumii nihánj, ne quene'en ta'aj soj manj nanj adonj. Dan me se sí ca'née Diose nicaj yu'unj man yuvií mej nanj adonj —taj Jesucristó rihaan nij sí tucu'yón se-nana so' a.

Nana nihánj taj xna'anj se vaa chuguun ndo'o man Jesucristó ni'yaj nij sí tucu'yón se-nana so' a

<sup>17</sup> Cachén vatan' güii, gaa ne nicaj Jesucristó man sí cu'naj Pedró do', sí cu'naj Jacobo do', tinúú Jacobo sí cu'naj Juan do', ca'anj so' raá 'o quij xcaan rej taj vaj a 'ó yuvií ne a. <sup>2</sup> Gaa ne yo'o cunuu ino cunudanj man Jesucristó ni'yaj nij sí tucu'yón se-nana so', ne dan me se chuguun ndo'o rihaan so', ne ase vaa chuguun güii ro', danj chuguun rihaan so' nanj á. Ne nuu catzii ndo'o sagan' so', ne ase vaa ya'an chuguun vaa sagan' so' a. <sup>3</sup> Gaa ne naqui'yaa sí cu'naj Moisés sí cane gaa naá ga sí cu'naj Elías sí cane gaa naá rihaan nij so', ne nanó roj so' cuentó ga Jesucristó a. <sup>4</sup> Gaa ne cataj Pedró rihaan Jesucristó a:

—Cunaj uxrá vaa mán núj nihánj ga so', Señor. Sese me rá so', ne qui'yáá 'unj va'nuy ve' yacataj cané soj nanj á. 'O ve' cané so', ne yo'ó ve' cané sí cu'naj Moisés, ne yo'ó ve' cané sí cu'naj Elías ei —taj Pedró rihaan Jesucristó a.

<sup>5</sup> Ataa quisij ca'mii Pedró, ne ca'na' 'o ngaa chuguun ndo'o, ne caráan ngaa chuguun yo' man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose:

—Sí nihánj me ta'nij adonj. 'Ee raj man so', niha' raj ni'yaj 'unj man so' adonj. Cuno soj rihaan so' ei —taj Diose cuno nij so' a.

<sup>6</sup> Dan me se cuno nij sí tucu'yón se-nana Jesucristó nana yo', gaa ne ca'anj quinaj nij so' rihaan yo'óo, ne cuchu'vi' ndo'o nij so' a. <sup>7</sup> Gaa ne cuchu' Jesucristó rihaan nij so', ne cuta' ra'a so' xraá nij so', ne cataj so':

—Canicun' caya soj, ne se cuchu'vi' soj ma' —taj so' a.

<sup>8</sup> Gaa ne naxcaj rihaan nij so' ni'yaj nij so', ne daj grún' Jesucristó nicun', quene'en nij so' nanj adonj.

**Nana nihánj taj xna'anj se vaa ase vaa sí cu'naj Elías ro', danj vaa sí cu'naj Juan sí cuta' ne man yuvií a**

<sup>9</sup> Gaa ne gaa nanij nij so' tacóo quij yo' me se ca'ne' Jesucristó suun rihaan nij so', cataj so':

—Se nata' soj rihaan a 'ó yuvií che'é se vaa quene'en soj cuan' ma'. Yo'o díng gaa tu'va soj che'é se vaa quene'en soj á. Ndaa quisij caví' 'unj ne cunuu i'na' uún 'unj, gaa ne ca'vee nata' soj se vaa quene'en soj daj quirán' 'unj sij ca'née Diose nicaj yu'unj man yuvií nanj adonj —taj Jesucristó rihaan nij so' a.

<sup>10</sup> Gaa ne xná'anj nij sí tucu'yón se-nana so' man so', cataj nij so':

—Me che'é taj nij sí naqui'yaj cuu se-tucuaj Moisés rihaan yuvií se vaa asino ca'na' sí cu'naj Elías sí nata' se-nana Diose gaa naá, gaa ne ca'vee ca'ne' Diose cacun' che'é yuvií ga —taj nij sí tucu'yón se-nana Jesucristó, xná'anj nij so' man Jesucristó a.

<sup>11</sup> Gaa ne cataj Jesucristó:

—Ya a'mii nij sí naqui'yaj cuu se-tucuaj Moisés, taj nij so' se vaa asino ca'na' sí cu'naj Elías, gaa ne naqui'yaj sa' so' nu' rasuun adonj. <sup>12</sup> Tzaj ne cuano ni-

hánj me se cataj xna'anj 'unj rihaan soj se vaa aj ca'na' síí cu'naj Elías yo', tzaj ne ne cunō nij yuvii rihaan so' ma'. Maan se qui'yaj ya nij yuvii ndaa vaa me rá ma'an nij yuvii man so' nanj adonj. Ne nda' se sij ca'neé Diose nicaj yu'unj man yuvii mej, tzaj ne ase vaa quiran' so' sayuun qui'yaj nij yuvii ro', danj inanj qui'rán' 'unj sayuun qui'yaj uún nij yuvii nanj adonj —taj Jesucristó a.

<sup>13</sup> Gaa ne xcax nij síí tucu'yón se-nana Jesucristó cuentá se vaa ca'mii Jesucristó che'é síí cu'naj Juan síí cuta' ne man yuvii cataj Jesucristó se vaa síí nacaj se-suun síí cu'naj Elías me síí cu'naj Juan yo' a.

**Nana nihánj taj xna'anj se vaa nahuun sa' 'o xnii nyu nanā chree nimán, qui'yaj Jesucristó a**

<sup>14</sup> Gaa ne ca'anj nij so' rej vaj ndo'o yuvii, ne cuchí 'o snó'o rihaan Jesucristó, gaa ne canicun' ruj so' rihaan Jesucristó, gaa ne cataj so':

<sup>15</sup> —Cunuu 'ee rá so' man ta'níj, Señor. 'O se quisnúú so', qui'yaj yavii, ne inanj naxru' so' rihaan ya'an, ne ran' ndo'o so' sayuun nanj adonj. Veé dan, ne inanj naxru' so' rque na uún, ne ne ni'yanj uxrá ran' so' ma'.

<sup>16</sup> Ne ca'anj nicaj 'unj man so' rihaan nij síí tucu'yón se-nana so', tzaj ne taj se qui'yá' nahuun sa' so', qui'yaj nij so' ma' —taj snó'o yo' a.

<sup>17</sup> Gaa ne cataj Jesucristó:

—Dan me se síí ne amán rá me soj sij man rihaan chumii nihánj cuang, ne chi'ii vaa nimán soj, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nicaj soj man xnii ca'na' soj rihanj cuaj á —taj Jesucristó a.

<sup>18</sup> Gaa ne ca'ne' Jesucristó suun rihaan nanā chree nyu nimán xnii se vaa tanáj so' man xnii yo' a. Gaa ne curihanj so' nimán xnii, ca'anj so', ne veé maan orá dan nahuun sa' xnii yo' a.

<sup>19</sup> Gaa ne cuchí inanj nij ma'an nij síí tucu'yón se-nana Jesucristó rihaan Jesucristó, ne xná'anj nij so' man so', cataj nij so':

—Me che'é ne guun nucuaj núj ca'vee quirii núj man nanā chree yo' nimán xnii ga —cataj nij so', xná'anj nij so' man Jesucristó a.

<sup>20</sup> Gaa ne cataj Jesucristó:

—Che'é se doj amán rá soj, che'é dan ne ca'vee guun nucuaj soj ei. Tzaj ne ne'en soj se vaa caán man raā cuêj mostazá xlá, ne nda' se tzin' vaa yo', tzaj ne asa' achij yo', ne ase vaa caán chruun chii ndo'o ro', vaa yo' ei. Ne ase vaa caán cuêj mostazá xlá yo' ro', danj gaa ma'an soj á. Ya ya cataj xna'anj 'unj rihaan soj se vaa sese ya amán rá soj ne sese cataj soj rihaan 'o quij se vaa curihanj quij yo' rej nicun' yo' ne natuna quij yo' rej nicun' quij yo', ne sese ya ya cuchuman rá soj se vaa ca'anj quij yo', ne cavii quij yo' rej nicun' yo', ne ca'anj yo' níchrej ei. Ne guun nucuaj soj qui'yaj soj cunudanj nanj adonj. <sup>21</sup> Ne nanā chree vaa danj ro', se ca'vee qui'yaj ní' curihanj nij so' nimán yuvii sese ne achíín ni'yaj ndo'o ní' rihaan Diose ne sese ne toco' ní' x'naa man ma'an ní' che'é se aráj guêe ní' rihaan Diose a —taj Jesucristó rihaan nij so' a.

**Nana nihánj taj xna'anj se vaa cataj xna'anj uún Jesucristó se vaa caví' so' ne cunuu i'na' uún so' a**

<sup>22</sup> Dan me se cunuu chre' uún taran' nij so' estadó Galilea, gaa ne cataj Jesucristó rihaan nij síí tucu'yón se-nana so' a:

—'O se síí ca'neé Diose nicaj yu'unj man yuvii mej, ne vaa güii nago' nii manj rihaan yuvii adonj. <sup>23</sup> Dan me se ticaví' nij yuvii manj, gaa ne cachēn va'nuj güii, gaa ne cunuu i'na' uún 'unj nanj adonj —taj Jesucristó a.

Gaa ne quinanó ndo'o rá nij síí tucu'yón se-nana so' a.

**Nana nihánj taj xna'anj me che'é ne nó xcúún Jesucristó go' so' puextó che'é nuvíí a**

<sup>24</sup> Catúj nij so' chuman' Capernaum, gaa ne cuchí nij síí ca'néj puextó che'é nuvíí rihaan síí cu'naj Pedró, ne xná'anj nij so' man Pedró, cataj nij so':

—Síí tucu'yón nanā rihaan soj ro', o' so' puextó che'é nuvíí na' —taj nij so' a.

<sup>25</sup> —O' so' ei —taj Pedró rihaan nij so' a.

Gaa ne catúj Pedró rá ve', tzaj ne aj ne'en Jesucristó se vaa me rá Pedró xná'anj Pedró sese ya o' Jesucristó puextó che'é nuvíí a. Che'é dan asino Jesucristó xná'anj man Pedró, cataj so':

—Daj uun rá so', ga Simón'. Nij síí nicaj suun rey uun chij rihaan yuvii man rihaan chumii nihánj me se me síí a'néj nij so' puextó rihaan ga. Rihaan ma'an ta'níí nij so' na'. Ase rihaan yo'ó yuvii xa' —taj Jesucristó, xná'anj so' man Pedró a.

<sup>26</sup> —Rihaan yo'ó yuvii adonj —taj Pedró rihaan Jesucristó a.

Gaa ne cataj Jesucristó:

—Che'é dan taj che'é go' ta'níí síí nicaj suun puextó ma'. Ne ase vaa síí nicaj suun vaa Réé 'unj Diose, ne rii ta'nga' so' rihaan nuvíí, ne che'é dan ne nó xcúnj goj puextó che'é nuvíí ma'.

<sup>27</sup> "Tzaj ne se guun ca'maan rá nij síí a'néj puextó che'é nuvíí, qui'yaj ní' ma'. Che'é dan ca'anj so' tu'va na lacuaná, ne tagüéj so' 'o aga' ata'aa xcuaj rque na, ne quita'aa so' xcuaj canō aga' asino yaan á. Gaa ne nuxra' so' tu'va xcuaj yo', ne quirí' so' sa'anj aga' es-tatero tu'va xcuaj yo', ne go' so' sa'anj yo' che'é ní' rihaan nij síí a'néj puextó á —taj Jesucristó a.

**Nana nihánj taj xna'anj me síí me síí guun chij doj asa' guun chij Diose rihaan chumii nihánj a**

**18** Veé maan orá dan cuchí' nij síí tucu'yón se-nana Jesucristó rihaan so', ne xná'anj nij so' man so' a:

—Ne me síí me síí guun chij doj asa' guun chij Diose rihaan chumii nihánj ga —taj nij so' a.

<sup>2</sup> Gaa ne canacúún Jesucristó ca'na' 'o ne'ej rihaan so', ne cachrón so' man ne'ej yo' tanuu nij síí tucu'yón se-nana so', <sup>3</sup> ne cataj so':

—Ya ya cataj xna'anj 'unj rihaan soj cuano se vaa no xcuún soj nuchran' nimán soj, ne ase vaa ne'ej nihánj ro', danj gaa soj á. Sese na'vej rá soj qui'yaj soj danj, ne daj chihaa mij se cayáan soj ga Diose asa' guun chij Diose rihaan chumii nihánj a ma'. <sup>4</sup> Dan me se sese naqui'yaj nica' yo' o so' nimán so', ne sese ase vaa nimán ne'ej nihánj danj gaa nimán so', ne so' me síi guun chij doj asa' guun chij Diose rihaan chumii nihánj nanj adonj.

**Nana nihánj taj xna'anj daj quiran' síi qui'yaj chi'ii nimán 'o síi nica' nimán síi cuchumán rá ni'yaj man Jesucristó a**

<sup>5</sup> Ne me ma'an 'o síi aráj cochroj ne a'mii sa' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. <sup>6</sup> Dan me se me ma'an 'o síi qui'yaj chi'ii nimán 'o síi le'ej amán rá ni'yaj manj, ne ca'vee a doj cavii sa' síi qui'yaj danj sese toco' nii 'o yuvej xij váj 'núu trigó gaán chihá so' ne tagüej nii man so' rque na ya'anj nanj adonj. Dan me se doj a sayuun quiran' so', sese qui'yaj chi'ii so' nimán 'o síi le'ej amán rá ni'yaj manj adonj. <sup>7</sup> Nique ndo'o nij síi man rihaan chumii nihánj, che'é se vaa ya'núj uxrá rihaan nij so' canoco' nij so' chrej chi'ii ei. Ne inanj danj vaa chumii nihánj, man ndo'o chrej chi'ii canoco' yuvii ei. Tzaj ne nique síi 'yaj anoco' yuvii chrej chi'ii yo' nanj adonj. 'O se daj chihaa mij se cavii sa' so' ma'.

<sup>8</sup> Dan me se sese ra'á so' do', tacóo so' do', me rá qui'yaj cacun', ne táa a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' ei. Taj se 'yaj sese taj vaj tacóo so' do', ra'á so' do', tzaj ne ca'vee cayáan so' ga Diose gaa ei. Tzaj ne sese quitaj ra'á so' do', tacóo so' do', ne qui'yaj nij yo' cacun', ne ca'anj so' rihaan ya'an, qui'yaj nij yo', ne dan me se yo' me se cunuú so' nu' cavii nu' ca'anj ei. <sup>9</sup> Veé danj uún sese me rá rlij rihaan so' qui'yaj yo' cacun', ne táa a se qui'ii so' man yo', ne síi rihaan canuu gaa so', tzaj ne ca'vee cayáan so' ga Diose gaa ei. Tzaj ne sese cunuú rlij rihaan so' ne qui'yaj yo' cacun', ne ca'anj so' rihaan ya'an, qui'yaj yo' ei.

**Nana nihánj taj xna'anj se vaa ve'é ndo'o tumé Diose man nij síi vaa nica' nimán síi nocó' man so' a**

<sup>10</sup> Cütumé soj man soj se cataj soj se vaa taj yu'vee nó yo' o tuvi' soj síi nica' nimán ei. 'O se cataj xna'anj 'unj rihaan soj cuano se vaa vaa se-mozó Réé 'unj síi nicun' xta' tumé man 'o 'o nij so' nanj adonj. Ne niganj nicun' nij so' rihaan Réj, ne uno Réj nu' nana nata' nij so' rihaan Réj ei. <sup>11</sup> 'O se xa' 'unj sij ca'née Diose nicaj yu'unj man yuvii, tzaj ne ca'ná' 'unj che'é rej tinanii 'unj man nij síi ca'anj ni'ya rihaan sayuun a.

<sup>12</sup> Tumé Diose man nij síi nica' nimán síi nocó' man so', rá soj na'. Nihánj me cataj xna'anj 'unj rihaan soj á. Ne'en soj se vaa sese vaa 'o cientó daán yo' o so' matzinj, ne sese ca'anj ni'ya orún' matzinj yo', ne tanáj síi daan matzinj yo' man ca'anj chihaa xnu' ca'anj matzinj yo' raá quij, ne ca'anj so' nana' so' matzinj ca'anj ni'ya

yo' ei. <sup>13</sup> Ne cataj xna'anj 'unj rihaan soj se vaa sese nari' so' daán so' matzinj, ne guun niha' uxrá rá so' nanj adonj. Doj tzin' gaa niha' rá so' che'é ca'anj chihaa xnu' ca'anj nij matzinj ne ca'anj ni'ya a. Tzaj ne che'é matzinj nari' uún so' doj a gaa niha' rá so' nanj adonj. <sup>14</sup> Dan me se ase vaa na'vej rá so' ca'anj ni'ya orún' daán so' matzinj ro', danj vaa na'vej rá Rej ní' síi nicun' xta' ca'anj ni'ya a 'ó síi nica' vaa nimán síi nocó' man so' nanj adonj.

**Nana nihánj taj xna'anj se vaa vaa suun rihaan ní' ca'mii ní' rihaan tinúu ní' che'é cacun' tumé tinúu ní' a**

<sup>15</sup> Ne sese qui'yaj tinúu so' cacun' rihaan so', ne ca'anj orún' so' rihaan so', ne cataj xna'anj so' rihaan so' che'é cacun' tumé so' á. Ne sese cunó so' rihaan so', ne dan me se aj qui'yaj canaán so', ne yo' o canoco' tinúu so' man Diose ga so' vaa gaa nanj adonj.

<sup>16</sup> Tzaj ne sese ne cunó so' rihaan so' ne nicaj so' yo' o do', yavij do', tinúu so' ca'anj so' rihaan tinúu so' síi tumé cacun' yo', ne ndaa síj, gaa ne canicun' vij va'núj soj sij cunó nana ca'mii so', gaa ne guun ya rá soj a. Sese 'o cuyaán gaa nana ca'mii vij va'núj síi quene'en, ne ya vaa nana ca'mii nij so' a. <sup>17</sup> Ne sese ne cunó síi tumé cacun' rihaan vij va'núj nij tinuj nij soj, gaa ne ca'anj soj nata' soj rihaan taran' nij síi nocó' man Diose yanj chiháan soj á. Ne sese ne cunó so' rihaan taran' nij síi nocó' man Diose, gaa ne guun yanij soj rihaan so' á. Dan me se ase vaa 'o síi yanij do', ase vaa 'o síi tiha' yu'unj che'é puextó do', danj gaa so' rihaan soj ei.

<sup>18</sup> Cuanó nihánj me cataj ya 'unj rihaan soj se vaa a me ma'an rasuun se ca'vee qui'yaj yuvii rá soj, ne veé danj na'vej rá Diose qui'yaj yuvii uún a. Ne naj guun rasuun cataj soj se vaa ca'vee qui'yaj yuvii, ne veé danj gaa qui'yaj yuvii, rá ma'an Diose uún a. <sup>19</sup> Dan me se cataj uún 'unj rihaan soj, ne sese vaa vij soj me rá cachinj ni'yaj rihaan Réj síi nicun' xta', ne cachinj ni'yaj soj se vaa achiin rihaan soj, ne rque so' man soj se vaa achiin man soj a. <sup>20</sup> Ése me rej ma'an nuu chre' 'o vij síi nocó' manj cachinj ni'yaj nij so', ne veé danj nicun' ma'anj ga nij so' a —taj Jesucristó a.

**Nana nihánj taj xna'anj se vaa no xcuún ndo'o ní' caraa x'naa ní' che'é tinúu ní' a**

<sup>21</sup> Gaa ne cuchi' síi cu'naj Pedró rihaan Jesucristó, ne xná'anj so' man so', cataj so':

—Me daj nó xcúnj caraa x'naj che'é tinúj síi qui'yaj chi'ii manj ga. Chij ya caraa x'naj na' —taj Pedró, xná'anj so' a.

<sup>22</sup> Gaa ne cataj Jesucristó rihaan so' a:

—Ne ne'en uxrá so' á. 'O se naj guun cacun' qui'yaj tinúu so', ne yo' o caraa x'naa niganj so' che'é tinúu so' nu' cavii nu' ca'anj nanj adonj. <sup>23</sup> Dan me se ase vaa 'o síi nicaj suun rey ro', danj gaa Diose asa' guun chij Diose rihaan chumii nihánj adonj. Dan me se síi nicaj suun rey yo' me se 'o güii, ne guun rá so' nachin' so' sa'anj man nij se-mozó so' a. <sup>24</sup> Dan me se guun che'ej so' ca'ne' so' sa'anj vaa xcuún, ne asino yaan nicaj nii



man 'o síi 'yaj xcuún que'ee millón pesó ca'na' nii rihaan síi nicaj suun rey yo' a. <sup>25</sup> Ne taj yan vaj a doj sa'anj nicaj síi 'yaj xcuún yo' narque so' rihaan rey a ma'. Che'é dan cataj xna'anj síi nicaj suun rey yo' se vaa cane' mozó cane' nicaj mozó cane' ta'níi mozó cane' nu' si'yaj mozó cane', gaa ne nari' rey se-sa'anj rey, taj rey a. <sup>26</sup> Gaa ne canicun' ruj mozó yo' rihaan síi nicaj suun rey yo', ne cachíin ni'yaj uxrá so', cataj so': "Caraa x'naa uxrá so' doj, ne vaa güii narquej cunudanj sa'anj mán so', síi chij", taj se-mozó so' rihaan so' a. <sup>27</sup> Gaa ne cunuu 'ee rá síi nicaj suun rey ni'yaj so' man se-mozó so', ne ca'néj so' xcuún xraá mozó yo', ne ca'ne' rá so', ca'anj uun mozó yo', qui'yaj so' a.

<sup>28</sup> "Veé dan, gaa ne curihanj mozó yo', ca'anj so', gaa ne nari' tuvi' so' ga yo'ó mozó 'yaj suun rcua'aañ ga so', gaa ne yo'ó mozó yo' me síi qui'yaj xcuún doj deso' rihaan mozó caráj x'naa rey a. Gaa ne quita'aa so' man tuvi' so' mozó yo', ne cataj so': "Narque so' nu' se vaa 'yaj xcuún so' rihanj cuaj vij", taj so' rihaan tuvi' so' a. <sup>29</sup> Gaa ne canicun' ruj yo'ó mozó yo' rihaan tuvi' so' síi nachin' xcuún yo', gaa ne cataj so': "Caraa x'naa so', ne vaa güii, ne narquej sa'anj mán so' ei", taj mozó yo' rihaan tuvi' so' a. <sup>30</sup> Tzaj ne ne ca'vej rá so' caraa x'naa so' rihaan tuvi' so' mozó yo' a ma'. Maañ se ca'anj so', ne caxrij so' taga' man tuvi' so', ne ndaa se narque ya tuvi' so' nu' se vaa 'yaj xcuún yo' rihaan so', gaa ne ca'ne' rá so' a.

<sup>31</sup> "Veé dan, gaa ne quene'en yo'ó nij se-mozó síi nicaj suun rey daj qui'yaj síi caxrij taga' man tuvi', ne nanó ndo'o rá nij so' che'é síi 'nij taga' yo' a. Che'é dan cuchii' nij so' rihaan síi nicaj suun rey yo', ne nata' nij so' cunudanj rihaan rey a. <sup>32</sup> Gaa ne ca'née síi nicaj suun rey yo' nana rihaan mozó caxrij taga' man tuvi' se vaa ca'na' so' rihaan so' a. Dan me se ca'na' so' rihaan rey, gaa ne ca'mii rey rihaan so' a: "Mozó chi'ij nimán mé so' ei. 'Unj me se ca'néj uun 'unj xcuún xraá so', che'é se cachíin ni'yáa so' rihanj a. <sup>33</sup> Ne ase vaa cunuu 'ee raj mán so' ro', danj vaa no xcuún so' cunuu 'ee rá so' man tuvi' so' mozó 'yaj suun ga so' adonj", taj so' rihaan se-mozó so' a. <sup>34</sup> Gaa ne ca'maan ndo'o rá síi nicaj suun, ne tacuachén síi nicaj suun man mozó yo' rihaan síi 'nij ra'a taga', ne naqui'yaj naca síi nicaj suun yo' xcuún xraá mozó, ne cataj xna'anj so' se vaa se curihanj mozó yo' taga' ndaa naru'vee ya so' nu' se vaa qui'yaj xcuún so', gaa ne curihanj so' a.

<sup>35</sup> "Ne ase vaa qui'yaj síi nicaj suun yo' ro', ta'nga' danj qui'yaj uún Réj síi nicun' xtá' che'é soj, sese na'vej rá soj caraa x'naa soj rihaan tinúú soj nanj adonj —taj Jesucristó a.

**Nana nihánj taj xna'anj se vaa ne nó xcuún yuvi' qui'ij yuvi' man nicaj yuvi' a**

**19** Gaa ne quisij ca'mii Jesucristó nana yo', gaa ne curihanj so' estadó Galilea, ne ca'anj so' ndaa rnej tu'va chraá cu'naj Jordán, ndaa estadó Judea a. <sup>2</sup> Ne canoco' uxrá yuvi' man so', ne nahuun sa' nij síi ran', qui'yaj so' a.

<sup>3</sup> Gaa ne cuchii' doj síi fariseo rihaan Jesucristó, ne me rá nij so' cuta' nij so' cacun' xraá Jesucristó che'é nana ca'mii Jesucristó a. Che'é dan xna'anj nij so' man Jesucristó, cataj nij so':

—Sese ne chihanj 'yaj chana nicaj yo'ó snó'o, rá snó'o yo', ne no xcuún so' quiri'ij so' man no' na' —taj nij so' a.

<sup>4</sup> Gaa ne cataj Jesucristó:

—Aj nayaa soj nana no rihaan danj Dioso nana taj se vaa asij qui'yaj Dioso chumii, ne qui'yaj Dioso snó'o, ne qui'yaj Dioso chana, ne vij roj so' me yuvi', qui'yaj Dioso a. <sup>5</sup> Ne vaa yo'ó nana taj: "Che'é dan tanáj snó'o man rej so' do', man nii so' do', ne ve'é nacaj snó'o man chana nicaj so', ne ase vaa orún' yuvi' ro', danj gaa roj so' adonj". Danj taj danj Dioso a. <sup>6</sup> Dan me se nuveé vij ran' yuvi' me roj so' asij xcaj tuvi' roj so' a ma'. 'O se ase vaa orún' yuvi' ro', vaa roj so' nanj adonj. Dan me se ma'an Dioso qui'yaj xcaj tuvi' roj so', ne che'é dan ne nó xcuún a 'ó yuvi' ca'ne' tanuu yuvi' man roj so' ma' —taj Jesucristó rihaan nij síi fariseo yo' a.

<sup>7</sup> Gaa ne cataj nij síi fariseo:

—Che'é dan, me che'é cataj xna'anj Moisés se vaa naxcaj snó'o 'o yanj cataj xna'anj se vaa quiri'ij so' chana nicaj so', ne ca'vee quiri'ij so' man no' ga —taj nij so' a.

<sup>8</sup> Ne cataj Jesucristó rihaan nij so' a:

—Che'é se nichraj ndo'o nimán soj ro', che'é dan cataj xna'anj Moisés rihaan soj se vaa naxcaj soj yanj yo', ne quiri'ij soj nicaj soj a. Tzaj ne asij guun che'e Dioso qui'yaj Dioso man yuvi', ne ne vaa danj ma'. <sup>9</sup> Cuanó nihánj me se cataj xna'anj 'unj rihaan soj se vaa sese ne cotoj chana nicaj yo'ó so' ga yo'ó chii, ne sese ri'ij rma'an so' man chana yo' ne xcaj so' man yo'ó chana, ne síi tumé ndo'o cacun' me ma'an so' nanj adonj. Veé ase vaa síi cotoj ga naj guun chana ro', vaa so' rihaan Dioso nanj adonj —taj Jesucristó rihaan nij so' a.

<sup>10</sup> Gaa ne cataj nij síi tucu'yón se-nana Jesucristó rihaan so':

—Sese ne nó xcuún snó'o quiri'ij so' man chana nicaj so', ne taj che'é xcaj snó'o man chana ma'. Maañ se sa' doj cavii síi ne uun adonj —taj nij so' a.

<sup>11</sup> Gaa ne cataj Jesucristó:

—Nuveé tucuanj canoco' cunudanj yuvi' me nana ca'mii soj ma'. Maañ se doj vaa nij yuvi' canoco' tucuáan yo', qui'yaj Dioso nanj ei. <sup>12</sup> Dan me se vaa síi asij ca'ngaa so', danj na'vej rá so' xcaj so' man chana, tzaj ne vaa yo'ó so' uún, ne gaa me so' xnii, ne ta'aj nij síi xcoj ruvaá rá ne ma'an nij so' naqui'yaj capuú man ta'aj xnii, ne gaa achij xnii, gaa ne na'vej rá so' xcaj so' man chana gaa a man adonj. Dan me se vaa yo'ó so' uún, ne ca'vee nanj xcaj so' chana, tzaj ne maañ se no-co' ndo'o so' man Dioso, ne me ndo'o rá so' guun chij Dioso rihaan chumii nihánj, ne 'yaj suun ndo'o so', ne ne vaa ya'núj rihaan so' xcaj so' chana, rá so', gaa ne che'é dan na'vej inanj rá ma'an so' xcaj so' chana a man adonj. Sese guun nucuaj yo'ó so' canoco' so' tu-

cuáan yo', ne ve'é canoco' so' tucuáan yo' nanj adonj —taj Jesucristó a.

**Nana nihánj taj xna'anj me che'é caran' rá Jesucristó ni'yaj so' man ne'ej a**

<sup>13</sup> Gaa ne nicaj nij yuvij man nij ne'ej ca'na' nij yuvij rihaan Jesucristó a. Me rá nij yuvij cuta' Jesucristó ra'a so' raá nij ne'ej, ne cachinj ni'yaj so' rihaan Dioso che'é nij ne'ej yo' a. Tzaj ne cataj xna'anj nij sí tucu'yón se-nana Jesucristó rihaan nij yuvij se vaa ne nó xcúun nij ne'ej ca'na' nij ne'ej rihaan Jesucristó, taj nij so' a.

<sup>14</sup> Tzaj ne cataj Jesucristó:

—Ca'ne' rá soj ca'na' nij ne'ej rihanj á. Se caráan soj chrej rihaan nij ne'ej mei. 'O se tucua' nij sí vaa danj ro', me rej yanj Dioso uun chij Dioso nanj adonj —taj Jesucristó a.

<sup>15</sup> Gaa ne cuta' so' ra'a so' raá nij ne'ej, gaa ne curihanj so' rej yo' a.

**Nana nihánj taj xna'anj che'é yo'ó sí me rá cayáan ga Dioso nu' cavii nu' ca'anj a**

<sup>16</sup> Dan me se cuchii' yo'ó sí tachruu yo' rihaan Jesucristó, ne xna'anj so' man Jesucristó, cataj so':

—Me suun sa' qui'yaj sunj, ne ca'vee cayánj ga Dioso nu' cavii nu' ca'anj, ga maestro' —taj so' a.

<sup>17</sup> Gaa ne cataj Jesucristó:

—Me che'é xna'anj so' manj che'é se sa' ga. 'O se grún' Dioso vaa sa' á. Tzaj ne sese me rá so' cayáan so' ga Dioso nu' cavii nu' ca'anj, ne cunó so' nij nana no-coo ya ya nana cataj xna'anj Dioso rihaan ní á —taj Jesucristó a.

<sup>18</sup> —Me nana ga —taj sí tachruu yo', xna'anj so' man Jesucristó a.

Gaa ne cataj Jesucristó:

—Nana nihánj a: "Se ticaví' so' yuvij ma'. Se cotoj so' ga chana' nicá yo'ó yuvij ma'. Se qui'yaj ituu so' si'yaj yo'ó yuvij ma'. Se nanó so' cuentó ne che'é yuvij ma'.

<sup>19</sup> Caraa cochróo so' rihaan rée so' do', rihaan ní so' do' á. Ase vaa 'ee rá so' man ma'an so' ro', danj gaa 'ee rá so' man tuví' so' á." Yo' me nana cunó so' ei —taj Jesucristó rihaan sí tachruu yo' a.

<sup>20</sup> —Nu' nana yo' unoj adonj. Vaa yo'ó se vaa achiin qui'yaj na' —taj sí tachruu yo' rihaan Jesucristó a.

<sup>21</sup> Gaa ne cataj Jesucristó rihaan so' a:

—Sese me rá so' cunuu sa' inanj nimán so', ne cavij so' ca'anj so', ne cutu'vee so' nu' si'yáa so', ne sa'anj quirí' so' ro', caxrii so' ston nij sí nique, ne cumán ndo'o si'yáa so' rej xtá', qui'yaj Dioso nanj ei. Ne dan me se ca'na' so', ne canocó' so' manj, ca'anj ní á —taj Jesucristó a.

<sup>22</sup> Dan me se cuno sí tachruu yo' nana cataj xna'anj Jesucristó rihaan so', ne ca'anj uun so', ne nanó ndo'o rá so' a. 'O se sí ru'vee me so', ne vaa ndo'o si'yaj so' a.

<sup>23</sup> Gaa ne ca'mii Jesucristó rihaan nij sí tucu'yón se-nana so', cataj so':

—Ya ya cataj xna'anj 'unj rihaan soj se vaa sayuun uxrá vaa quisij sí ru'vee cayáan sí ru'vee ga Dioso asa' guun chij Dioso rihaan chumii nihánj nanj adonj.

<sup>24</sup> Dan me se ne'en soj se vaa sayuun ndo'o vaa cachén xcuu camelló rihaan yu'uj taj tacúun cúu nuvá, tzaj ne cuano nihánj me se cataj xna'anj 'unj rihaan soj se vaa ca'vee a doj cachén xcuu yo' yu'uj taj tacúun cúu nuvá, ndaa rá se vaa sí ru'vee, ne se guun cachén so' cayáan so' ga Dioso asa' guun chij Dioso rihaan chumii nihánj a ma' —taj Jesucristó a.

<sup>25</sup> Dan me se cuno nij sí tucu'yón se-nana Jesucristó nana ca'mii so', ne caráya'anj uxrá nij so', cataj nij so':

—Che'é dan me se me sí guun nucuaj quinanii rihaan sayuun ga —taj nij so' a.

<sup>26</sup> Ni'yaj Jesucristó man nij so', ne cataj so':

—Se guun nucuaj yuvij quinanii ma'an nij yuvij rihaan sayuun ma'. Sayuun uxrá vaa rihaan nij so' nanj adonj. Tzaj ne xa' Dioso me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj so' a.

<sup>27</sup> Gaa ne cataj Pedró rihaan Jesucristó a:

—Ne núj ga. Aj tanáj núj nu' si'yaj núj, ne canoco' núj mán so' á. Daj quirán' núj ga —taj Pedró, xna'anj so' a.

<sup>28</sup> Gaa ne cataj Jesucristó:

—Veé sí noco' manj me soj, ne sí ca'née Dioso nicaj yu'unj man yuvij mej adonj. Ne ya ya cataj xna'anj 'unj rihaan soj se vaa asa' cunuu naca' chumii nihánj, ne asa' guun che'ej cayánj gunj sí rii ta'nga' rihaan chumii nihánj, ne cayáan chujij nij soj ca'ne' soj cacun' che'é chujij nij x'ne' nij yuvij israelitá adonj. <sup>29</sup> Ne sí tanáj ve' tucua' tanáj tinúú tanáj ra'vij tanáj rej tanáj ní tanáj ta'ní tanáj yo'ó tanáj canoco' so' manj ro', uxrá doj rasuun quirí' uún so', ne cayáan so' ga Dioso nu' cavii nu' ca'anj adonj. <sup>30</sup> Tzaj ne que'ee nij sí guun chij ndo'o rihaan chumii nihánj ro', guun nij so' sí noco' ei. Ne que'ee nij sí ne guun chij rihaan chumii nihánj me se guun chij nij so', qui'yaj Dioso nanj adonj.

**Cuentó nihánj taj xna'anj daj qui'yaj Dioso naru'vee Dioso rihaan taran' ní sij 'yaj suun che'é so' a**

**20** "Ase vaa qui'yaj 'o sí to'oj rej man ndo'o coj chruj uvá ro', danj qui'yaj Dioso asa' guun chij Dioso rihaan chumii nihánj adonj. Dan me se sí to'oj yo' ro', rej taxrej curihanj so' nana' so' sí qui'yaj suun rihaan to'ó so' rej man coj chruj uvá yo' a. <sup>2</sup> Gaa ne yo'ó ca'mii so' ga nij sí qui'yaj suun rihaan to'ó so', se vaa 'o sa'anj denario go' so' che'é suun qui'yaj suun 'o 'o nij so' 'o güii, ne ca'née so' man nij so', qui'yaj suun nij so' rihaan to'ó so' a.

<sup>3</sup> "Gaa ne aga' uun curihanj uún sí to'oj yo', ca'anj so' rihaan yu'vee, gaa ne quene'en so' doj snó'o nicun' ma'an uun rihaan yu'vee, ne taj vaj suun rihaan nij so' a. <sup>4</sup> Gaa ne cataj so' rihaan nij so': "Ca'anj soj qui'yaj suun soj rihaan to'ój ei. Naru'vee 'unj rihaan soj che'é nu' suun qui'yaj suun soj ei", taj so' rihaan nij mozó a.

<sup>5</sup> Dan me se ca'anj nij snó'o yo' qui'yaj suun nij so' uún to'ó sí to'oj yo' a.

"Gaa ne caxuj do', aga' va'nuj do', curihanj uún síf to'oj yo', ne nari' so' doj síf qui'yaj suun rihaan to'óo so', ne ca'née so' man nij so' qui'yaj suun nij so' rihaan to'óo so' uún a.

<sup>6</sup>"Gaa ne aga' 'un' curihanj uún síf to'oj yo', ne nari' so' doj síf nicun' ma'an rihaan yu'vee a. "Me che'é nicun' ma'an soj nu' güii nihánj ga. Taj vaj suun qui'yaj suun soj á", taj so', xná'anj so' man nij so' a. <sup>7</sup>"Maan se taj síf rqué suun man núj qui'yaj suun núj ma'", taj nij so' a. "Ca'anj soj qui'yaj suun soj rihaan to'ój ei'", taj so' rihaan nij so' a.

<sup>8</sup>"Veé dan, gaa ne nichrun' cata' güii tu'va quij, gaa ne ca'ne' síf to'oj yo' suun rihaan se-mozó so' síf tumé sa'anj se vaa naru'vee so' sa'anj rihaan nij síf qui'yaj suun rihaan to'óo so' yo' a. "Canacunj so' ca'na' nij síf qui'yaj suun yo', ne naru'vee so' rihaan nij so' á. Asino yaan naru'vee so' rihaan nij síf catúj suun aga' 'un', gaa ne naru'vee so' rihaan nij síf catúj suun rej na'yaan á", taj so' rihaan síf tumé sa'anj yo' a.

<sup>9</sup>"Dan me se asino yaan ca'na' nij síf catúj naa aga' 'un' rihaan síf tumé sa'anj, ne 'o sa'anj denario quirir' 'o 'o nij so' a. <sup>10</sup>Gaa ne ca'na' nij síf catúj suun rej na'yaan rihaan síf tumé sa'anj yo' a. Nocoo doj sa'anj quirir' nij so', rá nij so', tzaj ne veé danj 'o sa'anj denario quirir' 'o 'o nij so' uún a. <sup>11</sup>Nicaj nij so' sa'anj, gaa ne guun che'e nij so' ca'maan rá nij so' ni'yaj nij so' síf to'oj yo', <sup>12</sup>gaa ne cataj nij so': "Síf nihánj me se orún' orá guee qui'yaj suun nij so', tzaj ne 'o cuyaan naru'vee so' rihaan nij so' ga núj, ne qui'yaj suun núj nu' güii, ne go' uxrá naán xráá núj á", taj nij so' rihaan síf to'oj yo' a. <sup>13</sup>Gaa ne síf to'oj yo' cataj rihaan yo' o tuvi' nij mozó: "Ne ta'yunj man so', man tinuj. Maan se aj ca'mii ní che'é se vaa qui'yaj suun so' che'é 'o sa'anj denario che'é 'o güii a. <sup>14</sup>Nacaj so' sa'anj qui'yaj canaan so', ca'anj so' á. Maan se inanj me raj cuyaan naru'vej rihaan soj nanj adonj. <sup>15</sup>Ne nó xcúnj qui'yaj se vaa rii nimanj, rá so' na'. Xcoj ruvaá rá so', che'é se qui'yaj se luj rihaan tuvi' so' na'", taj síf to'oj yo' rihaan síf qui'yaj suun rihaan to'óo so' a.

<sup>16</sup>"Dan me se ase vaa qui'yaj síf to'oj yo' ro', danj qui'yaj uún Diose che'é nij síf 'yaj suun che'é Diose nanj adonj. Che'é dan nij síf ne guun chij rihaan chumij nihánj me se xta' ro', guun chij nij so' a. Ne nij síf guun chij ndo'o rihaan chumij nihánj me se xta' ro', guun nij so' síf nocoo', qui'yaj Diose nanj adonj —taj Jesucristó a.

**Nana nihánj taj xna'anj se vaa síf va'nuj cataj xna'anj Jesucristó se vaa cavi' so' ne cunuu i'na' uún so' a**

<sup>17</sup>Gaa ne cavii Jesucristó ca'anj so' chuman' Jerusalén, ne ca'anj chujij nij síf tucu'yón se-nana so' ga so', qui'yaj so' a. Veé asij vaj orún' cha'nuj nij so' ga Jesucristó chrej, ne ca'mii Jesucristó rihaan nij so', cataj so':

<sup>18</sup>—Nihánj me ca'anj ní' chuman' Jerusalén, ne qui-ta'aa nii manj sij ca'née Diose nicaj yu'unj man yuvij, ne nago' nii manj rihaan nij xrej atá suun nocoo doj do', rihaan nij síf naqui'yaj cuu se-tucuanj Moisés rihaan yuvij do' a. Ne cutá' nij so' cacun' xráj, ne cataj nij

so' se vaa cavi' 'unj a. <sup>19</sup>Gaa ne nago' nij so' manj rihaan nij síf yanij, ne ca'nga' nacoo nij síf yanij quene'en nij so' manj, ne go' nij so' cuartá xráj, ne cachron nij so' manj rihaan rcutze a. Gaa ne cachon va'nuj güii, gaa ne cunuu i'na' uún 'unj, qui'yaj Diose ei —taj Jesucristó a.

**Nana nihánj taj xna'anj se vaa cachín ni'yaj nii síf cu'naj Jacobo do', síf cu'naj Juan do', se vaa cataj roj so' suun sa' doj qui'yaj Jesucristó a**

<sup>20</sup>Gaa ne cuchi' nii síf cu'naj Jacobo do', síf cu'naj Juan do', rihaan Jesucristó, ne ta'níí síf cu'naj Zebedeo me uún roj so' a. Dan me se cuchi' nij ta'nij no' rihaan Jesucristó, gaa ne canicun' ruj no' rihaan Jesucristó, ne cataj no' se vaa vaa se cachinj ni'yaj no' rihaan so', rá no' a.

<sup>21</sup>—Me se achiin man so' ga —taj Jesucristó, xná'anj so' man no' a.

Ne cataj no':

—Cataj xna'anj so' se vaa asa' guun chij so' rihaan chumij nihánj, ne quitaj roj ta'nij x'núú so', ne cataj roj so' suun sa' doj qui'yáá so' á. Dan me se yo' o so' cayáán rej nuva' so', ne yo' o so' cayáán rej nichruún so', ne quirii ta'nga' roj so' ga so', cataj so', raj a —taj chana yo' a.

<sup>22</sup>Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachín ni'yaj roj soj rihaanj nihánj a ma'. 'O se guun nucuaj roj soj quiran' roj soj sayuun ndaa vaa quirán' 'unj na' —taj Jesucristó, xná'anj so' a.

—Guun nucuaj rój nanj adonj —taj roj so' a.

<sup>23</sup>Gaa ne cataj Jesucristó:

—Ya ya quiran' soj sayuun gaj nanj á. Tzaj ne ne nó xcúnj cataj xna'anj 'unj me síf cayáán x'núú 'unj rej nuva' 'unj do', rej nichrunj do', ma'. Orún' Réj síf nicun' xta' cataj xna'anj me síf quirii ta'nga' gaj nanj adonj —taj Jesucristó a.

<sup>24</sup>Gaa ne cuno yo' o chi' nij síf tucu'yón se-nana Jesucristó se vaa ca'mii roj tinuj roj so' rihaan Jesucristó, ne ca'maan rá nij so' ni'yaj nij so' man roj so' a. <sup>25</sup>Gaa ne canacúún Jesucristó man cunudanj nij so' se vaa ca'na' nij so' rihaan so', ne cataj so':

—Ne'en soj se vaa nij síf atá suun man rihaan chumij nihánj me se rii ta'nga' uxrá nij so' rihaan tuvi' nij so' nanj adonj. <sup>26</sup>Tzaj ne se gaa danj sca'núj nij soj a ma'. 'O se sese me rá nij soj guun chij nij soj rihaan tuvi' nij soj, ne guun nij soj síf qui'yaj suun rihaan taran' tuvi' nij soj, <sup>27</sup>ne ase vaa mozó ro', danj gaa xa' nij soj rihaan taran' tuvi' nij soj nanj adonj. <sup>28</sup>Dan me se ca'née Diose manj nicaj yu'unj 'unj man yuvij, tzaj ne ne ca'na' 'unj ne guun nij yuvij mozó rihanj ma'. 'O se ca'ná' 'unj qui'yaj suun ma'anj rihaan nij yuvij nanj adonj. Ne ca'ná' 'unj nayon ma'anj rihaan yuvij ne cavi' 'unj che'é cacun' atá nij so', gaa ne cavii sa' uxrá nij so', qui'yaj nanj adonj —taj Jesucristó a.

**Nana nihánj taj xna'anj se vaa naxra' rihaan vij sí tuchrij, qui'yaj Jesucristó a**

<sup>29</sup> Gaa ne cavii nij so' chuman' Jericó, ne cachéé ndo'o yuvij xcó Jesucristó a. <sup>30</sup> Ne vaa vij sí tuchrij ne tu'va chrej, ne cuno roj so' cuentó se vaa cachén Jesucristó rej ne roj so' a. Che'é dan caguáj roj so', cataj roj so':

—Ya ya ta'níí ta'nij si'no síí cu'naj David síí cane gaa naá mé so', Señor. Cunuu 'eé rá so' man rój ei —taj roj so' a.

<sup>31</sup> Tzaj ne:

—Dínj tu'va roj soj á —taj nij yuvij rihaan roj so' a.

Tzaj ne doj a nucuaj caguáj roj so', cataj roj so':

—Ta'níí ta'nij si'no síí cu'naj David síí cane gaa naá mé so', Señor. Cunuu 'eé rá so' man rój ei —taj uún roj so' a.

<sup>32</sup> Gaa ne canicun' Jesucristó, ne canacúún Jesucristó man roj so' se vaa ca'na' roj so' rihaan so', ne cataj so': —Daj qui'yáj man roj soj, rá roj soj gā —taj Jesucristó, xná'anj so' man roj so' a.

<sup>33</sup> —Cunuu sa' rihaan rój, rá rój, Señor —cataj roj so' a.

<sup>34</sup> Gaa ne cunuu 'eé rá Jesucristó man roj so', ne cuta' Jesucristó ra'a Jesucristó rihaan roj so', gaa ne veé maan orá dan cunuu sa' rihaan roj so' nanj adonj. Gaa ne ca'anj roj so' gā Jesucristó a.

**Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a**

**21** Gaa ne cuchi' Jesucristó cuchi' nij síí tucu'yón se-nana so' cuchi' tu'va chuman' cu'naj Betfagé a. Naj chuman' yo' tacóó quij cu'naj Quij man Chruun Olivó, ne nichrun' naj chuman' Jerusalén gā chuman' cu'naj Betfagé yo' a. Gaa ne ca'néé Jesucristó man vij tuvi' nij síí tucu'yón se-nana so' ca'anj roj so' rque chuman' yo', <sup>2</sup> ne cataj so' rihaan roj so' a:

—Catuu roj soj chuman' nihánj, chuman' naj rihaan ní, ne narí' nu' roj soj yo'ó burró chana numii, ne vaa ta'níí xo' burró le'ej ya'anj nicun' gā xo' adonj. Nache roj soj man burró chana yo', ne nicaj roj soj man roj xo' ca'na' roj soj rihaan 'unj á. <sup>3</sup> Ne sese xna'anj nii man roj soj me che'é nache roj soj burró, ne cataj roj soj: “Síí 'nij ra'a man ní' achiin xcuu nihánj rihaan chuguanj”, cataj roj soj, gaa ne nu' ca'nej nij so' man roj xcuu ca'na' roj xcuu gā roj soj ei —taj Jesucristó rihaan roj so' a.

<sup>4</sup> Dan me se nu' yo' qui'yaj Jesucristó, qui'yaj guéé so' ndaa vaa taj síí nata' se-nana Diose gaa naá a. Ne síí nata' yo' ro', cataj so': <sup>5</sup> “Dan me se cataj xna'anj soj rihaan nij síí man chuman' Jerusalén se vaa xcaj nij so' cuentá se vaa ca'na' síí guun chij rihaan nij so' adonj. Dan me se síí nica' nimán me so', quitaj so' xráá burró a. Dan me se quitaj so' xráá ta'níí xcuu 'yaj suun nanj adonj”, taj síí nata' yo' a.

<sup>6</sup> Dan me se ca'anj roj síí tucu'yón se-nana Jesucristó, ne qui'yaj roj so' nu' ndaa vaa cataj xna'anj Jesucristó

rihaan roj so' a. <sup>7</sup> Dan me se nicaj roj so' man roj ta'nij roj burró chana yo' ca'anj roj so' rihaan Jesucristó, ne cuta' roj so' yatzíj xráá roj xcuu, ne cavii Jesucristó a.

<sup>8</sup> Ne que'ee nij yuvij cuchruj yatzíj sagan' nij yuvij rá chrej, ne ta'aj nij tuvi' nij so' ro', ca'ne' ra'a chruun, ne caraa nij so' rá chrej, cachéé roj burró yo' rihaan yatzíj do', rihaan ra'a chruun do' a. <sup>9</sup> Ne man uxrá yuvij quitáá yaan rihaan Jesucristó, ne man uxrá yuvij noco' rej xco Jesucristó a. Ne caguáj nij yuvij, cataj nij yuvij:

—Caraa guéé ní' rihaan ta'níí ta'nij si'no síí cu'naj David síí cane gaa naá nanj á. Cunaj ndo'o vaa ca'na' síí ca'néé síí 'nij ra'a man ní' adonj. Se luj ndo'o me 'yaj Diose che'é ní' á. Caraa guéé ní' rihaan Diose síí nicun' xtá' ei —taj nij yuvij, caguáj nij yuvij a.

<sup>10</sup> Dan me se catúj Jesucristó chuman' Jerusalén, ne caráya'anj taran' nij yuvij man chuman' yo', ne cataj nij so':

—Me síí atúj chuman' gā —cataj nij síí man chuman' Jerusalén, xná'anj nij so' man nij yuvij atúj chuman' Jerusalén a.

<sup>11</sup> —Síí nihánj me Jesucristó síí cavii chuman' Nazaret chuman' naj estadó Galilea, ne síí nata' se-nana Diose me so' adonj —taj nij yuvij catúj chuman' Jerusalén, ni'yaj nij so' man Jesucristó a.

**Nana nihánj taj xna'anj se vaa quirii Jesucristó man nij yuvij tu'vej rasuun man rá nuvíí nocoo a**

<sup>12</sup> Gaa ne catúj Jesucristó rá nuvíí nocoo, gaa ne quirii so' man taran' nij síí tu'vej rasuun do', man taran' nij síí quiránj rasuun man rá nuvíí do' a. Ne tiguíj ra'a so' nij chruun mesá natuná nii sa'anj rihaan, ne tiguíj ra'a so' chruun xlá taj nij síí tu'vej cha'aan a. <sup>13</sup> Gaa ne ca'mii so' rihaan nij so', cataj so':

—Danj Diose taj se vaa tucúa Diose rej na'vúj yuvij rihaan Diose me nihánj á. Tzaj ne guun tucua síí ituu man tucúa Diose nihánj, qui'yaj soj nanj á —taj Jesucristó a.

<sup>14</sup> Gaa ne catúj síí tuchrij catúj síí rengó catúj rá nuvíí, ne nahuun sa' nij so', qui'yaj Jesucristó a.

<sup>15</sup> Ne man xnii catúj rá nuvíí, ne caguáj nij xnii cataj nij xnii:

—Caraa guéé ní' rihaan síí nihánj ta'níí ta'nij si'no síí cu'naj David síí cane gaa naá ei —taj nij xnii a.

Ne vaa xrej atā suun nocoo doj vaa síí naqui'yaj cyu se-tucuanj Moisés vaa, ne quene'en nij so' nu' suun sa' qui'yaj Jesucristó rá nuvíí, ne cuno nij so' nana caguáj nij xnii a. Gaa ne ca'maan rá nij so', <sup>16</sup> ne cataj nij so':

—Unó so' nana aguáj xnii nihánj na'. Me che'é a'vej so' caguaj xnii danj gā —taj nij so', xná'anj nij so' man Jesucristó a.

Ne cataj Jesucristó:

—Unó 'unj ei. Me che'é na'vej rá nij soj ca'mii xnii danj gā. Ne ni'yaj soj, ne Diose ca'néé nana vaa danj nimán xnii ca'mii xnii danj a. Me che'é ne nayaā nij soj nana no rihaan danj Diose gā. Ése gaa naá, ne ca'mii yo'ó so' rihaan Diose, cataj so' se vaa ve'é ca'mii xnii do', ve'é ca'mii ne'ej utzii too do', rihaan Diose, qui'yaj

ma'an Diose, taj nana no rihaan danj Diose a —taj Jesucristó rihaan nij so' a.

<sup>17</sup> Gaa ne tanáj Jesucristó man nij so', ne curihanj so' chuman' Jerusalén, ne ca'anj so' chuman' Betania, ne caran' so' 'o yan' a.

**Nana nihánj taj xna'anj se vaa canacoq 'o chruun man chruj higó, qui'yaj Jesucristó a**

<sup>18</sup> Rej ranga' cavii uún Jesucristó ca'anj so' chuman' Jerusalén, ne na'aan rque so' a. <sup>19</sup> Gaa ne quene'en so' 'o chruun man chruj higó nicun' tu'va chrej, ne ca'anj so' tacóo chruun yo', tzaj ne taj vaj a 'ó chruj higó ne quiri' so' a ma'. Maan nanj coj uun táa raq chruun yo' a. Gaa ne ca'mii so' rihaan chruun yo', cataj so':

—Daj chihaa mij se cumán chruj raá so' ma' —taj Jesucristó a.

Ne nu' ca'mii so' ga chruun, ne maan orá dan canacoq chruun man chruj higó yo' a. <sup>20</sup> Gaa ne caraya'anj nij sí tucu'yón se-nana Jesucristó, quene'en nij so' se vaa quiran' chruun yo' a. Ne cataj nij so':

—Asa' ca'vee nu' nacoq chruun nihánj cuano ga —taj nij so', caraya'anj nij so' a.

<sup>21</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sese se guun vij rá soj ne yo' o cuchuman rá soj, ne doj a qui'yaj soj vaa güii, se vaa qui'yáa 'unj man chruun nihánj a adonj. Dan me se cataj xna'anj nij soj rihaan quij xcaan yo' se vaa curihanj quij rej nicun' quij ne ca'anj nij quij rque na ya'anj, ne ya ca'anj nij yo' rque na ya'anj, qui'yaj soj adonj. <sup>22</sup> Ne nu' se vaa cachinj ni'yaj soj rihaan Diose ro', rque Diose rihaan soj, sese ya ya cuchuman rá soj nanj adonj —taj Jesucristó a.

**Nana nihánj taj xna'anj se vaa xna'anj nii man Jesucristó me sí ca'ne' suun rihaan so' qui'yaj so' ndaa vaa 'yaj so' a**

<sup>23</sup> Gaa ne catúj Jesucristó rá nuví, ne tucu'yón so' nana man nij sí man rá nuví yo' a. Gaa ne cuchi' nij xrej atá suun nocoo doj do', nij sí uun chij rihaan nij yuvij do', rihaan so', ne xna'anj nij so' man so', cataj nij so':

—Me sí ca'ne' suun rihaan so' qui'yáa so' ndaa vaa 'yáa so' ga —taj nij so' a.

<sup>24</sup> Gaa ne cataj Jesucristó rihaan nij so' a:

—Ne vaa yo' o nana xna'anj 'unj man nij soj, ne sese ya cataj xna'anj nij soj nana yo' rihanj, ne cataj xna'anj 'unj rihaan soj me sí ca'ne' suun rihanj a. <sup>25</sup> Dan me se me sí ca'ne' suun rihaan sí cu'naj Juan cutá' ne so' man yuvij, rá soj ga. Ma'an Juan cavii raq na'. Ase Diose cataj xna'anj rihaan so' xa'. Cataj xna'anj nij soj rihanj á —taj Jesucristó a.

Gaa ne nuchruj raq ndo'o nij so' ga tuvi' nij so', cataj nij so':

—Sese cataj ní' se vaa Diose ca'ne' suun rihaan sí cu'naj Juan cutá' ne so' man yuvij, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a. <sup>26</sup> Tzaj ne sese cataj ní' se vaa nuveé

sij ca'ne' Diose suun rihaan me sí cu'naj Juan, ne ca'maan rá nij yuvij, ne quiran' ní' sayuun, qui'yaj nij yuvij nanj á. 'O se nij yuvij me se sí ca'neé Diose nata' se-nana Diose me sí cu'naj Juan, rá cunudanj nij yuvij nanj á —taj nij so' rihaan tuvi' nij so' a.

<sup>27</sup> Gaa ne cataj nij so' rihaan Jesucristó:

—Ne ne'en núj me sí ca'ne' suun rihaan sí cu'naj Juan cutá' ne so' man yuvij ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihanj qui'yá ndaa vaa 'yá ma' —taj Jesucristó rihaan nij so' a.

**Nana nihánj me cuentó nanó Jesucristó che'é roj ta'níi 'o so' a**

<sup>28</sup> Gaa ne nanó Jesucristó cuentó nihánj cuno nij so' a:

—Ne daj vaa nana nihánj nana cataj xna'anj 'unj rihaan soj, rá soj ga. Vaa vij ta'níi 'o so' a. Ne cuchi' so' rihaan yo' o ta'níi so', cataj so': “Cuan' cavii so' qui'yaj suun so' rque naq chruj uvá, rej”, taj so' rihaan ta'níi so' a. <sup>29</sup> “Se ca'anj 'unj ma”, taj xnii yo' rihaan rej so' a. Tzaj ne orá nii doj naqui'yaj nica' so' nimán so', ne ca'anj qui'yaj suun so' a. <sup>30</sup> Gaa ne cuchi' rej xnii rihaan yo' o ta'níi so', ne cataj xna'anj so' se vaa ca'anj xnii yo', qui'yaj suun yo' a. “Ca'anj 'unj, ataj”, taj so' rihaan rej so' a. Tzaj ne ne ca'anj so' qui'yaj suun so', ne tiha' so' man rej so' a. <sup>31</sup> Ne me ta'níi snó'o yo' cuno sa' rihaan so', rá soj ga —taj Jesucristó, xna'anj Jesucristó man nij so' a.

—Xnii ca'anj qui'yaj suun ro', cuno ya so' rihaan rej so' ei —taj nij so' rihaan Jesucristó a.

Gaa ne cataj Jesucristó rihaan nij so' a:

—Ya ya cataj xna'anj 'unj rihaan nij soj cuano se vaa nij sí tiha' yu'unj man yuvij che'é puextó do', nij chana nihá' rá ga chii do', quitaj yaan rihaan soj catuú nij so' rihaan Diose asa' guun chij Diose rihaan chumii nihánj, ne quinaj xcó nij soj adonj. <sup>32</sup> 'O se cuchi' sí cu'naj Juan rihaan nij soj, ne tucu'yón so' rihaan nij soj daj qui'yaj soj cuno sa' soj rihaan Diose, tzaj ne ne cuchuman rá nij soj nana ca'mii so' ma'. Tzaj ne nij sí tiha' yu'unj man yuvij che'é puextó do', nij chana nihá' rá ga chii do', cuchuman rá nana ca'mii Juan nanj adonj. Ne quene'en soj se vaa cuchuman rá nij so', tzaj ne ne nuchran' nimán soj, ne ne cuchuman rá ma'an soj ma'.

**Nana nihánj me cuentó nanó Jesucristó che'é yuvij chi'ij 'yaj suun rihaan yo'óo a**

<sup>33</sup> “Ne cuno uún nij soj yo' o cuentó nihánj á. Dan me se vaa yo' o sí to'oj, ne chruj so' yo' o naq chruj uvá, ne qui'yaj so' chingá nu' anicaj tu'va naq yo', gaa ne gáan so' yu'uj rej xtun' chruj uvá ne cavii na, ne cune' so' 'o ve' nata' cayáan nij sí cutumé naq yo' a. Gaa ne tanáj so' man naq yo' rihaan sí qui'yaj suun naq yo', ne curihanj so' ca'anj so' gan' a. <sup>34</sup> Cachén doj yavii, ne quisij yavii cutá nii chruj uvá, ne ca'neé sí xnaq yo' man yo' o ta'aj nij se-mozó so' rihaan nij sí nuú tumé

xnaa so' a. Me rá so' ca'na' nıcaj yo'ó nij se-mozó so' doj chruj uvá rihaan ma'an so' a. <sup>35</sup> Gaa ne quita'aa nij sí nıy tumé naa man yo'ó nij mozó cuchi' uún a. Dan me se go' uxrá nij so' chruun xraá yo'ó mozó yo', ne ticavi' nij so' man yo'ó mozó yo', ne go' uxrá nij so' yahij man yo'ó mozó yo' ne yuun che'e cavi' so' nanj adonj. <sup>36</sup> Gaa ne ca'née uún sí xnaa yo' man yo'ó danj mozó ca'anj uún rej naj xnaa so' a. Tzaj ne nij sí nıy tumé naa ro', yo'ó danj qui'yaj uún nij so' man uún nij sí cuchi' uún a. <sup>37</sup> Veé dan, gaa ne ca'née sí xnaa yo' ta'nıí so' rej man nij sí nıy tumé xnaa so' a. "Caraa cochroj nij sí tumé naa rihaan ta'nıj sese ca'anj ta'nıj saj xee", taj sí xnaa yo' a. <sup>38</sup> Tzaj ne quene'en nij sí tumé naa man ta'nıí sí xnaa, ne cataj nij so': "Sí nihánj me sí guun sí xnaa naa nihánj vaa güii ei. Che'é dan ticavi' ní man so', ne vaa güii, ne guun xnaa ma'an ní man naa nihánj chuguanj", taj nij so' rihaan tuvi' nij so' a. <sup>39</sup> Gaa ne quita'aa nij so' man ta'nıí sí xnaa yo', ne quirii nij so' xe', ne ticavi' nij so' man ta'nıí sí xnaa adonj. <sup>40</sup> Ne vaa güii, ne ca'na' uún sí xnaa yo', ne daj qui'yaj so' man nij sí nıy tumé xnaa so', rá nij soj ga —taj Jesucristó, xna'anj so' man nij xrej do', man nij sí uun chij do' a.

<sup>41</sup> —Qui'yaj ndo'o sí xnaa yo' sayuun man nij sí chi'ij 'yaj suun xnaa so', ticavi' so' man nij so' nanj á. Ne tacauchén so' xnaa so' rihaan yo'ó sí tumé xnaa so', ne yavii cuta nii chruj uvá ro', ve'é rque nij so' chruj yo' rihaan sí xnaa yo' nanj adonj —taj nij so' rihaan Jesucristó a.

<sup>42</sup> Gaa ne cataj Jesucristó:

—Me che'é ne nayaaj nij soj nana nihánj nana no rihaan danj Diose ga: "Yuvej quiri'ij nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj. Ma'an sí 'nij ra'a man ní qui'yaj yo', ne cunaj uxrá vaa yo', rá ní á", taj danj Diose a. <sup>43</sup> Che'é dan cuano nihánj me se cataj xna'anj 'unj rihaan nij soj se vaa ca'nee Diose se-suun soj suun guun chij ga Diose rihaan chumii nihánj, gaa ne cune' Diose man yo'ó yuvii se vaa guun chij yo'ó nij yuvii rihaan chumii nihánj ga so', ne ve'é qui'yaj yo'ó nij yuvii yo' nu' se vaa me rá Diose qui'yaj nij so' nanj á. <sup>44</sup> Ne yuvej yo' me se ase vaa yuvej yo' vaa 'unj, ne ase vaa yuvii tíxe yuvej yo' vaa yuvii na'vej rá cunó rihaan 'unj, ne uxrá quiran' nij so' sayuun nanj adonj. Ne ase vaa yuvii quinij yuvej yo' xraá vaa nij yuvii qui'yáa 'unj sayuun man, ne yuun che'e quinavij nij so' nu' cavii nu' ca'anj nanj adonj —taj Jesucristó a.

<sup>45</sup> Dan me se cuno nij xrej atá suun nocoo doj cuno nij sí fariseo cuno cuentó nanó Jesucristó, ne quene'en nij so' se vaa che'e ma'an nij so' me cuentó nanó Jesucristó a. Ase vaa nij sí nıy tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. <sup>46</sup> Gaa ne nanó rá nij so' daj gaa quita'aa nij so' man Jesucristó, tzaj ne chucu'vi' nij so' ni'yaj nij so' man nij yuvii a. 'Q se sí nata' se-nana Diose me Jesucristó, rá nij yuvii a.

**Nana nihánj me cuentó nanó Jesucristó che'é nij sí catuy rihaan Diose asa' guun chij Diose rihaan chumii nihánj a**

**22** Gaa ne ca'mii uún Jesucristó, nanó so' doj cuentó rihaan nij so', cataj so':

<sup>2</sup> —Ase vaa qui'yaj yo'ó sí nicaj suun rey ro', danj qui'yaj uún Diose asa' guun chij Diose rihaan chumii nihánj ei. Dan me se sí nicaj suun rey yo' me se qui'yaj so' cha'anj che'é ta'nıí so' sí nara'aa, <sup>3</sup> ne vaa yuvii navij rá cha'anj ga so', ne ca'née so' se-mozó so' ca'anj nij so' rihaan nij yuvii, cataj xna'anj se-mozó so' rihaan nij yuvii se vaa ca'na' nij so' tucua so' navij rá nij so' cha'anj nara'aa yo', tzaj ne ne ca'vej nij yuvii yo' ca'na' nij so' tucua sí nicaj suun rey a. <sup>4</sup> Gaa ne ca'née uún so' man doj se-mozó so' rihaan nij sí navij rá cha'anj ga so', ne ca'née so' nana rihaan nij yuvii yo' se vaa aj qui'yaj chuvii so' cha ni'yánj nij so' do', se vaa aj ticavi' so' scúj aj ticavi' so' scúj le'ej ramii ndo'o aj ticavi' so' do', se vaa aj vaa chuvii nu' rasuun qui'yaj so' a. Che'é dan ca'na' nij so', ne navij rá nij so' cha'anj ga so', ne che'é dan ca'née so' nana rihaan nij sí navij rá cha'anj ga so' a.

<sup>5</sup> "Tzaj ne ne ca'na' a 'ó nij so' a ma'. Maan se ta'aj nij so' ca'anj qui'yaj suun xnaa nij so', ne yo'ó ta'aj nij so' ca'anj cutu'vee rasuun rihaan yuvii uún a. <sup>6</sup> Ne yo'ó nij so' quita'aa man nij se-mozó sí nicaj suun rey, ne qui'yaj chi'ii nij so' man mozó yo', ne ticavi' nij so' man mozó nacúun man nij so' a. <sup>7</sup> Gaa ne ca'maan ndo'o rá sí nicaj suun rey yo', ne ca'née so' man nij se-tanyu so' ca'anj ticavi' nij so' man sí ticavi' man se-mozó so' a. Cuchi' nij tanuu rihaan nij sí ticavi' man mozó yo', ne ticavi' nij tanuu man nij so', ne caxrij ya'an nij tanuu man se-chuman' nij so', ne cacaa nu' chuman' yo' a.

<sup>8</sup> "Gaa ne ca'mii sí nicaj suun rey rihaan nij se-mozó so', cataj so': "Síj qui'yaj chuvii ní navij rá ní cha'anj, tzaj ne nij sí me rá 'unj navij rá cha'anj gaj me se nuveé sij sa' me nij so' a ma'. Ne nó xcúun nij so' ca'na' nij so' ma'. <sup>9</sup> Che'é dan ca'anj soj rej nuná tuvi' chrej, ne naj guun yuvii nari' soj ro', cataj xna'anj soj rihaan yuvii yo' se vaa ca'na' nij so' navij rá nij so' cha'anj ga ní á". Danj ca'mii so' rihaan se-mozó so', <sup>10</sup> gaa ne curihanj nij mozó, ne naquiyaj chre' nij so' man cunudanj nij yuvii nari' nij so' rá chrej, ne dan me se ta'aj nij yuvii yo' me sí chi'ii, ne ta'aj nij yuvii yo' me sí sa' a. Dan me se quisij caraa nu' ve' canuú cha'anj, gaa ne ca'anj cayáan taran' nij yuvii rihaan mesá cha ni'yánj nij so' a.

<sup>11</sup> "Gaa ne catúj sí nicaj suun rey yo' rá ve' chá ni'yánj nij so', ne quene'en so' man yo'ó so', se vaa nuvi' yatzij nıy nij sí navij rá cha'anj nara'aa nuú so' a. <sup>12</sup> Gaa ne ca'mii sí nicaj suun rey rihaan so', cataj so': "Me che'é catúj so' rá ve' nihánj ve' anuú cha'anj, ne nuvi' yatzij nara'aa nuú so', ga tinu'", taj so' a. Ne guun na'aj so', ne ne ca'mii so' a. <sup>13</sup> Gaa ne ca'ne' sí nicaj suun rey yo' suun rihaan nij se-mozó so', cataj so': "Numij soj tacóo sí nihánj numij soj ra'a sí nihánj numij soj, ne quirii'ij soj man so' xe' ca'anj so' rej rmi' á", taj sí nicaj suun

rey yo' a. Rej rmi' yo' me se yo' me rej ta'vee ndo'o yuvi nē ndāa chā ruj yuvi cúu yan' yuvi adonj. <sup>14</sup> 'O se nacúun Diose man uxrá yuvi ca'na' nij yuvi cayáán nij yuvi gā so', tzaj nē doj vaa nij yuvi narii Diose canē gā so' nanj adonj —taj Jesucristó a.

**Nana nihánj taj xna'anj che'é puextó gō' ní' rihaan go-biernó nē che'é se rque ní' rihaan Diose dō' a**

<sup>15</sup> Gāa nē curihanj nij síi fariseo, nē nuchruj rāa nij so' gā tuvi' nij so' daj qui'yaj nij so' cutā' nij so' cacun' xráá Jesucristó che'é nana ca'mii Jesucristó a. <sup>16</sup> Gāa nē ca'néé nij so' man nij síi tucu'yón se-nānā ma'an nij so' dō', man nij síi noco' man síi cu'naj Herodes dō', cuchí' nij so' rihaan Jesucristó a. Nē cataj nij so' rihaan Jesucristó a:

—Ne'en nūj se vaa nana yā inanj a'mii sō', nē yā tucu'yón sō' rihaan yuvi daj qui'yaj yuvi canoco' yuvi man Diose, maestro. Nē ne chu'ví' sō' ni'yaj sō' man nij yuvi daj cataj yuvi ma'. Nē 'o cuyaān vaa nu' yuvi rihaan sō' chuguanj. <sup>17</sup> Che'é dan cataj xna'anj sō' rihaan nūj daj qui'yaj yuvi, rá sō' á. Nō xcúun yuvi gō' yuvi puextó rihaan síi nicaj suun cu'naj César na'. Ase sē gō' yuvi xa' —taj nij so', xná'anj nij so' nana tihā' yu'unj man Jesucristó a.

<sup>18</sup> Tzaj nē quene'en Jesucristó se vaa me rá nij so' qui'yaj chí'li' nij so' man so' a. Che'é dan cataj so':

—Me che'é me rá soj tihā' yu'unj soj manj nē cutā' soj cacun' xráá gā. 'O se síi tihā' yu'unj man yuvi me soj, nē quij vaa nimán soj adonj. <sup>19</sup> Tihāan soj rihanj daj vaa sa'anj o' nii che'é puextó á —taj Jesucristó rihaan nij síi me rá tihā' yu'unj yo' a.

Gāa nē nano' nij so' sa'anj agā' o' yuvi che'é puextó, nē tihāan nij so' sa'anj agā' yo' rihaan Jesucristó a.

<sup>20</sup> —Me síi nó rihaan sa'anj agā' nihánj gā. Nē me síi se-chuvij nó rihaan sa'anj agā' nihánj gā —taj Jesucristó, xná'anj so' man nij síi me rá tihā' yu'unj yo' a.

<sup>21</sup> —Síi nicaj suun cu'naj César me nó rihaan sa'anj agā' yo', nē nó se-chuvij so' rihaan sa'anj ei —taj nij so' a.

Gāa nē cataj Jesucristó:

—Che'é dan gō' soj si'yaj síi nicaj suun cu'naj César rihaan ma'an so', nē rque soj si'yaj Diose rihaan Diose á —taj Jesucristó a.

<sup>22</sup> Dan me se cuno nij so' nana ca'mii Jesucristó, nē ca'anj rá nij so', nē tanáj nij so' man Jesucristó, ca'anj nij so' a.

**Nana nihánj taj xna'anj se vaa yā cunūu i'na' uún nij síi cavi' a**

<sup>23</sup> Nē corá cuchí' doj nij síi saduceo rihaan Jesucristó a. Nij síi saduceo ro', a'mii nana nihánj se vaa daj chí'haā mij sē cunūu i'na' uún yuvi asā' cavi' yuvi, taj nij so' a. Dan me se xná'anj nij so' man Jesucristó, <sup>24</sup> nē cataj nij so' nana nihánj a:

—Cataj xna'anj síi cu'naj Moisés nana nihánj cunō ní' a: “Sese cavi' yo'ō so', nē sese taj vaj ta'ní' so', nē nō xcúun tinúu so' xcaj tinúu so' man chocō' so' chana

quináj, nē cotoj tinúu síi cavi' gā chocō' so', nē cuchruj no' ne'ej, nē guun ta'nij síi cavi' man ne'ej yo', nē cunūu ne'ej yo' rihaan to'óó síi cavi' yo' a”, taj síi cu'naj Moisés gā naá, maestro. <sup>25</sup> Dan me se vaa chij nij tinuj 'o' nij so' nē gā nūj a. Síi chava' ro', xcaj man chana, tzaj nē cavi' so', nē taj vaj ne'ej cuchruj chana nicā so', qui'yaj so', nē che'é dan quináj uun chana yo', nē che'é dan xcaj scue'ēē síi cavi' yo' man chocō' so' a.

<sup>26</sup> Tzaj nē cavi' so' uún, nē quináj uun chana xcaj scue'ēē so' uún, nē veé dan me se xcaj chij nij tinuj nij so' man chana yo', tzaj nē cavi' taran' nij so' nanj á.

<sup>27</sup> Síj, gāa nē cavi' ma'an chana yo' uún, <sup>28</sup> nē dan me se asā' cunūu i'na' uún nij síi cavi', gāa nē me nij tinuj nij so' nicaj man chana yo', rá sō' gā. 'O se gā vaa i'na' nij so', nē nicā taran' nij tinuj nij so' guun orún' no' a —taj nij síi saduceo, xná'anj nij so' man Jesucristó a.

<sup>29</sup> Gāa nē cataj Jesucristó rihaan nij so' a:

—Ne'en uxrá soj ma'. 'O se ne ne'en soj me taj danj Diose, nē ne ne'en soj sese nucuaj ndo'o Diose a.

<sup>30</sup> 'O se asā' cunūu i'na' uún nij síi cavi', nē sē xcaj tuvi' nij so' a ma'. 'O se ase vaa yáán nij se-mozó Diose rej xtā' ro', danj gāa cayáán nij so' nanj adonj. <sup>31</sup> Gāa nē cataj xna'anj 'unj rihaan soj daj gāa quene'en soj se vaa yā yā cunūu i'na' uún yuvi asā' cavi' yuvi ei. Ataa nayaā soj nana nihánj nana ca'mii ma'an Diose na'. Dan me se se-nānā Diose taj: <sup>32</sup> “Diose síi noco' nij síi man gāa naá síi cu'naj Abraham dō', síi cu'naj Isaac dō', síi cu'naj Jacob dō', mej a.” Danj ca'mii Diose che'é nij síi man gāa naá yo' a. Dan me se nuveé se-Diose nij xngáá me Diose ma'. Inanj nij síi vaa i'na' a'vee noco' man Diose nanj adonj. Che'é dan, ndā' se síi cane gāa naá me va'nuj nij so', tzaj nē vaa i'na' nij so' rihaan Diose nanj ei —taj Jesucristó a.

<sup>33</sup> Dan me se cuno nij yuvi nana ca'mii Jesucristó, gāa nē guun nihā' uxrá rá nij so' se vaa ve'é uxrá tucu'yón so' a.

**Nana nihánj taj xna'anj me nana me nana noco' doj cunō ní' a**

<sup>34</sup> Dan me se cuchí' nana rihaan nij síi fariseo se vaa sā' uxrá ca'mii Jesucristó rihaan nij síi saduceo nē taj vaj nana nari' nij síi saduceo ca'mii uún nij so' rihaan Jesucristó ma'. Gāa nē cunūu chre' nij síi fariseo nuchruj rāa nij so' daj qui'yaj ma'an nij so' a. <sup>35</sup> Gāa nē xná'anj yo'ō tuvi' nij so' yo'ō nana man Jesucristó, quene'en so' sese guun nucuaj Jesucristó cataj xna'anj Jesucristó nana yo' a. Dan me se cataj so':

<sup>36</sup> —Me nana cataj xna'anj Moisés me nana noco' ndo'o nana cunō uxrá ní' gā —taj so', xná'anj so' a.

<sup>37</sup> Gāa nē cataj Jesucristó:

—“Ndāa nimán yá sō' guun rá sō' ni'yaj sō' man Diose síi 'nij ra'a man ní', nē yo'ō ndāa cúu yave mán sō' cuchuman rá ni'yaj man Diose nanj adonj”. <sup>38</sup> Nē nihánj me yā nana uun chij yā nanj ei. <sup>39</sup> Nē ase vaa nana yo', danj vaa yo'ó nana nihánj nana me rá Diose cunō uún ní' a: “Adj' se 'ēē rá sō' man mā'an sō' ro', danj gāa 'ēē rá sō' man tuví' sō' á”. <sup>40</sup> 'O cuyaān a'mii roj nana nihánj gā nu' tucuaān cuchruj síi cu'naj Moisés

gaa naá dɔ', gā nɔ' nana nata' nij sí nata' se-nana  
Diose gaa naá dɔ' nanj adɔnj —taj Jesucristó a.

**Nana nihánj taj xna'anj se vaa sí ca'nej Diöse tɔnanii  
man yuvii rihaan sayuun ro', nuveé nanj yuvii me so'  
ma'**

<sup>41</sup> Dan me se nuu chɛ' nij sí fariseo rihaan Jesu-  
cristó, gaa ne xná'anj Jesucristó man nij so', cataj so':

<sup>42</sup> —Daj sij me sí ca'nej Diöse tɔnanii man yuvii ri-  
haan sayuun, rá nij soj gā. Me sí tuvi' me so', rá soj gā  
—taj Jesucristó, xná'anj so' man nij sí fariseo a.

—Ta'níi ta'nij si'nɔ sí cu'naj David sí cane gaa naá  
me sí ca'na' tɔnanii man yuvii rihaan sayuun nanj á  
—taj nij sí fariseo a.

<sup>43</sup> Gaa ne cataj Jesucristó:

—Tzaj ne gaa cunuû Nimán Diöse nimán sí cu'naj  
David, ne cataj David se vaa sí 'nij ra'a man ma'an so'  
me sí ca'nej Diöse tɔnanii man yuvii rihaan sayuun  
nanj á. Dan me se cataj so': <sup>44</sup> “Ca'mii Diöse sí 'nij ra'a  
man ní' rihaan sí 'nij ra'a manj, cataj so' se vaa cayáán  
sí 'nij ra'a manj x'núú Diöse rej nuva' Diöse ndaa se  
quisij qui'yaj canaán Diöse rihaan taran' nij sí taj  
ri'yunj man sí 'nij ra'a manj ne quirii ta'nga' sí 'nij ra'a  
manj rihaan nij so' nanj adɔnj”, taj sí cu'naj David yo'  
a. <sup>45</sup> Dan me se sí 'nij ra'a man sí cu'naj David me sí  
ca'nej Diöse tɔnanii man yuvii rihaan sayuun, taj sí cu'-  
naj David yo' a. Sese 'nij ra'a so' man David, ne me  
che'é taj soj se vaa nanj ta'níi ta'nij si'nɔ David me so'  
gā. Taj che'é cataj soj se vaa nanj yuvii me so' ma' —taj  
Jesucristó rihaan nij sí fariseo yo' a.

<sup>46</sup> Ne a 'ó nij so' ne guun nucuaj cataj xna'anj 'o nana  
rihaan Jesucristó, ne a 'ó nij so' ne quisij rá xná'anj doj  
nana man Jesucristó a ma'.

**Nana nihánj taj xna'anj che'é cacun' tumé nij sí  
naqui'yaj cɔu se-tucuaj Moisés dɔ', che'é cacun'  
tumé nij sí fariseo dɔ' a**

**23** Gaa ne ca'mii Jesucristó rihaan nij yuvii dɔ', ri-  
haan nij sí tucu'yón se-nana so' dɔ', <sup>2</sup> cataj so':

—Nij sí naqui'yaj cɔu se-tucuaj Moisés dɔ', nij sí  
fariseo dɔ', atā nij so' se-sɔun sí cu'naj Moisés sí cane  
gaa naá a. <sup>3</sup> Che'é dan, naj guun nana cataj nij so' ri-  
haan soj ro', cunɔ soj nɔ' nana yo', ne danj qui'yaj  
guɛɛ soj á. Tzaj ne se qui'yaj soj ndaa vaa 'yaj nij so' a  
ma'. 'O se taj xna'anj nij so' daj qui'yaj yuvii, tzaj ne ne  
'yaj ma'an nij so' se vaa taj nij so' ma'. <sup>4</sup> Ne a'ne' uxrá  
nij so' suun rihaan yuvii daj qui'yaj yuvii canocɔ' yuvii  
man Diöse, ne dan me se ase vaa yuvii araa ndo'o ra-  
sɔun 'ee xráá tuvi' vaa nij so', tzaj ne a doj ne racuij nij  
so' man yuvii catā yuvii rasɔun 'ee yo' a ma'. A 'ó raā  
ra'a nij so' ne racuij nij so' man yuvii nanj man adɔnj.  
<sup>5</sup> Naj guun suun sa' 'yaj nij so' ro', tzaj ne maan che'é  
rej me rá nij so' quene'en yuvii, ne che'é dan 'yaj nij so'  
danj nanj adɔnj. 'O se caxra' ndo'o vaa nij caxran' nuu  
se-nana Diöse nocɔ' rihaan nij so', 'yaj nij so', ne xcaan  
ndo'o vaa yiquitzij nocɔ' tu'va sagan' nij so', 'yaj uún  
nij so', <sup>6</sup> ne niha' rá nij so' nano' nij so' rej sa' doj quitaj

nij so' gaa 'anj nij so' cha'anj, ne niha' rá nij so' nano'  
nij so' chruun xlá sa' doj quitaj nij so' rá ve' tucu'yón  
yuvii se-tucuaj Moisés, <sup>7</sup> ne niha' rá nij so' gaa ve'é  
a'mii yuvii gā nij so' gaa chéé nij so' yu'vee, ne niha' rá  
nij so' cataj yuvii “Síi guun chij” rihaan nij so', <sup>8</sup> tzaj ne  
ma'an soj ro', se guun cataj yuvii “Síi guun chij” rihaan  
ma'an soj, qui'yaj soj a ma'. 'O se vaa ɔrún' síi uun chij  
rihaan soj, ne tinuj taran' soj nanj á. <sup>9</sup> Ne se guun cataj  
soj “Ataj chij” rihaan yuvii man rihaan chumii nihánj a  
ma'. 'O se vaa ɔrún' Rej soj síi nicun' xtā' á. <sup>10</sup> Ne se  
guun cataj yuvii se vaa nocɔ' nij yuvii man soj, qui'yaj  
soj a ma'. 'O se ɔrún' síi ca'néé Diöse tɔnanii man yuvii  
rihaan sayuun me sí canocɔ' soj man nanj adɔnj. <sup>11</sup> Ne  
me ma'an tuvi' soj síi 'yaj suun che'é soj ro', yo' me síi  
sa' doj rihaan taran' soj, <sup>12</sup> ne xa' síi me rá tɔcavii sa'  
man ma'an, tzaj ne quirii' so', ne guun na'aj so', ne xa'  
síi 'yaj nica' nimán, tzaj ne cavii sa' so' adɔnj —taj Jesu-  
cristó rihaan nij yuvii a.

<sup>13</sup> Gaa ne canicaj Jesucristó ca'mii Jesucristó rihaan  
nij sí fariseo dɔ', rihaan nij sí naqui'yaj cɔu se-tucuaj  
Moisés rihaan yuvii dɔ', cataj so':

—Nique soj sij fariseo dɔ', sij naqui'yaj cɔu se-tu-  
cuj Moisés rihaan yuvii dɔ' a. Quiran' uxrá soj sayu-  
un adɔnj. Dan me se a'néj nij soj ve' tucua chana cavi'  
nica, ne yuun che'e guun tucua nij soj man ve' yo', 'yaj  
ma'an nij soj, ne raan ndo'o achíin ni'yaj nij soj rihaan  
Diose, che'é rej sa' doj guun nucuaj nij soj tihā' yu'unj  
soj man yuvii a. Che'é dan doj a gaa sayuun quiran' soj  
qui'yaj Diöse, asa' ca'ne' Diöse cacun' che'é yuvii  
adɔnj.

<sup>14</sup> “Nique soj sij fariseo dɔ', sij naqui'yaj cɔu se-tu-  
cuj Moisés rihaan yuvii dɔ' a. Quiran' uxrá nij soj  
sayuun nanj adɔnj. Síi nucui' rá me nij soj adɔnj. Dan  
me se aráán soj chrej catuɔ yuvii rihaan Diöse asa' gu-  
un chij Diöse rihaan chumii nihánj á. 'O se ne uun chij  
Diose nimán soj, 'yaj soj ma'. Ne ndaa nij síi me rá  
guun chij Diöse nimán ro', aráán soj chrej cunɔ nij so'  
rihaan Diöse adɔnj.

<sup>15</sup> “Nique soj sij naqui'yaj cɔu se-tucuaj Moisés ri-  
haan yuvii dɔ', sij fariseo dɔ' ei. Quiran' uxrá nij soj  
sayuun nanj adɔnj. Síi nucui' rá me nij soj á. Dan me se  
chéé soj ndaa rej xcɔ tu'va na ya'anj dɔ', ndaa rej xcɔ  
quij dɔ', nano' soj yo'o síi canocɔ' man soj, gaa ne  
quisij canocɔ' yo'o so' man soj 'yaj soj, gaa ne nuu  
chii'ij doj nimán so' rihaan nimán soj, 'yaj soj, ne quitaj  
yaaan so' rihaan soj ca'anj taran' nij soj rihaan ya'an  
adɔnj.

<sup>16</sup> “Nique soj che'é sayuun quiran' soj nanj á. Ase vaa  
síi tuchrii vaa soj, tzaj ne me rá soj tihāan soj rihaan  
yuvii daj gaa qui'yaj yuvii a. Ca'vee se cuta' yo'o so' raa  
nuvií nocɔ se vaa ya vaa nana ca'mii so', tzaj ne taj se  
'yaj sese ca'mii ne so' ma', taj soj a. Tzaj ne sese cuta'  
yo'o so' raā aga' oró míi nuu rá nuvií, gaa ne che'é dan  
ya vaa nana ca'mii so', ne nɔ xcúún so' qui'yaj so' nu'  
ndaa vaa cataj so', taj soj a. <sup>17</sup> Ase vaa síi ni'yón dɔ',  
ase vaa síi tuchrii dɔ', vaa soj adɔnj. Me che'é ne ne'en  
soj se vaa nuvií nocɔ me se sa' doj vaa yo' rihaan aga'  
oró míi nuu rque nuvií yo' gā. 'O se ne'en soj se vaa



che'é ma'an nuvií nocoo yo' ro', nuu guëë aga' oró míi yo' rihaan Diose á. <sup>18</sup> Ne taj uún soj se vaa sese cuta' yo' o so' raq chraan altar acaa xcuu rqué yuvií rihaan Diose se vaa ya vaa nana ca'mii so', ne taj se 'yaj sese ca'mii ne so' ma', taj uún soj a. Tzaj ne sese cuta' so' raq xcuu naj rihaan chraan altar yo', ne no xcúun so' qui'yaj so' nu' ndaa vaa cataj so', taj uún soj a. <sup>19</sup> Dan me se ase vaa síi tuchrij vaa soj adonj. Me che'é ne ne'en soj se vaa sa' doj vaa chraan altar yo' rihaan xcuu naj rihaan yo' ga. 'O se che'é ma'an chraan altar ro', che'é dan nuu guëë xcuu yo' rihaan Diose nanj á. <sup>20</sup> Che'é dan sese cuta' yo' o so' raq chraan altar yo', ne nuveé raq chraan altar yo' me se cuta' so' raq ma'. 'O se cuta' so' raq chraan altar do', raq nu' se taj rihaan chraan altar yo' do' adonj. <sup>21</sup> Ne sese cuta' yo' o so' raq nuvií nocoo, ne nuveé inanj raq nuvií nocoo me se cuta' so' raq ma'. 'O se cuta' so' raq nuvií nocoo do', raq ma'an Diose síi yanj nuvií nocoo do' adonj. <sup>22</sup> Ne sese cuta' yo' o so' raq rej xta', ne nuveé inanj rej xta' me se cuta' so' raq ma'. 'O se cuta' so' raq rej xta' do', raq chruun xlá chruun taj ma'an Diose ga rii ta'nga' Diose do', raq ma'an Diose síi taj rihaan chruun xlá yo' do', cuta' so' nanj adonj.

<sup>23</sup> "Nique soj sij naqui'yaj cuu se-tucuñj Moisés rihaan yuvií do', sij fariseo do' ei. Quiran' uxrá soj sayuun adonj. Síi nucui' rá me nij soj nanj á. Dan me se sese vaa nuu xlá do', coj eneldo do', coj cominó do', rihaan soj, ne rqué soj 'o nánj coj rihaan Diose rihaan daj a chi' nánj coj yo' a. Tzaj ne nana nocoo doj ne 'yaj soj ma'. Ne a'ne' nica soj cacun' che'é tuvi' soj ma'. Ne 'ee rá soj tuvi' soj ma'. Ne uun nucaj rá tuvi' soj man soj ma'. Tzaj ne Diose ro', me rá qui'yaj soj nu' nana nocoo nihánj, ne na'vej rá Diose tanáj xco soj a yo' o nana le'ej doj ma'. <sup>24</sup> Dan me se ase vaa síi tuchrij vaa soj, tzaj ne me rá soj tijaan soj rihaan yuvií daj qui'yaj yuvií adonj. Ase vaa síi rii ndaa 'o yacoq le'ej rque na co' o ro', vaa soj, tzaj ne chumánj uun soj cunu' xcuu camelló vaa guëë nanj adonj.

<sup>25</sup> "Nique soj sij naqui'yaj cuu se-tucuñj Moisés rihaan yuvií do', sij fariseo do' a. Quiran' uxrá nij soj sayuun adonj. Síi nucui' rá me nij soj nanj á. Dan me se ase vaa rasuun, ne sa' uxrá na'nu' nii xráá yo', tzaj ne rque yo' ro', me se vaa nacaj guëë yo', ta'nga' danj vaa guëë soj, ne xráá soj me se ve'é naruvii, tzaj ne nimán soj me se quij vaa, ne niha' uxrá rá soj ca'nee soj si'yaj tuvi' soj, ne taj se 'yá' ca'ne' rá soj a ma'. <sup>26</sup> Ase vaa síi tuchrij vaa soj sij fariseo ei. Ase vaa 'yaj yuvií na'nu' rque rasuun ro', danj qui'yaj uún soj, naqui'yaj sa' soj nimán soj á. Ndaa síj, ga ne sa' inanj qui'yaj soj quene'en yuvií ei.

<sup>27</sup> "Nique soj sij naqui'yaj cuu se-tucuñj Moisés rihaan yuvií do', sij fariseo do' a. Quiran' uxrá nij soj sayuun adonj. Síi nucui' rá me nij soj nanj á. Dan me se ase vaa chraan naj xngá rihaan santó ro', vaa soj, ne xráá soj ro', vaa catzij, ne ve'é ndo'o ruvi' man soj, tzaj ne nimán soj me se adi' se vaa cúu ri'yuj ro', vaa nimán soj, ne chi'ij vaa nu' nimán soj adonj. <sup>28</sup> Dan me se ase vaa síi nica nimán vaa soj chéé soj ni'yaj yuvií,

tzaj ne 'yaj yuve ndo'o soj se chi'ij, ne ne uno uxrá soj rihaan Diose a ma'. Inanj danj vaa nimán soj nanj adonj.

<sup>29</sup> "Nique soj sij naqui'yaj cuu se-tucuñj Moisés rihaan yuvií do', sij fariseo do' a. Quiran' uxrá soj sayuun adonj. Síi nucui' rá me nij soj nanj á. Dan me se ve'é une' soj chraan yan naj cúu man nij síi nata' se-nana Diose ga naá do', man nij síi vaa sa' cane ga naá do', ne ve'é tumé soj man chraan yo' a. <sup>30</sup> Ne taj soj se vaa sese cayáan soj ga xii soj nij síi man ga naá ro', ne ne ticavi' soj man nij síi nata' se-nana Diose ndaa vaa qui'yaj ma'an xii soj a ma'. Danj a'mii soj, <sup>31</sup> taj xna'anj ma'an soj se vaa ya tuvi' nij síi ticavi' man nij síi nata' se-nana Diose ga naá me ma'an soj nanj á. <sup>32</sup> Ne ataa quisij cacun' qui'yaj nij tuvi' soj nij síi man ga naá yo' a. Tzaj ne tísij soj cacun' yo' adonj.

<sup>33</sup> "Ase vaa xcuáá yuvaq vaa soj, ne taj se qui'yá' quinanii soj rihaan sayuun qui'yaj Diose man soj ma'. Cacaq soj rihaan ya'an adonj. <sup>34</sup> Che'é dan xa' soj, tzaj ne ca'nej 'unj síi nata' se-nana Diose ca'nej 'unj síi ca'mii nana cuu ca'nej 'unj síi tucu'yón se-nana Diose ca'nej 'unj rihaan soj, ga ne ticavi' soj man ta'aj nij so', ne cachron soj man ta'aj nij so' rihaan rcutze, ne go' soj cuartá xráá ta'aj nij so', ne cunanj nij so' rihaan soj, curihanj nij so' 'o chuman', ne canoco' uxrá soj man nij so' ndaa 'o chuman' uún, qui'yaj soj vaa güii nanj adonj. <sup>35</sup> Ndaa síj, ga ne nu' ton cayanj man nij síi sa' rihaan Diose rihaan chumii nihánj ro', nu' cacun' yo' ro', nata' xráá nij soj a. Dan me se asij ton cayanj man síi sa' cu'naj Abel ne ndaa ton cayanj man síi cu'naj Zacarías ta'níi síi cu'naj Berequías ga cavi' so' rihaan nuvií yan nicun' chraan altar ro', nu' cacun' yo' ro', nata' xráá nij soj a. <sup>36</sup> Ya ya cataj xna'anj 'unj rihaan soj cuano se vaa quiran' ma'an nij tuvi' nij soj sayuun che'é nu' cacun' yo' adonj —taj Jesucristó rihaan nij síi fariseo do', rihaan nij síi naqui'yaj cuu se-tucuñj Moisés rihaan yuvií do' a.

#### Nana nihánj taj xna'anj daj quiran' nij síi man chuman' Jerusalén a

<sup>37</sup> Ga ne cataj uún Jesucristó a:

—Naná uxrá raj che'é soj sij man chuman' Jerusalén nihánj nanj á. Dan me se ticavi' soj man nij síi nata' se-nana Diose, ne go' soj yahij man nij síi ca'née Diose cuchí' rihaan soj á. Guun que'ee ndo'o guun rá 'unj naqui'yaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'níi xo' caráan xo' xcóo xo' xráá ta'níi xo' ro', danj guun raj qui'yaj man soj, tzaj ne ne ca'vej rá soj qui'yaj danj a ma'. <sup>38</sup> Yaj me se cutumé ma'an soj man soj nanj adonj. <sup>39</sup> 'O se cuano nihánj me se cataj xna'anj 'unj rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'na' uún 'unj rihaan chumii nihánj quene'en soj manj, ne cataj soj: "Ve'é uxrá 'na' síi a'née síi 'nij ra'a man ní' á", cataj soj a —taj Jesucristó ni'yaj so' man nij síi man Jerusalén yo' a.

Nana nihánj taj xna'anj se vaa canee nuj' nuví nocoo ne chuman' Jerusalén a

**24** Gaa ne curihanj Jesucristó nuví nocoo, ca'anj so', ne cuchi' nij sí tucu'yón se-nana so' rihaan so' a. Guun rá nij so' quene'en Jesucristó daj vaa nij ve' man nuví nocoo yo' a. <sup>2</sup> Gaa ne cataj Jesucristó rihaan nij so' a:

—Dan me se ne'en soj nuj' ve' man nuví nocoo nihánj na'. Ya ya cataj xna'anj 'unj rihaan soj cuano se vaa vaa güii, ne canee nuj' nuví nocoo nihánj, ne a 'ó yujej se quitáá xráá tuvi' yujej nihánj a ma' —taj Jesucristó a.

Nana nihánj taj xna'anj che'é sayuun guun rihaan chumii nihánj vaa güii a

<sup>3</sup> Dan me se ca'anj cayáán Jesucristó raq quij cu'naj Quij man Chruun Olivó, ne cuchi' orún' nij sí tucu'yón se-nana so' rihaan so', ne cataj nij so':

—Cataj xna'anj so' rihaan núj aman canee nuj' nuví nocoo yo' do', a me rasuun ca'na' qui'yáá so' asa' quisij ca'na' so' quene'en núj ne quinavij nuj' chumii nihánj, maestro —taj nij so', xna'anj nij so' man Jesucristó a.

<sup>4</sup> Gaa ne cataj Jesucristó:

—Cutumé ndo'o soj man soj se gaa nanj tihá' yu'unj yuvij man soj á. <sup>5</sup> 'O se ca'na' uxrá yuvij cataj: "Uñj me sí ca'née Diose tñanii man yuvij rihaan sayuun", cataj nij so', ne dan me se tihá' yu'unj uxrá nij so' man tuvi' nij so' nanj á.

<sup>6</sup> "Dan me se vaa güii, ne quene'en soj se vaa cunuj' uxrá chuman' ga tuvi' chuman' a. Ne cunuj' uxrá soj nana se vaa unu' chuman' man gan' ga tuvi' chuman' yo' a. Cutumé soj man soj se cuchu'vi' nimán soj ma'. Maan se vaa che'é guun sayuun yo' rihaan chumii nihánj adonj. Tzaj ne asa' quisij guun danj, gaa ne se ca'anj ni'ya chumii nihánj nuj' orá ma'. 'O se quinaj chumii nihánj doj adonj. <sup>7</sup> Dan me se cunuj' uxrá yuvij man chuman' nocoo ga yo'ó chuman' nocoo, ne cunuj' gobiernó ga tuvi' gobiernó a. Ne cachén x'naa cachén yuún nocoo cachén que'ee chuman' a. <sup>8</sup> Nuj' sayuun nihánj ro', ase vaa guun che'e 'o chana ve'ee rque no' cuchruj no' ne'ej ro', danj gaa nuj' sayuun nihánj nanj ei. Dan me se nuj' ne'en chana ve'ee rque yo', ne ne'en no' doj a quiran' no' sayuun rej rihān, ne ase uun rá chana yo', danj guun rá soj gaa ca'na' sayuun yo', guun rá soj se vaa daj doj guun uxrá sayuun rihaan chumii nihánj nanj adonj.

<sup>9</sup> "Gaa ne ca'anj nicaj yuvij man ta'aj soj rihaan nij sí nicaj suun, ne quiran' ta'aj soj sayuun ne cavi' ta'aj soj nanj á. Ne nachri' cunujanj nij sí yanij ni'yaj nij so' man soj, che'é se me soj sí nocoo manj adonj. <sup>10</sup> Gaa ne tanaj que'ee tinúú soj chrej sa', ne taquachén tinúú soj sí tanaj chrej sa' man yo'ó tinúú soj rihaan sí nicaj suun, ne nachri' uun tinúú soj sí tanaj chrej sa' man ta'aj soj sij nocoo manj nanj á. <sup>11</sup> Gaa ne ca'na' uxrá sí nata' rihaan yuvij se vaa sij nata' se-nana Diose me nij

so', cataj nij so', tzaj ne ca'mii ne uun nij so', ne tihá' yu'unj uxrá nij so' man yuvij adonj. <sup>12</sup> Gaa ne xna'anj ndo'o se chi'ii qui'yaj yuvij, ne ca'ne' rá nij yuvij ga suun nocoo se-nana Diose, ne che'é dan tanaj uxrá nij sí nocoo manj chrej sa' chrej 'ee rá man tuvi' a. <sup>13</sup> Tzaj ne sí nocoo raan manj ndaa se ca'anj ni'ya chumii nihánj ro', so' me sí quinanii rihaan sayuun adonj. <sup>14</sup> Ne ca'mii natáj yuvij nana sa' nihánj nana che'é güii guun chij Diose rihaan chumii nihánj cunuj' yuvij man cunujanj chuman' man rihaan chumii, ne xcaj nij yuvij cuentá che'ej, gaa ne guun che'e chumii nihánj quinavij chumii nihánj nanj adonj —taj Jesucristó rihaan nij sí tucu'yón se-nana so' a.

<sup>15</sup> Ne soj sij nayaá nana nihánj nana cachronj rihaan yanj nihánj ro', xcaj uxrá soj cuentá me taj nana nihánj nana ca'mii Jesucristó che'é se chi'ii á.

Dan me se cataj uun Jesucristó:

—Aj ne'en soj se vaa cataj xna'anj sí cu'naj Daniel sí nata' se-nana Diose gaa naá che'é yo'ó se chi'ii qui'yaj ndo'o sayuun man yuvij, ne dan me se güii quene'en soj se chi'ii yo' rej guue, <sup>16</sup> ne yo'ó cunanj nij sí man estadó Judea ca'anj nij so' raq quij á. <sup>17</sup> Ne sí taj xráá ve' tucua' ro', se catúj so' rá ve' tucua' so' quirij so' si'yaj so' ma'. <sup>18</sup> Ne sí 'yaj suun tacaan ro', se canicaj so' nanuj' so' sagan' so' tanaj so' rihaan yo'ó ma'. Se guun raan nij so' ma'. Maan se yo'ó cunanj nij so' á. <sup>19</sup> Nique chana nuy rque do', chana vaa ta'níí ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'. <sup>20</sup> Cachinj ni'yaj soj rihaan Diose se vaa se ca'na' sayuun yo' güii gaa maan do', güii no' xcúun yuvij naraan rá yuvij do' ma'. <sup>21</sup> 'O se güii ca'na' sayuun ro', quij ndo'o guun nanj á. Quij doj gaa sayuun yo' rihaan nuj' nij sayuun quiran' yuvij gaa nuj' ca'na', ne daj chihaa mij se quiran' uun yuvij sayuun vaa danj ma'. <sup>22</sup> Sese que'ee uxrá güii guun sayuun, ne se quinanii yuvij rihaan sayuun yo' ma'. Tzaj ne vaa güii quisij sayuun, qui'yaj Diose, che'é rej quinanii nij sí narii so' canoco' man so' adonj.

<sup>23</sup> "Ne güii yo' me se sese cataj yuvij rihaan soj: "Ni'yaj so' ei. Nihánj 'na' sí tñanii man ní' rihaan sayuun á", ne se cuchumán rá soj ma'. <sup>24</sup> 'O se ca'na' uxrá sí ne sí cataj se vaa sí tñanii man yuvij rihaan sayuun me nij so', ne ca'na' uxrá sí ne sí cataj se vaa nata' nij so' se-nana Diose, ne qui'yaj nij so' suun sa' nocoo, ne tihá' yu'unj nij so' man cunujanj nij yuvij man rihaan chumii nanj adonj. Ndaa nij sí narii Diose man ro', sese taj vaj Diose tumé man nij so', ne cuchuman rá nij so' ni'yaj nij so' man nij sí tihá' yu'unj yo' nanj adonj. <sup>25</sup> Nihánj me se cataj xna'anj 'unj rihaan soj daj guun rihaan chumii nihánj nanj á. <sup>26</sup> Che'é dan me sese cataj yuvij rihaan soj se vaa vaj 'unj rej quij, ne se ca'anj soj rej quij nanuj' soj manj ma'. Ne sese cataj yuvij rihaan soj se vaa yáán 'unj rá 'o ve', ne se cuchumán rá soj ma'. <sup>27</sup> Dan me se ndaa rá se uun gaa raan rej sij güii ne 'o chuguun nuj' xtá' ndaa rej ata' güii ro', ne ne'en cunujanj yuvij se vaa raan rihaan chumii a. Ne ase uun rá soj ne'en soj gaa raan ro', danj guun rá soj asa' ca'ná' 'unj sij ca'née Diose nicaj yu'unj man yuvij, ne

yo'o quene'en nu' yuvii man rihaan chumii nihánj se vaa ca'ná' 'unj adonj. <sup>28</sup> Aj ne'en soj daj 'yaj yachruú vaj rej xtá', ne ne'en ma'an xo' me rej naj nee chá xo' a. Taj síi nata' rihaan xo' me rej naj nee yo' ma'. Ne ase uun rá yachruú ro', danj guun rá ma'an soj asá' ca'na' uún 'unj rihaan chumii nihánj adonj. Quene'en ma'an soj sij man rihaan chumii nihánj me rej ca'ná' 'unj adonj.

**Nana nihánj taj xna'anj daj gaa ca'na' uún Jesucristó rihaan chumii nihánj a**

<sup>29</sup> "Sij quiran' yuvii sayuun yo', gaa ne guun rmi' güii guun rmi' yavii guun rmi', ne cayuu nij yati' xtá' ne quinaan taran' nij rasuun nucuaj man rej xtá' do' a. <sup>30</sup> Gaa ne vaa se curuvi' rej xtá' quene'en soj, ne quene'en soj se vaa daj doj ca'na' uún 'unj sij ca'née Diose nıcaj yu'unj man yuvii a. Gaa ne cunudanj nij síi man rihaan chumii nihánj ro', quinanó ndo'o rá ma'an nij so', gaa ne quene'en nij so' mán 'unj sij ca'née Diose nıcaj yu'unj man yuvii á. Dan me se xraá ngaa quitaj 'unj ca'na' 'unj, ne guun nucuaj ndo'oj quirii ta'ngaj, ne ve'é uxrá curuvij ca'naj á. <sup>31</sup> Gaa ne ca'yanj nii chruun a'yanj, qui'yáj, ne ca'nej 'unj man nij se-mozó 'unj ca'na' nij so' rihaan chumii nihánj, ne naqui'yaj chre' nij se-mozó 'unj man nij síi narii Diose man canoco' manj a. Dan me se cachee nij se-mozó 'unj rihaan nu' chumii nihánj, nanó' nij so' taran' nij síi cunuu chre' ga 'unj nanj adonj.

**Nana nihánj taj xna'anj se vaa ya quene'en ní' se vaa nichrun' ca'na' uún Jesucristó a**

<sup>32</sup> "Tucu'yón soj nana nihánj nana che'é chruun man chruj higó raá á. Gaa quisij guun laruu ra'a chruun, ne naca coj ya'lij raá chruun, ne ne'en soj se vaa nichrun' 'na' dió namān maan a. <sup>33</sup> Dan me se xcaj uún soj cuentá se vaa asá' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa síi nicun' ta'yaa ro', gaa 'unj ei. <sup>34</sup> Ya ya cataj xna'anj 'unj rihaan soj cuano quisij nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. <sup>35</sup> Vaa güii ca'anj ni'ya yo'óo do', xtá' do', tzaj ne se-nanaj me se daj chihaa mįj se quinavij yo' ma'.

**Nana nihánj taj xna'anj se vaa ne ne'en ní' me güii ca'na' uún Jesucristó ma'**

<sup>36</sup> "Nihánj me cataj xna'anj 'unj rihaan soj se vaa a 'ó síi ne ne'en me güii ca'na' uún 'unj rihaan chumii nihánj ma'. Ca'vee se ndaa se-mozó Diose 'yaj suun rej xtá', ca'vee se ndaa ma'anj ta'nij Diose, tzaj ne ne ne'en núj me güii me yo' ma'. Orún' Réj me síi ne'en nanj adonj. <sup>37</sup> Ase vaa qui'yaj yuvii gaa cayáán síi cu'naj Noé rihaan chumii ro', danj gaa qui'yaj uún yuvii asá' ca'na' uún 'unj sij ca'née Diose nıcaj yu'unj man yuvii rihaan chumii nihánj adonj. <sup>38</sup> Dan me se gaa cayáán síi cu'naj Noé, ne daj doj caráán na ya'anj rihaan chu-

mij, tzaj ne chá yuvii do', co'o yuvii do', ne xcaj tuvi' nij yuvii do'; inanj danj qui'yaj nij yuvii ndaa quisij güii catúj nij tuvi' síi cu'naj Noé rque rihoo xij chée rihaan na a. <sup>39</sup> Ne ne xcaj nij yuvii cuentá sese caráán na ya'anj xraá nij so' ma'. Maan se ndaa quisij caráán na ya'anj xraá cunudanj nij so', ne danj gaa xcaj nij so' cuentá nanj á. Ne ase vaa ne xcaj nij yuvii man gaa naá cuentá se vaa quiran' nij so' sayuun ro', danj gaa uún yuvii asá' quisij ca'na' uún 'unj sij ca'née Diose nıcaj yu'unj man yuvii rihaan chumii nihánj adonj. 'O se ndaa síi güii quene'en nij so' manj, gaa ne xcaj nij so' cuentá nanj á.

<sup>40</sup> "Ne asá' quisij güii yo', ne cunuú vij roj snó'o qui'yaj suun roj so' yo'óo, ne nacaj se-mozó Diose man yo'ó so', ne quinaj yo'ó so' a. <sup>41</sup> Ne cunuú vij roj chana gaj roj no' 'núú trigó, ne nacaj se-mozó Diose man yo'ó no', ne quinaj yo'ó no' nanj adonj. <sup>42</sup> Che'é dan cütumé uxrá soj man soj á. 'O se ne ne'en soj me güii ca'na' síi 'nij ra'a man soj a ma'. <sup>43</sup> Dan me se sese 'o síi tucua ve' ro', aj ne'en so' me orá ca'na' síi ituu ne qui'yaj ituu síi ituu rasuun man tucua so', ne uxrá cütumé so' tucua so', ne se qui'yaj ituu síi ituu tucua so' tzaj ma'. Maan se ne ne'en soj me orá ca'na' síi ituu man adonj. <sup>44</sup> Dan me se ta'nga' danj vaa guee 'unj sij ca'née Diose nıcaj yu'unj man yuvii, ne ne ne'en soj me orá ca'na' uún 'unj man adonj. Che'é dan yo'ó ni'yaj soj á.

**Nana nihánj taj xna'anj daj quiran' síi ve'é 'yaj suun rihaan Diose do', daj quiran' síi ne 'yaj suun sa' rihaan Diose do' a**

<sup>45</sup> "Che'é dan me sese cune' síi tucua yo'ó ve' man yo'ó se-mozó so' se vaa cütumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj mozó yo', rá soj ga. Sese ya ya sij ve'é 'yaj suun me so' do', sese ya ya sij avii raá me so' do', ne daj qui'yaj so', rá soj ga. <sup>46</sup> Gaa ne güii namān se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavi' sa' uxrá mozó yo', qui'yaj se-ru'vee mozó yo' adonj. <sup>47</sup> Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' síi tumé man cunudanj si'yaj ru'vee yo' a. <sup>48</sup> Tzaj ne sese vaa chi'ij nimán mozó yo', ne guun rá so' se vaa guun raan ndo'o se-ru'vee so', <sup>49</sup> gaa ne guun che'e so' go' so' man tuvi' so' mozó, ne chá so' co'ó so', ne guun xno so' a. <sup>50</sup> Dan me se ne ne'en so' aman namān se-ru'vee so' a. Ne na'vij so' ca'na' ru'vee a. Tzaj ne síi güii síj orá síj, ne ca'na' ma'an se-ru'vee mozó yo', <sup>51</sup> gaa ne ca'ne' nu' so' man mozó yo' ne cataj so' se vaa ca'anj mozó yo' rihaan ya'an ga yo'óo nij síi nucui' rá a. Ne yuvii man rihaan ya'an yo' ro', ta'vee uxrá, ne ndaa chá ruj ma'an nij yuvii cúu yan' yuvii ei.

Nihánj me cuentó nanó Jesucristó che'é chí' chana yaan me rá catuü rej anuû cha'anj nara'aa a

25 "Ne asá' ca'na' uún 'unj rihaan chumij nihánj, ne ase vaa chí' chana yaan ro', danj gaa nij yuvij me rá catuü rihaan Diosé asá' guun chij Diosé á. Dan me se nicaj nij chana yaan yo' saga' nij no' aga' ya'an, ne ca'anj na'vij nij no' man síí nara'aa a. <sup>2</sup> Dan me se 'un' nij chana yaan yo' ro', me chana ni'yón, ne yu'un' nij chana yaan yo' ro', me chana nicaj cuentá a. <sup>3</sup> 'O se nij chana ni'yón yo' ro', nicaj nij no' saga' nij no' aga' ya'an, tzaj ne taj vaj casté acaa nicaj nij no' a ma'. <sup>4</sup> Ne nij chana nicaj cuentá ro', nij no' me se nicaj nij no' saga' nij no' aga' ya'an do', aga' nuü casté acaa do' a. <sup>5</sup> Dan me se guun raan síí nara'aa, ne ca'na' nej rihaan taran' nij chana yaan yo', ne cotoj taran' nij no' a. <sup>6</sup> Gu-un yan', ne caguáj yuvij cataj yuvij: "Na' síí nara'aa ga chana yaan ei. Cuvá' soj nari' tuvi' soj ga so' ei", cataj yuvij rihaan chí' nij chana yaan yo' a. <sup>7</sup> Gaa ne cuno nij chana yaan, ne ra'yanj naxagaá taran' nij no', ne naqui'yaj sa' nij no' saga' nij no' aga' ya'an a. <sup>8</sup> Ne cataj nij chana ni'yón rihaan nij chana nicaj cuentá, ne: "Qui'yaj soj doj se ndo'o, rque soj doj casté acaa rihaan núj ruguanj. Quina'áj saga' núj aga' ya'an nanj achuguanj", taj nij chana ni'yón yo' rihaan tuvi' no' a. <sup>9</sup> Gaa ne tuvi' no' chana nicaj cuentá me se cataj: "Maan se se quisij casté acaa cacaa rihaan taran' ní ma'. Ca'anj soj rej ane' casté acaa, ne quiraan soj man yo' á", taj nij chana nicaj cuentá yo' rihaan nij chana ni'yón a. <sup>10</sup> Veé dan, ne ca'anj nij chana ni'yón yo' quiraan nij no' casté acaa, ne ca'na' síí nara'aa, ne nij chana nicaj cuentá me se ne cachjin casté acaa rihaan nij no' ma'. Che'é dan catúj nij no' rá ve' canuû cha'anj ga síí nara'aa, ne caráán nii ta'yaa yo' a. <sup>11</sup> Cachén doj orá, gaa ne ca'na' nij chana ni'yón uún, ne cataj nij no': "Ca'nyü so' ta'yaa catuü núj, socoj", cataj nij no' rihaan síí nara'aa a. <sup>12</sup> Ne cataj síí nara'aa yo': "Ya ya cataj xna'anj 'unj rihaan soj se vaa ne ne'én 'unj man soj ma'", taj so' rihaan nij chana ni'yón yo' a.

<sup>13</sup> "Che'é dan cutumé uxrá nij soj man soj á. 'O se ne ne'en soj me güii ca'na' 'unj ne ne'en soj me orá ca'na' 'unj ne ne'en soj ma'.

**Nana nihánj me cuentó nanó Jesucristó che'é síí racuíj sa'anj rihaan se-mozó so' a**

<sup>14</sup> "O se güii ca'na' 'unj me se ase vaa qui'yaj yo'o ru'vee ga se-mozó ru'vee ro', danj gaa qui'yáj ga soj sij nocó' manj adonj. Dan me se guun rá ru'vee yo' ca'anj so' yo'ó chuman', ne canacúún so' man nij se-mozó so', ne racuíj so' se-sa'anj so' rihaan nij mozó yo' a. <sup>15</sup> Dan me se rihaan yo'o so' racuíj so' 'un' sa'anj nocó uxrá cu'naj talento a. Rihaan yo'ó so' racuíj so' vij sa'anj talento a. Ne rihaan yo'ó so' racuíj so' yo'o sa'anj talento a. Danj qui'yaj so', racuíj so' sa'anj rihaan 'o 'o nij se-mozó so', ne rihaan 'o 'o mozó yo' racuíj so' ndaa vaa guun nucuaj mozó tinaca mozó yo' a. Dan me se me rá so' qui'yaj suun 'o 'o mozó tinaca

'o 'o mozó sa'anj rqué so' rihaan mozó yo', ne che'é dan qui'yaj so' danj a. Ne cavii so', ca'anj so' a.

<sup>16</sup> "Síí ca'anj so', ne cavii síí nicaj 'un' sa'anj talento ca'anj so', ne qui'yaj suun so', ne quisij, gaa ne qui'yaj canaán so' yu'un' sa'anj talento ga sa'anj uún a. <sup>17</sup> Ne ase vaa qui'yaj so' ro', danj vaa qui'yaj síí nicaj vij sa'anj talento uún, ne qui'yaj canaán so' yavij sa'anj talento uún a. <sup>18</sup> Tzaj ne síí quiri' 'o sa'anj talento yo' me se cavii so' ca'anj so', ne gáán so' 'o yu'uj, ne caxrj yuve so' man sa'anj racuíj ru'vee rihaan so' a.

<sup>19</sup> "Veé dan, ne guun raan uxrá, ne namán se-ru'vee va'núj nij mozó, ne xna'anj ru'vee man 'o 'o nij so' daj qui'yaj nij so' a. <sup>20</sup> Ne cuchí' síí nicaj 'un' sa'anj talento rihaan ru'vee, ne rqué so' chí' sa'anj talento man se-ru'vee so', cataj so': "'Un' sa'anj talento racuíj so' manj, señor. Ne yaj ro', nuu yo' chí' sa'anj talento, qui'yáj nanj á", taj so' a. <sup>21</sup> Ne cataj ru'vee yo' rihaan se-mozó so': "Cunaj uxrá vaa qui'yáá so' ei. Mozó sa' mé so', ne gaa nucuaj raj mán so' adonj. Ve'é cutumé so' man doj si'yáj á. Che'é dan, ne yaj cané so' tumé so' nocóo doj si'yáj á. Cuvá' so' cayáán so' ga 'unj, ne ve'é cayáán ní nanj ei", taj so' rihaan se-mozó so' a.

<sup>22</sup> "Gaa ne cuchí' síí nicaj vij sa'anj talento uún, ne cataj so': "Racuíj so' vij sa'anj talento rihanj, señor. Ne yaj, ne nuu yo' ca'anj sa'anj talento, qui'yáj nanj á", taj so' a. <sup>23</sup> Ne cataj ru'vee yo' rihaan so': "Cunaj uxrá vaa qui'yáá so' ei. Mozó sa' mé so' uún, ne gaa nucuaj raj mán so' uún adonj. Ve'é cutumé so' man doj si'yáj, ne che'é dan yaj cané so' tumé so' nocóo doj si'yáj ya ei. Cuvá' so', cayáán so' ga 'unj, ne ve'é cayáán ní ya ei", taj ru'vee yo' rihaan yo'ó se-mozó so' a.

<sup>24</sup> "Veé dan, ne cuchí' síí nicaj yo'o sa'anj talento uún rihaan se-ru'vee so', ne cataj so': "Ne'én 'unj se vaa sij sca' ndo'o nimán mé so', señor. Ne'én 'unj se vaa yo'ó yuvij unô 'núú, ne ma'án so' me síí rii yun naa nanj adonj. Ne yo'ó yuvij narii squij man 'núú trigó, 'yáá so', ne ma'án so' naran' yun man 'núú trigó sa' yo' nanj adonj. <sup>25</sup> Che'é dan cuchu'ví' 'unj, ne ca'anj 'unj, ne caxrj yuve 'unj se-sa'anj so' rque yo'óo nanj adonj. Dan me se nacaj guee uún so' se-sa'anj so' nanj ei", taj mozó yo' rihaan ru'vee a. <sup>26</sup> Ne cataj ru'vee yo' rihaan mozó: "Mozó chí'ii nimán do', mozó rmií do', mé so' ei. Se danj ne'én so' se vaa yo'ó yuvij unô 'núú, ne ma'anj rii naa, ne ne'én so' se vaa yo'ó yuvij narii squij man 'núú trigó, ne 'unj naran' 'núú trigó sa' yo', <sup>27</sup> ne me che'é ne tãcuachén so' se-sa'anj 'unj rihaan nij síí nuta' raá sa'anj ga. Gaa ne asá' 'ná' 'unj, ne nicaj 'unj se-sa'anj 'unj ga sa'anj nata' raá yo' ga", taj ru'vee yo' rihaan yo'ó mozó yo' a.

<sup>28</sup> "Ne ca'mii uún ru'vee yo' rihaan yo'ó nij se-mozó so', cataj so': "Ca'nee soj sa'anj nicaj mozó chí'ii nihánj, ne tãcuachén soj rihaan síí nicaj chí' sa'anj talento á.

<sup>29</sup> 'O se síí ne'en sa' qui'yaj suun rihanj me se vaa güii, ne doj a guun nucuaj so' qui'yaj suun so' rihanj adonj. Ne síí ne ne'en qui'yaj suun rihanj me se ca'nee 'unj suun le'ej nii atã so', ne quinaj yun so', qui'yáj adonj.

<sup>30</sup> Ne mozó chí'ii yo' me se taj se uun so' rihanj ma'. Quiri'ij soj man so' xe' rej rmi' á. Ne yuvij man rej rmi'

yo' me se ta'vee uxrá ne ndaa chá ruj ma'an nij yuvii cúu yan' nij so' nanj adonj", taj ru'vee rihaan yo'ó nij se-mozó so' a.

**Nana nihánj taj xna'anj che'é güii ca'ne' Jesucristó cacun' che'é yuvii man rihaan chumii a**

<sup>31</sup> "Dan me se síi ca'née Diose nıcaj yu'unj man yuvii mé 'unj, ne ca'na' uún 'unj rihaan chumii nihánj, ne ve'é uxrá gaa ca'na' 'unj, ne ca'na' cunudanj nij se-mozó 'unj, ne asa' ca'ná' 'unj, ne quitaj 'unj rihaan xrúún 'unj chruun xlá sa', ne ca'ne' 'unj cacun' che'é yuvii adonj. <sup>32</sup> Dan me se naqui'yaj chre' nij se-mozó 'unj man cunudanj nij yuvii man rihaan chumii, ne canicun' nij yuvii rihaan 'unj, ne cuxra' ta'aj 'unj man nij yuvii, ne dan me se ase vaa 'yaj síi tumé matzinj uxra' ta'aj so' man nij matzinj ga' nij tana ro', danj gaa qui'yáa 'unj, cuxra' ta'aj 'unj man nij yuvii yo' nanj adonj. <sup>33</sup> Dan me se nij síi sa' ro', ase vaa matzinj gaa nij so' rihanj, ne cachén nij so' canicun' nij so' rej nuva' 'unj, ne nij síi chi'ii ro', ase vaa tana gaa nij so' rihanj, ne cachén nij so' canicun' nij so' rej nichruún 'unj a.

<sup>34</sup> "Ne guún 'unj síi nicaj suun rey, quirii ta'ngá' 'unj rihaan nij so', ne dan me se ca'mii 'unj rihaan nij síi nicun' rej nuva' 'unj, cataj 'unj: "Cuvá' soj ei. Niha' uxrá rá Réé 'unj ni'yaj so' man soj á. Dan me se asij qui'yaj Réé 'unj man chumii nihánj, ne cachrón so' güii guun chij ma'an soj rihaan chumii nihánj a. Che'é dan ca'na' soj, ne nacaj soj nu' se sa' qui'yaj Réj á. <sup>35</sup> 'O se gaa naá, ne quina'aan rquej, ne rqué soj se chay á. Ne nacoó 'unj na, ne rqué soj na co'oj á. Ne ase vaa síi 'na' yo'ó chuman' vaa 'unj rihaan soj, tzaj ne ve'é ca'mii soj gaj a. <sup>36</sup> Tachrinj yun vaa sagan' 'unj, tzaj ne rqué soj yatzij manj á. Ne canó chi'ii manj, ne cuchi' soj rej náj, ne taj ya'anj soj manj á. Qui'nij 'unj taga', ne cuchi' soj taga', ne ca'mii soj gaj adonj", cataj 'unj rihaan nij síi nicun' rej nuva' 'unj a.

<sup>37</sup> "Gaa ne ca'mii nij síi sa' yo' rihanj, cataj nij so': "Aman quene'en núj se vaa na'aan rqué so', ne rqué núj se chá so', Señor. Aman quene'en núj se vaa nacoó so' na, ne rqué núj na co'o so' ga. <sup>38</sup> Aman ase vaa síi 'na' yo'ó chuman' vaa so' rihaan núj, ne ca'mii núj ga so' ga. Aman quene'en núj se vaa tachrinj yun vaa sagan' so', ne rqué núj yatzij cunuú so' ga. <sup>39</sup> Aman quene'en núj se vaa canó chi'ii mán so' do', se vaa catúj so' taga' do', ne cuchi' núj racuíj núj mán so' ga", cataj nij síi sa', xna'anj nij so' manj a.

<sup>40</sup> "Gaa ne cataj 'unj rihaan nij so': "Ya ya cataj xna'anj 'unj rihaan soj cuano se vaa racuíj ndo'o soj man nij tinúú 'unj gaa quiran' nij so' sayuun vaa danj á. Nda' se síi nicá' ndo'o me ta'aj nij so', tzaj ne racuíj ndo'o soj man nij so', ne che'é se racuíj ndo'o soj man tinúú 'unj, ne che'é dan nuchruj 'unj cuentá se vaa me soj síi racuíj man ma'anj adonj", cataj 'unj rihaan nij so' a.

<sup>41</sup> "Gaa ne cataj 'unj rihaan nij síi nicun' rej nichruún 'unj a: "Naxuun soj man soj rihanj ei. Maan se cataj ya Diose se vaa inanj sayuun quiran' soj, ca'anj soj rihaan ya'an, cacaa soj nu' cavii nu' ca'anj nanj á. Dan me se qui'yaj Diose ya'an yo' cacaa síi chree cacaa nij nana

chree cacaa, ne cacaa nij soj cacaa ga so' adonj. <sup>42</sup> 'O se quina'aan rquej gaa naá, tzaj ne ne rque soj a doj se chá chay ma'. Nacoó 'unj na, tzaj ne ne rque soj a doj na co'oj ma'. <sup>43</sup> Ase vaa síi 'na' yo'ó chuman' vaa 'unj rihaan soj, tzaj ne ne ca'mii soj gaj ma'. Tachrinj yun nuú 'unj, tzaj ne ne rque soj a doj yatzij ma'. Canó chi'ii manj do', qui'nij 'unj taga' do', tzaj ne a 'ó güii ne cuchi' soj rihanj ma'", cataj 'unj rihaan nij so' a.

<sup>44</sup> "Gaa ne cataj ma'an nij síi chi'ii yo': "Aman quene'en núj mán so' se vaa na'aan rqué so' do', se vaa nacoó so' na do', se vaa ase vaa síi ca'na' yo'ó chuman' vaa so' do', se vaa achiin yatzij cunuú so' do', se vaa canó chi'ii mán so' do', se vaa qui'nij so' taga' do', ne ne racuíj núj mán so', Señor", cataj nij so', xna'anj nij so' manj a.

<sup>45</sup> "Gaa ne cataj 'unj rihaan nij so': "Ya ya cataj xna'anj 'unj rihaan soj cuano se vaa a 'ó xco' ne racuíj soj man nij tinúú 'unj gaa quiran' nij so' sayuun vaa danj ma'. Ne nda' se síi nicá' ndo'o me ta'aj nij so', tzaj ne no xcúún nij soj racuíj soj man nij so' adonj. Ne che'é se ne racuíj soj man nij so' ro', che'é dan nuchruj 'unj cuentá se vaa nuveé sij racuíj manj me soj ma'", cataj 'unj rihaan nij so' a.

<sup>46</sup> "Gaa ne cavii nij so' ca'anj nij so', ne quiran' ndo'o nij so' sayuun nu' cavii nu' ca'anj, tzaj ne nij síi sa' ro', ve'é cayaán nij so' ga Diose nu' cavii nu' ca'anj nanj adonj —taj Jesucristó rihaan nij síi tucu'yón se-nana so' a.

**Nana nihánj taj xna'anj se vaa 'o guun rá nij xrej atá suun nocjo doj do', nij síi uun chij do', se vaa cavi' Jesucristó a**

**26** Sij cataj xna'anj Jesucristó nu' nana yo', gaa ne ca'mii uún so' rihaan nij síi tucu'yón se-nana so', cataj so':

<sup>2</sup> —Ne'en soj se vaa cachén vij güii, gaa ne canuú cha'anj pascuá, ne tacuachén nii manj rihaan nij síi cachrón manj rihaan rcutze nanj adonj. Danj qui'yaj nij so', che'é se síi ca'née Diose nıcaj yu'unj man yuvii mej a —taj Jesucristó a.

<sup>3</sup> Gaa ne cunuú chre' nij xrej atá suun nocjo doj do', nij síi uun chij do', rihaan ve' xij tucua' xrej atá suun nocjo doj síi cu'naj Caifás a. <sup>4</sup> Ne 'o guun rá cunudanj nij so' se vaa tihá' yu'unj nij so' man Jesucristó, ne qui-ta'aa yuve' nij so' man Jesucristó, ne cavi' Jesucristó, qui'yaj nij so', rá nij so' a. <sup>5</sup> Tzaj ne cataj nij so':

—Se quita'aa ní' man so' gaa aman anuú cha'anj ma'. Maan se sese danj qui'yaj ní', ne ca'maan rá nij yuvii, ne guun sayuun, qui'yaj nij yuvii nanj adonj —taj nij so' a.

**Nana nihánj taj xna'anj se vaa caxrj 'o chana casté raa Jesucristó a**

<sup>6</sup> Dan me se yáán Jesucristó chuman' cu'naj Betania, ne ne so' rá 'o ve' tucua' síi cu'naj Simón síi canó luj ri'yuj man, <sup>7</sup> ne yáán Jesucristó rihaan mesá, ne cuchi' yo'ó chana rihaan so', ne nicaj chana yo'ó aga' catzii

nuu casté gun' daj, ne casté tu'vee ndo'o me yo' a. Gaa ne caxrij chana casté raq Jesucristó a. <sup>8</sup> Ne ca'-maan rá nij sí tucu'yón se-nana Jesucristó, ne cataj nij so':

—Me che'é tiri' rma'an chana nihánj casté sa' ga. <sup>9</sup> Me che'é ne cutu'vee no' casté, ne quirí' uxrá no' sa'anj, ne go' no' sa'anj yo' man sí nique ga —cataj nij so', ni'yaj nij so' man chana yo' a.

<sup>10</sup> Ne quene'en Jesucristó daj vaa ca'mii nij so', ne cataj so' rihaan nij so' a:

—Me che'é a'mii soj danj ni'yaj soj man chana ga. 'O se ve'é uxrá vaa qui'yaj no' manj á. <sup>11</sup> 'O se sí nique me se daj a güii mán nij sí nique ga soj, ne ca'vee qui'yaj soj danj ga sí nique ei. Tzaj ne 'unj me se vaa güii ca'anj 'unj, ne quinaj un soj, ne se ca'vee qui'yaj soj se luj che'ej ma'. <sup>12</sup> Dan me se caxrij chana nihánj casté raj, ne che'é dan ne'en soj se vaa cachin' nii manj adonj. <sup>13</sup> Ya ya cataj xna'anj 'unj rihaan soj cuano se vaa me rej ma'an ca'mii natáj yuvi se-nana nana sa' rihaan nij yuvi man rihaan nu' chumii nihánj ro', ne cataj xna'anj uún nij yuvi rihaan tuvi' yuvi che'é se vaa qui'yaj chana nihánj manj, ne se quini'yón yuvi man chana nihánj ma' —taj Jesucristó a.

**Nana nihánj taj xna'anj se vaa cutu'vej sí cu'naj Judas man Jesucristó rihaan nij sí taj ri'yunj man Jesucristó a**

<sup>14</sup> Gaa ne cavii sí cu'naj Judas Iscariote, ca'anj so' rihaan nij xrej atá suun nocqo doj a. Dan me se yo'q tuvi' chuvij nij sí tucu'yón se-nana Jesucristó me sí cu'naj Judas yo' a. <sup>15</sup> Dan me se cataj so' rihaan nij xrej a:

—A me se rque soj manj, ne racu'ij 'unj man soj tacuachén 'unj man Jesucristó rihaan soj ga —taj so', xna'anj so' man nij xrej a.

Ne go' nij so' ico' chí' sa'anj platá catzii man sí cu'naj Judas yo' a. <sup>16</sup> Gaa ne guun che'e sí cu'naj Judas nuchruj raq so' aman guun nucuaj so' racu'ij so' man nij xrej atá suun nocqo doj, tacuachén so' man Jesucristó rihaan nij so' a.

**Nana nihánj taj xna'anj se vaa ma'an Jesucristó taj xna'anj se vaa tacuachén yo'q tuvi' nij sí tucu'yón se-nana so' man so' rihaan nij sí taj ri'yunj man so' a**

<sup>17</sup> Ne güii canu' cha'anj pascuá ro', cuchi' nij sí tucu'yón se-nana Jesucristó rihaan Jesucristó, ne xna'anj nij so' man so', cataj nij so':

—Me rej qui'yaj chuvii núj cha xti'nqo ní' cha'anj pascuá, rá sq' ga —taj nij so' rihaan Jesucristó a.

<sup>18</sup> Ne cataj xna'anj Jesucristó rihaan nij so' se vaa catuu nij so' chuman' Jerusalén, ne cuchi' nij so' rihaan yo'q so', ne ca'mii nij so' nana nihánj rihaan so' a: "Taj xna'anj maestró rihaan sq' se vaa daj doj quisij se-ora so' a. Ne cha xti'nqo so' do', nij sí tucu'yón se-nana so' do', cha'anj pascuá tucá so' á", cataj nij so' rihaan sí ne chuman' yo', taj Jesucristó rihaan nij so' a. <sup>19</sup> Dan me se qui'yaj nij sí tucu'yón se-nana Jesucristó ndaa vaa cataj xna'anj Jesucristó rihaan nij so', ne qui'yaj chuvii nij so' cha xti'nqo nij so' cha'anj pascuá a. <sup>20</sup> Ne

rej ti'nuu, ne cayáan Jesucristó ga chuvij nij sí tucu'yón se-nana so' rihaan mesá a. <sup>21</sup> Ne gaa chá nij so' chraa, ne cataj Jesucristó:

—Ya ya cataj xna'anj 'unj rihaan soj se vaa tacuachén yo'q tuvi' soj manj rihaan nij sí taj ri'yunj manj ei —taj Jesucristó a.

<sup>22</sup> Gaa ne quinanó ndo'o rá nij sí tucu'yón se-nana Jesucristó, ne guun che'e nij so' ndaa 'o' o' nij so' xna'anj man Jesucristó, cataj 'o' o' nij so':

—'Unj me sí qui'yaj danj ni', Señor' —taj 'o' o' nij so' a.

<sup>23</sup> Gaa ne cataj Jesucristó:

—Sí tigu'ij rachruún ga 'unj rá co'oo ro', so' me sí tacuachén manj rihaan nij sí taj ri'yunj manj adonj. <sup>24</sup> 'O se taj danj Diose se vaa ca'anj 'unj caví' 'unj sij ca'née Diose nica'j yu'unj man yuvi ne ya danj quirán' 'unj adonj. Tzaj ne nique ndo'o sí tacuachén manj rihaan nij sí taj ri'yunj manj nanj á. Quiran' uxrá so' sayuun nanj á. Snó'o yo' me se sese ne ca'ngaa so', ne cavii sa' so' doj tzaj adonj —taj Jesucristó a.

<sup>25</sup> Ne sí cu'naj Judas sí me rá tacuachén man Jesucristó rihaan nij sí taj ri'yunj man Jesucristó me se xna'anj so' man Jesucristó, cataj so':

—'Unj me sí qui'yaj danj ni', maestro' —taj ma'an so', xna'anj ma'an so' man Jesucristó uún a.

—Ya uxrá cataj sq', veé sq' qui'yaj danj ei —taj Jesucristó rihaan so' a.

**Nana nihánj taj xna'anj che'é rachruún rque Jesucristó rihaan nij sí tucu'yón se-nana so' cha nij so' do', che'é na vinó rque so' co'q nij so' do' a**

<sup>26</sup> Ne gaa chá nij so' chraa ne quita'aa Jesucristó yo'q rachruún, ne nago' so' graciá rihaan Diose, ne cuxra' ta'aj so' rachruún, ne rque so' rihaan nij sí tucu'yón se-nana so', ne cataj so':

—Quita'aa soj rachruún nihánj, cha soj man yo' á. Ne manj me rachruún nihánj ei —taj so' a.

<sup>27</sup> Gaa ne quita'aa Jesucristó aga' tazá nuu na vinó, ne nago' so' graciá rihaan Diose, ne tacuachén so' aga' nuu na vinó rihaan nij so', ne cataj so':

—Co'q taran' soj na vinó nihánj á. <sup>28</sup> 'O se ton manj me na nihánj, ne che'é ton manj ro', rque Diose 'o' nana rihaan soj daj qui'yaj Diose ga soj a. Dan me se che'é se cayanj ton manj ro', che'é dan me caraa x'naa Diose ni'yaj Diose cacun' tumé que'ee yuvi adonj. <sup>29</sup> Ne cuano nihánj me se cataj xna'anj 'unj rihaan soj se vaa veé doj nihánj me co'oj, ne se co'oj yaj a ma'. Tzaj ne asa' quisij güii guun chij Réé 'unj rihaan chumii nihánj, ne cunuu naca chumii nihánj, ne co'q ní' na vinó naca ei —taj Jesucristó rihaan nij sí tucu'yón se-nana so' a.

<sup>30</sup> Gaa ne cachraá taran' nij so' chra' rihaan Diose, ne cavii nij so', ca'anj nij so' quij cu'naj Quij man Chruun Olivó a.

Nanā nihánj taj xna'anj se vaa cataj xna'anj Jesucristó se vaa guun na'aj síf cu'naj Pedró ne cataj so' se vaa nuveé sij nocō' man Jesucristó me so' a

<sup>31</sup> Gaa ne cataj Jesucristó rihaan nij so' a:

—Danj Diose taj se vaa go' Diose man síf tumé matzinj, ne cunanj nij matzinj cha'nuu nij xo' a. Ne ya ase vaa daán 'unj matzinj vaa soj, ne ni corá guun na'aj taran' soj, ne se canoco' soj manj a ma'. <sup>32</sup> Tzaj ne asa' quisij cunuu i'na' uún 'unj, ne quitaj yaan 'unj rihaan soj ca'anj 'unj estadó Galilea, ne narj' tuvi' ní' estadó Galilea nanj adonj —taj Jesucristó rihaan nij síf tucuyón se-nana so' a.

<sup>33</sup> Gaa ne cataj síf cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa mij se tanáj 'unj mán so' ma' —taj Pedró a.

<sup>34</sup> Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa nij corá gaa ataa caguaj to'loo, ne va'nuj ya cataj so' rihaan yuvij se vaa nuveé sij nocō' manj mé so' a —taj Jesucristó rihaan Pedró a.

<sup>35</sup> Ne cataj Pedró:

—Taj ma'. Ca'vee se ticavi' yuvij man ní', tzaj ne daj chihaa mij se cataj 'unj se vaa nuveé sij nocō' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij síf tucuyón se-nana Jesucristó a.

**Nanā nihánj taj xna'anj daj qui'yaj Jesucristó gaa cachíin ni'yaj Jesucristó rihaan Diose a**

<sup>36</sup> Gaa ne ca'anj Jesucristó ga nij so' ndaa yo'ó rej cu'naj Getsemaní, ne cataj xna'anj Jesucristó rihaan nij so':

—Canē soj nihánj, na'vij soj mán 'unj, ne ca'anj 'unj gan' doj tzin', ne cachinj ni'yáj rihaan Réj a —taj Jesucristó a.

<sup>37</sup> Ne nicaj Jesucristó man Pedró do', man roj ta'níí síf cu'naj Zebedeo do', ca'anj so', ne guun che'e so' quinano ndo'o rá so' a. <sup>38</sup> Gaa ne cataj so' rihaan va'nuj nij síf ca'anj ga so' a:

—Nanó uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinaj soj nihánj, ne se cotoj soj ma' —taj Jesucristó rihaan va'nuj nij so' a.

<sup>39</sup> Gaa ne cavii so' yanij doj tzin', ne ca'anj cayáán rno so' rihaan yo'óo, ne cachíin ni'yaj so' rihaan Diose, ne cataj so' rihaan Diose a:

—Sese ca'vee, ne caráán ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáá so' ndaa vaa me rá ma'án so', ne se qui'yáá so' ndaa vaa me rá ma'anj, man Ataj —taj Jesucristó, cachíin ni'yaj so' rihaan Diose a.

<sup>40</sup> Gaa ne canicaj uún so' ca'na' so' rihaan va'nuj nij síf tucuyón se-nana so', ne quene'en so' se vaa cotoj cunudanj nij so' a. Gaa ne cataj so' rihaan Pedró a:

—Dan me se xa' soj me se a 'ó orá ne guun nucaj soj ni'yaj soj gaj a ma'. Ya na'. <sup>41</sup> Maan se ni'yaj soj, ne cachinj ni'yaj soj rihaan Diose se vaa caráán Diose rihaan síf chree se caxrij síf chree chrej chi'ii rque soj á. 'O se niha' rá soj qui'yaj soj se sa', tzaj ne ne guun nucaj soj ma' —taj Jesucristó rihaan nij so' a.

<sup>42</sup> Gaa ne cavii uún so', ne cachíin ni'yaj uún so' rihaan Diose, cataj so':

—Sese se ca'vee quinani' 'unj rihaan sayuun ase vaa, ne qui'yáá so' ndaa vaa me rá so', Ataj —taj Jesucristó, cachíin ni'yaj so' a.

<sup>43</sup> Gaa ne canicaj uún so' ca'na' so', ne quene'en so' se vaa cotoj uún va'nuj nij síf tucuyón se-nana so' a. 'O se ca'na' ndo'o nej rihaan nij so' a.

<sup>44</sup> Gaa ne tanáj so' man nij so', ne cavii uún so', ne cachíin ni'yaj uún so' rihaan Diose, ne ase vaa cachíin ni'yaj so' gaa rque ro', danj vaa cachíin ni'yaj uún so' rihaan Diose a.

<sup>45</sup> Gaa ne canicaj uún so' ca'na' so' rihaan va'nuj nij síf tucuyón se-nana so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Dan me se daj doj quisij orá tucuchén yo'ó so' manj rihaan síf tumé ndo'o cacun', che'é se mé 'unj síf ca'née Diose nicaj yu'unj man yuvij adonj. <sup>46</sup> Naxagaa soj, ca'anj ní' nanj ei. Ni'yaj soj nedj'. 'Na' síf tucuchén manj rihaan síf taj ri'yunj manj nanj chuguanj —taj Jesucristó a.

**Nanā nihánj taj xna'anj daj qui'yaj nii gaa quita'aa nii man Jesucristó a**

<sup>47</sup> Dan me se nicun' Jesucristó ca'mii so', ne nu' ca'na' síf cu'naj Judas yo'ó tuvi' chuvij nij síf tucuyón se-nana Jesucristó, ne ca'na' uxrá yuvij ga so', ne nicaj nij yuvij neê espadá do', chruun do' a. Dan me se nij yuvij ca'née nij xrej atá suun nocōo doj do', nij yuvij ca'née nij síf uun chij rihaan nij yuvij israelitá do', me nij yuvij ca'na' a. <sup>48</sup> Ne síf cu'naj Judas cataj xna'anj rihaan nij yuvij se vaa daj gaa qui'yaj so' ga Jesucristó, gaa ne cunuu yaan nij yuvij man Jesucristó, ne cataj so':

—Síf cachron tu'vaj ro', so' me síf quita'aa soj cuaj á —taj síf cu'naj Judas a.

<sup>49</sup> Gaa ne nu' cuchi' so' cuaj rihaan Jesucristó, ne cataj so':

—Ca'na' uxraj, nanj maestro —taj so' rihaan Jesucristó a.

Gaa ne nu' cachron tu'va so' xruu Jesucristó a.

<sup>50</sup> Gaa ne xna'anj Jesucristó man Judas, cataj so':

—Me che'é ca'ná so', ga tinu' —taj so' rihaan Judas a.

Gaa ne cuchi' nij yuvij rihaan Jesucristó, ne quita'aa nij yuvij man Jesucristó a.

<sup>51</sup> Ne yo'ó síf nicun' ga Jesucristó me se quirii so' taneē so' neē espadá, ne go' so' neē espadá yo' raá yo'ó se-mozó xrej atá suun nocōo doj, ne veé dan güéj nu' xreé mozó yo', qui'yaj so' a. <sup>52</sup> Gaa ne cataj Jesucristó rihaan síf nicaj neē espadá yo' a:

—Na'nej so' taneê so' á. 'O se nu' yuvij nicaj neê espadá ro', veé neê espadá qui'yaj caví' nij yuvij nanj adonj. <sup>53</sup> Ne ne ne'én so' se vaa guun nu'cuáj cachinij ni'yáj rihaan Réj, ne ca'na' que'ee ndo'o se-mozó Réj rihanj cuano, ne ca'vee qui'yaj cananj a. <sup>54</sup> Tzaj ne sese danj qui'yáj, gaa ne asa' ca'vee qui'yaj ní' nu' nana no rihaan danj Diose nana taj xna'anj daj gaa quirán' 'unj ga —taj Jesucristó rihaan síí nicaj neê espadá yo' a.

<sup>55</sup> Ne canicaj Jesucristó, cataj Jesucristó rihaan nij yuvij a:

—Me che'é nicaj soj neê espadá nicaj soj chruun nicaj soj, ca'na' soj ga. Síí ituu mé 'unj, rá soj na'. Ne 'o se guun que'ee güii cayáán 'unj rá nuvíí nocoo, tucuyón 'unj se-nanaj rihaan nij yuvij, tzaj ne ne quita'aa soj manj a. <sup>56</sup> Tzaj ne nihánj me se quirán' 'unj nu' se vaa taj nana cachrón nij síí nata' se-nana Diose gaa naá rihaan yanj a —taj Jesucristó a.

Gaa ne tanáj cunudanj nij síí tucuyón se-nana Jesucristó man so', ne cunánj nij so', ca'anj nij so' a.

#### Nana nihánj taj xna'anj daj qui'yaj nii gaa cuta' nii cacun' xráá Jesucristó a

<sup>57</sup> Dan me se nij síí quita'aa man Jesucristó me se nicaj nij so' man Jesucristó ca'anj nij so' rihaan síí cunaj Caifás xrej atá suun nocoo doj a. Ne aj mán chre' nij síí naqui'yaj cyu se-tucuanj Moisés do', nij síí uun chij do', rihaan síí cunaj Caifás yo' a. <sup>58</sup> Ne gan' gan' canoco' síí cunaj Pedró xco Jesucristó, ne cuchi' so' rihaan chingá rej yanj síí cunaj Caifás yo', ne catúj so' rá chingá ne ca'anj cayáán so' ga nij se-mozó xrej man rá chingá, quene'en so' daj quirán' Jesucristó a.

<sup>59</sup> Dan me se nano' nij xrej atá suun nocoo doj nano' nij cuese nano' man yuvij cataj xna'anj che'é cacun' tumé Jesucristó a. Me rá nij so' narí' nij so' cacun' rmi' cutá' nij so' xráá Jesucristó ne caví' Jesucristó, rá nij so' a. Tzaj ne taj vaj a 'ó cacun' tumé Jesucristó a ma'.

<sup>60</sup> Che'é dan nda' se cuchi' uxrá síí ne rihaan nij cuese ca'mii ne nij so', tzaj ne taj vaj cacun' quiri' nij so' cutá' nij so' xráá Jesucristó a ma'. Veé dan, ne cuchi' vij roj so', <sup>61</sup> ne cataj roj so':

—Síí nihánj cataj se vaa guun nucuaj so' tãcuanee so' nuvíí nocoo nuvíí na'víj ní' rihaan Diose, ne rque va'nuyj güii cuné' uún so' nuvíí yo', taj so' ei —taj roj so' a.

<sup>62</sup> Gaa ne canicun' xrej atá suun nocoo doj, ne xna'anj so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj síí nihánj che'é so' ga —taj so', xna'anj so' man Jesucristó a.

<sup>63</sup> Tzaj ne dínj táá Jesucristó a. Gaa ne cataj uún xrej atá suun nocoo doj rihaan Jesucristó a:

—Ase vaa nana taj xna'anj ma'an Diose rihaan so' ro', danj gaa nana nihánj nana cataj xna'anj 'unj rihaan so' á. 'Unj me síí ya ya ca'ne' suun rihaan so' cataj xna'anj so' sese ya ya mé so' ta'níí Diose síí tñanij man yuvij rihaan sayuun á —taj so' rihaan Jesucristó a.

<sup>64</sup> Gaa ne cataj Jesucristó rihaan so' a:

—Ya vaa nana ca'mii ma'an so' ei. Ne vaj a doj cataj xna'anj 'unj rihaan so' se vaa ndaa yaj quene'en soj se vaa síí ca'née Diose nicaj yu'unj man yuvij mej, ne quene'en soj se vaa cayáán 'unj rej nuva' Diose síí nucuaj ndo'o ei. Ne quene'en uún soj se vaa ca'na' uún 'unj rihaan chumij nihánj, ne quitaj 'unj xráá ngaa xta' ca'naj adonj —taj Jesucristó rihaan xrej atá suun nocoo doj yo' a.

<sup>65</sup> Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Ni'yaj soj vij. Quij uxrá tu'va síí nihánj rihaan Diose nanj ei. Se cachiin doj síí ca'na' cataj xna'anj rihaan ní' che'é cacun' tumé síí nihánj a ma'. Maan se cuano nihánj me se cuno ma'an soj nana quij ca'mii so' se vaa cayáán ma'an so' rej x'nuj Diose, taj so' ei. <sup>66</sup> Daj qui'yaj ní' man so', rá soj ga —taj xrej, xna'anj xrej man nij tuvi' xrej a.

—Caví' so' ei —taj nij so' a.

<sup>67</sup> Gaa ne quirii talúj nij so' rihaan Jesucristó, ne go' nij so' man Jesucristó a. Ne coxro ta'aj nij so' xruu Jesucristó, <sup>68</sup> ne cataj nij so':

—Sese ya ya ca'née Diose mán so' tñanij so' man yuvij rihaan sayuun, ne racuíj Diose mán so' cataj xna'anj so' rihaan núj me síí go' mán so' vij —taj nij so', ca'mii nacoo nij so' man Jesucristó a.

#### Nana nihánj taj xna'anj daj qui'yaj síí cunaj Pedró gaa cataj so' se vaa nuveé sij nocoo' man Jesucristó me so' a

<sup>69</sup> Veé dan, ne ne Jesucristó ga yo'ó nij so' rá ve', ne ne síí cunaj Pedró xe' rá chingá a.

Ne cuchi' yo' mozó chana rihaan so', ne cataj no':

—Ne so' me yo'ó síí cachéé ga Jesucristó síí cavii estadó Galilea á —taj mozó chana yo' rihaan Pedró a.

<sup>70</sup> —Taj ma'. Ne unó 'unj me taj so' ma' —taj Pedró cuno taran' nij yuvij cayáán ga so' a.

<sup>71</sup> Gaa ne curihanj Pedró, ne canicun' so' rej atúj yuvij chingá a.

Gaa ne quene'en yo'ó mozó chana man so', ne ca'mii no' rihaan nij yuvij nicun' rihaan ve' ga Pedró, cataj no':

—Síí nihánj cachéé ga Jesucristó síí cavii chuman' Nazaret asuun asanj —taj chana yo' a.

<sup>72</sup> Gaa ne nucuaj ndo'o ca'mii uún Pedró, cataj so':

—Taj ma'. A doj ne ne'enj man snó'o yo' ma' —taj Pedró yo' a.

<sup>73</sup> Ne corá nii cuchi' nij síí nicun' ga Pedró rihaan Pedró, ne cataj nij so':

—Ya ya yo'ó síí cachéé ga Jesucristó mé so' ei. 'O se ase vaa nana a'mii nij síí cachéé ga Jesucristó ro', vaa nana a'mii so' chuguanj —taj nij so' rihaan Pedró a.

<sup>74</sup> Gaa ne guun che'e Pedró nucuaj doj ca'mii Pedró, cataj Pedró se vaa ca'vee qui'yaj Diose sayuun man so' sese nuveé nana ya me nana a'mii so', ne cataj so':

—Ne ne'enj man snó'o yo' ma' —taj uún Pedró, gaa ne nu' caguáj to'loo a.

<sup>75</sup> Gaa ne ninuj rá Pedró ndaa vaa cataj Jesucristó rihaan so' quii se vaa gaa ataa caguaj to'loo, ne va'nuyj cataj Pedró se vaa nuveé sij nocoo' man Jesucristó me



ma'an Pedró ma'. Gaa ne curihanj Pedró xe', ne uxrá ta'vee Pedró a.

**Nana nihánj taj xna'anj se vaa nicaj nii man Jesucristó, ca'anj nii rihaan síí cu'naj Pilato a**

**27** Rej ranga' nuchruj raa taran' nij xrej atá suun nocoo doj do', nij síí uun chij do', daj qui'yaj nij so', ne cavi' Jesucristó a. <sup>2</sup> Gaa ne numíj nij so' man so', ne nicaj nij so' man so' ca'anj nij so' rihaan síí nicaj suun gobernador cu'naj Pilato, ne tacuachén nij so' man Jesucristó rihaan so' a.

**Nana nihánj taj xna'anj daj quiran' síí cu'naj Judas gaa cavi' so' a**

<sup>3</sup> Dan me se síí cu'naj Judas me síí tacuachén man Jesucristó rihaan nij síí taj ri'yunj man Jesucristó gaa asino yaan, ne xcaj so' cuentá se vaa ya ya ticavi' nii man Jesucristó ne ma'an so' me síí tumé cacun' se vaa cavi' Jesucristó a. Che'é dan nanó ndo'o rá so', ne me rá so' narque uún so' icó chi' sa'anj platá catzii yo' rihaan nij xrej atá suun nocoo doj do', rihaan nij síí uun chij do' a. Dan me se cuchi' so' rihaan nij so', <sup>4</sup> ne cataj so':

—Tumé 'unj cacun' se vaa tacuachén 'unj man yo'q síí sa' inanj rihaan soj á —taj síí cu'naj Judas yo' a.

—Nuveé se-cacun' núj me cacun' tumé so' ma'. Xcaj ma'an so' cuentá daj gaa qui'yáa so' ei —taj nij so' rihaan síí cu'naj Judas a.

<sup>5</sup> Gaa ne nicaj so' sa'anj aga' yo', ri'íj uun so' rá nuvií nocoo, ne cavií so' ca'anj so', ne toco' vaj ma'an so' man so', ne cavi' so' a. <sup>6</sup> Gaa ne naran' nij xrej atá suun nocoo doj man sa'anj aga' yo', ne cataj nij so':

—Ne nó xcúún ní' caraa ní' sa'anj nihánj rá chrúún sa'anj taj rihaan Diose ma'. 'Q se sa'anj go' ní' che'é rej cavi' yo'q yuvií me sa'anj nihánj á —taj nij so' a.

<sup>7</sup> Dan me se nuchruj raa nij so' daj qui'yaj nij so', ne nicaj nij so' sa'anj yo', ne quiránj nij so' to'óo síí rii xruj a. Ne guun yo'óo yo' santó cachin' nii man náa guun yuvií 'na' yo'óo chuman' yuvií cavi' chuman' Jerusalén a.

<sup>8</sup> Che'é dan cu'naj yo'óo yo' Yo'óo Ton cuano ei. <sup>9</sup> Dan me se quisíj qui'yaj nij so' nu' se vaa cataj síí cu'naj Jeremías síí nata' se-nana Diose gaa naá gaa cataj so':

“Gaa ne nicaj nij so' icó chi' sa'anj aga' a. Sa'anj yo' me sa'anj no' yo'q so', cataj nij yuvií israelitá a. <sup>10</sup> Ne nicaj nij so' sa'anj yo' quiránj nij so' to'óo síí rii xruj, ndaa vaa cataj xna'anj síí 'nij ra'a man ní' rihanj nanj adonj”, taj síí cu'naj Jeremías a.

**Nana nihánj taj xna'anj daj ca'mii síí cu'naj Pilato ga Jesucristó a**

<sup>11</sup> Dan me se canicun' Jesucristó rihaan síí nicaj suun gobernador yo', ne xná'anj síí nicaj suun yo' man Jesucristó, cataj so':

—So' me síí nicaj suun rey uun chij rihaan nij yuvií israelitá na' —taj so', xná'anj so' man Jesucristó a.

—Vej ei —taj Jesucristó rihaan so' a.

<sup>12</sup> Ne xná'anj síí nicaj suun gobernador yo' man Jesucristó che'é cacun' cuta' nij xrej atá suun nocoo doj

do', nij síí uun chij do', xráa Jesucristó a. Tzaj ne ne ca'mii Jesucristó a 'ó nana rihaan so' ma'. <sup>13</sup> Gaa ne xná'anj uún síí nicaj suun yo' man Jesucristó, cataj so': —Aj cunó so' cataj nij so' se vaa tumé so' cacun' na'. Me che'é ne a'mii so' ga —taj so', xná'anj so' man Jesucristó a.

<sup>14</sup> Tzaj ne yuun che'e ne ca'mii Jesucristó a 'ó nana rihaan so' che'é cacun' cuta' nii xráa so' a. Veé dan, ne caraya'anj uxrá síí nicaj suun gobernador yo' che'é yan qui'yaj so' danj a.

**Nana nihánj taj xna'anj se vaa cataj xna'anj síí cu'naj Pilato se vaa cavi' Jesucristó rihaan rcutzé a**

<sup>15</sup> Ne vaa yo'q tucuáán nocoo' síí nicaj suun gobernador se vaa rii so' man yo'q síí 'nij taga' 'q 'q cha'anj pascuá, ne tinavij uun so' cacun' tumé síí urihanj taga' yo' a. Me ma'an 'q síí 'nij taga' a'mii nij yuvií che'é se vaa quirii so', ne ca'vee qui'yaj so' ndaa vaa taj nij yuvií a. <sup>16</sup> Ne veé yo' yo' ro', 'nij yo'q síí cu'naj Barrabás taga', ne quene'en cunudanj nij yuvií se vaa tumé ndo'o so' cacun' a. <sup>17</sup> Dan me se nuu chre' nij yuvií rihaan síí nicaj suun gobernador cu'naj Pilato, ne xná'anj so' man nij yuvií, cataj so':

—Me síí quirii 'unj, rá soj ga. Síí cu'naj Barrabás na'. Ase síí cu'naj Jesucristó xa' —taj so', xná'anj so' man nij yuvií a.

<sup>18</sup> Danj ca'mii so', ne'en so' se vaa maan che'é se guun xcoj ruvaa rá nij xrej atá suun nocoo doj me tacuachén nij xrej man Jesucristó rihaan ma'an so' a.

<sup>19</sup> Ne asij yaán síí cu'naj Pilato yo' rihaan xrúún so' chruun xlá, ne ca'née nicá so' nana cuchi' rihaan so', taj no':

—Se guun ca'ne' so' cacun' che'é síí sa' yo' ma'. 'Q se asij cua'aa me se nanó ndo'o raj che'é yan tu-cua'nu' snó'o yo' manj adonj —taj nicá síí cu'naj Pilato rihaan so' a.

<sup>20</sup> Tzaj ne cataj xna'anj nij xrej atá suun nocoo doj do', nij síí uun chij do', rihaan nij yuvií se vaa ca'mii nij yuvií che'é síí cu'naj Barrabás rihaan síí cu'naj Pilato, ne cataj nij yuvií se vaa cavi' Jesucristó a. Ne cuchumán rá nij yuvií a. <sup>21</sup> Gaa ne xná'anj síí nicaj suun gobernador cu'naj Pilato man nij yuvií, cataj so':

—Me ya ya síí quirii, rá soj ga —taj so', xná'anj so' man nij yuvií a.

—Quirii so' man síí cu'naj Barrabás ei —taj nij yuvií rihaan so' a.

<sup>22</sup> —Ne me qui'yáa 'unj ga síí cu'naj Jesucristó, rá soj ga —taj uún síí cu'naj Pilato, xná'anj so' man nij yuvií a.

—Cavi' so' rihaan rcutzé, rá núj ei —taj taran' nij yuvií a.

<sup>23</sup> —Tzaj ne me cacun' tumé so' ga —taj síí cu'naj Pilato, xná'anj so' man nij yuvií a.

Tzaj ne doj a caguáj nij yuvií, cataj nij yuvií:

—Cavi' so' rihaan rcutzé ei. —Danj inanj caguáj nij yuvií a.

<sup>24</sup> Dan me se quene'en síí cu'naj Pilato se vaa taj se 'yá' quina'maan rá nij yuvií, ne maan se doj a ca'maan

rá nij yuvii, ne doj a qui'yaj nij yuvii sayuun a. Che'é dan nicaj so' na, ne na'ya' so' ni'yaj nij yuvii a. Ne cataj so':

—Se tumé 'unj cacun' sese cavi' sí nihánj a ma'. 'O se ma'an soj me sí qui'yaj cavi' so' adonj —taj sí cu'naj Pilato a.

<sup>25</sup> Gaa ne cataj nij yuvii rihaan so' a:

—Veé ma'an núj, ma'an ta'níí núj do', me sí tumé cacun' se vaa cavi' so' ei —taj nij yuvii yo' a.

<sup>26</sup> Gaa ne quirii sí cu'naj Pilato man sí cu'naj Barrabás taga' che'é nij yuvii, ne go' nij tanuu cuartá xráá Jesucristó, qui'yaj sí cu'naj Pilato, ne tacuachén sí cu'naj Pilato man so' rihaan nij tanuu se vaa cachron nij tanuu man so' rihaan rcutze a.

### Nana nihánj taj xna'anj se vaa ca'nga' nacoo nij tanuu ni'yaj nij tanuu man Jesucristó a

<sup>27</sup> Gaa ne ca'anj nicaj nij tanuu 'yaj suun rihaan sí nicaj suun gobernador man Jesucristó rá ve' tucua' sí nicaj suun gobernador yo' a. Ne naqui'yaj chre' nij tanuu man taran' nij tuvi' tanuu nij so' a. <sup>28</sup> Gaa ne quirii nij so' sagan' Jesucristó man Jesucristó, ne na'née nij so' sagan' rey yatzij marée man Jesucristó, <sup>29</sup> ne qui'yaj nij so' cachriin tanj, ne cuta' nij so' cachriin tanj raaj Jesucristó, ne caxrij nij so' yo'q vará tico uun ston Jesucristó a. Gaa ne canicun' ruj nij tanuu rihaan Jesucristó, ne ca'nga' nacoo nij so' ni'yaj nij so' man Jesucristó, ne cataj nij so':

—Ya ya sij nicaj suun rey rii ta'nga' rihaan nij yuvii israelitá mé so' ei —taj nij so' tiha' nij so' man Jesucristó a.

<sup>30</sup> Gaa ne quirii talúj nij so' man Jesucristó, ne nacaj nij so' vará noco' ra'a Jesucristó, ne go' nij so' vará raaj Jesucristó a. <sup>31</sup> Sij ca'nga' nacoo nij so' ni'yaj nij so' man Jesucristó, gaa ne quirii uún nij so' sagan' rey yatzij marée nuu Jesucristó, ne na'née uún nij so' sagan' uún Jesucristó man uún so', gaa ne nicaj nij so' man Jesucristó cavi' nij so' ca'anj nij so' yan cachron nij so' man Jesucristó rihaan rcutze a.

### Nana nihánj taj xna'anj daj qui'yaj nij yuvii gaa cachron nij yuvii man Jesucristó rihaan rcutze a

<sup>32</sup> Dan me se cavi' nij so', ne nari' nij so' man yo'q sí ne chuman' Cirene, ne so' me sí cu'naj Simón a. Veé dan, ne qui'yaj uxrá nij tanuu fuerzá man sí cu'naj Simón yo' cataj so' rcutze cano Jesucristó rihaan a.

<sup>33</sup> Gaa ne cuchi' nij so' tacaan cu'naj Gólgota, ne Gólgota ro', me rej cu'naj Tacaan Cúú Yave Xnangá a.

<sup>34</sup> Gaa ne rque' nij tanuu doj na vinó nahej ga na e' man Jesucristó co'q so' a. Ne doj tzin' tiguíj daa Jesucristó, ne ne ca'vej rá so' co'q so' ma'. <sup>35</sup> Veé dan, ne cachron nij tanuu man Jesucristó rihaan rcutze, ne tico tixaj nij so' che'é sagan' Jesucristó, <sup>36</sup> gaa ne ca'anj cane' nij so' rihaan yo'óo, ne tumé nij so' man Jesucristó a. <sup>37</sup> Ne cachron nij tanuu yo'q rcuchra' raaj rcutze, ne no letrá rihaan rcuchra' yo', ne taj xna'anj letrá yo' me che'é cavi' Jesucristó, ne: "Síí nihánj me síí

cu'naj Jesucristó, ne síí nicaj suun rey uun chij rihaan nij yuvii israelitá me so' a", taj letrá yo' a. <sup>38</sup> Gaa ne cachron nij tanuu man yavij snó'o rihaan yavij rcutze yo', ne yavij roj so' me sí ituu a. Dan me se nicun' yo'q so' rej nuva' Jesucristó, ne nicun' yo'ó so' rej nichruun Jesucristó a.

<sup>39</sup> Gaa ne cachén yuvii rej nicun' Jesucristó, ne ca'mii chi'ii ndo'o nij so' ni'yaj nij so' man Jesucristó a. Dan me se tucunó nij yuvii raaj nij yuvii, <sup>40</sup> cataj nij yuvii:

—Tacuane' so' man nuvií noco, ne rque va'núj güii cune' so' yo'ó nuvií noco, rá so' na'. Dan me se sese ya ya ta'nij Diose mé so', ne tinanii so' mán so' rihaan rcutze, ne nanij so' rihaan yo'óo yaj vij —taj nij yuvii rihaan Jesucristó a.

<sup>41</sup> Ne ase vaa qui'yaj nij yuvii yo' ro', danj qui'yaj uún nij xrej ataj suun noco' doj do', nij sí naqui'yaj cyu se-tucuan' Moisés do', nij sí uun chij do', ca'mii chi'ii nij so', cataj nij so':

<sup>42</sup> —Tinanii síí nihánj man yo'ó yuvii rihaan sayuun, rá so', tzaj ne ne guun nucuaj so' tinanii so' man ma'an so' rihaan rcutze danj. Sese ya ya sij nicaj suun rey uun chij rihaan ní' sij israelitá me so', ne nanij so' cuano rihaan yo'óo, ne cuchuman rá ní' ni'yaj ní' man so' ei. <sup>43</sup> Dan me se nucuaj rá so' man Diose se vaa cavi' sa' so', qui'yaj Diose, rá so' a. Ca'vee tinanii Diose man so' cuano, sese sij 'ee rá Diose man me so' á. 'O se ma'an so' taj se vaa ta'nij Diose me ma'an so' adonj —taj nij so', chi'ii ndo'o ca'mii nij so' ni'yaj nij so' man Jesucristó a. <sup>44</sup> Ne ase vaa ca'mii nij so' ro', danj ca'mii uún roj sí ituu noco' rihaan rcutze rej x'núj Jesucristó, ca'mii roj so' nana' nij rihaan Jesucristó a.

### Nana nihánj taj xna'anj daj guun gaa cavi' Jesucristó a

<sup>45</sup> Veé dan, ne caxuj, ne yuun che'e guun rmi' rihaan chumii, ne yo'q guun rmi' chumii ndaa quisij aga' va'núj rej anoco' güii a. <sup>46</sup> Veé dan, ne quisij aga' va'núj, gaa ne nucuaj ndo'o caguaj Jesucristó, cataj so':

—Elí, Elí, lama sabactani —taj so', caguaj so' xna'anj a'mii ma'an so', ne nana' caguaj so' taj: "Diose noco' 'unj mé so' á. Me che'é tanaj uun so' mán 'unj ga", taj nana' caguaj Jesucristó a.

<sup>47</sup> Ne cuno ta'aj nij síí nicun' rej x'núj Jesucristó nana' caguaj so', tzaj ne ne cunó nij so' me taj Jesucristó ma'. Maan se:

—Nacúun síí nihánj man síí cu'naj Elías tadonj —taj nij so' rihaan tuvi' nij so' a.

<sup>48</sup> Gaa ne nu' ra'yanj cunanj yo'q síí nicun' rej x'núj Jesucristó, ne nicaj so' yataañ esponja, ne caraa so' na vinó yuu rque yataañ, ne cuta' so' raaj yo'q vará, ne ru'maan so' yataañ tu'va Jesucristó, ne co'o Jesucristó na yuu yo', qui'yaj so' a. <sup>49</sup> Tzaj ne ca'mii yo'óo nij yuvii, cataj nij so':

—Dínj qui'yaá so' á. Quene'en ní' sese ca'na' síí cu'naj Elías tinanii síí cu'naj Elías man so' rihaan rcutze ei —taj nij yuvii yo' a.

<sup>50</sup> Gaa ne sca' caguaj uún Jesucristó, ne cavi' so' a. <sup>51</sup> Veé dan, ne quisin' yatzij mantá cortiná noco' rá nu-

vií nocoo ndaa rej raa, ne 'o quiniy ca'anj ndaa tacóo yo' a. Dan me se cachén yuún, ne quixra' ta'aj nij yuvej, <sup>52</sup> ne x'núj rej cachin' nii man nij sí cavi', ne cunuu i'na' uún que'ee nij sí sa' cavi' asij rque a. <sup>53</sup> Ne gaa quisij orá cunuu i'na' uún ma'an Jesucristó, ne curihanj nij sí cunuu i'na' uún yo', ne catúj nij so' chuman' guëe chuman' Jerusalén, ne quene'en uxrá yuvi man nij so' a.

<sup>54</sup> Veé dan, ne nicun' tanuu capitán nicun' yo'ó nij tanuu nicun' cutumé man Jesucristó a. Ne quene'en nij so' cachén yuún, ne quene'en nij so' nu' se vaa guun, ne cuchu'vi' ndo'o nij so', ne ndaa dan asuun gaa xcaj nij so' cuentá se vaa ya uxrá ta'nij Diosë me Jesucristó, ne dan me se cataj nij so':

—Ya ta'nij Diosë me sí nihánj tadonj —taj nij so' a.

<sup>55</sup> Ne gan' doj nicun' que'ee chana, ni'yaj uun nij chana man Jesucristó a. Chana cuno se-nana Jesucristó asij cavii Jesucristó estadó Galilea me nij chana yo', ne qui'yaj suun nij chana yo' che'é Jesucristó a.

<sup>56</sup> Yo'ó no' me chana cu'naj Mariá Magdalena, ne yo'ó no' me chana cu'naj Mariá nii sí cu'naj Jacobo ga sí cu'naj José a. Ne yo'ó no' me nii roj ta'ní sí cu'naj Zebedeo a.

**Nana nihánj taj xna'anj se vaa cachin' nii man Jesucristó rque yu'uj yuvej a**

<sup>57</sup> Ne rej ata' güii ca'na' yo'ó sí ru'vee sí ne chuman' Arimatea a. José cu'naj so', ne so' me sí tucu'yón se-nana Jesucristó a. <sup>58</sup> Dan me se ca'anj so' rihaan sí cu'naj Pilato, ne cachín ni'yaj so' rihaan sí cu'naj Pilato se vaa ca'vej sí cu'naj Pilato cachin' so' man Jesucristó a. Ne sí cu'naj Pilato ro', cataj se vaa ca'vee qui'yaj so' danj a. <sup>59</sup> Ne nicaj sí cu'naj José man Jesucristó, ne nacutáj so' yatzij mantá naruvii xráá Jesucristó, <sup>60</sup> ne vaa yu'uj yuvej rihaan so', rej achin' nii man nij sí cavi', tzaj ne yu'uj naca me yo' a. Ma'an so' me sí qui'yaj gáán nii yu'uj yo', ne taj vaj xngá naj rque yu'uj ma'. Ne caxrij so' man Jesucristó rque yu'uj yo', ne caráán so' yuvej xij tu'va yu'uj yo' a. <sup>61</sup> Ne cayáán chana cu'naj Mariá Magdalena cayáán yo'ó chana cu'naj Mariá cayáán tu'va yu'uj yo' a.

**Nana nihánj taj xna'anj se vaa tumé uxrá nii man yu'uj nuu Jesucristó a**

<sup>62</sup> Veé dan, ne taxrej, ne ndaa quisij qui'yaj chujii nij yuvi israelitá che'é güii naraan rá nij so', ne cunuu chre' nij xrej ata' suun nocoo doj do', nij sí fariseo do', ne ca'anj nij so' rihaan sí cu'naj Pilato, <sup>63</sup> ne cataj nij so':

—Nuu rá núj daj cataj sí tihá yu'unj yo' gaa gaa i'na' so', señor. Dan me se cataj so' se vaa cachén va'nuy güii, gaa ne cunuu i'na' uún so', cataj so' adonj.

<sup>64</sup> Che'é dan ca'ne' so' suun rihaan tanuu se vaa tumé tanuu man yu'uj naj so' ndaa se quisij va'nuy güii yo' rугуанj. Sese se qui'yaj ní danj, ne ca'na' nij sí tucu'yón se-nana so', ne quiirij nij so' man so', ne cataj nij so' rihaan nij yuvi se vaa cunuu i'na' uún so' nanj

adonj. Asa' quisij, gaa ne doj a tihá yu'unj uún nij so' man nij yuvi nanj adonj —taj nij so' rihaan sí cu'naj Pilato a.

<sup>65</sup> Ne cataj sí cu'naj Pilato rihaan nij so' a:

—Vaa tanuu rihaan soj ei. Nicaj soj man tanuu ca'anj soj cutumé soj man yu'uj yo' á. Ne'en ma'an soj daj qui'yaj soj á —taj Pilato rihaan nij so' a.

<sup>66</sup> Gaa ne cavii nij so' ca'anj nij so' tumé nij so' man yu'uj yuvej yo' a. Dan me se ca'ne' nij so' suun rihaan tanuu cutumé tanuu yu'uj, ne cachrón nij so' yánj nichraj tu'va yuvej caráán tu'va yu'uj yo' a.

**Nana nihánj taj xna'anj se vaa cunuu i'na' uún Jesucristó a**

**28** Dan me se ca'anj güii cuetan' güii naránj rá nij yuvi israelitá, ne na'yaan cotungó me yo', ne daj doj quisij güii a. Ne ca'na' chana cu'naj Mariá Magdalena do', yo'ó chana cu'naj Mariá do', quene'en roj chana yu'uj catúj Jesucristó a. <sup>2</sup> Veé dan, ne cachén uxrá yuún, ne cavii yo'ó se-mozó sí 'nij ra'a man ní' rej xta', ca'na' so', nanij so' tu'va yu'uj yo', gaa ne quiirij yanij so' yuvej aráán tu'va yu'uj yo', ne ca'anj canë so' xráá yuvej yo' a. <sup>3</sup> Daj se uun rá roj no' ne'en roj no' gaa raan ro', danj guun rá roj no' gaa curuvi' so' a. Ne daj se uun rá roj no' ne'en roj no' yu've' catzji ndo'o ro', danj guun rá roj no' ne'en roj no' sagán' so' a. <sup>4</sup> Gaa ne cuchu'vi' ndo'o nij tanuu man tumé tu'va yu'uj yo', ne quiirij ndo'o man nij so' a. Dan me se ase vaa mán sí cavi' vaa mán nij so' rihaan yo'ó a. <sup>5</sup> Veé dan, ne cuchi' roj chana yo' rihaan se-mozó Diosë, ne cataj se-mozó Diosë rihaan roj no' a:

—Se cuchu'vi' roj soj ma'. 'O se aj ne'én 'unj se vaa nano' roj soj man Jesucristó sí cavi' rihaan rcutze adonj. <sup>6</sup> Taj vaj so' naj nihánj a ma'. 'O se cunuu i'na' uún so', ndaa vaa cataj xna'anj so' rihaan soj á. Catuu roj soj ni'yaj roj soj rej quinaj so' á. <sup>7</sup> Gaa ne ra'yanj ca'anj roj soj, cataj xna'anj roj soj rihaan nij sí tucu'yón se-nana so' se vaa cunuu i'na' uún so' á. Veé dan me se quitaj yaan so' rihaan soj ca'anj so' estadó Galilea, ne ca'anj soj ndaa yo', ne quene'en soj man so' á. Danj gaa cataj xna'anj soj rihaan nij sí tucu'yón se-nana so' á. Veé dan me quisij nana cataj xna'anj 'unj rihaan soj a —taj se-mozó Diosë rihaan roj chana yo' a.

<sup>8</sup> Veé dan, ne curihanj roj chana ca'anj roj no' a. Veé roj no' cuchu'vi', ne veé roj no' guun nihá rá uún a. Veé dan me se cunanj ndo'o roj no', cataj xna'anj roj no' rihaan nij sí tucu'yón se-nana Jesucristó nu' se vaa quene'en roj no' do', nu' nana cataj xna'anj se-mozó Diosë rihaan roj no' do' a. <sup>9</sup> Ne maan orá dan nari' tuvi ma'an Jesucristó ga roj chana yo', ne cataj so':

—Gaa nihá' nimán roj soj á —taj Jesucristó rihaan roj no' a.

Gaa ne cuchi' roj chana yo' rihaan Jesucristó, ne ca'anj canicun' ruj roj no' rihaan so', ne quita'aa roj no' tacóo Jesucristó, ne na'víj roj no' rihaan Jesucristó a.

<sup>10</sup> Gaa ne cataj Jesucristó rihaan roj chana a:

—Se cuchu'vi' roj soj ma'. Maan se ca'anj roj soj cataj xna'anj roj soj rihaan nij tinúu 'unj se vaa cavii nij so'

ca'anj nij so' estadó Galilea, ne ndaa yo' quene'en nij so' manj á —taj Jesucristó rihaan roj chana yo' a.

**Nana nihánj taj xna'anj che'é nana cataj xna'anj nij tanuu rihaan nij xrej atá suun nocoo doj a**

<sup>11</sup> Ne gaa quisij ca'anj roj chana yo', ne dan me se cavii ta'aj nij tanuu man tu'va yu'uj yo' rque chuman', ne cataj xna'anj nij tanuu rihaan nij xrej atá suun nocoo doj nu' se vaa guun a. <sup>12</sup> Ne cunuu chre' nij xrej atá suun nocoo doj ga nij sí uun chij, ne nuchruj raa nij so' daj qui'yaj nij so' a. Gaa ne go' uxrá nij so' sa'anj rihaan nij tanuu yo', <sup>13</sup> ne cataj nij so':

—Cataj soj se vaa rej ni cotoj soj, ne nij sí tucu'yón se-nana so' ro', ca'na' quirii man so' a. Danj cataj soj á. <sup>14</sup> Ne sese cuchí' nana yo' rihaan sí nicaj suun gobernador, ne sese me rá so' qui'yaj so' sayuun man soj, ne ma'an núj caráan ra'a sayuun xráá soj á —taj nij so' rihaan nij tanuu a.

<sup>15</sup> Dan me se guun ya rá nij tanuu, ne quita'aa nij so' sa'anj yo', ne qui'yaj nij so' nu' se vaa cataj xna'anj nij xrej atá suun nocoo doj do', nij sí uun chij do', rihaan nij so' a. Ne ase vaa nana ca'mii nij tanuu rihaan yuvii ro', ta'nga' danj vaa nana ticha'nuu nij yuvii israelitá rihaan yuvii ndaa yo' yaj nanj adonj.

**Nana nihánj taj xna'anj che'é suun ca'ne' Jesucristó rihaan nij sí tucu'yón se-nana so' a**

<sup>16</sup> Gaa ne ca'anj xaan nij sí tucu'yón se-nana Jesucristó estadó Galilea, ne cavii nij so' raa 'o quij a. Danj qui'yaj nij so', ése cuno nij so' nana cataj xna'anj Jesucristó rihaan nij so' gaa rque a. <sup>17</sup> Gaa ne quene'en nij so' man Jesucristó, ne na'víj nij so' rihaan so', tzaj ne ne guun ya rá ta'aj nij so' se vaa ya ya Jesucristó me so' a. <sup>18</sup> Gaa ne cuchí' Jesucristó rihaan nij so', ne cataj so' rihaan nij so':

—Yaj me se 'unj me sí uun chij xta' do', nu' rihaan yo'óo do', qui'yaj Diose ei. <sup>19</sup> Che'é dan ca'anj soj tucu'yón soj se-nana rihaan nij yuvii man 'o 'o chuman' naj rihaan chumii, ne canoco' nij yuvii manj, qui'yaj soj, ne cuta' ne soj man nij so', ne cata' tu'va soj se-chuvii Réé 'unj Diose do', se-chuvii 'unj ta'nij Diose do', se-chuvii Nimán Diose do' á. <sup>20</sup> Ne tucu'yón soj rihaan nij yuvii se vaa cunoo nij yuvii nu' nana cataj xna'anj 'unj rihaan soj á. Veé dan yuun che'e cachee 'unj ga soj nu' güii cachee soj rihaan chumii nihánj, ndaa se quinavij nu' chumii nihánj nanj adonj —taj Jesucristó rihaan nij so' a.

# San Marcos

**Nana nihánj taj xna'anj che'é síí cu'naj Juan síí cuta' ne man yuvii a**

**1** Nana vaa guun che'e se-nana Jesucristó nana sa' a. <sup>2</sup> Dan me se síí cu'naj Isaías síí nata' se-nana Diose gaa naá ro', cachrón so' nana nihánj rihaan yanj, ne: "Vaa síí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so', qui'yaj so' a", me se-nana Diose nana cachrón síí cu'naj Isaías rihaan yanj a. <sup>3</sup> Ne yo'ó nana cachrón uún so' me nana nihánj, ne: "Nucua'j ndo'o ca'mii natáj 'o so' rej tacaan, ne cataj so' se vaa nuchran' nimán yuvii, ne ve'é ca'mii nij yuvii ga síí 'nij ra'a man ní' asa' ca'na' so' adonj", taj síí cu'naj Isaías gaa naá, ne ase vaa cataj so' ro', ta'nga' danj guun adonj. <sup>4</sup> Dan me se cavii síí cu'naj Juan síí cuta' ne man yuvii, ne vaj so' rej tacaan, ne ca'mii natáj so' rihaan nij yuvii, cataj so' se vaa nuchran' nimán nij yuvii, ne tanáj nij yuvii chrej chi'ii, ne ca'vee tinavij Diose cacun' tumé nij yuvii, taj Juan adonj. <sup>5</sup> Ne dan me se curihanj ndo'o nij yuvii man estadó Judea do', man ma'an chuman' Jerusalén do', ca'na' nij yuvii rihaan síí cu'naj Juan, ne cata' ne nij yuvii rá chráá cu'naj Jordán, qui'yaj Juan a. Dan me se nata' ya nij yuvii che'é cacun' tumé nij yuvii, gaa ne cata' ne nij yuvii adonj.

<sup>6</sup> Dan me se síí cu'naj Juan me se cachij taj xraá xcuu camelló guun yatzij nuu so', ne 'nij catuun so' 'o nuj, ne chá so' rquíí chá so' catzi' xtaan man quij chá so' a. <sup>7</sup> Ne ca'mii natáj so', ne cataj so':

—Vaa 'o síí sca' doj rihanj, ne so' me síí ca'na' rej rihāan ní', ne 'unj nihánj me se ne nó xcúnj nachej nuj correá 'nij tacanj so' ma'. <sup>8</sup> Ne síí uta' ne na yun man soj mej, tzaj ne ca'na' so', ne ca'na' Nimán Diose rihaan soj, qui'yaj so' adonj —taj síí cu'naj Juan rihaan nij yuvii a.

**Nana nihánj taj xna'anj se vaa cuta' ne Juan man Jesucristó a**

<sup>9</sup> Ne güii yo' ta' asuun me se cavii Jesucristó chuman' Nazaret chuman' naj estadó Galilea, ne cata' ne so' rá chráá cu'naj Jordán, qui'yaj síí cu'naj Juan a. <sup>10</sup> Nu' curihanj uún Jesucristó rque na, ne nu' quene'en so' se vaa naxra' rej xta', ne quene'en so' se vaa nanij Nimán Diose raá ma'an so', ne ase vaa cha'aan ro', vaa Nimán Diose, curuvi' yo' a. <sup>11</sup> Gaa ne rej xta' ca'mii Diose rihaan Jesucristó, ne cuno nij síí nicun' ga Jesucristó nana ca'mii Diose, ne dan me se cataj Diose a:

—Ta'níí 'unj síí 'ee ndo'o raj man mé so', ne niha' ndo'o raj ni'yaj 'unj mán so' adonj —taj nana cavii rej xta' ca'mii Diose rihaan Jesucristó a.

**Nana nihánj taj xna'anj se vaa guun ndo'o rá síí chree tihā' yu'unj síí chree man Jesucristó a**

<sup>12</sup> Ne dan me se ca'anj ndo'o Jesucristó rej tacaan, qui'yaj Nimán Diose a. <sup>13</sup> Ne vij chihāā güii vaj so' rej tacaan, ne guun rá síí chree tihā' yu'unj so' man Jesucristó, ne vaj Jesucristó rej man xcuu yuvaā, ne rque nij se-mozó Diose me ma'an se cachiin rihaan Jesucristó a.

**Nana nihánj taj xna'anj se vaa ca'anj Jesucristó estadó cu'naj Galilea a**

<sup>14</sup> Dan me se gaa quisij quita'aa nij tanuu man síí cu'naj Juan, ne ca'anj Jesucristó estadó cu'naj Galilea, <sup>15</sup> ne ca'mii natáj so' se-nana Diose nana sa', ne cataj so' se vaa nichrun' quisij güii ca'na' Diose guun chij Diose rihaan chumii nihánj, ne:

—Che'é dan nuchran' nimán soj, ne cuchuman rá soj cunō soj se-nanaj nana sa' á —taj so' rihaan nij yuvii a.

**Nana nihánj taj xna'anj se vaa cataj xna'anj Jesucristó rihaan ca'anj síí rii xcuaj se vaa canocō' nij so' man Jesucristó a**

<sup>16</sup> 'O güii cachén Jesucristó tu'va na lacuaná cu'naj na Galilea, ne quene'en so' síí cu'naj Simón ga tinúú Simón síí cu'naj Andrés, ne dan me se nicun' roj so' tu'va na lacuaná, ne tiguíj roj so' nanj rque na, ne dan me se síí rii xcuaj me roj so' a. <sup>17</sup> Gaa ne cataj Jesucristó rihaan roj so' a:

—Canocō' roj soj manj á. 'O se síí naqui'yaj chre' xcuaj me roj soj, tzaj ne rej rihāan ní' me se guun roj soj síí naqui'yaj chre' yuvii, qui'yáj, ne canocō' nij yuvii manj a —taj Jesucristó rihaan roj tinuj roj so' a.

<sup>18</sup> Ne nu' canicaj roj so' tanáj roj so' xnánj roj so', ne canocō' roj so' man Jesucristó, ca'anj roj so' nanj adonj.

<sup>19</sup> Veé dan, ne cachéé nij so' doj, gaa ne quene'en Jesucristó man síí cu'naj Jacobo ta'níí síí cu'naj Zebedeo do', man tinúú Jacobo síí cu'naj Juan do' a. Dan me se nuu roj so' rque rihoo chéé rihaan na, ne naqui'yaj sa' roj so' nanj rii xcuaj, ne canacúun Jesucristó man roj tinuj roj so' canocō' roj so' man Jesucristó a. <sup>20</sup> Veé dan, ne canicaj roj so', tanáj roj so' man rej roj so' síí cu'naj Zebedeo rá rihoo ga nij se-mozó so', gaa ne

cavii roj so' canoco' roj so' man Jesucristó, ca'anj roj so' nanj adonj.

**Nana nihánj taj xna'anj se vaa quirii Jesucristó man yo'q nana chree nimán 'o snó'o a**

<sup>21</sup> Dan me se catúj nij so' chuman' Capernaum, ne daj a güii naránj rá nij yuvií israelitá ca'anj Jesucristó ve' tucu'yón nij so' se-tucuñanj Moisés, ne tucu'yón so' se-nana Diosé man nij yuvií a. <sup>22</sup> Ne caráya'anj nij yuvií se-nana so', che'é se cuu doj vaa se-nana so' ga se-nana nij sí naqui'yaj cuu se-tucuñanj Moisés a. 'O se ase vaa a'mii 'o sí uun chij ndo'o ro', danj ca'mii so' rihaan nij yuvií a.

<sup>23</sup> Ne dan me se 'o güii naránj rá nij yuvií israelitá, ne yaán 'o sí nuu nana chree nimán rá ve' yo', ne caguáj so', <sup>24</sup> ne cataj so' se vaa:

—Me che'é ra'yunj so' man núj, ga Jesús Nazareno'. 'Na' so' tarí' so' man núj na'. Ne'enj mán so' se vaa sí guë cavii rihaan Diosé mé so' adonj —taj sí nuu nana chree nimán rihaan Jesucristó a.

<sup>25</sup> Gaa ne canicaj Jesucristó, caxrój yuvaa Jesucristó man nana chree nuu nimán snó'o yo', ne cataj so':

—Dínj tu'vá so', curihanj so' cuaj nimán sí nihánj á —taj Jesucristó rihaan nana chree yo' a.

<sup>26</sup> Ndaa quisnúu ma'an snó'o yo', qui'yaj nana chree, ne nucuaj ndo'o caguáj nana chree, ne curihanj nana chree nimán snó'o yo', ne nahuun sa' so' a. <sup>27</sup> Gaa ne ca'anj uxrá rá nij yuvií, ne xna'anj nij yuvií man tuvi' nij yuvií, cataj nij yuvií:

—Asa' ca'vee qui'yaj so' danj ga. Tucuáán naca me nihánj chuguñanj. 'O se guun chij ndo'o sí nihánj, ne ndaa rihaan nij nana chree taj xna'anj sí nihánj daj qui'yaj nij so', ne uno nij nana chree yo' rihaan so' ga —taj nij yuvií rihaan tuvi' nij yuvií a.

<sup>28</sup> Gaa ne cuchi' nana che'é Jesucristó rihaan cunudanj nij yuvií man nichrun' estadó Galilea yo' a.

**Nana nihánj taj xna'anj se vaa nahuun sa' nii chej Simón Pedró, qui'yaj Jesucristó a**

<sup>29</sup> Dan me se curihanj nij tuvi' Jesucristó rá ve' tucu'yón nii se-tucuñanj Moisés, gaa ne catúj taran' nij so' rá ve' tucua Simón ga Andrés, ne 'na' Juan ga Jacobo ga nij so' a. <sup>30</sup> Dan me se nii chej Simón ro', ran' no' chi'ij naca yuvaa, ne naj no', ne cataj xna'anj yo'q nij so' rihaan Jesucristó se vaa ran' uxrá no' a. <sup>31</sup> Gaa ne cuchi' Jesucristó rej naj no', ne canó so' ra'a no', ne naxcáj so' man no', ne naxagaa no', ne nu' x'néj chi'ij xráá no', qui'yaj Jesucristó a. Ne veé maan orá dan qui'yaj chuvij no' cha nij so' nanj adonj.

**Nana nihánj taj xna'anj se vaa nahuun que'ee sí ran', qui'yaj Jesucristó a**

<sup>32</sup> Dan me se cata' güii, ne ti'nuu, ne nicaj nij yuvií cunudanj tuvi' nij yuvií sí ran' do', sí nuu nana chree nimán do', vaj nij yuvií rej ne Jesucristó a. <sup>33</sup> Ne dan me se que'ee nij yuvií man chuman' Capernaum yo' nuu chre' rihaan ta'yaa ve' ne Jesucristó a. <sup>34</sup> Gaa ne nahu-

un que'ee nij sí ran' daj a chi'ij, qui'yaj Jesucristó, ne quirii ndo'o so' nana chree nimán nij yuvií, ne ca'ne' so' suun rihaan nij nana chree se vaa se ca'mii nij nana chree a doj nana a. Dan me se ne ca'vej rá Jesucristó cataj nij nana chree se vaa cunuu yaan nij nana chree man Jesucristó a.

**Nana nihánj taj xna'anj se vaa ca'anj Jesucristó nu' nij ve' tucu'yón nij yuvií israelitá se-tucuñanj Moisés, ca'mii natáj so' a**

<sup>35</sup> Gaa ne rej taxrej naxagaa Jesucristó, ne cavii so' chuman' Capernaum, ne ca'anj so' rej tacaan cachinj ni'yaj so' rihaan Diosé a. <sup>36</sup> Gaa ne canoco' nij tuvi' Simón man so', <sup>37</sup> gaa ne nari' nij so' man so', ne cataj nij so' rihaan so' se vaa:

—Cunudanj nij yuvií nano' mán so' á —taj nij tuvi' Simón rihaan Jesucristó a.

<sup>38</sup> Gaa ne cataj Jesucristó rihaan nij so':

—Cavii ní' rej nihánj, ca'anj ní' yo'ó nij chuman' naj nichrun', ne ca'mii natáj 'unj rihaan nij yuvií man yo'ó nij chuman' uún á. 'O se che'é dan ca'ná' 'unj adonj —taj Jesucristó rihaan nij so' a.

<sup>39</sup> Gaa ne ca'anj so' nu' nij chuman' naj estadó Galilea, ne ca'mii natáj so' rá ve' tucu'yón nij sí man nij chuman' yo' se-tucuñanj Moisés, ne quirii so' man nij nana chree nuu nimán yuvií a.

**Nana nihánj taj xna'anj se vaa nahuun sa' 'o sí ran' luj ri'yuj, qui'yaj Jesucristó a**

<sup>40</sup> Gaa ne ca'na' 'o sí ran' luj ri'yuj, ne canicun' ruj so' rihaan Jesucristó, ne cachíin ni'yaj so' rihaan Jesucristó, ne cataj so' se vaa:

—Sese me rá so', ne ca'vee ca'nee so' chi'ij xrá á —taj sí ran' luj ri'yuj yo' rihaan Jesucristó a.

<sup>41</sup> Gaa ne cunuu 'ee rá Jesucristó man so', ne cuta' Jesucristó ra'a Jesucristó raá so', ne cataj Jesucristó:

—Me raj qui'yáj danj ei. Nahuún so' qui'yáj adonj —taj Jesucristó rihaan so' a.

<sup>42</sup> Nu' danj cataj Jesucristó, ne nu' quinavij luj xráá sí ran', ne nahuun sa' so' cuaj a.

<sup>43</sup> Gaa ne ca'mii yuvaa Jesucristó ga so', ne quirii Jesucristó man so' rá ve', <sup>44</sup> ne cataj Jesucristó rihaan so':

—Se guun cataj xna'anj so' a doj nana rihaan a 'ó yuvií ma'. Maan se ca'anj so' rihaan xrej, ne tijaán so' mán so' rihaan xrej se vaa nahuún so', qui'yaj Diosé, ne rque so' rihaan Diosé ndaa vaa cataj sí cu'naj Moisés gaa naá ndaa vaa no' xcúun so' rque so' rihaan Diosé che'é yan nahuún so' adonj. Gaa ne xcáj nij xrej cuentá se vaa nahuún so' qui'yáj adonj —taj Jesucristó rihaan sí nahuun yo' a.

<sup>45</sup> Tzaj ne curihanj sí nahuun yo', ne guun che'e so' ca'mii natáj ndo'o so', ndaa síj, gaa ne cha'nuu ndo'o nana se vaa nahuun so' qui'yaj Jesucristó a. Ne dan me se ne ca'vee a doj catuu ranga' Jesucristó rá nij chuman', qui'yaj nij nana yo', ne inanj rej tacaan vaj so', ne canó nij yuvií cuchi' rej vaj so' a.

Nana nihánj taj xna'anj se vaa nahuun sa' 'o síí na'vee cachee, qui'yaj Jesucristó a

2 Dan me se cachén doj güii, gaa ne catúj uún Jesucristó chuman' Capernaum, gaa ne cuchi' nana rihaan nij yuvi se vaa yanj so' rá ve' a. <sup>2</sup> Gaa ne cunuu chre' que'ee ndo'o nij yuvi rihaan ve' yo', ne ndaa raan ma'an mán nij yuvi, ne ndaa rihaan ta'yaa ve' yo' taj rej quisij doj cumán nij yuvi a. Ne nata' Jesucristó se-nana so' rihaan nij yuvi a. <sup>3</sup> Ne dan me se ca'na' doj yuvi uún, ne nij so' me se nicaj nij so' yo'q tuvi' nij so' síí na'vee cachee, ne táa chihá ca'anj nij so' man síí na'vee cachee yo', ne dan me se guun rá nij so' cuchi' síí na'vee cachee yo' rihaan Jesucristó a. <sup>4</sup> Tzaj ne ne ca'vee cuchi' síí na'vee cachee yo' rihaan Jesucristó, qui'yaj nij so' a ma'. 'O se man uxrá yuvi, ne ne ca'vee cachén nij so' a. Che'é dan cavii nij so' xráa ve', ne caya' nij so' yu'uj xráa ve' rej nicun' Jesucristó rá ve', ne tananij nij so' yuvéé táa síí na'vee cachee yo' rihaan Jesucristó a. <sup>5</sup> Dan me se gaa quene'en Jesucristó se vaa cuchumán uxrá rá nij tuvi' síí na'vee cachee yo' se vaa ca'vee nahun so' qui'yaj Jesucristó, gaa ne cataj so' rihaan síí na'vee cachee yo':

—Navij cacun' xráa so', nanj tinuj —taj Jesucristó rihaan so' a.

<sup>6</sup> Ne ne doj síí naqui'yaj cyu se-tucuanj Moisés rá ve' yo' ga Jesucristó, ne nuchruj raá nij so', ne guun rá nij so': <sup>7</sup> "Me che'é a'mii síí nihánj danj ga. 'O se a'mii so' nana vaa nij rihaan Diose asan. Qrún' Diose guun nucuaj tinavij cacun' xráa yuvi nanj á", guun rá nij síí naqui'yaj cyu se-tucuanj Moisés yo' a. <sup>8</sup> Dan me se quene'en ma'an Jesucristó se vaa guun rá nij so' danj, ne che'é dan cataj so':

—Me che'é nuchruj raá soj nana nanj ga. <sup>9</sup> Tu'va rma'án 'unj se vaa navij cacun' xráa síí nihánj, rá soj a na'. Ca'vee cataj unj ní' navij cacun' xráa síí nihánj na'. Ase ca'vee doj cataj ní' naxagaa so', ne nacué so' tuvée so', ne cachee so' cuaj, cataj ní' xa'. <sup>10</sup> Dan me se me rá 'unj xcay soj cuentá se vaa síí ca'née Diose nicaj yu'unj man yuvi mej ne no xcúún 'unj tinavíi 'unj cacun' xráa nij yuvi man rihaan chumij nihánj adonj —taj Jesucristó rihaan nij so' a.

Dan me se cataj Jesucristó rihaan síí na'vee cachee a:

<sup>11</sup> —Rihaan so' sij na'vee cachee taj 'unj, ne nacué so' tuvée so', ne nan' so' tucua so' á —taj Jesucristó rihaan síí naj rihaan yuvéé yo' a.

<sup>12</sup> Gaa ne naxagaa síí na'vee cachee yo', ne nacué so' tuvée so', gaa ne curihanj so' rá ve', ni'yaj taran' nij yuvi man rá ve' a. Ndaa síj, gaa ne ca'anj rá nij yuvi, ne cataj nij yuvi se vaa sa' uxrá qui'yaj Diose, ne:

—Daj chihaa míj ne quene'en ní' suun danj a man adonj —taj nij yuvi yo' a.

Nana nihánj taj xna'anj se vaa nacúún Jesucristó man Leví, ne canoco' Leví man so' a

<sup>13</sup> Gaa ne curihanj uún Jesucristó, ca'anj so' tu'va na lacuaná, gaa ne ca'na' cunudanj nij yuvi rej vaj so', gaa ne tucuyón so' man nij yuvi a.

<sup>14</sup> Veé danj vaj so', ne quene'en so' man síí cu'naj Leví ta'níí síí cu'naj Alfeo, ne dan me se ne so' 'o ve' a'néj nii puextó, ne a'néj so' puextó man yuvi a. Gaa ne cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

Gaa ne naxumagan so', ne canoco' so' man Jesucristó, ca'anj so' a.

Nana nihánj taj xna'anj se vaa me rá Jesucristó racuíj so' man nij síí tumé cacun' a

<sup>15</sup> Dan me se 'o güii yáan Jesucristó rá ve' tucua síí cu'naj Leví yo', ne ca'na' ndo'o tuvi' so' síí a'néj puextó do', yo'ó nij síí tumé ndo'o cacun' do', ne catúj nij so' rá ve', ne ca'anj cayáan nij so' ga Jesucristó, ne dan me se man rcua'agan nij síí tucuyón se-nana Jesucristó do', ne chá cunudanj nij so' chraa a. 'O se que'ee ndo'o nij síí tumé cacun' yo' me canoco' se-nana Jesucristó a.

<sup>16</sup> Gaa ne nij síí fariseo naqui'yaj cyu se-tucuanj Moisés rihaan yuvi ro', quene'en nij so' se vaa chá Jesucristó chraa do', co'o Jesucristó do', ga nij síí a'néj puextó do', ga yo'ó nij síí tumé ndo'o cacun' do', gaa ne cataj nij so' rihaan nij síí tucuyón se-nana Jesucristó, ne:

—Me che'é chá síí nihánj chraa ne co'o so' na ga nij síí a'néj puextó do', ga yo'ó nij síí tumé cacun' do', ga —taj nij so', xná'anj nij so' man nij síí tucuyón se-nana Jesucristó a.

<sup>17</sup> Ne cuno Jesucristó nana ca'mii nij so', gaa ne cataj so' rihaan nij so' a:

—Síí vaa nucuaj ro', ne nano' nij so' man doctor ma'. Magan síí ran' ro', me síí nano' man doctor adonj. Gaa ne ase vaa síí ran' ro', danj vaa nij síí nihánj adonj. Ne ca'na' 'unj canacunj 'unj man síí sa' ma'. Che'é nij síí tumé cacun' ca'naj se vaa canoco' nij so' se-nanaj adonj. Tzaj ne sese síí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

Nana nihánj taj xna'anj me che'é ne toco' nij síí tucuyón se-nana Jesucristó x'naa man ma'an nij so' a

<sup>18</sup> Ne dan me se toco' nij síí tucuyón se-nana Juan do', nij síí fariseo do', x'naa man ma'an nij so', ne ca'na' nij so' rihaan Jesucristó, ne xná'anj nij so' man Jesucristó, cataj nij so':

—Me che'é, ne toco' núj sij tucuyón se-nana Juan do', sij tucuyón se-nana nij síí fariseo do', x'naa man ma'an núj che'é se aráj guéé núj rihaan Diose, tzaj ne nij síí tucuyón se-nana so' me se ne toco' nij so' x'naa man ma'an nij so' ga —taj nij so', xná'anj nij so' man Jesucristó a.

<sup>19</sup> Gaa ne cataj Jesucristó rihaan nij so' a:

—Ase vaa síi cuchruj sa'anj vaa 'unj, ne asá' ca'vee toco' nij síi man gaj x'naa man ma'an nij so', rá soj gá. Ase vaa síi cataj xcaj man chaná ne man tuvi' so' do', danj vaa nij síi man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' cuano ma'. <sup>20</sup> Tzaj ne vaa güii, ne guun yanij 'unj rihaan nij so', qui'yaj yuvii, gaa ne nano rá nij síi nihánj, gaa ne toco' nij so' x'naa man ma'an nij so' adonj.

**Nana nihánj taj xna'anj se vaa nij síi noco' tucuáán nga ro', se guun nucuaj nij so' cunq' nij so' se-nana Jesucristó ma'**

<sup>21</sup> "Tzaj ne ase vaa yatzij sin' vaa tucuáán nga noco' soj, ne se guun na'nej ní' mantá naca man yatzij nga yo' ma'. 'Q se sese qui'yaj ní' danj, ne güii quinanj yuvii yatzij yo', gaa ne nagüej mantá naca yo', ne sese cuxuun yuvii man yatzij yo', ne quisin' yo', gaa ne cunyu xij doj yu'uj taj man yatzij nga yo' nanj adonj. <sup>22</sup> Ne dan me se ase vaa nuj nga nuj araa nii na vinó vaa uún soj ei. Ne se ca'vee tucu'yón 'unj se-tucañj 'unj rihaan soj ma'. 'Q se ase vaa na vinó naca vaa nana tucu'yón 'unj, ne se guun caraa yuvii na vinó naca rque nuj nga ma'. Sese danj qui'yaj yuvii, ne cuyan na vinó cunyu xee na vinó, ne se cacua nuj nga ma'. Che'é dan canyu yo', ne cayanj na vinó rihaan yo'óo a. Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan síi naca síi ne noco' tucuáán nga tucu'yón 'unj se-nanaj nanj adonj —taj Jesucristó rihaan nij síi tucu'yón se-nana síi cu'naj Juan do', rihaan nij síi tucu'yón se-nana nij síi fariseo do' a.

**Nana nihánj taj xna'anj che'é güii naránj rá ní' a**

<sup>23</sup> 'Q güii naránj rá nij yuvii israelitá cachén Jesucristó ga nij síi tucu'yón se-nana so' rque 'o naa 'núu trigó, ne guun che'e nij síi tucu'yón se-nana so' vaj nij so' ne cuta nij so' doj caa trigó a. <sup>24</sup> Gaa ne cataj nij síi fariseo rihaan Jesucristó a:

—Ni'yaj so' ei. Me che'é 'yaj nij síi tucu'yón se-nana so' danj ga. Ne nó xcúún ní' qui'yaj ní' danj güii naránj rá ma' —taj nij síi fariseo rihaan Jesucristó a.

<sup>25</sup> Gaa ne cataj Jesucristó rihaan nij so' a:

—Me che'é, ne ne nayaaj soj rihaan danj Diose daj qui'yaj síi cu'naj David gaa naá a. Gaa quina'aan rque nij tuvi' nij so', <sup>26</sup> gaa ne catúj so' rá nuvíi gaa cayáán síi cu'naj Abiatar xrej atá suun noco'oj, ne chá so' rachrúún taj rihaan se-mesa Diose a. Ne ne nó xcúún so' chá so' rachrúún yo', maan orún' nij xrej nó xcúún chá rachrúún yo' a. Ne go' uún síi cu'naj David yo' chá nij tuvi' so' uún a. Tzaj ne ne cataj Diose se vaa tumé síi cu'naj David cacun' ma' —taj Jesucristó rihaan nij síi fariseo, <sup>27</sup> gaa ne cataj uún so' rihaan nij síi fariseo a—Maan che'é rej ca'vee cavii sa' nij yuvii me cuchruj Diose güii naránj rá nanj á. Nuveé che'e rej cātā nij yuvii suun navij rá güii naránj rá me qui'yaj Diose man nij yuvii a ma'. <sup>28</sup> Che'é dan me, 'unj sij ca'née Diose nīcaj

yu'unj man yuvii ro', no xcúún quirij ta'ngaj daj qui'yaj yuvii güii naránj rá nanj adonj —taj Jesucristó rihaan nij síi fariseo a.

**Nana nihánj taj xna'anj se vaa nahuun sa' 'o síi naco' ra'a, qui'yaj Jesucristó a**

<sup>3</sup> Gaa ne natúj Jesucristó rá ve' tucu'yón nij síi israelitá se-tucañj Moisés, ne dan me se yáán 'o snó'o naco' ra'a rá ve' yo' a. <sup>2</sup> Ne nij síi fariseo me se yáán nij so' rá ve' yo', ne tumé uxrá nij so' man Jesucristó sese nahuun yuvii qui'yaj so' gaa güii naránj rá nij yuvii israelitá a. Danj qui'yaj nij so' che'é rej guun rá nij so' cuta' nij so' cacun' xráá Jesucristó a. <sup>3</sup> Gaa ne cataj Jesucristó rihaan síi naco' ra'a a:

—Naxumagan so' canicun' cayá so' sca'núj núj á —taj Jesucristó rihaan so' a.

<sup>4</sup> Gaa ne xná'anj Jesucristó man nij síi fariseo yo', cataj so', ne:

—No xcúún ní' raquíj ní' man tuvi' ní' güii naránj rá ní' na', ase no xcúún ní' qui'yaj chí'ij ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúún ní' tjanii ní' man tuvi' ní' rihaan sayuun gaa güii naránj rá gaa a na'. Ni'yaj uun ní' caví' so' gaa güii naránj rá gaa a na'. —Danj taj Jesucristó rihaan nij so' a.

Tzaj ne dínj tu'va nij so' a. <sup>5</sup> Gaa ne ca'maan rá Jesucristó, ne ni'yaj so' man nij síi fariseo yo' a. 'Q se nanó ndo'o rá so' che'é nij so' se vaa síi nichraj ndo'o nimán me nij so' a.

Gaa ne cataj Jesucristó rihaan síi naco' ra'a yo' a:

—Tycua so' ra'á so' á —taj Jesucristó rihaan so' a.

Ne tucua so' ra'a so', ne cunuu sa' ra'a so' nanj adonj. <sup>6</sup> Gaa ne curihanj nij síi fariseo yo', ne cunuu chre' nij so' ga nij síi noco' man síi cu'naj Herodes, ne ca'anj nij so' rej yanij, ne guun rá taran' nij so' daj gaa qui'yaj nij so' ne caví' Jesucristó a.

**Nana nihánj taj xna'anj se vaa xcaj ndo'o nij yuvii cuentá se vaa síi 'yaj nahuun sa' yuvii me Jesucristó a**

<sup>7</sup> Gaa ne cavii Jesucristó ga nij síi tucu'yón se-nana so' rej yo', ne ca'anj so' tu'va na lacuaná a. Ne canoco' uxrá yuvii man so' a. Dan me se síi man estadó Galilea do', <sup>8</sup> síi man estadó Judea do', síi man chuman' Jerusalén do', síi man estadó Idumea do', síi man rej rnej chráa cu'naj Jordán do', síi man chuman' Tiro do', síi man chuman' Sidón do', cuno nij so' nana daj qui'yaj Jesucristó che'é nij síi ran', ne che'é dan ca'na' ndo'o nij so' rihaan Jesucristó a. <sup>9</sup> Gaa ne cataj Jesucristó rihaan nij síi tucu'yón se-nana so' se vaa qui'yaj chuvii nij so' 'o rihoo chée rihaan na catuu so', gaa ne se gaa nanj curu'maan nij yuvii man so', taj so' a. <sup>10</sup> 'Q se nahuun sa' uxrá yuvii, qui'yaj Jesucristó, ndaa síj, gaa ne taran' nij síi ran' ro', canoco' uxrá nij so' man Jesucristó che'é rej ca'vee cano' ra'a nij so' man so' gaa ne nahuun sa' nij so', rá nij so' a. <sup>11</sup> Ne nij síi nuu nana chree nimán ro', gaa quene'en nij so' man Jesucristó,



ne ca'anj quinaj nij so' rihaan yo'óo tacóo Jesucristó, ne cataj nij nana chree se vaa:

—So' me ta'níi Diosę ya adonj —taj nij nana chree rihaan Jesucristó a.

<sup>12</sup> Gaa ne ca'ne' ndo'o Jesucristó suun rihaan nij nana chree se vaa se guun nata' nij so' rihaan nij yuvij che'é so' a.

### Nana nihánj taj xna'anj se vaa quinarii Jesucristó chuvij síi ca'anj nata' se-nana so' a

<sup>13</sup> Gaa ne cavii Jesucristó xráa quij, ne canacúun so' man nij síi me rá so' ca'na' rihaan so', gaa ne cavii nij so', ne cuchii' nij so' rihaan Jesucristó a. <sup>14</sup> Gaa ne quinarii Jesucristó man chuvij nij so' se vaa guun nij so' apóstol nata' rihaan yuvij che'é so' a. 'O se guun rá so' se vaa cacheę chuvij nij so' ga so', ne guun rá so' ca'nej so' man chuvij nij so' ca'mii natáj nij so' rihaan nij yuvij a. <sup>15</sup> Ne guun rá so' nago' so' suun uun chij ra'a nij so' che'é rej ca'vee nahuun sa' nij síi ran' ne quirii' nij so' man nij nana chree nimán nij yuvij a.

<sup>16</sup> Dan me se cune' Jesucristó man síi cu'naj Simón, ne tucu'náj so' Pedró man Simón a. <sup>17</sup> Ne cune' so' man síi cu'naj Jacobo ta'níi síi cu'naj Zebedeo, ne cune' so' man tinúu Jacobo síi cu'naj Juan, ne tucu'náj so' Boanerges man roj so', ne nana "Boanerges" ro', taj se vaa ase vaa ta'níi ya'anj tu'vii vaa roj so' a. <sup>18</sup> Ne cune' so' man síi cu'naj Andrés do', man síi cu'naj Felipé do', man síi cu'naj Bartolomé do', man síi cu'naj Mateo do', man síi cu'naj Tomás do', man síi cu'naj Jacobo ta'níi síi cu'naj Alfeo do', man síi cu'naj Tadeo do' a. Ne cune' so' man yo'óo síi cu'naj Simón, ne tuvi' nij síi me rá cunú' ga gobiernó man Romá me so' a. <sup>19</sup> Ne cune' Jesucristó man síi cu'naj Judas Iscariote, ne so' me síi tacuachén man Jesucristó rihaan nij síi taj ri'yunj man Jesucristó a.

### Nana nihánj taj xna'anj se vaa cuta' nij síi fariseo cacun' rmi' xráa Jesucristó se vaa ca'mii Jesucristó ga síi chree a

Gaa ne catúj Jesucristó rá ve' a. <sup>20</sup> Gaa ne cunuu chre' ndo'o uún nij yuvij rihaan so', ne dan me se guun chruj ndo'o rihaan Jesucristó ga nij síi tucu'yón se-nana so', qui'yaj nij yuvij, ne ndaa ne gaa ya'núj rihaan Jesucristó ga nij síi tucu'yón se-nana so' cha' nij so' chraa, qui'yaj nij yuvij a. <sup>21</sup> Gaa ne cuchii' nana rihaan nij tuvi' Jesucristó daj ran' so' 'yaj nij yuvij, ne che'é dan ca'anj nij tuvi' Jesucristó quita'aa nij so' man Jesucristó a. 'O se guun rá nij tuvi' Jesucristó se vaa guun snuj Jesucristó a. <sup>22</sup> Gaa ne nij síi naqui'yaj cūu se-tucuaj Moisés síi cavii chuman' Jerusalén ro', cataj nij so' se vaa síi chree uun chij síi cu'naj Beelzebú nuú nimán Jesucristó, ne che'é dan guun nucuaj Jesucristó quirii' Jesucristó nana chree nimán yuvij qui'yaj síi chree uun chij yo', taj nij síi naqui'yaj cūu se-tucuaj Moisés yo' a.

<sup>23</sup> Gaa ne canacúun Jesucristó man nij síi naqui'yaj cūu se-tucuaj Moisés, ne nanó so' doj cuentó rihaan nij so', ne dan me se cataj so', ne:

—Asa' ca'vee quirii' síi chree síi cu'naj Satanás man ma'an tuvi' so' nana chree nimán nij yuvij, rá nij soj ga. Daj chihaa mij se ca'vee qui'yaj so' daj a man adonj.

<sup>24</sup> Ne'en soj se vaa sese vaa 'o nación, ne sese xra' ta'aj nij síi uun chij rihaan nación yo' ne cunú' ma'an nij so' ga tuvi' nij so', ne vaa güii, ne nu' nación yo' quirii' nu' nanj adonj. <sup>25</sup> Ne sese unu' ta'aj nij yuvij man 'o barrió ga tuvi' yuvij síi man ma'an barrió yo', ne vaa güii, ne quirii' nu' barrió yo', qui'yaj nij so' nanj adonj. <sup>26</sup> Che'é dan me sese unu' síi chree síi cu'naj Satanás ga tuvi' ma'an so', ne sese racuúj síi chree man 'unj quirii' 'unj nana chree nimán nij yuvij, ne se ca'vee guun chij síi chree yo' sese navij tuvi' so' ma'. Maan se quirii' nu' so' nanj adonj.

<sup>27</sup> "Ne sese me rá yo' o so' catuú so' rá ve' tucú síi ru'vee qui'yaj ituu so' si'yaj síi ru'vee yo', ne asino numij so' man síi ru'vee yo', gaa ne canicaj so' catzij so' tucú síi ru'vee yo' ei. Ne ase vaa 'yaj síi atúj tucú síi ru'vee ro', daj 'yá man síi chree yo' chuguaj. Dan me se numij 'unj man so', ne cuano nihánj a'néj 'unj man nu' nij síi 'nij ra'a so' adonj.

<sup>28</sup> "Cataj xna'anj yá yá 'unj rihaan soj cuano se vaa nu' cacun' tumé yuvij do', me ma'an nana chi'ii ca'mii yuvij do', ca'vee tinavij Diosę cacun' yo' che'é nij yuvij a. <sup>29</sup> Tzaj ne sese nachri' yo' o so' ni'yaj so' man Nimán Diosę, ne daj chihaa mij se quinavij cacun' yo' xráa so' a ma'. Tananj quitaj cacun' yo' xráa so' nu' cavii nu' ca'anj nanj adonj. <sup>30</sup> —Daj cataj Jesucristó rihaan nij síi naqui'yaj cūu se-tucuaj Moisés, che'é se aj cataj nij so' se vaa nana chree nuú nimán so' a.

### Nana nihánj taj xna'anj se vaa ase vaa nii Jesucristó do', ase vaa tinúu Jesucristó do', ase vaa ra'vij Jesucristó do', vaa nij síi uno rihaan Diosę a

<sup>31</sup> Gaa ne ca'na' nii Jesucristó do', tinúu Jesucristó do', ne nicun' nij so' xe' rihaan ve' nuu Jesucristó, ne ca'née nij so' nana rihaan Jesucristó se vaa curihaj so' ca'na' so' rej nicun' nij so' a. <sup>32</sup> Ne yáan ndo'o yuvij nu' anicaj rej ne Jesucristó, ne cataj nii rihaan Jesucristó a:

—Nicun' níi so' nicun' tinúu so' nicun' xe', ne me rá nij so' quene'en nij so' man so', Jesús —taj nii rihaan Jesucristó a.

<sup>33</sup> Gaa ne cataj Jesucristó rihaan nij síi nata' rihaan so' se vaa:

—Me chana me níi 'unj, rá soj ga. Me síi me tinúu 'unj, rá soj ga —taj Jesucristó rihaan nij so' a.

<sup>34</sup> Gaa ne ni'yaj Jesucristó man nij síi yanj nu' anicaj rej ne so', ne cataj so' a:

—Ni'yaj soj ei. Ase vaa níi 'unj do', ase vaa tinúu 'unj do', vaa nij síi nihánj adonj. <sup>35</sup> Yuvij uno rihaan Diosę ro', ase vaa tinúu 'unj do', ase vaa ra'vij 'unj do', ase vaa níi 'unj do', vaa nij so' adonj —taj Jesucristó a.

**Nihánj me cuentó nanó Jesucristó che'é 'núú trigó tix'nuu yo'q so' a**

4 Gaa ne ca'anj Jesucristó tu'va na lacuaná, ne gu-un che'e so' tucu'yón so' se-nanā so' rihaan yuvij tu'va na lacuaná a. Ne dan me se ca'na' ndo'o yuvij rihaan so', ne che'é dan cavii so' rque 'o rihoo chéé rihaan na, ne ca'anj canē so' rque rihoo yo', ne canicun' nij yuvij rihaan yo'óo tu'va na lacuaná yo' a.

2 Gaa ne tucu'yón so' man nij yuvij, nanó ndo'o so' cuentó rihaan nij yuvij, ne dan me se cataj so' rihaan nij yuvij a:

3 —Cunō soj ca'mij á. Dan me se curihanj 'o sif me rá cuchruj naā 'núú trigó, ne tix'nuu so' 'núú trigó yo' rihaan yo'óo, 4 ne cayuu doj 'núú trigó yo' rá chrej chéé yuvij, ne ca'na' xtâ chá xtâ man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâ nanj adonj. 5 Ne yo'ó ta'aj 'núú trigó yo' ro', cayuu rihaan yuvej rej taj catun' yo'óo a. Che'é dan cuaj xra' stanj le'ej a. 6 Veé dan, ne quisij güii, ne cuchrii naā le'ej, qui'yaj naán, che'é se ne ca'vee ca'anj nij yáá naā le'ej yo' a man adonj. 7 Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naā le'ej, ne quinavij nu' naā le'ej, qui'yaj coj tanj yo', ne ne cavij sa' naā yo' a man adonj. 8 Ne yo'ó ta'aj 'núú trigó yo' ro', cayuu rihaan yo'óo sa', ne naā yo' ro', cachij sa' a. Dan me se rihaan ta'aj yo'óo sa' yo' icō chī' ya 'núú cavii, qui'yaj 'o 'o 'núú le'ej nii quinij rihaan yo'óo sa' yo', ne rihaan yo'ó ta'aj yo'óo sa' yo' va'nuj chihāā ya 'núú cavii, qui'yaj 'o 'o 'núú le'ej nii quinij rihaan yo'óo sa' yo', ne rihaan yo'ó ta'aj yo'óo sa' yo' cientó ya 'núú trigó cavii, qui'yaj 'o 'o 'núú le'ej nii cayuu rihaan yo'óo sa' yo' uún nanj adonj —taj Jesucristó, 9 gaa ne cataj uún so'— Sese taj yu'uj xréé soj, ne cunō soj nanā nihánj ei. —Veé danj quisij cuentó yo' cuentó nanó Jesucristó a.

**Nanā nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvij a**

10 Gaa ne gaa guun yanij so' rihaan nij yuvij, ne nij sif chéé gā so' dō', chuvij nij apóstol cune' so' man nata' rihaan yuvij che'é so' dō', xná'anj nij so' man so' che'é nij cuentó nanó so' rihaan nij yuvij a.

11 Gaa ne cataj Jesucristó rihaan nij so' a:

—Xā' soj, tzaj ne tihāā Diose nanā rihaan soj daj qui'yaj Diose gaa guun chij Diose rihaan chumij nihánj adonj. Dan me se nanā ne ne'en cunudānj yuvij me nanā yo' nanā tihāā Diose rihaan soj adonj. Ne rihaan yo'óo nij yuvij man rihaan chumij me se inanj cuentó che'é nij rasuun nanōj rihaan nij yuvij, 12 gaa ne ni'yaj nij so' dō', nanō xrej nij so' dō', tzaj ne se quene'en nij so' dō', se xcāj nij so' cuentá dō', a ma'. 'Q se na'vej uxrá rá nij so' canicaj nimán nij so' ne güej cacun' xráá nij so' a man adonj —taj Jesucristó rihaan nij so' a.

**Nanā nihánj taj xna'anj me taj cuentó che'é 'núú trigó yo' a**

13 Gaa ne cataj uún Jesucristó rihaan nij so' a:

—Ne ne ne'en soj me taj cuentó nihánj cuentó che'é 'núú trigó tix'nuu yo'q so' na'. Ne asā' ca'vee xcāj soj cuentá che'é yo'óo nij cuentó, rá soj gā.

14 "Dan me se sif tix'nuu 'núú trigó ro', so' me sif nata' se-nanā Diose rihaan yuvij adonj. 15 Ne ase vaa 'núú cayuu rá chrej qui'yaj sif tix'nuu 'núú ro', danj vaa ta'aj nij sif uno se-nanā Diose, ne dan me se uno nij so' doj tzin', tzaj ne nu' cuno nij so', ne nu' 'na' sif chree sif cu'naj Satanás, ne a'néj sif chree se-nanā Diose nanā cayuu rque nimán nij so' a.

16 "Ne vaa ta'aj 'núú trigó cayuu rihaan yuvej uún, ne 'núú trigó yo' ro', ase vaa nij sif uno se-nanā Diose vaa yo', ne cuaj uun niha' rá nij so' canocō' nij so' nanā yo' a. 17 Tzaj ne ataa xcāj sa' nij so' cuentá, ne gaa uun che'e yuvij 'yaj yuvij sayuun man nij so' che'é nanā nocō' nij so', ne cuaj nu' uun na'aj nij so', ne tanáj nij so' nanā yo' cuaj nanj adonj.

18 "Ne ase vaa nij 'núú trigó cayuu sca'núj coj tanj ro', danj vaa yo'ó ta'aj nij yuvij uún, ne dan me se uno nij so' se-nanā Diose, 19 tzaj ne nanó ndo'o rá nij so' che'é se man rihaan chumij nihánj, ne me ndo'o rá nij so' qui'yaj canaán nij so' sa'anj, don tihā' yu'unj nij so' man ma'ān nij so' che'é sa'anj, ne me ma'ān yo'óo nij rasuun nano' ndo'o nij so', ne che'é dan tanáj xcō nij so' se-nanā Diose, ne ne 'yaj nij so' se sa' a ma'.

20 "Ne 'núú trigó cayuu rihaan yo'óo sa' ro', ase vaa sif uno se-nanā Diose vaa yo', ne uun niha' rá so' uno so' nanā yo', ne nuu sa' nimán so' rihaan Diose a. Ne sa' doj tzin' 'yaj ta'aj nij so', ne sa' doj 'yaj yo'ó ta'aj nij so', ne sa' uxrá doj 'yaj yo'ó ta'aj nij so' uún nanj adonj. —Veé danj quisij nanā ca'mii Jesucristó che'é cuentó yo' a.

**Nihánj me cuentó nanó Jesucristó che'é aga' ya'an a**

21 Gaa ne cataj Jesucristó rihaan nij so' a:

—Ne gaa rmi' me se achrón nii ya'an raā aga' ya'an, ne axrīj yuve nii aga' ya'an yo' rque 'o chrúún dō', rque yuvéé dō', rá soj na'. Taj ma'. Sese rmi', ne uta' nii aga' yo' rej xtā', gaa ne cuchuguun sa' ndo'o adonj. 22 Dan me se a 'ó rasuun caxrīj yuve yuvij se qui'nij yuve ma'. Ya nurihanj yo' vaa güii, ne cunudānj yuvij quene'en, vaa güii adonj. Ne cunudānj rasuun 'yaj yuve yuvij quene'en daj a yuvij vaa güii ei. 23 Sese taj yu'uj xréé soj, ne cunō soj nanā nihánj ei —taj Jesucristó rihaan nij so', 24 gaa ne cataj uún so' se vaa— Nuchruj raā soj nanā ca'mij nihánj ei. Sese qui'yaj suun uxrá soj nari' soj nanā nihánj, ne rque ndo'o Diose doj nanā nari' uún soj nanj adonj. 25 'Q se sif nari' nanā ro', doj a nari' uún so', qui'yaj Diose nanj adonj. Ne sif na'vej rá nari' sa' nanā ro', tanānj ca'neē Diose doj nij nanā nari' so' man so', ne quināj uun so' nanj adonj —taj Jesucristó rihaan nij so' a.

### Nihánj me cuentó nanó Jesucristó che'é naa a

<sup>26</sup> Gaa ne cataj Jesucristó:

—Dan me se ase vaa achij naa cuchruj 'o snó'o ro', danj gaa guun chij Diosē rihaan chumiij nihánj, ne snó'o yo' ro', cunō so' 'núu rihaan yo'óó, <sup>27</sup> ne síj cunō so', ne otoj so' rej nii, ne naxagaa so', ne danj 'yaj so' daj a güii, ne dan me se xra' naa le'ej, ne achij naa le'ej, ne ne ne'en uxrá snó'o me che'é me xra' naa ne achij naa a ma'. <sup>28</sup> Achij ma'an naa rihaan yo'óó, ne dan me se asino yaan xra' naa, gaa ne anó tihaj, gaa ne uun xij yumí naa a. <sup>29</sup> Gaa ne gaa quisíj tan' xráa naa, ne a'née snó'o man nij síj quirii naa nanj á. 'O se quisíj tió quirii nii naa nanj adonj —taj Jesucristó a.

### Nihánj me cuentó nanó Jesucristó che'é caân cuêj mostazá xlá a

<sup>30</sup> Gaa ne cataj uún Jesucristó:

—Daj gaa guun chij Diosē rihaan chumiij nihánj, rá soj gaa. <sup>31</sup> Dan me se ase vaa achij caân cuêj mostazá xlá ro', danj gaa guun chij Diosē rihaan chumiij nihánj adonj. Dan me se axríj nii caân yo' rihaan yo'óó, ne caân yo' me se caân le'ej nii doj vaa caân yo' rihaan cunudanj nij caân man rihaan chumiij nihánj, <sup>32</sup> tzaj ne dan me se gaa axríj nii caân yo' rihaan yo'óó, ne achij caân yo', ne xij doj uun yo' rihaan cunudanj nij coj man tacaan, ne xcaan ndo'o vaa ra'a cuêj yo', ne a'vee 'yaj nij xtâj vaj rej xtâ' saca' nij xo' raá cuêj yo', ne aráan cachun' xráa nij xo', 'yaj cuêj mostazá xlá yo' nanj adonj —taj Jesucristó a.

### Nana nihánj taj xna'anj se vaa inanj cuentó nanó Jesucristó rihaan nij yuvij a

<sup>33</sup> Dan me se que'ee cuentó vaa danj cuentó che'é nij rasuun nanó Jesucristó rihaan nij yuvij, nata' so' se-nana Diosē rihaan nij yuvij, ndaa vaa guun nucaj nij yuvij cunō nij yuvij a. <sup>34</sup> Taj vaj yo'ó nana nanó Jesucristó rihaan nij yuvij a ma'. Maan inanj cuentó che'é nij rasuun nanó Jesucristó rihaan nij so', tzaj ne rihaan ma'an nij síj tucu'yón se-nana so' me se ataj xna'anj so' che'é nij cuentó yo' rihaan nij so' a.

### Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a

<sup>35</sup> Gaa ne rej ti'nuu güii yo' me se cataj Jesucristó rihaan nij síj tucu'yón se-nana so', ne:

—Ca'anj ní' ndaa yo'ó níchrej tu'va na lacuaná á —taj so' rihaan nij so' a.

<sup>36</sup> Gaa ne nij síj tucu'yón se-nana Jesucristó me se ca'anj rihoo nuu nij so' gaa Jesucristó, qui'yaj nij so', ne quináj nij yuvij tu'va na lacuaná, ne vaa doj nij rihoo canoco' xcó nij so' a. <sup>37</sup> Gaa ne cavii uxrá nana yuvaa rihaan na lacuaná, ne quinaan ndo'o rihaan na, ne catúj uxrá na rque rihoo yo', ne daj doj caraa nu' rque rihoo, qui'yaj na a. <sup>38</sup> Ne Jesucristó me se naj so' rej sihuu rihoo, ne 'nij raá so' camá, otoj so' a. Gaa ne narii nij síj

tucu'yón se-nana Jesucristó nej rihaan Jesucristó, ne cataj nij so':

—Nihánj me se daj doj cavii ní', maestro, ne me che'é ne rihuun rá so' gaa —taj nij so' rihaan Jesucristó a.

<sup>39</sup> Gaa ne canicun' caya Jesucristó, ne caxríj yuvaa so' man nana, ne cataj so' rihaan na lacuaná:

—Gaa díj rihaan so', ne se quinaán so' ma' —taj so', gaa ne nu' canicun' nana, ne canicun' díj rihaan na lacuaná yo', qui'yaj Jesucristó nanj adonj.

<sup>40</sup> Gaa ne cataj Jesucristó rihaan nij síj tucu'yón se-nana so' a:

—Me che'é chu'vi' ndo'o nimán soj gaa. Ataa cuchuman sa' rá soj ni'yaj soj manj na' —taj so' rihaan nij so' a.

<sup>41</sup> Gaa ne cuchu'vi' ndo'o nij so', ne xna'anj nij so' man tuvi' nij so', cataj nij so':

—Daj sij me síj nihánj gaa. Ndaa nana do', ndaa na do', uno a'mii so' ason —taj nij so' rihaan tuvi' nij so' a.

### Nana nihánj taj xna'anj se vaa quirii Jesucristó man nij nana chree nimán 'o snó'o a

**5** Gaa ne ca'anj nij so' ndaa níchrej tu'va na lacuaná yo', ndaa rej ne nij síj man chuman' Gadara a. <sup>2</sup> Ne rej yo' me se taj yu'uj yuvej rej achin' nii xngaa a. Dan me se nanij Jesucristó gaa nij síj tucu'yón se-nana so' rque rihoo, ne nu' curihanj 'o snó'o nuu nana chree nimán rque yu'uj yuvej yo', ne cuchi' so' rihaan Jesucristó a.

<sup>3</sup> Ne síj nuu nana chree nimán me se cu'yón so' cayáan so' rque yu'uj yuvej yo', ne ne ca'vee numij nij yuvij man rej yo' aga' ne' man so' a. <sup>4</sup> 'O se aj uun que'ee ndo'o numij nij yuvij ne' do', aga' ne' do', man so', tzaj ne cuxra' so' aga' ne', ne ca'ne' so' ne' do', ne a 'o yuvij taj quisíj naqui'yaj camanj man so' a. <sup>5</sup> Ne niganj me se nuvij nigan' cayáan so' rque nij yu'uj yuvej do', vaj so' xráa quij do', ne caguáj ndo'o so', ne nicaj so' yahij sihaa ca'ne' ndo'o so' nee man ma'an so' uún a.

<sup>6</sup> Dan me se gaa quene'en so' man Jesucristó se vaa gan' uxrá vaj Jesucristó, ne cunanj so' ndaa rej vaj Jesucristó, ne na'víj so' rihaan Jesucristó, <sup>7</sup> ne nucaj ndo'o caguáj so' rihaan Jesucristó, ne cataj so':

—Aj ne'én 'unj se vaa ta'nij Diosē síj sa' ndo'o mé so', Jesús. Me che'é 'ná' so' rej né 'unj gaa. Cataj xna'anj sa' 'unj rihaan so' ni'yaj Diosē se vaa se qui'yáa so' sayuun manj ma' —taj síj nuu nana chree nimán rihaan Jesucristó a.

<sup>8</sup> Danj ca'mii so' rihaan Jesucristó che'é se aj cataj Jesucristó rihaan so' se vaa: "Rihaan so' nana chree nuu nimán síj nihánj cataj xna'anj 'unj se vaa curihanj so' nimán síj nihánj á", taj Jesucristó, tzaj ne ne guun rá nana chree curihanj so' ma'.

<sup>9</sup> Gaa ne xna'anj Jesucristó man nana chree, ne cataj so':

—Daj cu'naj so' gaa —taj Jesucristó rihaan so' a. Ne:

—X'ne' nocoŋo ndo'o me núj, ne que'e'e ndo'o núj á —taj nana chree rihaan Jesucristó, <sup>10</sup> ne cachíin ni'yaj nij nana chree yo' rihaan Jesucristó se vaa se ca'née Jesucristó man nij nana chree ndaa yo'ó rej yanij ma'.

<sup>11</sup> Dan me se rej tacaan rej nicun' nij so' me se chée 'o x'ne' nocoŋo xcáá, chá nij xo' coj, <sup>12</sup> gaa ne cachíin ni'yaj nij nana chree rihaan Jesucristó, cataj nij so':

—Ca'nej so' man núj catuyú núj nimán nij xcáá á —taj nij nana chree rihaan Jesucristó a.

<sup>13</sup> Gaa ne ca'vej rá Jesucristó qui'yaj nij so' danj, gaa ne curihanj nij so' nimán snó'o yo', gaa ne catúj nij so' nimán nij xcáá, ne dan me se ruvaá uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree yo' nimán nij xcáá yo', gaa ne cunánj ndo'o nij xo', ca'anj nij xo', ne veé danj vaj nij xo', ne quiniij nij xo' rque na, ne canó xráá nij xo' nanj adonj. Ne dan me se vij míj xcáá me nij xcáá canó xráá rque na a.

<sup>14</sup> "Ne nij síf tumé nij xcáá ro', cunánj nij so' ca'anj cataj xna'anj nij so' rihaan nij yuvii man chuman' do', rihaan nij yuvii man tacaan do' a. Gaa ne dan me se ca'na' ni'yaj nij yuvii se vaa guun, gaa ne ca'na' nij so' rihaan Jesucristó, <sup>15</sup> gaa ne quene'en nij so' man síf curihanj nana chree nimán a. Aj nanuú so' sajan' so', ne dínj ne so' rihaan Jesucristó a. Ne aj ti'inj se snúú so', ne nuu sa' so' a. Gaa ne cuchu'vi' ndo'o nij yuvii se vaa qui'yaj Jesucristó, <sup>16</sup> gaa ne cataj xna'anj nij síf quene'en yo' rihaan nij yuvii daj qui'yaj Jesucristó che'é síf nuu nana chree nimán do', ga nij xcáá do', <sup>17</sup> gaa ne guun che'e nij yuvii cachíin ni'yaj nij yuvii rihaan Jesucristó se vaa curihanj so' rej yanj nij so' ca'anj so' rej yanij a.

<sup>18</sup> "Che'é dan cavii Jesucristó rque rihoo chée rihaan na, gaa ne dan me se cachíin ni'yaj síf curihanj nana chree nimán rihaan Jesucristó se vaa ca'vej rá Jesucristó ca'anj so' ga Jesucristó a. <sup>19</sup> Tzaj ne ne ca'vej rá Jesucristó ca'anj so' ga Jesucristó a. Tananj cataj Jesucristó rihaan so' se vaa:

—Cavii so' nán' so' ve' tucua' so' rej yanj nij tuví' so', ne cataj xna'anj so' rihaan nij so' nu' se vaa qui'yaj síf 'nij ra'a man ní' che'é so', ne cataj so' se vaa cunuu 'ee rá so' ni'yaj so' mán so' á —taj Jesucristó rihaan síf curihanj nana chree nimán a.

<sup>20</sup> Gaa ne ca'anj síf curihanj nana chree nimán, ne guun che'e so' ca'mii natáj so' rihaan nij yuvii man rej cu'naj Chi' Chuman', ne cataj xna'anj so' nu' se vaa qui'yaj Jesucristó che'é so' a. Ne ca'anj ndo'o rá cunudanj nij yuvii cuno se-nana so' a.

**Nana nihánj taj xna'anj che'é chalá cunii do', che'é chana' hij do', nahuun sa', qui'yaj Jesucristó a**

<sup>21</sup> Dan me se nuu Jesucristó rque rihoo chée rihaan na, ne ca'anj uún so' ndaa nichrej tu'va na lacuaná, gaa ne cunuu chre' ndo'o yuvii rihaan so', ne vaj so' tu'va na lacuaná a. <sup>22</sup> Gaa ne dan me se ca'na' yo' o' nij síf 'nij ra'a ve' tucuyón nij yuvii israelitá se-tucuanj Moisés, ne Jairo cu'naj so' a. Dan me se quene'en síf cu'naj Jairo man Jesucristó, gaa ne canicun' ruj so' ri-

haan Jesucristó, <sup>23</sup> gaa ne cachíin ni'yaj uxrá so' rihaan Jesucristó, ne dan me se cataj so' se vaa:

—Ta'nij chalá cunii ro', ran' ndo'o no', ne daj doj cavii no', ne me rá 'unj cuchí' so' ve' tucua', ne cuta' so' ra'á so' raá no', ne nahuun sa' no', ne se cavi' no', qui'yáá so' ma' —taj síf cu'naj Jairo rihaan Jesucristó a.

<sup>24</sup> Gaa ne ca'anj Jesucristó ga so', ne canoco' uxrá yuvii xcó roj so', ne ndaa raan ma'an chrej vaj yuvii ga nij so' a.

<sup>25</sup> Dan me se sca'núj nij so' vaj 'o chana' ran' ndo'o, ne quisij chuvij ya yo' xra' ton man no' a. <sup>26</sup> Ne aj quiran' ndo'o no' sayuun, qui'yaj que'e'e nij doctor, ne aj cutun' no' cunudanj sa'anj vaa rihaan no', tzaj ne taj se qui'yá' a doj nahuun sa' no' qui'yaj nij doctor yo' a ma'. Tananj doj a ran' no' nanj adonj. <sup>27</sup> Gaa ne aj cuchí' nana rihaan no' che'é nu' se vaa qui'yaj Jesucristó che'é nij yuvii, ne che'é dan ca'na' no' sca'núj nij yuvii rej xcó Jesucristó, gaa ne canó ra'a no' doj tu'va sajan' so' a. <sup>28</sup> 'O se guun rá no' se vaa: "Sese cano' ra'aj sajan' Jesucristó, ne nahuun sa' 'unj nanj adonj", guun rá no' a. <sup>29</sup> Dan me se síf canó ra'a no' sajan' Jesucristó, gaa ne nu' canicun' ton man no' cuaj a. Ne quene'en no' se vaa nahuun sa' no', qui'yaj Jesucristó a. <sup>30</sup> Dan me se nu' canó ra'a no' sajan' Jesucristó, ne nu' xcaj Jesucristó cuentá se vaa nahuun yuvii qui'yaj so' a. Che'é dan canicaj so', ne xna'anj so', cataj so':

—Me síf canó ra'a sajan' 'unj ga —taj so' a.

<sup>31</sup> Gaa ne cataj nij síf tucuyón se-nana Jesucristó se vaa:

—Ne'én so' se vaa raan ndo'o vaj nij yuvii ga so', ne me che'é xna'anj so' me síf canó ra'a sajan' so' ga —taj nij so', xna'anj nij so' man Jesucristó a.

<sup>32</sup> Gaa ne canicaj Jesucristó, ne quene'en so' man chana' canó ra'a tu'va sajan' so' a. <sup>33</sup> Ne dan me se cuchu'vi' ndo'o no' ne ndaa ri'ij man no', ne aj ne'en no' se vaa nahuun sa' no' a. Gaa ne ca'anj no', ne canicun' ruj no' rihaan Jesucristó, ne cataj ya no' rihaan Jesucristó nu' se vaa qui'yaj no' a.

<sup>34</sup> Gaa ne cataj Jesucristó rihaan no' a:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á. Gaa nucuáá so', ne aj x'néj nu' chi'ii yo' xráá so' nanj ei —taj Jesucristó rihaan chana' yo' a.

<sup>35</sup> Ataa navij ca'mii Jesucristó, ne ca'na' 'o síf cavii tucua' síf cu'naj Jairo, ne cataj so' rihaan Jairo a:

—Aj cavi' ta'níí so', ne taj che'é caraa chrúú so' rihaan maestró a ma' —taj síf 'na' cataj xna'anj rihaan Jairo a.

<sup>36</sup> Dan me se cuno Jesucristó nana ca'mii síf ca'na', gaa ne cataj so' rihaan síf cu'naj Jairo a:

—Se cuchu'vi' so' ma'. Maan se cuchuman ya rá so' ni'yaj so' manj á —taj Jesucristó rihaan so' a.

<sup>37</sup> Dan me se ne ca'vej rá Jesucristó canoco' a doj nij yuvii man so', ne maan Pedró do', Jacobo do', Juan tinúú Jacobo do', ca'vej so' canoco' man so' a. <sup>38</sup> Gaa ne cuchí' so' rihaan ve' tucua' Jairo, ne quene'en Jesucristó se vaa ta'vee uxrá nij yuvii man rá ve' a. <sup>39</sup> Gaa ne catúj Jesucristó rá ve', ne cataj so' rihaan nij yuvii a:

—Me che'é ta'vee ndo'o nij soj gā. Ne cavi' chalā cunii nihánj ma'. Maan se otoj yun no' nanj á —taj Jesucristó rihaan nij so' a.

<sup>40</sup> Gāa ne ca'nga' nacoo nij yuvi' ni'yaj nij yuvi' man Jesucristó a. Tzaj ne quirii Jesucristó man cunudanj nij yuvi' xe', gāa ne nicaj so' man rej chalā cunii do', man nii chalā cunii do', man va'nuj nij sí ca'na' gā so' do', ne catúj so' rá cuartó naj chalā cunii yo' a.

<sup>41</sup> Gāa ne quita'aa Jesucristó ra'a chalā cunii, ne cataj so' rihaan chalā cunii yo' a:

—Talita, cumi —taj so' rihaan no' xna'ánj a'mii ma'an so' a. Ne se-nānā so' taj: "Naxagaa so', chalā cunii", taj nana ca'mii Jesucristó rihaan chalā cunii yo' a.

<sup>42</sup> Nu' ca'mii Jesucristó nana dan, ne nu' naxagaa chalā cunii yo', chéé no' cuaj a. Nahuun i'na' no' a.

Ne chalā cunii vaj chuvij yo' me no' a.

Ne nij sí quene'en, tzaj ne ca'anj ndo'o rá nij so' a.

<sup>43</sup> Gāa ne ca'ne' uxrá Jesucristó suun rihaan nij so' a:

—A 'ó yuvi' se cataj xna'anj nij soj rihaan daj qui'yáj che'é chalā cunii ma' —taj Jesucristó rihaan nij so', ne cataj so' se vaa rque nii doj se chá chá no' a.

**Nana nihánj taj xna'anj se vaa ne ca'vej rá nij sí man chiháán Jesucristó chuman' cu'naj Nazaret cunō nij so' nana ca'mii Jesucristó a**

**6** Gāa ne curihanj Jesucristó ve' yo', gāa ne namán so' rej chiháán so', ne canoco' nij sí tucu'yón se-nānā so' man so' a. <sup>2</sup> Ne güii naránj rá nij yuvi' israelitá me se ca'anj so' ve' tucu'yón nij sí man chiháán so' se-tucuanj Moisés, ne guun che'e so' tucu'yón so' man nij sí man rá ve' yo' a. Ne ca'anj ndo'o rá nij yuvi' gāa cunō nij yuvi' se-nānā Jesucristó, gāa ne cataj nij yuvi':

—Me rej nari' sí nihánj nana cyu avii raá sí nihánj gā. Me rej nari' so' suun sa' 'yaj so' gā. <sup>3</sup> Nuveé sij acó chruun sí ne chiháán ní' me so' na'. Ne ta'níi chana cu'naj Mariá me so' á. Ne tinúú sí cu'naj Jacobo do', sí cu'naj José do', sí cu'naj Judas do', sí cu'naj Simón do', me so' á. Ne nij ra'vij so' me chana ne chiháán ní' á —taj nij sí man chiháán Jesucristó rihaan tuvi' nij so', ne guun nacoo rá nij so' ni'yaj nij so' man Jesucristó a.

<sup>4</sup> Gāa ne cataj Jesucristó rihaan nij so' a:

—Me rej ma'an vaj 'o sí nata' se-nānā Diose, ne aráj cochroj nij yuvi' rihaan so', tzaj ne nij yuvi' man chiháán so' do', nij tuvi' so' do', nij sí yanj tucua' so' do', na'vej rá caraa cochroj rihaan so' ma' —taj Jesucristó rihaan nij sí man chiháán so' chuman' cu'naj Nazaret yo' a.

<sup>5</sup> Ne ne guun nucuaj Jesucristó qui'yaj so' a doj suun sa' nocoo chiháán so', maan se doj sí ran' me se cuta' so' ra'a so' raá ne nahuun sa' nij so', qui'yaj so' a. <sup>6</sup> Ne caráya'anj ndo'o so' se vaa ne cuchuman rá nij sí man chiháán so' ni'yaj nij so' man so' a. Ne cavii so' ca'anj so' nij chuman' naj nichrun', tucu'yón so' se-nānā so' man nij yuvi' a.

**Nana nihánj taj xna'anj se vaa ca'née Jesucristó man chuvij nij sí tucu'yón se-nānā so' ca'anj ca'mii natáj nij so' a**

<sup>7</sup> Gāa ne canacúun Jesucristó man chuvij nij sí tucu'yón se-nānā so', ne cuchi' nij so' rihaan so', gāa ne guun che'e so' ca'née so' man vij vij nij so', ne go' so' se nucuaj man nij so', gāa ne ca'vee qui'yaj canaán nij so' rihaan nij nana chree a. <sup>8</sup> Ne ca'ne' so' suun rihaan nij so' se vaa a doj rasuun se nicaj nij so' gāa vaj nij so' chrej; maan orún' chruun garroté me se ca'vee nicaj nij so', tzaj ne rachruún do', nanj do', se nicaj nij so', ne se ca'vee cunuú sa'anj rque se-caxran' nij so', <sup>9</sup> tzaj ne qui'nij tacóo nij so' canj, ne orún' yatzíj quitaj xráa nij so', taj Jesucristó rihaan nij so', <sup>10</sup> ne:

—Me ma'an ve' caran' soj, ne yo'q cayáán soj ve' yo' ndaa se curihanj soj chuman' yo' á. <sup>11</sup> Ne me rej ma'an se ca'mii sa' nij yuvi' gā soj do', se ca'vej rá nij yuvi' cunō nij yuvi' nana a'mii soj do', ne asa' cavii soj rej yo', ne nacunan' soj tacóo soj tucuayuu soj yo'óo tachruu canó tacóo soj, ne ndaa dan, gāa ne xcax nij sí man rej yo' cuentá se vaa tumé ndo'o nij so' cacun' se vaa ne ca'vej rá nij so' cunō nij so' se-nānā soj adonj. Cataj xna'anj yá yá 'unj rihaan soj cuano se vaa doj a quiran' nij so' cacun' rihaan nij yuvi' man chuman' Sodoma gā chuman' Gomorra nanj adonj —taj Jesucristó rihaan chuvij nij so' a.

<sup>12</sup> Gāa ne ca'anj nij so', gāa ne ca'mii natáj nij so' rihaan nij yuvi' se vaa canicaj rá nij yuvi' canoco' nij yuvi' chrej sa', <sup>13</sup> ne quirii ndo'o nij so' man nij nana chree nimán nij yuvi', ne cutáj ndo'o nij so' casté raá nij sí ran', ne nahuun sa' nij sí ran', qui'yaj nij so' a.

**Nana nihánj taj xna'anj se vaa cavi' Juan sí cuta' ne man yuvi', qui'yaj sí nicaj suun cu'naj Herodes a**

<sup>14</sup> Dan me se cuchi' nana rihaan sí nicaj suun rey cu'naj Herodes che'é nu' se vaa qui'yaj nij sí tucu'yón se-nānā Jesucristó, ne nu' cachra' cha'nuu ndo'o se-nānā Jesucristó a. Gāa ne cataj sí cu'naj Herodes se vaa:

—Cunuu i'na' ya uún sí cu'naj Juan, raj á. Ése sí cu'naj Juan me sí guun nucuaj qui'yaj nij suun sa' nocoo yo' nanj adonj —taj sí cu'naj Herodes a.

<sup>15</sup> Ne yo'ó ta'aj nij yuvi' me se cataj se vaa sí cu'naj Elías sí nata' se-nānā Diose gā naá me Jesucristó, ne yo'ó ta'aj nij yuvi' uún cataj se vaa yo'ó nij sí nata' se-nānā Diose gā naá me Jesucristó a. <sup>16</sup> Dan me se cunō sí cu'naj Herodes daj guun rá nij yuvi', gāa ne cataj so':

—Sí cu'naj Juan sí ca'ne' nij tanuu cúu yave qui'yáj ro', aj cunuu i'na' ya so' chuguanj —taj Herodes a.

<sup>17</sup> 'Q se ma'an sí cu'naj Herodes me sí ca'née man nij tanuu quita'aa nij tanuu man sí cu'naj Juan asij rque doj, ne numíj nij tanuu man sí cu'naj Juan, ne caxríj sí cu'naj Herodes taga' man sí cu'naj Juan, che'é chana cu'naj Herodías nica tinúú Herodes sí cu'naj Felipe a. 'Q se xcax sí cu'naj Herodes man chana

Herodías yo', <sup>18</sup> gaa ne cataj síi cu'naj Juan rihaan síi cu'naj Herodes se vaa:

—Ne nó xcúún so' xcaj so' man chocō so' ma' —taj Juan rihaan Herodes a.

<sup>19</sup> Che'é dan nachri' chanā cu'naj Herodías ni'yaj no' man Juan, ne guun ndo'o rá no' cavi' Juan, tzaj ne ne ca'vee ma'. <sup>20</sup> 'O se cuchu'vi' síi cu'naj Herodes ni'yaj so' man Juan, che'é se quene'en Herodes se vaa síi nicā rá síi sa' inanj nimán rihaan Diosē me Juan, ne che'é dan caráán Herodes rihaan chi'ii che'é Juan a. Dan me se gaa cuno Herodes se-nanā Juan, ne quinanó ndo'o rá so', tzaj ne guun niha' rá so' ca'mij Juan rihaan so' a.

<sup>21</sup> Dan me se quisij 'o güii ca'vee qui'yaj canaán chanā cu'naj Herodías yo', ne dan me se se-cha'anj síi cu'naj Herodes me yo', ne ca'ne' so' suun se vaa canuū se-cha'anj so', ne canacúún so' ca'na' nij síi 'yaj suun ga ma'an so' do', nij tanuu uun chij doj do', nij síi uun chij rihaan estadó Galilea do', ca'na' cha ni'yánj nij so' ga so' a. <sup>22</sup> Gaa ne catúj ta'níi chanā cu'naj Herodías rej anuū cha'anj, ne ra'ánj no', ne guun niha' uxrá rá Herodes ga nij síi ca'na' cha'anj yo' ni'yaj taran' nij so' man ta'níi Herodías a. Gaa ne cataj Herodes rihaan chanā yaan yo':

—Cuanō nihánj me se a me ma'an rasuun me rá so' cachinj so' rihanj, ne rque 'unj mán so' ei —taj so', <sup>23</sup> gaa ne cataj uún so'— Cutā' yá 'unj raā Diosē se vaa a me ma'an rasuun cachinj so' rihanj, ne rque 'unj mán so' á. Ndaa yanēj yo'óo uun chij 'unj rihaan ro', rque 'unj mán so' nanj adonj —taj Herodes rihaan chanā yaan yo' a.

<sup>24</sup> Gaa ne curihanj chanā yaan, ne xná'anj no' man nii no' chanā cu'naj Herodías, ne cataj no':

—Me se cachinj 'unj, ga nahiin —taj no' rihaan nii no' a.

Gaa ne chanā cu'naj Herodías cataj:

—Cachinj so' cúu yave síi cu'naj Juan síi cuta' ne man yuvii á —taj no' rihaan ta'níi no' chanā yaan yo' a.

<sup>25</sup> Gaa ne nu' catúj ra'yanj chanā yaan yo' rej man síi nicaj suun rey cu'naj Herodes, ne cachín ni'yaj no' rihaan so', cataj no':

—Me rá 'unj se vaa maan orá cuanō ro', ca'nej so' cúu yave síi cu'naj Juan síi cuta' ne man yuvii rque aga' rco'oo, ne rque so' rihanj cuaj á —taj no' rihaan Herodes a.

<sup>26</sup> Gaa ne nanó ndo'o rá síi nicaj suun rey cu'naj Herodes yo' che'é se aj cuta' so' raā Diosē ne aj cuno taran' nij síi yanj rihaan mesá ga so', ne che'é dan ne ca'vej rá so' tari' so' se-nanā so' se vaa se qui'yaj so' ndaa vaa taj chanā yaan yo' rihaan so' a. <sup>27</sup> Gaa ne nu' ca'née so' man síi ticavi' man síi cu'naj Juan, ne ca'ne' so' suun se vaa nicaj so' cúu yave Juan ca'na' so' a. <sup>28</sup> Gaa ne ca'anj síi ticavi' man Juan taga', ne ca'ne' so' cúu yave Juan, ne ca'née so' cúu yave Juan rque aga' rco'oo, nicaj so', ca'na' so', ne rque so' man chanā yaan, ne nago' chanā yaan yo' man nii no' a.

<sup>29</sup> Gaa ne gaa cuchu' nanā rihaan nij síi tucu'yón se-nanā Juan se vaa cavi' Juan, ne ca'na' nij so', ne

nicaj nij so' cúu man Juan, cachin' nij so' rque yu'uj yuvej a.

**Nanā nihánj taj xna'anj se vaa ca'vee quirii Jesucristó se chá 'un' mij snó'o a**

<sup>30</sup> Dan me se nij síi ca'née Jesucristó ca'anj nata' rihaan yuvii che'é so' ro', cunuu chre' nij so' ga Jesucristó, ne nata' nij so' rihaan Jesucristó che'é cunudanj nij suun sa' nocōo qui'yaj nij so' do', che'é cunudanj nij nanā tucu'yón nij so' man nij yuvii do' a. <sup>31</sup> Gaa ne cataj Jesucristó rihaan nij so' a:

—Ca'anj ní' doj rej tacaan rej taj vaj yuvii ne, gaa ne ca'vee naraan rá nij soj doj á —taj Jesucristó rihaan nij so' a.

'O se ca'na' ndo'o yuvii do', ca'anj ndo'o yuvii do', ne ne vaa ya'núj rihaan nij so' cha' nij so' a doj chraa a.

<sup>32</sup> Gaa ne cavii nij so' rque rihoo chée rihaan na, ne ca'anj orún' nij so' rej tacaan a. <sup>33</sup> Tzaj ne quene'en ndo'o nij yuvii se vaa ca'anj nij so', ne xcaj yuvii cuentá se vaa ca'anj nij so', qui'yaj nij síi quene'en, gaa ne chée tacōj nij yuvii man cunudanj nij chuman' naj rej yo', ne cunanj nij yuvii, cunuu chre' nij yuvii rej ca'anj nij tuvi' Jesucristó, ne asino nij yuvii cuchu', ne na'vij nij yuvii ca'na' Jesucristó a. <sup>34</sup> Ne nanij Jesucristó rá rihoo, ne quene'en so' se vaa aj mán uxrá yuvii, ne cunuu 'ee rá so' man nij yuvii a. 'O se ase vaa matzinj nuvi' síi tumé man vaa nij yuvii, ni'yaj Jesucristó, gaa ne guun che'e so' tucu'yón ndo'o so' se-nanā so' man nij yuvii a.

<sup>35</sup> Dan me se cachén ndo'o orá, gaa ne ca'na' nij síi tucu'yón se-nanā Jesucristó rihaan Jesucristó, gaa ne cataj nij so' se vaa:

—Rco' quij yun me nihánj, ne taj se chá cha' nij yuvii nihánj, ne cachén ndo'o orá nanj á. <sup>36</sup> Qui'yáá so' se ndo'o, ne na'nej so' chrej man nij yuvii, ca'anj nij yuvii chuman' naj nichrun' do', nij rancho naj nichrun' do', quirāan nij yuvii se chá cha' nij yuvii nanj á —taj nij síi tucu'yón se-nanā Jesucristó rihaan Jesucristó a.

<sup>37</sup> Gaa ne cataj Jesucristó rihaan nij so' a:

—Go' ma'an soj se chá cha' nij yuvii á —taj so' a.

Gaa ne cataj nij so' rihaan Jesucristó a:

—Ca'anj núj go' núj sa'anj vaa tu'vee yuvii 'yaj suun tunj yavii ne quirāan núj rachrúún, ne rque núj cha' nij yuvii, rá so' na' —taj nij so' rihaan Jesucristó a.

<sup>38</sup> Gaa ne cataj Jesucristó rihaan nij so' a:

—Me dāj rachrúún vaa rihaan soj ga. Cavi' soj, ne xcaj soj cuentá á —taj so' a.

Gaa ne ca'anj nij so' qui'yaj contá nij so' rachrúún vaa rihaan nij so', gaa ne canicaj nij so', ne cataj nij so':

—Vaa 'un' guee rachrúún ne vij guee xcuaj rihaan núj nanj á —taj nij so' rihaan Jesucristó a.

<sup>39</sup> Gaa ne ca'ne' Jesucristó suun rihaan nij yuvii se vaa ca'anj cayáán cunudanj nij yuvii rihaan coj chrin', ne ca'anj cumān x'ne' nij yuvii rihaan coj chrin', taj Jesucristó rihaan nij yuvii a. <sup>40</sup> Gaa ne naquiyaj x'ne' nij yuvii man nij yuvii, ne cayáán nij yuvii rihaan coj chrin', ne dan me se cientó yuvii do', vij chihāa chi' yuvii do', me 'o 'o x'ne' nij yuvii a.

<sup>41</sup> Gaa ne quita'aa Jesucristó 'un' nij rachrúun ne vij roj xcuaj, gaa ne ni'yaj so' rej xta', ne nago' so' gracia rihaan Diose, gaa ne cuxra' ta'aj so' man rachrúun yo', ne caxrij so' ston nij sí tucu'yón se-nana so', che'é rej caxrij nij so' ston nij yuvij a. Gaa ne cuxra' ta'aj so' nee xcuaj cha cunudanj nij yuvij a. <sup>42</sup> Gaa ne chá taran' nij yuvij, ne caraa rque cunudanj nij so', <sup>43</sup> ne ndaa quináj ndo'o se chá, qui'yaj nij yuvij a. Gaa ne naqui'yaj chre' nii se vaa quináj tu'va yuvij, ne caraa yo'ó chuvij ya scaa, ne ta'aj rachrúun do', ta'aj nee xcuaj do', me se chá naqui'yaj chre' nii a. <sup>44</sup> Ne nij snó'o rque Jesucristó chraa me se 'un' mij snó'o me nij so' a.

#### Nana nihánj taj xna'anj se vaa cachéé Jesucristó rihaan na a

<sup>45</sup> Gaa ne ra'yanj ca'ne' Jesucristó suun rihaan nij sí tucu'yón se-nana so' se vaa cavij nij so' rihoo chéé rihaan na ca'anj nij so' rej xco na lacuaná yo' ndaa chuman' cu'naj Betsaida, quitaj yaan nij so' rihaan Jesucristó, ne dan me se ma'an Jesucristó na'nej chrej man nij yuvij, taj Jesucristó rihaan nij sí tucu'yón se-nana so' a. <sup>46</sup> Dan me se ca'anj nij so', ne cataj Jesucristó rihaan nij yuvij se vaa ca'vee ca'anj nij yuvij a. Gaa ne cavij so' raaj quij, ne cachíin ni'yaj so' rihaan Diose a.

<sup>47</sup> Dan me se daj doj cata' güii raaj quij, ne vaj rihoo tanuy rihaan na lacuaná, ne orún' Jesucristó me sí nicun' rihaan yo'ó a. <sup>48</sup> Ne quene'en so' man nij sí tucu'yón se-nana so' se vaa güéj ndo'o rihoo yo' rihaan na qui'yaj nana, che'é se go' nana rej rihaan rihoo yo' a. Dan me se yan' si'nu' ca'anj Jesucristó rej vaj nij so', chéé tacqj uun so' rihaan na yo', vaj so' nanj adonj. Ne guun rá so' cachén so' rej x'nuj nij so' a. <sup>49</sup> Ne quene'en nij sí tucu'yón se-nana so' man so' se vaa chéé uun so' rihaan na, ne guun rá nij so' se vaa ta'naj me so', ne che'é dan caguáj ndo'o nij so' a. <sup>50</sup> 'Q se quene'en cunudanj nij so' man so', ne cuchu'vi' ndo'o nimán nij so' a. Veé dan, ne nu' cataj Jesucristó rihaan nij so' a:

—Naqui'yaj nucuaj soj nimán soj ei. 'U'nj 'na' ei. Se cuchu'vi' soj ma' —taj so' rihaan nij so' a.

<sup>51</sup> Gaa ne catúj so' rque rihoo rej nuu nij sí tucu'yón se-nana so', gaa ne canicun' nana yo', ne ca'anj ndo'o rá nij so' a. <sup>52</sup> 'Q se ne xcaj sa' nij so' cuentá che'é se nucuaj nicaj Jesucristó gaa cuxra' ta'aj Jesucristó rachrúun chá nij yuvij a. Maan se nichraj ndo'o nimán nij so' a.

#### Nana nihánj taj xna'anj se vaa nari' nucuaj nij sí ran' man rej cu'naj Genesaret, qui'yaj Jesucristó a

<sup>53</sup> Gaa ne cuchi' nij so' tu'va na lacuaná rej cu'naj Genesaret, ne numij nij so' rihoo tu'va na lacuaná a. <sup>54</sup> Gaa ne nanij nij so' rá rihoo, ne nu' cunuu yaan nij sí man rej yo' man Jesucristó, <sup>55</sup> ne yoo ca'anj cunudanj nij sí yanj nu' anicaj, ne guun che'e nij so' cuchruj nij so' tuvi' nij so' sí ran' rihaan yuvéé, ne quitáá chihá nij so' nij sí ran' yo', vaj nij so' me rej ma'an vaj Jesucristó a. <sup>56</sup> Ne me ma'an chuman' ra'a do', chuman' nocoo

do', rancho do', catúj Jesucristó me se cuchruj nij yuvij man nij sí ran' rihaan yu'vee, ne cachíin ni'yaj uxrá nij yuvij rihaan Jesucristó se vaa ca'vej rá Jesucristó cano ra'a nij so' doj tu'va sagan' so' a. Ne nu' nij sí canó ra'a doj man so' ro', nahuun sa' cunudanj nij so' cuaj nanj adonj.

#### Nana nihánj taj xna'anj me che'é ne na'ya' nij sí tucu'yón se-nana Jesucristó gaa chá nij so' chraa a

**7** Gaa ne quinichrun' sí fariseo do', quinichrun' sí naqui'yaj cuu se-tucuaj Moisés do', rihaan Jesucristó, ne sí cavij chuman' Jerusalén me nij so' a. <sup>2</sup> Ne quene'en nij so' se vaa gaa chá nij sí tucu'yón se-nana Jesucristó chraa, ne ne na'ya' nij so', ne che'é dan ne naruvij ra'a nij sí tucu'yón se-nana Jesucristó ni'yaj Diose, rá nij sí fariseo do', nij sí naqui'yaj cuu se-tucuaj Moisés do' a. <sup>3</sup> 'Q se xa' nij sí fariseo ga cunudanj yo'ó nij sí israelitá, tzaj ne a doj ne chá nij so' chraa sese ataa na'ya' nij so' ma'. Danj 'yaj nij so', che'é se nocq' nij so' tucuáan cuchruj nij sí chij cayáan gaa naá a. <sup>4</sup> Ne gaa 'na' nij so' yu'vee, ne ane nij so', ne sese ataa cané nij so', ne ne chá nij so' chraa a ma'. Ne vaa uxrá doj tucuáan nicaj nij so', ne ndaa vaa tucuáan che'é tazá do', che'é xruj do', che'é aga' do', daj qui'yaj nij so' gaa na'nu' nij so' man nij rasuyun vaa nacaj do' a.

<sup>5</sup> Gaa ne xna'anj nij sí fariseo ga nij sí naqui'yaj cuu se-tucuaj Moisés man Jesucristó, ne cataj nij so', ne:

—Nij sí tucu'yón se-nana so' me se me che'é ne nocq' nij so' tucuáan cuchruj nij sí chij cayáan gaa naá, ne nihánj me se chá nij so' chraa, ne ne naruvij ra'a nij so' ni'yaj Diose a ma' —taj nij so' rihaan Jesucristó a.

<sup>6</sup> Gaa ne cataj Jesucristó rihaan nij so' a:

—Cunaj uxrá vaa nana nata' sí cu'naj Isaías gaa naá gaa ca'mii so' che'é nij soj sij nucui' rá, ne dan me se ca'mii so' se-nana Diose, ne cataj so' se vaa: "Yuvij nihánj me se gan' uxrá nicun' nimán nij so' ga 'unj nanj adonj. <sup>7</sup> Na'vij rma'an nij so' rihanj, ne dan me se nanj se-nana nij sí man rihaan chumij tucu'yón nij so' rihaan tuvi' nij so', ne taj nij so' se vaa se-nana me se-nana nij yuvij yo' a", taj se-nana Diose nata' sí cu'naj Isaías gaa naá a. <sup>8</sup> 'Q se aj tanáj xco soj nana cataj xna'anj Diose rihaan ní', ne nanj tucuáan cuchruj yuvij uun nocq' soj nanj ei —taj Jesucristó, <sup>9</sup> ne cataj uún so' se vaa— Cunaj uxrá vaa 'yaj soj, ne uta' yanij soj nana cataj xna'anj Diose rihaan ní', che'é rej ca'vee canocq' soj se-tucuaj ma'an soj asan.

<sup>10</sup> 'Q se ca'ne' Moisés suun se vaa: "Caraj cochróo so' rihaan rée so' do', rihaan ní so' do' á". Tzaj ne: "Sí a'mii chree rihaan rej do', rihaan ní do', me se vaj so' ne nu' che'e cavij' so' á". Danj vaa cataj xna'anj Moisés rihaan ní' a. <sup>11</sup> Tzaj ne taj soj se vaa sese cataj yo' o so' rihaan rej so' do', rihaan ní so' do', se vaa aj rque so' nu' si'yaj so' rihaan Diose ne che'é dan se ca'vee racuj so' man rej so' do', man ní so' do', taj soj a. <sup>12</sup> Ne ne ca'vej soj racuj so' man rej so' do', man ní so' do' a. <sup>13</sup> Dan me se danj inanj a'mii soj gaa tucu'yón soj se-nana nij sí man gaa naá, ne axrij yuve soj man

se-nanā Diose nanj adonj —taj Jesucristó rihaan nij síí fariseo do', rihaan nij síí naqui'yaj cuu se-tucuaj Moisés rihaan yuvii do' a.

<sup>14</sup> Gaa ne canacúun uún Jesucristó man nij yuvii ca'-nanj nij yuvii rihaan so', gaa ne cataj so' rihaan nij yuvii a:

—Cunō taran' soj nanā nihánj, ne xcaj soj cuentá nedj'. <sup>15</sup> A doj rasuun atúj tu'va yuvii se ca'vee qui'yaj chi'ii man yuvii ma'. Se avii tu'va yuvii ro', 'yaj chi'ii man yuvii adonj. <sup>16</sup> Sese taj yu'uj xréé soj, ne cunō soj nanā nihánj ei —taj Jesucristó rihaan nij yuvii a.

<sup>17</sup> Dan me se corá ca'anj yanij Jesucristó ga nij síí tucuyón se-nanā so' rihaan nij yuvii, ne catúj nij so' rá ve', gaa ne xná'anj nij síí tucuyón se-nanā Jesucristó man so' me taj nanā ca'mii so' che'é se atúj tu'va yuvii gaa. <sup>18</sup> Gaa ne cataj Jesucristó rihaan nij so' a:

—Vaa soj vaa, ne ne xcaj ma'an soj do' cuentá a na'. Ne ne'en soj se vaa nu' se atúj tu'va yuvii ro', se ca'vee qui'yaj chi'ii yo' man yuvii a. <sup>19</sup> 'O se ne atúj yo' ndaa nimán yuvii ma'. Tananj achén yo' rque yuvii, ne urihanj yo' gaa re'é yuvii nanj á —taj Jesucristó, ne nanā yo' taj se vaa ca'vee chá yuvii me ma'an rasuun ne nu-veé cacun' me yo' rihaan Diose a. <sup>20</sup> Ne cataj uún so' a— Tzaj ne se urihanj tu'va yuvii ro', yo' me nanā avii nimán yuvii, ne nanā yo' me 'yaj chi'ii ndo'o man yuvii adonj. <sup>21</sup> 'O se nihánj me se chi'ii avii nimán yuvii a. Se chi'ii do', che'é yan qui'yaj ituy si'yaj tuvi' do', yan co-toj ga nicaj tuvi' do', yan ticavi' man tuvi' do', <sup>22</sup> yan guun rá nicaj si'yaj tuvi' do', yan tihaj yu'unj man tuvi' do', yan ni'yaj ndo'o man yo'ó chana do', yan guun xcoj ruvaa rá ni'yaj tuvi' do', che'é yan nachri' ni'yaj man tuvi' do', yan ca'mii xtá' do', yan qui'yaj rma'an náá guun se nij do', me nu' se avii nimán yuvii, <sup>23</sup> ne nu' yo' me se avii nimán yuvii ne 'yaj chi'ii man yuvii nanj adonj —taj Jesucristó rihaan nij síí tucuyón se-nanā so' a.

**Nanā nihánj taj xna'anj se vaa cuchumán rá 'o chana sirofenicia se vaa racuíj Jesucristó man no' a**

<sup>24</sup> Gaa ne canicun' Jesucristó, ne curihanj so' rej yo', ne ca'anj so' rej naj chuman' cu'naj Tiro a. Ne catúj so' rá 'o ve', ne ne ca'vej rá so' quene'en nij yuvii me rej vaj so' a. Tzaj ne ne ca'vee qui'nij yuve so' ma'.

<sup>25</sup> Tananj ra'yanj cuchi' nanā rihaan 'o chana se vaa yanj so', ne ta'níí chana ro', me níí nuu nanā chree nimán, ne ca'na' chana, ne canicun' ruj chana yo' rihaan Jesucristó a. <sup>26</sup> Dan me se chana sirofenicia a'mii xna'ánj griego me chana yo', ne cachíin ni'yaj no' rihaan Jesucristó se vaa quirii Jesucristó nanā chree nimán ta'níí no' a. <sup>27</sup> Gaa ne cataj Jesucristó rihaan no' a:

—Dan me se canicún' so' doj, ne chá asino nij xnii tucua, ne ne'én so' se vaa se ca'vee cata'aa ní' co'oo man rihaan nij xnii ne go' ní' chá nij chuvee ma'. Dan me se ndaa síj chá nij xnii tucua, gaa ne sese náj se chá tu'va nij xnii yo', gaa ne ca'vee go' chá chuvee nanj adonj. Che'é dan ase vaa ne nó xcúun yuvii ca'neē yuvii rachruún tu'va ta'níí yuvii go' yuvii

rachruún yo' chá chuvee ro', danj vaa ne nó xcúun racuíj man soj sij yanij a man adonj. Maan inanj ma'an nij yuvii israelitá me no xcúun 'unj racuíj 'unj nanj adonj —taj Jesucristó rihaan chana yo' a.

Gaa ne cataj no':

<sup>28</sup> —Veé dan vaa guē, Señor. Tzaj ne nij chuvee nicun' rque chruun mesá ro', chá nij xo' tachruu ayuu tu'va nij xnii nanj á. Ne ase vaa chuvee chá tachruu vaa 'unj rihaan so' nanj adonj. Che'é dan me ndo'o raj racuíj so' doj manj, raj nanj adonj —taj chana yo' rihaan Jesucristó a.

<sup>29</sup> Gaa ne cataj Jesucristó:

—Che'é nanā ca'mii so' nihánj ro', ca'vee cavii so' ca'anj so', ne aj curihanj nanā chree nimán ta'níí so' nanj ei —taj so' rihaan no' a.

<sup>30</sup> Gaa ne ca'anj chana, catúj chana rá ve' tucua chana, ne quene'en chana se vaa dínj naj ta'níí chana rihaan yuvéé, ne aj curihanj nanā chree nimán ta'níí chana adonj.

**Nanā nihánj taj xna'anj che'é síí naxra' tu'va do', nachuguun xréé do', qui'yaj Jesucristó a**

<sup>31</sup> Gaa ne curihanj uún Jesucristó rej naj chuman' Tiro, ne cachén so' sca'núj chuman' cu'naj Sidón, ca'anj uún so' tu'va na lacuaná cu'naj Galilea, ne cachén so' sca'núj rej cu'naj Chi' Chuman' a. <sup>32</sup> Ne nicaj nij yuvii man 'o síí so' o ya'mii ca'na' nij yuvii rihaan Jesucristó, ne cachíin ni'yaj uxrá nij yuvii rihaan Jesucristó se vaa cuta' ra'a Jesucristó xráá síí so' o ya'mii yo' a. <sup>33</sup> Gaa ne nicaj Jesucristó man síí so' o ya'mii ca'anj yanij so' rihaan yo'ó nij yuvii, gaa ne tucua'anj Jesucristó ra'a Jesucristó yu'uj xréé síí so' o ya'mii, gaa ne quirii talúj Jesucristó ra'a Jesucristó, ne canó ra'a Jesucristó daa síí so' o ya'mii yo' a. <sup>34</sup> Gaa ne ni'yaj Jesucristó rej xtá', gaa ne caráchej Jesucristó, ne cataj Jesucristó:

—Efata —taj Jesucristó, ne nanā “Efata” taj: “Nachuguun xréé so' á”, me nanā ca'mii Jesucristó rihaan síí so' o ya'mii yo' a.

<sup>35</sup> Gaa ne nachuguun xréé so', ne nahuun sa' daa so', gaa ne ca'mii sa' so' a. <sup>36</sup> Gaa ne ca'ne' Jesucristó suun rihaan nij síí quene'en daj qui'yaj Jesucristó che'é síí so' o ya'mii se vaa se guun cataj xna'anj nij so' rihaan a 'o yuvii a. Dan me se doj a na'vej rá Jesucristó cataj xna'anj nij so' rihaan tuvi' nij so', tzaj ne doj a nata' nij so' rihaan tuvi' nij so' a. <sup>37</sup> Gaa ne ca'anj uxrá rá nij yuvii xcaj cuentá daj qui'yaj Jesucristó, ne cataj nij yuvii se vaa sa' uxrá vaa nu' se vaa qui'yaj Jesucristó, ne ndaa nachuguun xréé nij síí so' o do', ndaa a'mii sa' nij síí ya'mii do', 'yaj Jesucristó, taj nij yuvii yo' a.

**Nanā nihánj taj xna'anj se vaa go' Jesucristó se chá rihaan ca'anj mij snó'o a**

**8** Ne güii dan me se vaj uún que'ee yuvii ga Jesucristó, ne nuvi' uún se chá rihaan nij yuvii, gaa ne canacúun Jesucristó man nij síí tucuyón se-nanā so' se



vaa ca'nā' nij so' rihaan so', gaa ne cataj so' rihaan nij so' a:

2 —'Ee rá 'unj man nij yuvií nihánj, ne nihánj me se síj va'nuj ya güii 'o vaj nij yuvií ga 'unj, ne taj vaj se chá rihaan nij yuvií cuano a ma'. 3 Ne sese na'nej 'unj chrej man nij yuvií cuano quinā' nij so' gaa na'aan rque nij so', ne ninaj nij so' rá chrej, ne dan me se ta'aj nij so' me síj yanj rej gan' ndo'o nanj adonj —taj Jesucristó rihaan nij síj tucu'yón se-nānā so' a.

4 Gaa ne cataj nij so' rihaan Jesucristó a:

—Tzaj ne rej tacaan uun me nihánj, ne nuvi' rachrúun nihánj go' ní' chá nij yuvií a ma' —taj nij síj tucu'yón se-nānā Jesucristó a.

5 Gaa ne xná'anj Jesucristó man nij so', cataj so':

—Me daj rachrúun vaa rihaan soj ga —taj so', xná'anj so' man nij síj tucu'yón se-nānā so' a.

—Chij rachrúun vaa rihaan nuj nanj á —taj nij so' rihaan Jesucristó a.

6 Gaa ne ca'ne' Jesucristó suun rihaan nij yuvií se vaa ca'anj cayáan nij yuvií rihaan yo'óo a. Gaa ne nicaj so' chij nij rachrúun, ne nago' so' graciá rihaan Diose, gaa ne cuxra' ta'aj so' rachrúun yo', ne caxrj so' ston nij síj tucu'yón se-nānā so', ne tucuachén nij so' rihaan nij yuvií, ne dan me se rque nij so' rachrúun yo' rihaan nij yuvií a. 7 Ne nicaj Jesucristó doj xcuaj le'ej uún, ne nago' so' graciá rihaan Diose che'é nij xcuaj le'ej, ne cataj so' rihaan nij síj tucu'yón se-nānā so' se vaa tucuachén nij so' nee xcuaj le'ej uún rihaan nij yuvií uún a. 8 Gaa ne chá cunudanj nij yuvií, ne ndaa caraa rque nij so' a. Gaa ne naqui'yaj chre' nii se vaa quináj tu'va nij yuvií, ne quisij 'o cunū' chij ya scaa caraa qui'yaj se quináj tu'va nij yuvií yo' a. 9 Dan me se cunudanj nij so' chá, ne quisij ndaa ca'anj mīj yuvií chá nanj adonj.

Gaa ne na'née Jesucristó chrej man nij yuvií, 10 gaa ne nu' cavii Jesucristó ga nij síj tucu'yón se-nānā so' rá rihoo chée rihaan na, ne ca'anj nij so' rej cu'naj Dalmanuta a.

**Nanā nihánj taj xna'anj se vaa cachíin nij síj fariseo se vaa qui'yaj Jesucristó 'o suun sá' nocoo quene'en nij so' a**

11 Dan me se curihanj doj nij síj fariseo, gaa ne guun che'e nij so' canó tuvi' nij so' ga Jesucristó, ne dan me se cachíin ni'yaj nij so' rihaan Jesucristó se vaa račuúj Diose man Jesucristó, ne qui'yaj Jesucristó 'o suun sá' nocoo quene'en nij so', gaa ne guun ya rá nij so' se vaa síj ca'née ya Diose me Jesucristó, rá nij so' a.

12 Gaa ne nucuaj ndo'o caráchej Jesucristó, ne cataj so' rihaan nij so' a:

—Ne me che'é me rá soj sij israelitá qui'yáj suun sá' nocoo quene'en soj ga. Dan me se daj chihaa mīj se qui'yáj suun sá' nocoo che'é soj a ma' —taj Jesucristó rihaan nij síj fariseo yo' a.

13 Gaa ne tanáj Jesucristó man nij so', gaa ne cavii uún so' rque rihoo chée rihaan na, ne ca'anj so' rej xco na lacuaná a.

**Nanā nihánj taj xna'anj se vaa ne ca'vej rá Jesucristó cunū nij síj tucu'yón se-nānā so' man nanā tucu'yón nij síj fariseo do', síj cu'naj Herodes do' a**

14 Dan me se quini'yón nij síj tucu'yón se-nānā Jesucristó nicaj nij so' rachrúun chá nij so', ne vaa orún' rachrúun rá rihoo vaj ga nij so' a. 15 Gaa ne ca'ne' Jesucristó suun rihaan nij so', cataj Jesucristó:

—Cutumé soj man soj se gaa nanj quirā' soj sayuun, qui'yaj se-levadura nij síj fariseo do', síj cu'naj Herodes do' á —taj Jesucristó no nij so' a.

16 Ne nuchruij raa ndo'o nij síj tucu'yón se-nānā Jesucristó che'é nanā ca'mii so', ne:

—Che'é se taj rachrúun nicaj ní', ne che'é dan a'mii so' che'é levadura se 'yaj naraa nanā rque rachrúun nanj adonj —taj nij so' a.

17 Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. Me che'é ataa xcaj soj cuentá ga. 'O se vaa nichraj ndo'o nimán soj nanj adonj. 18 'O se vaa rlij rihaan soj, tzaj ne ne ni'yaj soj a ma'. Vaa xrée soj, tzaj ne ne uno soj a ma'. 19 Ne ne nuú rá soj gaa vaa daj 'o 'un' guue rachrúun cuxra' ta'aj 'unj tzaj ne quisij chá cunū' 'un' mīj snó'o, qui'yáj a. Ne me daj scaa se chá quináj tu'va yuvií naqui'yaj chre' soj, rá soj ga —taj Jesucristó, xná'anj Jesucristó man nij so' a.

Gaa ne:

—Chuvij a —taj nij so' rihaan Jesucristó a.

20 Gaa ne cataj uún Jesucristó:

—Ne ne nuú rá soj gaa vaa daj 'o chij guue rachrúun cuxra' ta'aj 'unj tzaj ne quisij chá cunū' ca'anj mīj yuvií, qui'yáj a. Ne me daj scaa se chá quináj tu'va yuvií naqui'yaj chre' soj, rá soj ga —xná'anj uún Jesucristó man nij so' a.

Gaa ne:

—Chij a —taj nij so' rihaan Jesucristó a.

21 Gaa ne cataj Jesucristó rihaan nij so' a:

—Ne me che'é me ataa xcaj soj cuentá se vaa ca'vee rque 'unj nu' se vaa achiin man soj ne nuveé inanj che'é rej nanō rá soj che'é rachrúun me ca'mij rihaan soj che'é se-levadura nij síj fariseo do', síj cu'naj Herodes do' ma' —taj Jesucristó rihaan nij so' a.

**Nanā nihánj taj xna'anj se vaa naxra' rihaan 'o síj tuchrij, qui'yaj Jesucristó a**

22 Gaa ne catúj Jesucristó ga nij síj tucu'yón se-nānā so' rá chuman' cu'naj Betsaida a. Gaa ne nicaj yuvií 'o síj tuchrij ca'na' nij yuvií rihaan Jesucristó, ne cachíin ni'yaj nij yuvií rihaan Jesucristó se vaa cutā' Jesucristó ra'a Jesucristó raa síj tuchrij che'é rej naxra' rihaan síj tuchrij yo' a. 23 Gaa ne quita'aa Jesucristó ra'a síj tuchrij yo', ne curihanj so' rej tu'va chuman' ga síj tuchrij, ne quirii talúj Jesucristó rihaan síj tuchrij yo', ne cutā' ra'a Jesucristó xráa so', gaa ne xná'anj Jesucristó man so' a:

—Ruvi' rihaan so' na' —taj Jesucristó, xná'anj so' man sí tuchrij yo' a.

<sup>24</sup> Gaa ne ni'yaj sí tuchrij yo' doj, gaa ne cataj so':

—Ne'én 'unj nij snó'o, ne ase vaa chruun vaa nij so', tzaj ne chéé nij so' ni'yaj 'unj nanj asanj —taj so' rihaan Jesucristó a.

<sup>25</sup> Gaa ne cuta' ra'a uún Jesucristó rihaan sí tuchrij yo', gaa ne ni'yaj ni'yaj sí tuchrij, ne dan me se nahuun sa' nu' rlij rihaan so', ne curuvi' sa' cunudanj rasuun ni'yaj so' nanj adonj. <sup>26</sup> Gaa ne ca'née Jesucristó man so' quinan' so', tzaj ne cataj Jesucristó rihaan so' se vaa:

—A doj se catúj so' rá chuman', ne se cataj so' rihaan a 'ó nij yuvij, gaa ne se gaa nanj xcaj nij yuvij cuentá daj qui'yaj che'é so' á —taj Jesucristó rihaan so' a.

### Nana nihánj taj xna'anj se vaa cataj xna'anj Pedró me sí me Jesucristó a

<sup>27</sup> Gaa ne curihanj Jesucristó ga nij sí tucu'yón se-nana so' chuman' Betsaida yo', ne ca'anj nij so' nij chuman' ra'á nocó' man chuman' cu'naj Cesarea de Filipino do' a.

Dan me se vaj nij so', ne xná'anj Jesucristó man nij sí tucu'yón se-nana so', ne cataj so':

—Daj taj nij yuvij che'é 'unj ga. Ne me sí mé 'unj, taj nij yuvij ga —taj Jesucristó, xná'anj so' man nij so' a.

<sup>28</sup> —Vaa sí taj se vaa sí cu'naj Juan sí cuta' ne man yuvij mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa yo'ó sí nata' se-nana Diose gaa naá me uún so' chihá'. 'O se danj taj 'o 'o nij yuvij che'é so' nanj adonj —cataj nij so' rihaan Jesucristó a.

<sup>29</sup> —Ne ma'an soj, gaa ne me sí mé 'unj, rá ma'an soj ga —taj Jesucristó, xná'anj so' man nij sí tucu'yón se-nana so' a.

Gaa ne cataj sí cu'naj Pedró:

—Sí ca'née Diose tjanii man yuvij rihaan sayuun mé so' ei —taj so' rihaan Jesucristó a.

<sup>30</sup> Gaa ne cataj xna'anj Jesucristó rihaan nij sí tucu'yón se-nana so' se vaa se nata' nij so' rihaan a 'ó yuvij me sí me so', taj so' a.

### Nana nihánj taj xna'anj se vaa cataj xna'anj Jesucristó se vaa cavi' so' ne cunuu i'na' uún so' a

<sup>31</sup> Gaa ne guun che'e Jesucristó tucu'yón so' man nij sí tucu'yón se-nana so' se vaa che'é se sí ca'née Diose nicaj yu'unj man yuvij me so' ro', che'é dan no xcuún so' quiran' ndo'o so' sayuun, qui'yaj nij sí uun chij do', nij xrej atá suun nocóo doj do', nij sí naqui'yaj cuu se-tucuanj Moisés rihaan nij yuvij do', ne nachri' nij so' ni'yaj nij so' man so', ne ticavi' nii man so', ne cachén va'nuj güii, gaa ne cunuu i'na' uún so', cataj so' a. <sup>32</sup> Ne nucuaj ndo'o nata' so' nana yo' rihaan nij sí tucu'yón se-nana so' a. Gaa ne quirii yanij sí cu'naj Pedró man Jesucristó, ne guun che'e so' cataj so' se vaa ne nó xcuún Jesucristó ca'mij Jesucristó nana vaa danj a.

<sup>33</sup> Gaa ne canicaj Jesucristó, ne ni'yaj so' man nij sí tu-

cuyón se-nana so', ne cataj so' rihaan Pedró se vaa ne nó xcuún uxrá ma'an Pedró ca'mij Pedró danj, ne cataj so':

—Naxuun so' mán so' rihanj á. Na'vej raj quene'enj mán so' a ma'. 'O se ase tu'va sí chree sí cu'naj Satanás ro', danj tu'vá so' ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvij nanj adonj —taj Jesucristó rihaan sí cu'naj Pedró a.

<sup>34</sup> Gaa ne canacúun Jesucristó man nij yuvij ca'na' nij yuvij rej nicun' so' ga nij sí tucu'yón se-nana so', gaa ne cataj so' rihaan taran' nij so' a:

—Sese me rá yo'ó so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so' rihaan rcutze do', tzaj ne yo'ó qui'yaj suun so' che'ej, ne yo'ó canoco' raan so' manj adonj. <sup>35</sup> Tzaj ne sese vaa 'o sí me rá tjanii man ma'an rihaan sayuun, ne vaa güii, ne yo'ó cavi' nimán so' adonj. Tzaj ne sese cavi' yo'ó so' che'é se vaa me so' sí nocó' manj do', che'é se nata' so' se-nana nana sa' do', ne vaa güii, ne cunuu i'na' uún so' adonj. <sup>36</sup> Ne a me se quirii 'o so' sese qui'yaj canaan so' nu' rasuun man rihaan chumij nihánj ne ca'anj ni'ya nimán so', rá soj ga. Daj chihaa mij se ca'vee cavi' sa' so', qui'yaj rasuun man rihaan chumij nihánj a ma'. <sup>37</sup> Tzaj ne ca'vee se navij nu' si'yaj yo'ó so' rihaan chumij nihánj, tzaj ne sese gaa i'na' nimán so' nu' cavii nu' ca'anj, ne quinanó rá so', rá soj na'. Daj chihaa mij se quinanó rá so' a ma'. 'O se cavii sa' uxrá so' nanj adonj.

<sup>38</sup> "Dan me se xa' sí uun na'aj ni'yaj manj ne uun na'aj ni'yaj se-nana ro', ase vaa nij sí chi'ii tumé ndo'o cacun' man rihaan chumij nihánj cuano vaa so' adonj. Ne vaa güii guun na'aj 'unj sij ca'née Diose nicaj yu'unj man yuvij ni'yaj 'unj man so' asa' ca'na' uún 'unj rihaan chumij nihánj, ne dan me se uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj asa' ca'ná' 'unj nanj adonj —taj Jesucristó rihaan nij so'a.

**9** Gaa ne cataj uún so' se vaa:

—Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano, me se gaa ataa a cavi' ta'aj soj, ne ya quene'en ta'aj soj asa' guun che'e Diose nucuaj ndo'o guun chij Diose rihaan chumij nihánj nanj adonj —taj Jesucristó rihaan taran' nij so' a.

### Nana nihánj taj xna'anj se vaa chuguun ndo'o man Jesucristó ni'yaj nij sí tucu'yón se-nana so' a

<sup>2</sup> Cachén vatán' güii, gaa ne nicaj Jesucristó man sí cu'naj Pedró do', sí cu'naj Jacobo do', sí cu'naj Juan do', ca'anj so' raá 'o quij xcaan rej taj vaj a 'ó yuvij ne a. Gaa ne yo'ó cunuu ino cunudanj man Jesucristó ni'yaj nij sí tucu'yón se-nana so' yo' a. <sup>3</sup> Ne dan me se cunuu catzii ndo'o sagan' so', ne ndaa raan lá ma'an sagan' so' ni'yaj nij so' a. Ne taj vaj a yo'ó sí man rihaan chumij nihánj ca'vee qui'yaj catzii yatzi' ndaa rá se vaa sagan' Jesucristó a. <sup>4</sup> Ne ni'yaj va'nuj nij so', ne dan me se naqui'yaa sí cu'naj Elías sí cane gaa naá ga sí cu'-

naj Moisés rihaan nij so', ne nanó roj so' cuentó gā Jesucristó ni'yaj nij so' a. <sup>5</sup> Gāa ne cataj Pedró rihaan Jesucristó a:

—Cunaj uxrá vaa mán núj nihánj gā so', maestro. Ne qui'yaj núj va'núj ve' yacataj canē soj nānj á. 'O ve' canē so', ne yo'ó ve' canē síí cu'naj Moisés, ne yo'ó ve' canē síí cu'naj Elías ei —taj Pedró rihaan Jesucristó a.

<sup>6</sup> O se ne quene'en uxrá Pedró dāj me che'é ca'mii so' rihaan Jesucristó dānj ā ma'. 'O se cuchu'vi' ndo'o va'núj nij so' che'é se vaa quene'en nij so' nānj adōnj.

<sup>7</sup> Gāa ne ca'na' 'o ngāa, ne caráán ngāa man taran' nij so' a. Gāa ne Diose ro', ca'mii nanā cuno nij so' rque ngāa yo', ne cataj Diose a:

—Síí nihánj me ta'níj adōnj. 'Eē raj man so' adōnj. Cuno soj rihaan so' ei —taj Diose cuno nij so' a.

<sup>8</sup> Gāa ne nu' ni'yaj nij so', ne dāj orún' Jesucristó nicun' gā nij so', quene'en nij so' nānj adōnj.

**Nanā nihánj taj xna'anj se vaa ase vaa síí cu'naj Elías ro', dānj vaa síí cu'naj Juan síí cuta' ne man yuvií a**

<sup>9</sup> Gāa ne gāa nanij nij so' tacóo quij yo' me se ca'ne' Jesucristó suun rihaan nij so' se vaa se nata' nij so' rihaan ā doj yuvií che'é se vaa quene'en nij so' a. Yo'ó dínj gāa tu'va nij so' che'é rasuun quene'en nij so' a. Ndāa quisíj cavi' so' ne cunuu i'na' uún so', gāa ne ca'vee nata' nij so' se vaa quene'en nij so' dāj quiran' so' síí ca'née Diose nīcaj yu'unj man yuvií, taj Jesucristó rihaan nij so' a. <sup>10</sup> Ne yo'ó nu' rá nij so' nanā yo', ne xná'anj ndo'o nij so' man tuvi' ma'an nij so' me che'é me cataj Jesucristó se vaa cavi' so' ne cunuu i'na' uún so' a. <sup>11</sup> Gāa ne xná'anj nij so' man Jesucristó, cataj nij so':

—Me che'é taj nij síí naqui'yaj cyu se-tucuānj Moisés rihaan yuvií se vaa asino ca'na' síí cu'naj Elías síí nata' se-nānā Diose gāa naá, gāa ne ca'vee ca'ne' Diose cacun' che'é yuvií gā —taj nij síí tucu'yón se-nānā Jesucristó, xná'anj nij so' man Jesucristó a.

<sup>12</sup> Gāa ne cataj Jesucristó rihaan nij so' a:

—Yā a'mii nij síí naqui'yaj cyu se-tucuānj Moisés, taj nij so' se vaa asino ca'na' síí cu'naj Elías, gāa ne naqui'yaj sá' so' nu' rasuun adōnj. Ne me che'é taj danj Diose se vaa síí ca'née Diose nīcaj yu'unj man yuvií me se quirān' ndo'o so' sayuun ne nachri' nij yuvií ni'yaj nij yuvií man so', rá soj gā. <sup>13</sup> Tzāj ne cataj xna'anj 'unj rihaan soj se vaa āj ca'na' yā síí cu'naj Elías, tzāj ne qui'yaj yā yuvií ndāa vaa me rá ma'an nij yuvií man so' ndāa vaa taj danj Diose che'é so' nānj adōnj. Che'é dan ca'vee xcāj soj cuentá dāj quirán' 'unj qui'yaj uún nij yuvií adōnj —taj Jesucristó rihaan nij síí tucu'yón se-nānā so' a.

**Nanā nihánj taj xna'anj se vaa nahuun sá' 'o xnii nuu nanā chree nimán, qui'yaj Jesucristó a**

<sup>14</sup> Dan me se chuchi' nij so' rej nicun' yo'ó nij síí tucu'yón se-nānā Jesucristó, ne quene'en nij so' se vaa mán que'ēē yuvií anicaj rej nicun' nij so', ne nicun' doj nij síí naqui'yaj cyu se-tucuānj Moisés, ne ca'mii cunu'

uxrá nij so' gā nij síí tucu'yón se-nānā Jesucristó yo' a.

<sup>15</sup> Ne nu' quene'en nij yuvií man Jesucristó, ne nu' ca'anj ndo'o rá nij yuvií, ne cunánj nij yuvií ndāa rej vaj Jesucristó ca'mii nij so' gā so' a. <sup>16</sup> Gāa ne xná'anj Jesucristó man nij yuvií a:

—Me che'é me ca'mii cunu' nij soj gā nij síí tucu'yón se-nānā gā —taj so' rihaan nij yuvií a.

<sup>17</sup> Gāa ne yo'ó nij yuvií cataj rihaan Jesucristó a:

—'Unj me se nicaj 'unj ta'níj ca'ná' 'unj nano' 'unj mán so', maestro. Ne ta'níj me se ya'mii so' che'é se nuu nanā chree nimán so', <sup>18</sup> ne me rej ma'an me rá nanā chree quita'aa nanā chree man so', ne cagan' nanā chree man so' rihaan yo'óo, ne avii yatan' tu'va so', ne chá ruj so' cúú yan' so', ne nuu chrúnj nu' so' nānj adōnj. Ne cataj 'unj rihaan nij síí tucu'yón se-nānā so' se vaa quiríj nij so' man nanā chree nimán ta'níj, tzāj ne ne ca'vee qui'yaj canaán nij so' ma' —taj snó'o yo' rihaan Jesucristó a.

<sup>19</sup> Gāa ne cataj Jesucristó rihaan nij yuvií a:

—Dan me se síí ne amán rá me soj sij man rihaan chumii nihánj cuano, ne ā me dāj cachej gā soj, ne ā me dāj gāa naj nimanj ni'yaj 'unj man soj, gāa ne ca'vee qui'yaj canaán soj gā. Nīcaj soj man xnii ca'na' soj rihanj cuaj á —taj Jesucristó a.

<sup>20</sup> Gāa ne nicaj nij yuvií man xnii ca'na' nij yuvií rihaan Jesucristó a. Ne dan me se gāa quene'en nanā chree man Jesucristó, ne nu' snúú xnii, ne naxru' xnii, qui'yaj nanā chree yo', ne natúj rmií xnii, ne cavii yatan' tu'va xnii a. <sup>21</sup> Gāa ne xná'anj Jesucristó man rej xnii, cataj Jesucristó:

—Me dāj güii ran' ta'níí so' dānj gā —taj Jesucristó rihaan rej xnii a.

<sup>22</sup> Gāa ne cataj rej xnii:

—Dānj ran' so' asij ne'ej me so', ne que'ēē ndo'o cagan' nanā chree man so' rihaan ya'an do', rihaan na do', qui'yaj nanā chree, che'é rej me rá nanā chree cavi' so', tzāj ne sese ca'vee, ne cunuu 'ēē rá so' manj ne raçuíj so' man núj ruguānj —taj rej xnii yo' rihaan Jesucristó a.

<sup>23</sup> Gāa ne cataj Jesucristó rihaan so' a:

—Taj che'é cataj so' nanā "sese ca'vee" ma'. 'O se síí amán rá ni'yaj man Diose ro', ca'vee qui'yaj so' cunudānj nānj adōnj —taj Jesucristó rihaan so' a.

<sup>24</sup> Nu' ca'mii Jesucristó dānj, ne nu' caguáj rej xnii, cataj so':

—Amán rá 'unj ni'yaj 'unj Diose á. Raçuíj so' manj cuchuman raj doj, Señor —taj so' rihaan Jesucristó a.

<sup>25</sup> Dan me se quene'en Jesucristó se vaa cunánj ndo'o yuvií ca'na' nij yuvií rej nicun' so', ne che'é dan ca'ne' Jesucristó suun rihaan nanā chree yo', ne cataj Jesucristó:

—Rihaan so' nanā chree qui'yaj ya'mii ne qui'yaj so' man xnii nihánj a'mij, ne cataj xna'anj 'unj rihaan so' se vaa curihanj so' cuaj nimán so' cuano, ne dāj chihāa mīj se catúj uún so' nimán so' mei —taj Jesucristó rihaan nanā chree yo' a.

<sup>26</sup> Gāa ne caguáj nanā chree, ne guun snuj ndo'o xnii naxru' xnii, qui'yaj nanā chree, ne dan me se curihanj

nana chree nimán xnii yo' a. Gaa ne ase vaa sí cavi' ro', danj vaa xnii, naj xnii rihaan yo'óo, ne cataj nij yuvij se vaa ya ya cavi' so' a. <sup>27</sup> Tzaj ne quita'aa Jesucristó ra'a xnii, ne naxcaj Jesucristó man xnii, ne naxagaa so' a.

<sup>28</sup> Dan me se corá catúj Jesucristó rá ve', ne inanj nij ma'an nij sí tucu'yón se-nana so' ro', man rá ve' ga so', ne xná'anj nij so' man so', ne cataj nij so':

—Me che'é ne guun nucuaj núj quirii núj man nana chree yo' ga —taj nij so' rihaan Jesucristó a.

<sup>29</sup> Gaa ne cataj Jesucristó rihaan nij so' se vaa:

—Xa' nana chree vaa danj ro', se ca'vee qui'yaj ní curihañj nij so' nimán yuvij sese ne achíin ni'yaj ndo'o ní rihaan Dioso ma'. Dan me se cachinj ni'yaj uxrá', ne caraá guee ndo'o', gaa ne ca'vee adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa cataj xna'anj uún Jesucristó se vaa cavi' so' ne cunyu i'na' uún so' a**

<sup>30</sup> Gaa ne cavii Jesucristó ga nij sí tucu'yón se-nana so' rej yo', ne ca'anj nij so' estadó Galilea, ne ne ca'vej rá Jesucristó xcaj nij yuvij cuentá me rej vaj so' a. <sup>31</sup> 'O se tucu'yón so' man nij sí tucu'yón se-nana so', ne dan me se cataj so' rihaan nij so' se vaa:

—'O se sí ca'née Dioso nicaj yu'unj man yuvij mej, ne vaa güii, ne nago' nii manj rihaan yuvij adonj. Dan me se ticavi' nij yuvij manj, gaa ne cachen va'nuy güii, gaa ne cunyu i'na' uún 'unj nanj adonj —taj Jesucristó rihaan nij sí tucu'yón se-nana so' a.

<sup>32</sup> Tzaj ne ne cunó nij so' nana ca'mii Jesucristó, ne chu'vi' nij so' xna'anj nij so' man Jesucristó me taj nana yo' a.

**Nana nihánj taj xna'anj me sí me sí guun chij doj asa' guun chij Dioso rihaan chumii nihánj a**

<sup>33</sup> Gaa ne catúj Jesucristó ga nij sí tucu'yón se-nana so' chuman' cu'naj Capernaum a.

Dan me se gaa man nij so' rá ve', ne xná'anj Jesucristó man nij sí tucu'yón se-nana so', ne cataj so':

—Me che'é me canó tuvi' nij soj gaa vaj ní chrej asij cua'aa ga —taj Jesucristó, xná'anj so' man nij so' a.

<sup>34</sup> Gaa ne cunuu dínj tu'va nij so' a. 'O se gaa vaj nij so' chrej, ne canó tuvi' nij so' ga ma'an tuvi' nij so' se vaa cataj nij so' me nij so' me sí guun chij doj a.

<sup>35</sup> Gaa ne ca'anj quitaj Jesucristó chruun xlá, ne canacúun so' man chuvij nij so' se vaa ca'na' nij so' rihaan so', gaa ne cataj so' rihaan nij so' a:

—Me ma'an 'o sí me rá guun chij doj, ne so' me sí guun sí nocó, ne ndaa guun so' mozó rihaan daj a tu'vi' so' adonj —taj Jesucristó rihaan chuvij nij so' a.

<sup>36</sup> Gaa ne nicaj Jesucristó man 'o ne'ej, ne cachrón so' man ne'ej yo' tanuu nij sí tucu'yón se-nana so', ne na'yaan so' man ne'ej, ne cataj so' rihaan nij sí tucu'yón se-nana so' a:

<sup>37</sup> —Me ma'an 'o sí aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se sí a'mii sa'

ga 'unj me se nuveé orún 'unj me a'mii sa' so' ga ma'. Maan Dioso ya sí ca'née man 'unj rihaan chumii nihánj me aráj cochroj ya so' ne a'mii sa' ya so' ga vaa nanj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa cataj xna'anj Jesucristó se vaa me ma'an sí ne unu' ga so' me tuvi' so' a**

<sup>38</sup> Cataj sí cu'naj Juan rihaan Jesucristó a:

—Quene'en núj man 'o sí ata' tu'va se-chuvií so', ne urihanj nana chree nimán nij yuvij, 'yaj so', nanj maestro. Tzaj ne caráan núj chrej ca'mii so' ne se qui'yaj so' danj, che'é se nuveé sij chéé ga ní me so', taj núj, nanj maestro —taj Juan rihaan Jesucristó a.

<sup>39</sup> Gaa ne cataj Jesucristó rihaan chuvij nij sí tucu'yón se-nana so' a:

—Ca'ne' sa' guee rá soj qui'yaj ma'an so' danj ei. 'O se taj a 'o sí ata' tu'va se-chuvií 'unj ne qui'yaj so' suun sa' nocoo che'é se-chuvií 'unj, ne síj, gaa ne canicaj so' ne ca'mii chree so' che'é 'unj ma'. <sup>40</sup> 'O se xa' sí ne unu' ga ní, tzaj ne tuvi' ní me so' adonj. <sup>41</sup> 'O se a me ma'an yo' sí rqué doj na co'oj nij soj che'é se-chuvií 'unj, ne ya ya cataj xna'anj 'unj rihaan soj se vaa daj chihaa míj se quinavij se sa' naru'vee Dioso rihaan sí rqué doj na yo' co'oj soj ma'.

**Nana nihánj taj xna'anj daj quiran' sí qui'yaj chi'ii nimán 'o sí cuchumán rá ni'yaj man Jesucristó a**

<sup>42</sup> "Dan me se me ma'an 'o sí qui'yaj chi'ii nimán 'o sí le'ej amán rá ni'yaj manj, ne ca'vee a doj cavii sa' sí qui'yaj danj sese tocó' nii 'o yuvej xij váj 'núú trigó gaán chihá so' ne tagüej nii man so' rque na ya'anj nanj adonj. Dan me se doj a sayuun quiran' so', sese qui'yaj chi'ii so' nimán 'o sí le'ej amán rá ni'yaj manj adonj.

<sup>43</sup> "Dan me se sese ra'á so' me rá qui'yaj cacun', ne táa a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' ei. Taj se 'yaj se nuj se taj yan vaj ra'á so', tzaj ne ca'vee cayáan so' ga Dioso gaa ei. Tzaj ne sese quitaj ra'á so' ne qui'yaj yo' cacun', ne ca'anj so' rihaan ya'an, qui'yaj yo', ne dan me se ya'an yo' me se daj chihaa míj se quina'áj ya'an yo' nuvíi nigan' a mei. <sup>44</sup> Ne nij sí man rihaan ya'an yo' me se se ca'vee cavi' xlúú chá man nij so', ne daj chihaa míj se quina'áj ya'an rej cunuú nij so' cacaa nij so' a man adonj.

<sup>45</sup> "Ne sese tacóó so' me rá qui'yaj cacun', ne táa a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' nanj ei. Taj se 'yaj se nuj se taj yan vaj tacóó so', tzaj ne ca'vee cayáan so' ga Dioso ei. Tzaj ne sese quitaj tacóó so' ne qui'yaj yo' cacun', ne ca'anj so' rihaan ya'an, qui'yaj yo' ei. <sup>46</sup> Ne nij sí man rihaan ya'an yo' me se se ca'vee cavi' xlúú chá man nij so', ne daj chihaa míj se quina'áj ya'an rej cunuú nij so' cacaa nij so' a man adonj.

<sup>47</sup> "Veé danj uún sese me rá rlij rihaan so' qui'yaj yo' cacun', ne táa a se quirii so' man yo', ne sí rihaan

canuu gaa so', tzaj ne ca'vee catuu so' rej guun chij Diose ei. Tzaj ne sese cunuú rlij rihaan so' ne qui'yaj yo' cacun', ne ca'anj so' rihaan ya'an, qui'yaj yo' ei.

<sup>48</sup> Ne nij síi man rihaan ya'an yo' me se se ca'vee cavi' xlúú chá man nij so', ne daj chihaa mij se quina'áj ya'an rej cumān nij so' cacaa nij so' a man adonj.

<sup>49</sup> "O se vaa sayuun quiran' cunudanj nij rasuun man rihaan chumii nihánj, qui'yaj Diose, ne dan me se ase vaa nuu sa' nee 'yaj yaan ro', danj gaa cunuú sa' nij síi man rihaan chumii nihánj, qui'yaj ya'an ei.

<sup>50</sup> "Ne ase vaa yaan ga chraa ro', danj vaa nij soj sij tucu'yón se-nānā gā chumii nihánj, ne vaa se uun ndo'o yaan ei. Dan me se sese ne 'ne' chá yaan yo', gaa ne taj se qui'yá' cunuú sa' yaan gaa a ma'. Che'é dan, ase vaa yaan 'ne' sa' ro', danj gaa soj, ne dínj cayáán soj gā tuvi' soj, ne ca'vee cunuú sa' chumii nihánj qui'yaj soj nanj adonj —taj Jesucristó rihaan nij síi tucu'yón se-nānā so' a.

### Nanā nihánj taj xna'anj se vaa ne nó xcúún yuvii quiri'ij yuvii man nicā yuvii a

**10** Gaa ne curihanj Jesucristó rej yo', ne ca'anj so' ndaa rnej tu'va chráa cu'naj Jordán, ndaa estadó Judea a. Gaa ne cunuú chre' uún que'ee yuvii rihaan so', ne tucu'yón uún so' se-nānā so' rihaan nij yuvii, ndaa vaa u'yón so' 'yaj so' a. <sup>2</sup> Gaa ne ca'na' doj síi fariseo rihaan so', ne xná'anj nij so' man Jesucristó sese nō xcúún snó'o quiri'ij snó'o man nicā so' a. Danj cataj nij síi fariseo, che'é se guun rá nij so' cuta' nij so' cacun' xráa Jesucristó che'é nanā ca'mii Jesucristó a. <sup>3</sup> Gaa ne cataj Jesucristó rihaan nij so' a: —Ne daj cataj síi cu'naj Moisés qui'yaj soj gā —taj Jesucristó, xná'anj so' man nij síi fariseo a. <sup>4</sup> Gaa ne cataj nij so' se vaa: —Ca'ne' síi cu'naj Moisés suun se vaa naxcaj yuvii yanj rihaan nij síi nicā suun, ne ca'vee quiri'ij yuvii man nicā yuvii á —taj nij síi fariseo a. <sup>5</sup> Gaa ne cataj Jesucristó rihaan nij so' a: —Mañ che'é se síi nichraj ndo'o rá me nij soj ro', che'é dan cahrón Moisés nanā yo' rihaan yanj cunō soj a. <sup>6</sup> Tzaj ne asij qui'yaj Diose chumii, ne qui'yaj Diose snó'o, ne qui'yaj Diose chana, ne vij roj so' me yuvii, qui'yaj Diose a. <sup>7</sup> Che'é dan tñánj snó'o man rej so', man nii so' do', <sup>8</sup> ne ase vaa orún' yuvii ro', danj gaa snó'o gā nicā snó'o, taj danj Diose a. Dan me se nuveé vij ran' yuvii me roj so' asij xcaj tuvi' roj so' a ma'. 'O se ase vaa orún' yuvii ro', vaa roj so' nanj adonj. <sup>9</sup> Dan me se Diose me síi qui'yaj xcaj tuvi' roj so', ne che'é dan ne nó xcúún a 'ó yuvii ca'ne' tanuu yuvii man roj so' ma' —taj Jesucristó rihaan nij síi fariseo yo' a. <sup>10</sup> Dan me se gaa man nij síi tucu'yón se-nānā Jesucristó rá 'o ve' gā so', gaa ne xná'anj nij so' man so' che'é nanā ca'mii so' rihaan nij síi fariseo a. <sup>11</sup> Ne cataj Jesucristó rihaan nij so' a: —Me ma'an 'o síi ri'ij man nicā ne xcaj so' man yo'ó chana, ne tumé ndo'o so' cacun', ne nij qui'yaj so' rihaan nicā so' ei. <sup>12</sup> Tzaj ne sese cunanj chana rihaan

nicā no', ne xcaj no' man yo'ó chii, ne tumé ndo'o no' cacun' uún adonj —taj Jesucristó rihaan nij síi tucu'yón se-nānā so' a.

### Nanā nihánj taj xna'anj me che'é caran' rá Jesucristó ni'yaj so' man ne'ej a

<sup>13</sup> Gaa ne nicāj nij yuvii man nij ne'ej ca'na' nij yuvii rihaan Jesucristó, che'é rej cuta' Jesucristó ra'a so' raā nij ne'ej a. Tzaj ne nij síi tucu'yón se-nānā Jesucristó me se cataj xna'anj nij so' rihaan nij yuvii se vaa ne nó xcúún nij ne'ej ca'na' nij ne'ej rihaan Jesucristó, taj nij so' a. <sup>14</sup> Tzaj ne xcaj Jesucristó cuentá daj qui'yaj nij síi tucu'yón se-nānā so', gaa ne ca'maan rá Jesucristó, ne cataj so' rihaan nij síi tucu'yón se-nānā so' a: —Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'O se tucua' nij síi vaa danj ro', me rej yanj Diose uun chij Diose nanj adonj. <sup>15</sup> Ya ya cataj xna'anj 'unj rihaan soj se vaa me ma'an 'o síi na'vej rá guun chij Diose nimán, ndaa vaa uun chij Diose nimán ne'ej, ne daj chihaa mij se ca'vee cayáán so' gā Diose asa' guun chij Diose rihaan chumii nihánj ma' —taj Jesucristó rihaan nij síi tucu'yón se-nānā so' a. <sup>16</sup> Gaa ne na'yaan Jesucristó man nij ne'ej, ne uta' so' ra'a so' raā nij ne'ej, ne achíin ni'yaj so' rihaan Diose che'é nij ne'ej a.

### Nanā nihánj taj xna'anj che'é yo'ó síi me rá cayáán ga Diose nu' cavii nu' ca'anj a

<sup>17</sup> Dan me se gaa nayón Jesucristó chrej, ne dan me se cunánj 'o síi tachruu yo' ca'na' so' rihaan Jesucristó, ne canicun' ruj síi tachruu yo' rihaan Jesucristó, ne xná'anj so' man Jesucristó, cataj so', ne: —Maestro. Síi sa' uxrá mé so' adonj. Daj qui'yaj ne ca'vee cayánj gā Diose nu' cavii nu' ca'anj gā —taj síi tachruu yo', xná'anj so' man Jesucristó a. <sup>18</sup> Gaa ne cataj Jesucristó rihaan so' a: —Me che'é cataj so' se vaa síi sa' uxrá mej gā. 'O se orún' Diose me síi sa' ei. <sup>19</sup> Ne aj ne'én so' nij nanā nocō ya ya nanā cataj xna'anj Diose se vaa canocō' ní' á. Dan me se taj nanā yo': "Se ticavi' so' yuvii ma'. Se co-toj so' gā chana nicā yo'ó yuvii ma'. Se qui'yaj ituu so' si'yaj yo'ó yuvii ma'. Se nanō so' cuentó ne che'é yuvii ma'. Se tihá' yu'unj so' man yuvii che'é sa'anj ma'. Caraa cōchróo so' rihaan rée so' do', rihaan níi so' do' á" —taj Jesucristó rihaan síi tachruu yo' a. <sup>20</sup> —Asij gaa mej xnii me ve'é unō 'unj nu' nij nanā yo', nanj maestro —taj so' rihaan Jesucristó a. <sup>21</sup> Gaa ne ni'yaj uxrá Jesucristó man so', ne cunuú 'ee rá Jesucristó man so', ne cataj Jesucristó rihaan so' a: —Daj orún' rasuun achiin ya mán so' nanj ei. Cavii so' ca'anj so', ne cutu'vee so' nu' si'yáá so', ne sa'anj quiri' so' ro', caxrii so' ston nij síi nique, ne cumān ndo'o si'yáá so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó a.

<sup>22</sup> Gaa ne quiri' ndo'o rá sí tachruu, qui'yaj se-nana Jesucristó, ne ca'anj uun so', ne nanó ndo'o rá so' a. 'O se sí ru'vee me so', ne vaa ndo'o sí'yaj so' a.

<sup>23</sup> Gaa ne ni'yaj Jesucristó, ne cataj so' rihaan nij sí tucu'yón se-nana so' a:

—Sayuun uxrá vaa quisij nij sí vaa ndo'o sa'anj rihaan cayáan ga Diose asa' guun chij Diose rihaan chumii nihánj nanj adonj —taj Jesucristó rihaan nij sí tucu'yón se-nana so' a.

<sup>24</sup> Gaa ne ca'anj ndo'o rá nij so' gaa cuno nij so' nana yo' nana ca'mii Jesucristó a. Gaa ne cataj uun Jesucristó rihaan nij so' a:

—Sayuun uxrá vaa quisij yuvii cayáan nij yuvii ga Diose asa' guun chij Diose rihaan chumii nihánj nanj chuguanj. <sup>25</sup> Dan me se ne'en soj se vaa sayuun ndo'o vaa cachén xcuu camello rihaan yu'uj taj tacúún cúu nuvá, tzaj ne cuano nihánj me se cataj xna'anj 'unj rihaan soj se vaa ca'vee a doj cachén xcuu yo' yu'uj taj tacúún cúu nuvá, ndaa rá se vaa sí ru'vee, ne se guun cachén so' cayáan so' ga Diose asa' guun chij Diose rihaan chumii nihánj a ma' —taj Jesucristó rihaan nij so' a.

<sup>26</sup> Gaa ne ca'anj ndo'o rá nij so', ne cataj nij so' rihaan Jesucristó a:

—Che'é dan me se me sí guun nucuaj quinani rihaan sayuun ga —taj nij so', xná'anj nij so' man so' a.

<sup>27</sup> Ni'yaj Jesucristó man nij so', ne cataj so':

—Se guun nucuaj yuvii quinani ma'an nij yuvii rihaan sayuun ma'. Sayuun uxrá vaa rihaan nij so' nanj adonj. Tzaj ne xa' rihaan Diose me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj Jesucristó a.

<sup>28</sup> Gaa ne guun che'e Pedró cataj Pedró:

—Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

<sup>29</sup> Gaa ne cataj Jesucristó:

—Ya ya cataj xna'anj 'unj rihaan nij soj se vaa sí tanáj ve' tucua tanáj tinúú tanáj ra'vij tanáj nii tanáj rej tanáj ta'ní tanáj to'óo tanáj che'é se me rá so' canoco' so' manj ne nata' so' se-nanaj nana sa' rihaan yuvii, <sup>30</sup> ne cientó doj a rasuun quiri' uún so' gaa vaa i'na' so' rihaan chumii nihánj cuano adonj. Dan me se cumán que'ee ve' tucua so' do', tinúú so' do', ra'vij so' do', nii so' do', ta'ní so' do', to'óo so' do', rihaan so' gaa vaa i'na' so' rihaan chumii nihánj, tzaj ne vaa sayuun quiran' so' che'é 'unj adonj. Ne asa' guun chij Diose rihaan chumii nihánj me se yo'ó cayáan so' ga Diose nu' cavii nu' ca'anj nanj adonj. <sup>31</sup> Tzaj ne que'ee nij sí guun chij ndo'o rihaan chumii nihánj ro', guun nij so' sí no-co' ei. Ne que'ee nij sí ne guun chij rihaan chumii nihánj me se guun chij nij so', qui'yaj Diose nanj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa síj va'nuj cataj xna'anj Jesucristó se vaa cavi' so' ne cunuu i'na' uún so' a**

<sup>32</sup> Dan me se vaj nij so' chrej avii nij so' chuman' Jerusalén, ne táa yaan Jesucristó rihaan nij sí tucu'yón se-nana so', ne ma'anj ndo'o rá nij so', ne nij sí no-co'

xcó nij so' me se cuhu'vi' ndo'o nij so' a. Dan me se narii Jesucristó man chujij nij sí tucu'yón se-nana so', ne guun che'e so' cataj xna'anj so' rihaan nij so' daj quiran' so' a. <sup>33</sup> Dan me se cataj Jesucristó rihaan nij so', ne:

—Nihánj me ca'anj ní' chuman' Jerusalén, ne qui-ta'aa nii manj sij ca'née Diose nıcaj yu'unj man yuvii, ne nago' nii manj rihaan nij xrej ata suun no-co doj do', rihaan nij sí naqui'yaj cuu se-tucuanj Moisés rihaan yuvii do' a. Ne cuta' nij so' cacun' xráj, ne cataj nij so' se vaa cavi' 'unj a. Gaa ne nago' nij so' manj rihaan nij sí yanıj, <sup>34</sup> ne ca'nga' naco'o nij sí yanıj quene'en nij so' manj, ne quiri' talúj nij so' rihanj, ne go' nij so' cuarta xráj, ne ticavi' nij so' manj a. Gaa ne cachén va'nuj güii, gaa ne cunuu i'na' uún 'unj, qui'yaj Diose ei —taj Jesucristó rihaan chujij nij sí tucu'yón se-nana so' a.

**Nana nihánj taj xna'anj se vaa achíin ni'yaj síj cu'naj Jacobo do', síj cu'naj Juan do', se vaa cataj roj so' suun sa' doj qui'yaj Jesucristó a**

<sup>35</sup> Gaa ne cuhi' síj cu'naj Jacobo do', síj cu'naj Juan do', rihaan Jesucristó, ne ta'ní síj cu'naj Zebedeo me roj so' a. Gaa ne cataj roj so' rihaan Jesucristó a:

—Me rá rój se vaa qui'yáa so' ndaa vaa cachınj ni'yaj rój rihaan so' che'é rój, maestro —taj roj so' rihaan Jesucristó a.

<sup>36</sup> Gaa ne cataj Jesucristó rihaan roj so' a:

—Daj qui'yáj che'é roj soj, rá roj soj ga —taj so', xna'anj so' man roj so' a.

<sup>37</sup> Gaa ne cataj roj so' rihaan Jesucristó a:

—Cataj xna'anj so' se vaa asa' guun chij so' rihaan chumii nihánj, ne quitaj rój x'núú so', ne cataj rój suun sa' doj, qui'yáa so' á. Dan me se yo'ó rój cayáan rej nuva' so', ne yo'ó rój cayáan rej nichruún so', ne quiri' ta'nga' rój ga so', cataj so', rá rój a —taj roj síj cu'naj Jacobo ga Juan rihaan Jesucristó a.

<sup>38</sup> Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachíin ni'yaj roj soj rihanj nihánj a ma'. 'O se guun nucuaj roj soj quiran' roj soj sayuun ndaa vaa quiran' 'unj na' —taj Jesucristó, xna'anj Jesucristó man roj so' a.

<sup>39</sup> —Guun nucuaj rój ei —taj roj so' a.

Gaa ne cataj Jesucristó rihaan roj so' a:

—Ya ya quiran' roj soj sayuun gaj nanj á. <sup>40</sup> Tzaj ne ne nó xcúnj cataj xna'anj 'unj me sí cayáan x'núú 'unj rej nuva' 'unj do', rej nichrunj do', ma'. Qrún' Diose me sí cataj xna'anj me sí quiri' ta'nga' gaj nanj adonj —taj Jesucristó a.

<sup>41</sup> Gaa ne cuno yo'ó chi' nij sí tucu'yón se-nana Jesucristó se vaa ca'mii roj síj cu'naj Jacobo ga Juan rihaan Jesucristó, gaa ne guun che'e nij so' ca'maan rá nij so' ni'yaj nij so' man roj so' a.

<sup>42</sup> Gaa ne canacúún Jesucristó man cunudanj nij so' se vaa ca'nga' nij so' rihaan so' a. Ne cataj so':

—Ne'en soj se vaa nij síj ata suun man rihaan chumii nihánj me se rii ta'nga' uxrá nij so' rihaan tuvi' nij so' nanj adonj. <sup>43</sup> Tzaj ne se gaa danj se a nuj ní' qui'yaj ní'

ma'. 'O se sese me rá ní' guun chij ní' rihaan tuvi' ní', ne guun ní' síi qui'yaj suun rihaan taran' tuvi' ní', <sup>44</sup> ne ase vaa mozó ro', danj gaa xa' ní' rihaan tuvi' ní' nanj adonj. <sup>45</sup> Dan me se ca'née Diosé manj nıcaj yu'unj 'unj man yuvii, tzaj ne ne ca'na' 'unj ne guun nij yuvii mozó rihanj ma'. 'O se ca'ná' 'unj qui'yaj suun ma'anj rihaan nij yuvii nanj adonj. Ne ca'ná' 'unj nayon ma'anj rihaan yuvii ne cavii 'unj che'é cacun' atá nij so', gaa ne cavii sa' uxrá nij so', qui'yáj nanj adonj —taj Jesucristó a.

### Nana nihánj taj xna'anj se vaa naxra' rihaan síi cu'naj Bartimeo, qui'yaj Jesucristó a

<sup>46</sup> Gaa ne catúj nij so' chuman' Jericó a. Gaa ne curihanj Jesucristó do', nij síi tucu'yón se-nana so' do', que'ee yuvii do', chuman' Jericó, ne dan me se yáan 'o síi tuchrij cu'naj Bartimeo tu'va chrej, ne ta'níi síi cu'naj Timeo me so', ne síi achíin caridad me so' a. <sup>47</sup> Gaa ne xcaj so' cuentá se vaa Jesucristó síi cavii chuman' Nazaret me síi cachén rej ne so', ne che'é dan guun che'e so' caguáj so', ne cataj so':

—Ya ya ta'níi ta'nij si'no síi cu'naj David síi cane gaa naá mé so', Jesús. Cunuu 'ee rá so' manj ei —taj so' a.

<sup>48</sup> Tzaj ne:

—Dínj tu'vá so' á —taj que'ee nij yuvii rihaan so' a.

Tzaj ne doj a nucuaj caguáj so', cataj so':

—Ta'níi ta'nij si'no síi cu'naj David síi cane gaa naá ei. Cunuu 'ee rá so' manj ei —taj uún so' a.

<sup>49</sup> Gaa ne canicun' Jesucristó, ne ca'ne' Jesucristó suun rihaan nij síi nicun' ga so' se vaa ca'anj nacaj nij so' man síi tuchrij yo' ne ca'na' so' rihaan Jesucristó a. Gaa ne ca'anj canacunj nij so' man síi tuchrij, ne cataj nij so':

—Yo'ó ca'nej nucuaj nimán so' ei. Nacúun so' mán so', ne naxumaan so', ca'anj ní' á —taj nij so' rihaan síi tuchrij cu'naj Bartimeo a.

<sup>50</sup> Gaa ne tanáj so' yatzíj taj xráa so', ne güéj so', ne ca'na' so' rihaan Jesucristó a.

<sup>51</sup> Gaa ne xna'anj Jesucristó man so', cataj Jesucristó:

—Daj qui'yáj mán so', rá so' ga —taj Jesucristó a.

Ne:

—Cunuu sa' rihanj, raj, maestro —taj so' rihaan Jesucristó a.

<sup>52</sup> Gaa ne cataj Jesucristó rihaan so' a:

—Ca'vee ca'anj so' á. Maan che'é se amán rá so' ni'yaj so' manj ro', che'é dan cunuu sa' rihaan so' ei —taj Jesucristó rihaan so' a.

Nu' ca'mii Jesucristó danj, ne nu' curuvi' rihaan síi tuchrij yo', ne ca'anj so' ga Jesucristó chrej vaj Jesucristó a.

### Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a

**11** Gaa ne quinichrun' Jesucristó ga nij síi tucu'yón se-nana so' roj chuman' cu'naj Betfagé ga Betania, ne roj chuman' yo' ro', naj nichrun' tu'va chuman' Jerusalén, ne tacóo quij cu'naj Quij man Chruun Olivó naj roj chuman' yo' a. Gaa ne ca'née Jesucristó man vij

tuvi' nij síi tucu'yón se-nana so' ca'anj rque chuman' Betfagé yo', <sup>2</sup> ne cataj so' rihaan roj so' a:

—Cavii roj soj ca'anj soj, ne catuu roj soj chuman' nihánj chuman' naj rihaan ní', ne nu' catúj roj soj, ne nu' nari' roj soj man yo'ó burró le'ej ya'anj numii a. Dan me se nache roj soj man xo', ne nıcaj roj soj ca'na' roj soj rihanj nihánj á. <sup>3</sup> Ne sese xna'anj nii man roj soj me che'é 'yaj roj soj danj ga burró, ne cataj roj soj: "Síi 'nij ra'a man ní' achiin xcuu nihánj rihaan chuguanj. Ne nu' navij suun rihaan burró nihánj, ne nu' ca'nej uún so' man núj ca'na' tanáj uún núj man burró nihánj ei", cataj roj soj á —taj Jesucristó rihaan roj síi tucu'yón se-nana so' a.

<sup>4</sup> Dan me se ca'anj roj so', ne catúj roj so' chuman', ne nari' roj so' man burró le'ej, ne nicun' xo' rá 'o callé rihaan ta'yaa, ne numii xo' a. Dan me se nache roj so' man xo' a. <sup>5</sup> Ne nicun' doj nij yuvii rej yo', ne xna'anj nij so' man roj so', ne cataj nij so':

—Me che'é nache roj soj burró ga —taj nij síi nicun' rej yo' a.

<sup>6</sup> Ne ca'mii roj síi tucu'yón se-nana Jesucristó ndaa vaa ca'ne' Jesucristó suun rihaan roj so', gaa ne ca'vej rá nij síi nicun' rej yo' nıcaj roj so' burró ca'na' roj so' a.

<sup>7</sup> Dan me se nıcaj roj so' burró ca'na' uún roj so' rej nicun' Jesucristó, ne cuta' roj so' sagan' roj so' xráa burró, ne cavii Jesucristó xráa burró yo' a. <sup>8</sup> Dan me se uchruj ndo'o nij yuvii yatzíj sagan' nij so' rá chrej, ne achén Jesucristó ga burró yo' rihaan yatzíj a. Ne yo'ó ta'aj nij yuvii ro', a'ne' nij so' rcoj ra'a chruun do', coj man tacaan do', uchruj nij so' rá chrej, ne achén Jesucristó ga burró le'ej a.

<sup>9</sup> Ne vaj yuvii taj yaan rihaan Jesucristó, ne 'na' yuvii nocó' rej xco Jesucristó, ne caguáj nij yuvii, cataj nij yuvii:

—Caraa guée ní' rihaan Diosé ei. 'Na' síi ca'née síi 'nij ra'a man ní' ei. Se luj ndo'o me 'yaj Diosé che'é ní' ei.

<sup>10</sup> Cunaj uxrá vaa 'na' síi guun chij ndaa vaa guun chij xij ní' síi cu'naj David gaa naá ei. Caraa guée ní' rihaan Diosé síi nicun' xta' ei —taj nij yuvii yo', caguáj nij so' a.

<sup>11</sup> Gaa ne catúj taran' nij so' rihaan nuvíi nocoo ne chuman' Jerusalén, ne ni'yaj Jesucristó man cunudanj nij rasuun man anicaj rihaan nuvíi nocoo, ne maan che'é se nichrun' guun rmi', ne che'é dan curihanj uún Jesucristó ga chuvij nij síi tucu'yón se-nana so', ne nıcaj so' ca'anj so' chuman' Betania a.

### Nana nihánj taj xna'anj daj ca'mii Jesucristó rihaan chruun nuvi' chruj raá a

<sup>12</sup> Ne yo'ó güii me se curihanj uún nij so' chuman' Betania, ne na'aan rque Jesucristó a. <sup>13</sup> Gaa ne gan' nicun' 'o chruun man chruj higó quene'en Jesucristó, ne taj coj raá chruun yo' a. Ne cuchi' so' tacóo chruun, ne ni'yaj so', ne taj vaj a doj chruj man raá chruun a. Maan nanj coj uun táá raá chruun yo' a. 'O se nuveé tió man chruj higó me yo' a. <sup>14</sup> Gaa ne cataj Jesucristó rihaan chruun a:

—Daj chihaa mįj se cumán chruj raá so' cha yuvii a ma' —taj so' rihaan chruun man chruj higó yo' a.

Nę cuno nij sí tucu'yón se-nanā so' se vaa ca'mii so' danj rihaan chruun yo' a.

**Nanā nihánj taj xna'anj se vaa quirii Jesucristó man nij yuviĭ tu'véj rasuun man rá nuví nocoo a**

<sup>15</sup> Gaa nę catúj Jesucristó gā nij sí tucu'yón se-nanā so' chuman' Jerusalén, gaa nę catúj Jesucristó rá nuví nocoo, gaa nę guun che'e so' quirii so' man nu' nij sí tu'véj rasuun do', man nij sí quiránj rasuun man rá nuví nocoo do' a. Nę tiguĭj ra'a so' nij chruun mesá natuná nii sa'anj rihaan, nę tiguĭj ra'a so' chruun xlá taj nij sí tu'véj cha'aan a. <sup>16</sup> Nę caráán so' chrej se cata nij yuviĭ rasuun 'eē cachēn nij so' rque nuví a. <sup>17</sup> Gaa nę tucu'yón so' man nij sí man rihaan nuví, nę cataj so':

—Yā uxrá danj Diose taj se vaa tucúá Diose rej na'víj ndāa nij yuviĭ yanĭj rihaan Diose me nihánj á. Tzaj nę guun tucúá sí ituy man tucúá Diose nihánj, qui'yaj soj nanj á —taj Jesucristó a.

<sup>18</sup> Nę cuno nij xrej do', nij sí naqui'yaj cyu se-tucuanj Moisés rihaan yuviĭ do', se-nanā Jesucristó, gaa nę nano' uxrá nij so' daj qui'yaj nij so' nę ca'vee cavi' Jesucristó a. 'Q se chu'vi' nij so' ni'yaj nij so' man Jesucristó, che'é se ca'anj ndo'o rá cunudanj nij yuviĭ cuno nij yuviĭ nanā tucu'yón Jesucristó a. <sup>19</sup> Tzaj nę ca'anj güii, nę nichrun' guun rmi', nę curihanj uún Jesucristó gā nij sí tucu'yón se-nanā so' chuman' Jerusalén ca'anj nij so' a.

**Nanā nihánj taj xna'anj daj quiran' chruun man chruj higó raā a**

<sup>20</sup> Gaa nę rej na'yaan yo'ó güii me se vaj Jesucristó gā nij sí tucu'yón se-nanā so' chrej, nę cachēn nij so' rej nicun' chruun higó ca'mii Jesucristó rihaan gaa güii quii, nę dan me se yo'q nacoō ndāa yáá nu' chruun yo' a. <sup>21</sup> Dan me se nanuj rá sí cu'naj Pedró daj ca'mii Jesucristó rihaan chruun yo', nę che'é dan cataj so' rihaan Jesucristó a:

—Ni'yaj so', maestro. Nacoō nu' chruun ca'mii chreé so' rihaan gaa quii nanj á —taj Pedró rihaan Jesucristó a.

<sup>22</sup> Gaa nę cataj Jesucristó rihaan taran' nij so' a:

<sup>23</sup> —Cuchuman rá soj ni'yaj soj Diose ei. Yā yā cataj xna'anj 'unĭj rihaan soj se vaa me ma'an 'o sí cataj rihaan ndāa quij xcaan yo' se vaa curihanj quij rej nicun' quij nę ca'anj nij quij rque na ya'anj, nę sese se guun vĭj rá so' nę cuchuman yā rá so' se vaa guun nu' ndāa vaa cataj so', nę yā guun ndāa vaa cataj so' adonj.

<sup>24</sup> Che'é dan cataj xna'anj 'unĭj rihaan soj se vaa nu' se vaa cachĭnj ni'yaj soj rihaan Diose ro', sese cuchuman rá soj se vaa aj qui'yaj Diose danj che'é soj, nę yā yā guun ndāa vaa cachĭn ni'yaj soj adonj. <sup>25</sup> Nę gaa nicun' soj achĭn ni'yaj soj rihaan Diose, nę sese vaa cacun' qui'yaj yo'q so' rihaan soj, nę carāā x'naa soj che'é cacun' tumé tuvi' soj, gaa nę ca'vee carāā x'naa Rej soj sí nicun' xtā' ni'yaj so' cacun' tumé ma'an soj adonj.

<sup>26</sup> Tzaj nę sese se ca'vej rá soj carāā x'naa soj che'é ca-

cun' qui'yaj tuvi' soj rihaan soj, nę daj chihāā mĭj se tinavĭj Rej soj sí nicun' xtā' cacun' tumé ma'an soj a ma' —taj Jesucristó rihaan nij sí tucu'yón se-nanā so' a.

**Nanā nihánj taj xna'anj se vaa xná'anj nii man Jesucristó me sí ca'ne' suun rihaan so' qui'yaj so' ndāa vaa 'yaj so' a**

<sup>27</sup> Gaa nę catúj uún Jesucristó gā nij sí tucu'yón se-nanā so' rque chuman' Jerusalén, gaa nę chéé Jesucristó rá nuví nocoo, nę cuchi' nij xrej atā suun nocoo doj do', nij sí naqui'yaj cyu se-tucuanj Moisés rihaan yuviĭ do', nij sí uun chĭj rihaan nij yuviĭ do', rihaan so', <sup>28</sup> gaa nę cataj nij so' rihaan so' a:

—Me sí ca'ne' suun rihaan so' qui'yáá so' ndāa vaa 'yáá so' gā —taj nij so' a.

<sup>29</sup> Gaa nę cataj Jesucristó rihaan nij so' a:

—Nę vaa yo'q nanā xnā'anj 'unĭj man nij soj, nę sese yā cataj xna'anj nij soj nanā yo' rihanj, nę cataj xna'anj 'unĭj rihaan soj me sí ca'ne' suun rihanj a. <sup>30</sup> Dan me se me sí ca'ne' suun rihaan sí cu'naj Juan cutā' ne so' man yuviĭ, rá soj gā. Ma'an Juan cavii raā na'. Ase Diose cataj xna'anj rihaan so' xā'. Cataj xna'anj nij soj rihanj á —taj Jesucristó a.

<sup>31</sup> Gaa nę nuchruj raā ndo'o nij so' gā tuvi' nij so', nę cataj nij so':

—Sese cataj ní' se vaa Diose ca'ne' suun rihaan sí cu'naj Juan cutā' ne so' man yuviĭ, nę cataj Jesucristó rihaan ní' me che'é ne cuchuman rá ní' nanā ca'mii Juan, cataj so' a. <sup>32</sup> Tzaj nę daj chihāā mĭj se ca'vee cataj ní' se vaa ma'an Juan cavii raā qui'yaj danj ma' —taj nij so' rihaan tuvi' nij so', che'é se cuchu'vi' nij so' ni'yaj nij so' man nij yuviĭ a.

'Q se nij yuviĭ me se sí ca'néé Diose natā' se-nanā Diose rihaan yuviĭ me yā sí cu'naj Juan, rá cunudanj nij yuviĭ a.

<sup>33</sup> Gaa nę cataj nij so' rihaan Jesucristó a:

—Ne ne'en núj me sí ca'ne' suun rihaan sí cu'naj Juan cutā' ne so' man yuviĭ ma' —taj nij so' a.

—Che'é dan se cataj xna'anj 'unĭj rihaan nij soj me sí ca'ne' suun rihanj qui'yáj ndāa vaa 'yáj ma' —taj Jesucristó rihaan nij so' a.

**Nanā nihánj me cuentó nanó Jesucristó che'é yuviĭ chi'ĭi 'yaj suun rihaan yo'óo a**

**12** Gaa nę guun che'e Jesucristó nanó so' cuentó rihaan nij so' a:

—Dan me se cuchruj yo'q so' naā chruj uvá, nę qui'yaj so' chingá nu' anicaj tu'va naā yo', gaa nę gáán so' yu'uj rej xtun' chruj uvá nę cavĭi na, nę cune' so' 'o ve' nata' cayáán nij sí cutumé naā yo' a. Gaa nę tanáj so' naā yo' rihaan sí qui'yaj suun naā yo', nę curihanj so' ca'anj so' gan' a. <sup>2</sup> Cachēn doj yavii, nę quisĭj yavii cutā' nii chruj uvá, nę ca'néé sí xnāā yo' man yo'q se-mozó so' rihaan nij sí nuu tumé xnāā so' a. Me rá so' ca'na' nĭcaj se-mozó so' doj chruj uvá rihaan ma'an so' a. <sup>3</sup> Gaa nę quita'aa nij sí nuu tumé naā man



se-mozó sí xnaa, ne go' uxrá nij so' chruun xráa so', ne ca'née nij so' man so' rihaan sí xnaa a. Tzaj ne a doj chruj uvá ne nıcaj so' ca'anj so', qui'yaj nij so' a ma'. <sup>4</sup> Gaa ne ca'née sí xnaa man yo'ó mozó rihaan nij sí nuu tumé xnaa so' uún a. Tzaj ne go' nij so' raá so', ne qui'yaj chi'ij nij so' man so' a. <sup>5</sup> Gaa ne ca'née sí xnaa yo'ó mozó uún, ne ticavi' nij sí nuu tumé naa man so', ne que'ee doj mozó ca'née uún sí xnaa, ne ta'aj nij so' go' nij sí nuu tumé naa xráa, ne yo'ó ta'aj nij so' ticavi' nij sí nuu tumé naa, <sup>6</sup> ne daj orún' so' quináj, ne sí quináj me ta'ní sí xnaa, ne 'ee ndo'o rá sí xnaa man ta'ní so' a. Tzaj ne ca'née sí xnaa yo' man ta'ní so' rihaan nij sí tumé xnaa so' a. "Caraa cochroj nij sí tumé naa rihaan ta'níj sese ca'anj ta'níj saj xee", taj sí xnaa yo' a.

<sup>7</sup> "Tzaj ne cataj nij sí tumé naa rihaan tuvi' nij so': "Sí nihánj me sí guun xnaa naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj", taj nij so' ni'yaj nij so' man ta'ní sí xnaa a. <sup>8</sup> Gaa ne quita'aa nij so' man ta'ní sí xnaa yo', ne ticavi' nij so' man so', ne quiri'ij nij so' man so' xe' a.

<sup>9</sup> "Ne daj qui'yaj sí xnaa man nij sí tumé xnaa so', rá soj ga. Dan me se ca'na' so', ne ticavi' so' man nij so', ne tıcuachén so' xnaa so' rihaan yo'ó sí tumé xnaa so' a. <sup>10</sup> Ne me che'é ne nayaa nij soj nana nihánj nana no rihaan danj Dıose ga: "Yuvej quiri'ij nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj. <sup>11</sup> Ma'an sí 'nij ra'a man ní' qui'yaj yo', ne cunaj uxrá vaa yo', rá ní' á", taj danj Dıose a —taj Jesucristó rihaan nij sí uun chij rihaan nij yuvij israelitá a.

<sup>12</sup> Gaa ne nanó rá nij so' daj gaa quita'aa nij so' man Jesucristó, tzaj ne chuchuvi' nij so' ni'yaj nij so' man nij yuvij a. Ése che'e ma'an nij so' me cuentó nanó Jesucristó a. Ase vaa nij sí nuu tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. Gaa ne tanáj nij so' man Jesucristó, ne ca'anj nij so' a.

### Nana nihánj taj xna'anj che'é puextó go' ní' rihaan gobiernó ne che'é se rque ní' rihaan Dıose do' a

<sup>13</sup> Gaa ne ca'née nij sí uun chij yo' doj sí fariseo do', doj sí noco' man sí cu'naj Herodes do', rihaan Jesucristó, che'é rej cuta' nij so' cacun' xráa Jesucristó che'é nana ca'mij Jesucristó a. <sup>14</sup> Dan me se cuchi' nij sí tihá' yu'unj yo' rihaan Jesucristó, ne cataj nij so' rihaan so' a:

—Ne'en núj se vaa nana ya inanj a'mii so', maestro. Ne ne chu'ví' so' ni'yaj so' man nij yuvij daj cataj nij yuvij ma'. Ne 'o cuyaaan vaa nu' yuvij rihaan so' chuguanj. Maan se ya tucuyón so' rihaan yuvij daj qui'yaj yuvij canoco' yuvij man Dıose adonj. Ne no xcúun yuvij go' yuvij puextó rihaan sí nicaj suun gobiernó na'. Ase se go' yuvij xa'. Dan me se go' núj na'. Se go' núj xa' —taj nij so', xna'anj nij so' man Jesucristó a.

<sup>15</sup> Dan me se aj ne'en Jesucristó se vaa sí nucui' rá me nij sí xna'anj nana yo' man so', ne che'é dan cataj so' rihaan nij so' a:

—Me che'é me rá soj tihá' yu'unj soj manj ne cuta' soj cacun' xráj ga. Tihaaan soj 'o sa'anj aga' rihaan ni'yaj á —taj Jesucristó rihaan nij sí me rá tihá' yu'unj man so' a.

<sup>16</sup> Ne tihaaan nij so' 'o sa'anj aga' rihaan so', ne xna'anj so' man nij so', cataj so':

—Me sí nó rihaan sa'anj aga' nihánj ga. Ne me sí se-chuvij nó rihaan sa'anj aga' nihánj ga —taj Jesucristó, xna'anj so' man nij sí me rá tihá' yu'unj yo' a.

—Sí nicaj suun gobiernó me nó rihaan sa'anj aga' yo', ne nó se-chuvij so' rihaan sa'anj ei —taj nij so' a.

<sup>17</sup> Gaa ne cataj Jesucristó:

—Go' soj si'yaj sí nicaj suun rihaan ma'an so', ne rque soj si'yaj Dıose rihaan Dıose á —taj Jesucristó a.

Gaa ne ca'anj ndo'o rá nij sí me rá tihá' yu'unj yo' ni'yaj nij so' man Jesucristó a.

### Nana nihánj taj xna'anj se vaa ya cunuu i'na' uún nij sí cavi' a

<sup>18</sup> Gaa ne cuchi' doj sí saduceo rihaan Jesucristó a. Nij sí saduceo ro', a'mii nana nihánj se vaa daj chihaa mij se cunuu i'na' uún yuvij asa' cavi' yuvij, taj nij so' a. Dan me se xna'anj nij so' man Jesucristó, ne cataj nij so' nana nihánj a:

<sup>19</sup> —Cachrón sí cu'naj Moisés nana nihánj rihaan yanj cunó ní' a: "Sese cavi' yo' o so', ne sese quináj uun nicá so', ne sese taj vaj ta'ní so', ne no xcúun tinúu so' xcaj tinúu so' man choco' so' chana quináj, ne cotoj tinúu sí cavi' ga choco' so', ne cuchruj no' ne'ej, ne guun ta'nij sí cavi' man ne'ej yo' ne cunuú ne'ej yo' rihaan to'óo sí cavi' yo' a", me nana cachrón sí cu'naj Moisés rihaan yanj gaa naá, maestro. <sup>20</sup> Dan me se vaa chij nij tinuj 'o nij so', ne sí chava' me se xcaj so' chana, gaa ne cavi' so', ne taj vaj ne'ej cuchruj chana nicá so', qui'yaj so' a. <sup>21</sup> Gaa ne xcaj scue'ee sí cavi' man choco' so' chana cavi' nica, gaa ne cavi' so' uún, ne taj vaj ne'ej cuchruj chana yo', qui'yaj so', ne veé danj xcaj scue'ee so' uún man chana, ne so' cavi' uún, ne veé danj qui'yaj cunudanj chij nij tinuj nij so', ne xcaj cunudanj nij so' man orún' chana yo', tzaj ne cavi' cunudanj nij so', ne taj vaj a 'o ne'ej cuchruj chana yo' a man adonj. <sup>22</sup> Ndaa síj, gaa ne cavi' ma'an chana uún, <sup>23</sup> ne dan me se asa' cunuu i'na' uún nij sí cavi', gaa ne me tuvi' nij so' nıcaj man chana yo', rá so' ga. 'O se gaa vaa i'na' nij so', ne nica taran' nij tinuj nij so' guun orún' no' a —taj nij sí saduceo, xna'anj nij so' man Jesucristó a.

<sup>24</sup> Gaa ne cataj Jesucristó rihaan nij so' a:

—Ne ne'en uxrá soj ma'. 'O se ne ne'en soj me taj danj Dıose, ne ne ne'en soj sese nucuaj ndo'o Dıose a. <sup>25</sup> 'O se asa' cunuu i'na' uún nij sí cavi', ne se xcaj tuvi' nij so' a ma'. 'O se ase vaa yáan nij se-mozó Dıose rej xtá' ro', danj gaa cayáan nij so' nanj adonj. <sup>26</sup> Gaa ne cataj xna'anj 'unj rihaan soj daj gaa quene'en soj se vaa ya ya cunuu i'na' uún yuvij asa' cavi' yuvij ei. Ataa

nayaḡ soj nana nihánj nana nḡ rihaan danj Moisés nana che'é coj aco' ya'an raḡ na'. Ne dan me se gaa quene'en Moisés coj yo', ne cataj Diose rihaan Moisés: "Diose síi nocḡ' nij síi man gaa naá síi cu'naj Abraham do', síi cu'naj Isaac do', síi cu'naj Jacobo do', mej a". Danj cataj Diose che'é nij síi man gaa naá yo' a. <sup>27</sup> Dan me se nuveé se-Diose nij xngá me Diose ma'. Inañj nij síi vaa i'na' a'vee nocḡ' man Diose nanj adonj. Che'é dan, nda' se síi cane gaa naá me va'nuj nij so', tzaj ne vaa i'na' nij so' rihaan Diose nanj ei. Ne ne'en uxrá soj ḡ ma' —taj Jesucristó rihaan nij síi saduceo yo' a.

### Nana nihánj taj xna'anj me nana me nana nocḡo doj cunḡ ní' a

<sup>28</sup> Gaa ne yo'ḡ nij síi naqui'yaj cūu se-tucuḡnj Moisés cuhi' rihaan Jesucristó, ne so' ro', me síi cunḡo daj ca'mii Jesucristó ḡa nij síi saduceo yo', ne quene'en so' se vaa sa' uxrá ca'mii Jesucristó, ne che'é dan xná'anj so' man Jesucristó, ne cataj so':

—Me nana me nana nocḡo doj rihaan cunḡdanj nij nana cataj xna'anj Diose rihaan ní' cunḡo ní' ḡa —taj so', xná'anj so' man Jesucristó a.

<sup>29</sup> Gaa ne cataj Jesucristó rihaan so' a:

—Nana nocḡo doj rihaan cunḡdanj nij nana cunḡo ní' me nana nihánj, ne: "Cunḡo soj sij israelitá, ne Diose síi 'nij ra'a man ní' me se ḡruun so', <sup>30</sup> ne ndaa nimán yá so' ḡruun rá so' ni'yaj so' man Diose síi 'nij ra'a man ní', ne yo'ḡ ndaa cúu yave yá so' cuchuman ya rá ni'yaj man Diose, ne ndaa nu' se nucuaj yá so' caraḡ cochroj rihaan Diose nanj adonj". Ne nihánj me ya nana uun chij ya nanj ei. <sup>31</sup> Ne vaa yo'ó nana nihánj nana me rá Diose cunḡo uún ní' a: "Adi' se 'ee rá so' man ma'án so' ro', danj gaa 'ee rá so' man tuvi' so' á". Taj vaj yo'ó nana nocḡo doj rihaan roj nana nihánj nana cataj xna'anj Diose rihaan ní' ḡa man adonj —taj Jesucristó rihaan síi naqui'yaj cūu se-tucuḡnj Moisés yo' a.

<sup>32</sup> Gaa ne cataj síi naqui'yaj cūu se-tucuḡnj Moisés yo' rihaan Jesucristó a:

—Cunaj uxrá ca'mii so', maestro, ne ya uxrá vaa nana ca'mii so', se vaa ḡruun Diose, ne taj vaj tuvi' Diose, maḡan se ḡruun so' nicun', <sup>33</sup> ne ya uxrá vaa nana se vaa sese ndaa nimán ya ní' ḡruun rá ní' ni'yaj ní' man Diose do', sese yo'ḡ cuchuman rá ndaa cúu yave ya ní' ni'yaj ní' man Diose do', sese ndaa nu' se nucuaj man ní' caraḡ cochroj rihaan Diose do', sese gaa 'ee rá ní' man tuvi' ní' ndaa se 'ee rá ní' man ma'án ní' do', ne sa' doj vaa tucuáán nihánj rihaan nu' tucuáán nago' que'ee scúj cacaa rihaan Diose nanj chuguḡnj —taj síi naqui'yaj cūu se-tucuḡnj Moisés yo' rihaan Jesucristó a.

<sup>34</sup> Gaa ne quene'en Jesucristó se vaa ya cavii raḡ síi ca'mii danj rihaan so', ne che'é dan cataj Jesucristó rihaan so':

—So' me se nichrun' ya ḡruun chij Diose nimán so' nanj ei —taj Jesucristó rihaan so' a.

Ne taj vaj síi quisj rá xná'anj yo'ó nana man Jesucristó ḡ ma'.

### Nana nihánj taj xna'anj se vaa síi ca'neé Diose tinanii man yuvii rihaan sayuun ro', nuveé nanj yuvii me so' ma'

<sup>35</sup> Dan me se gaa tucu'yón Jesucristó se-nana so' man nij yuvii rá nuvií nocḡo, ne cataj so':

—Nij síi naqui'yaj cūu se-tucuḡnj Moisés rihaan yuvii ro', me che'é taj nij so' se vaa nanj ta'níi ta'nij si'nḡo síi cu'naj David síi cane gaa naá me síi ca'na' tinanii man yuvii rihaan sayuun, rá soj ḡa. <sup>36</sup> 'Ḳ se nuú Nimán Diose nimán síi cu'naj David, ne cataj síi cu'naj David: "Ca'mii Diose síi 'nij ra'a man ní' rihaan síi 'nij ra'a manj, cataj so' se vaa cayáán síi 'nij ra'a manj x'núu Diose rej nuva' Diose ndaa se quisj qui'yaj canaán Diose rihaan taran' nij síi taj ri'yunj man síi 'nij ra'a manj ne quirii ta'nga' síi 'nij ra'a manj rihaan nij so' nanj adonj", taj síi cu'naj David yo' a. <sup>37</sup> Dan me se síi 'nij ra'a man síi cu'naj David me síi ca'nej Diose tinanii man yuvii rihaan sayuun, taj síi cu'naj David yo' a. Sese 'nij ra'a so' man David, ne me che'é taj nij síi naqui'yaj cūu se-tucuḡnj Moisés se vaa nanj ta'níi ta'nij si'nḡo David me so' ḡa. Taj che'é cataj nij so' se vaa nanj yuvii me so' ma' —taj Jesucristó rihaan nij yuvii man rá nuvií nocḡo a.

Que'ee nij yuvii cunḡo se-nana Jesucristó, ne guun niha' rá nij so' cunḡo nij so' se-nana so' a.

### Nana nihánj taj xna'anj che'é cacun' tumé nij síi naqui'yaj cūu se-tucuḡnj Moisés rihaan yuvii a

<sup>38</sup> Dan me se gaa tucu'yón Jesucristó se-nana so' man nij yuvii, ne cataj so':

—Xcaj nij soj cuentá daj 'yaj nij síi naqui'yaj cūu se-tucuḡnj Moisés rihaan yuvii, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunuú nij so' yatzij sa' xcaḡan cachee nij so' rej quene'en yuvii man nij so', ne me rá nij so' ca'mii sa' yuvii ḡa nij so' gaa chéé nij so' rihaan yu'vee a. <sup>39</sup> Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuḡnj Moisés do', gaa 'anj nij so' cha'anj do' a. <sup>40</sup> Ne a'néj nij so' ve' tucuá chana cavi' nica, ne yuun che'e guun tucuḡ nij so' man ve' yo', ne 'yaj xcaḡan ndo'o nij so' cuentó achíin ni'yaj nij so' rihaan Diose, che'é rej sa' doj ḡruun nucuaj nij so' tiha' yu'unj nij so' man yuvii a. Xa' nij so', tzaj ne che'é se vaa 'yaj nij so' ro', che'é dan doj ḡ gaa sayuun quiran' nij so' qui'yaj Diose, asa' ca'ne' Diose cacun' che'é yuvii adonj —taj Jesucristó rihaan nij yuvii a.

### Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a

<sup>41</sup> Dan me se taj Jesucristó rej taj chrúun sa'anj taj rihaan nuvií nocḡo, ne ne'en so' daj qui'yaj nij yuvii gaa araa nij yuvii sa'anj aga' rque chrúun sa'anj yo' che'é Diose, ne dan me se man ndo'o síi ru'vee araa uxrá sa'anj rque chrúun yo' a. <sup>42</sup> Ne dan me se ca'na' 'ḡ chana cavi' nica chana nique, ne caraa no' vij guée

sa'anj aga' le'ej rque chrúun yo' a. <sup>43</sup> Gaa ne canacúun Jesucristó man nij sí tucu'yón se-nanā so' ca'na' nij so' rihaan so', gaa ne cataj so' rihaan nij so' a:

—Catāj xna'anj yá yá 'unj rihaan nij soj cuano se vaa xa' chana cavi' nicā chana nique nihánj, tzaj ne doj a caraa no' sa'anj rque chrúun yo' rihaan sa'anj caraa cunudanj yo'ó nij yuvií nanj adonj. <sup>44</sup> 'O se nij so', daj doj sa'anj quináj raā se-sa'anj nij so' ro', caraa nij so' rque chrúun, ne xa' no', tzaj ne ndā' se achiin ndo'o sa'anj rihaan no', tzaj ne rque no' rihaan Diose cunudanj sa'anj nicaj no' sa'anj quirāan no' se chā no' nanj adonj —taj Jesucristó rihaan nij sí tucu'yón se-nanā so' a.

### Nanā nihánj taj xna'anj se vaa canee nū' nuví nocōo ne chuman' Jerusalén a

**13** Gaa ne curihañj Jesucristó rá nuví nocōo, gaa ne yo'ō tuvi' nij sí tucu'yón se-nanā so' cataj rihaan so' a:

—Ni'yaj so', ne yuvej sa' inañj me yuvej guun nuví nocōo, ne ve'é ndo'o vaa nū' nij ve' man nuví nocōo, maestro —taj yo'ō tuvi' nij sí tucu'yón se-nanā Jesucristó a.

<sup>2</sup> Gaa ne cataj Jesucristó rihaan so' a:

—Ne'én so' nū' nij ve' nocōo man nuví nihánj na'. Vaa güii, ne canee nū' nuví nocōo nihánj, ne a 'ó yuvej se quitáá xráá tuvi' yuvej nihánj a ma' —taj Jesucristó rihaan sí tucu'yón se-nanā so' a.

### Nanā nihánj taj xna'anj che'é sayuun guun rihaan chumii nihánj vaa güii a

<sup>3</sup> Dan me se ca'anj cayáan Jesucristó raā quij cu'naj Quij man Chruun Olivó, ne ni'yaj so' nuví nocōo, ne cuhi' orún' ca'anj nij sí cu'naj Pedró do', Jacobo do', Juan do', Andrés do', rihaan so', ne xná'anj nij so' man so', cataj nij so':

<sup>4</sup> —Catāj xna'anj so' rihaan nūj aman canee nū' nuví nocōo yo' do', a me rasuun ca'na' qui'yáá so' asa' quisij ca'na' nū' nij sayuun ndaa vaa cataj xna'anj so' rihaan nūj, maestro —taj ca'anj tuvi' nij sí tucu'yón se-nanā Jesucristó rihaan Jesucristó a.

<sup>5</sup> Gaa ne guun che'e Jesucristó cataj xna'anj Jesucristó rihaan nij so', ne:

—Cūtumé ndo'o soj man soj se gaa nanj tihā' yu'unj yuvií man soj á. <sup>6</sup> 'O se ca'na' uxrā yuvií cataj: "Unj me sí na'vij soj, ne Cristó mej á", cataj nij so', ne dan me se tihā' yu'unj uxrā nij so' man tuvi' nij so' nanj á.

<sup>7</sup> "Dan me se asa' quene'en soj se vaa unu' uxrā chuman' gā tuvi' chuman', ne asa' cuno uxrā soj nanā se vaa unu' chuman' man gan' gā tuvi' chuman' yo', ne cūtumé soj man soj se chuchu'vi' nimán soj ma'. Maan se vaa che'é guun sayuun yo' rihaan chumii nihánj adonj. Tzaj ne asa' quisij guun danj, gaa ne se ca'anj ni'ya chumii nihánj nū' orá ma'. 'O se quināj chumii nihánj doj adonj. <sup>8</sup> Dan me se cunū' uxrā yuvií man chuman' nocōo gā yo'ó chuman' nocōo, ne cunū' gobiernó gā tuvi' gobiernó a. Ne cachēn yuún nocōo

que'ee chuman', ne cachēn ndo'o x'naa uún a. Nū' sayuun nihánj ro', ase vaa guun che'e 'o chana que'ee rque no' cuchruj no' ne'ej ro', danj gaa nū' sayuun nihánj nanj ei. Dan me se nū' ne'en chana ve'ee rque no', ne ne'en no' doj a quirān' no' sayuun rej rihaan no', ne ase uun rá chana yo', danj guun rá soj gaa ca'na' sayuun yo', guun rá soj se vaa daj doj guun uxrā sayuun rihaan chumii nihánj nanj adonj.

<sup>9</sup> "Ne tadó soj che'é sayuun quirān' ma'an soj ei. 'O se t̄acuachén nii man soj rihaan nij sí uun chij rihaan ní' sij israelitá, ne t̄acuachén nii man soj rihaan nij sí man rá ve' tucu'yón ní' se-tucuānj Moisés, ne maan yo' go' nii cuartá xráá soj a. Ne t̄acuachén nii man soj canicūn' soj rihaan sí nicaj suun do', rihaan sí nicaj suun rey do', che'é se me soj sí nocō' manj a. Ne cataj xna'anj soj rihaan nij sí nicaj suun che'ej a. <sup>10</sup> Ne asino ca'mii natáj soj se-nanā nanā sa' rihaan cunudanj nij sí yanij, gaa ne ca'vee quinavij chumii nihánj adonj.

<sup>11</sup> "Dan me se asa' ca'anj nicaj nii man soj rihaan nij sí nicaj suun, ne se nanó rá soj daj ca'mii soj rihaan nij so' ma'. Maan Nimán Diose rque nū' nanā ca'mii soj man orá yo' nanj adonj. 'O se nuveé ma'an soj me nij sí ca'mii rihaan nij so' ma'. 'O se Nimán Diose me sí ca'mii rihaan nij so' nanj adonj. <sup>12</sup> Dan me se ca'anj nicaj snó'o man tinúú snó'o rihaan yuvií, ne ticavi' nii man tinúú snó'o yo', qui'yaj ma'an so' nanj adonj. Ne ca'anj nicaj snó'o man ta'níí snó'o rihaan yuvií, ne ticavi' nii man ta'níí snó'o yo', qui'yaj so' ei. Ne cunū' xnii gā rej xnii, ne ca'anj nicaj xnii man rej xnii rihaan yuvií, ne ticavi' nii man rej xnii yo', qui'yaj so' ei. <sup>13</sup> Ne nachri' cunudanj nij yuvií man rihaan chumii ni'yaj nij so' man soj, che'é se me soj sí nocō' manj adonj. Tzaj ne sí nocō' raan manj ndaa se ca'anj ni'ya chumii nihánj ro', so' me sí quinānii rihaan sayuun adonj —taj Jesucristó rihaan ca'anj tuvi' nij sí tucu'yón se-nanā so' a.

<sup>14</sup> Ne soj sij nayaa nanā nihánj ro', xcāj uxrā soj cuentá me taj nanā nihánj nanā ca'mii Jesucristó che'é se chi'ii á.

Dan me se cataj uún Jesucristó:

—Aj ne'en soj se vaa vaa 'o se chi'ii qui'yaj ndo'o sayuun man yuvií, ne dan me se güii quene'en soj man se chi'ii yo' rej ne nó xcúun yo' nicūn' yo', ne yo'ō cunānj nij sí man estadó Judea ca'anj nij so' raā quij á. <sup>15</sup> Ne sí taj xráá ve' tucua' ro', se catúj so' rá ve' tucua' so' quirii so' si'yaj so' ma'. <sup>16</sup> Ne sí 'yaj suun tacaan ro', se canicaj so' nanō' so' saḡan' so' se vaa tanáj so' rihaan yo'ó ma'. Se guun raan nij so' ma'. Maan se yo'ō cunānj nij so' á. <sup>17</sup> Nique nij chana nūy rque do', chana vaa ta'níí ne'ej utzii do', güii ca'na' sayuun yo' a. 'O se se guun nucuaj chana yo' cunānj chana yo' ma'. <sup>18</sup> Cachinj ni'yaj soj rihaan Diose se vaa se ca'na' sayuun yo' güii gaa maan ma'.

<sup>19</sup> "O se güii yo' me se ca'na' uxrā sayuun, ne quij doj gaa sayuun yo' rihaan nū' nij sayuun quirān' yuvií asij qui'yaj Diose chumii, ne daj chihāā mīj se quirān' uún yuvií sayuun vaa danj ma'. <sup>20</sup> Sese que'ee uxrā güii guun sayuun, ne se quinānii yuvií rihaan sayuun yo'

ma'. Tzaj ne vaa güii quisij sayuun, qui'yaj síi 'nij ra'a man ní', che'é rej quinaniij nij síi narii so' canoco' man so' adonj.

<sup>21</sup> "Ne güii yo' me se sese cataj yuvii rihaan soj: "Ni'yaj soj ei. Nihánj 'na' síi tñanii man ní' rihaan sayuun á", ne se cuchumán rá soj ma'. <sup>22</sup> 'O se ca'na' uxrá síi ne síi cataj se vaa síi tñanii man yuvii rihaan sayuun me nij so', ne ca'na' uxrá síi ne síi cataj se vaa nata' nij so' se-nanā Diose, ne qui'yaj nij so' suun sa' nocoo, ne tihā' yu'unj nij so' man cunudanj nij yuvii man rihaan chumii nanj adonj. Ndaa nij síi narii Diose man ro', sese taj vaj Diose tumé man nij so', ne cuchumán rá soj so' ni'yaj nij so' man síi tihā' yu'unj yo' nanj adonj.

<sup>23</sup> Tadó uxrá soj á. Nihánj me se cataj xna'anj 'unj rihaan soj daj guun rihaan chumii nihánj nanj á.

<sup>24</sup> "Tzaj ne güii yo' me se asa' navij quisij sayuun yo', gaa ne guun rmi' güii guun rmi' yavii guun rmi', <sup>25</sup> ne cayuu nij yati' xtā', ne quināan taran' nij rasuun nucuaj man rej xtā' a. <sup>26</sup> Gaa ne quene'en nii mán 'unj sij ca'néé Diose nicaj yu'unj man yuvii á. Dan me se xráá ngaa quitaj 'unj ca'na' 'unj, ne guun nucuaj ndo'oj quirii ta'ngaj, ne ve'é uxrá curuvij ca'naj a. <sup>27</sup> Gaa ne ca'nej 'unj man nij se-mozó 'unj cuchí' nij so' rihaan chumii nihánj, ne dan me se naqui'yaj chre' 'unj man nij síi narii Diose man canoco' manj a. Dan me se cachee nij se-mozó 'unj rihaan nu' chumii nihánj, nanō' nij so' taran' nij síi cunuu chre' ga 'unj nanj adonj.

**Nanā nihánj taj xna'anj se vaa ya quene'en ní' se vaa nichrun' ca'na' uún Jesucristó a**

<sup>28</sup> "Tucu'yón soj nanā nihánj nanā che'é chruun man chruj higó raā á. Gaa quisij guun laruu ra'a chruun, ne naca coj ya'lij ra'a chruun, ne ne'en soj se vaa nichrun' 'na' tió namān maan a. <sup>29</sup> Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa síi nicun' ta'yaa ro', gaa 'unj ei. <sup>30</sup> Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumii nihánj cuano se vaa quisij ya 'unj nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. <sup>31</sup> Vaa güii ca'anj ni'ya yo'óo do', xtā' do', tzaj ne se-nanaj me se daj chihā' mij se quinavij yo' ma'.

**Nanā nihánj taj xna'anj se vaa ne ne'en ní' me güii ca'na' uún Jesucristó ma'**

<sup>32</sup> "Nihánj me cataj xna'anj 'unj rihaan soj se vaa a 'ó síi ne ne'en me güii ca'na' uún 'unj rihaan chumii nihánj ma'. Ca'vee se ndaa se-mozó Diose 'yaj suun rej xtā', ca'vee se ndaa ma'anj ta'nij Diose, tzaj ne ne ne'en núj me güii me yo' ma'. Orún' Réj me síi ne'en nanj adonj. <sup>33</sup> Yo'ō ni'yaj soj, ne se guun cotoj soj ma'. 'O se ne ne'en uxrá soj me güii me ca'naj ma'. <sup>34</sup> Dan me se ase vaa síi ca'anj yo'óo chuman' naj gan' vaa 'unj, ne aj tanáj 'unj ve' tucuaj, ne ca'né' 'unj suun rihaan 'o

'o nij mozó nuu rihaan se vaa ve'é cütumé nij so' nu' si'yáj, ne ase vaa síi tumé ta'yaa vaa nij soj, ne aj cataj xna'anj 'unj rihaan nij soj se vaa ni'yaj soj a. <sup>35</sup> Che'é dan tumé uxrá soj man soj, ne ni'yaj soj á. 'O se ne ne'en soj aman ca'na' 'unj sij tucua ve' ma'. Ca'vee ca'naj rej ti'nuu, ca'vee rej yan', ca'vee orá aguáj to'loo ca'vee rej na'yaan ca'vee, <sup>36</sup> ne tadó soj se guun taj ni'yón ca'naj ne nari' 'unj man soj ne xcaj 'unj cuentá se vaa otoj rma'an soj ei. <sup>37</sup> Ne nanā nihánj nanā taj xna'anj 'unj rihaan nij soj ro', veé nanā nihánj taj xna'anj 'unj rihaan cunudanj nij yuvii, se vaa tumé soj man soj se gaa nanj cotoj rma'an soj a —taj Jesucristó rihaan ca'anj tuvi' nij síi tucu'yón se-nanā so' a.

**Nanā nihánj taj xna'anj se vaa 'o guun rá nij xrej atā suun nocoo doj do', nij síi naqui'yaj cuu se-tucuaj Moisés rihaan yuvii do', se vaa cavi' Jesucristó a**

**14** Dan me se rque vij güii çanuû cha'anj pascuá cha'anj chá nij yuvii israelitá chraa yo'óo trigó, ne dan me se 'o guun rá nij xrej atā suun nocoo doj ga nij síi naqui'yaj cuu se-tucuaj Moisés rihaan yuvii se vaa tihā' yu'unj nij so' man Jesucristó, ne quita'aa yuve nij so' man Jesucristó, ne cavi' Jesucristó, qui'yaj nij so', rá nij so' a. <sup>2</sup> Ne cataj nij so':

—Se quita'aa ní' man so' gaa aman anuû cha'anj ma'. Sese danj qui'yaj ní', ne ca'maan rá nij yuvii, ne guun sayuun, qui'yaj nij yuvii nanj adonj —taj nij so' a.

**Nanā nihánj taj xna'anj se vaa caxrj 'o chanā casté raā Jesucristó a**

<sup>3</sup> Dan me se yáan Jesucristó chuman' cu'naj Betania, ne ne so' rá 'o ve' tucua síi cu'naj Simón síi canó luj ri'yuj man, ne yáan Jesucristó rihaan mesá, ne cuchí' yo'ō chanā rihaan so', ne nicaj chanā yo'ō aga' catzii nuu casté gun' daj rii nii man coj cu'naj nardo, ne casté tu'vee ndo'o me yo' a. Naxra' chanā yo' aga', ne caxrj chanā casté raā Jesucristó a. <sup>4</sup> Ne ca'maan rá ta'aj nij síi quene'en, ne cataj nij so' rihaan tuvi' nij so':

—Me che'é tiri' rma'an chanā nihánj casté sa' ga.

<sup>5</sup> Me che'é ne cutu'vee no' casté, ne quirí' no' sa'anj ase vaa 'yaj canaan yuvii rque 'o yo', ne go' no' sa'anj yo' man nij síi nique ga —taj nij so' rihaan tuvi' nij so', gaa ne guun che'e nij so' caxrj yuvaaj nij so' man chanā yo' a.

<sup>6</sup> Gaa ne cataj Jesucristó rihaan nij so' a:

—Me che'é a'mii soj danj ni'yaj soj man chanā ga. Ca'ne' guee rá nij soj doj nanj á. 'O se ve'é uxrá qui'yaj no' manj ei. <sup>7</sup> 'O se síi nique me se daj a güii mán nij síi nique ga soj, ne me ma'an güii guun rá soj, ne ca'vee qui'yaj soj se luj ga nij síi nique ei. Tzaj ne 'unj me se vaa güii ca'anj 'unj, ne quinaj uun soj, ne se ca'vee qui'yaj soj se luj che'ej ma'. <sup>8</sup> Ne chanā nihánj me se qui'yaj ma'an no' nu' ndaa vaa ca'vee qui'yaj no', ne dan me se gaa ataa cavi' 'unj ne aj caxrj no' casté gun' daj manj che'é rej xcaj soj cuentá se vaa cachin' nii manj adonj. <sup>9</sup> Ne cataj ya yá 'unj rihaan nij soj cuano se vaa me rej ma'an ca'mii natáj yuvii se-nanaj nanā sa'

rihaan nij yuvij man rihaan nu' chumij nihánj ro', ne cataj xna'anj uún yuvij rihaan tuvi' yuvij che'é se vaa qui'yaj chana nihánj manj, ne se quini'yón yuvij man chana nihánj ma' —taj Jesucristó a.

**Nana nihánj taj xna'anj se vaa cutu'véj sí cu'naj Judas man Jesucristó rihaan nij sí taj ri'yunj man Jesucristó a**

<sup>10</sup> Gaa ne sí cu'naj Judas Iscariote yo'q tuvi' chuvij nij sí tucu'yón se-nana Jesucristó me se cavii so' ca'anj so' rihaan nij xrej atá suun nocqo doj, che'é rej racuj so' man nij so' quita'aa nij so' man Jesucristó a. <sup>11</sup> Ne gaa cuno nij xrej atá suun nocqo doj, ne guun niha' uxrá rá nij so', ne cata' tu'va nij so' se vaa nago' nij so' sa'anj man sí cu'naj Judas a. Gaa ne guun che'e sí cu'naj Judas nuchruj raq so' aman ca'vee racuj so' man nij xrej atá suun nocqo doj quita'aa nij so' man Jesucristó a.

**Nana nihánj taj xna'anj se vaa ma'an Jesucristó taj xna'anj se vaa tacuachén yo'q tuvi' nij sí tucu'yón se-nana so' man so' rihaan nij sí taj ri'yunj man so' a**

<sup>12</sup> Dan me se quisij güii yaan canuú cha'anj chá nij yuvij israelitá chraa yo'óo trigó, ne güii ticavi' nij so' matzinj le'ej che'é Diose me yo', ne dan me se nij sí tucu'yón se-nana Jesucristó me se xna'anj nij so' man Jesucristó, cataj nij so':

—Me rej ca'anj núj qui'yaj chuvij núj cha xti'nq ní cha'anj pascuá, rá sq' ga —taj nij so' rihaan Jesucristó a.

<sup>13</sup> Gaa ne ca'née Jesucristó man vij tuvi' nij sí tucu'yón se-nana so', ne cataj so' rihaan roj so' a:

—Cavij roj soj, ne catuy roj soj chuman' Jerusalén nihánj, ne nari' tuvi' roj soj ga 'o sí atá 'o cacuaj na, <sup>14</sup> ne canocq' roj soj man so', ne rihaan sí tucua ve' catuy so' me se cataj soj: "Xná'anj maestró mán sq' se vaa me rej ne ve' cha xti'nq maestró chraa ga nij sí tucu'yón se-nana so' che'é cha'anj pascuá, taj so' a", cataj roj soj rihaan sí tucua ve' yo' á. <sup>15</sup> Gaa ne tihaa so' 'o ve' nata' xij rihaan roj soj, ne aj vaa chuvij rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvij roj soj á —taj Jesucristó rihaan roj so' a.

<sup>16</sup> Gaa ne curihañ roj sí tucu'yón se-nana Jesucristó, ne catuj roj so' chuman' Jerusalén, ne nari' roj so' nu' ndaa vaa cataj xna'anj Jesucristó rihaan roj so', gaa ne qui'yaj chuvij roj so' cha xti'nq nij so' chraa che'é cha'anj pascuá a. <sup>17</sup> Ne rej ti'nuu, ne ca'na' Jesucristó ga yo'óo chij' nij sí tucu'yón se-nana so' a.

<sup>18</sup> Dan me se yáan nij so' rihaan mesá, chá nij so' chraa, ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa yo'q tuvi' nij soj me sí tacuachén manj rihaan nij sí taj ri'yunj manj, ne sí chá chraa ga 'unj cuano me sí qui'yaj danj ei —taj Jesucristó a.

<sup>19</sup> Gaa ne guun che'e nij sí tucu'yón se-nana so' quinano ndo'o rá nij so', ne guun che'e nij so' ndaa 'o 'o nij so' xna'anj man Jesucristó, cataj 'o 'o nij so':

—'Unj me sí qui'yaj danj na' —taj 'o 'o nij so' a.

<sup>20</sup> Gaa ne cataj Jesucristó rihaan nij so' a:

—Yo'q tuvi' chuvij nij soj sij tucu'yón se-nana me sí tacuachén manj rihaan nij sí taj ri'yunj manj, ne sí tiguíj rachruún ga 'unj rá co'oo me so' adonj. <sup>21</sup> 'O se taj danj Diose se vaa ca'anj 'unj cavij' 'unj sij ca'née Diose nicaj yu'unj man yuvij, ne ya danj quirán' 'unj adonj. Tzaj ne nique ndo'o sí tacuachén manj rihaan nij sí taj ri'yunj manj nanj á. Quirán' uxrá so' sayuun nanj á. Snó'o yo' me se sese ne ca'ngaa so', ne cavii sq' so' doj tzaj adonj —taj Jesucristó a.

**Nana nihánj taj xna'anj che'é rachruún rqué Jesucristó rihaan nij sí tucu'yón se-nana so' cha nij so' dq', che'é na vinó rqué so' co'q nij so' dq' a**

<sup>22</sup> Ne gaa chá nij so' chraa, ne quita'aa Jesucristó yo'q rachruún, ne nago' so' graciá rihaan Diose, ne cuxra' ta'aj so' rachruún, ne rqué so' rihaan nij sí tucu'yón se-nana so', ne cataj so':

—Quita'aa soj rachruún nihánj á. Ne manj me rachruún nihánj ei —taj so' a.

<sup>23</sup> Gaa ne quita'aa Jesucristó aga' tazá nuu na vinó, ne nago' so' graciá rihaan Diose, ne tacuachén so' aga' nuu na vinó rihaan nij so', ne co'o cunudanj nij so' na vinó yo' a. <sup>24</sup> Gaa ne cataj so' rihaan nij so' a:

—Ton manj me na nihánj, ne che'é ton manj ro', rqué Diose 'o nana rihaan soj daj qui'yaj Diose ga soj a. Dan me se cayanj ton manj che'é que'ee yuvij adonj. <sup>25</sup> Ne cataj yá yá 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisij güii guun chij Diose rihaan chumij nihánj, ne cunuu naca chumij nihánj, gaa ne co'oj na vinó naca ei —taj Jesucristó rihaan nij sí tucu'yón se-nana so' a.

<sup>26</sup> Gaa ne cachráá taran' nij so' chra' rihaan Diose, ne cavii nij so', ca'anj nij so' quij cu'naj Quij man Chruun Olivó a.

**Nana nihánj taj xna'anj se vaa cataj xna'anj Jesucristó se vaa guun na'aj sí cu'naj Pedró, ne cataj so' se vaa nuveé sij nocq' man Jesucristó me so' a**

<sup>27</sup> Gaa ne cataj Jesucristó rihaan nij so' a:

—Danj Diose taj se vaa go' Diose man sí tumé matzinj, ne cunanj nij matzinj cha'nuu nij xo' a. Ne ya ase vaa daán 'unj matzinj vaa soj, ne guun na'aj taran' soj, ne se canoco' soj manj a ma'. <sup>28</sup> Tzaj ne asa' quisij cunuu i'na' uún 'unj, ne quitaj yaan 'unj rihaan soj ca'anj 'unj estadó Galilea, ne nari' tuvi' ní' estadó Galilea nanj adonj —taj Jesucristó rihaan nij sí tucu'yón se-nana so' a.

<sup>29</sup> Gaa ne cataj sí cu'naj Pedró rihaan so' a:

—Ca'vee se tanáj taran' nij so' mán sq', tzaj ne daj chihaa mij se tanáj 'unj mán sq' ma' —taj Pedró a.

<sup>30</sup> Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa ni' cuan' gaa ataa quisij vij caguáj to'loo, ne va'nuy ya cataj so' rihaan yuvij se vaa nuveé sij nocq' manj mé sq' a —taj Jesucristó rihaan Pedró a.

<sup>31</sup> Gaa ne nucuaj uxrá cataj Pedró rihaan Jesucristó, ne:

—Taj ma'. Ca'vee se ticavi' yuvij man ní', tzaj ne daj chihaa mij se cataj 'unj se vaa nuveé sij nocó' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij sí tu-cu'yón se-nanā Jesucristó a.

### Nanā nihánj taj xna'anj daj qui'yaj Jesucristó gaa cachíin ni'yaj Jesucristó rihaan Diose a

<sup>32</sup> Gaa ne ca'anj Jesucristó ga nij so' ndaa yo'ó rej cu'naj Getsemaní, ne cataj xna'anj Jesucristó rihaan nij so' a:

—Canē soj nihánj, na'vij soj mán 'unj, ne ca'anj 'unj, cachinj ni'yaj rihaan Réj a —taj Jesucristó a.

<sup>33</sup> Ne nicaj Jesucristó man Pedró do', man Jacobo do', man Juan do', ca'anj so', ne guun che'e so' quinanó ndo'o rá so' a. <sup>34</sup> Gaa ne cataj so' rihaan va'nuj nij sí ca'anj ga so' a:

—Naná uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinanó soj nihánj, ne se cotoj soj ma' —taj Jesucristó rihaan va'nuj nij so' a.

<sup>35</sup> Gaa ne cavii so' yanij doj tzin', ne ca'anj cayáán rno so' rihaan yo'óo, ne cachíin ni'yaj so' rihaan Diose se vaa sese ca'vee, ne caráán ra'a Diose xráá so', se gaa nanj quiran' so' sayuun a. <sup>36</sup> Dan me se cataj so':

—Ca'vee qui'yáá so' cunudanj, Ataj. Caráán ra'á so' xráj, se gaa nanj quiran' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáá so' ndaa vaa me rá ma'án so', ne se qui'yáá so' ndaa vaa me rá ma'anj ma' —taj Jesucristó, cachíin ni'yaj so' rihaan Diose a.

<sup>37</sup> Gaa ne canicaj uún so' ca'na' so' rihaan va'nuj nij sí tucu'yón se-nanā so', ne quene'en so' se vaa cotoj cunudanj nij so' a. Gaa ne cataj so' rihaan Pedró a:

—Otoj so', nanj Pedro. A 'ó orá ne guun nucuáá so' ni'yaj so' a ma'. Ya na'. <sup>38</sup> Maan se ni'yaj soj, ne cachinj ni'yaj soj rihaan Diose se vaa caráán Diose rihaan sí chree se caxrij sí chree chrej chi'ii rque soj á. 'Q se ni-ha' rá soj qui'yaj soj se sa', tzaj ne ne uun nucuaj soj ma' —taj Jesucristó rihaan nij so' a.

<sup>39</sup> Gaa ne cavii uún Jesucristó, ca'anj so', ne cachíin ni'yaj uún so' rihaan Diose, ne cuyaān vaa nanā ca'mii so' rihaan Diose ga nanā ca'mii so' asij cua'aa doj a.

<sup>40</sup> Gaa ne canicaj uún so' ca'na' so', ne quene'en so' se vaa cotoj uún va'nuj nij sí tucu'yón se-nanā so' a. 'Q se ca'na' ndo'o nej rihaan nij so' a. Ne ne nari' nij so' nanā ca'mii nij so' rihaan so' a.

<sup>41</sup> Gaa ne corá me se ca'na' uún so' rej man va'nuj nij sí tucu'yón se-nanā so', ne cataj so':

—Ca'vee cotoj soj ca'vee naraān rá soj ca'vee sese vaa ya'núj rihaan soj á. Ni'yaj soj, ne nihánj me se quisij orá tacuachén yo'ó so' manj rihaan sí tumé ndo'o cacun', che'é se mé 'unj sí ca'née Diose nicaj yu'unj man yuvij adonj. <sup>42</sup> Naxagaa soj, ca'anj ní' nanj ei. Ni'yaj soj nedí'. 'Na' sí tacuachén manj rihaan sí taj ri'yunj manj nanj chuguānj —taj Jesucristó a.

### Nanā nihánj taj xna'anj daj qui'yaj nii gaa quita'aa nii man Jesucristó a

<sup>43</sup> Dan me se nicun' Jesucristó ca'mii so', ne nu' ca'na' sí cu'naj Judas yo'ó tuvi' chuvij nij sí tucu'yón se-nanā Jesucristó, ne ca'na' uxrá yuvij ga so', ne nicaj nij yuvij neê espadá do', chruun do' a. Dan me se nij yuvij ca'née nij xrej atā suun nocōo doj do', nij yuvij ca'née nij sí naqui'yaj cuu se-tucuānj Moisés do', nij yuvij ca'née nij sí uun chij rihaan nij yuvij israelitá do', me nij yuvij ca'na' a. <sup>44</sup> Ne sí cu'naj Judas cataj xna'anj rihaan nij yuvij se vaa daj qui'yaj so' ga Jesucristó, gaa ne cunu yān nij yuvij man Jesucristó, ne cataj so':

—Sí rytu'vaj ro', so' me sí quita'aa soj cuaj á. Raan cano soj man so', ca'anj soj á —taj sí cu'naj Judas a.

<sup>45</sup> Gaa ne nu' cuchi' so' cuaj rihaan Jesucristó, ne cataj so':

—Maestro —taj so', ne nu' cachrón tu'va so' xruu Jesucristó a.

<sup>46</sup> Gaa ne cuchi' nij yuvij rihaan Jesucristó, ne quita'aa nij yuvij man Jesucristó a.

<sup>47</sup> Ne yo'ó sí nicun' ga Jesucristó me se quirii so' taneê so' neê espadá, ne go' so' neê espadá yo' raq yo'ó se-mozó xrej atā suun nocōo doj, ne veé dan güéj nu' xrée mozó yo', qui'yaj so' a.

<sup>48</sup> Gaa ne cataj Jesucristó rihaan nij yuvij a:

—Me che'é nicaj soj neê espadá nicaj soj chruun nicaj soj, ca'na' soj ga. Sí ityu mé 'unj, rá soj na'. <sup>49</sup> Ne 'o se guun que'ee güii cayáán 'unj rá nuví nocōo, tucu'yón 'unj se-nanā rihaan soj, tzaj ne ne quita'aa soj manj ma'. Tzaj ne nihánj me se quirán' 'unj nu' se vaa taj nanā no rihaan danj Diose a —taj Jesucristó a.

<sup>50</sup> Gaa ne tanāj cunudanj nij sí tucu'yón se-nanā Jesucristó man so', ne cunánj nij so', ca'anj nij so' a.

<sup>51</sup> Ne vaa 'o sí tachruu nocō' xcó Jesucristó, ne orún' yatzij mantá niquee so', ne quita'aa nij yuvij man so', <sup>52</sup> gaa ne tanāj so' yatzij mantá ra'a nij yuvij, cunánj so', ne cánj uun vaa so', cunánj so' a.

### Nanā nihánj taj xna'anj daj qui'yaj nii gaa cuta' nii cacun' xráá Jesucristó a

<sup>53</sup> Dan me se nij sí quita'aa man Jesucristó me se nicaj nij so' man Jesucristó ca'anj nij so' rihaan sí yanj xrej atā suun nocōo doj, gaa ne cunu chre' yo'ó nij xrej atā suun nocōo doj do', nij sí naqui'yaj cuu se-tucuānj Moisés rihaan nij yuvij do', nij sí uun chij do', rej mán nij so' a. <sup>54</sup> Ne gan' gan' canoco' sí cu'naj Pedró xcó Jesucristó, ne cuchi' so' rihaan ve' yanj xrej atā suun nocōo doj yo', ne catúj so' rá ve', ne ca'anj cayáán so' ga nij se-mozó xrej man rá ve', tinaguun so' ra'a so' rihaan ya'an a.

<sup>55</sup> Dan me se nano' nij xrej atā suun nocōo doj nano' nij cuesē nano' man yuvij cataj xna'anj che'é cacun' tumé Jesucristó a. Me rá nij so' nari' nij so' cacun' cutā' nij so' xráá Jesucristó, ne cavi' Jesucristó, rá nij so' a. Tzaj ne nuvi' cacun' tumé Jesucristó nari' nij so' ma'.

<sup>56</sup> 'Q se cuchi' uxrá sí ne rihaan nij cuesē ca'mii ne nij

so', tzej ne ino vaa nana ca'mii 'o 'o nij so' a. <sup>57</sup> Gaa ne canicun' yo'ó doj síi ne uún, ne guun rá nij so' cuta' nij so' cacun' xráá Jesucristó, ne dan me se cataj nij so':

<sup>58</sup> —Cuno núj se vaa cataj Jesucristó se vaa: "Uñj me síi taçuane nuvíi nocoo nihánj nuvíi cune' yuvii, ne rque va'núj güii cune' 'unj yo'oj uún, tzej ne nuveé nuvíi cune' ma'an yuvii me nuvíi cune' 'unj a man adonj", taj Jesucristó cuno núj ei —taj síi ne ni'yaj nij so' man Jesucristó, <sup>59</sup> tzej ne ndaa se-nana nij so' me se ne 'o cuyaagan vaa nana ca'mii 'o 'o nij so' a ma'. <sup>60</sup> Gaa ne canicun' xrej atá suun nocoo doj tanuu yo'ó nij síi man rá ve' yo', ne xná'anj so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj síi nihánj che'é so' ga —taj so', xná'anj so' man Jesucristó a.

<sup>61</sup> Tzej ne dínj táá Jesucristó, ne ca'mii so' a doj nana a. Gaa ne xná'anj uún xrej atá suun nocoo doj man Jesucristó, ne:

—So' me ta'níi Diose síi tñanii man yuvii rihaan sayuun na' —taj so', xná'anj so' man Jesucristó a.

<sup>62</sup> Gaa ne cataj Jesucristó rihaan so' a:

—Veé danj vaa ya ei. Ne quene'en soj se vaa quitaj 'unj rej nuva' Diose síi nucuaj ndo'o á. Ne quene'en uún soj se vaa ca'na' uún 'unj rihaan chumii nihánj, ne quitaj 'unj xráá ngaa xta' ca'naj adonj —taj Jesucristó rihaan xrej atá suun nocoo doj yo' a.

<sup>63</sup> Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Ni'yaj soj vij. Se cachiin doj síi ca'na' cataj xna'anj rihaan ní' che'é cacun' tumé síi nihánj a ma'. <sup>64</sup> Ne cuno soj nana quij ca'mii so' se vaa quitaj ma'an so' rej x'núj Diose na'. Aj cuno soj chuguanj. Ne daj qui'yaj ní' man so', rá soj ga —taj xrej, xná'anj xrej man nij tuvi' xrej a.

Gaa ne cunudanj nij so' cuta' cacun' xráá Jesucristó se vaa no xcúún Jesucristó cavi' Jesucristó a. <sup>65</sup> Gaa ne guun che'e ta'aj nij so' quirii talúj nij so' man Jesucristó, ne caráán nij so' yatzíj rihaan Jesucristó, ne go' nij so' man Jesucristó, ne cataj nij so':

—Raçuíj Diose mán so' cataj xna'anj so' rihaan núj me síi go' mán so' vij —taj nij so', tiha' yu'unj nij so' man Jesucristó a.

Ne nicaj nij tanuu man so', ne go' nij tanuu chruun xráá so' a.

**Nana nihánj taj xna'anj daj qui'yaj síi cu'naj Pedró gaa cataj so' se vaa nuveé sij nocoo' man Jesucristó me so' a**

<sup>66</sup> Veé dan, ne yanj Jesucristó ga yo'ó nij so' rá ve', ne yanj síi cu'naj Pedró rej rque doj rej rihaan ve' yo' a. Gaa ne ca'na' yo'ó mozó chana nuu rihaan xrej atá suun nocoo doj, <sup>67</sup> ne quene'en no' man Pedró gaa tinaguun Pedró ra'a Pedró rihaan ya'an a. Gaa ne ni'yaj uxrá mozó chana yo' man Pedró, gaa ne cataj no':

—Ne ma'án so' me yo'ó síi cachée ga Jesucristó síi cavii chuman' Nazaret á —taj mozó chana yo' rihaan Pedró a.

<sup>68</sup> —Taj ma'. Ne unó 'unj me taj so' ma' —taj Pedró rihaan mozó chana, gaa ne curihanj so', ne canicun' so' rihaan chingá a.

<sup>69</sup> Gaa ne quene'en mozó chana se vaa nicun' Pedró rihaan chingá, ne guun che'e no' ca'mii no' rihaan nij yuvii nicun' rihaan chingá ga Pedró, cataj no':

—Síi nihánj me yo'ó nij síi cachée ga Jesucristó asuun asán —taj mozó chana yo' a.

<sup>70</sup> Gaa ne cataj uún Pedró se vaa ne ne'en so' man Jesucristó a.

Dan me se corá nii me se cataj nij síi nicun' ga Pedró rihaan Pedró a:

—Ya ya yo'ó síi cachée ga Jesucristó mé so' ei. 'O se sij cavii estadó Galilea mé so' chuguanj —taj nij so' rihaan Pedró a.

<sup>71</sup> Gaa ne guun che'e Pedró nucuaj doj ca'mii Pedró, cataj Pedró se vaa ca'vee qui'yaj Diose sayuun man so' sese nuveé nana ya me nana a'mii so', ne cataj so':

—Ne ne'enj man snó'o nihánj síi a'mii soj che'é a ma' —taj uún Pedró, <sup>72</sup> gaa ne nu' quisij vij caguáj to'loo a.

Gaa ne nanuj rá Pedró ndaa vaa cataj Jesucristó rihaan so' quii se vaa gaa ataa quisij vij caguáj to'loo, ne va'núj cataj Pedró se vaa nuveé sij nocoo' man Jesucristó me ma'an Pedró a. Gaa ne guun che'e Pedró ta'vee ndo'o Pedró a.

**Nana nihánj taj xna'anj daj ca'mii síi cu'naj Pilato ga Jesucristó a**

**15** Gaa ne rej ranga' cunuu chre' nij xrej atá suun nocoo doj do', nij síi uun chij do', nij síi naqui'yaj cyu se-tucuanj Moisés do', cunudanj nij cuese do', qui'yaj nij so' junta, gaa ne numij nij so' man Jesucristó, ne nicaj nij so' man Jesucristó ca'anj nij so' rihaan síi cu'naj Pilato, ne tacuachén nij so' man Jesucristó rihaan so' a. <sup>2</sup> Gaa ne xná'anj síi cu'naj Pilato man Jesucristó, cataj so':

—So' me síi nicaj suun rey uun chij rihaan nij yuvii israelitá na' —taj so', xná'anj so' man Jesucristó a.

—Vej ei —taj Jesucristó rihaan so' a.

<sup>3</sup> Ne cuta' ndo'o nij xrej atá suun nocoo doj cacun' xráá Jesucristó a. <sup>4</sup> Gaa ne xná'anj uún síi cu'naj Pilato man Jesucristó, cataj so':

—Me che'é ne a'mii so' ga. Nihánj me se uta' uxrá nii cacun' xráá so' ei —taj síi cu'naj Pilato rihaan Jesucristó a.

<sup>5</sup> Tzej ne yuun che'e ne ca'mii Jesucristó a doj nana rihaan so', ne caraya'anj uxrá síi cu'naj Pilato che'é yan qui'yaj so' danj a.

**Nana nihánj taj xna'anj se vaa cataj xna'anj síi cu'naj Pilato se vaa cavi' Jesucristó rihaan rcutze a**

<sup>6</sup> Ne vaa yo'ó tucuáán nocoo' síi cu'naj Pilato se vaa rii so' man yo'ó yo'ó síi 'nij taga' 'o 'o cha'anj pascuá, ne tinavij uun so' cacun' tumé síi urihanj taga' yo' a. Me ma'an 'o síi 'nij taga' achíin nij yuvii se vaa quirii so', ne ca'vee qui'yaj so' ndaa vaa taj nij yuvii a. <sup>7</sup> Dan me se vaa 'o síi cu'naj Barrabás 'nij taga' ga yo'ó nij síi guun

rá cunu' gā gobiernó, nē nij so' me se gāa cunu' nij so' gā gobiernó nē ticavi' ndo'o nij so' yuvií a. <sup>8</sup> Dan me se cavii nij yuvií israelitá, nē guun che'e' nij so' cachíin nij so' man síí cu'naj Pilato se vaa quiríi so' man 'o síí 'nij taga' ndāa vaa u'yón so' 'yaj so' che'é nij so' a. <sup>9</sup> Gāa nē xná'anj síí cu'naj Pilato man nij yuvií, cataj so':

—Nē me rá soj quiríi 'unj man síí nicaj suun rey uun chij rihaan soj sij israelitá na' —taj so', xná'anj so' man nij yuvií a.

<sup>10</sup> Dānj ca'mii so', ne'en so' se vaa maan che'é se guun xcoj ruvaā rá nij xrej atā suun nocōo doj me tacuachén nij xrej man Jesucristó rihaan so' a.

<sup>11</sup> Tzaj nē nij xrej atā suun nocōo doj me se cataj xna'anj nij so' rihaan nij yuvií se vaa quiríi síí cu'naj Pilato man síí cu'naj Barrabás taga' qui'yaj nij yuvií a.

<sup>12</sup> Gāa nē xná'anj uún síí cu'naj Pilato man nij yuvií, cataj so':

—Che'é se me rá soj quiríi 'unj man síí cu'naj Barrabás rihaan soj, nē che'é dan daj qui'yáj man síí tūcu'náj soj síí nicaj suun rey uun chij rihaan soj gā —taj so', xná'anj so' man nij yuvií a.

<sup>13</sup> Gāa nē caguáj uún nij yuvií, cataj nij yuvií:

—Cavi' so' rihaan rcutze, qui'yáá so' ei —taj nij yuvií a.

<sup>14</sup> —Tzaj nē me cacun' tumé so' gā —taj síí cu'naj Pilato, xná'anj so' man nij yuvií a.

Tzaj nē doj a caguáj nij yuvií, cataj nij yuvií:

—Cavi' so' rihaan rcutze, qui'yáá so' cuaj ei. —Dānj inanj caguáj nij yuvií a.

<sup>15</sup> Nē síí cu'naj Pilato me se guun rá so' qui'yaj so' ndāa vaa nō xcúún so' qui'yaj so' che'é nij yuvií, nē che'é dan quiríi so' man síí cu'naj Barrabás taga' che'é nij yuvií, nē go' nij tanuu cuartá xráá Jesucristó, qui'yaj so', nē tacuachén so' man Jesucristó rihaan nij tanuu che'é rej cachron nij tanuu man Jesucristó rihaan rcutze a.

### Nanā nihánj taj xna'anj se vaa ca'nga' nacōo nij tanuu ni'yaj nij tanuu man Jesucristó a

<sup>16</sup> Gāa nē ca'anj nicaj nij tanuu man Jesucristó rá ve' tucua' síí nicaj suun gobernador, gāa nē canacúún nij tanuu man taran' nij tuvi' tanuu nij so' cunuu chre' taran' nij so' a. <sup>17</sup> Gāa nē nanuú Jesucristó sagan' rey yatzíj tintá, qui'yaj nij tanuu, nē qui'yaj nij so' cachriin tanj, cuta' nij so' raā Jesucristó a. <sup>18</sup> Gāa nē guun che'e' nij tanuu caguáj nij tanuu rihaan Jesucristó, cataj nij tanuu:

—Yā yā sij nicaj suun rey rii ta'nga' rihaan nij yuvií israelitá mé so' ei —taj nij so', tiha' nij so' man Jesucristó a.

<sup>19</sup> Gāa nē go' nij so' vará raā Jesucristó, nē quiríi talúj nij so' man Jesucristó, nē canicun' ruj nij so' rihaan Jesucristó, nē qui'yaj nij so' ndāa vaa 'yaj yuvií na'víj rihaan ya'anj a. <sup>20</sup> Síj ca'nga' nacōo nij so' ni'yaj nij so' man Jesucristó, gāa nē quiríi uún nij so' sagan' rey yatzíj tintá nuu Jesucristó, nē na'néé uún nij so' sagan' uún Jesucristó man uún so', gāa nē nicaj nij so' man Je-

sucristó cavii nij so' ca'anj nij so' yan cachron nij so' man Jesucristó rihaan rcutze a.

### Nanā nihánj taj xna'anj daj qui'yaj nij yuvií gāa cachron nij tanuu man Jesucristó rihaan rcutze a

<sup>21</sup> Dan me se gāa vaj nij tanuu gā Jesucristó, nē 'na' nique yo'o síí cu'naj Simón síí cavii chuman' Cirene rej tacaan, nē so' me se rej roj síí cu'naj Alejandro gā Rufo me so', nē dan me se quita'aa nij tanuu man so', nē qui'yaj uxrá nij tanuu fuerzá man síí cu'naj Simón yo' çatā so' rcutze canō Jesucristó rihaan a. <sup>22</sup> Dan me se nicaj nij tanuu man Jesucristó ca'anj nij tanuu tacaan cu'naj Gólgota, nē nanā "Gólgota" ro', taj Tacaan Cúú Yave Xnangá a. <sup>23</sup> Gāa nē rqué nij tanuu doj na vinó nahej gā na e' cu'naj mirra man Jesucristó co'o so' a. Tzaj nē ne co'o so' ma'. <sup>24</sup> Veé dan, nē cachron nij tanuu man Jesucristó rihaan rcutze, nē tico tixaj nij so' che'é sagan' Jesucristó me síí qui'yaj canaán 'o 'o ta'aj sagan' so' a.

<sup>25</sup> Dan me se aga' uun rej xtā' güii me cachron nij tanuu man Jesucristó rihaan rcutze a. <sup>26</sup> Nē cachron nij tanuu letrá rihaan 'o rcuchra', nē taj xna'anj letrá yo' me che'é cavi' Jesucristó, nē: "Síí nihánj me síí nicaj suun rey uun chij rihaan nij yuvií israelitá a", taj letrá yo' a. <sup>27</sup> Gāa nē cachron nij tanuu man yavíj snó'o rihaan yavíj rcutze yo', nē yavíj roj so' me síí ituy a. Dan me se nicun' yo'o so' rej nuva' Jesucristó, nē nicun' yo'ó so' rej nichruun Jesucristó a. <sup>28</sup> Nē veé dānj quisíj yā nu' nanā nō rihaan dānj Diose nanā taj: "Guun rá nii se vaa yo'o tuvi' nij síí tumé cacun' me so', rá nii a", taj se-na-na Diose yo' a. <sup>29</sup> Gāa nē cachén yuvií rej nicun' Jesucristó, nē ca'mii chi'ii ndo'o nij yuvií ni'yaj nij yuvií man Jesucristó a. Dan me se tucunó nij yuvií raā nij yuvií, cataj nij yuvií:

—Nihánj táá so' sij guun rá tacuaneé man nuvíi nocōo nē cunē' yo'ó nuvíi nocōo rque va'nuy güii na'.

<sup>30</sup> Tīnanii so' mán so' rihaan rcutze, nē nanij so' rihaan yo'óo yaj víj —taj nij yuvií rihaan Jesucristó a.

<sup>31</sup> Nē ase vaa qui'yaj nij yuvií ro', dānj qui'yaj uún nij xrej atā suun nocōo doj do', nij síí naqui'yaj cūu se-tucuanj Moisés do', ca'mii chi'ii nij so' rihaan tuvi' nij so' ni'yaj nij so' man Jesucristó, nē cataj nij so':

—Tīnanii síí nihánj man yo'ó yuvií rihaan sayuun, rá so', tzaj nē ne guun nucuaj so' tīnanii so' man ma'an so' rihaan rcutze dānj. <sup>32</sup> Sese yā yā sij ca'néé Diose tīnanii man yuvií rihaan sayuun me so' do', sese yā yā sij nicaj suun rey uun chij rihaan ní' sij israelitá me so' do', nē nanij so' cuano rihaan yo'óo, nē quene'en ní', nē cuchuman rá ní' ni'yaj ní' man so' adonj —taj nij so', chi'ii ndo'o ca'mii nij so' ni'yaj nij so' man Jesucristó a.

Nē roj síí ituy nicun' rihaan rcutze rej x'nuy Jesucristó me se ca'mii roj so' nanā nij rihaan Jesucristó a.

### Nanā nihánj taj xna'anj daj guun gāa cavi' Jesucristó a

<sup>33</sup> Veé dan, nē caxuj, nē yuun che'e' guun rmi' rihaan chumii, nē yo'o guun rmi' chumii ndāa quisíj aga'



va'nuy rej anoco' güii a. <sup>34</sup> Veé dan, ne quisíj aga' va'nuy, gaa ne nucuaj ndo'o caguáj Jesucristó, cataj so':

—Eloi, Eloi, lama sabactani —taj so', caguáj so' xna'ánj a'mii ma'an so' a. Ne nana caguáj so' taj: “Diose síi noco' 'unj mé so' á. Me che'é tanáj uun so' mán 'unj ga”, taj nana caguáj Jesucristó a.

<sup>35</sup> Ne cuno ta'aj nij síi nicun' rej x'nuy Jesucristó nana caguáj so', tzaj ne ne cuno nij so' me taj Jesucristó a ma'. Maan se:

—Ni'yaj so' ei. Nacúún síi nihánj man síi cu'naj Elías tadonj —taj nij so' rihaan tuvi' nij so' a.

<sup>36</sup> Gaa ne cunánj yo'o so', ne caraa so' na vinó yuu rque 'o yataan esponja, ne cuta' so' raá yo'o vará, ne ru'maan so' yataan tu'va Jesucristó, ne co'o Jesucristó na yuu yo', qui'yaj so', ne cataj síi qui'yaj danj:

—Dínj qui'yaj soj á. Quene'en ní' sese ca'na' síi cu'naj Elías tananij síi cu'naj Elías man so' rihaan yo'óo ei —taj so' rihaan tuvi' so' a.

<sup>37</sup> Gaa ne sca' caguáj Jesucristó, ne cavi' so' a. <sup>38</sup> Gaa ne quisin' yatzíj mantá cortiná noco' rá nuvíi noco'o yo' ndaa rej raá, ne 'o quini' ca'anj ndaa tacóo yo' a.

<sup>39</sup> Veé dan, ne nicun' tanuu capitán rihaan Jesucristó, ne quene'en so' nu' se vaa guun gaa cavi' Jesucristó, ne ndaa dan asuun gaa xcaj so' cuentá se vaa ya uxrá ta'nij Diöse me Jesucristó, ne dan me se cataj so':

—Ya ta'nij Diöse me snó'o nihánj tadonj —taj tanuu capitán yo' a.

<sup>40</sup> Ne gan' doj nicun' que'ee chana, ni'yaj uun nij chana man Jesucristó a. Yo'o no' me chana cu'naj Mariá Magdalena, ne yo'ó no' me chana cu'naj Mariá nii síi cu'naj Jacobo Cunij ga síi cu'naj José a. Ne yo'ó no' me chana cu'naj Salomé a. <sup>41</sup> Dan me se gaa vaj Jesucristó estadó Galilea, ne qui'yaj suun nij chana che'é Jesucristó a. Ne vaa que'ee doj chana uún níi ca'anj chuman' Jerusalén ga Jesucristó a.

#### Nana nihánj taj xna'anj se vaa cachin' nii man Jesucristó rque yu'uj yuvej a

<sup>42</sup> Dan me se rej ata' güii me yo', ne güii no' xcúún nij yuvi' israelitá qui'yaj chuvij nij so' che'é güii a'yuj güii naránj rá nij so' me yo', <sup>43</sup> ne che'é dan ca'na' yo'o síi cu'naj José síi ne chuman' Arimatea, ne yo'o síi sa' uun hij rihaan nij yuvi' israelitá me so', ne síi me ndo'o rá guun hij Diöse rihaan chumij nihánj me uún so' a.

Dan me se quisíj rá so', ne catúj so' rihaan síi cu'naj Pilato, ne cachíin ni'yaj so' rihaan síi cu'naj Pilato se vaa ca'vej síi cu'naj Pilato cachin' so' man Jesucristó a.

<sup>44</sup> Dan me se caráya'anj ndo'o síi cu'naj Pilato nana se vaa aj cavi' Jesucristó, gaa ne canacúún so' ca'na' tanuu capitán rihaan so', ne xna'anj so' man tanuu capitán sese ya ya cavi' Jesucristó a. <sup>45</sup> Gaa ne cataj tanuu capitán se vaa ya ya cavi' Jesucristó, ne che'é dan ca'vej rá síi cu'naj Pilato nica' síi cu'naj José man Jesucristó ca'anj cachinj so' a. <sup>46</sup> Gaa ne xcaj síi cu'naj José yatzíj mantá, gaa ne tananij so' man Jesucristó, ne nacadáj so' yatzíj mantá xraá Jesucristó, ne caxríj so' man Jesucristó rque yu'uj gáán nii rque yuvej, ne

caráán so' yuvej xij tu'va yu'uj yo' a. <sup>47</sup> Ne quene'en chana cu'naj Mariá Magdalena do', chana cu'naj Mariá nii síi cu'naj José do', rej cachin' so' man Jesucristó a.

#### Nana nihánj taj xna'anj se vaa cunuu i'na' uún Jesucristó a

**16** Ne ti'nuu güii naránj rá nij yuvi' israelitá me se quiránj chana cu'naj Mariá Magdalena do', chana cu'naj Mariá nii Jacobo do', chana cu'naj Salomé do', yo'óo gun' daj, che'é rej ca'anj caxrii nij no' yo'óo gun' daj man Jesucristó a. <sup>2</sup> Gaa ne taxrej cotungó me se ca'anj va'nuy nij chana rej cachin' nii man Jesucristó, ne dan me se aj quisíj güii, <sup>3</sup> ne cataj nij chana rihaan tuvi' chana, ne:

—Me síi quirii yanij yuvej aráán tu'va yu'uj gaa ne catuu ní' ga —taj nij no', xna'anj nij no' man tuvi' nij no' a.

<sup>4</sup> Gaa ne ni'yaj nij chana, ne quene'en nij chana se vaa aj naj yanij yuvej, ne dan me se yuvej xij ndo'o me yo' a. <sup>5</sup> Gaa ne catúj nij chana rque yu'uj, gaa ne quene'en nij chana se vaa yanj 'o síi yaan rej nuva' nij chana, ne nuú so' yatzíj xcaan catzii, ne ca'anj ndo'o rá nij chana a.

<sup>6</sup> Gaa ne cataj síi yaan rihaan nij chana a:

—Taj che'é ca'anj rá nij soj ma'. Nihánj me nano' nij soj man Jesucristó síi cavii chuman' Nazaret síi cahrón nii rihaan rcutzé, ne so' me se aj cunuu i'na' uún so' ei. Ne ni'yaj soj rej cuchruj nii man so', ne xcaj soj cuentá se vaa nuvi' so' naj nihánj a man adonj. <sup>7</sup> Tananj cavii soj cataj soj rihaan nij síi tucu'yón se-nana so' do', ndaa rihaan Pedró do', cataj soj: “Táá yaan Jesucristó rihaan soj 'anj so' estadó Galilea, ne yo' me rej quene'en nij soj man so' ndaa vaa cataj ma'an so' rihaan soj á”, cataj nij soj rihaan Pedró ga yo'óo nij síi tucu'yón se-nana so' á —taj síi yaan rihaan va'nuy nij chana a.

<sup>8</sup> Gaa ne curihanj nij chana rque yu'uj, ne cunánj nij chana, ca'anj nij no' a. 'O se ca'anj ndo'o rá nij chana, ne ndaa ri'ij man nij chana a. Ne ne ca'vee ca'mii nij no' a doj nana rihaan a 'o yuvi', che'é se cuchuvi' ndo'o nij no' a.

#### Nana nihánj taj xna'anj se vaa quene'en chana cu'naj Mariá Magdalena man Jesucristó a

<sup>9</sup> Dan me se cunuu i'na' uún Jesucristó taxrej cotungó, gaa ne curuvi' so' asino yaan rihaan chana cu'naj Mariá Magdalena, ne no' me chana quirii so' hij nana chree nimán asij rque doj a. <sup>10</sup> Dan me se ca'anj no' rej man nij síi chée ga Jesucristó, ne dan me se nanó ndo'o rá nij so', ne ta'vee nij so', ne dan me se cataj xna'anj no' rihaan nij so' se vaa vaa i'na' Jesucristó ne quene'en no' man Jesucristó, taj no', tzaj ne ne cuchuman rá nij so' a ma'.

**Nana nihánj taj xna'anj se vaa curuvi' Jesucristó rihaan vij tuvi' nij sí tucu'yón se-nana so' gaa vaj roj so' rej tacaan a**

<sup>12</sup> Cachén doj, gaa ne dan me se chéé vij tuvi' nij sí tucu'yón se-nana Jesucristó rej tacaan, ne curuvi' Jesucristó rihaan roj so', tzaj ne ino doj vaa so', ruvi' so', ni'yaj roj so' a. <sup>13</sup> Gaa ne cavii roj so' uún, nata' roj so' rihaan yo'ó nij sí tucu'yón se-nana Jesucristó, tzaj ne nij so' me se ne cuchuman rá nij so' se-nana roj so' a.

**Nana nihánj taj xna'anj se vaa curuvi' Jesucristó rihaan xaan nij sí tucu'yón se-nana so' a**

<sup>14</sup> Corá me se gaa yáán xaan nij sí tucu'yón se-nana Jesucristó rihaan mesá, ne curuvi' ma'an Jesucristó rihaan nij so', ne cuta' so' cacun' xráá nij so' se vaa gunichraj rá nij so' ne ne cuchuman rá nij so' se-nana nij sí quene'en man so' gaa cunuu i'na' uún so' a.

<sup>15</sup> Gaa ne cataj Jesucristó rihaan nij so' a:

—Ca'anj nij soj rihaan nu' cachra' chumij, ne ca'mij natáj soj se-nana nana sa' rihaan cunudanj nij yuvij a.

<sup>16</sup> Ne me ma'an 'o sí cuchuman rá se-nana soj ne cata'

ne, ne so' me sí quinanj rihaan sayuun, tzaj ne sí na'vej rá cuchuman rá se-nana soj me se qui'yaj Diosé sayuun man so' che'é cacun' tumé so' adonj. <sup>17</sup> Ne nihánj me suun sa' nocoo qui'yaj nij sí cuchuman ya rá ni'yaj manj, ne dan me se quitaj tu'va nij so' se-chuvií 'unj, quirij nij so' nana chree nimán yuvij, ne ca'mij nij so' xna'anj naca xna'anj ne ne'en ma'an nij so', <sup>18</sup> ne ma'an ra'a nij so' quita'aa nij so' xcuáá yuvaá, ne ca'vee se co'o nij so' se xnaj, tzaj ne a doj se quiran' nij so' chi'ij ma'. Ne cuta' ra'a nij so' xráá sí ran', ne nahuun sa' nij sí ran' yo' a —taj Jesucristó rihaan xaan nij sí tucu'yón se-nana so' a.

**Nana nihánj taj xna'anj se vaa cavii Jesucristó xtá' a**

<sup>19</sup> Dan me se quisij ca'mii Jesucristó nana dan rihaan nij sí tucu'yón se-nana so', gaa ne cavii so' xtá', gaa ne cayáán so' rej nuva' Diosé a. <sup>20</sup> Gaa ne nij sí tucu'yón se-nana so' me se ca'anj ca'mij natáj nij so' se-nana so' nu' nij chuman', ne racuj sí 'nij ra'a man ní' man nij so', ne dan me se che'é suun sa' nocoo qui'yaj nij so' me se raan doj canoco' nij yuvij se-nana Jesucristó a. Veé danj gaa ya ei.

# San Lucas

Nana nihánj taj xna'anj se vaa qui'yaj síf cu'naj Lucas yanj nihánj ca'nej so' rihaan síf cu'naj Teófilo a

**1** Dan me se que'ee uxrá yuvij guun rá cachron nicá nana rihaan yanj che'é nu' se vaa qui'yaj Jesucristó sca'núj ní' asij rque doj a. <sup>2</sup> Dan me se cachron nij so' nana cataj xna'anj nij síf quene'en cunudanj se vaa qui'yaj Jesucristó asij guun che'e so' cayáán so' rihaan chumij nihánj, ne nij síf quene'en ro', me síf atá suun nata' nana yo' rihaan nu' yuvij a. <sup>3</sup> Ne 'unj nihánj me síf tucuyón uxrá, don ca'vee narij cunudanj rasuun yo', ne che'é dan vaa che'é cachron nicá 'unj cunudanj se vaa qui'yaj Jesucristó rihaan yanj nihánj nayaá so' sij cu'naj Teófilo sij sa' ndo'o, raj adonj. <sup>4</sup> Nanj qui'yaj, gaa ne ca'vee guun ya rá so' se vaa ya vaa nu' nana cataj xna'anj nii rihaan so' che'é Jesucristó adonj.

Nana nihánj taj xna'anj se vaa cataj xna'anj se-mozó Diose se vaa ca'ngaa Juan síf cuta' ne man yuvij a

<sup>5</sup> Gaa cayáán síf cu'naj Herodes síf nicaj suun rey uun chij rihaan estadó Judea, gaa ne 'o xrej canicun' rihaan yuvij israelitá me 'o síf cu'naj Zacarías, ne cachée so' ga 'o ta'aj nij xrej, ne ta'níí ta'nij si'no Abías me nij so' a. Ne nicá Zacarías me chana cu'naj Elisabet, ne ta'nij 'o xrej me no', <sup>6</sup> ne síf yanj sa' rihaan Diose me roj nica roj so', ne sa' uxrá cuno roj so' nu' nij nana me rá Diose cuno ní', ne nuvi' cacun' tumé roj so' a doj a ma'. <sup>7</sup> Tzaj ne taj vaj ta'níí roj so', che'é se chana ityün me Elisabet adonj. Ne aj cachén ndo'o yo' ne roj nica roj so' nanj á.

<sup>8</sup> Dan me se gaa natúj nij ta'níí ta'nij si'no Abías qui'yaj suun nij so' se-suun Diose, <sup>9</sup> ne 'o güii quiri' ni'yaj Zacarías catuy so' nuvií nocoo caraa so' squíí xlá rihaan ya'an a. 'O se tucuaán nocoo' nij xrej me se daj a güii tico tixaj nij so' se-chuvij nij so', se vaa quene'en nij so' a me síf quiri' ni'yaj caraa squíí rihaan ya'an a. <sup>10</sup> Dan me se catúj Zacarías rque nuvií nocoo, ne xe' nicun' 'o x'ne' yuvij, cachíín ni'yaj nij so' rihaan Diose gaa caraa Zacarías squíí rihaan ya'an a. <sup>11</sup> Dan me se naqui'yaa 'o se-mozó Diose rihaan Zacarías, ne nicun' so' rej nuva' mesá altar acaa squíí a. <sup>12</sup> Dan me se gaa quene'en Zacarías man se-mozó Diose, gaa ne cuchu'vi' ndo'o so' a. <sup>13</sup> Tzaj ne cataj se-mozó Diose rihaan so', ne:

—Se cuchu'vi' so', man Zacarías. 'O se aj cuno Diose nana cachíín ni'yáá so' rihaan so', ne che'é dan cuchruj nicá so' Elisabet ta'nij sno'o so' adonj. <sup>14</sup> Juan tycu'náj so' man so' á. Guun niha' ndo'o rá so', ne

guun niha' rá que'ee yuvij asa' ca'ngaa so' adonj. <sup>15</sup> 'O se ta'níí so' me síf guun síf sa' ndo'o rihaan Diose nanj adonj. Se co'o so' tzi' se co'o so' rinté se co'o so' ma'. Asij güii ataa ca'ngaa so', ne guun che'e Nimán Diose yo'o cayáán Nimán Diose ga so' nanj á. <sup>16</sup> Ne que'ee síf israelitá canicaj nimán canoco' uún man Diose síf 'nij ra'a man nij so', qui'yaj ta'níí so' adonj. <sup>17</sup> Dan me se guun so' síf ca'anj suun rihaan Diose adonj. Asino ta'níí so' guun che'e ca'mij natáj rihaan yuvij, gaa ne ca'mij síf ca'nej Diose man a. Daj se qui'yaj Nimán Diose, racuj Nimán Diose man síf cu'naj Elías gaa naá ro', danj qui'yaj guee Nimán Diose, racuj ndo'o so' man ta'níí so' a. Ca'mij luj yuvij ga ta'níí yuvij, qui'yaj so', natuna nimán nij síf chi'ij cuno nij so' rihaan Diose, qui'yaj so' nanj á. Juan me síf qui'yaj, ne caraya'anj nu' yuvij che'é se ca'na' síf qui'nij ra'a man ní' adonj. —Nu' nana nihánj cataj xna'anj se-mozó Diose rihaan Zacarías a.

<sup>18</sup> Gaa ne cataj Zacarías rihaan se-mozó Diose a:

—Asá' ca'vee cuchuman raj se vaa ya ca'mii so' ga. Chii nga mé 'unj nihánj, ne chana chij me nicá 'unj nihánj nanj á —taj Zacarías rihaan se-mozó Diose yo' a.

<sup>19</sup> Gaa ne cataj se-mozó Diose rihaan Zacarías a:

—Gabriel síf nicun' rihaan Diose mé 'unj adonj. Ma'an Diose me síf ca'née manj ca'naj ca'mij ga so' adonj. Ca'ne' so' suun rihanj se vaa cataj xna'anj 'unj nana sa' nihánj rihaan so', <sup>20</sup> tzaj ne ne cuchuman rá so' nana nihánj, ne che'é dan me guun ya'míí so' adonj. A 'o nana se ca'vee ca'mij so' ndaa quisij güii quisij ya nu' nana nihánj ndaa vaa cataj xna'anj 'unj rihaan so' adonj. Ne ya quisij nana nihánj güii aj cachron Diose adonj. —Danj cataj se-mozó Diose rihaan Zacarías a.

<sup>21</sup> Dan me se xe' mán nij yuvij, na'vij nij yuvij a me orá curihanj Zacarías rque nuvií, ne caraya'anj nij so' se vaa guun raan so' rque nuvií a. <sup>22</sup> Dan me se gaa curihanj so' rque nuvií, gaa ne ne ca'vee ca'mij so' ga nij so' a ma'. Che'é dan xcaj nij so' cuentá se vaa naqui'yaa 'o rasuun rihaan Zacarías, qui'yaj Diose, gaa nuu so' rque nuvií a. Daj doj ra'a so' tucunó so' che'é se yo'o guun ya'mij so' a.

<sup>23</sup> Gaa cachén Zacarías se-suun Diose, gaa ne quinan' so' tucua' so' a. <sup>24</sup> Cachén doj güii, gaa ne nari' nicá so' Elisabet 'o ne'ej a. 'Un' yavii cayáán no' tucua' no', <sup>25</sup> ne nuchruj raa no' nana nihánj a: "Ga naá guun na'aj uxraj rihaan yuvij che'é se chana ityün mej, tzaj ne ndaa yaj racuj Diose manj á". Danj guun rá no' a.

**Nana nihánj taj xna'anj se vaa cataj xna'anj se-mozó  
Diose se vaa ca'ngaa Jesucristó a**

<sup>26</sup> Gaa quisij vatán' yavii cunuû rque Elisabet, gaa ne ca'néé Diosé man se-mozó so' síí cu'naj Gabriel ca'anj so' ndaa 'o chuman' naj rihaan estadó Galilea chuman' cu'naj Nazaret a. <sup>27</sup> Ne ca'anj cataj xna'anj so' 'o nana rihaan 'o chana yaan cu'naj Mariá a. Aj guun ya xcáj 'o síí cu'naj José man no', ne 'o ta'níí ta'nij si'nó síí guun hij ndo'o gaa naá síí cu'naj David me so' a.

<sup>28</sup> Gaa ne dan me se cuchi' se-mozó Diosé rihaan Mariá, ne cataj so':

—Racuíj Diosé mán so' á. 'Q se qui'yaj ndo'o Diosé se luj che'é so', ne yo'q yaán Diosé ga so' á. Sa' doj cavii uruún so' rihaan cunudanj nij chana, qui'yaj Diosé a. —Danj cataj se-mozó Diosé rihaan Mariá a.

<sup>29</sup> Tzaj ne caráya'anj Mariá nana ca'mii se-mozó Diosé, ne ne quene'en no' me che'é ca'mii so' nana vaa danj ma'. <sup>30</sup> Gaa ne cataj uún se-mozó Diosé rihaan no' a:

—Se kuchu'ví' so', man Mariá. Aran' rá Diosé qui'yaj Diosé se luj che'é so' á. <sup>31</sup> Nari' so' 'o ne'ej, ne cuchruj so' 'o ne'ej sno'o adonj. Jesús tycu'náj so' man so' á.

<sup>32</sup> Síí sa' ndo'o guun so', ne ta'níí Diosé síí sa' ndo'o me so' adonj. Guun so' síí guun hij rihaan ní', qui'yaj Diosé síí 'nij ra'a man ní' a. Ase vaa guun hij xij so' síí cu'naj David rihaan soj sij israelitá gaa naá ro', danj qui'yaj ma'an so' guun hij so' rihaan soj nu' cavii nu' ca'anj adonj. —Danj cataj Gabriel rihaan Mariá a.

<sup>34</sup> Ne cataj Mariá rihaan se-mozó Diosé, ne:

—Chana yaan mej á. Asa' ca'vee cuchruj 'ujj ne'ej, rá so' ga —taj Mariá, xná'anj no' man se-mozó Diosé a.

<sup>35</sup> Gaa ne cataj se-mozó Diosé rihaan Mariá a:

—Cayáán Nimán Diosé ga so', ne racuíj Diosé síí nucuaj ndo'o mán so', ne che'é dan cuchruj so' ne'ej sa' rihaan Diosé, ne ta'níí Diosé me ne'ej cuchruj so' a.

<sup>36</sup> Ne xcáj so' cuentá che'é tuvi' chana so' Elisabet se vaa nda' se chana ityun me no', taj nii, ne nda' se chana hij me no', tzaj ne aj quisij vatán' yavii nuû rque no' cuano nanj á. <sup>37</sup> Diosé me síí a'vee 'yaj cunudanj a —taj se-mozó Diosé rihaan Mariá a.

<sup>38</sup> Ne cataj Mariá rihaan se-mozó Diosé a:

—Dan me se nanj chana 'yaj suun che'é síí 'nij ra'a man ní' mej, ne ca'vee qui'yaj so' ndaa vaa cataj so' rihaan á —taj Mariá rihaan se-mozó Diosé yo' a.

Gaa ne naxuun se-mozó Diosé man so' a.

**Nana nihánj taj xna'anj se vaa ca'anj Mariá ca'mii no'  
ga Elisabet a**

<sup>39</sup> Cachén doj güii, gaa ne qui'yaj chuvii Mariá si'yaj no', ne yoo ndo'o ca'anj no' 'o chuman' naj estadó Judea, 'o chuman' naj rej xraj a. <sup>40</sup> Ne ca'anj no' tucua Zacarías, ne catúj no' rá ve', ne cataj no': "Vaa nucuáá so' na'", taj no' rihaan Elisabet a.

<sup>41</sup> Nu' cuno Elisabet nana ca'mii Mariá, ne nu' güéj ne'ej rque no' a. Dan me se catúj Nimán Diosé nimán Elisabet, <sup>42</sup> ne nucuaj ca'mii no' ga Mariá, cataj no':

—Rqué Diosé xna'anj ni'yaj uruún so' rihaan cunu' danj chana a. Ne uxrá rque Diosé xna'anj ni'yaj ne'ej cuchruj so' a. <sup>43</sup> Ve'é ndo'o quirán' 'ujj se vaa ca'na' roj nij síí qui'nij ra'a man ní' tucuaj a. <sup>44</sup> Nu' cunoj nana cataj so' rihanj, ne nu' guun niha' rá ne'ej, ne nu' güéj ne'ej rquej a. <sup>45</sup> Cavii sa' so' che'é se amán rá so' se-nana Diosé, se vaa quisij ya nu' nana ca'mii Diosé rihaan so' adonj —taj Elisabet rihaan Mariá a.

<sup>46</sup> Gaa ne cataj Mariá nana nihánj a:

—Nda' se chana yanj rma'an mé 'ujj, tzaj ne cunuu 'ee rá Diosé ni'yaj so' manj a. Che'é dan me daj cataj ma'an Diosé, ne ca'vee qui'yaj a. Nanuj rá Diosé manj, ne che'é dan sa' vaa Diosé, rá nimanj, ne guun niha' ndo'o rá nimanj ni'yaj nimanj man Diosé síí tinanii manj rihaan sayuun nanj adonj. Ne yaj cataj cunudanj yuvii se vaa chana quiri' ndo'o xna'anj ni'yaj mej a.

<sup>49</sup> Danj cataj nij so' che'é se sa' qui'yaj Diosé síí nucuaj ndo'o che'ej a. Ne síí vaa sa' inanj me so' adonj. <sup>50</sup> 'Q 'ee rá so' man taran' nij síí uno rihaan so' a. <sup>51</sup> Qui'yaj Diosé suun nocoo uxrá a. Nu' nij síí xtá' nimán ro', qui'yaj canaán Diosé rihaan nij so', ne quinavij se-nana nij so' nanj adonj. <sup>52</sup> Nu' nij síí rii ta'nga' ro', ca'nee Diosé suun ra'a nij so', ne guun nij so' síí nocoo nanj adonj. Ne nu' nij síí nocoo ro', guun nij so' síí quiri' ta'nga' naca, qui'yaj Diosé nanj á. <sup>53</sup> Nu' nij síí na'aaan rque ro', rque Diosé chraa cha' nij so', ne nu' nij ru'vee ro', cunuu nique' nij so', qui'yaj Diosé a. <sup>54</sup> Quisij ya nu' nana ca'mii Diosé rihaan xij ní' nij síí man gaa naá a. Racuíj so' man ní' sij israelitá, che'é se sij nocoo man so' me ní' adonj. <sup>55</sup> Nanuj rá so' ndaa vaa cataj so' rihaan xij ní' síí cu'naj Abraham, ne che'é dan 'ee rá so' man ní' sij israelitá, che'é se ta'níí ta'nij si'nó Abraham me ní' a. —Nu' nana nihánj me nana cataj Mariá a.

<sup>56</sup> Gaa ne va'nuj yavii cayáán Mariá tucua Elisabet, gaa ne quinán' no' tucua no' a.

**Nana nihánj taj xna'anj se vaa ca'ngaa Juan síí cuta' ne  
man yuvii a**

<sup>57</sup> Gaa quisij güii ca'ngaa ta'níí Elisabet, gaa ne dan me se cuchruj no' 'o ne'ej sno'o cunii a. <sup>58</sup> Cuno nij tuvi' no' se vaa ve'é uxrá qui'yaj Diosé ga no', ne guun niha' uxrá rá nij so' che'é no' a. <sup>59</sup> Gaa quisij ne'ej tunj güii, gaa ne dan me se cuchi' nij síí cuta' ta'nga' nee man ne'ej ve' a. Ne nij so' me rá tycu'náj Zacarías man ne'ej che'é se Zacarías cu'naj rej ne'ej, <sup>60</sup> tzaj ne ne ca'vej rá nii ne'ej cu'naj ne'ej danj ma'. 'Q se cataj no': —Juan cu'naj se-chuvii ta'níí á —taj no' rihaan nij so' a.

<sup>61</sup> Tzaj ne cataj nij síí ca'na' rihaan no' a:

—Tzaj ne a 'ó tuvi' soj ne cu'naj Juan ma' —taj nij so' rihaan no' a.

<sup>62</sup> Che'é dan xná'anj nij so' man rej ne'ej, daj doj ra'a nij so' tucunó nij so' a. Guun rá nij so' quene'en nij so' daj quinaj se-chuvii ne'ej, qui'yaj rej ne'ej, rá nij so' a.

<sup>63</sup> Cachíín Zacarías yanj ga ra'a so', ne cachrón so' letrá rihaan yanj yo', ne: "Juan cu'naj se-chuvii ne'ej", taj letrá cachrón so' rihaan yanj, ne che'é dan caráya'anj ndo'o nij síí ca'na' a. <sup>64</sup> Nu' cachrón Zacarías letrá, ne

nu' ca'vee ca'mii uún so' nanj adonj. Gaa ne guun che'e so' cataj so' se vaa ve'é uxrá qui'yaj Diose a. <sup>65</sup> Ne caraya'anj nij síf yanj nichrun' se vaa quiran' Zacarías se vaa guun ya'mii so', ne ndaa taran' nij síf yanj quij nicun' estadó Judea ro', cuno ndaa vaa quiran' so' a. <sup>66</sup> Taran' nij síf cuno ro', nuchruj raa, ne xná'anj nij so' man tuvi' nij so' me suun cata Juan asa' cachij so' a. Danj tu'va nij so' che'é se quene'en nij so' se vaa rqué ndo'o Diose xna'anj ni'yaj Juan a.

### Nana nihánj taj xna'anj se vaa cataj xna'anj Zacarías se vaa racuíj ndo'o Diose man nij yuvij israelitá a

<sup>67</sup> Racuíj Nimán Diose man rej Juan síf cu'naj Zacarías, ne cataj so':

<sup>68</sup> —Ca'mij sa' ní' che'é Diose síf noco' ní' sij israelitá a. Ése racuíj so' man ní' sij noco' man so', ne tinanii so' man ní' rihaan sayuun a. <sup>69</sup> Ca'na' 'o síf nucuaj guun so' síf tinanii sa' man ní' rihaan sayuun, qui'yaj Diose a. 'O ta'níí ta'nij si'no síf guun chij gaa naá síf cu'naj David guun so', <sup>70</sup> ndaa vaa cataj nij síf nata' se-nana Diose, qui'yaj Diose gaa naá, <sup>71</sup> ne dan me se ca'na' síf nucuaj tinanii so' man ní' rihaan nij síf taj ri'yunj man ní', taj nij so', ne se guun nucuaj nij síf taj ri'yunj man ní' qui'yaj chi'ij nij so' man ní' ma', taj nij so' a. <sup>72</sup> Dan me se cunuu 'ee rá so' man ní' ndaa vaa cata' tu'va so' rihaan xij ní', ne yo'q nuú rá so' nu' se vaa cataj xna'anj so' se vaa qui'yaj so' che'é ní' do' a.

<sup>73</sup> "Dan me se cataj so' rihaan xij ní' síf cu'naj Abraham se vaa ya ya tinanii so' man ní' rihaan nij síf taj ri'yunj man ní', gaa ne se cuchu'vi' ní' qui'yaj suun ní' che'é so' a. <sup>75</sup> Ne gaa nica nimán ní' rihaan Diose nu' güii gaa i'na' ní' adonj —taj Zacarías, gaa ne ca'mii uún Zacarías rihaan ma'an ta'níí so'— <sup>76</sup> Ne xa' ma'an so', tzaj ne guún so' síf nata' se-nana Diose, ne Diose me síf sa' ndo'o, rej. Asino so' guun che'e ca'mii natáj, gaa ne ca'na' síf qui'nij ra'a man ní' ei. Dan me se cunuu nica nimán yuvij, qui'yáá so', ne caraya'anj yuvij man síf ca'na' qui'nij ra'a man ní', qui'yáá so', <sup>77</sup> ne so' qui'yaj xcaj nij síf canoco' man Diose cuentá se vaa ca'vee quinvij cacun' tumé nij so' qui'yaj síf ca'na', ne ca'vee quinanij nij so' rihaan sayuun a. <sup>78</sup> Danj qui'yaj Diose che'é nij so' che'é se 'ee uxrá rá Diose man nij so', ne che'é dan ca'nej so' man síf qui'nij ra'a man nij so' asa' quisij güii ca'vee cavij sa' ní' qui'yaj Diose adonj. <sup>79</sup> Gaa ne xa' tuvi' ní' síf ne acaj cuentá do', xa' tuvi' ní' síf chu'vi' ndo'o se vaa cavij' nij so' do', tzaj ne cuchuguyun rihaan nimán nij so', gaa ne xcaj nij so' cuentá, gaa ne nari' taran' ní' daj qui'yaj ní', ne cunuu xej nimán ní' adonj —taj Zacarías rihaan ta'níí so' a.

<sup>80</sup> Dan me se cachij xnii cu'naj Juan, ne guun so' síf nucuaj nimán, ne inanj rej tacaan yaán so' ndaa se quisij güii guun che'e so' nata' so' se-nana Diose rihaan nij síf israelitá a.

### Nana nihánj taj xna'anj se vaa ca'ngaa Jesucristó a

2 Maan yo' ca'ngaa Juan ro', cayáán síf cu'naj Augusto síf nica suun emperador, ne ca'née so'

nana rihaan nij síf man taran' nij chuman' rii ta'nga' so' rihaan se vaa me rá so' naxcaj so' 'o yanj documento no se-chuvij 'o 'o nij yuvij a. <sup>2</sup> Ne cayáán síf cu'naj Cirenio síf nica suun gobernador uun chij rihaan estadó Siria gaa naxagaa yanj yo' a. <sup>3</sup> Dan me se ca'anj cunudanj nij yuvij chuman' chiháán xij nij so', gaa ne naxagaa yanj no se-chuvij nij yuvij yo' a.

<sup>4</sup> Cavij síf cu'naj José chuman' Nazaret chuman' naj estadó Galilea, ne ca'anj so' chuman' Belén chuman' naj estadó Judea a. Chuman' ca'ngaa xij so' síf guun chij gaa naá síf cu'naj David me Belén, ne che'é dan ca'anj José ndaa Belén, che'é se 'o ta'níí ta'nij si'no David me so' a. <sup>5</sup> Nica so' chana cu'naj Mariá chana aj guun ya xcaj so' man, ca'anj so' cano se-chuvij roj so' rihaan yanj a. Nuú rque Mariá, <sup>6</sup> ne gaa caran' roj so' Belén, ne quisij güii ca'ngaa ne'ej a. <sup>7</sup> Taj yan vaa ya'núj caran' roj so' ca'ngaa ne'ej a ma'. Dan me se daj doj rej man scúj vaa ya'núj caran' roj so' a. Ne cuchruj no' 'o ne'ej snó'o cunii ta'níí no' síf chava' a. Qui'yaj yanu' no' man ne'ej, ne ca'née no' man ne'ej rá rihoo yan nuú co'yoo chá scúj a.

### Nana nihánj taj xna'anj se vaa curuvi' se-mozó Diose rihaan nij síf tumé matzinj a

<sup>8</sup> Dan me se man síf tumé matzinj rej tacaan nichrun' yaj tu'va chuman' Belén, ne nicun' ta'aj nij so' xe' tumé nij so' daán nij so' rej nij a. <sup>9</sup> Gaa ne dan me se naqui'yaa 'o se-mozó Diose rihaan nij so', ne cuchuguyun uxrá rihaan nij so', qui'yaj Diose, gaa ne cuchu'vi' ndo'o nij so' a. <sup>10</sup> Gaa ne cataj se-mozó Diose rihaan nij so' a:

—Se cuchu'vi' soj ma'. 'O se ca'ná' 'unj nata' 'unj 'o nana sa' rihaan soj che'é rasuyun qui'yaj guun nihan' rá taran' nij yuvij ei. <sup>11</sup> 'O se cuan' me se ca'ngaa 'o ne'ej chuman' chiháán David, ne ne'ej yo' ro', me síf ca'née Diose tinanii man yuvij rihaan sayuun, ne síf qui'nij ra'a man ní' me so' ei. <sup>12</sup> Nanj vaa quene'en soj se vaa ya ca'mij rihaan soj a. Ca'anj nij soj chuman' Belén, ne nari' soj 'o ne'ej guun yanu', ne nuú so' rá rihoo chá xcuu co'yoo, ne so' me síf qui'nij ra'a man ní' a. —Danj cataj se-mozó Diose rihaan nij síf tumé matzinj a.

<sup>13</sup> Dan me se nu' navij ca'mii se-mozó Diose ga nij so', gaa ne veé maan orá dan curuvi' que'ee doj nij se-mozó Diose uún, ne ve'é uxrá ca'mii nij so' che'é Diose, cataj nij so':

<sup>14</sup> —Sa' uxrá vaa Diose, síf nicun' xta', ne gaa xej nimán nij yuvij sij sa' nimán a —taj nij se-mozó Diose rihaan nij síf tumé matzinj a.

<sup>15</sup> Dan me se quinan' nij se-mozó Diose xta', gaa ne cataj nij síf tumé matzinj rihaan tuvi' nij so' a:

—Ca'anj ní' Belén quene'en ní' daj guun se vaa cataj xna'anj Diose rihaan ní' ei —taj nij so' rihaan tuvi' nij so' a.

<sup>16</sup> Yoo ca'anj nij so', ne dan me se nu' cuchi' nij so', ne nu' quinari' nij so' man Mariá ga José, ne dan me se quinari' nij so' man ne'ej, nuú ne'ej rá rihoo a. <sup>17</sup> Dan me se gaa quene'en nij síf tumé matzinj man ne'ej, gaa ne cataj xna'anj nij so' nana ca'née Diose rihaan

nij so' che'é ne'ej rihaan Mariá gá José do', rihaan nij síi man nichrun' do' a. <sup>18</sup> Gaa ne caráya'anj cunudanj yuvij cuno nana ca'mii nij síi tumé matzinj yo' a. <sup>19</sup> Ne Mariá me se ca'née no' cunudanj nana yo' cúu yave no', ne nuchruj raa no' che'é nana yo' a. <sup>20</sup> Dan me se quinán' nij síi tumé matzinj, gaa ne guun niha' uxrá rá nij so' che'é nu' nana cuno nij so' do', che'é nu' se vaa quene'en nij so' do', ne: "Sa' uxrá qui'yaj Diose á", taj nij so' a. 'O se ase vaa cataj xna'anj se-mozó Diose rihaan nij so' ro', veé danj vaa guun a.

### Nana nihánj taj xna'anj se vaa caxrij roj nica José ne'ej ston Diose a

<sup>21</sup> Cachén 'o tunj güii gaa ne cuta' nii ta'nga' nee man ne'ej, ne Jesús cu'naj ne'ej, qui'yaj nii, ndaa vaa cataj xna'anj se-mozó Diose gaa ataa nayon so' rque Mariá a.

<sup>22</sup> Cachén vij chihaa güii, gaa ne quisij güii cunuu sa' Mariá rihaan Diose a. Che'é dan nicaj roj so' man ne'ej ca'anj roj so' nuvií nocoo yanj chuman' Jerusalén, ne caxrij roj so' ne'ej ston Diose a. <sup>23</sup> 'O se danj Diose taj se vaa daj a ta'níi nij yuvij israelitá síi chava' guun si'yaj Diose, ne che'é dan qui'yaj roj so' danj a. <sup>24</sup> Dan me se ca'anj roj so' ca'anj go' roj so' xcuu rihaan Diose ndaa vaa taj danj Diose a. Ca'vee go' yuvij vij cha'aan ca'vee go' yuvij vij culuj ca'vee, taj danj Diose a.

<sup>25</sup> Dan me se cayáan 'o chii nga' cu'naj Simeón chuman' Jerusalén a. Sij vaa nica nimán me so', ne sij nocoo' uxrá man Diose me uún so', ne quisij que'ee yo' na'vij uxrá so' se vaa tinanii Diose man nij yuvij israelitá rihaan sayuun a. Cayáan Nimán Diose ga so', <sup>26</sup> ne aj cataj xna'anj Nimán Diose rihaan so' se vaa se cavi' so' ndaa se aj quene'en ya so' man síi ca'nej Diose a. <sup>27</sup> Dan me se güii cuchi' roj nica José chuman' Jerusalén me se cataj xna'anj Nimán Diose rihaan Simeón se vaa ca'anj so' nuvií nocoo, ne che'é dan ca'anj so' catúj so' rque nuvií a. Gaa ne catúj roj nica José rque nuvií ga ne'ej che'é se guun rá roj so' qui'yaj roj so' ndaa vaa taj danj Diose a. <sup>28</sup> Gaa ne tára'a síi cu'naj Simeón ne'ej, ne nago' so' graciá rihaan Diose che'é ne'ej a. Ne nihánj me nana ca'mii so' a:

<sup>29</sup> —Quisij ya nu' ndaa vaa cataj so' rihanj, ne che'é dan ca'vee cavij yaj, ne gaa xej nimanj, Ataj Chij. <sup>30</sup> Quene'en rihanj man síi ca'née so' man tinanii man núj rihaan sayuun, <sup>31</sup> ne quene'en cunudanj yuvij se vaa ca'na' so' qui'yáa so' nanj á. <sup>32</sup> Ase vaa ya'an chuguun gaa so' tijaan so' se-tucuaj so' rihaan nij yuvij yanij, ne ca'mii sa' nii che'é núj sij israelitá, qui'yaj uún so', ése síi nocoo' man so' me núj nanj adonj —taj Simeón rihaan Diose a.

<sup>33</sup> Caráya'anj roj nica José se-nana síi cu'naj Simeón se vaa ca'mii so' che'é ne'ej, <sup>34</sup> ne cachíin ni'yaj Simeón rihaan Diose se vaa rque Diose xna'anj ni'yaj roj nica José a. Gaa ne cataj so' rihaan Mariá a:

—Cune' Diose man ne'ej nihánj qui'yaj suun so' rihaan Diose, ne dan me se cavij sa' uxrá que'ee tuvi' ní' sij israelitá, qui'yaj so', tzaj ne que'ee tuvi' ní' tuna, qui'yaj uún so' adonj. Dan me se ca'née Diose man so'

che'é rej xcaj yuvij cuentá che'é Diose, tzaj ne ca'mii chí'ii nii ni'yaj nii man so' adonj. <sup>35</sup> Ne xa' so', tzaj ne quinano ndo'o rá ma'an so' che'é so' vaa güii nanj á. Dan me se ca'vee xcaj ní' cuentá daj vaa nimán que'ee yuvij, qui'yaj so' adonj —taj Simeón rihaan Mariá a.

<sup>36</sup> Ne yáan 'o chana' hij cu'naj Ana, ne níi nata' se-nana Diose me no', ne ta'níi síi cu'naj Fanuel me no', ne ta'níi ta'nij si'no' síi cu'naj Aser me roj roj roj no' a. Xcaj chii man no' gaa naá, ne nicaj tuvi' roj so' hij yo', gaa ne cavi' nica no', <sup>37</sup> ne quináj no' ne ma'an no', ne quisij no' ndaa ca'anj chihaa ca'anj yo' gaa ca'ngaa ne'ej cu'naj Jesús a. Chana' nocoo' uxrá man Diose me no', ne che'é dan yo' cayáan no' nuvií nocoo, ne nigánj yaj a'yuj caráj guue no', ne cachíin ni'yaj no' rihaan Diose a. <sup>38</sup> Maan orá ca'mii Simeón che'é ne'ej ro', veé maan orá dan vaj chana' hij cu'naj Ana, ne catúj no' rque nuvií, gaa ne nago' no' graciá rihaan Diose che'é ne'ej, ne cataj xna'anj no' che'é ne'ej rihaan nij yuvij man na'vij güii tinanii Diose man nij síi man Jerusalén rihaan sayuun a.

### Nana nihánj taj xna'anj se vaa canicaj roj nica José quinán' roj so' tucua roj so' a

<sup>39</sup> Dan me se gaa quisij qui'yaj roj nica José se vaa taj se-tucuaj Moisés, gaa ne quinán' roj so' estadó Galilea a. Quinán' roj so' chiháan roj so' chuman' Nazaret a. <sup>40</sup> Cachij ne'ej guun so' síi nucuaj a. Xnii vaa hij rá me so', ne rque uxrá Diose xna'anj ni'yaj so' a.

### Nana nihánj taj xna'anj se vaa ca'mii Jesucristó rihaan nij síi naqui'yaj cuu se-tucuaj Moisés gaa me Jesucristó xnii a

<sup>41</sup> Daj a yo' ca'anj roj nica José chuman' Jerusalén gaa canuú cha'anj pascuá, <sup>42</sup> ése danj vaa tucuaán nocoo' nij síi israelitá a. Dan me se gaa quisij Jesucristó chuvij yo', gaa ne ca'anj roj ni' so' cha'anj ga rej so' a.

<sup>43</sup> Cachén cha'anj, gaa ne quinán' roj nica roj so', tzaj ne xnii ro', quináj Jerusalén, ne ne quene'en roj nica roj so' se vaa quináj xnii a ma'. <sup>44</sup> Quinán' xnii ga tuvi' roj so', rá roj so', ne che'é dan ca'anj roj so' a. Gaa ne rej ti'nuu guun che'e roj so' nano' roj so' man xnii rihaan tuvi' roj so', <sup>45</sup> tzaj ne nuvi' yan vaj xnii a ma'. Che'é dan nanicaj uún roj so' ca'anj uún roj so' Jerusalén, ne nano' uxrá roj so' man xnii a. <sup>46</sup> Quisij va'núj güii nano' roj so' man xnii, gaa ne ca'anj roj so' rque nuvií nocoo man nij síi naqui'yaj cuu se-tucuaj Moisés, ne maan dan ne xnii nanó xrej xnii nana a'mii nij so', ne achíin na'anj xnii nana cuu man nij so', <sup>47</sup> ne caráya'anj daj a nij síi cuno nana ca'mii xnii, ése sij nicaj uxrá cuentá me xnii, ne sa' uxrá ca'mii xnii, rá nij so' a. <sup>48</sup> Ne caráya'anj roj nica roj so' gaa quene'en roj so' se vaa ne xnii sca'núj nij sij a. Gaa ne cataj nii so' rihaan so' a:

—Ne chihan' qui'yáa di' man núj, man rej. Nanó ndo'o rá rée di' do', nanó ndo'o rá 'unj do', qui'yáa di', che'é se nuvi' nano' núj man di', rej —taj nii so' rihaan so' a.

<sup>49</sup> Tzaj ne cataj Jesucristó rihaan roj so' a:

—Taj che'é nana' roj soj manj ma'. Me che'é ne ne'en roj soj se vaa no xcúun 'unj qui'yaj suun 'unj se-tu-cuanj Réj ga —taj xnii rihaan roj nica roj so' a.

<sup>50</sup> Tzaj ne ne cunō roj so' se-nana xnii se vaa no xcúun so' qui'yaj suun so' se-chrej Rej so' Diose a.

<sup>51</sup> Dan me se quinan' Jesucristó chuman' Nazaret ga roj so', ne yo'o yanj uno sa' so' rihaan roj so' a. Ne yo'o nuú rá Mariá nu' ndaa vaa guun che'é so' ga ca'ngaa so' do', nu' nana cyu sa' a'mii so' do' a. <sup>52</sup> Dan me se cachij Jesucristó guun so' sí cyu raq, ne caran' rá Diose ni'yaj Diose man so', ne caran' rá yuvij uun ni'yaj yuvij man so' nanj adonj.

**Nana nihánj taj xna'anj se vaa ca'anj Juan sí cuta' ne man yuvij tacaan, ca'mii natáj so' a**

**3** Yo' xnu' cayáan sí cu'naj Tiberio sí nicaj suun emperador ro', maan yo' dan me rqué Diose se-nana Diose rihaan sí cu'naj Juan ta'ní Zacarías ga cachéé so' tacaan a. Veé maan yo' ca'mii Diose rihaan Juan, dan me cayáan sí cu'naj Poncio Pilato sí nicaj suun gobernador uun chij rihaan estadó cu'naj Judea a. Ne veé maan yo' dan cayáan sí cu'naj Herodes sí nicaj suun tetrarca uun chij rihaan estadó cu'naj Galilea, ne cayáan tinúú so' sí cu'naj Felipe sí nicaj suun tetrarca uun chij rihaan roj estadó cu'naj Iturea ga Traconite a. Ne veé maan yo' dan cayáan sí cu'naj Lisanas sí nicaj suun tetrarca uun chij rihaan estadó cu'naj Abilinia, ne cayáan roj sí cu'naj Anás ga Caifás xrej ata suun nocōo doj rihaan nij yuvij israelitá a. Taran' nij so' me sí uun chij ga cuchi' se-nana Diose rihaan Juan ga cachéé so' tacaan a.

<sup>3</sup> Dan me se cachéé Juan nu' rej naj nichrun' tu'va chráa cu'naj Jordán, ne guun che'e so' ca'mii natáj so' rihaan yuvij se vaa nuchran' nimán nij yuvij, ne tanáj nij yuvij chrej chi'ij, ne ca'vee tinavij Diose cacun' tumé nij yuvij, taj Juan adonj.

<sup>4</sup> Dan me se qui'yaj Juan nu' ndaa vaa taj nana cachrón sí cu'naj Isaías sí nata' se-nana Diose ga naá rihaan yanj, ne nihánj me nana cachrón so' a: "Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvij, ne ve'é ca'mii nij yuvij ga sí 'nij ra'a man ní' asa' ca'na' so' adonj. <sup>5</sup> Dan me se se ca'vee quinaj a doj se chi'ij nimán ní' caráan chrej rihaan sí 'nij ra'a man ní' ca'na' so' ma'. Maan se quirij ní' nu' se chi'ij, ne caraa ní' nu' se sa' cachijin man nimán ní', ne ve'é inanj cunuu nica nimán ní', qui'yaj ní' ei. <sup>6</sup> Ga ne quene'en nu' nij sí man daj a chuman' se vaa ca'vee tinanii Diose man yuvij rihaan sayuun nanj á". Dan me nana cachrón sí cu'naj Isaías rihaan yanj ga naá nana taj xna'anj che'é sí cu'naj Juan a.

<sup>7</sup> Dan me se cuchi' que'ee ndo'o yuvij rihaan Juan che'é se guun rá nij so' cuta' ne Juan man nij so' a. Ga ne caxrij yuvaj Juan man nij so', cataj so':

—Ase vaa xcuáa yuvaj vaa soj á. Me sí cataj xna'anj rihaan soj cunanj soj, ne quinanij soj rihaan sayuun qui'yaj Diose ga. Asa' ca'vee quinanij soj rihaan sayuun, qui'yaj nanj na cata' ne soj, rá soj ga. <sup>8</sup> Sese ya

cunuu sa' nimán soj, ne ca'anj soj qui'yaj soj ndaa vaa 'yaj yuvij cunuu sa' nimán ei. Ne tadó soj sese guun che'e soj cataj soj se vaa ta'ní ta'nij si'no sí cu'naj Abraham sí cane ga naá me soj, ne ne tumé soj cacun', cataj soj á. Se ca'mii soj daj chihaa mij danj ma'. Maan se cataj xna'anj 'unj rihaan soj se vaa nuveé se ya'anj tiha' ta'ní ta'nij si'no sí cu'naj Abraham me soj a ma'. Maan se sese Diose rá, ne ca'vee nicaj Diose náá guun yahij naj rihaan yo'óo nihánj, ne qui'yaj Diose man 'o ta'ní ta'nij si'no sí cu'naj Abraham adonj. Che'é dan canoco' ya soj man Diose ei. <sup>9</sup> O se nichrun' qui'yaj Diose sayuun man nij sí na'vej rá cunō rihaan so' nanj á. Ase vaa sí orō' aga' a'ne' chruun, ne orō' so' aga' ca'ne' so' chruun ro', danj vaa Diose cuano ei. Che'é dan ase vaa 'yaj nii man chruun ro', ta'nga' danj qui'yaj Diose man nij sí ne uno rihaan so' a. Dan me se a'ne' nii chruun nuvi' chruj sa' raq, ne araa nii man chruun yo' rihaan ya'an a. Ta'nga' danj qui'yaj Diose man nij sí na'vej rá canoco' chrej sa' adonj. —Danj cataj Juan rihaan nij yuvij a.

<sup>10</sup> Ga ne xna'anj nij yuvij man Juan, cataj nij yuvij:

—Daj qui'yaj núj, rá so' ga —taj nij so' rihaan Juan a.

<sup>11</sup> Ga ne cataj Juan rihaan nij so' a:

—Sí vaa vij se-cotoó ro', caxrij uun so' 'o cotoó ston sí nuvi' se-cotoó á. Ne sí vaa se chá rihaan ro', go' so' doj se chá man nij sí nuvi' se chá rihaan á. —Danj cataj Juan rihaan nij so' a.

<sup>12</sup> Doj tuvi' nij sí a'néj puextó ro', ca'na' rihaan Juan che'é se guun rá nij so' cuta' ne Juan man nij so' a. Ne xna'anj nij so' man Juan, cataj nij so':

—Daj qui'yaj núj, rá so', ga maestro' —taj nij so' rihaan Juan a.

<sup>13</sup> Ne cataj Juan rihaan nij so' a:

—Inanj sa'anj no xcúun soj ca'nee soj man yuvij ro', ca'vee ca'nee soj á. Se ca'néj soj doj sa'anj man yuvij ma' —taj Juan rihaan nij so' a.

<sup>14</sup> Ga ne xna'anj doj tanuu man Juan a:

—Daj qui'yaj núj, rá so' ga —taj nij so' rihaan Juan a.

Ne cataj Juan rihaan nij so' a:

—Se qui'yaj soj fuerzá rque yuvij sa'anj rihaan soj a ma'. Se ca'mii ne soj che'é yuvij ne ca'nee soj sa'anj man nij yuvij a ma'. Veé doj sa'anj vaa tu'vee soj ro', guun niha' rá soj nicaj soj nanj á. —Danj cataj Juan rihaan nij tanuu a.

<sup>15</sup> Dan me se nuchruj nij yuvij cuentá sese sij ca'né Diose tinanii man yuvij rihaan sayuun me Juan, ne che'é dan na'vij ndo'o nij yuvij cataj xna'anj ma'an sí cu'naj Juan daj sij me ma'an so' a. <sup>16</sup> Ne che'é dan cataj Juan rihaan nij so' a:

—Sí uta' ne na uun man soj mej, tzaj ne ca'na' yo'ó sí guun sca' doj rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nimán Diose ga so', ne caxrij ya'an so' man soj sij na'vej rá cunō rihaan Diose, ne cacaa soj adonj.

<sup>17</sup> Dan me se ase vaa sí orō' chruun palá vaa so' cuano adonj. Dan me se sí nicaj chruun palá ro', rii nu' 'núú trigó naj rihaan yo'óo, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne ani-

caj so' araa so' squij ni'ya xráá trigó rihaan ya'an a. Ne ase vaa síí nicaj palá man cuano ro', danj qui'yaj síí ca'na', ne naqui'yaj chre' so' man cunudanj nij síí cunuu sa' nimán, ne caraa so' man nij síí chi'ii rihaan ya'an, ne cacaa nij so' nu' cavii nu' ca'anj, ne daj chihaa mij se quina'áj ya'an yo' a man adonj. —Danj ca'mii síí cunaj Juan rihaan nij yuvii yo' a.

<sup>18</sup> Ne vaa uxrá doj chrej sa' nago' so' man nij yuvii, ne ve'é nata' so' se-nana Diose nana sa' rihaan nij so' a.

<sup>19</sup> Dan me se cataj Juan se vaa ne chihan' qui'yaj síí nicaj suun rey síí cunaj Herodes che'é se ca'néj so' nicaj tinúú so' chana cu'naj Herodías ne xcax so' man no' do', che'é que'ee ndo'o doj se chi'ii qui'yaj Herodes do' a. <sup>20</sup> Che'é se nij ndo'o qui'yaj Herodes ca'néj so' nicaj tinúú so' cataj Juan, ne ca'maan ndo'o rá Herodes ni'yaj so' man Juan, ne caxrij so' taga' man Juan nanj á. Maan ta'nga' doj vaa cacun' tumé so' gaa ataa caxrij so' taga' man Juan, tzaj ne yaj caxrij so' taga' man Juan, ne doj a tumé so' cacun' adonj.

#### Nana nihánj taj xna'anj se vaa cuta' ne Juan man Jesucristó a

<sup>21</sup> Dan me se gaa ataa catuu Juan taga', ne cata' ne taran' nij yuvii, qui'yaj Juan, gaa ne cata' ne Jesucristó, ne nu' nago' Jesucristó gracia rihaan Diose, gaa ne naxra' rej xtá' a. <sup>22</sup> Gaa ne nanij Nimán Diose raá Jesucristó, ne ase vaa ruvi' 'o cha'aan ro', danj vaa curuvi' Nimán Diose a. Gaa ne ca'mii Diose síí nicun' xtá', cataj Diose:

—Ta'níí 'unj síí 'ee ndo'o raj man mé so', ne niha' ndo'o raj ni'yaj 'unj man so' adonj —taj Diose síí nicun' xtá' a.

#### Nana nihánj taj xna'anj che'é taran' nij xii Jesucristó a

<sup>23</sup> Ndaa quisij Jesucristó icó chi' yo' ta' asuun, gaa ne guun che'e so' qui'yaj suun so' se-suun so' a. Dan me se guun rej Jesucristó man síí cunaj José, ne ta'nij José me Jesucristó, rá nij yuvii a. Ne ta'níí Elí me José a.

<sup>24</sup> Ta'níí Matat me Elí, ne ta'níí Leví me Matat, ne ta'níí Melqui me Leví, ne ta'níí Jana me Melqui, ne ta'níí José me Jana a. <sup>25</sup> Ta'níí Matatías me José, ne ta'níí Amós me Matatías, ne ta'níí Nahum me Amós, ne ta'níí Esli me Nahum, ne ta'níí Nagai me Esli a. <sup>26</sup> Ta'níí Maat me Nagai, ne ta'níí Matatías me Maat, ne ta'níí Semei me Matatías, ne ta'níí José me Semei, ne ta'níí Judá me José a. <sup>27</sup> Ta'níí Joana me Judá, ne ta'níí Resa me Joana, ne ta'níí Zorobabel me Resa, ne ta'níí Salatiel me Zorobabel, ne ta'níí Neri me Salatiel a.

<sup>28</sup> Ta'níí Melqui me Neri, ne ta'níí Adi me Melqui, ne ta'níí Cosam me Adi, ne ta'níí Elmodam me Cosam, ne ta'níí Er me Elmodam a. <sup>29</sup> Ta'níí Josué me Er, ne ta'níí Eliezer me Josué, ne ta'níí Jorim me Eliezer, ne ta'níí Matat me Jorim a. <sup>30</sup> Ta'níí Leví me Matat, ne ta'níí Simeón me Leví, ne ta'níí Judá me Simeón, ne ta'níí José me Judá, ne ta'níí Jonán me José, ne ta'níí Eli-aquim me Jonán a. <sup>31</sup> Ta'níí Melea me Eliaquim, ne ta'níí Mainán me Melea, ne ta'níí Matata me Mainán,

ne ta'níí Natán me Matata a. <sup>32</sup> Ta'níí David me Natán, ne ta'níí Isaí me David, ne ta'níí Obed me Isaí, ne ta'níí Booz me Obed, ne ta'níí Salmón me Booz, ne ta'níí Naasón me Salmón a.

<sup>33</sup> Ta'níí Aminadab me Naasón, ne ta'níí Aram me Aminadab, ne ta'níí Esrom me Aram, ne ta'níí Fares me Esrom, ne ta'níí Judá me Fares a. <sup>34</sup> Ta'níí Jacob me Judá, ne ta'níí Isaac me Jacob, ne ta'níí Abraham me Isaac, ne ta'níí Taré me Abraham, ne ta'níí Nacor me Taré a. <sup>35</sup> Ta'níí Serug me Nacor, ne ta'níí Ragau me Serug, ne ta'níí Peleg me Ragau, ne ta'níí Heber me Peleg, ne ta'níí Sala me Heber a. <sup>36</sup> Ta'níí Cainán me Sala, ne ta'níí Arfaxad me Cainán, ne ta'níí Sem me Arfaxad, ne ta'níí Noé me Sem, ne ta'níí Lamec me Noé a. <sup>37</sup> Ta'níí Matusalén me Lamec, ne ta'níí Enoc me Matusalén, ne ta'níí Jared me Enoc, ne ta'níí Mahalaleel me Jared, ne ta'níí Cainán me Mahalaleel a. <sup>38</sup> Ta'níí Enós me Cainán, ne ta'níí Set me Enós, ne ta'níí Adán me Set a. Ne Adán ro', me síí qui'yaj ma'an Diose man a. Nu' nij so' me xii Jesucristó cumán gaa naá a.

#### Nana nihánj taj xna'anj se vaa guun ndo'o rá síí chree tihá' yu'unj so' man Jesucristó a

**4** Dan me se naraa Nimán Diose nu' nimán Jesucristó, gaa ne cavii Jesucristó tu'va chráá cu'naj Jordán, ne ca'anj so', vaj so' rej tacaan, qui'yaj Nimán Diose a. <sup>2</sup> Ne vij chihaa ya güii guun rá síí chree tihá' yu'unj síí chree man Jesucristó, che'é rej guun rá so' canoco' Jesucristó man so' a. Ne a 'ó xco' chraa ne cha Jesucristó cunv' vij chihaa güii ma'. Gaa quisij nu' vij chihaa güii, gaa ne quina'aan ndo'o rque Jesucristó a. <sup>3</sup> Gaa ne dan me se cataj síí chree rihaan Jesucristó, ne: —Sese ya ya ta'nij Diose mé so', ne cataj so' rihaan yahij nihánj se vaa guun yo' rachruún cha so' á —taj síí chree rihaan Jesucristó a.

<sup>4</sup> Gaa ne cataj Jesucristó rihaan so', ne:

—Danj Diose taj: “Nuveé inanj se chá me se achiin rihaan yuvii, ne ca'vee cayáan sa' yuvii ma’”. Inanj danj taj danj Diose —taj Jesucristó rihaan síí chree yo' a.

<sup>5</sup> Gaa ne dan me se nicaj síí chree man Jesucristó cavii so' 'o rej xtá' ndo'o, gaa ne tihaan so' man cunudanj nij chuman' naj rihaan chumii rihaan Jesucristó rque orún' orá nii a. <sup>6</sup> Gaa ne cataj so' rihaan Jesucristó, ne:

—Rque 'unj nu' chuman' nihánj do', nu' se sa' man nij chuman' nihánj do', man so' a. 'O se aj ca'vej Diose guun chij 'unj rihaan nij chuman' yo', ne che'é dan ca'vee qui'yaj guun chij náá guun yuvii rihaan chuman' yo' adonj. <sup>7</sup> Che'é dan sese canicun' ruj so' rihanj, ne guun sij'áá so' man nu' nihánj, qui'yaj adonj. —Danj cataj síí chree rihaan Jesucristó a.

<sup>8</sup> Ne canicaj Jesucristó cataj Jesucristó rihaan síí chree:

—Daj chihaa mij se canicun' ruj 'unj rihaan so' a ma'. 'O se danj Diose taj nana nihánj, se vaa: “Rihaan orún' Diose síí 'nij ra'a man ní' canicun' ruj so', ne a 'ó rihaan tuvi' so' se ca'vee na'vij so' ma’”. Danj taj danj Diose adonj —taj Jesucristó rihaan síí chree yo' a.



<sup>9</sup> Gaa ne nicaj sí chree man Jesucristó ca'anj so' chuman' Jerusalén, ne tacavii so' man Jesucristó raq nuvií nocoo, <sup>10</sup> ne cataj so' rihaan so', ne:

—Sese ya ta'nij Dioso mé so', ne güej so', ne nanij guęę so' rihaan yo'óó á. 'O se danj Dioso taj: "Ca'ne' Dioso suun rihaan nij se-mozó so' se vaa cütumé nij so' mán so' a", taj danj Dioso, ne taj uún yo': <sup>11</sup> "Caráán ra'a nij so' mán so', se gaa nanj cano che'é so' yahij ma". Danj a'mii danj Dioso —taj sí chree rihaan Jesucristó adonj.

<sup>12</sup> Gaa ne cataj Jesucristó rihaan sí chree a:

—Tzaj ne ne nó xcúnj qui'yáj danj ma'. 'O se taj uún danj Dioso a: "Se guun qui'iyunj so' man Dioso sí 'nij ra'a man ní, ne tihá' so' man so' ma". Inanj danj a'mii danj Dioso rihaan ní' adonj —taj Jesucristó rihaan sí chree a.

<sup>13</sup> Danj qui'yaj sí chree, tzaj ne a doj ne cuchuman rá Jesucristó a man adonj. Gaa ne ca'ne' rá sí chree doj güii ga Jesucristó a.

**Nana nihánj taj xna'anj se vaa guun che'e Jesucristó tucuyón so' se-nana Dioso man nij yuvii man estadó Galilea a**

<sup>14</sup> Dan me se nan' Jesucristó estadó Galilea, ne yo'o racuij ndo'o Nimán Dioso man so', ne cuchi' nana che'é so' rihaan nij yuvii man nu' nij chuman' naj estadó Galilea a. <sup>15</sup> Ca'anj Jesucristó daj a nij ve' tucuyón nij yuvii israelitá se-tucuanj Moisés, ne tucuyón so' se-nana Dioso man nij yuvii, ne ve'é uxrá ca'mii taran' nij yuvii che'é so' a.

**Nana nihánj taj xna'anj se vaa nucui' Jesucristó chiháán so', ne ca'mii natáj so' a**

<sup>16</sup> Gaa ne dan me se nucui' uún Jesucristó chiháán so' chuman' Nazaret rej cachij so' a. Gaa quisij güii naránj rá nij yuvii israelitá, ne catúj so' rá ve' tucuyón nij so' se-tucuanj Moisés, ése danj inanj cu'yón so' qui'yaj so' a. Gaa ne canicun' caya so' nayaá so' danj Dioso rihaan nij yuvii a. <sup>17</sup> Sí tumé yanj quirii yanj no nana cachrón sí cu'naj Isaías sí nata' se-nana Dioso gaa naá, ne caxrj so' ston Jesucristó a. Nacuchra' Jesucristó yanj, ne nari' so' rej no nana nihánj a: <sup>18</sup> "Yanj Nimán Dioso ga 'unj, ne che'é dan narii Dioso manj ca'anj ca'mii natáj 'unj nana sa' rihaan nij sí nique a. Ca'née Dioso manj ca'mii natáj 'unj rihaan nij sí 'nij taga' cataj 'unj se vaa curihanj nij so' cacheę yuun nij so' a. Ne ca'née Dioso manj racuij 'unj man nij sí tuchrij naxra' rihaan nij so', ne ca'née Dioso manj racuij 'unj man nij sí ran' sayuun uún nanj á. <sup>19</sup> Ca'née Dioso manj cataj xna'anj 'unj se vaa yaj ro', me rá Dioso cavii sa' nij sí nocoo' man so' qui'yaj so' adonj."

<sup>20</sup> Nu' nihánj me nana nayaa Jesucristó, gaa ne nacué uún so' yanj ne nago' uún so' man sí tumé yanj, gaa ne ca'anj quitaj so' chruun xlá a. Tzaj ne ni'yaj uxrá cunudanj nij yuvii man rque ve' yo' man so', <sup>21</sup> ne che'é dan ca'mii uún so', cataj so':

—Veé cuano nihánj me se aj quisij ya nu' nana nihánj, ne 'unj sij nayaa nana nihánj cuno soj me sí qui'yaj nu' se vaa taj nana nihánj adonj —taj Jesucristó rihaan nij so' a.

<sup>22</sup> Sa' uxrá ca'mii Jesucristó, cataj nij yuvii, ne caraya'anj nij so' cuno nij so' se vaa ve'é uxrá vaa nana ca'mii Jesucristó a. Gaa ne dan me se xna'anj nij so' man tuvi' nij so' sese nuveé ta'nij José sí ne chiháán ní' me so', xna'anj nij so' man tuvi' nij so' a. <sup>23</sup> Che'é dan me ca'mii Jesucristó nana nihánj rihaan nij so' a:

—Ne'én 'unj se vaa cataj soj nana nihánj rihanj a: "Sese ya sij 'yaj cono'ó mé so', ne qui'yaj cono'ó so' man ma'an so' á", cataj soj rihanj che'é se cuno soj se vaa que'ęę suun sa' nocoo qui'yáj chuman' Capernaum a. Ne cataj soj rihanj se vaa qui'yáj suun sa' nocoo tuvi' yo' chuman' chiháán ní' nihánj uún a. <sup>24</sup> Tzaj ne vaa nana nihánj nana cataj ma'anj rihaan soj uún a: "Xa' sí nata' se-nana Dioso, tzaj ne ne amán rá tuvi' so' ni'yaj nij so' man so' ma", me nana taj 'unj no soj a.

<sup>25</sup> "Dan me se cuño soj ca'mij á. Ne'en soj se vaa gaa cayáán sí cu'naj Elías sí nata' se-nana Dioso gaa naá, ne cachén va'nuj yo' táá yanée, ne ne caman', ne che'é dan guun uxrá x'naa nu' chiháán nij sí israelitá, ne yo' dan me se cayáán que'ęę chana cavi' nicaj chiháán nij sí israelitá a. <sup>26</sup> Tzaj ne a 'o chana nique cayáán chiháán nij sí israelitá ro', ne ca'nej Dioso man Elías rihaan no', racuij so' man no' ma'. Maan se rihaan orún' chana nique ne chuman' Sarepta chuman' nocoo' man chuman' Sidón ca'née Dioso man Elías, ne nda' se nuveé chana israelitá me no', tzaj ne racuij Elías man no' adonj.

<sup>27</sup> "Ne ne'en soj se vaa que'ęę yuvii quiran' ndo'o luj ri'yuj cayáán chiháán nij sí israelitá gaa cayáán sí cu'naj Eliseo sí nata' se-nana Dioso gaa naá a. Tzaj ne a 'o nij so' ne nahuun ma'. Maan se orún' sí cu'naj Naamán sí cavii rej yanj cu'naj Siria nahuun, qui'yaj Eliseo adonj. —Danj cataj Jesucristó rihaan nij sí man rá ve' tucuyón nii se-tucuanj Moisés ve' ne chiháán nij so' a.

<sup>28</sup> Cuno nij yuvii nda vaa cavii sa' nij sí man chuman' yanj, ne guun xcoj ruvaá rá nij so', gaa ne ca'maan rá nij so' ni'yaj nij so' man Jesucristó a. <sup>29</sup> Naxumaaan nij so' nicaj nij so' man Jesucristó ca'anj nij so' tu'va chuman' a. Ne dan me se chuman' yo' ro', naj xráá 'o tacaan ruvaá ndo'o a. Ne nicaj nij so' man Jesucristó ca'anj nij so' rej ruvaá, ne guun rá nij so' tanjij nij so' man Jesucristó rej ruvaá a. <sup>30</sup> Tzaj ne cachén Jesucristó sca'núj nij yuvii, ne ca'anj so' nanj adonj.

**Nana nihánj taj xna'anj se vaa quirii Jesucristó man yo'o nana chree nimán 'o snó'o a**

<sup>31</sup> Gaa ne ca'anj Jesucristó chuman' Capernaum chuman' naj estadó Galilea, ne güii naránj rá nij yuvii israelitá ca'anj Jesucristó ve' tucuyón nij so' se-tucuanj Moisés, ne tucuyón so' se-nana Dioso man nij yuvii a. <sup>32</sup> Ne caraya'anj nij yuvii se-nana so', che'é rej ase vaa a'mii 'o sí uun chij ndo'o ro', danj ca'mii so' rihaan nij yuvii a.

<sup>33</sup> Ne dan me se yáán 'o síi nuu naná chree nimán rá ve' yo', ne nucuaj ndo'o caguáj so', ne cataj so' se vaa:

<sup>34</sup> —Me che'é ra'yunj so' man núj, ga Jesús Nazareno'. 'Ná so' tarí so' man núj na'. Ne'enj mán so' se vaa síi guée cavii rihaan Diose mé so' adonj —taj síi nuu naná chree nimán rihaan Jesucristó a.

<sup>35</sup> Gaa ne canicaj Jesucristó caxrj yuvaa so' man naná chree nuu nimán snó'o yo', ne cataj so':

—Dínj tu'vá so' curihanj so' cuaj nimán síi nihánj á —taj Jesucristó rihaan naná chree yo' a.

Ndaa naxru' ma'an snó'o rej tanuu nij yuvii, qui'yaj naná chree, gaa ne curihanj naná chree nimán snó'o yo', ne nahuun sa' so', taj a doj chi'ii ran' so' a ma'.

<sup>36</sup> Gaa ne ca'anj uxrá rá nij yuvii, ne xná'anj nij so' man tuvi' nij so', cataj nij so':

—Daj sij me síi a'mii naná nihánj, ne uun chij so' rihaan naná chree, ne urihanj nij naná chree nimán yuvii 'yaj síi nihánj ga —taj nij yuvii ni'yaj nij yuvii man Jesucristó a.

<sup>37</sup> Gaa ne cuchi' naná che'é Jesucristó rihaan cunudanj nij yuvii man nichrun' chuman' Capernaum yo' a.

#### Naná nihánj taj xna'anj se vaa nahuun nii chej Simón Pedró, qui'yaj Jesucristó a

<sup>38</sup> Dan me se curihanj Jesucristó rá ve' tucu'yón nii se-tucuaj Moisés, ne ca'anj so' tucua' síi cu'naj Simón a. Ne ran' nii chej Simón chi'ii naca yuvaa, ne che'é dan cachíin ni'yaj nii rihaan Jesucristó che'é no' a.

<sup>39</sup> Gaa ne ca'anj Jesucristó canicun' so' rej tu'va yuvé naj no', ne ca'ne' so' suun rihaan chi'ii se vaa quix'nee chi'ii xráa no' a. Gaa ne nu' quix'néj chi'ii xráa no', qui'yaj Jesucristó a. Ne veé maan orá dan naxagaa no', ne qui'yaj chuvii no' chá nij so' nanj adonj.

#### Naná nihánj taj xna'anj se vaa nahuun que'ee síi ran', qui'yaj Jesucristó a

<sup>40</sup> Cata' güii, ne nicaj nij yuvii cunudanj tuvi' nij so' síi ran', vaj nij so' rej ne Jesucristó a. Que'ee ndo'o chi'ii ran' nij so' a. Ne ca'anj Jesucristó, cuta' so' ra'a so' ra ndaa 'o 'o nij síi ran', gaa ne nahuun taran' nij so', qui'yaj Jesucristó a. <sup>41</sup> Ne que'ee nij síi ran' ro', curihanj naná chree nimán uún, ne caguáj nij naná chree yo', ne cataj nij so' se vaa ta'níi Diose me Jesucristó a. Tzaj ne caxrj yuvaa Jesucristó man nij naná chree, ne ne ca'vej rá Jesucristó ca'mii nij so' naná vaa danj a. 'O se quene'en nij so' se vaa sij ca'née Diose tjanii man yuvii rihaan sayuun me Jesucristó, ne ne ca'vej rá Jesucristó guun cuentó che'é so' a.

#### Naná nihánj taj xna'anj se vaa ca'anj Jesucristó nu' nij ve' tucu'yón nij yuvii israelitá se-tucuaj Moisés, ca'mii natáj so' a

<sup>42</sup> Rej taxrej cavii Jesucristó chuman' Capernaum ca'anj so' rej tacaan a. Gaa ne nano' nij síi man Capernaum man so', ne gaa nari' nij so' man Jesucristó, gaa ne caráan nij so' chrej rihaan Jesucristó, ne:

—Se ca'vee ca'anj so' rej yanij ma' —taj nij so' rihaan Jesucristó a.

<sup>43</sup> Tzaj ne cataj Jesucristó rihaan nij so' a:

—Vaa ndo'o suun rihaan 'unj ca'anj 'unj yo'ó nij chuman' uún, ne nata' 'unj naná sa' nihánj rihaan nij síi ne yo'ó chuman' se vaa guun chij Diose rihaan chumii nihánj adonj. 'O se che'é naná sa' nihánj me ca'née Diose manj ca'naj rihaan chumii nihánj ca'mii natáj 'unj rihaan cunudanj nij yuvii adonj —taj Jesucristó rihaan nij síi man Capernaum a.

<sup>44</sup> Gaa ne ca'ne' rá nij so', ne ca'anj Jesucristó nu' nij ve' tucu'yón nij yuvii israelitá se-tucuaj Moisés ve' yanj estadó Judea, ne ca'mii natáj so' naná sa' a.

#### Naná nihánj taj xna'anj se vaa quiri' uxrá nij tuvi' Simón Pedró xcuaj, qui'yaj Jesucristó a

**5** Dan me se 'o güii canicun' Jesucristó tu'va na lacuaná cu'naj Genesaret, ne cuchi' uxrá yuvii rej nicun' so', ne cunuu chre' ndo'o nij so' che'é se guun rá nij so' cunó nij so' se-nana Diose a. Dan me se ndaa raan ma'an mán nij so' x'núú Jesucristó a. <sup>2</sup> Dan me se quene'en Jesucristó vij rihoo naj tu'va na lacuaná, ne síi uta xcuaj me nij síi si'yaj rihoo yo', ne tanáj nij so' se-rihoo nij so' 'o orá nii, ne ca'anj na'nu' nij so' xnánj nij so' a. <sup>3</sup> Dan me se catúj Jesucristó rá 'o rihoo, ne se-rihoo síi cu'naj Simón me yo', ne cachíin ni'yaj Jesucristó rihaan Simón se vaa qui'yaj so' se ndo'o cuxuun so' rihoo ca'anj rihoo yo' doj rihaan na a. Gaa ne cayáan Jesucristó rque rihoo, ne tucu'yón so' se-nana Diose man nij yuvii man tu'va na a. <sup>4</sup> Quisij tucu'yón Jesucristó man nij yuvii, gaa ne cataj so' rihaan Simón, ne:

—Nícaj so' rihoo ca'anj so' rej cunuu doj na, gaa ne tiguíj soj nanj rá na á —taj Jesucristó rihaan so' a.

<sup>5</sup> Tzaj ne cataj Simón rihaan Jesucristó, ne:

—Nigán' qui'yaj suun uxrá núj, tiguíj ndo'o núj nanj rá na, tzaj ne a 'o xcuaj ne quiri' núj, man maestro. Tzaj ne maan che'é se ma'an so' cataj, ne ca'anj tiguíj uún núj nanj rá na nanj á —taj Simón rihaan Jesucristó a.

<sup>6</sup> Dan me se ca'anj tiguíj uún nij tuvi' Simón nanj rá na, ne quiri' uxrá nij so' xcuaj ndaa quisin' ma'an xnánj nij so', qui'yaj xcuaj a. <sup>7</sup> Che'é dan canacúun nij so' man tuvi' nij so' síi nuu rque yo'ó rihoo, che'é rej guun rá nij so' racuj tuvi' nij so' man nij so' a. Dan me se ca'na' nij tuvi' nij so' yan nicun' nij so', ne caraa uxrá nij so' xcuaj rque roj rihoo a. Ne uxrá caraa roj rihoo, ne daj doj se ca'anj nij roj rihoo rque na nanj á. <sup>8</sup> Dan me se quene'en Simón Pedró se vaa qui'yaj Jesucristó, gaa ne ca'anj canicun' ruj so' rihaan Jesucristó, cataj so':

—Nuveé sij canicun' nichrun' rihaan so' mej a ma'. Sij atá ndo'o cacun' mej nanj á —taj Simón rihaan Jesucristó a.

<sup>9</sup> Dan me se ca'anj ndo'o rá nij tuvi' Simón se vaa quiri' uxrá nij so' xcuaj a. <sup>10</sup> Ne ca'anj rá síi cu'naj Jacobo do', síi cu'naj Juan do', che'é xcuaj a. Ne tuvi' Simón me roj so', ne ta'níi síi cu'naj Zebedeo me roj so' a. Ne dan me se cataj Jesucristó rihaan Simón, ne:

—Sę cuchu'ví' sọ' ma'. 'O se rej rihaan ní' me se guún sọ' sí naqui'yaj chre' yuvií canocọ' yuvií manj á —taj Jesucristó rihaan Simón a.

<sup>11</sup> Gaa ne nicaj nij so' se-rihoọ' nij so' ca'anj nij so' ndaa tu'va na a. Gaa ne tanáj nij so' cunudanj nij rasuun yo', ne canoco' nij so' man Jesucristó, ne ca'anj nij so' ga so' a.

### Nana nihánj taj xna'anj se vaa nahuun sa' 'o sí ran' luj ri'yuj, qui'yaj Jesucristó a

<sup>12</sup> Dan me se 'o güii caran' Jesucristó 'o chuman', ne cuchí' 'o sí ran' ndo'o luj ri'yuj rihaan so' a. Gaa quene'en sí ran' yo' man Jesucristó, gaa ne canicun' ruj so' rihaan Jesucristó, ne cachíin ni'yaj so' rihaan Jesucristó, cataj so':

—Sese me rá sọ', ne ca'vee ca'neę sọ' chí'ii xráj, Señor —taj so' rihaan Jesucristó a.

<sup>13</sup> Gaa ne cuta' Jesucristó ra'a Jesucristó raę sí ran', ne cataj Jesucristó:

—Me raj qui'yáj danj ei. Nahuún sọ', qui'yáj adonj —taj Jesucristó rihaan so' a.

Nu' danj cataj Jesucristó, ne nu' quinavij luj xráa sí ran' a.

<sup>14</sup> Dan me se ca'ne' Jesucristó suun rihaan sí nahuun yo', ne se cataj xna'anj so' rihaan a 'o yuvií che'é se vaa quiran' so' ma'. Gaa ne cataj uún Jesucristó rihaan so' a:

—Ca'anj sọ' rihaan xrej, ne tijaán sọ' mán sọ' rihaan xrej se vaa nahuún sọ', ne rque sọ' rihaan Diose se vaa cataj sí cu'naj Moisés gaa naá ndaa vaa no xcúun sọ' rque sọ' rihaan Diose che'é yan nahuún sọ' adonj. Gaa ne xcaj nij xrej cuentá se vaa nahuún sọ' qui'yáj adonj —taj Jesucristó rihaan sí nahuun yo' a.

<sup>15</sup> Tzaj ne cha'nuu ndo'o nana che'é se vaa quiran' sí nahuun yo', ne che'é dan cunuu chre' ndo'o nij yuvií rej vaj Jesucristó a. Guun rá nij so' cunọ' nij so' se-nana Jesucristó, ne guun rá nij sí ran' x'neę chí'ii xráa nij so' uún a. <sup>16</sup> Tzaj ne naxuun Jesucristó man so' rihaan nij yuvií, ne ca'anj so' rej tacaan, ne cachíin ni'yaj ndo'o so' rihaan Diose a.

### Nana nihánj taj xna'anj se vaa nahuun sa' 'o sí na'vee cacheę, qui'yaj Jesucristó a

<sup>17</sup> 'O güii me se ne Jesucristó rá 'o ve', ne tucu'yón so' se-nana Diose man yuvií, ne ne doj sí fariseo ga sí naqui'yaj cuu se-tucuanj Moisés rá ve' yo', ne mán sí cavii chuman' Jerusalén do', yo'ó nij chuman' naj estadó Judea do', nij chuman' naj estadó Galilea do', mán ga nij so' rá ve' yo' a. Ne Diose sí 'nij ra'a man ní ro', racuíj ndo'o man Jesucristó, ne nahuun ndo'o nij sí ran', qui'yaj Jesucristó a. <sup>18</sup> Dan me se táa 'o sí na'vee cacheę rihaan yuvéé, ne táa chihá nii man so' ca'na' nii rihaan Jesucristó a. Tzaj ne man ndo'o yuvií rá ve' ne Jesucristó, ne nano' nij so' rej catuyú nij so' rá ve' cuchruj nij so' man sí ran' rihaan Jesucristó a.

<sup>19</sup> Tzaj ne taj se qui'yá' ca'vee cachęn nij so' sca'núj nij yuvií a. Che'é dan cavii nij so' xráa ve', ne caya' nij so'

yu'uj xráa ve', che'é rej ca'vee tinanij nij so' man sí ran' rihaan Jesucristó a. <sup>20</sup> Gaa quene'en Jesucristó se vaa cuchumán uxrá rá nij tuvi' sí ran' yo' se vaa ca'vee nahuun so' qui'yaj Jesucristó, gaa ne cataj Jesucristó rihaan sí ran' yo', ne:

—Navij cacun' xráa sọ', nanj tinuj —taj Jesucristó rihaan so' a.

<sup>21</sup> Ne cuno nij sí fariseo cuno nij sí naqui'yaj cuu se-tucuanj Moisés cuno nana ca'mii Jesucristó, gaa ne nuchruj raę nij so' nana nihánj ga tuvi' nij so' a:

—Daj sij me sí nihánj, ne a'mii so' nana vaa nij rihaan Diose ga. Orún' Diose uun nucuaj tinavij cacun' xráa yuvií nanj á —taj nij so' ga tuvi' nij so' a.

<sup>22</sup> Quene'en Jesucristó daj nuchruj raę nij so', ne che'é dan cataj so' rihaan nij so' a:

—Me che'é nuchruj raę soj nana nanj ga. <sup>23</sup> Tu'va rma'án 'unj se vaa navij cacun' xráa sí nihánj, rá soj a na'. Ca'vee cataj uun ní' navij cacun' xráa sí nihánj na'. Ase ca'vee doj cataj ní' naxagaa so', ne cacheę so' cuaj, cataj ní' xa'. <sup>24</sup> Dan me se me rá 'unj xcaj soj cuentá se vaa sí ca'née Diose nicaj yu'unj man yuvií mej ne no xcúun 'unj tinaví 'unj cacun' xráa nij yuvií man rihaan chumii nihánj adonj —taj Jesucristó rihaan nij so' a.

Dan me se cataj Jesucristó rihaan sí na'vee cacheę a:

—Rihaan sọ' sij na'vee cacheę taj 'unj, ne nacuę sọ' tuvée sọ', ne nán' sọ' tucúa sọ' á —taj Jesucristó rihaan sí naj rihaan yuvéé yo' a.

<sup>25</sup> Nu' danj tu'va Jesucristó, gaa ne nu' naxagaa sí ran' yo' ni'yaj taran' nij yuvií a. Gaa ne nacué so' tuvée so', gaa ne nan' so' tucúa so', ne ve'é uxrá ca'mii so' che'é Diose a.

<sup>26</sup> Dan me se ca'anj rá taran' nij yuvií man rá ve' yo', ne cataj nij yuvií se vaa ve'é uxrá qui'yaj Diose a. Ne cuchu'vi' ndo'o nij yuvií, ne cataj nij yuvií se vaa:

—Nihá' uxrá vaa suun sa' nocọ' quene'en ní' cuan' adonj —taj nij yuvií yo' a.

### Nana nihánj taj xna'anj se vaa nacúun Jesucristó man Leví, ne canoco' Leví man so' a

<sup>27</sup> Quisij nahuun sí ran' yo', gaa ne curihanj Jesucristó xe', ne quene'en so' man 'o sí a'néj puextó cu'naj Leví a. Ne ne sí cu'naj Leví 'o ve' a'néj nii puextó man yuvií a. Gaa ne cataj Jesucristó rihaan so', ne:

—Canocó' sọ' manj, ca'anj ní' á —taj Jesucristó rihaan so' a.

<sup>28</sup> Gaa ne tanáj Leví man cunudanj rasuun nicaj so', ne naxumaan so', canoco' so' man Jesucristó, ca'anj so' a.

### Nana nihánj taj xna'anj se vaa me rá Jesucristó racuíj so' man nij sí tumé cacun' a

<sup>29</sup> Gaa ne canuú ndo'o cha'anj nocọ' tucúa Leví che'é Jesucristó, qui'yaj Leví a. Ne man que'ęę ndo'o tuvi' so' sí a'néj puextó do', que'ęę yo'ó yuvií do', mán tucúa Leví, ne ne nij so' ga nij tuvi' Jesucristó a. <sup>30</sup> Dan me se man nij sí fariseo do', sí naqui'yaj cuu se-tucuanj Moisés nocọ' man nij sí fariseo do', gaa ne

ca'mii chi'ij nij so' che'é Jesucristó rihaan nij síi tucu'yón se-nanā Jesucristó a. Dan me se cataj nij síi fariseo gā nij síi naqui'yaj cūu se-tucuañj Moisés:

—Me che'é chá soj chraa ne 'o soj na gā nij síi a'néj puextó do', gā yo'ó nij síi tumé cacun' do', gā —taj nij so', xná'anj nij so' man nij síi tucu'yón se-nanā Jesucristó a.

<sup>31</sup> Gāa ne dan me se cataj ma'an Jesucristó rihaan nij so' a:

—Síi vaa nucuaj ro', ne nano' nij so' man doctor ma'. Maan se síi ran' ro', me síi nano' man doctor adonj. Gāa ne ase vaa síi ran' ro', danj vaa nij síi nihánj adonj. <sup>32</sup> 'O se ne ca'na' 'unj canacun' 'unj man síi sa' ma'. Che'ē nij síi tumé cacun' ca'naj se vaa canicaj nimán nij so' ne canoco' nij so' se-nanāj adonj. Tzaj ne sese síi sa' me soj, rá soj, ne nuveé sij canacun' 'unj man me soj ma' —taj Jesucristó rihaan nij so' a.

**Nanā nihánj taj xna'anj me che'é ne toco' nij síi tucu'yón se-nanā Jesucristó x'naa man ma'an nij so' a**

<sup>33</sup> Gāa ne nij síi fariseo gā nij síi naqui'yaj cūu se-tucuañj Moisés me se cataj nij so' rihaan Jesucristó a:

—Me che'é, ne nij síi tucu'yón se-nanā Juan síi uta' ne man yuvij me se toco' nij so' x'naa man ma'an nij so' do', na'vij nij so' do', ne veé danj 'yaj nij síi tucu'yón se-nanā nuj sij fariseo do', tzaj ne nij síi tucu'yón se-nanā so' me se ne toco' nij so' x'naa man ma'an nij so' do', ne na'vij nij so' do', rihaan Diose gā —taj nij so' rihaan Jesucristó a.

<sup>34</sup> Ne cataj Jesucristó rihaan nij so':

—Ase vaa síi cuchruij sa'anj vaa 'unj, ne asa' ca'vee toco' nij síi man gaj x'naa man ma'an nij so', rá soj gā. Ase vaa síi cataj xcaj man chanā ne man tuvi' so' do', danj vaa nij síi man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' cuano ma'. <sup>35</sup> Tzaj ne vaa güii, ne guun yanij 'unj rihaan nij so', qui'yaj yuvij, gāa ne nanō rá nij síi nihánj, gāa ne toco' nij so' x'naa man ma'an nij so' adonj —taj Jesucristó rihaan nij síi fariseo gā nij síi naqui'yaj cūu se-tucuañj Moisés yo' a.

<sup>36</sup> Gāa ne ca'mii Jesucristó yo'ó nanā rihaan nij so', cataj so':

—Ase vaa yatzij sin' vaa tucuáán ngā noco' soj, ne se guun cusin' ní' yatzij naca ne na'nej ní' man yatzij ngā ma'. Sese danj qui'yaj ní', gāa ne quirij' nu' yatzij naca yo', qui'yaj yatzij ngā nanj adonj. Gāa ne ino uxrá gāa yatzij naca, qui'yaj yatzij ngā yo' nanj adonj. <sup>37</sup> Ne dan me se ase vaa nuj ngā nuj araa nii na vinó vaa uún soj a. Ne se ca'vee tucu'yón 'unj se-tucuañj 'unj man soj ma'. 'O se ase vaa na vinó naca vaa nanā tucu'yón 'unj, ne se guun carāa yuvij na vinó naca rque nuj ngā ma'. Sese danj qui'yaj yuvij, ne cuyan' na vinó cunuu xēē na vinó, ne se cacuá nuj ngā ma'. Che'é dan canuu yo', ne cayan' na vinó rihaan yo'óo a. <sup>38</sup> Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan síi naca síi ne noco' tucuáán ngā tucu'yón 'unj se-nanāj nanj adonj. <sup>39</sup> Ne taj síi guun rá co'o na vinó naca, sese aj co'o so'

na vinó ngā ma'. 'O se sa' doj vaa na ngā, cataj so' nanj á. Ne danj vaa gueē soj, inanj tucuáán ngā noco' soj, ne che'é dan na'vej soj canoco' soj tucuáán naca nanj adonj. —Danj cataj Jesucristó rihaan nij síi fariseo do', rihaan nij síi naqui'yaj cūu se-tucuañj Moisés do' a.

**Nanā nihánj taj xna'anj che'é güii naránj rá ní' a**

<sup>6</sup> 'O güii naránj rá nij yuvij israelitá cachén Jesucristó gā nij síi tucu'yón se-nanā so' rque 'o naa 'núú trigó a. Ne cuta nij síi tucu'yón se-nanā Jesucristó doj caa trigó, ne tuguáj ra'a nij so' caa, gāa ne chá nij so' doj trigó a. <sup>2</sup> Gāa ne xná'anj ta'aj síi fariseo man nij so', cataj nij so':

—Me che'é 'yaj soj danj gā. Ne nó xcúún ní' cuta ní' trigó güii naránj rá ma' —taj nij síi fariseo rihaan nij síi tucu'yón se-nanā Jesucristó a.

<sup>3</sup> Tzaj ne cataj ma'an Jesucristó rihaan nij síi fariseo a:

—Me che'é, ne ne nayāa soj rihaan danj Diose daj qui'yaj síi cu'naj David gāa naá a. Gāa quina'aan rque nij tuvi' nij so', <sup>4</sup> gāa ne catúj so' rá nuvií, ne chá so' rachrúún taj rihaan se-mesa Diose a. Ne go' uún so' chá nij tuvi' so' uún a. Ne ne nó xcúún nij so' cha' nij so' rachrúún yo', maan se orún' nij xrej nó xcúún cha' rachrúún yo' a. Tzaj ne maan che'é se rque nij so' na'aan uxrá, gāa ne chá nij so' rachrúún yo' nanj adonj. Tzaj ne ne cataj Diose se vaa tumé síi cu'naj David cacun' ma' —taj Jesucristó rihaan nij síi fariseo a.

<sup>5</sup> Gāa ne canicaj so', cataj uún so' a:

—Síi ca'née Diose nijcaj yu'unj man yuvij mej, ne no xcúnj quirij ta'ngaj daj qui'yaj yuvij güii naránj rá yuvij adonj —taj Jesucristó rihaan nij síi fariseo a.

**Nanā nihánj taj xna'anj se vaa nahuun sa' 'o síi naco' ra'a, qui'yaj Jesucristó a**

<sup>6</sup> Dan me se yo'ó güii naránj rá nij yuvij israelitá ro', catúj Jesucristó rque 'o ve' tucu'yón nij so' se-tucuañj Moisés, ne tucu'yón so' se-nanā Diose man nij yuvij a. Ne dan me se yáán 'o snó'o rá ve' yo', ne naco' ra'a so' rej nuva' so' a. <sup>7</sup> Ne nij síi naqui'yaj cūu se-tucuañj Moisés rihaan yuvij do', nij síi fariseo do', yáán nij so' rá ve', ne tumé uxrá nij so' man Jesucristó sese nahuun yuvij qui'yaj so' gāa güii naránj rá nij so' a. Danj qui'yaj nij so' che'é rej guun rá nij so' cuta' nij so' cacun' xráá Jesucristó a. <sup>8</sup> Tzaj ne quene'en Jesucristó se vaa guun rá nij so', gāa ne cataj so' rihaan síi naco' ra'a a:

—Naxumāan so' canicun' caya' so' sca'núj á —taj Jesucristó rihaan so' a.

Gāa ne naxumāan so', ne canicun' caya' so' sca'núj nij yuvij a.

<sup>9</sup> Gāa ne cataj Jesucristó rihaan nij síi nanó chi'ij rá a:

—Cuanō nihánj me se xná'anj 'unj man soj che'é güii naránj rá xa'. No xcúún ní' racúij ní' tuvi' ní' na'. Ase no xcúún ní' qui'yaj chi'ij ní' man tuvi' ní' xa'. Daj qui'yaj ní' rá soj gāa güii naránj rá ní' gā. Ne nó xcúún ní' t-

nanii ní man tuvi' ní rihaan sayuun gaa güii naránj rá gaa a na'. Ni'yaj uun ní cavi' so' gaa güii naránj rá gaa a na'. —Danj taj Jesucristó rihaan nij so' a.

<sup>10</sup> Gaa ne ni'yaj Jesucristó man cunudanj nij yuvij man rque ve' yo', gaa ne cataj so' rihaan síí nacoq ra'a a:

—Tucuá so' ra'á so' á —taj Jesucristó rihaan so' a.

Ne tucuá so' ra'a so', ne cunuu sa' ra'a so' adonj.

<sup>11</sup> Tzaj ne ca'maan ndo'o rá nij síí naqui'yaj cuu se-tucuanj Moisés ga nij síí fariseo, ne guun rá nij so' ga tuvi' nij so' daj gaa qui'yaj chi'ii nij so' man Jesucristó a.

**Nana nihánj taj xna'anj se vaa narii Jesucristó chuvij apóstol ca'anj nata' se-nana so' a**

<sup>12</sup> Dan me se cachén doj güii, gaa ne ca'anj Jesucristó rej quij, ca'anj cachinj ni'yaj so' rihaan Dioso a. Nigan' quináj so' quij cachíin ni'yaj so' rihaan Dioso a. <sup>13</sup> Ranga', gaa ne canacúun Jesucristó man cunudanj nij síí tucu'yón se-nana so' ca'na' nij so' rihaan so', gaa ne narii Jesucristó man chuvij nij so' guun nij so' apóstol nata' rihaan yuvij che'é so' a. <sup>14</sup> 'Q so' me síí cu'naj Simón, ne tucu'náj Jesucristó Pedró man so' a. Yo'ó so' me tinúu Pedró síí cu'naj Andrés a. Yo'ó nij so' me Jacobo do', Juan do', Felipe do', Bartolomé do', <sup>15</sup> Mateo do', Tomás do', Jacobo ta'níí Alfeo do' a. Yo'ó so' uún me Simón, ne tuvi' nij síí me rá cunuj ga gobiernó ne Romá me so' a. <sup>16</sup> Yo'ó so' me Judas tinúu Jacobo, ne yo'ó so' uún me Judas Iscariote síí tacuachén man Jesucristó rihaan nij síí taj ri'yunj man Jesucristó a.

**Nana nihánj taj xna'anj se vaa nago' Jesucristó chrej man 'o x'ne' nocqo yuvij a**

<sup>17</sup> Dan me se nanij Jesucristó ga chuvij nij apóstol yo' taa rque doj, ne cuchi' nij so' 'o rej vaa taa, ne nocqo doj síí tucu'yón se-nana so' man ga so' a. Ne ca'na' ndo'o yuvij cavii chuman' Jerusalén do', yuvij cavii yo'ó nij chuman' naj estadó Judea do', yuvij cavii rej tu'va na ya'anj rej naj chuman' Tiro ga chuman' Sidón do' a. <sup>18</sup> Ne guun rá nij yuvij cunqo nij so' se-nana Jesucristó, ne guun rá nij síí ran' nahuun nij so' a. Ne vaa nij yuvij nuu nana chree nimán, ne sayuun ndo'o quiran' nij yuvi, qui'yaj nana chree, tzaj ne quirii Jesucristó nana chree nuu nimán nij so', ne cunuu sa' nij so', qui'yaj Jesucristó a. <sup>19</sup> Gaa ne guun rá cunudanj nij yuvij canqo ra'a nij so' xráá Jesucristó che'é se cavii ndo'o se nucuaj man Jesucristó, ne nahuun sa' cunudanj nij yuvij, qui'yaj Jesucristó a.

**Nana nihánj taj xna'anj me yuvij cavii sa' doj ne me yuvij quiran' sayuun a**

<sup>20</sup> Gaa ne naxcaj Jesucristó rihaan so' ni'yaj so' man nij síí tucu'yón se-nana so', gaa ne cataj so':

—Cavii sa' taran' soj sij nique, ne soj me síí cayáan ga Dioso gaa güii guun chij Dioso rihaan chumii nihánj adonj.

<sup>21</sup> "Cavii sa' taran' soj sij na'aan rque cuano adonj. Vaa güii quirí' soj se cha soj adonj.

"Cavii sa' taran' soj sij ta'vee cuano adonj. Vaa güii ca'nga' ndo'o soj adonj.

<sup>22</sup> "Ne cavii sa' ndo'o soj sese quitaj ri'yunj yuvij man soj do', sese quirii yanij yuvij man soj do', sese ca'mii yuvij nana nij rihaan soj do', sese nachri' yuvij ni'yaj yuvij man soj se vaa sij chi'ii me soj do', che'é se me soj síí nocqo' manj sij ca'née Dioso nica' yu'unj man yuvi adonj. Ne quene'en soj se vaa ya cavii sa' soj adonj. <sup>23</sup> Gaa ne güii quiran' soj danj me se no xcuún soj guun niha' uxrá rá soj ne güej ndo'o soj, che'é se uxrá naru'vee Dioso rihaan soj asa' cuchi' soj rej xta' adonj. 'Q se ase vaa 'yaj nij yuvij man soj ro', ta'nga' danj qui'yaj xii nij yuvij man nij síí nata' se-nana Dioso gaa naá uún adonj.

<sup>24</sup> "Tzaj ne nique ndo'o soj sij ru'vee nanj á. Soj sij ru'vee me se aj quirí' soj nu' se sa' nica' soj, ne taj vaj doj se sa' rque Dioso man soj a ma'.

<sup>25</sup> "Nique soj sij vaa raan rque cuano nanj á. Vaa güii quina'aan rque soj adonj.

"Nique soj sij a'nga' cuano nanj á. Vaa güii quinano ndo'o rá soj do', ta'vee soj do', adonj.

<sup>26</sup> "Ne nique soj sij ve'é inanj a'mii cunudanj yuvij che'é nanj á. 'Q se ase vaa ve'é inanj a'mii nij yuvij che'é soj ro', ta'nga' danj ca'mii xii nij yuvij che'é nij síí tiha' yu'unj se vaa sij nata' se-nana Dioso me nij so' gaa naá a —taj Jesucristó rihaan cunudanj nij síí tucu'yón se-nana so' a.

**Nana nihánj taj xna'anj se vaa gaa 'ee rá ní' man nij síí taj ri'yunj man ní' a**

<sup>27</sup> Canicaj Jesucristó, cataj so' a:

—Tzaj ne rihaan soj sij man nanó xrej ro', cataj xna'anj unj se vaa gaa 'ee rá soj man nij síí taj ri'yunj ni'yaj man soj, ne qui'yaj soj se luj che'é nij síí nachri' ni'yaj man soj ei. <sup>28</sup> Ve'é ca'mii soj rihaan nij síí a'mii quij rihaan soj, ne cachinj ni'yaj soj rihaan Dioso che'é nij síí 'yaj se nij man soj a. <sup>29</sup> Sese vaa síí coxro nichrej xruú so', ne ca'ne' rá so' coxro so' nichrej xruú so' uún a. Sese vaa síí ca'néj se-roto so', ne ca'ne' rá so' ca'nee so' se-cotoo so' uún a. <sup>30</sup> Ne me ma'an yuvij achíin ni'yaj rasuun rihaan soj, ne go' soj rasuun yo' man nij so' ei. Sese vaa yuvij ca'néj si'yaj soj, ne se nachin' soj si'yaj soj ma'. <sup>31</sup> Dan me se daj se uun rá soj qui'yaj sa' yuvij rihaan soj ro', ta'nga' danj qui'yaj sa' soj rihaan yuvij á.

<sup>32</sup> "Dan me se gaa 'ee rá soj man cunudanj yuvij ei. Sese 'ee rá soj man inanj nij síí 'ee rá man soj, gaa ne me che'é naru'vee Dioso rihaan soj, rá soj ga. 'Q se ndaa nij síí chi'ii ro', 'ee rá nij so' man nij síí 'ee rá man nij so' nanj á. <sup>33</sup> Ne qui'yaj soj se luj rihaan cunudanj yuvij ei. 'Q se sese qui'yaj soj se luj rihaan inanj síí 'yaj se luj rihaan soj, gaa ne me che'é naru'vee Dioso rihaan soj, rá soj ga. 'Q se ndaa nij síí chi'ii ro', 'yaj nij so' se luj rihaan tuvi' nij so' sij 'yaj se luj rihaan nij so' nanj adonj. <sup>34</sup> Me ma'an yuvij racu'ij soj sa'anj, ne se guun rá soj nacaj uún soj se-sa'anj soj ma'. Sese racu'ij soj sa'anj man inanj síí naru'vee rihaan soj, gaa ne me che'é naru'vee Dioso rihaan soj, rá soj ga. 'Q se ndaa

ma'an nij sí chi'ii ro', racuíj nij so' sa'anj man nij tuvi' so' sij naru'vee rihaan so' adonj.

<sup>35</sup> "Dan me se gaa 'ee rá soj man nij sí taj ri'yunj ni'yaj man soj, ne qui'yaj soj se luj rihaan nij sí nachri' man soj, ne racuíj soj sa'anj man yuvii, ne se guun rá soj nacaj uún soj se-sa'anj soj ma'. Ne vaa güii, ne narque uxrá Diosé se sa' man soj, ne ta'ní Diosé sí sa' ndo'o me soj gaa adonj. 'O se Diosé me sí 'yaj se luj rihaan ndaa sí ne ne'en me se uun se luj do', rihaan ndaa sí chi'ii do', adonj. <sup>36</sup> Ase vaa 'ee rá Rej ní' Diosé man daj a nij yuvii ro', danj gaa 'ee rá soj man daj a nij yuvii uún adonj. —Danj cataj Jesucristó rihaan nij sí tucu'yón se-nana so' a.

**Nana nihánj taj xna'anj daj qui'yaj ní' gaa ca'mii ní' ga tinúu ní' che'é cacun' tumé tinúu ní' a**

<sup>37</sup> Ne canicaj Jesucristó cataj so' a:

—Se guun niha' rá soj cuta' soj cacun' xráá tinúu soj, gaa ne taj cacun' cuta' Diosé xráá ma'an soj man adonj. Maan se caraa x'naa soj rihaan tinúu soj, ne caraa x'naa Diosé rihaan ma'an soj uún adonj. <sup>38</sup> Go' soj rasuun man tuvi' soj, ne Diosé me sí narque rasuun rihaan soj uún adonj. So' me sí sa' ndo'o rá, ne adi' se 'yaj sí sa' rá tu'vej 'núu ne araa navii so' rihaan tanej ro', danj qui'yaj guee Diosé ga soj, ne doj a narque Diosé rasuun sa' man soj adonj. Ase vaa 'yaj guee soj ga tuvi' soj ro', danj qui'yaj guee Diosé ga soj uún adonj. —Danj cataj Jesucristó rihaan nij sí tucu'yón se-nana so' a.

<sup>39</sup> Gaa ne nanó Jesucristó se-cuento roj sí tuchrii rihaan nij sí tucu'yón se-nana so' a:

—Ne ca'vee tijaan 'o sí tuchrii chrej rihaan tuvi' tuchrii so', rá soj na'. Taj ma'. Sese danj qui'yaj so', gaa ne quinij roj so' rá yu'uj nanj adonj. <sup>40</sup> Danj nanj uún, ne 'o xnii tucu'yón se guun nucuaj so' quene'en so' doj rihaan se-maestro so' ma'. Ne ca'vee se uxrá tucu'yón so', tzaj ne veé ase vaa ne'en se-maestro so' ro', veé danj quene'en ma'an so' nanj adonj. <sup>41</sup> Me che'é guun chree rá so' ni'yaj so' ni'ya nuu rihaan tinúu so' ga. Ne ne ni'yaj so' chruun manj nuu rihaan ma'an so' a. <sup>42</sup> Asa' ca'vee cataj so' rihaan tinúu so': "Rque so' rihaan so' quirii 'unj ni'ya á". Se guun a doj cataj so' danj tihá' so' man tinúu so' ma'. Asino quirii so' chruun manj nuu rihaan so', gaa ne aj ruvi' sa' rihaan so', gaa ne ca'vee quirii so' ni'ya nuu rihaan tinúu so' adonj. Dan me se ase vaa aráan ni'ya rihaan yuvii ro', danj vaa aráan rihaan yuvii 'yaj cacun' atá yuvii ne na'vee xcaj sa' nij yuvii cuentá man adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa ase vaa nimán yuvii ro', danj vaa a'mii yuvii a**

<sup>43</sup> Gaa ne canicaj Jesucristó, cataj so':

—Chruun sa' ro', se guun cuman chruj nij raá ma'. Ne chruun nij ro', se guun cuman chruj sa' raá ma'. Ase vaa chruun yo' ro', danj vaa nimán yuvii, ne ase vaa chruj yo' ro', danj vaa se vaa 'yaj nij yuvii adonj.

<sup>44</sup> Maan chruj man raá chruun ro', 'yaj ne'en ní' daj chruun me yo' adonj. Taj rutzí' man raá chruun tanj yangíj ma'. Ne taj roo man raá chruun tanj xcuáa ma'.

<sup>45</sup> Dan me se sí sa' ro', man ndo'o se sa' nimán so', ne a'mii so' inanj nana sa' adonj. Sí chi'ii ro', man ndo'o se quij nimán so', ne a'mii so' inanj nana chi'ii adonj. 'O se ase vaa se man nimán yuvii ro', danj vaa nana a'mii yuvii nanj á —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa ase vaa sí 'yaj ve' sa' ro', danj vaa sí uno sa' rihaan Jesucristó a**

<sup>46</sup> Canicaj Jesucristó, cataj so' nana nihánj a:

—Me che'é taj soj se vaa sí 'nij ra'a man soj mej, tzaj ne ne uno soj rihanj ga. Ne chihan' 'yaj soj ma'.

<sup>47</sup> Cuanó nihánj me cataj xna'anj 'unj rihaan soj daj sij me sí 'na' nanó xrej nana a'mij, ne 'yaj so' ndaa vaa taj se-nanaj a. <sup>48</sup> Ase vaa 'o sí cune' ve' tucua' rihaan 'o yuvej vaa so' a. Cunuu ndo'o váan so' rej cuchruj so' tacóo ve', ne raan ndo'o yáan ve', 'yaj so' a. Ca'vee se maan nana yuvaa curihanj go' xráá ve', ne ca'vee se cavii chráá, ne ca'na' na xee go' na xee tacóo ve', tzaj ne se naxru' ve', qui'yaj na xee ma'. Danj vaa sí uno se-nanaj a. <sup>49</sup> Tzaj ne ino vaa sí nanó xrej nana a'mij tzaj ne ne 'yaj ndaa vaa taj se-nanaj ma'. Ase vaa 'o sí 'yaj ve' nij vaa so' a. Ne váan cunuu so' rej cuchruj so' tacóo ve' rihaan yo'óo ma'. Che'é dan yáan cuan' uun tucua' so' a. Sese curihanj maan nana yuvaa, ne go' yo' xráá ve', ne sese cavii chráá, ne ca'na' na xee go' na xee tacóo ve', gaa ne canee guee ve' nanj á. Nu' canee ve' yo', ne daj chihaa mij se cunuu sa' yo' a ma'. Danj vaa sí ne uno se-nanaj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa nahuun se-mozó tanuu capitán, qui'yaj Jesucristó a**

**7** Quisíj ca'mii Jesucristó nu' nana yo' cuno nij yuvii, gaa ne ca'anj so' chuman' Capernaum a. <sup>2</sup> Dan me se yáan 'o tanuu capitán chuman' yo', ne sí rii ta'nga' rihaan 'o cientó tanuu me so' a. Ne vaa 'o se-mozó so' sí 'ee uxrá rá so' man, ne ran' uxrá mozó yo', ne daj doj cavi' so' a. <sup>3</sup> Dan me se cuno tanuu capitán se vaa ca'na' Jesucristó chuman' yo', ne ca'neé so' doj sí uun chij rihaan nij yuvii israelitá cuchí' nij so' rihaan Jesucristó, ne cachinj ni'yaj nij so' rihaan Jesucristó se vaa ca'na' so' tinahuun so' se-mozó tanuu capitán yo' a. <sup>4</sup> Dan me se cuchí' nij sí uun chij yo' rihaan Jesucristó, gaa ne cachín ni'yaj uxrá nij so' rihaan Jesucristó, cataj nij so':

—Sí sa' me tanuu capitán yo', ne che'é dan vaa che'é racuíj so' man so' adonj. <sup>5</sup> 'Ee rá so' man ní' sij israelitá, ne ma'an so' qui'yaj ve' nuu chre' núj tucu'yón núj se-tucuanj Moisés adonj —taj nij so' rihaan Jesucristó a.

<sup>6</sup> Ne ca'anj Jesucristó ga nij so', ne daj doj cuchí' nij so' ve', gaa ne ca'neé tanuu capitán man tuvi' so' ca'anj caran' man Jesucristó, ne cataj nij so':

—Se caráyá'áán so', man maestro. 'O se nuveé sij sa' me so', taj so' ma'. Ne nó xcúún so' catuy so' rá ve' tu-cuá so', taj so' ma'. <sup>7</sup> Che'é dan ne quisij rá ma'an so' ca'na' so' rihaan so', taj so' ma'. Maañ se ca'ne' uyun so' suun se vaa nahuun se-mozó so', gaa ne nahuun ma'an se-mozó so', taj so' nanj á. <sup>8</sup> Ne cataj so' se vaa vaa síi rii ta'nga' rihaan so', ne rii ta'nga' so' rihaan tanuu, ne taj xna'anj so' rihaan tanuu se vaa ca'anj nij so', ne 'anj nij so', ne taj xna'anj so' rihaan nij tanuu se vaa ca'na' nij so', ne 'na' nij so' rihaan so', ne taj xna'anj so' daj qui'yaj nij tanuu, ne veé danj 'yaj nij tanuu adonj. Ne ne'en so' se vaa ase vaa rii ta'nga' so' rihaan nij tanuu nocó' man so' ro', danj rii ta'nga' guéé so' rihaan chi'ii anó man yuvii, taj so' nanj á —taj nij tuvi' tanuu capitán rihaan Jesucristó a.

<sup>9</sup> Dan me se gaa cuno Jesucristó nana ca'mii tuvi' tanuu capitán yo', ne ca'anj rá Jesucristó, ne canicaj so' cataj so' rihaan nij síi nocó' rej xco so' a:

—Cuanó nihánj me cataj xna'anj 'unj rihaan soj se vaa taj vaj á 'ó rej ne narij man yo'ó síi israelitá síi cuchumán ndo'o rá nana a'mii 'unj ndaa vaa amán rá tanuu capitán nihánj á ma' —taj Jesucristó rihaan nij so' a.

<sup>10</sup> Dan me se canicaj uún nij tuvi' tanuu capitán ca'anj nij so' tucúá so', ne gaa cuchí' nij so', ne aj nahuun se-mozó tanuu capitán yo', qui'yaj Jesucristó a.

#### Nana nihánj taj xna'anj se vaa cunuu i'na' uún ta'níi 'o chana cavi' nica, qui'yaj Jesucristó a

<sup>11</sup> Dan me se cachén doj güii, gaa ne ca'anj Jesucristó chuman' cu'naj Naín ga nij síi tucuyón se-nana so' ga 'o x'ne' nocoo yuvii a. <sup>12</sup> Quinichrun' nij so' tu'va chuman', gaa ne dan me se nari' tuvi' Jesucristó ga nij síi ca'anj cachin' 'o x'ngá a. Ne síi cavi' me se orún' so' me ta'níi chana cavi' nica, ne vaj 'o x'ne' nocoo yuvii man chuman' yo' ga nii so' rihaan santó a. <sup>13</sup> Dan me se quene'en Jesucristó man chana yo', gaa ne cunuu 'ee rá so' man no', gaa ne cataj so':

—Se ta'veé so' ma' —taj so' a.

<sup>14</sup> Gaa ne dan me se ca'anj Jesucristó canó ra'a so' man chrúún taj xngá, gaa ne canicun' nij síi taj chihá xngá a. Gaa ne cataj Jesucristó rihaan síi cavi' a:

—Cunó so' a'mij, ne naxagaa so', xnii —taj Jesucristó rihaan síi cavi' yo' a.

<sup>15</sup> Gaa ne cunuu i'na' ya uún xnii, ne naxagaa so', gaa ne guun che'e xnii ca'mii so' a. Gaa ne:

—Nihánj 'na' ta'níi so' á —taj Jesucristó rihaan nii xnii a.

<sup>16</sup> Gaa ne dan me se ca'anj rá taran' nij yuvii se vaa qui'yaj Jesucristó, gaa ne guun naha' rá nij so' se vaa ve'é qui'yaj Diose, gaa ne canicaj nij so' cataj nij so' se vaa ca'née Diose 'o síi nata' se-nana so' rihaan nij so' a. Ne cataj uún nij so' se vaa ca'na' Diose racuíj so' man nij so' sij nocó' man Diose a.

<sup>17</sup> Gaa ne cuchí' nana rihaan nij yuvii man estadó Judea do', rihaan nu' nij yuvii man anicaj estadó Judea che'é se vaa qui'yaj Jesucristó a.

#### Nana nihánj taj xna'anj che'é nana ca'mii Jesucristó che'é síi cu'naj Juan síi cuta' ne man yuvii a

<sup>18</sup> Dan me se cuno nij síi tucuyón se-nana Juan nu' se vaa qui'yaj Jesucristó, gaa ne cataj xna'anj nij so' rihaan Juan a. Gaa ne canacúún Juan man vij síi tucuyón se-nana so' ca'na' roj so' rihaan so', gaa ne dan me se ca'née so' man roj so' cuchí' roj so' rihaan síi 'nij ra'a man ní' a. <sup>19</sup> Ne nana nihánj ro', xna'anj roj so' man Jesucristó, taj síi cu'naj Juan rihaan roj so' a: "So' me síi ca'na' tñanii man yuvii rihaan sayuun na'. Ase na'vij ní' ca'na' yo'ó so' xa'". Dan me nana me rá síi cu'naj Juan xna'anj roj so' man Jesucristó a. <sup>20</sup> Dan me se cuchí' roj so' rihaan Jesucristó, ne cataj roj so':

—Vij ran' rój me síi ca'née Juan síi uta' ne man yuvii ca'na' rihaan so' a. Me rá Juan quene'en so' sese ma'an so' me síi ca'na' tñanii man yuvii rihaan sayuun ni', ase na'vij ní' ca'na' yo'ó so' a —taj roj so' rihaan Jesucristó a.

<sup>21</sup> Gaa ne veé maañ orá ca'na' roj síi ca'née Juan man ro', nahuun que'ee ndo'o síi ran' do', curihanj nana chree nimán que'ee yuvii do', nachuguun rihaan que'ee síi tuchrii do', qui'yaj Jesucristó a. <sup>22</sup> Gaa ne cataj xna'anj Jesucristó rihaan roj so' a:

—Cavii roj soj cuchí' uún roj soj rihaan síi cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. Dan me se nij síi tuchrii ro', naxra' rihaan, ne nij síi na'vee cachee ro', chée nij so', ne nij síi ran' luj ri'yuj ro', nahuun sa', ne nij síi so' o ro', nachuguun xrée nij so', ne nij síi cavi' ro', cunuu i'na' uún, ne nij síi nique ro', uno nij so' nana sa' a. Nu' nihánj cataj xna'anj roj soj rihaan síi cu'naj Juan yo' á. <sup>23</sup> Ne cataj uún roj soj rihaan síi cu'naj Juan se vaa cavii sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan síi cu'naj Juan yo' ei —taj Jesucristó rihaan roj síi tucuyón se-nana Juan yo' a.

<sup>24</sup> Dan me se gaa ca'anj roj síi ca'anj suun che'é Juan, gaa ne guun che'e Jesucristó ca'mii so' rihaan cunudanj nij yuvii che'é síi cu'naj Juan síi cuta' ne man yuvii a:

—Asij ca'anj soj rej tacaan quene'en soj man síi cu'naj Juan ro', ne daj gaa so' quene'en soj, rá soj ga. Ase vaa yo' o rcoo naan ndo'o 'yaj nana vaa so', rá soj na'. Guun vij nimán so' che'é tucúáan nocó' so', rá soj na'. Taj ma'. <sup>25</sup> Maañ se daj gaa so' rá soj, asij ca'anj soj quene'en soj man so' ga. Sij nuu yatzij laruu ndo'o me so', rá soj na'. Taj ma'. 'O se nij síi nuu yatzij sa' ndo'o do', nij síi utun' ndo'o sa'anj do', yanj rá ve' tucúá síi nicaj suun rey adonj. <sup>26</sup> Maañ se daj gaa síi cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij síi nata' se-nana Diose adonj.

<sup>27</sup> 'O se nana nihánj nana no rihaan danj Diose ro', taj xna'anj che'é síi cu'naj Juan a: "Vaa síi ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so',

qui'yaj so' a". Daj taj danj Diosę che'é sí cu'naj Juan se vaa nuchran' nimán yuvij ve'é ca'mij nij yuvij ga sí ca'na' tjanii man nij yuvij rihaan sayuun, qui'yaj so' a. Ne daj qui'yaj so' adonj.

<sup>28</sup> "Cuanę nihánj me se cataj xna'anj 'unj rihaan soj se vaa sij sa' doj rihaan cunudanj nij yuvij man rihaan chumij me sí cu'naj Juan a. A 'ó yuvij ne vaa sa' doj rihaan so' ma'. Tzaj ne cuanę ro', uun hij Diosę nimán yuvij man rihaan chumij nihánj, ne naj guun yuvij guun hij Diosę nimán ro', me sí sa' doj rihaan sí cu'naj Juan a. —Daj cataj Jesucristó rihaan nij yuvij yo' a.

<sup>29</sup> Dan me se nu' nij yuvij man ne ndaa nij sí a'něj puextó ro', ga cuno nij so' se-nana Jesucristó, ne cataj nij so' se vaa sa' uxrá qui'yaj Diosę a. 'O se sij cata' ne qui'yaj Juan me nij so' a. <sup>30</sup> Ne nij sí naqui'yaj cuu se-tucuanj Moisés do', nij sí fariseo do', ne ca'vej rá nij so' cunę nij so' daj me rá Diosę qui'yaj Diosę che'é nij so' ma'. 'O se nuveé sij cata' ne qui'yaj Juan me nij sí na'vej rá ma'.

<sup>31</sup> Ga ne cataj uun Jesucristó rihaan nij yuvij a:

—Ne daj vaa nij soj sij man rihaan chumij nihánj cuanę, rá soj ga. Dan me se cataj xna'anj 'unj rihaan soj ei. <sup>32</sup> Ase vaa xnii ca'anj rihaan yu'vee ne tico ga tuvi' ro', vaa soj sij man rihaan chumij nihánj adonj. Dan me se yáan nij xnii yo' rihaan yo'óo, ne aguáj nij xnii rihaan tuvi' xnii, taj nij xnii: "Nicaj núj rihuu núj, go' núj chra' chocó', tzaj ne me che'é ne ra'anj soj ga. Ne go' núj chra' xngá, tzaj ne me che'é ne ta'vee soj ga. Me che'é ne tico soj ga núj ga", taj nij xnii rihaan tuvi' nij so' a. <sup>33</sup> 'O se ca'na' Juan sí cata' ne man yuvij, ga ne ne cha so' chraa do', ne co'ó so' na vinó ga tuvi' so' do', ga ne che'é dan taj soj se vaa nuu nana chre nimán so', taj soj a. <sup>34</sup> Ne ca'ná' 'unj sij ca'née Diosę nicaj yu'unj man yuvij, ga ne nihá' rá 'unj chá 'unj do', co'ó 'unj do', ga ne che'é dan taj uun soj se vaa sí cachén chá do', sí cachén co'ó do', mé 'unj, taj uun soj a. Ne taj uun soj se vaa tuvi' 'unj me sí tiha' yu'unj man yuvij che'é puextó do', yo'óo nij sí tumé cacun' do', taj soj a. Daj tu'va soj, tzaj ne ne ne'en uxrá soj ma'. <sup>35</sup> Sese xcaj soj cuentá daj vaa 'yaj rój, ne guun ya rá soj se vaa sij cuu raę me rój ga sí cu'naj Juan yo' adonj —taj Jesucristó rihaan nij yuvij a.

#### Nana nihánj taj xna'anj se vaa na'nu' 'o chana tacóo Jesucristó a

<sup>36</sup> Dan me se canacúun 'o sí fariseo man Jesucristó cha Jesucristó chraa tucúa so', ga ne ca'anj cayáan Jesucristó tucúa so' cha so' chraa a. <sup>37</sup> Ne dan me se yáan 'o chana nihá' rá ga chii chuman' yo', ga ne cuno no' nana se vaa cuchí' Jesucristó chá so' chraa tucúa sí fariseo yo', ga ne che'é dan nicaj no' 'o aga' catzij ve'é ndo'o vaa nuu casté gun' daj, ca'anj no' tucúa sí fariseo yo' a. <sup>38</sup> Ga ne ca'anj canę ruy no' nichrun' tacóo Jesucristó, ne ta'vee uxrá no', ne na'nu' no' na rihaan no' tacóo Jesucristó a. Ga ne maan yuvé raę no' na've no' tacóo Jesucristó a. Cachron tu'va no' tacóo Jesucristó, ga ne caxrj no' casté gun' daj tacóo so' uun a. <sup>39</sup> Dan me se ga quene'en sí tucua se vaa

qui'yaj chana man Jesucristó, ga ne guun rá so' nana nihánj ni'yaj so' man Jesucristó a: "Sese ya sij nata' se-nana Diosę me sí nihánj, ne aj ne'en so' daj chana me chana nihánj, se vaa chana atę cacun' me no', ne ne ca'vej rá so' qui'yaj no' daj ga so' tzaj man adonj", guun rá sí tucua yo' a. <sup>40</sup> Ga ne cataj Jesucristó rihaan so' a:

—Vaa nana me raj cataj 'unj rihaan so', Simón —taj Jesucristó rihaan so' a.

—Ca'mij so', maestro —taj sí tucua yo' a.

<sup>41</sup> Ga ne nanó Jesucristó se-cuento vij sí 'yaj xcúun a:

—Vij sí 'yaj xcúun sa'anj rihaan 'o ru'vee me roj so' a. 'O so' ro', 'yaj xcúun 'un' cientó sa'anj denario, ne yo'ó so' ro', 'yaj xcúun vij chihaa chí' sa'anj denario a.

<sup>42</sup> Tzaj ne taj sa'anj rihaan roj so' naru'vee roj so' rihaan ru'vee, ga ne che'é dan cunuu 'eę rá ru'vee man roj so', ne quinavij uun xcúun xráa roj so', qui'yaj ru'vee a. Me tuvi' roj so' caran' doj rá ni'yaj man ru'vee, rá so' ga —taj Jesucristó, xna'anj so' man sí cu'naj Simón yo' a.

<sup>43</sup> —Caran' doj rá sí navij nocoo doj xcúun xráa ni'yaj so' man ru'vee, che'é rej nocoo doj se luj qui'yaj ru'vee che'é so', raj a —taj sí cu'naj Simón yo' a.

—Veé daj vaa ya —taj Jesucristó rihaan so' a.

<sup>44</sup> Ga ne canicaj Jesucristó ni'yaj Jesucristó man chana, ga ne cataj so' rihaan sí cu'naj Simón yo' a:

—Xcaj so' cuentá se vaa qui'yaj chana nihánj ei.

Ca'ná' 'unj tucúa so', tzaj ne taj na rquę so' na'nuj tacój ma'. Tzaj ne chana nihánj me ní na'nu' na rihaan no' tacój, ne maan yuvé raę no' na've no' tacój nanj á.

<sup>45</sup> Ca'naj tucúa so', tzaj ne ne cachron tu'vá so' ra'aj ma'. Tzaj ne chana nihánj ro', nu' catuj 'unj rá ve', ne nu' cachron tu'va no' tacój, ne veé 'o achron tu'va no' tacój nanj á. <sup>46</sup> Taj vaj casté caxrj so' raj ma'. Tzaj ne chana nihánj me ní caxrj casté gun' daj tacój adonj.

<sup>47</sup> Cuno so' ca'mij á. Ase vaa sí navij uun xcúun 'un' cientó sa'anj denario xráa ro', daj vaa no' a. 'O se nda' se ní tumé uxrá cacun' me no', tzaj ne che'é se caraya'anj ndo'o no' ni'yaj no' manj ro', che'é dan ne'en ní se vaa x'něj nu' cacun' xráa no' nanj adonj. Ne xa' sí x'něj doj cacun' xráa, tzaj ne doj araya'anj so' ni'yaj so' manj nanj adonj —taj Jesucristó rihaan sí cu'naj Simón yo' a.

<sup>48</sup> Ga ne cataj Jesucristó rihaan chana yo' a:

—Navij cacun' tumé so' ei —taj Jesucristó rihaan no' a.

<sup>49</sup> Ga ne guun che'e nij sí chá chraa tucúa Simón ca'mii nij so' ga tuvi' nij so', cataj nij so' a:

—Daj sij me sí nihánj, ne sij rá so' cataj so' se vaa navij cacun' xráa yuvij, rá soj ga —taj nij so', xna'anj nij so' man tuvi' nij so' a.

<sup>50</sup> Tzaj ne canicaj uun Jesucristó, cataj so' rihaan chana a:

—Quinanij so' rihaan sayuun, che'é se amán rá so' ni'yaj so' manj adonj. Ve'é ca'anj so', ne daj ga nimán so' á —taj Jesucristó rihaan chana yo' a.



**Nana nihánj taj xna'anj che'é nij chana racuíj man Jesucristó a**

**8** Dan me se cachén doj güii, gaa ne ca'anj Jesucristó que'ee chuman', ca'mii natáj so' rihaan yuvij che'é güii guun chij Diose rihaan chumij nihánj, ne ca'anj chuvij nij sí tucu'yón se-nana so' ga so' a. <sup>2</sup> Ne ca'anj chana nahuun sa' qui'yaj Jesucristó ga nij so' a. Dan me se ta'aj no' me ní nahuun qui'yaj Jesucristó, ne yo'ó ta'aj no' me ní curihanj nana chree nimán qui'yaj Jesucristó a. Chana cu'naj Mariá Magdalena me 'o no', ne no' me ní curihanj chij nana chree nimán qui'yaj Jesucristó a. <sup>3</sup> Ne yo'ó no' ro', me ní cu'naj Juana, ne nica no' ro', me sí cu'naj Chuza sí nicun' rihaan sí nica suun rey cu'naj Herodes a. Ne yo'ó chana ca'anj ga Jesucristó ro', me ní cu'naj Susana a. Ne vaa que'ee doj nij chana ca'anj ga nij so' a. Nu' nij chana nihánj ro', me ní racuíj man nij tuví' Jesucristó se vaa rqué nij no' si'yaj nij no' rasuun cachiin man nij tuví' Jesucristó a.

**Nihánj me cuentó nanó Jesucristó che'é 'núu trigó tix'nuu yo'ó so' a**

<sup>4</sup> Dan me se cavii que'ee ndo'o nij yuvij daj a chuman', ca'anj ni'yaj nij so' man Jesucristó, ne dan me se quisij cunuu chre' nij yuvij, gaa ne guun che'e Jesucristó nanó so' se-cuento 'núu trigó rihaan nij so' a.

<sup>5</sup> Cataj Jesucristó nana nihánj a:

—Dan me se curihanj 'o sí me rá cuchruj naa 'núu trigó, ne tix'nuu so' 'núu trigó rihaan yo'ó, ne cayuu doj 'núu trigó yo' rá chrej chée yuvij, ne curu'maan che'é yuvij man yo', ne ca'na' xtâj, chá xtâj man 'núu trigó naj rá chrej yo', ne dan me se navij nu' 'núu trigó yo', qui'yaj nij xtâj nanj adonj. <sup>6</sup> Ne yo'ó ta'aj 'núu trigó yo' ro', cayuu rihaan yuvej rej taj catun' yo'ó a. Xra' 'núu, tzaj ne cuchrii naa le'ej che'é se taj nocoo 'yoo táá xráá yuvej yo' nanj adonj. <sup>7</sup> Ne yo'ó ta'aj 'núu trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj nanj adonj. <sup>8</sup> Ne yo'ó ta'aj 'núu trigó yo' ro', cayuu rihaan yo'ó sa', ne naa yo' ro', cachij sa', ne cientó ya 'núu cavii, qui'yaj 'o 'o 'núu le'ej nii quini rihaan yo'ó sa' yo' nanj adonj. —Danj cataj Jesucristó rihaan nij so' a.

Gaa ne guun che'e so' ca'mii nucaj so', cataj so':

—Sese taj yu'uj xréé soj, ne cunoo soj nana nihánj ei —taj Jesucristó rihaan nij so' a.

**Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvij a**

<sup>9</sup> Gaa ne xna'anj nij sí tucu'yón se-nana Jesucristó man so' me che'é nanó so' cuentó che'é 'núu trigó yo' a. <sup>10</sup> Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumij nihánj adonj. Tzaj ne rihaan yo'ó nij yuvij me se inanj cuentó che'é nij rasuun nanó 'unj rihaan nij so', gaa ne ni'yaj

nij so' do', nana xrej nij so' do', tzaj ne se quene'en nij so' do', se xcaj nij so' cuentá do', a man adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj me taj se-cuento 'núu trigó yo' a**

<sup>11</sup> Canicaj Jesucristó, cataj so':

—Nihánj me cataj xna'anj 'unj che'é se-cuento 'núu trigó, ne ase vaa 'núu trigó yo' ro', danj vaa se-nana Diose adonj. <sup>12</sup> Ne ase vaa 'núu cayuu rá chrej ro', danj vaa ta'aj nij sí uno se-nana Diose, ne dan me se uno nij so' doj tzin', tzaj ne 'na' sí chree, ne a'néj sí chree se-nana Diose nimán nij so' che'é se na'vej rá sí chree cuchuman rá nij so' ne quinaniij nij so' rihaan sayuun qui'yaj Diose adonj. <sup>13</sup> Ne ase vaa ta'aj 'núu trigó cayuu rihaan yuvej ro', danj vaa yo'ó ta'aj nij sí uno se-nana Diose, ne uun niha' rá nij so', ne doj orá nii gaa chumán xa' rá nij so', tzaj ne nu' 'na' sayuun rihaan nij so', ne nu' tanáj nij so' se-nana Diose, ne ne noco' raan nij so' se-nana Diose ma'. <sup>14</sup> Ne ase vaa ta'aj 'núu cayuu sca'núj tanj ro', danj vaa yo'ó ta'aj nij sí uno se-nana Diose uún, ne dan me se achén güii, gaa ne anicaj nij so' niganj nanó rá nij so' che'é rasuun achiin man nij so' do', che'é sa'anj do', che'é se niha' ndo'o vaa rasuun man rihaan chumij nihánj rá nij so' do', ne che'é dan me tanáj xcó nij so' se-nana Diose, ne ne 'yaj nij so' se sa' a ma'. <sup>15</sup> Ne yo'ó ta'aj nij sí uno se-nana Diose me se ase vaa 'núu cayuu rihaan yo'ó sa' ne sa' uxrá cachij yo' ro', danj vaa sí sa' uno se-nana Diose, ne sa' uxrá vaa nij so', ne ve'é nanó xrej nij so' se-nana Diose, ne noco' raan nij so' se-nana Diose, ne inanj se sa' 'yaj nij so', ne ne a'ne' rá nij so' ga se-nana Diose ma' —taj Jesucristó rihaan nij sí tucu'yón se-nana so' a.

**Nihánj me cuentó nanó Jesucristó che'é aga' ya'an a**

<sup>16</sup> Dan me se guun che'e Jesucristó cataj so':

—Nuvi' a 'ó sí achrón ya'an raag aga' ya'an, ne axríj yuve so' aga' rque xruj do', rque yuvéé do' ma'. Tananj toco' nii aga' ya'an rej xa', gaa ne chuguun yo' rihaan cunudanj nij sí atúj rá ve' adonj. <sup>17</sup> Dan me se a 'ó rasuun caxríj yuve yuvij se qui'nij yuve ma'. Ya nurihanj yo', vaa güii, ne cunudanj yuvij quene'en, vaa güii adonj. <sup>18</sup> Che'é dan nuchruj raag soj nana ca'mij nihánj ei. 'O se sí nari' nana ro', doj a nari' so', qui'yaj Diose, ne sí na'vej rá nari' sa' nana ro', tananj doj a ca'nee Diose nana nari' so' man so', ne quinaj uun so' nanj adonj —taj Jesucristó rihaan nij so' a.

**Nana nihánj taj xna'anj se vaa ase vaa nii Jesucristó do', ase vaa tinúu Jesucristó do', vaa nij sí uno se-nana Diose a**

<sup>19</sup> Dan me se cuchi' nii Jesucristó cuchi' nij tinúu Jesucristó cuchi' ndaa rej vaj Jesucristó, tzaj ne ne ca'vee quinichrun' nij so' rihaan Jesucristó, che'é se man ndo'o yuvij a. <sup>20</sup> Ne cataj 'o so' rihaan Jesucristó a:

—Nicun' ní sɔ' nicun' tinúú sɔ' nicun' xe', ne me rá nij so' quene'en nij so' mán sɔ', Jesús —taj so', cataj xna'anj so' rihaan Jesucristó a.

<sup>21</sup> Tzaj ne cataj Jesucristó rihaan nij yuvi a:

—Ase vaa ní 'unj dɔ', ase vaa tinúú 'unj dɔ', vaa nij sí nihánj adonj. 'O se nanó xrej nij so' se-nanā Diose, ne 'yaj nij so' ndaa vaa taj nana yo' adonj —taj Jesucristó rihaan nij yuvi a.

**Nana nihánj taj xna'anj se vaa ca'ne' Jesucristó suun rihaan na dɔ', rihaan nana dɔ', se vaa canicun' yo' a**

<sup>22</sup> Dan me se 'o güii catúj Jesucristó rque 'o rihoo ga cunudanj nij sí tucu'yón se-nanā so', ne cataj Jesucristó rihaan nij so' se vaa ca'anj cunudanj nij so' ndaa yo'ó níchrej tu'va na lacuaná a. Gaa ne guun che'e rihoo chéé rihoo rihaan na, qui'yaj nij so' a. <sup>23</sup> Doj ca'anj rihoo, ne cotoj Jesucristó a. Cachén 'o orá nii, gaa ne guun che'e nana yuvaa cavii uxrá yo' go' ndo'o yo' rihaan na, ne dan me se catúj ndo'o na rque rihoo, ne daj doj ca'anj nij rihoo rque na a. <sup>24</sup> Gaa ne guun che'e nij sí tucu'yón se-nanā Jesucristó narii nij so' nej rihaan so', ne:

—Daj doj cavi' ní, nanj maestro —taj nij so' rihaan Jesucristó a.

Gaa ne canicun' caya so', ne caxrj yuvaa so' man nana dɔ', man na dɔ' a. Gaa ne canicun' nana canicun' na dɔ', ne canicun' dínj rihaan na lacuaná yo', qui'yaj Jesucristó nanj adonj. <sup>25</sup> Gaa ne xna'anj Jesucristó man nij sí tucu'yón se-nanā so', cataj so':

—Me che'é ne amán rá soj ni'yaj soj man Diose ga —taj so' rihaan nij so' a.

Tzaj ne ca'anj rá nij so', ne cuchu'vi' nij so', ne cataj nij so' rihaan tuvi' nij so':

—Daj sij me sí nihánj ga. Ndaa rihaan nana dɔ', ndaa rihaan na dɔ', a'ne' so' suun, ne uno roj yo' a'mii so' ason —taj nij so' rihaan tuvi' nij so' a.

**Nana nihánj taj xna'anj se vaa quirii Jesucristó man nij nana chree nimán 'o snó'o a**

<sup>26</sup> Dan me se guun gan' rihoo nuu Jesucristó ga estadó Galilea, ne cachén yo' ca'anj yo' ndaa níchrej tu'va na lacuaná yo', ndaa rej ne nij sí man chuman' Gadara a. <sup>27</sup> Cuchi' nij so' yo'óó yo', ne nanij Jesucristó rihoo, gaa ne nari' tuvi' so' ga 'o sí chihanj chuman' yo', ne so' me sí nuu nana chree nimán, ne taj yatzj nuu so' dɔ', na'vej rá so' cayáán so' ve' tucua so' dɔ', inanj rihaan santó ne so' dɔ' a. <sup>28</sup> Dan me se ca'ne' Jesucristó suun rihaan nana chree se vaa curihanj nana chree nimán so' a. 'O se quisj que'ee canó nana chree man so' a. Dan me se ndaa aga' ne' numij nii ra'a so' dɔ', tacóó so' dɔ', tzaj ne xuun so', ne x'ne' yo', qui'yaj so', gaa ne nicaj nana chree man so' ca'anj nij so' quij nanj adonj. Dan me se gaa quene'en so' man Jesucristó, ne caguáj so', ne canicun' ruj so' rihaan Jesucristó, ne nucuaj ca'mii so', cataj so':

—Veé ne'én 'unj se vaa ta'nij Diose sí sɔ' ndo'o mé sɔ', Jesús. Me che'é 'ná' sɔ' rej né 'unj ga. Cataj xna'anj

sɔ' 'unj rihaan sɔ' se vaa se qui'yáá sɔ' sayuun manj ma' —taj so' rihaan Jesucristó a.

<sup>30</sup> Gaa ne xna'anj Jesucristó man nana chree yo', cataj so':

—Daj cu'naj sɔ' ga —taj Jesucristó, xna'anj so' man nana chree a.

Ne dan me se cataj nana chree yo':

—X'ne' nocɔ me núj á —taj nij so' che'é rej aj catúj que'ee ndo'o nij so' nimán snó'o yo' a.

<sup>31</sup> Gaa ne cachín ni'yaj nij nana chree rihaan Jesucristó se gaa nanj ca'nej so' man nij so' rej cunuu rej nuu ya'an, ne:

—Achín ni'yaj ndo'o núj rihaan sɔ' se ca'neé sɔ' man núj rej nuu ya'an, man Jesús —taj nij so' rihaan Jesucristó a.

<sup>32</sup> Ne dan me se chéé 'o x'ne' nocɔ xcáá rej tacaan rej yo', chá nij xo' coj, ne dan me se cachín ni'yaj nij nana chree rihaan Jesucristó se vaa ca'vej rá Jesucristó catuu nij so' nimán xcáá, ne cayáán nij so' nimán xcáá a. Ne ca'vej rá Jesucristó catuu nij so' nimán xcáá a.

<sup>33</sup> Che'é dan me curihanj nij nana chree nimán snó'o, ne catúj nij so' nimán xcáá, ne dan me se ruvaa uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree nimán xcáá yo', gaa ne cunánj ndo'o nij xo' ca'anj nij xo', ne veé danj vaj nij xo', ne quiniij nij xo' rque na, ne canó xráá nij xo' nanj adonj.

<sup>34</sup> Dan me se quene'en nij sí tumé xcáá se vaa guun, gaa ne cunánj nij so' ca'anj cataj xna'anj nij so' rihaan nij yuvi man chuman' dɔ', rihaan nij yuvi man tacaan dɔ' a. <sup>35</sup> Gaa ne dan me se ca'na' ni'yaj nij yuvi se vaa guun, gaa ne ca'na' nij so' rej nicun' Jesucristó, gaa ne quene'en nij so' man sí curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj ti'inj se snúú so', ne nuu sɔ' so' a. Gaa ne cuchu'vi' ndo'o nij yuvi se vaa qui'yaj Jesucristó a.

<sup>36</sup> Gaa ne cataj xna'anj nij sí quene'en rihaan nij yuvi daj qui'yaj Jesucristó ne nahuun sɔ' sí nuu nana chree nimán a.

<sup>37</sup> Che'é dan cuchu'vi' ndo'o nij sí man chuman' Gadara, ne che'é dan cachín ni'yaj taran' nij so' rihaan Jesucristó se vaa ca'anj yanj Jesucristó rihaan nij so' a. Gaa ne dan me se catúj Jesucristó rque rihoo, ne canicaj so' ca'anj so' a. <sup>38</sup> Gaa ne dan me se cachín ni'yaj sí nahuun sɔ' rihaan Jesucristó se vaa ca'vej rá Jesucristó ca'anj so' ga Jesucristó, tzaj ne ne ca'vej rá Jesucristó ma'.

<sup>39</sup> —Canicaj sɔ' nán' sɔ' tucua sɔ', ne cataj xna'anj sɔ' rihaan tuvi' sɔ' che'é se sɔ' ndo'o qui'yaj Diose che'é sɔ' á —taj Jesucristó rihaan so' a.

Gaa ne canicaj sí nahuun sɔ' yo' quinan' so', ne ca'mii natáj so' rihaan taran' nij yuvi yanj chuman' yo' che'é se sɔ' qui'yaj Jesucristó rihaan so' a.

**Nana nihánj taj xna'anj che'é chalá cunii dɔ', che'é chaná chij dɔ', nahuun sɔ', qui'yaj Jesucristó a**

<sup>40</sup> Nanicaj Jesucristó, namán uún so' tu'va na lacuaná a. Gaa ne man ndo'o yuvi na'vij man so', ne guun nihá' rá nij yuvi se vaa namán uún so' a. <sup>41</sup> Gaa ne dan

me se ca'na' 'o so' rihaan Jesucristó, ne Jairo cu'naj so', ne so' me sí 'nij ra'a 'o ve' tucu'yón nij yuvií israelitá se-tucuanj Moisés, ne dan me se canicun' ruj so' rihaan Jesucristó, ne cachíin ni'yaj so' rihaan Jesucristó se vaa ca'anj Jesucristó tucua' so' a. <sup>42</sup> Ne orún' raa ta'nij chana so' chala cunii vaj chuvij yo', tzaj ne ran' ndo'o yo', ne daj doj cavi' yo', ne che'é dan guun rá so' ca'anj Jesucristó tucua' so' a.

Veé dan me ca'anj Jesucristó ga so', ne ca'anj ndo'o yuvií ga so', ne ndaa raan ma'an chrej vaj yuvií ga so' a.

<sup>43</sup> Dan me se sca'núj nij so' vaj 'o chana ran' ndo'o, ne quisij chuvij ya yo' xra' ton man no', ne cutun' no' cunudanj sa'anj vaa rihaan no', tzaj ne taj vaj a 'ó sí guun nucuaj qui'yaj nahuun sa' no' ma'. <sup>44</sup> Dan me se quinichrun' no' rej xcó Jesucristó, ne canó ra'a no' doj tu'va sagan' so'. Dan me se nu' canó ra'a no' tu'va sagan' so', ne nu' canicun' se xra' ton man no' nanj adonj. <sup>45</sup> Gaa ne xna'anj Jesucristó se vaa me sí canó ra'a sagan' so', tzaj ne a 'ó nij yuvií ne cano ra'a sagan' so' ma', taj nu' nij yuvií a. Gaa ne cataj Pedró rihaan Jesucristó:

—Maan che'é se raan vaj nij yuvií, ne canó rma'an ra'a 'o so' sagan' so', maestro —taj Pedró rihaan Jesucristó a.

<sup>46</sup> Tzaj ne cataj Jesucristó rihaan so' a:

—Vaa 'o yuvií canó ra'a sagan' 'unj adonj. Ne'enj se vaa nahuun yuvií qui'yaj adonj —taj Jesucristó rihaan so' a.

<sup>47</sup> Gaa ne xcax chana cuentá se vaa quene'en Jesucristó se vaa qui'yaj no', gaa ne ri'ij man no', ne ca'na' no', ne canicun' ruj no' rihaan so', gaa ne cataj xna'anj no' rihaan nu' nij yuvií se vaa maan se canó ra'a no' sagan' Jesucristó, ne nu' maan orá dan nahuun sa' no' ne canicun' se xra' ton man no', taj no' rihaan cunudanj nij yuvií a.

<sup>48</sup> Gaa ne cataj Jesucristó rihaan no', ne:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á —taj Jesucristó rihaan no' a.

<sup>49</sup> Ataa navij ca'mií Jesucristó, ne ca'na' 'o sí cavií tucua' Jairo, ne cataj so' rihaan Jairo a:

—Aj cavi' ta'níí so', ne taj che'é caraa chrúú so' rihaan maestró a ma' —taj sí 'na' cataj xna'anj rihaan Jairo a.

<sup>50</sup> Dan me se cuno Jesucristó nana ca'mií sí ca'na', gaa ne cataj so' rihaan sí cu'naj Jairo a:

—Se kuchu'ví' so' ma'. Maan se kuchuman ya rá so' ni'yaj so' manj, ne quinahun ta'níí so' nanj adonj —taj Jesucristó rihaan so' a.

<sup>51</sup> Dan me se cuchi' Jesucristó tucua' Jairo, ne ne ca'vej Jesucristó catuyú nij yuvií rá ve' ga so', ne maan Pedró do', Juan do', Jacobo do', roj nica Jairo do', ca'vej so' catuyú rá ve' ga so' a. <sup>52</sup> Dan me se ta'vee ndo'o nij sí cunuu chre' rá ve' che'é chala cunii cavi', ne nanó uxrá rá nij so', ne go' nij so' cuxru' rucuaa nij so' a. Tzaj ne cataj Jesucristó rihaan nij so':

—Se ta'vee soj ma'. 'O se ne cavi' no' ma'. Maan se otoj uun no' nanj á —taj Jesucristó rihaan nij so' a.

<sup>53</sup> Gaa ne ca'nga' nacoó nij so' ni'yaj nij so' man Jesucristó che'é se aj quene'en nij so' se vaa aj cavi' ya no' a. <sup>54</sup> Tzaj ne catúj Jesucristó rá cuartó naj no', ne quita'aa so' ra'a no', ne nacúún so' man no', cataj so':

—Naxagaa so', chala cunii —taj so' rihaan no' a.

<sup>55</sup> Ne cunuu i'na' uún no', gaa ne nu' naxagaa no', ne nu' ca'ne' Jesucristó suun rihaan roj nica Jairo se vaa go' roj so' doj se chá cha chala cunii, taj Jesucristó rihaan roj nica Jairo a.

<sup>56</sup> Dan me se ca'anj rá roj so' se vaa qui'yaj Jesucristó, gaa ne cataj Jesucristó rihaan roj so' a:

—A 'ó yuvií se cataj xna'anj roj soj rihaan daj qui'yaj che'é chala cunii ma' —taj Jesucristó rihaan roj nica roj so' a.

**Nana nihánj taj xna'anj se vaa ca'née Jesucristó man chuvij nij sí tucu'yón se-nana so' ca'anj ca'mií natáj nij so' a**

**9** Dan me se canacúún Jesucristó man chuvij nij sí tucu'yón se-nana so', ne cunuu chre' nij so', ne go' so' se nucuaj man nij so', gaa ne ca'vee qui'yaj canaán nij so' rihaan me ma'an nana chree do', ca'vee ca'nee nij so' chi'ij xraá sí ran' do' a. <sup>2</sup> Gaa ne ca'née so' man nij so' ca'anj ca'mií natáj nij so' che'é güii guun chij Diöse rihaan chumií nihánj, ne ca'nee nij so' chi'ij xraá nij sí ran' do' a. <sup>3</sup> Ne cataj so' rihaan nij so' a:

—A 'ó rasuun se nicaj soj ca'anj soj ma'. Chruun garroté do', nanj do', se chá do', sa'anj do', se nicaj soj ma'. Orún' niquee yatzij nuu soj ca'anj ga soj á. <sup>4</sup> Ne me ma'an ve' cuchi' soj ne ca'vej 'o so' cano soj ro', ne veé ve' yo' yo'o cano soj ne veé ve' yo' cavií soj ca'anj soj ca'mií natáj soj se-nana Diöse á. <sup>5</sup> Ne me ma'an 'o chuman' se ca'vej rá nij sí chihanj cunó nij so' se-nana soj, tanáj soj chuman' yo', ne cavií soj tu'va chuman' yo', ne nacunan' soj tacóó soj cayuu yo'ó tachruu man chuman' yo' tacóó soj á. Ndaa dan, gaa ne xcax nij sí chihanj yo' cuentá se vaa tumé nij so' cacun' se vaa ne ca'vej rá nij so' cunó nij so' se-nana soj man adonj —taj Jesucristó rihaan chuvij nij so' a.

<sup>6</sup> Gaa ne dan me se ca'anj nij so' nij chuman', ne ca'mií natáj nij so' se-nana Diöse nana sa', ne me rej ma'an vaj nij so' ca'néj nij so' chi'ij xraá nij sí ran' a.

**Nana nihánj taj xna'anj se vaa xcax sí nicaj suun cu'naj Herodes cuentá che'é Jesucristó a**

<sup>7</sup> Dan me se cuno sí nicaj suun cu'naj Herodes nu' se vaa qui'yaj Jesucristó, gaa ne guun rá Herodes quene'en so' me sí me Jesucristó a. 'O se ta'aj yuvií cataj se vaa cunuu i'na' uún Juan sí cuta' ne man yuvií, <sup>8</sup> ne yo'ó ta'aj yuvií cataj se vaa curuvi' uún sí cu'naj Elías sí cayáan gaa naá, ne yo'ó ta'aj uún yuvií cataj se vaa cunuu i'na' uún 'o sí nata' se-nana Diöse gaa naá a. <sup>9</sup> Tzaj ne ma'an sí cu'naj Herodes cataj, ne:

—Aj cavi' Juan, ne x'ne' chihá Juan, qui'yáy a. Tzaj ne ne'enj me yuvij me síi nihánj, ne tu'va nii dānj che'é so' rihanj ma' —taj Herodes a.

Gaa ne guun uxrá rá Herodes quene'en so' man Jesucristó a.

### Nana nihánj taj xna'anj se vaa ca'vee quirii Jesucristó se chá 'un' mij snó'o a

<sup>10</sup> Dan me se namán chuvij nij síi tucu'yón se-nānā Jesucristó rihaan Jesucristó, ne nata' nij so' rihaan Jesucristó che'é nū' nij suun sá' nocōo qui'yaj suun nij so' rej ca'anj nij so' a. Gaa ne nicaj Jesucristó man taran' nij so', ca'anj nij so' ndāa tu'va chuman' cu'naj Betsaida rej yanij a. <sup>11</sup> Tzaj ne quene'en 'o x'ne' nocōo yuvij rej ca'anj Jesucristó, gaa ne canoco' nij so' man Jesucristó, ca'anj nij so' a. Gaa ne ve'é ca'mii Jesucristó gā x'ne' nocōo yuvij canoco' man so', ne ca'mii natáj so' che'é güii guun hij Diose rihaan chumij nihánj, ne quinahuun nij síi ran', qui'yaj so' dō' a. <sup>12</sup> Dan me se nichrun' cata' güii, ne dan me se quinichrun' chuvij nij síi tucu'yón se-nānā Jesucristó rihaan so', ne cataj nij so':

—Qui'yáá sō' se ndo'o, ne na'nej sō' chrej man nij yuvij, ca'anj nij so' rej chuman' nocōo chuman' ra'a dō', gaa ne man ve' caran' nij so' dō', man se chá quirij' nij so' chá nij so' dō' a. Tzaj ne rej man ní' nihánj me se rco' quij me nihánj, ne taj rej caran' nij so', taj se chá chá nij so' dō', nihánj ma' —taj nij so' rihaan Jesucristó a.

<sup>13</sup> Tzaj ne cataj Jesucristó rihaan nij so' a:

—Gō' ma'an soj se chá chá nij yuvij ei —taj Jesucristó rihaan nij so' a.

—Tzaj ne taj se chá rihaan núj ma'. Maan se orún' 'un' rachrúun ne vij guēē xcuaj ne, vaa rihaan núj nanj á. Tzaj ne ca'vee ca'anj núj, ne quirāan núj se chá chá cunudanj nij yuvij nihánj nanj á —taj nij so' rihaan Jesucristó a.

<sup>14</sup> Dan me se 'un' mij snó'o mán rej yo' tā' asuun, ne inō me chanā gā xnii adōnj. Tzaj ne cataj Jesucristó rihaan nij síi tucu'yón se-nānā so' a:

—Cayáan nij yuvij rihaan yo'óo, qui'yaj soj, ne dan me se cunūu chre' 'o vij chihāā chī' vij chihāā chī' yuvij canē 'o 'o rej, qui'yaj soj á —taj Jesucristó rihaan nij so' a.

<sup>15</sup> Ne veé dānj qui'yaj nij so', ne ca'anj canē cunudanj nij yuvij a. <sup>16</sup> Gaa ne dan me se quita'aa Jesucristó 'un' nij rachrúun gā roj xcuaj yo', gaa ne ni'yaj so' rej xtā', ne nago' so' graciá rihaan Diose che'é se chá yo', gaa ne cuxra' ta'aj so' rachrúun dō', neē xcuaj dō', ne caxrij so' ston nij síi tucu'yón se-nānā so', che'é rej caxrij nij so' ston nij yuvij a. <sup>17</sup> Gaa ne chá taran' nij yuvij, ne caraa rque nij so' ne ndāa quináj ndo'o se chá a. Gaa ne naqui'yaj chre' nij so' nū' se quináj tu'va yuvij, ne caraa nij so' yo'ó cunū' chuvij scaa a.

### Nana nihánj taj xna'anj se vaa cataj xna'anj Pedró me síi me Jesucristó a

<sup>18</sup> Dan me se 'o güii ca'anj Jesucristó 'o rej yanij cachíin ni'yaj so' rihaan Diose, ne nij síi tucu'yón se-nānā so' ro', mán rej yo' gā so', ne xná'anj so' man nij so', cataj so', ne:

—Me sij mé 'unj, taj nij yuvij gā —taj Jesucristó, xná'anj so' man nij so' a.

<sup>19</sup> —Vaa síi taj se vaa síi cu'naj Juan síi cuta' ne man yuvij mé sō' ei. Ne vaa síi taj uún se vaa síi cu'naj Elías síi nata' se-nānā Diose gaa naá me uún sō' chuguanj. Ne vaa síi taj uún se vaa yo'ó síi nata' se-nānā Diose gaa naá me uún sō' xā'. Dānj taj 'o 'o ta'aj nij yuvij nanj á —taj nij so' a.

<sup>20</sup> Gaa ne cataj Jesucristó rihaan nij so':

—Ne ma'an soj, gaa ne me sij mé 'unj, rá soj uún gā —taj Jesucristó, xná'anj so' man nij síi tucu'yón se-nānā so' a.

Gaa ne cataj Pedró:

—Síi ca'née Diose tīnani man yuvij rihaan sayuun mé sō' ei —taj so' rihaan Jesucristó a.

<sup>21</sup> Gaa ne cataj xna'anj Jesucristó rihaan nij so' a:

—Se cataj nij soj nana vaa dānj rihaan ā 'ó nij yuvij ma' —taj Jesucristó rihaan nij so' a.

### Nana nihánj taj xna'anj se vaa cataj xna'anj Jesucristó se vaa cavi' so' ne cunūu i'nā' uún so' a

<sup>22</sup> Gaa ne cataj uún Jesucristó rihaan nij síi tucu'yón se-nānā so' a:

—Xā' 'unj sij ca'née Diose nīcāj yu'unj man yuvij, tzaj ne nō xcúun 'unj quirān' ndo'o 'unj sayuun qui'yaj nij síi uun hij dō', qui'yaj nij xrej atā suun nocōo doj dō', qui'yaj nij síi naqui'yaj cūu se-tucuānj Moisés rihaan yuvij dō', ne nachrij' ndo'o nij so' nī'yaj nij so' mán 'unj, ne ticavi' nii mán 'unj, ne cachēn va'nūj güii, gaa ne cunūu i'nā' uún 'unj adōnj —taj Jesucristó rihaan nij so' a.

<sup>23</sup> Gaa ne dan me se cataj so' rihaan cunudanj nij yuvij a:

—Sese me rá yo'ō so' canocō' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quirān' uxrá so' sayuun dō', ca'vee se ndāa cachron' nii man so' rihaan rcutze dō', tzaj ne dāj ā 'o 'o güii me se yo'ō qui'yaj suun so' che'ej, ne yo'ō canocō' raan so' manj adōnj. <sup>24</sup> Tzaj ne sese vaa 'o síi me rá tīnani man ma'an rihaan sayuun, ne vaa güii yo'ō cavi' nimán so' adōnj. Tzaj ne sese cavi' yo'ō so' che'é se me so' síi nocō' manj, ne vaa güii cunūu i'nā' uún so' adōnj. <sup>25</sup> Ne ā me se quirij' 'o so' sese qui'yaj canaán so' nū' rasūun man rihaan chumij nihánj, ne ca'anj ni'ya nimán ma'an so', rá soj gā. Daj chihāā mij se ca'vee cavi' sá' so', qui'yaj rasūun man rihaan chumij nihánj ā ma'. <sup>26</sup> Dan me se xā' síi uun na'aj ni'yaj manj ne uun na'aj ni'yaj se-nānā, tzaj ne vaa güii guun na'aj 'unj sij ca'née Diose nīcāj yu'unj man yuvij nī'yaj 'unj man so' asā' ca'na' uún 'unj rihaan chumij nihánj

adonj. Ne güii yo' me se ve'é ndo'o guun chij 'unj, qui'yaj Réj Diose, ne cavii sa' 'unj, qui'yaj se-mozó Diose nij síi guéé adonj. <sup>27</sup> Nihánj me se cataj yá 'unj rihaan soj se vaa xa' ta'aj soj sij nicun' nihánj cuano me se gaa ataa a cavi' ta'aj soj, ne ya quene'en ta'aj soj asa' guun che'e Diose guun chij Diose rihaan chumii nihánj nanj adonj —taj Jesucristó rihaan cunudanj nij so' a.

**Nana nihánj taj xna'anj se vaa chuguun ndo'o man Jesucristó ni'yaj nij síi tucu'yón se-nana so' a**

<sup>28</sup> Quisíj ca'mii Jesucristó nana vaa danj, gaa ne cachén 'o tunj güii ta' asuun, gaa ne nicaj Jesucristó man Pedró ga Juan ga Jacobo, ne cavii so' raá 'o quij xcaan, ca'anj cachinj ni'yaj so' rihaan Diose a. <sup>29</sup> Gaa cachíin ni'yaj so' rihaan Diose, ne yo'o cunuu ino rihaan so', ne yuun che'e cunuu catzii sagan' so', ne ndaa raan lá ma'an sagan' so' a. <sup>30</sup> Gaa ne dan me se naqui'yaa vij snó'o rihaan nij so', ne nanó roj so' cuentó ga Jesucristó, ne Moisés do', Elías síi nata' se-nana Diose gaa naá do', me roj so' a. <sup>31</sup> Dan me se ve'é ndo'o curuvi' roj so', ne ca'mii roj so' ga Jesucristó che'é se vaa quiran' Jesucristó chuman' Jerusalén, ne cavii so' chumii nihánj, ndaa vaa guun rá Diose qui'yaj so' a. <sup>32</sup> Dan me se ca'na' ndo'o nej rihaan nij tuvi' Pedró, tzaj ne ne cotoj nij so' ma'. Quene'en nij so' ndaa vaa chuguun sagan' Jesucristó do', ndaa vaa chuguun sagan' roj síi nicun' ga so' do' a. <sup>33</sup> Gaa ne dan me se guun che'e roj síi nicun' ga Jesucristó ca'anj yanij roj so' ga Jesucristó, gaa ne cataj Pedró rihaan Jesucristó:

—Cunaj uxrá vaa mán núj nihánj ga so', maestro. Ne qui'yaj núj va'nuy ve' yacataj cané soj nanj á. 'O ve' cané so', ne yo'ó ve' cané síi cu'naj Moisés, ne yo'ó ve' cané síi cu'naj Elías ei —taj Pedró rihaan Jesucristó, tzaj ne ne quene'en uxrá so' daj me che'é ca'mii so' rihaan Jesucristó danj a ma'.

<sup>34</sup> Quisíj ca'mii so' nana vaa danj, gaa ne ca'na' 'o ngaa rej xtá', ne caráan ngaa xráá nij so' ne naxij nij so' rque ngaa, ne chucu'vi' va'nuy nij síi tucu'yón se-nana Jesucristó yo' a. <sup>35</sup> Gaa ne Diose ro', ca'mii nana cuno nij so' rque ngaa yo' a. Ne cataj Diose:

—Síi nihánj me ta'nij síi 'eé raj adonj. Cuno soj rihaan so' ei —taj Diose cuno nij so' a.

<sup>36</sup> Quisíj ca'mii Diose, gaa ne taj orún' Jesucristó nicun', quene'en nij so' a. Tzaj ne yo'o caráan tu'va nij so' se vaa quene'en nij so', ne güii guun danj me se a 'ó yuvij ne cataj xna'anj nij so' rihaan a.

**Nana nihánj taj xna'anj se vaa nahuun sa' 'o xnii nuy nana chree nimán, qui'yaj Jesucristó a**

<sup>37</sup> Dan me se cachén 'o yan', ne quisíj güii, gaa ne ca'anj Jesucristó ga nij síi tucu'yón se-nana so' rej rque a. Gaa ne nari' tuvi' nij so' ga 'o x'ne' nocço yuvij a.

<sup>38</sup> Gaa ne dan me se nucuaj ndo'o ca'mii yo'o síi 'na' sca'núj nij yuvij rihaan Jesucristó, ne cataj so':

—Achíin ni'yaj rihaan so' se vaa cunuu 'eé rá so' ni'yaj so' ta'nij che'é se orún' raá so' me ta'nij, maestro

—taj so' rihaan Jesucristó, ne— <sup>39</sup> Dan me se naruvi' nana chree nimán ta'nij, ne taj ni'yón snúu so', ne aguáj so', ne avii yatan' tu'va so', 'yaj nana chree yo', ne 'yaj chí'ii ndo'o nana chree yo' man ta'nij, ne sayuun uxrá curihanj nana chree yo' nimán ta'nij adonj. <sup>40</sup> Ne dan me se cachíin ni'yaj rihaan nij síi tucu'yón se-nana so' se vaa quirii nij so' nana chree nimán ta'nij, tzaj ne ne ca'vee quirii nij so' nana chree nimán ta'nij ma'. —Danj cataj snó'o yo' rihaan Jesucristó a.

<sup>41</sup> Gaa ne cataj Jesucristó a:

—Dan me se síi ne amán rá me soj sij man rihaan chumii nihánj cuano, ne chí'ii vaa nimán soj, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nicaj so' man xnii ca'na' so' rihanj cuaj á —taj Jesucristó a.

<sup>42</sup> Dan me se gaa 'na' xnii, ne nu' snúu xnii, ne naxru' xnii, qui'yaj nana chree yo', tzaj ne ca'ne' Jesucristó suun rihaan nana chree se vaa curihanj so' nimán xnii, ne dan me se curihanj nana chree yo' nimán xnii, ne nahuun sa' xnii, qui'yaj Jesucristó, ne nago' Jesucristó man xnii rihaan rej xnii a. <sup>43</sup> Gaa ne quene'en nij yuvij se vaa nucuaj ndo'o Diose síi qui'yaj suun sa' nocço yo', ne caráya'anj nu' nij so' a.

**Nana nihánj taj xna'anj se vaa cataj xna'anj uún Jesucristó se vaa vaa güii cavi' so' a**

Dan me se caráya'anj cunudanj yuvij se vaa qui'yaj Jesucristó a. Gaa ne cataj Jesucristó rihaan nij síi tucu'yón se-nana so' a:

<sup>44</sup> —A 'ó xco' se quini'yón soj nana nihánj nana cataj xna'anj 'unj rihaan soj cuano ma'. Dan me se 'unj sij ca'née Diose nicaj yu'unj man yuvij me se vaa güii nago' nii mán 'unj rihaan yuvij adonj —taj Jesucristó rihaan nij síi tucu'yón se-nana so' a.

<sup>45</sup> Tzaj ne ne cunó nij so' nana ca'mii Jesucristó, ne ne ca'vej rá Diose xcaj nij so' cuentá ma'. Ne chucu'vi' nij so' xna'anj nij so' man Jesucristó che'é nana yo' a.

**Nana nihánj taj xna'anj me síi me síi guun chij doj a**

<sup>46</sup> Dan me se guun che'e nij síi tucu'yón se-nana Jesucristó ca'mii cunu' nij so' me nij so' guun chij doj a.

<sup>47</sup> Tzaj ne xcaj Jesucristó cuentá daj vaa nimán nij so', ne che'é dan quita'aa so' ra'a 'o ne'ej, ne nicaj so' cachrón so' x'núu so', <sup>48</sup> gaa ne cataj Jesucristó rihaan nij so' a:

—Me ma'an 'o síi aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se síi a'mii sa' ga 'unj me se nuveé orún' 'unj me a'mii sa' so' ga ma'. Maan Diose ya síi ca'née mán 'unj me aráj cochroj ya so' ne a'mii sa' ya so' ga vaa nanj adonj. 'O se síi nicaj' doj rihaan taran' soj ro', me síi sa' doj rihaan taran' soj a —taj Jesucristó rihaan nij síi tucu'yón se-nana so' a.

**Nana nihánj taj xna'anj se vaa cataj xna'anj Jesucristó se vaa me ma'an síí ne unu' ga so' me tuvi' so' a**

<sup>49</sup> Gaa ne cataj síí cu'naj Juan rihaan Jesucristó a:

—Quene'en núj man 'o síí ata' tu'va se-chuvií so', ne urihanj nana chree nimán yuvij, 'yaj so', nanj maestro. Tzaj ne caráán núj chrej ca'mii so' ne se qui'yaj so' danj, che'é se nuveé sij chéé ga ní' me so', taj núj, nanj maestro —taj Juan rihaan Jesucristó a.

<sup>50</sup> Tzaj ne cataj Jesucristó rihaan so' a:

—Ca'ne' sa' guee rá soj qui'yaj ma'an so' danj ei. 'O se xa' síí ne unu' ga soj, tzaj ne tuvi' soj me so' adonj —taj Jesucristó rihaan Juan do', rihaan yo'ó nij síí tucuyón se-nana so' do' a.

**Nana nihánj taj xna'anj se vaa cataj xna'anj Jesucristó rihaan síí cu'naj Jacobo do', rihaan síí cu'naj Juan do', se vaa nij ca'mii roj so' a**

<sup>51</sup> Dan me se gaa nichrun' güii quinān' Jesucristó xtā', gaa ne yo'ó ca'née nucuaj nimán so' ca'anj so' chuman' Jerusalén a. <sup>52</sup> Dan me se ca'ne' so' suun rihaan doj síí chéé ga so' quitaj yaan nij so' nano' nij so' ve' carān' nij tuvi' nij so', gaa ne ca'anj nij síí ca'anj suun, ne cuchí' nij so' 'o chuman' yanj nij síí samaritano a. <sup>53</sup> Tzaj ne quira'aan nij síí samaritano ve' tucua' nij so' rihaan Jesucristó, che'é se guun rá so' ca'anj so' chuman' Jerusalén a. <sup>54</sup> Dan me se gaa quene'en roj síí tucuyón se-nana Jesucristó roj síí cu'naj Jacobo ga Juan, se vaa quira'aan nij síí samaritano ve', gaa ne xná'anj roj so' man Jesucristó, cataj roj so':

—Me rá so' cachin' ni'yaj núj rihaan Diose, ne ca'nej Diose ya'an, ne cacaa' nij síí samaritano na' —taj roj so', xná'anj roj so' man Jesucristó a.

<sup>55</sup> Tzaj ne ni'yaj Jesucristó man roj so', ne caxrij yuvaa Jesucristó man roj so', ne cataj Jesucristó a:

—Ne ne'en soj daj sij me soj ne guun danj rá soj a. Xa' 'unj, tzaj ne ne ca'na' 'unj ticavi' 'unj man yuvij ma'. Che'é yan tinanii 'unj man yuvij rihaan sayuun ca'ná' 'unj adonj —taj Jesucristó rihaan roj so' a.

<sup>56</sup> Gaa ne ca'anj nij tuvi' Jesucristó yo'ó chuman' caran' nij so' a.

**Nana nihánj taj xna'anj daj ca'mii Jesucristó rihaan va'nuy síí tihaj guun rá canoco' man so' a**

<sup>57</sup> Gaa vaj nij so' chrej, gaa ne ca'na' 'o so', ca'mii so' ga Jesucristó a:

—Canocó' 'unj mán so' daj rej ma'an vaj so' ei —taj so' rihaan Jesucristó a.

<sup>58</sup> Gaa ne cataj ya Jesucristó se vaa ran' so' chéé so' a:

—'O se nij chunee ro', otoj sa' nij xo' rá yu'uj taj rque yo'ó, ne nij xtā' chéé xtā' ro', vaa saca' nij xo' a. Ne xa' 'unj sij ca'née Diose nicaj yu'unj man yuvij, tzaj ne taj a doj rej quináá 'unj cotoj 'unj a ma' —taj Jesucristó rihaan so' a.

<sup>59</sup> Ne dan me se cataj Jesucristó rihaan yo'ó so' a:

—Canocó' so' manj ca'anj ní' á —taj Jesucristó rihaan so' a.

—Ca'vej so' nanj tucua'j, ne ndaa cavi' réj, gaa ne cachin' 'unj man réj, gaa ne canocó' 'unj mán so' ei —taj so' rihaan Jesucristó a.

<sup>60</sup> Tzaj ne cataj Jesucristó rihaan so' a:

—Ca'ne' rá so' cachin' ma'an nij síí cavi' nimán man tuvi' so' xngá á. Ne ca'anj so', ca'mii natáj so' che'é güii guun chij Diose rihaan chumii nihánj ei —taj Jesucristó rihaan so' a.

<sup>61</sup> Ne dan me se cataj yo'ó so' uún rihaan Jesucristó a:

—Me raj canocoj mán so', Señor. Tzaj ne asino ca'vej so' ca'anj cataj xna'anj 'unj rihaan nij tuvij, gaa ne ca'naj, ne ca'anj ní' ei —taj so' rihaan Jesucristó a.

<sup>62</sup> Tzaj ne cataj Jesucristó rihaan so' a:

—Síí oro' nee ni'yaj rej xco' ro', daj chihaa' mij se cavii nicā tucuaán qui'yaj so' ma'. Ne síí me rá canoco' manj me se se guun canicaj uún so' rej xco' so' ma'. Ne sese danj qui'yaj so', ne daj chihaa' mij se ca'vee guun chij Diose nimán so' ma'. Ne ase vaa síí oro' nee rii tucuaán ro', vaa síí me rá canoco' manj adonj —taj Jesucristó rihaan so' a.

**Nana nihánj taj xna'anj se vaa ca'née Jesucristó man va'nuy chihaa' chí' síí tucuyón se-nana so' ca'anj ca'mii natáj nij so' a**

**10** Cachén doj, gaa ne narii Jesucristó man ya'núj chihaa' chí' snó'o, ne ca'née so' man vij vij nij so' quitaj yaan nij so' rihaan Jesucristó ca'anj nij so' daj a chuman' cachén Jesucristó, <sup>2</sup> ne cataj Jesucristó rihaan nij so' a:

—Ya uxrá, ne vaa ndo'o suun rihaan ní', ne nij síí 'yaj suun me se doj nij so' nanj adonj. Ne cachin' ni'yaj ní' doj nij síí qui'yaj suun rihaan Diose síí uun chij 'nij ra'a suun, gaa ne ca'nej so' doj yuvij qui'yaj suun se-suyun so' adonj. <sup>3</sup> Dan me se ca'anj ca'mii natáj soj rihaan nij yuvij, tzaj ne xcaj soj cuentá se vaa ca'na' sayuun rihaan soj ei. 'O se ase vaa matzinj vaj rej man xca'yanj ca'nu' ro', danj gaa soj chuguānj. <sup>4</sup> Se nicaj soj vitó nuu sa'anj se nicaj soj nanj se nicaj soj yo'ó tajoj canj se nicaj soj ca'anj soj ma'. 'O rej ca'anj soj, ne 'o rej canicaj soj, ne se canicun' soj nano' soj cuentó ga yuvij ma'.

<sup>5</sup> "Asa' catúj soj rá 'o ve', ne asino cataj soj rihaan nij síí yanj rá ve' yo' se vaa dínj gaa cumān nij so', qui'yaj Diose a. <sup>6</sup> Ne sese yanj 'o síí cayáán sa' ga Diose rá ve' yo', gaa ne ya ve'é cayáán so', qui'yaj Diose a. Tzaj ne sese nuvi' síí cayáán sa' ga Diose yáán rá ve' yo', ne canicaj uún nana sa' ca'mii soj rihaan ma'an soj, qui'yaj Diose, tzaj ne se cavii sa' nij síí tucua' yo' a ma'. <sup>7</sup> Carān' soj ve' yanj síí sa' yo', ne me ma'an se rque síí yanj yo', ne cha' soj co' o soj do', ne no' xcúun yuvij rque yuvij chraa cha' soj che'é suun sa' 'yaj suun soj a. Se ca'anj soj carān' soj yo'ó yo'ó ve' ma'. <sup>8</sup> Asa' cuchí' soj 'o chuman', ne sese ve'é ca'mii nij síí man chuman' yo' ga soj, gaa ne cha' soj me ma'an se chá rque nij so' man nij soj a. <sup>9</sup> Ca'ne' soj chí'i' xráá nij síí ran' man

chuman' yo', ne ca'miij natáj soj rihaan yuvij se vaa nichrun' guun chij Diose chiháán nij so' a.

<sup>10</sup> "Tzaj ne asa' cuchi' soj 'o chuman', ne sese ne ca'vej rá nij yuvij cunō nij yuvij se-nanā soj, gaa ne canicun' soj tanuyú rá callé chuman', gaa ne cataj soj rihaan nij yuvij man chuman' yo' a: <sup>11</sup> "Asa' curihanj núj chuman' nihánj, ne nacunan' núj tacóó núj, ne tu-cuayuu núj yo'óo tachruyú avii chiháán soj tacóó núj cayuu yo' rihaan ma'an soj a. Gaa ne xcaj soj cuentá se vaa guun rá Diose guun chij Diose chiháán soj, tzaj ne ne ca'vej rá soj a". Danj cataj soj rihaan nij síí na'vej rá cunō nanā ca'miij soj a. <sup>12</sup> Ne cataj xna'anj 'unj rihaan soj cuano se vaa vaa güii ca'ne' 'unj cacun' che'é nij yuvij, gaa ne quirān' nij yuvij man chuman' yo' doj sayuun rihaan nij síí chi'ij man chuman' Sodoma adonj —taj Jesucristó rihaan nij síí ca'née so' a.

**Nanā nihánj taj xna'anj se vaa cataj xna'anj Jesucristó che'é sayuun quirān' yuvij man va'nuy chuman' yuvij ne ca'vej rá cunō se-nanā so' a**

<sup>13</sup> Gaa ne dan me se cataj uún Jesucristó a:

—Nique soj sij man chuman' Corazín a. Nique soj sij man chuman' Betsaida a. 'O se quirān' uxrá soj sayuun nanj á. Dan me se nij síí man chuman' Tiro do', nij síí man chuman' Sidón do', me síí chi'ij nimán nanj á. Tzaj ne sese ca'anj 'unj chiháán nij so', ne sese qui'yáj suun sa' nocōo ni'yaj nij so', ne cuno nij so' se-nanā ne guun ya rá nij so' se vaa tumé nij so' cacun', ne canicaj nimán nij so', ne quinanó ndo'o rá nij so' che'é cacun' tumé nij so', ne ndaa yatzij ya' cunuú nij so', ne ndaa yaj chruun acaa ruvaj caraa nij so' raā nij so', che'é yan quinanó rá nij so' che'é cacun' tumé nij so' asuun saj adonj. Nihánj, ne ne ca'anj 'unj ma'. Maan se inanj chiháán soj 'naj, ne qui'yáj suun sa' nocōo quene'en ma'an soj, tzaj ne ne canicaj nimán nij soj a ma'. <sup>14</sup> Dan me se güii ca'ne' 'unj cacun' che'é nij yuvij ro', doj a gaa sayuun quirān' soj rihaan sayuun quirān' nij síí chi'ij man chuman' Tiro do', man chuman' Sidón do' adonj. <sup>15</sup> Ne vaa soj sij man chuman' Capernaum uún a. Ne síí sa' inanj me ma'an soj, rá soj na'. Nuveé sij sa' me soj ma'. Síí ca'anj rihaan ya'an guun soj adonj —taj Jesucristó a.

<sup>16</sup> Ne cataj uún Jesucristó rihaan nij síí tucu'yón se-nanā so' a:

—Síí nanó xrej se-nanā soj ro', so' me síí nanó xrej se-nanā ma'anj a. Tzaj ne síí uun nacōo rá ni'yaj man soj ro', so' me síí uun nacōo rá ni'yaj man ndaa ma'anj a. Ne síí uun nacōo rá ni'yaj man ma'anj ro', so' me síí uun nacōo rá ni'yaj man Diose síí ca'née manj adonj —taj Jesucristó rihaan nij síí tucu'yón se-nanā so' a.

**Nanā nihánj taj xna'anj se vaa namán va'nuy chihāa chi' nij síí ca'née Jesucristó a**

<sup>17</sup> Quisij qui'yaj va'nuy chihāa chi' nij so' ndaa vaa cataj Jesucristó, gaa ne namán uún nij so' a. Niha' rá nij so', ne cataj nij so' rihaan Jesucristó a:

—Ndaa nij nanā chree uno rihaan núj, Señor. Che'é se se-chuvií so' táá tu'va núj, ne urihanj nij so' nimán yuvij nanj á —taj nij so' rihaan Jesucristó a.

<sup>18</sup> Ne cataj Jesucristó rihaan nij so' a:

—Ne'en yaj cayuu se nucuaj nicaj Satanás, ne ase uun raan ro', me cayuu se nucuaj nicaj Satanás adonj. <sup>19</sup> Cuno soj ca'miij á. 'Unj ro', me síí qui'yaj guun nucuaj soj qui'yaj canaán soj rihaan daj a se chi'ij a. Ca'vee se ru'maan che'é soj 'o xcuáá do', 'o xcuun do', tzaj ne taj se qui'yaj xo' man soj ma'. Qui'yaj canaán soj rihaan nu' se nucuaj nicaj Satanás síí taj ri'yunj ni'yaj man ní', ne a 'ó xco' se qui'yaj chi'ij a 'ó rasuun man soj ma'. <sup>20</sup> Tzaj ne taj che'é guun niha' rá soj che'é se uno nij nanā chree rihaan soj ma'. Guun niha' rá soj, tzaj ne che'é se aj cachrón Diose se-chuvij soj rej xta' ro', che'é dan guun niha' rá soj á —taj Jesucristó rihaan va'nuy chihāa chi' nij so' a.

**Nanā nihánj taj xna'anj se vaa guun niha' rá Jesucristó, qui'yaj Nimán Diose a**

<sup>21</sup> Maan güii yo' ro', guun niha' rá Jesucristó, qui'yaj Nimán Diose, ne cataj Jesucristó rihaan Diose a:

—Síí 'nij ra'a chumiij do', síí 'nij ra'a xta' do', mé so', Ataj Chij. Ne sa' uxrá qui'yáá so' caráán so' rihaan nij síí avii raā do', rihaan nij síí acaj cuentá do', se vaa se cuno nij so' se-nanā ma'. Maan nij síí vaa nicaj nimán ro', ve'é cuno nij so', qui'yáá so' a. Danj inanj qui'yáá so', che'é yan danj me rá so' qui'yáá so', Ataj —taj Jesucristó rihaan Rej so' Diose a.

<sup>22</sup> Canicaj Jesucristó, ca'miij so' rihaan nij yuvij, cataj so' a:

—Aj rqué Réé 'unj Diose cunudanj rasuun rihanj á. Ne a 'ó síí ne ne'en daj vaa 'unj, maan se orún' Réj ne'en a. 'O se ta'níí so' mej adonj. Ne a 'ó síí ne ne'en daj vaa Réj ma'. Maan se orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'óo nij yuvij daj vaa Réj, ne quene'en yo'óo nij so' uún adonj —taj Jesucristó rihaan nij yuvij a.

<sup>23</sup> Gaa ne ni'yaj Jesucristó man nij síí tucu'yón se-nanā so', ne cataj so' rihaan inanj ma'an nij so' a:

—Vaa che'é gaa niha' rá soj che'é rihaan soj á. 'O se aj quene'en soj se vaa qui'yáj nanj á. <sup>24</sup> 'O se cataj xna'anj 'unj rihaan soj cuano se vaa man ndo'o síí man gaa naá síí nata' se-nanā Diose do', síí nicaj suun rey do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cunō nij so' se vaa cuno nij soj, tzaj ne ne cunō nij so' a man adonj —taj Jesucristó rihaan nij síí tucu'yón se-nanā so' a.

**Nanā nihánj me cuentó nanó Jesucristó che'é síí samaritano racuú man síí ran' chi'ij a**

<sup>25</sup> Gaa ne dan me se canicun' caya 'o síí naqui'yaj cuu se-tucuaj Moisés rihaan yuvij, ne xna'anj so' 'o nanā man Jesucristó, che'é rej guun rá so' qui' so' rej caraa so' cacun' xráá Jesucristó a.

—Daj qui'yáj, gaa ne ca'vee cayánj gā Diose nu' cavii nu' ca'anj, gā maestro' —taj so' rihaan Jesucristó a.

<sup>26</sup> Gaa ne cataj Jesucristó rihaan so' a:

—Ne'én so' me naná no rihaan yanj no se-tucuaj Mojisés na'. Daj taj yanj yo' nayaa so' ga —taj Jesucristó, xná'anj Jesucristó man so' a.

<sup>27</sup> Gaa ne cataj so' rihaan Jesucristó a:

—“Ndáa nimán yá so' guun rá so' ni'yaj so' man Diose sí 'nij ra'a man ní, ne ndáa nu' se nucuaj yá so' caraa cochroj rihaan Diose, ne yo' o ndáa cúu yave mán so' cuchuman rá ni'yaj man Diose nanj adonj.” Ne, “Adi' se 'ee rá so' man ma'án so' ro', danj gaa 'ee rá so' man tuvi' so' á”, taj se-tucuaj Mojisés adonj —taj sí naqui'yaj cuu se-tucuaj Mojisés yo' a.

<sup>28</sup> Gaa ne cataj Jesucristó rihaan so' a:

—Ya uxrá a'mii so' á. Danj qui'yáa so', gaa ne cayáan so' ga Diose nu' cavii nu' ca'anj nanj á —taj Jesucristó rihaan so' a.

<sup>29</sup> Tzaj ne sí sa' inanj me sí tucu'yón se-tucuaj Mojisés, rá ma'an so' a. Che'é dan xná'anj so' naná nihánj man Jesucristó a:

—Me sí me tuvi' 'unj ga —taj so' a.

<sup>30</sup> Gaa ne canicaj Jesucristó, nanó so' se-cuento sí samaritano a:

—Dan me se cavii 'o sí israelitá chuman' Jerusalén, ca'anj so' chuman' Jericó a. Vaj so' chrej, gaa ne caráan sí ituu man so' chrej, ne go' uxrá nij sí ituu man so', ne quirii nij sí ituu sagan' so', ne daj doj se cavi' so', gaa ne tanáj nij sí ituu man so' a. <sup>31</sup> Gaa ne dan me se vaj 'o xrej nicun' rihaan ní' sij israelitá chrej yo' a. Quene'en so' man sí quiran' chi'ii naj tu'va chrej, tzaj ne cachén yanj so' ca'anj so' a. <sup>32</sup> Gaa ne dan me se vaj 'o ta'ní ta'nij si'no Leví sí racuíj man xrej uún a. Quene'en so' man sí quiran' chi'ii yo', tzaj ne cachén yanj so' ca'anj so' uún a.

<sup>33</sup> “Gaa ne dan me se ca'na' 'o sí samaritano uún a. Nuveé sij israelitá me so' ma'. Sij yanj avii rej Samaria me so' a. Quene'en so' man sí quiran' chi'ii yo', gaa ne cunuu 'ee rá so' man sí quiran' chi'ii yo' a. <sup>34</sup> Ca'anj so' qui'yaj cono'ó so' man sí quiran' chi'ii yo', ne cuta' so' rmedió rej quiran' chi'ii, ne ncutáj so' mantá rej quiran' chi'ii yo' a. Gaa ne cuta' sí samaritano yo' man sí quiran' chi'ii yo' xráa daán so' xcuu vaj ga so', ne ca'anj roj so' ve' aran' yuvii chéé chrej, ne taj ya'anj sí samaritano yo' man sí quiran' chi'ii yo' a. <sup>35</sup> Cachén 'o yan', ne yo'ó güii me se guun rá sí samaritano ca'anj so', ne quirii so' vij sa'anj denario, ne caxrj so' ston sí tucua ve' se vaa taj ya'anj so' man sí ran', gaa ne cataj so' rihaan sí tucua: “Asa' ca'na' uún 'unj, ne naru'vee 'unj me daj ma'an sa'anj me gaa tu'vee so', rá so'”, taj sí samaritano rihaan sí tucua a. —Veé danj sij cuentó nanó Jesucristó rihaan sí naqui'yaj cuu se-tucuaj Mojisés yo' a.

<sup>36</sup> Gaa ne xná'anj Jesucristó naná nihánj man sí naqui'yaj cuu se-tucuaj Mojisés yo' a:

—Va'nuj nij sí vaj rá chrej yo', gaa ne me so' me tuvi' sí quiran' chi'ii yo', rá so' ga —taj Jesucristó, xná'anj Jesucristó man so' a.

<sup>37</sup> —Sí cunuu 'ee rá man so' ro', me tuvi' so', raj a —taj sí naqui'yaj cuu se-tucuaj Mojisés rihaan Jesucristó a.

Ne cataj uún Jesucristó rihaan so' a:

—Ase vaa qui'yaj sí cunuu 'ee rá man sí quiran' chi'ii yo' ro', veé danj qui'yaj guee so', ca'anj so' ei —taj Jesucristó rihaan sí naqui'yaj cuu se-tucuaj Mojisés yo' a.

### Naná nihánj taj xna'anj se vaa ca'anj Jesucristó tucua roj chu'vij Marta a

<sup>38</sup> Dan me se vaj Jesucristó chrej ga nij sí tucu'yón se-nana so', ne cuchi' so' 'o chuman', ne dan me se ca'vej rá 'o chana cu'naj Marta yanj chuman' yo' caran' Jesucristó tucua no', <sup>39</sup> ne yáan chu'vij no' chana cu'naj Mariá ga no', ne dan me se ca'anj cayáan chu'vij no' Mariá tacóo Jesucristó, ne nanó xrej no' se-nana so' a. <sup>40</sup> Tzaj ne Marta ro', daj a suun caraya'anj no' a. Dan me se quinichrun' Marta rihaan Jesucristó, ne cataj no' rihaan so' a:

—Me che'é ne rihuun rá so' se vaa dínj ne chu'vij 'unj, ne orún' ma'anj 'yaj chujii, ga Señor'. Cataj so' rihaan no' se vaa racuíj no' manj á —taj Marta rihaan Jesucristó a.

<sup>41</sup> Tzaj ne cataj Jesucristó rihaan no' a:

—Xa' che'é suun man rihaan chumii nihánj, tzaj ne taj che'é caraya'áan so' ndáa vaa 'yáa so', man Marta. Snúu rá so', 'yaj suun vaa rihaan so' á. 'O se taj che'é caraya'anj ní' rasuun man rihaan chumii nihánj ma'. <sup>42</sup> 'O se doj a vaa suun achiin qui'yaj ní', ne vaa orún' suun sa' ya ya achiin rihaan ní' nanj á. Ne Mariá nihánj, tzaj ne cunaj 'yaj no' se vaa me rá no' cunó no' se-nanaj, ne taj che'é cataj ní' se vaa nij 'yaj no' uno no' se-nanaj ma' —taj Jesucristó rihaan Marta a.

### Naná nihánj taj xna'anj daj ca'mii ní' gaa achiín ni'yaj ní' rihaan Diose a

**11** Gaa ne dan me se cachíin ni'yaj Jesucristó rihaan Diose 'o güii, ne gaa quisj cachíin ni'yaj so' rihaan Diose, gaa ne cataj 'o sí tucu'yón se-nana so' rihaan so' a:

—Tucu'yón so' man núj daj ca'mii núj gaa cachinj ni'yaj núj rihaan Diose, Señor. 'O se xa' sí cu'naj Juan sí cuta' ne man yuvii, tzaj ne tucu'yón so' rihaan nij sí tucu'yón se-nana so' daj ca'mii nij so' gaa cachinj ni'yaj nij so' rihaan Diose, ne danj inanj qui'yáa so' che'é núj, rá núj a —taj so' rihaan Jesucristó a.

<sup>2</sup> Gaa ne dan me se ca'mii Jesucristó naná nihánj rihaan nij so' a:

—Nanj cataj soj gaa cachinj ni'yaj soj rihaan Diose á: “Ataj Chij, me rá núj xcaj yuvii cuentá se vaa inanj sa' 'yáa so' a. Ne me rá núj quisj güii guun chij so' rihaan chumii nihánj a. <sup>3</sup> Ne 'o 'o güii me se rque so' nu' rasuun achiin man núj cha núj á. <sup>4</sup> Ne caraa x'naa so' che'é cacun' taj xráa núj á. 'O se ma'an núj me sí aráj x'naa che'é cacun' 'yaj tuvi' núj rihaan núj nanj adonj. Dan me se caráan ra'á so' xráa núj rihaan chrej chi'ii



á". Danj cataj soj gaa cachinj ni'yaj soj rihaan Diose ei —taj Jesucristó rihaan nij sí tucu'yón se-nanā so' a.

**Nanā nihánj taj xna'anj se vaa nō xcúún ní' cachinj ni'yaj ní' rihaan Diose che'é rasuun achiin man ní' a**

<sup>5</sup> Gaa ne canicaj Jesucristó, nanó so' 'o se-cuentó síí cachíin rasuun rihaan tuvi' rej nij a:

—Dan me se cataj ní', ne cuchí' 'o so' tucúá tuvi' so' yan', ne cataj so' rihaan tuvi' so': "Qui'yáá so' se ndo'o, ne racuíj so' va'núj chraa manj, tinuj. <sup>6</sup> Ca'na' 'o tuvij síí achén chrej, ne caran' so' tucuaaj, tzaj ne taj vaj chraa rihanj goj chá so' ma'", cataj so' rihaan tuvi' so' a. <sup>7</sup> Ne daj cataj tuvi' so' rihaan so', rá soj gā. Cataj tuvi' so': "Se narii so' nej rihanj, man tinuj. Aj naqui'yaj raan 'unj ta'yaa, ne aj otoj nij ta'nij núj, ne rmij naxagaj rquej chraa mán so' ei", cataj tuvi' so' rihaan so', rá soj na'. Daj chihāā mīj se ca'mii so' danj ma'. <sup>8</sup> Dan me se cataj xna'anj 'unj rihaan soj cuano se vaa síí otoj yo' ro', ndā se na'vej rá so' naxagaa so' go' so' chraa man tuvi' so', tzaj ne che'é se ne uun na'aj tuvi' so' achíin achíin so' chraa, ne che'é dan guun rmij xréé síí naj otoj, gaa ne naxagaa so', ne go' so' me ma'an rasuun achiin man síí nicun' ta'yaa yo' adonj.

<sup>9</sup> Ne 'unj nihánj me síí cataj xna'anj rihaan soj se vaa cachinj soj se vaa achiin man soj rihaan Diose, ne so' me síí rque man soj, ne nanō' soj rasuun achiin man soj, ne nari' soj rasuun yo', ne ase vaa 'yaj síí tica'mii ta'yaa tucúá tuvi' ro', danj qui'yaj soj gā Diose, ne ca'nuu Diose ta'yaa yo', ne rque Diose rasuun achiin man soj adonj. <sup>10</sup> 'O se síí achíin rasuun rihaan Diose ro', quirí' so' rasuun achiin man so', ne síí nano' rasuun achiin man ro', quirí' so' rasuun yo', ne síí tica'mii ta'yaa rej yanj Diose ro', ca'nuu Diose ta'yaa, ne quirí' síí tica'mii ta'yaa rasuun achiin man so' adonj. <sup>11</sup> Xcaj soj cuentá se vaa ma'an soj, nanj yuvií me soj, tzaj ne sese achíin ta'níí yo' o tuvi' soj chraa chá yo' man soj, ne se ca'vee nano' soj yahij ne caxrii soj ston yo' ma'. Ne sese achíin ta'níí soj nee xcuaj chá yo' man soj, ne se ca'vee nano' soj xcuáá ne caxrii soj ston yo' ma'. <sup>12</sup> Ne sese achíin ta'níí soj xrúú chuchee chá yo' man soj, ne se ca'vee nano' soj xcuun ne caxrii soj ston yo' ma'. <sup>13</sup> Dan me se danj nanj soj, ne síí chí'ij nimán me soj, tzaj ne ne'en soj rque soj se sa' chá ta'níí soj ei. Che'é dan táá a Rej soj síí nicun' xtā', ne sij sa' inanj me so', ne so' me síí rque ya Nimán man nij síí achíin Nimán Diose rihaan so' nanj adonj. —Danj cataj Jesucristó rihaan nij síí tucu'yón se-nanā so' a.

**Nanā nihánj taj xna'anj se vaa cuta' nij síí fariseo cacun' rmi' xráá Jesucristó se vaa ca'mii Jesucristó gā síí chree a**

<sup>14</sup> Dan me se 'o güii quirii Jesucristó yo' o nanā chree nimán 'o síí ya'mii, ne dan me se ya'mii so', qui'yaj nanā chree yo', tzaj ne curihanj nanā chree nimán so', ne guun che'e so' ca'mii so' adonj. Ne caráya'anj uxrā nij yuvií quene'en nij so' se vaa qui'yaj Jesucristó, <sup>15</sup> ne ta'aj nij yuvií cataj se vaa a'mii Jesucristó gā síí chree

cu'naj Beelzebú síí uun chij rihaan nij nanā chree, ne che'é dan rii so' man nij nanā chree nimán yuvií, taj ta'aj nij yuvií, ni'yaj nij yuvií man Jesucristó a. <sup>16</sup> Ne yo' o ta'aj nij yuvií guun rá cutā' cacun' xráá Jesucristó, ne che'é dan cachíin ni'yaj nij so' rihaan Jesucristó se vaa qui'yaj so' 'o suun sa' nocō 'na' rej xtā' ni'yaj nij so', taj nij so' a. <sup>17</sup> Dan me se quene'en ma'an Jesucristó daj vaa nimán nij yuvií, ne che'é dan cataj so':

—Ne'en soj se vaa sese vaa 'o nación, ne sese xra' ta'aj nij síí uun chij rihaan nación yo' ne cunū' ma'an nij so' gā tuvi' nij so', ne vaa güii, ne nu' nación yo' quirí' nu' nanj adonj. Ne sese cunū' ta'aj nij yuvií man 'o barrió gā tuvi' yuvií síí man ma'an barrió yo' ro', ne vaa güii, ne quirí' nu' barrió yo', qui'yaj nij so' nanj adonj. <sup>18</sup> Che'é dan me sese racuíj síí chree síí cu'naj Satanás manj rii 'unj man tuvi' so' nanā chree nimán nij yuvií, gaa ne asa' ca'vee guun chij ndo'o so' rihaan nij yuvií man rihaan chumii nihánj, rá soj gā. Nanā nihánj xná'anj 'unj man soj che'é se me rá soj cataj soj se vaa síí chree cu'naj Beelzebú ro', me síí racuíj manj rij man nanā chree nimán nij yuvií, rá soj vaa nanj á. <sup>19</sup> Dan me se rii 'unj man nij nanā chree nimán nij yuvií, 'yaj síí chree cu'naj Beelzebú, che'é se a'mii 'unj gā so', rá soj a. Tzaj ne nij síí tucu'yón se-nanā soj me se veé danj rii uún nij so' man nij nanā chree nimán nij yuvií uún ei. Ne asa' a'vee 'yaj nij so' danj, rá soj gā. Ne vaa nij so' vaa, veé danj a'mii nij so' gā síí chree, rá soj gā na'. Che'é nanā ca'mii soj me se ma'an nij síí tucu'yón se-nanā soj cutā' cacun' xráá soj se vaa ca'mii ne soj adonj. <sup>20</sup> Tzaj ne 'unj me se ya' ma'an ra'a Diose racuíj manj rii 'unj man nij nanā chree nimán nij yuvií adonj. Che'é dan xcaj soj cuentá se vaa aj guun che'e Diose guun chij Diose rihaan chumii nihánj adonj.

<sup>21</sup> "Dan me se sese 'o síí ru'vee yanj rá ve' me se vaa aga' sihaā do', vaa mixté do', rihaan so', ne tumé so' si'yaj so' yáán so', ne taj síí ca'neē si'yaj so' ma'. <sup>22</sup> Tzaj ne sese ca'na' yo' o síí vaa doj fuerzá rihaan, gaa ne qui'yaj canaán so' rihaan síí yanj raan, gaa ne ca'neē so' nu' saga' so' do', nu' si'yaj so' do', ne cuxra' ta'aj so' gā tuvi' so' nanj adonj. Ta'nga' danj 'yáá 'unj gā síí chree, ne 'yaj canaán 'unj man so' adonj.

<sup>23</sup> Naj guun síí na'vej rá qui'yaj suun gā 'unj ro', síí taj ri'yunj manj me so' a. Ne naj guun síí ne racuíj manj naqui'yaj chre' 'unj man yuvií canocō' man Diose ro', so' me síí ticha'nuu man nij yuvií, ne aráán so' rihaan nij yuvií se canoco' nij yuvií man Diose ei —taj Jesucristó rihaan nij yuvií a.

**Nanā nihánj taj xna'anj daj 'yaj nanā chree gā anicaj uún nanā chree nimán yuvií a**

<sup>24</sup> Gaa ne cataj uún Jesucristó rihaan nij yuvií a:

—Ne gaa tihāj avii yuun yo' o nanā chree nimán snó'o, ne chéé rma'an nanā chree yo' nano' so' rej cayáán so', tzaj ne taj se qui'yá' quirí' nanā chree yo' rej cayáán so', gaa ne me rá uún nanā chree yo' canicaj so' rej cavii so' gaa naá a. Dan me se taj nanā chree yo': "Canicaj uún 'unj nán' 'unj rej cavii 'unj a. Ve'é nanj vaa tucuaaj, ne naruvii rá ve' tucuaaj cuano, ne uun yāj

yanj rá ve' tucuj cuano adonj', taj nana chree yo' a.  
<sup>26</sup> Gaa ne dan me se anicaj uun nana chree yo' nimán snó'o yo', ne nano' nana chree yo' yo'ó hiji tuvi' nana chree yo' síi chi'ii doj, ne 'na' nique uun so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún' nana chree yo', gaa ne maan ta'nga' quij vaa nimán snó'o yo', tzaj gaa namán yo'ó hiji nana chree yo', gaa ne doj a tico nana chree man so', ne doj a quij vaa nimán snó'o yo', 'yaj nana chree yo' a adonj —taj Jesucristó rihaan nij yuvii a.

**Nana nihánj taj xna'anj me síi me nij síi cavii sa' ga Diose a**

<sup>27</sup> Dan me se gaa ca'mii Jesucristó nana vaa danj, gaa ne nucuaj ca'mii 'o chana nicun' sca'núj nij yuvii, cataj no':

—Cavii sa' níi so', che'é se cuchruj no' mán so', ne tutzii no' mán so' á —taj chana yo', caguáj no' rihaan Jesucristó a.

<sup>28</sup> Tzaj ne cataj Jesucristó a:

—Síi cavii sa' ya ro', me síi uno se-nana Diose ne 'yaj ndaa vaa taj nu' nana yo' adonj —taj Jesucristó rihaan nij yuvii yo' a.

**Nana nihánj taj xna'anj me suun sa' nocoo me qui'yaj Jesucristó, yan guun ya rá nij yuvii se vaa ya vaa nana ca'mii so' a**

<sup>29</sup> Dan me se cunuu chre' doj yuvii rihaan Jesucristó, ne che'é dan guun che'e so' ca'mii so' nana nihánj a:

—Inanj che'é se yuvii vaa chi'ii nimán me soj ro', che'é dan me rá soj qui'yaj suun sa' nocoo á. Tzaj ne se qui'yaj suun sa' nocoo che'é soj ma'. Maan se quene'en soj se vaa ase vaa quiran' síi cu'naj Jonás gaa naá ro', danj quirán' 'unj, vaa güii nanj á. <sup>30</sup> Dan me se qui'yaj Diose suun sa' nocoo ga síi cu'naj Jonás quene'en nij síi man chuman' Nínive gaa naá, ne danj inanj qui'yaj uun Diose ga 'unj sij ca'née so' nicaj yu'unj man yuvii, quene'en soj adonj.

<sup>31</sup> "Ne güii ca'ne' Diose cacun' che'é yuvii ro', cuchii chana nicaj suun reiná guun hiji rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cuta' no' cacun' xraá soj adonj. 'O se gan' ndo'o cachéé no' cuchii' no' rihaan síi cu'naj Salomón, ne cuno no' nana cuu tucu'yón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Salomón yo' adonj. Tzaj ne na'vej rá soj cunoo soj nana a'mii 'unj rihaan soj a man adonj. <sup>32</sup> Ne nij síi man chuman' Nínive ro', canicun' nij so' ga ma'an soj sij vaa i'na' rihaan chumii nihánj cuano asa' quisij güii ca'ne' Diose cacun' che'é yuvii, ne cuta' nij síi man chuman' Nínive yo' cacun' xraá soj adonj. Cuno nij so' nana ca'mii natáj síi cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Jonás

yo', tzaj ne taj se qui'yá' naqui'yaj sa' soj nimán soj ma' —taj Jesucristó rihaan nij yuvii yo' a.

**Nana nihánj taj xna'anj se vaa no xcuún ní' xcaxi ní' cuentá daj qui'yaj ní' a**

<sup>33</sup> Ne cataj uun Jesucristó rihaan nij so' a:

—Gaa rmi', ne a 'ó yuvii ne uta' ya'an raá aga' ya'an ne axrij yuve nij so' rque 'o chrúun ma'. Sese rmi', ne achrón nii ya'an raá aga' ya'an ne uta' nii aga' yo' rej xta', ne daj a nij yuvii atúj rá ve' ro', chuguun ni'yaj nij so' adonj.

<sup>34</sup> "Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne uun sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', danj chuguun man ní' gaa sa' rihaan ní' adonj. Tzaj ne sese rlij rihaan ní' ro', ni'yaj yo' ne inanj uun chi'ii rá yo', gaa ne nu' nee man ní' ro', uun chi'ii rá, gaa ne adi' síi nicun' yan rmi' ne cunudanj man so' ro', rmi', ne danj vaa síi uun chi'ii rá adonj. <sup>35</sup> Xcaxi ndo'o soj cuentá se gaa nanj quina'aj ya'an nicaj yu'unj man soj ne guun soj 'o se rmi' a.

<sup>36</sup> Dan me se sese cunudanj man ní' nuu ya'an, gaa ne taj a doj se rmi' nuu man ní', gaa ne cunudanj man ní' ro', chuguun, ne adi' gaa o' cachun' ya'an xraá nii ne chuguun nu' man nii ro', danj vaa ní' adonj —taj Jesucristó rihaan nij yuvii yo' a.

**Nana nihánj taj xna'anj che'é cacun' tumé nij síi fariseo a**

<sup>37</sup> Dan me se gaa ca'mii Jesucristó rihaan nij yuvii, ne canacúun 'o síi fariseo man so' cha so' chraa tucua síi fariseo yo', gaa ne dan me se ca'anj cayáán roj so' rihaan mesá a. <sup>38</sup> Dan me se xcaxi síi fariseo yo' cuentá se vaa ne noco' Jesucristó se-tucuanj nij síi fariseo se vaa ne na'ya' so' gaa cha so' chraa, gaa ne caraya'anj ndo'o síi fariseo yo' a. <sup>39</sup> Che'é dan cataj síi 'nij ra'a man ní' rihaan so':

—Xa' soj sij fariseo, tzaj ne ase vaa rasuun, ne sa' uxrá na'nu' nii xraá yo', tzaj ne rque yo' ro', me se vaa nacaj guee yo', ta'nga' danj vaa guee soj, ne xraá soj me se ve'é naruvii, tzaj ne nimán soj me quij vaa, ne niha' uxrá rá soj ca'ne' soj si'yaj tuvi' soj, ne noco' ndo'o soj chrej chi'ii adonj. <sup>40</sup> Nuveé sij acaxi cuentá me soj a ma'. Ne'en soj se vaa Diose ro', me síi qui'yaj ra'a soj, ne na'ya' ndo'o soj, ne veé so' me síi qui'yaj nimán soj uun a. <sup>41</sup> Dan me se go' soj ta'aj se chá do', ta'aj sa'anj do', man nij síi nique, gaa ne xcaxi soj cuentá se vaa síi sa' nimán me soj adonj.

<sup>42</sup> "Tzaj ne nique soj sij fariseo nanj á. 'O se quiran' uxrá soj sayuun nanj adonj. 'O se sese vaa nuu xlá do', coj ruda do', me ma'an cuêj do', rihaan soj, ne rque soj 'o nánj rasuun yo' rihaan Diose che'é 'o 'o chi' nánj rasuun vaa rihaan soj nanj á. Tzaj ne ne a'ne' nica soj cacun' che'é tuvi' soj ma'. Ne aráj cochroj soj rihaan Diose ma'. Tzaj ne me rá Diose qui'yaj soj nu' nana nocoo nihánj, ne na'vej rá Diose tanáj xcaxi soj yo'ó nana le'ej doj yo' a ma'.

<sup>43</sup> "Niquej soj sij fariseo nanj á. Quiran' uxrá nij soj sayuun adonj. 'O se niha' rá soj quitaj soj chruun xlá sa' doj nicun' rá ve' tucu'yón ní se-tucuaj Moisés, ne niha' rá soj caraya'anj yuvi man soj gaa chée soj yu'vee a.

<sup>44</sup> "Niquej soj che'é sayuun quiran' soj á. Ne ase vaa chraan naj xngá rihaan santó ro', vaa soj, ne xráá soj ro', vaa catzii, tzaj ne nimán soj me se adi' se vaa cúu ri'yuj ro', vaa nimán soj adonj. Ne vaa chraan naj xngá rihaan santó, ne xráá yo' me se sa' uxrá vaa yo', ne rque yo' me se cúu ri'yuj inanj man rque yo', ne nij yuvi me se chée nij yuvi yo' xráá chraan, ne taj nij so' se vaa sa' ndo'o vaa chraan yo', taj nij so', tzaj ne ne ne'en nij so' se vaa inanj cúu ri'yuj man rque yo' a man adonj. Ta'nga' danj vaa guej soj adonj —taj Jesucristó rihaan nij sí fariseo yo' a.

**Nana nihánj taj xna'anj che'é cacun' tumé nij sí naqui'yaj cuu se-tucuaj Moisés rihaan yuvi a**

<sup>45</sup> Gaa ne ca'mii 'o sí naqui'yaj cuu se-tucuaj Moisés rihaan yuvi, ne cataj so' rihaan Jesucristó a:

—Tzaj ne nachri' so' ni'yaj so' man ma'an núj gaa a'mii so' nana vaa danj á —taj so' rihaan Jesucristó a.

<sup>46</sup> Gaa ne cataj Jesucristó rihaan so' a:

—Ne niquej ma'an soj sij naqui'yaj cuu se-tucuaj Moisés rihaan yuvi a. Ma'an soj uún quiran' uxrá sayuun nanj adonj. 'O se a'ne' uxrá soj suun rihaan yuvi daj qui'yaj nij yuvi canoco' nij yuvi man Diose, tzaj ne dan me se ase vaa yuvi araa ndo'o rasuun 'ee xráá tuvi' vaa nij soj, ne a doj ne racu'ij soj man yuvi cataj yuvi rasuun 'ee yo' a ma'. A 'ó raá ra'a nij soj ne racu'ij soj man yuvi a man adonj.

<sup>47</sup> "Niquej soj che'é sayuun quiran' soj a. Ve'é une' soj chraan yan naj cúu man nij sí nata' se-nana Diose gaa naá, tzaj ne ma'an xij soj ro', me sí ticavi' man nij so' adonj. <sup>48</sup> Dan me se che'é se ne'en ní' se vaa 'yaj ma'an soj, ne che'é dan xcaj ní' cuentá se vaa 'o vaa rá soj ga xij soj sí man gaa naá, ne cuyaaj 'yaj soj ga xij soj adonj. Dan me se nij so' ro', ticavi' man nij sí nata' se-nana Diose, ne soj ro', une' chraan yan naj cúu man nij so' adonj.

<sup>49</sup> "Che'é dan cavii 'o nana cuu raá Diose, cataj Diose: "Xa' yuvi nihánj, tzaj ne ca'nej 'unj sí nata' se-nana rihaan nij so' a. Dan me se ticavi' nij so' man ta'aj nij sí ca'nej 'unj, ne yo'ó ta'aj nij so' me se me rej ma'an vaj nij so', ne quitaj ri'yunj uxrá nij so' man nij sí ca'nej a.

<sup>50</sup> Ndaa síj, gaa ne nu' ton cayanj man nij sí nata' se-nana Diose asij gaa guun che'e chumi ro', nu' cacun' yo' ro', nata' xráá nij so' a. <sup>51</sup> Dan me se asij ton cayanj man sí cu'naj Abel ne ndaa ton cayanj man sí cu'naj Zacarías gaa cavi' so' rihaan nuví yan nicun' mesá altar xij ro', nu' cacun' yo' ro', nata' xráá nij so' a", taj Diose a. Dan me se cataj xna'anj 'unj rihaan soj cuano se vaa quiran' ma'an nij tuvi' nij soj sayuun che'é nu' cacun' yo' adonj.

<sup>52</sup> "Niquej soj sij naqui'yaj cuu se-tucuaj Moisés rihaan yuvi a. Quiran' uxrá soj sayuun adonj. Taj se qui'yá' xcaj yuvi cuentá, 'yaj soj ma'. Dan me se ma'an

soj ro', na'vej rá catuu se-tucuaj Diose, ne nij sí me rá catuu me se aráan soj chrej rihaan nij so', ne na'vej rá soj catuu nij so' a man adonj —taj Jesucristó rihaan nij sí naqui'yaj cuu se-tucuaj Moisés rihaan yuvi a.

<sup>53</sup> Dan me se curihanj Jesucristó ve' yo', ne guun che'e nij sí naqui'yaj cuu se-tucuaj Moisés do', nij sí fariseo do', táá ri'yunj uxrá nij so' man Jesucristó, ne guun che'e nij so' xna'anj nij so' man so' che'é que'ee rasuun a. <sup>54</sup> Dan me se nanó xrej uxrá nij so' nana ca'mii Jesucristó che'é rej guun ndo'o rá nij so' cuta' nij so' cacun' xráá Jesucristó che'é nana tu'va so' a.

**Nana nihánj taj xna'anj se vaa ne ca'vej rá Jesucristó qui'yaj nij sí tucu'yón se-nana so' ndaa vaa qui'yaj nij sí fariseo a**

**12** Dan me se cunuu chre' uxrá yuvi rej vaj Jesucristó, ne uxrá chruj nij so', ne ndaa tigu'ij tuvi ma'an nij so' a.

Gaa ne guun che'e Jesucristó ca'mii so' asino yaan ga nij sí tucu'yón se-nana so', cataj so':

—Cutumé soj man soj se gaa nanj quiran' soj sayuun, qui'yaj se-levadura nij sí fariseo á. Dan me se taj nij so', ne inanj nana sa' a'mii nij so', taj nij so', tzaj ne taj ma'. Tu'va rma'an nij so' nanj adonj. Nuveé nana sa' a'mii nij so' ma'. Inanj nana nucui' rá a'mii nij so' nanj adonj. <sup>2</sup> Tzaj ne dan me se nu' nana ca'mii yuve nij so' do', nu' rasuun 'yaj yuve nij so' do', nu' yo' ro', nurihanj quene'en cunudanj yuvi vaa güii adonj.

<sup>3</sup> Che'é dan nu' nana ca'mii soj rej rmi' ro', vaa güii nurihanj yo' rej chuguun, ne nu' nana ca'mii soj xréé tuvi' soj rej rá ve', ne nurihanj yo' vaa güii ndaa patio rihaan ve' adonj —taj Jesucristó rihaan nij so' a.

**Nana nihánj taj xna'anj se vaa se cuchu'vi' ní quene'en ní yuvi ma'**

<sup>4</sup> Gaa ne cataj uún Jesucristó a:

—Dan me se tuvi' 'unj me soj, ne che'é dan cataj xna'anj 'unj rihaan soj se vaa se cuchu'vi' soj quene'en soj nij sí ticavi' man nee man soj ma'. 'O se asa' qui'yaj nij so' danj, gaa ne taj vaj doj se chi'ii qui'yaj nij so' man soj a ma'. <sup>5</sup> Tzaj ne nihánj me se cataj xna'anj 'unj rihaan soj me sí cuchu'vi' soj ni'yaj soj man a. Dan me se vaa che'é cuchu'vi' soj ni'yaj soj Diose adonj. Asa' quisíj ticavi' nii man soj, gaa ne so' me sí ca'nej man soj rihaan ya'an cacaa soj sese tumé soj cacun' adonj. Che'é dan taj 'unj rihaan soj se vaa vaa che'é cuchu'vi' soj ni'yaj soj man so' adonj.

<sup>6</sup> "Ne'en soj daj vaa nij xtâj chrin' se vaa 'un' ya xo' nó chi' guej cha'aa a. Tzaj ne taj ya'anj uxrá Diose man 'o 'o nij xo' a. <sup>7</sup> Ne Diose me se vaa cuentá yuvé raá soj 'yaj so', ne ne'en so' me daj yuvé raá soj, ne che'é dan se cuchu'vi' soj che'é sayuun qui'yaj yuvi man soj ma'. 'O se uxrá vaa yu'vee doj nó soj rihaan xtâj chrin' yo', 'yaj Diose adonj. <sup>8</sup> Ne cataj xna'anj 'unj rihaan soj cuano se vaa no' xcúun soj nata' ya soj rihaan yuvi se vaa me soj sí nocó' manj, ne nu' sí 'yaj danj ro', vaa güii, ne 'unj sij ca'neé Diose nicaj yu'unj man yuvi ro',

nataj rihaan nij se-mozó Dioso se vaa sij noco' manj me so' a. <sup>9</sup> Ne sí taj xna'anj rihaan yuvij se vaa nuveé sij noco' manj me so' ro', vaa güii, ne cataj xna'anj yá 'unj rihaan nij se-mozó Réé 'unj se vaa nuveé sij noco' manj me so' a ma'.

<sup>10</sup> "Dan me se 'unj sij ca'née Dioso nicaj yu'unj man yuvij ro', ca'vee se ca'mii yo'o so' naná chi'ij che'ej, ne ca'vee navij cacun' xráa so' qui'yaj Dioso, tzaj ne sese ca'mii chi'ij yo'o so' che'é Nimán Dioso, ne daj chihaa mǐj se tinavij Dioso cacun' yo' xráa so' a ma'.

<sup>11</sup> "Dan me se asa' tucuatúj nii man soj rá ve' tu-cu'yón ní' sij israelitá se-tucuanj Moisés ne canicun' soj rihaan nij sí' uun chij, ne se nanó rá soj daj ca'mii soj che'é soj rihaan nij so' ma'. <sup>12</sup> 'O se orá yo' ro', ma'an Nimán Dioso ro', tucuyón man soj daj ca'mii soj rihaan nij so' adonj —taj Jesucristó rihaan nij sí' tu-cu'yón se-naná so' a.

### Nihánj me cuentó nanó Jesucristó che'é 'o sí' ru'vee caraa sa' que'ee rasuyun rihaan chumii nihánj a

<sup>13</sup> Dan me se cataj yo'o tuvi' nij yuvij yo' rihaan Jesucristó a:

—Cataj so' rihaan tinúu 'unj, ne cuxra' ta'aj so' yo'óo do', rasuyun do', gaj, maestro —taj so' rihaan Jesucristó a.

<sup>14</sup> Gaa ne:

—Me che'é guun rá so' se vaa guún 'unj sí' a'ne' cacun' che'é soj ga. Me che'é ca'mii 'unj che'é rasuyun vaa rihaan roj tinuj soj, rá so', ga tinu' —taj Jesucristó rihaan so' a.

<sup>15</sup> Gaa ne cataj Jesucristó rihaan nij yuvij a:

—Tumé uxrá soj man soj rihaan nij rasuyun xcoj ruvaa rá a. Nuveé rasuyun man rihaan ní' qui'yaj cavij sa' nimán ní' ma' —taj Jesucristó rihaan nij yuvij a.

<sup>16</sup> Gaa ne dan me se nanó Jesucristó 'o se-cuento 'o sí' ru'vee rihaan nij yuvij a:

—'O sí' ru'vee me 'o so', ne cavii ndo'o xnaa so', ne man ndo'o rasuyun rihaan so', <sup>17</sup> ne dan me se taj so': "A me se qui'yaj ga rasuyun man rihanj ne taj rej caraj man rasuyun yo' ga", taj so' a. <sup>18</sup> Gaa ne: "Aan a. Aj ne'enj me se qui'yaj á. Tucuanee 'unj man nij cuchruu nii, ne qui'yaj doj ve' xij, ne yo'o caraa chre' 'unj man nij rasuyun, ne tinavii 'unj man nij yo' rá nij ve', <sup>19</sup> gaa ne cataj 'unj rihaan nimanj se vaa man ndo'o rasuyun rihaan ní' chá ní', ne se nanó rá ní', maan se ve'é chá ní' do', ve'é co'o ní' do', ve'é cayáán ní' do', ve'é cotoj ní' do' a. Daj cataj rihaan nimanj che'é nij rasuyun cumán rihanj", taj so' a. <sup>20</sup> Tzaj ne Dioso ca'mii rihaan so', cataj Dioso: "Sí' ni'yón mé so' á. 'O se nii corá me se caví' so', ne xa' rasuyun caraa sa' so', tzaj ne me se guun yo' rihaan so', rá so' ga", taj Dioso rihaan ru'vee yo' a. <sup>21</sup> Daj quiran' sí' araa sa' rasuyun che'é ma'an daj, ne taj vaj a doj rasuyun sa' nicaj so', ni'yaj Dioso a ma' —taj Jesucristó rihaan nij yuvij a.

### Naná nihánj taj xna'anj se vaa ne nó xcúun ní' nano ndo'o rá ní' che'é se chá ní' do', che'é yatzij cunuú ní' do' a

<sup>22</sup> Gaa ne cataj Jesucristó rihaan nij sí' tucu'yón se-naná so' a:

—Che'é dan cataj xna'anj 'unj rihaan soj se vaa taj che'é nano ndo'o rá soj che'é soj ma'. Ne che'é se chá soj do', ne che'é yan quiri' soj se caráán xráa soj se nanó rá soj ma'. <sup>23</sup> Aj ne'en soj se vaa aj vaa i'na' soj, qui'yaj Dioso, ne se guun nucuaj Dioso rque Dioso chá soj, rá soj gaa a na'. Daj chihaa mǐj se guun danj rá soj ma'. Ne Dioso me sí' ca'vee rque se chá soj ei. Ne Dioso me sí' qui'yaj nee man soj, ne se guun nucuaj Dioso rque Dioso yatzij caráán xráa soj, rá soj gaa a na'. Daj chihaa mǐj se guun danj rá soj ma'. Ne Dioso me sí' ca'vee rque se caráán xráa soj ei.

<sup>24</sup> "Xcaj soj cuentá daj 'yaj nij xcaa, ne ne unô nij xo' 'núu, ne ne rii nij xo' naa, ne taj se-cuchruu nij xo', tzaj ne Dioso ro', rque se chá nij xo' adonj. Ne sa' doj vaa soj rihaan xcaa ni'yaj Dioso adonj. Ya sa' doj vaa soj chuguanj. <sup>25</sup> Ne nda' se nanó ndo'o rá soj che'é yan chre' vaa soj, tzaj ne a 'ó xco' se guun nucuaj soj cachij xcaan soj doj qui'yaj ma'an soj ma'. Maan se Dioso ro', me sí' ne'en daj gaa cachij soj, ne che'é dan taj che'é nano rá soj a ma'. <sup>26</sup> Dan me se sese se ca'vee qui'yaj soj rasuyun le'ej doj, ne asa' ca'vee qui'yaj soj rasuyun nocoo doj, rá soj ga. Che'é dan taj che'é nano ndo'o rá soj che'é nij rasuyun nocoo doj a ma'.

<sup>27</sup> "O se xcaj soj cuentá ni'yaj soj nij yâj se vaa ve'é ndo'o vaa nij yâj a. Ne 'yaj suun nij yâj, tzaj ne ma'an Dioso ro', me sí' sa' ndo'o vaa qui'yaj man nij yâj adonj. Ne ne rii nij yâj yu'vej ma'. Tzaj ne adi' se vaa sí' rii yu'vej ne sa' uxrá vaa sagan' so' ro', vaa nij yatzij nuu nij yâj adonj. Dan me se cataj xna'anj 'unj rihaan soj se vaa sí' cu'naj Salomón sí' cane gaa naá, ne ve'é uxrá vaa yatzij nuu so', qui'yaj cunudanj sa'anj vaa rihaan so', tzaj ne nij doj vaa yatzij nuu so' rihaan nij yâj man tacaan yo', qui'yaj Dioso adonj. <sup>28</sup> Dan me se danj nanj nij yâj man tacaan yo', tzaj ne sa' uxrá vaa nij yatzij nuu nij yâj yo', 'yaj Dioso, tzaj ne a'yuj ca'ne' nii man nu' coj do', yâj do', ne caraa nii man yo' rihaan ya'an, ne cacaa nu' nij yâj yo' nanj adonj. Ne a doj yu'vee taj nó yâj yo' a ma'. Táa a soj yuvij, ne se nanó rá soj ma'. Dioso me sí' rque sagan' soj adonj. Tzaj ne ne guun ya sa' rá soj se vaa Dioso me sí' racuúj ya man soj man adonj.

<sup>29</sup> "Ne xa' soj, tzaj ne se nano' ndo'o soj se chá soj do', se co'o soj do' ma'. Ne se nanó ndo'o rá soj che'é nij yo' ma'. <sup>30</sup> 'O se nij sí' man rihaan chumii nihánj sí' ne ne'en daj vaa Dioso ro', inanj 'yaj suun ndo'o nij so' che'é rasuyun man rihaan chumii nihánj adonj. Tzaj ne nu' rasuyun achiin man soj ro', aj ne'en Rej soj Dioso se vaa achiin rasuyun yo' man soj adonj. <sup>31</sup> Tzaj ne nano' soj rej daj qui'yaj soj, ne guun chij Dioso nimán soj, gaa ne rque Dioso rasuyun yo' rihaan soj adonj.

<sup>32</sup> "Se chucu'vi' soj ma'. Ase vaa daán Dioso matzinj vaa soj, ne Dioso tumé man soj, ne aj guun rá Rej soj

Diose se vaa guun chij soj rihaan chumii nihánj gá so' vaa güii a.

<sup>33</sup> "Cutu'vee soj si'yaj soj, ne go' soj sa'anj man nij sí nique á. Gaa ne vaa güii quirí' soj 'o nanj caraa nu' sa'anj rque, ne xa' nanj yo', tzaj ne daj chihaa míj se xtuu nanj yo', ne xa' sa'anj yo', tzaj ne daj chihaa míj se navij sa'anj yo' a. Yo' me se quirí' soj rej xtá', ne rej xtá' ro', taj vaj sí ituu ma'. Ne taj vaj xluú chá rasuun ma'. <sup>34</sup> Ne sese inanj che'é rasuun man rihaan chumii nihánj qui'yaj suun soj, gaa ne veé maan rihaan chumii nihánj quinaj nimán soj gaa nanj adonj. Ne sese inanj che'é rasuun man xtá' ro', qui'yaj suun soj, gaa ne veé rej xtá' ro', ca'anj nimán soj nanj adonj. Me rej ma'an araa soj rasuun, ne veé rej danj vaj nimán soj nanj adonj —taj Jesucristó rihaan nij sí tucu'yón se-nanā so' a.

### Nihánj me cuentó nanó Jesucristó che'é mozó na'vij namān ru'vee a

<sup>35</sup> Ne cataj uún Jesucristó rihaan nij so' a:

—Ase vaa sí 'nij raan nuj catuun ro', danj gaa soj ei. Ase vaa sí nicaj aga' chuguun aco' ya'an ro', danj gaa soj ei. <sup>36</sup> Dan me se qui'yaj soj ndaa vaa 'yaj mozó na'vij so' namān se-ru'vee so' gaa ca'anj se-ru'vee so' cha'anj nara'aa ei. Dan me se asa' namán ru'vee ne nu' tara'a so' ta'yaa, ne nu' ca'nuy mozó yo' ta'yaa, gaa ne guun niha' rá se-ru'vee mozó yo' adonj. <sup>37</sup> Ne cavii sa' uxrá nij mozó 'yaj danj, che'é se ne cotoj nij so' gaa namán se-ru'vee nij so' a. Dan me se quene'en ya so' se vaa ne cotoj nij so' ma'. Cataj yá 'unj rihaan soj cuano se vaa ma'an ru'vee yo' ro', naqui'yaj sa' so' man so', cayáán se-mozó so' rihaan mesá, qui'yaj so', ne qui'yaj chuvii ma'an so' chá nij se-mozó so' adonj. <sup>38</sup> Dan me se ca'vee se rej yan' namān so' ni', ca'vee se rej taxrej namān so' ni', tzaj ne aj ne'en so' se vaa ve'é inanj na'vij nij mozó yo' man so', ne cavii sa' uxrá nij mozó yo' adonj. Che'é dan qui'yaj soj ndaa vaa 'yaj nij mozó yo' ei. <sup>39</sup> Dan me se sese 'o sí tucua ve' ro', aj ne'en so' me orá ca'nā' sí ituu ne qui'yaj ituu sí ituu rasuun man tucua so', ne uxrá cutumé so' tucua so', ne se qui'yaj ituu sí ituu tucua so' tzaj ma'. Maan se ne ne'en so' me orá ca'nā' sí ituu man adonj. <sup>40</sup> Dan me se ta'nga' danj vaa guee 'unj sij nicaj yu'unj man yuvii, ne ne'en soj me orá ca'nā' uún 'unj man adonj. Che'é dan yo'o ni'yaj soj á —taj Jesucristó rihaan nij sí tucu'yón se-nanā so' a.

### Nanā nihánj taj xna'anj daj quirān' sí ve'é 'yaj suun rihaan Diōse do', daj quirān' sí ne 'yaj suun sa' rihaan Diōse do' a

<sup>41</sup> Gaa ne xná'anj sí cu'naj Pedró man Jesucristó, cataj so' a:

—Señor. Che'é ma'an nuj me nanó so' cuentó yo' na'. Ase che'é cunudanj yuvii xa' —taj Pedró, xná'anj so' man Jesucristó a.

<sup>42</sup> Gaa ne cataj sí 'nij ra'a man ní' a:

—Che'é dan me sese cune' sí tucua yo'o ve' man yo'o se-mozó so' se vaa cutumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj mozó yo', rá soj gá. Sese ya ya sij ve'é 'yaj suun me so' do', sese ya ya sij avii raá me so' do', ne daj qui'yaj so', rá soj gá. <sup>43</sup> Gaa ne güii namān se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavii sa' uxrá mozó yo', qui'yaj se-ru'vee mozó yo' adonj. <sup>44</sup> Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' sí tumé man cunudanj si'yaj ru'vee yo' a. <sup>45</sup> Tzaj ne sese guun rá mozó yo' se vaa guun raan ndo'o se-ru'vee so', gaa ne guun che'e so' go' so' man yo'ó nij mozó do', man nij mozó chana do', ne chá so' co'o so' ne guun xno so' a. <sup>46</sup> Dan me se ne ne'en so' aman namān se-ru'vee so' a. Ne na'vij so' ca'nā' ru'vee a. Tzaj ne síj güii síj orá síj, ne ca'nā' ma'an se-ru'vee mozó yo', gaa ne ca'ne' nu' so' man mozó yo', ne cataj so' se vaa ca'anj mozó yo' rihaan ya'an gá yo'ó nij sí ne amán rá ni'yaj man Diōse a.

<sup>47</sup> "Dan me se xa' mozó ne'en daj me rá se-ru'vee so' qui'yaj so', tzaj ne sese se qui'yaj so' danj, ne qui'yaj so' inanj se vaa rii nimán ma'an so' qui'yaj so', ne cayuun uxrá so' vaa güii adonj. <sup>48</sup> Ne xa' sí ne ne'en daj me rá se-ru'vee so' qui'yaj so', ne qui'yaj so' rasuun na'vej rá se-ru'vee so' qui'yaj so', tzaj ne maan che'é se ne ne'en so' ne qui'yaj so' rasuun chi'ii ro', maan che'é dan doj cayuun so' adonj.

"Ne sí atā suun nocoo doj 'yaj Diōse ro', doj a guun rá Diōse qui'yaj suun so' a. Ne sí tumé doj rasuun che'é Diōse ro', doj a gaa rasuun nachin' Diōse rihaan so' nanj adonj —taj Jesucristó rihaan nij sí tucu'yón se-nanā so' a.

### Nanā nihánj taj xna'anj se vaa cunū' ndo'o yuvii gá tuvi' yuvii che'é Jesucristó a

<sup>49</sup> Gaa ne cataj uún Jesucristó a:

—Ca'ná' 'unj rihaan chumii nihánj che'é rej guun rá 'unj taacuacoj ya'an nimán yuvii, ne guun niha' rá nij yuvii canoco' nij yuvii man Diōse adonj. Ne me ndo'o raj se vaa ra'yanj cacō' ya'an yo' nimán nij yuvii adonj. <sup>50</sup> Tzaj ne rej rihaan ní' me se vaa uxrá sayuun quirān' 'unj, se vaa nata' nu' sayuun yo' xrā nanj á. <sup>51</sup> Dan me se ca'ná' 'unj che'é rej dínj doj cayáán nij yuvii man rihaan chumii nihánj gá tuvi' yuvii, rá soj na'. Taj ma'. Cuano nihánj me cataj 'unj rihaan soj se vaa ca'ná' 'unj che'é rej nata' 'unj se-nanāj rihaan yuvii, tzaj ne se cuno cunudanj nij yuvii rihanj ma'. Che'é dan cunū' yuvii gá tuvi' yuvii adonj. <sup>52</sup> Dan me se rej rihaan ní' me se, sese cayáán 'un' yuvii rá 'o ve', ne cunū' va'nuy nij so' gá yavij nij so', ne cunū' vij nij so' gá ya'núj nij so' adonj. <sup>53</sup> Dan me se cunū' snó'o gá ta'nij snó'o so', ne cunū' ta'nij snó'o so' gá ma'an so', ne cunū' chana gá ta'nij chana no', ne cunū' ta'nij chana no' gá ma'an no' adonj. Ne cunū' chana gá choco' no', ne cunū' choco' no' gá ma'an no', che'é se-nanāj adonj —taj Jesucristó rihaan nij sí tucu'yón se-nanā so' a.

Nana nihánj taj xna'anj se vaa ne quene'en nij yuvij xcaj nij yuvij cuentá che'é sayuun quiran' nij yuvij ma'

<sup>54</sup> Gaa ne cataj Jesucristó rihaan nij yuvij a:

—Dan me se soj me se sa' uxrá ne'en soj xcaj soj cuentá adonj. Nu' ne'en soj se vaa gaa avii ngaa rej ata' güii, ne nu' taj soj se vaa caman' uxrá maan, taj soj, ne veé danj 'yaj guëë xá' maan, ne aman' ndo'o yo' nanj adonj. <sup>55</sup> Ne nu' ne'en uún soj se vaa avii nana yuvaá rej rque rej sur, ne nu' taj soj se vaa daj doj ca'-na' ndo'o cachi' taj soj, ne veé danj 'yaj xa' cachi', ne maan ndo'o nanj adonj. <sup>56</sup> Dan me se xa' soj sij nucui' rá me se síf sa' me soj taj soj, tzaj ne tu'va rma'an soj nanj adonj. 'Q se ne'en soj xcaj soj cuentá che'é se vaa rihaan chumij do', che'é se vaa rej xta' do', tzaj ne ne ne'en soj xcaj soj cuentá che'é sayuun quiran' soj sij man rihaan chumij nihánj vaa güii ma'.

<sup>57</sup> Ne me che'é na'vee xcaj ma'an soj cuentá che'é se vaa no xcúún soj qui'yaj ma'an soj ga. <sup>58</sup> Ne so' me se sese vaa síf me rá cutá' cacun' xráá so' rihaan nij síf nicaj suun, ne gaa tihaj vaj so' chrej ga so', ne ve'é ca'mij so' ga so', cataj so' rihaan so' se vaa: "Ca'ne' rá so', ne se cutá' so' cacun' xráá ma'", cataj so', ne ve'é ca'mij so' ga so' ei. Ne sese se qui'yáá so' danj ca'mij sa' so' ga so' gaa tihaj vaj roj soj chrej rihaan chumij nihánj, ne nicaj so' man so' ca'anj so' rihaan cuese, ne cuese yo' ro', tachuachén man so' ra'a síf tumé taga', ne so' me síf caxrij taga' man so', <sup>59</sup> ne yo' me se guun raan ndo'o so', ne ndaa navij naru'vee so' nu' cacun' qui'yáá so', gaa ne curihanj so' taga' nanj adonj —taj Jesucristó rihaan nij yuvij a.

Nana nihánj taj xna'anj se vaa quirij' nu' ní' sese se ca'vej rá ní' canicaj nimán ní' tanáj ní' chrej chi'ij a

**13** Güii dan me se man ta'aj nij yuvij, ne nata' nij so' rihaan Jesucristó che'é daj quiran' ta'aj nij síf man estadó Galilea gaa man nij so' ticavi' nij so' xcuu rihaan Diose gaa ne curihanj nij tanuu 'yaj suun rihaan síf cu'naj Pilato, ne ticavi' nij tanuu man nij síf man estadó Galilea yo' a. <sup>2</sup> Gaa ne canicaj Jesucristó cataj so' rihaan nij yuvij nata' nana yo' a:

—Che'é yan quiran' nij so' danj, ne che'é dan sij tumé doj cacun' rihaan cunudanj yo'ó nij síf ne estadó Galilea me nij so', rá soj na'. <sup>3</sup> Taj ma'. Tzaj ne cataj xna'anj 'unj rihaan soj cuano se vaa sese se canicaj nimán soj tanáj soj chrej chi'ij, ne vaa güii quirij' nu' soj ne quiran' soj ndaa vaa quiran' nij so' adonj.

<sup>4</sup> Ne xa' xnu' va'nuj nij síf cavi' gaa canee ve' nata' xcaan cu'naj Siloé xráá nij so', gaa ne sij tumé doj cacun' rihaan cunudanj nij síf man chuman' Jerusalén me nij so', rá soj gaa na'. <sup>5</sup> Taj ma'. Tzaj ne cataj xna'anj 'unj rihaan soj cuano se vaa sese se canicaj nimán soj tanáj soj chrej chi'ij, ne vaa güii quirij' nu' soj ne quiran' soj ndaa vaa quiran' nij so' adonj —taj Jesucristó rihaan nij yuvij a.

Nihánj me cuentó nanó Jesucristó se vaa sese se guun rá ní' qui'yaj ní' ndaa vaa me rá Diose, ne quirij' ní' a

<sup>6</sup> Gaa ne nanó Jesucristó cuentó nihánj a:

—Dan me se 'o snó'o me se naj 'o xnaa so' naa chruj uvá, ne nicun' 'o chruun higó rque naa uvá yo', tzaj ne 'na' so' nano' so' chruj raá yo' chá so', tzaj ne a 'ó chruj ne quirij' so' chá so' raá chruun yo', ne che'é dan quirij' rá so' ni'yaj so' chruun yo' a. <sup>7</sup> Che'é dan cataj so' rihaan síf 'yaj suun rque xnaa so': "Ni'yaj so' ei. Sij va'nuj ya yo' 'ná' 'unj nanó' 'unj chruj higó raá chruun nihánj, tzaj ne a 'ó chruj nuvi' raá chruun nihánj chá' ma'. Ca'ne' so' man yo', ne taj che'é canicun' rma'an yo' rihaan to'ój a ma'", taj so' rihaan síf 'yaj suun rque naa uvá yo' a. <sup>8</sup> Tzaj ne síf 'yaj suun rque naa uvá yo' ro', cataj rihaan so' a: "Qui'yáá so' se ndo'o, ne daj orún' guëë yo' cuano tanáj ní' man chruun nihánj, ne canaa 'unj nu' anicaj tacóo chruun yo', ne caraá 'unj ya'luj tacóo chruun yo', señor. <sup>9</sup> Xraj, ne sese yo' natuu ro', ne cumán chruj raá chruun yo', ne quinaj chruun yo', qui'yaj ní' a. Se taj, ne ca'ne' cachrij ní' man chruun yo' ei", taj síf 'yaj suun naa uvá yo' rihaan síf si'yaj chruun yo' a. —Dan me cuentó nanó Jesucristó rihaan nij yuvij yo' a.

Nana nihánj taj xna'anj se vaa nahuun sa' 'o chana guun lacuu xráá, qui'yaj Jesucristó güii naránj rá nij yuvij israelitá a

<sup>10</sup> Dan me se 'o güii naránj rá nij yuvij israelitá me se tucu'yón Jesucristó rihaan nij yuvij cunuu chre' rá ve' tucu'yón nii se-tucuanj Moisés, <sup>11</sup> ne dan me se rá ve' yo' ro', nicun' 'o chana guun lacuu xráá, ne nana chree yanj nimán no' ro', me qui'yaj guun lacuu xráá no' a. Ne aj quisij xnu' va'nuj yo' quiran' no' danj a. Dan me se ne ca'vee canicun' caya no' a ma'. <sup>12</sup> Dan me se quene'en Jesucristó man no', ne canacúún so' man no', cataj so':

—Cuanó nihánj me x'neë chi'ij xráá so', nocoj —taj Jesucristó, <sup>13</sup> ne cuta' so' ra'a so' xráá no' a.

Nu' xcaj chana cuentá se vaa nahuun sa' no', ne nu' guun che'e no' cataj no' se vaa sa' uxrá qui'yaj Diose a.

<sup>14</sup> Tzaj ne ca'maan rá síf 'nij ra'a ve' tucu'yón nii se-tucuanj Moisés, che'é se güii naránj rá nij yuvij israelitá me güii qui'yaj cono'ó Jesucristó man chana yo' a. Che'é dan cataj síf 'nij ra'a ve' yo' rihaan nij yuvij a:

—Vatan' güii me güii no xcúún ní' qui'yaj suun ní' 'o 'o smaná a. Ca'na' soj güii yo', ne nahuun sa' soj ei. Se ca'na' soj nahuun sa' soj güii naránj rá ní' ma' —taj so' rihaan nij yuvij a.

<sup>15</sup> Gaa ne cataj síf 'nij ra'a man ní' rihaan nij tuvij' síf 'nij ra'a ve' a:

—Quij ndo'o vaa nimán soj, ne síf nucui' ndo'o rá me soj adonj. 'Q se taran' soj me se ne nache soj daán soj scúj do', daán soj burró do', rej numij xo', ne nicaj soj man xo' 'anj soj rej co'ó xo' na güii naránj rá ní' gaa na'. <sup>16</sup> Ne nihánj me nicun' chana nihánj, ne ta'nij ta'nij si'no xij ní' síf cu'naj Abraham me no', ne nihánj me

quisij xnu' va'nuy yo' numij sí cu'naj Satanás man no', ne ca'vee se güii naránj rá ní' me güii cuan', tzaj ne vaa che'é ndo'o nache ní' man no' ra'a sí cu'naj Satanás adonj —taj Jesucristó rihaan sí 'nij ra'a ve' yo' a.

<sup>17</sup> Ne gaa quisij ca'mii so' danj, gaa ne guun na'aj cunudanj nij sí guun rá cunuj gá so', gaa ne guun ni-há' rá cunudanj nij yuvij che'é cunudanj nij suun sa' nocoo qui'yaj so' a.

#### Nihánj me cuentó nanó Jesucristó che'é caên cuêj mostazá xlá a

<sup>18</sup> Che'é dan cataj Jesucristó a:

—Daj gaa guun chij Diose rihaan chumij nihánj, rá soj gá. <sup>19</sup> Dan me se ase vaa achij caên cuêj mostazá xlá ro', danj gaa guun chij Diose rihaan chumij nihánj adonj. Dan me se nicaj yo' o so' man caên cuêj mostazá xlá ne caxrij so' caên yo' rque to'óo so', ne dan me se xra' caên yo', ne cachij yo', ne asa' cachij yo', ne ase vaa 'o chruun ro', danj vaa yo' a. Gaa ne cayuu nij xtâj vaj rej xtâ' raá cuêj yo', ne qui'yaj nij xo' sacá' nij xo' raá cuêj yo' adonj. —Danj ca'mii Jesucristó rihaan nij yuvij a.

#### Nihánj me cuentó nanó Jesucristó che'é levadura se 'yaj naraa naná rque rachrúun a

<sup>20</sup> Gaa ne cataj uún Jesucristó a:

—Daj gaa 'o rasuun naqui'yaj ní' rihaan soj, gaa ne quene'en soj daj gaa guun chij Diose rihaan chumij nihánj, rá soj gá. <sup>21</sup> Dan me se naqui'yaj ní' 'o chana caxrij yo'óo levadura rque cunj hariná gaa 'yaj no' rachrúun a. Dan me se ase vaa 'o chana, ne cuxra' ta'aj no' 'o va'nuy yá aga' yo'óo hariná, ne caxrij ndo'o no' yo'óo levadura, ne caxrij yuve no' man yo' ndaa navij naraa ndo'o naná rque yo' a. Ase vaa uun chij yo'óo levadura yo' rihaan cunj hariná ro', danj gaa guun chij Diose rihaan chumij nihánj adonj. —Danj ca'mii Jesucristó rihaan nij yuvij a.

#### Naná nihánj taj xna'anj me sí ca'anj cayáán gá Diose ne me sí ca'anj rihaan ya'an a

<sup>22</sup> Gaa ne vaj Jesucristó cachén so' nij chuman' nocoo do', nij chuman' ra'a do', ne tucu'yón so' se-nana so' rihaan nij yuvij a. Ne danj nanj nichrun' so' nichrun' so' chuman' Jerusalén a. <sup>23</sup> Ne xná'anj yo' o so' man Jesucristó, cataj so':

—Ne doj nij sí ca'vee quinanj rihaan sayuun, qui'yaj Diose a na' —taj so', xná'anj so' man Jesucristó a.

Gaa ne cataj Jesucristó rihaan nij yuvij a:

<sup>24</sup> —Ase vaa ta'yaa chruj ndo'o vaa rej cachén yuvij catuy yuvij rihaan Diose adonj. Qui'yaj nucuaj soj nimán soj che'é rej catuy soj rej yo' ei. Cataj xna'anj 'unj rihaan soj cuano se vaa guun ndo'o rá nij yuvij catuy nij so' rej yo', tzaj ne se guun nucuaj nij so' catuy nij so' ma'. <sup>25</sup> Ne asa' quisij canicun' caya sí tu-cua ve' yo' ne caráán so' ta'yaa, gaa ne soj ro', canicun' xe', ne guun che'e soj tica'mii soj ta'yaa, ne cataj soj: "Na'nuy so' ta'yaa catuy núj, Señor", cataj

soj, gaa ne cataj 'unj rihaan soj: "Ne ne'en uxraj me rej cavii soj a ma'", cataj 'unj rihaan soj gaa nanj adonj.

<sup>26</sup> Gaa ne guun che'e soj cataj soj: "Chá núj chraa do', co'o núj na gá so' do', ne tucu'yón so' se-nana so' chiháán núj nanj á", cataj soj rihanj á. <sup>27</sup> Gaa ne cataj uún 'unj rihaan soj: "Ne ne'en uxraj me rej cavii cunudanj soj sij 'yaj inanj cacun' a ma'. Naxuun soj man soj rihanj á", cataj 'unj rihaan soj a.

<sup>28</sup> "Ne rej ca'anj soj me se rej ta'vee ndo'o yuvij me yo', ne ndaa cha ruj ma'an yuvij cúu yan' yuvij, ne quene'en soj man sí cu'naj Abraham do', man sí cu'naj Isaac do', man sí cu'naj Jacob do', man cunudanj nij sí nata' se-nana Diose gaa naá do', se vaa cayáán nij so' gá Diose asa' guun chij Diose rihaan chumij nihánj, ne xa' soj, tzaj ne quene'en soj se vaa aj quiri'lj nii man soj xe' nanj adonj. <sup>29</sup> Ne güii guun chij Diose rihaan chumij nihánj ro', ca'na' ndo'o yuvij man cunuj chumij, ne cayáán nij so' rihaan se-mesa Diose, ne cha nij so' chraa adonj. <sup>30</sup> Ne nij sí ne guun chij rihaan chumij nihánj me se xtâ' ro', guun chij nij so' a. Ne nij sí guun chij ndo'o rihaan chumij nihánj me se rej xtâ' ro', guun nij so' sí nocoo, qui'yaj Diose nanj adonj —taj Jesucristó rihaan nij yuvij yo' a.

#### Naná nihánj taj xna'anj se vaa ne cuchu'vi' Jesucristó ni'yaj so' man sí cu'naj Herodes ma'

<sup>31</sup> Ne güii dan me se cuchi' doj nij sí fariseo rihaan Jesucristó, ne cataj nij so' a:

—Curihanj so' estadó nihánj ca'anj so', ne sí nicaj suun rey cu'naj Herodes me se me ndo'o rá so' ticavi' so' mán so' á —taj nij sí fariseo rihaan Jesucristó a.

<sup>32</sup> Gaa ne cataj Jesucristó rihaan nij so' a:

—Ase vaa chunee avii ndo'o raá qui'yaj sayuun vaa sí cu'naj Herodes yo', ne ca'anj soj, ne cataj soj rihaan so' se vaa 'unj me se rii 'unj naná chree nimán nij yuvij, ne naqui'yaj sa' 'unj man nij sí ran', ne 'o güii cuan' ne 'o güii a'yuj ne rque va'nuy guêe güii qui'yaj suun 'unj se-sunj, ne veé danj quisij se-sunj, qui'yaj nanj adonj.

<sup>33</sup> Tzaj ne vaa che'é qui'yaj suun 'unj cuan' ne a'yuj ne yataj, ne rque va'nuy güii qui'yaj suun 'unj che'é xrej 'unj, gaa ne curihanj 'unj estadó nihánj ei. 'O se taj che'é cavi' 'o sí nata' se-nana Diose rej yanij yo'óo chuman', ne veé chuman' Jerusalén cavi' so' gaa ca'vee adonj —taj Jesucristó rihaan nij sí fariseo yo' a.

#### Naná nihánj taj xna'anj daj quiran' nij sí ne chuman' Jerusalén a

<sup>34</sup> Gaa ne cataj uún Jesucristó a:

—Naná uxra' raj che'é soj sij man chuman' Jerusalén nihánj nanj á. Dan me se ticavi' soj man nij sí nata' se-nana Diose, ne go' soj yahij man nij sí ca'née Diose cuchi' rihaan soj a. Guun que'ee ndo'o guun rá 'unj naqui'yaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'níi xo' caráán xo' xcóo xo' xraá ta'níi xo' ro', danj guun raj qui'yaj man soj, tzaj ne ne ca'vee rá soj qui'yaj danj a ma'.

<sup>35</sup> Yaj me se cütumé ma'an soj man soj nanj adonj. 'O se cuano nihánj me se cataj xna'anj 'unj rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'nã' uún 'unj rihaan chumiï nihánj quene'en soj manj, ne cataj soj: "Ve'é uxrá 'na' sí a'néé sí 'nij ra'a man ní' ei", cataj soj a —taj Jesucristó ni'yaj so' man nij sí man Jerusalén yo' a.

**Nana nihánj taj xna'anj se vaa nahuun snó'o quixíj cu'maan man, qui'yaj Jesucristó güii naránj rá nij yuvii israelitá a**

**14** Dan me se 'o güii naránj rá nij yuvii israelitá me se catúj Jesucristó rá ve' tucua' 'o sí uun chij rihaan nij sí fariseo chá so' chraa, ne nij sí fariseo ro', tumé uxrá man so' daj qui'yaj so' a. <sup>2</sup> Ne veé danj nicun' 'o sí quixíj cu'maan man rihaan Jesucristó a. <sup>3</sup> Gaa ne xná'anj Jesucristó man nij sí naqui'yaj cyu se-tucuanj Moisés rihaan yuvii do', man nij sí fariseo do', cataj so':

—No xcúun ní' ca'neé ní' ch'i'ij xráá sí ran' güii naránj rá ní', rá soj na'. Ase ne nó xcúun ní' xa' —taj Jesucristó, xná'anj Jesucristó man nij so' a.

Tzaj ne guun dínj tu'va nij so' a.

<sup>4</sup> Gaa ne quita'aa Jesucristó man sí ran' yo', ne nahuun sa' so', qui'yaj Jesucristó, gaa ne na'néé Jesucristó chrej man so' a. <sup>5</sup> Gaa ne ni'yaj Jesucristó rihaan nij sí fariseo yo', cataj so' a:

—Ne sese quiniñ ta'níí 'o tuvi' soj do', 'o daán soj scúj do', rá cuxruj na güii naránj rá ní', ne ra'yanj quirii soj man ta'níí soj do', man daán soj do', rá 'unj ei —taj Jesucristó rihaan nij sí fariseo a.

<sup>6</sup> Veé dan me se a 'o nana ne quirii nij so' ca'mii nij so' rihaan Jesucristó ma'.

**Nana nihánj taj xna'anj se vaa se nano' ní' rej sa' doj quitaj ní' a**

<sup>7</sup> Dan me se quene'en Jesucristó se vaa nij sí 'na' tucua' sí fariseo yo' ro', nano' ndo'o nij so' rej sa' doj quitaj nij so', gaa ne che'é dan tucu'yón Jesucristó nana nihánj man nij so', cataj so' a:

<sup>8</sup> —Asa' canacúun ta'aj nii mán so' ca'anj so' cha'anj nara'aa, ne se ca'anj quitaj so' chruun xlá sa' doj ma'. 'O se ne ne'én so' sese canacunj nii man yo'ó sí sa' doj rihaan so' ne quitaj so' chruun xlá taj so' man adonj.

<sup>9</sup> Ne síí 'yaj cha'anj ro', cataj so' rihaan so': "Rque so' chruun yo' quitaj síí nihánj á", cataj so' rihaan so', gaa ne guun na'aj so', ne chruun xlá nij doj ca'anj quitaj so', qui'yaj so' a. <sup>10</sup> Dan me se asa' canacúun nii mán so', ne asa' cuchí' so' rej canuú cha'anj, ne rej nij doj ro', quitaj so' ei. Gaa ne asa' ca'na' síí canacúun mán so', gaa ne cataj so' rihaan so': "Cavii so' quitaj so' rej sa' doj nihánj, tinuj", cataj so' rihaan so', gaa ne caraya'anj uxrá cunudanj nij síí 'na' cha'anj yo' ni'yaj nij so' mán so' nanj adonj. <sup>11</sup> 'O se xa' síí me rá ticavii sa' man ma'an, tzaj ne quirii so', ne guun na'aj so' adonj. Ne xa' síí 'yaj nicá' nimán, tzaj ne cavii sa' so' adonj —taj Jesucristó rihaan nij sí fariseo do', rihaan

nij síí naqui'yaj cyu se-tucuanj Moisés rihaan yuvii do' a.

**Nana nihánj taj xna'anj me síí canacunj ní' chá chraa ga ní' a**

<sup>12</sup> Gaa ne cataj Jesucristó rihaan síí canacúun man so' chá so' chraa a:

—Asa' guun rá so' ca'nã' yuvii chá yuvii chraa ve' tucua' so', ne se canacúun so' man tuví' so' do', man tinúú so' do', man nij síí ru'vee man chiháan so' do' ma'. Dan me se sese canacunj so' man inanj ma'an nij so', gaa ne vaa güii canacunj nij so' mán so' chá so' chraa ga nij so', gaa ne dan me se aj naru'vee nij so' nu' se chá rihaan so' danj rá se vaa gaa nanj adonj.

<sup>13</sup> Tzaj ne asa' canuú cha'anj qui'yáá so', ne canacunj so' man nij síí nique do', man nij síí rengo do', man nij síí tuchrii do', chá nij so' chraa ei. <sup>14</sup> Danj qui'yáá so', gaa ne nij so' me se taj rasuun rihaan nij so' naru'vee nij so' rihaan so' ma'. Gaa ne asa' cunuu i'na' uún nij síí sa' rihaan Diose, ne ma'an Diose naru'vee rihaan so', gaa ne cavii sa' uxrá so' adonj —taj Jesucristó rihaan síí canacúun man so' chá so' chraa a.

**Cuentó nihánj taj xna'anj me síí chá chraa ga Diose asa' guun chij Diose rihaan chumiï nihánj a**

<sup>15</sup> Dan me se cuno yo' o síí chá chraa ga Jesucristó nana ca'mii Jesucristó, gaa ne che'é dan cataj so' rihaan Jesucristó a:

—Cavii sa' cunudanj nij síí chá chraa ga Diose asa' guun chij Diose rihaan chumiï nihánj nanj ei —taj so' rihaan Jesucristó a.

<sup>16</sup> Gaa ne cataj Jesucristó rihaan so' a:

—Síí navij rá cha'anj nocoo ndo'o me so', ne nacúun so' ca'nã' que'ee yuvii a. <sup>17</sup> Gaa ne dan me se maan orá chá nij so' chraa me ca'néé síí navij rá cha'anj man se-mozó so' ca'anj cataj mozó yo' rihaan nij síí ca'nã' se vaa ca'nã' nij so' cha'anj chá nij so' chraa a. "Aj quisij guun chuvii, ne ca'anj ní' chá nij soj chraa ei", taj mozó yo' rihaan nij síí ca'nã' cha'anj yo' a. <sup>18</sup> Gaa ne guun che'e nij so' cataj 'o 'o nij so' rihaan mozó yo' se vaa se ca'vee cuchí' nij so' chá nij so' chraa a. Dan me se yo' o so' cataj: "Tzaj ne 'unj me se tihaj quiránj 'unj 'o yo'óo, ne vaa che'é ndo'o ca'anj 'unj quene'én 'unj yo'óo yo' a. Ne qui'yáá so' se ndo'o, cataj so' se vaa se ca'vee cuchí' 'unj ma'", taj so' rihaan mozó yo' a. <sup>19</sup> Gaa ne yo'ó so' cataj: "Maan se 'unj me se 'un' yuntá scúj quiránj 'unj, ne cuano nihánj me se ca'anj 'unj quene'én 'unj daj vaa scúj quiránj sese scúj sa' me xo' a. Ne che'é dan qui'yáá so' se ndo'o cataj so' se vaa se ca'vee cuchí' 'unj ma'", taj so' rihaan mozó yo' a. <sup>20</sup> Ne yo'ó so' ro', cataj uún rihaan mozó yo' a: "'Unj me se tihaj xcax 'unj chana, ne che'é dan se ca'vee cuchí' 'unj ma'", taj so' rihaan se-mozó síí navij rá cha'anj yo' a. Ne veé danj ca'mii cunudanj nij síí aj quirii ni'yaj ca'anj cha'anj yo' a.

<sup>21</sup> "Dan me se namán mozó, ne nata' mozó nu' se vaa ca'mii 'o 'o nij so' rihaan se-ru'vee mozó a. Gaa ne ca'-



maan ndo'o rá síí navij rá cha'anj yo' gaa cuno so' se-nanā se-mozó so', ne cataj so' rihaan se-mozó so': "Ra'yanj cavii so' ca'anj so' daj a nij callé, ne nīcaj so' man nij síí nique do', man nij síí chéé rengó do', man nij síí tuchrii do', ca'na' so' nihánj, ne chá nij so' chraa gā ní' ei", taj so' rihaan se-mozó so' a. <sup>22</sup> Veé danj qui'yaj se-mozó so', ne cuchi' uún mozó yo' rihaan se-ru'vee so', ne cataj so': "Aj qui'yáj nu' se vaa cataj so' rihanj, señor. Tzaj ne vaa rej quisij catuu doj yuvi uún a", taj mozó yo' rihaan se-ru'vee so' a. <sup>23</sup> Gaa ne cataj ru'vee yo' rihaan mozó a: "Cavii so' ca'anj so' nu' nij chrej ca'aan do', nu' nij chrej catuun do', ne qui'yáá so' fuerzá man nij yuvi se vaa ca'na' nij so' á. Gaa ne caraa nu' ve' tucua ei. <sup>24</sup> 'Q se cuano nihánj me se cataj xna'anj 'unj rihaan so' se vaa xa' nij síí canacúun ní' asino yaan, tzaj ne a 'ó nij so' se ca'vee ca'na' chá chraa gā ní' a man adonj", taj so' rihaan se-mozó so' a. —Veé danj quisij cuentó nanó Jesucristó a.

### Nana nihánj taj xna'anj se vaa yuun che'e ca'nej nimán ní' canoco' ní' man orún' Jesucristó a

<sup>25</sup> Dan me se que'ee uxrá yuvi vaj gā Jesucristó, ne canicaj so', cataj so' rihaan nij yuvi a:

<sup>26</sup> —Sese me rá 'o so' ca'na' so' rihanj, ne sese guun rá so' se vaa sa' doj vaa rej so' do', nii so' do', nicā so' do', ta'níí so' do', tinúú so' do', ra'vij so' do', ndaa nimán ma'an so' do', rihanj, ne se ca'vee guun so' 'o síí tucu'yón se-nanā a ma'. <sup>27</sup> Ne síí na'vej rá quiran' sayuun che'é se me so' síí nocó' manj ro', se ca'vee guun so' 'o síí tucu'yón se-nanā a ma'.

<sup>28</sup> "Dan me se soj, tzaj ne sese guun rá yo' o tuvi' soj cune' yo' o soj ve' nata' xcaan, ne síí qui'yaj ve' yo' me se asino nuchruj raa so' cuentá sese quisij se-sa'anj so' quisij nu' ve' yo', raj a. <sup>29</sup> Ne sese se qui'yaj so' danj nuchruj so' cuentá asino yaan, gaa ne asa' cuchruj so' tacóó ve', gaa ne se guun nucuaj so' qui'yaj so' nu' ve' a ma'. Ne nij síí ne'en se vaa qui'yaj so' ro', ca'nga' nacoo nij so' ni'yaj nij so' man so', <sup>30</sup> ne cataj nij so': "Síí nihánj me se guun che'e so' cune' so' ve', tzaj ne ne guun nucuaj so' quisij nu' ve' qui'yaj so' a ma'", cataj nij so' ni'yaj nij so' man síí guun che'e ve' yo' a.

<sup>31</sup> "Ne dan me se sese vaa 'o síí nicaj suun rey vaa chi' mij tanuu rihaan, ne sese ca'na' yo' o síí nicaj suun rey vaa icó mij tanuu rihaan cunu' gā so', gaa ne asino yaan xcaj so' cuentá sese guun nucuaj so' qui'yaj canaan so' rihaan síí vaa icó mij tanuu rihaan yo', ne sese guun nucuaj so' rá so', ne cavii so' cunu' so' gā nij síí 'na' yo' a. <sup>32</sup> Tzaj ne sese se guun nucuaj so' qui'yaj canaan so' rá so', gaa ne ca'nej so' síí ca'anj suun ca'mii gā síí 'na' yo' ndaa vaa se guun cunu' nij so' a. Danj cataj so' gaa tihaj 'na' síí cunu' gā so' gan' a. Gaa ne cachinj ni'yaj síí ca'anj suun yo' rihaan síí 'na', ndaa vaa ca'ne' rá so' gā suun cunu' a.

<sup>33</sup> "Dan me se ase vaa xcaj síí cune' ve' do', síí cunu' gā tuvi' do', cuentá sese guun nucuaj roj so' qui'yaj roj so' danj ro', veé danj qui'yaj guee soj sij me rá canoco' manj ei. Ne sese se guun rá soj tanáj xco soj nu' si'yaj

soj do', nu' tuvi' soj do', canoco' soj manj, ne se ca'vee guun soj síí tucu'yón se-nanā a ma'.

<sup>34</sup> "Q se ase vaa yaan gā chraa ro', danj vaa nij síí tucu'yón se-nanā gā chumii nihánj, ne vaa se uun ndo'o yaan nanj á. Dan me se sese ne 'ne' chá yaan yo', gaa ne taj se qui'yá' cunu sa' yaan gaa a ma'. <sup>35</sup> Taj se guun yaan yo' rihaan to'óó ní' cunu sa' to'óó ní' ma'. Taj se guun yaan yo' rihaan ya'luj se vaa cunu sa' doj ya'luj ma'. A doj rasuun se cavii sa', qui'yaj yaan yo' ma'. Maan se ri'ij uun nii man yaan vaa danj xe' a.

"Dan me se sese taj yu'uj xréé soj, ne cunó soj nana nihánj ei —taj Jesucristó rihaan nij yuvi yo' a.

### Nihánj me cuentó che'é matzinj ca'anj ni'ya a

**15** Dan me se cuchi' que'ee síí a'nej puextó do', que'ee síí tumé cacun' do', rihaan Jesucristó a. 'Q se guun rá nij so' cunó nij so' se-nanā so' a. <sup>2</sup> Ne xa' nij síí fariseo do', nij síí naqui'yaj cuu se-tucañj Moisés rihaan yuvi do', tzaj ne ca'maan rá nij so' ni'yaj nij so' man Jesucristó, ne nij ca'mii nij so' che'é so', che'é rej ve'é nicaj tuvi' so' gā nij síí tumé cacun' ne chá so' chraa gā nij so' a. <sup>3</sup> Gaa ne nanó Jesucristó 'o cuentó nihánj rihaan nij so' a:

<sup>4</sup> —Dan me se sese yo' o tuvi' nij soj nicaj 'o cientó matzinj, ne sese ca'anj ni'ya orún' guee daán so' matzinj, ne tanáj so' yo' o ca'anj chihaa xnu' ca'anj daán so' matzinj rej tacaan, ne cavii so' ca'anj nanó' so' man orún' daán so' matzinj ca'anj ni'ya á. Ne se ca'ne' rá so' ma'. Tananj ya ca'anj so' nanó' so' man daán so' matzinj, gaa ne uun daj nari' so' man yo' adonj. <sup>5</sup> Ne asa' quisij nari' so' man xo', gaa ne cuta' so' man xo' tacaan xcóó so', ne guun niha' ndo'o rá so' a. <sup>6</sup> Ne asa' namán so' tucua so', gaa ne nacunj so' man nu' tuvi' so' síí ne chiháan so', ne cataj so' rihaan nij tuvi' so': "Guun niha' rá soj gaj ei. 'Q se narij danj matzinj ca'anj ni'ya ei", cataj so' rihaan tuvi' so' a. <sup>7</sup> Ne cuano nihánj me cataj xna'anj 'unj rihaan soj se vaa xta' rej ne Diose ro', guun niha' doj rá nij síí man yo' ni'yaj nij so' man orún' síí tumé cacun' gaa canicaj nimán so' canoco' so' chrej sa' a. Tzaj ne se caráya'anj nij so' man ca'anj chihaa xnu' ca'anj, ése sij sa' me nij so', rá nij so' ma', ne taj che'é canoco' nij so' tucuaán naca' narqué Diose, rá nij so' ma' —taj Jesucristó rihaan nij so' a.

### Nihánj me cuentó che'é pesó xoo ca'anj ni'ya a

<sup>8</sup> Ne cataj uún Jesucristó a:

—Ne sese nīcaj 'o chana' chi' pesó xoo, ne sese ca'anj ni'ya orún' pesó xoo yo', ne tucua' no' ya'an aga' chuguun, ne naca' no' nu' ve' tucua' no', ne uxrá nanó' no' pesó xoo yo', ne se ca'ne' rá no' ma'. Tananj uxrá nanó' no' man pesó xoo yo', uun daj nari' ya no' man yo', gaa ne ca'ne' rá no' adonj. <sup>9</sup> Ne asa' quisij nari' no' pesó xoo yo', gaa ne canacunj no' man nu' tuvi' chana' no' níí ne x'núú ve' tucua' no', ne cataj no' rihaan nij tuvi' chana' no': "Guun niha' rá soj gaj á. 'Q se narij se-sa'anj pesó xoo ca'anj ni'ya ei", cataj no' rihaan tuvi' chana' no' a. <sup>10</sup> Dan me se cataj xna'anj 'unj rihaan soj

a. Ndaa rá se vaa guun rá chanaḡ gaa nari' no' se-sa'anj no' ro', danj guun niha' uxrá rá nij se-mozó Diose ni'yaj nij so' man orún' sí tumé cacun' gaa canicaj nimán so' canoco' so' chrej sa' adonj —taj Jesucristó rihaan nij so' a.

### Nihánj me cuentó che'é sí tumé cacun' canicaj rihaan rej a

<sup>11</sup> Gaa ne cataj uún Jesucristó a:

—'O sí vaa vij ta'ní me so' a. <sup>12</sup> Ne cataj sí cunij rihaan rej so' a: "Me rá 'unj cuxra' ta'aj so' rasuun rque so' manj guun si'yáj, ataj", taj so' rihaan rej so' a. Gaa ne cuxra' ta'aj snó'o yo' nu' si'yaj so', ne rque so' ta'aj si'yaj so' rihaan 'o 'o ta'ní so' a. <sup>13</sup> Dan me se cachén doj güii, gaa ne naqui'yaj chre' sí cunij yo' nu' si'yaj so', ne cavii so' ca'anj so' chuman' naj gan', ne qui'yaj ndo'o so' se nij, ne cutun' rma'an so' nu' se-sa'anj so' a. <sup>14</sup> Quisij cutun' so' nu' se-sa'anj so', gaa ne cachén ndo'o x'naa chuman' yo', ne guun che'e so' quiran' ndo'o so' sayuun, ne quina'aa ndo'o rque so', ne taj vaj a doj se chá rihaan so' cha so' a. <sup>15</sup> Dan me se catúj so' rihaan 'o sí chihanj chuman' yo', ne ca'ne' sí chihanj chuman' yo' suun rihaan so' ca'anj so' se-ranchó sí chihanj yo' cutumé so' xcáa a. <sup>16</sup> Tzaj ne na'aa ndo'o rque so', ne ndaa guun rá so' cha so' coj go' nii cha nij xcáa a. Tzaj ne ne rque nii coj yo' cha so' a ma'.

<sup>17</sup> "Dan me se 'o güii ne nahuun sa' raḡ so', ne guun che'e so' xcaj so' cuentá, ne nanuj rá so' rej so' a. Ne me rá so': "Nij se-mozó réj, tzaj ne man ndo'o se chá rihaan réj, ne man ndo'o se chá rihaan se-mozó réj a. Ne nihánj me cavi' 'unj qui'yaj x'naa nanj á. <sup>18</sup> Naxu-maañ 'unj, ne nán' 'unj rej ne réj, cataj 'unj rihaan réj: Tumej cacun' rihaan Diose, ne tumej cacun' rihaan so', ataj. <sup>19</sup> Taj che'é cataj so' se vaa ta'ní so' mej cuano a ma'. Maañ se qui'yáa so' se ndo'o, ne guún 'unj mozó rihaan so', qui'yáa so', ruguanj, cataj 'unj rihaan réj", guun rá sí cunij yo' a.

<sup>20</sup> "Gaa ne cavii so' ca'anj so' rej ne rej so' a. Dan me se gan' ndo'o vaj so' chéé so', ne quene'en rej so' man so', ne cunuu 'ee ndo'o rá rej so' man so', ne cunánj rej so' ndaa rej vaj so', ne na'yaan rej so' man so', ne cachrón tu'va rej so' man so' a. <sup>21</sup> Gaa ne cataj sí cunij yo' rihaan rej so' a: "Tumej cacun' rihaan Diose, ne tumej cacun' rihaan so', ataj. Taj che'é cataj so' se vaa ta'ní so' mej cuano a ma'. Maañ se qui'yáa so' se ndo'o, ne guún 'unj mozó rihaan so', qui'yáa so', ruguanj", taj so' rihaan rej so' a. <sup>22</sup> Tzaj ne ca'mii rej so' rihaan nij mozó man rihaan rej so', cataj rej so': "Ra'yanj nicaj soj yatzij sa' ndo'o ca'naḡ soj cunuú ta'nij, ne ca'naḡ se'ej sa' cunuú ra'a ta'nij, ne ca'naḡ canj naca qui'nij tacó so' á. <sup>23</sup> Ne ticavi' soj man scúj le'ej ramii ndo'o, ne qui'yaj chujij soj, ne cha ní, ne qui'yaj ní' cha'anj, ne guun niha' uxrá rá ní' ei. <sup>24</sup> 'O se ta'nij nihánj me se ase vaa sí cavi' gaa so' rihanj, tzaj ne nihánj me se cunuu i'na' uún so' rihanj, ne ase vaa sí ca'anj ni'ya gaa so', tzaj ne nihánj me se narij man so' nanj adonj", taj rej so', ne guun che'e nij so' guun niha' uxrá rá nij so' a.

<sup>25</sup> "Tzaj ne vaa sí chava' uún, ne 'yaj suun so' se-ranchó rej so' a. Dan me se 'na' nique sí chava' yo', ne gaa quinichrun' so' ve', ne cuno so' se vaa go' ndo'o misca chra' do', se vaa ra'anj ndo'o yuvij do' a. <sup>26</sup> Gaa ne canacúun sí chava' yo' man 'o mozó, ne ca'na' yo' mozó rihaan so', ne xná'anj so' man mozó, ne: "Me che'é 'yaj nii nu' cha'anj ga", taj so' rihaan mozó yo' a. <sup>27</sup> Gaa ne cataj mozó rihaan so' a: "Namán tinúu so', ne cavi' scúj le'ej ramii ndo'o, qui'yaj rée so', che'é se nari' i' uún so' ta'ní so' ne vaa nucuaj ta'ní so' nari' so' a", taj mozó rihaan sí chava' yo' a.

<sup>28</sup> "Dan me se ca'maan rá sí chava', ne na'vej uxrá rá so' catuu so' rá ve' a. Tzaj ne curihanj rej so', gaa ne canacúun rej so' man so' ca'naḡ so' a. <sup>29</sup> Tzaj ne cataj so' rihaan rej so' a: "'Unj nihánj me se aj quisij que'ee yo' qui'yaj suun 'unj rihaan so' nihánj, ne cunudanj nij nanā cataj xna'anj so' rihanj ve'é cunoj a. Ne a 'o güii ne rque so' a 'ó tana le'ej rihanj ne qui'yaj chujij 'unj ne chaj ga nij tuvij a ma'. <sup>30</sup> Tzaj ne nihánj me se namán ta'ní so' sí chá nu' si'yáa so' gaa chéé so' ga nij chana niha' rá, ne ticavi' so' scúj le'ej ramii che'é so' a", taj sí chava' yo' rihaan rej so' a.

<sup>31</sup> "Gaa ne cataj rej so' rihaan so' a: "Maañ se so' me se 'o né so' ga 'unj nihánj, rej. Ne nu' rasuun si'yáj me si'yáa so', rej. <sup>32</sup> Tzaj ne vaa che'é guun niha' rá ní' gaa namán tinúu so', rej. 'O se tinúu so' ro', ase vaa 'o sí cavi' gaa so' rihanj, tzaj ne nihánj me cunuu i'na' uún so', ne ase vaa 'o sí ca'anj ni'ya gaa so' rihanj, tzaj ne cuano nihánj me se aj narij man so' nanj adonj", taj rej so' rihaan sí chava' yo' a. —Veé danj quisij cuentó nanó Jesucristó rihaan nij so' a.

### Cuentó nihánj taj xna'anj daj qui'yaj ní' ga si'yaj ní' rihaan chumii nihánj, ne ca'vee cayáan ní' ga Diose asaḡ guun hij Diose rihaan chumii nihánj a

**16** Gaa ne cataj Jesucristó rihaan nij sí tucu'yón se-nana so' a:

—Sí ru'vee me yo'o so', ne nuu 'o mayordomo rihaan so' sí tumé nu' si'yaj so' a. Dan me se cuta' nii cacun' xráa mayordomo yo' rihaan ru'vee se vaa cutun' ndo'o so' si'yaj ru'vee a. <sup>2</sup> Gaa ne canacúun ru'vee man mayordomo, ne ca'na' mayordomo rihaan so', ne cataj so' rihaan mayordomo yo' a: "Aj ca'na' nana rihanj se vaa cutun' ndo'o so' si'yáj, ne ne ne'en uxraj me che'é qui'yáa so' danj a ma'. Tzaj ne cataj xna'anj so' rihanj daj qui'yáa so' gaa cutumé so' si'yáj á. 'O se se ca'vee cunuú so' doj rihanj cutumé so' si'yáj a ma'", taj ru'vee rihaan mayordomo yo' a.

<sup>3</sup> "Dan me se curihanj mayordomo, ne guun rá so' a: "Nihánj me se daj qui'yáj, ne ca'nee se-ru'vee 'unj suun ra'aj, ne daj qui'yáj cuano, raj a. 'Unj me se se guun nucuaj qui'yaj suun 'unj suun 'ee, ne na'aj 'unj cachinj 'unj caridad, na'aj 'unj cachee rma'anj nanj á. <sup>4</sup> Aan a. Nihánj me qui'yáj nanj á. Gaa ne asa' ca'néj ru'vee suun ra'aj gaa ne nuvi' rej ca'anj 'unj, gaa ne canacunj yo'ó nij so' manj ca'anj 'unj tucua' yo'ó nij so' cayánj a", guun rá so' a.

<sup>5</sup>“Gaa ne canacúun so' man nij síi qui'yaj xcúun rihaan se-ru'vee so', ne ca'na' 'o 'o nij so' rihaan so' a. Gaa ne rihaan síi taj yaan rihaan yo'ó nij so' cataj so': “Me daj qui'yaj xcúun so' rihaan se-ru'vee 'unj ga”, taj so', xná'anj so' man síi taj yaan yo' a. <sup>6</sup> Gaa ne so' cataj: “'O cientó tambo casté qui'yaj xcúnj rihaan se-ru'vee so' a”, taj so' rihaan mayordomo yo' a. Gaa ne cataj mayordomo yo' rihaan so': “Nijaj so' daán so' yanj cuentá nihánj, tíri' so' man yo', ne ra'yanj cayáán so', ne qui'yáá so' yo'ó yanj naca, ne cachron so' rihaan yanj naca se vaa vij chihaa chí' guée tambo qui'yaj xcúun so' á”, taj mayordomo yo' rihaan síi taj yaan yo' a. <sup>7</sup> Gaa ne xná'anj so' man yo'ó so', cataj so': “Ne so' ga. Me daj qui'yaj xcúun so' rihaan se-ru'vee 'unj ga”, taj so', xná'anj so' man yo'ó so' yo' a. “'O cientó nanj 'núú trigó a”, taj yo'ó so' a. “Nijaj so' daán so' yanj cuentá nihánj, tíri' so' man yo', ne qui'yáá so' yo'ó yanj naca, ne ca'anj chihaa guée nanj cachron so' rihaan yanj naca yo' á”, taj mayordomo rihaan yo'ó so' a.

<sup>8</sup>“Dan me se xcaj se-ru'vee mayordomo yo' cuentá se vaa qui'yaj chí'ii ndo'o mayordomo yo' rihaan so', tzaj ne ca'mii sa' ru'vee che'é mayordomo cataj ru'vee se vaa sij avii ndo'o raá me mayordomo yo' adonj. Danj nanj nij síi man rihaan chumii nihánj cuano, tzaj ne gaa 'yaj suun nij so' ga tuvi' ma'an nij so', ne doj a avii raá nij so' rihaan nij síi nocó' se-nana Diose nanj á.

<sup>9</sup>“Gaa ne cuano nihánj me se cataj xna'anj 'unj rihaan soj se vaa nij rasuun man rihaan chumii nihánj, tzaj ne 'yaj ndo'o nij yuvii cacun' che'é rej qui'yaj canaán nij yuvii rasuun man rihaan chumii nihánj, ne soj ro', vaa che'é nijaj soj si'yaj soj rasuun man rihaan chumii nihánj, ne go' soj man yuvii gaa ne guun tuvi' soj ga nij yuvii, qui'yaj rasuun yo' a. Ne güii navij nu' rasuun man rihaan chumii nihánj me se aj quiri' ndo'o soj tuvi' soj síi cayáán ga soj, gaa ne ve'é ndo'o cayáán soj ga nij tuvi' soj ga Diose rej xta' nu' cavii nu' ca'anj a. <sup>10</sup> 'O se síi ve'é tumé doj tzin' rasuun ro', so' me síi guun nucuaj cutumé nocoo rasuun, ne síi 'yaj chí'ii ga doj rasuun ro', chí'ii doj qui'yaj so' ga nocoo rasuun ei. <sup>11</sup> Che'é dan sese ne guun nucuaj soj cutumé sa' soj nij rasuun chí'ii man rihaan chumii nihánj, gaa ne me síi guun rá rque nij rasuun ya rihaan soj cutumé soj, rá soj ga. Taj vaj síi guun rá qui'yaj danj a ma'. <sup>12</sup> Ne nu-veé si'yaj ma'an ya soj me nij rasuun man rihaan chumii nihánj a man adonj. Ne sese ne guun nucuaj soj cutumé sa' soj nij rasuun man rihaan chumii nihánj, ne me síi guun rá rque rihaan soj rasuun guun si'yaj ma'an ya soj rej xta', rá soj ga. Taj síi guun rá qui'yaj danj ma'.

<sup>13</sup>“Taj vaj síi guun nucuaj cutumé sa' si'yaj vij ru'vee ma'. Sese qui'yaj suun ní' rihaan vij ru'vee, ne nachri' ní' ni'yaj ní' man 'o ru'vee yo', ne caran' rá ní' ni'yaj ní' man yo'ó ru'vee yo' a. Se guun nucuaj ní' caran' rá ní' ni'yaj ní' man vij ru'vee ma'. Ne xa' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun man rihaan chumii nihánj a ma' —taj Jesucristó rihaan nij síi tucu'yón se-nana so' a.

### Nana nihánj taj xna'anj se vaa tumé nij síi fariseo cacun' rihaan se-tucuaj Moisés a

<sup>14</sup> Dan me se nij síi fariseo ro', me síi aran' ndo'o rá ni'yaj sa'anj, ne gaa cuno nij so' cunudanj se-nana Jesucristó nana che'é rasuun man rihaan chumii nihánj, gaa ne ca'nga' nacoo nij so' ni'yaj nij so' man Jesucristó a. <sup>15</sup> Gaa ne cataj Jesucristó rihaan nij so' a:

—Xa' soj, tzaj ne nuvi' cacun' tumé soj ni'yaj yuvii, 'yaj soj ma'. Tzaj ne Diose ro', me síi ne'en daj vaa nimán soj adonj. 'O se sa' uxrá vaa 'yaj yuvii, rá tuvi' yuvii, tzaj ne chí'ii ndo'o 'yaj nij yuvii, rá Diose nanj adonj.

<sup>16</sup> 'O se gaa ataa ca'na' síi cu'naj Juan síi cuta' ne man yuvii me se cuno yuvii rihaan inanj se-tucuaj Moisés do', rihaan nij síi nata' se-nana Diose gaa naá do', tzaj ne yaj me se uno ndo'o yuvii nana sa' nana che'é güii guun chij Diose nimán yuvii man rihaan chumii nihánj, ne me inanj rá cunudanj nij yuvii cataj ma'an nij yuvii daj qui'yaj Diose asa' guun chij Diose adonj. <sup>17</sup> Tzaj ne ne nó xcúun ní' tanáj ní' a 'ó nana rque Diose rihaan ní' canoco' ní' ma'. 'O se ca'vee a doj quinavij rej xta' do', ca'vee a doj quinavij chumii nihánj do', tzaj ne se ca'vee quinavij a doj nana rque Diose rihaan ní' canoco' ní' ma'. <sup>18</sup> Dan me se sese quiri'ij yo'ó so' man nica so', ne sese xcaj so' man yo'ó chana, ne cutumé so' cacun', ne sese xcaj yo'ó so' man chana quiri'ij chii man, ne cutumé so' cacun' uún adonj —taj Jesucristó rihaan nij síi fariseo yo' a.

### Nihánj me cuentó nanó Jesucristó che'é ru'vee ne che'é 'o síi nique cu'naj Lázaro a

<sup>19</sup> Gaa ne nanó Jesucristó cuentó nihánj a:

—Ru'vee me yo'ó so', ne yatzi' sa' inanj cunuú so', ne daj a güii uun ndo'o nihaa sa' tucua so', ne guun niha' uxrá rá so' rihaan chumii nihánj a. <sup>20</sup> Ne naj 'o síi nique cu'naj Lázaro rihaan yo'ó ta'yaa ve' tucua ru'vee yo', ne man ndo'o luj xraá síi nique yo', <sup>21</sup> ne guun rá síi cu'naj Lázaro cha so' se quinij rihaan yo'ó rej chá ru'vee yo' chraa, tzaj ne daj doj chuvee ca'na' chavé luj xraá so' a.

<sup>22</sup> “Dan me se gaa quisij güii cavi' síi nique yo', gaa ne nicaj nij se-mozó Diose man so' ca'anj so' rej sa', ne na'yaan síi cu'naj Abraham man so' a. Ne cavi' ru'vee uún, ne cachin' nii man so' a. <sup>23</sup> Dan me se ca'anj so' rihaan ya'an, ne quiran' uxrá so' sayuun rihaan ya'an yo', gaa ne naxcaj so' rihaan so', ne quene'en so' se vaa gan' ndo'o ne síi cu'naj Abraham, ne na'yaan Abraham man síi cu'naj Lázaro yo' a. <sup>24</sup> Gaa ne canacúun so' man síi cu'naj Abraham, cataj so': “Cunuu 'ee rá so' manj, ataj Abraham. Ne ca'nej so' man síi cu'naj Lázaro se vaa ca'na' so' ne tiguú so' raá ra'a so' rque na, ne tucuachree so' ra'a so' daa 'unj, gaa ne cunuu cuij doj raj qui'yaj so', ataj. 'O se na'aan ndo'o manj, 'yaj ya'an nihánj nanj á”, taj ru'vee yo' rihaan síi cu'naj Abraham a.

<sup>25</sup> "Tzaj ne cataj Abraham rihaan so': "Tzaj ne nanuj rá so', ta'nij, se vaa gaa gaa i'ná' so' rihaan chumij ne nicaj so' inanj rasuun sa', ne Lázaro me se inanj rasuun chi'ij nicaj so' nanj á. Ne cuano nihánj me se uun nihá' nimán so', ne ma'án so' me se ran' sayuun a.

<sup>26</sup> Ne danj inanj uún, ne nuu 'o yu'uj cunuú ndo'o rej ne ní', ne veé danj se ca'vee cuchí' yuvij man nihánj ndaa rej ne nij soj yo', ne síí man yo' se ca'vee ca'na' rej nihánj a ma'", taj Abraham rihaan ru'vee yo' a.

<sup>27</sup> "Ne cataj ru'vee yo' rihaan Abraham a: "Che'é dan qui'yáá so' se ndo'o, ataj, ne ca'nej so' man síí cu'naj Lázaro ca'anj so' tucua réj, <sup>28</sup> ne vaa 'un' tinúj, ne me rá 'unj cataj xna'anj so' rihaan nij so' daj rán' 'unj nihánj, ne se ca'na' nij so' uún rej rán' 'unj sayuun nihánj a ma'", taj ru'vee rihaan Abraham a. <sup>29</sup> Gaa ne cataj Abraham rihaan so' a: "Vaa se-nana síí cu'naj Moisés do', se-nana nij síí nata' se-nana Diose gaa naá do', nicaj nij so' á. Ca'vee cunó nij so' nana yo' ei'", taj Abraham rihaan ru'vee a. <sup>30</sup> "Se cuno nij so', man ataj Abraham. Tzaj ne sese ca'anj 'o síí cavi' rihaan nij so', gaa ne canicaj nimán nij so' canoco' nij so' chrej sa', raj a", taj ru'vee rihaan Abraham a.

<sup>31</sup> "Tzaj ne cataj Abraham rihaan so' a: "Sese se ca'vej rá nij so' cunó nij so' rihaan síí cu'naj Moisés do', rihaan nij síí nata' se-nana Diose gaa naá do', ne ca'vee se cunuú i'ná' uún 'o síí cavi', tzaj ne se cuchumán rá nij so' ni'yaj nij so' man so' a ma'", taj Abraham rihaan ru'vee yo' a. —Veé danj quisij cuentó nanó Jesucristó a.

**Nana nihánj taj xna'anj se vaa no xcúún ní' racúij ní' man tinúú ní' se qui'yaj tinúú ní' cacun' a**

**17** Gaa ne cataj Jesucristó rihaan nij síí tucu'yón se-nana so' a:

—Xa' chumij nihánj, tzaj ne man ndo'o chrej chi'ij canoco' yuvij, ne vaa ya'núj uxrá rihaan nij yuvij canoco' nij yuvij chrej chi'ij adonj. Tzaj ne nique síí 'yaj anoco' yuvij chrej chi'ij yo' adonj. <sup>2</sup> Daj chihaa mij se cavii sa' so' ma'. Ne'en soj se vaa sese toco' vaj nii yuvej xij vāj 'núú trigó man chihá yo'o so', ne sese tagüéj nii man so' rque na ya'anj, ne nij uxrá vaa ran' síí 'anj nij rque na ya'anj yo' nanj adonj. Tzaj ne nij doj quiran' síí qui'yaj chi'ij nimán yo'o tuvi' soj síí nicaj nimán nanj á. 'O se quiran' so' sayuun nu' cavii nu' ca'anj nanj adonj.

<sup>3</sup> "Tumé uxrá soj man soj daj qui'yaj soj á. Sese qui'yaj tinúú so' cacun', ne cataj so' rihaan so' se vaa nij ndo'o qui'yaj so', ne sese canicaj nimán so' tanáj so' chrej chi'ij, ne caraa x'naa so' che'é cacun' tumé so' ei. <sup>4</sup> Dan me se ca'vee se chij ya qui'yaj so' cacun' rihaan so' rque orún' güii, tzaj ne sese chij cuchí' so' rihaan so' ne cataj so' se vaa canicaj nimán so' ne nij vaa cacun' qui'yaj so' rá so', ne caraa x'naa so' rihaan so' ei —taj Jesucristó rihaan nij síí tucu'yón se-nana so' a.

**Nana nihánj taj xna'anj che'é rasuun guun nucuaj ní' qui'yaj ní' sese cuchumán rá ní' ni'yaj ní' man Diose a**

<sup>5</sup> Gaa ne nij apóstol cune' Jesucristó man ro', cataj chuvij nij so' rihaan ma'anj Jesucristó sij 'nij ra'a man ní' a:

—Cataj xna'anj so' rihaan núj daj qui'yaj núj, gaa ne doj a cuchumán rá núj ni'yaj núj Diose á —taj nij so' rihaan Jesucristó a.

<sup>6</sup> Gaa ne cataj síí 'nij ra'a man ní' rihaan nij so' a:

—Sese daj se 'o snií cuchumán rá soj ni'yaj soj man Diose, ne sese ase vaa caân cuêj mostazá xlá gaa cuchumán rá soj, ne cataj soj rihaan chruun se vaa curihanj chruun yo'óó rej nicun' chruun ne ca'anj chruun canicun' chruun rque na ya'anj, ne cunó chruun rihaan soj ei —taj Jesucristó rihaan nij so' a.

**Nana nihánj taj xna'anj se vaa se ca'mii xtá' ní' che'é suun qui'yaj suun ní' che'é Diose ma'**

<sup>7</sup> Gaa ne cataj uún Jesucristó rihaan nij apóstol cune' so' a:

—Sese vaa mozó nuu rihaan 'o tuvi' soj, ne sese 'yaj suun uxrá mozó uxrá' mozó yo' yo'óó do', sese tumé mozó yo' daán soj xcuu do', ne daj cataj soj rihaan mozó nuu rihaan soj asa' namán mozó yo' ca'anj qui'yaj suun mozó tacaan ga. Ne se cataj soj rihaan mozó yo' se vaa nu' namán mozó ne nu' cayáán mozó chá mozó chraa ma'. Daj chihaa mij se tu'va soj danj a ma'. <sup>8</sup> Maan se cataj soj: "Qui'yaj chuvií so' chá 'unj chraa, ne cutá' so' chraa do', na do', rihaan mesá rej chá 'unj chraa, ne rque so' nij rasuun achiin manj, ne asa' quisij chaj chraa gaa ne ca'vee chá so' chraa ne co'o so' na á". Danj ca'mii soj rihaan se-mozó soj nanj á. <sup>9</sup> Ne se caráya'anj soj man mozó sese qui'yaj suun ndo'o mozó yo' suun ca'ne' soj rihaan mozó yo' ma'. <sup>10</sup> Ne ase vaa mozó nuu rihaan Diose vaa soj, ne che'é dan asa' quisij qui'yaj suun soj nu' suun ca'ne' Diose rihaan soj, ne cataj soj se vaa mozó rmii me soj, ne inanj do' suun ataj Diose rihaan soj qui'yaj suun soj nanj adonj —taj Jesucristó rihaan nij so' a.

**Nana nihánj taj xna'anj che'é síí samaritano síí nago' graciá rihaan Diose a**

<sup>11</sup> Dan me se vaj Jesucristó chrej ca'anj chuman' Jerusalén, ne cachéé so' chrej uun ran' estadó Samaria ga estadó Galilea, <sup>12</sup> ne dan me se daj doj catuu so' 'o chuman', ne nari' tuvi' so' ga chi' síí ran' luj ri'yuj a. Ne gan' canicun' nij so', <sup>13</sup> ne nucuaj canacúún nij so' man Jesucristó, ne cataj nij so':

—Cunuú 'ee rá so' man núj, maestró Jesucristó —taj nij so', caguáj nij so' a.

<sup>14</sup> Gaa ne quene'en Jesucristó man nij so', gaa ne cataj Jesucristó rihaan nij so' a:

—Cavij soj ca'anj soj, ne tihaa soj man soj rihaan nij xrej á —taj Jesucristó rihaan nij so' a.

Dan me se cuno nij so' nana ca'mii Jesucristó, ne cavii nij so', ca'anj nij so', ne gaa vaj nij so' chrej, ne

nahuun sa' cunudanj nij so' ta'aj chrej a. <sup>15</sup> Ne yo'o tuvi' nij so' ro', xcaj cuentá se vaa nahuun sa' so', gaa ne canicaj so' ca'anj so' rej vaj Jesucristó, ne nucuaj ndo'o caguáj so' cataj so' se vaa sa' uxrá qui'yaj Diose ga so' a. <sup>16</sup> Ne gaa cuchi' so' rihaan Jesucristó, gaa ne canicun' ruj so' ne nago' so' graciá rihaan Jesucristó a. Ne sí samaritano sí yanij ga nij yuvi' israelitá me so' a.

<sup>17</sup> Gaa ne cataj Jesucristó rihaan nij sí chéé ga so' a:

—Chí' ya yuvi' nahuun sa', qui'yáj, raj a. Ne me rej vaj yo'ó uun nij sí nahuun sa', rá soj ga. <sup>18</sup> Ne a 'ó nij so' ne canicaj cataj se vaa sa' uxrá qui'yaj Diose che'é so' a ma'. Orún' sí yanij nihánj me sí guun rá cataj daj qui'yaj Diose ga so' na' —taj Jesucristó, xná'anj so' man nij yuvi' chéé ga so' a.

<sup>19</sup> Gaa ne canicaj Jesucristó cataj Jesucristó rihaan sí samaritano yo':

—Naxumaan so', ne ca'anj so' á. Che'é se amán rá so' ni'yaj so' Diose ro', che'é dan aj nahuun sa' so' ei —taj Jesucristó rihaan so' a.

### Nana nihánj taj xna'anj che'é güii guun che'e Diose guun chij Diose rihaan chumi' nihánj a

<sup>20</sup> Dan me se xná'anj nij sí fariseo man Jesucristó me güii guun chij Diose rihaan chumi' nihánj a. Gaa ne cataj so' rihaan nij sí fariseo a:

—Taj che'é ni'yaj ndo'o soj ma'. Ca'vee se guun chij Diose rihaan chumi' nihánj, tzaj ne se quene'en yuvi' ma'. <sup>21</sup> Ne se cataj nii: "Ni'yaj so' ei. Nihánj me guun chij Diose á. Yo' me rej guun chij Diose á". Se ca'mii yuvi' daj ma'. 'O se sca'núj ma'an soj vaj 'o sí 'yaj uun chij Diose adonj —taj Jesucristó rihaan nij sí fariseo a.

<sup>22</sup> Gaa ne canicaj Jesucristó cataj so' rihaan nij sí tucuyón se-nana so' a:

—Vaa güii guun ndo'o rá soj quene'en soj güii nihánj güii vaj 'unj sij ca'née Diose nıcaj yu'unj man yuvi' rihaan chumi' nihánj, tzaj ne se ca'vee quene'en soj manj ma'. <sup>23</sup> Gaa ne cataj yuvi' rihaan soj: "Ni'yaj so' ei. Yo' me rej vaj Jesucristó ei". Ne cataj uun yuvi': "Ni'yaj so' ei. Nihánj me rej vaj Jesucristó ei", cataj yuvi' rihaan soj a. Tzaj ne se cavii soj nano' soj manj ma'. <sup>24</sup> Dan me se ndaa rá se uun gaa raan rihaan chumi' nihánj, ne 'o chuguun nu' rihaan chumi' nihánj ro', ne ne'en cunudanj yuvi' se vaa raan rihaan chumi' á. Ne ase uun rá soj ne'en soj gaa raan ro', daj guun rá soj asa' ca'ná' 'unj sij nıcaj yu'unj man yuvi', ne quene'en nu' yuvi' man rihaan chumi' nihánj se vaa ca'ná' 'unj adonj. <sup>25</sup> Tzaj ne vaa che'é quirán' 'unj que'ee sayuun asino yaan, gaa ne vaa che'é nachri' nij sí man rihaan chumi' nihánj ni'yaj nij so' manj a.

<sup>26</sup> Ne ase vaa qui'yaj yuvi' gaa cayáan sí cu'naj Noé rihaan chumi' ro', daj gaa qui'yaj uun yuvi' asa' ca'na' uun 'unj sij ca'née Diose nıcaj yu'unj man yuvi' rihaan chumi' nihánj adonj. <sup>27</sup> Dan me se chá yuvi' do', co'o yuvi' do', ne xcaj tuvi' nij yuvi' do', inanj daj qui'yaj nij yuvi' ndaa quisj güii catúj nij tuvi' sí cu'naj Noé rque rihoo xij chéé rihaan na a. Gaa ne taj ni'yón caman' ndo'o, ne ca'na' na ya'anj, ne caráan na ya'anj xráa cunudanj nij so', ne cavi' nij so' a. <sup>28</sup> Ne ase vaa qui'yaj

nij yuvi' man chuman' cu'naj Sodoma gaa cayáan sí cu'naj Lot ro', daj qui'yaj uun yuvi' asa' ca'na' uun 'unj rihaan chumi' nihánj adonj. Dan me se chá nij so' do', co'o nij so' do', quiránj nij so' rasuun cutu'vej nij so' do', cunó nij so' naa do', cune' nij so' ve' do', <sup>29</sup> ne nu' curihanj sí cu'naj Lot chuman' Sodoma, ne nu' cavii ya'an rej xtá' ga yo'ó azufre, cayuu yo' rihaan chuman' yo', ne cacaa nu' chuman' yo', ne cavi' cunudanj nij sí man chuman' yo' a. <sup>30</sup> Ne ase vaa ne xcaj nij yuvi' man gaa naa cuentá se vaa quirán' nij so' sayuun ro', daj gaa uun yuvi' asa' quisj ca'na' uun 'unj sij nıcaj yu'unj man yuvi' rihaan chumi' nihánj adonj. 'O se ndaa sij güii quene'en nij so' manj, gaa ne xcaj nij so' cuentá a.

<sup>31</sup> "Ne güii guun daj me se xa' sí taj xráa ve' tucua me se se ca'vee catuu so' rá ve' tucua so' quirii so' si'yaj so' ma'. Ne sí nuu tacaan 'yaj suun tacaan ro', se canicaj so' nano' so' si'yaj so' ma'. Maan se yo'o cunanj nij so' á. <sup>32</sup> Vaa che'é nanuj rá soj daj quiran' nıca sí cu'naj Lot gaa canicaj no' ni'yaj no' rej xcó no', ne cavi' no' a.

<sup>33</sup> "Sí chu'vi' ndo'o cavi' rihaan chumi' nihánj ro', cavii nu' so', ne sí cavi' ro', so' me sí gaa i'na' nimán nu' cavii nu' ca'anj adonj.

<sup>34</sup> "Cuanó nihánj me se cataj xna'anj 'unj rihaan soj a: Ne güii guun daj me se rej ni' ro', quitaj roj nıca roj so' cotoj roj so', ne nacaj se-mozó Diose man yo'o so', ne quinaj yo'ó so' a. <sup>35</sup> Ne cunuú vij roj chana gaj roj no' 'núú trigó, ne nacaj se-mozó Diose man yo'o no', ne quinaj yo'ó no' a. <sup>36</sup> Ne cunuú vij roj snó'o qui'yaj suun roj so' yo'ó, ne nacaj se-mozó Diose man yo'o so', ne quinaj yo'ó so' nanj adonj —taj Jesucristó rihaan nij so' a.

<sup>37</sup> Gaa ne xná'anj nij sí tucuyón se-nana Jesucristó man so', ne:

—Ne me rej ca'na' so', ga Señor —taj nij so', xná'anj nij so' a.

Gaa ne cataj Jesucristó rihaan nij so' a:

—Aj ne'en soj daj 'yaj yachruú vaj rej xtá', ne ne'en ma'an xo' me rej naj nee cha xo' a. Taj sí nata' rihaan xo' me rej naj nee yo' ma'. Ne ase uun rá yachruú ro', daj guun rá ma'an soj asa' ca'na' uun 'unj rihaan chumi' nihánj adonj. Quene'en ma'an soj sij man rihaan chumi' nihánj me rej ca'na' 'unj adonj —taj Jesucristó rihaan nij so' a.

### Nihánj me cuentó che'é chana cavi' nıca cachíin ni'yaj ndo'o rihaan cuesa a

**18** Ne nanó Jesucristó cuentó nihánj rihaan nij sí tucuyón se-nana so', che'é rej guun rá so' xcaj nij sí tucuyón se-nana so' cuentá se vaa no xcúun nij so' nıganj cachınj ni'yaj nij so' rihaan Diose, ne se guun rmıj nij so' ma'. <sup>2</sup> Dan me se cataj Jesucristó a:

—'O cuesa cayáan rque 'o chuman' me yo'o so', ne nuveé sij amán rá ni'yaj man Diose do', nuveé sij aráj cochroj rihaan yuvi' do', me cuesa yo' a. <sup>3</sup> Ne yáan 'o chana cavi' nıca chuman' yo', ne guun che'e no' cachıin ni'yaj no' rihaan so' se vaa qui'yaj so' sayuun

man sí qui'yaj sayuun man no' a. <sup>4</sup> Ne a doj ne ca'vej rá so' racuíj so' man no' a. Tzaj ne 'o güii me se guun rá ma'an cuesé yo', ne: "Ca'vee se ne amán raj ni'yaj 'unj Diosé do', ca'vee se ne aráj cōchrój rihaan yuvií do', <sup>5</sup> tzaj ne che'é se guun rmií ndo'oj 'yaj chana cavi nica nihánj, ne che'é dan ca'ne' cāchríí 'unj cacun' che'é síí 'yaj sayuun man no', ne ca'vee a. Se taj, ne guun rmií xrée 'unj, qui'yaj no' vaa güii adonj", guun rá cuesé yo' a <sup>6</sup> —taj síí 'nij ra'a man ní', ne cataj uún so'— Xcaj soj cuentá daj ca'mii cuesé vaa quij nimán yo' á. <sup>7</sup> Ne dan me se táá a nij síí narii Diosé, ne nuvíí nigán' aguáj ndo'o nij so', achíín ni'yaj nij so' rihaan Diosé, ne Diosé, tzaj ne se ca'ne' Diosé cacun' che'é nij síí 'yaj sayuun man nij so', rá soj na'. Guun raan ndo'o Diosé ca'ne' so' cacun', rá soj na'. Se guun danj rá soj ma'. <sup>8</sup> 'O se cataj xna'anj 'unj rihaan soj cuano se vaa ra'yanj uxrá ca'ne' Diosé cacun' che'é nij síí 'yaj sayuun man nij síí narii so' man adonj. Tzaj ne dan me se asa' ca'na' uún 'unj sij nicaj yu'unj man yuvií rihaan chumii nihánj, ne me daj yuvií amán rá ni'yaj man Diosé narij ga —taj Jesucristó rihaan nij síí tucu'yón se-nana so' a.

#### Nihánj me cuentó nanó Jesucristó che'é vij síí cachíín ni'yaj rihaan Diosé a

<sup>9</sup> Gaa ne nanó Jesucristó cuentó nihánj rihaan ta'aj yuvií guun rá se vaa sij sa' inanj me ma'an nij so' ne nachri' nij so' ni'yaj nij so' man yo'ó yuvií a:

<sup>10</sup> —Canicun' vij snó'o rá nuvíí nocōo, cachíín ni'yaj roj so' rihaan Diosé a. Yo' o so' ro', me síí fariseo, ne yo'ó so' ro', me síí tiha' yu'unj man yuvií che'é puextó a.

<sup>11</sup> "Dan me se canicun' síí fariseo yo', ne cachíín ni'yaj so', ne cataj so' nana nihánj rihaan Diosé a. 'O se ne ca'mii nucuaj so' ma'. Maan se rihaan ma'an so' ca'mii so', cataj so': "Guun ni'yaj uxrá ní', Ataj Diosé. Guun ni'yaj uxrá ní' se vaa ne 'yáá 'unj ndaa vaa 'yaj yo'ó nij yuvií ma'. Dan me se xa' nij so', tzaj ne sij tiha' yu'unj do', sij tumé cacun' do', sij otoj ga nica yo'ó yuvií do', me nij so', ne ne 'yáá 'unj danj ma'. Ne guun ni'yaj ní' se vaa ne 'yáá 'unj ndaa vaa 'yaj síí nihánj síí tiha' yu'unj man yuvií che'é puextó a. <sup>12</sup> Ne vij ya aráj guēē 'unj che'é se chá 'o 'o tunj güii, ne rquē 'unj 'o pesó rihaan daj a chí' pesó 'yaj canaán 'unj rihaan so' ei", taj síí fariseo yo' rihaan Diosé a.

<sup>13</sup> "Ne gan' doj tzin' nicun' síí a'néj puextó man yuvií yo', ne guun na'aj ndo'o so' ni'yaj so' man so' rihaan Diosé, ne ne ca'vej rá so' naxcaj so' rihaan so' ni'yaj so' rej nicun' Diosé a. Tzaj ne go' so' se-cuxru' so' rucuaa ma'an so', ne cataj so': "Cunyu 'ee rá so' ni'yaj so' manj, Ataj Diosé. 'O se sij tumé cacun' mej adonj", taj so' rihaan Diosé a.

<sup>14</sup> "Ne cuano nihánj me se cataj xna'anj 'unj rihaan soj se vaa gaa quinan' síí tiha' yu'unj man yuvií che'é puextó yo' tucua so', gaa ne aj cunuu sa' so' rihaan Diosé nanj á. Tzaj ne yo'ó so' ro', taj ma'. 'O se xa' síí me rá tacavii sa' man ma'an, tzaj ne quirí' so', ne guun na'aj so' a. Ne xa' síí naqui'yaj nica' nimán, tzaj ne cavii

sa' ndo'o so' adonj —taj Jesucristó rihaan nij yuvií yo' a.

#### Nana nihánj taj xna'anj me che'é caran' rá Jesucristó ni'yaj so' man ne'ej a

<sup>15</sup> Gaa ne nica'j nij yuvií man nij ne'ej ca'na' nij yuvií rihaan Jesucristó a. 'O se me rá nij yuvií cuta' Jesucristó ra'a so' raaj nij ne'ej che'é rej quirí' ne'ej xna'anj ni'yaj ne'ej a. Tzaj ne quene'en nij síí tucu'yón se-nana Jesucristó daj qui'yaj nij yuvií, gaa ne cataj xna'anj nij so' rihaan nij yuvií se vaa ne nó xcúún nij ne'ej ca'na' nij ne'ej rihaan Jesucristó a. <sup>16</sup> Tzaj ne canacúún Jesucristó man nij síí tucu'yón se-nana so', ne cataj Jesucristó rihaan nij so' a:

—Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'O se tucua' nij síí vaa danj ro', me rej yanj Diosé uun chij Diosé nanj adonj. <sup>17</sup> Ya ya cataj xna'anj 'unj rihaan soj cuano se vaa síí na'vej rá guun chij Diosé nimán, ndaa vaa a'vej rá ne'ej guun chij Diosé nimán ne'ej ro', daj chihaa míj se cayáán so' ga Diosé asa' guun chij Diosé rihaan chumii nihánj ma' —taj Jesucristó rihaan nij síí tucu'yón se-nana so' a.

#### Nana nihánj taj xna'anj che'é 'o síí me rá cayáán ga Diosé nu' cavii nu' ca'anj a

<sup>18</sup> Dan me se xná'anj 'o síí nica'j suun yo' man Jesucristó, cataj so' rihaan Jesucristó a:

—Maestro. Síí sa' uxrá mé so' adonj. Daj qui'yaj, ne ca'vee cayánj ga Diosé nu' cavii nu' ca'anj ga —taj síí nica'j suun yo', xná'anj so' man Jesucristó a.

<sup>19</sup> Gaa ne cataj Jesucristó rihaan so' a:

—Me che'é cataj so' se vaa síí sa' uxrá mej ga. 'O se orún' Diosé me síí sa' á. <sup>20</sup> Ne aj ne'én so' nij nana nocōo ya ya nana cataj xna'anj Diosé se vaa canocō' ní' á. Dan me se taj nana yo': "Se cotoj so' ga chana nica yo'ó yuvií ma'. Se ticaví' so' yuvií ma'. Se qui'yaj ituu so' si'yaj yo'ó yuvií ma'. Se nanó so' cuentó ne che'é yuvií ma'. Caraa cōchróo so' rihaan rée so' do', rihaan níí so' do' á". Yo' me nana cunó so' ei —taj Jesucristó rihaan síí nica'j suun yo' a.

<sup>21</sup> —Asij gaa mej xnii me ve'é unó 'unj nu' nij nana yo' nanj á —taj so' rihaan Jesucristó a.

<sup>22</sup> Gaa ne cataj Jesucristó rihaan so' a:

—Daj orún' rasuun achiin ya man so' nanj ei. Dan me se cutu'vee so' cunudanj si'yáá so', ne sa'anj quirí' so' ro', caxrií so' ston nij síí nique, ne cumān ndo'o si'yáá so' rej xta', qui'yaj Diosé nanj ei. Ne dan me se ca'na' so', ne canocó' so' manj, ca'anj ní' á —taj Jesucristó rihaan so' a.

<sup>23</sup> Dan me se cuno síí nica'j suun yo' nana nihánj, gaa ne quinanó ndo'o rá so' a. 'O se síí ru'vee ndo'o me so' a.

<sup>24</sup> Dan me se ni'yaj Jesucristó man so', ne cataj Jesucristó:

—Sayuun uxrá vaa quisij nij síí vaa ndo'o sa'anj rihaan cayáán nij so' ga Diosé asa' guun chij Diosé rihaan chumii nihánj nanj adonj. <sup>25</sup> Dan me se ne'en soj

se vaa sayuun ndo'o vaa cachēn xcuu camelló yu'uj taj tacúun cúu nuvá, tzaj ne ca'vee a doj cachēn xcuu yo' yu'uj taj tacúun cúu nuvá, ndaa rá se vaa sí ru'vee, ne se guun cachēn ma'an sí ru'vee cayáan so' ga Diose asa' guun chij Diose rihaan chumii nihánj a ma' —taj Jesucristó a.

<sup>26</sup> Gaa ne xná'anj nij sí cuno nana nihánj man Jesucristó, cataj nij so':

—Che'é dan me se me sí guun nucuaj quinaniij rihaan sayuun ga —taj nij so', xná'anj nij so' man Jesucristó a.

<sup>27</sup> Gaa ne cataj Jesucristó rihaan nij so' a:

—Xa' rasuun na'vee qui'yaj ma'an inanj yuvii, tzaj ne Diose me sí uun nucuaj qui'yaj nu' rasuun yo' adonj —taj Jesucristó rihaan nij so' a.

<sup>28</sup> Gaa ne cataj Pedró rihaan so' a:

—Ne núj ga. Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

<sup>29</sup> Gaa ne cataj Jesucristó rihaan nij so' a:

—Cuanō nihánj me se cataj yá 'unj rihaan soj se vaa sí tanáj ve' tucua tanáj nica tanáj tinúú tanáj tuvi' tanáj ta'ní tanáj, che'é rej guun chij Diose rihaan chumii nihánj ro', <sup>30</sup> uxrá doj a rasuun quirí' uún so' gaa vaa i'na' so' rihaan chumii nihánj, ne asa' guun chij Diose rihaan chumii nihánj me se yo'o cayáan so' ga Diose nu' cavii nu' ca'anj nanj adonj —taj Jesucristó rihaan nij so' a.

**Nana nihánj taj xna'anj se vaa síj va'núj cataj xna'anj Jesucristó se vaa caví' so' ne cunuu i'na' uún so' a**

<sup>31</sup> Dan me se nicaj Jesucristó chujij nij sí tucu'yón se-nana so' ca'anj so', ne cataj so' rihaan nij so':

—Nihánj me ca'anj ní chuman' Jerusalén, ne asa' cuchi' ní, ne quisij ya nu' nana cataj xna'anj nij sí nata' se-nana Diose gaa naá che'é 'unj sij ca'née Diose nicaj yu'unj man yuvii, <sup>32</sup> ne dan me se tachuachén nii manj rihaan nij sí yaníj, ne ca'nga' nacoo nij so' quene'en nij so' manj, ne qui'yaj chilíi nij so' manj, ne quirii talúj nij so' manj, <sup>33</sup> ne go' nij so' cuartá xráj, gaa ne ticaví' nij so' manj a. Gaa ne cachēn va'núj güii, gaa ne cunuu i'na' uún 'unj, qui'yaj Diose ei —taj Jesucristó rihaan nij so' a.

<sup>34</sup> Ne ne quene'en uxrá nij so' me che'é ca'mii Jesucristó danj ma'. 'O se ne ca'vee xcaj nij so' cuentá che'é nana yo' ma'.

**Nana nihánj taj xna'anj se vaa naxra' rihaan 'o sí tuchrii, qui'yaj Jesucristó a**

<sup>35</sup> Dan me se gaa quinichrun' Jesucristó chuman' Jericó, ne yáan 'o sí tuchrii tu'va chrej, ne achín so' caridad rihaan yuvii a. <sup>36</sup> Dan me se cuno sí tuchrii yo' se vaa cachén ndo'o yuvii chrej rej ne so', ne che'é dan xná'anj so' man yuvii che'é rej vaj ndo'o yuvii chrej yo' a. <sup>37</sup> Gaa ne cataj xna'anj nii rihaan so' se vaa Jesucristó sí cavii chuman' Nazaret me sí achén rej ne nij so' a. <sup>38</sup> Gaa ne dan me se caguáj sí tuchrii yo', cataj so':

—Ya ya ta'ní ta'nij si'no sí cu'naj David sí cane gaa naá mé so', Jesús. Cunuu 'ee rá so' manj ei —taj so', caguáj so' a.

<sup>39</sup> Gaa ne cataj nij sí racuíj man so' chéé so' se vaa se tu'va so' danj, maan se:

—Dínj gaa tu'vá so' á —taj nij so' rihaan sí tuchrii, tzaj ne doj a nucuaj caguáj so', cataj so':

—Ta'ní ta'nij si'no sí cu'naj David mé so' ei. Cunuu 'ee rá so' manj ei —taj so', caguáj so' rihaan Jesucristó a.

<sup>40</sup> Canicun' Jesucristó, ne canacúun Jesucristó man sí tuchrii se vaa racuíj nii man so' ca'na' so' rihaan Jesucristó a. Ne gaa quinichrun' sí tuchrii yo' rihaan Jesucristó, ne xná'anj Jesucristó man so', cataj Jesucristó rihaan so' a:

<sup>41</sup> —Daj qui'yáj mán so', rá so' ga —taj Jesucristó, xná'anj Jesucristó man so' a.

—Curuvi' rihanj raj, Señor —taj so' rihaan Jesucristó a.

<sup>42</sup> Gaa ne cataj Jesucristó rihaan so':

—Ca'vee curuvi' rihaan so' á. Maan che'é se amán rá so' ni'yaj so' manj ro', che'é dan nahuun sa' so' ei —taj Jesucristó a.

<sup>43</sup> Ne nu' curuvi' rihaan so', gaa ne canoco' so' xcó Jesucristó, ne nata' so' se vaa sa' uxrá qui'yaj Diose ga so' a. Ne nu' nij yuvii quene'en daj quiran' so' cataj se vaa sa' uxrá qui'yaj Diose a.

**Nana nihánj taj xna'anj daj qui'yaj sí cu'naj Zaqueo gaa guun rá so' quene'en so' man Jesucristó a**

**19** Dan me se catúj Jesucristó chuman' Jericó, ne cachén so' chuman' yo', <sup>2</sup> ne yáan 'o sí cu'naj Zaqueo chuman' yo', ne so' me sí uun chij rihaan nij sí tiha' yu'unj man yuvii che'é puextó, ne ru'vee ndo'o so' a. <sup>3</sup> Dan me se guun rá so' quene'en so' me sí me Jesucristó, tzaj ne ne ca'vee quene'en so', che'é se man ndo'o yuvii, ne sí chre' nii vaa sí cu'naj Zaqueo a. <sup>4</sup> Che'é dan yoo cunánj so' quitáa yaan so' rihaan nij yuvii, gaa ne cavii so' raá 'o chruun man chruj higó raá, che'é yan me rá so' quene'en so' man Jesucristó a. 'O se cachēn Jesucristó tacóo chruun yo' a. <sup>5</sup> Dan me se gaa cuchi' Jesucristó tacóo chruun taj Zaqueo, ne ni'yaj Jesucristó raá chruun, ne cataj so' rihaan Zaqueo a:

—Nanij so' cuaj rihaan yo'óo, Zaqueo. 'O se vaa che'é ndo'o carán' 'unj ve' tucua so' cuan' á —taj Jesucristó rihaan Zaqueo a.

<sup>6</sup> Gaa ne yoo nanij Zaqueo rihaan yo'óo, ne guun niha' uxrá rá so' se vaa carán' Jesucristó tucua so' a.

<sup>7</sup> Dan me se cuno nij yuvii daj cataj Jesucristó, gaa ne nij ca'mii nij yuvii ni'yaj nij so' man Jesucristó a. Ne cataj nij so' che'é Jesucristó a:

—Nihánj me se carán' so' tucua 'o sí tumé ndo'o cacun' adonj —taj nij yuvii ni'yaj nij so' man Jesucristó a.

<sup>8</sup> Tzaj ne canicun' ma'an Zaqueo, cataj so' rihaan sí 'nij ra'a man ní' a:

—Cuanō nihánj me se rque 'unj yanēj si'yáj rihaan nij sí nique, ne nij sí tiha' yu'unj 'unj man, tzaj ne

naqui'yáj 'ó cunū' ca'anj narque 'unj rihaan nij so' se vaa ca'néj 'unj man nij so', Señor —taj so' rihaan Jesucristó a.

<sup>9</sup> Gaa ne cataj Jesucristó rihaan so' a:

—Cuan' me se aj cavii sa' nij tucua sít nihánj, ndaa rá se vaa 'o ta'níi sít cu'naj Abraham gaa naá ro', danj vaa ma'an so' cuano a. <sup>10</sup> 'O se ca'ná' 'unj sij nicaj yu'unj man yuvii che'é rej ca'vee nano' 'unj man nij sít ca'anj ni'ya, ne cavii sa' nij so' qui'yáj adonj —taj Jesucristó rihaan nij so' a.

### Nana nihánj me cuentó nanó Jesucristó che'é sít racuj sa'anj rihaan se-mozó so' a

<sup>11</sup> Dan me se cuno nij sít man chuman' Jericó se-nana Jesucristó, tzaj ne guun rá nij so' se vaa che'é se nichrun' Jesucristó chuman' Jerusalén, che'é dan ra'yanj guun chij Diosé rihaan chumii nihánj adonj, rá nij so', ne che'é dan guun che'e Jesucristó naqui'yaj Jesucristó yo'q cuentó nihánj, gaa ne ca'vee xcax nij yuvii cuentá a. <sup>12</sup> Dan me se cataj so' a:

—Yo'q sít xna'anj ru'vee guun rá quinaj suun uun chij chiháán, ne guun rá so' ca'anj so' chuman' raa ne nata suun so' suun guun chij chiháán so', gaa ne canicaj so' namán so' chiháán so', rá so' a. <sup>13</sup> Gaa ne canacúún so' man chi' nij se-mozó so' ca'na' rihaan so', gaa ne rque so' 'o sa'anj mina rihaan 'o 'o nij so', ne cataj xna'anj so' rihaan nij so' se vaa qui'yaj suun nij so' ga sa'anj, ne tanaca nij so' man sa'anj, ne ndaa quisij güii namán uún so', gaa ne nuchruj nij so' cuentá, taj so' a. Danj ca'mii so', gaa ne cavii so' ca'anj so' a.

<sup>14</sup> Tzaj ne nij sít man chiháán so' ro', quitáa ri'yunj man so', ne che'é dan ca'néj nij so' sít ca'anj suun ca'anj cataj xna'anj rihaan sít nicaj suun rej ca'anj sít xna'anj ru'vee yo' se vaa ne ca'vej rá nij so' guun chij sít xna'anj ru'vee yo' rihaan nij so' a.

<sup>15</sup> Dan me se ya qui'yaj canaán sít xna'anj ru'vee yo' guun chij so' chiháán so', gaa ne gaa namán so', ne cataj xna'anj so' se vaa nacunj nii man chi' nij se-mozó so' nij sít rque so' sa'anj rihaan a. 'O se guun rá so' xcax so' cuentá me daj sa'anj qui'yaj canaán nij so' a.

<sup>16</sup> Dan me se sít ca'na' asino yaan rihaan so' ro', cataj: "Xa' sa'anj mina rque so' manj, tzaj ne qui'yaj canaán 'unj 'ó chi' sa'anj mina uún, qui'yaj sa'anj yo', señor", taj so' rihaan sít xna'anj ru'vee yo' a. <sup>17</sup> Gaa ne cataj sít xna'anj ru'vee yo' rihaan mozó yo': "Cunaj uxrá qui'yáa so' á. Mozó sa' inanj mé so' ei. Che'é dan guun chij so' rihaan chi' ya chuman', qui'yáj a", taj sít xna'anj ru'vee rihaan mozó sa' yo' a.

<sup>18</sup> Dan me se ca'na' uún yo'ó mozó, cataj so': "Xa' sa'anj mina rque so' manj, tzaj ne qui'yaj canaán 'unj yu'un' sa'anj mina uún, qui'yaj sa'anj yo', señor", taj so' rihaan sít xna'anj ru'vee yo' a. <sup>19</sup> Ne cataj sít xna'anj rihaan so': "Gaa ne guun chij so' rihaan 'un' ya chuman' nanj ei", taj so' rihaan yo'ó mozó yo' a.

<sup>20</sup> Dan me se ca'na' yo'ó so' uún, ne cataj so': "Nihánj me nacaj so' se-sa'anj so', señor. 'O se caraa sa' 'unj man yo' rque 'o vitó, <sup>21</sup> ne chucu'ví' 'unj ni'yaj 'unj mán so', che'é se sij sca' ndo'o nimán mé so', ne nax-

cax so' rasuun rej nuvi' rasuun cutá' so', ne yo'ó yuvii unô caân, ne so' me se, ne ma'an so', ne rii so' naa adonj", taj mozó yo' rihaan sít xna'anj ru'vee yo' a.

<sup>22</sup> Gaa ne cataj sít xna'anj ru'vee rihaan mozó yo':

"Mozó chi'ij nimán mé so' ei. Cutá' 'unj cacun' xráa so' che'é nana tu'va ma'an so' á. 'O se quene'én so' se vaa sij sca' ndo'o nimán mej, ne quene'én so' se vaa naxcaj 'unj rasuun rej nuvi' rasuun cutaj, ne quene'én so' se vaa yo'ó yuvii unô caân ne 'unj rii naa nanj á.

<sup>23</sup> Che'é dan me che'é ne tucuachén so' se-sa'anj 'unj rihaan nij sít nuta' sa'anj ga. Gaa ne gaa ca'ná' 'unj, ne nacaj 'unj se-sa'anj 'unj ga sa'anj nata' raa yo' ga", taj sít xna'anj ru'vee yo' rihaan mozó rmii yo' a. <sup>24</sup> Gaa ne cataj so' rihaan yo'ó nij sít nicun' ga so' a: "Ca'neé soj sa'anj nicaj mozó chi'ij nihánj, ne tucuachén soj rihaan sít nicaj chi' sa'anj mina yo' á", taj sít xna'anj ru'vee yo' rihaan yo'ó nij so' a. <sup>25</sup> "Tzaj ne aj nicaj so' 'o chi' vaa guéé á", cataj nij so' rihaan sít xna'anj ru'vee yo' a.

<sup>26</sup> "Taj se 'yaj ma'. Cuanó nihánj me se cataj xna'anj 'unj rihaan soj se vaa sít ne'en sa' qui'yaj suun rihanj ro', ne vaa güii, ne doj a guun nucuaj so' qui'yaj suun so' adonj. Ne sít ne ne'en qui'yaj suun rihanj ro', ca'neé 'unj suun le'ej nii atá so', ne quinaj uun so' adonj", taj sít xna'anj ru'vee yo' rihaan nij so' a. <sup>27</sup> Gaa ne cataj uún so': "Tzaj ne xa' nij sít taj ri'yunj manj sít ne ca'vej rá guun chij 'unj rihaan, tzaj ne nicaj soj man nij so' ca'na' soj rihanj, gaa ne ticavi' soj man nij so' rihanj nihánj ei", taj uún so' a. <sup>28</sup> —Veé danj quisij cuentó nanó Jesucristó a.

Gaa ne cavii so' ca'anj so' chuman' Jerusalén, ne táa yaan so' rihaan nij sít tucu'yón se-nana so' a.

### Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a

<sup>29</sup> Dan me quinichrun' Jesucristó roj chuman' cu'naj Betfagé ga Betania a. Naj roj chuman' yo' tacóo quij cu'naj Quij man Chruun Olivó a. Gaa ne ca'néj Jesucristó man vij tuvi' nij sít tucu'yón se-nana so' ca'anj rque chuman' Betfagé, <sup>30</sup> ne cataj so' rihaan roj so' a:

—Cavii roj soj ca'anj soj, ne catuy roj soj chuman' nihánj chuman' naj rihaan ní, ne asa' catúj roj soj, ne nari' roj soj man yo'q burró le'ej ya'anj numii a. Dan me se nache roj soj man xo', ne nicaj roj soj ca'na' roj soj rihanj nihánj á. <sup>31</sup> Ne sese xna'anj nii man roj soj me che'é nache roj soj burró, ne cataj roj soj: "Sít 'nij ra'a man ní' achiin xcuu nihánj rihaan chuguanj", cataj roj soj á —taj Jesucristó rihaan roj sít tucu'yón se-nana so' a.

<sup>32</sup> Dan me se ca'anj roj so', ne catúj roj so' chuman' yo', ne nari' roj so' man burró le'ej, ndaa vaa cataj xna'anj Jesucristó rihaan roj so' a. <sup>33</sup> Ne gaa nache roj so' man burró, ne xna'anj nij sít daan burró man roj so' a:

—Me che'é nache soj burró ga —taj nij so', xna'anj nij so' man roj so' a.

<sup>34</sup> Gaa ne cataj roj so' rihaan nij sít daan burró a:

—Sít 'nij ra'a man ní' achiin xcuu nihánj rihaan chuguanj —taj roj so' a.



<sup>35</sup> Gaa ne nicaj roj so' xcuu ca'na' roj so' rihaan Jesu-cristó, ne cuta' roj so' sagan' roj so' xráá burró, ne tacavii roj so' man Jesucristó xráá burró yo', <sup>36</sup> ne gaa vaj Jesucristó, ne cuchruj ndo'o nij yuvij yatzij sagan' nij so' rá chrej, ne achén Jesucristó ga burró yo' rihaan yatzij a. <sup>37</sup> Dan me se quinichrun' Jesucristó chuman' Jerusalén, ne vaj so' tacóó Quij man Chruun Olivó rej vaj nij chrej, ne guun che'e que'ee nij sí tucu'yón se-nana so' guun niha' rá nij so', ne aguáj nij so', ca'mii sa' nij so' che'é Diosé che'é nu' nij suun sa' no-cóo qui'yaj Jesucristó quene'en nij so' a. <sup>38</sup> Dan me se cataj nij so':

—Cunaj uxrá vaa ca'na' sí ca'néé sí 'nij ra'a man ní' ei. Sí nicaj suun rey uun chij rihaan ní' me so' ei. Ve'é cayáán Diosé sí nicun' xtá' á. Cunaj uxrá 'yaj so' ei —taj nij yuvij, caguáj nij so' a.

<sup>39</sup> Dan me se ta'aj nij sí chéé ga Jesucristó me sí fariseo, ne ta'aj nij so' cataj rihaan Jesucristó a:

—Cataj xna'anj so' rihaan nij sí tucu'yón se-nana so' se vaa ca'ne' rá nij so' ga nana vaa danj á —taj nij so' rihaan Jesucristó a.

<sup>40</sup> Gaa ne cataj so' rihaan nij so' a:

—Cataj xna'anj 'unj rihaan soj cuano se vaa sese dínj gaa tu'va nij sí aguáj nana vaa danj, ne ma'an nij yahij naj rihaan yo'óo nihánj caguaj nana vaa danj asuun nanj adonj —taj Jesucristó rihaan nij sí fariseo yo' a.

<sup>41</sup> Ne gaa quinichrun' Jesucristó chuman' Jerusalén yo', ne ta'vee Jesucristó che'é chuman' yo', <sup>42</sup> ne cataj so':

—Güii cuan' me se me inanj raj quene'en soj sij man chuman' Jerusalén daj qui'yaj soj ne ca'vee dínj cayáán soj, tzaj ne cuano nihánj me se se ca'vee xcaj soj cuentá ma'. <sup>43</sup> Dan me se quisij ya güii, ne ca'na' nij sí taj ri'yunj man soj, ne cune' nij so' chingá nu' anicaj chiháán soj, ne tucuachrijin nij so' man soj, ne se ca'vee curihanj soj, qui'yaj nij so' ma'. <sup>44</sup> Ne tucuanee nij so' nu' chiháán soj, ne cavi' soj, ne a 'ó yuvej se quitáá xráá tuvi' yuvej, qui'yaj nij so' ma'. Danj quiran' soj, che'é se gaa guun rá Diosé racúij Diosé man soj, ne ne xcaj soj cuentá ma' —taj Jesucristó ni'yaj so' man nij sí man chuman' Jerusalén yo' a.

**Nana nihánj taj xna'anj se vaa quirii Jesucristó man nij yuvij tu'vej rasuun rá nuví nocoo a**

<sup>45</sup> Gaa ne catúj Jesucristó rá nuví nocoo, gaa ne guun che'e so' quirii so' man nu' nij yuvij tu'vej rasuun man rá nuví nocoo a. <sup>46</sup> Ne cataj so' rihaan nij so' a:

—Danj Diosé taj se vaa tucua Diosé me rej na'víj yuvij rihaan Diosé á. Tzaj ne guun tucua sí ituu man tucua Diosé nihánj, qui'yaj soj nanj á —taj Jesucristó rihaan nij yuvij quirii so' a.

<sup>47</sup> Ne dan me se daj a güii nicun' Jesucristó rá nuví nocoo, tucu'yón Jesucristó se-nana so' rihaan yuvij, tzaj ne nij xrej atá suun nocoo doj do', nij sí naqui'yaj cuu se-tucuajj Moisés rihaan yuvij do', nij sí uun chij rihaan nij yuvij israelitá do', nano' uxrá nij so' daj qui'yaj nij so' gaa ne ca'vee cavi' Jesucristó a. <sup>48</sup> Tzaj ne ne narí' nij so' daj qui'yaj nij so' cavi' Jesucristó ma'. 'O

se guun niha' uxrá rá nij yuvij cuno nij so' se-nana Jesucristó a.

**Nana nihánj taj xna'anj se vaa xna'anj nii man Jesucristó me sí ca'ne' suun rihaan so' qui'yaj so' ndaa vaa 'yaj so' a**

**20** Dan me se 'o güii nicun' Jesucristó rá nuví no-cóo, tucu'yón Jesucristó rihaan yuvij, ne nata' so' se-nana so' nana sa', ne nicun' xrej atá suun nocoo doj nicun' sí naqui'yaj cuu se-tucuajj Moisés nicun' sí uun chij nicun' rej tucu'yón Jesucristó a. <sup>2</sup> Gaa ne cataj nij so' rihaan Jesucristó a:

—Me sí ca'ne' suun rihaan so' qui'yáá so' ndaa vaa 'yáá so' ga —taj nij so', xna'anj nij so' man Jesucristó a.

<sup>3</sup> Gaa ne cataj Jesucristó rihaan nij so' a:

—Ne vaa yo'o nana me raj xna'anj 'unj man nij soj, ne cataj soj rihanj á. <sup>4</sup> Dan me se me sí ca'ne' suun rihaan sí cu'naj Juan cutá' ne so' man yuvij, rá soj ga. Ma'an Juan cavii raá na'. Ase Diosé cataj xna'anj rihaan so' xa'. Cataj xna'anj nij soj rihanj ei —taj Jesucristó rihaan nij so' a.

<sup>5</sup> Gaa ne nuchruj raá ndo'o nij so' ga tuvi' nij so' a:

—Ne sese cataj ní' se vaa Diosé ca'ne' suun rihaan sí cu'naj Juan cutá' ne so' man yuvij, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a. <sup>6</sup> Tzaj ne sese cataj ní' se vaa nuveé sij ca'ne' Diosé suun rihaan me sí cu'naj Juan, ne go' cunudanj nij yuvij yahij man ní' a. 'O se cuchuman rá nij yuvij se vaa sí nata' se-nana Diosé me sí cu'naj Juan a —cataj nij so' ga tuvi' ma'an nij so' a.

<sup>7</sup> Gaa ne cataj nij so' rihaan Jesucristó se vaa ne ne'en nij so' me sí ca'ne' suun rihaan sí cu'naj Juan cutá' ne so' man yuvij a.

<sup>8</sup> Gaa ne cataj Jesucristó rihaan nij so' a:

—Che'é dan se cataj xna'anj 'unj rihaan nij soj me sí ca'ne' suun rihanj qui'yáj ndaa vaa 'yá ma' —taj Jesucristó rihaan nij so' a.

**Nana nihánj me cuentó nanó Jesucristó che'é yuvij chi'ii 'yaj suun rihaan yo'óo a**

<sup>9</sup> Gaa ne guun che'e Jesucristó nanó so' cuentó nihánj rihaan nij yuvij a.

—Dan me se cuchruj yo'o so' yo'o naa chruj uvá a. Gaa ne tanáj so' man naa yo' rihaan sí qui'yaj suun naa yo', ne curihanj so' ca'anj so' gan' que'ee yavii a.

<sup>10</sup> Ne 'o güii ca'néé so' man yo'ó se-mozó so' ca'anj so' rihaan nij sí nuu tumé xnaa so' a. 'O se me rá so' rque nij sí nuu tumé naa doj chruj uvá rihaan yo'ó mozó yo', tzaj ne a doj chruj ne rque nij sí nuu tumé naa rihaan yo'ó mozó yo' ma'. Maan se go' ndo'o nij so' xráá so', ne quirii nij so' man so' rque naa yo' a. <sup>11</sup> Che'é dan ca'néé sí to'oj naa yo' man yo'ó mozó uún, tzaj ne nij sí nuu tumé naa ro', go' uún nij so' xráá mozó uún, ne nij uxrá qui'yaj nij so' man so', ne quirii nij so' man so' rque naa, ne a doj chruj ne rque nij so' man mozó yo' a ma'. <sup>12</sup> Gaa ne ca'néé uún sí xnaa yo' yo'ó mozó

uún, tzaj ne quiran' chi'ij ndo'o so', qui'yaj nij síi nuu tumé naa, ne quirii nij so' man so' xe' a.

<sup>13</sup> Gaa ne guun rá síi xnaa yo': "Daj qui'yaj yaj ga. 'O se ca'nej 'unj ma'an ta'nij síi 'ee raj man á. Caraa cochroj nij so' rihaan ta'nij sese ca'anj ta'nij saj xee", guun rá síi xnaa, ne ca'née so' man ta'níi ma'an so' ca'anj a. <sup>14</sup> Dan me se quene'en nij síi nuu tumé naa se vaa 'na' ta'níi síi xnaa, gaa ne nuchruj raa nij so' ga tuvi' nij so' daj qui'yaj nij so', taj nij so' a: "Síi nihánj me síi guun xnaa man naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj", taj nij so' rihaan tuvi' nij so' a. <sup>15</sup> Gaa ne quirii nij so' man ta'níi síi xnaa yo' xe', ne ticavi' nij so' man ta'níi síi si'yaj naa nanj adonj. Che'é dan daj qui'yaj síi si'yaj naa yo' man nij síi nuu tumé xnaa so', rá nij soj ga. <sup>16</sup> 'O se ca'na' so' vaa güii, ne ticavi' so' man nij síi nuu tumé naa yo', ne tajuachén so' xnaa so' rihaan yo'ó síi tumé man xnaa so' nanj adonj —taj Jesucristó rihaan nij yuvii a.

Gaa cuno nij yuvii nana nihánj, ne cuchu'vi' ndo'o nij so', ne cataj nij so':

—Orún' raa Diose me síi nacaj man núj rihaan sayuun yo' nanj chuguanj —taj nij so' rihaan Jesucristó a.

<sup>17</sup> Gaa ne ni'yaj Jesucristó man nij so', ne xna'anj Jesucristó man nij so' a:

—Che'é dan me se me che'é nó nana nihánj rihaan danj Diose, rá nij soj ga: "Yuvej quiri'ij nij síi cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj", taj danj Diose a. <sup>18</sup> Ne yuvej yo' me se ase vaa yuvej yo' vaa 'unj, ne ase vaa yuvii tixé yuvej yo' vaa yuvii na'vej rá cuno rihaan 'unj, ne uxrá quiran' nij so' sayuun nanj adonj. Ne ase vaa yuvii quinij yuvej yo' xraá vaa nij yuvii qui'yáa 'unj sayuun man, ne yuun che'e quinavij nij so' nu' cavii nu' ca'anj nanj adonj —taj Jesucristó a.

<sup>19</sup> Gaa ne guun rá nij síi naqui'yaj cuu se-tucuanj Moisés rihaan yuvii guun rá nij xrej atá suun nocoo doj guun rá quita'aa ra'yanj man Jesucristó, tzaj ne chu'vi' nij so' ni'yaj nij so' man nij yuvii a. Quene'en nij so' se vaa che'e ma'an nij so' me cuentó nanó Jesucristó a. Ase vaa nij síi nuu tumé naa vaa ma'an nij so' rihaan Jesucristó, ne quene'en nij so' se vaa che'é dan nanó Jesucristó cuentó yo' a.

**Nana nihánj taj xna'anj che'é puextó go' ní' rihaan gobiernó do', che'é se rque ní' rihaan Diose do' a**

<sup>20</sup> Dan me se cutumé ndo'o nij síi naqui'yaj cuu se-tucuanj Moisés rihaan yuvii do', nij xrej atá suun nocoo doj do', man Jesucristó daj ca'mii so' a. Ne go' nij so' sa'anj rihaan doj tuvi' nij so' síi tiha' yu'unj cuchí' nij so' rihaan Jesucristó, ne qui'yaj nij so' ndaa vaa 'yaj síi vaa sa' síi me rá xna'anj nana man so' a. 'O se guun rá nij so' cutá' nij so' cacun' xraá Jesucristó che'é nana ca'mii so', gaa ne ca'vee tajuachén nij so' man Jesucristó rihaan síi nicaj suun procurador a. <sup>21</sup> Dan me se xna'anj nij síi tiha' yu'unj yo' man Jesucristó a:

—Ne'en núj se vaa nana nicá inanj a'mii so' ne tucuyón so' do', maestro. Ne 'o cuyaan vaa cunudanj

yuvii rihaan so' chuguanj. Ne ya tucuyón so' rihaan yuvii daj qui'yaj yuvii canoco' yuvii man Diose, maestro. <sup>22</sup> Dan me se nó xcúun ní' go' ní' puextó rihaan síi nicaj suun gobiernó na'. Ase se go' ní' xa' —taj nij síi tiha' yu'unj, xna'anj nij so' man Jesucristó a.

<sup>23</sup> Tzaj ne caxrij rá Jesucristó se vaa me rá nij so' tiha' yu'unj nij so' man so' a. Che'é dan cataj Jesucristó nana nihánj rihaan nij so' a:

<sup>24</sup> —Tihaan soj sa'anj aga' ni'yaj ní' á —taj Jesucristó rihaan nij so' a.

Gaa ne gaa tihaan nij so' sa'anj aga' yo' rihaan Jesucristó, gaa ne cataj Jesucristó:

—Me síi nó rihaan sa'anj aga' nihánj ga. Ne me síi se-chuvii nó rihaan sa'anj aga' nihánj ga —taj Jesucristó, xna'anj so' man nij síi me rá tiha' yu'unj yo' a.

—Síi nicaj suun gobiernó me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

<sup>25</sup> Gaa ne cataj Jesucristó rihaan nij so' a:

—Che'é dan go' soj si'yaj síi nicaj suun gobiernó rihaan ma'an so', ne rque soj si'yaj Diose rihaan Diose á —taj Jesucristó a.

<sup>26</sup> Gaa ne ne guun nucuaj nij síi tiha' yu'unj yo' cutá' nij so' cacun' xraá Jesucristó che'é se-nana so' ma'. 'O se cuno cunudanj nij yuvii daj ca'mii nij so', gaa ne ca'anj ndo'o rá nij yuvii cuno nij so' se-nana Jesucristó, ne ca'ne' rá nij so' nanj adonj.

**Nana nihánj taj xna'anj se vaa ya cunuu i'na' uún nij síi cavi' a**

<sup>27</sup> Dan me se cuchí' doj nij síi saduceo rihaan Jesucristó a. Nij síi saduceo ro', a'mii nana nihánj se vaa daj chihaa mij se cunuu i'na' uún yuvii asa' cavi' yuvii, taj nij so' a. <sup>28</sup> Dan me se xna'anj nij so' man Jesucristó, ne cataj nij so' nana nihánj a:

—Cachrón síi cu'naj Moisés nana nihánj rihaan yanj, che'é rej cunó ní' nana nihánj a: "Sese cavi' yo'ó síi vaa nicá, ne sese taj vaj ta'níi so', ne nó xcúun tinúú so' xcaj tinúú so' man chocó' so' chana quináj, ne cotoj tinúú síi cavi' ga chocó' so', ne cuchruj no' ne'ej, ne guun ta'nij síi cavi' man ne'ej yo', ne cunuú ne'ej yo' rihaan to'óo síi cavi' yo' a", taj síi cu'naj Moisés gaa naá, maestro. <sup>29</sup> Dan me se vaa chij nij tinuj 'o nij so' a. Síi chava' ro', xcaj man chana, tzaj ne cavi' so', ne taj vaj ne'ej cuchruj chana nicá so', qui'yaj so', <sup>30</sup> ne che'é dan xcaj scue'ee síi cavi' yo' man chocó' so' chana quináj, tzaj ne cavi' so' uún, ne xcaj scue'ee so' uún man chana, tzaj ne cavi' so' uún, <sup>31</sup> ne dan me se quisij xcaj nu' chij nij tinuj nij so' man orún' chana yo', tzaj ne taj vaj 'ó ne'ej cuchruj chana yo', qui'yaj nij so' ma'. Ne cavi' taran' nij so' nanj adonj. <sup>32</sup> Síj, gaa ne cavi' ma'an chana yo' uún, <sup>33</sup> ne dan me se asa' cunuu i'na' uún nij síi cavi', gaa ne me nij tinuj nij so' nicaj man chana yo', rá so' ga. 'O se gaa vaa i'na' nij so', ne nicá taran' nij tinuj nij so' guun orún' no' a —taj nij síi saduceo, xna'anj nij so' man Jesucristó a.

<sup>34</sup> Gaa ne cataj Jesucristó rihaan nij so' a:

—Xa' nij yuvii man rihaan chumii nihánj cuano, tzaj ne uchruj nij so' sa'anj do', xcaj tuvi' nij so' do', <sup>35</sup> tzaj

ne ino qui'yaj nij yuvij cunu i'na' uún cayáán ga Diose asa' cunu nacá uún chumij nihánj nanj á. 'O se rej yanj Diose me se taj yan vaj síí xcaj tuvi' yo' ma'. <sup>36</sup> 'O se danj nanj uún, ne taj yan vaj síí cavi' uún rej yo' ma'. 'O se ase vaa nij se-mozó Diose ro', danj gaa nij so', ne cuyaán gaa nij so' ga nij se-mozó Diose, ése ta'nij Diose me nij so', ne sij aj cavi' ne cunu i'na' uún me nij so' adonj.

<sup>37</sup> Ne ma'an síí cu'naj Moisés me síí cataj xna'anj asino yaan se vaa ca'vee cunu i'na' uún nij síí cavi' ndaa vaa nari' so' gaa canicun' so' rihaan yan nicun' 'o coj acó' ya'an raá a. Dan me se cataj so' se vaa síí 'nij ra'a man ní' ro', me Diose síí noco' nij síí man gaa naá síí cu'naj Abraham do', síí cu'naj Isaac do', síí cu'naj Jacobo do' a. <sup>38</sup> Dan me se nuveé se-Diose nij xngá me Diose ma'. Inanj nij síí vaa i'na' a'vee noco' man Diose nanj adonj. Che'é dan, nda' se síí cane gaa naá me va'nuj nij so', tzaj ne vaa i'na' nij so' rihaan Diose nanj ei. 'O se vaa i'na' cunudanj yuvij ni'yaj Diose nanj adonj —taj Jesucristó rihaan nij so' a.

<sup>39</sup> Gaa ne ta'aj nij síí naqui'yaj cuu se-tucuanj Moisés rihaan yuvij ro', cataj rihaan Jesucristó a:

—Cunaj uxrá ca'mii so', maestro —taj nij so' a.

<sup>40</sup> 'O se ne quisij rá nij so' xna'anj nij so' doj nana man Jesucristó a ma'.

**Nana nihánj taj xna'anj se vaa síí ca'nej Diose tinanii man yuvij rihaan sayuun ro', nuveé nanj yuvij me so' ma'**

<sup>41</sup> Gaa ne cataj Jesucristó rihaan nij so' a:

—Me che'é taj nij soj se vaa nanj ta'níí ta'nij si'no síí cu'naj David síí cane gaa naá me síí ca'nej Diose tinanii man yuvij rihaan sayuun ga. <sup>42</sup> 'O se nó se-nana ma'an síí cu'naj David rihaan yanj no chra' qui'yaj so', se vaa cataj so': <sup>43</sup> "Ca'mii Diose síí 'nij ra'a man ní' rihaan síí 'nij ra'a manj, cataj so' se vaa cayáán síí 'nij ra'a manj x'núú Diose rej nuva' Diose ndaa se quisij qui'yaj canaán Diose rihaan taran' nij síí taj ri'yunj man síí 'nij ra'a manj ne quirii ta'nga' síí 'nij ra'a manj rihaan nij so' adonj", taj síí cu'naj David yo' a. <sup>44</sup> Dan me se síí 'nij ra'a man síí cu'naj David me síí ca'nej Diose tinanii man yuvij rihaan sayuun, taj síí cu'naj David yo' a. Sese 'nij ra'a so' man David, gaa ne me che'é taj soj se vaa nanj ta'níí ta'nij si'no David me so' ga. Taj che'é cataj soj se vaa nanj yuvij me so' ma' —taj Jesucristó rihaan nij síí naqui'yaj cuu se-tucuanj Moisés a.

**Nana nihánj taj xna'anj che'é cacun' tumé nij síí naqui'yaj cuu se-tucuanj Moisés rihaan yuvij a**

<sup>45</sup> Gaa ne ca'mii so' nana nihánj rihaan nij síí tu-cu'yón se-nana so', ne cuno cunudanj nij yuvij daj ca'mii so' a:

<sup>46</sup> —Xcaj nij soj cuentá daj 'yaj nij síí naqui'yaj cuu se-tucuanj Moisés rihaan yuvij, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunuú nij so' yatzij sa' xcaan cachee nij so' rej quene'en yuvij man nij so', ne aran' rá nij so' se

vaa ca'mii sa' yuvij ga nij so' gaa chée nij so' rihaan yu'vee a. Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuanj Moisés do', gaa 'anj nij so' cha'anj do' a. <sup>47</sup> Ne a'néj nij so' ve' tucua' chana' cavi' nica, ne yuun che'e guun tucua' nij so' man ve' yo', ne 'yaj xcaan ndo'o nij so' cuentó achíín ni'yaj nij so' rihaan Diose, che'é rej sa' doj guun nucuaj nij so' tihá' yu'unj nij so' man yuvij a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quiran' nij so' qui'yaj Diose, asa' ca'ne' Diose cacun' che'é yuvij adonj —taj Jesucristó rihaan nij síí tucu'yón se-nana so' a.

**Nana nihánj taj xna'anj che'é chana' nique cavi' nica qui'yaj sa' doj rihaan nij ru'vee, ni'yaj Diose a**

**21** Dan me se ni'yaj Jesucristó, ne quene'en so' se vaa araa ndo'o nij síí ru'vee sa'anj rque chrúún taj rihaan nuvíí nocgo che'é Diose a. <sup>2</sup> Ne quene'en so' 'o chana' cavi' nica chana' nique se vaa caraa no' vij guue sa'anj aga' le'ej rque chrúún yo', <sup>3</sup> ne cataj so':

—Cataj xna'anj yá yá 'unj rihaan nij soj cuano se vaa xa' chana' cavi' nica chana' nique nihánj, tzaj ne doj a caraa no' sa'anj rque chrúún yo' rihaan sa'anj caraa cunudanj yo'ó nij yuvij nanj adonj. <sup>4</sup> 'O se nij so', daj doj sa'anj quináj raá se-sa'anj nij so' ro', caraa nij so' rque chrúún, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudanj sa'anj nica' no' sa'anj quiraan no' se cha' no' nanj adonj —taj Jesucristó a.

**Nana nihánj taj xna'anj se vaa canee nu' nuvíí nocgo ne chuman' Jerusalén a**

<sup>5</sup> Dan me se cataj ta'aj yuvij se vaa xa' nuvíí nocgo, tzaj ne yuvej sa' inanj me yuvej guun nuvíí nocgo, ne me doj uxrá sa'anj go' nij yuvij rihaan Diose che'é rej ca'vee cune' nii nuvíí nocgo yo' a. <sup>6</sup> Gaa ne cataj Jesucristó rihaan nij so' a:

—Xa' nu' nuvíí nocgo ni'yaj soj nihánj, tzaj ne vaa güii canee nu' nuvíí nocgo nihánj, ne a 'ó yuvej se quitáá xráá tuvi' yuvej nihánj a ma' —taj Jesucristó a.

**Nana nihánj taj xna'anj che'é sayuun guun rihaan chumij nihánj vaa güii a**

<sup>7</sup> Dan me se xna'anj nii man Jesucristó, ne cataj nii rihaan so' a:

—Che'é dan cataj xna'anj so' rihaan núj aman canee nu' nuvíí nocgo nihánj do', a me rasuun ca'na' qui'yáá so' asa' quisij ca'na' sayuun yo', señor —taj nii, xna'anj nii man so' a.

<sup>8</sup> Gaa ne cataj so' rihaan nii:

—Tumé ndo'o soj man soj se gaa nanj tihá' yu'unj yuvij man soj á. 'O se ca'na' uxrá yuvij cataj: "Uñj me síí na'vij soj, ne Cristo mej á", cataj nij yuvij, ne cataj uún nij yuvij: "Aj quisij güii ca'anj ni'ya' chumij nanj á", cataj uún nij yuvij rihaan soj a. Tzaj ne se cuchumán rá soj, ne se canoco' soj man yuvij a'mii danj ma'.

<sup>9</sup>“Dan me se ca'vee se cunō soj nana se vaa unu' uxrá chuman' gā tuvi' chuman' dō', ca'vee se cunō soj nana se vaa tucuáá ndo'o yuvi' rihaan gobiernó dō', tzaj ne se cuchu'vi' soj ma'. Maan se vaa che'é guun sayuun yo' rihaan chumi' nihánj asino yaan adonj. Tzaj ne asa' quisij guun danj, gaa ne se ca'anj ni'ya chumi' nihánj nu' orá ma'. 'Q se quina'j chumi' nihánj doj adonj —taj so' rihaan nij so' a.

<sup>10</sup> Gaa ne cataj uún Jesucristó rihaan nij so' a:

—Dan me se cunū' uxrá yuvi' man chuman' nocōo gā yo'ó chuman' nocōo, ne cunū' gobiernó gā tuvi' gobiernó a. <sup>11</sup> Ne cachēn ndo'o yuún nocōo, ne que'ee chuman' me se cachēn ndo'o chi'i' cachēn ndo'o x'naa cachēn ndo'o a. Ne quene'en ndo'o yuvi' rasuun nocōo nij ndo'o rej xta', ne cuchu'vi' nij yuvi', qui'ya'j rasuun yo' a.

<sup>12</sup> “Tzaj ne asa' ataa guun nu' sayuun yo', ne quitaj ri'yunj nii man soj, ne quita'aa nii man soj, ne canocō' nii man soj qui'ya'j nii sayuun man soj, ne tachuachén nii man soj rihaan nij sí' man rá ve' nuu chre' ní' tucu'yón ní' se-tucu'anj Moisés, ne caxri'j nii taga' man soj, ne tachuachén nii man soj rihaan nij sí' nicaj suun, che'é se sij nocō' manj me soj a. <sup>13</sup> Sij, gaa ne quirí' soj cataj xna'anj soj rihaan nij so' che'é 'unj a. <sup>14</sup> Ne asa' nicun' soj rihaan nij so', ne yo'ó ca'nej nimán soj se nanó rá soj che'é nana ca'mi' ma'an soj rihaan nij so' ma'. <sup>15</sup> 'Q se ma'anj me sí' rque nana cuu cavii tu'va soj nanj á. Ne taj sí' guun nucuaj qui'ya'j canaán rihaan se-nana soj ma'. <sup>16</sup> Dan me se ndaa ma'an rej soj dō', ndaa ma'an tuvi' soj dō', ndaa ma'an tinúu soj dō', ndaa ma'an nij sí' man chiháan soj dō', me nij sí' tachuachén man soj rihaan nij sí' qui'ya'j sayuun man soj, gaa ne ticavi' nii man ta'aj soj, <sup>17</sup> ne nachri' cunudan'j nij yuvi' man rihaan chumi' ni'ya'j nij so' man soj, che'é se me soj sí' nocō' manj adonj. <sup>18</sup> Tzaj ne daj chihaa mij se ca'anj ni'ya' a doj yuvé raaj soj ma'. <sup>19</sup> 'Q se che'é se nocō' raan soj manj ro', che'é dan yo'ó gaa i'na' soj nu' cavii nu' ca'anj adonj.

<sup>20</sup> “Dan me se asa' quene'en soj se vaa tucuachriin tanuu nu' chuman' Jerusalén, ne xcaj soj cuentá se vaa daj doj quirí' nu' chuman' yo', ne quina'vij nu' chuman' yo' nanj adonj. <sup>21</sup> Ne güii dan me se yo'ó cunanj nij sí' man estadó Judea ca'anj nij so' raaj quij, ne nij sí' vaj rque chuman' Jerusalén me se ra'yanj cūrihan'j nij so', ne nij sí' vaj rej tacaan me se se catú'j nij so' chuman' yo' daj chihaa mij ma'. <sup>22</sup> 'Q se yo' me güii naru'vee Diose sayuun rihaan nij sí' ne estadó Judea yo' che'é cacun' tumé nij so', ne ya danj guun, gaa ne quisij ya nu' nana nō rihaan danj Diose che'é nij so' a. <sup>23</sup> Nique chana nuu rque dō', chana vaa ta'ní' ne'ej utzii dō', güii ca'na' sayuun yo' a. 'Q se se guun nucuaj chana yo' cunanj chana yo' ma'. 'Q se guun ndo'o sayuun rej yo', ne caxri'j yuvaa Diose man yuvi' yo', <sup>24</sup> ne cavi' que'ee nij so' raaj neē espadá, ne quita'aa nii man que'ee nij so' ca'anj nicaj nii rej ne nij sí' yaní' a. Ne cachēe nij sí' yaní' xráa nu' chuman' Jerusalén, ndaa se quisij güii ca'neē Diose suun ra'a nij so' a —taj Jesucristó a.

**Nana nihánj taj xna'anj daj gaa ca'na' uún Jesucristó rihaan chumi' nihánj a**

<sup>25</sup> Ne cataj uún Jesucristó a:

—Gaa ne quene'en yuvi' se vaa cunūu inō güii dō', yavi' dō', nij yati' dō', ne rihaan ma'an chumi' me se cuchu'vi' ndo'o cunudan'j nij yuvi' cunō nij so' daj gaa cariin ndo'o na ya'anj dō', quene'en nij so' daj gaa quinaan rihaan na ya'anj dō' a. <sup>26</sup> Ne cuchu'vi' ndo'o nij yuvi', che'é yan quinanō rá nij so' daj gaa quiran' nu' chumi' nihánj a. Ne quinaan taran' nij rasuun nucuaj man rej xta' a. <sup>27</sup> Gaa ne quene'en nij so' mán 'unj sij ca'née Diose nicaj yu'unj man yuvi' á. Dan me se xráa ngaa quitaj 'unj ca'na' 'unj, ne guun nucuaj ndo'oj quiri' ta'ngaj, ne ve'é uxrá curuvij ca'na'j ei. <sup>28</sup> Dan me se asa' guun che'e nu' rasuun nihánj guun yo' danj, ne canicun' soj, ne ni'ya'j soj xta', ne daj doj nacaj 'unj man soj rihaan chumi' nihánj gaa nanj adonj —taj Jesucristó rihaan nij so' a.

**Nana nihánj taj xna'anj se vaa ya quene'en ní' se vaa daj doj ca'na' uún Jesucristó a**

<sup>29</sup> Gaa ne nanó Jesucristó cuentó nihánj a:

—Xcaj soj cuentá daj 'yaj chruun man chruj higó raaj dō', daj 'yaj me ma'an chruun dō' á. <sup>30</sup> Gaa naca coj ya'lij ra'a nij chruun, ne ni'ya'j soj man nij chruun, ne ne'en soj se vaa daj doj 'na' tió namān maan a. <sup>31</sup> Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne daj doj guun che'e Diose guun chij Diose rihaan chumi' nihánj nanj adonj. <sup>32</sup> Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumi' nihánj cuano quisij nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. <sup>33</sup> Vaa güii ca'anj ni'ya' yo'ó dō', xta' dō', tzaj ne se-nanaj me se daj chihaa mij se quina'vij yo' ma' —taj Jesucristó rihaan nij so' a.

**Nana nihánj taj xna'anj se vaa tumé ní' man ní' daj qui'ya'j ní', gaa ne ca'vee canicun' ní' rihaan Jesucristó a**

<sup>34</sup> Ne cataj uún Jesucristó a:

—Dan me se cūtumé soj man soj se gaa nanj yo'ó guun rá soj rasuun man rihaan chumi' nihánj, ne guun rá soj guun xno soj dō', guun rá soj ca'mi' sca' soj dō', guun rá soj guun si'ya'j soj nu' rasuun man rihaan chumi' nihánj dō' a. Se qui'ya'j soj danj, tóse taj ni'yón ca'na'j, ne se quene'en soj ca'na'j a. <sup>35</sup> 'Q se ndaa rá se vaa 'o lazo ne' ta'aa man nii ro', danj gaa ca'na' xráa cunudan'j chumi' nihánj adonj. <sup>36</sup> Che'é dan yo'ó ni'ya'j soj, ne xcaj soj cuentá nu' güii, ne inanj cachinj ni'ya'j soj rihaan Diose se vaa ca'vee quina'ni'j soj rihaan nu' sayuun nihánj asa' guun danj rihaan chumi' nihánj, gaa ne ca'vee canicun' soj rihaan 'unj sij ca'née Diose nicaj yu'unj man yuvi' ei —taj Jesucristó a.

<sup>37</sup> Dan me se rej rangá' ro', ne Jesucristó rá nuvi' nocōo, ne tucu'yón so' man nij yuvi', ne rej ti'nuu me se

curihanj so', ne rej cu'naj Quij man Chruun Olivó aran' so' a. <sup>38</sup> Ne taxrej uchi' cunudanj nij yuviij cunō nij so' se-nana Jesucristó a.

**Nana nihánj taj xna'anj daj qui'yaj síf cu'naj Judas gaa cutu'vej yuve so' man Jesucristó a**

**22** Dan me se daj doj canuú cha'anj pascuá cha'anj chá nij yuviij israelitá chraa yo'óo trigó a. <sup>2</sup> Ne nano' nij xrej atā suun nocōo doj do', nij síf naqui'yaj cuu se-tucuānj Moisés rihaan yuviij do', daj qui'yaj nij so' ne cavi' Jesucristó, che'é se man ndo'o yuviij nocō' man Jesucristó a.

<sup>3</sup> Ne catúj síf chree cu'naj Satanás nimán síf cu'naj Judas Iscariote, ne so' me se yo'ō tuvi' ma'an chuvij nij síf tucu'yón se-nana Jesucristó me so' a. <sup>4</sup> Dan me se cavii so' ca'anj so', ne ca'mii so' ga nij xrej atā suun nocōo doj do', ga tanuu uun chij rihaan nij tanuu tumé nuvií do', gaa ne cataj so' daj qui'yaj so' ne tucuachén so' man Jesucristó rihaan nij so' a. <sup>5</sup> Gaa ne guun niha' rá nij so' gaa cuno nij so' se-nana Judas, ne guun ya ca'mii nij so' ga Judas se vaa rque nij so' sa'anj man Judas a. <sup>6</sup> Dan me se cata' tu'va síf cu'naj Judas se vaa tucuachén so' man Jesucristó rihaan nij so', gaa ne nuchruj raa Judas aman ca'vee tucuachén so' man Jesucristó rihaan nij so', gaa ne se gaa nanj quene'en nij yuviij a.

**Nana nihánj taj xna'anj che'é rachrúun rqué Jesucristó rihaan nij síf tucu'yón se-nana so' chá nij so' do', che'é na vinó rqué so' co'ō nij so' do' a**

<sup>7</sup> Dan me se quisij güii canuú cha'anj chá nii chraa yo'óo trigó, ne güii dan me güii ticavi' nij yuviij israelitá matzinj le'ej che'é Diosē a. <sup>8</sup> Dan me se ca'née Jesucristó man Pedró do', man Juan do', ne cataj so' rihaan roj so':

—Ca'anj roj soj qui'yaj chuvij roj soj chá ní' ne navij rá ní' cha'anj pascuá ei —taj so' rihaan roj so' a.

<sup>9</sup> Gaa ne xná'anj roj so' man Jesucristó a:

—Me rej qui'yaj chuvij núj chá ní' ga —taj roj so' a.

<sup>10</sup> Gaa ne cataj Jesucristó rihaan roj so' a:

—Cunō roj soj nana nihánj, se vaa asa' catúj roj soj chuman' yo', ne nari' tuvi' roj soj ga 'ō síf táa chihā 'ō cacuaj na, ne canocō' roj soj man so', catuū roj soj rá ve' catuū so', <sup>11</sup> ne cataj roj soj rihaan síf tucuā ve' yo': "Xná'anj maestró mán so' se vaa me rej ne ve' chá xti'nō maestró chraa ga nij síf tucu'yón se-nana so' che'é cha'anj pascuá, taj so' a", catā roj soj rihaan síf tucuā ve' yo' a. <sup>12</sup> Gaa ne tijaan so' 'ō ve' nata' xij rihaan roj soj, ne aj vaa chuvij rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvij roj soj á —taj Jesucristó rihaan roj so' a.

<sup>13</sup> Dan me se cavii roj so' ca'anj roj so', ne nari' roj so' nu' ndaa vaa cataj xna'anj Jesucristó rihaan roj so', gaa ne qui'yaj chuvij roj so' chá xti'nō nij so' chraa che'é cha'anj pascuá a. <sup>14</sup> Ne quisij orá chá xti'nō nij so', ne ca'na' Jesucristó ga yo'óo nij apóstol cune' so' man nata' rihaan yuviij che'é so', gaa ne ca'anj cayáan

taran' nij so' rihaan mesá a. <sup>15</sup> Gaa ne cataj Jesucristó rihaan nij so' a:

—Guun ndo'o raj chá xti'nō 'unj che'é cha'anj pascuá nihánj ga nij soj cuano nihánj gaa ataa quirán' 'unj sayuun a. <sup>16</sup> 'ō se cataj xna'anj 'unj rihaan soj cuano se vaa se chá xti'nō uún 'unj ga soj ā 'ó cha'anj nihánj ndaa se quisij güii canuú cha'anj pascuá naca asa' guun chij Diosē rihaan chumii nihánj ā man adonj —taj Jesucristó rihaan nij so' a.

<sup>17</sup> Gaa ne nicaj so' 'ō aga' tazá na vinó, ne nago' so' graciá rihaan Diosē, gaa ne cataj so':

—Quita'aa soj na nihánj, cuxra' ta'aj soj, ne co'ō cunudanj soj á. <sup>18</sup> 'ō se cataj xna'anj 'unj rihaan soj cuano se vaa veé doj nihánj me co'ōj, ne se co'ōj yaj ā ma'. Tzaj ne asa' quisij güii guun chij Diosē rihaan chumii nihánj, ne co'ōj adonj —taj Jesucristó rihaan nij so' a.

<sup>19</sup> Gaa ne nicaj so' rachrúun, ne nago' so' graciá rihaan Diosē, gaa ne cuxra' so' rachrúun, ne rqué so' man nij so', ne cataj so':

—Ne manj me rachrúun nihánj nanj á. Ca'vej rá 'unj cavi' ne manj che'é soj, ne chá soj man nihánj, gaa ne yo'ō cunuú rá soj manj ei —taj so' rihaan nij apóstol a.

<sup>20</sup> Gaa ne ase vaa qui'yaj so' ga rachrúun ro', dānj qui'yaj uún so' ga aga' nuū na vinó gaa quisij chá xti'nō nij so', ne cataj so':

—Na vinó nihánj ro', me ton manj a. Che'é ton manj ro', rqué Diosē 'ō nana rihaan soj daj qui'yaj Diosē ga soj a. Dan me se che'é se cayanj ton manj ro', che'é dan me caraa x'naa Diosē ni'yaj Diosē cacun' tumé yuviij nanj adonj —taj Jesucristó rihaan nij so' a.

**Nana nihánj taj xna'anj se vaa ma'an Jesucristó cataj xna'anj se vaa tucuachén yo'ō síf tucu'yón se-nana so' man so' rihaan nij síf taj ri'yunj man so' a**

<sup>21</sup> Ne cataj uún Jesucristó a:

—Tzaj ne xcāj soj cuentá se vaa vaa 'ō síf tucuachén manj rihaan nij síf taj ri'yunj manj, ne táa ra'a so' rihaan chruun mesá taj ra'aj nihánj cuano ei. <sup>22</sup> 'ō se xā' 'unj sij ca'née Diosē nicaj yu'unj man yuviij, tzaj ne ca'anj 'unj cavi' 'unj ndaa vaa cataj xna'anj ma'an Diosē a. Tzaj ne nique ndo'o síf tucuachén manj rihaan nij síf taj ri'yunj manj nanj á. Quiran' uxrá so' sayuun adonj —taj Jesucristó rihaan nij so' a.

<sup>23</sup> Gaa ne guun che'e nij síf tucu'yón se-nana Jesucristó nuchruj raa nij so' ga tuvi' nij so' me tuvi' nij so' me síf qui'yaj dānj man Jesucristó, rá nij so' a.

**Nana nihánj taj xna'anj daj qui'yaj ní' sese me rá ní' guun ní' síf guun chij doj rihaan tuvi' ní' a**

<sup>24</sup> Gaa ne ca'mii cunu' cunudanj nij síf tucu'yón se-nana Jesucristó me tuvi' nij so' me síf guun chij doj a.

<sup>25</sup> Gaa ne cataj Jesucristó rihaan nij so' a:

—Nij síf nicaj suun rey uun chij rihaan nij yuviij yanij ro', rii ta'nga' uxrá nij so' rihaan tuvi' nij so', ne tucu'náj nii "síf 'nij ra'a man ní'" man nij so' nanj á. <sup>26</sup> Tzaj ne se guun soj síf vaa dānj ma'. Maan se tuvi' soj síf

guun rá se vaa guun chij so' doj rihaan soj ro', vaa che'é guun so' síí noco' doj rihaan soj, ne guun so' ase vaa 'o se-mozó soj a. <sup>27</sup> Dan me se me síí me síí uun chij doj, rá soj gā: síí anicaj co'oo rihaan mesá na', ase síí yanj rihaan mesá xā'. Veé síí yanj rihaan mesá me síí uun chij doj, rá soj a. Tzaj ne nihánj me se vaj mā'án 'unj sca'núj nij soj, ne aj guún 'unj mozó rihaan soj vaa nanj adonj.

<sup>28</sup> Ne xā' soj, tzaj ne nij soj me nij síí cachéé gā 'unj gāa quirán' 'unj sayuun, <sup>29</sup> ne ase vaa cune' Réj Diose manj se vaa guun chij 'unj ro', danj gāa cune' 'unj man soj cuano <sup>30</sup> se vaa cayáán soj rihaan xrúún 'unj chruun mesá asa' guun chij mā'anj, ne chá soj chraa ne co'o soj na gā 'unj adonj. Ne quitaj soj chruun xlá sá' ndo'o, ne ca'ne' soj cacun' che'é chuvij nij x'ne' yuvij israelitá adonj —taj Jesucristó rihaan nij síí tucu'yón se-nānā so' a.

### Nanā nihánj taj xna'anj daj ca'mii Jesucristó gā síí cu'naj Simón Pedró a

<sup>31</sup> Gāa ne cataj Jesucristó rihaan síí cu'naj Simón Pedró a:

—Cunó sō' nanā nihánj ca'mij rihaan sō', Simón. 'O se aj cachíin ni'yaj síí cu'naj Satanás rihaan Diose se vaa ca'vej rá Diose qui'yaj so' sayuun man nij soj a. Dan me se ase vaa 'yaj nii man 'núú trigó gāa tixrin' nii 'núú trigó rihaan rcuaa ro', danj qui'yaj síí chree man soj, che'é se guun rá so' quirí' soj adonj. <sup>32</sup> Tzaj ne aj cachíin ni'yáá 'unj rihaan Diose che'é sō', se vaa se ca'ne' rá sō' gā suun amán rá ni'yaj manj a ma'. Gāa ne asa' nanicaj nimán sō' canoco' uún sō' manj ro', ne račuíj sō' man nij tinúú sō' se vaa cunuu sca' doj nimán nij so' uún á —taj Jesucristó rihaan síí cu'naj Simón Pedró yo' a.

<sup>33</sup> Gāa ne cataj so' rihaan Jesucristó a:

—Tzaj ne aj ca'néé nimanj yo'o cachee 'unj gā sō', Señor. Ca'vee se caxrij nii taga' mán sō' ca'vee se ticavij' nii mán sō' ca'vee se, tzaj ne se tanáj xcō 'unj mán sō' ma' —taj so' rihaan Jesucristó a.

<sup>34</sup> Tzaj ne cataj Jesucristó rihaan Pedró a:

—Nihánj me cataj 'unj rihaan sō' daj qui'yáá sō', Pedró. Ne'én 'unj se vaa asa' ataa caguaj to'loo nij corá, ne va'nuj cataj sō' se vaa ne ne'én sō' manj ma' —taj Jesucristó rihaan Pedró a.

### Nanā nihánj taj xna'anj se vaa quirān' nij síí tucu'yón se-nānā Jesucristó sayuun a

<sup>35</sup> Gāa ne cataj Jesucristó rihaan nij síí tucu'yón se-nānā so' a:

—Gāa ca'néé 'unj man soj ca'mii natáj soj se-nānā rihaan nij yuvij israelitá ne taj nanj taj vitó taj canj taj ca'anj nicaj soj gā ca'anj soj, tzaj ne taj vaj rasuun cachiin man soj gā ca'anj soj, rá 'unj a —taj Jesucristó rihaan nij so' a.

—Taj vaj a doj rasuun ne cachijin man núj ma' —taj nij so' rihaan Jesucristó a.

<sup>36</sup> Gāa ne cataj Jesucristó rihaan nij so' a:

—Yaj me se sese vaa xnánj soj do', se-vito soj do', ne nicaj soj ca'anj soj á. Ne sese taj yan vaj neê espadá rihaan soj, ne quirān soj 'o taneê soj neê espadá á. Ne sese nuvi' sa'anj rihaan yo'o tuvi' soj, ne vaa che'é cutu'vee so' se-roto so', ne quirān so' neê espadá ei.

<sup>37</sup> 'O se vaa nanā nō rihaan danj Diose taj: “Cataj nii se vaa sij 'yaj cacun' me so'”, taj danj Diose che'é 'unj, ne vaa che'é quisij yā nū' nanā yo' che'ej a. 'O se daj doj quinavij se vaa 'yáá 'unj rihaan chumii nihánj nanj adonj —taj Jesucristó rihaan nij so' a.

<sup>38</sup> Gāa ne cataj nij so' rihaan Jesucristó a:

—Ni'yaj sō' ei. Vaa vij neê espadá rihaan ní' nihánj, Señor —taj nij so' a.

—Veé danj me se danj nanj á —taj Jesucristó rihaan nij so' a.

### Nanā nihánj taj xna'anj daj qui'yaj Jesucristó gā cachíin ni'yaj Jesucristó rihaan Diose a

<sup>39</sup> Gāa ne cavii so' ca'anj so' quij cu'naj Quij man Chruun Olivó, ndāa vaa cu'yón inanj so' qui'yaj so' a. Ne canoco' nij síí tucu'yón se-nānā so' rej xcō so' a.

<sup>40</sup> Ne gāa cuchi' nij so' rej yo', ne cataj Jesucristó rihaan nij so' a:

—Cachinj ni'yaj soj rihaan Diose se vaa caráán Diose chrej rihaan síí chree se gāa nanj guun rá soj qui'yaj soj cacun' qui'yaj síí chree á —taj Jesucristó rihaan nij síí tucu'yón se-nānā so' a.

<sup>41</sup> Gāa ne naxuun so' man so' rihaan nij síí tucu'yón se-nānā so', ne ca'anj so' rej yanij doj, ne canicun' ruj so', ne cachíin ni'yaj so' rihaan Diose, <sup>42</sup> ne cataj so' rihaan Diose a:

—Sese ca'vee, ne caráán ra'á sō' xráj, se gāa nanj quirān' uxrá 'unj sayuun, tzaj ne sese mā'án sō' me rá quirán' 'unj sayuun, ne qui'yáá sō' ndāa vaa me rá mā'anj ma' —taj Jesucristó, cachíin ni'yaj so' rihaan Diose a.

<sup>43</sup> Gāa ne curuvi' yo'o se-mozó Diose cavii rej xtā' rihaan so', ne nari' nucuj nimán so', qui'yaj se-mozó Diose yo' a. <sup>44</sup> Ne nanó ndo'o rá so', ne nucuj ndo'o cachíin ni'yaj so' rihaan Diose, ne cavii ndo'o nihaā rihaan so', ne ase vaa ton vaa nihaā cavii rihaan so' cayanj rihaan yo'óo a. <sup>45</sup> Ne canicun' caya so', ne ca'anj so' rej ne nij síí tucu'yón se-nānā so', tzaj ne quene'en so' se vaa cotoj nū' nij so', che'é se nanó ndo'o rá nij so' a. <sup>46</sup> Gāa ne cataj Jesucristó rihaan nij so' a:

—Me che'é otoj soj gā. Naxumān soj cachinj ni'yaj soj rihaan Diose se gāa nanj guun rá soj qui'yaj soj cacun' qui'yaj síí chree á —taj so' rihaan nij síí tucu'yón se-nānā so' a.

### Nanā nihánj taj xna'anj daj qui'yaj nii gāa quita'aa nii man Jesucristó a

<sup>47</sup> Dan me se nicun' Jesucristó ca'mii so', ne nū' ca'na' que'ee yuvij, ne síí cu'naj Judas yo'o tuvi' chuvij nij síí tucu'yón se-nānā Jesucristó me síí táá yaan rihaan nij yuvij, ne quinichrun' síí cu'naj Judas rihaan Jesu-

crístó, che'é rej guun rá so' cachron tu'va so' xruy Jesucristó a. <sup>48</sup> Gaa ne cataj Jesucristó rihaan Judas a:

—Ne chihān' uxrá 'yáá so', se vaa tacuachén so' manj sij ca'néé Diose nīcaj yu'unj man yuvij gaa cachron tu'vá so' xruj, man Judas —taj so' rihaan Judas yo' a.

<sup>49</sup> Dan me se quene'en nij síí nicun' gā Jesucristó daj qui'yaj nij yuvij man Jesucristó, ne che'é dan xná'anj nij so' man Jesucristó a:

—Go' nūj neē espadá raā nij so', rá so' na' —taj nij so' rihaan Jesucristó a.

<sup>50</sup> Ne yo'ō tuvi' nij so' ro', go' taneē so' neē espadá raā se-mozó xrej atā suun nocōo doj, ne güéj nu' xréé yo' rej nuva' yo', qui'yaj so' a. <sup>51</sup> Gaa ne cataj Jesucristó rihaan so' a:

—Ca'ne' rá soj gā suun 'yaj dānj á —taj Jesucristó rihaan nij so' a.

Gaa ne cuta' Jesucristó ra'a Jesucristó rej quiran' chi'ij xréé mozó yo', ne nu' orá nahuun sa' xréé mozó yo', qui'yaj Jesucristó a. <sup>52</sup> Gaa ne cataj Jesucristó rihaan nij xrej atā suun nocōo doj do', rihaan tanuu uun chij rihaan nij tanuu tumé nuví do', rihaan nij síí uun chij rihaan nij yuvij israelitá do' a:

—Me che'é 'na' neē espadá 'na' chruun 'na' gā soj gā. Síí itūū mé 'unj, rá soj na'. <sup>53</sup> 'O se daj ā güii yáán 'unj gā nij soj rá nuví nocōo, tzaj ne ne guun rá soj quita'aa soj mán 'unj ma'. Tzaj ne cuanō nihánj me se aj quisij orá ca'vee qui'yaj soj ndāa vaa me rá soj qui'yaj soj, ne nihánj me se ca'vee guun nucaj soj sij vaj rej rmi' a —taj Jesucristó rihaan nij so' a.

**Nanā nihánj taj xna'anj daj qui'yaj síí cu'naj Pedró gaa cataj so' se vaa nuveé sij nocō' man Jesucristó me so' a**

<sup>54</sup> Dan me se quita'aa nij so' man Jesucristó, ne ca'anj nicaj nij so' man Jesucristó rá ve' tucúa xrej atā suun nocōo doj, ne gan' gan' canoco' síí cu'naj Pedró rej xcō Jesucristó, 'na' so' a. <sup>55</sup> Dan me se naran' nii ya'an rá ve', ne yáán tacuachriin taran' nii rihaan ya'an, ne yáán síí cu'naj Pedró sca'núj nij so' a. <sup>56</sup> Dan me se yáán so' rej chuguun ya'an rihaan nij tuvi' xrej, ne quene'en yo'ō mozó chānā man so', ne ni'yaj uxrá chānā yo' man so' a. Gaa ne cataj mozó chānā yo' rihaan tuvi' no' síí mān gā no' a:

<sup>57</sup> —Síí nihánj ro', me yo'ō síí cachéé gā Jesucristó a —taj chānā yo', ni'yaj yo' man Pedró a.

Gaa ne cataj Pedró rihaan chānā yo' a:

—Ne ne'én 'unj man so', man nocōj —taj so' a.

<sup>58</sup> Ne yo'ō orá nii me se quene'en yo'ō so' man Pedró uún a:

—Yo'ō tuvi' nij síí chéé gā so' mé so' ei —taj so' rihaan Pedró a.

—Taj ma'. Nuveé sij chéé gā so' mé 'unj, man tinuj —taj Pedró yo' a.

<sup>59</sup> Dan me se cachén yo'ō orá uún, gaa ne nucaj ca'mii yo'ō so' a:

—Yā uxrá sij cachéé gā Jesucristó me síí nihánj nānj ei. 'O se sij cavii estadó Galilea me roj so' gā Jesucristó chuguanj —taj yo'ō so' a.

<sup>60</sup> Gaa ne cataj Pedró rihaan síí tu'va dānj a:

—Ne uno uxraj me taj so', man tinuj —taj so' rihaan nij so' a.

Ne dan me se nu' ca'mii so' dānj, ne nu' caguáj to'loo a. <sup>61</sup> Gaa ne canicaj síí 'nij ra'a man ní', ne ni'yaj so' man Pedró, gaa ne nanuj rá Pedró se-nānā síí 'nij ra'a man ní' gaa cataj síí 'nij ra'a man ní' rihaan so': "Ne'én 'unj se vaa asā' ataa caguaj to'loo ni corá, ne va'nuj cataj so' se vaa ne ne'én so' manj ma'", cataj síí 'nij ra'a man ní' rihaan so' quii a. <sup>62</sup> Dan me se gaa ni'yaj síí 'nij ra'a man ní' man Pedró, gaa ne curihānj Pedró xe', ne ta'vee ndo'o so' a.

**Nanā nihánj taj xna'anj daj qui'yaj nii gaa cuta' nii cacun' xráá Jesucristó a**

<sup>63</sup> Gaa ne nij síí quita'aa man Jesucristó ro', tiha' ndo'o nij so' man so', ne go' nij so' xráá so' a. <sup>64</sup> Ne gaa go' nij so' xráá so' me se caráán nij so' rihaan Jesucristó, ne cataj nij so' rihaan so' a:

—Cataj so' rihaan nūj me síí go' mán so' á —taj nij so', <sup>65</sup> ne que'ee doj nanā nij a'mii uún nij so' rihaan Jesucristó a.

<sup>66</sup> Ne gaa quisij güii, ne cunuu chre' nij síí uun chij rihaan nij yuvij israelitá, ne dan me se nij xrej atā suun nocōo doj do', nij síí naqui'yaj cuu se-tucuanj Moisés do', cunuu chre', ne ca'anj nicaj nij so' man Jesucristó rá ve' a'ne' nij so' cacun' che'é yuvij a. Gaa ne xná'anj nij so' man Jesucristó, ne cataj nij so':

<sup>67</sup> —Sese yā sij ca'néé Diose tinanii man yuvij rihaan sayuun mé so', rá so', ne cataj xna'anj so' rihaan nūj á —taj nij so' a.

Gaa ne cataj Jesucristó rihaan nij so' a:

—Ca'vee se cataj xna'anj 'unj rihaan soj, tzaj ne se cuchumán rá soj se-nānā ma'. <sup>68</sup> Ne sese xna'anj 'unj 'o nanā man soj, tzaj ne se cataj xna'anj soj rihanj ma'. <sup>69</sup> Tzaj ne rej rihaan ní' me se xā' 'unj sij ca'néé Diose nīcaj yu'unj man yuvij, tzaj ne cayáán 'unj rej nuva' Diose síí nucaj ndo'o a —taj Jesucristó rihaan nij so' a.

<sup>70</sup> Gaa ne xná'anj cunudānj nij so' man Jesucristó, cataj nij so':

—Che'é dan me ta'nij Diose mé so', rá so' na' —taj nij so' rihaan so' a.

Gaa ne cataj Jesucristó rihaan nij so' a:

—Veé yā ndāa vaa cataj soj ro', veé dānj vaa nānj á —taj so' a.

<sup>71</sup> Gaa ne cataj nij so' rihaan tuvi' nij so' a:

—Se cachiin doj síí ca'nā' cataj xna'anj rihaan ní' che'é cacun' tumé síí nihánj ā ma'. 'O se ma'an ní' me síí cuno daj tu'va so' nihánj nānj adōnj —taj nij so' rihaan tuvi' nij so' a.

**Nanā nihánj taj xna'anj daj ca'mii síí cu'naj Pilato gā Jesucristó a**

**23** Dan me se que'ee nij so', ne naxumaan taran' nij so', ne ca'anj nicaj nij so' man Jesucristó rihaan síí cu'naj Pilato a. <sup>2</sup> Gaa ne cuta' nij so' cacun'

xráá so' rihaan síí cu'naj Pilato, ne cataj nij so' rihaan síí cu'naj Pilato a:

—Síí nihánj ro', me síí tucu'yón tucuáán ne rihaan tuvi' núj sij israelitá, ne cataj so' se vaa se go' yuvií puextó rihaan síí nicaj suun cu'naj César, ne taj so' se vaa sij ca'née Diosé guun síí nicaj suun rey me ma'an so', taj so' adonj —taj nij so' rihaan síí cu'naj Pilato, ni'yaj nij so' man Jesucristó a.

<sup>3</sup> Gaa ne xná'anj síí cu'naj Pilato man Jesucristó a:

—So' me síí nicaj suun rey uun chij rihaan nij yuvií israelitá na' —taj so', xná'anj so' man Jesucristó a.

—Vej á —taj Jesucristó rihaan so' a.

<sup>4</sup> Gaa ne cataj síí cu'naj Pilato rihaan nij xrej atá suun nocoo doj do', rihaan nij yuvií do' a:

—Nuvi' cacun' tumé síí nihánj naríj ma' —taj so' a:

<sup>5</sup> Tzaj ne nucuaj doj ca'mii nij so', cataj nij so':

—Tzaj ne que'ee yuvií uno se-nana so', ne vaa güii qui'yaj nij so' sayuun nanj á. Ne vaj so' tucu'yón so' se-nana so' nu' estadó Judea nihánj, ne guun che'e so' tucu'yón so' se-nana so' estadó Galilea, ne 'na' so' ndaa nihánj tucu'yón so' nanj adonj —taj nij so' rihaan Pilato a.

<sup>6</sup> Dan me se cuno Pilato se-nana nij so', gaa ne xná'anj Pilato man nij so' sese sij cavii estadó Galilea me Jesucristó a. <sup>7</sup> Gaa ne quene'en so' se vaa ya cavii Jesucristó estadó Galilea rej uun chij síí cu'naj Herodes a. Che'é dan cataj so' se vaa ca'anj nicaj nij so' man Jesucristó rihaan síí cu'naj Herodes yo' a. 'O se güii dan me se nuú ma'an síí cu'naj Herodes chuman' Jerusalén a.

#### Nana nihánj taj xna'anj daj ca'mii síí cu'naj Herodes ga Jesucristó a

<sup>8</sup> Gaa quene'en síí cu'naj Herodes man Jesucristó, gaa ne guun nihá' uxrá rá so' a. 'O se asij rque ndo'o me se guun rá so' quene'en so' man Jesucristó, che'é se aj cuchí' nana rihaan so' daj 'yaj Jesucristó a. Ne guun rá so' se vaa qui'yaj Jesucristó 'o suun sa' nocoo ni'yaj so' a. <sup>9</sup> Dan me se xná'anj ndo'o so' nana man Jesucristó, tzaj ne a 'ó nana ne ca'mii Jesucristó rihaan so' a ma'. <sup>10</sup> Tzaj ne nicun' nij xrej atá suun nocoo doj nicun' nij síí naqui'yaj cyu se-tucuanj Moisés rihaan nij yuvií nicun', ne nucuaj ndo'o cuta' nij so' cacun' xráá Jesucristó a. <sup>11</sup> Gaa ne nachri' Herodes do', nij tanuu nuu rihaan so' do', ni'yaj nij so' man Jesucristó, ne ca'nga' nacoo nij so' ni'yaj nij so' man Jesucristó a. Gaa ne na'née nij so' yatzíj sedá man Jesucristó qui'yaj Herodes, ne veé dan na'née uún Herodes man so' rihaan Pilato a. <sup>12</sup> Ne güii dan me se guun che'e Herodes ga Pilato na'mii sa' roj so' ga tuvi' roj so' a. 'O se asij rque doj me se sij taj ri'yunj man tuvi' me roj so' a.

#### Nana nihánj taj xna'anj se vaa cataj xna'anj síí cu'naj Pilato se vaa cavi' Jesucristó rihaan rcutze a

<sup>13</sup> Dan me se canacúún síí cu'naj Pilato man nij xrej atá suun nocoo doj do', man nij síí uun chij rihaan nij

yuvií israelitá do', man ma'an nij yuvií do', se vaa ca'na' nij so' cunuu chre' nij so' rihaan so' a. <sup>14</sup> Gaa ne cataj Pilato rihaan nu' nij yuvií a:

—Dan me se nicaj soj man snó'o nihánj ca'na' soj rihaanj, ne cataj soj se vaa so' me síí me rá qui'yaj nij yuvií sayuun a. Ne veé xná'anj 'unj man so' cuno taran' soj daj 'yaj so', ne xa' cacun' cuta' soj xráá so', tzaj ne taj vaj cacun' vaa danj tumé síí nihánj naríj ma'. <sup>15</sup> Ne síí cu'naj Herodes ro', ne narí' so' cacun' tumé síí nihánj a ma'. Maan se na'née uun síí cu'naj Herodes man síí nihánj rihaan ní' nanj á. Ne xcaj soj cuentá se vaa taj cacun' qui'yaj síí nihánj, ne ne nó xcúún so' cavi' so' ma'. <sup>16</sup> Che'é dan qui'yaj doj sayuun man so', ne ca'anj uun so', qui'yaj ní' nanj á —taj Pilato rihaan taran' nij yuvií a.

<sup>17</sup> 'O se maan güii dan me se daj a cha'anj pascuá na'née nij so' man 'o yuvií 'nij taga' a.

<sup>18</sup> Gaa ne caguáj cunudanj nij so', cataj nij so' a:

—Ticavi' soj man síí nihánj ei. Ticavi' soj man síí nihánj ei. Ne quiríj so' man síí cu'naj Barrabás taga' che'é núj á —taj nij so', caguáj nij so' rihaan Pilato a.

<sup>19</sup> Ne xa' síí cu'naj Barrabás, tzaj ne sij qui'yaj cunu' nij yuvií man chuman' Jerusalén me so', ne sij ticavi' man yuvií me so', ne che'é dan caxríj nii taga' man so' a.

<sup>20</sup> Gaa ne ca'mii uún Pilato rihaan nij yuvií a. 'O se guun rá so' quiríj so' man Jesucristó ca'anj Jesucristó a.

<sup>21</sup> Gaa ne caguáj nu' nij yuvií, cataj nij so':

—Canó ya so' rihaan rcutze ei —taj nij yuvií, caguáj nij yuvií a.

<sup>22</sup> Gaa ne quisíj va'núj cataj so' rihaan nij yuvií:

—Tzaj ne taj vaj se chi'ii qui'yaj so' ma'. Taj vaj cacun' tumé so', ne ne nó xcúún so' cavi' so' ma'. Dan me se qui'yaj doj sayuun man so', ne ca'anj uun so' qui'yaj nanj á —taj uún Pilato rihaan nij yuvií a.

<sup>23</sup> Tzaj ne caguáj ndo'o nij yuvií, ne uxrá ca'ne' nij yuvií suun rihaan Pilato se vaa ya cavi' Jesucristó rihaan rcutze qui'yaj so', ne guun nucuaj doj se-nana nij yuvií yo' a. <sup>24</sup> Gaa ne guun ya rá Pilato se vaa qui'yaj so' ndaa vaa cataj nij yuvií rihaan so' a. <sup>25</sup> Dan me se síí 'nij taga' tumé cacun' se vaa cunu' yuvií qui'yaj do', se vaa ticavi' yuvií do', quiríj Pilato man so' ca'anj uun so', ndaa vaa cataj nij yuvií a. Ne Jesucristó ro', ca'vej rá Pilato quiran' so' ndaa vaa guun rá nij yuvií quiran' so' nanj adonj.

#### Nana nihánj taj xna'anj daj qui'yaj nij yuvií gaa cachrón nij yuvií man Jesucristó rihaan rcutze a

<sup>26</sup> Dan me se nicaj nii man Jesucristó ca'anj nii, gaa ne quita'aa nii man yo'o síí cu'naj Simón síí cavii chuman' Cirene gaa 'na' nique so' rej tacaan, ne cuta' nii rcutze xráá so' atá so' rcutze 'na' so' rej xco Jesucristó a. <sup>27</sup> Ne noco' que'ee yuvií man Jesucristó, ne ta'aj nij yuvií me chana, ne dan me se go' nij chana se-cuxru' nij no' rucuaa nij no', ne ta'vee ndo'o nij chana ni'yaj nij chana man Jesucristó a. <sup>28</sup> Gaa ne canicaj Jesucristó, cataj Jesucristó rihaan nij chana yo':



—Cuno soj chana ta'nij chuman' Jerusalén ca'mij á. Se ta'vee nij soj ni'yaj soj man ma'an soj do', man ma'an ta'nii soj do' á. <sup>29</sup> 'O se vaa güii cataj nii se vaa aj cavii sa' doj nij chana ituun do', nij chana ne nari' ne'ej do', nij chana ne tucutzii ne'ej do' a. <sup>30</sup> 'O se güii dan me se guun che'e yuvii nacunj yuvii nij quij se vaa canee nij quij caráán nij quij xráá ma'an nij so' a. <sup>31</sup> 'O se ase vaa chruun maree vaa i'na' vaa 'unj nihánj, tzaj ne danj nanj ticavi' nii manj a. Táa a nij sif ne chuman' Jerusalén, ne ase vaa chruun naco cavi' vaa nij sif tumé cacun' ne chuman' Jerusalén, ne che'é dan chi'ij uxrá doj quiran' nij so' nanj adonj —taj Jesucristó rihaan nij chana a.

<sup>32</sup> Ne nicaj nii man yavij roj sif tumé cacun', ca'anj nii rej cavi' roj so' ga Jesucristó a. <sup>33</sup> Ne ga cuchi' taran' nij so' rej cu'naj Tacaan Cúu Yave Xnangá, ne cachrón nii man Jesucristó ga roj sif tumé cacun' rihaan va'nuy rcutze, ne dan me se yo'q so' ro', cachrón nii rej nuva' Jesucristó, ne yo'q so' ro', cachrón nii rej nichruun Jesucristó a. <sup>34</sup> Ga ne cachíin ni'yaj Jesucristó rihaan Diose, cataj so':

—Caráa x'naa so', ne se qui'yáá so' sayuun man nij so', man Ataj Chij. 'O se ne ne'en nij so' daj 'yaj nij so' ma' —taj so', cachíin ni'yaj so' rihaan Rej so' Diose a.

Ga ne tico tixaj nij tanuu che'é sagan' Jesucristó a.

<sup>35</sup> Ne canicun' que'ee yuvii ni'yaj daj quiran' Jesucristó a. Dan me se ca'nga' nacoqo nij sif uun chij, cataj nij so':

—Aj tinanii so' man yo'ó yuvii rihaan sayuun, rá so' á. Ca'vee tinanii so' man ma'an so' yaj ei. Sese sij narii Diose me so' do', sese sij ca'née Diose tinanii man yuvii rihaan sayuun me so' do', ne ca'vee tinanii ma'an so' man so' a —taj nij sif uun chij ni'yaj nij so' man Jesucristó a.

<sup>36</sup> Ne nij tanuu, tzaj ne ca'nga' nacoqo uún nij tanuu ni'yaj nij tanuu man Jesucristó, ne ru'maan nij tanuu na vinó yuu tu'va Jesucristó, <sup>37</sup> ne cataj nij so':

—Sese so' me sif nicaj suun rey uun chij rihaan nij yuvii israelitá, ne tinanii so' man ma'an so' rihaan sayuun yaj vij —taj nij tanuu rihaan Jesucristó a.

<sup>38</sup> Ne vaa rcuchra' nó rihaan rcutze yo', ne nó nana rihaan rcuchra' yo' se vaa: "Sij nicaj suun rey uun chij rihaan nij yuvii israelitá me sif nihánj a", taj nana yo' a.

<sup>39</sup> Ne yo'q tuvi' roj sif tumé cacun' noco' rihaan rcutze rej x'nuy Jesucristó ro', nij ca'mii so' rihaan Jesucristó, cataj so':

—Sij ca'née Diose tinanii man yuvii rihaan sayuun mé so', rá so' na'. Me che'é ne tinanii so' man taran' ní ga —taj so' rihaan Jesucristó a.

<sup>40</sup> Tzaj ne yo'ó sif tumé cacun' ro', cataj so' rihaan tuvi' so':

—Nihánj me se cuyaan vaa sayuun ran' ní ga sayuun ran' sif nihánj nanj á. Ne me che'é ne chu'ví so' a doj ni'yaj so' Diose ga. <sup>41</sup> Dan me se xa' ní', tzaj ne vaa che'é cavi' ní', ne ran' ní' sayuun che'é cacun' tumé ní', tzaj ne xa' sif nihánj, tzaj ne taj vaj a doj se chi'ij ne

qui'yaj sif nihánj a ma' —taj yo'ó sif tumé cacun' yo' rihaan tuvi' so' a.

<sup>42</sup> Ga ne cataj so' rihaan Jesucristó a:

—Se quini'yón so' racuj so' manj, asa' guun che'e so' guun chij so' a ma' —taj so' rihaan Jesucristó a.

<sup>43</sup> Ga ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa güii cuan' me se cayáán so' ga 'unj rej sa' ndo'o rej ne nij sif sa' rihaan Diose ei —taj Jesucristó rihaan so' a.

<sup>44</sup> Veé dan, ne caxuj me yo', ne guun rmi' rihaan nu' chumij, ne yo'q guun rmi' rihaan chumij ndaa quisij aga' va'nuy rej anoco' güii a. <sup>45</sup> Ne guun rmi' rihaan güii, ne sin' nu' yatzij cortiná noco' rá nuvi' nocoqo a.

<sup>46</sup> Ga ne nucuaj ndo'o caguáj Jesucristó, cataj so':

—Nacaj so' nimanj, Ataj Chij —taj so', ne veé dan cavi' so' a.

<sup>47</sup> Dan me se quene'en tanuu capitán se vaa guun, ga ne ve'é uxrá ca'mii so' che'é Diose, ne cataj so':

—Xa' sif nihánj, tzaj ne ya ya sif sa' me so' nanj á —taj tanuu yo' ni'yaj so' man Jesucristó a.

<sup>48</sup> Dan me se quene'en taran' nij yuvii cunuu chre' rej yo' se vaa guun, ga ne go' nij so' se-cuxru' nij so' ru-cuaqo nij so' che'é se nanó ndo'o rá nij so', ga ne canicaj nij so' ca'anj nij so' chuman' a. <sup>49</sup> Ne canicun' cunudanj nij tuvi' Jesucristó rej gan' doj, ne ta'aj nij so' me chana cuno se-nana Jesucristó asij cavii Jesucristó estadó Galilea a. Ne ni'yaj taran' nij so' man Jesucristó a.

#### Nana nihánj taj xna'anj se vaa cachin' nii man Jesucristó rque yu'uj yuvej a

<sup>50</sup> Ne vaa 'q sif cu'naj José, ne yo'q tuvi' nij sif uun chij rihaan nij yuvii israelitá me so' a. Ne sif sa' me so', ne sif nica nimán me so', <sup>51</sup> ne ne vaa rá so' daj se vaa rá yo'ó nij sif uun chij rihaan nij yuvii israelitá ma'. Ne guun rá so' qui'yaj so' ndaa vaa qui'yaj yo'ó nij so' ma'. Ne sif cavii chuman' Arimatea yo'q chuman' naj estadó Judea me so' a. Ne so' me sif me ndo'o rá guun chij Diose rihaan chumij nihánj a.

<sup>52</sup> Dan me se ca'anj so' rihaan sif cu'naj Pilato, ne cachíin ni'yaj so' rihaan sif cu'naj Pilato se vaa ca'vej rá sif cu'naj Pilato cachin' so' man Jesucristó a. Dan me se ca'vej sif cu'naj Pilato, <sup>53</sup> ga ne ca'anj sif cu'naj José, tinanij so' man Jesucristó, ne nacusá so' yatzij mantá xráá Jesucristó, ne caxrij so' man Jesucristó rque yu'uj yuvej rej nuvi' a 'ó xnangá naj a.

<sup>54</sup> Veé danj qui'yaj nij so' güii 'yaj chuvii nij yuvii israelitá che'é güii naraan rá nij so', ne veé danj quisij güii naranj rá nij so' a. <sup>55</sup> Ne canoco' nij chana cavii estadó Galilea ga Jesucristó rej xco sif cu'naj José, ne quene'en nij chana yu'uj rej caxrij sif cu'naj José man Jesucristó, <sup>56</sup> ga ne canicaj nij chana chuman' Jerusalén, ne qui'yaj chuvii nij chana yo'óo gun' daj do', squíi xlá mirra do', caxrii nij chana man Jesucristó rá nij chana a.

**Nana nihánj taj xna'anj se vaa cunuu i'na' uún Jesucristó a**

Dan me se ma'an güii naránj rá nij yuvij israelitá me se naránj rá nij chana a.

**24** Ne taxrej güii cotungó, gaa ataa doj quisij güii, me se ca'anj nij chana rej taj yu'uj, ne nicaj nij chana nij rasuun gun' daj se vaa aj qui'yaj chuvij nij no' a. <sup>2</sup> Gaa ne quene'en nij chana se vaa naj yanij yuvej aráán tu'va yu'uj naj Jesucristó a. <sup>3</sup> Ne gaa catúj nij chana rá yu'uj, ne ne narí' nij chana man Jesucristó sij 'nij ra'a man ní' a ma'. <sup>4</sup> Dan me se caráya'anj ndo'o nij chana, ne nicun' vij snó'o rihaan nij chana, ne roj snó'o yo' me se yatzij chuguun uxrá nuú roj so' a. <sup>5</sup> Dan me se cuchu'vi' uxrá nij chana, ne ca'anj cayáán ruj nij chana, ne cuchruj nij chana rihaan nij chana rihaan yo'ó a. Gaa ne cataj roj snó'o rihaan nij no':

—Taj che'é nanó' soj man síí vaa i'na' rej naj nij síí cavi' ma'. <sup>6</sup> 'Q se nuvi' so' naj nihánj a ma'. 'Q se cunuu i'na' uún so' nanj á. Dan me se nanuj rá soj se vaa cataj so' gaa vaj nij soj estadó Galilea, ne cataj xna'anj so' rihaan soj se vaa <sup>7</sup> xa' so' sij ca'née Diosé nijaj yu'unj man yuvij, tzaj ne vaa che'é tajuachén nii man so' rihaan síí tumé cacun', ne cachron nij so' man so' rihaan rcutzé, ne cachén va'nuy güii, gaa ne cunuu i'na' uún so', taj so' a —taj roj snó'o yo' rihaan nij chana a.

<sup>8</sup> Dan me se nanuj rá nij chana nana ca'mii Jesucristó a. <sup>9</sup> Gaa ne curihanj nij chana yu'uj yuvej, ne canicaj nij chana yo' chuman' Jerusalén, ne cataj xna'anj nij chana nu' se vaa quene'en nij no' rihaan xaan nij apóstol cune' Jesucristó man do', rihaan yo'ó nij síí tucuyón se-nana Jesucristó uún do' a. <sup>10</sup> Dan me se va'nuy nij chana me níí cu'naj Mariá Magdalena do', níí cu'naj Juana do', níí cu'naj María nii Jacobo do', ne va'nuy nij no' ga yo'ó nij chana ro', cataj xna'anj rihaan nij apóstol che'é nu' se vaa quene'en nij no' a. <sup>11</sup> Ne gaa cuno nij apóstol cune' Jesucristó man se-nana nij chana, gaa ne nana snúú rma'an me nana yo', rá nij apóstol cune' Jesucristó man, ne ne cuchuman rá nij so' se-nana nij chana a. <sup>12</sup> Tzaj ne naxumaan síí cu'naj Pedró, ne cavii so' cunanj so' ca'anj so' ndaa yu'uj yo', ni'yaj so' a. Dan me se canicun' nituy so', ni'yaj so' rque yu'uj, tzaj ne nuvi' Jesucristó naj rque yu'uj quene'en so' a. Maan yatzij mantá uun naj, ni'yaj so' a. Gaa ne cavii so' quinan' so', ne caráya'anj so' che'é nu' se vaa guun a.

**Nana nihánj taj xna'anj se vaa ca'mii Jesucristó ga vij tuvi' nij síí tucuyón se-nana so' gaa vaj roj so' chrej ndaa chuman' cu'naj Emaús a**

<sup>13</sup> Dan me se vij tuvi' nij síí tucuyón se-nana Jesucristó ro', vaj roj so' chrej veé maan güii cotungó yo', ca'anj roj so' ndaa 'o chuman' naj xaan kilómetro ga chuman' Jerusalén, ne Emaús cu'naj chuman' yo' a. <sup>14</sup> Ne nanó roj so' cuentó che'é nu' se vaa quiran' nij tuvi' Jesucristó a. <sup>15</sup> Dan me se nanó roj so' cuentó, ne

nuchruj raa roj so' daj quiran' Jesucristó, gaa ne ma'an Jesucristó quinichrun' rihaan roj so', ne chée Jesucristó ga roj so' a. <sup>16</sup> Tzaj ne ne ca'vee cunuu yaan roj so' man Jesucristó ma'. <sup>17</sup> Gaa ne cataj Jesucristó rihaan roj so' a:

—Chée roj soj nanó roj soj cuentó, ne me che'é nanó roj soj cuentó ga tuvi' roj soj, ne me che'é nanó ndo'o rá roj soj ga —taj so', xna'anj so' man roj so' a.

Ne dan me se canicun' roj so', ne nanó ndo'o rá roj so' a. <sup>18</sup> Dan me se yo'o so' me síí cu'naj Cleofas, ne cataj so' rihaan Jesucristó a:

—Cunudanj nij síí aran' chuman' Jerusalén ne'en daj vaa guun chuman' Jerusalén güii cachén nihánj ei. Ne me che'é daj 'o ruún so' me síí ne ne'en daj vaa guun güii cachén nihánj ga —taj so', xna'anj so' man Jesucristó a.

<sup>19</sup> Gaa ne:

—Daj guun chuman' Jerusalén ga —taj Jesucristó, xna'anj so' man roj so' a.

Gaa ne cataj roj so' rihaan Jesucristó a:

—Nu' se vaa quiran' Jesucristó síí cavii chuman' Nazaret a. Ne so' me síí guun síí nata' se-nana Diosé rihaan nij yuvij, ne síí uun nucuaj ndo'o qui'yaj suun me so', ne síí cavii ndo'o nana sa' che'é Diosé tu'va me so' rihaan cunudanj nij yuvij a. <sup>20</sup> Ne dan me se ca'ne' nij xrej atá suun nocoo doj ca'ne' nij síí nicaj suun ca'ne' suun se vaa cavi' so', gaa ne cachron nii man so' rihaan rcutzé, <sup>21</sup> ne dan me se guun rá núj se vaa so' me síí tinanii man níí sij israelitá rihaan sayuun, tzaj ne quiran' so' cunudanj, ne nihánj me se síj va'nuy güii cavi' so' adonj. <sup>22</sup> Tzaj ne caráya'anj ndo'o núj, qui'yaj chana tuvi' núj a. 'Q se taxrej cuan' me se ca'anj ni'yaj nij chana yu'uj cachin' nii man so', <sup>23</sup> tzaj ne dan me se ne narí' nij chana man so' a ma'. Che'é dan ca'na' uún nij chana rihaan núj, ne cataj nij chana se vaa ndaa vij se-mozó Diosé naqui'yaa rihaan nij no', ne cataj roj se-mozó Diosé se vaa vaa i'na' Jesucristó, taj nij chana rihaan núj nanj adonj. <sup>24</sup> Dan me se cavii 'o vij tuvi' núj ca'anj ni'yaj roj so' yu'uj yo', tzaj ne quene'en roj so' nu' ndaa vaa cataj xna'anj nij chana rihaan núj, tzaj ne ne narí' roj so' man ma'an Jesucristó a ma' —taj roj so' rihaan Jesucristó a.

<sup>25</sup> Gaa ne ma'an Jesucristó cataj rihaan roj so' a:

—Dan me se síí ne acaj cuentá me soj, ne síí ne niha' rá cuchuman rá nu' se-nana nij síí nata' se-nana Diosé gaa naá me soj nanj á. <sup>26</sup> 'Q se ne ne'en soj se vaa xa' síí ca'née Diosé tinanii man yuvij rihaan sayuun, tzaj ne vaa che'é ndo'o quiran' so' sayuun ne catuy so' rej guun chij ndo'o so' a —taj Jesucristó rihaan roj so' a.

<sup>27</sup> Gaa ne dan me se guun che'e so' ca'mii so' che'é se-nana síí cu'naj Moisés do', che'é se-nana cunudanj nij síí nata' se-nana Diosé do', gaa ne cataj xna'anj so' rihaan roj so' daj taj nu' danj Diosé che'é ma'an so' a.

<sup>28</sup> Dan me se quinichrun' nij so' tu'va chuman' rej ca'anj roj so', gaa ne Jesucristó me se ndaa rá se 'yaj síí ca'anj chuman' naj gan' doj ro', qui'yaj so' a. <sup>29</sup> Gaa ne terquee roj so' man Jesucristó a:

—Quinaj cāchríi so' gā rój, ne aj ca'anj güii, ne vaj so' chrej, ne guun rmi' nanj á —taj roj so' rihaan Jesucristó a.

Gāa ne quináj so' gā roj so', ne catúj so' chuman' caran' so' gā roj so' a.

<sup>30</sup> Dan me se yáán nij so' chá xti'nō nij so', ne nicaj Jesucristó rachrúún, ne nago' so' graciá rihaan Diose che'é rachrúún, gāa ne cuxra' ta'aj so' rachrúún, rqué so' chá roj so' a. <sup>31</sup> Dan me se caxríj rá roj so', ne cunuu yaan roj so' man Jesucristó, ne veé dan nu' ca'anj ni'ya Jesucristó rihaan roj so', ne ne ca'vee quene'en roj so' man so' a ma'. <sup>32</sup> Gāa ne cataj roj so' rihaan tuvi' roj so' a:

—Veé ya ma'an Jesucristó me yo' asan. 'O se gāa ca'mii so' gā ní' gāa vaj ní' chrej do', gāa cataj xna'anj so' che'é danj Diose do', gāa ne guun niha' uxrá nimán ní', ne ndaa tiquisii ma'an nimán ní', qui'yaj so' a —taj roj so' rihaan tuvi' roj so' a.

<sup>33</sup> Gāa ne maan orá dan naxumaan roj so', ne canicaj roj so' ca'anj uún roj so' chuman' Jerusalén, gāa ne cuchi' roj so' yo', gāa ne aj cunuu chre' xaan nij síi tucuyón se-nānā Jesucristó gā yo'ó tuvi' nij so', <sup>34</sup> ne nij so' ro', cataj rihaan roj so' se vaa ya aj cunuu i'na' uún síi 'nij ra'a man ní', ne síi cu'naj Simón me síi quene'en man so', taj nij so' rihaan roj so' a. <sup>35</sup> Gāa ne roj so' ro', cataj xna'anj daj guun gāa quene'en roj so' man Jesucristó gāa vaj roj so' chrej, ne cataj xna'anj roj so' se vaa ndaa cuxra' ta'aj so' rachrúún gāa cunuu yaan roj so' man Jesucristó, taj roj so' a.

**Nanā nihánj taj xna'anj se vaa curuvi' Jesucristó rihaan xaan nij síi tucuyón se-nānā so' gā tuvi' nij so' a**

<sup>36</sup> Dan me se gāa nanó nij so' cuentó che'é nu' rasuun dan, ne nu' curuvi' Jesucristó tanuu sca'núj nij so', ne:

—Dínj gāa nimán soj á —taj so' rihaan nij so' a.

<sup>37</sup> Gāa ne cuchu'vi' ndo'o nij so', ne ta'naj me síi nicun' rihaan nij so', rá nij so' a. <sup>38</sup> Gāa ne cataj Jesucristó rihaan nij so' a:

—Me che'é nanó ndo'o rá soj, ne me che'é uun vij rá soj gā. <sup>39</sup> Ni'yaj soj ra'aj ni'yaj soj tacój ni'yaj soj, ne xcaj soj cuentá se vaa mā'anj me á. Xa' ta'naj, tzaj ne taj nee man so' do', taj cúu man so' do' ma' —taj Jesucristó rihaan nij so', <sup>40</sup> ne tihaan so' ra'a so' do', tacóo so' do', rihaan nij so' a.

<sup>41</sup> Dan me se ne ca'vee cuchuman rá nij so' se vaa ma'an Jesucristó me a. 'O se guun niha' uxrá rá nij so', ne ca'anj uxrá rá nij so' a. Che'é dan cataj Jesucristó rihaan nij so' a:

—Vaa doj se chá rihaan soj na' —taj so', xna'anj so' man nij so' a.

<sup>42</sup> Gāa ne rqué nij so' 'o xco' nee xcuaj ri'ya do', doj scuū xtaan do', man so', <sup>43</sup> gāa ne nicaj so', ne chá so' ni'yaj nij so' a. <sup>44</sup> Gāa ne cataj so' rihaan nij so' a:

—Nihánj me nanā ca'mii 'unj rihaan nij soj gāa vaj 'unj gā soj, se vaa cataj 'unj vaa che'é quisij ya 'unj nu' nanā a'mii che'é 'unj nanā nō rihaan yanj nō se-tucuanj Moisés do', yanj nō se-nānā nij síi nata' se-nānā Diose gāa naá do', yanj nō nij chra' salmo do' a —taj so' rihaan nij so' a.

<sup>45</sup> Gāa ne guun nucuaj nij so' xcaj nij so' cuentá che'é nu' danj Diose, qui'yaj so', <sup>46</sup> ne cataj so' rihaan nij so':

—Veé danj taj danj Diose se vaa xa' 'unj sij ca'née Diose tinanii man yuvi' rihaan sayuun, tzaj ne quiran' mā'anj sayuun, ne cavi' 'unj, ne cachēn va'nuj güii, gāa ne cunuu i'na' uún 'unj a. <sup>47</sup> Gāa ne ca'mii natáj nii rihaan cunudanj nij yuvi' man rihaan chumi' se vaa che'é se vaa ca'ná' 'unj ro', che'é dan sese canicaj nimán nij yuvi' canoco' nij yuvi' chrej sa', gāa ne tinavij Diose cacun' tumé nij so' a. Dan me se asino ca'mii natáj nii nanā dan chuman' Jerusalén, gāa ne ca'mii natáj nii nu' rihaan chumi' adonj. <sup>48</sup> Ne nij soj ro', me nij síi quene'en nu' rasuun qui'yaj ne testigó guun soj, <sup>49</sup> ne nihánj me se rque 'unj Nimán Diose rihaan soj ndaa vaa cata' tu'va ma'an Diose gāa naá a. Dan me se yo' o cayaán soj chuman' Jerusalén nihánj ndaa se nari' nucuaj nimán soj qui'yaj Diose á —taj Jesucristó rihaan nij so' a.

**Nanā nihánj taj xna'anj se vaa cavii Jesucristó xta' a**

<sup>50</sup> Gāa ne nicaj Jesucristó man nij so', ca'anj so' ndaa tu'va chuman' Betania, gāa ne naxcaj so' ra'a so', ne cachíin ni'yaj so' rihaan Diose se vaa ve'é racu'ij Diose man nij so', ne cavii sa' nij so' a. <sup>51</sup> Ne nu' ca'mii so' danj che'é nij so', ne nu' cavii so' xta' ca'anj so' a.

<sup>52</sup> Dan me se na'vij nij so' rihaan so', gāa ne canicaj nij so' ca'anj uún nij so' ndaa chuman' Jerusalén, ne guun niha' uxrá rá nij so', <sup>53</sup> ne yo' o ca'anj nij so' nuvíi no-cōo, ne nata' nij so' rihaan nij yuvi' se vaa sa' uxrá qui'yaj Diose a. Veé danj gāa ya ei.

# San Juan

**Nana nihánj taj xna'anj se vaa guun yuvij man se-nana Diose a**

**1** Asij ataa qui'yaj Diose chumij, ne aj vaa se-nana Diose, ne se-nana Diose ro', canicun' so' rihaan ma'an Diose, ne Diose me so' a. <sup>2</sup> Dan me se asij ataa qui'yaj Diose chumij, ne canicun' se-nana Diose rihaan Diose, <sup>3</sup> ne ca'ne' Diose suun rihaan so' qui'yaj so' nu' rasuun a. Ne sese taj se-nana Diose, ne taj vaj a doj rasuun man nihánj cuano ne guun ma'. <sup>4</sup> So' me sí qui'yaj cunuu i'na' rasuun, ne che'é se cunuu i'na' yuvij qui'yaj so', che'é dan guun nucuaj yuvij xcaj yuvij cuentá a. Dan me se ase vaa ya'an chuguun vaa so' rihaan yuvij, <sup>5</sup> ne qui'yaj so' chuguun rej rmi' rej man ní sij man rihaan chumij nihánj sij ataa xcaj cuentá, ne ne qui'yaj canaán rej rmi' yo' rihaan so' a man adonj.

<sup>6</sup> Ne curihanj yo'o snó'o, ne dan me se sí ca'née Diose me so', ne Juan cu'naj so', <sup>7</sup> ne ca'na' so' cataj xna'anj so' che'é ya'an chuguun yo', ne me rá so' cuchuman rá cunudanj yuvij ni'yaj nij yuvij man ya'an chuguun yo' a. <sup>8</sup> Nuveé ma'an so' me ya'an chuguun yo'; maan se ca'na' so' cataj xna'anj so' che'é ya'an chuguun yo' a.

<sup>9</sup> Ne ya'an chuguun ya yo' ro', yo' me sí 'yaj chuguun rihaan cunudanj yuvij, che'é rej guun nucuaj nij yuvij xcaj nij yuvij cuentá a. Ne ca'na' so' rihaan chumij nihánj, <sup>10</sup> ne cayáan so' rihaan chumij nihánj, ne ma'an so' me sí qui'yaj chumij nihánj, qui'yaj Diose, tzaj ne ne xcaj nij sí man rihaan chumij nihánj cuentá me sí me so' a ma'.

<sup>11</sup> Ndaa rihaan ma'an nij tuvi' so' cuhi' so', tzaj ne ne ca'mii sa' nij so' ga so' a ma'. <sup>12</sup> Tzaj ne xa' taran' nij sí ca'mii sa' ga so', tzaj ne sí amán rá ni'yaj man so' me nij so', ne danj nanj rqué so' guun nij so' ta'ní ma'an ya Diose a. <sup>13</sup> Ne nij sí guun ta'nij Diose man, tzaj ne nuveé che'e se nayón nij so' rque nii nij so' me guun ta'nij Diose man nij so' ma'. Ne nuveé che'e se guun rá ma'an rej nij so' nayón nij so' rque nii nij so' me guun ta'nij Diose man nij so' ma'. Nuveé che'e se guun rá rej nij so' ca'ngaa nij so' me guun ta'nij Diose man nij so' ma'. Maan se ma'an Diose me sí qui'yaj guun ta'nij Diose man nij so' adonj.

<sup>14</sup> Gaa ne guun se-nana Diose yo' yuvij, ne cayáan so' ga ní, ne quene'en núj se vaa ve'é inanj qui'yaj so', ne dan me se taj vaj yo'ó ta'ní Rej so' Diose ma'. Tananj orún' so' me sí qui'yaj ndaa vaa qui'yaj so', ne se luj ndo'o qui'yaj so' che'é ní, ne inanj nana ya ca'mii so' adonj.

<sup>15</sup> Ne sí cu'naj Juan me sí cataj xna'anj rihaan yuvij che'é Jesucristó, ne nucuaj ca'mii so', cataj so':

—Sí nihánj ro', aj cataj xna'anj 'unj rihaan soj che'é so' gaa rque á. Dan me se cataj xna'anj 'unj rihaan soj se vaa nda' se sí ca'na' rej rihanj me so', tzaj ne 'o se sij uun chij ndo'o doj me so' rihanj nanj á. 'Q se asij ataa ca'ngaa 'unj, ne aj nicun' so' nanj adonj —taj sí cu'naj Juan yo' a.

<sup>16</sup> Danj ca'mii sí cu'naj Juan che'é se Jesucristó me sí nicaj nu' rasuun sa', ne so' me sí rqué se sa' man taran' ní, ne dan me se nuveé orún' se luj 'yaj so' che'é ní ma'. 'Q se que'ee se luj 'yaj so' che'é ní adonj. <sup>17</sup> 'Q se rqué Diose se-tucuaj Moisés rihaan xij ní gaa naá, tzaj ne Jesucristó me sí tacuachén nana luj do', nana ya do', rihaan ní a. <sup>18</sup> Ne xa' Diose, tzaj ne taj vaj a doj sí ne'en rihaan man Diose ma'. Tzaj ne xa' Jesucristó, tzaj ne orún' so' me ta'ní Diose, ne nicun' so' rihaan Diose, ne so' me sí tihaan rihaan ní' daj vaa Diose adonj.

**Nihánj me se-nana sí cu'naj Juan sí cuta' ne man yuvij a**

<sup>19</sup> Ne nij sí uun chij rihaan nij yuvij israelitá sí man chuman' Jerusalén me se ca'née nij so' man xrej do', man doj tuvi' sí cu'naj Leví sí cayáan gaa naá do', se vaa ca'anj nij so' xna'anj nij so' man sí cu'naj Juan me sí me Juan a. Dan me se ca'anj nij so' xna'anj nij so' man Juan, gaa ne Juan yo' ro', ca'mii so' nana nihánj rihaan nij so' a. <sup>20</sup> Dan me se yo'o cataj xna'anj sí cu'naj Juan rihaan nij so' daj sij me so', ne ne ca'mii ne so' ma'. 'Q se ca'mii ya so', cataj so':

—Nuveé sij ca'née Diose tñanii man yuvij rihaan sayuun mé 'unj ma' —taj sí cu'naj Juan yo' a.

<sup>21</sup> Gaa ne xna'anj uún nij so' man so', cataj nij so':

—Che'é dan me sí mé so' ga. Sí cu'naj Elías sí nata' se-nana Diose gaa naá mé so' na' —taj uún nij so', xna'anj nij so' man Juan a.

—Taj ma'. Nuveé so' mé 'unj ma' —taj uún sí cu'naj Juan yo' a.

—Ne'en núj se vaa vaa güii ca'na' yo'o sí nata' se-nana Diose, ne sij nata' yo' mé so' na' —taj uún nij so', xna'anj nij so' man Juan a.

—Taj ma' —taj sí cu'naj Juan yo' a.

<sup>22</sup> Che'é dan cataj nij so':

—Tzaj ne cataj ya so' me sij mé so', gaa ne ca'vee cataj xna'anj núj rihaan nij sí ca'née man núj ca'na' núj daj sij mé so' a. Me sij mé so' ga. Daj vaa yo', rá so' ga —taj uún nij so', xna'anj nij so' man Juan a.

<sup>23</sup> Ne cataj síi cu'naj Juan:

—Síi cu'naj Isaías síi nata' se-nanā Diose gaa naá ro', cataj xna'anj so' che'é suun 'yaj sunj a. Dan me se 'unj me síi nucuaj ndo'o a'mii rej tacaan, ne taj 'unj rihaan yuvij se vaa nuchran' nimán yuvij, ne ve'é ca'mii nij yuvij gā síi 'nij ra'a man ní' asá' ca'na' so' a —taj síi cu'naj Juan yo' a.

<sup>24</sup> Ne ta'aj nij síi ca'na' rihaan síi cu'naj Juan me síi fariseo, <sup>25</sup> ne cataj nij so' rihaan síi cu'naj Juan a:

—Dan me se nuveé sij ca'née Diose tjanii man yuvij rihaan sayuun mé so' ma'. Nuveé sij cu'naj Elías mé so' ma'. Nuveé sij nata' se-nanā Diose yo' mé so' ma'. Che'é dan ne nó xcúun so' cutá' ne so' man yuvij —taj nij síi fariseo yo' rihaan síi cu'naj Juan a.

<sup>26</sup> Ne cataj xna'anj síi cu'naj Juan rihaan nij so', cataj so':

—'Unj me síi uta' ne uun man yuvij a. Tzaj ne vaa yo'ó síi nicun' sca'núj soj, ne ne ne'en soj man so' ma'.

<sup>27</sup> Ne so' me síi 'na' rej xcoj, ne sij sa' uxrá doj me so' rihanj, ne daj chihāā mij se quisij raj quirij canj 'nij tacóo so' ma' —taj síi cu'naj Juan rihaan nij síi fariseo yo' a.

<sup>28</sup> Danj guun rej Betania rej rnej tu'va chráá cu'naj Jordán, rej vaj síi cu'naj Juan gaa cuta' ne so' man yuvij a.

<sup>29</sup> Dan me se yo'ó güii, ne quene'en síi cu'naj Juan se vaa ca'na' Jesucristó rihaan so', ne cataj so':

—Ni'yaj soj ei. Ase vaa matzinj cavi' rihaan Diose vaa síi nihánj, ne dan me se síi nihánj me síi ca'neē cacun' tumé yuvij man rihaan chumii nihánj, <sup>30</sup> ne síi nihánj ro', cataj xna'anj 'unj rihaan soj che'é so' gaa rque, ne cataj 'unj se vaa ca'vee se sij 'na' rej xcoj me so', tzaj ne sij uun chij doj rihaan 'unj me so' a. 'Q se asij ataa ca'ngāā 'unj, ne aj nicun' so' nanj adonj. <sup>31</sup> Dan me se gaa rque ro', ne quene'en ma'anj sese sij nihánj me so' ma'. Tzaj ne maan che'é se me rá 'unj quene'en nij yuvij israelitá man so' ro', che'é dan ca'ná' 'unj, ne che'é dan cuta' ne 'unj man yuvij nanj á —taj síi cu'naj Juan yo' a.

<sup>32</sup> Gaa ne cataj xna'anj ya síi cu'naj Juan che'é se vaa quene'en ma'an so', cataj so':

—Quene'én 'unj se vaa nanij Nimán Diose rej xtá', ne ase vaa 'o cha'aan vaa Nimán Diose yo', ne ca'na' yo', quitáá yo' raā Jesucristó ei. <sup>33</sup> Gaa ne nuy' xcaj 'unj cuentá se vaa ma'an so' me síi ca'née Diose á. 'Q se síi ca'née mán 'unj cutá' ne 'unj man yuvij me se ma'an so' cataj rihaan 'unj se vaa sese quene'én 'unj nanij Nimán Diose raā yo' o so', ne sese quitaj Nimán Diose yo' raā so', ne so' me síi ca'née Diose, ne cayáán uxrá Nimán Diose gā yuvij, qui'yaj so' a, taj síi ca'née manj adonj. <sup>34</sup> Gaa ne quene'en ma'án 'unj man Jesucristó nihánj, se vaa nanij Nimán Diose raā so', ne aj cataj ya 'unj rihaan soj se vaa ta'nij Diose me so' ei —taj síi cu'naj Juan yo' a.

**Nanā nihánj taj xna'anj se vaa guun che'e va'nuj nij snó'o canoco' nij so' man Jesucristó a**

<sup>35</sup> Güii a'yuj me se canicun' uún síi cu'naj Juan gā vij tuvi' nij síi tucu'yón se-nanā so' a. <sup>36</sup> Ne ni'yaj uxrá síi cu'naj Juan man Jesucristó gaa chée Jesucristó, ne cataj síi cu'naj Juan:

—Ni'yaj roj soj ei. Ase vaa matzinj cavi' rihaan Diose vaa síi nihánj á —taj síi cu'naj Juan a.

<sup>37</sup> Dan me se cuno roj síi tucu'yón se-nanā Juan nanā ca'mii so', ne canoco' roj so' man Jesucristó a. <sup>38</sup> Gaa ne canicaj Jesucristó, ne quene'en so' se vaa canoco' roj so' man so', ne cataj Jesucristó rihaan roj so' a:

—Vaa se achiin man roj soj na' —taj Jesucristó, xna'anj Jesucristó man roj so' a.

Gaa ne xna'anj roj so', cataj roj so':

—Me rej né so', rabbi —cataj roj so', xna'anj roj so' man Jesucristó, ne nanā "rabbi" yo' taj "maestró" a.

<sup>39</sup> Gaa ne cataj Jesucristó rihaan roj so' a:

—Ca'anj ní', ne quene'en soj á —taj Jesucristó a.

Che'é dan me ca'anj roj so', ne quene'en roj so' rej ne Jesucristó, ne cunuû roj so' tucua' so' cunuj güii yo' a. Dan me se aga' ca'anj rej anoco' güii me orá ca'mii roj so' gā Jesucristó a.

<sup>40</sup> Dan me se yo' o tuvi' roj síi cuno nanā ca'mii síi cu'naj Juan ne canoco' man Jesucristó ro', me síi cu'naj Andrés, ne tinúú síi cu'naj Simón Pedró me uún so' a.

<sup>41</sup> Asino yaan nari' síi cu'naj Andrés man tinúú so' síi cu'naj Simón, ne cataj so' rihaan tinúú so':

—Nari' núj man Mesías ei —taj so' rihaan tinúú so' a. Ne nanā "Mesías" taj "síi ca'née Diose tjanii man yuvij rihaan sayuun" a.

<sup>42</sup> Ne ca'anj nicaj so' man tinúú so' rihaan Jesucristó, gaa ne ni'yaj uxrá Jesucristó man síi cu'naj Simón yo', ne cataj so':

—Síi cu'naj Simón mé so', ne ta'níi síi cu'naj Juan mé so' á. Tzaj ne ndāā yaj, ne Cefas cu'naj so' á —taj Jesucristó rihaan so' a. Ne nanā "Cefas" ro', xna'anj hebreo me yo', ne 'o cuyāā vaa yo' gā nanā "Pedró", ne taj yo' se vaa ase vaa 'o yuvej vaa síi cu'naj Pedró, ne sca' nimán so' a.

**Nanā nihánj taj xna'anj se vaa canacúun Jesucristó man síi cu'naj Felipé do', man síi cu'naj Natanael do', se vaa canoco' roj so' man so' a**

<sup>43</sup> Dan me se yo'ó güii uún me rá Jesucristó cavi' so' ca'anj so' estadó Galilea, ne nari' Jesucristó man síi cu'naj Felipé, ne dan me se cataj Jesucristó rihaan so' a:

—Canocó' so' manj, ca'anj ní' á —taj Jesucristó rihaan so' a.

<sup>44</sup> Ne Felipé ro', me síi ne chuman' Betsaida, ne Betsaida me chiháán síi cu'naj Andrés do', síi cu'naj Pedró do', uún a. <sup>45</sup> Veé dan, ne nari' síi cu'naj Felipé yo' man síi cu'naj Natanael, ne cataj so':

—Aj nari' núj man síi ca'née Diose tjanii man yuvij rihaan sayuun, ne dan me se síi ca'mii Moisés che'é

gaa cuchruj so' se-tucuñj so' me so', ne nij síi nata' se-nanā Diose gaa naá ro', nata' uún nij so' che'é so' nanj adonj. Ne dan me se Jesús ta'níi síi cu'naj José, síi ne chuman' Nazaret me so' ei —taj Felipé rihaan Natanael yo' a.

<sup>46</sup> Ne cataj Natanael yo':

—Taj vaj síi sa' avii chuman' Nazaret ma' —taj Natanael yo' a.

Ne cataj Felipé:

—Ca'anj ní', quene'én so' man so', sese me rá so' á —taj Felipé rihaan so' a.

<sup>47</sup> Veé dan, ne quene'en Jesucristó se vaa ca'na' Natanael rihaan so', ne ca'mii so' 'o nanā che'é Natanael, cataj so':

—Ni'yaj soj ei. Ya sij israelitá me síi 'na' cuano ei. Nicā a'mii so', ne a'mii so' nanā tiha' yu'unj ma' —taj Jesucristó ni'yaj so' man Natanael yo' a.

<sup>48</sup> Gaa ne xná'anj Natanael yo' man Jesucristó, cataj so':

—Asā' a'vee ne'én so' manj gā —taj so', xná'anj so' man Jesucristó a.

Ne cataj Jesucristó:

—Asij ataa ca'mii Felipé rihaan so' do', asij cayáan so' tacóo chruun man chruj higó raā do', ne aj quene'én 'unj mán so' ei —taj Jesucristó rihaan so' a.

<sup>49</sup> Gaa ne cataj Natanael:

—Ta'nij Diose mé so', maestro. Sij nicaj suun rey uun chij rihaan ní' sij israelitá mé so' á —taj Natanael a.

<sup>50</sup> Gaa ne cataj Jesucristó rihaan so':

—Che'é se cataj 'unj rihaan so' se vaa quene'én 'unj mán so' gaa cayáan so' tacóo chruun man chruj higó ro', maan che'é dan amán rá so' ni'yaj so' manj na'. Tzaj ne quene'én so' que'ee doj rasuun nocoo doj uún a á. <sup>51</sup> Ya ya cataj xna'anj 'unj rihaan nij soj cuano se vaa quene'én soj naxra' rej xta', ne quene'én soj man nij se-mozó Diose, ne cavii nij so' xta', ne nanij uún nij so' rihaan 'unj sij ca'née Diose nicaj yu'unj man yuvii adonj —taj Jesucristó rihaan taran' nij so' a.

**Nanā nihánj taj xna'anj se vaa naquiyaj Jesucristó na vinó man na uun gaa canuú cha'anj nara'aa chuman' Caná a**

**2** Cachén yavij güii, gaa ne canuú cha'anj nara'aa chuman' Caná chuman' naj estadó Galilea, ne ca'anj nii Jesucristó cha'anj yo' a. <sup>2</sup> Dan me se nacúun nii man Jesucristó do', man nij síi tucu'yón se-nanā so' do', ca'nā' nij so' cha'anj yo' a. <sup>3</sup> Veé dan, ne navij na vinó man nij síi navij rá cha'anj yo', ne che'é dan cataj nii Jesucristó rihaan Jesucristó a:

—Taj vaj na vinó rihaan nij síi navij rá cha'anj ma' —taj no' a.

<sup>4</sup> Gaa ne cataj Jesucristó rihaan nii so' a:

—Taj che'é ca'mii so' danj rihanj ma'. Ni'yaj so', ne ataa quisij güii qui'yaj suun sa' nocoo á —taj so' no nii so' a.

<sup>5</sup> Gaa ne cataj xna'anj nii Jesucristó rihaan nij mozó a:

—Cunō nij soj nu' se vaa cataj xna'anj ta'nij rihaan soj, ne qui'yaj soj nu' se vaa cataj so' á —taj no' rihaan nij mozó a.

<sup>6</sup> Veé dan, ne ne vatan' xruj yahij xij a. Xruj nicaj ca'anj chihāā litró na me xruj yo', ne xruj araa nij yuvii israelitá na rásuun nij so' na'ya' nij so' ndāa vaa taj se-tucuñj Moisés me xruj yo' a. <sup>7</sup> Ne ca'ne' Jesucristó suun rihaan nij mozó, cataj so':

—Carāa soj na rque nij xruj yahij yo' á —taj so' rihaan nij mozó yo' a.

Gaa ne caraa nij mozó na, ne yo' o caraa ndāa tu'va xruj yo', qui'yaj nij so' a. <sup>8</sup> Gaa ne cataj xna'anj uún Jesucristó rihaan nij mozó yo', cataj so':

—Yaj ro', quirii soj doj na nuu rque xruj, ne ca'anj nicaj soj na yo' rihaan síi uun chij rihaan nij mozó anicaj co'oo rihaan nij yuvii á —taj Jesucristó a.

Ne danj qui'yaj nij so' a.

<sup>9</sup> Veé dan, ne síi uun chij rihaan nij mozó anicaj co'oo rihaan yuvii me se co'o so' doj tzin' na yo', tzaj ne nu-veé nā uun me yo' a ma'. Nu' guun na yo' na vinó nanj adonj. Ne ne quene'én so' me rej cavii na vinó yo' a ma'. 'O se maan inanj nij mozó quirii na yo' rque xruj ro', orún' nij so' me síi quene'én me rej cavii na yo' a. Veé dan, ne nacúun síi uun chij yo' man síi nara'aa ca'nā' síi nara'aa rihaan so', <sup>10</sup> ne cataj so':

—Tucuáan 'yaj ní' ro', me se nanj vaa yo' nanj á. Asino yaan go' ní' na vinó sa' doj co' o nij síi tihaj 'na' cha'anj, gaa ne ndāa quisij guun xno yuvii asuun, gaa ne go' ní' na vinó nij doj co' o nij so' a. Tzaj ne so' me se ino qui'yáá so' chuguñj. Dan me se ndāa yaj quirii so' na vinó sa' doj yo' asanj —taj síi uun chij yo' rihaan síi nara'aa yo' a.

<sup>11</sup> Nihánj me se guun che'e Jesucristó qui'yaj Jesucristó suun sa' nocoo, ne nu' nihánj me se vaa qui'yaj so' chuman' Caná chuman' naj estadó Galilea a. Che'é dan xcaj nij yuvii cuentá se vaa sij sa' uxrá me so', qui'yaj so', ne cuchumán rá nij síi tucu'yón se-nanā so' ni'yaj nij so' man so' a.

<sup>12</sup> Gaa quisij canuú cha'anj nara'aa yo', gaa ne ca'anj Jesucristó do', nii so' do', nij tinúu so' do', nij síi tucu'yón se-nanā so' do', chuman' Capernaum, ne doj güii cayáan nij so' chuman' yo' a.

**Nanā nihánj taj xna'anj daj qui'yaj Jesucristó gaa quirii so' man síi chi'ii rá nuvíi nocoo a**

<sup>13</sup> Dan me se ataa doj quisij cha'anj pascuá cha'anj navij rá nij yuvii israelitá, gaa ne cavii Jesucristó ca'anj so' chuman' Jerusalén a. <sup>14</sup> Gaa ne rá nuvíi nocoo ro', naj 'o yu'vee nocoo 'yaj nij yuvii israelitá, ne maan dan mán nij so' tu'vej nij so' scúj do', matzinj do', cha'aan do' a. Ne vaa síi ne rihaan chruun mesá, ne síi natuná sa'anj che'é yuvii atúj rque nuvíi me nij so' a. <sup>15</sup> Gaa ne nicaj Jesucristó ne', qui'yaj so' cuartá, go' so' man nij síi tu'vej xcuu do', man nij síi natuná sa'anj do', ne quirii so' xe' man taran' nij so' a. Ne rano so' man nij scúj do', man nij matzinj do', quirii so' xe' a. Ne ticha'nuu so' se-sa'anj síi natuná sa'anj rihaan yo'óo,

ne tinaxru' so' nij chruun mesá a. <sup>16</sup> Gaa ne cataj so' rihaan nij síi tu'véj cha'aan a:

—Quirij soj rasuun nihánj xe' cuaj ei. Se guun qui'yaj soj yu'vee tucua Réj ma' —taj so' rihaan nij síi tu'véj cha'aan man rá nuvíi yo' a.

<sup>17</sup> Gaa ne ninuj rá nij síi tucu'yón se-nana Jesucristó se vaa nó nana nihánj rihaan danj Diose a: “Che'é se 'ee ndo'o raj ve' tucua so', che'é dan ca'née nimanj qui'yaj sunj che'é yo' a”. Yo' me nana nó rihaan danj Diose a.

### Nana nihánj taj xna'anj se vaa ca'mii Jesucristó che'é güii cunuu i'na' uún so' a

<sup>18</sup> Quene'en nij síi uun chij rihaan nij yuvij israelitá se vaa qui'yaj Jesucristó rá nuvíi yo', gaa ne che'é dan cataj nij so' rihaan Jesucristó a:

—Ne nó xcúun so' quirij so' man síi tu'véj xcuu man rá nuvíi nocoo, rá núj ma'. Maan se qui'yáa so' 'o suun sa' nocoo quene'en núj, gaa ne guun ya rá núj se vaa no xcúun so' qui'yáa so' danj ei —taj nij so' rihaan Jesucristó a.

<sup>19</sup> Ne cataj Jesucristó rihaan nij so' a:

—Tirj' soj man nuvíi nihánj, ne rque va'nuj güii, ne cunuu sa' uún nuvíi nihánj, qui'yaj ei —taj Jesucristó a.

<sup>20</sup> Che'é dan cataj nij síi uun chij yo' rihaan Jesucristó a:

—Vij chihaa vatan' ya yo' qui'yaj suun nij síi cune' nuvíi nihánj, tzaj ne asa' ca'vee naquiyaj sa' so' nuvíi nihánj rque va'nuj güii, rá so' ga —taj nij so' rihaan Jesucristó a.

<sup>21</sup> Tzaj ne ne ca'mij Jesucristó che'é maan nuvíi nocoo yo' ma'. Maan se ca'mii so' che'é ma'an yan cunuu i'na' uún so' rque va'nuj güii a. <sup>22</sup> Che'é dan, gaa quisij cavi' so' ne cunuu i'na' uún so', gaa ne nanuj rá nij síi tucu'yón se-nana so' nana nihánj nana aj ca'mii so', ne cuchumán rá nij so' nana no rihaan danj Diose nana taj xna'anj daj quiran' síi ca'nej Diose tinanii man yuvij rihaan sayuun, ne cuchumán rá nij so' nana ca'mii ma'an Jesucristó uún a.

### Nana nihánj taj xna'anj se vaa ne'en Jesucristó daj vaa nimán yuvij a

<sup>23</sup> Dan me se nu' nihánj qui'yaj Jesucristó chuman' Jerusalén gaa canuú cha'anj pascuá, ne che'é dan que'ee ndo'o nij yuvij cuchumán rá se vaa sij ca'née Diose me so' a. 'O se quene'en nij yuvij nij suun sa' nocoo qui'yaj suun so' a. <sup>24</sup> Tzaj ne ma'an Jesucristó, ne gaa nucaj rá so' man nij yuvij yo' ma'. 'O se so' me síi ne'en cunudanj, <sup>25</sup> ne ne cachijn yo' síi cataj xna'anj rihaan Jesucristó daj vaa nimán yuvij ma'. 'O se ma'an so' me síi quene'en daj vaa nimán nu' nij yuvij adonj.

### Nana nihánj taj xna'anj daj ca'mii Jesucristó ga síi cu'naj Nicodemo a

**3** Dan me se vaa yo' síi fariseo cu'naj Nicodemo, ne síi uun chij rihaan nij yuvij israelitá me so' a.

<sup>2</sup> Dan me se rej nij ca'na' so' rihaan Jesucristó, ne cataj so':

—Ne'en núj se vaa sij ca'née Diose tucu'yón man yuvij mé so', maestro. 'O se sese nuvi' Diose racuj man so', ne ne guun nucaá so' qui'yáa so' ndaa vaa 'yáa so' nihánj cuano asuun ma' —taj so' rihaan Jesucristó a.

<sup>3</sup> Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa síi se ca'ngaa naca uún ro', daj chihaa mij se guun nucaj so' quene'en so' man Diose asa' guun chij Diose rihaan chumij nihánj a ma' —taj Jesucristó rihaan so' a.

<sup>4</sup> Dan me se xna'anj síi cu'naj Nicodemo man Jesucristó, cataj so':

—Asa' ca'vee ca'ngaa uún 'o síi aj cachij ga. Ca'vee xa' catuu uún so' rque nii so' ne ca'ngaa naca uún so' gaa a na' —taj Nicodemo, xna'anj so' man Jesucristó a.

<sup>5</sup> Gaa ne cataj uún Jesucristó:

—Ya ya cataj xna'anj 'unj rihaan so' se vaa sese se ca'ngaa yo' so' qui'yaj na ne qui'yaj Nimán Diose, ne se guun nucaj so' catuu so' rihaan Diose asa' guun chij Diose rihaan chumij nihánj ma'. <sup>6</sup> 'O se sese nanj yuvij qui'yaj ca'ngaa ní', ne nanj yuvij man rihaan chumij nihánj me ní', tzaj ne sese ca'ngaa ní' qui'yaj Nimán Diose, ne ase vaa sa' Nimán Diose ro', danj gaa sa' nimán ní' nanj adonj. <sup>7</sup> Se caraya'anj tihá' so' se vaa cataj 'unj rihaan so' ma'. 'O se no xcúun nij soj ca'ngaa ya uún nij soj adonj. <sup>8</sup> Dan me se xcaj so' cuentá ni'yaj so' nana a. Avii nana yo', ne cayuj 'yaj yo', tzaj ne ne ne'en so' me rej avii yo' 'na' yo', ne ne ne'en so' me rej ca'anj yo' ma'. Ne ase vaa nana ro', danj vaa Nimán Diose, ne dan me se sese cunuu sa' nimán yo' so' qui'yaj Nimán Diose, ne taj ne'en asa' ca'vee cunuu sa' nimán so' qui'yaj Nimán Diose ma' —taj Jesucristó rihaan síi cu'naj Nicodemo yo' a.

<sup>9</sup> Veé dan, ne xna'anj síi cu'naj Nicodemo, cataj so':

—Asa' ca'vee qui'yaj yuvij danj ga —taj so', xna'anj so' a.

<sup>10</sup> Gaa ne xna'anj uún Jesucristó man so', cataj Jesucristó:

—'O se me che'é sij uun chij sij tucu'yón se-nana Diose rihaan nij yuvij israelitá mé so', tzaj ne ne ne'en so' nana nihánj nana cataj 'unj rihaan so' ga. <sup>11</sup> Ya ya cataj xna'anj 'unj rihaan so' se vaa xa' núj, tzaj ne che'é inanj se vaa ne'en núj a'mii núj ne che'é se vaa quene'en núj nata' núj adonj. Tzaj ne ne amán rá nij soj nana a'mii núj ma'. <sup>12</sup> Dan me se nanj che'é rasuun man rihaan chumij nihánj cataj xna'anj 'unj rihaan soj, tzaj ne ne cuchuman rá soj ma'. Asa' ca'vee cuchuman rá soj sese cataj xna'anj 'unj rihaan soj che'é rasuun man rej xtá' ga. <sup>13</sup> 'O se taj vaj síi cavii rej xtá' nanij rihaan yo'óo cataj xna'anj rihaan soj daj vaa nij rasuun man rej xtá' ma'. Maan orún' 'unj sij ca'née Diose nicaj yu'unj man yuvij ro', me síi 'na' rej xtá' nanij rihaan yo'óo nihánj, ne che'é dan ma'anj me síi guun nucaj cataj xna'anj rihaan soj che'é rej xtá' adonj. <sup>14</sup> Dan me se ase vaa tacavii síi cu'naj Moisés xcuáa aga' raq chruun rej tacaan ro', danj qui'yaj nii manj sij ca'née Diose

nıcaj yu'unj man yuvii, ne tacavii nii manj raq 'o chruun, <sup>15</sup> ne ndaa sıj, gaa ne taran' nij sıf cuchuman rá ni'yaj manj ro', cayáan nij so' ga Dıose nu' cavii nu' ca'anj nanj adonj —taj Jesucristó rihaan sıf cu'naj Nicodemo a.

**Nana nihánj taj xna'anj me che'é ca'na' Jesucristó rihaan chumii nihánj a**

<sup>16</sup> Dan me se 'ee uxrá rá Dıose ni'yaj Dıose man ní' sıj man rihaan chumii nihánj, ne nda' se orún' ta'nıf Dıose, tzaj ne rqué uun Dıose ta'nıf so' yo', ca'na' ta'nıf so' rihaan chumii nihánj, ne cataj Dıose se vaa nij yuvii amán rá ni'yaj man ta'nıf so' ro', se cavi' nij so' daj chihaa mıj ma'. Tananj cane nij so' ga Dıose nu' cavii nu' ca'anj nanj adonj. <sup>17</sup> 'O se ne ca'nej Dıose ta'nıf so' che'é rej cuta' ta'nıf so' cacun' xraa' nij yuvii man rihaan chumii nihánj ma'. Tananj ca'née Dıose man ta'nıf so' rihaan chumii nihánj che'é rej tınanii ta'nıf so' man nij yuvii rihaan chrej chi'ii uun chij nimán nij so' adonj. <sup>18</sup> Nı' sıj amán rá ni'yaj man ta'nıf Dıose me se taj vaj sayuun quiran' ní' ma'. Tzaj ne sıf ne amán rá ni'yaj man so' ro', aj cataj Dıose se vaa ya quiran' so' sayuun nanj á. Che'é se ne cuchuman ya rá so' ni'yaj so' orún' ya ta'nıf Dıose ro', che'é dan quiran' ya so' sayuun adonj.

<sup>19</sup> Dan me se nihánj me cacun' tumé nij sıf quiran' sayuun yo' a. 'O se aj ca'na' Jesucristó rihaan chumii nihánj, ne ase vaa 'o ya'an chuguun vaa so', tzaj ne caran' inanj rá nij sıf man rihaan chumii nihánj cachee nij so' rej rmi', ne ne ca'vej rá nij so' quinichrun' nij so' rihaan ya'an chuguun yo' a. 'O se chi'ii ndo'o vaa se qui'yaj nij so' adonj. <sup>20</sup> Dan me se nu' yuvii 'yaj se chi'ii ro', taj ri'yunj nij so' ni'yaj nij so' ya'an chuguun yo', ne ne 'na' nij so' rihaan ya'an chuguun yo' ma'. 'O se na'vej rá nij so' curuvi' se vaa 'yaj nij so' ma'. <sup>21</sup> Tzaj ne nij sıf me rá canoco' nana ya ro', 'na' nij so' rihaan ya'an chuguun yo', ne dan me se gaa 'yaj nij so' danj, ne ruvi' se vaa 'yaj nij so', ne sıf noco' man Dıose me nij so', ne Dıose racuij man nij so' nu' se vaa 'yaj nij so' a.

**Nana nihánj taj xna'anj se vaa sıj sa' doj rihaan sıf cu'naj Juan me Jesucristó, taj ma'an Juan yo' a**

<sup>22</sup> Dan me se gaa quisij nu' se vaa qui'yaj Jesucristó chuman' Jerusalén, gaa ne curihanj Jesucristó do', nij sıf tucu'yón se-nana so' do', chuman' Jerusalén, ne ca'anj nij so' ne nij so' chuman' le'ej nii naj estadó Judea, ne veé dan vaj nij so' cuta' ne nij so' man yuvii do' a. <sup>23</sup> Ne sıf cu'naj Juan ro', ne chuman' cu'naj Enón, ne uta' ne so' man yuvii uún a. 'O se nichrun' naj chuman' Enón ga chuman' Salim, ne man uxrá na cata' ne yuvii rej yo', ne ca'na' uxrá yuvii, ne ata' ne nij yuvii adonj. <sup>24</sup> 'O se ataa doj caxrii nii taga' man sıf cu'naj Juan yo' gaa ei. <sup>25</sup> Veé dan, ne guun che'e nij sıf tucu'yón se-nana Juan ca'mii cunu' nij so' ga 'o sıf uun chij rihaan nij yuvii israelitá che'é nana cataj xna'anj sıf cu'naj Moisés, se vaa daj qui'yaj yuvii na'ya' yuvii, gaa

ne ca'vee guun niha' rá Dıose ni'yaj Dıose man nij so' a. <sup>26</sup> Veé dan, ne cuchi' nij sıf tucu'yón se-nana Juan rihaan ma'an Juan, ne cataj nij so':

—Sıf chée ga so' gaa vaj ní' rej rej tu'va chráa cu'naj Jordán ro', sıf natá' so' che'é ro', uta' ne so' man yuvii cuano, ne 'anj taran' nij yuvii rej vaj so', maestro —taj nij sıf tucu'yón se-nana Juan rihaan Juan a.

<sup>27</sup> Gaa ne cataj Juan:

—A 'ó yuvii na'vee canoco' daj chihaa mıj man so', sese nuveé Dıose me sıf ca'vej rá ma'. <sup>28</sup> 'O se aj cuno ma'an soj nana cataj xna'anj 'unj rihaan soj se vaa nuveé sıj ca'née Dıose tınanii man yuvii rihaan sayuun mej a. Maan se 'unj me sıf ca'née Dıose ca'na' asino yaan rihaan sıf tınanii man yuvii rihaan sayuun ei. <sup>29</sup> Ase vaa sıf xcaj man chana ne nara'aa ro', vaa so', ne ase vaa tuvi' sıf nara'aa ro', danj vaa 'unj, ne nicún' 'unj unó 'unj se vaa a'mii so', ne uun niha' uxrá raj, 'yaj nana a'mii sıf nara'aa, ne che'é dan me uun niha' uxrá raj adonj. <sup>30</sup> 'O se no xcúun so' guun chij so' doj, ne 'unj me se no xcúnj gunj sıf nica' doj rihaan so' adonj —taj sıf cu'naj Juan yo' a.

**Nana nihánj taj xna'anj se vaa no xcúun ní' cuchuman rá ní' ni'yaj ní' man Jesucristó a**

<sup>31</sup> Sıf nanij rihaan chumii nihánj ro', so' me sıf uun chij rihaan cunudanj rasuun adonj. Nij sıf man rihaan chumii nihánj, tzaj ne che'é inanj rasuun man rihaan chumii nihánj a'mii nij so', ne taj vaj yo'ó rasuun ne'en nij so' ma'. Tzaj ne sıf nanij rej xta' ro', <sup>32</sup> so' me sıf a'mii che'é se vaa quene'en so' rej xta' do', che'é nana cuno so' rej xta' do', ne taj vaj sıf amán rá uno se-nana so' ma'. <sup>33</sup> Tzaj ne sıf amán rá se-nana so' ro', so' me sıf taj se vaa nana ya me se-nana Dıose adonj. <sup>34</sup> Sıf ca'née Dıose man ro', me sıf a'mii se-nana Dıose á. 'O se rqué ndo'o Dıose Nimán Dıose rihaan so' adonj. <sup>35</sup> 'Ee rá Rej so' man so', che'é yan ta'nij Rej so' me so', ne rqué Rej so' cunudanj rasuun man so', che'é rej guun chij so' rihaan cunudanj nij rasuun yo' adonj. <sup>36</sup> Sıf amán rá ni'yaj man ta'nıf Dıose ro', so' me sıf ve'é cayáan ga Dıose nu' cavii nu' ca'anj, tzaj ne sıf na'vej rá cuno rihaan ta'nıf Dıose ro', daj chihaa mıj se cayáan so' ga Dıose ma'. Tananj yo'o ca'maan rá Dıose ni'yaj Dıose man so', ne yo'o quiran' so' sayuun, qui'yaj Dıose adonj.

**Nana nihánj taj xna'anj che'é nana ca'mii Jesucristó ga 'o chana samaritana a**

**4** Dan me se xcaj Jesucristó cuenta se vaa cuchi' nana rihaan nij sıf fariseo se vaa doj a vaa nij sıf tucu'yón se-nana Jesucristó rihaan nij sıf tucu'yón se-nana Juan, ne noco' doj nij yuvii cata' ne qui'yaj Jesucristó rihaan nij yuvii cata' ne qui'yaj Juan a. <sup>2</sup> Tzaj ne nuveé ma'an Jesucristó me sıf cuta' ne man nij yuvii ma'. Maan nij sıf tucu'yón se-nana so' cuta' ne man nij yuvii a. <sup>3</sup> Dan me se xcaj Jesucristó cuenta se vaa cuchi' nana yo' rihaan nij sıf fariseo, gaa ne cavii so' estadó Judea ca'anj so' estadó Galilea a. <sup>4</sup> 'O se ya cachén so'



estadó Samaria yo', <sup>5</sup> ne cuchi' so' tu'va yo'o chuman' naj estadó Samaria, ne Sicar cu'naj chuman' yo' a. Dan me se nichrun' naj chuman' yo' tu'va yo'óo rque síi cu'naj Jacob rihaan ta'níi so' síi cu'naj José gaa naá, <sup>6</sup> ne tu'va chuman' yo' nuú yo'o na yu'uj qui'yaj síi cu'naj Jacob gaa naá a. Dan me se xe' man Jesucristó che'é yan cachéé uxrá so' ca'na' so' chuman' yo', ne che'é dan ca'anj cané so' tu'va na yu'uj yo', ne caxuj me yo' a.

<sup>7</sup> Dan me se ca'na' 'o chana samaritana na yu'uj quir-ii no' na, ne cataj Jesucristó rihaan chana yo' a:

—Qui'yáa so' se ndo'o, ne rque so' doj na co'oj ruguaj —taj Jesucristó no chana yo' a.

<sup>8</sup> Ne taj vaj nij síi tucu'yón se-nana Jesucristó nicun' ga so' gaa ma'. 'O se ca'anj nij so' chuman' quiraaan nij so' se chá a.

<sup>9</sup> Veé dan, ne cataj chana samaritana yo' rihaan Jesucristó a:

—Me che'é cachíin so' na rihanj, co'o so', ne ni'yaj so', ne sij israelitá mé so', ne chana samaritana mej ga —taj chana yo', xná'anj no' man Jesucristó a.

'O se ne a'mii sa' nij síi israelitá ga nij síi samaritano ma'.

<sup>10</sup> Gaa ne cataj Jesucristó rihaan no' a:

—Sese xcaj so' cuentá che'é se luj qui'yaj Diose che'é so' ne sese quene'én so' me síi achíin na mán so' cuano, ne cachíin so' na 'yaj vaa i'na' yuvii man so' co'o so', ne rque so' na yo' co'o so' saj adonj —taj Jesucristó no chana yo' a.

<sup>11</sup> Gaa ne cataj chana rihaan Jesucristó a:

—Tzaj ne taj vaj sihuu rihaan so' quirii so' na nihánj ma'. Ne cunuu ndo'o nuú na rá yu'uj nihánj, señor. Me rej quirii so' na 'yaj vaa i'na' yuvii rque so' co'oj ga.

<sup>12</sup> Dan me se xii ní' síi cu'naj Jacob ro', so' me síi co'o na nuu na yu'uj nihánj, ne veé dan me co'o ta'níi so' do', daán so' xcuu do', ne rque so' na nihánj co'o núj a. Ne sij sa' doj rihaan so' mé so', rá so' na' —taj chana yo' rihaan Jesucristó a.

<sup>13</sup> Gaa ne cataj Jesucristó rihaan no':

—Cunudanj nij síi co'o na nuu rá yu'uj nihánj ro', canacoó uún nij so' na vaa güii, ne ca'na' uún nij so' quirii nij so' doj na a adonj. <sup>14</sup> Tzaj ne síi co'o na rque 'unj nihánj me se daj chihaj míj se canacoó uún so' na yo' a ma'. Ase vaa rej ve'é uxrá avii na ro', danj gaa nimán so', ne cunuú uxrá se luj nimán so', ne gaa i'na' so' ga Diose nu' cavii nu' ca'anj, qui'yaj na rquej adonj —taj Jesucristó rihaan chana yo' a.

<sup>15</sup> Ne cataj chana rihaan so':

—Rque so' doj na yo' co'oj, señor. Ne se canacoó 'unj na, ne se ca'na' uún 'unj quirii na nihánj a ma' —taj chana rihaan Jesucristó a.

<sup>16</sup> Ne cataj Jesucristó rihaan no' a:

—Ca'anj nacunj so' man nicá so', ne ca'na' so' nihánj á —taj so' rihaan no' a.

<sup>17</sup> Ne cataj chana rihaan so':

—Taj vaj nicaj ma' —taj chana yo' a.

Ne cataj Jesucristó rihaan no' a:

—Cunaj uxrá ca'mii so', cataj so' se vaa taj vaj nica so' ei. <sup>18</sup> 'O se asij rque me se quisij ya 'un' snó'o xcaj so', tzaj ne tanáj so' man nij so', ne yaj nihánj me se nicaj so' man 'ó so', tzaj ne nuveé nica so' me so' ma'. Che'é dan ya uxrá ca'mii so' ei —taj Jesucristó no chana yo' a.

<sup>19</sup> Ne cataj chana rihaan so':

—Cuanó nihánj xcaj 'unj cuentá se vaa sij nata' se-nana Diose mé so', señor. <sup>20</sup> Dan me se xii núj ro', quina'vii nij so' xráa quiij nihánj, tzaj ne soj sij israelitá taj se vaa orún' chuman' Jerusalén me rej no xcuún ní' na'vii ní' rihaan Diose, taj soj adonj —taj chana yo' rihaan Jesucristó a.

<sup>21</sup> Gaa ne cataj Jesucristó rihaan chana a:

—Cuchuman rá so' nana nihánj nana cataj xna'anj 'unj rihaan so', nocoj. Dan me se vaa güii, ne se cavii nij soj raá quiij nihánj do', se ca'anj nij soj chuman' Jerusalén do', na'vii soj rihaan Rej ní' Diose ma'. <sup>22</sup> Dan me se ne ne'en nij soj man síi na'vii soj rihaan ma'. Tzaj ne xa' núj sij israelitá, tzaj ne ne'en núj man síi na'vii núj rihaan a. 'O se núj sij israelitá me nij síi qui'yaj quinanii yuvii rihaan sayuun a. <sup>23</sup> Tzaj ne vaa güii, ne nij síi na'vii sa' rihaan Rej ní' Diose ro', guun in-anj rá nij so' na'vii nij so' rihaan Diose, ne me rej ma'an vaj nij so' na'vii ya nij so' rihaan Diose nanj adonj. Ne cuano nihánj me aj guun che'e yuvii qui'yaj yuvii danj adonj. 'O se me ndo'o rá Rej ní' Diose na'vii ya yuvii rihaan so' ei. <sup>24</sup> Dan me se me ma'an rej vaj ní' nicun' Diose, ne che'é dan ní' sij na'vii rihaan Diose ro', me ma'an rej mán ní', ne no xcuún ní' guun niha' rá ní' na'vii ya ní' rihaan so' adonj —taj Jesucristó rihaan chana yo' a.

<sup>25</sup> Gaa ne cataj chana rihaan Jesucristó a:

—Ne'én 'unj se vaa vaa güii, ne ca'na' síi ca'nej Diose tinanii man ní' rihaan sayuun, ne asa' ca'na' so', ne cataj xna'anj ma'an so' che'é cunudanj rasuun rihaan ní' nanj á —taj chana rihaan Jesucristó a.

<sup>26</sup> Gaa ne canicaj Jesucristó cataj Jesucristó rihaan no', ne:

—'Unj sij a'mii rihaan so' cuano nihánj ro', me síi ca'née Diose adonj —taj Jesucristó rihaan chana yo' a.

<sup>27</sup> Veé dan, ne nu' 'na' nique nij síi tucu'yón se-nana Jesucristó, ne caraya'anj nij so' se vaa ca'mii Jesucristó ga chana yo' a. Tzaj ne a 'ó nij so' ne xna'anj man so' daj qui'yaj so' do', me che'é ca'mii so' ga chana yo' do' a ma'. <sup>28</sup> Gaa ne tanáj chana se-sihuú chana, ne cavii chana quinan' chana chuman', gaa ne cataj chana rihaan nij yuvii man chuman' a:

<sup>29</sup> —Ca'anj ní', ne quene'en soj 'o snó'o síi cataj xna'anj rihanj che'é nu' se vaa qui'yaj gaa rque á. Nuveé sij ca'née Diose tinanii man ní' rihaan sayuun me so', rá soj na' —taj chana rihaan nij snó'o man chuman' yo' a.

<sup>30</sup> Gaa ne curihanj nij so' chuman', ne ca'na' nij so' rihaan Jesucristó a.

<sup>31</sup> Dan me se gaa ca'mii chana ga nij síi man chuman' yo', ne guun che'e nij síi tucu'yón se-nana Jesucristó rquee nij so' chraa man Jesucristó, cataj nij so':

—Chá so' doj chraa, maestro —taj nij so' a.

<sup>32</sup> Tzaj ne cataj Jesucristó rihaan nij so' a:

—Vaa se chá rihanj, tzaj ne ne ne'en soj ma' —taj Jesucristó rihaan nij so' a.

<sup>33</sup> Gaa ne xná'anj nij so' man tuvi' nij so', cataj nij so':

—Vaa sí ca'na' rqué se chá so', rá soj na' —taj nij so' rihaan tuvi' nij so' a.

<sup>34</sup> Gaa ne cataj Jesucristó rihaan nij so' a:

—Sese 'yáá 'unj ndaa vaa me rá sí ca'née manj qui'yáj, ne sese navij quisij suun ca'ne' so' rihanj, ne ase vaa se chá vaa yo' rihanj adonj. Dan me se nuu xej nimanj gaa 'yaj sunj suun yo' ei. <sup>35</sup> Se guun cataj soj se vaa cachén yo'ó ca'anj yavii, gaa ne quirii ní' naa, cataj soj ma'. Maañ se cuano nihánj cataj xna'anj 'unj rihaan soj se vaa naxcaj soj rihaan soj, ni'yaj soj nij yuvii, se vaa ase vaa naa 'núu trigó vaa nij yuvii, ne catzii ndo'o vaa naa 'núu trigó yo', cachij yo', ne cuano nihánj me se no xcúun ní' quirii ní' 'núu trigó yo' adonj. Dan me se aj guun che'e <sup>36</sup> Diose naru'vee Diose rihaan nij sí rii naa yo', ne naqui'yaj chre' ndo'o nij so' man nij sí cayáán ga Diose nu' cavii nu' ca'anj, ne rej rihaañ guun niha' rá sí cunô naa ga sí rii naa adonj. <sup>37</sup> 'O se ya uxrá vaa nana nihánj se vaa ino vaa sí cunô naa ga sí rii naa, <sup>38</sup> ne aj ca'née 'unj man soj quirii soj naa rej ne qui'yaj suun soj ma'. Yo'ó yuvii me nij sí qui'yaj suun naa yo' gaa rque, ne catúj soj qui'yaj suun soj ga nij so' adonj —taj Jesucristó rihaan nij sí tucu'yón se-nana so' a.

<sup>39</sup> Dan me se che'é se nata' chana yo' rihaan nij yuvii samaritana man chuman' yo' se vaa cataj xna'anj Jesucristó rihaan no' nu' se vaa qui'yaj no' gaa rque ro', che'é dan me cuchumán rá que'ee nij yuvii man chuman' yo' ni'yaj nij yuvii man Jesucristó a. <sup>40</sup> Dan me se cuchi' nij sí man chuman' yo' rihaan Jesucristó, ne cachíin ni'yaj uxrá nij so' rihaan so' se vaa caran' so' doj tucua' nij so', ne che'é dan vij güii quináj so' chuman' yo' a. <sup>41</sup> Ne guun rij doj nij sí cuchumán rá cuno se-nana Jesucristó a. <sup>42</sup> Ne nij yuvii amán rá ni'yaj man Jesucristó ro', cataj nij so' rihaan chana yo' a:

—Nuveé che'e doj nana natá' so' rihaan núj me cuchumán rá núj ni'yaj núj man so' ma'. Maañ se cuno ma'an núj se-nana so', ne xcaj núj cuenta se vaa ya sí tñanai man yuvii man rihaan chumii nihánj rihaan sayuun me sí nihánj nanj adonj —taj nij so' rihaan chana yo' a.

**Nana nihánj taj xna'anj se vaa nahuun sa' ta'níi yo'ó sí nicaj suun, qui'yaj Jesucristó a**

<sup>43</sup> Dan me se quisij vij güii caran' Jesucristó chuman' yo', gaa ne cavii so' ca'anj so' estadó Galilea a. <sup>44</sup> Dan me se ma'an Jesucristó me sí cataj xna'anj se vaa nij sí man chiháan 'o sí a'mii natáj se-nana Diose me se ne aráj cochroj nij sí man ma'an dan rihaan so' ma'.

<sup>45</sup> Gaa ca'na' Jesucristó estadó Galilea, gaa ne ve'é uxrá ca'mii nij sí man estadó yo' che'é suun sa' nocoo qui'yaj so' cha'anj canuû chuman' Jerusalén a. 'O se ma'an nij so' ca'anj cha'anj yo' a.

<sup>46</sup> Dan me se ca'anj uún so' chuman' Caná chuman' naj estadó Galilea a. Chuman' yo' me chuman' naqui'yaj so' na vinó man na uun gaa rque a. Ne chuman' Capernaum ro', ne yo'ó sí nicaj suun rihaan rey a. Ne canó chi'ii man ta'níi so' 'o snó'o cunii a. <sup>47</sup> Dan me se cuchi' nana rihaan sí nicaj suun yo' se vaa cavii Jesucristó estadó Judea ca'na' Jesucristó estadó Galilea, gaa ne ca'anj so' cuchi' so' rihaan Jesucristó, ne cachíin ni'yaj uxrá so' rihaan Jesucristó se vaa ca'anj Jesucristó qui'yaj cono'ó Jesucristó man ta'níi so' a. Dan me se daj doj cavii ta'níi so', taj so' a. <sup>48</sup> Gaa ne cataj Jesucristó rihaan so' a:

—Sese se qui'yáj suun sa' nocoo quene'en soj, ne daj chihaa míj se cuchumán rá soj ni'yaj soj manj ma' —taj Jesucristó rihaan so' a.

<sup>49</sup> Gaa ne cataj sí nicaj suun yo' rihaan Jesucristó a:

—Daj doj cavii ta'níi, nanj señor. Qui'yáá so' se ndo'o uxrá, ne ca'anj ní' doj ruguanj —taj so', cachíin ni'yaj so' rihaan Jesucristó a.

<sup>50</sup> Ne cataj Jesucristó rihaan so' a:

—Ca'vee ca'anj so' á. 'O se aj nahuun sa' ta'níi so' nanj adonj —taj Jesucristó rihaan so' a.

Gaa ne cuchumán rá snó'o yo' nana cataj xna'anj Jesucristó rihaan so', ne cavii so' ca'anj so' a.

<sup>51</sup> Veé dan, ne tihaj nan' so' chrej, ne ca'anj caran' nij se-mozó so' man so', ne cataj xna'anj nij yo' rihaan so' se vaa aj nahuun sa' ta'níi so' nanj adonj. <sup>52</sup> Veé dan, ne xná'anj so' man nij mozó yo':

—Me orá me guun che'e ta'níi nahuun sa' yo' ga —cataj so' rihaan nij mozó yo' a.

Gaa ne cataj nij mozo yo' rihaan so':

—Quii aga' 'o me na'maân cachi' man xnii nanj á —taj nij mozó yo' rihaan so' a.

<sup>53</sup> Che'é dan me xcaj snó'o yo' cuenta se vaa maañ orá cataj xna'anj Jesucristó rihaan so' se vaa nahuun sa' ta'níi so' ro', maañ orá dan me nahuun sa' ya ta'níi so' a. Gaa ne cuchumán rá nij tucua' so' se vaa sij ca'née Diose me Jesucristó a. <sup>54</sup> Dan me se quisij vij suun sa' nocoo qui'yaj Jesucristó gaa quisij cavii so' estadó Judea ca'anj so' estadó Galilea a.

**Nana nihánj taj xna'anj se vaa nahuun sa' 'o sí ninaj cunu' icó xnu' va'núj yo', qui'yaj Jesucristó a**

**5** Veé dan, ne canuû cha'anj navij rá nij sí israelitá, gaa ne cavii Jesucristó ca'anj so' chuman'

Jerusalén a. <sup>2</sup> Dan me se chuman' Jerusalén ro', vaa 'o na cu'naj Betesda xna'anj a'mii nij sí israelitá a.

Nichrun' naj na yo' ga ta'yaa atúj matzinj, ne vaa 'un' ve' ne nu' anicaj tu'va na yo' a. <sup>3</sup> Rá ve' yo' mán ndo'o sí ninaj do', sí tuchrii do', sí rengó do', sí nuu chrúnj ra'a do' a. <sup>4</sup> Dan me se ndaa vaa orá nanij yo'ó

se-mozó sí 'nij ra'a man ní' rá na yo', ne tanicaj so' na yo', taj nij yuvii yo' a. Ne gaa anicaj na yo', ne sí nanij asino yaan rque na ro', orún' so' güej naj guun chi'ii xráa, taj uún nij yuvii yo' a. <sup>5</sup> Ne naj yo'ó snó'o tu'va na yo', ne sí icó xnu' va'núj ya yo' ran' so' a. <sup>6</sup> Dan me se quene'en Jesucristó man so' se vaa naj so' rej yo', ne aj

quene'en Jesucristó se vaa guun que'ee yo' ran' so', ne xná'anj Jesucristó man so', cataj Jesucristó a:

—Nahuun sa' so', rá so' na' —taj Jesucristó rihaan so' a.

<sup>7</sup> Ne cataj sí ran' yo' rihaan Jesucristó a:

—Nahuún 'unj raj, tzaj ne taj vaj tuví' 'unj sí tñanij mán 'unj rá na gaa anicaj na, man señor. Che'é dan me gaa 'anj 'unj tu'va na yo', ne guun yucuan' yo'ó so', ne asino so' atúj rque na rihanj nanj adonj —taj so' rihaan Jesucristó a.

<sup>8</sup> Gaa ne cataj Jesucristó rihaan so':

—Naxagaa so', ne naxcaj so' tuvée so', cachee so' á —taj Jesucristó rihaan so' a.

<sup>9</sup> Gaa ne nu' nahuun sa' snó'o yo', ne naxcaj so' tuvée so', ne ca'anj so' a.

**Nana nihánj taj xna'anj me che'é nq xcúun Jesucristó qui'yaj cono'ó so' man yuvii güii naránj rá nij yuvii israelitá a**

Ne güii nahuun sa' snó'o yo' me güii naránj rá nij yuvii israelitá a. <sup>10</sup> Che'é dan me nij sí uun chij rihaan nij yuvii israelitá me se cataj nij so' rihaan sí nahuun sa' yo':

—Güii naránj rá ní' me nihánj á. Ne nó xcúun so' catá so' tuvée so' cuan' ma' —taj nij so' rihaan so' a.

<sup>11</sup> Gaa ne cataj so' rihaan nij so' a:

—Tzaj ne sí qui'yaj nahuun sa' 'unj ro', so' me sí ca'ne' suun rihanj naxcaj 'unj tuvée 'unj ne cachee 'unj adonj —taj so' rihaan nij so' a.

<sup>12</sup> Gaa ne xná'anj nij so' man so', cataj nij so':

—Me sí cataj rihaan so' naxcaj so' tuvée so' ne cachee so' ga —taj nij so' rihaan so' a.

<sup>13</sup> Tzaj ne ne quene'en sí nahuun sa' me sí qui'yaj danj ma'. 'Q se gaa quisij nahuun sa' so', ne naxuun Jesucristó man ma'an so' cachén Jesucristó sca'núj nij yuvii man anicaj ni'yaj man sí nahuun sa' yo', ca'anj so' a. <sup>14</sup> Veé dan, ne nari' Jesucristó man sí nahuun sa' yo' rá nuvií nocqo, ne cataj Jesucristó rihaan so' a:

—Ya nahuun sa' so' á. Tánáj so' chrej chi'ii á. Sese taj, ne canicaj uún chi'ii mán so', ne doj a quirán' so' nanj adonj —taj Jesucristó rihaan so' a.

<sup>15</sup> Dan me se cavii snó'o yo', ne nata' so' rihaan nij sí uun chij rihaan nij yuvii israelitá se vaa Jesucristó me sí qui'yaj nahuun sa' so' a. <sup>16</sup> Che'é dan guun rá nij sí uun chij yo' qui'yaj nij so' sayuun man Jesucristó, che'é se güii naránj rá nij so' me güii nahuun snó'o yo', qui'yaj Jesucristó a.

<sup>17</sup> Gaa ne cataj Jesucristó rihaan nij so' a:

—Réj me se ne anicun' so' ga suun ma'. Che'é dan yo'q 'yaj suun ma'anj adonj —taj Jesucristó rihaan nij so' a.

<sup>18</sup> Che'é dan doj a nano' nij so' daj qui'yaj nij so', gaa ne ca'vee caví' Jesucristó a. 'Q se nuveé che'e inanj tinavij Jesucristó tucuaán nocq' nij so' che'é güii naránj rá nij so' me guun rá nij so' caví' Jesucristó ma'. 'Q se che'é se cataj so' se vaa Rej ma'an so' me Diose, che'é dan guun doj rá nij so' caví' Jesucristó nanj adonj. Dan

me se ase vaa Diose vaa ma'an so', taj so' a. <sup>19</sup> Che'é dan cataj Jesucristó rihaan nij so' a:

—Dan me se cataj xna'anj yá yá 'unj rihaan soj a.

Dan me se ase vaa xnii rihaan rej xnii ro', danj vaa 'unj sij ta'nij Diose nihánj rihaan Réj Diose, ne ne uun nucuáá 'unj 'yáá 'unj se vaa rii nimán ma'anj ma'. 'Q se inanj 'yáá 'unj ndaa vaa 'yaj Réj Diose ne'enj a. Ne ase vaa 'yaj guée so' ro', veé danj vaa guée 'yáá 'unj uún adonj. <sup>20</sup> 'Q se 'ee ndo'o rá Réj Diose ni'yaj so' manj che'é se ta'nij so' mej, ne tihaan so' manj nu' se vaa 'yaj so' a. Ne suun sa' doj rihaan suun sa' qui'yáj quene'en soj cuano ro', tihaan so' manj a. Yo' me se doj a caraya'anj soj ni'yaj soj suun sa' yo' ei. <sup>21</sup> Dan me se ase vaa nuu i'na' uún nij sí cavi' 'yaj Réj ro', danj qui'yáá 'unj uún adonj. Dan me se cunuu i'na' uún naj guun yuvii qui'yáá 'unj, sese guun rá 'unj cunuu i'na' uún nij so' adonj. <sup>22</sup> Dan me se ne a'ne' Réj Diose cacun' che'é a doj yuvii ma'. 'Q se aj ca'ne' so' suun rihanj sij ta'nij so' se vaa ca'ne' ma'anj cacun' che'é cunudanj yuvii, <sup>23</sup> ne ase vaa aráj cochroj yuvii rihaan so' ro', danj gaa caraa cochroj yuvii rihanj adonj. Dan me se sí na'vej rá caraa cochroj rihanj sij ta'nij Diose me se so' me sí se guun rá caraa cochroj rihaan ndaa Réj Diose sí ca'neé manj a.

<sup>24</sup> "Ya ya cataj xna'anj 'unj rihaan soj cuano se vaa sí uno se-nanaj ne amán rá ni'yaj man sí ca'neé manj ro', se cuta' Diose cacun' xráá so' ma'. Dan me se daj chihaa mij se cavi' nu' so' ma'. Tananj gaa i'na' so' nu' cavii nu' ca'anj ga Diose adonj. <sup>25</sup> Ya ya cataj xna'anj 'unj rihaan soj cuano se vaa vaa güii, ne nij sí man rihaan chumii nihánj nij sí cavi' vaa güii ro', ca'mij sij ta'nij Diose rihaan nij so', ne nu' nij sí cunq nana ca'mij ro', cunuu i'na' ya nimán nij so', ne cuano nihánj me güii a'mij rihaan nij so', sese me rá nij so' cunq nij so' adonj. <sup>26</sup> 'Q se ase vaa vaa i'na' ma'an Diose, ne vaa i'na' taran' nij rasuun 'yaj Diose ro', danj vaa vaa i'na' ma'anj sij ta'nij Diose uún, 'yaj Diose, ne cunuu i'na' yuvii, qui'yáá 'unj, <sup>27</sup> ne 'unj me sí nicaj suun, ne ca'ne' 'unj cacun' che'é yuvii, che'é yan sí ca'neé Diose nicaj yu'unj man yuvii mej adonj.

<sup>28</sup> "Se caraya'anj soj nana nihánj ma'. 'Q se vaa güii cunq taran' nij sí cavi' naj rihaan santó se-nanaj, <sup>29</sup> ne curihanj nij so' rque yo'óo nanj adonj. Dan me se, nij sí qui'yaj se sa' gaa vaa i'na' ro', curihanj nij so', ne cunuu i'na' uún nij so' cané nij so' ga Diose adonj. Tzaj ne nij sí qui'yaj se chi'ii ro', curihanj nij so', tzaj ne 'q quiran' ndo'o nij so' sayuun che'é cacun' tumé nij so' nanj adonj. <sup>30</sup> Dan me se a doj ne uun nucuaj ma'anj qui'yaj sunj a ma'. Maan se ase vaa taj xna'anj Réj Diose rihanj ro', veé danj vaa 'yá gaa a'ne' 'unj cacun' che'é nij yuvii, ne 'q nicá a'ne' 'unj cacun' che'é nij yuvii nanj adonj. 'Q se ne 'yá inanj se me raj qui'yá ma'. Tananj inanj se ataj xna'anj sí ca'neé manj me se vaa 'yá adonj.

<sup>31</sup> "Sese orún' 'unj me sí cataj xna'anj rihaan soj daj sij mej, ne taj che'é cataj soj se vaa ya vaa se-nanaj ma'. <sup>32</sup> Tzaj ne vaa yo'ó sí cataj xna'anj daj sij mej, ne

ne'én 'un̄j se vaa so' me síí cataj xna'an̄j ya che'é 'un̄j ei.

<sup>33</sup> "Dan me se ca'néé soj síí cuchí' rihaan síí cu'naj Juan che'é rej nari' nij so' se-nan̄a síí cu'naj Juan, ne cataj xna'an̄j so' nan̄a ya rihaan nij soj a. <sup>34</sup> (Dan me se ca'vee se ca'mii ve'é yuvii che'ej ca'vee se se ca'mii ve'é yuvii che'ej, taj se 'yaj ma'. Maan se nan̄j taj 'un̄j rihaan soj che'é se me raj quinani' soj rihaan sayuun nan̄j adon̄j.) <sup>35</sup> Dan me se síí cu'naj Juan ro', ase vaa aga' ya'an vaa so', ne ase vaa ruvi' sa' rihaan yuvii gaa chuguun aga' ya'an yo' ro', dan̄j vaa ruvi' sa' tucuáan ya rihaan soj qui'yaj so' nan̄j adon̄j. Tzaj ne nij soj ro', guun rá soj cun̄o soj se-nan̄a so' 'o orá nii, che'é se guun rá soj guun niha' rá soj, qui'yaj se-nan̄a so', tzaj ne qui'yaj rma'an̄ soj doj tzin', ne tanáj uún soj se-nan̄a so' a.

<sup>36</sup> "Ne xa' 'un̄j nihánj, tzaj ne sa' doj vaa síí taj xna'an̄j che'é 'un̄j rihaan síí cu'naj Juan a. Dan me se vaa suun ca'ne' Réj rihan̄j se vaa ya quisij suun yo' qui'yá, ne che'é dan me 'yaj suun 'un̄j nij suun yo' a. Che'é ma'an̄ suun sa' yo' ca'vee xcaj soj cuentá se vaa sij ca'néé Réj Diose mej adon̄j. <sup>37</sup> Ne Réj síí ca'néé manj ro', ma'an̄ so' cataj xna'an̄j daj sij mej, tzaj ne taj se-nan̄a so' cun̄o soj ma'. Ne ne ne'en soj daj vaa Réj ma'. <sup>38</sup> Ne taj se-nan̄a so' nayón nimán soj a ma'. Dan̄j vaa soj, che'é yan ne cuchuman̄ rá soj ni'yaj soj manj sij ca'néé so' rihaan chumii nihánj man adon̄j. <sup>39</sup> Dan me se nayaa uxrá soj dan̄j Diose, che'é se me rá soj xcaj soj cuentá daj qui'yaj soj ne ca'vee cayáan soj ga Diose nu' cavii nu' ca'an̄j ei. Ne veé ma'an̄ dan̄j Diose ataj xna'an̄j che'é 'un̄j a. <sup>40</sup> Tzaj ne na'vej rá soj ca'na' soj rihan̄j, yan ca'vee can̄e soj ga Diose nu' cavii nu' ca'an̄j qui'yá ma'.

<sup>41</sup> "Taj se 'yaj sese na'vej rá yuvii ca'mii yuvii nan̄a sa' che'ej ma'. <sup>42</sup> Tzaj ne ne'én 'un̄j daj vaa rá soj, se vaa ne niha' rá soj ni'yaj soj Diose ma'. <sup>43</sup> Dan me se ca'néé Réj manj ca'naj rihaan chumii nihánj ca'mij se-nan̄a Réj Diose rihaan soj, tzaj ne ne aran' rá soj ca'mij rihaan soj ma'. Tzaj ne sese ca'na' me ma'an̄ yo'ó so' ca'mii so' nan̄a avii raá ma'an̄ so', ne ve'é cun̄o soj se-nan̄a so' ei. <sup>44</sup> Daj chihaa mij se guun nucaj soj cuchuman̄ rá soj ni'yaj soj manj a ma'. 'O se me rá soj ve'é ca'mii nij tuvi' soj che'é soj, tzaj ne ne nanó rá soj daj qui'yaj soj, ne ve'é ca'mii Diose che'é soj ma'. <sup>45</sup> Se guun rá soj se vaa 'un̄j me síí cuta' cacun' xráa soj rihaan Réj Diose ma'. Maan se vaa síí cu'naj Moisés, ne nucaj ndo'o rá soj man so' se vaa ca'vee cavii sa' soj rihaan Diose qui'yaj so', tzaj ne ma'an̄ so' me síí cuta' cacun' xráa soj adon̄j. <sup>46</sup> 'O se sese ya amán rá soj ni'yaj soj man síí cu'naj Moisés, ne cuchuman̄ rá uún soj ni'yaj soj manj, gaa ne ca'vee ei. 'O se so' me síí cachrón nan̄a rihaan yan̄ nan̄a taj xna'an̄j che'é 'un̄j adon̄j. <sup>47</sup> Tzaj ne sese ne amán rá soj nan̄a cachrón so' rihaan yan̄, gaa ne asa' ca'vee cuchuman̄ rá soj cun̄o soj se-nan̄aj ga —taj Jesucristó rihaan nij síí uun chij rihaan nij yuvii israelitá a.

Nan̄a nihánj taj xna'an̄j se vaa go' Jesucristó se chá rihaan 'un̄j mij snó'o a

**6** Veé dan, ne cavii Jesucristó ca'an̄j Jesucristó rej xco na lacuaná cu'naj Galilea a. Tiberias cu'naj yo'ó se-chuvii na lacuaná yo' a. <sup>2</sup> Dan me se rij uxrá yuvii canoco' rej xco so', che'é yan aj quene'en nij yuvii nu' nij suun sa' nocco qui'yaj suun Jesucristó, se vaa nahuun sa' ndo'o síí ran', qui'yaj so' a. <sup>3</sup> Dan me se cavii so' raá quij, ne ca'an̄j can̄e so' rihaan yo'óo ga nij síí tucu'yón se-nan̄a so', <sup>4</sup> ne dan me se daj doj güii achiin canuú cha'an̄j pascuá cha'an̄j navij rá nij yuvii israelitá a. <sup>5</sup> Dan me se naxcaj Jesucristó rihaan Jesucristó, ne quene'en so' se vaa ca'na' ndo'o yuvii rihaan so', ne cataj so' rihaan síí cu'naj Felipé a:

—Me rej quiraañ ní' rachrúun chá taran' nij yuvii nihánj, rá so' ga —taj so', xna'an̄j so' man síí cu'naj Felipé yo' a.

<sup>6</sup> Dan̄j ca'mii so' rihaan síí cu'naj Felipé, che'é se me rá so' quene'en so' daj cataj síí cu'naj Felipé a. Tzaj ne aj ne'en so' daj qui'yaj ma'an̄ so' nan̄j adon̄j.

<sup>7</sup> Dan me se cataj síí cu'naj Felipé rihaan Jesucristó:

—A' sa'an̄j vaa tu'vee yuvii 'yaj suun tunj yavii se quisij quirí' nij so' doj rachrúun chá nij so' a ma' —taj so' a.

<sup>8</sup> Dan me se 'o síí tucu'yón se-nan̄a so' síí cu'naj Andrés tinúú síí cu'naj Simón Pedró me so' a. Cataj so' rihaan Jesucristó a:

<sup>9</sup> —Nihánj me nicun' 'o xnii, ne nicaj xnii nihánj 'un̄j guee rachrúun 'núú cebada, ne vij guee xcuaj nicaj so', tzaj ne asa' ca'vee quisij doj tzin' nihánj chá taran' nij yuvii nihánj ga —taj síí cu'naj Andrés yo' a.

<sup>10</sup> Gaa ne cataj Jesucristó:

—Ca'an̄j can̄e nij yuvii rihaan coj chrin', qui'yaj nij soj ei —taj Jesucristó rihaan nij síí tucu'yón se-nan̄a so' a.

Dan me se man̄ uxrá coj chrin' rej yo', ne ca'an̄j can̄e nij yuvii rihaan coj chrin' yo', ne 'un̄j mij snó'o me nij so' a.

<sup>11</sup> Dan me se quita'aa Jesucristó rachrúun, ne nago' so' graciá rihaan Diose, ne cuxra' ta'aj so' rachrúun caxrij so' ston nij síí tucu'yón se-nan̄a so', ne nij síí tucu'yón se-nan̄a so' ro', rqué nij so' chá taran' nij síí ne rihaan coj chrin' yo' a. Ne ase vaa qui'yaj so' ga rachrúun ro', dan̄j qui'yaj uún so' ga nee xcuaj yo', rqué so' nu' se vaa me rá nij yuvii chá nij yuvii yo' a.

<sup>12</sup> Gaa quisij caraa rque nij yuvii, ne cataj Jesucristó rihaan nij síí tucu'yón se-nan̄a so' a:

—Naqui'yaj chre' nij soj se quináj tu'va nij yuvii, ne se guun quirí' un̄ yo' ma' —taj Jesucristó rihaan nij so' a.

<sup>13</sup> Che'é dan naqui'yaj chre' nij so' nu' se quináj tu'va nij yuvii, ne caraa cunu' chujij ya scaa, qui'yaj nij xco' nii rachrúun quináj tu'va nij yuvii gaa quisij chá nij yuvii yo' 'un̄j rachrúun yo' nan̄j adon̄j. <sup>14</sup> Dan me se gaa quene'en nij snó'o suun sa' nocco qui'yaj suun Jesucristó, ne cataj nij so':

—Síí nihánj ro', ya uxrá síí nata' se-nan̄a Diose me so', ne síí na'vij ní' ca'na' ya rihaan chumii nihánj me so' ei —taj nij snó'o yo' a.

<sup>15</sup> Tzaj ne aj ne'en Jesucristó se vaa ca'ná' nij so', ne qui'ta'aa nij so' man so', ne cune' nij so' man Jesucristó guun so' sí nicaj suun rey guun chij rihaan nij so', ne che'é dan naxuun so' man so', ne cavii uún orún' so' ca'anj so' quij a.

### Nanā nihánj taj xna'anj se vaa cachéé Jesucristó rihaan na a

<sup>16</sup> Dan me se rej ti'nuu, ne nanij nij sí tucu'yón se-nā-nā Jesucristó tu'va na lacuaná, <sup>17</sup> gaa ne catúj nij so' rihoo, gaa ne cavii nij so' ca'anj nij so' chuman' Capernaum a. Dan me se quisij guun rmi' rihaan na lacuaná yo', ne ataa namān Jesucristó rihaan nij so' a. <sup>18</sup> Ne cavii nanā yuvāā, ne uxrá nari' nucaj ndo'o na lacuaná yo', <sup>19</sup> ne dan me se 'un' kilómetro ca'anj nij so', gaa ne quene'en nij so' se vaa chéé Jesucristó rihaan na 'na' so', ne gaa quinichrun' so' rihaan rihoo yo', ne chucu'vi' nij so' a. <sup>20</sup> Tzaj ne cataj Jesucristó rihaan nij so' a:

—'Unj me yo' ei. Se chu'vi' soj ma' —taj Jesucristó a.

<sup>21</sup> Che'é dan guun niha' uxrá rá nij so', ne nu' catúj Jesucristó rá rihoo, ne nu' cuchi' rihoo tu'va na lacuaná rej vaj nij so' a.

### Nanā nihánj taj xna'anj se vaa cataj Jesucristó se vaa ase vaa se chá vaa Jesucristó rihaan nimán ní' a

<sup>22</sup> Dan me se yo'ó güii me se quene'en nij yuvii quináj rej xcō na lacuaná yo' se vaa taj vaj yo'ó rihoo chéé rihaan na rej yo', māān se oruun rihoo catúj nij sí tucu'yón se-nānā Jesucristó gaa ca'anj nij so' a. Tzaj ne ne catūu Jesucristó rá rihoo yo' gā nij sí tucu'yón se-nānā so', ni'yaj nij yuvii a. Che'é dan ne quene'en uxrá nij yuvii me rej ca'anj Jesucristó a. <sup>23</sup> Tzaj ne ca'na' doj rihoo cavii chuman' Tiberias tu'va na lacuaná nichrun' rej nago' sí 'nij ra'a man ní' graciá rihaan Diose che'é rachrúún ne chá nij yuvii rachrúún yo' a. <sup>24</sup> Che'é dan gaa quene'en nij yuvii se vaa taj vaj Jesucristó gā nij sí tucu'yón se-nānā so' chéé gā nij so', gaa ne catúj nij yuvii rque nij rihoo yo', ne ca'anj nij yuvii chuman' Capernaum, nano' nij yuvii man Jesucristó a. <sup>25</sup> Dan me se nari' nij so' man Jesucristó chuman' Capernaum, gaa ne xná'anj nij so' man so', cataj nij so':

—Me aman ca'ná' so' nihánj, gā maestro' —taj nij yuvii, xná'anj nij so' man Jesucristó a.

<sup>26</sup> Gaa ne cataj Jesucristó rihaan nij so' a:

—Yā yā cataj xna'anj 'unj rihaan soj cuano se vaa nuveé che'e se quene'en soj nij suun sá' nocōo qui'yáá 'unj me nano' soj manj ma'. Māān che'é se chá soj rachrúún yo' ne caraa rque soj ro', che'é dan nano' soj manj ei.

<sup>27</sup> “Se guun qui'yaj suun soj che'é inānj se chá soj ma'. 'Q se vaa güii, ne quinavij nu' nij rasuun yo' nanj adōnj. Che'é dan qui'yaj suun soj che'é se vaa qui'yaj cavii sá' nimán soj, gaa ne gāā i'na' yā nimán soj nu' cavii nu' ca'anj ei. 'Unj sij ca'néé Diose nij yu'unj man yuvii me sí rque se sá' yo' rihaan soj ei. 'Q se Réj

Diose me sí cataj se vaa ca'vee qui'yáj danj che'é soj adōnj —taj Jesucristó rihaan nij yuvii a.

<sup>28</sup> Che'é dan cataj nij yuvii rihaan so' a:

—Me suun qui'yaj suun núj, rá Diose gā —taj nij yuvii a.

<sup>29</sup> Gaa ne cataj Jesucristó rihaan nij yuvii:

—Nihánj me suun me rá Diose qui'yaj suun soj, se vaa cuchuman rá soj ni'yaj soj mán 'unj sij ca'néé so' rihaan soj adōnj —taj Jesucristó rihaan nij yuvii a.

<sup>30</sup> Che'é dan cataj nij yuvii rihaan so' a:

—Sese danj vaa, ne me suun sá' nocōo qui'yáá so' quene'en núj, gaa ne cuchuman rá núj ni'yaj núj mán so' gā. <sup>31</sup> Dan me se qui'yaj Diose suun sá' nocōo gaa naá, ne xij ní' me se chá nij so' se cu'naj maná gaa chéé nij so' rej tacaan, qui'yaj Diose gaa naá, ne dan me se danj Diose taj se vaa nanij se chá rihaan nij so', qui'yaj Diose, ne chá nij so' se chá nanij rej xtā' adōnj —taj nij so' rihaan Jesucristó a.

<sup>32</sup> Che'é dan cataj Jesucristó rihaan nij so' a:

—Yā yā cataj xna'anj 'unj rihaan soj cuano, ne xā' se rqué Moisés chá soj, tzaj ne nuveé se chá 'yaj vaa i'na' yuvii nu' cavii nu' ca'anj me yo' ma'. Xā' se rqué Réj Diose chá soj, tzaj ne se qui'yaj gāā i'na' soj me yā yo' adōnj. <sup>33</sup> 'Q se se chá rqué Réj Diose rihaan soj mé 'unj sij cavii rej xtā', ne 'unj me sí rqué se vaa ca'vee gāā i'na' yā soj sij mān rihaan chumii nihánj nu' cavii nu' ca'anj adōnj —taj Jesucristó rihaan nij yuvii a.

<sup>34</sup> Che'é dan cataj nij yuvii rihaan Jesucristó a:

—Rque so' se chá yo' rihaan núj nu' cavii nu' ca'anj, señor —taj nij yuvii a.

<sup>35</sup> Gaa ne cataj Jesucristó rihaan nij yuvii a:

—'Unj nihánj me se chá, ne a'vee 'yáj vaa i'na' yā yuvii ei. Sese ca'nā' soj rihanj, ne yo'ō gāā xej nimán soj, sese yā uxrá amán rá soj ni'yaj soj manj á. <sup>36</sup> Tzaj ne aj cataj 'unj rihaan soj se vaa ndā' se quene'en soj manj, tzaj ne ne cuchuman rá soj ni'yaj soj manj ā ma'. <sup>37</sup> Xā' nij sí rqué Réj Diose manj, tzaj ne ca'nā' nij so' rihanj, ne ve'é ca'mii 'unj gā nij so', ne xā' nij sí 'na' rihanj, tzaj ne daj chihāā mīj se quiri'íj yanij 'unj man nij so' ma'. <sup>38</sup> Dan me se ca'ná' 'unj rihaan chumii nihánj, tzaj ne se guun qui'yáá 'unj ndāā vaa me rá mā'anj qui'yáj ma'. Tanānj che'é rej qui'yáá 'unj se vaa me rá Diose sí ca'néé mán 'unj qui'yáá 'unj ro', che'é dan nanij 'unj rihaan chumii nihánj adōnj. <sup>39</sup> Ne nihánj me se vaa me rá Diose qui'yáj ei. Dan me se na'vej uxrá rá Diose ca'anj ni'yā ā 'ó nij sí rqué so' manj ma'. Dan me se me rá Diose cunūu i'na' uún taran' nij so', qui'yáj, asā' quisij güii ca'anj ni'yā chumii nihánj adōnj. <sup>40</sup> 'Q se nihánj me se vaa me rá Réj Diose ei. Me rá so' yo'ō gāā i'na' taran' nij sí amán rá ni'yaj manj nu' cavii nu' ca'anj gā so', ne 'unj me sí qui'yaj cunūu i'na' uún nij so' asā' quisij güii ca'anj ni'yā chumii nihánj adōnj —taj Jesucristó rihaan nij yuvii a.

<sup>41</sup> Dan me se, che'é se cataj Jesucristó se vaa mā'an so' me se chá nanij rej xtā' rihaan chumii nihánj, ne che'é dan ca'mii nij sí uun chij rihaan nij yuvii israelitā nanā nij ni'yaj nij so' man Jesucristó, <sup>42</sup> cataj nij so':

—Nuveé sij cu'naj Jesús me síi nihánj na'. Nuveé ta'nij síi cu'naj José me so' na'. Nuveé sij ne'en ní' me rej so' me nii so' do' na'. Me che'é guun rá so' cataj so' cuano se vaa me so' síi nanij rej xta' rihaan chumií nihánj ga —taj nij síi uun chij ni'yaj nij so' man Jesucristó a.

<sup>43</sup> Gaa ne cataj Jesucristó rihaan nij so' a:

—Se ca'mii soj nana nij ga tuvi' soj ma'. <sup>44</sup> Dan me se ca'née Réj Dioso manj, ne a 'ó yuvií se ca'vee ca'na' rihanj sese nuveé Réj Dioso qui'yaj ca'na' so' rihanj a. Ne xa' síi 'na' rihanj, tzaj ne cunuu i'na' uún so' qui'yáj asa' quisíj güii ca'anj ni'ya chumií nihánj adonj. <sup>45</sup> Dan me se vaa 'o síi nata' se-nana Dioso cachrón nana nihánj rihaan yanj gaa naá a: “Ne ma'an Dioso tucu'yón man taran' nij so' adonj”, taj síi nata' yo' a. Dan me se taran' nij síi uno rihaan Réj ne nari' se-nana Réj me síi 'na' rihanj ei. <sup>46</sup> Taj vaj yo'ó síi quene'en man Réj a ma'. Tzaj ne orún' 'unj me síi quene'en man so', che'é se sij cavii rihaan so' mej adonj.

<sup>47</sup> “Ya ya cataj xna'anj 'unj rihaan soj cuano se vaa síi amán rá ni'yaj manj me se yo'ó cayáán so' ga Dioso nu' cavii nu' ca'anj ei. <sup>48</sup> Dan me se ase vaa i'na' nee man soj 'yaj se chá soj ro', danj gaa i'na' nimán soj qui'yáá 'unj adonj. <sup>49</sup> Xa' xii soj síi man gaa naá, tzaj ne chá nij so' se cu'naj maná gaa chéé nij so' rej tacaan, gaa ne cavi' nij so', <sup>50</sup> tzaj ne vaa 'unj nihánj, ne ase vaa se chá cu'naj maná cavii rej xta' nanij rihaan xii soj vaa 'unj, ne sese chá soj mán 'unj ne daj chihaa mij se cavi' nimán soj ma'. <sup>51</sup> Dan me se 'unj me se chá vaa i'na' ya nanij rej xta', ne sese chá yo'ó so' man se chá nanij rej xta' nihánj, ne yo'ó gaa i'na' so' ei. Tzaj ne se chá rque 'unj chá yuvií ro', nee manj me yo' ei. Ne yo' me qui'yáj, gaa ne ca'vee gaa i'na' ya cunudanj soj sij man rihaan chumií nihánj ei —taj Jesucristó rihaan nij síi uun chij rihaan nij yuvií israelitá a.

<sup>52</sup> Dan me se nuchruij raa ndo'o nij síi uun chij yo' ga tuvi' nij so', ne xná'anj nij so' man tuvi' nij so', ne:

—Asa' ca'vee rque síi nihánj nee man ma'an so' chá yuvií ga —taj nij so', xná'anj nij so' man tuvi' nij so' a.

<sup>53</sup> Che'é dan cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sese se chá soj nee manj, ne sese se co'o soj ton manj, ne se ca'vee gaa i'na' nimán soj a ma'. <sup>54</sup> Tzaj ne síi chá nee manj ne co'o ton manj me se yo'ó gaa i'na' so' nu' cavii nu' ca'anj, ne asa' quisíj güii ca'anj ni'ya chumií nihánj, ne cunuu i'na' uún so', qui'yáj adonj. <sup>55</sup> Xa' nee manj, tzaj ne nee chá ya ya me yo', ne ton manj me se na co'o ya me yo' ei. <sup>56</sup> Ne síi chá nee manj ne co'o ton manj me se yo'ó cayáán so' ga 'unj, ne yo'ó cayáán 'unj ga so' chuguanj. <sup>57</sup> Ase vaa vaa i'na' Réé 'unj síi ca'née mán 'unj rihaan chumií nihánj ro', danj vaa vaa i'na' 'unj, 'yaj Réé 'unj a. Ne xa' síi chá mán 'unj, tzaj ne yo'ó gaa i'na' nimán so', qui'yáá 'unj a. <sup>58</sup> 'Unj nihánj me se se chá 'na' rej xta' nanij rihaan yo'óo nihánj mé 'unj ei. Tzaj ne ino uxrá vaa 'unj ga se cu'naj maná chá xii soj gaa naá ei. 'O se cavi' cunudanj nij so' nanj á. Tzaj ne síi chá manj me se yo'ó gaa i'na' nimán so' nu' cavii nu' ca'anj adonj. <sup>59</sup> —Nana nihánj me nana tu-

cu'yón Jesucristó rihaan nij yuvií cunuu chre' rá ve' tucu'yón nij síi israelitá se-tucuanj Moisés ve' ne chuman' Capernaum a.

**Nana nihánj taj xna'anj daj ca'mii síi tanáj xco man Jesucristó ne daj ca'mii síi noco' raan man Jesucristó a**

<sup>60</sup> Que'ee nij síi tucu'yón se-nana Jesucristó cuno nana nihánj nana ca'mii Jesucristó, gaa ne cataj nij so': —Sayuun uxrá vaa nana nihánj chuguanj. Daj chihaa mij se cuno ní' doj nana tu'va so' a ma' —taj nij so' rihaan tuvi' nij so' a.

<sup>61</sup> Quene'en ma'an Jesucristó se vaa nana nij yo' ca'mii ta'aj nij síi tucu'yón se-nana so', gaa ne cataj Jesucristó rihaan nij so':

—Guun na'aj soj, qui'yaj nana nihánj ei. <sup>62</sup> Che'é dan sese quene'en soj mán 'unj sij ca'née Dioso nicaj yu'unj man yuvií se vaa cavií uún 'unj quínán' 'unj rej cayáán 'unj asij rque, ne daj guun rá soj ga. 'O se doj a guun na'aj soj che'é se ne cunó soj se-nanaj chuguanj.

<sup>63</sup> Dan me se Nimán Dioso me se vaa 'yaj vaa i'na' nimán yuvií ei. Tzaj ne taj se gún' man nee man yuvií qui'yaj yo' gaa i'na' yuvií a ma'. Xa' nana ca'mij rihaan soj, tzaj ne nana cavii Nimán Dioso me nana yo', ne ca'vee gaa i'na' nimán soj, qui'yaj se-nanaj ei. <sup>64</sup> Tzaj ne ta'aj soj me síi ne amán rá uno se-nanaj a man adonj —taj Jesucristó rihaan nij síi tucu'yón se-nana so' a.

'O se asij guun che'e Jesucristó tucu'yón so' se-nana so' man yuvií, ne aj ne'en so' me síi me síi cuchumán rá ni'yaj man so', ne aj ne'en so' me síi me síi tacuachén man so' rihaan nij síi taj ri'yunj man so' adonj. <sup>65</sup> Gaa ne cataj uún Jesucristó:

—Che'é se ne cuchuman rá soj ro', che'é dan cataj xna'anj 'unj rihaan soj se vaa a 'ó síi se guun nucuaj ca'na' rihaan 'unj, sese nuveé Réj Dioso me síi qui'yaj ca'na' so' rihaan 'unj ma' —taj uún Jesucristó a.

<sup>66</sup> Che'é dan canicaj que'ee nij síi tucu'yón se-nana so', ne ca'ne' rá nij so' ga suun chéé ga Jesucristó a.

<sup>67</sup> Che'é dan xná'anj Jesucristó man chuvij nij síi tucu'yón se-nana so', cataj so':

—Soj do' me rá tanáj manj na' —taj Jesucristó, xná'anj so' man chuvij nij síi tucu'yón se-nana so' a.

<sup>68</sup> Gaa ne cataj síi cu'naj Simón Pedró rihaan so' a:

—Taj yo'ó síi cuchí' núj rihaan, man Señor. 'O se so' me síi a'mii nana qui'yaj gaa i'na' núj rihaan Dioso nu' cavii nu' ca'anj, <sup>69</sup> ne amán rá núj ni'yaj núj mán so', ne aj ne'en núj se vaa mé so' síi guee síi ca'née ma'an Dioso rihaan chumií nihánj adonj —taj Simón Pedró rihaan Jesucristó a.

<sup>70</sup> Gaa ne cataj Jesucristó rihaan chuvij nij so' a:

—Dan me se 'unj me síi narii man chuvij nij soj se vaa canoco' soj manj, tzaj ne ase vaa ma'an síi chree vaa yo'ó tuvi' soj adonj —taj Jesucristó rihaan chuvij nij so' a.

<sup>71</sup> Nana yo' ca'mii Jesucristó ni'yaj Jesucristó man síi cu'naj Judas ta'níi síi cu'naj Simón Iscariote a. 'O se síi cu'naj Judas yo', tzaj ne yo'ó tuvi' chuvij nij síi tucu'yón se-nana Jesucristó me so', tzaj ne me so' síi tacuachén

man Jesucristó rihaan nij síí taj ri'yunj man Jesucristó a.

**Nana nihánj taj xna'anj che'é nana ca'mii Jesucristó ga nij tinúú so' a**

**7** Quisij ca'mii Jesucristó nu' nana dan, ga ne cachéé Jesucristó estadó Galilea a. 'Q se ne ca'vej rá so' cachéé so' estadó Judea, che'é se nano' nij síí uun chij rihaan nij yuvií israelitá man so', ne ticavi' nij so' man Jesucristó, rá nij so' a.

<sup>2</sup> Dan me se daj doj quisij cha'anj navij rá nij yuvií israelitá cha'anj une' nij so' ve' yacataj a. <sup>3</sup> Che'é dan cataj nij tinúú Jesucristó rihaan so' a:

—Cavii so' ca'anj so' estadó Judea, ga ne quene'en nij síí tucu'yón se-nana so' nij suun sa' nocço 'yáá so', tinuj. <sup>4</sup> 'Q se sese me rá so' qui'yáá so' suun sa' nocço, ne ca'anj so' rej quene'en nij síí man rihaan chumii nihánj mán so' á —taj nij tinúú ma'an Jesucristó rihaan so' a.

<sup>5</sup> 'Q se ndaa ma'an nij tinúú Jesucristó ne cuchuman rá ni'yaj man Jesucristó a ma'. <sup>6</sup> Che'é dan cataj Jesucristó rihaan nij so':

—Ataa quisij güii no xcúun 'unj qui'yaj suun 'unj á. Se-suun ma'an soj me se a me ma'an güii ca'vee qui'yaj suun soj se-suun soj ei. <sup>7</sup> Taj che'é quitaj ri'yunj nij síí man rihaan chumii nihánj man soj ma'. 'Unj ro', vaa che'é quitaj ri'yunj nij so', ese 'unj me síí taj xna'anj rihaan nij so' se vaa chi'ii ndo'o vaa 'yaj nij so' adonj. <sup>8</sup> Ca'anj soj cha'anj xraj ei. Xa' 'unj, tzaj ne se ca'anj 'unj cha'anj ma'. 'Q se ataa quisij güii qui'yaj sunj nanj adonj <sup>9</sup> —taj Jesucristó rihaan nij so', ga ne quináj so' estadó Galilea a.

**Nana nihánj taj xna'anj daj qui'yaj Jesucristó ga canuú cha'anj une' nii ve' yacataj a**

<sup>10</sup> Dan me se ga quisij cavii nij tinúú Jesucristó ca'anj nij so' cha'anj, ga ne cavii ma'an Jesucristó ca'anj so' cha'anj uun a. Tzaj ne ca'anj yuve so' a.

<sup>11</sup> Che'é dan me nano' nij síí uun chij rihaan nij yuvií israelitá man Jesucristó rej canuú cha'anj yo' a. Ne xná'anj nij so' man tuvi' nij so', cataj nij so':

—Me rej vaj so' ga —taj nij so', xná'anj nij so' man tuvi' nij so' a.

<sup>12</sup> Ne nanó yuve ndo'o nij yuvií cuentó che'é Jesucristó a. Dan me se ta'aj nij yuvií cataj:

—Síí sa' me so' á —taj ta'aj nij yuvií a.

Tzaj ne yo'ó ta'aj nij yuvií cataj:

—Taj ma'. Síí tiha' yu'unj man nij yuvií me so' ei —taj yo'ó ta'aj nij yuvií yo' a.

<sup>13</sup> Tzaj ne a 'ó nij yuvií ne ca'mii ranga' che'é Jesucristó ma'. 'Q seuchu'vi' nij yuvií ni'yaj nij yuvií man nij síí uun chij rihaan nij so' a.

<sup>14</sup> Dan me se ga anuú cha'anj, ne cavii Jesucristó rá nuví nocço, ne tucu'yón so' man nij yuvií a. <sup>15</sup> Che'é dan caraya'anj nij síí uun chij rihaan nij yuvií israelitá, ne cataj nij so':

—Nuveé sij tucu'yón me síí nihánj ma'. Me rej nari' so' se-nana Diose ga —taj nij síí uun chij yo' ni'yaj nij so' man Jesucristó a.

<sup>16</sup> Che'é dan cataj Jesucristó rihaan nij so' a:

—Xa' se-nana, tzaj ne nuveé nana cavii raá 'unj me nana nihánj ma'. 'Q se se-nana Diose síí ca'née manj me nana nihánj ei. <sup>17</sup> Dan me se sese me rá yo'ó so' cunó so' rihaan Diose, ne quene'en so' se vaa nuveé nana avii raá 'unj me nana tucu'yón 'unj ma'. 'Q se quene'en so' se vaa se-nana Diose me nana yo' a.

<sup>18</sup> Xa' síí a'mii se-nana ma'an, tzaj ne inanj me rá so' ca'mii sa' yuvií che'é ma'an so', ne me rá so' cavii sa' ma'an so' ei. Tzaj ne sese me rá yo'ó so' ca'mii sa' yuvií che'é síí ca'née man so', ne inanj nana ya che'é síí ca'née man so' a'mii so', ne ne nano' so' chrej chi'ii ma'. <sup>19</sup> Ya uxrá rqué síí cu'naj Moisés se-tucuanj so' rihaan soj, tzaj ne a 'ó tuvi' soj na'vej rá qui'yaj tucuáan yo' a ma'. Me che'é nano' soj daj qui'yaj soj, ne cavii 'unj ga —taj Jesucristó rihaan nij síí uun chij rihaan nij yuvií israelitá a.

<sup>20</sup> Ga ne cataj nij yuvií rihaan Jesucristó a:

—Nuú nana chre nimán so' á. Me síí me rá ticavi' mán so', rá so' ga —taj nij yuvií rihaan Jesucristó a.

<sup>21</sup> Ga ne cataj Jesucristó rihaan nij so' a:

—Ga rque me se orún' suun sa' nocço qui'yaj, ne caraya'anj taran' nij soj se vaa qui'yáá 'unj suun sa' nocço güii naránj rá ní' a. <sup>22</sup> Dan me se ya uxrá cataj xna'anj Moisés rihaan ní' se vaa ca'ne' ní' ta'nga' man snó'o che'é rej ca'vee cunú sa' ní' rihaan Diose adonj. Tzaj ne nuveé tucuanj cuchruj ma'an Moisés me yo' ma'. 'Q se se-tucuanj xii ní' nij síí man ga naá me yo' adonj. Ne ndaa güii naránj rá a'ne' soj ta'nga' man snó'o ei. <sup>23</sup> Dan me se che'é se me rá soj qui'yaj soj nu' se-tucuanj Moisés, che'é dan a'vej rá soj cata' ta'nga' man snó'o güii naránj rá soj, tzaj ne me che'é axrij yuva soj manj che'é yan cunuu sa' nu' nee man yo'ó snó'o qui'yaj güii naránj rá soj ga. <sup>24</sup> Se guun xcaj soj cuentá che'é se vaa 'yaj yuvií ni'yaj soj che'é inanj tucuáan nocço' soj ma'. 'Q se xcaj soj cuentá daj me rá Diose, ne cunuu cuu soj doj, qui'yaj soj ei —taj Jesucristó rihaan nij yuvií a.

<sup>25</sup> Che'é dan cataj ta'aj nij síí ne chuman' Jerusalén:

—Ne sij nihánj, nuveé sij nano' nii ticavi' nii man me so' na'. <sup>26</sup> Ne veé a'mii ranga' so' nihánj, ne a 'ó nana ne a'mii nij so' rihaan so' man asanj. Ya ya síí ca'née Diose tinanii man yuvií rihaan sayuun me so', rá nij xrej atá suun sa' doj na'. <sup>27</sup> Tzaj ne ne'en ní' me rej cavii síí nihánj ei. Tzaj ne taj síí ne'en me rej cavii síí ca'nej Diose tinanii man yuvií rihaan sayuun asa' ca'na' so' man asanj —taj nij síí ne chuman' Jerusalén yo' a.

<sup>28</sup> Che'é dan sca' ndo'o ca'mii Jesucristó, cataj so':

—Ne'en soj manj, ne ne'en soj me rej cavii 'unj ei. Tzaj ne ne ca'na' ma'anj ma'. 'Q se ya a'mii síí ca'née manj, tzaj ne ne ne'en uxrá soj man so' a ma'. <sup>29</sup> 'Unj me síí ne'en man so', che'é se cavii 'unj rihaan so', ne so' me síí ca'née manj adonj —taj Jesucristó rihaan nij yuvií a.

<sup>30</sup> Che'é dan nano' nij so' daj qui'ya'j nij so' ne qui-ta'aa nij so' man Jesucristó, t'zaj ne a 'ó nij so' ne quisij rá quita'aa man so' a ma'. 'O se ataa quisij güii ca'vee qui'ya'j nij so' danj man so' a.

<sup>31</sup> Ne que'ee nij yuvi' cuhumán rá ni'ya'j man so', ne cataj nij s'í cuhumán rá ni'ya'j man so':

—Ca'vee se ca'na' yo'ó so' cataj so' se vaa t'inanii so' man ní' rihaan sayuun, t'zaj ne daj chihaa mij se quisij so' qui'ya'j so' doj suun sa' noc'oo rihaan suun sa' noc'oo qui'ya'j s'í nihánj a ma'. Ya ya sij t'inanii man ní' rihaan sayuun me s'í nihánj adonj —taj nij yuvi' ni'ya'j nij so' man Jesucristó a.

<sup>32</sup> Dan me se gaa cuno nij s'í fariseo se vaa ca'mii yuvee nij yuvi' naná dan che'é Jesucristó, gaa ne ca'neé nij xrej atá suun noc'oo doj ca'neé nij s'í fariseo man tanuu ca'anj nij tanuu quita'aa nij tanuu man Jesucristó a. <sup>33</sup> Che'é dan cataj Jesucristó:

—Doj güii cayáan 'unj gá nij soj, ne cavii 'unj quínán' 'unj rihaan s'í ca'neé manj 'na' 'unj nanj ei. <sup>34</sup> Nanó' soj manj, t'zaj ne se nari' soj manj a ma'. Ne se guun nucaj soj cuchí' soj rej cayáan 'unj a ma' —taj Jesucristó a.

<sup>35</sup> Che'é dan nij s'í uun chij rihaan nij yuvi' israelitá cataj rihaan tuvi' nij so' a:

—Me rej ca'anj nij nihánj, ne se nari' ní' man so' ga. Ca'anj so' rihaan tuvi' ní' s'í ne chiháan nij yuvi' yaníj na'. Tucuyón so' se-naná so' rihaan nij yuvi' yaníj na'.

<sup>36</sup> 'O se cataj so' naná nihánj se vaa: "Nanó' soj manj, t'zaj ne se nari' soj manj a ma'. Ne se guun nucaj soj cuchí' soj rej cayáan 'unj a ma'". Me che'é tu'va so' danj, rá soj gá —taj nij s'í uun chij yo', xna'anj nij so' man tuvi' nij so' a.

<sup>37</sup> Dan me se daj yo'ó güii navij cha'anj noc'oo sa' ndo'o yo', ne güii yo' canicun' Jesucristó, ne cataj so':

—Sese ase vaa s'í nac'oo ndo'o na vaa soj, ne ca'na' soj rihanj, ne rquej na achiin ya man soj á. <sup>38</sup> Xá' s'í amán rá ni'ya'j manj, t'zaj ne quirí' so' se vaa taj danj Diosé rihaan ní', ne dan me se ase vaa 'o chráa sa' ndo'o nuy na sa' inanj ro', danj gaa se sa' cunuú nimán s'í amán rá ni'ya'j manj, ne ca'vee gaa i'na' nimán so' adonj. <sup>39</sup> —Danj taj Jesucristó, ca'mii so' che'é Nimán Diosé cunuú nimán nij s'í cuhumán rá ni'ya'j man so' a. 'O se ataa ca'na' Nimán Diosé rihaan yuvi', ese ataa quisij güii caví' so' rihaan rcutze a.

<sup>40</sup> Che'é dan ta'aj nij yuvi' cuno naná nihánj cataj:

—Ya ya sij nata' se-naná Diosé gaa naá sij ca'na' uún rihaan chumi' nihánj me s'í nihánj nanj á —taj ta'aj nij yuvi' a.

<sup>41</sup> Yo'ó ta'aj nij yuvi' cataj:

—Sij ca'neé Diosé t'inanii man ní' rihaan sayuun me s'í nihánj ei —taj yo'ó ta'aj nij so' a.

T'zaj ne yo'ó ta'aj nij yuvi' cataj:

—Xá' s'í ca'nej Diosé t'inanii man ní' rihaan sayuun, t'zaj ne nuveé sij cavii estadó Galilea me so' ma'. <sup>42</sup> 'O se danj Diosé taj se vaa ta'ní' ta'nij si'nó s'í cu'naj David s'í cane gaa naá me s'í ca'nej Diosé, ne sij cavii chiháan s'í cu'naj David chuman' Belén me uún so' adonj —taj yo'ó ta'aj nij yuvi' uún a.

<sup>43</sup> Che'é dan guun vij ca'mii nij yuvi', ni'ya'j nij yuvi' man Jesucristó a. <sup>44</sup> Ne guun rá ta'aj nij so' quita'aa nij so' man Jesucristó, t'zaj ne taj vaj s'í quisij rá quita'aa man so' a ma'. <sup>45</sup> Che'é dan canicaj nij tanuu ca'anj uún nij tanuu rihaan nij xrej atá suun noc'oo doj do', rihaan nij s'í fariseo do', gaa ne cataj nij xrej do', nij s'í fariseo do', rihaan nij tanuu:

—Me che'é ne ca'na' Jesucristó gá soj, qui'ya'j soj gá —taj nij so', xna'anj nij so' man nij tanuu yo' a.

<sup>46</sup> Gaa ne cataj nij tanuu:

—T'zaj ne cunaj uxrá vaa naná a'mii so', ne taj vaj yo'ó yuvi' ne'en ca'mii naná a'mii so' a ma' —taj nij tanuu yo' a.

<sup>47</sup> Che'é dan cataj nij s'í fariseo rihaan nij tanuu a:

—Tiha' yu'unj so' man soj do' nanj ei. <sup>48</sup> 'O se a 'ó nij s'í uun chij do', a 'ó nij s'í fariseo do', ne cuhumán rá se vaa sij ca'neé Diosé me so' a ma'. <sup>49</sup> Ne xá' nij yuvi', t'zaj ne ne ne'en nij yuvi' se-tucuanj Moisés, ne inanj sayuun quiran' nij yuvi' yo', qui'ya'j Diosé chuguanj —taj nij s'í fariseo rihaan nij tanuu yo' a.

<sup>50</sup> Dan me se nicun' s'í cu'naj Nicodemo gá nij so', ne yo'ó tuvi' nij so' me so', ne s'í ca'anj nanó cuentó gá Jesucristó rej ni' gaa rquej doj me so', ne cataj so':

<sup>51</sup> —T'zaj ne se-tucuanj Moisés taj se vaa ne nó xcúun ní' ca'ne' ní' cacun' che'é yo'ó so', sese ataa cunó ní' naná a'mii so' ne sese ataa xcaj ní' cuentá daj 'ya'j so' ma' —taj s'í cu'naj Nicodemo rihaan yo'ó nij s'í fariseo yo' a.

<sup>52</sup> Gaa ne cataj nij so' rihaan s'í cu'naj Nicodemo a:

—Me che'é me rá so' ca'mii sa' so' che'é Jesucristó ga. 'O se sij cavii estadó Galilea mé so' ga so' na'.

Tucuyón so', ne xcaj so' cuentá se vaa a 'ó s'í nata' se-naná Diosé ne avii estadó Galilea, 'ya'j Diosé ma' —taj nij s'í fariseo rihaan s'í cu'naj Nicodemo yo' a.

<sup>53</sup> Dan me se cavii nij so', ne quinan' 'o 'o nij so' tucuá nij so' a.

**8** T'zaj ne cavii Jesucristó xraá quij cu'naj Quij man Chruun Olivó a.

**Naná nihánj taj xna'anj daj ca'mii Jesucristó gá nij s'í me rá go' yahij man chaná tumé cacun' a**

<sup>2</sup> Dan me se rej sij güii me se ca'anj uún Jesucristó rá nuvi' noc'oo a. Gaa ne cuchí' cunudanj nij yuvi' rihaan so', ne ca'anj quitaj so' chruun xlá, ne tucuyón so' man nij yuvi' yo' a. <sup>3</sup> Veé dan, ne ca'na' nij s'í naqui'ya'j cyu se-tucuanj Moisés rihaan yuvi' ca'na' nij s'í fariseo do', ne nicaj nij so' man 'o chaná a. Ne chaná nicaj nij so' me se aj nari' nii man chaná yo' gaa cotoj no' ga snó'o, t'zaj ne nuveé nicá no' me snó'o cotoj ga no' a. Che'é dan quita'aa nij so' man no', ne nicaj nij so' man no' ca'na' nij so' rihaan Jesucristó, ne cachrón nij so' man chaná tanuy ma'an nij so' gá Jesucristó a. <sup>4</sup> Gaa ne cataj nij so' rihaan Jesucristó a:

—Chaná nihánj me se maan orá cotoj no' ga yo'ó snó'o, ne nari' nii man no', ne quita'aa nii man no', maestro. <sup>5</sup> Dan me se se-tucuanj Moisés taj se vaa no xcúun ní' go' ní' yahij man chaná vaa danj ndaa se caví' no', taj tucuáan yo' nanj á. Che'é dan me, daj qui'ya'j



ní', rá so' gā —taj nij so', xná'anj nij so' man Jesucristó a. <sup>6</sup> 'O se guun rá nij so' ca'mii Jesucristó yo' o nana vaa nij che'é se-tucuaj Moisés, gā ne ca'vee cuta' nij so' cacun' xráá Jesucristó che'é nana ca'mii so' a.

Dan me se ca'anj canē ruy Jesucristó, ne cachrón ra'a so' letrá rihaan yo'óo a. <sup>7</sup> Tzaj ne yo' o tirquee nij so' xná'anj nij so' man so' a. Che'é dan canicun' caya uún so', ne cataj so' rihaan nij so' a:

—Sese danj me rá soj, ne ca'vee, tzaj ne a me ma'an 'o soj taj a doj cacun' tumé ro', ca'vee go' yahij man no' asino yaan ei —taj Jesucristó rihaan nij so', tzaj ne aj ne'en Jesucristó se vaa taran' nij so' atā cacun' a.

<sup>8</sup> Gā ne ca'anj canē ruy uún Jesucristó, ne cachrón uún so' letrá rihaan yo'óo yo' a.

<sup>9</sup> Veé dan, gā ne guun na'aj nij so' gā cuno nij so' se-nana Jesucristó, ne nayón nij so' chrej, ne ca'anj nij so' a. Dan me se ndāa 'o 'o nij so' nayón chrej, ne asino yaan ca'anj nij sí cachij doj, gā ne canoco' nij sí tachruu doj xcó nij so', ne ca'anj cunudanj nij so' nanj adonj. Ndāa síj, gā ne quináj uun Jesucristó, ne nicun' orún' chana ne rihaan so' a. <sup>10</sup> Gā ne canicun' caya uún Jesucristó, ne cataj so' rihaan chana yo':

—Ca'anj taran' nij so', nanj nocoj. Me rej vaj nij sí cuta' cacun' xráá so' gā. A 'o nij so' ne quisij rá cavi' so' a na' —taj Jesucristó, xná'anj so' man chana yo' a.

<sup>11</sup> Gā ne cataj chana yo':

—Taj vaj a 'o sí me rá ca'mii danj, a man Señor —taj chana yo' rihaan Jesucristó a.

Gā ne cataj Jesucristó rihaan no' a:

—A 'unj se cataj se vaa qui'yaj nii sayuun mán so' a ma'. Dan me se ca'anj so', ne se qui'yáa so' a doj cacun' rej rihaan so' a ma' —taj Jesucristó rihaan chana yo' a.

**Nana nihánj taj xna'anj se vaa cataj Jesucristó se vaa ya vaa se-nana so' a**

<sup>12</sup> Gā ne cataj uún Jesucristó rihaan nij xrej atā suun nocoo doj do', rihaan nij sí fariseo do' a:

—Ase vaa ya'an chuguun vaa 'unj rihaan soj sij man rihaan chumii nihánj adonj. Dan me se sí nocoo manj ro', se cachéé so' rej rmi' ma'. 'Unj ro', me ya'an chuguun cachéé gā so', ne xcaj so' cuentá me rej vaj so', qui'yáj, ne che'é dan gā i'nā' ya nimán so' nu' cavii nu' ca'anj adonj —taj Jesucristó no nij so' a.

<sup>13</sup> Che'é dan cataj nij sí fariseo rihaan so' a:

—Tzaj ne inanj mā'án so' me sí taj xna'anj che'é mā'án so' á. Nuveé nana ya me nana a'mii so' che'é mā'án so' a ma' —taj nij sí fariseo rihaan Jesucristó a.

<sup>14</sup> Gā ne cataj Jesucristó rihaan nij so' a:

—Ndā se mā'anj me sí a'mii che'ej, tzaj ne ya vaa se-nana ei. 'O se 'unj me sí ne'en me rej cavij, ne 'unj me sí ne'en me rej ca'anj 'unj ei. Ne xā soj, tzaj ne ne ne'en soj me rej cavij ne ne'en soj me rej ca'anj 'unj a ma'. <sup>15</sup> Xā soj, tzaj ne inanj uta' soj cacun' xráá yuvii che'é inanj se vaa ruvi' rihaan soj nanj ei. Tzaj ne 'unj me se ne utá 'unj cacun' xráá a 'o yuvii ma'. <sup>16</sup> Tzaj ne ca'vee se xcaj 'unj cuentá che'é yuvii daj vaa yuvii, tzaj ne ya xcaj 'unj cuentá che'é yuvii ei. Dan me se nuveé

orún' 'unj me sí xcaj cuentá che'é yuvii ma'. 'O se vaa Réj sí ca'née manj rihaan chumii nihánj, ne so' me sí racuij manj adonj. <sup>17</sup> Ne se-tucuaj Moisés tucuáan nocoo soj me se nana yo' taj se vaa sese cuyaan vaa nana a'mii vij roj so', ne ya vaa se-nana roj so', taj nana yo' ei. <sup>18</sup> Dan me se 'unj me sí taj xna'anj che'é mā'anj, ne taj xna'anj Réj sí ca'née manj uún adonj —taj Jesucristó rihaan nij so' a.

<sup>19</sup> Che'é dan xná'anj nij so' man Jesucristó, cataj nij so':

—Me rej ne rée so' gā —taj nij so' a.

Gā ne cataj Jesucristó:

—Ne ne'en uxrā soj manj do', man Réj do' ma'. 'O se sese ne'en ya soj manj, ne ne'en soj man Réj uún adonj —taj Jesucristó rihaan nij so' a.

<sup>20</sup> Nu' nihánj me nana tucu'yón Jesucristó gā canicun' so' rá nuví nocoo rej rqué yuvii sa'anj rihaan Diosé a. Ne taj vaj yuvii quita'aa man so' a ma'. 'O se ataa quisij güii ca'vee qui'yaj nii sayuun man Jesucristó nanj adonj.

**Nana nihánj taj xna'anj se vaa cataj Jesucristó se vaa daj chihāa mij se guun nucuaj nij sí uun chij rihaan nij yuvii israelitá cuchí' nij so' rihaan so' a ma'**

<sup>21</sup> Che'é dan cataj uún Jesucristó rihaan nij sí uun chij rihaan nij yuvii israelitá a:

—'Unj nihánj me se cavii 'unj ca'anj 'unj, gā ne nana' soj manj, tzaj ne asā' cavi' soj, ne yo' o quitaj nu' cacun' tumé soj xráá soj, ne se guun nucuaj soj cuchí' soj rej ca'anj 'unj ma' —taj Jesucristó rihaan nij so' a.

<sup>22</sup> Che'é dan xná'anj nij sí uun chij rihaan nij yuvii israelitá man tuvi' nij so', cataj nij so':

—Ticavi' so' man ma'an so', rá soj na'. Che'é dan cataj so' se vaa se guun nucuaj ní' cuchí' ní' rej ca'anj so', rá soj na' —taj nij so', xná'anj nij so' man tuvi' nij so' a.

<sup>23</sup> Gā ne cataj Jesucristó rihaan nij so':

—Dan me se xā soj, tzaj ne nanj sij man rihaan chumii nihánj me soj, ne 'unj, tzaj ne sij cavii rej xta' mej nanj á. <sup>24</sup> Che'é dan cataj xna'anj 'unj rihaan soj se vaa asā' cavi' soj, ne yo' o quitaj nu' cacun' tumé soj xráá soj nanj ei. 'O se sese se cuchumán rá soj se vaa Diosé mé 'unj, ne asā' cavi' soj, ne yo' o quitaj nu' cacun' tumé soj xráá soj nanj adonj —taj Jesucristó rihaan nij so' a.

<sup>25</sup> Che'é dan xná'anj nij so' man Jesucristó, cataj nij so':

—Me sí mé so' gā —taj nij so', xná'anj nij so' man Jesucristó a.

Gā ne cataj Jesucristó rihaan nij so' a:

—Aj cataj xna'anj 'unj rihaan soj asino yaan me sij mej ei. <sup>26</sup> Vaa ndo'o nana no xcúnj ca'mij che'é soj, ne no xcúun uxraj ya ca'ne' 'unj cacun' che'é soj ei. Dan me se sí ca'née manj, tzaj ne so' me sí a'mii ya uxrā, ne inanj nana ca'mii so' cunoj me nana taj xna'anj 'unj rihaan soj sij man rihaan chumii nihánj adonj —taj Jesucristó rihaan nij so' a.

<sup>27</sup> Tzaj ne ne quene'en nij so' se vaa ca'mii Jesucristó che'é Rej so' Diose sí ca'née man Jesucristó a ma'.

<sup>28</sup> Che'é dan cataj Jesucristó rihaan nij so' a:

—Asa' quisij cavii 'unj xta' qui'yaj soj, gaa ne xcaj ya soj cuentá se vaa ya ya sij ca'née Diose nicaj yu'unj man yuvij mej ei. Ne ne 'yáa 'unj se vaa avii inanj raá ma'anj ma'. 'O se a'mii 'unj ndaa vaa tucu'yón Réj manj adonj. <sup>29</sup> Ne so' me sí ca'née manj rihaan soj, ne yo'o nicun' so' ga 'unj, ne a doj ne tanáj yaníj so' manj a ma'. 'O se 'yáa 'unj se inanj me rá ma'an so' qui'yaj adonj —taj Jesucristó rihaan nij so' a.

<sup>30</sup> Gaa quisij ca'mii Jesucristó nana vaa danj, gaa ne cuchumán rá que'ee nij sí uun chij rihaan nij yuvij israelitá ni'yaj nij so' man Jesucristó a.

**Nana nihánj taj xna'anj daj ca'mii Jesucristó ga nij sí uun chij rihaan nij yuvij israelitá sí cuchumán rá ni'yaj man so' a**

<sup>31</sup> Che'é dan cataj Jesucristó rihaan nij sí uun chij rihaan nij yuvij israelitá sí cuchumán rá ni'yaj man so' a:

—Sese yo'o canoco' soj se-nanaj, ne sij ya ya tucu'yón se-nanaj me soj, <sup>32</sup> ne quene'en soj nu' nana ya, ne quinanií soj rihaan suun uun mozó, qui'yaj nana ya yo' chuguanj —taj Jesucristó rihaan nij so' a.

<sup>33</sup> Gaa ne cataj nij so' rihaan Jesucristó:

—'O se ta'níí ta'nij si'no sí cu'naj Abraham sí cane gaa naá me núj, ne daj chihaa míj ne guun núj mozó a ma'. Me che'é cataj so' se vaa quinanií núj rihaan suun uun mozó ga —taj nij so', xna'anj nij so' man Jesucristó a.

<sup>34</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sí 'yaj cacun' ro', me sí uun mozó rihaan cacun' yo' ei.

<sup>35</sup> Ne xa' mozó, tzaj ne se ca'vee guun chij mozó, ne se ca'vee cane so' nu' cavii nu' ca'anj ma'. Ne xa' ta'níí sí tucua ve', tzaj ne so' me sí ca'vee cane rá ve' nu' cavii nu' ca'anj adonj. <sup>36</sup> Che'é dan me sese tinanii ta'níí Diose man soj rihaan suun uun mozó, ne ya ya nuveé sij uun mozó me soj a ma'.

<sup>37</sup> 'Aj ne'enj se vaa ta'níí ta'nij si'no sí cu'naj Abraham me soj á. Tzaj ne nano' uxrá soj daj qui'yaj soj ne cavi' 'unj ei. Danj 'yaj soj che'é rej na'vej rá soj narí' soj canoco' soj se-nanaj ei. <sup>38</sup> Dan me se a'mii 'unj inanj se vaa quene'enj qui'yaj Réj a. Tzaj ne nij soj me sí 'yaj ndaa vaa cataj rej soj rihaan soj adonj —taj Jesucristó rihaan nij so' a.

<sup>39</sup> Gaa ne cataj nij so' rihaan Jesucristó a:

—Xij núj me sí cu'naj Abraham gaa naá adonj —taj nij so' a.

Gaa ne cataj Jesucristó rihaan nij so' a:

—Sese ya ya ta'níí ta'nij si'no sí cu'naj Abraham me soj, ne qui'yaj soj ndaa vaa qui'yaj sí cu'naj Abraham yo' asuun tzaj a. <sup>40</sup> Tzaj ne cuano nihánj me se nano' soj daj qui'yaj soj ne cavi' 'unj, ne 'unj me sí cataj xna'anj rihaan soj nu' nana ya cataj xna'anj Réj Diose rihanj adonj. Dan me se ino uxrá vaa 'yaj soj ga sí cu'naj Abraham adonj. <sup>41</sup> Maan se 'yaj soj inanj se vaa 'yaj rej soj nanj á —taj Jesucristó rihaan nij so' a.

Che'é dan cataj nij so' rihaan Jesucristó a:

—Nuveé ta'nij cacun' me núj ma'. 'O se oruun Rej núj, ne Diose me so' nanj á —taj nij so' a.

<sup>42</sup> Gaa ne cataj Jesucristó rihaan nij so' a:

—Sese Diose me Rej soj, ne cunuu 'ee rá soj manj se danj ei. 'O se 'unj me sí cavii rej nicun' Diose, ne ca'ná' 'unj nihánj chuguanj. Dan me se ne ca'ná' ma'anj nihánj ma'. 'O se so' me sí ca'née manj ca'naj nihánj adonj.

<sup>43</sup> "Che'é se na'vej rá soj cunō soj se-nanaj, che'é dan sayuun uxrá vaa nana a'mij rihaan soj adonj. <sup>44</sup> 'O se ta'níí sí chree me soj, ne me rá soj qui'yaj soj inanj ndaa vaa me rá rej soj sí chree qui'yaj soj adonj. Ne xa' so', tzaj ne sí ticavi' man yuvij me so' asij guun che'e chumij nihánj, ne daj chihaa míj ne ne'en so' ca'mii nica' so' nana ya ma'. 'O se ne aran' rá so' ca'mij so' nana ya a man adonj. Danj inanj vaa so', a'mii ne so', che'é se sí ne inanj me so', ne sí tucu'yón man yuvij ca'mii ne yuvij me uun so' adonj.

<sup>45</sup> "Ne xa' 'unj, tzaj ne che'é se nana ya a'mij rihaan soj, che'é dan ne amán rá soj uno soj se-nanaj a ma'.

<sup>46</sup> A 'ó tuvi' soj se ca'vee quirij cacun' cutá' xrá a ma'. Inanj nana ya a'mij rihaan soj ei. Me che'é ne cuchumán rá soj cunō soj se-nanaj ga. <sup>47</sup> 'O se sí noco' ya man Diose me sí uno se-nana Diose adonj. Tzaj ne nuveé sij noco' man Diose me soj a ma'. Che'é dan ne uno soj a man adonj —taj Jesucristó rihaan nij sí uun chij rihaan nij yuvij israelitá a.

<sup>48</sup> Gaa ne cataj nij sí uun chij rihaan nij yuvij israelitá a:

—Ya uxrá vaa nana ca'mii núj se vaa nuveé tuvi' núj mé so' a ma'. 'O se sí cavii estadó Samaria mé so' chuguanj. Nuun nana chree nimán so' ei —taj nij so' rihaan Jesucristó a.

<sup>49</sup> Gaa ne cataj Jesucristó:

—Taj vaj nana chree nuu nimanj ma'. 'O se aráj cochroó 'unj rihaan Réj Diose, tzaj ne ne aráj cochroj soj rihanj a ma'. <sup>50</sup> Ne 'yaj suun 'unj che'é yan cataj yuvij se vaa sij sa' mej ma'. Tzaj ne vaa Diose, ne so' me sí me rá cataj yuvij se vaa sij sa' mé 'unj, ne so' me sí ca'ne' cacun' che'é yuvij adonj. <sup>51</sup> Ya ya cataj xna'anj 'unj rihaan soj cuano se vaa sese cunō soj se-nanaj, ne daj chihaa míj se cavi' soj a ma' —taj Jesucristó a.

<sup>52</sup> Che'é dan nij sí uun chij rihaan nij yuvij israelitá cataj rihaan so' a:

—Cuano nihánj me se ne'en ya núj se vaa nuun nana chree nimán so' á. 'O se cavi' sí cu'naj Abraham cavi' nij sí nata' se-nana Diose gaa naá cavi', ne nihánj me taj so' se vaa sese cunō núj se-nana so', ne daj chihaa míj se cavi' núj, taj so' man asanj. <sup>53</sup> Dan me se gaa naá me se cavi' xij núj sí cu'naj Abraham, ne sij sa' doj mé so' rihaan so', rá so' na'. Ne cavi' nij sí nata' se-nana Diose uun a. Daj sij mé so', rá so' ga —taj nij so' rihaan Jesucristó a.

<sup>54</sup> Gaa ne cataj Jesucristó rihaan nij so' a:

—Sese cataj 'unj se vaa sij sa' me ma'anj, ne taj yu'vee nó se-nanaj a ma'. Tzaj ne vaa Réj, ne so' me sí taj se vaa sa' 'yá adonj. Dan me se Diose me Réj, ne nij

soj me síí taj se vaa nocó' soj man so', <sup>55</sup> tzaj ne ne ne'en uxrá soj man so' a ma'. Tzaj ne 'unj me síí ne'en man so' adonj. Dan me se sese cataj 'unj se vaa ne ne'enj man so', ne tuvi' soj síí ne mej nanj á. Tzaj ne ya ya ne'enj man so', ne nocó' 'unj se-nanā so' chuguanj.

<sup>56</sup> "Dan me se guun niha' uxrá rá xij soj síí cu'naj Abraham che'é se quene'en so' se vaa vaa güii quene'en so' se vaa ca'na' 'unj rihaan chumií nihánj a. Dan me se quene'en so' se vaa ca'ná' 'unj, gaa ne guun niha' ya uxrá rá so' ei —taj Jesucristó rihaan nij so' a.

<sup>57</sup> Che'é dan nij síí uun chij rihaan nij yuvií israelitá cataj rihaan Jesucristó a:

—Ataa quisij so' vij chihāā chi' yo' a. Asā' a'vee taj so' se vaa quene'én so' man Abraham gā —taj nij so', xná'anj nij so' man Jesucristó a.

<sup>58</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa asij ataa ca'ngāā síí cu'naj Abraham, ne aj nej nanj adonj —taj Jesucristó rihaan nij so' a.

<sup>59</sup> Che'é dan quita'aa nij so' yahij, ne go' nij so' man Jesucristó, rá nij so' a. Tzaj ne curihanj yuve so' rá nuvíí nocōo yo', ne ca'anj so' a. Dan me se maan tanuu sca'núj nij so' cachén Jesucristó, ca'anj so' a.

**Nanā nihánj taj xna'anj se vaa naxra' rihaan 'o síí tuchrij, qui'yaj Jesucristó a**

**9** Dan me se cavii Jesucristó ca'anj so', gaa ne quene'en so' 'o síí tuchrij a. Dan me se síí tuchrij yo' me se tuchrij so' asij ca'ngāā so' a. <sup>2</sup> Gaa ne xná'anj nij síí tucu'yón se-nanā Jesucristó man Jesucristó, cataj nij so':

—Me che'é tuchrij síí nihánj, gā man maestro'. Ma'an so' qui'yaj cacun' na'. Ase rej so' qui'yaj cacun' xa' —taj nij so', xná'anj nij so' man Jesucristó a.

<sup>3</sup> Gaa ne cataj Jesucristó:

—Nuveé ma'an so', nuveé rej so' gā nii so' do', me síí tumé cacun' ma'. Maan se Diosē me rá quene'en ní' daj qui'yaj Diosē che'é so' adonj. <sup>4</sup> 'O se nō xcúún ní' qui'yaj suun ní' se-suun síí ca'née manj rihaan chumií nihánj adonj. Ase vaa rej rangā' vaa yo' yaj, ne ca'vee qui'yaj suun ní' yaj ei. Tzaj ne quisij güii ca'ne' rá ní', ne ase vaa rej nij ro', gāā güii yo', ne se ca'vee qui'yaj suun ní' doj ā ma'. <sup>5</sup> Tzaj ne cuano nihánj me se vaj 'unj rihaan chumií nihánj, ne ase vaa ya'an chuguun ro', danj vaa 'unj rihaan chumií nihánj adonj —taj Jesucristó rihaan nij síí tucu'yón se-nanā so' a.

<sup>6</sup> Quisij ca'mii so' danj, gaa ne quirii talúj so' rihaan yo'óo, gaa ne qui'yaj so' doj sigui' man yo'óo yo', ne caxrij so' sigui' yo' rihaan síí tuchrij yo' a. <sup>7</sup> Gaa ne cataj so' rihaan síí tuchrij yo' a:

—Ca'anj so' na'nu' so' rihaan so' rá na Siloé á —taj Jesucristó rihaan so' a.

Dan me se cyaān vaa nanā "Siloé" yo' gā nanā "ra-suun ca'née nii man" a.

Veé dan me se ca'anj síí tuchrij yo', ne na'nu' so' rihaan so' rá na yo', gaa ne canicaj so' ca'na' uún so', ne curuvi' rihaan so' a.

<sup>8</sup> Dan me se nij síí yanj nichrun' yan yanj so' do', nij síí aj ne'en man so' gā tuchrij so' do', cataj nij so':

—Ne síí nihánj me síí cane cachíín caridad gā rque, rá soj na' —taj nij so' ni'yaj nij so' man síí naxra' rihaan yo' a.

<sup>9</sup> —Danj asanj. Veé ya so' ei —taj ta'aj nij so' a.

Ne yo'ó ta'aj nij so' cataj:

—Taj ma'. Maan se ase ni'yaj gueē síí cachíín caridad ro', danj ni'yaj gueē síí nihánj, tzaj ne nuveé so' ma' —taj yo'ó ta'aj nij so' a.

Tzaj ne ma'an síí naxra' rihaan yo' cataj:

—'Unj me síí cachíín caridad yo' ei —taj so' a.

<sup>10</sup> Che'é dan xná'anj nij yuvií man so', cataj nij yuvií:

—Daj qui'yáá so', ne ca'vee naxra' rihaan so' gā —taj nij yuvií, xná'anj nij so' man síí tuchrij yo' a.

<sup>11</sup> Gaa ne cataj so':

—Síí cu'naj Jesucristó ro', qui'yaj sigui', ne caxrij so' sigui' rihanj, gaa ne cataj xna'anj so' rihanj se vaa ca'anj 'unj na'nu' 'unj rihanj rá na Siloé a. Gaa ne gaa quisij ca'anj na'nu' 'unj rihanj rá na yo', ne naruvi' rihanj nanj á —taj síí naxra' rihaan yo' rihaan nij yuvií a.

<sup>12</sup> Gaa ne xná'anj nij yuvií man so', cataj nij yuvií:

—Me rej vaj so' cuano gā —taj nij yuvií, xná'anj nij yuvií man síí tuchrij yo' a.

—Ne ne'enj me rej vaj so' cuano ā ma' —taj síí tuchrij yo' rihaan nij yuvií a.

**Nanā nihánj taj xna'anj se vaa ca'maan rá nij síí fariseo ni'yaj nij so' man síí naxra' rihaan yo' a**

<sup>13</sup> Dan me se ca'anj nicaj nii man síí naxra' rihaan yo' rihaan nij síí fariseo a. <sup>14</sup> Dan me se güii naránj rá nij yuvií israelitá me güii qui'yaj Jesucristó sigui' ne naxra' rihaan síí tuchrij yo' qui'yaj Jesucristó a. <sup>15</sup> Che'é dan xná'anj uún nij síí fariseo man síí naxra' rihaan yo' daj qui'yaj so' ne naxra' rihaan so' a.

Gaa ne cataj síí naxra' rihaan yo':

—Qui'yaj so' sigui', ne caxrij so' rihanj, gaa ne na'nuj rihanj, ne cuano nihánj ruvi' rihanj nanj á —taj so' rihaan nij síí fariseo a.

<sup>16</sup> Che'é dan cataj ta'aj nij síí fariseo:

—Nuveé sij ca'née Diosē rihaan ní' me síí qui'yaj naxra' rihaan síí nihánj ā ma'. 'O se 'yaj suun so' güii nō xcúún ní' naraān rá ní' adonj —taj ta'aj nij síí fariseo yo' a.

Tzaj ne yo'ó ta'aj nij so' cataj:

—Tzaj ne nuveé sij tumé cacun' me so' ā ma'. 'O se nij síí tumé cacun' me se daj chihāā mīj se guun nucaj nij síí tumé cacun' qui'yaj nij so' suun sā' nocōo ndāā vaa qui'yaj síí qui'yaj naxra' rihaan síí nihánj ā adonj —taj yo'ó ta'aj nij síí fariseo yo' a.

Dan me se cuxra' ta'aj nij síí fariseo man nij so', ne ino guun rá nij so' gā tuvi' nij so' ni'yaj nij so' man Jesucristó a. <sup>17</sup> Che'é dan cataj uún nij so' rihaan síí naxra' rihaan yo' a:

—Daj uun rá mā'an so' che'é síí qui'yaj naxra' rihaan so' gā —taj nij síí fariseo, xná'anj nij so' man síí naxra' rihaan yo' a.

Ne cataj so':

—Sij nata' se-nanã Dioso me so', rá yá 'unj adonj  
—taj síí naxra' rihaan yo' che'é Jesucristó a.

<sup>18</sup> Tzaj ne ne cuchuman rá nij síí uun chij rihaan nij yuvií israelitá se vaa yá yá tuchrii me so' gaa rque ne naxra' rihaan so' a. Che'é dan ca'née nij so' nanã se vaa ca'nã' rej so' dõ', nii so' dõ', gã síí naxra' rihaan yo' rihaan nij so' a. <sup>19</sup> Veé dan cuchí' roj so', gaa ne xná'anj nij síí uun chij rihaan nij yuvií israelitá man roj so', cataj nij so':

—Yá yá ta'níí roj soj me síí nihánj na'. Yá yá tuchrii me so' gaa ca'ngaa so' na'. Asã' ca'vee naxra' rihaan so' cuanõ, rá roj soj gã —taj nij so', xná'anj nij so' man roj nicã so' a.

<sup>20</sup> Gaa ne cataj roj so':

—Ta'nij yá rój me síí nihánj, ne tuchrii yá me so' asij ca'ngaa so', <sup>21</sup> tzaj ne ne ne'én uxrã rój asã' ca'vee naxra' rihaan so' cuanõ ã ma'. Ne ne ne'én uxrã rój me síí qui'yaj naxra' rihaan so' ã ma'. Xnã'anj soj man so' á. 'O se síí aj nocõõ me so', ca'mií so' che'é ma'an so' nanj á —taj roj so' a.

<sup>22</sup> Dãnj ca'mií roj nicã rej síí naxra' rihaan yo' dõ', nii so' dõ', che'é se cuhu'vi' roj so' ni'yaj roj so' man nij síí uun chij rihaan nij yuvií israelitá a. Dan me se aj guun yá ca'mií nij síí uun chij rihaan nij yuvií israelitá se vaa sese cataj yo'õ so' se vaa sij ca'née Dioso tinanii man yuvií rihaan sayuun me Jesucristó, ne quirií nij so' xe' man síí a'mií dãnj sca'núj nij yuvií israelitá a.

<sup>23</sup> Che'é dan cataj rej síí naxra' rihaan dõ', nii so' dõ', se vaa síí aj nocõõ me so', ne xnã'anj nij so' man ma'an so' a.

<sup>24</sup> Che'é dan nacúún uún nij so' man síí naxra' rihaan yo', ne cataj nij so' rihaan so' a:

—Ve'é cataj yá so' rihaan Dioso daj quirán' so' á. 'O se aj ne'én núj se vaa xa' snó'o ca'mií gã so', tzaj ne sij tumé cacun' me so' ei —taj nij so' rihaan síí naxra' rihaan yo' a.

<sup>25</sup> Che'é dan cataj síí naxra' rihaan yo':

—Ne ne'én uxraj sese sij tumé cacun' me so' ma'. Maan se orún' rasuun ne'én 'unj se vaa gaa rque, ne síí tuchrii mej, tzaj ne cuanõ nihánj me se ruvi' rihanj adonj —taj síí naxra' rihaan yo' a.

<sup>26</sup> Che'é dan xná'anj nij so' man so', cataj nij so':

—Ne xa' síí ca'mií gã so', tzaj ne daj qui'yaj so', gaa ne naxra' rihaan so' qui'yaj so' gã —taj nij so', xná'anj nij so' man so' a.

<sup>27</sup> Gaa ne cataj síí naxra' rihaan yo' rihaan nij so' a:

—Aj cataj xna'anj 'unj rihaan soj, tzaj ne ne cunõ soj ã ma'. Me che'é me rá soj cataj xna'anj uún 'unj rihaan soj gã. Gyun ma'an soj síí tucu'yón se-nanã so', rá soj na' —taj síí naxra' rihaan yo' rihaan nij so' a.

<sup>28</sup> Gaa ne nij ca'mií nij so' gã síí naxra' rihaan yo', ne cataj nij so':

—Ma'an so' me síí tucu'yón se-nanã so', ne xa' núj, tzaj ne sij tucu'yón se-nanã Moisés me núj ei. <sup>29</sup> Ne'én núj se vaa ca'mií ma'an Dioso gã síí cu'naj Moisés, tzaj ne ne ne'én núj me rej cavii síí ca'mií gã so' ã ma' —taj nij so' rihaan síí naxra' rihaan yo' a.

<sup>30</sup> Gaa ne cataj so' rihaan nij so' a:

—Nihã' uxrã vaa se-nanã soj chihã'. Ne ne'én soj me rej cavii so', tzaj ne síí nacuchra' rihanj me so' nanj adonj. <sup>31</sup> 'O se ne'én ní' se vaa ne uno Dioso rihaan nij síí tumé cacun' ã ma'. Tzaj ne sese aráj cochroj ní' rihaan Dioso, ne sese 'yaj ní' se vaa me rá Dioso, ne qui'yaj Dioso se vaa achíín ni'yaj ní' rihaan Dioso nanj á. <sup>32</sup> Dan me se síí tuchrii mej gã ca'ngaj, ne nu' ca'na' me se ne ca'nã' nanã rihaan ní' se vaa nacuchra' yo'õ so' rihaan síí vaa dãnj ã ma'. Tanãnj orún' so' me síí qui'yaj dãnj ei. <sup>33</sup> Dan me se sese nuveé sij ca'née Dioso rihaan ní' me so', ne daj chihãã mij se guun nu-cuaj so' qui'yaj so' dãnj ma' —taj síí naxra' rihaan yo' rihaan nij so' a.

<sup>34</sup> Gaa ne cataj nij so' rihaan so' a:

—Nãnj síí tumé cacun' mé so' asij ca'ngaa so' ei. Ne nó xcúún so' tucu'yón so' ã 'ó nanã rihaan núj ã ma' —taj nij so' rihaan so' a.

Gaa ne quirií nij so' man so' xe' a. <sup>35</sup> Dan me se cuchí' nanã rihaan Jesucristó se vaa quirií nij so' man síí naxra' rihaan yo' xe' a. Che'é dan nano' Jesucristó man so', gaa ne cataj Jesucristó rihaan so' a:

—So' me síí amán rá ni'yaj man síí ca'née Dioso nicaj yu'unj man yuvií na' —taj Jesucristó rihaan síí naxra' rihaan yo' a.

<sup>36</sup> Gaa ne cataj so':

—Ne me síí me síí ca'née Dioso nicaj yu'unj man yuvií, señor'. Cataj xna'anj so' noj, gaa ne cuchuman raj ni'yaj man so' ei —taj síí naxra' rihaan yo' rihaan Jesucristó a.

<sup>37</sup> Gaa ne cataj Jesucristó rihaan so':

—Aj quene'én so' man so', ne 'unj sij a'mií gã so' cuanõ me so' adonj —taj Jesucristó rihaan so' a.

<sup>38</sup> Gaa ne cataj so':

—Cuanõ nihánj me se chumán raj ni'yaj mán so', Señor —taj so' a.

Gaa ne canicun' ruj so' rihaan Jesucristó a. <sup>39</sup> Gaa ne cataj Jesucristó:

—Ca'ná' 'unj rihaan chumií nihánj che'é se nõ xcúún 'unj ca'ne' 'unj cacun' che'é yuvií adonj. Dan me se xa' nij síí ne ne'én, tzaj ne quene'én nij so', qui'yáj, ne xa' nij síí guun rá se vaa aj quisíj xcãj nij so' cuentá, tzaj ne ase vaa síí aráán rihaan ro', dãnj gaa nij so' se vaa se ca'vee xcãj nij so' cuentá ma' —taj Jesucristó a.

<sup>40</sup> Dan me se cachée ta'aj nij síí fariseo gã Jesucristó, ne cuno nij so' nanã ca'mií Jesucristó a. Che'é dan xná'anj nij so' man Jesucristó, cataj nij so':

—Ne ase vaa síí aráán rihaan vaa núj, rá so' na' —taj nij so', xná'anj nij so' man Jesucristó a.

<sup>41</sup> Gaa ne cataj Jesucristó rihaan nij so' a:

—Sese sij ne ne'én me soj, ne taj vaj cacun' tumé soj ma'. Tzaj ne cuanõ nihánj me se cataj soj se vaa aj ne'én soj a. Che'é dan yo'õ tumé soj cacun' adonj —taj Jesucristó rihaan nij síí fariseo yo' a.

Nanã nihánj taj xna'anj se vaa ase vaa síí tumé matzinj ro', dãnj vaa Jesucristó, tumé so' man ní' a

10 Gaa ne cataj uún Jesucristó rihaan nij so' a:

—Ya ya cataj xna'anj 'unj rihaan soj cuano se vaa xa' sí ne atúj ta'yaa rej nuu nij matzinj ne avii raá chingá rej nuu nij xo', tzaj ne sí ituu me so' adonj. <sup>2</sup> Tzaj ne sí atúj ta'yaa ro', so' me sí daan matzinj yo' adonj. <sup>3</sup> Dan me se x'núj ta'yaa rihaan so', 'yaj sí tumé ta'yaa, gaa ne uno nij matzinj se-nana so', gaa ne nacúun so' man nij matzinj a'mii so' se-chuvii 'o 'o nij xo', gaa ne 'anj nicaj so' man nij xo' xe' adonj. <sup>4</sup> Gaa quisíj quirii so' man nij xo' xe', ne noco' nij matzinj xcó so', che'é se u'yón nij xo' se-nana so' ei. <sup>5</sup> Tzaj ne yo'ó yuvii me se se canoco' nij xo' man yo'ó so', maan se cunanj nij xo' rihaan yo'ó so', che'é se ino ca'mii yo'ó so' xréé nij xo', ne se cu'yón uxrá nij xo' se-nana yo'ó so' a ma' —taj Jesucristó a.

<sup>6</sup> Dan me se ase vaa 'o cuentó vaa nana nihánj nana ca'mii Jesucristó rihaan nij so', tzaj ne ne xcaj nij so' cuentá me taj nana nihánj a ma'. <sup>7</sup> Che'é dan cataj uún Jesucristó:

—Ya ya cataj xna'anj 'unj rihaan soj cuano se vaa ase vaa ta'yaa rej atúj nij matzinj ro', danj vaa 'unj a. <sup>8</sup> Dan me se xa' taran' nij sí ca'na' gaa rque' doj, tzaj ne ase vaa sí ituu vaa nij so' a. Tzaj ne ne cunó nij matzinj rihaan nij so' a ma'. <sup>9</sup> Dan me se ase vaa ta'yaa yo' vaa 'unj, ne sí atúj rej nicun' 'unj ro', so' me sí amán rá ni'yaj manj, ne quinanii so' rihaan sayuun, ne ve'é catuu so', ne ve'é curihañj so', ne nari' so' coj chrin' cha so' nanj adonj.

<sup>10</sup> "Xa' sí ituu, tzaj ne me inanj rá so' qui'yaj ituu so' matzinj do', ticavi' so' matzinj do', tinavij so' matzinj do' ei. Che'é dan atúj so' rej nuu nij matzinj a. Tzaj ne 'unj me se ca'ná' 'unj che'é se me rá 'unj yo'ó gaa i'na' nij xo', ne ve'é uxrá cayáan nij xo', qui'yaj chuguanj.

<sup>11</sup> "Ne 'unj ro', me sí daan ya ya nij matzinj, ne tumé sa' yá 'unj man nij matzinj, ne ca'nej nimanj cavij che'é nij xo' adonj. <sup>12</sup> Xa' mozó, tzaj ne nuveé sij daan matzinj me so' ma'. Sij 'yaj canaán sa'anj uun me so', ne che'é dan sese ne'en so' xcuu ca'yánj ca'nu', ne chu'vi' so', ne tanáj so' matzinj yo', ne unánj so' a. Gaa ne tanáj ma'an so' man nij matzinj, gaa ne quita'aa ca'yánj yo' man nij matzinj, ne ticha'nuu ca'yánj yo' man nij xo' nanj adonj. <sup>13</sup> Danj 'yaj mozó yo', che'é se mozó uun me so', ne ne rihuun rá so' sese quiran' nij matzinj sayuun ma'.

<sup>14</sup> "Ne xa' 'unj, tzaj ne sij tumé sa' man nij matzinj mej, ne ne'enj man nij matzinj noco' manj, ne ne'en nij xo' manj ei. <sup>15</sup> Dan me se ne'en Réj Diose manj, ne ne'enj man Réj, ne ase vaa 'unj ga Réj ro', danj vaa daán 'unj matzinj gaj chuguanj. Ne a'neé nimanj cavij che'é nij xo' adonj. <sup>16</sup> Ne vaa doj daán 'unj matzinj uún, tzaj ne nuvi' nij xo' rej nuu matzinj nihánj ma'. Ne vaa che'é ca'na' yo'ó matzinj yo' uún, qui'yaj, ne cunó nij xo' se-nana, gaa ne cunuu chre' nij xo' ga matzinj nihánj, gaa ne cutumé 'unj man cunudanj nij xo' adonj.

<sup>17</sup> "Dan me se ca'neé nimanj cavij, ne cunuu i'na' uún 'unj, ne che'é dan 'ee rá Réj Diose manj adonj. <sup>18</sup> Taj vaj sí 'yaj fuerzá manj cavij ma'. 'O se ma'anj a'neé nimanj cavij nanj á. Dan me se no xcúnj ca'nej nimanj cavij, ne no xcúnj cunuu i'na' uún 'unj adonj. Nihánj

me suun ca'ne' Réj Diose rihanj nanj adonj —taj Jesucristó rihaan nij so' a.

<sup>19</sup> Gaa ne cuxra' ta'aj uún nij sí uun chij rihaan nij yuvii israelitá man nij so', gaa cuno nij so' nana yo' a.

<sup>20</sup> Dan me se ta'aj nij so' cataj:

—Nuu nana chree nimán so', ne snúu so' nanj á. Taj che'é cunó soj se-nana so' ma' —taj ta'aj nij so' rihaan tuvi' nij so', ni'yaj nij so' man Jesucristó a.

<sup>21</sup> Gaa ne yo'ó ta'aj nij so' cataj:

—Nuveé nana chree nuú nimán sí nihánj a ma'. 'O se se guun nucuaj sí nuu nana chree nimán nacuchra' so' rihaan sí tuchrii a ma' —taj yo'ó ta'aj nij so' a.

**Nana nihánj taj xna'anj se vaa guun rá nij sí uun chij rihaan nij yuvii israelitá go' nij so' yahij man Jesucristó**  
a

<sup>22</sup> Güii dan me se canuú cha'anj che'é nuvi' nocoo chuman' Jerusalén, ne yavii ayuu yu've' me yo' a.

<sup>23</sup> Gaa ne chéé Jesucristó rá chingá cu'naj Corredor Salomón rá nuvi' nocoo yo', <sup>24</sup> ne che'é dan cunuu chre' nij sí uun chij rihaan nij yuvii israelitá, ne yo'ó tu-cuachriin nij so' nu' anicaj man Jesucristó a. Gaa ne cataj nij so':

—Ndaa aman me quisij güii guun ya ya rá núj ni'yaj núj mán so' ga. 'O se cataj xna'anj yá yá so' rihaan núj sese ya sij ca'neé Diose tinanii man yuvii rihaan sayuun me yá so' ei —taj nij so' rihaan Jesucristó a.

<sup>25</sup> Gaa ne cataj Jesucristó rihaan nij so' a:

—Aj cataj xna'anj 'unj rihaan soj, tzaj ne na'vej rá soj cuchuman rá soj a ma'. Ne xa' suun sa' nocoo 'yáá 'unj che'é Réj Diose, tzaj ne ma'an nij suun sa' nocoo yo' taj xna'anj daj sij mej adonj. <sup>26</sup> Tzaj ne ne cuchuman rá soj ni'yaj soj manj man asanj. 'O se nuveé daan 'unj matzinj me soj a ma'. <sup>27</sup> Xa' daán 'unj matzinj, tzaj ne uno nij xo' se-nana, ne ne'enj man nij xo', ne noco' nij xo' xcoj a. <sup>28</sup> Gaa ne cunuu i'na' nij xo' cayáan nij xo' ga Diose nu' cavii nu' ca'anj, qui'yáá 'unj, ne daj chihaa mij se cavi' nij xo' a ma'. Ne taj vaj sí ca'neé man nij xo' ra'aj ma'. <sup>29</sup> 'O se Réj Diose me sí rque' man nij xo' rihanj, ne sij uun chij ya me so' rihaan cunudanj, ne che'é dan taj vaj sí guun nucuaj ca'neé man nij xo' ra'a Réj Diose a ma'. <sup>30</sup> 'O se ase vaa orún' yuvii vaa 'unj ga Réj adonj —taj Jesucristó rihaan nij so' a.

<sup>31</sup> Gaa ne quita'aa uún nij sí uun chij rihaan nij yuvii israelitá yahij go' nij so' man Jesucristó a.

<sup>32</sup> Gaa ne cataj Jesucristó rihaan nij so' a:

—Quisíj qui'yaj uxraj suun sa' nocoo quene'en nij soj, ne guun nucuaj qui'yaj danj, qui'yaj Réj Diose, ne che'é me suun sa' nocoo me rá soj go' soj yahij manj ga —taj Jesucristó, xna'anj so' man nij so' a.

<sup>33</sup> Gaa ne cataj nij sí uun chij rihaan nij yuvii israelitá:

—Se go' núj yahij mán so' che'é suun sa' nocoo qui'yáá so' a ma'. 'O se go' núj yahij mán so' che'é se ca'mii so' nana nij che'é Diose adonj. Dan me se nanj yuvii uun mé so', ne me che'é cataj so' se vaa Diose mé so' ga —taj nij so' rihaan Jesucristó a.

<sup>34</sup> Gaa ne cataj Jesucristó:

—Maan se vaa nana no rihaan yanj no tucuáan nocoj soj, ne nana ca'mii ma'an Diose me nana yo', ne dan me se cataj Diose: "Unj me sí cataj xna'anj se vaa diose me soj á", taj Diose rihaan nij sí ca'mii se-nana so' gaa naá a. <sup>35</sup> Dan me se sese ma'an Diose cataj se vaa nij sí ca'mii se-nana so' me ma'an uún diose, gaa ne daj chihaa mij se ca'vee tanáj xco ní se-nana Diose nana no rihaan yanj gaa ma'. <sup>36</sup> Ne veé dan me ca'ne' Diose suun guée rihanj, ne ca'née so' manj rihaan chumij nihánj ne maan che'é se cataj unj se vaa ta'nij Diose mej, che'é dan cataj soj se vaa nana nij ca'mij che'é Diose á. Taj che'é ca'mii nij soj danj, raj ma'. <sup>37</sup> O se sese ne 'yaj suun unj se-suun Réj Diose, ne ca'vee ca'ne' rá soj ga suun amán rá ni'yaj manj chuguanj. <sup>38</sup> Tzaj ne sese ya 'yaj suun unj se-suun Réj Diose, ne ca'vee se ne amán rá soj ni'yaj soj man ma'anj, tzaj ne vaa che'é cuchuman rá soj ni'yaj soj man nij suun sa' nocoo qui'yaj ei. Ndaa síj, gaa ne xcaj soj cuentá, gaa ne yo'q quene'en soj se vaa ne Réj Diose gaj, ne nej ga Réj Diose uún adonj —taj Jesucristó a.

<sup>39</sup> Che'é dan guun rá uún nij so' quita'aa nij so' man so' a. Tzaj ne quinanii so' rihaan nij so' a.

**Nana nihánj taj xna'anj daj guun rá nij sí cuchumán rá ni'yaj man Jesucristó a**

<sup>40</sup> Gaa ne cavii uún Jesucristó ca'anj so' rej rnej tu'va chraá cu'naj Jordán ndaa rej cuta' ne sí cu'naj Juan man yuvij gaa chée so' a. Gaa ne guun raan so' rej yo' a. <sup>41</sup> Gaa ne cuchi' uxrá yuvij rihaan so', ne cataj nij yuvij se vaa sí cu'naj Juan sí cuta' ne man yuvij me se a doj suun sa' nocoo ne qui'yaj so', tzaj ne quisij ya nu' nana cataj xna'anj sí cu'naj Juan che'é Jesucristó a. Daj cataj nij yuvij, ni'yaj nij yuvij nij suun sa' nocoo qui'yaj Jesucristó a. <sup>42</sup> Gaa ne cuchumán rá que'ee nij so' ni'yaj nij so' man Jesucristó gaa vaj so' rej yo' a.

**Nana nihánj taj xna'anj che'é se vaa guun gaa cavi' sí cu'naj Lázaro gaa ne cunuu i'ná' uún so', qui'yaj Jesucristó a**

**11** Dan me se vaa 'o sí ran', ne sí cu'naj Lázaro me so', ne sí ne chuman' Betania me so' a. Ne chuman' Betania yo' me se chiháan chana cu'naj Mariá ga chu'vij Mariá chana cu'naj Marta me chuman' Betania yo' a. <sup>2</sup> Ne chana cu'naj Mariá yo' me se no' me chana caxrij casté gun' daj tacóo sí 'nij ra'a man ní', ne yuvé ra ma'an no' tanacoo no' tacóo so' a. Dan me se ra'vij no' me sí cu'naj Lázaro sí ran' yo' a. <sup>3</sup> Dan me se ca'née roj ra'vij sí cu'naj Lázaro yo' nana rihaan Jesucristó, cataj roj no': "Xa' sí 'ee rá so' man, tzaj ne ran' so', a Señor", vaa nana ca'née roj no' rihaan Jesucristó a. <sup>4</sup> Dan me se cuchi' nana yo' rihaan Jesucristó, gaa ne cataj so':

—Nuveé che'e rej yo'q cavi' sí cu'naj Lázaro me quiran' so' a ma'. 'O se quiran' so' che'é rej ve'é doj xcaj yuvij cuentá che'é Diose adonj. Dan me se ve'é doj xcaj yuvij cuentá che'é ma'anj ta'nij Diose, che'é se

quiran' sí cu'naj Lázaro yo' nanj adonj —taj Jesucristó rihaan nij sí nata' nana yo' rihaan so' a.

<sup>5</sup> Ne Jesucristó me se 'ee ndo'o rá Jesucristó man chana cu'naj Marta do', man chu'vij no' chana cu'naj Mariá do', man sí cu'naj Lázaro do' a. <sup>6</sup> Dan me se gaa cuno Jesucristó nana se vaa ran' sí cu'naj Lázaro, ne ne cavij ra'yaj so' ca'anj so' a ma'. 'O se guun raan so' yavij güii rej vaj so' a. <sup>7</sup> Dan me se cachén yavij güii yo', gaa ne cataj Jesucristó rihaan nij sí tucu'yón se-nana so' a:

—Cavij ní ca'anj uún ní' estadó Judea ei —taj so' rihaan nij so' a.

<sup>8</sup> Gaa ne cataj nij sí tucu'yón se-nana so' rihaan so' a:

—Cuanó nihánj me se guun ndo'o rá nij sí uun chij rihaan nij yuvij israelitá go' nij so' yahij mán so' ne cavij' so' á. Se guun ca'anj so' yo' ma' —taj nij so' rihaan Jesucristó a.

<sup>9</sup> Gaa ne cataj Jesucristó:

—Ne'en soj se vaa chujij orá ranga' rihaan chumij nihánj 'o 'o güii, ne dan me se sese cachee yo'q so' rej ranga', ne se naxru' so' ma'. 'O se curuvij' sa' rihaan so', qui'yaj güii chuguun rihaan chumij nihánj adonj.

<sup>10</sup> Tzaj ne sese cachee yo'q so' rej nij, ne naxru' so', che'é se taj vaj ya'an chuguun nicaj so' adonj —taj Jesucristó a. <sup>11</sup> Dan me se quisij ca'mii so' danj, gaa ne cataj uún so'— Ne xa' tuvi' ní' sí cu'naj Lázaro, tzaj ne otoj so' ei. Tzaj ne ca'anj yaj, che'é rej narí unj nej rihaan so' a —taj Jesucristó rihaan nij sí tucu'yón se-nana so' a.

<sup>12</sup> Che'é dan cataj nij sí tucu'yón se-nana so' rihaan so':

—'O se sese otoj so', ne cunuu sa' ma'an so', Señor —taj nij so' rihaan Jesucristó a.

<sup>13</sup> Dan me se nana dan ca'mii Jesucristó che'é se aj cavi' sí cu'naj Lázaro, tzaj ne nij sí tucu'yón se-nana Jesucristó me se guun rá nij so' se vaa ya ya otoj uun Lázaro, taj Jesucristó, rá nij so' a. <sup>14</sup> Che'é dan ca'mii nicaj Jesucristó rihaan nij so', cataj so':

—Aj cavi' sí cu'naj Lázaro, <sup>15</sup> ne guun niha' rá unj se vaa nuvi' unj ne ga so' gaa cavi' so' a. 'O se che'é se cavi' so' ro', che'é dan cuchuman doj rá soj ni'yaj soj manj adonj. Tzaj ne cavij ní ca'anj ní' rej naj so' ei —taj Jesucristó rihaan nij so' a.

<sup>16</sup> Che'é dan cataj sí cu'naj Tomás Dídimó rihaan yo'ó nij sí tucu'yón se-nana Jesucristó:

—Cavij ní ca'anj ní' ga so', gaa ne cavi' ní' ga so' á —taj so' ni'yaj so' man Jesucristó a.

<sup>17</sup> Veé dan me se cuchi' Jesucristó chuman' Betania, gaa ne cataj xna'anj nii rihaan so' se vaa aj quisij ca'anj güii cachin' nii man sí cu'naj Lázaro rque yu'uj yuvej a.

<sup>18</sup> Dan me se nichrun' naj chuman' Betania ga chuman' Jerusalén, ne orún' va'naj kilómetro naj chuman' Jerusalén yo' a. <sup>19</sup> Ne aj cavii que'ee nij yuvij israelitá chuman' Jerusalén, ne cuchi' nij so' rihaan chana cu'naj Marta do', rihaan chana cu'naj Mariá do', che'é rej se nanó rá roj no', che'é se aj cavi' ra'vij roj no' a.

<sup>20</sup> Dan me se gaa cuno chan̄a cu'naj Marta se vaa ca'-na' Jesucristó, ne curihan̄j no' nari' tuvi' no' gā Jesucristó, tzaj ne chan̄a cu'naj Mariá me se quiná' no' rá ve' yo' a. <sup>21</sup> Gaa ne cataj chan̄a cu'naj Marta rihaan Jesucristó a:

—Sese cané so' nihánj, ne ne cavi' ra'vij asuun saj, man Señor. <sup>22</sup> Tzaj ne cuan̄o nihánj me se ne'enj se vaa me ma'an rasuyun cachin̄j so' rihaan Diose, ne qui'yaj so' nan̄j á —taj chan̄a cu'naj Marta rihaan Jesucristó a.

<sup>23</sup> Gaa ne cataj Jesucristó rihaan no' a:

—Cunuu i'n̄a' uún ra'vij so' —taj so' rihaan no' a.

<sup>24</sup> Gaa ne cataj chan̄a cu'naj Marta rihaan so':

—Aj ne'enj se vaa asa' quisij güii ca'an̄j ni'ya chumi' nihánj, ne cunuu i'n̄a' uún so' gā yo'ó nij yuvii cunuu i'n̄a' uún ei —taj no' rihaan Jesucristó a.

<sup>25</sup> Gaa ne cataj Jesucristó rihaan no' a:

—Xa' 'unj, tzaj ne sij 'yaj nuu i'n̄a' uún yuvii mej, ne 'unj me sí qui'yaj gaa i'n̄a' yuvii cayáan yuvii gā Diose nu' cavii nu' ca'an̄j adon̄j. Ne xa' sí amán rá ni'yaj manj, tzaj ne ca'vee se cavi' so', tzaj ne yo'ó gaa i'n̄a' nimán so' chuguan̄j. <sup>26</sup> Che'é se amán rá so' ni'yaj so' manj, ne che'é dan vaa i'n̄a' nimán so', ne daj chih̄aa mij se cavi' nimán so' a ma'. Amán rá so' nan̄a nihánj na' —taj Jesucristó, xná'an̄j so' man chan̄a cu'naj Marta yo' a.

<sup>27</sup> Gaa ne cataj no':

—Chumán raj, Señor. Dan me se aj cuchumán raj se vaa sij ca'née Diose tinanii man núj rihaan sayuun mé so', ne ta'nij Diose mé so', ne ca'ná' so' rihaan chumi' nihánj a —taj no' rihaan Jesucristó a.

<sup>28</sup> Dan me se quisij ca'mii no' d̄anj, gaa ne ca'an̄j no', ne canacúun yuve no' man chu'vij no' chan̄a cu'naj Mariá, cataj no':

—Aj ca'na' maestró, ne nacúun so' mán so' a —taj no' rihaan chan̄a cu'naj Mariá a.

<sup>29</sup> Ne gaa cuno chan̄a cu'naj Mariá nan̄a yo', gaa ne ra'yan̄j cavii no', ne ca'an̄j no' rej nicun' Jesucristó a.

<sup>30</sup> Dan me se ataa catuy Jesucristó rque chuman' yo', ne nicun' so' rej nari' tuvi' chan̄a cu'naj Marta gā so' a.

<sup>31</sup> Dan me se nij yuvii israelitá yuvi' cane rá ve' nanó cuentó gā chan̄a cu'naj Mariá me se quene'en nij so' se vaa ra'yan̄j canicun' no' ne curihan̄j no' xe', ne canoco' nij so' xcó no', ne curihan̄j nij so' xe' a. 'Q se guun rá nij so' se vaa ca'an̄j chan̄a cu'naj Mariá rihaan yu'uj yuvej che'é rej ta'vee no', rá nij so' a.

<sup>32</sup> Dan me se gaa cuhi' chan̄a cu'naj Mariá rej nicun' Jesucristó, gaa ne quene'en no' man so', gaa ne canicun' ruy no' rihaan Jesucristó, gaa ne cataj no':

—Sese cané so' nihánj, ne ne cavi' ra'vij asuun saj, man Señor —taj no' rihaan Jesucristó a.

<sup>33</sup> Dan me se quene'en Jesucristó se vaa ta'vee no', se vaa ta'vee nij yuvii israelitá ca'na' gā no' do', gaa ne quinano' ndo'o rá so', <sup>34</sup> gaa ne cataj so':

—Me rej cachin' soj man so' gā —taj so', xná'an̄j so' man nij so' a.

Gaa ne cataj nij so' rihaan so' a:

—Ca'an̄j ní, gaa ne quene'én so' á —taj nij so' rihaan so' a.

<sup>35</sup> Gaa ne ta'vee Jesucristó a. <sup>36</sup> Che'é dan cataj nij yuvi' israelitá rihaan tuvi' nij so' a:

—Niyaj soj ei. 'Q se ta'vee so', che'é se 'eē uxrá rá so' ni'yaj so' man sí cavi' yo' a —taj nij yuvi' ni'yaj nij yuvi' man Jesucristó a.

<sup>37</sup> Gaa ne ta'aj nij yuvi' cataj:

—'Q se sij ne'en nacuchra' rihaan sí tuchri' me sí nihánj á. Che'é dan uun nucuaj so' naquiyaj sa' so' man sí cu'naj Láزارo, ne sese cane so' nihánj, ne ne cavi' sí cu'naj Láزارo asuun saj ma' —taj ta'aj nij yuvi' yo' a.

<sup>38</sup> Dan me se quinano' uún rá Jesucristó, ne cuhi' so' rej cachin' nii man sí cu'naj Láزارo yo' a. Dan me se yu'uj yuvej me yo', ne caráan yahij rihaan yu'uj yo' a.

<sup>39</sup> Gaa ne cataj Jesucristó:

—Naxuyun soj yahij rihaan yu'uj á —taj Jesucristó a.

Gaa ne cataj ra'vij sí cavi' chan̄a cu'naj Marta rihaan so':

—Tzaj ne gun' ri'yuj man so' yaj, Señor. 'Q se quisij ca'an̄j ya güii naj so' nan̄j adon̄j —taj no' rihaan so' a.

<sup>40</sup> Gaa ne cataj Jesucristó rihaan no' a:

—Aj cataj xna'an̄j 'unj rihaan so' se vaa sese kuchuman̄a rá so' ni'yaj so' manj, gaa ne quene'én so' se vaa nucuaj uxrá Diose á —taj Jesucristó rihaan chan̄a cu'naj Marta yo' a.

<sup>41</sup> Che'é dan naxuun nij so' yahij yo' a. Gaa ne naxcāj Jesucristó rihaan so', ne cataj so':

—Guun ni'yaj ní se vaa cunó so' se-nan̄aj, Ataj Chij.

<sup>42</sup> Aj ne'enj se vaa nigan̄j unó so' se-nan̄aj, tzaj ne a'mij nan̄a nihánj che'é rej cun̄o nij yuvi' nicun' nihánj gāj a. 'Q se me raj kuchuman̄a rá nij yuvi' se vaa so' me sí ca'née manj rihaan chumi' nihánj nan̄j adon̄j —taj Jesucristó, cachín ni'yaj so' rihaan Diose a.

<sup>43</sup> Quisij cataj so' d̄anj, gaa ne nucuaj ndo'o caguáj so', cataj so':

—Láزارo. Cavii so' ca'na' so' nihánj ei —taj so', caguáj so' rihaan sí cu'naj Láزارo yo' a.

<sup>44</sup> Gaa ne curihan̄j sí cavi' yo' rque yu'uj, ne nacutāj yatzij nu' man so', ne caráan yatzij rihaan so' uún a.

Gaa ne cataj Jesucristó rihaan nij yuvi' a:

—Nache soj man so', ne cachee so' ca'an̄j so' á —taj Jesucristó rihaan nij yuvi' a.

**Nan̄a nihánj taj xna'an̄j se vaa guun ndo'o rá nij xrej at̄a suun noc̄o doj do', nij sí fariseo do', cavi' Jesucristó a**

<sup>45</sup> Dan me se ca'na' nij yuvi' israelitá gā chan̄a cu'naj Mariá yo', ne quene'en nij so' daj qui'yaj Jesucristó a. Che'é dan cuchumán rá que'eē nij yuvi' se vaa sí ca'née Diose me Jesucristó a. <sup>46</sup> Tzaj ne cavii yo'ó ta'aj nij so' ca'an̄j nij so' rihaan nij sí fariseo, gaa ne cataj xna'an̄j nij so' rihaan nij sí fariseo nu' se vaa qui'yaj Jesucristó a. <sup>47</sup> Che'é dan cunuu chre' nij xrej at̄a suun noc̄o doj do', nij sí fariseo do', qui'yaj nij so' juntá, gaa ne cataj nij so':

—Daj qui'yaj ní, rá soj gā. 'Q se xa' snó'o nihánj, tzaj ne 'yaj suun uxrá so' suun sa' noc̄o adon̄j. <sup>48</sup> Sese yo'ó tan̄aj ní' man so' qui'yaj so' d̄anj, ne kuchuman̄a rá cunudan̄j nij yuvi' ni'yaj nij yuvi' man so', gaa ne ca'na'

nij tanuu 'yaj suun rihaan gobiernó man Romá, gaa ne tirí' nij tanuu man ní' dɔ', man chiháán ní' dɔ', man nu' tuvi' ní' dɔ' á —taj nij so' rihaan tuvi' nij so' a.

<sup>49</sup> Gaa ne ca'mii yo'ó tuvi' nij so', síí cu'naj Caifás, ne so' me xrej atá suun nocɔo doj yo' yo' a. Dan me se cataj so' rihaan nij so' a:

—Ne ne'en uxrá nij soj a ma'. <sup>50</sup> 'Q se ataa xcaxj soj cuentá se vaa xa' soj, tzaj ne cavii sa' doj soj sese cavi' ɔrún' snó'o che'é nij yuvii, gaa ne veé danj me se quirí' nu' ní' sij israelitá ma' —taj síí cu'naj Caifás rihaan yo'ó nij so' a.

<sup>51</sup> Dan me se nuveé inanj nana cavii raá ma'an síí cu'naj Caifás me nana nihánj ma'. 'Q se xrej atá suun nocɔo doj me so' yo' yo', ne che'é dan ma'an Diosé me síí rque nana ca'mii so', ne che'é dan me ya vaa se-nana so' gaa cataj so' se vaa cavi' Jesucristó che'é taran' nij yuvii israelitá yo' a. <sup>52</sup> Ne nuveé inanj che'é nij yuvii israelitá me cavi' Jesucristó ma'. 'Q se cavi' so' che'é rej naqui'yaj chre' so' man cunudanj nij ta'níí Diosé nij síí man nu' rihaan chumii nihánj, gaa ne cunu tuvi' cunudanj nij so' adonj.

<sup>53</sup> Dan me se maan güii dan me se guun che'e nij síí fariseo dɔ', nij xrej atá suun nocɔo doj dɔ', nuchruj raá nij so' daj qui'yaj nij so', gaa ne cavi' Jesucristó a.

<sup>54</sup> Che'é dan me ne ca'vee cachee rangá' so' estadó Judea ma'. Gaa ne cavii so' ca'anj so' tu'va rej taj vaj yuvii man, gaa ne catúj so' yo'ɔ chuman' cu'naj Efraín, gaa ne caran' so' chuman' yo' ga nij síí tucu'yón se-nana so' a.

<sup>55</sup> Dan me se daj doj quisij cha'anj pascuá cha'anj navij rá nij yuvii israelitá, ne che'é dan cavii nij yuvii ne chuman' le'ej, ne ca'anj nij so' chuman' Jerusalén, che'é rej qui'yaj nij so' tucuáán nocɔ' nij so' ne cunu guee nij so' rihaan Diosé a. <sup>56</sup> Gaa ne nano' ndo'o nij yuvii man Jesucristó a. Dan me se canicun' nij yuvii rá nuví nocɔo, ne xná'anj nij yuvii man tuvi' yuvii, cataj nij yuvii:

—Daj uun rá soj ga. Ca'ná' so' rej canuú cha'anj, rá soj na' —cataj nij yuvii, xná'anj nij yuvii man tuvi' yuvii yo' a.

<sup>57</sup> Ne xa' nij xrej atá suun nocɔo doj dɔ', nij síí fariseo dɔ', tzaj ne cataj xna'anj nij so' se vaa sese quene'en nij yuvii me rej vaj Jesucristó, gaa ne cataj xna'anj nij yuvii rihaan ma'an nij so' a. 'Q se guun rá nij so' qui-ta'aa nij so' man Jesucristó adonj.

**Nana nihánj taj xna'anj se vaa caxríj chana cu'naj Mariá casté tacóo Jesucristó a**

**12** Dan me se achiin yatan' güii canuú cha'anj pascuá, ne ca'anj Jesucristó chuman' Betania a. Chuman' Betania ro', ne síí cu'naj Lázaro síí cunu i'na' uún qui'yaj Jesucristó a. <sup>2</sup> Dan me se qui'yaj chuvii nii cha ni'yánj Jesucristó, ne chana cu'naj Marta me chana rque chá ni'yánj nij síí 'na', ne ne síí cu'naj Lázaro rihaan mesá ga Jesucristó gaa chá so' chraa a. <sup>3</sup> Dan me se nicaj chana cu'naj Mariá yo'ɔ aga' xij casté gun' daj tu'vee ndo'o, ne caxríj no' tacóo Jesucristó, gaa ne yuvé raá ma'an no' tanacoɔ no' tacóo Jesu-

cristó a. Gaa ne nasíj toto' nu' rá ve' yo', qui'yaj casté caxríj chana cu'naj Mariá tacóo Jesucristó a.

<sup>4</sup> Dan me se ne síí cu'naj Judas Iscariote, ne yo'ɔ síí tucu'yón se-nana Jesucristó me so', ne síí tacuachén man Jesucristó rihaan nij síí taj ri'yunj man Jesucristó me so' a. Dan me se cataj so':

<sup>5</sup> —Me che'é ne cutu'vee nii casté nihánj ne quirí' uxrá nii sa'anj ga. 'Q se ase vaa sa'anj 'yaj canaán yuvii rque 'o yo' nó casté nihánj, ne vaa che'é rque ní' sa'anj yo' rihaan nij síí nique nana á —taj síí cu'naj Judas yo' a.

<sup>6</sup> Dan me se danj tu'va ma'an síí cu'naj Judas yo', tzaj ne a doj ne nanó rá Judas yo' che'é nij síí nique a ma'. Maan se sij tumé se-chrunj nij tuvi' Jesucristó chrúun sa'anj me so', tzaj ne síí ituu me so', ne qui'yaj ituu ndo'o so' sa'anj man rque chrúun yo', ne che'é dan ca'mii so' danj nana ei. <sup>7</sup> Dan me se cataj Jesucristó rihaan so' a:

—Ca'ne' rá so' qui'yaj ma'an no' ei. Che'é yan quisij güii cachin' nii manj ro', che'é dan caxríj no' casté tu'vee ndo'o manj nana á. <sup>8</sup> Xa' nij síí nique, tzaj ne nu' güii man nij síí nique ga soj, ne xa' ma'anj, tzaj ne se canicún' 'unj rihaan soj nu' cavii nu' ca'anj ni'yaj soj ma' —taj Jesucristó rihaan síí cu'naj Judas yo' a.

**Nana nihánj taj xna'anj se vaa guun rá nij xrej atá suun nocɔo doj se vaa cavi' uún síí cu'naj Lázaro yo' a**

<sup>9</sup> Dan me se xcaxj ndo'o nij yuvii israelitá cuentá se vaa ne Jesucristó chuman' Betania, ne che'é dan ca'anj uxrá nij so' chuman' yo' a. Dan me se nuveé inanj che'é ma'an Jesucristó me ca'anj nij so' ma'. 'Q se me rá nij so' quene'en nij so' man síí cu'naj Lázaro síí cunu i'na' uún qui'yaj Jesucristó a. <sup>10</sup> Gaa ne guun 'o rá nij xrej atá suun nocɔo doj se vaa cavi' síí cu'naj Lázaro uún, qui'yaj nij so' a. <sup>11</sup> 'Q se che'é síí cu'naj Lázaro me se cavii ndo'o nij yuvii israelitá canoco' nij so' man Jesucristó, ne cuchumán rá nij yuvii israelitá ni'yaj nij so' man Jesucristó a.

**Nana nihánj taj xna'anj daj qui'yaj nij yuvii gaa canicaj uún Jesucristó ca'anj so' chuman' Jerusalén a**

<sup>12</sup> Gaa ne güii a'yuj me se cuchi' nana rihaan taran' nij yuvii israelitá navij rá cha'anj pascuá se vaa catuu Jesucristó chuman' Jerusalén a. <sup>13</sup> Che'é dan me cuta nij yuvii ra'a chruun yuun, ne curihanj nij yuvii tu'va chuman' nari' tuvi' nij so' ga Jesucristó a. Gaa ne caguáj nij yuvii, cataj nij yuvii:

—Caraa guee ní' rihaan Diosé ei. Cunaj ndo'o vaa ca'na' síí ca'neé síí 'nij ra'a man ní' adonj. Síí uun chij rihaan ní' sij israelitá me so' chuguanj —taj nij yuvii, caguáj nij yuvii a.

<sup>14</sup> Gaa ne nari' Jesucristó yo'ɔ burró, gaa ne cavii so' xráa burró a. Dan me se cuyaán qui'yaj so' ga nana nihánj nana no' rihaan danj Diosé a: <sup>15</sup> “Soj sij man chuman' Jerusalén me se se cuchuvi' soj ma'. 'Q se xcaxj soj cuentá se vaa 'na' síí guun chij rihaan soj nana adonj. Dan me se síí nica' nimán me so', ne táa so' xráa burró le'ej ta'níí xcuu burró chana adonj”, taj



nanaŋ nō rihaan danj Diosoŋ yo' a. <sup>16</sup> Dan me se nij síí tu-cu'yón se-nanaŋ Jesucristó me se gaa güii catúŋ Jesucristó chuman' Jerusalén, ne ne xcáj nij so' cuentá, ne ne caxrij rá nij so' se vaa qui'yaj so' ndaa vaa cataj nanaŋ nō rihaan yanj yo' ma'. Tzaj ne ndaa quisij cavii sa' Jesucristó qui'yaj Diosoŋ, gaa ne ninuj rá nij so' nanaŋ nō rihaan danj Diosoŋ, ne ninuj rá nij so' se vaa guun che'é Jesucristó a.

<sup>17</sup> Dan me se nij yuvii cumán ga Jesucristó me se cataj xna'anj nij so' nu' se vaa guun gaa canacúun Jesucristó man síí cu'naj Lázaro se vaa curihanj so' yu'uj yuvej ne cunuu i'na' uún ya síí cu'naj Lázaro qui'yaj Jesucristó a. <sup>18</sup> Gaa ne che'é se cuno nij yuvii man chuman' Jerusalén se vaa qui'yaj so' suun sa' nocōo yo', gaa ne che'é dan ca'na' nari' nij so' man Jesucristó a. <sup>19</sup> Che'é dan cataj nij síí fariseo rihaan tuvi' nij so' a:

—Ni'yaj soj ei. 'O se ne qui'yaj canaán uxrá ní', qui'yaj soj a ma'. 'O se veé danj ya canoco' cunudanj nij yuvii man rihaan chumii se-nanaŋ so' nanj adonj —taj nij so' rihaan tuvi' nij so' ni'yaj nij so' man Jesucristó a.

**Nanaŋ nihánj taj xna'anj se vaa ca'na' doj síí a'mii xna'ánj griego ca'mii nij so' ga Jesucristó a**

<sup>20</sup> Dan me se mán ta'aj nij síí a'mii xna'ánj griego, ne sij cuchii' chuman' Jerusalén gaa anuú cha'anj pascuá me nij so', ne cuchii' nij so' na'vij nij so' rihaan Diosoŋ a.

<sup>21</sup> Dan me se cuchii' nij so' rihaan síí cu'naj Felipé síí cavii chuman' Betsaida chuman' naj estadó Galilea, gaa ne xna'anj nij so' man so', ne cataj nij so':

—Me rá núj ca'mii núj doj ga Jesucristó, señor —taj nij so' rihaan síí cu'naj Felipé yo' a.

<sup>22</sup> Gaa ne ca'anj síí cu'naj Felipé cataj xna'anj so' rihaan síí cu'naj Andrés se vaa cataj nij síí a'mii xna'ánj griego yo' rihaan so' a. Gaa ne ca'anj cataj xna'anj roj so' rihaan Jesucristó, ne cataj roj so' rihaan Jesucristó se vaa ca'na' nij síí a'mii xna'ánj griego ne me rá nij so' ca'mii nij so' ga Jesucristó a. <sup>23</sup> Gaa ne cataj Jesucristó rihaan roj so' a:

—Unj sij ca'née Diosoŋ nıcaj yu'unj man yuvii, tzaj ne cuanoŋ nihánj me se quisij güii cavii sa' 'unj, ne guun chij 'unj, qui'yaj Diosoŋ ei. <sup>24</sup> Ya ya cataj xna'anj 'unj rihaan soj cuanoŋ se vaa ase vaa 'núú vaa ní', ne sese se quini' 'núú yaan rihaan yo'óo ne cavi' ma'an 'núú yaan yo', ne quini' 'núú yaan rihaan yo'óo ne cavi' 'núú yaan yo', ne quisij que'ee doj 'núú qui'yaj yo' nanj adonj. <sup>25</sup> Dan me se xa' síí me rá gaa i'na' rihaan chumii nihánj, tzaj ne yo'ō cavi' so', ne xa' síí a'vej rá cavi' rihaan chumii nihánj che'é se me so' síí nocōo manj, tzaj ne yo'ō gaa i'na' nimán so' nu' cavii nu' ca'anj adonj. <sup>26</sup> Che'é dan me sese vaa 'o so' nuu rihanj 'yaj suun rihanj, ne canoco' so' manj cuaj ei. Ne me rej ma'an canicun' ma'anj ro', maan dan canicun' síí nuu rihanj uún nanj ei. Gaa ne cavii sa' uxrá síí 'yaj suun rihanj, qui'yaj Réj adonj.

<sup>27</sup> "Cuanō nihánj me se nanó ndo'o raj chuguanj. Ne daj qui'yáj a ranj a. Cachin'j ni'yáj rihaan Réj se vaa tı-nanii so' manj rihaan sayuun qui'ranj cuanoŋ, rá soj na'.

Taj che'é qui'yáj danj ma'. Che'e yan qui'ran' 'unj sayuun ca'naj adonj —taj Jesucristó rihaan roj so' a.

<sup>28</sup> Gaa ne cachin'j ni'yaj Jesucristó rihaan Diosoŋ, cataj so':

—Cavii sa' doj ma'an so' rihaan chumii nihánj, qui'yáa so', Ataj —taj Jesucristó, cachin'j ni'yaj so' a.

Gaa ne cavii 'o nanaŋ rej xtá' ca'mii Diosoŋ cuno nij so', ne nanaŋ cavii rej xtá' me:

—Aj cavii sa' 'unj, qui'yáj, tzaj ne cavii sa' 'unj doj, qui'yáj adonj —taj nanaŋ yo' nanaŋ cavii rej xtá' ca'mii Diosoŋ cuno nij so' a.

<sup>29</sup> Dan me se nicun' uxrá yuvii ga Jesucristó, ne cuno nij so' nanaŋ yo', ne cataj nij so' se vaa caguáj tu'vii rej xtá' a. Ne yo'ó ta'aj nij so' cataj se vaa ca'mii yo'ō se-mozō Diosoŋ nanaŋ yo' rihaan Jesucristó a. <sup>30</sup> Gaa ne cataj Jesucristó rihaan nij yuvii:

—Nuveé che'e orún' 'unj me ca'mii Diosoŋ nanaŋ yo' ma'. 'O se ca'mii Diosoŋ nanaŋ yo', che'é rej xcáj soj cuentá ei. <sup>31</sup> Che'é se vaa qui'ranj cuanoŋ ca'ne' Diosoŋ cacun' che'é nij yuvii man rihaan chumii nihánj, ne qui'ri' yanj Diosoŋ man síí chree síí uun chij rihaan chumii nihánj chuguanj. <sup>32</sup> Gaa ne asa' quisij naxcaj nii manj rihaan chumii nihánj cachron nii manj rihaan rcutze, gaa ne guun rá cunudanj nij yuvii canoco' nij yuvii manj, qui'yáj adonj —taj Jesucristó rihaan nij yuvii a.

<sup>33</sup> Ne ma'an nanaŋ nihánj nanaŋ ca'mii Jesucristó ro', taj xna'anj daj qui'yaj nii man so' ne cavi' so' a.

<sup>34</sup> Gaa ne cataj nij yuvii rihaan Jesucristó a:

—Aj ne'en núj nanaŋ nō rihaan danj Diosoŋ se vaa síí ca'nej Diosoŋ tınanii man yuvii rihaan sayuun me se sij cayáan nu' cavii nu' ca'anj me so' a. Ne me che'é cataj so' nihánj se vaa naxcaj nii man síí ca'née Diosoŋ nıcaj yu'unj man yuvii rihaan chumii nihánj ga. Me che'é cavi' so' ga. Daj sij me síí ca'nej Diosoŋ nıcaj yu'unj man yuvii, rá so' ga —taj nij yuvii, xna'anj nij yuvii man Jesucristó a.

<sup>35</sup> Che'é dan cataj Jesucristó rihaan nij so' a:

—Cuanō nihánj me se vaj soj rej chuguun sa' ya'an, tzaj ne daj doj quisij orá quina'aj ya'an yo', ne se guun nucaj soj xcáj soj cuentá ma'. Che'é dan vaa che'é xcáj soj cuentá ndaa vaa 'yaj nij síí vaj rej chuguun ya'an ei. Sese taj, ne guun soj síí chée rej rmi', ne xa' síí chée rej rmi', tzaj ne ne ne'en so' me rej vaj so' ma'.

<sup>36</sup> Dan me se vaj soj rej chuguun ya'an, ne che'é dan cuchuman rá soj ni'yaj soj ya'an sa' ei. Quisij qui'yaj soj danj, gaa ne guun soj ta'nii ya'an chuguun, ne sij xcáj cuentá guun soj adonj —taj Jesucristó rihaan nij yuvii a.

Quisij ca'mii Jesucristó nanaŋ nihánj, gaa ne ca'anj Jesucristó, ne caxrij yuve so' man so', che'é se na'vej rá so' quene'en nij yuvii man so' a.

**Nanaŋ nihánj taj xna'anj se vaa ne cuchuman rá nij síí israelitá ni'yaj nij so' man Jesucristó ma'**

<sup>37</sup> Ndá' se uxrá qui'yaj Jesucristó suun sa' nocōo ni'yaj nij yuvii, qui'yaj Diosoŋ, tzaj ne ne cuchuman rá nij yuvii se vaa sij ca'née Diosoŋ me so' a ma'. <sup>38</sup> Ne veé

danj quisij ya nu' se-nana sí cu'naj Isaías sí nata' se-nana Diose gaa naá a. Dan me se cataj sí cu'naj Isaías:

—Ataj sí chij. Doj yuvij cuchumán rá cuno nana ca'mii núj, ne doj yuvij xcaj cuentá se vaa nucuaj ndo'o so' sij 'nij ra'a man núj ei —taj sí cu'naj Isaías yo' a.

<sup>39</sup> Ne vaa doj nana nihánj nana ca'mii Diose ne cachrón sí cu'naj Isaías rihaan yanj, ne dan me se cataj xna'anj Diose me che'é ne guun nucuaj nij yuvij israelitá cuchumán rá nij so' ni'yaj nij so' man Jesucristó a:

<sup>40</sup> —Sí ca'neé 'unj me se nata' uxrá so' se-nanaj rihaan yuvij nihánj ndaa se caráan rihaan nij yuvij, ne se ca'vee quene'en nij so' doj ma'. Ne ne ca'vee catuu doj se-nanaj nimán nij so' ma'. 'O se na'vej uxrá rá nij so' xcaj nij so' cuentá ne canicaj nimán nij so' ne nahuun sa' nij so' qui'yáa 'unj ma' —taj Diose ne cachrón sí cu'naj Isaías rihaan yanj gaa naá a.

<sup>41</sup> Danj ca'mii Isaías che'é se aj quene'en so' se vaa sa' uxrá qui'yaj Jesucristó, ne che'é dan ca'mii so' danj che'é Jesucristó a.

<sup>42</sup> Tzaj ne cuchumán rá que'ee nij sí uun chij rihaan nij yuvij israelitá ni'yaj nij so' man Jesucristó a. Tzaj ne ne cataj xna'anj nij so' se vaa cuchumán rá nij so' ma'. 'O seuchu'vi' nij so' ni'yaj nij so' man nij sí fariseo, se vaa cuta' nij sí fariseo cacun' xráa nij so', gaa ne quirii yanij nij sí fariseo man nij so' rque nij yuvij israelitá yo' a. <sup>43</sup> Dan me se niha' rá nij so' doj cunó nij so' ca'mii sa' yuvij che'é nij so', ne ne caraya'anj nij so' se vaa ve'é ca'mii Diose che'é nij so' a ma'.

#### Nana nihánj taj xna'anj che'é cacun' tumé sí na'vej rá cunó se-nana Jesucristó a

<sup>44</sup> Ne sca' ndo'o ca'mii Jesucristó, cataj so':

—Xa' sí amán rá ni'yaj manj, tzaj ne nuveé inanj ma'anj me sí amán rá so' ni'yaj so' man ma'. 'O se amán rá so' ni'yaj so' man sí ca'neé manj rihaan chumii nihánj adonj. <sup>45</sup> Ne xa' sí acaj cuentá che'ej, tzaj ne so' me sí acaj cuentá che'é sí ca'neé manj rihaan chumii nihánj adonj. <sup>46</sup> Xa' ma'anj, tzaj ne chuguun ya'an rihaan chumii nihánj qui'yaj gaa ca'naj rihaan chumii nihánj, che'é rej se quináj nij sí amán rá ni'yaj manj rej rmi' man chuguanj.

<sup>47</sup> Ne ca'vee se se ca'vej rá yo'o so' cunó so' se-nanaj nana catúj xréé so', tzaj ne nuveé 'unj me sí cuta' cacun' xráa so' a ma'. 'O se nuveé che'e se cuta' 'unj cacun' xráa yuvij me ca'ná' 'unj rihaan chumii nihánj ma'. Tananj ca'ná' 'unj rihaan chumii nihánj che'é rej tinanii 'unj man nij yuvij man rihaan chumii nihánj rihaan chrej chi'ii uun chij nimán nij so' adonj. <sup>48</sup> Dan me se sí tanáj xco manj ne na'vej rá cunó se-nanaj me se quitaj cacun' xráa so' ei. 'O se che'é se ne cunó so' nana ca'mij rihaan so' ro', che'é dan quitaj cacun' xráa so' asa' quisij güii ca'ne' Diose cacun' che'é yuvij chuguanj. <sup>49</sup> Ne 'unj nihánj me se nuveé inanj nana cavii raj me nana ca'mij ma'. 'O se Réj sí ca'neé manj me sí cataj xna'anj rihanj daj ca'mij ei. <sup>50</sup> Ne aj ne'enj se vaa sese cunó ní' se vaa cataj xna'anj so' rihaan ní',

ne cayáan ní' gaa so' nu' cavii nu' ca'anj a. Che'é dan nana a'mij me se ma'an nana ca'mii Réj rihanj me nij nana a'mij adonj. —Danj cataj Jesucristó a.

#### Nana nihánj taj xna'anj se vaa na'nu' Jesucristó tacóo nij sí tucu'yón se-nana so' a

**13** Dan me se gaa ataa quisij cha'anj pascuá, ne quene'en Jesucristó se vaa nichrun' quisij orá tanáj so' chumii nihánj ne quinán' so' rihaan Rej so' Diose a. Dan me se 'ee rá so' man nij sí cachéé gaa so' rihaan chumii nihánj, ne yo'o 'ee rá so' man nij so' ndaa se cavi' so' a. <sup>2</sup> Dan me se quisij orá chá xti'nó nij so', ne aj guun rá sí chree se vaa sí cu'naj Judas Iscariote ta'níí Simón me sí tucuachén man Jesucristó rihaan nij sí taj ri'yunj man Jesucristó a. <sup>3</sup> Ne aj quene'en Jesucristó se vaa quisij guun chij ma'an so' rihaan cunudanj rasuun, qui'yaj Diose, ne aj quene'en so' se vaa sij cavii rej yanj Diose me so' ne quinán' uún so' rihaan Diose a. <sup>4</sup> Dan me se gaa quisij chá xti'nó nij so', ne quirii Jesucristó cotoó nuu so', ne cata'aa so' 'o yatzij toalla, ne tumij so' catuun so' a. <sup>5</sup> Veé dan, gaa ne caraa so' na rque rco'oo, gaa ne guun che'e so' na'nu' so' tacóo nij sí tucu'yón se-nana so', ne nachen so' yatzij toalla numii catuun so', ne tinacoó so' tacóo nij sí tucu'yón se-nana so' a. <sup>6</sup> Dan me se cuhi' so' rihaan sí cu'naj Simón Pedró, ne cataj Pedró rihaan so' a:

—Señor. Ma'an so' na'nu' tacóo aj na' —taj Pedró, xná'anj so' man Jesucristó a.

<sup>7</sup> Gaa ne cataj Jesucristó rihaan so' a:

—Ne ne'én so' me che'é 'yáj danj cuano ma'. Tzaj ne vaa güii, ne xcaj so' cuentá adonj —taj Jesucristó rihaan Pedró a.

<sup>8</sup> —Daj chihaa mij se guun na'nu' so' tacóo a ma' —taj Pedró rihaan Jesucristó a.

Gaa ne cataj Jesucristó rihaan so' a:

—Tzaj ne sese se na'nú' 'unj tacóo so', ne se ca'vee guún so' tuvi' 'unj ma' —taj Jesucristó rihaan Pedró a.

<sup>9</sup> Gaa ne cataj Simón Pedró rihaan Jesucristó a:

—Se na'nú' so' inanj tacóo, man Señor. Ndaa nu' ra'aj do', nu' raj do', na'nu' so' ei —taj Pedró rihaan Jesucristó a.

<sup>10</sup> Gaa ne cataj Jesucristó rihaan so' a:

—Xa' sí aj cane, tzaj ne taj che'é na'nu' nii man nu' nee man so' ma'. 'O se aj vaa cuy man so' nanj á. Maan se inanj tacóo so' na'nu' nii nanj adonj. Ne nda' se aj vaa cuy man ta'aj soj, tzaj ne nuveé taran' soj me sí vaa cuy man ma' —taj Jesucristó a.

<sup>11</sup> 'O se aj quene'en Jesucristó se vaa tucuachén yo'o tuvi' nij so' man so' rihaan nij sí taj ri'yunj man so', ne che'é dan cataj so' se vaa nuveé cunudanj nij so' me sí vaa cuy man a.

<sup>12</sup> Dan me se gaa quisij na'nu' Jesucristó tacóo nij so', ne nanuú so' se-cotoó so', ne ca'anj cane uún so' rej ne nij so', gaa ne xná'anj so' man nij so', cataj so':

—Ne'en soj me che'é qui'yaj danj man soj na'. <sup>13</sup> Xa' soj, tzaj ne ve'é a'mii soj rihanj, taj soj se vaa sij tucu'yón man soj mej, ne sij uun chij rihaan soj mej, ne

cunaj uxrá a'mii soj ei. 'O se veé yá 'unj nanj á. <sup>14</sup> Dan me se 'unj me sí tucu'yón man soj ne 'unj me sí uun chij rihaan soj, tzaj ne guún 'unj mozó rihaan soj ne na'nú' 'unj tacóo soj ei. Che'é dan xcaj soj cuentá se vaa no xcúun soj cunuu nica' nimán soj ne guun soj mozó rihaan tuvi' soj ne na'nu' soj tacóo tuvi' soj nanj adonj. <sup>15</sup> Danj inanj qui'yáj, che'é rej me raj quene'en soj manj, ne xcaj soj cuentá daj qui'yaj ma'an soj uún adonj. <sup>16</sup> Cuanó nihánj me cataj xna'anj yá 'unj rihaan soj se vaa nuveé sij uun chij doj me mozó rihaan se-ru'vee mozó ma'. Ne nuveé sij uun chij doj me sí ca'anj suun rihaan sí ca'née man so' ma'. Ne ase vaa mozó do', ase vaa sí ca'anj suun do', vaa soj rihanj a. Che'é dan daj se qui'yáá 'unj ro', danj gaa qui'yaj soj, qui'yaj suun soj che'é tuvi' soj ei. <sup>17</sup> Ne aj cuno soj nana nihánj, ne sese qui'yaj soj nu' nana nihánj, ne vaa che'é guun nihan' rá soj, ne ya cavii sa' soj adonj. <sup>18</sup> Tzaj ne ne ca'mij nana nihánj che'é taran' nij soj ma'. Dan me se aj ne'enj man soj sij narri 'unj canoco' manj, tzaj ne vaa che'é quisij guee nana nihánj nana no rihaan danj Diose adonj: "Sí chá rachrúun gaj ro', me sí guun rá tiguíj che'é manj adonj", me nana no rihaan danj Diose a.

<sup>19</sup> "Asij cuanó nihánj nu' rej rihagan cataj xna'anj 'unj rihaan soj daj guun rej rihagan, ne cuanó nihánj me se ataa quiranj se vaa quiranj, tzaj ne asa' quisij quiranj yo', gaa ne cuchuman rá soj daj sij mej ei. <sup>20</sup> Ya ya cataj xna'anj 'unj rihaan soj se vaa xa' sí ve'é nicaj tuvi' ga sí ca'nej 'unj rihaan chumii nihánj, tzaj ne so' me sí ve'é nicaj tuvi' ga ma'anj, ne xa' sí ve'é nicaj tuvi' ga ma'anj, tzaj ne so' me sí ve'é nicaj tuvi' ga sí ca'née manj nanj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa cataj xna'anj Jesucristó che'é sí tucuachén man so' rihaan nij sí taj ri'yunj man so' a**

<sup>21</sup> Sij ca'mii Jesucristó nana nihánj, gaa ne quinanó ndo'o rá so', gaa ne guun che'e so' cataj xna'anj so' daj qui'yaj yo'o so' man so', cataj so':

—Cuanó nihánj me se cataj yá 'unj rihaan soj se vaa yo'o tuvi' nij soj me sí tucuachén manj rihaan nij sí taj ri'yunj manj adonj —taj Jesucristó rihaan nij sí tucu'yón se-nana so' a.

<sup>22</sup> Gaa ne ni'yaj taran' nij so' man tuvi' nij so' a. 'O se ne quene'en nij so' me che'é ca'mii Jesucristó nana vaa danj a ma'. <sup>23</sup> Dan me se yanj yo'o so' x'núú Jesucristó, ne nichrun' uxrá ne so' ga Jesucristó, ne sí 'ee rá Jesucristó man me so' a. <sup>24</sup> Che'é dan ticun' Simón Pedró raá Simón Pedró rihaan so', che'é rej xna'anj so' man Jesucristó me sí che'e a'mii Jesucristó a. <sup>25</sup> Che'é dan xna'anj tuvi' so' man Jesucristó, cataj so':

—Me sí qui'yaj danj, ga Señor' —taj so', xna'anj so' man Jesucristó a.

<sup>26</sup> Gaa ne cataj Jesucristó:

—Tiguíj 'unj doj rachrúun candó nuu rque co'oo, ne rquej man sí qui'yaj danj manj a —taj Jesucristó a.

Gaa ne tiguíj Jesucristó yo'o xco' rachrúun rque candó nuu rque co'oo, ne go' so' man sí cu'naj Judas ta'ní sí cu'naj Simón Iscariote a. <sup>27</sup> Ne gaa quisij quita'aa sí cu'naj Judas rachrúun yo', gaa ne catúj Satanás nimán so' a. Che'é dan cataj Jesucristó rihaan so' a:

—Cavii so' ca'anj so' cuaj qui'yáá so' ndaa vaa me rá so' á —taj Jesucristó rihaan Judas yo' a.

<sup>28</sup> Tzaj ne a 'ó nij so' ne quene'en me che'é ca'mii Jesucristó nana vaa danj rihaan sí cu'naj Judas a ma'. <sup>29</sup> Dan me se che'é se sij tumé chrúun sa'anj me sí cu'naj Judas, che'é dan guun rá ta'aj nij so' se vaa ca'ne' Jesucristó suun rihaan so' quiraan so' se vaa cachijn rihaan nij so' che'é cha'anj do', se vaa go' so' doj sa'anj rihaan nij sí nique do' a.

<sup>30</sup> Dan me se nicaj Judas rachrúun yo', ne nu' quita'aa so' nu' curihanj so' xe', ne rej niij me yo' a.

**Nana nihánj taj xna'anj che'é suun ca'ne' Jesucristó rihaan ní a**

<sup>31</sup> Che'é dan gaa quisij curihanj Judas, ne cataj Jesucristó rihaan yo'ó nij so' a:

—Daj doj quene'en yuvij se vaa sij sa' uxrá mej sij ca'née Diose nicaj yu'unj man yuvij, ne che'é dan quene'en nij yuvij se vaa sij sa' uxrá me ma'an Diose adonj. <sup>32</sup> Ne che'é dan quene'en' se vaa sij sa' me ma'anj, qui'yaj Diose, ne nichrun' qui'yaj so' danj nanj adonj. <sup>33</sup> Nichrun' quinavij orá chée 'unj ga soj, nanj rej. Dan me se aj cataj 'unj rihaan nij sí uun chij rihaan nij yuvij israelitá se vaa cavii 'unj ca'anj 'unj, ne se guun nucuaj nij so' cuchí' nij so' rej ca'anj 'unj ma'. Ne xa' ma'an soj, tzaj ne nana' ma'an soj manj, ne nihánj me cataj xna'anj 'unj rihaan soj se vaa se guun nucuaj ma'an soj cuchí' ma'an soj rej ca'anj 'unj a ma'. <sup>34</sup> Ne nihánj me suun naca a'nej rihaan soj, se vaa yo'o gaa 'ee rá soj man tuvi' soj ei. Dan me se daj se cunuu 'ee raj ni'yaj man soj ro', danj gaa qui'yaj soj, gaa 'ee rá soj man tuvi' soj a. <sup>35</sup> Sese gaa 'ee rá soj man tuvi' soj, ne quene'en nu' yuvij man rihaan chumij se vaa sij tucu'yón se-nanaj me soj nanj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj che'é nana nij ca'mii Pedró che'é Jesucristó a**

<sup>36</sup> Gaa ne cataj Simón Pedró rihaan Jesucristó a:

—Me rej ca'anj so', ga Señor' —taj Pedró, xna'anj so' man Jesucristó a.

Gaa ne cataj Jesucristó:

—Xa' rej ca'anj 'unj, tzaj ne se guun nucuáá so' canocó' so' manj cuanó ma'. Tzaj ne vaa güii, ne canocó' so' manj adonj —taj so' rihaan Pedró a.

<sup>37</sup> Gaa ne cataj Pedró rihaan so' a:

—Me che'é se guun nucuáj canocoj man so' cuanó, Señor'. 'O se ca'nej nimanj cavij che'é so' á —taj Pedró rihaan Jesucristó a.

<sup>38</sup> Gaa ne cataj Jesucristó rihaan so' a:

—Ya ya ca'nej nimán so' cavi' so' che'ej, rá so' na'. Cuanō nihánj me se cataj yá 'unj rihaan so' se vaa gaa ataa caguaj to'loo, ne va'nuj ya cataj so' se vaa ne ne'én so' manj chuguaj —taj Jesucristó rihaan Pedró a.

**Nana nihánj taj xna'anj che'é nu' se vaa qui'yaj Jesucristó che'é ní' a**

**14** Gaa ne cataj Jesucristó rihaan taran' nij so' a: —Ca'ne' rá soj ga suun guun vij rá á. Cuchuman rá soj ni'yaj soj Diose, ne cuchuman rá soj ni'yaj soj manj ei. <sup>2</sup> Tucuá Réj me se vaa ndo'o rej canē yuvi ei. Sese ne vaa danj, ne me che'é cataj xna'anj 'unj rihaan soj se vaa ca'anj 'unj naqui'yaj sa' 'unj rej canē ma'an soj, rá soj ga. <sup>3</sup> Ne che'é se ca'anj 'unj naqui'yaj sa' 'unj rej canē soj, che'é dan ne'en soj se vaa ca'na' uún 'unj rihaan soj, ne nacaj 'unj man soj; ndaa síj, gaa ne canē rcua'aaan taran' ní' yo' ei. <sup>4</sup> Ne aj ne'en soj chrej uchi' ndaa rej ca'anj 'unj nanj adonj —taj Jesucristó rihaan nij síj tucu'yón se-nana so' a.

<sup>5</sup> Gaa ne cataj síj cu'naj Tomás rihaan Jesucristó a:

—Ne ne'en núj rej ca'anj so', man Señor. Asa' ca'vee quene'en núj chrej uchi' ndaa rej ca'anj so' ga —taj síj cu'naj Tomás, xná'anj so' man Jesucristó a.

<sup>6</sup> Gaa ne cataj Jesucristó rihaan so' a:

—Ma'anj me guun chrej rihaan soj, ne ma'anj me nana ya cunō soj, ne ma'anj me síj qui'yaj gaa i'na' nimán soj adonj. Sese se ca'vej rá yo'o so' canoco' so' manj, ne daj chihaa mij se cuchi' so' rihaan Réj Diose ma'. <sup>7</sup> Sese ne'en ya soj manj, ne aj ne'en soj man Réj Diose adonj. Dan me se asij cuanō ro', ne'en soj man so' nanj adonj —taj Jesucristó rihaan Tomás a.

<sup>8</sup> Gaa ne cataj síj cu'naj Felipé:

—Tijaán so' man Réé so' rihaan núj, ne guun ya rá núj, Señor —taj Felipé rihaan Jesucristó a.

<sup>9</sup> Gaa ne cataj Jesucristó rihaan Felipé a:

—Sij que'ee ndo'o güii cachéé 'unj ga nij soj, ne me che'é ne quene'en so' manj, ga Felipé'. Xa' síj ne'en manj, tzaj ne so' me síj ne'en Réj Diose adonj. Asa' ca'vee cataj so' se vaa me rá so' tijaán 'unj man Réj Diose rihaan so' ga. <sup>10</sup> Ne cuchumán ya rá so' se vaa cuyaān vaa rá 'unj ga Réj Diose a. 'O se xa' nana a'mij, tzaj ne nuveé nana avii raā ma'anj me nana yo' ma'. 'O se nuu Réj Diose nimanj, ne so' me síj 'yaj suun nu' suun 'yaj sunj adonj. <sup>11</sup> Cuchuman rá soj se vaa cuyaān vaa rá 'unj ga Réj ei. Ca'vee se ne amán rá soj ni'yaj soj man ma'anj, tzaj ne cuchuman rá soj se-nanaj che'é suun 'yaj sunj ei. <sup>12</sup> Ne cuanō nihánj me se cataj yá 'unj rihaan soj se vaa síj amán rá ni'yaj manj me se ase vaa suun 'yaj suun ma'anj ro', danj gaa suun qui'yaj suun ma'an so' uún nanj adonj. Tzaj ne suun sa' doj qui'yaj suun so', che'é se nucu' 'unj rihaan Réj Diose ei. <sup>13</sup> Ne me ma'an rasuun cachinj soj rihanj che'é se me soj síj noco' manj, ne nu' yo' qui'yaj che'é soj adonj. Ndaa síj, gaa ne ve'é ca'mij nii che'é Réj Diose, qui'yaj ei. <sup>14</sup> Sese cachinj soj yo'o rasuun rihanj che'é se me soj síj noco' manj, ne veé danj qui'yaj adonj.

<sup>15</sup> “Sese ya aráj cochroj soj rihanj, ne cunō soj nij nana cataj xna'anj 'unj rihaan soj a. <sup>16</sup> Gaa ne cachinj ni'yaj ma'anj rihaan Réj Diose, gaa ne ca'nej so' yo'ó síj cuchi' rihaan soj, ne racu'ij ndo'o so' man soj, ne canē so' ga soj nu' cavi' nu' ca'anj a. <sup>17</sup> Dan me se Nimán Diose me síj cuchi' rihaan soj, ne inanj nana ya rque so' man soj a. Tzaj ne se guun nucuaj nij yuvi man rihaan chumij nihánj nacaj nij so' man Nimán Diose a ma'. 'O se ne ne'en nij so' man so' ma'. Tzaj ne soj me se ne'en soj man so', che'é se ne so' ga soj, ne yo'o canē so' nimán soj adonj. <sup>18</sup> Se quináj ma'an soj ma'. 'O se ca'na' uún 'unj rihaan soj ei. <sup>19</sup> Nichrun' ca'anj 'unj, ne se quene'en uún nij síj man rihaan chumij nihánj manj ma'. Tzaj ne quene'en ma'an soj manj, che'é se yo'o vaa i'na' 'unj ga Diose, ne gaa i'na' nimán soj ga Diose adonj. <sup>20</sup> Asa' quene'en soj manj ne quene'en soj se vaa cuyaān vaa rá 'unj ga Réj, ne cuyaān gaa rá soj ga 'unj nanj adonj. <sup>21</sup> Síj nari' se-nanaj ne uno nana yo' ro', síj yo' me síj ya ya aráj cochroj rihanj chuguaj. Ne cunūu 'ee rá Réj Diose man síj aráj cochroj rihanj, ne gaa 'ee rá ma'anj man so', ne quene'en so' manj, qui'yaj ei —taj Jesucristó rihaan nij síj tucu'yón se-nana so' a.

<sup>22</sup> Dan me se ca'mii síj cu'naj Judas rihaan so' a. Tzaj ne nuveé sij cu'naj Judas Iscariote me so' ma'. Yo'ó síj cu'naj Judas me a. Dan me se xná'anj so' man Jesucristó, cataj so':

—Me che'é cataj so' cuanō nihánj se vaa quene'en núj mán so' qui'yáa so', tzaj ne se quene'en nij síj man rihaan chumij nihánj mán so' ga. Me che'é ca'mii so' danj ga —taj Judas, xná'anj so' man Jesucristó a.

<sup>23</sup> Gaa ne cataj Jesucristó rihaan so' a:

—Sese aráj cochroj yo'o so' rihanj, ne sese cunō so' se-nanaj, gaa ne cunūu 'ee rá Réj Diose man so', gaa ne cuchi' núj rihaan so', ne yo'o cayaán núj ga so' adonj. <sup>24</sup> Xa' síj ne aráj cochroj rihanj, tzaj ne ne uno so' se-nanaj ma'. Ne nana ca'mij cunō soj me se nuveé inanj se-nanaj me nana yo' ma'. Se-nana Réj síj ca'neé manj rihaan chumij nihánj me nana ca'mij cunō soj nanj adonj.

<sup>25</sup> “Dan me se cuanō yaj ne ma'anj ga soj, ne ca'mij nu' nana nihánj rihaan soj adonj. <sup>26</sup> Tzaj ne vaa güii ca'nej Réj Diose man Nimán so' cuchi' Nimán so' rihaan soj, ne racu'ij ndo'o Nimán so' man soj, gaa ne tucu'yón Nimán so' nu' nana man soj, ne ninuj rá soj nu' nana ca'mij rihaan soj, qui'yaj Nimán Diose yo' ei.

<sup>27</sup> “Dan me se se xej nuu nimán 'unj tanáj 'unj rihaan soj, ne se xej nuu nimán 'unj rquej man soj, ne se tihá yu'unj 'unj man soj, ndaa vaa 'yaj nij síj man rihaan chumij nihánj ma'. Ya ya gaa xej nimán soj, qui'yaj yá 'unj adonj. Taj che'é quinanō rá soj ma'. Se cuchu'vi' nimán soj ma'. <sup>28</sup> Aj cunō soj nana ca'mij, se vaa cavi' 'unj quínán' 'unj, tzaj ne ca'na' uún 'unj rihaan soj adonj. Sese sij aráj cochroj rihanj me soj, ne guun nihá' rá soj cunō soj nana se vaa cavi' 'unj quínán' 'unj yan yanj Réj Diose ei. Uun chij doj Réj rihanj nanj adonj.

<sup>29</sup> "Cuanō nihánj me se cataj xna'anj 'unj rihaan soj daj quirán' 'unj rej rihaan ní', ne asa' quisíj quirán' 'unj danj, gaa ne me rá 'unj cuchuman rá soj ni'yaj soj manj chuguanj. <sup>30</sup> Se ca'mij que'eej doj nana rihaan soj a ma'. 'O se daj doj ca'na' sí chree sí guun chij rihaan chumij nihánj, ne a doj se ca'vee guun chij so' rihanj a ma'. <sup>31</sup> Tzaj ne me rá 'unj quene'en nij sí man rihaan chumij nihánj se vaa aráj cochróo 'unj rihaan Réj Diose, ne che'é dan qui'yáj ndaa vaa cataj xna'anj so' rihanj adonj. Canicun' caya soj, ne cavii ní' ca'anj ní' ei —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa ase vaa yo'o ya'aa coj chruj uvá ro', danj vaa Jesucristó, ne ase vaa ya'aa ra'a avii xraá ya'aa manj ro', danj vaa ní' a**

**15** Gaa ne cataj uún Jesucristó a: —Ase vaa yo'o ra'a manj chruun uvá ro', danj vaa yá 'unj, ne Réj Diose me sí tumé chruun uvá yo' chuguanj. <sup>2</sup> Ne a me ma'an 'o ra'a chruun yo' ne rii chruj uvá, ne a'néj so' man ra'a yo' nanj adonj. Tzaj ne ra'a chruun man chruj uvá raq me se ve'é a'ne' so' man yo', gaa ne cumán doj chruj uvá raq yo' uún ei. <sup>3</sup> Dan me se ra'a chruun cachij sa' me soj, che'é se aj cuno soj nana ca'mij rihaan soj ei. <sup>4</sup> 'O nuú rá soj manj, ne 'o nuú 'unj nimán soj a. Dan me se xa' ra'a chruun uvá, tzaj ne se ca'vee cumán chruj raq yo' sese ma'an inanj yo' a ma'. Ne ase vaa ra'a chruun chruj uvá ro', danj vaa soj, ne sese se cuno sa' soj rihanj, ne sese ca'anj yanij soj rihanj, ne se ca'vee qui'yaj soj ndaa vaa me rá Réj Diose qui'yaj soj ma'.

<sup>5</sup> "Dan me se 'unj nihánj me ma'an ra'a manj coj chruj uvá, ne soj me ra'a cajuun avii xraá ra'a manj ei. Ne sese yo'o cunō soj rihanj, ne sese yo'o cunuú 'unj nimán soj, ne qui'yaj uxrá soj se vaa me rá Diose qui'yaj soj chuguanj. 'O se sese se racuíj 'unj man soj, ne se guun nucuaj soj qui'yaj suun soj a doj suun sa' ma'. <sup>6</sup> Sese se ca'vej rá yo'o so' quinaj so' ga 'unj, ne quiri'ij nii man so', ndaa vaa 'yaj nii man ra'a chruun yo', ne canacōo yo', ne naquiyaj chre' nii man nij ra'a chruun yo', ne quiri'ij nii man nij yo' rihaan ya'an ei. Dan me se cacaa nu' nij sí vaa danj nanj adonj.

<sup>7</sup> "Tzaj ne sese yo'o cunō soj rihanj, ne sese yo'o cunuú se-nanaj nimán soj, ne ca'vee se me ma'an rasuun guun rá soj cachinj soj rihanj, ne rquej man soj chuguanj. <sup>8</sup> Che'é se uno soj rihanj, che'é dan a'mii sa' yuvij che'é Réj Diose, ne che'é dan guun nucuaj soj qui'yaj suun ndo'o soj suun sa', ne sese cunō sa' soj rihanj, ne sí tucu'yón se-nanaj me soj adonj. <sup>9</sup> Dan me se daj se 'eej rá Réj manj ro', danj vaa 'eej raj man soj chuguanj. Ne yo'o gaa 'eej raj ni'yaj 'unj man soj, qui'yaj soj ei. <sup>10</sup> Sese a'née sa' soj suun a'nej rihaan soj, ne yo'o gaa 'eej raj man soj a. Veé danj 'yáá 'unj, ne a'née sa' 'unj suun a'ne' Réj Diose rihanj, ne yo'o 'eej rá so' manj adonj.

<sup>11</sup> "Nu' nana nihánj cataj xna'anj 'unj rihaan soj che'é se me raj gaa niha' uxrá raj ni'yaj 'unj man soj, ne me raj gaa niha' uxrá rá ma'an soj uún a. <sup>12</sup> Nihánj me suun sa' ya a'nej rihaan soj cunō soj ei. Nda' rá se vaa 'eej

raj ni'yaj 'unj man soj ro', danj gaa 'eej rá soj ni'yaj soj tuvi' soj ei. <sup>13</sup> Dan me se sese ca'vej rá yo'o so' nayon so' rihaan tuvi' so' cavi' so' che'é tuvi' so', ne sij 'eej ya rá man tuvi' me so', ne taj vaj a doj sí 'eej doj rá man tuvi' rihaan sí ca'vej cavi' che'é tuvi' a ma'. <sup>14</sup> Ne nij soj me se tuvij me soj sese qui'yaj soj ndaa vaa cataj xna'anj 'unj rihaan soj nanj adonj. <sup>15</sup> Rej rihaan ní' me se se cataj 'unj se vaa se-mozó 'unj me soj a ma'. 'O se mozó me se ne ne'en so' daj 'yaj sí uun chij rihaan so' ma'. Xa' soj, tzaj ne aj cataj 'unj se vaa tuvij me soj, che'é se aj cataj xna'anj 'unj rihaan soj nu' se vaa cataj Réj Diose rihanj adonj. <sup>16</sup> Ne quinarij soj manj a ma'. Tananj ma'an 'unj nihánj quinarij man soj ne cuné' 'unj man soj, yan cavii soj qui'yaj ndo'o soj se vaa me rá Diose qui'yaj soj, ne se quinarij suun sa' 'yaj suun soj daj chihaa mij ma'. Ne che'é se cuné' 'unj man soj, che'é dan me ma'an rasuun cachinj soj rihaan Réj Diose che'é se me soj sí nocō' manj, ne rque so' rasuun yo' man soj adonj. <sup>17</sup> Nihánj me se vaa cataj xna'anj 'unj rihaan soj, se vaa gaa 'eej rá soj man tuvi' soj ei —taj Jesucristó rihaan nij sí tucu'yón se-nana so' a.

**Nana nihánj me taj xna'anj Jesucristó se vaa nij ndo'o qui'yaj nij sí man rihaan chumij nihánj man ní' a**

<sup>18</sup> Gaa ne cataj uún Jesucristó a:

—Sese quitaj ri'yunj nij sí man rihaan chumij nihánj ni'yaj nij so' man soj, ne xcaj soj cuentá se vaa asino yaan quitáa ri'yunj nij so' man ma'anj a. <sup>19</sup> Sese sij man rihaan chumij nihánj uun me ma'an soj, ne gaa niha' rá yo'ó nij sí man rihaan chumij nihánj ni'yaj nij so' man soj asuun, tzaj ne narij 'unj man soj se vaa tanáj soj chumij nihánj ne canocō' soj manj, ne che'é dan nuveé sij man rihaan chumij nihánj me soj cuanō ma'. Che'é dan táa ri'yunj nij sí man rihaan chumij nihánj ni'yaj nij so' man soj ei.

<sup>20</sup> "Yo'o cunuú rá soj nana nihánj nana cataj xna'anj 'unj rihaan soj se vaa nuveé sij uun chij doj me mozó rihaan se-ru'vee mozó ma'. Che'é se canocō' nij sí taj ri'yunj manj qui'yaj nij so' sayuun manj ro', che'é dan ne'en soj se vaa ndaa ma'an soj do', canocō' nij so' qui'yaj nij so' sayuun nanj adonj. Ne che'é se ne cunō nij so' se-nanaj, ne che'é dan ne'en soj se vaa se cuno nij so' se-nana soj a man adonj. <sup>21</sup> Dan me se qui'yaj nij so' nu' se nij yo' man soj, che'é se me soj sí nocō' manj, che'é se ne ne'en nij so' man sí ca'née manj chuguanj. <sup>22</sup> Sese ne ca'na' 'unj, ne sese ne ca'mij ga nij so', ne taj vaj cacun' tumé nij so' saj ma'. Tzaj ne cuanō nihánj me se natá 'unj se-nana Diose rihaan nij so', ne se ca'vee cataj nij so' se vaa nuveé sij taj ri'yunj man Diose me nij so' ma'. <sup>23</sup> 'O se sí taj ri'yunj manj ro', so' me sí taj ri'yunj man Réj Diose ei. <sup>24</sup> Ne suun sa' nocōo qui'yaj sunj quene'en nij so' me se ne qui'yaj a yo'ó yuvij suun sa' nocōo vaa danj ma'. Ne sese ne qui'yáj suun sa' nocōo yo' quene'en nij so', ne ne tumé nij so' cacun' saj ma'. Tzaj ne yaj me se aj quene'en nij so' nij suun sa' nocōo qui'yaj sunj, ne quitáa ri'yunj nij so' mán 'unj, man Réj Diose do', nanj adonj. <sup>25</sup> Tzaj ne

nihánj me se quisij ya nu' nana nihánj nana no rihaan se-tucuanj Moisés nana nayaa ma'an nij so' se vaa, "Quitáa ri'yunj rma'an nij so' manj", taj se-tucuanj Moisés yo', ne veé danj qui'yaj guee nij so' nanj adonj. <sup>26</sup> "Dan me se ca'nej 'unj Nimán Diose cavii so' rej ne Diose ca'na' so' rihaan soj, ne racuúj so' man soj, ne in- anj nana ya rque so' man soj, ne asa' ca'na' Nimán Diose rihaan soj, gaa ne cataj xna'anj so' rihaan soj che'ej ei. <sup>27</sup> Ne cataj xna'anj ma'an soj che'ej, che'é rej asij guun che'ej cachée 'unj rihaan chumii nihánj, cachée soj gaj ei.

**16** "Nihánj me quisij cataj xna'anj 'unj nu' nana ni- hánj rihaan soj, che'é rej na'vej raj guun na'aj soj che'é se vaa quiran' soj a. <sup>2</sup> 'O se se ca'vej rá nij sí israelitá cunuu chre' soj ga nij so' rá ve' tucu'yón nij so' se-tucuanj Moisés ma'. Ne quisij güii guun rá nij so' se vaa nuveé sij noco' man Diose me soj, ne guun rá sí ticavi' man soj se vaa ve'é uxrá 'yaj suun so' rihaan Diose gaa ticavi' so' man soj a. <sup>3</sup> Danj qui'yaj nii, che'é rej ne ne'en uxrá nii man Réj Diose do', man ma'anj do' a. <sup>4</sup> Tzaj ne nihánj me cataj xna'anj 'unj nu' nana ni- hánj rihaan soj, che'é rej asa' quiran' soj nu' sayuun ni- hánj, ne ninuj rá soj se vaa aj cataj xna'anj 'unj rihaan soj che'é nu' nihánj nanj adonj —taj Jesucristó rihaan nij sí tucu'yón se-nana so' a.

**Nana nihánj me taj xna'anj Jesucristó se vaa ca'anj so' ne ca'na' Nimán Diose rihaan ní' a**

Gaa ne cataj uún Jesucristó a:

—Ne cataj xna'anj 'unj nu' nana nihánj rihaan soj gaa guun che'e soj cachée soj gaj, che'é se cachée ma'anj ga soj, ne che'é dan ne cachiiin nana vaa danj rihaan soj ma'. <sup>5</sup> Tzaj ne cuano nihánj me se quinan' uún 'unj rihaan sí ca'née manj rihaan chumii nihánj, ne me che'é ne xná'anj soj manj me rej ca'anj 'unj ga. <sup>6</sup> Tzaj ne che'é se cataj xna'anj 'unj rihaan soj se vaa ca'anj 'unj ro', che'é dan nanó ndo'o rá soj ne nuu xru' rá soj chuguanj. <sup>7</sup> Tzaj ne ya vaa nana nihánj nana cataj xna'anj 'unj rihaan soj, se vaa cavii sa' soj doj che'é se ca'anj 'unj adonj. 'O se sese se ca'anj 'unj, ne se ca'na' Nimán Diose rihaan soj ma'. Tzaj ne sese ca'anj 'unj, ne ca'nej 'unj man so' rihaan soj adonj. <sup>8</sup> Ne asa' quisij ca'na' so', ne cuta' so' cacun' xráá nij sí man rihaan chumii nihánj se vaa tumé nij so' cacun' do', se vaa ataa cunuu sa' nij so' rihaan Diose do', se vaa ca'ne' ya Diose cacun' che'é nij so' do' a. <sup>9</sup> Dan me se che'é se ne cuchuman rá nij yuvii ni'yaj nij so' manj ro', che'é dan cataj Nimán Diose se vaa tumé nij so' ca- cun' a. <sup>10</sup> Che'é se cavii 'unj quinan' 'unj rej yanj Réj Diose ne se quene'en soj doj manj ro', che'é dan cataj Nimán Diose se vaa ataa cunuu sa' nij yuvii rihaan Diose a. <sup>11</sup> Che'é se aj ca'ne' Diose cacun' che'é sí chre' sí uun chij rihaan chumii nihánj ro', che'é dan cataj Nimán Diose se vaa ca'ne' Diose cacun' che'é ma'an nij yuvii uún adonj.

<sup>12</sup> "Dan me se vaa uxrá doj nana me raj cataj xna'anj 'unj rihaan soj, tzaj ne se guun nucaj soj cunó soj nana yo' cuano a ma'. <sup>13</sup> Tzaj ne asa' quisij ca'na'

Nimán Diose yo', ne tucu'yón so' nu' nana ya rihaan soj nanj ei. 'O se sij a'mii inanj nana ya me so' adonj. 'O se se ca'mii so' nana cavii raq so' ma'. Tananj ca'mii so' inanj nana cataj xna'anj Diose cunó so', ne dan me se cataj xna'anj so' che'é se vaa ca'na' rihaan soj rej ri- haan soj nanj adonj. <sup>14</sup> Ca'mii sa' so' che'é 'unj, che'é se nicaj so' se-nanaj, ne nicaj so' nu' si'yáj, ne cataj xna'anj so' nana yo' rihaan soj chuguanj. <sup>15</sup> Nu' se nicaj Réj Diose me se si'yáj me yo' ei. Che'é dan cataj 'unj se vaa nicaj so' si'yáj, ne tihagan so' rihaan soj a —taj Jesu- cristó rihaan nij sí tucu'yón se-nana so' a.

**Nana nihánj me taj xna'anj Jesucristó che'é güii guun niha' rá nij sí tucu'yón se-nana so' a**

<sup>16</sup> Gaa ne cataj uún Jesucristó:

—Cachen doj, gaa ne se quene'en soj manj ma'. Gaa ne cachén doj uún, gaa ne quene'en uún soj manj chuguanj —taj Jesucristó rihaan nij sí tucu'yón se-na- na so' a.

<sup>17</sup> Che'é dan xná'anj nij sí tucu'yón se-nana so' man tuvi' nij so', cataj nij so':

—Me che'é ca'mii so' nana vaa danj se vaa, "Cachen doj, gaa ne se quene'en soj manj, ne cachén doj uún, gaa ne quene'en uún soj manj, che'é se cavii 'unj quinan' 'unj rej yanj Réj Diose a". Me che'é tu'va so' danj, rá soj ga —taj nij sí tucu'yón se-nana Jesucristó, xná'anj nij so' man tuvi' nij so' a.

<sup>18</sup> Che'é dan xná'anj uún nij so', cataj nij so':

—Me che'é ca'mii so' nana "cachén doj" ga. 'O se ne ne'en uxrá núj daj taj so' a ma' —taj nij so' rihaan tuvi' nij so' a.

<sup>19</sup> Quene'en Jesucristó se vaa me rá nij so' xná'anj nij so' man so', ne che'é dan xná'anj ma'an so' man nij so', cataj so':

—Me che'é xná'anj ndo'o soj man tuvi' soj che'é nana ca'mij, se vaa cachén doj, gaa ne se quene'en uún soj manj, gaa ne cachén doj uún, gaa ne quene'en uún soj manj ga. <sup>20</sup> Cuanó nihánj me cataj yá yá 'unj ri- haan soj se vaa ta'vee soj ne quinanó ndo'o rá soj, tzaj ne guun niha' rá nij sí man rihaan chumii nihánj adonj. Nda' se quinanó ndo'o rá soj, tzaj ne cachén doj, gaa ne guun niha' uxrá nimán soj nanj ei. <sup>21</sup> Dan me se chana uchruj ne'ej me se nanó ndo'o rá no', che'é se daj doj quisij orá cuchruj no' ne'ej, tzaj ne gaa quisij ca'ngaa ne'ej, ne ni'yón no' nu' sayuun quiran' no' nanj ei. 'O se uun niha' ndo'o rá no' che'é se ca'n- gaa yuvii rihaan chumii nanj adonj. <sup>22</sup> Ne xa' soj, tzaj ne cuano nihánj me se nanó rá soj, tzaj ne vaa güii quene'en uún 'unj man soj, gaa ne guun niha' uxrá rá soj, ne taj vaj a doj sí ca'ne' se niha' nimán soj a ma'. <sup>23</sup> Ne güii dan me se se xná'anj soj a doj nana manj a ma'. Ya ya cataj xna'anj 'unj rihaan soj cuano se vaa me ma'an rasuun cachinj ni'yaj soj rihaan Réj Diose ne cata' tu'va soj se-chuvij, ne rque so' nu' yo' man soj adonj. <sup>24</sup> Dan me se nda' se sij noco' manj me soj, tzaj ne gaa rque me se ne cachinj ni'yaj soj a doj rasuun ri- haan Diose ma'. Cachinj ni'yaj soj, ne quirí' soj ei. Ndaa

sij, gaa ne gaa niha' uxrá rá soj adonj —taj Jesucristó rihaan nij sí tucu'yón se-nana so' a.

**Nana nihánj me taj xna'anj Jesucristó se vaa quinan' so' rihaan Rej so' Diose ne ca'na' uún so' rihaan chumii a**

<sup>25</sup> Gaa ne cataj uún Jesucristó a:

—Dan me se aj ca'mii cachrón ndo'oj rihaan soj che'é rasuun nihánj, tzaj ne vaa güii, ne se ca'mii cachronj doj rihaan soj a ma'. Tananj nana nicá nata' 'unj rihaan soj che'é Réj Diose a. <sup>26</sup> Ne güii dan me se cachinj ni'yaj soj rasuun rihaan Réj Diose, ne cata' tu'-va soj se-chuvij, ne taj che'é cataj 'unj rihaan soj se vaa ma'anj cachinj ni'yaj rihaan Réj che'é soj a ma'. <sup>27</sup> 'O se ma'an Réj Diose 'ee rá man soj, che'é se sij aráj cochroj rihanj me soj, ne amán rá soj se vaa cavii 'unj rihaan Réj Diose nanj á. <sup>28</sup> Dan me se cavii 'unj rihaan Réj Diose, ne ca'ná' 'unj rihaan chumii nihánj, gaa ne cavii uún 'unj rihaan chumii nihánj, ne nucu' uún 'unj rihaan Réj Diose adonj —taj Jesucristó rihaan nij sí tucu'yón se-nana so' a.

<sup>29</sup> Gaa ne cataj nij sí tucu'yón se-nana so' a:

—Cuanó nihánj me se nana nicá a'mii so' no núj, ne a doj ne ca'mii cachrón so' ma'. <sup>30</sup> Nihánj me se ne'en núj se vaa ne'én so' cunudanj, ne ndaa ne'én so' me nana uun rá yuvij xna'anj yuvii mán so' a. Che'é dan amán rá núj se vaa cavii so' rihaan Diose nanj á —taj nij sí tucu'yón se-nana Jesucristó a.

<sup>31</sup> Gaa ne xna'anj Jesucristó man nij so', cataj so':

—Ndaa yaj cuchumán ya rá soj na'. <sup>32</sup> Dan me se quisij güii, ne veé aj quisij güii yo', ne cha'nuu soj, ne ino rej cunanj 'o 'o soj, ca'anj soj, ne tanáj soj man orún' 'unj nanj á. Tzaj ne se quináj orún' 'unj ma'. 'O se nicun' Réj Diose gaj adonj. <sup>33</sup> Nu' nana nihánj ca'mij rihaan soj, che'é se me raj gaa xej nimán soj che'é rej noco' soj manj, tzaj ne quiran' soj sayuun rihaan chumii nihánj, tzaj ne vaa che'é guun niha' rá soj, ne guun ya ya rá soj se vaa 'unj nihánj qui'yaj canaán ya rihaan chumii nihánj ei —taj Jesucristó rihaan nij sí tucu'yón se-nana so' a.

**Nana nihánj taj xna'anj daj ca'mii Jesucristó gaa cachíin ni'yaj so' rihaan Rej so' Diose a**

**17** Quisij ca'mii Jesucristó nana dan rihaan nij sí tucu'yón se-nana so', gaa ne naxcaj rihaan so', ni'yaj so' rej xta', ne cataj so':

—Aj quisij orá yo', Ataj. Ve'é cavii 'unj sij ta'nij so', qui'yáa so', gaa ne ve'é ca'mii yuvii che'é so', qui'yáj, <sup>2</sup> che'é se guun chij 'unj rihaan cunudanj yuvii, qui'yáa so' a. Ne che'é dan nu' nij sí rqué so' manj me se gaa i'na' nij so' nu' cavii nu' ca'anj, qui'yáj a. <sup>3</sup> Ne sí gaa i'-na' nu' cavii nu' ca'anj me se so' me sí ne'en mán so' do', mán 'unj do' a. Dan me se orún' so' me Diose ya, ne 'unj Jesucristó me sí ca'née so' rihaan chumii nihánj adonj. <sup>4</sup> Dan me se aj qui'yaj sunj nu' suun ca'né' so' rihanj, ne che'é dan aj ca'mii sa' nij yuvii man rihaan chumii nihánj che'é so' nanj adonj. <sup>5</sup> Ne cuano ni-

hánj me se qui'yáa so' cavii sa' 'unj ga ma'an so', Ataj Chij, ndaa vaa cavii sa' 'unj ga so' asij ataa guun chumii nihánj a.

<sup>6</sup> "Ne xa' nij sí rqué so' manj sí cavii rihaan chumii nihánj, tzaj ne cataj xna'anj 'unj se-nana so' rihaan nij so', ne sij cuno rihaan so' me nij so', ne rqué so' man nij so' rihanj, ne aj canoco' nij so' se-nana so' nanj á.

<sup>7</sup> Nihánj me se ne'en nij so' se vaa nij rasuun nicaj 'unj me se ma'an so' me sí rqué nu' rasuun yo' manj nanj adonj. <sup>8</sup> 'O se cataj xna'anj 'unj nu' nana rqué so' manj rihaan nij so', ne cuno nij so', ne ne'en ya nij so' se vaa cavii 'unj rihaan so', ne amán rá nij so' se vaa ca'née so' manj rihaan chumii nihánj a.

<sup>9</sup> "Nihánj me se achíin ni'yáa 'unj rihaan so' che'é nij so' a. Ne xa' che'é nij sí man rihaan chumii nihánj, tzaj ne se cachíin ni'yáa 'unj che'é cunudanj nij so' ma'.

Maan inanj che'é nij sí rqué so' manj me cachinj ni'yáa 'unj rihaan so' adonj. 'O se sij uno rihaan so' me nij so' nanj á. <sup>10</sup> Ne nij sí noco' manj me se noco' nij so' mán so', ne nij sí noco' mán so' ro', noco' manj, ne aj cavii sa' 'unj, qui'yaj nij so' nanj á. <sup>11</sup> Ne nihánj me se nuvi' 'unj yáan rihaan chumii nihánj a ma'. 'O se nij sí nihánj yáan rihaan chumii nihánj adonj. 'Unj me se

quinán' 'unj rej yanj so' nanj adonj. Dan me se nij sí rqué so' manj me se qui'yáa so' se ndo'o, ne cütumé so' man nij so', che'é rej yo' o cunó nij so' rihaan so', Ataj Chij. Ne cuyaan gaa rá nij so' ga ní ei. <sup>12</sup> Gaa cayáan 'unj ga nij so' me se tumej man nij so' cunó nij so' rihaan so' a. Che'é se rqué so' man nij so' rihanj ro', che'é dan ve'é tumej man nij so' a. Ne cunaj cumej man nij so' adonj. Ne a 'ó nij so' ne ca'anj ni'ya, qui'yáj ma'. Tzaj ne quene'én so' se vaa ca'anj ni'ya yo' o tuvi' nij so', ne orún' so' ca'anj ni'ya, ne dan me se quisij ya nu' nana no rihaan dáan so' adonj.

<sup>13</sup> "Nihánj me se quinán' 'unj rej yanj so', ne a'mii 'unj nu' nana nihánj gaa vaj 'unj rihaan chumii nihánj, che'é se me raj gaa niha' uxrá rá nij so' ndaa se vaa niha' rá ma'anj adonj. <sup>14</sup> Aj rquej se-nana so' rihaan nij so', ne che'é dan táa ri'yunj nij sí man rihaan chumii nihánj ni'yaj nij so' man nij sí rqué so' manj a. 'O se ase vaa 'unj ro', danj vaa nij sí rqué so' manj, ne nuveé sij man rihaan chumii nihánj me nij so' a ma'.

<sup>15</sup> "O se se cachíin ni'yáa 'unj se vaa ca'nee so' man nij so' rihaan chumii nihánj ma'. 'O se me rá 'unj cütumé so' man nij so' se cunuu chi'ii nimán nij so' a man adonj. <sup>16</sup> Dan me se ase vaa 'unj vaa nij so', ne nuveé sij man rihaan chumii nihánj me nij so' ma'. <sup>17</sup> Inanj nana ya cunó nij so', qui'yáa so', gaa ne sa' inanj gaa nij so' rihaan so' á. Ne se-nana ma'an so' me nana ya yo' ei. <sup>18</sup> Dan me se ca'née 'unj man nij so' rihaan chumii nihánj, ndaa vaa ca'née so' man ma'anj rihaan chumii nihánj a. <sup>19</sup> Ne nihánj me se inanj qui'yaj sunj rihaan so' cavii 'unj che'é nij so', che'é rej cunuu sa' ya nij so' rihaan so' adonj.

<sup>20</sup> "Ne nuveé inanj che'é nij sí nihánj me achíin ni'yáa rihaan so' a ma'. Tananj achíin ni'yáa 'unj che'é nij sí cunó se-nana so' ne cuchuman rá ni'yaj manj vaa güii, qui'yaj nij sí nihánj sí nata' se-nana so' nanj adonj.

<sup>21</sup> Dan me se, né sɔ' gə 'unj, Ataj Chij, ne né 'unj gə sɔ' a. Ne 'o rcua'aan ní', ne dan me se achíin ni'yáá 'unj che'é taran' nij so' se vaa cuyaan gaa rá taran' nij so' uún, ne yo'o noco' nij so' man ní', ne che'é dan cuchuman rá nij síi man rihaan chumii nihánj se vaa ca'née sɔ' manj rihaan chumii nihánj a. <sup>22</sup> Ne ase vaa cavii sɔ' 'unj qui'yáá sɔ' ro', danj cavii sɔ' nij so', qui'yáj, che'é se me rá 'unj cuyaan gaa rá nij so' ndaa rá se vaa 'yaj ma'an ní' a. <sup>23</sup> Dan me se cayáán 'unj gə nij so' ndaa vaa yáán sɔ' gə 'unj, gaa ne quisij nij so' nari' nij so' nu' nana ya, ne ase vaa orún' yuvii ro', danj gaa nij so' a. Ndaa síj, gaa ne quene'en nij síi man rihaan chumii nihánj se vaa ca'née sɔ' manj ne 'ee rá sɔ' man nij síi rqué sɔ' manj ndaa vaa 'ee rá sɔ' manj adonj.

<sup>24</sup> "Ne xa' nij síi rqué sɔ' manj, tzaj ne me rá 'unj cayáán nij so' gə 'unj rej cayáán 'unj, Ataj. 'O se me rá 'unj quene'en nij so' se vaa cavii sɔ' 'unj qui'yáá sɔ' á. 'O se asij ataa qui'yáá sɔ' chumii nihánj me se aj 'ee rá sɔ' manj, ne cavii sɔ' 'unj, qui'yáá sɔ' ei. <sup>25</sup> Ataj Chij, sɔ' inanj 'yáá sɔ' ei. Tzaj ne ne ne'en nij síi man rihaan chumii nihánj mán sɔ' ma'. Tzaj ne 'unj me se quene'enj mán sɔ', ne quene'en nij síi nihánj se vaa ca'née sɔ' manj rihaan chumii nihánj a. <sup>26</sup> Ne cataj xna'anj 'unj rihaan nij so' daj sij mé sɔ', ne cataj 'unj doj rihaan nij so', che'é rej gaa 'ee rá sɔ' man nij so' ndaa vaa 'ee rá sɔ' manj, ne cayáán 'unj gə nij so' a —taj Jesucristó, cachíin ni'yaj so' rihaan Diose a.

#### Nana nihánj taj xna'anj daj guun gaa quita'aa nij tanuu man Jesucristó a

**18** Gaa quisij ca'mii Jesucristó nu' nana vaa danj, gaa ne cavii so' gə nij síi tucuyón se-nana so', ne ca'anj nij so' rej xcɔ chraá cu'naj Cedrón, ne cuchi' nij so' 'o naa chruun, ne catúj taran' nij so' a. <sup>2</sup> Ne síi cu'naj Judas síi tɔacuachén man Jesucristó rihaan nij síi taj ri'yunj man Jesucristó me se aj quene'en so' rej yo' a. 'O se aj guun que'ee ndo'o cunuu chre' Jesucristó rej yo' gə nij síi tucuyón se-nana so' a. <sup>3</sup> Dan me se nicaj Judas man nij tanuu dɔ', man nij se-mozó nij xrej atə suun nocɔo doj dɔ', man nij se-mozó nij síi fariseo dɔ', ca'anj so' rej yo' a. Ne nicaj nij so' aga' ya'an dɔ', ca' acaa dɔ', ne espadá dɔ', nicaj nij so' vaj nij so' rej yanj Jesucristó gə nij síi tucuyón se-nana so' a. <sup>4</sup> Dan me se quene'en Jesucristó nu' se vaa quiran' so', tzaj ne curihanj so', ne cataj so' rihaan nij so' a:

—Me síi nano' soj gə —taj so', xna'anj so' man nij so' a.

<sup>5</sup> Gaa ne cataj nij so' rihaan so' a:

—Nano' núj man Jesús síi cavii chuman' Nazaret a —taj nij so' rihaan Jesucristó a.

—'Unj me so' ei —taj Jesucristó rihaan nij so' a.

Dan me se canicun' síi cu'naj Judas gə nij so' 'na' so' gə nij so' a. <sup>6</sup> Dan me se gaa cataj Jesucristó se vaa ma'an so' me síi nano' nij so', gaa ne nu' naxuun nij so' man nij so', ne naxru' nij so' rihaan yo'óo a. <sup>7</sup> Gaa ne xna'anj uún Jesucristó man nij so', cataj so':

—Me síi nano' soj gə —taj uún Jesucristó a.

Gaa ne cataj uún nij so':

—Jesús síi cavii chuman' Nazaret a —taj uún nij so' a.

<sup>8</sup> Gaa ne cataj Jesucristó:

—Aj cataj xna'anj 'unj rihaan soj se vaa 'unj me so' ei. Sese 'unj me síi nano' soj, ne ca'ne' rá soj ca'anj nij síi nihánj á —taj Jesucristó rihaan nij so' a.

<sup>9</sup> Danj ca'mii so' rihaan nij tanuu che'é rej ca'vee quisij ya nu' nana ca'mii so' rihaan Diose se vaa ne ca'anj ni'ya á 'ó nij síi rqué Diose man so' a.

<sup>10</sup> Dan me se nicaj síi cu'naj Simón Pedró neê espadá, ne quirii so' taneê so', ne go' so' raə se-mozó xrej atə suun nocɔo doj, ne veé danj güéj nuj xréé so' rej nuva' so', qui'yaj Pedró a. Ne mozó yo' ro', cu'naj Malco a.

<sup>11</sup> Dan me se cataj Jesucristó rihaan Pedró a:

—Na'nej sɔ' sɔ' taneê sɔ' rque nuj á. Dan me se ase vaa 'o tazá nuu na vinó rqué Réj Diose manj co'oj ro', danj vaa sayuun nihánj rihanj, ne me che'é na'vej rá sɔ' co'oj man yo' gə —taj Jesucristó, xna'anj so' man Pedró a.

#### Nana nihánj taj xna'anj se vaa ca'anj nicaj nii man Jesucristó rihaan síi cu'naj Anás a

<sup>12</sup> Dan me se quita'aa nij tanuu dɔ', síi uun chij rihaan nij tanuu dɔ', nij se-mozó nij síi uun chij rihaan nij yuvii israelitá dɔ', man Jesucristó, ne numíj nij so' ra'a so', <sup>13</sup> ne asino yaan ca'anj nicaj nij so' man so' rihaan síi cu'naj Anás a. Dan me se síi cu'naj Anás yo' me se rej chej síi cu'naj Caifás me so', ne Caifás me síi guun xrej atə suun nocɔo doj yo' yo' a. <sup>14</sup> Ma'an síi cu'naj Caifás me síi narqué chrej rihaan nij síi uun chij rihaan nij yuvii israelitá se vaa vaa che'é cavii 'o snó'o che'é cunudanj nij yuvii israelitá yo' a.

#### Nana nihánj taj xna'anj se vaa cataj síi cu'naj Pedró se vaa nuveé sij noco' man Jesucristó me so' a

<sup>15</sup> Dan me se canoco' Simón Pedró dɔ', yo'ó síi tucuyón se-nana Jesucristó dɔ', rej xcɔ Jesucristó a. Ne yo'ó so' me se sij ne'en xrej atə suun nocɔo doj man me so', ne catúj so' gə Jesucristó ta'yaa tucua xrej atə suun nocɔo doj a. <sup>16</sup> Ne Pedró me se quináj so' xe' rej nichrun' ta'yaa a. Che'é dan curihanj yo'ó síi tucuyón se-nana Jesucristó yo', ne ca'mii so' gə chana tumé ta'yaa, ne catúj Pedró uún, qui'yaj so' a. <sup>17</sup> Dan me se xna'anj chana tumé ta'yaa man Pedró, cataj no':

—Ne nuvé sɔ' me síi tucuyón se-nana síi nihánj na' —taj no', xna'anj no' man Pedró a.

Ne cataj so':

—Taj ma' —taj Pedró yo' a.

<sup>18</sup> Ne nicun' nij mozó dɔ', nij tanuu dɔ', rej nachráj nii ya'an a. 'O se acoj tiha' rej man nij so', ne cunuu guun nij so' ya'an a. Ne ca'anj Pedró uún cunuu guun ma'an so' ya'an a.

#### Nana nihánj taj xna'anj daj ca'mii Jesucristó rihaan síi cu'naj Anás a

<sup>19</sup> Dan me se síi cu'naj Anás síi cayáán xrej atə suun nocɔo doj asij rque doj ro', xna'anj so' man Jesucristó che'é nij síi tucuyón se-nana Jesucristó dɔ', che'é



ma'an nana tucu'yón Jesucristó man nij so' dɔ' a.

<sup>20</sup> Gaa ne cataj Jesucristó rihaan nij so' a:

—'Unj ro', ca'mii ranga' rihaan cunudanj nij yuvij a. Nu' güii tucu'yón 'unj se-nanaj rá ve' tucu'yón ní se-tucuanj Moisés dɔ', rá nuvií nocɔo dɔ', ne yo' me rej nuu chre' taran' soj sij uun chij rihaan nij yuvij israelitá a. Ne taj vaj nana ne ca'mii yuve 'unj ma'. <sup>21</sup> Me che'é xná'anj soj manj ga. Xna'anj soj man nij yuvij cuno nana ca'mij á. Veé nij so' ne'en ya daj ca'mii 'unj nanj ei —taj Jesucristó rihaan sí cu'naj Anás yo' a.

<sup>22</sup> Quisij ca'mii Jesucristó danj, gaa ne coxro yo'q mozó nicun' rej yo' xruy Jesucristó, ne cataj so':

—Me che'é ca'mii so' danj rihaan xrej atá suun nocɔo doj —taj so', guun yuvaa so' man Jesucristó a.

<sup>23</sup> Gaa ne cataj Jesucristó rihaan so' a:

—Sese ca'mii chi'ij 'unj, ne cataj so' me nana chi'ij ca'mij á. Tzaj ne sese ca'mii sa' 'unj, ne me che'é coxro so' manj ga —taj Jesucristó rihaan mozó coxro man so' a.

<sup>24</sup> Veé yo', gaa ne ca'neé sí cu'naj Anás man Jesucristó rihaan sí cu'naj Caifás sí cayáan xrej atá suun nocɔo doj, ne veé 'o danj numii so' ca'anj so' a.

#### Nana nihánj taj xna'anj se vaa yavij cataj Pedró se vaa nuveé sij nocɔo man Jesucristó me so' ma'

<sup>25</sup> Dan me se nicun' Simón Pedró cunuu guun so' ya'an a. Gaa ne cataj 'o yuvij rihaan so':

—Nuveé yo'q sí nocɔo man so' mé so' na' —taj yuvij, xná'anj yuvij man so' a.

Ne cataj Pedró:

—Taj ma' —taj so' a.

<sup>26</sup> Gaa ne xná'anj yo'q se-mozó xrej atá suun nocɔo doj man so', ne tuvi' sí güéj xréé qui'yaj Pedró me so', ne cataj so':

—Nuveé so' me sí vaj ga Jesucristó rque naa chruun quene'enj na' —taj so', xná'anj so' man Pedró a.

<sup>27</sup> Gaa ne cataj uún Pedró se vaa nuveé tuvi' Jesucristó me so' a. Ne nu' ca'mii so' danj, gaa ne nu' caguáj to'loo a.

#### Nana nihánj taj xna'anj che'é nana ca'mii Jesucristó ga sí cu'naj Pilato a

<sup>28</sup> Dan me se nicaj nij mozó dɔ', nij tanuu dɔ', man Jesucristó curihanj nij so' rej ne sí cu'naj Caifás, ne ca'anj nij so' tucua suun a. Na'yaan uxrá me yo' a. Ne ne catuu nij sí israelitá rá tucua suun a ma'. 'O se me rá nij so' cha'anj pascuá, ne che'é dan ne ca'vej rá nij so' guun chi'ij nij so' rihaan Diosé qui'yaj tucua suun yo' a. <sup>29</sup> Che'é dan curihanj ma'an sí cu'naj Pilato rej nicun' nij so' a. Ne xná'anj sí cu'naj Pilato man nij so', cataj so':

—Me cacun' cuta' soj xráá snó'o nihánj, rá soj ga —taj so' rihaan nij yuvij ca'na' ga Jesucristó a.

<sup>30</sup> Gaa ne cataj nij so' rihaan sí cu'naj Pilato a:

—Sese nuveé sij 'yaj chi'ij me sí nihánj, ne ne tajuachén núj man so' ndaa rihaan so' tzaj ma' —taj nij yuvij rihaan sí cu'naj Pilato a.

<sup>31</sup> Che'é dan cataj sí cu'naj Pilato rihaan nij so' a:

—Nica' soj man so', ne ca'ne' soj cacun' che'é so', qui'yaj soj ndaa vaa tucuaán nocɔo ma'an soj á —taj sí cu'naj Pilato rihaan nij so' a.

—Tzaj ne no xcúun so' cavi' so', rá núj, tzaj ne na'vej rá soj sij cavii chuman' Romá ticavi' núj man a 'ó yuvij a ma' —taj nij so' rihaan Pilato a.

<sup>32</sup> Che'é se ca'mii nij so' danj ro', che'é dan quisij ya nu' se-nana Jesucristó nana a'mii che'é daj qui'yaj nii man so' ticavi' nii man so' a. 'O se orún' nij yuvij man chuman' Romá cachrón rihaan rcutzé man yuvij tumé cacun' a.

<sup>33</sup> Dan me se catúj uún sí cu'naj Pilato tucua suun, ne canacúun so' ca'na' Jesucristó, ne xná'anj so' man Jesucristó, cataj so':

—Ma'an so' me sí nicaj suun rey uun chij rihaan nij yuvij israelitá na' —taj sí cu'naj Pilato rihaan Jesucristó a.

<sup>34</sup> Gaa ne xná'anj Jesucristó man so', cataj Jesucristó:

—Ma'an so' cavii raá nana vaa danj ca'mii so' na'.

Ase yo'ó yuvij cataj xna'anj rihaan so' che'ej xa' —taj Jesucristó, xná'anj so' man sí cu'naj Pilato a.

<sup>35</sup> Gaa ne xná'anj sí cu'naj Pilato man so', cataj so':

—Sij israelitá mé 'unj, rá so' na'. Ne'én 'unj se-tucuanj soj, rá so' na'. 'O se nij tuvi' so' dɔ', ma'an nij xrej atá suun nocɔo doj dɔ', tacuachén man so' rihanj á. Me cacun' tumé so' ga —taj sí cu'naj Pilato, xná'anj so' man Jesucristó a.

<sup>36</sup> Gaa ne cataj Jesucristó:

—'O se nuveé rihāan chumii nihánj me rej uun chij 'unj ma'. Sese rihaan chumii nihánj me rej uun chij 'unj, ne gaa tanuu 'yaj suun rihanj, ne cavii nij tanuu, cunu' nij tanuu, che'é rej se cata'aa nij sí uun chij rihaan nij yuvij israelitá manj tzaj adonj. Tzaj ne nuveé rihāan chumii nihánj me rej guun chij 'unj ma' —taj Jesucristó a.

<sup>37</sup> Gaa ne xná'anj sí cu'naj Pilato man so', cataj so':

—Che'é dan sí nicaj suun rey mé so' na'. Ya na' —taj Pilato, xná'anj so' man Jesucristó a.

Gaa ne cataj Jesucristó rihaan so' a:

—Ya uxrá vaa nana ca'mii ma'an so' se vaa sij nicaj suun rey mej á. Ne nihánj me cataj xna'anj 'unj rihaan so' me che'é ca'ngaa 'unj ne me che'é ca'ná' 'unj rihaan chumii nihánj ei. Dan me se ca'ná' 'unj cataj xna'anj 'unj nana ya rihaan yuvij a. Ne cunudanj nij sí ya ro', uno nana ya a'mij adonj —taj Jesucristó rihaan Pilato a.

<sup>38</sup> Ne cataj Pilato rihaan so':

—A me nana cu'naj nana ya ga —taj Pilato, xná'anj Pilato man Jesucristó a.

#### Nana nihánj taj xna'anj daj qui'yaj sí cu'naj Pilato gaa ca'ne' so' cacun' che'é Jesucristó a

Ne gaa quisij ca'mii sí cu'naj Pilato nana vaa danj ga Jesucristó, ne curihanj uún so' rej nicun' nij sí uun chij rihaan nij yuvij israelitá, ne cataj so' rihaan nij so' a:

—Taj vaj a doj cacun' tumé so' narí 'unj a ma'. <sup>39</sup> Tzaj ne vaa yo'q tucuaán nocɔo ní se vaa rii 'unj 'o tuvi' soj

sí 'nij taga' 'o 'o cha'anj pascuá a. Ne me rá soj quirij 'unj man ma'an sí nihánj sí nicaj suun rey uun chij rihaan soj sij israelitá na' —taj sí cu'naj Pilato, xná'anj so' man nij yuvij a.

<sup>40</sup> Che'é dan caguáj uún nij yuvij, cataj nij so':

—Se quirii so' man sí nihánj a ma'. Tananij sí cu'naj Barrabás quirij so' ei —taj nij yuvij, caguáj nij yuvij a.

Ne sí cu'naj Barrabás me se sij guun rá cunú' gá go-biernó me so' a.

**19** Dan me se nicaj sí cu'naj Pilato man Jesucristó, ne go' nij tanuu cuartá xráá so', qui'yaj Pilato yo' a. <sup>2</sup> Ne qui'yaj nij tanuu cachriin tanj, ne cuta' nij so' raá Jesucristó, ne na'néé nij so' yatzij tintá sa' ndo'o man Jesucristó a. <sup>3</sup> Gaa ne cuchi' ndo'o nij so' rihaan Jesucristó, ne cataj nij so':

—Veé sí nicaj suun rey uun chij rihaan nij yuvij israelitá mé so' á —taj nij so', ca'mii tico nij so', ne coxro nij so' xruu Jesucristó a.

<sup>4</sup> Gaa ne curihanj uún sí cu'naj Pilato xe', ne cataj so' rihaan nij yuvij a:

—Ni'yaj soj ei. Curihanj uún so' rihaan soj, qui'yáj, che'é rej xcáj soj cuentá se vaa taj vaj cacun' tumé so' narí' 'unj a man chuguanj —taj Pilato rihaan nij yuvij a.

<sup>5</sup> Gaa ne curihanj Jesucristó xe', ne 'nij raá so' cachriin tanj, ne nuu so' yatzij tintá sa' yo' a. Ne cataj Pilato rihaan nij yuvij a:

—Ni'yaj soj man snó'o nihánj vij —taj Pilato rihaan nij yuvij a.

<sup>6</sup> Dan me se gaa quene'en nij xrej atá suun nocgo doj do', nij se-mozó nij so' do', man Jesucristó, ne caguáj nij so', cataj nij so':

—Cavi' so' rihaan rcutze, qui'yáá so' ei —taj nij so', caguáj nij so' a.

Gaa ne cataj Pilato rihaan nij so' a:

—Nijcaj ma'an soj man so' cachron soj man so' rihaan rcutze, sese me rá soj ei. Xa' 'unj, tzaj ne taj vaj a doj cacun' tumé so' narí' 'unj a ma' —taj Pilato rihaan nij so' a.

<sup>7</sup> Gaa ne cataj nij sí uun chij rihaan nij yuvij israelitá no sí cu'naj Pilato:

—Vaa tucuáán nocgo' núj, ne tucuáán nocgo' núj taj se vaa no xcúún so' cavi' so', che'é rej cataj so' se vaa ta'nij Dioso me so' adonj —taj nij so' rihaan Pilato a.

<sup>8</sup> Dan me se gaa cuno sí cu'naj Pilato nana vaa danj, gaa ne doj a kuchu'vi' so', <sup>9</sup> gaa ne catúj uún so' tucuá suun, ne xná'anj so' man Jesucristó, cataj so':

—Me rej cavii so' gá —taj so', xná'anj so' man Jesucristó a.

Tzaj ne ne ca'mij Jesucristó a 'ó nana rihaan so' a.

<sup>10</sup> Che'é dan cataj Pilato rihaan so' a:

—Me che'é ne a'mii so' gá. Ne ne'én so' sese 'unj ro', me sí no xcúún quirij mán so' taga', ne vej nó xcúún qui'yaj cachron nij tanuu mán so' rihaan rcutze á. Me che'é ne acáj so' cuentá gá —taj Pilato, xná'anj so' man Jesucristó a.

<sup>11</sup> Gaa ne cataj Jesucristó rihaan so' a:

—Sese nuveé Dioso me sí cune' mán so' catá so' suun nihánj, ne ne guun nucuáá so' qui'yáá so' a doj ra-

suun asuun tzaj ma'. Che'é dan sí tacuachén manj rihaan so' me sí tumé doj cacun' rihaan so' adonj —taj Jesucristó rihaan Pilato yo' a.

<sup>12</sup> Quisij cuno Pilato nana dan, gaa ne nano' so' daj qui'yaj so', gaa ne ca'vee tinanii so' man Jesucristó a. Tzaj ne doj a caguáj nij sí uun chij rihaan nij yuvij israelitá, cataj nij so':

—Sese ca'anj uun sí nihánj, qui'yáá so', ne nuveé tuvi' sí nicaj suun cu'naj César mé so' ma'. 'O se sí nihánj me se sij me rá guun sí nicaj suun rey me so', ne dan me se ca'neé so' suun man sí cu'naj César, rá so', ne sij taj ri'yun man sí cu'naj César me so' adonj —taj nij so', caguáj nij so' a.

<sup>13</sup> Dan me se gaa cuno Pilato nana vaa danj, gaa ne ca'anj nicaj so' man Jesucristó xe', ne ca'anj cayáán so' rihaan xrúún so' chruun xlá rej ca'ne' so' cacun' che'é yuvij a. Ne rej ne chruun xlá yo' ro', me rej cu'naj Litós-tratos xna'ánj griego, ne Gabata cu'naj rej yo' xna'ánj hebreo a. <sup>14</sup> Dan me se güii 'yaj chuvij nii che'é cha'anj pascuá me yo', ne rej caxuj me yo' a. Ne cataj Pilato rihaan nij sí uun chij rihaan nij yuvij israelitá a:

—Ni'yaj soj ei. Nihánj me sí nicaj suun rey uun chij rihaan soj chuguanj —taj so' rihaan nij yuvij a.

<sup>15</sup> Gaa ne caguáj nij yuvij, cataj nij so':

—Nijcaj so' man so', ne ca'anj tanuu cachron nij tanuu man so' rihaan rcutze, qui'yáá so' cuaj ei —taj nij so' rihaan Pilato a.

Ne xná'anj Pilato man nij so', cataj so':

—Ma'an sí nicaj suun rey uun chij rihaan soj cachronj rihaan rcutze, rá soj a na' —taj so', xná'anj so' man nij so' a.

—Taj vaj 'ó rey ma'. Orún' sí cu'naj César me sí uun chij rihaan núj ei —taj nij xrej atá suun nocgo doj a.

<sup>16</sup> Gaa ne tacuachén Pilato man Jesucristó rihaan nij so' cachron nij so' man so' rihaan rcutze a.

### Nana nihánj taj xna'anj daj guun gaa cachron nij tanuu man Jesucristó rihaan rcutze a

Dan me se ca'anj nicaj nij so' man Jesucristó, <sup>17</sup> ne ma'an so' catá rcutze, ne cavii so' ca'anj so' rej cu'naj tacaan cúu yave, ne rej yo' ro', cu'naj Gólgota xna'ánj hebreo a. <sup>18</sup> Ne gaa cuchi' nij so' rej yo', gaa ne cachron nij tanuu man so' rihaan rcutze, ne yavij roj so' cachron uún nij tanuu rihaan yavij rcutze uún, ne yo'o so' ro', nicun' rej nuva' Jesucristó, ne yo'ó so' ro', nicun' rej nichruun Jesucristó, ne tanuu nicun' ma'an Jesucristó a. <sup>19</sup> Ne ca'ne' sí cu'naj Pilato suun, se vaa cano letrá rihaan 'o rcuchra', ne cano rcuchra' yo' raá rcutze, ne letrá yo' taj xna'anj me che'é cavi' Jesucristó a. Ne nihánj me se taj letrá no rihaan rcuchra' yo', se vaa "Sí nihánj me Jesucristó sí cavii chuman' Nazaret, ne sí nicaj suun rey me so', uun chij so' rihaan nij yuvij israelitá", taj letrá yo' a. <sup>20</sup> Dan me se nayaa que'ee nij sí israelitá nana yo' a. 'O se nichrun' naj rej cachron nii man Jesucristó rihaan rcutze gá ma'an chuman' Jerusalén yo' a. Ne cachron nii nana yo' xna'ánj hebreo do', xna'ánj latín do', xna'ánj griego do' a.

<sup>21</sup> Che'é dan nij xrej atá suun nocgo doj che'é nij yuvij israelitá ro', cataj nij ro' rihaan síí cu'naj Pilato a:

—Se guun cano letrá se vaa síí nicaj suun rey uun chij rihaan núj sij israelitá me so' ma'. Maan se cataj letrá se vaa ma'an so' cataj se vaa síí nicaj suun rey uun chij rihaan nij yuvij israelitá me so' á —taj nij so' rihaan síí cu'naj Pilato a.

<sup>22</sup> —Aj quisij cachron 'unj nana cachronj nanj á —taj Pilato rihaan nij so' a.

<sup>23</sup> Dan me se gaa quisij cachron nij tanuu man Jesucristó rihaan rcutzé, ne nicaj nij so' sagan' Jesucristó, ne cuxra' ta'aj nij so' sagan' Jesucristó, ne nicaj 'o 'o tanuu ta'aj sagan' Jesucristó yo' a. Ne vaa se-cotoó Jesucristó uún a. Ne xa' se-cotoó so', tzaj ne taj rej nuva nii se-cotoó so' ma'. Maan se orún' yatzij me yo' gaa canánj nii man yo' a. <sup>24</sup> Che'é dan cataj nij tanuu rihaan tuvi' nij so' a:

—Se cuxra' ta'aj ní' man cotoó nihánj ma'. Maan se tico tixaj ní' se-suerté ní' che'é nihánj, ne quene'en ní' me síí nacaj man cotoó yo' ei —taj nij so' a.

Danj qui'yaj nij so', ne quisij ya nu' nana nihánj nana no rihaan danj Diose a: “Cuxra' ta'aj nii sagan' 'unj, ne tico tixaj nii che'é se-cotoó 'unj a”, taj danj Diose a. Dan me se nij tanuu me nij síí qui'yaj danj adonj.

<sup>25</sup> Ne nichrun' nicun' nii Jesucristó do', chu'vij nii so' do', chana cu'naj Mariá nicá síí cu'naj Cleofas do', chana cu'naj Mariá Magdalena do', rihaan rcutzé no Jesucristó a. <sup>26</sup> Dan me se quene'en Jesucristó man nii so' do', man síí tucu'yón se-nana so' síí 'e'e rá so' man do', se vaa nicun' rcua'aan roj so' rihaan so', ne cataj so' rihaan nii so':

—Síí nihánj guun ta'níí so', nahiin —taj Jesucristó no nii so' a.

<sup>27</sup> Gaa ne cataj so' rihaan síí tucu'yón se-nana so' yo' a:

—Chana nihánj guun níí so' á —taj so' rihaan síí tucu'yón se-nana so' yo' a.

Ne maan orá dan guun nij síí tucu'yón se-nana Jesucristó yo' man nii Jesucristó, ne ca'anj nicaj so' man no' ve' tucua' ma'an so' a.

### Nana nihánj taj xna'anj daj guun gaa cavi' Jesucristó a

<sup>28</sup> Quisij qui'yaj nij so' danj, gaa ne quene'en Jesucristó se vaa aj quisij ya nu' se vaa taj danj Diose che'é so' a. Che'é dan cataj so':

—Nacoó 'unj na nanj á —taj so' a.

<sup>29</sup> Yanj 'o xruj nuu na vinó yuu rihaan yo'óo, ne nicaj nij so' 'o yataaen esponja, ne tucua'anj nij so' yataaen rque na vinó yuu yo', ne cuta' nij so' raá 'o coj hisopo, ne cachron nij so' yataaen yo' tu'va Jesucristó a. <sup>30</sup> Ne gaa quisij co'o Jesucristó na vinó yuu nuu rque yataaen yo', ne cataj so':

—Veé danj navij suun, qui'yaj a —taj so', ne ni'naa raá so', ne ca'ne' rá so', ne cavi' so' a.

### Nana nihánj taj xna'anj se vaa cho'oj 'o tanuu chruun lanzá x'núú Jesucristó a

<sup>31</sup> Dan me se güii 'yaj chuvij nij síí israelitá cha nij so' cha'anj pascuá me yo', ne güii guee ndo'o me cuetan' a'yuj, 'yaj nij yuvij israelitá, ne ne ca'vej rá nij yuvij yo' canoco' xnganá rihaan rcutzé güii guee yo' a. Che'é dan me cachín ni'yaj nij síí uun chij rihaan nij yuvij israelitá rihaan síí cu'naj Pilato se vaa ca'ne' so' suun tucuchran' nii tacóo nij síí nocgo' rihaan rcutzé yo' che'é rej ra'yanj doj cavi' nij so', gaa ne quirij yanij nii man nij síí cavi' yo' a. <sup>32</sup> Qui'yaj Pilato ndaa vaa cachín ni'yaj nij so' rihaan so', ne ca'anj nij tanuu, ne asino tucuchran' nij tanuu tacóo yo' síí nocgo' rej x'núj Jesucristó, gaa ne tucuchran' uún nij tanuu tacóo síí nocgo' níchrej x'núú Jesucristó uún a. <sup>33</sup> Tzaj ne gaa cuchi' nij so' rej nocgo' ma'an Jesucristó, gaa ne xcaj nij so' cuentá se vaa aj cavi' so', ne che'é dan ne tucuchran' nij so' tacóo so' ma'. <sup>34</sup> Tzaj ne yo' tuvi' nij tanuu nicaj xrúún so' chruun taj aga' sihāā raā, ne cho'oj so' x'núú Jesucristó, ne nu' qui'yaj so' danj, ne nu' cavii ndo'o ton do', na do', rej catúj aga' sihāā yo' a.

<sup>35</sup> Ne síí taj xna'anj nana nihánj me se sij quene'en nu' se vaa guun me so', ne ya vaa se-nana so', ne ne'en so' se vaa ya a'mii so', ne taj xna'anj so' nu' nana nihánj che'é rej cuchuman rá soj sij nayaā nana nihánj ni'yaj soj Jesucristó a.

<sup>36</sup> 'O se guun nu' nihánj che'é rej quisij ya nu' nana nihánj nana no rihaan danj Diose, se vaa taj yo': “Se cachran' a 'ó cúú man so' ma”, taj nana no rihaan danj Diose a. <sup>37</sup> Ne yo'ó nana ro', taj: “Ni'yaj nij so' man síí cho'oj ma'an nij so' aga' man a”, taj yo'ó nana no uún rihaan danj Diose a.

### Nana nihánj taj xna'anj daj guun gaa cachin' nii man Jesucristó rque yu'uj yuvej a

<sup>38</sup> Quisij qui'yaj nij tanuu danj, gaa ne cachín ni'yaj síí cu'naj José síí cavii chuman' Arimatea rihaan síí cu'naj Pilato se vaa ca'vej rá síí cu'naj Pilato quirij yanij so' man Jesucristó a. Ne xa' síí cu'naj José yo', tzaj ne sij tucu'yón se-nana Jesucristó me so', tzaj ne maan se nocgo' yuve so' man Jesucristó, che'é se cuchu'vi' so' ni'yaj so' man nij síí uun chij rihaan nij yuvij israelitá a. Dan me se ca'vej rá síí cu'naj Pilato, ne che'é dan quirij yanij síí cu'naj José man Jesucristó a. <sup>39</sup> Ne vaa síí cu'naj Nicodemo uún, ne sij cuchi' rihaan Jesucristó rej nij asij rque doj me so', ne ca'anj so' gá síí cu'naj José yo', ne cata so' icō chí' kiló taj doj squíí cu'naj mirra nachej gá se cu'naj áloe a. <sup>40</sup> Dan me se tananij roj so' man Jesucristó, ne nucutáj roj so' mantá sa' man nu' nee man Jesucristó, ne caraa roj so' mirra do', áloe do', rque mantá yo' a. Dan me se tucuaán nocgo' nij yuvij israelitá gaa achin' nij so' man nij síí cavi' qui'yaj roj so' a.

<sup>41</sup> Dan me se nichrun' rej cachron nii man Jesucristó rihaan rcutzé ro', naj 'o naā chruun, ne rque naā yo' ro', táá yu'uj rque yuvej rej achin' nii xnganá a. Tzaj ne yu'uj naca me yo', ne a 'ó xnganá ne cachin' nii rque

yu'uj yo' ma'. <sup>42</sup> Dan me se güii 'yaj chuvij nij sí israelitá chá nij so' cha'anj pascuá me yo', ne nichrun' naj rej taj yu'uj yo' gá rej nicun' rcutze yo', ne che'é dan cachin' roj so' man Jesucristó rque yu'uj yo' a.

**Nana nihánj taj xna'anj daj guun gaa quisij cunuu i'na' uún Jesucristó a**

**20** Dan me se taxrej cotungó vaa rmi' doj, ne ca'anj chana cu'naj Mariá Magdalena rej taj yu'uj rque yuvej yo', ne quene'en no' se vaa taj yanij yuvej aráan rihaan yu'uj yo' a. <sup>2</sup> Che'é dan cunanj no', ne cuchi' no' rihaan sí cu'naj Simón Pedró do', rihaan yo'ó sí tucu'yón se-nana Jesucristó sí 'e'e rá Jesucristó man do' a. Ne cataj no' rihaan roj so':

—Quirii nii man sí 'nij ra'a man ní' rque yu'uj nanj á. Ne ne me rej ca'anj nicaj nii man so' a ma' —taj no' rihaan roj so' a.

<sup>3</sup> Che'é dan cavii sí cu'naj Pedró gá yo'ó sí tucu'yón se-nana Jesucristó yo', ne ca'anj roj so' rej taj yu'uj yo', <sup>4</sup> ne cunanj roj so', ne ra'yanj doj cunanj yo'ó so' rihaan sí cu'naj Pedró, ne so' me sí cuchi' asino yaan doj tu'va yu'uj yo' a. <sup>5</sup> Gaa ne ni'yaj so' rque yu'uj yo', ne quene'en so' rej naj nij yatzij, tzaj ne ne catuy so' ma'. <sup>6</sup> Dan me se cuchi' sí cu'naj Pedró sí noco' xcó so', gaa ne catuj ma'an Pedró rque yu'uj yo', ne quene'en so' rej naj nij yatzij, <sup>7</sup> ne quene'en so' vitó aráan raá Jesucristó, tzaj ne nuvi' yo' naj rcua'aaan gá yo'ó nij yatzij a ma'. Tananj rej yanij quinaj orún' yo', ne naculu' yo' a. <sup>8</sup> Dan me se catuj uún yo'ó sí tucu'yón se-nana Jesucristó sí cuchi' asino yaan, ne quene'en so' nij yatzij yo', gaa ne cuchumán rá so' se-nana chana cu'naj Mariá Magdalena yo' a. <sup>9</sup> 'Q se ataa nari' roj so' nana no' rihaan danj Diose se vaa cavij Jesucristó gaa ne cunuu i'na' uún so' a. <sup>10</sup> Dan me se cavii uún roj sí tucu'yón se-nana Jesucristó yo', quinán' roj so' a.

**Nana nihánj taj xna'anj se vaa quene'en chana cu'naj Mariá Magdalena man Jesucristó a**

<sup>11</sup> Ne canicun' chana cu'naj Mariá nichrun' tu'va yu'uj yo', ne ta'vee ndo'o no' a. <sup>12</sup> Ne quene'en no' vij se-mozó Diose nuu yatzij catzij, ne ne roj so' rej cachin' nii man Jesucristó a. Yo'ó so' ne rej raá Jesucristó, ne yo'ó so' ne rej tacoj Jesucristó a. <sup>13</sup> Gaa ne xna'anj roj so' man chana cu'naj Mariá, cataj roj so':

—Me che'é ta'vee so', gá man nocoj —taj roj so' no' a.

—Ta'vee 'unj che'é se quirii nii man cúu man sí 'nij ra'a manj, ne ne me rej ca'anj nicaj nii man so' a ma' —taj no' rihaan roj so' a.

<sup>14</sup> Síj ca'mii no' danj, gaa ne canicaj no' rej xcó no', ne quene'en no' man Jesucristó, nicun' so' rihaan no' a. Tzaj ne ne cunuu yaan no' man Jesucristó a. <sup>15</sup> Gaa ne xna'anj Jesucristó man no', cataj so':

—Me che'é ta'vee so', gá man nocoj. Me sí nanó' so' gá —taj Jesucristó no' a.

Dan me se guun rá no' se vaa sij tumé naa naj yo' me sí ca'mii gá no', rá no', ne che'é dan cataj no':

—Sese quirii yanij so' man so', ne cataj xna'anj so' rihaan me rej ca'anj nicaj so' man so', ne nicaj 'unj man so' ca'anj 'unj á —taj no' rihaan sí nicun' rihaan no' a.

<sup>16</sup> Gaa ne cataj Jesucristó:

—Mariá —taj so' a.

Canicaj no', cataj no':

—Raboni —taj no' rihaan so' xna'ánj hebreo, ne dan me se "maestró" me se taj nana ca'mii no' rihaan so' a.

<sup>17</sup> Gaa ne cataj Jesucristó rihaan no' a:

—Ca'ne' rá so', se catzif so' doj manj ma'. 'Q se ataa cavii uún 'unj quinán' 'unj rihaan Réj Diose, ne me rá 'unj ca'anj so' rihaan nij tinúu 'unj ne cataj xna'anj so' rihaan nij so' se vaa cavii 'unj quinán' 'unj rihaan Réj, ne so' me se Rej soj me uún so', ne Diose sí noco' 'unj me so', ne Diose sí noco' soj me uún so' adonj —taj Jesucristó rihaan chana cu'naj Mariá a.

<sup>18</sup> Dan me se ca'anj chana cu'naj Mariá Magdalena, ne nata' no' rihaan nij sí tucu'yón se-nana Jesucristó se vaa quene'en no' man sí 'nij ra'a man ní', ne nata' no' nij nana cataj Jesucristó rihaan no' a.

**Nana nihánj taj xna'anj daj guun gaa cuchi' Jesucristó rihaan nij sí tucu'yón se-nana so' a**

<sup>19</sup> Dan me se rej ti'nuu ma'an güii cotungó yo' me se caráan nij sí tucu'yón se-nana Jesucristó ta'yaa rihaan ve' man nij so', che'é se cuchuvi' nij so' ni'yaj nij so' nij sí uun chij rihaan nij yuvij israelitá a. Gaa ne ca'na' Jesucristó, ne canicun' so' tanuu rej man nij so', ne cataj so':

—Gaa dínj nimán soj ei —taj Jesucristó rihaan nij so' a.

<sup>20</sup> Quisij ca'mii so' danj, gaa ne tihaan so' ra'a so' tihaan so' x'núu so' tihaan so' rihaan nij so' a. Gaa quene'en nij so' nu' yo', gaa ne guun niha' uxrá rá nij sí tucu'yón se-nana so' ni'yaj nij so' man sí 'nij ra'a man ní' a.

<sup>21</sup> Dan me se yuún ca'mii Jesucristó rihaan nij so', cataj so':

—Gaa dínj nimán soj ei. Ase vaa ca'née Réj manj ro', danj gaa ca'nej 'unj man soj nu' rihaan chumij nihánj adonj —taj Jesucristó rihaan nij so' a.

<sup>22</sup> Quisij ca'mii Jesucristó danj, gaa ne ca'yánj Jesucristó rihaan nij so', ne cataj so':

—Nıcaj soj Nimán Diose nihánj á. <sup>23</sup> Ne sese cataj soj se vaa navij cacun' tumé me ma'an yuvij, ne quinavij nu' cacun' tumé so' a. Ne sese cataj soj se vaa se quinavij cacun' tumé me ma'an yuvij, ne veé danj gaa quitaj nu' cacun' tumé so' xraá so' nu' cavii nu' ca'anj uún a —taj Jesucristó rihaan nij sí tucu'yón se-nana so' a.

**Nana nihánj taj xna'anj daj guun gaa quene'en sí cu'naj Tomás man Jesucristó a**

<sup>24</sup> Dan me se yo'ó tuvi' chuvij nij sí tucu'yón se-nana Jesucristó me sí cu'naj Tomás, ne yo'ó se-chuvij so' me

Dídimo a. Ne nuvi' so' ne ga yo'ó nij so' gaa cuchi' Jesucristó rihaan yo'ó nij so' ma'. <sup>25</sup> Che'é dan cataj xna'anj yo'ó nij sí tucu'yón se-nana Jesucristó rihaan Tomás se vaa quene'en nij so' man sí 'nij ra'a man ní a. Tzaj ne cataj Tomás rihaan nij so' a:

—Sese se quene'en ma'anj rej catúj caquí ra'a so', ne sese se cutaj ra'aj rej catúj caquí ra'a so' do', sese se cutaj ra'aj rej quiran' chi'ij x'núu so' do', ne daj chihaa mįj se cuchumán raj se vaa cunuu i'na' uún so' ma' —taj sí cu'naj Tomás rihaan nij so' a.

<sup>26</sup> Dan me se cachén tunj güii, ne mán uún nij sí tucu'yón se-nana Jesucristó, ne ne sí cu'naj Tomás ga nij so', ne dan me se raan nij ta'yaa, tzaj ne taj ni'yón, ne naruvi' Jesucristó tanuu yan man nij so' a. Ne cataj so':

—Gaa dínj nimán soj ei —taj so' rihaan nij so' a.

<sup>27</sup> Gaa ne cataj so' rihaan sí cu'naj Tomás a:

—Tucua'anj so' ra'á so' nihánj, gaa ne xcaj so' cuentá daj vaa ra'aj, ne cuta' so' ra'á so' x'núu 'unj nihánj rej catúj chruun lanzá, gaa ne guun ya ya rá so' se vaa cunuu i'na' uún 'unj á. Cuchuman rá so', ni'yaj so' manj á —taj so' rihaan sí cu'naj Tomás a.

<sup>28</sup> Gaa ne cataj sí cu'naj Tomás rihaan so' a:

—So' me sí 'nij ra'a manj, ne so' me Diöse sí nocoj adonj —taj so' rihaan Jesucristó a.

<sup>29</sup> Gaa ne cataj Jesucristó rihaan so' a:

—Uun daj quene'en yá so' manj, gaa ne amán rá so' ni'yaj so' manj nanj á. Tzaj ne vaa che'é guun nihá' rá nij sí ne quene'en manj ne amán rá ni'yaj manj ei. 'Q se cavij sa' ya nij so' adonj —taj Jesucristó rihaan sí cu'naj Tomás a.

### Nana nihánj taj xna'anj me che'é cachrón sí cu'naj Juan yanj nihánj a

<sup>30</sup> Dan me se vaa uxrá yo'ó nij suun sa' nocoo qui'yaj suun Jesucristó quene'en nij sí tucu'yón se-nana so', tzaj ne taj vaj nana che'é yo'ó nij suun sa' nocoo yo' no' rihaan yanj nihánj, <sup>31</sup> tzaj ne no nana nihánj rihaan yanj nihánj che'é rej yo'ó cuchuman rá soj sij nayaa nana nihánj se vaa Jesucristó ro', me sí ca'née Diöse tinanii man yuvij rihaan sayuun, ne ta'nij Diöse me ya uún so' ei. Ne che'é se amán rá soj ni'yaj soj man so' ro', che'é dan gaa i'na' nimán soj rihaan Diöse nu' cavii nu' ca'anj che'é ma'an Jesucristó chuguaj.

### Nana nihánj taj xna'anj se vaa nari' tuvi' uún Jesucristó ga chij nij sí tucu'yón se-nana so' a

**21** Cachén doj, gaa ne cuchi' uún Jesucristó rihaan nij sí tucu'yón se-nana so' rej nuu na lacuaná cu'naj Tiberias a. Ne nihánj me se vaa qui'yaj so' a. <sup>2</sup> Aj cunuu chre' sí cu'naj Simón Pedró do', sí cu'naj Tomás Dídimo do', Natanael sí cavii chuman' Caná chuman' naj estadó Galilea do', roj ta'ní sí cu'naj Zebedeo do', yavij sí tucu'yón se-nana Jesucristó do' a. <sup>3</sup> Gaa ne cataj Simón Pedró rihaan yo'ó nij so' a:

—Ca'anj 'unj tiguíj 'unj nanj rque na quirij xcuaj, raj chuguaj —taj so' rihaan nij so' a.

—Ca'anj ní chihá' —taj yo'ó nij so' rihaan Simón Pedró a.

Gaa ne cavii nij so' catúj nij so' rque rihoo chée rihaan na, ne nigan' qui'yaj suun nij so', tzaj ne a 'ó xcuaj ne quirí' nij so' a ma'.

<sup>4</sup> Dan me se taxrej yo'ó güii me se nicun' Jesucristó tu'va na lacuaná yo' a. Tzaj ne ne quene'en nij sí tucu'yón se-nana so' se vaa ma'an so' me yo' a ma'.

<sup>5</sup> Dan me se cataj Jesucristó rihaan nij so' a:

—Vaa doj se chá rihaan soj na' —taj Jesucristó, xna'anj so' man nij so' a.

Taj ma' —taj nij so' a.

<sup>6</sup> Gaa ne cataj Jesucristó rihaan nij so' a:

—Tiguíj soj nanj rque na rej x'nuj rihoo rej nuva' rihoo, ne quirí' soj xcuaj ei —taj Jesucristó rihaan nij so' a.

Che'é dan tiguíj nij so' nanj ndaa vaa cataj Jesucristó, ne caraa nu' nanj, qui'yaj xcuaj, ne ne guun nucuaj nij so' cuxuun nij so' nanj a ma'. <sup>7</sup> Che'é dan ca'mii 'o sí tucu'yón se-nana Jesucristó sí 'ee rá Jesucristó man rihaan Pedró, cataj so':

—Sí 'nij ra'a man ní' me yo' ei —taj so' a.

Dan me se cuno Simón Pedró nana se vaa sí 'nij ra'a man ní' me yo', gaa ne che'é se aj quirii so' se-cotoó so', che'é dan nanuú ra'yanj so' se-cotoó so', gaa ne tagüej so' man so' rihaan na yo' a.

<sup>8</sup> Tzaj ne yo'ó nij so' ro', quináj rque rihoo yo', ne tiguíj nij so' chruun man rihoo yo', ne nicaj nij so' rihoo ca'anj nij so' ndaa tu'va na lacuaná yo', ne orún' cientó metró tiguíj ra'a nij so' man rihoo rque na, ne cuxuun nij so' nanj caraa xcuaj yo' rej tu'va na a. <sup>9</sup> Ne nu' cuchi' nij so' rihaan yo'óo, ne quene'en nij so' 'o ya'an nachráj Jesucristó, ne táa nee xcuaj do', rachrúun do', ruvaj yo' a. <sup>10</sup> Gaa ne cataj Jesucristó rihaan nij so' a:

—Nıcaj soj doj xcuaj quirii soj ca'na' soj ei —taj Jesucristó rihaan nij so' a.

<sup>11</sup> Che'é dan cavii Simón Pedró, ne cuxuun so' nanj yo' rihaan yo'óo a. Ne caraa 'o cientó táa yavij chihaa cha'nuj xcuaj rque nanj yo' a. Ne nda' se 'ee ndo'o nij xcuaj, tzaj ne ne sin' nanj ma'.

<sup>12</sup> Gaa ne cataj Jesucristó rihaan nij so' a:

—Cuvá' soj, chá ruvá soj ei —taj so' rihaan nij so' a.

Ne a 'ó nij sí tucu'yón se-nana Jesucristó ne quisij rá xna'anj man so' me sí me so' a. 'Q se aj quene'en nij so' se vaa sí 'nij ra'a man ní' me yo' a. <sup>13</sup> Gaa ne ca'na' Jesucristó, ne nicaj so' rachrúun do', nee xcuaj do', rqué so' man nij so' a.

<sup>14</sup> Dan me se quisij va'nuj nari' tuvi' Jesucristó ga nij sí tucu'yón se-nana so' gaa cunuu i'na' uún so' a.

<sup>15</sup> Dan me se gaa quisij chá ruvá nij so', ne xna'anj Jesucristó man Simón Pedró, cataj so':

—Cunó so' ca'mij, Simón ta'ní Jonás. Doj a 'ee rá so' manj rihaan nij sí nihánj na' —taj Jesucristó, xna'anj so' man Pedró a.

—Ne'en ma'an so' se vaa 'ee raj mán so', Señor —taj Pedró rihaan Jesucristó a.

—Ve'é rque so' chá daán 'unj matzinj á —taj Jesucristó ni'yaj Jesucristó nu' nij sí nocoo' man so' a.

<sup>16</sup> Gaa ne xná'anj uún Jesucristó man Pedró, cataj so':  
—Cunó so' ca'mij, Simón ta'níí Jonás. 'Ee rá so' manj na' —taj uún Jesucristó rihaan Pedró a.

—Ne'en ma'án so' se vaa 'ee raj mán so', Señor —taj uún Pedró rihaan Jesucristó a.

—Ve'é tume so' man daán 'unj matzinj á —taj uún Jesucristó, ni'yaj so' nu' nij síí nocó' man so' a.

<sup>17</sup> Gaa ne cataj uún Jesucristó rihaan Pedró:

—Cunó so' ca'mij, Simón ta'níí Jonás. 'Ee rá so' manj na' —taj uún Jesucristó, ne veé danj quisíj va'nuj xná'anj so' danj man Pedró a.

Dan me se quinanó rá Pedró che'é se quisíj va'nuj xná'anj Jesucristó danj man so' a. Gaa ne cataj uún so' rihaan Jesucristó a:

—Ne'én so' cunudanj, Señor. Ma'án so' ne'en se vaa 'ee raj mán so' ei —taj Pedró rihaan Jesucristó a.

—Ve'é rque so' chá daán 'unj matzinj á. <sup>18</sup> Cuanó nihánj me se cataj yá yá 'unj rihaan so' se vaa gaa mé so' síí tachruu, ne numíj ma'án so' yatzíj catuún so', ne chéé so' me rej me ma'an guun rá so', tzaj ne asa' guun chij so', ne ticún' so' ra'á so', ne yo'ó so' numíj catuún so', ne nicaj so' mán so' ca'anj so' me rej me ma'an rá so' ca'anj so', ne nda' se na'vej rá so' ca'anj so', tzaj ne vaj so' ei —taj Jesucristó rihaan Pedró a.

<sup>19</sup> Ne nana cataj Jesucristó rihaan Pedró, tzaj ne nana yo' taj xna'anj se vaa ticavi' nii man so', ne ca'mij sa' yuvij che'é Dióse, qui'yaj so' a.

Gaa ne cataj uún Jesucristó rihaan Pedró a:

—Yo'ó canocó' so' manj ei —taj Jesucristó rihaan so' a.

<sup>20</sup> Gaa ne canicaj Pedró, ne quene'en so' man yo'ó síí tucu'yón se-nana Jesucristó síí 'ee rá Jesucristó man a. So' ro', me síí cayáán rej x'nuj Jesucristó gaa chá xti'no nij so' gaa rque, ne so' me síí xná'anj man Jesucristó me síí taquachén man Jesucristó rihaan nij síí taj ri'yunj man Jesucristó gaa chá xti'no nij so' gaa rque a. <sup>21</sup> Dan me se gaa quene'en Pedró man síí 'ee rá Jesucristó man yo', ne xná'anj so' man Jesucristó, cataj so':

—Daj quirān' síí nihánj gā, Señor' —taj so' rihaan Jesucristó a.

<sup>22</sup> Gaa ne cataj Jesucristó rihaan so' a:

—Ne sese me rá 'unj yo'ó gaa i'na' so' rihaan chumij nda se ca'na' uún 'unj rihaan chumij nihánj, ne nuveé se-suun ma'án so' me yo' ma'. Yo'ó canocó' ma'án so' manj ei —taj Jesucristó rihaan Pedró a.

<sup>23</sup> Che'é dan cha'nuu nana nihánj sca'núj nij tinuj nij so', ne guun rá nij so' se vaa daj chihaa míj se cavi' síí tucu'yón se-nana Jesucristó yo' a. Tzaj ne ne cataj Jesucristó se vaa ya ya se cavi' so' ma'. Maan se cataj uun so' nana: “Sese me rá 'unj yo'ó gaa i'na' so' rihaan chumij nda se ca'na' uún 'unj rihaan chumij nihánj”, me nana ca'mii Jesucristó a.

<sup>24</sup> Dan me se síí tucu'yón se-nana Jesucristó nihánj me se so' me síí cataj xna'anj che'é nu' rasuun no rihaan yanj nihánj, ne so' me síí cachrón nana rihaan yanj che'é rasuun nihánj, ne ne'en núj se vaa ya uxrá nu' vaa nana cataj xna'anj so' ei. <sup>25</sup> Ne vaa que'ee doj rasuun qui'yaj uún Jesucristó, tzaj ne sese cachrón nii nu' nana che'é 'o 'o nij rasuun rihaan yanj nihánj, ne se quisíj chumij nihánj cumān cunudanj nij yanj libró yo' rihaan chumij nihánj, rá 'unj a ma'.

# Hechos

Nana nihánj taj xna'anj daj ca'mii Jesucristó rihaan nij apóstol cune' so' man nata' se nana so' rihaan yuviij gaa ataa quinan' Jesucristó xta' a

**1** Dan me se yanj ca'née 'unj rihaan so' asij rque me se rihaan yo' cachrón 'unj nana che'é nu' se vaa qui'yaj Jesucristó do', che'é nu' nana tucu'yón Jesucristó do', asij tacoo, ndaa se quinán so' xta', qui'yaj Diose a. Dan me se asino ca'ne' so' suun rihaan nij apóstol cune' so' man nata' se nana so' rihaan yuviij, ndaa vaa cataj Nimán Diose rihaan so', gaa ne quinán so' xta', ne dan me se nu' nana che'é yo' me cachronj rihaan yanj ca'néj rihaan so', Teófilo. <sup>3</sup> Dan me se gaa quisij cavi' Jesucristó rihaan rcutze, gaa ne guun que'ee tihaan so' man so' rihaan nij apóstol yo', che'é rej guun ya rá nij so' se vaa ya cunuu i'na' uún so' a. Dan me se vij chihaa ya güii quene'en nij apóstol man so', ne ca'mii ndo'o so' ga nij apóstol che'é rej guun chij Diose rihaan chumiij nihánj a. <sup>4</sup> Ne gaa vaj so' ga nij apóstol, ne cataj xna'anj so' rihaan nij so' se vaa:

—Yo'q cumán soj chuman' Jerusalén nihánj, ne se cavii soj ca'anj soj ma'. Maan se na'vij soj ca'na' se vaa cata' tu'va Réj Diose se vaa rque so' man soj, ndaa vaa cataj xna'anj ma'anj rihaan soj a. <sup>5</sup> 'Q se Juan ro', me sí cuta' ne man yuviij na uun, ne xa' soj, tzaj ne ma'an Nimán Diose catuu nimán soj rque doj güii adonj —taj Jesucristó rihaan nij apóstol cune' so' man nata' se nana so' rihaan yuviij a.

<sup>6</sup> Ne dan me se cunuu chre' nij apóstol rihaan Jesucristó, ne xna'anj nij so' man Jesucristó a:

—Ne yaj me se guun chij uún ní' sij israelitá rihaan chiháan ní', qui'yaa so' na'. Cataj so' rihaan núj, Señor —taj nij so' rihaan Jesucristó a.

<sup>7</sup> Tzaj ne cataj Jesucristó rihaan nij so' a:

—Diose ro', me sí nq xcúun cachron güii qui'yaj so' se vaa qui'yaj so' ei. Nuveé se sūun soj me suun yo' ma'. <sup>8</sup> Tzaj ne asa' catúj Nimán Diose nimán soj, ne quiri' ndo'o soj rej nucuaj, gaa ne guun soj sí nata' se nanaj rihaan yuviij adonj. Dan me se nu' chuman' Jerusalén do', nu' estadó Judea do', ndaa chuman' Samaria do', ca'vee se ndaa chuman' gan' doj naj rihaan chumiij nihánj, tzaj ne ca'anj soj nata' soj se nanaj adonj —taj Jesucristó rihaan nij so' a.

<sup>9</sup> Dan me se quisij ca'mii Jesucristó danj rihaan nij so', gaa ne ni'yaj nij so' man so', ne dan me se cavii so' xta', qui'yaj Diose, ne catúj so' rque ngaa, ne ne ca'vee quene'en nij so' man so' a ma'. <sup>10</sup> Dan me se ni'yaj uxrá nij apóstol rej xta' rej vaj Jesucristó, tzaj ne ne

ne'en nij so' daj guun, ne aj nicun' vij sí nuu yatzij catzii x'núu nij so' nanj ei. <sup>11</sup> Gaa ne cataj roj snó'o yo' a:

—Me che'é yo'q nicun' soj sij cavii estadó Galilea ni'yaj soj xta' ga. Jesucristó me se ne'en soj se vaa cavii so' quinán so' xta', qui'yaj Diose, ne ase vaa cavii so' xta' ro', danj qui'yaj uún so' nanj so' ca'na' so' rihaan chumiij nihánj adonj —taj roj sí nuu yatzij catzii rihaan nij apóstol yo' a.

Nana nihánj taj xna'anj daj qui'yaj nii gaa narii nii 'o sí nayoñ rihaan sí cu'naj Judas a

<sup>12</sup> Dan me se tanáj nij apóstol quij cu'naj Quij man Chruun Olivó, ne ca'anj nij so', ne namán uún nij so' chuman' Jerusalén a. Dan me se 'o kilómetro ca'anj nij so', <sup>13</sup> ne gaa catúj nij so' chuman', ne cavii nij so' xta' ve' tucua' nij so' ve' nata' a. Ne nij so' ro', me Pedró do', Juan do', Jacobo do', Andrés do', Felipe do', Tomás do', Bartolomé do', Mateo do', Jacobo ta'níf Alfeo do', Simón sí guun tuvi' ga nij sí me rá cunuu' ga gobiernó man Romá do', Judas tinúu Jacobo do' a. <sup>14</sup> Dan me se yo'q vaa rá taran' nij so', ne yo'q achín ni'yaj nij so' rihaan Diose a. Danj qui'yaj nij so' ga nij chana do', ga Mariá nii Jesucristó do', ga nij tinúu Jesucristó do' a.

<sup>15</sup> Ne güii dan me se canicun' Pedró tanuu nij tinuj nij so', ne ca'mii so' rihaan nij so' a. Dan me se cientó taá 'ó icq yuviij me nij yuviij cunuu chre' rej man nij so' a.

<sup>16</sup> Dan me se cataj Pedró rihaan nij so' a:

—Aj quisij ya nu' nana nq rihaan danj Diose nana rque Nimán Diose ca'mii sí cu'naj David nana a'mii che'é sí cu'naj Judas, tinuj, nocoj. Ne dan me se ya ya guun so' sí racuíj man nij sí quita'aa man Jesucristó se vaa ca'vee nari' nij so' man Jesucristó, qui'yaj Judas a. <sup>17</sup> Ne yo'q tuvi' núj apóstol guun so', ne cata' so' se sūun núj a.

<sup>18</sup> "Dan me se nicaj so' sa'anj cacun' qui'yaj canaán ma'an so', ne quiri' so' 'o yo'óo, qui'yaj yo' a. Gaa ne dan me se naxru' so' rihaan yo'óo, ne canuu rque so', ne cavii xri' so' cayuu yo' rihaan yo'óo a. <sup>19</sup> Ne nihánj me nana cachén nu' rque chuman' Jerusalén, ne che'é dan tucu'náj nij sí man Jerusalén Acéldama man yo'óo yo' a —taj Pedró rihaan nij so', ne nana Acéldama ro', me se xna'anj nij so', ne nana yo' taj Yo'óo Tqñ a. Dan me se cataj uún Pedró— <sup>20</sup> 'Q se rihaan yanj chra' nó nana taj se vaa: "Cunuu taqaan rej cane so', ne se cayáan a doj yuviij rej yo' ma'", taj yanj chra' yo', ne taj uún yo': "Se sūun so' ro', nacaj yo'óo so' á", taj uún yanj yo' a.

<sup>21</sup> "Che'é dan vaa che'é çatã yo'ó tinúú ní' suun ga núj se vaa nata' so' rihaan yuvij se vaa ya cunuu i'na' uún Jesucristó, ndaa vaa 'yaj núj a. Tzaj ne inanj síí chée ga núj sij apóstol gaa vaj Jesucristó ga núj me síí nō xcúún çatã suun yo' a. Dan me se síí quene'en asij cuta' ne Juan man Jesucristó ndaa se cavii Jesucristó xtã' qui'yaj Diose dō', me síí nō xcúún guun tuví' núj sij apóstol adonj —taj Pedró rihaan cunudanj nij síí cunuu chre' a.

<sup>23</sup> Gaa ne dan me se narii nij so' man vij snó'o, ne yo'ó so' ro', me síí cu'naj José, ne Barsabás cu'naj uún so', ne Justo tucu'naj nii man so' a. Ne yo'ó so' ro', me síí cu'naj Matías a. <sup>24</sup> Gaa ne cachíin ni'yaj taran' nij so' rihaan Diose, cataj nij so':

—Ne'én so' daj vaa nimán cunudanj yuvij, Señor. Che'é dan tijaán so' me roj tuví' síí nihánj narii so' <sup>25</sup> se vaa çatã so' suun nihánj ne guun so' apóstol nata' se nana Jesucristó rihaan yuvij a. 'O se ca'anj yanij síí cu'naj Judas, tanáj xcō so' suun nihánj, ne ca'anj so' ndaa rej nō xcúún so' ca'anj so' a —taj nij yuvij, cachíin ni'yaj nij yuvij rihaan Diose a.

<sup>26</sup> Gaa ne tico tixaj nij so' me roj so' qui'yaj canaán, ne síí cu'naj Matías me síí qui'yaj canaán, ne che'é dan guun tuví' so' ga yo'ó xaan nij apóstol cune' Jesucristó man nata' se nana so' rihaan cunudanj nij yuvij man rihaan chumij a.

#### Nana nihánj taj xna'anj se vaa ca'na' Nimán Diose rihaan nij síí noco' man Jesucristó a

**2** Dan me se cachén cha'anj pascuá, ne cachén yavij chihãa çhí' güii, ne quisij cha'anj Pentecostés a. Ne güii dan me se cunuu chre' cunudanj nij síí noco' man Jesucristó rá 'o ve', <sup>2</sup> ne taj ni'yón cuno taran' nij síí ne rá ve' se vaa nayuu rá ve', ne daj se uun rá' unó' nana yuvã avii rej xtã' ro', danj guun rá nij so' gaa nayuu rá ve' a. <sup>3</sup> Gaa ne quene'en nij so' rasuun, ne ase vaa yaa ya'an cuxra' ta'aj vaa rasuun quene'en nij so', ne quitáa rasuun yo' raã 'o 'o nij so' a. <sup>4</sup> Gaa ne dan me se caraa Nimán Diose nimán taran' nij so', gaa ne guun che'e nij so' nucuaj ca'mii nij so' xna'anj ino vaa, ne ndaa vaa xna'anj ca'vee ca'mii 'o 'o nij so' qui'yaj Nimán Diose, danj inanj ca'mii nij so' a.

<sup>5</sup> Dan me se güii dan cumán ndo'o yuvij israelitá chuman' Jerusalén, ne síí me ya rá canocō' man Diose me nij yuvij israelitá yo', ne síí cavii nu' chuman' naj rihaan chumij me uún nij so' a. <sup>6</sup> Dan me se cuno nij yuvij israelitá yo' se vaa cuno nij síí noco' man Jesucristó ne rá ve' yo', ne che'é dan cunuu chre' nij yuvij israelitá rihaan ve' yo', ne ca'anj ndo'o rá nij so' se vaa guun a. 'O se 'o 'o nij yuvij israelitá yo' ro', cuno se vaa ca'mii nij síí noco' man Jesucristó xna'anj a'mii 'o 'o nij yuvij israelitá yo' a. <sup>7</sup> Dan me se caráya'anj uxrã nij yuvij, ne cataj nij yuvij yo':

—Ni'yaj soj ei. Xã' nij síí nicun' a'mii nihánj, tzaj ne sij cavii estadó Galilea me cunudanj nij so' á. <sup>8</sup> Ne asã' a'vee uno 'o 'o ní' se vaa a'mii nij so' xna'anj a'mii ma'an nii ní' rihaan ní' ga. <sup>9</sup> Dan me se ma'an ní' me síí cavii Partia dō', Media dō', Elam dō', Mesopotamia dō',

Judea dō', Capadocia dō', Ponto dō', Asia dō', <sup>10</sup> Frigia dō', Panfilia dō', Egiptó dō', rej Libia naj nichrun' Cirene dō', ne ta'aj ní' me síí ne chuman' Romá uún a. 'O se ta'aj ní' me yuvij israelitá, ne yo'ó ta'aj ní' me nij síí yanij guun tuví' ga nij síí israelitá a. <sup>11</sup> Ne vaa síí cavii Creta dō', Arabia dō', uún a. Ne nihánj me se ndaa uno 'o 'o ní' se xna'anj ní', 'yaj nij so' a'mii nij so', ne nata' ndo'o nij so' se vaa sã' uxrã vaa Diose á —taj cunudanj nij yuvij yo' a.

<sup>12</sup> Dan me se caráya'anj uxrã cunudanj nij yuvij israelitá yo', ne ne ca'vee xcãj nij so' cuentá daj me che'é guun danj a. Ne ta'aj nij so' xna'anj man tuví', cataj nij so':

—Me che'é guun nu' danj ga —taj ta'aj nij so' a.

<sup>13</sup> Ne yo'ó ta'aj nij so' ca'nga' nacoo, ne cataj nij so':

—Cachén ndo'o co'o nij síí nihánj na vinó naca nanj chuguãnj —taj nij síí ca'nga' nacoo yo' a.

#### Nihánj me nana nata' Pedró rihaan nij yuvij a

<sup>14</sup> Gaa ne dan me se canicun' síí cu'naj Pedró ga yo'ó xaan nij apóstol cune' Jesucristó man nata' se nana so' rihaan yuvij, ne nucuaj ndo'o ca'mii Pedró ne nata' so' nana nihánj a:

—Soj sij israelitá dō', cunudanj soj sij ne chuman' Jerusalén nihánj dō', nana xrej soj nana ca'mij rihaan soj, ne xcãj soj cuentá che'é rasuun nihánj ei. <sup>15</sup> Ne guun xno núj ndaa vaa guun rá ta'aj soj ma'. 'O se xcãj soj cuentá, ne tihãj aga' uun rej na'yaan me nihánj ei.

<sup>16</sup> Tzaj ne nu' nihánj ro', me se vaa cataj síí cu'naj Joel síí nata' se nana Diose gaa naã qui'yaj Diose a. Dan me se cataj síí cu'naj Joel: <sup>17</sup> "Nihánj me a'mii ma'an Diose rihaan soj, ne taj Diose se vaa asã' nichrun' ca'anj ni'ya chumij nihánj, ne ca'nej ndo'o 'unj Nimán 'unj nimán yuvij man rihaan nu' chumij, ne ta'níí soj ro', nata' nana rque 'unj man ma'an nij so' a. Ne nij síí tachruu ro', naqui'yaa ndo'o rasuun rihaan nij so', qui'yáj, ne nij chii ngã ro', ca'mii ndo'o nej rihaan nij so', qui'yáj adonj. <sup>18</sup> Dan me se güii yo' caraj Nimanj nimán nij síí nuu rihanj dō', nimán nij chanã nuu rihanj dō', ne nata' nij so' se nanaj adonj. <sup>19</sup> Dan me se gaa ndo'o rasuun noco quene'en soj rej xtã', qui'yáj, ne gaa ndo'o rasuun noco quene'en soj rihaan yo'óo, qui'yáj, ne quene'en soj ton dō', ya'an dō', catze' dō' a. <sup>20</sup> Ne guun rmi' rihaan güii, ne rihaan yavii ro', guun ton, asã' nichrun' quisij güii sã' güii ca'ne' 'unj sij 'nij ra'a man soj cacun' che'é yuvij a. <sup>21</sup> Ne me ma'an síí cachinj ni'yaj rihaan 'unj, ne quinanií so' rihaan sayuun adonj". Nihánj me se nana Diose nana ca'mii síí cu'naj Joel gaa naã ei.

<sup>22</sup> "Ne cuano nihánj me se cuno soj sij israelitá nana nihánj ei. Dan me se aj ne'en nij soj daj qui'yaj Jesucristó síí cavii chuman' Nazaret, se vaa guun nucuaj so' qui'yaj ndo'o so' suun sã' noco quene'en soj, qui'yaj Diose adonj. Ne dan me se xcãj soj cuentá daj sij me so', qui'yaj Diose á. <sup>23</sup> Dan me se tucuachén nii man so' rihaan nij síí taj ri'yunj man so', gaa ne dan me se cahrón nij síí ne noco' man Diose man so' rihaan rcutze, ne cavi' so', qui'yaj ma'an soj a. Ne nu' nihánj



me se vaa 'o guun rá Diose quiran' so', ne aj quene'en Diose se vaa quiran' so' danj ei. <sup>24</sup> Tzaj ne qui'yaj Diose se vaa ne ca'vee yuun che'e cavi' so', ma'. Tzaj ne cunuu i'na' uún so', qui'yaj Diose, che'é se ne ca'vee yuun che'e cavi' so' daj chihaa mij a man adonj.

<sup>25</sup> "O se nihánj me nana ca'mii sí cu'naj David che'é Jesucristó a: "Quene'en 'unj daj quiranj rej rihanj, ne xcaj 'unj cuentá se vaa yo'o canicun' sí 'nij ra'a manj rihanj nanj á. 'O se nicun' so' rej x'nuj, ne se ca'vee naxruij, qui'yaj so' ma'. <sup>26</sup> Che'é dan guun niha' ndo'o nimanj, ne ca'mij nana niha' cavii nimanj a. 'O se yo'o guun ya raj se vaa ya cavii sa' 'unj nanj adonj. <sup>27</sup> 'O se se tanáj so' nimanj rej man nij sí cavi' ma'. Ne se quir-i'yuj nee man sí vaa sa' rihaan so', qui'yaa so' ma'. <sup>28</sup> Dan me se tijaán so' rihanj tucuaán canocoj ne ca'vee gaa i'na' 'unj a. Ne guun niha' ndo'o raj, qui'yaa so', asa' canicun' 'unj rihaan so' adonj". Nihánj me se nana sí cu'naj David yo' a.

<sup>29</sup> "Nuveé nana naca me nana nihánj nana cataj 'unj rihaan nij soj cuanoj, man tinuj. Dan me se xij ní' sí cu'naj David me se cavi' so', gaa ne cachin' nii man so', ne yaj me se ne'en ní' me rej cachin' nii man so' nanj á. <sup>30</sup> Tzaj ne sí nata' se nana Diose me so' gaa cayáan so', ne quene'en so' se vaa cata' tu'va Diose rihaan so' se vaa guun chij yo'o ta'níi ta'nij si'no so', ndaa vaa guun chij ma'an so' a. <sup>31</sup> Ne che'é dan cataj so' se vaa se quináj Jesucristó rej man nij sí cavi', ne se quixtun' nu' nee man so' ma'. Daj ca'mii so' ni'yaj so' güii cunuu i'na' uún Jesucristó a.

<sup>32</sup> "Gaa ne dan me se ya ya cunuu i'na' uún Jesucristó, qui'yaj Diose, ne taran' núj me sí quene'en se vaa cunuu i'na' uún so' adonj. <sup>33</sup> Gaa ne cavii Jesucristó ndaa x'núu Diose rej nuva' Diose, ya gaa naca Jesucristó Nimán Diose gaa narqué Diose Nimán so' man Jesucristó, danj vaa cata' tu'va so' a. Ne qui'yaj Jesucristó ga núj sij apóstol ndaa vaa ne'en soj se vaa ran' núj, ne dan me se qui'yaj Jesucristó ca'mii núj sij apóstol nu' xna'anj a'mii soj ndaa vaa cuno soj ca'mii núj ei.

<sup>34</sup> "Dan me se ne cavii ma'an sí cu'naj David rej xta' ma'. Tzaj ne cataj so': "Ca'mii Diose sí 'nij ra'a man ní' rihaan sí 'nij ra'a manj, cataj so' se vaa cayáan sí 'nij ra'a manj x'núu Diose rej nuva' Diose <sup>35</sup> ndaa se quisij qui'yaj canaán Diose rihaan taran' nij sí taj ri'yunj man sí 'nij ra'a manj ne quirij ta'nga' sí 'nij ra'a manj rihaan nij so' adonj", taj sí cu'naj David yo' a. <sup>36</sup> Che'é dan vaa che'é ndo'o xcaj ya taran' soj sij israelitá cuentá se vaa xa' Jesucristó sí cachrón ma'an soj rihaan rcutze, tzaj ne sí 'nij ra'a man ní' me so', ne sí ca'née Diose tinanii man ní' rihaan sayuun me uún so', qui'yaj Diose adonj —taj Pedró rihaan nij yuvij cunuu chre' yo' a.

<sup>37</sup> Dan me se gaa cuno nij yuvij nana yo', ne quinanó ndo'o rá nij so', ne xná'anj nij so' man Pedró ga yo'ó nij apóstol cune' Jesucristó man nata' se nana so' rihaan yuvij, cataj nij so' a:

—Ne daj qui'yaj núj, ga tinu' —taj nij so', xná'anj nij so' man nij tuvi' Pedró a.

<sup>38</sup> Gaa ne cataj Pedró rihaan nij so' a:

—Canicaj nimán soj canoco' soj chrej sa', ne cata' ne cunudanj soj che'é yan quene'en yuvij se vaa nocoj soj man Jesucristó, gaa ne tinavij Diose cacun' tumé soj, ne rque Diose Nimán Diose catuu yo' nimán soj ei.

<sup>39</sup> Dan me se cata' tu'va Diose se vaa qui'yaj so' danj che'é nij soj do', che'é ta'níi soj do', che'é nij sí ne gan' do' a. Dan me se me ma'an sí nacunj Diose sí 'nij ra'a man ní' canoco' man so' me se qui'yaj Diose danj che'é so' adonj —taj Pedró rihaan nij yuvij israelitá yo' a.

<sup>40</sup> Gaa ne nata' so' que'ee doj nana rihaan nij so', gaa ne nago' so' chrej nucuaj man nij so', cataj so':

—Curihanj soj sca'núj tuvi' ní' sí nocoj tucuaán chi'ij, gaa ne quinanij soj rihaan sayuun ei —taj Pedró rihaan nij yuvij israelitá a.

<sup>41</sup> Che'é dan me nij sí cuchumán rá se nana so' ro', cata' ne nij so', ne güii yo' me se canoco' naca va'nuj mij yuvij man Jesucristó ta' asuun a.

### Nana nihánj taj xna'anj daj qui'yaj nij sí nocoj man Jesucristó a

<sup>42</sup> Dan me se yo'o canoco' raan nij sí nocoj man Jesucristó nana tucuyón nij apóstol rihaan nij so', ne yo'o guun tuvi' cunudanj nij so' a. Ne yo'o cuxra' ta'aj nij so' rachrúun chá nij so', ne yo'o chre' cachín ni'yaj nij so' rihaan Diose a. <sup>43</sup> Ne cunudanj nij yuvij ro', chuchuvi' ndo'o nij so' ni'yaj nij so' nij suun sa' nocoj qui'yaj nij apóstol yo' a.

<sup>44</sup> Tzaj ne nij sí cuchumán rá ni'yaj man Jesucristó me se 'o rej man chre' cunudanj nij so', ne naqui'yaj rcua'aan nij so' nu' si'yaj nij so', ne si'yaj taran' nij so' me cunudanj nij rasuun yo' a. <sup>45</sup> Ne tu'vej nij so' to'óo nij so' do', si'yaj nij so' do', ne rque nij so' se sa'anj nij so' rihaan tuvi' nij so' sí achiin rasuun man a. <sup>46</sup> Dan me se daj a güii 'anj nij so' nuví nocoj cachinj ni'yaj nij so' rihaan Diose, ndaa vaa guun rá taran' nij so' a. Ne 'o nuu chre' nij so' 'o ve', ne uxra' ta'aj nij so' rachrúun chá nij so' a. Ne dan me se ndaa niha' ndaa cochroj rá taran' nij so' chá nij so' chraa a. <sup>47</sup> Ne cataj nij so' se vaa sa' uxra' qui'yaj Diose che'é nij so', ne ca'mii sa' cunudanj nij yuvij ne chuman' Jerusalén ni'yaj nij yuvij man nij so' gaa ve'é mán chre' nij so' a. Ne daj a güii cunuu chre' doj sí vaj nanij rihaan sayuun ga nij so', qui'yaj Diose a.

### Nana nihánj taj xna'anj se vaa nahuun sa' 'o sí rengo, qui'yaj Pedró ga Juan a

**3** Dan me se aga' va'nuj rej anoco' güii me se cuchí sí cu'naj Pedró do', sí cu'naj Juan do', nuví nocoj, che'é se orá achín ni'yaj nii rihaan Diose me yo' a. <sup>2</sup> Ne maan orá dan nicaj nii man 'o sí rengo cuchí nii rihaan nuví nocoj yo', ne sí rengo me so' asij ca'n-gaa so' a. Ne dan me se daj a güii uchruj nii man so' rihaan yo'óo rej x'nuj ta'yaa cu'naj Ta'yaa Ve'é Ndo'o Vaa a. Ne yo' me rej achín so' caridad man nij yuvij atúj nuví yo' a. <sup>3</sup> Dan me se quene'en so' man Pedró do', man Juan do', se vaa catuu roj so' rá nuví nocoj,

gaa ne cachíin so' caridad man roj so' a. <sup>4</sup>Gaa ne ni'yaj uxrá Pedró do', Juan do', man so', ne cataj Pedró rihaan so' a:

—Ni'yaj so' man rój á —taj so' rihaan síi rengó yo' a.

<sup>5</sup>Gaa ne ni'yaj síi rengó man roj so', che'é se guun rá so' se vaa rque roj so' sa'anj man so' a. <sup>6</sup>Gaa ne cataj Pedró rihaan so' a:

—Taj vaj a doj sa'anj rihaan 'unj ma'. Tzaj ne rque 'unj se vaa rihaan 'unj mán so' ei. Dan me se che'é ma'an Jesucristó síi cavii chuman' Nazaret taj xna'anj 'unj rihaan so' se vaa na'xumaan so' ne cachee so' á —taj Pedró rihaan so' a.

<sup>7</sup>Gaa ne quita'aa Pedró ra'a so' rej nuva' so', ne cachrón caya Pedró man so', ne nu' nari' nucaj tacóo so' do', xtucua' so' do' a. <sup>8</sup>Gaa ne dan me se güéj so', ne canicun' caya so', ne cachéé so', ne dan me se catúj so' rá nuvií nocoo ga roj so', ne cachéé ndo'o so', ne güéj so', ne cataj so' se vaa sa' uxrá qui'yaj Diose che'é so' a. <sup>9</sup>Gaa ne quene'en cunudanj nij yuvii se vaa cachéé so' ne cataj so' se vaa sa' uxrá qui'yaj Diose a.

<sup>10</sup>Ne quene'en nij yuvii se vaa ma'an so' me síi yaán rihaan ta'yaa nuvií nocoo cu'naj Ta'yaa Ve'é Ndo'o Vaa ne achíin so' caridad, ne ca'anj ndo'o rá nij yuvii che'é se vaa nahuun sa' síi rengó yo' a.

**Nihánj me nana nata' Pedró rihaan nij yuvii a**

<sup>11</sup>Dan me se quita'aa síi nahuun sa' yo' man síi cu'naj Pedró do', man síi cu'naj Juan do', ne che'é se ca'anj ndo'o rá nij yuvii, che'é dan cunanj nij yuvii cunuu chre' nij yuvii rihaan roj so' rque chingá cu'naj Corredor Salomón a. <sup>12</sup>Ne gaa quene'en Pedró man nij yuvii, ne cataj so' rihaan nij yuvii a:

—Cunoo soj sij israelitá ca'mij á. Me che'é ca'anj ndo'o rá soj se vaa chéé síi nihánj ga. Me che'é ni'yaj ndo'o soj man rój ga. Nuveé ma'an rój me síi guun nucaj qui'yaj cachéé so' ma'. Nuveé che'e se sij nocoo sa' ndo'o man Diose me rój, ne cachéé so' qui'yaj rój ma'.

<sup>13</sup>Dan me se Diose síi nocoo' xii ní' síi cu'naj Abraham do', síi cu'naj Isaac do', síi cu'naj Jacob do', me síi qui'yaj cavii sa' ndo'o ta'níi ma'an so' Jesucristó nanj adonj. Tzaj ne nij soj me nij síi tucuchén man Jesucristó rihaan nij síi taj ri'yunj man Jesucristó, ne nda' se guun ya' rá síi cu'naj Pilato se vaa ca'anj yun Jesucristó, tzaj ne cataj soj rihaan síi cu'naj Pilato se vaa guun rá soj cavii Jesucristó adonj.

<sup>14</sup>"Dan me se cataj soj se vaa ne guun rá soj ni'yaj soj man síi sa' nimán yo' ma'. Maan se cachíin ni'yaj soj rihaan síi cu'naj Pilato se vaa quiriij so' taga' man 'o síi ticavi' man yuvii a. <sup>15</sup>Ne ticavi' soj man Jesucristó síi guun nucaj qui'yaj gaa i'na' nimán ní' a. Ne Diose ro', qui'yaj cunuu i'na' uún Jesucristó, ne ma'an núj me síi quene'en se vaa cunuu i'na' uún so' nanj adonj. <sup>16</sup>Ne che'é se cuchumán rá síi nihánj ni'yaj so' man Jesucristó ro', che'é dan nari' nucaj so', qui'yaj Jesucristó adonj. Ne dan me se nahuun sa' nu' so', ne aj ne'en taran' soj daj quiran' so', ne aj cunoo soj daj taj ma'an so' nanj á.

<sup>17</sup>"Ne nihánj me se ne'én 'unj se vaa che'é se ne quene'en soj daj sij me Jesucristó, ne che'é dan cavii so' qui'yaj soj ga nij síi uun chij rihaan soj nanj ei.

<sup>18</sup>Tzaj ne Diose ro', me síi cataj xna'anj asij naá ndo'o gaa rque so' nana nata' nij síi nata' se nana so', ne dan me se cataj xna'anj Diose se vaa síi ca'nej so' tinanii man yuvii rihaan sayuun me se quiran' ndo'o so' sayuun a. Ne nihánj me se quisij ya nu' ndaa vaa cataj Diose se vaa qui'yaj ma'an Diose nanj ei.

<sup>19</sup>"Che'é dan canicaj nimán soj canoco' soj chrej sa', gaa ne ca'vee tinavij Diose cacun' tumé soj á. <sup>20</sup>Gaa ne ca'vee quisij güii cunuu cuij rá taran' ní' sij israelitá, qui'yaj síi 'nij ra'a man ní', ne dan me se Jesucristó síi cune' Diose man tinanii man ní' rihaan sayuun me se ca'nej Diose man so' ca'na' uún so' rihaan ní' a.

<sup>21</sup>Cunoo nihánj me se me rá Diose cayaán so' rej xta' ndaa se quisij güii naqui'yaj sa' Diose nu' nij rasuun ndaa rá se vaa nij rasuun asij naá ndo'o ndaa vaa cataj xna'anj nij síi sa' síi nata' se nana Diose gaa naá a.

<sup>22</sup>Dan me se síi cu'naj Moisés cataj rihaan xii ní': "Diose sij 'nij ra'a man ní' me se cavii yo'ó tinúú nij soj, qui'yaj Diose, ne guun so' síi nata' se nana Diose ndaa vaa 'yaj ma'anj a. Ne cunoo soj nu' nana nata' so' rihaan soj á. <sup>23</sup>Ne dan me se a me ma'an síi na'vej rá cunoo se nana síi nata' se nana Diose yo', ne nu' quiriij yanij nii man so' sca'núj ní' sij israelitá, ne quiri' nu' so' nanj adonj", taj síi cu'naj Moisés gaa naá a. <sup>24</sup>Ne dan me se síi cu'naj Samuel do', cunudanj yo'ó nij síi nata' se nana Diose do', cataj xna'anj taran' uún nij so' uún che'é güii yaj ei.

<sup>25</sup>"Ne rihaan ma'an nij soj ca'mii nij síi nata' se nana Diose, ne ma'an nij soj me nij síi cavii sa' qui'yaj Diose, ndaa vaa cata' tu'va Diose rihaan xii ní' gaa naá ei. Dan me se rihaan xii ní' síi cu'naj Abraham cataj Diose: "Dan me se cavii sa' nij yuvii man cunudanj nij chuman' naj rihaan chumii, qui'yaj ta'níi ta'nij si'no' so' a", taj Diose rihaan Abraham a. <sup>26</sup>Gaa ne aj ca'neé Diose man ta'níi Diose rihaan chumii, ne cuchi' ta'níi Diose asino yaan rihaan ma'an soj, qui'yaj Diose, che'é rej canicaj nimán 'o 'o nij soj, ne tanáj xco nij soj tucuaán chi'ii, ne ca'vee qui'yaj ndo'o Diose se luj che'é taran' nij soj ei —taj Pedró rihaan nij yuvii cunuu chre' rá nuvií nocoo yo' a.

**Nana nihánj taj xna'anj daj ca'mii síi cu'naj Pedró ga Juan rihaan nij síi uun chij rihaan nij yuvii israelitá a**

**4** Dan me se gaa ca'mii síi cu'naj Pedró ga Juan rihaan nij yuvii, ne cuchi' nij xrej do', tanuu uun chij rihaan nij tanuu 'yaj suun rá nuvií nocoo do', nij síi sadoce do', rihaan roj so' a. <sup>2</sup>'O se ne guun niha' rá nij so' gaa cunoo nij so' nana tucuyón Pedró ga Juan man nij yuvii nana se vaa Jesucristó me 'o síi cunuu i'na' uún gaa cavii' so' a. <sup>3</sup>Ne dan me se quita'aa nij so' man roj so', ne caxríj nij so' taga' man roj so' 'o yan' a. 'O se aj ti'nuu me orá yo' a. <sup>4</sup>Ne que'ee nij síi cunoo se nana roj so' ro', cuchumán rá nana yo', ne veé danj quisij 'un' mij snó'o canoco' man Jesucristó ta' asuun a.

<sup>5</sup> Ne yo'ó güii me se cunuu chre' nij sí nicaj suun do', nij sí uun chij do', nij sí naqui'yaj cüu se tucuanj Moisés rihaan nij yuvi' do', chuman' Jerusalén ga <sup>6</sup> sí cu'naj Anás sí guun xrej atá suun nocoo doj do', sí cu'naj Caifás do', sí cu'naj Juan do', sí cu'naj Alejandro do', taran' nij tuvi' nij xrej atá suun nocoo doj do' a.

<sup>7</sup> Dan me se canicun' caya sí cu'naj Pedró ga Juan tanuu ve' man nij xrej, qui'yaj nij xrej, ne xná'anj nij xrej man roj so', cataj nij xrej a:

—Me rej quirí' roj soj rej nucuj do', me sí ca'ne' suun rihaan roj soj do', ne qui'yaj roj soj danj ga —taj nij so', xná'anj nij so' man roj so' a.

<sup>8</sup> Gaa ne caraa ndo'o Nimán Diosé nimán Pedró, ne cataj Pedró rihaan nij so' a:

—Cunō nij soj sij nicaj suun rii ta'nga' rihaan nij yuvi' do', cunō soj sij uun chij cunō nana cataj xna'anj 'unj rihaan nij soj á. <sup>9</sup> Nihánj me se naqui'yaj cüu nij soj man rōj che'é se cunuu 'e'e rá rōj ni'yaj rōj 'o sí rengō, ne me rá nij soj quene'en soj asá' ca'vee nahuun sá' sí rengō nihánj a. <sup>10</sup> Che'é dan xcaj nij soj do', taran' nij yuvi' israelitá do', cuentá se vaa Jesucristó sí cavii chuman' Nazaret me sí qui'yaj ca'vee naxcaj rōj man sí rengō nihánj, ne 'o vaa nucuj so' a. Ne nij soj ro', me nij sí qui'yaj cachrón nii man Jesucristó rihaan rcutze, tzaj ne cunuu i'na' uún so', qui'yaj Diosé a. <sup>11</sup> Ne xa' Jesús, tzaj ne so' me yuvej quirí'ij nij soj sij cunē' ve', ne yaj me se guun so' yuvej sá' doj rihaan taran' nij yuvej man tacóo ve' yaj nanj adonj. <sup>12</sup> Ne taj vaj a doj yo'ó sí guun nucuj qui'yaj cavii sá' ní' a ma'. Orún' so' me sí vaa rihaan chumii nihánj sí ca'née Diosé, ne orún' so' me sí ca'vee tñanii man ní' rihaan sayuun nanj adonj —taj Pedró rihaan nij sí uun chij yo' a.

<sup>13</sup> Dan me se quene'en nij so' se vaa ne chuhu'vi' Pedró ga Juan ne sca' uxrá ca'mii roj so', ne xcaj nij so' cuentá se vaa nuveé sij tucu'yón yanj me roj so', tzaj ne sá' uxrá nari' roj so' a. Che'é dan caráya'anj nij so' a. Ne quene'en nij so' se vaa roj so' me sí cachéé ga Jesucristó a. <sup>14</sup> Ne quene'en nij so' man sí nahuun sá' yo' nicun' ga roj so' a. Gaa ne ne quirí' nij so' nana ca'mii nij so' ma'.

<sup>15</sup> Gaa ne ca'ne' nij sí uun chij suun rihaan Pedró ga Juan ga sí nahuun sá' yo' se vaa cūrihanj va'nuj nij so' xe', gaa ne ca'vee nuchruj raā nij tuvi' nij sí uun chij daj qui'yaj nij so' ga sí cu'naj Pedró ga Juan yo', rá nij so' a. <sup>16</sup> Dan me se cataj nij so':

—Daj qui'yaj ní' ga roj sí nihánj ga. 'O se xcaj taran' nij sí ne chuman' Jerusalén nihánj cuentá se vaa ran-ga' qui'yaj suun roj so' suun sá' nocoo, ne se ca'vee cataj ní' se vaa ne qui'yaj roj so' danj ma'. <sup>17</sup> Tzaj ne tuchu'vi' ní' man roj so' ne ca'ne' ní' suun rihaan roj so' se vaa se ca'mii roj so' che'é Jesucristó rihaan a 'ó yuvi' a. Gaa ne se cha'nuu doj nana nihánj sca'núj nij yuvi' a —taj taran' nij so' a. <sup>18</sup> Gaa ne canacúun nij so' catuu uún Pedró ga Juan rej nuu nij so', gaa ne nago' nij so' chrej nucuj man roj so' se vaa se ca'mii roj so' che'é Jesucristó ne se tucu'yón roj so' se nana Jesucristó a.

<sup>19</sup> Gaa ne canicaj sí cu'naj Pedró ga Juan cataj roj so' rihaan nij so' a:

—Nuchruj raā nij soj sese guun rá Diosé cunō núj rihaan soj ne tanáj xco núj se nana Diosé ei. <sup>20</sup> Se ca'vee ca'ne' rá núj ga suun a'mii che'é rasuun quene'en núj do', che'é nana cunō núj do' a ma' —taj roj so' rihaan nij so' a.

<sup>21</sup> Gaa ne doj a ca'mii yuvaā nij sí uun chij yo' rihaan roj so', tzaj ne ne quirí' nij sí uun chij yo' daj qui'yaj nij so' sayuun man roj so' a ma'. Che'é dan na'née nij so' chrej man roj so' a. 'O se nij yuvi' me se cunudanj nij so' cataj se vaa sá' uxrá qui'yaj Diosé che'é sí nahuun sá' yo' a. <sup>22</sup> Ne sí nahuun sá' qui'yaj suun sá' nocoo yo' me se vaj so' vij chihāā yo' táá doj a.

**Nana nihánj taj xna'anj daj ca'mii nij sí nocoo' man Jesucristó gaa cachíin ni'yaj nij so' rihaan Diosé a**

<sup>23</sup> Dan me se na'née nii man Pedró ga Juan, ne cuchi' roj so' rihaan tinúú roj so', gaa ne nata' roj so' nu' nana cataj nij xrej atá suun nocoo doj do', nij sí uun chij do', se vaa cataj nij so' rihaan roj so' a. <sup>24</sup> Gaa ne dan me se gaa cunō nij so' se nana roj so', gaa ne nu' guun rá taran' nij so' cachinj ni'yaj nij so' rihaan Diosé, ne che'é dan nucuj ca'mii nij so', cataj nij so' a:

—Ma'an sō' me sí qui'yaj nu' rej xta' nu' chumii nu' na ya'anj nu' rasuun nu' a. <sup>25</sup> Ne sō' ro', ca'née Nimán sō' rihaan xii núj sí cu'naj David sí qui'yaj suun che'é sō', ne Nimán sō' ro', rque nana rihaan so' ca'mii so', ne dan me se cataj so': "Me che'é ca'maan ndo'o rá nij sí yanij, ne me che'é guun nij rma'an rá nij yuvi' ga.

<sup>26</sup> Dan me se cavii nij sí nicaj suun rey uun chij rihaan chumii nihánj, gaa ne cunuu chre' nij so', che'é rej qui'yaj nij so' sayuun man sí 'nij ra'a man ní' do', man sí ca'née so' tñanii man yuvi' rihaan sayuun do' a", taj sí cu'naj David yo' gaa naá a. <sup>27</sup> Dan me se ya ya cunuu chre' sí cu'naj Herodes do', sí cu'naj Poncio Pilato do', nij sí yanij do', nij yuvi' israelitá do', rque chuman' nihánj, che'é rej qui'yaj nij so' sayuun man ta'níi sō' sí cu'naj Jesucristó sí cuné' sō' man tñanii man núj rihaan sayuun a. <sup>28</sup> Tzaj ne qui'yaj nij so' inanj se vaa guun rá ma'an sō' asij naá se vaa qui'yaj nij so', ne ma'an sō' me sí qui'yaj guun nu' nihánj a.

<sup>29</sup> "Ne nihánj me se xcaj sō' sij 'nij ra'a man núj cuentá se vaa ca'mii yuvaā ndo'o nij so' rihaan núj a. Ne racu'ij sō' man núj sij 'yaj suun che'é sō' se vaa guun nucuj núj nata' sca' núj se nana sō' rihaan yuvi' a.

<sup>30</sup> Dan me se racu'ij sō' man núj qui'yaj núj suun sá' nocoo, ne nahuun sá' yuvi', qui'yáá sō', che'é rej xcaj yuvi' cuentá se vaa sij nucuj ndo'o mé sō' che'é ta'níi sō' Jesucristó sí guēē á —taj taran' nij so', cachíin ni'yaj nij so' rihaan Diosé a.

<sup>31</sup> Dan me se quisij cachíin ni'yaj nij so' rihaan Diosé, gaa ne quinaan nu' rej man nij so', ne caraa ndo'o Nimán Diosé nimán cunudanj nij so', gaa ne sca' ndo'o ca'mii nij so' se nana Diosé a.

**Nana nihánj taj xna'anj che'é yan yo'ò chre' mán nij síf nocò' man Jesucristó a**

<sup>32</sup> Dan me se yo'ò cuyaān vaa rá cunudañj nij síf cuchumán rá ni'yaj man Jesucristó, ne a 'ó nij síf nocò' man Jesucristó ne taj se vaa se si'yaj orún' me rasuun ma'. Tananj nu' rasuun man rihaan 'ò 'ò nij so' ro', me si'yaj taran' nij so', taj nij so', ne 'ò chre' mán nij so', ne 'ò chre' a'mii nij so', ne orún' rasuun si'yaj cunudañj nij so' a. <sup>33</sup> Ne nij apóstol cune' Jesucristó man nata' se nana so' rihaan yuviñ me se nucuaj ndo'o nata' nij so' se vaa cunuu i'na' uún Jesucristó sij 'nij ra'a man ní' a. Ne qui'yaj ndo'o Diose se luj che'é cunudañj nij so' a.

<sup>34</sup> Ne taj vaj a 'ó síf achiin rasuun man 'nij sca'núñj nij so' ma'. 'Q se cunudañj tinúú nij so' síf vaa to'óo dò', síf vaa ve' tucua' dò', cutu'véj nij so' si'yaj nij so', ne nicaj nij so' sa'anj quiri' nij so', <sup>35</sup> ne caxrjñ nij so' sa'anj yo' ston nij apóstol cune' Jesucristó man nata' se nana so' rihaan yuviñ a. Ne sese cachiin rasuun rihaan 'ò tinúú nij so', ne nij apóstol me nij síf rqué nu' se vaa cachiin rihaan so' a.

<sup>36</sup> Ne yo'ò so' ro', me síf cu'naj José, ne tucu'nájñ nij apóstol Bernabé man so' a. Ne nana Bernabé taj se vaa síf 'yaj nari' nucañj ní' me so' a. Ne 'ò ta'níí ta'nij si'nò síf cu'naj Leví síf cane gaa naá me so', ne cavii so' rej cu'naj Chipre a. <sup>37</sup> Dan me se vaa 'ò to'óo so', ne cutu'véj so' man yo', ne nicaj so' sa'anj quiri' so' che'é yo'óo yo', ne caxrjñ so' ston nij apóstol yo' a.

**Nana nihánj taj xna'anj che'é cacun' qui'yaj síf cu'naj Ananías dò', nica so' chana cu'naj Safira dò' a**

**5** Dan me se vaa yo'ò síf cu'naj Ananías, ne vaa nica so' chana cu'naj Safira, ne cutu'véj roj nica roj so' 'ò yo'óo, <sup>2</sup> ne quiri' roj so' sa'anj, gaa ne quita'aa síf cu'naj Ananías ta'aj sa'anj yo', ne ca'vej rá nica so' qui-ta'aa so' sa'anj yo' a. Gaa ne daj 'ó ta'aj sa'anj ca'anj nicaj so', caxrjñ so' ston nij apóstol cune' Jesucristó man a. Ne ca'mii ne so' rihaan nij apóstol se vaa nu' sa'anj quiri' so' che'é yo'óo cutu'véj so' me yo', cataj so' a. <sup>3</sup> Gaa ne ca'mii Pedró rihaan síf cu'naj Ananías, cataj so', ne:

—Me che'é catúj síf chree nimán so', ne ca'mii ne so' ndaa rihaan Nimán Diose, ne quita'aa so' ta'aj sa'anj quiri' so' gaa cutu'véj so' yo'óo yo' gaa. <sup>4</sup> Dan me se daj guun rá so', ne ca'mii ne so' gaa. Nuveé to'oj ma'án so' cutu'véj so' ne gaa cutu'véj so' man yo' ne ne nó xcúún so' qui'yáá so' ndaa vaa me rá ma'án so' qui'yáá so' gaa se sa'anj so' na'. Me che'é cavii raá so' qui'yáá so' se vaa qui'yáá so' nihánj gaa. Nuveé rihaan yuviñ uun ca'mii ne so' ma'. Ndaa rihaan ma'an ya Diose ca'mii ne so' nanj adonj —taj Pedró rihaan Ananías yo' a.

<sup>5</sup> Gaa cuno Ananías nana ca'mii Pedró rihaan so', ne naxru' so', ne cavi' so' a. Gaa ne cuchu'vi' ndo'o cunudañj nij síf cuno ndaa vaa quiran' so' a. <sup>6</sup> Gaa ne canicun' nij síf tachruu, ne caráán nij so' yatzjñ xráá síf

cavi', gaa ne ca'anj nicaj nij so' man so' xe', gaa ne cachin' nij so' man so' a.

<sup>7</sup> Dan me se cachén va'nuj orá ta' asuun, gaa ne catúj nica síf cavi' yo' rá ve', ne ne quene'en no' daj quiran' nica no' ma'. <sup>8</sup> Gaa ne cataj Pedró rihaan no' a: —Cataj xna'anj so' rihanj sese nu' sa'anj quita'aa roj soj che'é yo'óo cutu'véj roj soj me nihánj á —taj Pedró rihaan no' a.

—Veé cunudañj ya sa'anj quita'aa róñ che'é yo'óo me yo' ei —taj no' a.

<sup>9</sup> Gaa ne cataj Pedró rihaan no' a:

—Me che'é cuyaān guun rá roj soj tihá' yu'unj roj soj man Nimán síf 'nij ra'a man ní' gaa. Ni'yaj so' ei. Nij síf cachin' man nica so' ro', nicun' ta'yaa, ne nihánj me se cãtañj nij so' mán so', ca'anj nicaj nij so' mán so' xe' cuano ei —taj Pedró rihaan no' a.

<sup>10</sup> Gaa ne taj ni'yón naxru' no' rihaan yo'óo rej nicun' Pedró, ne nu' cavi' no' a. Gaa ne dan me se catúj uún nij síf tachruu rá ve', ne quene'en nij so' se vaa aj cavi' no', gaa ne ca'anj nicaj nij so' man no' xe', gaa ne cachin' nij so' man no' uún x'núú nica no' a. <sup>11</sup> Gaa ne cuchu'vi' ndo'o cunudañj nij síf cuchumán rá ni'yaj man Jesucristó dò', cunudañj nij síf cuno nana daj quiran' roj nica roj so' a.

**Nana nihánj taj xna'anj che'é suun sa' nocoo qui'yaj nij apóstol cune' Jesucristó man nata' se nana so' a**

<sup>12</sup> Gaa ne qui'yaj ndo'o nij apóstol cune' Jesucristó man suun sa' nocoo ni'yaj nij yuviñ ne chuman' Jerusalén a. Ne yo'ò vaa rá nij síf nocò' man Jesucristó, ne cunuu chre' nij so' rá nuviñ nocoo rá chingá cu'naj Corredor Salomón a. <sup>13</sup> Tzaj ne yo'óo nij yuviñ ro', ne quisij rá nij so' cunuu chre' nij so' gaa nij síf nocò' man Jesucristó ma'. Tzaj ne cunudañj nij yuviñ cataj se vaa sa' qui'yaj nij síf nocò' man Jesucristó a. <sup>14</sup> Tzaj ne cuchumán rá que'eeñ nij snó'o dò', nij chana dò', ni'yaj nij so' man síf 'nij ra'a man ní', ne che'é dan guun rijñ doj nij yuviñ nocò' man so' a. <sup>15</sup> Ne dan me se rihaan chruun dò', rihaan yuvéé dò', táá nij síf ran', riiñ nij yuviñ man nij síf ran' yo' xe' a. Cuchruj niiñ man nij síf ran' rá callé rej cachén Pedró, che'é se sese se cãchun' Pedró cano xráá nij síf ran' ne nahuun so', rá nij yuviñ a. <sup>16</sup> Gaa ne ca'na' ndo'o yuviñ caviiñ nij chuman' naj nichrun' chuman' Jerusalén, ne nuu chre' nij so' a. Dan me se atañj so' síf ran' dò', síf nuu nana chree nimán dò', ne nahuun sa' cunudañj nij so' a.

**Nana nihánj taj xna'anj che'é sayuun qui'yaj niiñ man nij apóstol cune' Jesucristó man nata' se nana so' rihaan yuviñ a**

<sup>17</sup> Dan me se guun xcoj ruvãã rá nij tuvi' xrej atañj suun nocoo doj ni'yaj nij so' man nij apóstol cune' Jesucristó man nata' se nana so' rihaan yuviñ a. Dan me se nij tuvi' xrej me se síf saduceo me nij so' a. <sup>18</sup> Dan me se ca'néeñ nij so' tanuu quita'aa man nij apóstol, gaa ne caxrjñ nij so' taga' man nij so' a. <sup>19</sup> Tzaj ne rej niñ me se ca'na' yo'ò se mozó síf 'nij ra'a man ní', ne ca'núñj so'

ta'yaa taga' yo', ne ca'anj nicaj so' man nij apóstol xe' a. Gaa ne cataj se mozó Diose yo' rihaan nij apóstol:

<sup>20</sup>—Cavii soj, ne ca'anj soj canicun' soj rá nuví no-cço, ne nata' soj rihaan nij yuvií nu' nana nihánj nana taj xna'anj daj qui'yaj nij yuvií ne ca'vee gaa i'na' nimán nij yuvií rihaan Diose á —taj se mozó Diose yo' rihaan nij so' a.

<sup>21</sup>Sij cuno nij so' nana vaa danj, gaa ne rej síj güii catúj nij so' rá nuví nocço, ne tucu'yón nij so' se nana Jesucristó rihaan nij yuvií a. Maan orá dan canacúun nij tuví' xrej atá suun nocço doj, ne cunu chre' cunudanj nij sí uun chij rihaan nij yuvií israelitá, qui'yaj nij so' juntá a. Gaa ne ca'née nij so' sí ca'anj taga', ne ca'na' nıcaj nij so' man nij apóstol rihaan nij so', rá nij so' a. <sup>22</sup>Dan me se cuchí' nij mozó ca'née nij sí uun chij yo' taga', gaa ne ne nari' mozó man nij apóstol rque taga' a ma'. Che'é dan me canicaj nij mozó yo' rej mán nij sí uun chij yo', ne nata' nij mozó yo' se vaa guun taga' a. <sup>23</sup>Dan me se cataj nij mozó yo' a:

—Dan me se gaa cuchí' núj taga', ne vaa raan taga', ne nicun' nij tanuu rihaan ta'yaa, tumé nij tanuu ta'yaa a. Tzaj ne gaa ca'núj núj ta'yaa, ne ne nari' núj a 'ó yuvií rá taga' a ma' —taj nij mozó rihaan nij sí uun chij yo' a.

<sup>24</sup>Dan me se gaa cuno tanuu uun chij rihaan nij tanuu tumé nuví nocço do', gaa cuno nij xrej atá suun nocço doj do', nana vaa danj, gaa ne dan me se cuchu'vi' nij so', ne ne quene'en nij so' daj guun rej rihaan nij so' qui'yaj nij sí nocço' man Jesucristó a. <sup>25</sup>Gaa ne dan me se cuchí' yo' o so' rihaan nij sí uun chij, gaa ne nata' so' rihaan nij so', cataj so':

—Xa' nij sí caxrįj nij soj taga' man, tzaj ne cuano nihánj me se nicun' nij so' rá nuví nocço, tucu'yón uxrá nij so' rihaan nij yuvií nanj á —taj sí ca'na' rihaan nij so' a.

<sup>26</sup>Gaa ne cavii tanuu uun chij rihaan nij tanuu tumé nuví nocço cavii nij mozó cavii, ca'anj nij so' nuví nocço, ne ca'anj nacaj nij so' man nij apóstol cune' Jesucristó man rihaan nij sí uun chij yo' a. Tzaj ne ne qui'yaj nij so' fuerzá man nij sí cune' Jesucristó man ma'. 'O se cuchu'vi' tanuu do', nij mozó do', ni'yaj nij so' man nij yuvií se vaa go' nij yuvií yahij xráa ma'an nij so' a.

<sup>27</sup>Dan me se ca'na' nicaj nij so' man nij apóstol rej cunu chre' cunudanj nij sí uun chij rihaan nij yuvií israelitá a. Gaa ne xna'anj xrej atá suun nocço doj man nij so', <sup>28</sup>cataj so' a:

—Né se aj cataj xna'anj núj rihaan nij soj se vaa ca'ne' rá soj ga suun tucu'yón rihaan nij yuvií che'é sí nata' soj che'é a. Tzaj ne cuano nihánj me se aj cuchí' se nana soj rihaan cunudanj nij sí man chuman' Jerusalén nihánj, qui'yaj soj, ne me rá soj caraa soj cacun' xráa núj se vaa cavi' snó'o nocço' soj qui'yaj núj á —taj so' rihaan nij apóstol a.

<sup>29</sup>Gaa ne cataj Pedró do', yo'ó nij apóstol cune' Jesucristó man do' a:

—Tzaj ne 'o se no xcúun ní' cunç ní' asino yaan nana a'mii Diose rihaan nana a'mii yuvií a. <sup>30</sup>'O se nij soj me

sí toco' man Jesucristó rihaan rcutze, ne cavi' so', qui'yaj soj, ne Diose noco' xii ní' asij naá ro', me sí qui'yaj cunu i'na' uún so' adonj. <sup>31</sup>Gaa ne ma'an Diose qui'yaj cavii Jesucristó xta', ne nicun' Jesucristó rej x'nuj Diose rej nuva' Diose, ne guun Jesucristó sí uun chij ndo'o, ne sí tinanii man ní' rihaan sayuun guun so', che'é rej ca'vee canicaj nimán ní' sij israelitá gaa ne quinavij cacun' tumé ní' adonj. <sup>32</sup>Ne núj me sí nata' nana nihánj rihaan yuvií ei. Ne ne'en Nimán Diose uún se vaa ya ya vaa nana nihánj, ne rqué Diose Nimán Diose rihaan núj sij uno rihaan Diose a —taj nij so' rihaan nij sí uun chij rihaan nij yuvií israelitá a.

<sup>33</sup>Dan me se gaa cuno nij sí uun chij nana nihánj, gaa ne ca'maan uxrá rá nij so', gaa ne guun rá nij so' ticavi' nij so' man nij apóstol yo' a. <sup>34</sup>Tzaj ne canicun' caya yo' o tuvi' nij so' 'o sí fariseo sí cu'naj Gamaliel, ne sí naquiyaj cyu se tucuanj Moisés me so', ne caráj cochroj cunudanj nij yuvií ni'yaj nij yuvií man so' a. Gaa ne ca'ne' so' suun se vaa curihanj nij apóstol doj 'o orá nii xe' a. <sup>35</sup>Gaa ne cataj Gamaliel rihaan yo'ó nij sí uun chij yo' a:

—Cunç soj sij israelitá nana ca'mij rihaan nij soj cuano á. Dan me se tadó soj daj qui'yaj soj ga nij snó'o ca'na' rihaan ní' nihánj á. <sup>36</sup>'O se asij rque doj me se nachumaan 'o sí cu'naj Teudas, ne so' ro', me sí cataj se vaa sij sa' uxrá me ma'an so', ne canoco' 'o ca'anj cientó yuvií xcó so' ta' asuun a. Gaa ne ticavi' nii man so', ne cha'nuu cunudanj nij sí cuno se nana so', ne navij nu' se nana so' nanj adonj. <sup>37</sup>Gaa ne dan me se cachén doj, gaa ne cavii yo'ó sí cu'naj Judas sí cavii estadó Galilea, ne nachumaan so' gaa güii cachrón gobiernó se chuvia cunudanj nij yuvií rihaan yanj a. Gaa ne tiha' yu'unj so' man yuvií, ne canoco' nij yuvií xcó so' a. Gaa ne cavi' so' uún, gaa ne cunudanj nij yuvií cuno se nana so' cha'nuu uún a.

<sup>38</sup>Ne cuano nihánj me se cataj xna'anj 'unj rihaan nij soj se vaa se qui'yaj nij soj a doj sayuun man nij sí ca'na' rihaan ní' cuan' ma'. 'O se sese tucuaán cuchruj yuvií uun me se tucuanj nij so', ne sese 'yaj nij so' ndaa vaa avii raq ma'an nij so', ne quiri' nu' se vaa 'yaj nij so' nanj adonj. <sup>39</sup>Tzaj ne sese Diose me sí rque se nana nij so', ne sese 'yaj suun nij so' se suun Diose, ne daj chihaa mį se ca'anj ni'ya se nana nij so' qui'yaj soj ma'. Sese danj guun qui'yaj nij soj, ne sí unu' ga ma'an Diose me nij soj adonj —taj sí cu'naj Gamaliel cuno yo'ó nij sí uun chij rihaan nij yuvií israelitá a.

Dan me se cuchumán rá nij so' se nana sí cu'naj Gamaliel yo', <sup>40</sup>gaa ne canacúun nij so' man nij apóstol, ne catúj nij so' rej mán nij so', gaa ne go' nii rutzii xráa nij apóstol, qui'yaj nij sí uun chij, ne ca'ne' nij so' suun rihaan nij apóstol se vaa se ca'mii nij so' a 'ó nana che'é Jesucristó rihaan nij yuvií, gaa ne na'née nij sí uun chij yo' chrej man nij apóstol a. <sup>41</sup>Dan me se curihanj nij apóstol rej mán nij sí uun chij rihaan nij yuvií israelitá, ne guun niha' rá nij apóstol che'é se sij vaa sa' me nij so' ni'yaj Diose ne che'é dan ca'vee quiran' nij so' sayuun che'é Jesucristó qui'yaj Diose a. <sup>42</sup>Ne daj a güii me se cunu chre' nij apóstol rá nuví

noc̄o do', rá ve' tucuá nij so' do', ne yo'o tucu'yón nij so' man nij yuvij, ne nata' nij so' se nana Jesucristó nana sa' rihaan nij yuvij a.

**Nana nihánj taj xna'anj daj cune' nii man chij síf 'yaj suun che'é nij síf cuchumán rá ni'yaj man Jesucristó a**

**6** Ne güii dan me se guun rij doj nij síf tucu'yón se nana Jesucristó, ne dan me se ta'aj nij so' me síf a'mii xna'ánj griego, ne yo'ó ta'aj nij so' me síf a'mii xna'ánj hebreo a. Ne dan me se nij ca'mii nij síf a'mii xna'ánj griego ni'yaj nij so' man nij síf a'mii xna'ánj hebreo, che'é se chá go' nij síf a'mii xna'ánj hebreo yo' rihaan nij chana nique cavi' nicá daj a güii a. Ne rihaan nij chana nique cavi' nicá níf a'mii xna'ánj griego me se ne cuyaañ go' nij so' se chá chá nij no' a ma'. Ne che'é dan a'maan rá nij síf a'mii xna'ánj griego a. <sup>2</sup> Che'é dan chujij nij apóstol cune' Jesucristó man ro', canacúun nij so' man nij síf tucu'yón se nana Jesucristó cunuu chre' nij so', ne cataj chujij nij so' a:

—Nij uxrá vaa sese tanáj xc̄o núj suun nata' se nana Dioso rihaan yuvij che'é rej qui'yaj chujij núj co'oo rihaan nij chana cavi' nicá adonj. <sup>3</sup> Che'é dan narij nij soj chij tinúu níf síf ve'é a'mii nii ni'yaj nii man, tinuj. Dan me se nan̄o' soj síf nuu ndo'o Nimán Dioso nimán, ne síf cuy rañ nan̄o' soj, ne cun̄e' níf man nij so' se vaa qui'yaj suun nij so' suun nihánj á. <sup>4</sup> Ne xa' núj, tzaj ne inanj suun yo'o cachinj ni'yaj rihaan Dioso qui'yaj suun núj, ne nata' núj se nana Dioso nanj á —taj chujij nij apóstol cune' Jesucristó man nata' se nana so' a.

<sup>5</sup> Dan me se guun niha' rá cunudanj nij yuvij gaa cuno nij yuvij nana yo', ne narij nij yuvij man chij tinúu nij so', ne yo'o so' me síf cu'naj Esteban, ne so' ro', me síf nucuaj uxrá rá ni'yaj man Dioso, ne nuu ndo'o Nimán Dioso nimán so' a. Ne narij uún nij so' man síf cu'naj Felipé do', Prócoro do', Nicanor do', Timón do', Parmenas do', Nicolás do' a. Ne nuveé sij israelitá me Nicolás, mañ ne síf guun rá canoco' se tucuanj nij síf israelitá guun so', ne síf cavii chuman' Antioquia me so' uún a. <sup>6</sup> Ne dan me se nicaj nij yuvij man chij nij so' ca'anj nij so' rihaan chujij nij apóstol cune' Jesucristó man, ne nij apóstol me se cachíin ni'yaj nij so' rihaan Dioso, gaa ne cuta' nij so' ra'a nij so' rañ chij nij so' che'é yan go' nij so' se chá rihaan nij chana nique cavi' nicá a.

<sup>7</sup> Dan me se cha'nuu uxrá se nana Dioso, ne guun rij ndo'o doj nij síf tucu'yón se nana Jesucristó chuman' Jerusalén yo', ne ndaa que'ee uxrá nij xrej israelitá cuchumán rá se nana Jesucristó ne cuno rihaan Jesucristó a.

**Nana nihánj taj xna'anj daj qui'yaj nii gaa quita'aa nii man síf cu'naj Esteban a**

<sup>8</sup> Dan me se síf cu'naj Esteban me se racuj ndo'o Dioso man so', ne guun nucuaj ndo'o so', ne dan me se qui'yaj ndo'o so' suun sa' noc̄o ni'yaj nij síf man rej chuman' Jerusalén a. <sup>9</sup> Tzaj ne canicun' que'ee yuvij, ne ta'aj nij so' me síf 'anj ve' tucu'yón rej nuu chre' nij síf

qui'yaj canaán curihanj rihaan se ru'vee nij so', ne yo'ó ta'aj nij so' me síf cavii chuman' Cirene, ne yo'ó ta'aj nij so' me síf cavii chuman' Alejandría, ne yo'ó ta'aj nij so' me síf cavii rej cu'naj Cilicia do', rej cu'naj Asia do' a. Dan me se canó tuvi' taran' nij so' ga síf cu'naj Esteban, <sup>10</sup> tzaj ne ne ca'vee qui'yaj canaán se nana nij so' rihaan se nana Esteban a ma'. 'Q se racuj ndo'o Nimán Dioso man síf cu'naj Esteban, ne cavii ndo'o nana cuy rañ so', qui'yaj Nimán Dioso a. <sup>11</sup> Gaa ne caxrij nij so' chrej rque yo'ó ta'aj snó'o uún, ne snó'o yo' cataj:

—Cuno núj se vaa ca'mii síf cu'naj Esteban yo' nana nij che'é síf cu'naj Moisés ga ma'an Dioso á —taj nij snó'o yo', ca'mii ne nij so' a.

<sup>12</sup> Gaa ne ca'maan rá nij yuvij do', nij síf uun chij rihaan nij yuvij israelitá do', nij síf naqui'yaj cuy se tucuanj Moisés rihaan yuvij do', gaa cuno nij so' se nana nij síf ne yo' a. Gaa ne cavii nij so', quita'aa cunudanj nij so' man Esteban, ne ca'anj nicaj nij so' man so' rá ve' nuu chre' nij so', qui'yaj nij so' juntá a. <sup>13</sup> Gaa ne canicun' doj síf ca'mii ne síf caraa cacun' xráá Esteban, ne cataj nij so' a:

—Síf nihánj ro', ne a'ne' rá so' ga suun a'mii quij che'é rej guue nihánj do', che'é tucuáan noc̄o' níf do', a ma'. <sup>14</sup> 'Q se cuno núj se vaa cataj so' se vaa Jesucristó síf cavii chuman' Nazaret me síf tirí' nu' nuví no-c̄o nihánj, ne natuna so' tucuáan cuchruj síf cu'naj Moisés che'é níf adonj —taj nij so', ca'mii ne nij so' ni'yaj nij so' man Esteban yo' a.

<sup>15</sup> Gaa ne ni'yaj uxrá cunudanj nij síf yanj rá ve' yo' man Esteban yo', ne ase vaa rihaan se mozó Dioso ro', danj vaa rihaan so', ni'yaj nij so' a.

**7** Gaa ne xna'anj xrej atá suun noc̄o doj man síf cu'naj Esteban, cataj xrej:

—Yá uxrá danj ca'mii so' dan tu'va nij so' danj che'é so' na' —taj so', xna'anj so' man Esteban a.

**Nana nihánj taj xna'anj daj ca'mii natáj síf cu'naj Esteban rihaan nij síf uun chij rihaan nij yuvij israelitá a**

<sup>2</sup> Gaa ne cataj síf cu'naj Esteban yo':

—Cun̄o soj ca'mij rihaan soj, tinuj, ta'núj. Dan me se gaa ataa cayáan xii níf síf cu'naj Abraham chuman' Harán, ne ni'ndaj ya ve'é vaa Dioso curuvi' rihaan so' rej vaj so' rej cu'naj Mesopotamia, <sup>3</sup> ne cataj Dioso rihaan so': "Curihanj so' chiháan so' rej ne nij tuví' so', ne cavij so' ca'anj so' 'o rej tijaán 'unj mán so' á", taj Dioso rihaan Abraham a. <sup>4</sup> Gaa ne dan me se curihanj so' rej ne nij síf caldeo, ne ca'anj so' cayáan so' chuman' Harán a. Gaa ne quisij cavi' rej so', ne cavii uún so', ca'anj so' cayáan so' yo'óo nihánj rej ne ma'an nij soj cuan̄o a. <sup>5</sup> Tzaj ne a doj yo'óo ne rque Dioso rihaan síf cu'naj Abraham ma'. Ne a 'o ta'níí Abraham ne ca'n-gaa gaa cata' tu'va Dioso rihaan so' se vaa guun si'yaj nij ta'níí ta'nij si'n̄o Abraham man yo'óo nihánj nanj á.

<sup>6</sup> "Gaa ne cataj uún Dioso rihaan so' se vaa ca'anj cayáan nij ta'níí ta'nij si'n̄o so' to'óo yo'ó yuvij, ne guun nij so' mozó cunuú rihaan yo'óo nij yuvij yo', ne tucuxru' yo'óo nij yuvij man nij so' cunu' ca'anj cientó

yo' a. <sup>7</sup> Ne xə' nij yuvij guun nij so' mozó rihaan, tzaj ne ma'an Diose qui'yaj sayuun man nij yuvij yo', gaa ne cyrihanj nij ta'níi ta'nij si'no Abraham rej yo', ne naman nij so' cayáan nij so' rej nihánj, ne canoco' nij so' man Diose, ne qui'yaj suun nij so' che'é Diose, taj Diose rihaan Abraham gaa naá a.

<sup>8</sup> "Dan me se cata' tu'va Diose se vaa qui'yaj Diose danj che'é nij tuvi' Abraham, gaa ne ca'ne' Diose suun se vaa cutə' taran' nij tuvi' Abraham ta'nga' man nij so', che'é se yuvij 'nij ra'a Diose man me nij so' a. Ne dan me se ca'ngaa ta'níi Abraham síi cu'naj Isaac, ne cuta' Abraham ta'nga' man so' gaa vaj so' tunj güii a. Ne danj qui'yaj Isaac uún che'é ta'níi so' síi cu'naj Jacob, ne danj qui'yaj uún Jacob che'é nij ta'níi so' chujij nij xii ní' nij síi cayáan gaa naá a.

<sup>9</sup> "Gaa ne dan me se guun xcoj ruvaá rá nij xii ní' ni'yaj nij so' man tinúu nij so' José, gaa ne cutu'vej nij so' man so' rihaan síi ca'anj nicaj man so' ndaa rej yo'óo cu'naj Egiptó a. Ne Diose vaj ga so', <sup>10</sup> ne tinanii Diose man so' rihaan ní' sayuun quiran' so' a. Gaa ne guun rá síi nicaj suun rey síi cu'naj Faraón ni'yaj so' man José, ne síi sa' ndo'o avii raá guun José rihaan Faraón, qui'yaj Diose a. Gaa ne cune' Faraón man José se vaa guun chij José rihaan rej Egiptó, ne ndaa rihaan nu' ve' tucua Faraón guun chij José a.

<sup>11</sup> "Gaa ne cachén ndo'o x'naa nu' rej Egiptó do', rej yo'óo cu'naj Canaan do', ne quiran' ndo'o nij yuvij sayuun, ne xii ní' ro', ne guun nucuaj nij so' quirí' nij so' se cha nij so' ma'. <sup>12</sup> Gaa ne cuno Jacob nana se vaa vaa 'núu trigó ane' rej Egiptó, ne che'é dan tihaj yuun ca'née so' man nij ta'níi so' ca'anj nij so' nanə' nij so' 'núu trigó a. <sup>13</sup> Dan me se quisij vij ca'anj nij so' rej Egiptó, gaa ne cataj xna'anj José rihaan nij so' se vaa tinúu nij so' me so', gaa ne dan me se xcaj Faraón cuentá me rej cavii José a.

<sup>14</sup> "Gaa ne ca'née José nana rihaan rej so' Jacob se vaa ca'anj nij tuvi' Jacob cayáan nij so' rej Egiptó, ne dan me se va'nuj chihaa xnu' yuvij me nij tuvi' Jacob yo' a. <sup>15</sup> Gaa ne dan me se ca'anj Jacob rej Egiptó a. Cachén doj, gaa ne cavi' so', ne cavi' nij ta'níi so' xii ní', <sup>16</sup> gaa ne ca'anj nicaj nii man cúu man nij so' ndaa chuman' cu'naj Siquem, ne dan me se cachin' nii man cúu man nij so' rque yu'uj yuvej aj quiránj Abraham rihaan nij ta'níi síi cu'naj Hamor rej chuman' Siquem yo' a.

<sup>17</sup> "Dan me se gaa quinichrun' güii quisij ya nu' nana aj cata' tu'va Diose rihaan Abraham gaa naá, ne dan me se xna'anj nij yuvij israelitá yo' rej Egiptó, ne guun rij ndo'o doj nij so' a. <sup>18</sup> Danj qui'yaj nij so' ndaa se catúj yo'óo síi nicaj suun rey yo'óo Egiptó, ne ne ne'en so' a doj che'é síi cu'naj José a ma'. <sup>19</sup> Ne so' me síi tihaj yu'unj man tuvi' ní' nij yuvij israelitá, ne tucuxru' so' man xii ní' nij yuvij israelitá yo' a. Dan me se ca'ne' so' suun se vaa quirí'ij nii man ta'níi nij yuvij israelitá ne'ej leé no xe', che'é rej caví' ta'níi nij so' a. <sup>20</sup> Ne maañ tió dan me se ca'ngaa síi cu'naj Moisés, ne caran' rá Diose ni'yaj so' man Moisés, ne rque va'nuj yavii tucuchij rej so' ga nii so' man so' tucua rej so' a. <sup>21</sup> Gaa ne caxríj yuve roj so' man ne'ej cu'naj Moisés

xe' yo'óo rej yaníj, gaa ne dan me se nacaj ma'an ta'nij chana Faraón man ne'ej cu'naj Moisés yo', ne tucuchij no' man so' ase 'yá' ga ta'níi ma'an' qui'yaj no' a. <sup>22</sup> Gaa ne tucuyón nii nu' se nana nij síi man Egiptó nana cyu man síi cu'naj Moisés, ne sca' a'mii so' ne sca' 'yaj suun so' a.

<sup>23</sup> "Dan me se quisij síi cu'naj Moisés vij chihaa yo', gaa ne guun rá so' ca'anj ni'yaj so' daj ran' nij tuvi' so' nij yuvij israelitá a. <sup>24</sup> Ne dan me se quene'en so' se vaa tucuxru' yo'óo síi man yo'óo Egiptó man 'o síi israelitá a. Che'é dan guun rá síi cu'naj Moisés yo' nayan cuentá che'é tuvi' so' síi israelitá, ne che'é dan go' so' man síi man yo'óo Egiptó yo' a. <sup>25</sup> Gaa ne guun rá síi cu'naj Moisés se vaa xcaj nij tuvi' so' síi israelitá cuentá se vaa Diose raculj man so' tinanii so' man nij so' rihaan nij síi man Egiptó, tzaj ne ne xcaj nij so' cuentá ma'.

<sup>26</sup> "Dan me se yo'óo güii me se cuhi' so' rej man nij yuvij israelitá, ne dan me se vij tuvi' nij so' cunu', ne guun rá so' na'mij sa' uún roj so', ne che'é dan cataj so': "Tinuj. Me che'é unu' roj tinuj roj soj ga", taj so' rihaan roj so' a. <sup>27</sup> Ne síi tucuxru' man tuvi' ro', tiguíj ra'a so' man Moisés, ne cataj so': "Taj vaj síi cune' man so' guun chij so' rihaan nuj ne ca'ne' so' cacun' che'é nuj ma'. <sup>28</sup> Ne nihánj me se guun rá so' ticavi' so' manj, ndaa vaa ticavi' so' man síi man yo'óo Egiptó quii na", taj síi tucuxru' man tuvi' rihaan síi cu'naj Moisés yo' a. <sup>29</sup> Gaa ne che'é se xcaj síi cu'naj Moisés cuentá se vaa cha'nuu ndo'o nana se vaa ticavi' so' man 'o síi man yo'óo Egiptó, gaa ne che'é dan cunánj so', ne ca'anj so' cayáan so' rej cu'naj Madián a. Ne xcaj so' chana, ne ca'ngaa vij ta'níi so' snó'o cunii a.

<sup>30</sup> "Dan me se cachén vij chihaa yo', gaa ne rej tacaan nichrun' quij cu'naj Sinaí me se quene'en so' 'o coj aco' ya'an raá, ne curuvi' yo'óo se mozó Diose rque ya'an yo' quene'en so' a. <sup>31</sup> Ne ca'anj rá Moisés gaa quene'en so' rasuun ya'anj yo', ne guun rá so' quinichrun' so' rihaan coj yo' ni'yaj so' man yo', tzaj ne cuno so' ca'mii síi 'nij ra'a man ní', <sup>32</sup> ne dan me se cataj síi 'nij ra'a man ní': "Unj ro', me Diose nocə' nij xií so' gaa naá a. Dan me se Diose nocə' síi cu'naj Abraham do', síi cu'naj Isaac do', síi cu'naj Jacob do', mé 'unj á", taj Diose síi 'nij ra'a man ní' cuno Moisés a. Gaa ne kuchu'vi' Moisés ne quirí'ij man so', ne ne quisij rá so' ni'yaj so' coj aco' ya'an raá yo' a. <sup>33</sup> Gaa ne cataj síi 'nij ra'a man ní' rihaan so' a: "Quirij so' canj 'nij tacóo so' á. 'O se yo'óo nicun' so' cuano ro', me yo'óo guu ndo'o adonj. <sup>34</sup> Dan me se ni'yaj 'unj, ne quene'én 'unj sayuun ran' nij yuvij nocə' manj rej Egiptó, ne cunoj daj rnúj nij so' che'é sayuun ran' nij so', ne nihánj me se nanij 'unj che'é se me raj tinanii 'unj man nij so' rihaan sayuun ran' nij so' a. Che'é dan cuva' so', ne ca'nej 'unj man so' rej Egiptó á", taj síi 'nij ra'a man ní' rihaan Moisés a.

<sup>35</sup> "Dan me se xə' Moisés, tzaj ne so' me síi quirí'ij yaníj nij yuvij israelitá man gaa cataj nij so' se vaa taj vaj síi cune' man so' guun chij so' rihaan nij so' ne ca'ne' so' cacun' che'é nij so' ma'. Tzaj ne so' me síi

ca'néé ma'an Diose se vaa guun chij so' rihaan nij yuvií israelitá ne quirii so' man nij yuvií israelitá rej guun nij so' mozó rihaan yo'ó yuvií a. Daj qui'yaj Diose ga Moisés gaa quene'en Moisés se mozó Diose yo' rque coj aco' ya'an raq yo' a. <sup>36</sup> Dan me se curihanj nij yuvií israelitá rej cu'naj Egipto, qui'yaj Moisés, ne qui'yaj ndo'o so' suun sa' nocoo Egipto do', rej naj na ya'anj cu'naj Na Ya'anj Maree do', rej tacaan vaj nij so' vij chihaa yo' do' a. <sup>37</sup> Ne ma'an Moisés yo' me sí cataj rihaan nij sí israelitá: "Vaa güii, ne yo'o tuvi' soj ro', guun sí nata' se nana Diose, qui'yaj Diose, ne ase vaa yaá 'unj ro', daj qui'yaj so' uún a", taj Moisés rihaan nij yuvií israelitá a.

<sup>38</sup> Ne Moisés me sí vaj ga cunudanj nij yuvií israelitá rej tacaan, ne cachéé so' ga se mozó Diose sí ca'mii rihaan so' rej tacaan nichrun' quij cu'naj Sinaí, ne cachéé so' ga nij xii ní' uún, ne so' me sí nata' Diose se nana Diose nana nucuaj rihaan, che'é rej tachuachén so' nana yo' ndaa rihaan ní' a. <sup>39</sup> Tzaj ne ne ca'vej rá nij xii ní' cunqo nij so' rihaan Moisés ma'. 'O se tanaj xco nij so' se nana so', ne guun inanj rá nij so' qui'yaj nij so' ndaa vaa 'yaj nij so' rej Egipto a. <sup>40</sup> Dan me se cataj nij xii ní' rihaan sí cu'naj Aarón, ne: "Qui'yaá so' ya'anj canoco' ní', gaa ne quitaj yaan ya'anj yo' rihaan ní' cachee ní' á. 'O se xa' Moisés sí qui'yaj curihanj ní' rej cu'naj Egipto, tzaj ne ne ne'en uxrá núj daj quiran' so' a ma'", taj nij yuvií rihaan Aarón a. <sup>41</sup> Ne güii dan me se qui'yaj nij yuvií israelitá 'o scúj le'ej, ne guun yo' ya'anj noco' nij so', ne rqué ndo'o nij so' rasuun rihaan ya'anj yo', gaa ne guun niha' rá nij so' ni'yaj nij so' ya'anj qui'yaj ma'an nij so' a.

<sup>42</sup> Che'é dan guun yanj Diose rihaan nij yuvií israelitá, ne ca'néé ra'a Diose man nij so' na'vij nij so' rihaan nij rasuun vaq rej xtá', ne dan me se na'vij nij so' rihaan güii do', rihaan yavii do', rihaan nij yati' do' a. Dan me se daj inanj taj nana no rihaan yanj qui'yaj nij sí nata' se nana Diose gaa naá, ne nana yo' taj: "Taj vaj rasuun rqué nij soj sij israelitá rihanj gaa vaj soj rej tacaan vij chihaa yo' ma'. Taj vaj xcuu cacaa rihanj, qui'yaj soj ma'. <sup>43</sup> Tananj catá soj ve' mantá nuu ya'anj cu'naj Moloc, ne catá soj yati' chraan, ne guun yo' ya'anj cu'naj Renfán rihaan soj nanj adonj. Dan me se ya'anj qui'yaj ma'an soj na'vij soj rihaan me roj ya'anj yo', ne che'é dan nonaj rej cane soj, ne rej xco chuman' Babilonia cayáán soj, qui'yaj adonj", taj Diose rihaan nij xii ní' a.

<sup>44</sup> Dan me se nicaj xii ní' nuvíí mantá, ne ve' nata' ma'an Diose nana rihaan nij xii ní' gaa vaj nij so' rej tacaan me ve' yo' a. Ne nuvíí mantá yo' ro', qui'yaj Moisés man yo' ndaa vaa cataj xna'anj Diose rihaan so' a. Dan me se ase vaa nuvíí mantá tihaan Diose rihaan Moisés, daj vaa qui'yaj so' a. <sup>45</sup> Ne ca'anj nicaj nij xii ní' ga sí cu'naj Josué man nuvíí mantá yo' ndaa to'óo yuvií yanj, ne dan me se quirii yanj Diose man nij yuvií yanj rihaan to'óo nij so', ne catúj nij xii ní', qui'yaj Diose a. Ne nuvíí mantá yo' me rej quina'vij nij xii ní' rihaan Diose ndaa se cayáán sí cu'naj David sí nicaj suun rey a.

<sup>46</sup> Ne David ro', guun niha' rá Diose ni'yaj Diose man so', ne cachíín ni'yaj so' rihaan Diose se vaa ca'vej rá Diose cune' so' nuvíí nocoo rej na'vij nii rihaan ta'anj sí cu'naj Jacob a. <sup>47</sup> Ne sí cu'naj Salomón me sí cune' nuvíí yo' a. <sup>48</sup> Tzaj ne nuveé sij ne rá ve' une' yuvií me Diose sí 'nij ra'a nu' chumii ma'. 'O se cataj xna'anj sí nata' se nana Diose se vaa ma'an Diose cataj: <sup>49</sup> "Rej xtá' ro', me chruun xlá sa' táá 'unj, ne yo'óo ro', me rej taj tacój adonj. Che'é dan taj che'é cune' nij soj ve' cané 'unj ma', taj sí 'nij ra'a man ní', ne taj uún so': Taj rej qui'yaj soj naraan rá 'unj ma'. <sup>50</sup> 'O se ma'anj ra'aj qui'yaj nu' nij rasuun nihánj adonj", taj ma'an Diose a.

<sup>51</sup> "Dan me se nichraj ndo'o rá soj, ne nuveé sij niha' rá xcáj cuentá che'é tucuáán sa' me soj ma'. Tananj niganj anó tuvi' soj ga Nimán Diose adonj. Ase vaa qui'yaj xii soj ro', daj 'yaj guee ma'an soj uún nanj á. <sup>52</sup> Dan me se canoco' xii soj man cunudanj nij sí nata' se nana Diose, ne guun rá nij so' qui'yaj nij so' sayuun man nij so', ne ndaa ticavi' nij so' man nij sí nata' che'é sí sa' ca'nej Diose rihaan chumii nihánj tinanii man yuvií rihaan sayuun ei. Ne sí sa' yo' me se guun nij soj sí tachuachén man so' rihaan nij sí taj ri'yunj man ní', ne ndaa ticavi' nij soj man so' vaa ei. <sup>53</sup> Dan me se soj me sí guun rá se vaa se tucuaj Diose ro', me nana cataj xna'anj nij se mozó Diose rihaan soj, tzaj ne ne uno soj nana yo' ma' —taj sí cu'naj Esteban rihaan nij sí uun chij rihaan nij yuvií israelitá a.

#### Nana nihánj taj xna'anj daj qui'yaj nii gaa ticavi' nii man sí cu'naj Esteban a

<sup>54</sup> Dan me se gaa cuno nij sí uun chij rihaan nij yuvií israelitá nana vaa daj, gaa ne cuyanj rá nij so', ne ndaa chá ruj ma'an nij so' tu'va nij so' ni'yaj nij so' man Esteban a. <sup>55</sup> Tzaj ne Esteban ro', caraa ndo'o Nimán Diose nimán so', ne dan me se ni'yaj so' rej xtá', ne quene'en so' rej ve'é ndo'o vaa rej nicun' Diose, ne quene'en so' se vaa nicun' Jesucristó rej x'núú Diose rej nuva' Diose a. <sup>56</sup> Gaa ne cataj sí cu'naj Esteban a:

—Nihánj me se nax'núj rej xtá' ni'yaj 'unj, ne ne'én 'unj man sí ca'néé Diose nicaj yu'unj man yuvií se vaa nicun' so' rej x'núú Diose rej nuva' Diose á —taj so' no nij sí uun chij a.

<sup>57</sup> Gaa ne nucuaj ndo'o caguáj nij so', ne caráán ra'a nij so' xrée nij so', che'é rej ne ca'vej daj chihaa míj rá nij so' cunqo nij so' a doj se nana Esteban a ma'. Gaa ne cunanj cunudanj nij so' ndaa rej nicun' Esteban, ne quita'aa cunudanj nij so' man so', <sup>58</sup> ne quirii nij so' man Esteban rque chuman' Jerusalén yo', ne guun che'e nij so' go' nij so' yahij man Esteban a. Dan me se nij sí caraa cacun' xráá Esteban me se cuchruj nij so' sagan' nij so' rihaan yo'óo rej nicun' 'o sí tachruu cu'naj Saulo a. <sup>59</sup> Gaa ne go' ndo'o nij so' yahij man Esteban, ne cachíín ni'yaj so' rihaan Jesucristó, ne cataj so':

—Nihánj me se nacaj so' nimanj, Jesucristó Sí Chij —taj so', cachíín ni'yaj so' rihaan Jesucristó a.

<sup>60</sup> Gaa ne canicun' ruj so', ne nucuaj ndo'o caguáj so', cataj so':



—Se caraá so' cacun' nihánj xráá nij so', man Síí Chij —taj so', gaa ne cavi' so' a.

**8** Ne síí cu'naj Saulo yo' ro', cunaj quiran' Esteban rá so' a.

**Nana nihánj taj xna'anj che'é sayuun qui'yaj síí cu'naj Saulo man nij yuvij cuchumán rá ni'yaj man Jesucristó a**

Ne güii dan me se guun che'e nii qui'yaj ndo'o nii sayuun man nij síí cuchumán rá ni'yaj man Jesucristó síí ne chuman' Jerusalén a. Dan me se cunánj nij so' chuman' Jerusalén, ne ca'anj nij so' ndaa nu' estadó Judea do', estadó cu'naj Samaria do' a. Tzaj ne orún' ma'an nij apóstol cune' Jesucristó man nata' se nana so' ro', me nij síí yo'q quináj chuman' Jerusalén a. <sup>2</sup> Ne dan me se ta'aj nij síí sa' nimán cachin' man Esteban, ne ta'vee uxrá nij so' che'é se vaa cavi' so' a. <sup>3</sup> Tzaj ne síí cu'naj Saulo me se síí taj ri'yunj man nij síí cuchumán rá ni'yaj man Jesucristó me so', ne ticavi' so' man nij síí nocó' man Jesucristó a. Dan me se cuchí' so' ve' ne 'o 'o nij síí nocó' man Jesucristó, ne quita'aa so' man nij so', ne dan me se nu' snó'o nu' chana nu' quita'aa so', ne caxrj so' taga' man nij so' a.

**Nana nihánj taj xna'anj se vaa cuchí' se nana Diose chuman' cu'naj Samaria a**

<sup>4</sup> Dan me se nij síí cunánj me se chéé ndo'o nij so' nata' nij so' se nana Diose nana sa' rihaan yuvij a. <sup>5</sup> Ne síí cu'naj Felipé ca'anj chuman' Samaria, ne ca'mii natáj so' se nana Jesucristó rihaan nij yuvij man chuman' yo' a. <sup>6</sup> Gaa ne cuno nij síí man chuman' Samaria se nana Felipé, ne quene'en nij so' nij suun sa' nocoo qui'yaj so', ne che'é dan guun nihá' ndo'o rá cunudanj nij so' cunó nij so' se nana Felipé a. <sup>7</sup> Dan me se que'ee nij nana chree curihanj nimán yuvij, qui'yaj so', ne nu-cuaj caguáj nij nana chree yo' gaa curihanj nij yo' a. Ne quinahuun que'ee nij síí ran' do', que'ee nij síí rengó do', <sup>8</sup> ne che'é dan guun nihá' uxrá rá nij síí ne chuman' Samaria yo' a.

<sup>9</sup> Ne dan me se gaa ataa cuchí' Felipé chuman' Samaria, ne vaa 'o snó'o cu'naj Simón chuman' yo', ne Simón me se qui'yaj chruun ndo'o so', ne ca'anj rá nij síí ne Samaria, qui'yaj so' a. Ne cataj so' rihaan nij yuvij se vaa síí sa' uxrá me ma'an so', <sup>10</sup> ne cunudanj nij yuvij caráya'anj uxrá se vaa qui'yaj so', ne dan me se nu' nij síí nocó' do', nu' nij síí uun chij do', cataj se vaa me so' síí atá ndo'o rej nucuaj, qui'yaj ma'an Diose, taj nij so', ni'yaj nij so' man Simón a. <sup>11</sup> Dan me se sa' ndo'o nanó xrej nij yuvij daj taj so', che'é se sa' ndo'o qui'yaj chruun so', ne ca'anj rá nij so', qui'yaj Simón a. <sup>12</sup> Dan me se gaa nata' Felipé se nana Diose nana sa' che'é suun uun chij Diose rihaan chumij nihánj do', nana che'é Jesucristó do', ne cuchumán rá nij yuvij nana yo', ne cata' ne snó'o do', chana do', che'é Jesucristó a. <sup>13</sup> Ne ndaa ma'an Simón cuchumán rá nana yo', ne cata' ne so', ne canoco' so' xcó Felipé, ne ca'anj rá

ma'an so' uún gaa quene'en so' nij suun sa' nocoo qui'yaj suun Felipé a.

<sup>14</sup> Dan me se cuchí' nana rihaan nij apóstol síí cune' Jesucristó man nata' se nana so' síí ne chuman' Jerusalén se vaa cuchumán rá nij síí man chuman' Samaria se nana Diose, ne che'é dan ca'néé nij so' man Pedró do', man Juan do', se vaa cuchí' roj so' rihaan nij síí ne chuman' Samaria, <sup>15</sup> ne dan me se cuchí' roj so', gaa ne cachín ni'yaj roj so' rihaan Diose che'é nij síí cuchumán rá ni'yaj man Jesucristó yanj chuman' Samaria se vaa catuú Nimán Diose nimán nij so' qui'yaj Diose a. <sup>16</sup> 'Q se ataa catuú Nimán Diose nimán nij so' a. Maan se tihaj cata' ne uun nij so' che'é Jesucristó sij 'nij ra'a man ní' a. <sup>17</sup> Dan me se cuta' ra'a Pedró gá Juan raá nij síí cuchumán rá ni'yaj man Jesucristó yanj chuman' Samaria, gaa ne catúj Nimán Diose nimán nij so' a.

<sup>18</sup> Dan me se quene'en síí chruun cu'naj Simón se vaa gaa cuta' ra'a Pedró gá Juan raá yuvij, ne catúj Nimán Diose nimán nij yuvij yo', ne che'é dan rquee so' sa'anj rihaan roj so', <sup>19</sup> ne cataj so':

—Rque 'unj sa'anj man roj soj, ne rque roj soj rej nu-cuaj nicaj roj soj mán 'unj, ne me ma'an 'o síí cuta' 'unj ra'aj raá, ne ca'vee catuú Nimán Diose nimán nij so', qui'yaj roj soj á —taj so' rihaan roj so' a.

<sup>20</sup> Gaa ne cataj Pedró rihaan so' a:

—Tadó so' se cacaá so' rihaan ya'an gá se sa'anj so' á. Me che'é guun rá so' se vaa ane' se rqué uun Diose gá. <sup>21</sup> Daj chiháá mój se ca'vee qui'yáá so' danj ma'. Ne vaa nicá a doj nimán so' rihaan Diose a man adonj. <sup>22</sup> Vaa che'é canicaj nimán so' tanáj so' tucuáán chi'ij nocó' so' nihánj, gaa ne cachinj ni'yáá so' rihaan Diose síí 'nij ra'a man ní' sese ca'vee caraá x'naa so' ndaa vaa guun rá so' á. <sup>23</sup> 'Q se cuangó nihánj me se xcax 'unj cuentá se vaa vaa chi'ij nu' nimán so' ei —taj Pedró rihaan Simón yo' a.

<sup>24</sup> Gaa ne cataj Simón:

—Cachinj ni'yaj roj soj rihaan Diose síí 'nij ra'a man ní' che'é 'unj se gaa nanj quirán' 'unj a doj se vaa cataj roj soj ruguanj —taj so' rihaan roj so' a.

<sup>25</sup> Dan me se nata' ndo'o roj so' se nana Diose síí 'nij ra'a man ní', gaa ne quinan' roj so' chuman' Jerusalén, ne nata' roj so' se nana Diose nana sa' rque que'ee chuman' naj estadó cu'naj Samaria a.

**Nana nihánj taj xna'anj se vaa cuchumán rá 'o síí eunuco cavii rej cu'naj Etiopía ni'yaj so' man Jesucristó a**

<sup>26</sup> Gaa ne ca'mii yo'q se mozó Diose rihaan síí cu'naj Felipé, cataj so':

—Cavii so', ca'anj so' rej sur ndaa chrej avii chuman' Jerusalén 'anj ndaa chuman' Gaza á —taj se mozó Diose rihaan Felipé a.

Dan me se chrej vaj rej tacaan inanj me chrej yo' a.

<sup>27</sup> Dan me se cavii Felipé, ca'anj so', ne gaa vaj so' chrej yo', ne quene'en so' 'o síí eunuco cavii yo'óo cu'naj Etiopía, ne síí nuu rihaan chana reiná cu'naj Candace uun chij rihaan nu' yo'óo Etiopía me síí eunuco yo' a. Ne síí tumé nu' se sa'anj chana reiná yo' me so'

a. Dan me se aj ca'anj so' chuman' Jerusalén na'vij so' rihaan Diose, <sup>28</sup> ne nihánj me se nan' so' chiháán so', ne táá so' cuchri' nucuaj cuayó, ne nayaa so' nana cahrón síí cu'naj Isaías síí nata' se nana Diose gaa naá rihaan yanj a. <sup>29</sup> Gaa ne dan me se cataj Nimán Diose rihaan Felipé a:

—Cuchij' so' rihaan cuchri' nucuaj cuayó 'na' nihánj, ne cachee so' rej x'núú cuchri' yo' á —taj Nimán Diose rihaan Felipé a.

<sup>30</sup> Dan me se cunanj Felipé rej x'núú cuchri', gaa ne cuno so' se vaa nayaa síí taj cuchri' se nana síí cu'naj Isaías síí nata' se nana Diose gaa naá a. Ne xná'anj Felipé man so', cataj Felipé:

—Ne ya uxrá unó so' nana nayaa so' na' —taj Felipé, xná'anj so' man síí eunuco yo' a.

<sup>31</sup> —'O se asá' ca'vee cunoj nana nihánj rá so', ne nuvi' síí tucu'yón nana nihánj manj ga —taj síí eunuco yo' rihaan Felipé, gaa ne canacúún síí eunuco man Felipé se vaa cavij Felipé cuchri' ne quitaj so' rej x'núú síí eunuco yo' a.

<sup>32</sup> Dan me se nana nayaa síí eunuco yo' ro', me nana nihánj a: "Ase vaa dínj tu'va matzinj gaa uchi' xo' rihaan síí ticavi' man xo' do', ase vaa dínj tu'va matzinj le'ej gaa uchi' xo' rihaan síí cacá cachij xráá xo' do', danj qui'yaj so', ne a doj nana ne ca'mij so' ma'. <sup>33</sup> Dan me se caxrij na'aj ndo'o nii man so', ne maan che'é se naqui'yaj nicá' so' nimán so', ne taj ca'ne' sa' cacun' che'é so' ma'. Tzaj ne a doj yuvij se guun nucuaj cataj xná'anj che'é cunudanj nij síí nocó' xná'anj tuvi' ga so', che'é se ne xná'anj so' a ma'. 'O se ne vaj so' rihaan chumij nihánj cuano ma'", taj se nana síí cu'naj Isaías nana nayaa síí eunuco yo' a.

<sup>34</sup> Dan me se xná'anj síí eunuco yo' man Felipé, cataj so':

—Me síí me síí quiran' nu' ndaa vaa taj xná'anj síí nata' se nana Diose nihánj ga. Ma'an síí nata' se nana Diose quiran' danj na'. Yo'ó so' xa' —taj síí eunuco, xná'anj so' man Felipé a.

<sup>35</sup> Gaa ne guun che'e Felipé cataj xná'anj so' daj taj ma'an nana yo' nana nayaa síí eunuco yo', gaa ne nata' so' nu' se nana Jesucristó nana sa' rihaan síí eunuco yo' a. <sup>36</sup> Dan me se gaa vaj roj so' chrej, ne cuchri' roj so' rej nuu doj na, gaa ne cataj síí eunuco:

—Nij'yaj so' ei. Nihánj me nuu na á. Ne ca'vee cata' ne 'unj na' —taj so', xná'anj so' man Felipé a.

<sup>37</sup> Gaa ne cataj Felipé rihaan so' a:

—Sese ya ya amán rá so' ni'yaj so' man Jesucristó, ne ca'vee a —taj Felipé rihaan so' a.

Gaa ne cataj síí eunuco rihaan Felipé a:

—Amán rá 'unj se vaa ta'níí Diose me Jesucristó ei —taj so' rihaan Felipé a.

<sup>38</sup> Gaa ne ca'ne' síí eunuco suun se vaa canicun' cuchri', gaa ne nanij roj so' rihaan yo'óo, gaa ne ca'anj roj so' rej nuu na, gaa ne cuta' ne Felipé man síí eunuco yo' a. <sup>39</sup> Dan me se gaa curihanj roj so' rá na, gaa ne naxcaj Nimán Diose man Felipé, ne ne quene'en uún síí eunuco yo' man Felipé a ma'. 'O se cavii síí eunuco yo', quinan' so', ne guun niha' rá so' a. <sup>40</sup> Ne Fe-

lipé me se aj nuú so' chuman' Azoto a. Gaa ne nu' nij chuman' naj rej vaj so' ro', nata' so' se nana Diose nana sa' rihaan nij síí ne nu' nij chuman' yo', ne danj qui'yaj so' ndaa se cuchri' so' chuman' Cesarea a.

**Nana nihánj taj xná'anj daj quiran' síí cu'naj Saulo gaa canicaj nimán so' qui'yaj Jesucristó a**

**9** Dan me se síí cu'naj Saulo me se 'o guun rá so' qui'yaj so' sayuun man nij síí nocó' se nana Diose sij 'nij ra'a man ní' ne ndaa guun rá so' cavi' nij so', ne che'é dan canoco' uxrá so' man nij síí nocó' man Jesucristó a. Ne ca'anj so' rej ne xrej ata' suun nocóo doj, <sup>2</sup> ne naxcaj so' yanj actá rihaan xrej, ne yanj actá yo' ro', ca'anj chuman' Damasco rihaan nij síí 'nij ra'a ve' tucu'yón nij yuvij israelitá se tucuaj Moisés a. Ne taj xná'anj yanj yo' rihaan nij so' se vaa sese nari' Saulo man nij síí nocó' man Jesucristó, ne se snó'o se chana se no xcuún so' numij so' man nij so' ne ca'anj nicaj so' man nij so' ndaa chuman' Jerusalén caxrii so' man nij so' taga' a. <sup>3</sup> Dan me se nicaj Saulo yanj, ne vaj so' chrej, ne quinichrun' so' chuman' Damasco yo', ne taj ni'yón cuchuguun nu' xtá' nu' anicaj rej nicun' so' a. <sup>4</sup> Gaa ne quinij so' rihaan yo'óo, ne dan me se cuno Saulo se vaa cataj yo' o so' rihaan so':

—Cunó so' ca'mij, Saulo. Me che'é 'yáá so' sayuun manj ga —taj nana cuno Saulo a.

<sup>5</sup> Gaa ne xná'anj Saulo man síí ca'mii rihaan so', cataj so':

—Síí Chij, me síí mé so' ga —taj so', xná'anj so' a.

Gaa ne síí ca'mii rihaan so' cataj:

—'Unj ro', me Jesús, ne 'yaj ndo'o so' sayuun manj adonj. <sup>6</sup> Tzaj ne naxagaa so' ca'anj so' ndaa chuman' Damasco, gaa ne cataj nii rihaan so' daj qui'yáá so' á —taj Jesucristó rihaan Saulo a.

<sup>7</sup> Ne nij snó'o vaj chrej ga Saulo me se canicun' nij so', ne a doj nana ne ca'mij nij so' a ma'. Ne cuno nij so' nana yo', tzaj ne taj a 'o rasuun ne quene'en nij so' a ma'. <sup>8</sup> Ne Saulo me se naxumaan so', ne nuxra' so' rihaan so', tzaj ne taj se qui'yá' quene'en so' ma'. Yuun che'e caráán rihaan so' nanj adonj. Gaa ne quita'aa yo'óo nij so' ra'a so', ne racujij nij so' man Saulo chéé Saulo, ne ca'anj nij so' chuman' Damasco a. <sup>9</sup> Ne quisij va'nuj güii ne ca'vee quene'en so' ma'. Ne ne cha' so' ne ne co' o so' na a ma'.

<sup>10</sup> Dan me se chuman' Damasco ro', yáán 'o síí tucu'yón se nana Jesucristó, ne Ananías cu'naj so' a. Ne naqui'yaa Diose sij 'nij ra'a man ní' rihaan so', ne cataj so' a:

—Cunó so' ca'mij, Ananías —taj Diose sij 'nij ra'a man ní' no so' a.

—Nihánj né 'unj unó 'unj a'mii so' á —taj Ananías rihaan Diose sij 'nij ra'a man ní' a.

<sup>11</sup> Gaa ne cataj Diose sij 'nij ra'a man ní' rihaan Ananías a:

—Canicun' cayá so' ca'anj so' callé cu'naj Callé Nicá, ne cuchij' so' ve' tucua' síí cu'naj Judas, ne nana so' o síí cu'naj Saulo síí cavii chuman' Tarso á. 'O se cuano nihánj me se achín ni'yaj so' rihanj, <sup>12</sup> ne dan me se

gaa cachíin ni'yaj so' ne naqui'yaa 'o síi cu'naj Ananías rihaan so', qui'yáj adonj. Ne catúj Ananías yo' rihaan so', ne cuta' ra'a so' raá Saulo, che'é rej ca'vee curuvi' uún rihaan so' qui'yáj a —taj Diose sij 'nij ra'a man ní' rihaan Ananías a.

<sup>13</sup> Gaa ne cataj Ananías rihaan Diose sij 'nij ra'a man ní' a:

—Tzaj ne aj cataj xna'anj ndo'o nii rihanj che'é síi nihánj, Síi Chij. 'O se aj qui'yaj chi'ij ndo'o so' man nij síi sa' nocó' mán so' nij síi yanj chuman' Jerusalén, <sup>14</sup> ne nihánj me se veé danj nicaj so' yanj actá che'é rej numíj so' man cunudanj núj sij achíin ni'yaj rihaan so', qui'yaj nij xrej atá suun nocóo doj adonj —taj Ananías a.

<sup>15</sup> Gaa ne cataj Diose sij 'nij ra'a man ní' rihaan so' a:

—Ca'anj so' cuaj ei. 'O se aj narii 'unj man so' qui'yaj suun so' rihanj, ne xcaj nij síi yaníj do', nij síi nicaj suun rey do', ma'an nij síi israelitá do', cuentá che'é 'unj, qui'yaj so' adonj. <sup>16</sup> 'O se 'unj me síi cataj xna'anj rihaan so' che'é nu' sayuun no xcúun so' quiran' so', che'é yan nata' so' rihaan yuvií che'ej adonj —taj Diose sij 'nij ra'a man ní' rihaan Ananías a.

<sup>17</sup> Dan me se ca'anj Ananías, ne catúj so' rá ve' yo', ne cuta' ra'a so' raá Saulo, ne cataj so':

—Diose sij 'nij ra'a man ní' ca'née manj ca'naj rihaan so' nihánj, tinuj. Ne so' ro', me Jesucristó síi quene'én so' gaa vaj so' chrej gaa ca'ná' so' nihánj ei. Ne me rá so' curuvi' uún rihaan so' ne catuy ndo'o Nimán Diose nimán so' ei —taj Ananías rihaan so' a.

<sup>18</sup> Nu' ca'mii so' danj, ne nu' cayuu 'o rasuyun rihaan Saulo, ne ase vaa 'o nuj catun' ro', danj vaa se cayuu rihaan so', ne curuvi' rihaan Saulo, ne canicun' caya so', ne cata' ne so' a. <sup>19</sup> Ne chá so' chraa, ne nari' nu-cuaj rá so' a.

### Nana nihánj taj xna'anj se vaa ca'mii natáj Saulo se nana Jesucristó chuman' Damasco a

Dan me se cayáan Saulo doj güii gá nij síi tucu'yón se nana Jesucristó yanj chuman' Damasco, <sup>20</sup> ne nu' ca'anj so' nij ve' tucu'yón nij yuvií israelitá se tucuanj Moisés, ne ca'mii natáj so' rihaan nij so' se vaa Jesucristó ro', ta'níi ya Diose me so' a.

<sup>21</sup> Ne cunudanj nij síi cuno se nana Saulo ro', caráya'anj ndo'o nij so' se nana so', ne cataj nij so':

—Tzaj ne nuveé sij nihánj me síi taj ri'yun man nij síi yanj chuman' Jerusalén achíin ni'yaj rihaan Jesucristó, ne ca'na' so' ndaa nihánj che'é rej me rá so' numíj so' man nij so' ne ca'anj nicaj so' man nij so' rihaan nij xrej atá suun nocóo doj, rá so' na' —taj nij síi cuno se nana Saulo rihaan tuvi' nij so' a.

<sup>22</sup> Tzaj ne doj a nucuaj nata' so' se nana Jesucristó rihaan nij yuvií israelitá yanj chuman' Damasco, ne ve'é tihaan so' rihaan nij so' se vaa Jesucristó me síi ca'née Diose tinanii man yuvií rihaan sayuun, ne ndaa cunuu díj tu'va nij so', qui'yaj so' a.

### Nana nihánj taj xna'anj se vaa quinanii Saulo rihaan nij yuvií israelitá guun rá ticavi' man so' a

<sup>23</sup> Dan me se cachén que'ee güii, gaa ne cavii raá nij yuvií israelitá daj qui'yaj nij so' ne ca'vee ticavi' nij so' man Saulo a. <sup>24</sup> Tzaj ne xcaj Saulo cuentá daj guun rá nij so' qui'yaj nij so' man so', ne dan me se nuvíi nigan' tumé ndo'o nij yuvií israelitá ta'yaa chingá yahij taj rej atúj yuvií chuman' yo', che'é rej me rá nij so' nari' nij so' man Saulo ne ticavi' nij so' man Saulo, rá nij so' a. <sup>25</sup> Che'é dan nij síi tucu'yón se nana Saulo ro', ca'née nij so' man Saulo rá 'o scaa xij, ne rej ni tacuachén nij so' man Saulo rque ta'yaa le'ej taj chingá yahij aráan tu'va chuman', ne tananij nij so' man Saulo rihaan yo'óo xe', ne dan me se quinanii so' a.

### Nana nihánj taj xna'anj se vaa ve'é ca'mii nij síi tucu'yón se nana Jesucristó yanj chuman' Jerusalén ga Saulo a

<sup>26</sup> Dan me se cuhi' Saulo chuman' Jerusalén, ne guun rá so' cunyu chre' so' gá nij síi tucu'yón se nana Jesucristó, tzaj ne cuhu'vi' cunudanj nij so' ni'yaj nij so' man Saulo a. 'O se ne cuchuman rá nij so' ni'yaj nij so' se nana Saulo se vaa sij tucu'yón se nana Jesucristó me so' a. <sup>27</sup> Che'é dan nicaj síi cu'naj Bernabé man so', ca'anj so' rihaan ma'an nij apóstol cune' Jesucristó man nata' se nana so', ne nata' Bernabé rihaan nij so' daj guun gaa quene'en Saulo man Jesucristó sij 'nij ra'a man ní' gaa vaj so' chrej ne ca'mii so' gá Jesucristó sij 'nij ra'a man ní', ne nata' uún Bernabé daj qui'yaj Saulo chuman' Damasco gaa ca'mii natáj so', ne ne cuhu'vi' so' a doj ca'mii natáj so' rihaan nij yuvií che'é Jesucristó, taj Bernabé a.

<sup>28</sup> Dan me se guun che'e nij so' ve'é ca'mii nij so' ga Saulo, ne 'o vaj so' gá nij so' a. Ne ca'mii natáj so' se nana Jesucristó síi 'nij ra'a man ní' rihaan nij síi man chuman' Jerusalén, ne a doj ne cuhu'vi' so', ne nucuaj ca'mii natáj so' rihaan nij yuvií a. <sup>29</sup> Dan me se ca'mii so' gá nij síi israelitá a'mii xna'ánj griego, ne canó tuvi' nij so' gá so' a. Tzaj ne nij so' ro', guun rá ticavi' man so' a. <sup>30</sup> Dan me se xcaj nij tinuj nij síi nocó' man Jesucristó cuentá se vaa guun rá yo'óo nij síi israelitá ticavi' nij so' man Saulo, ne che'é dan ca'anj nicaj nij so' man Saulo ndaa chuman' Cesarea, gaa ne ca'née nij so' man so' ndaa chuman' Tarso a.

<sup>31</sup> Veé dan me se díj yáan cunudanj nij síi cuchumán rá ni'yaj man Jesucristó yanj nu' estadó Judea do', Galilea do', Samaria do' a. Dan me se caráj cochroj ndo'o nij so' rihaan Diose sij 'nij ra'a man ní', ne che'é dan ve'é doj nari' nij so' canocó' nij so' se tucuanj so' a. Ne Nimán Diose tucu'yón man nij so' daj qui'yaj nij so', ne che'é dan guun rií ndo'o nij so' doj a.

### Nana nihánj taj xna'anj se vaa quinahuun sa' síi cu'naj Eneas, qui'yaj Jesucristó, gaa ca'mii Pedró ga so' a

<sup>32</sup> Dan me se chéé síi cu'naj Pedró nu' rej ne nij síi sa' nocó' man Diose, ne dan me se cuhi' so' ndaa rihaan

tinúú nij so' ne chuman' Lida, <sup>33</sup> ne chuman' Lida ro', nari' so' 'o síí cu'naj Eneas, ne so' me se aj quisij tunj ya yo' yo'o naj so' rihaan yuvéé, ne 'o síí taj se 'yá' cachee me so', <sup>34</sup> ne dan me se cataj Pedró rihaan so':  
—Cuano nihánj me se nahuun sa' so', 'yaj Jesucristó, Eneas. Naxagaa so' cuaj, ne nacue so' tuvée so' cuaj ei —taj Pedró rihaan so', ne nu' ca'mii Pedró danj, ne nu' naxumaan caya so' canicun' so' a.

<sup>35</sup> Gaa ne quene'en cunudanj nij síí yanj chuman' Lida do', nij síí yanj taa cu'naj Sarón do', ndaa vaa nahuun sa' síí cu'naj Eneas yo', gaa ne che'é dan canicaj nimán nij so' canoco' nij so' man Diosé sij 'nij ra'a man ní' a.

### Nana nihánj taj xna'anj se vaa cunuu i'na' uún chana cu'naj Dorcas, qui'yaj Pedró a

<sup>36</sup> Dan me se chuman' Jope yáan 'o chana tucu'yón se nana Jesucristó, ne Tabita cu'naj no' xna'ánj hebreo, ne Dorcas me se chuvii no' xna'ánj griego a. Ne chana qui'yaj inanj se sa' me no', ne rqué ndo'o no' rasuyun man nij síí nique, <sup>37</sup> ne güii dan me se canó chi'ij man no', ne quiran' ndo'o no', ne cavi' no' a. Ne tucuanee nii man no', ne cuchruj nii man no' rque ve' nata', <sup>38</sup> ne dan me se nichrun' naj chuman' Lida ga chuman' Jope, ne cuchii' nana rihaan nij síí tucu'yón se nana Jesucristó yanj chuman' Jope se vaa vaj Pedró chuman' Lida yo', ne che'é dan ca'née nij so' man vij snó'o cuchij' roj so' rihaan Pedró a. Dan me se cuchii' roj so' rihaan Pedró, ne cataj roj so':

—Se guun raan so' cuchii' so' rihaan núj sij yanj chuman' Jope ma' —taj roj so' rihaan Pedró a.

<sup>39</sup> Gaa ne naxumaan Pedró, ne ca'anj so' cuaj ga roj so' a. Ne gaa cuchii' nij so' chuman' Jope, ne ca'anj nicaj nij so' man Pedró rá ve' nata' naj chana cavi' cu'naj Dorcas, ne ca'na' cunudanj nij chana cavi' nicaj rihaan Pedró, ne ta'vee nij no', ne tihaan nij chana rihaan Pedró cunudanj nij yatzij qui'yaj Dorcas gaa vaa i'na' no' a. <sup>40</sup> Dan me se quirii Pedró man cunudanj nij no' xe', gaa ne canicun' ruj so', ne cachíin ni'yaj ndo'o so' rihaan Diosé a. Gaa ne canicaj so', cataj so' rihaan cúu man chana a:

—Naxagaa so', Tabita —taj so' rihaan no' a.

Gaa ne naxra' rihaan no', ne gaa quene'en no' man Pedró, ne ca'anj cané caya no', <sup>41</sup> ne quita'aa Pedró ra'a no', ne naxumaan no', qui'yaj so' a. Gaa ne canacúun so' ca'na' nij chana cavi' nicaj do', yo'ó nij síí sa' nocó' man Diosé do', ne tihaan so' man níí cu'naj Dorcas rihaan nij so' se vaa cunuu i'na' uún no' a.

<sup>42</sup> Dan me se cuchii' nana che'é Dorcas rihaan cunudanj nij síí ne chuman' Jope, ne che'é dan que'ee nij síí man Jope cuchumán rá ni'yaj man Diosé sij 'nij ra'a man ní' a. <sup>43</sup> Dan me se guun raan Pedró que'ee güii chuman' Jope, ne dan me se tucua' 'o síí cu'naj Simón caran' so' que'ee güii, ne síí naqui'yaj laruu nuj xcuu me Simón yo' a.

### Nana nihánj taj xna'anj se vaa cuchii' se nana Jesucristó rihaan nij tuvi' síí yanij cu'naj Cornelio a

**10** Dan me se yáan 'o síí cu'naj Cornelio chuman' Cesarea, ne síí 'nij ra'a 'o ta'aj x'ne' tanuu cu'naj italiano me so' a. Dan me se nuveé sij israelita me so', maan se sij yanij me so', <sup>2</sup> ne sij ve'é ndo'o nocó' man Diosé me so', ne aráj cochroj ndo'o so' rihaan Diosé, ne ase vaa 'yaj so' ro', danj 'yaj nij tucua' so' uún a. Ne rqué ndo'o so' caridad rihaan nij yuvii, ne niganj cachíin ni'yaj so' rihaan Diosé a. <sup>3</sup> Dan me se aga' va'nuy rej ca'anj güii ta' asuun me se naqui'yaa ranga' yo'o se mozó Diosé rihaan so', ne catúj se mozó Diosé yo' rej nicun' so', ne cataj se mozó Diosé:

—Cornelio —taj se mozó Diosé no so' a.

<sup>4</sup> Gaa ne ni'yaj uxrá Cornelio man se mozó Diosé yo', ne cuchu'vi' ndo'o so', ne cataj so':

—Me che'é nacúun so' manj, ga —taj so', xna'anj so' man se mozó Diosé yo' a.

Gaa ne cataj se mozó Diosé rihaan so' a:

—Aj xcaj Diosé cuentá che'é nana achíin ni'yáa so' rihaan Diosé, ne aj xcaj Diosé cuentá che'é caridad 'yáa so' a. Che'é dan nuy rá Diosé mán so' a. <sup>5</sup> Ne nihánj me se ca'nej so' snó'o ca'anj chuman' Jope, ne nacunj nij so' ca'na' 'o síí cu'naj Simón Pedró nihánj á. <sup>6</sup> Ne so' me se aran' so' ve' tucua' yo'ó síí cu'naj Simón síí naqui'yaj laruu nuj xcuu síí ne tu'va na ya'anj a —taj se mozó Diosé rihaan Cornelio a.

<sup>7</sup> Dan me se ca'anj uún se mozó Diosé yo', gaa ne canacúun Cornelio ca'na' vij se mozó ma'an so' do', yo'o tanuu nocó' man Diosé ga so' do', <sup>8</sup> ne ca'na' va'nuy nij so', ne cataj xna'anj so' rihaan nij so' se vaa cataj se mozó Diosé rihaan so', gaa ne ca'née so' man nij so' ca'anj nij so' chuman' Jope nang' nij so' man síí cu'naj Simón Pedró a.

<sup>9</sup> Ne yo'ó güii me se vaj va'nuy nij so' chrej, ne maan orá quinichrun' nij so' chuman' Jope me se cavii Pedró xráa ve' caran' so', cachinj ni'yaj so' rihaan Diosé, ne caxuj me yo', <sup>10</sup> ne dan me se quina'aan rque so', ne guun rá so' cha so' chraa a. Ne tihaj 'yaj chuvii nij síí man rá ve' cha so', ne maan orá dan naqui'yaa 'o rasuyun rihaan Pedró a. <sup>11</sup> Dan me se quene'en so' se vaa naxra' rej xta', ne nanij yo'o rasuyun rihaan yo'óo, ne ase vaa 'o yatzij mantá caxra' ndo'o vaa yo', ne vaa ca'anj scúj yatzij mantá yo' a. <sup>12</sup> Ne nuy cunudanj nij xcuu vaa ca'anj tacóo do', nij xcuu nucuaj rij man do', nij xtâj do', yo'ó nij xcuu vaa tachrii xráa do', nuy rque yatzij mantá yo' a. <sup>13</sup> Gaa ne cuno Pedró nana ca'mii yo'o so' rihaan so' a:

—Naxumaan so', Pedró. Tjaví' so' man nij xcuu yo', ne cha so' nee á —taj nana yo' cuno Pedró a.

<sup>14</sup> Gaa ne cataj Pedró:

—Se guun ma'. Daj chihaa mij se guun qui'yaj danj, man Síí Chij. 'O se nuveé xcuu chá me yo' rihaan núj sij israelita ma'. Maan se xcuu vaa chi'ij me nij xo' rihaan núj nanj á. 'O se nu' ca'na' a doj ne cha 'unj nee xcuu vaa danj a ma' —taj Pedró a.

<sup>15</sup> Gaa ne ca'mii uún síí ca'mii rihaan Pedró, cataj so':

—Ñe sese Diose me sí cataj se vaa cunuu sa' 'o rasuun, ñe se guun cataj so' se vaa chi'ij vaa rasuun yo' rihaan so' ma' —taj uún so' rihaan Pedró a.

<sup>16</sup> Gaa ñe dan me se quisij va'nuy cuno Pedró nana vaa ñanj nana ca'mii Diose rihaan so', gaa ñe nu' cavii uún nu' yatzij mantá man xcuu yo' rej xta' a.

<sup>17</sup> Dan me se quinanó ndo'o rá Pedró che'é rasuun naqui'yaa rihaan so', ñe maan orá dan nari' nij snó'o ca'néé sí cu'naj Cornelio ve' tucua Simón, ñe dan me se canicun' nij so' ta'yaa rihaan ve' yo', <sup>18</sup> ñe canacúun nij so', xná'anj nij so' sese aran' 'o sí cu'naj Simón Pedró ve' yo' a. <sup>19</sup> Dan me se Pedró ro', nuchruj raá che'é nij rasuun naqui'yaa rihaan so', ñe dan me se cataj Nimán Diose rihaan so':

—Nihánj me se ca'na' va'nuy snó'o nano' mán so', <sup>20</sup> ñe cuaj ñaxumaan so', nanij so', ñe ca'anj so' ga nij so' á. Ñe se guun vij rá so', ñe se cataj so' se vaa ne nó xcúun so' ca'anj so' ga nij so' ma'. 'O se 'unj nihánj me sí ca'néé man nij so' ca'na' nij so' adonj —taj Nimán Diose rihaan Pedró a.

<sup>21</sup> Gaa ñe nanij Pedró ndaa rej nicun' va'nuy nij snó'o, ñe cataj so' rihaan nij so':

—'Unj nihánj me sí nano' nij soj ei. Ñe me che'é ca'na' soj nihánj ga —taj Pedró, xná'anj so' man nij so' a.

<sup>22</sup> Gaa ñe cataj nij so':

—Ca'mii 'o se mozó Diose mozó guee rihaan 'o sí cu'naj Cornelio, ñe so' ro', me sí 'nij ra'a 'o ta'aj x'ne' tanuu, ñe cunudanj nij yuvij israelitá taj se vaa sí vaa nicá nimán me so' ñe sí aráj cochroj ndo'o rihaan Diose me uún so', ñe dan me se cataj xna'anj se mozó Diose rihaan so' se vaa nacunj so' mán so' cuchí' so' ve' tucua so' ñe cunó so' nana nata' so' rihaan so' a —taj nij so' rihaan Pedró a.

<sup>23</sup> Che'é dan cataj Pedró se vaa catuu nij so' rá ve', ñe ve'é ca'mii so' ga nij so' a. Ñe ranga' yo'ó güii me se naxagaa nij so', ñe ca'anj Pedró ga ya'núj nij so', ñe ca'anj ñoj nij tinuj nij sí cuchumán rá ni'yaj man Jesucristó yanj chuman' Jope do', ga Pedró a. <sup>24</sup> Ñe yo'ó güii uún me se catúj nij so' chuman' Cesarea, ñe sí cu'naj Cornelio me se na'vij ndo'o so' ca'na' nij so', ñe aj canacúun so' man nij tuvi' so' do', man nij sí ca'mii sa' ga so' do', se vaa cunuu chre' nij so' rá ve' tucua so' a.

<sup>25</sup> Dan me se gaa guun rá Pedró catuu Pedró rá ve', ñe nari' tuvi' Cornelio ga so', ñe canicun' ruy Cornelio rihaan Pedró, ñe caráj guee Cornelio rihaan so' a.

<sup>26</sup> Tzaj ñe cataj Pedró rihaan Cornelio:

—Ñaxumaan so' ei. Taj che'é caraa guee so' rihanj ma'. 'O cuyaan yuvij uun me ní' nanj á —taj Pedró rihaan Cornelio a.

<sup>27</sup> Dan me se nanó Pedró cuentó ga Cornelio, ñe catúj Pedró rá ve', gaa ñe quene'en so' se vaa aj nuu chre' que'ee yuvij rá ve' yo' a. <sup>28</sup> Gaa ñe cataj Pedró rihaan nij yuvij:

—Aj ne'en nij soj se tucuanj núj sij israelitá se vaa ne nó xcúun núj catuu núj rej man soj sij yanij, ñe ne nó xcúun núj cunuu chre' núj ga soj ma'. Tzaj ñe Diose tihaan rihaan ma'anj se vaa se ca'vee cataj 'unj se vaa

nij vaa ta'aj yuvij rihaan so' ma'. <sup>29</sup> Che'é dan gaa canacúun Cornelio nihánj manj, ñe ne cataj 'unj se vaa se ca'anj 'unj ma'. Tananj ca'ná' 'unj cuaj nanj ei. Ñe nihánj me se cataj xna'anj nij soj rihanj ñaj me che'é canacúun nij soj manj ca'naj ei —taj Pedró rihaan nij tuvi' Cornelio a.

<sup>30</sup> Gaa ñe cataj Cornelio rihaan so':

—Cachén ca'anj güii ñe maan orá nihánj me ta' asuun, ñe aga' va'nuy me yo', ñe cachín ni'yáá 'unj rihaan Diose rá ve' tucua, ñe taj ni'yón naqui'yaa 'o snó'o nicun' rihanj, ñe yatzij catzii chuguun ma'an nuú so', <sup>31</sup> ñe cataj so' rihanj a: "Cunó so' ca'mij, Cornelio. Aj cuno Diose nana achíin ni'yáá so' rihaan so', ñe Diose me sí nuu rá se vaa rqué ndo'o so' caridad rihaan nij sí nique, <sup>32</sup> ñe dan me se ca'nej so' nana ndaa chuman' Jope, ñe canacunj so' ca'na' 'o sí cu'naj Simón Pedró nihánj á. Ñe so' ro', aran' ve' tucua 'o sí cu'naj Simón sí naqui'yaj laruu nuu xcuu sí ñe tu'va na ya'anj a", taj snó'o yo' rihanj adonj. <sup>33</sup> Che'é dan me ra'yanj ca'néé 'unj nana rihaan so', ñe so' ro', qui'yaj ndo'o se luj che'é núj se vaa ca'ná' so' rihaan núj nihánj ñe che'é dan me mán taran' núj rihaan Diose nihánj cuano, che'é rej me rá núj cunó núj nu' nana cataj xna'anj Diose sí 'nij ra'a man ní' rihaan so' ei —taj Cornelio rihaan Pedró a.

<sup>34</sup> Gaa ñe guun che'e Pedró ca'mii so' rihaan nij so' a:

—Ndaa yaj me se xcaj 'unj cuentá se vaa ya' 'o cuyaan vaa cunudanj yuvij rihaan Diose á. <sup>35</sup> Ñe sí yanj me ma'an chuman' sí aráj cochroj rihaan Diose ñe no-co' tucuaán sa' ro', ca'vee nacaj Diose man so' adonj.

<sup>36</sup> Aj ne'en nij soj nana sa' ca'néé Diose rihaan núj sij israelitá se vaa ve'é nacaj Diose man núj che'é se vaa qui'yaj Jesucristó che'é núj, ñe Jesucristó ro', me sí 'nij ra'a man cunudanj yuvij adonj. <sup>37</sup> Dan me se nana yo' ro', me nana chuchi' nu' chuman' chiháán núj sij israelitá, ñe dan me se gaa quisij ca'mii natáj sí cu'naj Juan se vaa no xcúun yuvij cata' ne yuvij, ñe guun che'e Jesucristó nata' so' se nana so' rihaan núj sij man estadó Galilea, <sup>38</sup> ñe nana yo' ro', me se nana Jesucristó sí cavii chuman' Nazaret ei. Ñe nana yo' taj se vaa cune' Diose man so' qui'yaj suun so' rihaan Diose, ñe rqué ndo'o Diose Nimán Diose man so', ñe rqué ndo'o Diose rej nucuaj man so', ñe dan me se cachée Jesucristó, ñe qui'yaj suun ndo'o so' suun sa', ñe cunudanj nij sí ran' sayuun 'yaj sí chre' che'é se quirii ta'nga' sí chre' rihaan nij so' ro', quinahuun sa' nij so', qui'yaj Jesucristó a. 'O se Diose ro', racuíj ndo'o man Jesucristó 'yaj so' ñanj adonj.

<sup>39</sup> "Ñe ma'an núj me sí quene'en nu' se vaa qui'yaj so' gaa vaj so' nu' rej ñe núj sij israelitá do', ndaa ma'an chuman' Jerusalén do' ei. Ñe dan me se cachron nii man so' rihaan rcutze, ñe cavi' so', qui'yaj nii ei. <sup>40</sup> Gaa ñe quisij va'nuy güii cavi' so', gaa ñe cunuu i'na' uún so', qui'yaj Diose, ñe curuvi' so' rihaan núj, qui'yaj uún Diose adonj. <sup>41</sup> Dan me se ne curuvi' so' rihaan cunudanj nij yuvij ma'. Tananj curuvi' so' rihaan núj sij aj nari' Diose nata' rihaan yuvij ñaj vaa so', ñe núj me sí chá chraa ñe co'o na ga so' gaa cunuu i'na'

uún so' gaa cavi' so' adonj. <sup>42</sup> Gaa ne ca'ne' so' suun rihaan núj ca'mii natáj núj rihaan nij yuvii ne nata' núj nana se vaa ma'an so' me síi cune' Diose ca'ne' cacun' che'é nij yuvii vaa i'na' do', che'é nij yuvii cavi' do' adonj. <sup>43</sup> Ne cunudanj nij síi nata' se nana Diose gaa naá ro', cataj xna'anj nij so' che'é so', ne cataj nij so' se vaa caraa x'naa Diose ni'yaj Diose cunudanj nij síi amán rá ni'yaj man Jesucristó a —taj Pedró rihaan nij tuvi' Cornelió a.

<sup>44</sup> Dan me se ataa a doj quisij ca'mii Pedró nu' se nana so', gaa ne catúj ndo'o Nimán Diose nimán cunudanj nij síi cuno nana yo' a. <sup>45</sup> Gaa ne nij síi israelitá cuchumán rá ni'yaj man Jesucristó ca'na' ga Pedró ro', caraya'anj nij so' se vaa qui'yaj Diose se luj che'é nij yuvii yanij ne ndaa nimán nij yuvii yanij catúj Nimán Diose, qui'yaj Diose a. <sup>46</sup> 'O se cuno nij so' se vaa ca'mii nij tuvi' Cornelió xna'anj naca, cataj nij so' se vaa sa' uxrá vaa Diose á. Gaa ne cataj Pedró rihaan tuvi' ma'an so':

<sup>47</sup> —Nihánj me se ve'é nacaj Nimán Diose man síi nihánj ndaa vaa nacaj so' man ma'an ní' adonj. Se ca'vee caráán ní' chrej rihaan nij so' cata' ne nij so' ma' —taj Pedró rihaan nij tuvi' so' a.

<sup>48</sup> Gaa ne ca'ne' Pedró suun rihaan nij so' se vaa cata' ne nij so', che'é se sij nocu' man Jesucristó me nij so' a. Daj qui'yaj nij so', gaa ne cachíin ni'yaj nij so' rihaan Pedró se vaa guun raa so' que'ee doj güii ga nij so' a.

**Nana nihánj taj xna'anj daj guun rá nij síi israelitá cuchumán rá ni'yaj man Jesucristó ga cuno nij so' nana se vaa cuchumán rá nij síi yanij ni'yaj nij so' man Jesucristó a**

**11** Dan me se cuno nij síi cune' Jesucristó man nata' se nana so' cuno yo'ó nij tinuj nij síi cuchumán rá ni'yaj man Jesucristó yanj estadó Judea cuno nana se vaa ndaa nij síi yanij canoco' se nana Diose a. <sup>2</sup> Ne gaa cavii Pedró ca'anj so' chuman' Jerusalén, ne nij síi israelitá cuchumán rá ni'yaj man Jesucristó ro', cuta' cacun' xráá so', <sup>3</sup> cataj nij so':

—Me che'é catúj so' rá ve' tucua' síi yanij ga. Me che'é chá so' chraa ga nij so' ga —taj nij so' rihaan Pedró a.

<sup>4</sup> Gaa ne guun che'e Pedró cataj xna'anj nica so' rihaan nij so' daj me che'é qui'yaj so' daj a. Dan me se cataj so':

<sup>5</sup> —Chuman' Jope vaj 'unj, ne cachíin ni'yáá 'unj rihaan Diose, ne dan me se naqui'yaa 'o rasuun rihanj, qui'yaj Diose a. Ne dan me se nanij 'o rasuun, ne ase vaa 'o yatzij mantá caxra' vaa rasuun yo', ne vaa ca'anj scúj yatzij yo' a. Ne cavii yatzij yo' rej xta', ne quinanij yo' rej nicun' 'unj a. <sup>6</sup> Dan me se ni'yaj uxraj yatzij yo', ne quene'enj se vaa man cunudanj nij xcuu vaa ca'anj tacóo do', ndaa xcuu quij do', xcuu nucuaj rij man do', xtâj do', nu' xcuu vaa tachrii xráá do', man rque yatzij yo' a. <sup>7</sup> Gaa ne cunó 'unj se vaa ca'mii yo' o so' rihanj, cataj so': "Naxumaan so', Pedró. Tjaví' so' man nij xcuu yo', chá so' á", taj so' cunoj a. <sup>8</sup> Gaa ne cataj 'unj: "Daj chihaa mij se guun qui'yaj daj, man Síi Chij. 'O se

nuveé xcuu chá me nij xo' rihaan núj sij israelitá ma'. Maan xcuu vaa chi'ij me nij xo' rihaan núj nanj á. Nu' ca'na' me se ne catuun nee xcuu vaa daj tu'vaj ma'", cataj 'unj rihaan síi ca'mii rihanj a. <sup>9</sup> Gaa ne ca'mii uún so' rihanj, cataj so': "Ne sese Diose me síi cataj se vaa cunuu sa' 'o rasuun, ne se guun cataj so' se vaa chi'ij vaa rasuun yo' rihaan so' ma'", cataj so' rihanj a. <sup>10</sup> Dan me se quisij va'núj ca'mii so' nana vaa daj rihanj, gaa ne cavii uún nu' rasuun yo' rej xta', ca'anj yo' a.

<sup>11</sup> "Ne nu' cavii rasuun yo' rej xta', ne nu' cuchíi va'núj snó'o rihaan ve' carán' 'unj, ne nij síi ca'née 'o síi ne chuman' Cesarea me va'núj nij so', nano' nij so' manj a. <sup>12</sup> Gaa ne cataj xna'anj Nimán Diose rihanj se vaa ca'anj 'unj ga nij so', ne se guun rá 'unj se vaa yuvii nij doj rihaan ní' sij israelitá me nij so', taj Nimán Diose rihanj a. Che'é dan ca'anj 'unj ga va'núj nij so', ne vatan' tinúú ní' síi nihánj ro', me síi ca'anj ga 'unj a. Gaa ne catúj núj rá ve' tucua' síi canacúun manj, <sup>13</sup> gaa ne nata' síi ne ve' yo' rihaan 'unj se vaa aj quene'en so' 'o se mozó Diose rá ve' tucua' so', ne dan me se curuvi' se mozó Diose yo' rihaan so', ne cataj se mozó Diose yo' rihaan so': "Ca'nej so' nana chuman' Jope rihaan 'o síi cu'naj Simón Pedró, ne nacunj so' man so' ca'na' so' nihánj rihaan so' á. <sup>14</sup> Ne so' me síi nata' nana rihaan so', ne sese cuno nu' nij tucua' soj nana yo', ne ca'vee quinanij taran' soj rihaan sayuun adonj", taj se mozó Diose rihaan síi ne ve' yo', taj so' rihanj nanj á.

<sup>15</sup> "Dan me se guun che'ej nataj se nana Jesucristó rihaan nij so', gaa ne catúj Nimán Diose nimán nij so' ndaa vaa catúj Nimán Diose nimán ma'an ní' gaa asino yaan nanj ei. <sup>16</sup> Gaa ne ninuj rá 'unj se nana Diose sij 'nij ra'a man ní' gaa cataj so': "Juan ro', na uun cata' ne so' man yuvii, tzaj ne xa' soj, tzaj ne Diose cuta' ne nimán soj ga ma'an Nimán Diose nanj adonj", taj síi 'nij ra'a man ní' a. <sup>17</sup> Dan me se cuyaan vaa se luj qui'yaj Diose che'é ma'an ní' sij amán rá ni'yaj man Jesucristó sij 'nij ra'a man ní' nanj adonj. Ne sese Diose me síi guun rá qui'yaj daj, ne asa' ca'vee caráán 'unj chrej rihaan Diose se vaa se qui'yaj so' se vaa me rá so' qui'yaj so', rá soj ga —taj Pedró rihaan nij síi israelitá cuchumán rá ni'yaj man Jesucristó a.

<sup>18</sup> Dan me se qui'yaj canaán se nana Pedró rihaan se nana yo'ó nij so', gaa ne cataj nij so' se vaa sa' uxrá qui'yaj Diose a. Ne cataj uún nij so':

—Che'é dan me ndaa nij síi yanij canicaj nimán canoco' chrej sa', qui'yaj Diose, ne che'é dan cayáán nij síi yanij rihaan Diose nu' cavii nu' ca'anj adonj —taj cunudanj nij síi israelitá a.

**Nana nihánj taj xna'anj che'é nij síi cuchumán rá ni'yaj man Jesucristó yanj chuman' Antioquia a**

<sup>19</sup> Dan me se che'é se nana síi cu'naj Esteban me se qui'yaj ndo'o nii sayuun man nij síi israelitá cuchumán rá ni'yaj man Jesucristó a. Che'é dan tanáj nij so' chuman' Jerusalén, ne cunánj nij so' ca'anj nij so' ndaa estadó cu'naj Fenicia do', ndaa yo'óo taj rihaan na ya'anj cu'naj Chipre do', ndaa chuman' Antioquia do' a. Tzaj ne inanj rihaan nij yuvii israelitá nata' nij so' se nana

Jesucristó, ne ne ca'mij nij so' ga nij sí yanij ma'. <sup>20</sup> Tzaj ne doj tuvi' nij so' me sí cavii Chipre do', estadó Cirene do', ne nij so' ro', ca'anj chuman' Antioquía, ne ndaa rihaan nij sí yanij sí a'mii xna'anj griego nata' nij so' nana sa' se nana Jesucristó sij 'nij ra'a man ní' a. <sup>21</sup> Ne racuíj ndo'o Dioso sij 'nij ra'a man ní' man nij sí nata' se nana so', ne que'ee nij sí yanij yo' cuchumán rá cuno nana sa' yo', ne canoco' nij so' man Jesucristó sij 'nij ra'a man ní' a.

<sup>22</sup> Dan me se cuchí' nana rihaan nij sí cuchumán rá ni'yaj man Jesucristó yanj chuman' Jerusalén se vaa cuchumán rá nij sí yanij yanj chuman' Antioquía ni'yaj nij so' man Jesucristó a. Che'é dan ca'née nij so' man sí cu'naj Bernabé cuchí' so' chuman' Antioquía a.

<sup>23</sup> Dan me se cuchí' so', gaa ne quene'en so' se vaa qui'yaj ndo'o Dioso se luj ga nij sí yanij yo', ne guun niha' uxrá rá so', ne narqué so' chrej sa' rihaan nij sí yanij yo' se vaa ca'nej nimán nij so' yo'o canoco' raan nij so' man Dioso sij 'nij ra'a man ní' a. <sup>24</sup> 'O se sí vaa sa' nimán me sí cu'naj Bernabé yo', ne nuu ndo'o Nimán Dioso nimán so', ne sí nucuaj ndo'o rá man Dioso me uún so' a. Gaa ne dan me se guun rij doj yuvij canoco' man sí 'nij ra'a man ní', <sup>25</sup> ne ca'anj Bernabé chuman' Tarso, nano' so' man sí cu'naj Saulo, <sup>26</sup> ne nari' Bernabé man Saulo, gaa ne nicaj Bernabé man Saulo ca'na' so' chuman' Antioquía a. Ne dan me se 'o yo' ro', yáán roj so' ga nij sí cuchumán rá ni'yaj man Jesucristó yanj chuman' Antioquía, ne tucu'yón roj so' se nana Dioso man que'ee ndo'o nij yuvij man yo' a. Ne nij sí man chuman' Antioquía me nij sí guun che'e tucu'náj "cristiano" man nij sí tucu'yón se nana Jesucristó a. 'O se nana "cristiano" me rá cataj nij sí chéé stucuajj Cristo a.

<sup>27</sup> Ne güii yo' me se cavii doj sí nata' se nana Dioso chuman' Jerusalén, ne ca'anj nij so' chuman' Antioquía a. <sup>28</sup> Ne canicun' yo'o tuvi' nij sí nata' se nana Dioso yo', ne sí cu'naj Agabo me so' a. Ne nata' so' nana rqué Nimán Dioso rihaan so' se vaa vaa güii, ne cachén x'naa nu' chuman' naj rihaan chumii a. Ne gaa cayáán sí cu'naj Claudio sí nicaj suun emperador, ne cachén ya x'naa ndaa vaa cataj sí cu'naj Agabo a.

<sup>29</sup> Dan me se nij sí tucu'yón se nana Jesucristó ro', gaa cuno nij so' se nana sí cu'naj Agabo, ne nuchruj raa 'o 'o nij so' se vaa me daj sa'anj rque so' man tinúú nij so' sí yanj estadó Judea ne racuíj man nij so' a. Ne sí ru'vee doj rqué nocoo doj sa'anj, ne sí niquej doj ro', rqué doj sa'anj a. <sup>30</sup> Gaa ne go' nij so' sa'anj yo' man Bernabé ga Saulo, caxrij roj so' ston nij sí uun chij rihaan nij sí cuchumán rá ni'yaj man Jesucristó yanj chuman' Jerusalén a.

**Nana nihánj taj xna'anj daj guun gaa tinanii Dioso man Pedró rihaan sí cu'naj Herodes a**

**12** Dan me se güii dan me se guun rá sí nicaj suun rey cu'naj Herodes qui'yaj chí'ij so' man nij sí cuchumán rá ni'yaj man Jesucristó a. Che'é dan ca'ne' so' suun rihaan tanuu quita'aa nij tanuu man ta'aj nij so' a. <sup>2</sup> Ne raa neé espadá ticavi' tanuu man sí cu'naj

Jacobo tinúú sí cu'naj Juan, qui'yaj Herodes a. <sup>3</sup> Dan me se xcaj Herodes cuentá se vaa guun niha' rá nij yuvij israelitá se vaa cavi' Jacobo, ne che'é dan quita'aa nij tanuu man Pedró, qui'yaj uún so' a. Gaa canuú cha'anj nanuj rá nij sí israelitá güii nu' curihanj xii nij so' yo'óo Egipto gaa naá me qui'yaj Herodes danj a.

<sup>4</sup> Dan me se caxrij nij tanuu taga' man Pedró, ne ca'ne' Herodes suun rihaan xnu' yaan tanuu se vaa cutumé nij tanuu man Pedró, ne ca'anj ya x'ne' me nij tanuu yo' a. 'O se guun rá Herodes se vaa ndaa cachén cha'anj pascuá, gaa ne quirii' so' man Pedró ne tijaan so' man Pedró rihaan nij yuvij israelitá, rá so' a. <sup>5</sup> Dan me se Pedró ro', 'nij so' taga' rej cutumé nij tanuu man so', tzaj ne nucuaj ndo'o cachín ni'yaj nij sí cuchumán rá ni'yaj man Jesucristó rihaan Dioso che'é so' a.

<sup>6</sup> Dan me se rej nii me yo', ne a'yuj me güii quirii' Herodes man Pedró taga' rihaan nij yuvij a. Dan me se otoj Pedró naj so' rá taga', ne naj so' sca'núj vij tanuu, ne vij aga' ne' numii so' naj so' a. Ne nicun' yavij tanuu tumé ta'yaa taga' a. <sup>7</sup> Ne dan me se curuvi' yo'o se mozó Dioso rá ve' naj Pedró, ne chuguun ndo'o rá ve' yo' a. Gaa ne go' se mozó Dioso x'núú Pedró, ne cataj so':

—'O naxagaa so' cuaj, Pedró —taj so' rihaan Pedró a.

Dan me se naxagaa Pedró, ne aga' ne' numij ra'a so' ro', naxra' yo', ne quini' yo' rihaan yo'óo a. <sup>8</sup> Gaa ne cataj se mozó Dioso rihaan Pedró a:

—Naqui'yaj raan so' catuún so', ne caxrij so' canj tacóo so' á —taj se mozó Dioso rihaan so', ne qui'yaj Pedró ndaa vaa cataj se mozó Dioso rihaan so' a.

Gaa ne cataj uún se mozó Dioso a:

—Niquee so' roto so', ne canocó so' manj á —taj uún se mozó Dioso rihaan so' a.

<sup>9</sup> Dan me se canoco' Pedró man se mozó Dioso, ne curihanj so' taga', tzaj ne ne quene'en so' sese ya curihanj so' taga' qui'yaj se mozó Dioso yo' ma'. 'O se maan se qui'yaj ma'an rihaan so' qui'yaj Dioso nu' se vaa qui'yaj se mozó Dioso yo', rá so' a. <sup>10</sup> Dan me se cachén roj so' vij rej nicun' tanuu tumé ta'yaa, gaa ne cuchí' roj so' ta'yaa aga' taga' yo', ne rej xcó ta'yaa yo' ro', naj ma'an chuman' a. Gaa ne quix'núj ma'an ta'yaa yo', ne curihanj roj so', ne cachén roj so' 'o scúj callé, gaa ne ca'anj ni'ya se mozó Dioso yo' rihaan Pedró a. <sup>11</sup> Dan me se caxrij rá Pedró se vaa ya curihanj so' taga', gaa ne cataj so':

—Ndaa yaj guun ya ya raj se vaa Dioso sij 'nij ra'a mán 'unj ro', ya ca'née so' man se mozó so', ne tinanii so' mán 'unj rihaan sí cu'naj Herodes, ne nihánj me se se quirán' 'unj ndaa vaa me rá nij yuvij israelitá quirán' 'unj yaj a ma' —taj Pedró a.

<sup>12</sup> Dan me se quisij guun ya ya rá so', gaa ne ca'anj so' ve' tucua' chana' cu'naj Mariá nii sí cu'naj Juan Marcos a. Ne ve' yo' me rej aj nuu chre' que'ee nij sí cuchumán rá ni'yaj man Jesucristó, ne achín ni'yaj nij so' rihaan Dioso a. <sup>13</sup> Dan me se cuchí' Pedró tica'mii so' ta'yaa chingá nuu rihaan ve', gaa ne ca'na' 'o mozó chana' cu'naj Rode ta'yaa xcaj no' cuentá me sí ca'na' a. <sup>14</sup> Gaa ne cunuu yaan Rode se nana Pedró a. Tzaj ne

che'é se guun niha' ndo'o rá no', gaa ne che'é dan ne ca'nyu no' ta'yaa ma'. Maan se cunanj no' catuj no' rá ve', ne nata' no' rihaan yo'ó nij yuvij se vaa nicun' Pedró ta'yaa a. <sup>15</sup> Tzaj ne nij síi man rá ve' taj rihaan no': —Snúú so' á —taj ta'aj nij so' rihaan no' a.

Tzaj ne taj se qui'yá' ca'ne' rá no' a. 'O se yo'ó cataj no' se vaa ya nicun' Pedró ta'yaa a. Gaa ne cataj yo'ó nij so' rihaan no':

—Nanj se mozó Diose tumé man Pedró me síi nicun' rihaan ta'yaa nanj á —taj yo'ó nij so' rihaan no' a.

<sup>16</sup> Ne Pedró ro', yo'ó nicun' so' xe' tica'mii so' ta'yaa a. Gaa ne ca'na' nij so', ne ca'núj nij so', ne quene'en nij so' man Pedró, gaa ne ca'anj ndo'o rá nij so' ni'yaj nij so' man Pedró a. <sup>17</sup> Gaa ne naxcáj Pedró ra'a Pedró, che'é se guun rá so' gaa dínj tu'va nij so' a. Gaa ne cataj xna'anj so' rihaan nij so' nu' se vaa qui'yaj Diose sij 'nij ra'a man ní' gaa tinanii so' man Pedro taga' a. Gaa ne cataj so':

—Cataj xna'anj nij soj rihaan tinú' Jacobo ga yo'ó nij tinúú ní' daj quiranj á —taj so' a.

Gaa ne cavii so' ca'anj so' yo'ó rej yanij a.

<sup>18</sup> Dan me se gaa quisij güii, ne quinanó ndo'o rá nij tanuu nicun' taga', che'é se ne quene'en uxrá nij so' me rej vaj Pedró a ma'. <sup>19</sup> Gaa ne ca'ne' Herodes suun rihaan tanuu ca'na' Pedró rihaan so' qui'yaj tanuu, tzaj ne ne ca'vee nari' nij tanuu man Pedró ma'. Che'é dan xná'anj Herodes man nij tanuu tumé man Pedró me rej ca'anj Pedró, tzaj ne ne quene'en nij so' a ma'. Che'é dan ca'ne' Herodes suun se vaa ticavi' nii man nij tanuu tumé man Pedró, gaa ne curihanj Herodes estadó Judea, ca'anj so' chuman' Cesarea, cayáán so' a.

**Nana nihánj taj xna'anj se vaa cavi' Herodes, qui'yaj xluú chá nee man so' a**

<sup>20</sup> Dan me se ca'maan rá síi cu'naj Herodes ni'yaj so' man nij síi man chuman' Tiro do', chuman' Sidón do', ne che'é dan ca'na' cunudanj nij so' rej ne Herodes, ne ca'mii nij so' ga síi cu'naj Blasto síi tumé nu' ve' tucua' Herodes, ne dan me se ca'vej rá síi cu'naj Blasto racuj so' man nij so' cunuu rcua'aaan nij so' ga Herodes, che'é se caxrij yuve nij so' doj sa'anj ston Blasto a. 'O se nucuaj rá nij so' man Herodes se vaa cuchij se chá avii rej uun chij so' ndaa chiháán nij so' chá nij so' a. <sup>21</sup> Ne güii cachrón Blasto ca'mii nij so' ga Herodes me se nanuú Herodes yatzij nuu síi nicaj suun rey, ne táá so' chruun xlá sa', ne ca'mii natáj ndo'o so' rihaan nij síi man Tiro do', man Sidón do' a. <sup>22</sup> Gaa ne caguáj cunudanj nij so', cataj nij so':

—Nuveé se nana yuvij me nana avii raá síi nihánj a ma'. 'O se se nana ya'anj avii tu'va so' nanj á —taj nij yuvij, ni'yaj nij yuvij man Herodes a.

<sup>23</sup> Gaa ne cuaj caxrij 'o se mozó Diose chi'ij man Herodes, che'é se ne cataj so' se vaa orún' Diose me síi 'yaj avii raá so' a. Maan se ca'vej rá so' cataj nij yuvij se vaa ya'anj me ma'an so' a. Gaa ne dan me se cunuj nee man so' chá xluú, ne cavi' so', qui'yaj xluú a.

<sup>24</sup> Tzaj ne se nana Diose me se ra'yanj achij yo' ne naxna'anj yo' cuaj cuaj a. Ne uun rij ndo'o doj nij yuvij canoco' nana yo' a. <sup>25</sup> Ne Bernabé ga Saulo me se quisij roj so', ne caxrij roj so' sa'anj ston nij síi uun chij rihaan nij síi cuchumán rá ni'yaj man Jesucristó yanj chuman' Jerusalén, ne canicaj roj so', ca'anj roj so' chuman' Antioquía, ne ca'anj síi cu'naj Juan Marcos ga roj so', qui'yaj roj so' a.

**Nana nihánj taj xna'anj se vaa cune' nii man síi cu'naj Bernabé do', man síi cu'naj Saulo do', ca'anj nata' roj so' se nana Diose rihaan yuvij a**

**13** Dan me se chuman' Antioquía ro', ta'aj nij síi cuchumán rá ni'yaj man Jesucristó me síi nata' se nana Diose, ne yo'ó ta'aj nij so' me síi tucuyón se nana Diose rihaan yuvij a. Ne síi cu'naj Bernabé do', síi cu'naj Simón Negro do', síi cu'naj Lucio síi cavii estadó Cirene do', síi cu'naj Manaén síi cachij tucua' síi cu'naj Herodes do', síi cu'naj Saulo do', me nij síi catá roj suun sa' yo' a. <sup>2</sup> Dan me se na'vij nij so' rihaan Diose sij 'nij ra'a man ní', ne toco' nij so' x'naa man ma'an nij so' che'é se aráj guee nij so' rihaan Diose, ne dan me se cataj Nimán Diose rihaan nij so' a:

—Cune' nij soj man síi cu'naj Bernabé ga síi cu'naj Saulo se vaa qui'yaj suun roj so' rihanj ndaa vaa cataj xna'anj 'unj rihaan roj so' á —taj Nimán Diose rihaan nij so' a.

<sup>3</sup> Gaa ne toco' nij so' x'naa man ma'an nij so', ne cachíin ni'yaj ndo'o nij so' rihaan Diose, gaa ne cuta' nij so' ra'a nij so' raá roj so', gaa ne dan me se ca'née nij so' man roj so' ca'anj nata' roj so' se nana Jesucristó rihaan yuvij a.

**Nana nihánj taj xna'anj daj quiran' 'o síi guun rá caráán chrej rihaan se nana Diose estadó Chipre a**

<sup>4</sup> Dan me se gaa ca'née Nimán Diose man roj so' ca'anj roj so', ne ca'anj roj so' chuman' Seleucia, gaa ne cavii roj so' rihoo chée rihaan na ca'anj roj so' ndaa estadó cu'naj Chipre a. <sup>5</sup> Gaa ne gaa cuchij roj so' chuman' Salamina, ne nata' roj so' se nana Diose rá nij ve' nuu chre' nij yuvij israelitá tucuyón nij so' se tucuanj Moisés, ne síi cu'naj Juan Marcos me síi vaj racuj man roj so' a. <sup>6</sup> Dan me se yo'óo taj rihaan na ya'anj me estadó Chipre yo', ne va'nuj nij so' chée nu' yo'óo yo' ndaa se cuchij nij so' chuman' Pafos a. Ne chuman' Pafos nari' nij so' man 'o síi chruun síi tu'va rma'an se vaa sij nata' se nana Diose me so', ne síi israelitá me so', ne Barjesús cu'naj so' a. <sup>7</sup> Ne so' me síi u'yón inanj chée ga síi nicaj suun gobernador cu'naj Sergio Paulo, ne síi cavii ndo'o raá me síi cu'naj Sergio Paulo yo' a. Ne síi cu'naj Sergio Paulo canacúun man roj síi cu'naj Bernabé ga Saulo se vaa ca'na' roj so' rihaan so', ne guun ndo'o rá so' cunó so' se nana Diose, ne danj qui'yaj roj so' a. <sup>8</sup> Dan me se síi chruun cu'naj Barjesús, tzaj ne yo'ó se chuvij so' me Elimas, ne nana "Elimas" taj se vaa síi chruun me so' a. Dan me se caráán Elimas chrej rihaan se nana Bernabé ga Saulo a. 'O se guun



rá so' ca'anj yanij síí cu'naj Sergio Paulo ne se cuchumán rá so' nana ya yo' a.

<sup>9</sup> Ne xa' síí cu'naj Saulo, tzaj ne yo'ó se chuvji so' me Pabló, ne dan me se caraa ndo'o Nimán Diose nimán so', ne ni'yaj uxrá so' man síí cu'naj Elimas yo', <sup>10</sup> ne cataj so':

—So' ro', me síí nuu nana tiha' yu'unj nimán, ne sij snúú rma'an mé so' nanj ei. Ta'níí ya síí chree mé so' á. Sij nachri' ni'yaj cunudanj se sa' mé so' a. Vaa güii tanáj ti'fín so' suun tanachej nana ya a'mii Diose sij 'nij ra'a man ní' na'. <sup>11</sup> Ne nihánj me se qui'yaj síí 'nij ra'a man ní' sayuun mán so', ne caráán rihaan so' doj güii, qui'yaj so', ne ndaa naán güii se curuvi' rihaan so' ma' —taj Pabló rihaan Elimas yo' a.

Ne taj ni'yón caráán rihaan Elimas, ne adi' se ran' síí chée rque ngaa rej rmi' ro', danj quiran' so', chée so', vaj so', nano' so' man síí coró' ra'a so' racuíj man so' cachee so' a.

<sup>12</sup> Ne gaa quene'en síí nicaj suun gobernador yo' daj quiran' síí chruun cu'naj Elimas yo', gaa ne caráya'anj ndo'o so' se tucuajj síí 'nij ra'a man ní', ne cuchumán rá so' ni'yaj so' man Jesucristó a.

**Nana nihánj taj xna'anj se vaa cuchumán rá que'ee ndo'o yuvií yanij yanj chuman' Antioquía naj estadó Písidia cuno nij so' nana ca'mii natáj Pabló rihaan nij so' a**

<sup>13</sup> Dan me se cavii nij tuvi' Pabló chuman' Pafos, ne cavii nij so' rque rihoo chée rihaan na, ne ca'anj nij so' ndaa chuman' Perge chuman' naj estadó Panfilia a. Tzaj ne síí cu'naj Juan Marcos me se tanáj so' man yavij roj so', ne canicaj so' nan' so' chuman' Jerusalén a.

<sup>14</sup> Gaa ne yavij roj so' me se curihanj roj so' chuman' Perge, ne ca'anj roj so' chuman' Antioquía naj estadó Písidia a. Ne güii naránj rá nij yuvií israelitá me güii yo', ne catúj roj so' rá ve' tucu'yón nij yuvií israelitá se tucuajj Moisés, ne ca'anj cayáán roj so', <sup>15</sup> ne quisij nayaa nii se tucuajj Moisés do', se nana nij síí nata' se nana Diose gaa naá do', ne ca'née nij síí 'nij ra'a ve' yo' nana rihaan roj so', ne nana ca'née nij so' me nana nihánj a: “Sese vaa chrej nucuaj me rá roj soj nago' roj soj rihaan nij yuvií nuu chre' nihánj, ne ca'mii roj soj, tinuj”, taj síí 'nij ra'a ve' yo' rihaan síí cu'naj Pabló ga' síí cu'naj Bernabé a. <sup>16</sup> Gaa ne canicun' caya Pabló, ne naxcáj so' ra'a so', ne cataj so' a:

—Cunó soj sij israelitá do', soj sij aráj cochroj rihaan Diose do', ca'mij rihaan soj á. <sup>17</sup> Dan me se Diose síí noco' ní' sij israelitá ro', me síí narii man xii ní', ne tinaxcáj Diose man nij xii ní' gaa cayáán nij so' rej cu'naj Egiptó, ne Diose me síí guun nucuaj quirii uún man nij so' rej Egiptó a. <sup>18</sup> Gaa ne nda' se tucuaá ndo'o nij so' rihaan Diose, tzaj ne yo'ó racuíj Diose man nij so' gaa vaj nij so' rej tacaan nacoó vij chihaa ya yo' a.

<sup>19</sup> Gaa ne tinavij Diose man chij x'ne' yuvií yanj rej cu'naj Canaán, gaa ne cuxra' ta'aj Diose nu' rej yo' guun yo' to'óó nij xii ní', qui'yaj Diose a. <sup>20</sup> Ne rej yo' guun to'óó nij so' 'o ca'anj cientó táá vij chihaa chi' yo' a. Ne gaa quisij catúj nij so' rej cu'naj Canaán, gaa ne cune'

Diose man nij síí raa rii ta'nga' rihaan nij so', ne danj inanj cayáán nij so' ndaa se cayáán síí cu'naj Samuel síí nata' se nana Diose rihaan yuvií a.

<sup>21</sup> “Ne güii cayáán Samuel me se guun che'e nij xii ní' cachíin nij so' 'o síí nicaj suun rey guun chij rihaan nij so', gaa ne cune' Diose man síí cu'naj Saúl ta'níí síí cu'naj Cis se vaa guun chij so' rihaan nij so' ndaa vaa guun rá ma'an nij so' a. So' ro', me ta'níí ta'nij si'no' síí cu'naj Benjamín, ne vij chihaa ya yo' cayáán so' síí nicaj suun rey a. <sup>22</sup> Gaa ne quirii yanij Diose man Saúl, gaa ne cune' Diose man síí cu'naj David se vaa guun David síí nicaj suun rey uun chij rihaan nij yuvií israelitá a. Ne ca'mii Diose che'é so', cataj Diose: “Nihánj me se narí' 'unj man David ta'níí Isaí, ne so' me síí qui'yaj nu' ndaa vaa me raj qui'yaj so' nanj á”, taj Diose ni'yaj Diose man David a.

<sup>23</sup> “Ne sca'núj nij ta'níí ta'nij si'no' David ro', rque Diose 'o síí tinanii man ní' sij israelitá rihaan sayuun, ndaa vaa cata' tu'va Diose asij naá, ne Jesucristó me so' a. <sup>24</sup> Dan me se asino ca'mii natáj síí cu'naj Juan rihaan cunudanj nij yuvií israelitá se vaa canicaj nimán nij so' canoco' nij so' tucuaán sa', ne cata' ne nij so', gaa ne ca'na' Jesucristó a. <sup>25</sup> Dan me se gaa ataa doj tzín' quisij ca'mii natáj Juan nu' se vaa guun rá Diose cataj so', gaa ne cataj so': “Me síí mé 'unj, rá nij soj ga. 'O se nuveé sij nano' soj man mej ma'. Tzaj ne vaa síí noco' xó 'unj, ne sij sa' uxrá doj me so' rihanj, ne ne nó xcúnj nachej canj 'nij tacóó so' ma'”, taj síí cu'naj Juan rihaan nij yuvií ni'yaj so' man Jesucristó a.

<sup>26</sup> “Cunó soj ta'nij ta'nij si'no' Abraham do', soj sij aráj cochroj rihaan Diose do', ca'mij rihaan soj cuano, tinuj. Aj ca'na' nana nihánj rihaan ní', qui'yaj Diose, ne nana nihánj taj xna'anj daj qui'yaj ní' gaa ne ca'vée quinanii ní' rihaan sayuun ei. <sup>27</sup> 'O se tuvi' ní' síí yanj chuman' Jerusalén do', nij síí uun chij rihaan nij so' do', ne xcáj nij so' cuentá che'é Jesucristó ma'. Ne cuta' nij so' cacun' xraá Jesucristó se vaa no xcúun so' ticavi' nii man so', ne dan me se quisij ya nu' se nana nij síí nata' se nana Diose gaa naá nana nayaa ní' daj a güii naránj rá ní', qui'yaj nij so' nanj á. <sup>28</sup> Dan me se taj vaj a doj cacun' tumé so', tzaj ne rquee nij so' rihaan Pilato se vaa cavi' so' qui'yaj Pilato a. <sup>29</sup> Dan me se gaa quisij qui'yaj nij so' nu' ndaa vaa nó rihaan danj Diose che'é Jesucristó, gaa ne tananij nii man so' rihaan rcutze, ne cachin' nii man so' rque yu'uj yuvej a. <sup>30</sup> Tzaj ne Diose me síí qui'yaj cunuu i'na' uún so' adonj. <sup>31</sup> Gaa ne que'ee güii curuvi' so' rihaan nij síí cavii ga' so' estadó Galilea ca'anj chuman' Jerusalén ga' so' a. Ne yaj me se guun ma'an nij so' síí nata' che'é so' rihaan nij yuvií adonj.

<sup>32</sup> “Ne nihánj me se nata' núj nana sa' rihaan nij soj se vaa aj qui'yaj Diose nu' ndaa vaa cata' tu'va so' rihaan xii ní' gaa naá a. <sup>33</sup> Dan me se cunuu i'na' uún Jesucristó, qui'yaj Diose che'é ní', ne dan me se quisij ya nu' nana cata' tu'va so' gaa naá, ne cavii sa' ní' ta'nij nij síí cane gaa naá, qui'yaj so' adonj. Ne ase vaa nana nihánj nana natá' 'unj rihaan nij soj ro', danj vaa nana no rihaan chra' Salmo número vij, ne taj yo': “Ta'nij mé

so' á. Cuanõ nihánj me se quene'en yuvij se vaa ta'nij mé so', qui'yáj nanj á", taj se nana Diose nõ rihaan chra' Salmo yo' a. <sup>34</sup> Dan me se naxagaa so' ne cunuu i'na' uún so', ne se ri'yuj nee man so' daj chihaa mij ma'. Ne dan me se ma'an Diose ca'mii nana nihánj adonj: "Ase vaa rque 'unj nu' se luj rihaan David, ta'n-ga' danj gaa rque 'unj nu' se luj rihaan so', ne daj chihaa mij se navij se luj yo' rihaan so' ma'", taj uún Diose rihaan Jesucristó a. <sup>35</sup> Che'é se qui'yaj Diose danj che'é Jesucristó rá David ro', che'é dan cachrón David rihaan yo'ó salmo nana nihánj a: "Daj chihaa mij se ri'yuj nee man sí vaa sa' rihaan so', qui'yáa so' ma'", taj David rihaan Diose ni'yaj David man Jesucristó a. <sup>36</sup> Dan me se xa' ma'an David, tzaj ne gaa quisij qui'yaj so' nu' ndaa vaa guun rá Diose qui'yaj so' che'é nij tuvi' so', gaa ne cavi' so', gaa ne cachin' nii man so' rej naj nij xij so', gaa ne ri'yuj nee man so' a. <sup>37</sup> Ne xa' Jesucristó sí cunuu i'na' uún qui'yaj Diose, tzaj ne ne ri'yuj nee man so' ma'.

<sup>38</sup> "Xcäj nij soj cuentá se vaa cuanõ nihánj me se nata' nún nana rihaan soj se vaa che'é se vaa qui'yaj Jesucristó ro', che'é dan ca'vee caraa x'naa Diose ni'yaj Diose cacun' tumé ní', tinuj. Dan me se daj chihaa mij se navij nu' cacun' tumé soj, qui'yaj se tucuñj Moisés ma'. <sup>39</sup> Tzaj ne cunudanj nij soj sij amán rá ni'yaj man Jesucristó me se x'néj uun cacun' yo' xráa soj, ne nuu sa' soj rihaan Diose adonj. <sup>40</sup> Che'é dan tadó nij soj se quiran' soj ndaa vaa taj se nana Diose nana nõ rihaan danj nij sí nata' se nana Diose nana nihánj á: <sup>41</sup> "Ne soj sij a'nga' nacoo ni'yaj manj, tzaj ne ni'yaj soj ei. Ca'anj rá soj, ne quirí' nu' soj nanj ei. 'O se gaa vaa i'na' soj nihánj, ne qui'yáj suun nocoo, ne ca'vee se cataj xna'anj yo'ó so' rihaan soj che'é se vaa qui'yáj, tzaj ne se ca'vee cuchuman rá soj se nana so' asuun ma'", taj Diose rihaan soj a —taj Pabló rihaan nij yuvij cunuu chre' rá ve' yo' a.

<sup>42</sup> Dan me se gaa me rá roj so' ca'anj roj so', ne cachín ni'yaj nij yuvij rihaan roj so' se vaa cachén yo'ó tunj güii, ne ca'na' uún roj so' ne ca'mii uún roj so' nana vaa danj rihaan nij so' a. <sup>43</sup> Gaa ne gaa quisij tucuyón nij so' ne curihanj nij yuvij xe', ne que'ee nij sí israelitá do', nij sí yanij nocoo xraan se tucuñj nij sí israelitá do', canoco' man roj sí cu'naj Pabló gaa Bernabé a. Gaa ne ca'mii ndo'o roj so' gaa nij so', gaa ne guun ya rá nij so' se vaa yo'ó nıcaj nij so' tucuaán sa' gaa se luj 'yaj Diose che'é nij so' a.

<sup>44</sup> Dan me se cachén tunj güii ne nasij yo'ó güii naránj rá nij yuvij israelitá, gaa ne cunuu chre' cunudanj nij yuvij yanj chuman' ta' asuun, che'é rej cunõ nij so' se nana Diose sij 'nij ra'a man ní' a. <sup>45</sup> Tzaj ne quene'en nij yuvij israelitá se vaa cuchí' ndo'o yuvij rihaan Pabló, gaa ne che'é dan guun xcoj ruvaa rá nij yuvij israelitá, ne nij ca'mii nij so' che'é Pabló, cataj nij so' se vaa inanj nana ne ca'mii Pabló a. <sup>46</sup> Tzaj ne ne cuchu'vi' ya roj sí cu'naj Pabló gaa Bernabé ni'yaj roj so' man nij yuvij israelitá a ma'. Ne cataj roj so':

—Nõ xcúún nún nata' nún se nana Diose rihaan nij soj sij israelitá asino yaan adonj. Tzaj ne che'é se quirí'ij

yanij soj nana yo', ne che'é se nuveé sij nõ xcúún cayáán gaa Diose nu' cavii nu' ca'anj me soj rá soj, ne che'é dan nihánj me se canicaj núj, ne nata' núj nana yo' rihaan nij sí yanij ei. <sup>47</sup> 'O se Diose sij 'nij ra'a man ní' me sí ca'ne' suun rihaan núj qui'yaj núj danj adonj. Dan me se cataj sí 'nij ra'a man ní': "Aj cuné' 'unj mán so' se vaa guún so' ya'an chuguun rihaan nij sí yanij ne ca'vee xcäj nij so' cuentá, qui'yáa so', gaa ne quinaniı yuvij yanj chuman' naj nu' rihaan chumii rihaan sayuun, qui'yáa so' á". Nihánj me se nana Diose nana cataj Diose rihaan núj nanj á —taj roj so' rihaan nij yuvij israelitá yo' a.

<sup>48</sup> Dan me se gaa cuno nij sí yanij se nana Pabló, ne guun niha' uxrá rá nij so', ne ve'é ca'mii nij so' che'é se nana Diose sij 'nij ra'a man ní' a. Ne cunudanj nij sí cune' Diose cayáán rihaan Diose nu' cavii nu' ca'anj ro', cuchumán rá nij so' cuno nij so' nana yo' a. <sup>49</sup> Gaa ne cuchí' se nana Diose sij 'nij ra'a man ní' daj a nij chuman' naj rihaan yo'ó rej yo' a. <sup>50</sup> Tzaj ne caxríj nij sí israelitá chrej rque nij chana yanij nocoo xraan man Diose chana xna'anj do', rque nij sí nicaj suun uun chij rihaan chuman' yo' do', ne taá ri'yunj nij so' man Pabló gaa Bernabé a. Gaa ne tucunanj nij so' man roj so' rej yo' a. <sup>51</sup> Gaa ne nacunan' roj so' tacoo roj so' tucuyuu roj so' yo'ó tachruu cavii chuman' yo' rihaan yo'ó, che'é rej xcäj nij sí man chuman' yo' cuentá se vaa ma'an nij so' tumé cacun' se vaa ne cunõ nij so' se nana Diose a. Gaa ne ca'anj roj so' chuman' Iconio a. <sup>52</sup> Ne nij sí cuchumán rá ni'yaj man Jesucristó yanj chuman' Antioquía yo' me se 'o guun niha' uxrá rá nij so', ne 'o cunuu Nimán Diose nimán nij so' a.

**Nana nihánj taj xna'anj daj guun rá nij sí man chuman' Iconio gaa cuchí' se nana Diose chiháán nij so' a**

**14** Dan me se gaa cuchí' sí cu'naj Pabló gaa sí cu'naj Bernabé chuman' Iconio, ne catúj roj so' rá ve' tucuyón nij yuvij israelitá se tucuñj Moisés, ne che'é se ve'é ndo'o nata' roj so' se nana Diose, che'é dan cuchumán rá que'ee ndo'o yuvij israelitá do', yuvij yanij a'mii xna'ánj griego do', ni'yaj nij so' man Jesucristó a. <sup>2</sup> Tzaj ne nij yuvij israelitá na'vej rá cunõ se nana Jesucristó me se caxríj nij so' chrej rque nij yuvij yanij yanj chuman' yo' che'é rej nachri' nij so' ni'yaj nij so' man nij tinuj nij sí cuchumán rá ni'yaj man Jesucristó, ne danj guun a. <sup>3</sup> Dan me se que'ee güii sca' nanj ca'mii natáj roj sí cu'naj Pabló gaa Bernabé se nana Diose sij 'nij ra'a man ní', ne sí 'nij ra'a man ní' ro', racuíj man roj so' se vaa guun nucuaj roj so' qui'yaj suun roj so' suun sa' nocoo ni'yaj nij yuvij, che'é rej cuchuman rá nij yuvij se vaa ya ya vaa se nana roj so' nana che'é se luj qui'yaj sí 'nij ra'a man ní' che'é ní' a.

<sup>4</sup> Gaa ne xra' ta'aj nij yuvij man chuman' yo', ne ta'aj nij so' ro', canoco' se nana nij sí israelitá sí na'vej rá cunõ se nana Diose, ne yo'ó ta'aj nij so' ro', canoco' se nana roj sí cune' Jesucristó man nata' se nana so' a. <sup>5</sup> Gaa ne guun rá nij yuvij yanij do', nij yuvij israelitá do', nij sí uun chij rihaan nij so' do', qui'yaj chí'ij nij so' man roj sí cu'naj Pabló gaa Bernabé ne ndaa guun rá

nij so' go' nij so' yahij man roj so' ndaa se cavi' roj so' a. <sup>6</sup> Tzaj ne xcaj roj so' cuentá, gaa ne che'é dan cunánj roj so', ca'anj roj so' chuman' Listra chuman' naj estadó Licaonia do', chuman' Derbe yo'ó chuman' naj estadó Licaonia do', yo'ó nij chuman' ra'a naj nichrun' ga roj chuman' yo' do', <sup>7</sup> ne vaj roj so' nata' roj so' se nana Diosé nana sa' rihaan nij yuvij yanj nij chuman' yo' a.

**Nana nihánj taj xna'anj se vaa guun rá nij síf ne chuman' Listra se vaa ya'anj me síf cu'naj Pabló do', síf cu'naj Bernabé do' a**

<sup>8</sup> Dan me se chuman' Listra ro', ne 'o síf rengó ne síf rengó me so' asij ca'ngaa so', ne veé 'o danj vaa so', ne daj chihaa mij taj se qui'yá' cachee so' ma'. <sup>9</sup> Ne yaán so' cuno so' se nana Pabló a. Dan me se ni'yaj uxrá Pabló man so', ne xcaj Pabló cuentá se vaa síf rengó yo' nucuaj ndo'o rá se vaa ca'vee nahuun sa' so', qui'yaj Diosé a. <sup>10</sup> Che'é dan nucuaj ca'mii Pabló, cataj Pabló rihaan so' a:

—Naxumaan so', canicun' cayá so' ei. —taj Pabló rihaan so' a.

Gaa ne güej síf rengó yo', ne cachéé so' a. <sup>11</sup> Dan me se quene'en nij yuvij se vaa qui'yaj Pabló, ne che'é dan caguáj nij yuvij se xna'anj ma'an nij so', cataj nij so':

—Nahuun nij ya'anj yuvij, ne nanij nij so' rihaan yo'ó chuguanj —taj nij yuvij ni'yaj nij yuvij man Pabló ga Bernabé a.

<sup>12</sup> Gaa ne cataj nij yuvij se vaa ya'anj cu'naj Júpiter me Bernabé, ne Pabló me se ya'anj cu'naj Mercurio me so', che'é se so' me síf ca'mii doj a. <sup>13</sup> Ne dan me se rihaan tu'va chuman' yo' ne 'o nuví rej na'víj nij yuvij rihaan ya'anj Júpiter, ne xrej ne nuví yo' ro', ca'ne' suun se vaa ca'na' scúj toró ca'na' cachriin yâ ca'na' ta'yaa rej atúj yuvij chuman' yo', ne guun rá so' ga nij yuvij ticavi' nij so' scúj yo' rihaan Pabló ga Bernabé che'é se ya'anj me roj so' rá nij yuvij a.

<sup>14</sup> Dan me se xcaj Bernabé ga Pabló cuentá daj guun rá nij yuvij, ne che'é dan cutzin' roj so' sagán' roj so', che'é se chi'ii ndo'o qui'yaj nij yuvij rá roj so' a. Gaa ne cunánj roj so' sca'núj nij yuvij, ne caguáj roj so', <sup>15</sup> cataj roj so':

—Se guun qui'yaj nij soj danj ma'. 'O se cuyaan yuvij me ní', ne nihánj me se xa' núj, tzaj ne 'na' núj nata' núj se nana Diosé nana sa' rihaan nij soj, che'é rej tanáj soj tucuaán ni'yón rma'an noco' soj cuano nihánj ne canicaj soj canoco' soj Diosé síf vaa i'na' ya ei. Ne so' ro', me síf qui'yaj nu' rej xtá' do', nu' rihaan yo'ó do', nu' na ya'anj do', ne nu' rasuun qui'yaj so' adonj. <sup>16</sup> Ne asij rque me se ca'née ra'a Diosé canoco' cunudanj nij x'ne' yuvij tucuaán cuchruj xij nij so' a.

<sup>17</sup> Tzaj ne se guun cataj soj se vaa a doj ne ca'vee xcaj soj cuentá che'é Diosé ma'. 'O se ve'é ndo'o qui'yaj Diosé che'é soj adonj. Dan me se aman' maan avii rej xtá', qui'yaj Diosé che'é soj, ne síj dió avii naa, qui'yaj uún Diosé, ne dan me se araa rque soj, ne uun niha' rá soj, qui'yaj Diosé adonj —taj roj so' rihaan nij yuvij yo' a.

<sup>18</sup> Dan me se daj doj se ticavi' nij yuvij scúj rihaan roj so', tzaj ne ca'ne' rá nij yuvij ga suun yo', qui'yaj se nana roj so' a.

**Nana nihánj taj xna'anj che'é sayuun qui'yaj nij síf israelitá cavii chuman' Antioquía do', chuman' Iconio do', man síf cu'naj Pabló ga Bernabé a**

<sup>19</sup> Tzaj ne cavii síf israelitá chuman' Antioquía do', chuman' Iconio do', ca'na' nij so' chuman' Listra, ne caxrij nij so' chrej rque nij yuvij man chuman' Listra, ne che'é dan go' ndo'o nij yuvij yahij man Pabló, ne cuxuun nij yuvij man so' ndaa tu'va chuman', ne ri'ij nij yuvij man so' a. Ne guun rá nij yuvij se vaa cavi' so' a.

<sup>20</sup> Tzaj ne cunuu chre' nij síf cuchumán rá se nana Jesucristó ne chuman' yo', ne tucuchriin nij so' nu' anicaj rej naj Pabló rihaan yo'óó, ne naxagaa so', ne catúj uún so' chuman' ga nij so' a. Gaa ne yo'ó güii me se curihanj roj so' ga Bernabé ca'anj roj so' chuman' Derbe a.

**Nana nihánj taj xna'anj se vaa canicaj síf cu'naj Pabló ga Bernabé chuman' Antioquía naj estadó Siria a**

<sup>21</sup> Dan me se nata' ndo'o síf cu'naj Pabló ga Bernabé se nana Diosé nana sa' rihaan nij yuvij man chuman' Derbe yo', ne cavii ndo'o síf tucuyón se nana Jesucristó chuman' Derbe yo', qui'yaj roj so' a. Gaa ne canicaj roj so', ca'anj roj so' chuman' Listra do', chuman' Iconio do', chuman' Antioquía naj estadó Pisidia do' a.

<sup>22</sup> Ne nari' nucuaj nimán cunudanj nij síf tucuyón se nana Jesucristó, qui'yaj roj so' a. Ne narqué roj so' chrej man nij síf tucuyón se nana Jesucristó se vaa daj chihaa mij se ca'ne' rá nij so' ga suun noco' se tucuanj Jesucristó a. Ne cataj roj so' se vaa asino quirán' ndo'o ní' sayuun, gaa ne ca'vee cayáán ní' ga Diosé asa' guun chij Diosé rihaan chumii nihánj, taj roj so' a. <sup>23</sup> Ne cune' roj so' man síf guun chij rihaan nij síf cuchumán rá ni'yaj man Jesucristó 'o 'o nij chuman' a. Gaa ne toco' roj so' x'naa man ma'an roj so', ne cachíin ni'yaj roj so' rihaan Diosé sij 'nij ra'a man ní' che'é nij síf cuchumán rá ni'yaj man so' se vaa racuíj so' man nij so' a.

<sup>24</sup> Dan me se cachén roj so' nu' estadó Pisidia, gaa ne cuchí' roj so' estadó Panfilia a. <sup>25</sup> Gaa ne ca'mii natáj roj so' se nana Diosé rihaan nij síf man chuman' Perge, gaa ne ca'anj roj so' chuman' Atalia a. <sup>26</sup> Gaa ne chuman' Atalia ro', cavii roj so' rihoo chéé rihaan na, quinan' roj so' ndaa chuman' Antioquía naj estadó Siria a. Ne chuman' Antioquía ro', me rej cavii roj so' asino yaan gaa cachíin ni'yaj nij síf cuchumán rá ni'yaj man Jesucristó rihaan Diosé se vaa racuíj Diosé man roj so' qui'yaj suun roj so' ca'mii natáj roj so' se nana Diosé rihaan yuvij a. Ne nihánj me se quisij suun yo', qui'yaj roj so' nanj adonj. <sup>27</sup> Dan me se gaa nucui' roj so', ne canacúun roj so' man nij síf cuchumán rá ni'yaj man Jesucristó se vaa cunuu chre' nij so', gaa ne cataj xna'anj roj so' nu' se vaa qui'yaj Diosé ga roj so', ne cataj roj so' se vaa ya' x'núj rihaan nij yuvij yanij cucu-

man rá nij so' ni'yaj nij so' man Jesucristó, qui'yaj Diose, ne ca'vee cavii sa' nij yuvií yaníj yo' a. <sup>28</sup> Gaa ne guun raan ndo'o roj so' ga nij síi tucu'yón se nana Jesucristó yanj chuman' Antioquía yo' a.

**Nana nihánj taj xna'anj che'é juntá qui'yaj nij síi cuchumán rá ni'yaj man Jesucristó man chuman' Jerusalén gaa ca'mii nij so' che'é se tucuñj Moisés a**

**15** Dan me se ta'aj nij síi cuchumán rá ni'yaj man Jesucristó cavii chuman' Jerusalén, ne ca'anj nij so' tucu'yón nij so' rihaan yo'ó tinúú nij so' se vaa sese se cata' ta'nga' man yo'q so' ndaa vaa taj se tucuñj Moisés, ne daj chihaa míj se ca'vee nanii so' rihaan sayuun qui'yaj Diose ma'. <sup>2</sup> Gaa ne ca'mii canó tuvi' ndo'o síi cu'naj Pabló dq', síi cu'naj Bernabé dq', ga nij síi tucu'yón nana yo', gaa ne che'é dan cune' nij síi cuchumán rá ni'yaj man Jesucristó yanj chuman' Antioquía man roj so' ga yo'ó doj tinúú nij so' se vaa ca'anj nij so' chuman' Jerusalén nanao nij so' cuentó ga nij apóstol cune' Jesucristó man nata' se nana so' dq', ga yo'ó nij síi uun chij rihaan nij so' dq', che'é nana a'mii nij yuvií yo' a.

<sup>3</sup> Dan me se cavii nij so', ca'anj nij so', ne cachén nij so' estadó Fenicia dq', estadó Samaria dq', ne cataj xna'anj nij so' rihaan nij tinúú nij so' che'é nij yuvií yaníj se vaa cuchumán rá ta'aj nij so' ni'yaj nij so' man Jesucristó, gaa ne guun niha' uxrá rá cunudanj nij síi cuno nana yo' a. <sup>4</sup> Dan me se cuchí' nij so' chuman' Jerusalén, gaa ne ve'é ca'mii nij síi cuchumán rá ni'yaj man Jesucristó dq', nij apóstol cune' Jesucristó man nata' se nana so' dq', yo'ó nij síi uun chij dq', ga nij so' a. Gaa ne cataj xna'anj nij so' rihaan nij síi yanj chuman' Jerusalén yo' che'é nu' se vaa qui'yaj Diose ga nij tinuj nij so' a.

<sup>5</sup> Tzaj ne canicun' doj síi fariseo síi cuchumán rá ni'yaj man Jesucristó, ne cataj nij so' se vaa no xcúún nij tuvi' Pabló cuta' nij so' ta'nga' man nij síi yaníj yo', ne cataj xna'anj nij so' rihaan nij síi yaníj yo' se vaa no xcúún nij so' qui'yaj nij so' nu' se tucuñj Moisés a.

<sup>6</sup> Dan me se cunuu chre' nij apóstol cune' Jesucristó man nata' se nana so' rihaan yuvií ga yo'ó nij síi uun chij rihaan nij yuvií cuchumán rá ni'yaj man Jesucristó, qui'yaj nij so' juntá, ca'mii nij so' che'é se nanao nij síi fariseo yo' a. <sup>7</sup> Dan me se ca'mii ca'mii nij so', gaa ne canicun' síi cu'naj Pedró, ne cataj so':

—Cunq soj ca'mij, tinuj. Aj ne'en soj se vaa asij naá ndo'o guun rá Diose cunq nij síi yaníj se nanao Diose nana sa', ne cuchuman rá nij síi yaníj ni'yaj nij so' man nana sa' yo' a. Gaa ne narii Diose man yo'q tuvi' ní', ne 'unj me síi narii Diose nata' se nanao Diose rihaan nij yuvií yaníj yo' chuguanj. <sup>8</sup> Ne Diose ro', me síi ne'en daj vaa nimán yuvií, ne Diose me síi rqué Nimán Diose man nij síi yaníj yo' ndaa vaa qui'yaj so' che'é ma'an ní', che'é rej ca'vee guun ya rá ní' se vaa ya tinúú ní' me nij síi yaníj nanj adonj. <sup>9</sup> Dan me se cunuu sa' nimán nij síi yaníj rihaan Diose che'é se cuchumán rá nij so' ni'yaj nij so' man Jesucristó, ne cuano nihánj me se 'o cuyaan vaa nij so' ga ní' rihaan Diose nanj adonj.

<sup>10</sup> "Ne tadó soj sese guun rá soj quene'en soj sese ca'vee ca'maan rá Diose qui'yaj soj ne qui'yaj Diose sayuun man soj á. 'Q se xa' se tucuñj Moisés, tzaj ne ase vaa icón 'ee taj raá yuntá scúj ro', danj vaa se tucuñj Moisés rihaan xii ní' dq', rihaan ma'an ní' dq', ne ne ca'vee qui'yaj ní' nu' tucuáán yo' ma'. Ne nihánj me se me rá soj cuchruj soj tucuáán yo' rihaan yo'ó nij tinúú ní' síi tucu'yón se nanao Jesucristó, <sup>11</sup> tzaj ne amán rá ní' se vaa che'é inanj se luj qui'yaj Jesucristó sij 'nij ra'a man ní' ro', che'é dan nanii ní' rihaan sayuun ei. Nuveé se tucuñj Moisés me se vaa qui'yaj nanii ní' rihaan sayuun ma'. Ne ase vaa ní' ro', danj vaa nij tinúú ní' síi yaníj uún adonj —taj Pedró rihaan cunudanj nij so' a.

<sup>12</sup> Dan me se ca'ne' rá nij so', ne a doj ne ca'mii nij so' a ma'. Maan se sa' uxrá nanó xrej nij so' gaa cataj xna'anj Bernabé ga Pabló che'é nij suun sa' nocqo guun nucuaj roj so' qui'yaj roj so' sca'núj nij síi yaníj qui'yaj Diose a. <sup>13</sup> Dan me se gaa quisíj ca'mii roj so', gaa ne ca'mii síi cu'naj Santiagó, cataj so':

—Cunq nij soj ca'mij, tinuj. <sup>14</sup> Nihánj me se cataj xna'anj tinú' Simón rihaan ní' se vaa asino yaan narii Diose man ta'aj nij yuvií yaníj guun nij so' 'o se chuman' Diose a. <sup>15</sup> Ne 'o cuyaan vaa se nanao nij síi nata' se nanao Diose gaa naá ga se nanao tinú' Simón nihánj a. Dan me se vaa nanao rihaan danj Diose taj: <sup>16</sup> "Asa' quisíj, gaa ne canicaj 'unj, ne naquiyaj sa' 'unj rej ne síi cu'naj David a. Dan me se canee nu' ve' ne so', ne quiri' ndo'o ve', tzaj ne nacune' caya uún 'unj man nu' ve' yo', gaa ne cunuu sa' cunudanj yo' a. <sup>17</sup> Danj qui'yaj che'é rej ca'vee nanao' yo'ó nij yuvií yaníj man 'unj sij 'nij ra'a man nij so' a. Danj qui'yaj cunudanj nij yuvií yaníj nocq' manj, taj 'unj sij 'nij ra'a man soj, <sup>18</sup> ne asij naá cataj 'unj se vaa qui'yaj danj adonj", taj se nanao Diose nanao cachrón síi nata' se nanao Diose gaa naá rihaan yanj a.

<sup>19</sup> "Che'é dan 'unj me síi guun rá se vaa se qui'yaj ní' sayuun man nij síi yaníj canicaj nimán canoco' man Diose ma'. Se cataj ní' se vaa canoco' nij so' nu' se tucuñj Moisés ma'. <sup>20</sup> Maan se qui'yaj ní' yanj ca'nej ní' rihaan nij so', ne cataj xna'anj ní' rihaan nij so' se vaa se guun cha' nij so' rasuun rqué yuvií rihaan ya'anj cacóq yuvií ma'. Ne snó'o dq', chanao dq', se cotoj nij so' ga yo'ó yuvií sese ne nicaj nij so' me yo' ma'. Ne se chá nij so' neq xcuu tuguáj nii gaán chihá ma'. Ne se chá nij so' ton ma'. <sup>21</sup> 'Q se daj a güii cuetan' naranj rá ní' me se man ndo'o tuvi' ní' sij israelitá nayaa se nanao Moisés, ne a'mii natáj nii che'é se tucuñj so' rá ve' tucu'yón ní' tucuáán yo' daj a chuman' a. Ne danj 'yaj inanj ní' sij israelitá asij naá ndo'o a —taj síi cu'naj Santiagó rihaan yo'ó nij so' a.

**Nanao nihánj taj xna'anj che'é yanj cartá qui'yaj nij síi man Jerusalén ca'née nij so' rihaan nij yuvií yaníj cuchumán rá ni'yaj man Jesucristó a**

<sup>22</sup> Gaa ne guun rá nij apóstol cune' Jesucristó man nata' se nanao so' dq', yo'ó nij síi uun chij dq', cunudanj nij yuvií cuchumán rá ni'yaj man Jesucristó yanj chu-

man' Jerusalén do', narij nij so' doj tuvi' ma'ān nij so' ca'anj nij so' ndaa chuman' Antioquia ga roj síi cu'naj Pabló do', Bernabé do' a. Gaa ne narij nij so' man síi cu'naj Judas Barsabás do', man síi cu'naj Silas do', se vaa ca'anj roj so' a. 'O se síi sa' me roj so', rá nij tinúú roj so' a. <sup>23</sup> Gaa ne qui'yaj cunudanj nij so' yanj cartá ca'anj nıcaj nij síi ca'anj chuman' Antioquia, ne nihánj me se vaa taj yanj cartá yo' a: "Nihánj me yanj cartá 'yaj núj sij apóstol cune' Jesucristó man nata' se nana so' do', sij uun chij rihaan nij síi amán rá ni'yaj man Jesucristó do' a. Tinúú soj me núj, ne ca'nej núj yanj nihánj rihaan nij soj sij yanıj amán rá ni'yaj man Jesucristó yanj chuman' Antioquia do', estadó Siria do', estadó Cilicia do' a. <sup>24</sup> Dan me se ca'na' nana rihaan núj se vaa doj tuvi' núj me síi ca'mii nana qui'yaj sayuun rihaan nij, ne quiri' rá soj, qui'yaj nij síi ca'mii nana yo' rihaan nij soj a. Tzaj ne nuveé núj ca'née man nij so' ma'. <sup>25</sup> Tzaj ne che'é se qui'yaj nij so' dānj roj, che'é dan cuyaan guun rá núj narij núj doj tinúú núj cuchı' rihaan soj ga roj tinúú ní' síi 'eē ndo'o rá núj síi cu'naj Bernabé ga Pabló adonj. <sup>26</sup> Ne xa' roj so', tzaj ne sij ca'née nimán cunuú rihaan Jesucristó sij 'nij ra'a man ní' me roj so', ne ndaa ne chu'vi' roj so' cavı' roj so' ma'. <sup>27</sup> Dan me se ca'née núj man síi cu'naj Judas do', man síi cu'naj Silas do', se vaa ca'anj roj so' ga síi cu'naj Bernabé ga Pabló, ne ma'ān roj so' nata' rihaan soj ndaa vaa taj nana no rihaan yanj nihánj ei.

<sup>28</sup> "Dan me se ne guun rá Nimán Dıose do', ma'ān núj do', cuchıj ndo'o núj tucuáan canoco' soj ma'. Tzaj ne vaa che'é cunō soj ca'anj guee nana nihánj, rá núj nanj adonj. <sup>29</sup> Dan me se se guun cha soj rasuun rquē yuvıi rihaan ya'anj cacój yuvıi ma'. Se guun cha soj ton ma'. Se guun cha soj nee xcuu tuguáj nii gaán chihá ma'. Ne snó'o do', chana do', se cotoj soj ga yo'ó yuvıi sese ne nıca soj me yo' ma'. Ne sese qui'yaj soj nu' ndaa vaa taj nana nihánj, ne ve'é 'yaj soj, rá núj nanj adonj. Ne me rá núj se vaa ve'é çayáan soj adonj", taj yanj cartá qui'yaj nij síi man chuman' Jerusalén yo' a.

<sup>30</sup> Dan me se ca'née nij so' man ca'anj nij síi ca'anj chuman' Antioquia, gaa ne gaa cuchı' nij so', ne canacúun nij so' cunu chre' cunudanj nij síi cuchumán rá ni'yaj man Jesucristó, gaa ne caxrıj nij so' yanj cartá yo' ston nij síi yanj chuman' Antioquia a.

<sup>31</sup> Gaa ne nayaa nij síi man Antioquia yanj cartá, gaa ne guun niha' uxrá rá nij so' che'é nana sa' cataj xna'anj nij síi man Jerusalén rihaan nij so' a. <sup>32</sup> Ne síi cu'naj Judas do', síi cu'naj Silas do', síi nata' se nana Dıose me roj so', ne a'mii a'mii roj so' nago' roj so' chrej man nij síi man Antioquia yo', ne nari' nucaj nimán nij so', qui'yaj roj so' a. <sup>33</sup> Dan me se quisıj caran' roj so' chuman' Antioquia, gaa ne ve'é cataj nij tinuj nij síi man Antioquia rihaan roj so' se vaa dınj gaa nimán roj so' ca'anj roj so' a. Gaa ne dan me se quinan' roj so' rihaan nij síi ca'née man roj so' ca'na' roj so' a. <sup>34</sup> Tzaj ne guun rá síi cu'naj Silas quınaj so' chuman' Antioquia a. <sup>35</sup> Ne guun rāan síi cu'naj Pabló do', síi cu'naj Bernabé do', chuman' Antioquia, ne tucu'yón roj so' se nana

Dıose sij 'nij ra'a man ní' nana sa' rihaan yuvıi a. Ne que'eē ndo'o yo'ó nij yuvıi nata' nana sa' yo' ga roj so' a.

**Nana nihánj taj xna'anj se vaa ca'anj uún Pabló tucu'yón so' se nana Dıose rihaan yuvıi, ne ca'anj Bernabé yo'ó rej yanıj a**

<sup>36</sup> Dan me se cachén doj güii, gaa ne cataj Pabló rihaan Bernabé a:

—Canıcaj ní' ca'anj uún ní' cunudanj nij chuman' yanj nij tinúú ní' nij síi nata' ní' se nana Dıose nana sa' rihaan, gaa ne quene'ēn ní' daj vaa mán nij so' ei —taj Pabló rihaan Bernabé a.

<sup>37</sup> Tzaj ne Bernabé ro', guun rá so' se vaa ca'anj uún síi cu'naj Juan Marcos ga roj so' a. <sup>38</sup> Tzaj ne ne ca'vej rá Pabló ca'anj uún Juan Marcos ga roj so', che'é se gaa rquē me se tanáj Juan Marcos man roj so' estadó Panfilia, ne ne ca'anj so' qui'yaj suun nij so' che'é Dıose ma'. <sup>39</sup> Che'é dan guun vij nana ca'mii roj so' che'é Juan Marcos, ne che'é dan ca'anj yanıj roj so', ne Bernabé ro', nıcaj síi cu'naj Marcos, ne cavıi roj so' ri-hoo chée rihaan na, ne ca'anj roj so' estadó Chipre a. <sup>40</sup> Ne Pabló ro', narij so' man síi cu'naj Silas se vaa ca'anj so' ga Pabló a. Ne cachıın ni'yaj nij tinúú roj so' nij síi man chuman' Antioquia rihaan Dıose se vaa qui'yaj Dıose se lıj ne rācıj so' man roj so' chrej ca'anj roj so', ne dan me se ca'anj roj so' a. <sup>41</sup> Gaa ne cachén roj so' nu' estadó Siria do', nu' estadó Cilicia do', ne nari' nucaj nimán nij x'ne' nij síi cuchumán rá ni'yaj man Jesucristó man cunudanj nij chuman' naj roj estadó yo', qui'yaj roj so' a.

**Nana nihánj taj xna'anj se vaa cachée síi cu'naj Timoteo ga síi cu'naj Pabló ga Silas a**

**16** Dan me se cuchı' síi cu'naj Pabló ga Silas chuman' Derbe do', chuman' Listra do' a. Ne chuman' Listra ro', yáan 'o síi tucu'yón se nana Jesucristó, ne Timoteo cu'naj so' a. Ne nii Timoteo me chana israelitá cuchumán rá ni'yaj man Jesucristó, ne rej Timoteo me síi yanıj a'mii xna'anj griego a. <sup>2</sup> Ne síi sa' me Timoteo, taj nij tinúú so' síi ne chuman' Listra do', chuman' Iconio do' a. <sup>3</sup> Dan me se guun rá Pabló se vaa ca'anj Timoteo ga so' a. Ne cuta' Pabló ta'nga' man so', che'é se ne'en cunudanj nij síi israelitá yanj rej yo' se vaa sij yanıj me rej so' ne che'é dan nuvi' ta'nga' cata' man so' ma'. <sup>4</sup> Dan me se gaa cachén nij so' nu' nij chuman', ne cataj xna'anj nij so' rihaan nij yuvıi cuchumán rá ni'yaj man Jesucristó se vaa cunō nij yuvıi se nana nij apóstol cune' Jesucristó man do', yo'ó nij síi uun chij yanj chuman' Jerusalén do', nana naquı'yaj cuu nij so' che'é nij síi yanıj a. <sup>5</sup> Ne xa' nij x'ne' nij síi cuchumán rá ni'yaj man Jesucristó, tzaj ne doj a canoco' nij so' se tucuıanj Jesucristó, ne doj a cunu rıi nij x'ne' daj a güii a.

Nanə nihánj taj xna'anj se vaa naqui'yaa 'o síf ne estadó Macedonia rihaan Pabló, qui'yaj Diose a

<sup>6</sup> Dan me se caráán Nimán Diose chrej rihaan nij so' nata' nij so' se nanə Diose estadó cu'naj Asia, ne che'é dan cachén nij so' rej cu'naj Frigia do', rej cu'naj Galacia do' a. <sup>7</sup> Gaa ne vaj nij so' chrej ndaa rej cu'naj Misia, gaa ne guun rá nij so' ca'anj nij so' estadó cu'naj Bitinia a. Tzaj ne ne ca'vee qui'yaj nij so' danj, qui'yaj Nimán Diose ma'. <sup>8</sup> Che'é dan cachén nij so' rej cu'naj Misia, ne nanij nij so' ndaa chuman' Troas a. <sup>9</sup> Ne dan me se rej nij naqui'yaa 'o rasuun rihaan Pabló, qui'yaj Diose a. Ne dan me se nicun' 'o síf ne estadó Macedonia ni'yaj Pabló, ne canacúún snó'o yo' man Pabló, cataj so':

—Ca'na' so' ndaa estadó Macedonia nihánj, ne racuúj so' man nuj á —taj so' rquee so' man Pabló a.

<sup>10</sup> Gaa ne nu' nanó rá ca'anj ran' nuj daj gaa qui'yaj nuj ne ca'vee ca'anj nuj ndaa estadó Macedonia a. 'O se cachríj rá ya nuj se vaa Diose me síf ca'ne' suun rihaan nuj nata' nuj se nanə Diose nanə sa' rihaan nij síf ne estadó Macedonia yo' a.

Nanə nihánj taj xna'anj che'é chanə cu'naj Lidia chanə cuchumán rá ni'yaj man Jesucristó a

<sup>11</sup> Dan me se chuman' Troas ro', cavii nuj rihoo chée rihaan na, ne 'o chrej ca'anj nuj cuhi' nuj ndaa rej cu'naj Samotracia a. Ne yo'ó güii ca'anj nuj rque rihoo ndaa chuman' cu'naj Neápolis a. <sup>12</sup> Gaa ne cavii nuj chuman' yo', ca'anj nuj chuman' cu'naj Filipos a. Ne chuman' Filipos ro', me chuman' nocoo naj estadó Macedonia, ne chuman' cuchruj nij síf cavii Romá me yo' a. Dan me se guun raan nuj doj güii chuman' Filipos yo', <sup>13</sup> ne güii naránj rá nij yuvij israelitá curihanj nuj ta'yaa xij rej atúj yuvij chuman' yo', ne ca'anj nuj tu'va 'o chráá a. 'O se guun rá nuj se vaa rej yo' me rej cunuu chre' nij yuvij israelitá cachinj ni'yaj nij so' rihaan Diose a. Dan me se cayáán nuj rihaan yo'óó, ne ca'mii nuj gə nij chanə cunuu chre' rej yo', <sup>14</sup> ne yáán 'o chanə cu'naj Lidia, ne no' ro', me chanə ránj natu'vej yatzij mantá tintá sa' inanj, ne chanə cavii chuman' Tiatira me no', ne chanə yanij aráj guée rihaan Diose me no' a. Dan me se cuno no' se nanə Pabló, ne racuúj ndo'o Diose sij 'nij ra'a man ní' man no' se vaa ca'vee cuchumán rá no' se nanə Pabló yo' a. <sup>15</sup> Gaa ne cata' ne nij tucua no' a. Gaa ne canacúún no' man nuj, cataj no':

—Sese 'unj me chanə amán ya rá ni'yaj man Diose sij 'nij ra'a man ní', rá nij soj, ne caran' soj ve' tucua dij güii á —taj chanə cu'naj Lidia rihaan nuj a.

Ne rquee ndo'o no' man nuj, ne caran' nuj ve' tucua no' a.

Nanə nihánj taj xna'anj se vaa catúj roj síf cu'naj Pabló gə Silas taga' che'é se quirii roj so' nanə chree nimán 'o chanə yaan rii suerté, tzaj ne racuúj Diose man roj so' a

<sup>16</sup> Dan me se yo'ó güii ca'anj uún nuj rej cachinj ni'yaj nuj rihaan Diose, ne nari' tuvi' 'o chanə yaan gə nuj, ne nuu 'o nanə chree nimán no', ne qui'yaj canaán ndo'o nij síf uun chij rihaan no' sa'anj, qui'yaj no' gaa quirii no' suerté che'é yuvij a. <sup>17</sup> Dan me se canoco' ndo'o no' man nuj gə Pabló, ne caguáj no', cataj no':

—Nij síf nihánj ro', me síf nuu rihaan Diose síf nicun' xta', ne nata' nij so' rihaan soj me tucuaán canoco' soj ne ca'vee nanij soj rihaan sayuun ei —taj no', ni'yaj no' man nuj a.

<sup>18</sup> Dan me se guun que'ee güii qui'yaj no' danj, gaa ne guun rmii Pabló, qui'yaj no', ne che'é dan canicaj so' ca'mii so' rihaan nanə chree nuu nimán no', cataj so':

—Nihánj me se che'é suun nucuaj rque Jesucristó manj a'né' 'unj suun rihaan so' se vaa curihanj so' nimán chanə nihánj á —taj Pabló rihaan nanə chree yo' a.

Gaa ne nu' curihanj nanə chree nimán no' a.

<sup>19</sup> Dan me se nij síf uun chij rihaan chanə yaan yo' me se xcaj nij so' cuenta se vaa che'é se curihanj nanə chree nimán chanə yo' ro', che'é dan se ca'vee qui'yaj canaán nij so' doj sa'anj qui'yaj chanə yaan yo', rá nij so' a. Che'é dan quita'aa nij so' man Pabló gə Silas, ne nucuaj rij nii man roj so' ca'anj nij so' yu'vee ndaa rihaan nij síf nicaj suun uun chij rihaan chuman' yo' a. <sup>20</sup> Gaa ne ca'anj nicaj nij so' man roj síf cu'naj Pabló gə Silas rihaan roj cuese uun chij rihaan chuman' yo', gaa ne cataj nij so' a:

—Roj síf nihánj me se nanj yuvij israelitá me roj so', ne uun rmii rá nu' nij síf man chiháán ní' 'yaj roj so' nanj á. <sup>21</sup> 'O se nata' roj so' tucuaán nacə rihaan nuj, ne nuveé tucuanj nə xcúún ní' nicaj ní' me tucuaán yo' che'é se síf nocoo gobiernó ne Romá me ní' á —taj nij so' rihaan roj cuese uun chij rihaan chuman' yo' a.

<sup>22</sup> Gaa ne 'o cunihəan guun rá nij yuvij man chuman' yo', ne caxrij yuvaə ndo'o nij so' man Pabló gə Silas a. Gaa ne nucuaj cuxuun roj cuese sagan' Pabló gə Silas ndaa se quitzin' yatzéj, ne ca'ne' roj cuese suun rihaan nij tanuu se vaa go' ndo'o nij tanuu rutzij xráá roj so' a. <sup>23</sup> Ne gaa quisij cayuun roj so', ne tagüéj nij tanuu man roj so' rá taga', ne ca'ne' roj cuese yo' suun rihaan síf tumé taga' se vaa cütumé uxrá so' man roj so' a.

<sup>24</sup> Dan me se gaa cuno síf tumé taga' nanə yo', ne canu' so' man roj so' rá 'o ve' rej rque taga' yo', ne caxrij so' tacóo roj so' rque yu'uj taj rque caj a.

<sup>25</sup> Dan me se rej nij yan' achíín ni'yaj ndo'o roj síf cu'naj Pabló gə Silas ne achráá roj so' chra' rihaan Diose, ne uno nij síf man taga' se vaa 'yaj roj so', <sup>26</sup> ne dan me se cachén ndo'o yuún, ne ndaa nasqui' ndo'o tacóo ve' taga' yo', ne x'núj nu' nij ta'yaa taj rihaan taga' yo', ne nache nu' aga' ne' nuu chihá ra'a cunudanj nij síf 'nij taga' yo' a. <sup>27</sup> Ne nanuú rá síf tumé taga', ne quene'en

so' se vaa táá ya'núj uun nij ta'yaa, gaa ne guun rá so' se vaa aj cunánj nij síi man taga', ne che'é dan quirii so' taneê so' neê espadá, ne daj doj se ticavi' so' man ma'an so' a. <sup>28</sup> Tzaj ne nucuaj ndo'o caguáj síi cu'naj Pabló rihaan so', cataj Pabló:

—Se guun qui'yaj chi'ii so' man ma'an so' ma'. 'O se man chre' cunudanj núj nihánj nanj ei —taj Pabló, caguáj so' a.

<sup>29</sup> Gaa ne canacúun síi tumé taga' se vaa ca'na' nicaj nii ya'an chuguun rihaan so', ne yoo ndo'o catúj so' rá taga', ne ri'ij ndo'o man so' che'é se chu'vi' so', ne cayáan ruj so' ndaa canó tu'va so' rihaan yo'óo rihaan roj síi cu'naj Pabló ga Silas a. <sup>30</sup> Dan me se ca'anj nicaj so' man roj so' xe', ne xná'anj so' man roj so', cataj so':

—Daj qui'yaj, gaa ne ca'vee nanij 'unj rihaan sayuun qui'ran' 'unj nihánj ga —taj so', xná'anj so' man roj so' a.

<sup>31</sup> Gaa ne cataj roj so':

—Cuchuman rá so' ni'yaj so' man Jesucristó sij 'nij ra'a man ní', gaa ne nanij so' rihaan sayuun nihánj do', rihaan chrej chi'ii uun chij nimán so' do' a. Ne danj inanj qui'yaj nij tuvi' soj, gaa ne cavii sa' cunudanj soj rihaan Diose á —taj roj so' rihaan síi tumé taga' yo' a.

<sup>32</sup> Gaa ne nata' roj so' se nana Diose sij 'nij ra'a man ní' rihaan nu' nij tucua so' a. <sup>33</sup> Dan me se rej nij me yo', ne maan orá dan nicaj síi tumé taga' yo' man roj so', ne na'nu' so' xráá roj so' rej canó rutzij, ne nu' qui'yaj so' danj, ne nu' cata' ne nu' nij tucua so' a.

<sup>34</sup> Gaa ne ca'anj nicaj so' man roj so' rej xrax rej ne ma'an so', ne go' so' se chá chá roj so' a. Gaa ne dan me se guun niha' uxra' rá nij tucua so', che'é se cuchumán rá nij so' ni'yaj nij so' man Diose a.

<sup>35</sup> Gaa ne rej ranga' me se ca'née roj cuese man misión taga', ne cataj nij misión rihaan síi tumé taga' a:

—Na'nej so' man roj snó'o yo' á —taj nij so' a.

<sup>36</sup> Gaa ne cuchi' síi tumé taga' yo' rihaan Pabló, ne nata' so' se nana nij misión rihaan Pabló, cataj so':

—Ca'née roj cuese nana se vaa na'nej 'unj man roj soj nanj á. Che'é dan cuano nihánj me se ca'vee ca'anj roj soj, ne gaa xej nimán roj soj á —taj so' rihaan Pabló a.

<sup>37</sup> Gaa ne cataj Pabló rihaan nij misión a:

—Dan me se roj cuese yo' ro', nda' se sij romanó me rój, tzaj ne ne naqui'yaj cuu roj so' che'é rój, ne maan se go' rma'an nii rutzij xráá rój, qui'yaj roj so', ne quene'en cunudanj nij yuvii man rój se vaa cayuun rój, gaa ne caxrij roj so' taga' man rój a. Ne nihánj me se uun rá roj so' quirii yuve roj so' man rój xe', tzaj ne se guun danj ma'. Tananj ca'na' ma'an roj so' nihánj, gaa ne ve'é quitaj yaan roj so' rihaan rój curihanj rój taga' nihánj á —taj Pabló rihaan nij misión ca'na' taga' a.

<sup>38</sup> Dan me se nata' nij misión se nana Pabló rihaan roj cuese yo', gaa ne cuhu'vi' ndo'o roj so' gaa cuno roj so' nana se vaa sij romanó me Pabló ga Silas a.

<sup>39</sup> Gaa ne cuchi' roj cuese taga', gaa ne ca'mii sa' roj so' ga roj síi cu'naj Pabló ga Silas a. Gaa ne quitáa yaan roj cuese rihaan roj so' curihanj roj so' taga', ne ve'é cachíin ni'yaj roj cuese rihaan Pabló ga Silas se

vaa qui'yaj roj so' se ndo'o, curihanj roj so' chuman' yo' a. <sup>40</sup> Dan me se gaa quisij curihanj roj so' taga', gaa ne ca'anj roj so' tucua chana' cu'naj Lidia a. Gaa ne gaa quene'en roj so' man nij tinúu' nij so' síi nocó' man Jesucristó, ne ca'mii roj so' ga nij so', ne cunuu xej nimán nij so' qui'yaj se nana roj so', gaa ne curihanj roj so' chuman' yo', ne ca'anj roj so' a.

**Nana nihánj taj xna'anj se vaa ca'maan rá nij síi man chuman' Tesalónica ni'yaj nij so' man Pabló ga Silas a**

**17** Dan me se cachén roj so' chuman' Anfípolis do', chuman' Apolonia do', gaa ne catúj roj so' chuman' Tesalónica a. Ne chuman' Tesalónica ro', ne 'o ve' tucuyón nij yuvii israelitá se tucuanj Moisés a. <sup>2</sup> Dan me se catúj Pabló rá ve' yo' rej nuu chre' nij yuvii israelitá yo', ndaa vaa u'yón inanj so' qui'yaj so' a. Ne va'núj ya güii cuetan' naránj rá nij so' nanó Pabló cuentó ga nij so' che'é nana no' rihaan danj Diose a. <sup>3</sup> Dan me se cataj xna'anj Pabló rihaan nij so' se vaa síi ca'née Diose tinanii man yuvii rihaan sayuun me se no' xcúun so' qui'ran' so' sayuun ne cavi' so' ne cunuu i'na' uún so', ne cataj Pabló se vaa ma'an Jesucristó síi nata' Pabló che'e rihaan nij so' ro', ma'an ya so' me síi ca'née Diose tinanii man yuvii rihaan sayuun a. <sup>4</sup> Gaa ne ta'aj nij síi israelitá cuno se nana Pabló ro', cuchumán rá nij so' ni'yaj nij so' man Jesucristó, ne guun tuvi' nij so' ga Pabló ne ga Silas a. Ne cuchumán rá que'ee ndo'o nij síi yanij a'mii xna'ánj griego aráj guee inanj rihaan Diose do', que'ee nij chana' raá doj ne chuman' yo' do', cuchumán rá a.

<sup>5</sup> Tzaj ne guun xcoj ruvaá rá yo'óo nij yuvii israelitá ni'yaj nij so' man roj síi cu'naj Pabló ga Silas, ne che'é dan nano' nij so' doj síi chi'ii man yu'vee, ne cunuu chre' ndo'o yuvii, qui'yaj nij síi chi'ii yo', gaa ne naxumaa'ndo'o sayuun chuman' yo', qui'yaj nij so' a. Gaa ne cuchi' nij yuvii yo' rihaan ve' tucua síi cu'naj Jasón ve' caran' síi cu'naj Pabló ga Silas, ne guun rá nij yuvii quirii nij so' man roj so' ndaa rihaan yuvii cunuu chre' a. <sup>6</sup> Dan me se nuvi' roj so' ne rá ve' yo' gaa cuchi' nij yuvii nano' man roj so' ma'. Che'é dan quirii nij yuvii man ma'an síi cu'naj Jasón do', man yo'óo nij tinúu' ní' síi nocó' man Jesucristó do', ne nucuaj riíi nij yuvii man nij so' ndaa rihaan nij síi uun chij rihaan chuman' yo' a. Gaa ne caguáj nij yuvii, cataj nij yuvii:

—Nij síi nihánj 'yaj natuná tucuaán naj rihaan yuvii man nu' caxra' rihaan chumii, tzaj ne nihánj me se ndaa chiháán ní' 'na' nij so' tiri' nij so' yaj nanj chuguanj. <sup>7</sup> Ne síi cu'naj Jasón nihánj me se taj ya'anj so' man roj so' adonj. Ne cunudanj nij so' ro', inanj se vaa na'vej rá síi cu'naj César qui'yaj yuvii 'yaj nij so' nanj á. 'O se tucuyón nij so' rihaan yuvii se vaa Jesucristó me yo'óo síi nicaj suun rey uun chij rihaan ní' nanj ei —taj nij yuvii israelitá, caguáj nij so', cuno nij síi uun chij rihaan chuman' Tesalónica yo' a.

<sup>8</sup> Dan me se cuyanj ndo'o rá nij síi uun chij do', yo'óo nij yuvii ne chuman' yo' do', gaa cuno nij so' nana yo', <sup>9</sup> gaa ne cata' tu'va nij tuvi' síi cu'naj Jasón se vaa se guun qui'yaj nij so' doj sayuun, ne ndaa cuchruj nij so'

sa'anj, ne na'née nij sí uun chij yo' chrej man nij so' a.

**Nana nihánj taj xna'anj se vaa ca'mii natáj sí cu'naj Pabló ga Silas se nana Diosé rihaan nij sí man chuman' Berea a**

<sup>10</sup> Dan me se maan orá rej nij güii yo' ca'née nij tinúú ní' sí man chuman' Tesalónica man sí cu'naj Pabló ga Silas ca'anj roj so' ndaa chuman' Berea a. Gaa ne cuhi' roj so', ne catúj roj so' rá ve' tucu'yón nij yuvij israelitá se tucuanj Moisés a. <sup>11</sup> Ne nij sí israelitá yanj chuman' Berea me se sa' doj vaa nimán nij so' rihaan nij sí israelitá yanj chuman' Tesalónica yo' a. 'O se aran' rá nij so' cunó nij so' se nana Diosé, ne daj a nij güii yanj ndo'o nayaa nij so' danj Diosé, che'é se guun rá nij so' xcaj nij so' cuentá sese ya ya cuyaan vaa se nana Pabló ga nana no rihaan danj Diosé a. <sup>12</sup> Che'é dan que'ee ndo'o nij so' cuchumán rá ni'yaj man Jesucristó a. Ne nij sí yanij a'mii xna'anj griego me se que'ee tuvi' nij so' chana ni'yanj nimán do', snó'o do', cuchumán rá ni'yaj man Jesucristó a.

<sup>13</sup> Dan me se xcaj nij sí israelitá yanj chuman' Tesalónica cuentá se vaa ndaa chuman' Berea nata' uún sí cu'naj Pabló se nana Diosé rihaan nij yuvij a. Che'é dan ca'anj nij so' chuman' Berea yo', ne ca'mii ne nij so' che'é Pabló, ne cuyanj rá nij sí man Berea ni'yaj nij so' man sí cu'naj Pabló ga Silas, qui'yaj nij sí man Tesalónica yo' a. <sup>14</sup> Gaa ne nu' ca'née nij tinúú ní' man Pabló ca'anj so' ndaa tu'va na ya'anj, tzaj ne quináj sí cu'naj Silas do', sí cu'naj Timoteo do', chuman' Berea yo' a. <sup>15</sup> Ne ta'aj nij sí man Berea yo' me se ca'anj tacuachée man Pabló, ne ca'anj nicaj nij so' man so' ndaa chuman' Atenas a. Gaa ne rque Pabló nana rihaan nij sí man Berea nata' nij so' rihaan sí cu'naj Silas ga Timoteo se vaa cuaj ca'na' roj so' rihaan Pabló a. Gaa ne canicaj nij sí man Berea yo' quinan' nij so' chiháan nij so' a.

**Nana nihánj taj xna'anj che'é nij nana ca'mii natáj Pabló rihaan nij sí man chuman' Atenas a**

<sup>16</sup> Dan me se gaa na'vij Pabló ca'na' roj sí cu'naj Silas ga Timoteo chuman' Atenas, ne ve'ee ndo'o nimán Pabló gaa quene'en so' se vaa man ndo'o ya'anj qui'yaj ra'a nij sí man Atenas yo' rque chuman' yo', <sup>17</sup> ne che'é dan nanó ndo'o so' cuentó ga nij yuvij israelitá do', ga nij sí yanij aráj guée rihaan Diosé do', rá ve' tucu'yón nij so' se tucuanj Moisés a. Ne daj a güii ca'anj so' yu'vee, ne nanó so' cuentó ga me ma'an sí chée yu'vee yo' a. <sup>18</sup> Dan me se man ndo'o sí chruun yanj ne chuman' Atenas yo', ne ta'aj nij so' me sí tucu'yón se nana sí cu'naj Epicuro, ne yo'ó ta'aj nij so' cu'naj estoico a. Ne doj tuvi' nij so' nanó cuentó ga Pabló a. Dan me se ta'aj nij so' cataj:

—Me taj sí nihánj tu'va rma'an so' danj, rá soj ga —taj nij so', xná'anj nij so' man tuvi' nij so', ni'yaj nij so' man Pabló a.

Ne yo'ó ta'aj nij so' cataj:

—Sí nata' se nana ya'anj curuvi' naca me so' nanj á —taj yo'ó ta'aj nij yuvij, ese nata' Pabló se nana Jesucristó nana sa' rihaan nij so', ne nata' Pabló se vaa ca'vee cunyu i'na' uún nij sí cavi' a.

<sup>19</sup> Dan me se ca'anj nicaj nij so' man Pabló ra'a 'o quij le'ej cu'naj Areópago, ne cataj nij so' rihaan Pabló:

—Qui'yáa so' se ndo'o cataj xna'anj so' rihaan nún daj vaa nij nana naca nana tucu'yón so' rihaan yuvij á. <sup>20</sup> 'O se caráya'anj ndo'o nún ta'aj nij nana ca'mii so' cuno nún, ne che'é dan me rá nún xcaj nún cuentá daj vaa tucuaán tucu'yón so' a —taj nij sí man Atenas rihaan sí cu'naj Pabló a.

<sup>21</sup> 'O se nij sí man chuman' Atenas do', nij sí 'na' aran' chuman' Atenas do', inanj uun rá nij so' nata' nij so' nana naca do', narí' nij so' nana naca do', nanj adonj.

<sup>22</sup> Dan me se canicun' Pabló tanyu sca'nún nij so' ra'a quij cu'naj Areópago, gaa ne cataj so' rihaan nij so':

—Cunó soj sij man chuman' Atenas nihánj ca'mij á. Aj ne'enj se vaa sij aran' ndo'o rá na'vij rihaan nij ya'anj me nij soj adonj. <sup>23</sup> 'O se gaa cachenj chuman' man soj, ne quene'é 'unj nij rej na'vij soj rihaan nij ya'anj nocó' soj, ne quene'é 'unj yo'ó chraan altar, ne nana no rihaan chraan altar yo' cataj, "Rej na'vij ní' rihaan ya'anj ne ne'en ní' man a", taj nana no rihaan chraan altar yo' a. Ne xa' 'unj, tzaj ne nihánj me se nata' 'unj rihaan nij soj che'é ma'an ya'anj yo' ya'anj na'vij soj rihaan, ya'anj ne ne'en soj man nanj adonj.

<sup>24</sup> "Dan me se Diosé ro', me ya'anj qui'yaj nu' chumi do', nu' rasuun man rihaan chumi do', ne se ca'vee guun tucua so' ve' une' yuvij cané so' che'é se so' me sí 'nij ra'a nu' rej xta' nu' yo'ó nu' a. <sup>25</sup> 'O se so' me sí 'yaj vaa i'na' ní', ne so' me sí 'yaj naránj ní' nana, ne dan me se rque so' nu' rasuun achiin man ní' adonj.

Ne che'é dan taj vaj rasuun achiin man so', ne se ca'vee racuí' yuvij man so' ma'. <sup>26</sup> Ne orún' snó'o qui'yaj so' asij rque ro', veé ton dan qui'yaj so' man daj a x'ne' nij yuvij, che'é rej cayáan nij yuvij rihaan nu' cachra' chumi adonj. Ne aj ne'en Diosé me daj yo' cayáan 'o 'o x'ne' nij yuvij rihaan chumi, ne aj ne'en Diosé me rej guun ran' to'óo 'o 'o x'ne' nij yuvij ei. <sup>27</sup> 'O se guun rá Diosé se vaa xcaj nij yuvij cuentá che'é Diosé ne narí' nij yuvij man Diosé chuguanj. 'O se neveé sij ne gan' ndo'o rihaan 'o 'o ní' me Diosé ma'.

<sup>28</sup> 'O se vaa i'na' ní', 'yaj so', ne chée ní', 'yaj so', ne vaa ní' rihaan chumi nihánj, 'yaj so' adonj. 'O se ta'aj tuvi' nij soj sí chruun yanj cachrón nana nihánj rihaan yanj se vaa: "'O se ndaa ta'ní' so' me ní' adonj", taj ta'aj tuvi' ma'an soj nanj ei. <sup>29</sup> Ne che'é se ta'nij Diosé me ní' ro', che'é dan ne nó xcúun ní' guun rá ní' se vaa ase vaa Diosé ro', danj vaa nij aga' oró mii titaa ní' do', nij aga' platá catzii titaa ní' do', nij yahij acó' ní' do' ma'. 'O se inanj rasuun avii ra'a ma'an ní' yuvij me nij rasuun vaa danj ei.

<sup>30</sup> "Dan me se asij rque me se ne qui'yaj Diosé sayuun man nij sí na'vij rihaan aga' do', rihaan yahij do' ma'. 'O se ne ca'vee xcaj nij yuvij cuentá ma'. Tzaj ne yaj me se cataj xna'anj Diosé rihaan nij yuvij man



cunudañj nij chuman' naj rihaan chumij se vaa canicaj nimán nij yuvij canoco' nij yuvij tucuáán sa' adonj. <sup>31</sup> Ne dan me se cachrón Diose 'o güii ca'ne' nica so' cacun' che'é cunudañj nij yuvij man rihaan chumij a. Ne aj cune' so' man 'o snó'o guun síi ca'ne' cacun' che'é yuvij a. Ne che'é se cunuu i'na' uún snó'o yo', qui'yaj Diose, gaa cavi' so', ne che'é dan no xcúún cunudañj yuvij cuchuman rá nij yuvij se vaa veé ya snó'o yo' me so' adonj —taj Pabló rihaan nij síi man Atenas yo' a.

<sup>32</sup> Dan me se gaa cuno nij síi man Atenas nana se vaa cunuu i'na' uún 'o síi cavi', ne ta'aj nij so' ca'nga' na-coc, ne yo'ó ta'aj nij so' cataj:

—Ndáa yo'ó güii uún me se ca'na' núj cunú se nana so' nanj ei —taj yo'ó ta'aj nij síi man chuman' Atenas yo' a.

<sup>33</sup> Veé dan, ne curihañj Pabló sca'núj nij so' a. <sup>34</sup> Tzaj ne doj nij yuvij guun tuvi' ga Pabló, ne cuchumán rá nij so' ni'yaj nij so' man Jesucristó a. Ne yo'ó so' me 'o síi uun chij cu'naj Dionisio, ne yo'ó no' me chana cu'naj Dámaris, ne vaa doj yuvij ga nij so' uún a.

#### Nana nihánj taj xna'anj che'é suun qui'yaj suun Pabló chuman' Corinto a

**18** Cachén doj, gaa ne cavii Pabló chuman' Atenas, ca'anj so' ndáa chuman' Corinto a. <sup>2</sup> Tihaj yuun nari' tuvi' so' ga 'o síi israelitá cu'naj Aquila, ne xa' so', tzaj ne sij cavii rej cu'naj Ponto me so', ne gaa cayáán so' chuman' Romá, ne ca'ne' síi nicaj suun emperador cu'naj Claudio suun se vaa cavii cunudañj nij yuvij israelitá chuman' Romá ca'anj yanij nij so' a. Che'é dan cavii so' ga nica so' chana cu'naj Priscila yo'óo nocoo cu'naj Italia, ne che'é dan sij ca'na' naca chuman' Corinto me roj so' a. Dan me se cuchii' Pabló rihaan roj so', <sup>3</sup> ne che'é se cuyáan vaa suun 'yaj suun Pabló ga suun 'yaj suun roj so' ro', che'é dan caran' Pabló ga roj so', ne qui'yaj suun so' ga roj so' a. <sup>4</sup> Ne daj a nij güii cuctañ' naránj rá nij yuvij israelitá me se ca'mii so' ga nij yuvij cunuu chre' rá ve' tucu'yón nij yuvij israelitá se tucuñj Moisés, ne cuchumán rá doj síi israelitá do', doj síi yanij a'mii xna'ánj griego do', gaa cuno nij so' se nana so' a.

<sup>5</sup> Dan me se gaa cavii síi cu'naj Silas ga Timoteo estadó Macedonia ca'na' roj so' chuman' Corinto, ne yo'ó ca'née nimán Pabló nata' so' se nana Diose rihaan nij yuvij, ne inañ cataj xna'anj so' rihaan nij yuvij israelitá se vaa Jesucristó me síi ca'née Diose tñanii man yuvij rihaan sayuun a. <sup>6</sup> Tzaj ne ca'mii canó tuvi' nij yuvij israelitá ga Pabló, ne quij ca'mii nij so' che'é Pabló a. Che'é dan tucuayuu so' yo'óo tachruu no rihaan sagan' so', gaa ne cataj so' rihaan nij yuvij a:

—Ma'an inañ soj me rá ca'anj rihaan ya'an nanj á. Ne tumé 'unj cacun' se vaa quirán' soj sayuun qui'yaj Diose ma'. Ne yaj me se rej rihaan nihánj me se ca'anj 'unj nata' 'unj se nana Diose rihaan nij síi yanij nanj á —taj Pabló rihaan nij so' a.

<sup>7</sup> Gaa ne cavii so' rej mán nij so', ne ca'anj so' ve' tucua' 'o síi cu'naj Titó Justo, ne so' ro', me 'o síi yanij ne

'o síi aráj guëe rihaan Diose me so', ne ve' tucua' so' ro', ne rej x'nuj ve' tucu'yón nij yuvij israelitá se tucuñj Moisés a.

<sup>8</sup> Dan me se 'o síi cu'naj Crispo síi 'nij ra'a ve' tucu'yón nij yuvij israelitá se tucuñj Moisés ro', me 'o so', ne cuchumán rá nu' nij tucua' so' ni'yaj nij so' man Diose sij 'nij ra'a man ní' a. Gaa ne cuchii' nana rihaan nij síi man Corinto se vaa síi cu'naj Crispo me síi cuchumán rá ni'yaj man Diose sij 'nij ra'a man ní', ne che'é dan cuchumán rá uún que'ee nij so' ni'yaj nij so' man Jesucristó, ne cata' ne cunudañj nij so' a.

<sup>9</sup> Ne rej niij me se naqui'yaa Diose sij 'nij ra'a man ní' rihaan Pabló, ne cataj so' a:

—Se cucu'ví' so' ma'. Yo'ó ca'mii so' se nanaj, ne se gaa dínj tu'vá so' ma'. <sup>10</sup> 'O se vaj 'unj ga so', ne taj vaj síi go' mán so' ne qui'yaj chi'ij mán so' ma'. 'O se man uxrá yuvij man chuman' nihánj canoco' manj adonj —taj Diose sij 'nij ra'a man ní' rihaan Pabló a.

<sup>11</sup> Gaa ne dan me se quináj Pabló 'o yo' táa yanée, tucu'yón so' se nana Diose rihaan nij síi man chuman' Corinto yo' a.

<sup>12</sup> Dan me se yo' dan me se síi cu'naj Galión me síi nicaj suun gobernador uun chij rihaan chuman' Corinto yo' a. Ne naxumañ yuvij israelitá, ne yo'ó me nimán nij so' ni'yaj nij so' man Pabló, ne ca'anj nijaj nij so' man Pabló rihaan síi nicaj suun cu'naj Galión yo', che'é rej naqui'yaj cuu so' che'é Pabló a. <sup>13</sup> Gaa ne cataj nij so':

—Síi nihánj ro', 'yaj tanáj xco yuvij se tucuñj núj che'é suun na'víj nij yuvij rihaan Diose, ne ino doj na'víj nij yuvij rihaan Diose, 'yaj síi nihánj ei —taj nij yuvij israelitá yo', ni'yaj nij so' man Pabló a.

<sup>14</sup> Daj doj tzín' se cavii nana tu'va Pabló, tzaj ne ma'an síi cu'naj Galión me síi ca'mii rihaan nij yuvij israelitá yo', ne cataj so':

—Cunú soj sij israelitá ca'mij á. Sese vaa cacun' chi'ij qui'yaj síi nihánj, ne no xcúnj cunoj se vaa taj soj saj á.

<sup>15</sup> Sese taj, gaa ne che'é inañ se nana soj do', che'é se tucuñj soj do', araa soj cacun' xráá so', gaa ne che'é dan ma'an soj no xcúún ca'ne' cacun' che'é so' nanj adonj. 'O se xa' 'unj nihánj, tzaj ne na'vej uxrá raj naqui'yaj cuú 'unj che'é rasuun vaa danj ma' —taj síi cu'naj Galión rihaan nij yuvij israelitá yo' a.

<sup>16</sup> Gaa ne quirii so' man cunudañj nij so' tucua' suun a. <sup>17</sup> Gaa ne quita'aa cunudañj nij yuvij man síi cu'naj Sóstenes síi 'nij ra'a man ve' tucu'yón nij so' se tucuñj Moisés, ne go' nij so' chruun xráá so' rihaan tucua' suun a. Tzaj ne ne rihuuun rá síi cu'naj Galión yo' gaa qui'yaj nij so' danj a ma'.

#### Nana nihánj taj xna'anj se vaa nanicaj Pabló nan' so' chuman' Antioquia a

<sup>18</sup> Dan me se guun que'ee doj güii guun raan Pabló ga nij tinúú ní' síi ne chuman' Corinto, gaa ne cataj so' se vaa ca'anj so', ne cavii so' rque rihoo chée rihaan na, ne ca'anj so' ndáa estadó cu'naj Siria, ne ca'anj chana cu'naj Priscila do', síi cu'naj Aquila do', ga so' a. Tzaj ne asino yaan caca çan nii raá Pabló, qui'yaj

Pabló, gaa vaj nij so' chuman' Cencrea, che'é se aj cata' tu'va so' 'o nana rihaan Diose a. <sup>19</sup> Dan me se cuichi' nij so' chuman' Efeso, ne tanaj Pabló man roj so' chuman' yo' a. Gaa ne catúj ma'an so' rá ve' tucu'yón nij yuvi israelitá se tucuaj Moisés, ne ca'mii so' ga nij yuvi che'é se nana Diose a. <sup>20</sup> Ne cachín ni'yaj nij sif man chuman' Efeso se vaa guun raa so' doj chiháan nij so', tzaj ne ne ca'vej so' a. <sup>21</sup> Tzaj ne cataj so':

—Ca'anj 'unj nanj ei. Vaa che'é ndo'o canicún' 'unj 'o cha'anj canuú chuman' Jerusalén, tzaj ne sese Diose ca'vej, ne ndaa yuún xe ca'na' uún 'unj a —taj so', ne cavii so' rque rihoo chéé rihaan na, ne tanaj so' man chuman' Efeso yo' a.

<sup>22</sup> Dan me se ca'anj so' ndaa chuman' Cesarea, ne cavii so' ca'anj ni'yaj so' man x'ne' nij sif amán rá ni'yaj man Jesucristó yanj chuman' Jerusalén a. Gaa ne nanij so' ndaa chuman' Antioquia a. <sup>23</sup> Ne guun raa so' doj chuman' Antioquia, gaa ne ca'anj so' ndaa vaa naj 'o 'o chuman' naj estadó Galacia do', estadó Frigia do', ne nari' nucaj rá cunudanj nij sif tucu'yón se nana Jesucristó yanj nij chuman' yo', qui'yaj so' a.

#### Nana nihánj taj xna'anj che'é sif cu'naj Apolos a

<sup>24</sup> Dan me se vaa 'o sif israelitá cu'naj Apolos, ne sij cavii chuman' Alejandría me so', ne sij ve'é ndo'o a'mii me so', ne sa' uxrá nari' so' danj Diose a. Dan me se ca'anj so' ndaa chuman' Efeso a. <sup>25</sup> Ne aj nari' so' se tucuaj Diose sij 'nij ra'a man ní', ne guun ndo'o rá nimán so', ne che'é dan nica nata' so' ne tucu'yón so' se nana Jesucristó rihaan nij yuvi a. Tzaj ne ataa xcax so' cuentá se vaa no xcuún yuvi catá' ne yuvi che'é Jesucristó, ne inanj quene'en so' daj qui'yaj sif cu'naj Juan gaa cuta' ne Juan man yuvi a. <sup>26</sup> Dan me se guun che'e so' ve'é ca'mii natá so' rá ve' tucu'yón nij yuvi israelitá man chuman' Efeso se tucuaj Moisés a. Ne cuno chana cu'naj Priscila do', sif cu'naj Aquila do', gaa ne nicaj tuvi' roj so' ga so', ne nica doj ne sa' doj tucu'yón roj so' se tucuaj Diose man Apolos a.

<sup>27</sup> Dan me se guun rá sif cu'naj Apolos cachén so' ndaa estadó Acaya, gaa ne doj a nari' nucaj so' qui'yaj nij tinú ní' sif man chuman' Efeso, ne qui'yaj nij so' yanj cartá nayaaj nij sif tucu'yón se nana Jesucristó man estadó Acaya, ne cataj nij so' se vaa ve'é nicaj tuvi' nij sif man Acaya ga sif cu'naj Apolos yo' a. Gaa ne gaa cuchi' sif cu'naj Apolos ndaa estadó Acaya, ne racuúj ndo'o so' man nij tinú ní' sif cuchumán rá ni'yaj man Jesucristó che'é se luj qui'yaj Diose a. <sup>28</sup> 'O se cunaj uxrá tihaan so' rihaan nij yuvi israelitá ne amán rá ni'yaj man Jesucristó se vaa taj danj Diose se vaa Jesucristó me sif ca'née Diose tinanii man yuvi rihaan sayuun, ne ca'mii canó tuvi' so' ga nij so' rej man ndo'o nij yuvi, ne qui'yaj canaán se nana sif cu'naj Apolos rihaan se nana nij sif israelitá yo' a.

#### Nana nihánj taj xna'anj se vaa ca'na' Nimán Diose rihaan nij sif tucu'yón se nana Jesucristó yanj chuman' Efeso a

**19** Dan me se gaa cayáan sif cu'naj Apolos chuman' Corinto, ne cachén Pabló rej xraj doj cuichi' so' chuman' Efeso, ne nari' so' doj sif tucu'yón se nana Jesucristó a. <sup>2</sup> Gaa ne xna'anj Pabló man nij so' a:

—Ne catúj Nimán Diose nimán nij soj gaa cuchumán rá soj ni'yaj soj man Jesucristó na' —taj Pabló, xna'anj so' man nij so' a.

Gaa ne cataj nij so':

—Taj ma'. 'O se a ne cunú nuj nana se vaa vaa 'o Nimán Diose a ma' —taj nij so' rihaan Pabló a.

<sup>3</sup> Gaa ne xna'anj Pabló man nij so' a:

—Ne me sif che'e cata' ne nij soj ga —taj so', xna'anj so' man nij so' a.

Gaa ne cataj nij so':

—'O se cata' ne nuj ndaa vaa cataj xna'anj sif cu'naj Juan nanj á —taj nij so' rihaan Pabló a.

<sup>4</sup> Gaa ne cataj Pabló rihaan nij so' a:

—Xa' Juan, tzaj ne cuta' ne so' man yuvi che'é yan canicaj nimán nij yuvi canoco' nij yuvi tucuáan sa' a. Ne cataj Juan rihaan nij yuvi se vaa sif ca'na' rej xcax Juan ro', me sif no xcuún nij yuvi cuchuman rá nij so' ni'yaj nij so' man, ne sif ca'na' rej xcax Juan ro', me Jesucristó a —taj Pabló rihaan nij sif ne chuman' Efeso a.

<sup>5</sup> Dan me se gaa cuno nij so' nana vaa danj, gaa ne cata' ne nij so' che'é Jesucristó sij 'nij ra'a man ní' a.

<sup>6</sup> Gaa ne cuta' Pabló ra'a so' raa nij so', ne catúj Nimán Diose nimán nij so', ne ca'mii nij so' xna'anj naca, ne nata' nij so' nana rque Diose rihaan ma'an nij so' nata' nij so' a. <sup>7</sup> Ne cunudanj nij snó'o me se quisij ya 'o chuvij nij so' ta' asuun a.

#### Nana nihánj taj xna'anj se vaa ca'anj Pabló ca'mii so' ga yuvi man rá escuela 'nij ra'a sif cu'naj Tiranno a

<sup>8</sup> Gaa ne catúj Pabló rá ve' tucu'yón nij yuvi israelitá man chuman' Efeso se tucuaj Moisés, ne va'nuj yavii 'o rihaan inanj ca'mii so' ga nij so' che'é se me rá so' cuchuman rá nij so' nana che'é suun uun chij Diose nimán yuvi do', rihaan chumii nihánj vaa güii do' a. <sup>9</sup> Tzaj ne nichraj ndo'o rá ta'aj nij so', ne ne ca'vej rá nij so' cuchuman rá nij so' nana sa' yo' ma'. Gaa ne quij ca'mii nij so' che'é tucuáan noco' ní' cuno cunudanj nij yuvi man rá ve' yo', gaa ne che'é dan tanaj Pabló man nij sif nichraj rá yo', ne ca'anj yanij nij sif tucu'yón se nana Jesucristó rihaan nij so', qui'yaj Pabló, ne ca'anj so' ve' escuela 'nij ra'a 'o sif cu'naj Tiranno, ne daj a güii ca'mii so' ga yuvi rá ve' escuela yo' a. <sup>10</sup> Ne quisij vij ya yo' qui'yaj so' danj, ne che'é dan cunudanj nij sif israelitá ga nij sif yanij a'mii xna'anj griego yanj estadó Asia xcax cuentá che'é se nana Jesucristó sij 'nij ra'a man ní' a.

**Nana nihánj taj xna'anj se vaa quiran' nij ta'níí síí cu'-  
naj Esceva sayuun, qui'yaj 'o nana chree a**

<sup>11</sup> Dan me se guun nucuaj Pabló qui'yaj so' suun sa' nocoo, qui'yaj Diose, <sup>12</sup> ne ndaa nicaj nii se vító Pabló do', yatzíj numíi catuun Pabló do', ca'anj nii cuta' nii raaj nij síí ran', ne nahuun sa' nij síí ran', ne curihanj nana chree nimán nij síí ran' yo', qui'yaj Diose a. <sup>13</sup> Ne vaa doj síí israelitá chée canó chuman', ne nij so' me síí uta' ra'a raaj síí ran' ne urihanj nana chree nimán nij síí ran' yo', 'yaj nij so' a. Ne cata' tu'va nij so' se chuyí Jesucristó sij 'nij ra'a man ní' se vaa guun rá nij so' racuíj so' man nij so' qui'yaj nij so' ndaa vaa 'yaj Pabló a. Dan me se cataj nij so' rihaan nana chree a: "Nihánj me se a'né' 'unj suun rihaan nij soj nana chree se vaa curihanj soj nimán síí ran' nihánj che'é Jesucristó síí a'mii natáj síí cu'naj Pabló che'é á", taj nij so' a. <sup>14</sup> Ne vaa chij ta'níí 'o síí israelitá cu'naj Esceva, ne xrej ataj suun nocoo doj me so', ne chij nij ta'níí so' ro', ca'mii danj rihaan 'o nana chree nuu nimán 'o so' a. <sup>15</sup> Gaa ne nana chree yo' ro', ca'mii rihaan nij so', ne cataj yo':

—Ne 'unj me se ne'enj man Jesucristó, ne ne'enj daj sij me Pabló a. Tzaj ne soj me se ne ne'en uxrá 'unj man soj a ma' —taj nana chree yo' rihaan chij nij so' a.

<sup>16</sup> Gaa ne síí nuu nana chree yo' nimán ro', güéj so', ne tuguáj tuvi' so' ga nij so', ne nucuaj so' doj rihaan nij so', ne qui'yaj canaan so' man cunú' chij nij so' a. Dan me se cunanj nij so', curihanj nij so' rá ve' yo', ne cánj yun vaa nij so', ne quiran' ndo'o nij so' sayuun, qui'yaj síí nuu nana chree nimán yo' a.

<sup>17</sup> Gaa ne xcaj cunudanj nij yuvií israelitá ga nij yuvií yanj a'mii xna'ánj griego yanj chuman' Efeso yo' cuenta se vaa quiran' chij nij so', ne che'é dan chuchuvi' ndo'o cunudanj nij so', ne cataj nij so' se vaa sa' uxrá vaa Jesucristó sij 'nij ra'a man ní' a. <sup>18</sup> Ne que'ee nij síí cuchumán rá ni'yaj man Jesucristó me se naxra' tu'va nij so', ne nata' ya nij so' che'é cacun' qui'yaj nij so' a. <sup>19</sup> Ne que'ee nij síí qui'yaj chree gaa rque doj ro', naqui'yaj chre' nij so' danj nij so' yanj libró no nana chree, ne caxríj ya'an nij so' man nij yanj yo', ni'yaj cunudanj nij yuvií a. Gaa ne narií nij so' cuenta me daj sa'anj nó nij yanj yo', ne quisíj vij chihaa chí' míj sa'anj platá catzii nó nij yanj tucuacaá nij so' a. <sup>20</sup> Veé dan me se cha'nuu uxrá se nana Jesucristó sij 'nij ra'a man ní', ne nari' nucuaj doj se nana so' a.

**Nana nihánj taj xna'anj se vaa ca'maan rá nij síí 'yaj  
ya'anj aga' yanj chuman' Efeso ni'yaj nij so' man Pabló  
a**

<sup>21</sup> Veé dan gaa ne ca'née nimán Pabló cachén so' estadó cu'naj Macedonia ga Acaya ne ca'anj so' ndaa chuman' Jerusalén, ne cataj so' se vaa asa' quisíj ca'anj so' ndaa chuman' Jerusalén, ne no xcúun so' ca'anj ni'yaj so' ndaa chuman' Romá, taj so' a. <sup>22</sup> Gaa ne ca'née so' vij tuvi' nij síí 'yaj suun ga so' catuu roj so' rej Macedonia a. Dan me se síí cu'naj Timoteo do', síí cu'naj Erasto do', me roj síí ca'née so', ne ma'an so'

guun raaj doj güii estadó Asia a. <sup>23</sup> Ne güii dan me se guun ndo'o sayuun che'é se tucuaj ní' sij nocoo man Jesucristó a. <sup>24</sup> Dan me se vaa 'o síí cu'naj Demetrio ne síí 'yaj suun aga' me so', ne nij tuvi' nij so' nicaj aga' platá catzii ne 'yaj nij so' nuvií le'ej nii, ne ase vaa ma'an nuvií na'víj yuvií rihaan ya'anj chana cu'naj Diana vaa yo' a. Ne 'yaj canaan ndo'o nij so' sa'anj a. <sup>25</sup> Dan me se canacúun síí cu'naj Demetrio man cunudanj nij síí 'yaj suun ase vaa suun 'yaj suun ma'an so' ne chuman' Efeso yo', ne ca'mii natáj so' rihaan nij so', cataj so':

—Cunó nij soj nana ca'mij rihaan soj, tinuj. Dan me se aj ne'en soj se vaa che'é suun 'yaj suun ní' ro', che'é dan 'yaj canaan ndo'o ní' sa'anj á. <sup>26</sup> Ne nihánj me se aj ne'en ní' daj 'yaj síí cu'naj Pabló yo', ne ca'na' nana rihaan ní' se vaa vaj so' nata' so' se nana so' se vaa xa' ya'anj 'yaj yuvií, tzaj ne nuveé ya'anj ya me ya'anj vaa danj ma'. Ne nuveé inanj chuman' Efeso nihánj me rej tu'va so' danj ma'. Tananj vaj so' ndaa nu' estadó Asia nihánj ta' asuun, ne cuchumán rá que'ee ndo'o yuvií man estadó Asia nihánj cuno nij so' se nana Pabló, ne tanáj nij so' se tucuaj ní' qui'yaj Pabló adonj. <sup>27</sup> Dan me se xraj ne vaa güii nachri' yuvií ni'yaj yuvií se suun ní', gaa ne dan me se guun rá uún nij yuvií se vaa taj se gún' nuvií na'víj ní' rihaan ya'anj chana sa' ndo'o cu'naj Diana a ma'. Ne cataj nij yuvií se vaa nuveé ya'anj sa' me no' ma'. Ne xa' no', tzaj ne nu' ní' sij man estadó Asia nihánj do', ndaa yuvií man rihaan nu' chumii do', na'víj rihaan no' ei —taj síí cu'naj Demetrio cuno nij tuvi' so' a.

<sup>28</sup> Dan me se gaa cuno nij so' se nana Demetrio, ne cuyanj uxrá rá nij so', ne caguáj nij so', cataj nij so':

—Guee uxrá Diana ta'anj ní' sij man Efeso ei —taj nij so', caguáj nij so' a.

<sup>29</sup> Gaa ne yo'o nachej raaj cunudanj nij yuvií man chuman' Efeso yo', ne quita'aa nij yuvií man síí cu'naj Gayo ga síí cu'naj Aristarco che'é se sij chée ga Pabló me roj so', ne sij cavii estadó Macedonia me roj so' a. Dan me se nicaj cunudanj nij yuvií man roj so', ca'anj nij yuvií, ne cunanj nij so' catúj nij so' rej estadió nuu chre' que'ee ndo'o yuvií a. <sup>30</sup> Ne guun rá Pabló catuu so' rej man nij yuvií, tzaj ne ne ca'vej rá yo'ó nij síí tucu'yón se nana Jesucristó ca'anj so', ne ne ca'vee catuu Pabló rej yo' qui'yaj tuvi' so' a ma'. <sup>31</sup> Ne ta'aj nij síí uun chij rihaan nu' estadó Asia ro', me tuvi' Pabló, ne ca'née nij so' nana rihaan Pabló se vaa daj chihaa míj se guun catuu Pabló rej cunuu chre' nij yuvií a.

<sup>32</sup> Dan me se ino doj vaa nana caguáj 'o 'o ta'aj nij yuvií, che'é se nachej se nana nij so' a. Ne me doj uxrá doj nij so' ne ne'en daj me che'é cunuu chre' nij so' ma'. <sup>33</sup> Dan me se tiguíj ra'a nii man síí cu'naj Alejandro, ne canicun' so' rihaan nij yuvií, qui'yaj nij yuvií israelitá, ne guun rá ta'aj nij yuvií se vaa ca'mii Alejandro rihaan nij so' a. Gaa ne tucunó ra'a so' rihaan nij yuvií se vaa dínj gaa tu'va nij yuvií, gaa ne ca'vee ca'mii nacaj so' rihaan chuman' a. <sup>34</sup> Tzaj ne xcaj nij yuvií cuenta se vaa sij israelitá me síí canicun' rihaan nij so',

ne che'é dan yo' o caguáj cunudanj nij yuvii, cataj nij so':

—Guee uxrá Diana ta'anj ní' sij man Efeso ei —taj taran' nij yuvii, ne cunu' vij ya' orá caguáj nij so' danj a.  
 35 Ndaa síj, gaa ne ca'ne' rá nij yuvii caguáj nij so', qui'yaj síi uta' yanj tucúa suun, ne cataj ma'an so' rihaaan nij yuvii a:

—Cuno soj sij man chuman' Efeso ca'mij á. Ya ya cunudanj yuvii man rihaaan chumii ne'en se vaa chuman' Efeso nihánj me chuman' na'víj rihaaan ya'anj guee cu'naj Diana ga yahij quini' rej xta' cuyaan vaa ga no' adonj. 36 Che'é se ya vaa nu' nana nihánj ro', che'é dan no' xcúun nij soj dínj cumán soj, ne xcaj soj cuentá, ne se guun qui'yaj soj a doj se nij ma'. 37 'O se ca'na' roj snó'o nihánj, qui'yaj soj, ne nuveé sij qui'yaj se nij rque nuví me roj so', ne nuveé sij ca'mii nana nij che'é ya'anj na'víj ní' rihaaan me roj so' ma'. 38 Dan me se xa' nij tuví' síi cu'naj Demetrio, tzaj ne sese me rá nij tuví' nij so' cutá' nij so' cacun' xráá 'o' yuvii, ne vaa ya'núj rihaaan nij so' ca'anj nij so' rihaaan cuese, ne ca'vee cutá' nij so' cacun' xráá tuví' nij so' nanj á. 39 Ne sese me rá soj naqui'yaj cuu soj doj che'é yo' o rasuun, ne güii nuu chre' ní' ndaa vaa tucúaán nocó' ní' ro', güii dan me ca'vee qui'yaj soj danj ei. 40 'O se nihánj me se ca'vee cutá' nii cacun' xráá ní' se vaa qui'yaj rma'an ní' sayuun cuan', ne se guun nucuaj ní' cataj xna'anj ní' me che'é me ca'na' ní' ne caguáj ndo'o ní' nihánj ma' —taj síi uta' yanj tucúa suun rihaaan nij yuvii, 41 gaa ne na'née so' chrej man taran' nij so' a.

#### Nana nihánj taj xna'anj se vaa ca'anj Pabló estadó cu'naj Macedonia ga Grecia a

20 Dan me se gaa cha'nuu nij yuvii yo', gaa ne canacúun Pabló man nij síi tucuyón se nana Jesucristó se vaa cunu chre' nij so' ga so', ne nago' so' chrej nucuaj man nij so' a. Gaa ne quita'aa so' ra'a cunudanj nij so', ne cataj so' se vaa ca'anj so', ne veé dan cavii so' ne ca'anj so' ndaa estadó Macedonia a. 2 Dan me se cachén so' nu' estadó Macedonia yo', ne nago' ndo'o so' chrej nucuaj man nij síi nocó' man Jesucristó ne chuman' yo', gaa ne ca'anj so' ndaa estadó cu'naj Grecia a. 3 Dan me se quisíj va'núj yavii guun raan so' estadó Grecia yo', gaa ne guun rá so' cavii so' rque rihoo chéé rihaaan na ne ca'anj so' estadó cu'naj Siria, tzaj ne xcaj so' cuentá se vaa guun rá nij yuvii israelitá qui'yaj nij so' sayuun man so', ne che'é dan ca'née nimán so' asino yaan cachee tacó' so' cachén so' sca'núj estadó Macedonia gaa ne canicaj so' ndaa estadó Siria a. 4 Ne yo' o tuvi' nij síi cachéé ga Pabló ro', me síi cu'naj Sópater, ne ta'níí síi cu'naj Piro me so', ne síi cavii chuman' Berea me so' a. Ne yavíj tuvi' nij so' me síi cavii chuman' Tesalónica, ne Aristarco do', Segundo do', cu'naj roj so' a. Ne yo' o so' me síi cu'naj Gayo, ne síi cavii chuman' Derbe me so' a. Ne vaa síi cu'naj Timoteo, ne yavíj tuvi' nij so' me síi cavii estadó Asia, ne Tíquico do', Trófimo do', cu'naj roj so' a. 5 Dan me se guun yaan nij so' rihaaan núj, ca'anj nij so' chuman' Troas, gaa ne na'víj nij so' man núj rej yo' a. 6 Gaa

ne gaa cachén cha'anj chá nij yuvii israelitá chraa yo' o trigó, ne cavii núj 'o' rihoo chéé rihaaan na, ne cavii núj chuman' Filipos, ca'anj núj, ne cachén 'un' güii, gaa ne cuchi' núj rihaaan nij so' chuman' Troas yo' a. Gaa ne guun raan núj yo' o hij güii chuman' yo' a.

#### Nana nihánj taj xna'anj se vaa cunu i'na' uún 'o' síi cavi', qui'yaj Pabló a

7 Dan me se güii cotungó me se gaa cunu chre' taran' núj cuxra' ta'aj núj rachrúun, ne ca'mii natáj Pabló nana rihaaan yo' o nij tinúú ní' a. 'O se guun rá so' cavii so' ranga' yo' o güii ca'anj so' níchrej, ne che'é dan yo' o ca'mii so' ndaa guun ta'aj yan' a. 8 Ne ve' nata' rej nuu chre' nij so' me se man ndo'o aga' ya'an chuguun rá ve' yo' a. 9 Dan me se táá 'o' síi tachruu cu'naj Eutico 'o' ta'yaa le'ej, ne che'é se xcaan ndo'o ca'mii Pabló, gaa ne che'é dan ca'na' ndo'o ne rihaaan Eutico, ne yuun che'e cotoj so', ne quini' so' ca'anj so' rej taj xe' a. Dan me se ndaa rej nata' va'núj raaj ve' táá so' gaa quini' so' a. Gaa ne nanij yo' o nij so' rihaaan yo' o, ne naxcaj nij so' man so', tzaj ne aj cavi' un' so' nanj á. 10 Gaa ne nanij Pabló, ne ca'anj quinaj Pabló rihaaan nee man síi cu'naj Eutico yo', ne na'yaan Pabló man so', ne cataj Pabló rihaaan yo' o nij so' a:

—Se chuchu'vi' soj ma'. 'O se vaa i'na' so' ei —taj Pabló rihaaan nij so' a.

11 Gaa ne cavii uún Pabló ga yo' o nij so' rá ve' nata' yo', ne cuxra' ta'aj so' rachrúun chá nij so', ne dan me se gaa quisíj chá nij so', gaa ne ca'mii natáj so' doj rihaaan nij so' ndaa se quisíj güii a. Gaa ne curihanj Pabló, ca'anj so' a. 12 Dan me se cunu i'na' uún xnii quini', ne ca'anj nicaj nii man so', ne guun xej ndo'o nimán taran' nij so' a.

#### Nana nihánj taj xna'anj se vaa cavii nij tuvi' Pabló chuman' Troas, ne ca'anj nij so' ndaa chuman' Mileto a

13 Dan me se cavii núj rque rihoo chéé rihaaan na, ne táá yaan núj rihaaan Pabló, ca'anj núj chuman' cu'naj Asón a. 'O se guun rá Pabló cachee tacó' so' ca'anj so' chuman' Asón, ne che'é dan guun ya ca'mii Pabló ga núj se vaa nari' tuvi' núj ga so' chuman' Asón ne ca'anj taran' núj a. 14 Dan me se gaa nari' tuvi' núj ga Pabló chuman' Asón, ne cavii so' rque rihoo ga núj, ne ca'anj taran' núj ndaa chuman' Mitilene a. 15 Gaa ne cavii rihoo chuman' Mitilene, qui'yaj núj, ne yo' o güii me se cachén núj nichrun' rej naj chuman' cu'naj Quío a. Ne yo' o güii uún me se cuchi' núj ndaa rej cu'naj Samos, ne yo' o güii uún me se ca'anj núj ndaa chuman' cu'naj Mileto a. 16 'O se guun ya rá Pabló se vaa se cachén so' chuman' Efeso, che'é se na'vej rá so' guun raan so' estadó Asia ma'. Tananj guun rá so' cuchi' ra'yanj so' chuman' Jerusalén che'é cha'anj Pentecostés canuú a.

Nanā nihánj taj xna'anj daj ca'mii Pabló gā nij síf chij nicaj yu'unj man x'ne' nij síf cuchumán rá ni'yaj man Jesucristó yanj chuman' Efeso a

<sup>17</sup> Dan me se gāa caran' Pabló chuman' Mileto, ne ca'neé so' nanā rihaan nij síf chij nicaj yu'unj man x'ne' nij yuvií cuchumán rá ni'yaj man Jesucristó yanj chuman' Efeso se vaa ca'na' nij so' rihaan so' a. <sup>18</sup> Dan me se gāa ca'na' nij so' rihaan Pabló, ne cataj Pabló rihaan nij so' a:

—Aj ne'en nij soj daj vaa 'unj daj ā güii canej gā soj asij naca ca'ná' 'unj estadó Asia nihánj ndāa cuano a. <sup>19</sup> 'O vaa nica' nimán 'unj nuy 'unj rihaan Diose sij 'nij ra'a man ní', ne ne'en soj daj vaa ta'veé 'unj, ne daj vaa quirán' 'unj sayuun che'é se nuchruj rāa nij síf israelitá qui'yaj nij so' sayuun manj a. <sup>20</sup> Dan me se ne a'ne' rá 'unj gā suun natá' 'unj rihaan soj nu' nana qui'yaj cavii sa' soj doj, ne tucu'yón 'unj nanā yo' rihaan soj rej cuno que'eē yuvií ca'mij do', ndāa rá ve' tucua' ma'an soj do', tucu'yonj man soj a. <sup>21</sup> Ne 'o xraan inanj cataj xna'anj 'unj rihaan nij yuvií israelitá do', rihaan nij yuvií yanij a'mii xna'ánj griego do', se vaa nō xcúún nij so' canicaj nimán nij so' canoco' nij so' man Diose ne cuchuman rá nij so' ni'yaj nij so' man Jesucristó sij 'nij ra'a man ní' a.

<sup>22</sup> Ne nihánj me se guun yā raj se vaa nō xcúnj ca'anj 'unj chuman' Jerusalén, qui'yaj Nimán Diose, tzaj ne ne ne'enj daj quiranj sese cuchij yo' ma'. <sup>23</sup> Tzaj ne ne'én 'unj se vaa me ma'an chuman' vaj 'unj, ne Nimán Diose 'o xraan inanj taj xna'anj rihaan 'unj se vaa vaa güii, ne caxrii nii taga' manj ne qui'yaj nii sayuun manj nanj adonj. <sup>24</sup> Tzaj ne ā doj ne chu'ví' 'unj sese ndāa ticavi' nii mán 'unj rihaan chumii nihánj ā ma'. Tzaj ne ve'é inanj me raj tisij suun ca'ne' Jesucristó sij 'nij ra'a man ní' rihanj, ne che'é dan 'o xraan inanj taj xna'anj 'unj nanā sa' rihaan yuvií che'é se luj qui'yaj Diose che'é taran' ní' a. <sup>25</sup> Ne nihánj me se ne'én 'unj se vaa nij soj sij cuno nanā ca'mii natá' 'unj che'é suun uun chij Diose nimán yuvií do', rihaan chumii nihánj vaa güii do', ā 'ó soj se quene'en uún manj daj chihāa mij ā ma'. <sup>26</sup> Che'é dan me cuano yaj me se cataj yá 'unj rihaan soj se vaa nuveé 'unj me síf tumé cacun' sese ca'anj ni'ya 'o tuvi' soj rihaan Diose ma'. <sup>27</sup> 'O se ne a'ne' rá 'unj gā suun taj xna'anj 'unj rihaan cunudanj soj nu' se vaa me rá Diose cunō soj ma'.

<sup>28</sup> Dan me se ase vaa tumé yuvií man daán yuvií matzinj ro', danj qui'yaj soj, tumé soj man ma'an soj do', man x'ne' nij síf amán rá ni'yaj man Jesucristó do' á. Dan me se Nimán Diose me síf cune' man soj nicaj yu'unj soj man x'ne' nij síf amán rá ni'yaj man Jesucristó a. Ne dan me se quiránj Jesucristó man cunudanj nij síf noco' x'ne' yo' che'é ton cavii man ma'an so' adonj. <sup>29</sup> Dan me se ne'enj se vaa asā' ca'anj 'unj, ne catuyú síf chi'ii sca'núj soj, ne ase vaa xca'yanj ca'nu' yuvaā ro', danj gāa nij síf chi'ii yo', ne se caráj x'naa nij so' man nij tinúú ní' nij síf noco' man Jesucristó, ne qui'yaj ndo'o nij síf chi'ii yo' sayuun man nij so' a.

<sup>30</sup> Ne ndāa tuvi' ma'an yā soj me síf guun che'é tuguáj

nij so' nanā yā, che'é se guun rá nij so' canoco' nij síf tucu'yón se nanā Jesucristó man ma'an nij so' a.

<sup>31</sup> Che'é dan yo'ō ni'yaj soj, ne xcaj soj cuentá á. 'O inanj nanuj rá soj se vaa rque va'nuj yā yo' me se ne ca'ne' raj gā suun narqué chrej nucuaj man 'o 'o nij soj nuvií nigan' ma'. Ne ndāa ta'veé 'unj che'é soj adonj.

<sup>32</sup> Ne cuano nihánj me se nucuaj rá 'unj man ma'an Diose se vaa tumé Diose man soj, ne nucuaj rá 'unj man se nanā Diose se vaa cunō soj nanā yo' ne ca'vee qui'yaj ndo'o Diose se luj che'é soj a. Dan me se sa' doj canoco' soj man Diose, qui'yaj se nanā Diose yo', ne guun tuvi' soj gā cunudanj yo'ó nij síf cunuu sa' rihaan Diose, ne ca'vee quirí' soj xna'anj ni'yaj cata' tu'va Diose gāa rque adonj.

<sup>33</sup> Dan me se ne sij uun ne rá guun si'yaj si'yaj yo'ó yuvií, se aga' platá catzii do', se aga' oró míí do', se yatzíj sa' do', mé 'unj ma'. <sup>34</sup> Ne aj ne'en ma'an nij soj se vaa mā'anj ra'aj nihánj qui'yaj suun che'é rej ca'vee quirí' 'unj nij rasuun achiin manj do', achiin man nij síf chéé gaj do' a. <sup>35</sup> Cunudanj qui'yaj suun 'unj, che'é se guun raj xcaj soj cuentá se vaa nō xcúún soj qui'yaj suun ma'an soj, che'é rej ca'vee racuíj soj man tinúú ní' síf achiin rasuun man a. Ne yo'ō cunuú rá soj nanā nihánj nanā ca'mii ma'an Jesucristó sij 'nij ra'a man ní' a: "Síf rqué rasuun rihaan tuvi' ro', uun niha' rá so' doj rihaan síf ri' rasuun yo' ra'a tuvi' a", taj síf 'nij ra'a man ní' a —taj Pabló rihaan nij síf chij nicaj yu'unj man x'ne' nij síf cuchumán rá ni'yaj man Jesucristó yanj chuman' Efeso a.

<sup>36</sup> Dan me se gāa quisij ca'mii Pabló nu' nanā yo', gāa ne canicun' ruj so' gā nij so', ne cachín ni'yaj Pabló rihaan Diose gā taran' nij so' a. <sup>37</sup> Gāa ne ta'vee uxrā cunudanj nij so', ne na'yaān nij so' man Pabló, ne cachrón tu'va nij so' xruu Pabló a. <sup>38</sup> 'O se quinanó doj rá nij so' che'é se nanā Pabló nanā se vaa daj chihāa mij se quene'en uún nij so' man Pabló ma'. Gāa ne ca'anj tñáj nij so' man Pabló ndāa rej cavii so' rque rihoo chéé rihaan na a.

#### Nanā nihánj taj xna'anj daj guun gāa ca'anj Pabló ndāa chuman' Jerusalén a

**21** Dan me se gāa tanáj xco núj man nij síf man chuman' Efeso, ne ca'anj núj vaj núj rque rihoo, ne yo'ō chrej ca'anj núj, cuchí' núj rej cu'naj Cos, ne yo'ō güii me se cuchí' núj ndāa rej cu'naj Rodas, ne ca'anj uún núj, cuchí' núj ndāa chuman' cu'naj Pátara a. <sup>2</sup> Gāa ne nari' núj yo'ó rihoo ca'anj ndāa rej cu'naj Fenicia a. Gāa ne cavii núj rque rihoo, ne ca'anj núj a. <sup>3</sup> Gāa ne quene'en núj yo'óo taj rihaan na ya'anj cu'naj Chipre, ne tanáj xco núj Chipre rej nichruun núj, ne cachén núj ca'anj núj ndāa estadó Siria a. Dan me se cuchí' núj chuman' Tiro, ne 'o se yo' me rej guun rá nij síf tumé rihoo tucuayuu nij so' cargá man rque rihoo rihaan yo'óo yo' a.

<sup>4</sup> Dan me se nano' núj man nij síf tucu'yón se nanā Jesucristó yanj chuman' Tiro yo', ne nari' núj man nij so', ne chij güii caran' núj chuman' yo' a. Dan me se gāa nari' tuvi' núj, ne dan me se nata' nij so' nanā rqué

Nimán Diosë rihaan nij so' rihaan Pabló se vaa së gu-un ca'anj Pabló chuman' Jerusalén a. <sup>5</sup> Dan me se gaa quisij chij güii yo', ne curihañj núj ca'anj núj rej taj ri-hoo rihaan na, ne cachéé cunudañj nij tucua nij sí tu-cu'yón se nana Jesucristó gā núj ndaa se cuhi' núj tu'-va chuman' a. Gaa ne canicun' ruj núj rihaan yo'óo chruy naj tu'va na ya'anj rej yo', ne cachíín ni'yaj núj ri-haan Diosë, <sup>6</sup> ne cataj núj rihaan tuvi' núj se vaa ca'anj núj, ne dan me se cavii núj rque rihoo, ne canicaj nij so' quinán' nij so' tucua nij so' a.

<sup>7</sup> Dan me se tanáj núj chuman' Tiro yo', ne ca'anj uún núj rque rihoo, ne cuhi' núj ndaa chuman' cu'naj Tole-maida, ne nanó núj cuentó gā nij tinúú ní' sí yanj chu-man' yo', ne quináj núj orún' güii gā nij so' a. <sup>8</sup> Ne yo'ó güii me se cavii uún núj rque rihoo gā Pabló, ca'anj núj, ne cuhi' núj chuman' Cesarea, gaa ne catúj núj ndaa chuman' Cesarea, ne ca'anj núj ve' tucua sí cu'-naj Felipé sí nata' se nana Diosë nana sa' rihaan yuvii a. Ne so' ro', me 'o tuvi' chij nij sí rque se chá rihaan nij chana cavi' nica yanj chuman' Jerusalén gaa rque doj a. Ne caran' núj tucua so' a. <sup>9</sup> Ne vaa ca'anj ta'ní so' chana yaan, ne ca'anj nij no' me ní nata' nana rque Diosë rihaan a. <sup>10</sup> Dan me se gaa guun raan núj que'ee güii tucua sí cu'naj Felipé, ne nanij 'o sí cavii estadó Judea, ne sí nata' nana rque Diosë rihaan me so', ne Agabo cu'naj so' a. <sup>11</sup> Dan me se ca'na' so' rihaan núj, ne nicaj so' marque 'nij catuun Pabló, numij so' tacóo Pabló do', ra'a Pabló do' a. Gaa ne cataj so':

—Sí si'yaj yatziñ nihánj me se ase vaa qui'yáa 'unj cuano nihánj ro', ñanj gaa qui'yaj nij sí israelitá man chuman' Jerusalén, numij nij so' man so', ne taçuachén nij so' man so' ra'a nij sí yanij adonj —taj sí cu'naj Agabo yo' a.

<sup>12</sup> Dan me se gaa cuno núj nana yo', ne rqueë uxrá núj gā nij sí yanj chuman' Cesarea yo' rihaan Pabló se vaa së cavii so' ca'anj so' ndaa chuman' Jerusalén ma'.

<sup>13</sup> Gaa ne cataj Pabló:

—Taj che'é ta'vee soj ne quinano rá 'unj qui'yaj soj ma'. 'Q se 'unj nihánj me se a'vej raj numij nii manj ne ndaa ticavi' nii manj rej Jerusalén che'é se sí nata' che'é Jesucristó sij 'nij ra'a man ní' mej chuguanj —taj Pabló rihaan nij so' a.

<sup>14</sup> Ne taj se qui'yá' cunq so' se nana núj a ma'. Che'é dan ca'ne' rá núj, ne cataj núj:

—Qui'yaj Diosë sij 'nij ra'a man ní' ndaa vaa me rá ma'an so' qui'yaj so' á —taj núj a.

<sup>15</sup> Dan me se quisij caran' núj chuman' Cesarea yo', gaa ne qui'yaj chuvii núj, ne cavii núj ca'anj núj ndaa chuman' Jerusalén a. <sup>16</sup> Ne chéé ta'aj nij sí tucuyón se nana Jesucristó yanj chuman' Cesarea gā núj, ne táá yaan nij so' rihaan núj ca'anj núj ve' tucua 'o sí cu'naj Mnasón, caran' núj a. Ne sí cu'naj Mnasón me se sij cavii yo'óo taj rihaan na ya'anj cu'naj Chipre me so', ne aj quisij que'ee yo' tucuyón so' se nana Jesucristó a.

Nana nihánj taj xna'anj se vaa cuhi' Pabló chuman' Je-susalén a.

<sup>17</sup> Dan me se gaa cuhi' núj chuman' Jerusalén, ne guun niha' ndo'o rá nij tinúú ní' sí man Jerusalén nana nij so' cuentó gā núj a. <sup>18</sup> Ne yo'ó güii me se ca'anj ni'yaj núj gā Pabló man sí cu'naj Santiagó ne catúj núj rque 'o ve' ne so', ne nari' chre' núj man nu' nij sí chij nicaj yu'unj man nij yuvií cuchumán rá ni'yaj man Jesu-cristó gā Santiagó a. <sup>19</sup> Dan me se ve'é ca'mii sa' taran' núj, gaa ne cataj xna'anj Pabló rihaan nij sí chij nuu chre' gā Santiagó ndaa 'o 'o se vaa qui'yaj Diosë gā nij sí yanij gaa nata' Pabló se nana Diosë rihaan nij sí yanij yo' a. <sup>20</sup> Ne gaa cuno nij sí chij se nana Pabló, ne cataj nij so' se vaa sa' uxrá qui'yaj Diosë gā nij sí yanij a. Gaa ne cataj nij tuvi' Santiagó rihaan Pabló a:

—Aj ne'én sq' se vaa que'ee mij tuvi' ní' sij israelitá amán rá ni'yaj man Jesucristó, tinuj. Ne nij so' ro', me sí yanj uxrá qui'yaj nu' ndaa vaa taj se tucuanj Moisés a. <sup>21</sup> Ne cuhi' nana ne rihaan nij so' se vaa tucuyón so' man cunudañj nij yuvií israelitá yanj chiháán nij sí yanij se vaa tanáj xcq nij so' se nana Moisés, ne cataj sq' se vaa ca'ne' rá nij so' gā suun uta' ta'nga' man ta'ní do', gā suun noco' se tucuanj Moisés do' a. <sup>22</sup> Me se no xcuún ní' qui'yaj ní', rá sq' gā. 'Q se ya cunuu chre' yuvií gaa xcaj cunudañj nij so' cuentá se vaa ca'ná' sq' nihánj adonj.

<sup>23</sup> "Che'é dan me rá núj qui'yáa sq' ndaa vaa cataj núj rihaan sq' á. Dan me se vaa ca'anj tinúú ní', ne aj cata' tu'va ma'an nij so' rihaan Diosë che'é 'o rasuun qui'yaj nij so' rihaan Diosë a. <sup>24</sup> Ne me rá núj nicaj tuvi' sq' gā nij so', ne cunuu gueë sq' rihaan Diosë gā nij so', gaa ne naru'vee sq' che'é xcuu nago' nij so' rihaan Diosë, gaa ne ca'vee cacā caan nii raā nij so' ne quisij nu' se vaa cata' tu'va nij so' rihaan Diosë á. Gaa ne xcaj nij tinúú ní' cuentá se vaa xā' nana cuno nij so' che'é sq', tzaj ne ne ya vaa nana yo' ma'. Ne ma'án sq' me sí no-cq' raan man se tucuanj Moisés a.

<sup>25</sup> "Ne xā' nij sí yanij amán rá ni'yaj man Jesucristó, tzaj ne aj ca'néé núj yanj cartá rihaan nij so', ne cataj xna'anj núj rihaan nij so' se vaa taj che'é canoco' ma'an nij so' se tucuanj Moisés ma'. Maan se xcaj nij so' cuentá, ne së chá nij so' rasuun rque yuvií rihaan ya'anj cacóy yuvií ma'. Ne së chá nij so' ton ma'. Ne së chá nij so' neë xcuu tuguáj nii gaán chihá ma'. Ne snó'o do', chana do', së cotoj nij so' gā yo'ó yuvií sese ne nica nij so' me yo' ma'. Ñanj taj yanj ca'néé núj ri-haan nij so' adonj —taj nij sí chij yo' rihaan Pabló a.

<sup>26</sup> Gaa ne nicaj tuvi' Pabló gā ca'anj nij snó'o yo', ne yo'ó güii me se cunuu gueë so' gā nij so' rihaan Diosë, ne catúj so' rá nuví nocqo, ne nata' so' rihaan xrej me güii quisij cunuu gueë nij so' rihaan Diosë ne ca'na' ni-caj nij so' nij rasuun gueë nago' 'o 'o nij so' rihaan Diosë a.

Nanə nihánj taj xna'anj daj guun gaa quita'aa nii man Pabló rá nuví nocoo a

<sup>27</sup> Dan me se gaa nichrun' quisij chij nij güii nuu guee 'un' nij so' rihaan Diose, ne nij sí israelitá cavii estadó Asia ro', quene'en nij so' man Pabló rá nuví nocoo, ne naxumaan cunudanj nij yuvi man rej yo', qui'yaj nij so', ne quita'aa nij so' man Pabló a. <sup>28</sup> Ne caguáj nij sí cavii estadó Asia, cataj nij so':

—Cunə soj sij israelitá ca'mii núj, ne racuij soj man núj á. 'O se sí nihánj ro', me sí tucu'yón man nij yuvi yanj cunudanj chuman' se vaa nij vaa ní' sij israelitá do', se vaa nij vaa tucuaán nocoo' ní' do', se vaa nij vaa nuví nocoo nihánj do', taj so' a. Ne ndaa yuvi yanj catúj nuví nocoo nihánj, ne quiri' rej guee nihánj, qui'yaj so' nanj á —taj nij so', ni'yaj nij so' man Pabló a.

<sup>29</sup> 'O se aj quene'en nij so' man sí cu'naj Trófimo sí yanj cavii chuman' Efeso se vaa vaj so' gā Pabló rque chuman' Jerusalén, ne guun rá nij so' se vaa catúj sí cu'naj Trófimo yo' rá nuví nocoo, qui'yaj Pabló a.

<sup>30</sup> Dan me se naxumaan cunudanj nij yuvi man chuman' Jerusalén yo', ne cunanj nij so' ndaa nuví nocoo, gaa ne quita'aa nij yuvi man Pabló, ne nucuaj rij nij so' man so' xe', ne nu' naraán nii nij ta'yaa rihaan nuví nocoo yo' a. <sup>31</sup> Dan me se guun rá nij yuvi ticavi' nij yuvi man Pabló, ne cuchí' nanə rihaan sí 'nij ra'a man cunudanj nij tanuu romanó man chuman' Jerusalén se vaa ca'maan ndo'o rá nij sí man chuman' Jerusalén ne naxumaan ndo'o sayuun a. <sup>32</sup> Ne nicaj so' tanuu nicaj so' sí 'nij ra'a 'o cientó tanuu, ne cunanj so' ndaa rej man nij yuvi yo' a. Ne gaa quene'en nij yuvi se vaa ca'na' sí uun chij rihaan cunudanj nij tanuu do', se vaa ca'na' nij tanuu do', gaa ne ca'ne' rá nij so' gā suun o' man Pabló a. <sup>33</sup> Gaa ne cuchí' sí 'nij ra'a man nij tanuu yo' rihaan Pabló, ne quita'aa so' man Pabló, ne ca'ne' so' suun se vaa numij nij tanuu vij aga' ne' man Pabló, ne xna'anj so' man nij yuvi me sí me Pabló ne daj qui'yaj so' a.

<sup>34</sup> Ne ino vaa nanə caguáj 'o 'o nij yuvi a. Dan me se ne ca'vee xcaj so' cuentá daj me che'é me ca'maan rá nij yuvi ma'. 'O se caguáj ndo'o nij yuvi, ne ne ca'vee cunə so' se nanə nij yuvi ma'. Che'é dan ca'ne' so' suun rihaan nij tanuu se vaa ca'anj nicaj nij tanuu man Pabló rá cuarteé man nij tanuu a. <sup>35</sup> Ne gaa cuchí' nij tanuu cuarteé, gaa ne che'é se man ndo'o nij yuvi a'-maan rá ni'yaj man Pabló, gaa ne ndaa atə xta' ma'an nij tanuu man Pabló, che'é se guun ndo'o rá nij yuvi qui'ij nij so' man Pabló go' nij so' man so' a.

<sup>36</sup> 'O se canoco' raan nij yuvi man nij tanuu, ne caguáj nij yuvi, cataj nij yuvi:

—Ticavi' soj man so' cuaj ei —taj nij yuvi, caguáj nij yuvi, ni'yaj nij yuvi man Pabló a.

Nanə nihánj taj xna'anj se vaa guun che'e Pabló nacaj so' man so' rihaan nij sí israelitá a

<sup>37</sup> Dan me se daj doj catuu Pabló cuarteé man nij tanuu, qui'yaj nij tanuu, gaa ne cataj Pabló rihaan sí 'nij ra'a man cunudanj nij tanuu a:

—Ne ca'vee ca'mij 'o nanə rihaan so' na' —taj so', xna'anj so' man sí 'nij ra'a man nij tanuu a.

Ne so' cataj:

—Ne'én so' ca'mii so' xna'anj griego na'. <sup>38</sup> Ne nuveé so' me sí cavii rej cu'naj Egipto sí me rá cunú' gā gobiernó ne ca'anj nicaj ca'anj mij nij sí me rá ticavi' man yuvi ndaa rej tacaan asij rque doj na' —taj sí 'nij ra'a man nij tanuu, xna'anj so' man Pabló a.

<sup>39</sup> Gaa ne cataj Pabló rihaan so' a:

—'Unj ro', me 'o sí israelitá cavii chuman' Tarso chuman' naj estadó Cilicia, ne chuman' vaa suun ndo'o me chihánj á. Rqueé 'unj rihaan so', ne ca'vej rá so' ca'mij doj gā nij yuvi á —taj Pabló rihaan sí 'nij ra'a man nij tanuu a.

<sup>40</sup> Dan me se ca'vej rá so', ne che'é dan canicun' Pabló rej xta' rej atúj nii cuarteé, ne tucunó ra'a so', che'é rej cunú dínj tu'va nij yuvi a.

Dan me se cunuu dínj tu'va nij yuvi, gaa ne guun che'e Pabló ca'mii so' xna'anj hebreo rihaan nij yuvi, ne cataj so':

**22** —Cunə soj ca'mij, tinuj, ta'nuj. Ne nanə xrej soj se vaa ca'mii nacaj 'unj manj —taj Pabló rihaan nij sí israelitá a.

<sup>2</sup> Dan me se xcax nij yuvi israelitá cuentá se vaa ca'mii Pabló xna'anj hebreo, ne che'é dan ndaa dínj ma'an man nij so' a. Gaa ne cataj uún Pabló a:

<sup>3</sup> —Dan me se ya sí israelitá mé 'unj, ne ca'ngaa 'unj chuman' Tarso chuman' naj estadó Cilicia a. Tzaj ne cachij 'unj chuman' Jerusalén nihánj, ne narí' 'unj nocoo' 'unj nu' se tucuanj xij ní', qui'yaj maestró Gamaliel a. Ne cuano nihánj me se sij yanj qui'yaj nu' ndaa vaa me rá Diose mé 'unj ase vaa 'yaj ma'an soj güii cuan' adonj. <sup>4</sup> Ne qui'yaj ndo'oj sayuun man nij yuvi nocoo' se tucuanj Jesucristó yo', ne guun ndo'o raj cavi' nij so' a. Dan me se snó'o do', chanə do', numij, ne canú' 'unj man nij so' taga', <sup>5</sup> ne xrej atə suun nocoo doj do', nij sí uun chij rihaan ní' do', me sí cataj se vaa ya vaa nanə nihánj nanə natá' 'unj rihaan soj adonj. 'O se ma'an nij so' rque yanj cartá rihaan 'unj nayaə tuvi' ní' sí man chuman' Damasco, gaa ne ca'anj 'unj chuman' Damasco, ne guun rá 'unj cunumij 'unj man nij yuvi nocoo' man Jesucristó yanj chuman' Damasco, che'é rej ca'na' nij so' chuman' Jerusalén nihánj ne quiran' nij so' sayuun, qui'yaj adonj.

<sup>6</sup> "Dan me se vaj 'unj chrej, ne caxuj me ta' asuun, ne nichrún' 'unj chuman' Damasco, gaa ne taj ni'yón cuchuguun nu' xta' nu' anicaj rej nicun' 'unj a. <sup>7</sup> Gaa ne quini' 'unj rihaan yo'óo, ne cunó 'unj se vaa ca'mii 'o so' rihanj, ne cataj so': "Saulo, Saulo, me che'é 'yáa so' sayuun manj, gā", taj sí ca'mii rihanj, xna'anj so' manj a. <sup>8</sup> Gaa ne: "Me sí mé so', Señor", cataj 'unj rihaan so', xna'anj 'unj man so' a. Gaa ne cataj so': "'Unj ro',

me Jesús sí cavii chuman' Nazaret, ne síi 'yaj ndo'o so' sayuun man mej adonj", taj so' rihanj a. <sup>9</sup> Gaa ne dan me se nij síi vaj ga 'unj ro', ya quene'en nij so' ya'an chuguun rej nicun' 'unj, tzaj ne ne cunonij so' nana ca'mii Jesús rihanj a ma'. <sup>10</sup> Gaa ne cataj 'unj rihaan so' a: "Daj qui'yáa 'unj, rá so' ga", taj 'unj, xná'anj 'unj man so' a. Gaa ne síi 'nij ra'a man ní' ro', cataj: "Naxumaan so', ne ca'anj so' chuman' Damasco, gaa ne asa' cuchí' so' yo', ne cataj xna'anj nii rihaan so' che'é nu' se vaa no xcuún so' qui'yáa so' á", taj síi 'nij ra'a man ní' rihanj a. <sup>11</sup> Dan me se che'é se nucuaj ndo'o chuguun ya'an yo' ro', che'é dan ne ca'vee curuvi' rlij rihanj, ne che'é dan nij síi chéé gaj ro', quita'aa nij so' ra'aj, racuíj nij so' manj, ne ca'anj 'unj catúj 'unj chuman' Damasco a.

<sup>12</sup> "Dan me se chuman' Damasco ro', yáan 'o síi cu'naj Ananías, ne síi ve'é nocō' man Diosē me so', ne síi qui'yaj nu' se tucuaj Moisés me so', ne cunudanj nij yuvii israelitá yanj chuman' Damasco taj se vaa sij sa' me so' a. <sup>13</sup> Dan me se ca'na' so' rihanj ne canicun' so' x'núj, ne cataj so': "Nachuguun rihaan so', gaa ne ni'yaj so', tinuj Saulo", taj so' rihanj a. Ne maan orá dan nachuguun rihanj, ne quene'enj man so' a. <sup>14</sup> Gaa ne cataj síi cu'naj Ananías: "Diosē síi nocō' xij ní' gaa naá ro', narii so' mán so' che'é rej xcaj so' cuentá daj me rá so' qui'yaj so' che'é yuvii, ne guun rá so' quene'én so' man Jesucristó síi sa' inanj ne cunón so' nana ca'mii so' rihaan so' á. <sup>15</sup> Gaa ne guún so' síi ne'en che'é so', ne dan me se ca'anj so', ne nata' so' rihaan nu' nij yuvii che'é se vaa quene'én so' do', che'é nij nana cunón so' do' a. <sup>16</sup> Ne nihánj me se se guun raan so' doj a ma'. Maan se naxumaan so', ne cata' ne so', ne cachinj ni'yáa so' rihaan Jesucristó che'é rej tinaruvii Diosē nu' cacun' xráa so' á", taj síi cu'naj Ananías yo' rihanj a.

<sup>17</sup> "Dan me se nanicaj 'unj ca'ná' 'unj chuman' Jerusalén nihánj, ne gaa cachín ni'yáa 'unj rihaan Diosē, ne naqui'yaa 'o rasuun rihaan 'unj, <sup>18</sup> ne dan me se quene'én 'unj man Jesucristó, ne cataj so' rihanj a: "Yoó so' cuaj, cūrihanj so' rque chuman' Jerusalén nihánj á. 'O se se cuno nij síi man chuman' Jerusalén nana nata' so' rihaan nij so' che'é 'unj ma'", taj so' rihanj a. <sup>19</sup> Gaa ne cataj 'unj rihaan so' a: "Tzaj ne aj ne'en nij so' se vaa 'unj me síi catúj daj a nij ve' tucu'yón nij so' se tucuaj Moisés, ne quita'aa 'unj nij síi cuchumán rá ni'yaj mán so', ne canú' 'unj man nij so' taga' ne gó' 'unj cuartá xráa nij so', Señor. <sup>20</sup> Ne aj ne'en nij so' se vaa gaa cavi' síi cu'naj Esteban síi nata' rihaan yuvii che'é so', ne 'unj me síi 'o vaa rá ga nij síi ticavi' man so', ne dan me se cutumej sagan' nij so' gaa go' nij so' yahij man Esteban adonj. Che'é dan cunonij so' se nana nana á", taj 'unj rihaan Jesucristó a. <sup>21</sup> Gaa ne cataj so': "Ca'anj so' á. 'O se 'unj ca'nej mán so' ca'anj so' gan' rihaan nij síi yanij a", taj so' rihanj a —taj Pabló rihaan nij síi israelitá yo' se xna'anj nij so' a.

<sup>22</sup> Dan me se ndaa dan ca'mii Pabló nana yo', ne nanó xrej nij síi israelitá se nana so' a. Tzaj ne gaa canicaj so' ca'mii so' che'é nij síi yanij, gaa ne canicaj uún nij so', nucuaj caguáj nij so', cataj nij so':

—Cavi' síi nihánj á. Ne nó xcuún síi nihánj gaa i'na' so' rihaan chumii nihánj a ma' —taj nij so', caguáj nij so' a.

<sup>23</sup> Dan me se caguáj ndo'o nij so', ne quirii nij so' roto nij so', ne taman' ndo'o nij so' yo'ó tachruu xta' che'é se ca'maan ndo'o rá nij so' a. <sup>24</sup> Gaa ne ca'ne' síi uun chij suun rihaan nij tanuu se vaa ca'anj nica'ij nij so' man Pabló rá cuarteé ne nij so', gaa ne go' nij so' cuartá xráa Pabló, che'é rej cataj xna'anj so' me che'é caguáj nij yuvii danj ni'yaj nij so' man Pabló a. <sup>25</sup> Dan me se nica'ij nij tanuu nuj xcaan, numij nij tanuu man Pabló, ne gaa qui'yaj nij so' danj, gaa ne ca'mii Pabló rihaan 'o síi nicun' rej nicun' so', ne tanuu uun chij rihaan 'o cientó tanuu me so', ne dan me se cataj Pabló rihaan so' a:

—Nó xcuún soj go' soj cuartá xráa 'o síi guun chihanj Romá gaa ataa ca'ne' nii cacun' che'é so' axe —taj so' rihaan tanuu yo' a. '

<sup>26</sup> Gaa cuno tanuu yo' nana ca'mii Pabló rihaan so', ne ca'anj so' cataj xna'anj so' rihaan síi uun chij rihaan cunudanj nij tanuu, ne cataj so':

—Ya me rá so' go' ní' cuartá xráa so' na'. 'O se sij romanó me snó'o nihánj ei —taj so' rihaan tuvi' tanuu so' tanuu uun chij rihaan cunudanj nij tanuu a.

<sup>27</sup> Gaa ne cuchi' tanuu uun chij yo' rihaan Pabló, ne xná'anj so' man Pabló, cataj so':

—Cataj so' 'o nana rihanj á. Ya ya sij romanó mé so' na' —taj so', xná'anj so' man Pabló a.

—Vej adonj —taj Pabló rihaan so' a.

<sup>28</sup> Gaa ne cataj tanuu uun chij yo' rihaan Pabló a:

—'Unj nihánj, tzaj ne nocōo ndo'o sa'anj gó' 'unj che'é rej ca'vee guún 'unj 'o síi romanó nanj á —taj so' rihaan Pabló a.

Gaa ne cataj Pabló:

—Tzaj ne 'unj ro', me síi romanó asij ca'ngaa 'unj adonj —taj so' rihaan tanuu uun chij yo' a.

<sup>29</sup> Nu' ca'mii so' danj, ne nu' ca'anj yanij nij tanuu guun rá go' cuartá xráa Pabló a. Ne ma'anj tanuu uun chij rihaan nij so' cuchu'vi', che'é se xcaj so' cuentá se vaa sij romanó me Pabló ne aj numij so' man Pabló a.

**Nana nihánj taj xna'anj daj ca'mii Pabló gaa canicun' so' rihaan juntá qui'yaj nij síi uun chij rihaan nij yuvii israelitá a**

<sup>30</sup> Ne ranga' yo'ó güii me se tanuu uun chij rihaan cunudanj nij tanuu ro', guun ya rá so' xcaj so' cuentá me che'é guun rá nij síi israelitá cuta'ij nij so' cacun' xráa Pabló a. Che'é dan ca'ne' so' suun se vaa nache'ij nij tanuu man Pabló, ne ca'ne' so' suun se vaa cunuu chre'ij nij xrej atá suun nocōo doj do', nu' nij síi uun chij rihaan nij yuvii israelitá do', qui'yaj nij so' juntá a. Gaa ne catúj Pabló rej man nij so', qui'yaj so', ne canicun' Pabló tanuu rihaan nij so' a.

**23** Dan me se ni'yaj uxrá Pabló man taran' nij síi uun chij yo', ne cataj so':



—Cunq̄o nij soj ca'mij, tinuj. Nu' cavii nu' ca'na' ro', in-  
anj sa' uxrá 'yáá 'unj rihaan Dios̄e, raj a. Taj cacun'  
tumej ma' —taj Pabló rihaan nij so' a.

<sup>2</sup> Gaā ne xrej at̄a suun noc̄oqo doj síi cu'naj Ananías  
ro', ca'ne' so' suun rihaan nij síi nicun' rej x'núú Pabló  
se vaa coxr̄o nij so' tu'va Pabló, gaā ne d̄anj qui'yaj nij  
so' a. <sup>3</sup> Gaā ne cataj Pabló rihaan síi cu'naj Ananías yo'  
a:

—Vaa güii coxr̄o Dios̄e tu'vá so' á. 'O se síi nucai' rá  
mé so' á. 'O se táá so' naqui'yaj cuú so' che'ej sese  
qui'yáá 'unj cacun' rihaan se tucuñj Moisés, rá so' a.  
Tzaj̄ ne nihánj me se tananj ca'né' so' suun se vaa  
coxr̄o nii tu'vaj, ne se tucuñj Moisés taj se vaa ne nó  
xcúún so' a 'ó xco' qui'yáá so' d̄anj ma' —taj Pabló ri-  
haan síi cu'naj Ananías a.

<sup>4</sup> Gaā ne nij síi nicun' rej x'núú Pabló ro', cataj nij so'  
rihaan Pabló a:

—Ne nó xcúún so' caxrij̄ yuvaā so' man síi cune'  
Dios̄e guun xrej at̄a suun noc̄oqo doj ma' —taj nij so' ri-  
haan Pabló a.

<sup>5</sup> Gaā ne cataj Pabló:

—Ne quene'én 'unj se vaa xrej at̄a suun noc̄oqo doj  
me síi tu'va d̄anj, man tinuj. 'O se danj Dios̄e taj se vaa  
s̄e ca'mii chi'iñ ní' n̄i'yaj ní' síi uun chij rihaan nij tuvi' ní'  
a ma' —taj Pabló rihaan nij so' a.

<sup>6</sup> Dan me se xcaj Pabló cuentá se vaa ta'aj nij síi uun  
chij yo' me síi saduceo ne yo'ó ta'aj nij so' me síi  
fariseo, ne che'é dan caguáj so', cataj so' rihaan  
cunudanj nij so' a:

—Síi fariseo mej, ne ta'níi síi fariseo mej, tinuj. Ne ni-  
hánj me se cuta' nii cacun' xráj che'é se 'unj me síi  
amán rá se vaa cunuu i'na' uún nij síi cavi' vaa güii, tin-  
uj —taj Pabló rihaan cunudanj nij so' a.

<sup>7</sup> Dan me se gaā ca'mii Pabló d̄anj, ne ca'maan rá nij  
síi fariseo do', nij síi saduceo do', ni'yaj nij so' tuvi' nij  
so', ne xra' ta'aj nij so' a. <sup>8</sup> 'O se nij síi saduceo ro', taj  
se vaa s̄e ca'vee cunuu i'na' uún nij síi cavi' ma'. Ne se  
mozó Dios̄e do', nimán yuvij̄ do', taj vaj ma', taj nij síi  
saduceo yo' a. Tzaj̄ ne nij síi fariseo ro', taj se vaa yā yā  
cunuu i'na' uún nij síi cavi' vaa güii, ne vaa se mozó  
Dios̄e, ne vaa nimán yuvij̄, taj nij so' a.

<sup>9</sup> Dan me se caguáj ndo'o cunudanj nij síi uun chij  
yo', ne canicun' ta'aj nij síi fariseo at̄a suun naqui'yaj  
c̄yu se tucuñj Moisés rihaan yuvij̄, ne ca'mii canó tuvi'  
nij so' ḡā nij síi saduceo, cataj nij so':

—Nuvi' cacun' tumé síi nihánj, rá núj ma'. 'O se  
ca'vee se aj̄ ca'mii 'ō nimán rihaan so' ca'vee se aj̄  
ca'mii 'ō se mozó Dios̄e rihaan so' ca'vee nanj á —taj  
nij so', ca'mii nacaj nij so' man Pabló a.

<sup>10</sup> Gaā ne ca'maan uxrá rá cunudanj nij so', ne che'é  
dan cuchu'vi' tanuu uun chij doj se vaa cutun' nij so'  
man Pabló, ne che'é dan ca'ne' so' suun rihaan nij  
tanuu se vaa ca'anj̄ nij tanuu quita'aā nij tanuu man  
Pabló ne quirij̄ nij tanuu man Pabló sca'núj̄ nij síi uun  
chij rihaan nij yuvij̄ israelitá yo' ne ca'anj̄ n̄icaj̄ nij tanuu  
man Pabló rá cuarteé man nij tanuu a.

<sup>11</sup> Ti'nuu yo'ó güii me se curuvi' ma'an Jesucristó sij  
'nij ra'a man ní' rihaan Pabló, ne cataj so' rihaan Pabló  
a:

—Gaā nucaj̄ nimán so' á. 'O se ase vaa 'ō xraan taj  
xna'anj̄ so' rihaan nij síi man chuman' Jerusalén nihánj  
che'é 'unj ro', d̄anj̄ gaā cataj xna'anj̄ so' rihaan nij síi  
man chuman' Romá uún che'é 'unj adonj̄ —taj síi 'nij  
ra'a man ní' rihaan Pabló a.

**Nanā nihánj̄ taj xna'anj̄ se vaa guun rá nij síi israelitá  
ticavi'̄ nij so' man Pabló a**

<sup>12</sup> Dan me se yo'ó güii cunuu chre'̄ nij síi israelitá  
che'é rej qui'yaj̄ nij so' sayuun man Pabló, ne cataj nij  
so' rihaan Dios̄e a:

—Sese chā núj do', sese co'qo núj na do', gaā ataa  
cavi' Pabló qui'yaj̄ núj, ne ca'vee qui'yáá so' sayuun  
man núj á —taj nij so' rihaan Dios̄e a.

<sup>13</sup> Ne vij̄ chihaā táá doj nij so' me nij síi guun 'ō rá  
qui'yaj̄ d̄anj man Pabló a.

<sup>14</sup> Gaā ne nij síi me rá ticavi'̄ man Pabló ro', cuchi'̄ nij  
so' rihaan nij xrej at̄a suun noc̄oqo doj do', rihaan nij síi  
uun chij do', ne cataj nij so' a:

—Aj cata' tu'va núj rihaan Dios̄e se vaa ca'vej̄ rá núj  
qui'yaj̄ Dios̄e sayuun man núj sese chā núj me ma'an  
rasuun gaā ataa cavi' Pabló qui'yaj̄ núj a. <sup>15</sup> Che'é dan  
soj ḡā yo'ó nij síi uun chij ro', cataj xna'anj̄ soj rihaan  
tanuu uun chij doj se vaa me rá soj ca'n̄a' uún Pabló ri-  
haan soj che'é se me rá soj xcaj̄ sa' soj doj cuentá  
che'é Pabló, cataj soj rihaan tanuu yo' a. Tzaj̄ ne  
cum̄an núj rá chrej, caráán̄ núj chrej man Pabló, ne se  
gaā i'na' Pabló cuchi'̄ Pabló rihaan soj, qui'yaj̄ núj a  
man adonj̄ —taj nij so' rihaan xrej at̄a suun noc̄oqo doj  
do', rihaan tuvi'̄ nij so' síi uun chij do' a.

<sup>16</sup> Tzaj̄ ne cuno xticun' Pabló se vaa ca'mii nij so'  
che'é rej caráán̄ nij so' chrej man Pabló, ne che'é dan  
ca'anj̄ so' catúj̄ so' rá cuarteé, gaā ne nu' tacuachén  
so' nanā rihaan Pabló a. <sup>17</sup> Gaā ne canacúún Pabló ca'-  
na' yo'qō nij tanuu uun chij rihaan 'ō cientó tanuu ri-  
haan so', ne cataj so' rihaan tanuu yo' a:

—Cat̄uuj̄ síi tachruuj̄ nihánj̄ nata' so' rihaan tanuu uun  
chij doj, qui'yáá so' á. 'O se vaa nanā me rá so' nata'  
so' rihaan tanuu uun chij doj a —taj Pabló rihaan  
tanuu yo' a.

<sup>18</sup> Che'é dan nicaj̄ tanuu yo' man xticun' Pabló, ca'anj̄  
so' rihaan tanuu uun chij rihaan cunudanj̄ nij tanuu,  
ne cataj so' rihaan tanuu a:

—Síi cu'naj̄ Pabló síi 'nij taga' ro', canacúún so' manj̄  
cuchij̄ rihaan so', ne cachíin̄ ni'yaj̄ so' rihanj̄ se vaa ca'-  
na' síi tachruuj̄ nihánj̄ rihaan so' qui'yáā a. 'O se vaa  
nanā me rá síi tachruuj̄ nihánj̄ nata' so' rihaan so', taj  
Pabló a —taj tanuu yo' rihaan tanuu uun chij doj a.

<sup>19</sup> Dan me se corq' tanuu uun chij yo' ra'a xticun'  
Pabló, gaā ne ca'anj̄ yanij̄ roj so', gaā ne xná'anj̄ tanuu  
yo' man so', cataj so':

—Me nanā nata' so' rihanj̄, rá so' ḡā —taj so' rihaan  
síi tachruuj̄ yo' a.

<sup>20</sup> Gaā ne so' cataj:

—Nij sí israelitá ro', cuyaan guun rá nij so' se vaa cachinj ni'yaj nij so' rihaan so' se vaa a'yuj ca'anj nicaj so' man Pabló rej cunyu chre' nij sí uun chij rihaan nij so' a. 'O se cataj nij so' se vaa me rá nij so' xcaj nij so' cuentá sa' doj che'é Pabló a. <sup>21</sup> Tzaj ne se cuchumán rá so' se nana nij so' ma'. 'O se vaa vij chihaa tuvi' nij so' táa doj caráan chrej man Pabló, ne aj cata' tu'va nij so' rihaan Diosé se vaa se chá nij so' do', se co'o nij so' na do', gaa ataa cavi' Pabló qui'yaj nij so', ne sese se cavi' Pabló qui'yaj nij so', ne ca'vee qui'yaj Diosé sayuun man nij so', taj nij so' nanj á. Ne cuano nihánj me se me ndo'o rá nij so' se vaa cata' tu'vá so' se vaa ya ca'anj nicaj so' man Pabló rihaan nij sí uun chij yo' adonj —taj xticun' Pabló rihaan tanuu uun chij doj a.

<sup>22</sup> Ne tanuu yo' ro', na'née so' chrej man sí tachruu yo', ne ca'ne' so' suun rihaan sí tachruu se vaa se cataj xna'anj so' rihaan a 'ó yuvi se vaa aj nata' so' nana vaa danj rihaan tanuu yo' ma'.

**Nana nihánj taj xna'anj se vaa ca'née tanuu uun chij doj man Pabló rihaan sí nicaj suun gobernador cu'naj Félix a**

<sup>23</sup> Dan me se canacúun tanuu uun chij yo' man vij nij tanuu uun chij rihaan 'o cientó tanuu, ne cataj so' rihaan roj so' a:

—Nicaj roj soj vij cientó tanuu cheé tacoj do', va'nuy chihaa chi' tanuu taj xráa cuayó do', vij cientó tanuu nicaj chruun lanzá do', ne cumán chruun soj cavii soj aga' uun nij corá, ca'anj soj chuman' Cesarea á. <sup>24</sup> Ne quirii soj 'o cuayó quitaj sí cu'naj Pabló, gaa ne cuchí' Pabló rihaan sí nicaj suun gobernador cu'naj Félix, qui'yaj soj, ne dan me se quinani so' rihaan nij sí israelitá a —taj tanuu uun chij doj cuno roj so' a.

<sup>25</sup> Gaa ne qui'yaj so' 'o yanj cartá, ne ase vaa nana nihánj ro', danj vaa nana cachrón so' rihaan yanj cartá yo' a: <sup>26</sup> "Uñj sij cu'naj Claudio Lisias ro', 'yáa 'uñj yanj cartá nihánj ca'nej 'uñj rihaan so' sij nicaj suun gobernador cu'naj Félix sij sa' ndo'o a. Ve'é cayáan so' á.

<sup>27</sup> Xa' sí ca'nej 'uñj rihaan so' nihánj, tzaj ne quita'aa nij sí israelitá man so', ne guun rá nij so' ticavi' nij so' man so' a. Gaa xcaj 'uñj cuentá, ne nacaj núj ga nij tanuu man so', che'é se xcaj 'uñj cuentá se vaa sij romanó me so' a. <sup>28</sup> Dan me se guun rá 'uñj xcaj 'uñj cuentá me che'é me guun rá nij sí israelitá cuta' nij so' cacun' xráa so', ne che'é dan ca'anj nicaj 'uñj man so' rihaan nij sí uun chij rihaan nij so' a. <sup>29</sup> Ne xcaj 'uñj cuentá se vaa inanj che'é tucuáan nocó' ma'an nij so' me cuta' nij so' cacun' xráa so' a. Tzaj ne taj vaj cacun' chi'ij tumé so' ma'. Taj che'é cavi' so' do', taj che'é qui'nij so' taga' do' ma'. <sup>30</sup> Tzaj ne cataj xna'anj nii rihanj se vaa guun rá ta'aj nij sí israelitá ticavi' nij so' man so', ne che'é dan ca'nej 'uñj man so' rihaan so', ne cataj 'uñj rihaan nij sí me rá cuta' cacun' xráa so' se vaa cuchí' nij so' rihaan so' ne ca'mii nij so' ga so' a", taj nana cachrón tanuu uun chij doj rihaan yanj cartá ca'née so' rihaan sí nicaj suun gobernador cu'naj Félix a.

<sup>31</sup> Dan me se qui'yaj nij tanuu ndaa vaa cataj xna'anj so' rihaan nij so', ne rej nii ca'anj nicaj nij so' man Pabló ndaa chuman' cu'naj Antípatris a. <sup>32</sup> Gaa ne yo'ó güii me se cavii nij tanuu taj xráa cuayó, ca'anj nij so' ga Pabló, ne yo'ó nij tanuu ro', canicaj nij so' chuman' Jerusalén ndaa cuarteé a. <sup>33</sup> Dan me se gaa catúj nij tanuu taj xráa cuayó ga Pabló chuman' Cesarea, ne nago' nij so' yanj cartá yo' ra'a sí nicaj suun gobernador, ne tacuachén nij so' man Pabló rihaan so' uún a. <sup>34</sup> Gaa quisj nayaa so' yanj cartá, ne xna'anj so' me estadó cavii Pabló, ne cataj xna'anj nii rihaan so' se vaa cavii Pabló estadó Cilicia a. <sup>35</sup> Gaa ne cataj so' rihaan Pabló a:

—Naqui'yaj cuú 'uñj che'é so' asa' ca'na' nij sí cuta' cacun' xráa so' á —taj so' rihaan Pabló a.

Gaa ne ca'ne' so' suun rihaan nij tanuu se vaa ca'anj nicaj nij tanuu man Pabló rá tucuá suun nocó cune' sí cu'naj Herodes ne tumé nij tanuu man so' a.

**Nana nihánj taj xna'anj che'é cacun' cuta' nii xráa Pabló a**

**24** Dan me se cachén 'uñ' güii, gaa ne nanij xrej atá suun nocóo doj cu'naj Ananías ndaa chuman' Cesarea, ne ca'anj ta'aj nij sí uun chij rihaan nij yuvi israelitá do', 'o sí a'mii natá cu'naj Tértulo do', ga so', ne cuta' nij so' cacun' xráa Pabló rihaan sí nicaj suun gobernador a. <sup>2</sup> Dan me se gaa canacúun nii ca'na' sí cu'naj Pabló, ne ca'na' Pabló, ne guun che'e sí cu'naj Tértulo cuta' so' cacun' xráa Pabló rihaan sí cu'naj Félix, cataj so':

—Che'é se so' me sí acaj ndo'o cuentá ro', che'é dan díj mán núj sij israelitá, ne naxcaj ndo'o chiháan núj, <sup>3</sup> ne cunudanj núj me sí taj se vaa inanj sa' uxrá qui'yáa so', Félix sij sa' ndo'o a. Ne: "'O guun ni'yaj ndo'o ní"', taj taran' núj rihaan so' me rej ma'an vaj núj a. <sup>4</sup> Tzaj ne taj che'é guun rmii so' doj qui'yáa ma'. Ne che'é dan rquee 'uñj rihaan so' se vaa veé danj gaa inaj nimán so', ne cunó so' doj tzin' se nana núj nanj adonj.

<sup>5</sup> "Dan me se xcaj núj cuentá se vaa xa' sí nihánj, tzaj ne ase vaa yuuee xij man naa vaa so', ne so' me sí 'yaj se vaa ino vaa rá cunudanj nij sí israelitá yanj rihaan chumii nihánj ne xra' ta'aj nij so', ne so' me sí uun chij rihaan nij sí nocó' 'o tucuáan ne se tucuanj sí cavii chuman' Nazaret a. <sup>6</sup> Ne ndaa guun rá so' qui'yaj chi'ij so' man nuvií nocóo, ne che'é dan quita'aa núj man so', ne guun rá núj ca'ne' núj cacun' che'é so' ndaa vaa a'mii tucuáan nocó' ma'an núj a. <sup>7</sup> Tzaj ne sí cu'naj Lisias tanuu uun chij rihaan taran' nij tanuu man chuman' Jerusalén ro', ca'néj yuvaa so' man sí nihánj ra'a núj, <sup>8</sup> ne cataj xna'anj so' rihaan nij sí me rá cuta' cacun' xráa Pabló se vaa ca'na' nij so' rihaan so' nihánj a. Ne dan me se ma'an so' me sí guun nucuaj naqui'yaj cyu che'é nu' rasuun nihánj, ne xcaj ma'an so' cuentá che'é cacun' cuta' núj xráa Pabló nanj adonj —taj sí cu'naj Tértulo cuno sí cu'naj Félix a.

<sup>9</sup> Gaa ne yo'ó nij yuvij israelitá ro', caraa ndo'o nij so' cacun' xráá Pabló, ne cataj nij so' se vaa ya vaa se na-na sítí cu'naj Tértulo yo' a.

**Nana nihánj taj xna'anj che'é nana ca'mii ma'an Pabló rihaan sítí nicaj suun gobernador cu'naj Félix yo' a**

<sup>10</sup> Gaa ne guun ra'a sítí nicaj suun gobernador cataj so' se vaa ca'vee ca'mii Pabló, ne che'é dan cataj Pabló a:

—Ne'én 'unj se vaa quisij que'ee yo' guún so' sítí a'ne' cacun' che'é nij sítí man chiháán núj, ne che'é dan uun niha' raj ca'mii nacaj 'unj che'é ma'anj rihaan so' á. <sup>11</sup> Ne guun nucuaj ma'an so' xcaj so' cuentá se vaa ataa quisij chuvij güii asij cavii 'unj chuman' Jerusalén caraa guee 'unj rihaan Diose a. <sup>12</sup> Ne rá nuví nocoo do', rá nij ve' tucu'yón núj sij israelitá se tucuaj Moisés do', rque chuman' do', ne cano tuví 'unj ga yuvi ma'. Ne a doj ne ca'maan rá nij yuvij qui'yáá 'unj ma'. <sup>13</sup> Ne se ca'vee tijaan nij sítí nihánj se vaa vaa che'é cuta' nij so' cacun' xráj ma'.

<sup>14</sup> "Tzaj ne cataj yá 'unj rihaan so' se vaa xa' tucuáán tucu'náj nij sítí nihánj tucuáán ne ro', danj 'yáá 'unj aráj guee 'unj rihaan Diose sij nocoo' nij xí 'unj a. 'O se amán raj nu' nana no rihaan yanj no se tucuaj Moisés do', se nana nij sítí nata' se nana Diose gaa naá do' a.

<sup>15</sup> Ne nucuaj rá 'unj man Diose ndaa vaa 'yaj ma'an nij sítí nihánj se vaa vaa güii cunyu i'na' uún nij sítí sa' cavi' do', nij sítí chi'ii cavi' do' a. <sup>16</sup> Che'é dan nu' se vaa 'yáj, tzaj ne ve'é inanj 'yáj che'é rej se guun quitaj cacun' xráj rihaan Diose do', rihaan yuvij do' ma'.

<sup>17</sup> "Dan me se cachén que'ee yo', gaa ne guun rá 'unj rque 'unj caridad rihaan tuví 'unj sítí nique ne rque 'unj rasuun guee rihaan Diose, ne che'é dan ca'anj 'unj ndaa chuman' Jerusalén a. <sup>18</sup> Ne gaa qui'yáá 'unj danj, ne nari' doj sítí israelitá cavii estadó Asia mán 'unj rá nuví nocoo, ne aj cunuu sa' 'unj rihaan Diose daj vaa taj se tucuaj núj a. Tzaj ne taj vaj yuvi vaj ga 'unj, ne taj vaj sayuun chi'ii qui'yáá 'unj gaa nari' nij so' manj ma'. <sup>19</sup> Ne xa' nij so', tzaj ne sese vaa cacun' tumé 'unj rá nij so', ne no xcúún nij so' ca'na' ma'an nij so' canicun' nij so' nihánj rihaan so' á. <sup>20</sup> Ne sese taj, ne no xcúún ma'an nij sítí nihánj cataj xna'anj nij so' rihaan so' me cacun' tumé 'unj nari' nij so' gaa canicun' 'unj rihaan juntá qui'yaj nij sítí atá suun rihaan núj á. <sup>21</sup> 'O se vaa orún' nana caguáj 'unj gaa canicun' 'unj rihaan nij sítí uun chij rihaan nij yuvij israelitá yo', ne dan me se cataj 'unj danj: "Maan che'é se 'unj me sítí amán rá se vaa vaa güii cunyu i'na' uún nij sítí cavi' qui'yaj Diose ro', che'é dan naquiyaj cuu nij soj che'ej cuan' a", cataj 'unj rihaan nij so' a —taj Pabló rihaan sítí nicaj suun gobernador cu'naj Félix a.

<sup>22</sup> Ese sítí cu'naj Félix ro', me sítí quene'en sa' daj vaa se tucuaj ní' sij nocoo' man Jesucristó, gaa ne cataj so' se vaa guun raan doj, gaa ne ca'ne' so' cacun' che'é Pabló a. Che'é dan cataj so':

—Asa' ca'na' tanuu uun chij cu'naj Lisias nihánj, ne naquiyaj cuu 'unj che'é nij soj á —taj sítí cu'naj Félix a.

<sup>23</sup> Ne ca'ne' sítí cu'naj Félix suun rihaan tanuu uun chij rihaan 'o cientó tanuu se vaa cutumé tanuu man Pabló, tzaj ne ca'vee cachee uun Pabló doj, ne ca'vee ca'na' nij tuvi' Pabló racuíj nij so' doj man Pabló, qui'yaj tanuu, taj sítí cu'naj Félix yo' a.

**Nana nihánj taj xna'anj se vaa yo'ó 'nij Pabló taga', qui'yaj sítí cu'naj Félix a**

<sup>24</sup> Dan me se cachén doj güii, gaa ne ca'na' sítí cu'naj Félix ga nica so' chana israelitá cu'naj Drusila, ne canacúún so' se vaa ca'na' Pabló rihaan so', ne cuno so' nana ca'mii Pabló rihaan so' che'é tucuáán nocoo' ní' sij amán rá ni'yaj man Jesucristó a. <sup>25</sup> Dan me se cataj xna'anj Pabló rihaan sítí cu'naj Félix se vaa no xcúún ní' cunyu sa' ní' rihaan Diose ne no xcúún ní' cutumé ní' man ma'an ní' se vaa ve'é inanj qui'yaj ní' a. Ne ca'mii so' che'é güii ca'ne' Diose cacun' che'é yuvi a. Gaa ne cuchu'vi' ndo'o sítí cu'naj Félix, ne cataj so':

—Cuanó nihánj me se ca'anj so' yaj, tzaj ne asa' vaa i'núj rihanj, ne canacunj uún 'unj mán so' á —taj so' rihaan Pabló a.

<sup>26</sup> Danj cataj Félix che'é se me rá so' caráán Pabló sa'anj rihaan ma'an so' che'é rej quirii so' taga' man Pabló, rá so' a. Che'é dan que'ee güii canacúún so' man Pabló ca'na' Pabló rihaan so', ne ca'mii so' ga Pabló a.

<sup>27</sup> Dan me se quisij vij ya yo' 'nij Pabló taga', gaa ne x'néj suun ra'a sítí cu'naj Félix, ne catúj sítí cu'naj Porcio Festo a. Ne guun rá sítí cu'naj Félix qui'yaj so' se luj che'é nij yuvij israelitá, ne che'é dan tanáj so' man Pabló taga' a.

**Nana nihánj taj xna'anj se vaa cataj Pabló se vaa guun rá so' naquiyaj cuu sítí nicaj suun emperador che'é so' a**

**25** Quisij va'nuj güii yáán sítí cu'naj Festo sítí nicaj suun gobernador, gaa ne curihanj so' chuman' Cesarea cavii so' ndaa chuman' Jerusalén a. <sup>2</sup> Gaa ne nij xrej atá suun nocoo doj do', nij sítí raá doj rihaan nij yuvij israelitá do', cuta' nij so' cacun' xráá Pabló rihaan sítí cu'naj Festo a. Gaa ne nucuaj <sup>3</sup> cachíín ni'yaj nij sítí israelitá rihaan sítí cu'naj Festo se vaa ca'ne' so' suun se vaa ca'na' Pabló ndaa chuman' Jerusalén a. 'O se guun rá nij so' caráán nij so' chrej ne ticaví' nij so' man Pabló a. <sup>4</sup> Che'é dan cataj sítí cu'naj Festo se vaa tumé nij tanuu man Pabló chuman' Cesarea a. 'O se rque doj güii nucuí' so' chuman' Cesarea, taj so' a. <sup>5</sup> Gaa ne cataj uún sítí cu'naj Festo rihaan nij sítí israelitá a:

—Che'é dan sese nij tuvi' soj sítí guun nucuaj ca'anj ndaa chuman' Cesarea ga 'unj ro', ca'anj nij so', ne sese vaa se chi'ii qui'yaj sítí cu'naj Pabló, ne cutá' nij so' cacun' xráá Pabló á —taj sítí cu'naj Festo rihaan nij so' a.

<sup>6</sup> Dan me se guun raan sítí cu'naj Festo 'o tunj güii chuman' Jerusalén ta' asuun, gaa ne nanii so' ndaa chuman' Cesarea, gaa ne yo'ó güii me se ca'anj quitaj

so' chruun xlá sa' rej naqui'yaj cyu so' che'é yuvij, gaa ne ca'ne' so' suun rihaan nij tanuu se vaa ca'na' Pabló rihaan so' qui'yaj nij tanuu a. <sup>7</sup> Gaa ne gaa ca'na' Pabló rihaan so', ne man nij sí israelitá nanij ndaa chuman' Jerusalén, ne canicun' nij so' nu' anicaj rej x'nuj Pabló, ne caraa ndo'o nij so' cacun' nocoo xráá Pabló, tzaj ne ne ca'vee tijaan nij so' se vaa ya ya qui'yaj so' cacun' yo' ma'. <sup>8</sup> Gaa ne canicaj Pabló, ca'mii nacaj so' che'é ma'an so', cataj so':

—Taj cacun' qui'yáá 'unj rihaan se tucuanj nij sí israelitá do', rihaan nuví nocoo do', rihaan sí nicaj suun emperador cu'naj César do' a ma' —taj Pabló rihaan sí cu'naj Festo yo' a.

<sup>9</sup> Dan me se guun rá sí cu'naj Festo qui'yaj so' se luj che'é nij yuvij israelitá, ne che'é dan cataj so' rihaan Pabló a:

—Ne me rá so' ca'anj so' ndaa chuman' Jerusalén ne ndaa ti'yaj ca'ne' 'unj cacun' che'é so' che'é nij rasuun nihánj na' —taj so', xná'anj so' man Pabló a.

<sup>10</sup> Gaa ne cataj Pabló rihaan so' a:

—Nihánj me nicún' 'unj rihaan so', sij cune' sí nicaj suun emperador cu'naj César se vaa ca'ne' so' cacun' che'é yuvij á. Ne che'é dan no' xcúun so' ca'ne' so' cacun' che'é 'unj nanj adonj. Ne qui'yáá 'unj cacun' rihaan a 'ó nij sí israelitá ma'. Ne aj ne'én so' se vaa ya vaa nana nihánj nana a'mii 'unj rihaan so' chuguanj. <sup>11</sup> Dan me se sese vaa cacun' qui'yáá 'unj ne sese vaa che'é ticavi' nii man 'unj, ne a'vej 'unj cavi' 'unj á. Tzaj ne sese cacun' rmi' inanj me se nana nij sí nihánj, ne taj a 'ó sí nó xcúun tucuachén man 'unj rihaan nij so' ma'. Cuanó nihánj me se achíin ni'yáá 'unj rihaan sí nicaj suun emperador cu'naj César se vaa ma'an so' ca'ne' cacun' che'é 'unj adonj —taj Pabló rihaan sí cu'naj Festo a.

<sup>12</sup> Dan me se nuchruij raa sí cu'naj Festo ga nij sí narqué chrej man so' daj qui'yaj nij so', gaa ne cataj so' rihaan Pabló a:

—Aj cachíin ni'yáá so' rihaan sí cu'naj César se vaa ma'an so' ca'ne' cacun' che'é so' á. Che'é dan ca'anj so' rihaan so' adonj —taj so' rihaan Pabló a.

**Nana nihánj taj xna'anj daj guun gaa ca'na' Pabló rihaan sí nicaj suun rey cu'naj Agripa do', rihaan ra'vij so' chana cu'naj Berenice do' a**

<sup>13</sup> Dan me se cachén doj güii, gaa ne sí nicaj suun rey cu'naj Agripa do', chana cu'naj Berenice do', ca'na' chuman' Cesarea, ca'na' ni'yaj roj so' sí nicaj suun gobernador cu'naj Festo a. <sup>14</sup> Ne guun raa roj so' que'ee güii chuman' Cesarea a. Che'é dan cataj xna'anj sí cu'naj Festo rihaan sí nicaj suun rey yo' che'é Pabló a. Dan me se cataj so':

—Dan me se sí quináj taga' nihánj qui'yaj sí cu'naj Félix me yo' o' so', <sup>15</sup> ne gaa nuu 'unj chuman' Jerusalén, ne nij xrej atá suun nocoo doj do', nij sí uun chij rihaan nij yuvij israelitá do', cataj xna'anj nij so' rihaan 'unj che'é so', ne guun rá nij so' se vaa narj' 'unj cacun' xráá so' ne qui'yáá 'unj sayuun man so' a.

<sup>16</sup> Gaa ne cataj xna'anj 'unj rihaan nij so' se vaa nuveé

se tucuanj núj sij romanó me tucuachén uun ní man 'o' so' ticavi' nii man so' ma'. Tananj asino yaan quene'en sí ata' cacun' man nij sí cuta' cacun' xráá so', gaa ne ca'mii nacaj so' che'é ma'an so', cataj 'unj rihaan nij so' a.

<sup>17</sup> "Dan me se ca'na' nij so' chuman' Cesarea nihánj, ne ne guun raa 'unj ma'. Tzaj ne yo'ó güii me se quitáá 'unj chruun xlá sa' rej a'ne' 'unj cacun' che'é yuvij, gaa ne ca'ne' 'unj suun rihaan nij tanuu se vaa ca'na' sí 'nij taga' yo' rihaan 'unj qui'yaj nij so' a. <sup>18</sup> Ne gaa ca'na' so', ne nij sí guun rá cuta' cacun' xráá so' ro', canicun' nij so' ne cuta' ndo'o nij so' cacun' xráá so', tzaj ne nuveé cacun' chi'ii me cacun' cuta' nij so' xráá so', rá 'unj ma'. <sup>19</sup> 'O se ino' doj vaa rá nij so' ga sí 'nij taga' yo', ni'yaj nij so' tucuáan nocoo' ma'an nij so' do', 'o' sí cavi' cu'naj Jesús do' a. 'O se vaa i'na' sí cu'naj Jesús, cataj sí 'nij taga' cu'naj Pabló yo' a.

<sup>20</sup> "Dan me se ne quene'én 'unj daj naqui'yaj cuj che'é rasuun vaa danj ma'. Che'é dan xná'anj 'unj man sí cu'naj Pabló yo' sese guun rá so' ca'anj so' chuman' Jerusalén, ne ca'vee ca'ne' 'unj cacun' che'é so' che'é nij rasuun yo', taj 'unj rihaan so' a. <sup>21</sup> Tzaj ne cachíin ni'yaj Pabló se vaa yo' o' qui'nij so' taga' nihánj ndaa se ca'vee naqui'yaj cyu sí nicaj suun emperador che'é so' a. Che'é dan ca'ne' 'unj suun rihaan nij tanuu se vaa yo' o' cütumé nij so' man Pabló taga' ndaa se ca'nej 'unj man so' rihaan sí cu'naj César yo' a —taj sí cu'naj Festo rihaan sí cu'naj Agripa a.

<sup>22</sup> Gaa ne cataj sí cu'naj Agripa rihaan sí cu'naj Festo a:

—Me rá 'unj cunó ma'an 'unj ca'mii snó'o yo' á —taj so' rihaan sí cu'naj Festo a.

—A'yuj me se cunó so' ca'mii so' adonj —taj sí cu'naj Festo rihaan sí cu'naj Agripa a.

<sup>23</sup> Ne yo'ó güii me se ve'é ndo'o qui'yaj nij yuvij gaa ca'na' sí nicaj suun rey cu'naj Agripa do', chana cu'naj Berenice do', ne catúj roj so' rá ve' 'yaj nii juntá a. Ne ca'na' tanuu uun chij rihaan 'o' mij tanuu ca'na' nij sí raa man chuman' Cesarea yo' ca'na' ga roj so' a. Gaa ne ca'ne' sí cu'naj Festo suun rihaan nij tanuu se vaa ca'na' Pabló rihaan nij so' qui'yaj nij tanuu a. <sup>24</sup> Ne gaa catúj Pabló, ne cataj sí cu'naj Festo rihaan sí cu'naj Agripa a:

—Cunó so', sij nicaj suun rey Agripa. Cunó soj sij cunuu chre' ga núj nihánj á. Nihánj me se ni'yaj nij soj man sí nihánj á. 'O se rque chuman' Jerusalén do', ndaa ma'an chuman' nihánj do', ca'na' ndo'o nij yuvij israelitá rihanj ne caguáj nij so' cataj nij so' se vaa ne nó xcúun so' gaa i'na' so' doj a ma'. <sup>25</sup> Tzaj ne xcaj 'unj cuentá se vaa taj se chi'ii qui'yaj so', ne taj che'é ticavi' nii man so' qui'yáá 'unj ma'. Tzaj ne ma'an so' cachíin ni'yaj rihaan sí nicaj suun emperador se vaa ca'ne' ma'an emperador cacun' che'é so', ne che'é dan guun raj se vaa ca'nej 'unj man so' rihaan sí nicaj suun emperador adonj. <sup>26</sup> Tzaj ne ne cavii raá 'unj me nana cachron 'unj rihaan yanj ca'nej 'unj rihaan sí nicaj suun emperador yo' che'é cacun' tumé sí nihánj ma'. Che'é dan ca'na' so' rihaan so' sij nicaj suun rey Agripa

dō', rihaan yo'ó nij soj dō', che'é rej naquiyaj cūu nij soj che'é so' ne cataj xna'anj nij soj rihaan 'unj me nana cachron 'unj rihaan yanj che'é so' á. <sup>27</sup> 'O se snúu rma'án 'unj, sese ca'nej 'unj man 'o síí 'nij taga' rihaan síí nicaj suun emperador, sese nuvi' nana cataj xna'anj 'unj rihaan so' che'é cacun' tumé síí 'nij taga' yo', rá 'unj a —taj síí cu'naj Festo rihaan yo'ó nij so' a.

**Nana nihánj taj xna'anj daj ca'mii Pabló rihaan síí nicaj suun rey cu'naj Agripa a**

**26** Gaa ne cataj síí cu'naj Agripa rihaan Pabló a: —Ca'vee ca'mii so' che'é so' á —taj so' rihaan Pabló a.

Gaa ne ticun' ra'a Pabló, ne ca'mii nacaj so' che'é ma'an so', cataj so':

<sup>2</sup>—Aj cavii sa' uxrá 'unj nihánj, che'é se vaa i'núj rihanj ca'mii nacaj 'unj manj rihaan so' cuan', sij nicaj suun rey cu'naj Agripa. Ne nihánj me se ca'mij che'é nu' cacun' cuta' yo'ó nij síí israelitá xráj a. <sup>3</sup> 'O se ne'éen 'unj se vaa so' me síí nicaj cuentá che'é nu' se tucuanj ní' sij israelitá, ne ne'éen so' daj vaa nu' nana nocō' ní' a. Che'é dan achíin ni'yáa 'unj rihaan so' se vaa qui'yáa so' se ndo'o, ne gaa inaj nimán so', ne cunó so' nana a'mij á.

<sup>4</sup>“Dan me se gaa síí tachruu mé 'unj, ne cayáan 'unj chuman' Jerusalén ga yo'ó nij síí israelitá, ne aj ne'en cunudanj nij síí israelitá se vaa qui'yáj gaa mej síí tachruu a. <sup>5</sup> Ne sese guun rá nij so', ne guun nucaj nij so' cataj xna'anj ma'an nij so' se vaa sij fariseo mé 'unj asino yaan, ne qui'yáa 'unj nu' ndaa vaa 'yaj nij síí fariseo, ne nij síí fariseo ro', me síí nicā doj nocō' se tucuanj ní' nanj á. <sup>6</sup> Ne nihánj me se cuta' nij síí israelitá cacun' xráj, ne nicún' 'unj nihánj rihaan so', che'é se guun ya raj se vaa qui'yaj Diōse nu' ndaa vaa cata' tu'-va so' rihaan xii ní' gaa naá a. <sup>7</sup> Ne nuvíi nigan' yo'ō na'vij cunū' chuvij nij x'ne' nij síí israelitá rihaan Diōse, che'é se guun ya rá ma'an nij so' se vaa qui'yaj Diōse nu' danj che'é nij so' a. Ne che'é rasuun yo' rasuun qui'yaj Diōse che'é ní' ro', che'é dan cuta' nij so' cacun' xráj, nanj rey Agripa. <sup>8</sup> Ne me che'é ne amán rá soj se vaa ca'vee cunūu i'na' uún nij síí cavi' qui'yaj Diōse ga.

<sup>9</sup>“Dan me se 'unj nihánj me se gaa rque me se guun ya ya rá 'unj qui'yaj ndo'o 'unj sayuun man nij síí nocō' man Jesucristó síí cavii chuman' Nazaret a. <sup>10</sup> Ne danj qui'yáa 'unj rque chuman' Jerusalén nanj á. 'O se 'unj me síí canu' man que'ee nij síí sa' nocō' man Diōse taga', ne rque nij xrej atā suun nocōo doj se nucaj rihanj se vaa qui'yáj danj a. Ne gaa ca'ne' núj cacun' che'é nij so' se vaa cavi' nij so', ne ndaa 'unj me síí cataj se vaa nō xcúún nij so' cavi' nij so' adonj. <sup>11</sup> Ne guun que'ee ndo'o ca'anj 'unj cunudanj nij ve' tucuyón ní' sij israelitá se tucuanj Moisés, ne qui'yáa 'unj sayuun man nij síí nocō' man Jesús, ne ndaa rqueé 'unj man nij so' ca'mii chi'ii nij so' che'é Jesucristó, ne che'é se ca'maan ndo'o rá 'unj ni'yaj 'unj man nij so', ne ndaa canocó' 'unj man nij so' ndaa yo'ó chuman' naj gan' che'é rej qui'yáa 'unj doj sayuun man nij so' adonj.

<sup>12</sup>“Dan me se gaa qui'yáj danj, ne 'o güii me se ca'anj 'unj chuman' Damasco, ne aj rque nij xrej atā suun nocōo doj rej nucaj, ne ca'née nij so' mán 'unj ca'anj 'unj qui'yáa 'unj sayuun man nij síí nocō' man Jesucristó yanj chuman' Damasco yo' a. <sup>13</sup> Cunó so' nana ca'mij rihaan so' nihánj, nanj rey. 'O se caxuj me yo', ne vaj 'unj chrej, ne rej xtā' ro', cuchuguun 'o ya'an nu' anicaj rej nicun' 'unj ga nij síí vaj chrej ga 'unj, ne nucaj doj ya'an yo' rihaan naán güii á. <sup>14</sup> Dan me se quini taran' núj rihaan yo'óo, ne cunó 'unj ca'mii yo'ō so' rihaan 'unj, ne xna'ánj hebreo ca'mii so', cataj so': “Me che'é 'yáa so' sayuun manj, ga Saulo'. 'O se me rá so' qui'yáa so' sayuun manj, tzaj ne man ma'án so' 'yáa so' sayuun ase 'yaj scúj o' tacanj rihaan chruun sihaaj nicaj síí 'yaj suun ga yuntá nanj á”, taj síí ca'mii rihanj a. <sup>15</sup> Gaa ne taj 'unj: “Me síí mé so', Señor”, taj 'unj, xná'anj 'unj man so' a.

<sup>16</sup>“Gaa ne cataj síí 'nij ra'a man ní': “Unj ro', me Jesús, ne sij 'yáa so' sayuun man mej adonj. <sup>16</sup> Tzaj ne naxaga so', canicun' cayá so' á. 'O se nihánj me se curuvi' 'unj rihaan so' che'é se narii 'unj mán so' qui'yaj suun so' rihanj ne nata' so' rihaan yuvi che'é nij rasuun nar'i' so' cuano dō', che'é rej quene'én so' manj dō', che'é nij rasuun nar'i' so' asa' curuvi' uún 'unj rihaan so' rej rihanj doj dō' a. <sup>17</sup> Dan me se tinanii 'unj mán so' rihaan nij síí man chiháan so' yuvi israelitá dō', rihaan nij síí yanj dō', ne yaj ca'nej 'unj mán so' rihaan nij so', <sup>18</sup> che'é rej naxra' rihaan nij so' ne xcaj nij so' cuentá qui'yáa so', gaa ne tanáj xcōo nij so' rej rmi' rej uun chij síí chree rihaan nij so', ne canicaj nij so' rihaan Diōse rej ranga' rej guun nucaj nij so' xcaj nij so' cuentá a. Gaa ne ca'vee quinavij nu' cacun' tumé nij so', ne ca'vee cavii sa' nij so' ga nij síí cunūu sa' nimán rihaan Diōse, sese cuchuman rá nij so' ni'yaj nij so' mán 'unj, qui'yáa so' á”, taj síí 'nij ra'a man ní' rihanj a.

<sup>19</sup>“Ne xcaj so' cuentá, sij nicaj suun rey Agripa. 'O se ne guun nichraj nimanj ma'. Tananj qui'yáa 'unj nu' ndaa vaa cataj Jesucristó rihanj gaa curuvi' so' rihanj rej xtā' a. <sup>20</sup> Asino yaan natá 'unj chuman' Damasco dō', chuman' Jerusalén dō', nu' estadó Judea dō', gaa ne natá 'unj ndaa rej man nij síí yanj uún a. Natá 'unj rihaan cunudanj nij yuvi se vaa canicaj nimán nij yuvi canocō' nij so' Diōse, ne ve'é qui'yaj nij so' ndaa vaa 'yaj síí canicaj ya nimán nanj adonj. <sup>21</sup> Che'é dan quita'aa nij yuvi israelitá mán 'unj rá nuvíi nocōo, ne guun rá nij so' ticavi' nij so' manj a.

<sup>22</sup>“Che'é dan nicun' 'unj rihaan nij soj cuano, ne ta'aj soj me síí yanj uun ne ta'aj soj me síí raa atā suun, tzaj ne Diōse me síí racuíj manj ndaa cuano nihánj, ne che'é dan natá 'unj se nana Diōse rihaan nij soj a. Tzaj ne ne ino vaa nana natá 'unj rihaan nij soj cuano ga se nana nij síí nata' se nana Diōse gaa naá dō', se nana ma'an síí cu'naj Moisés dō', gaa cataj xna'anj nij so' daj guun rej rihaan nij so' ma'. <sup>23</sup> Dan me se ma'an nij so' cataj se vaa síí ca'nej Diōse tinanii man yuvi rihaan sayuun me se quirān' so' sayuun, ne guun so' síí cunūu i'na' uún asino yaan rihaan yo'ó nij síí cavi', ne nata' so' nana ya rihaan nij yuvi israelitá dō', rihaan nij

yuvij yanij do' a —taj Pabló rihaan síí cu'naj Agripa yo' a.

<sup>24</sup> Dan me se gaa ca'mii so' dānj rihaan síí cu'naj Agripa, ne caguáj síí cu'naj Festo, cataj so':

—Snúú so', Pablo. Che'é se tucu'yón ndo'o so' yanj ro', che'é dan guun snuj raá so' nanj á —taj so' rihaan Pabló a.

<sup>25</sup> Gaa ne cataj Pabló rihaan síí cu'naj Festo yo' a:

—Ne snuj 'unj, man Festo sij uun chij. Tananj ya vaa nanā natá 'unj, ne nanā ve'é vaa nō xcúún ní' cunō ní' me nij nanā yo' a. <sup>26</sup> 'O se sij nicaj suun rey me síí nihánj, ne so' me síí ne'en dāj vaa nu' rasuun natá 'unj rihaan nij soj cuano á. Ne ne chu'ví' 'unj natā 'unj nu' nanā nihánj rihaan so' ma'. 'O se aj xcaj síí cu'naj Agripa nihánj cuentá che'é nu' rasuun nihánj, rá 'unj á. 'O se nuveé rasuun 'nij yuvē me rasuun nihánj a man adōnj —taj Pabló rihaan síí cu'naj Festo a.

<sup>27</sup> Ne cataj so' rihaan síí cu'naj Agripa a:

—Ne cataj so' 'o nanā rihanj, Agripa. Amán rá so' dāj taj se nanā nij síí nata' se nanā Diose gaa naá na'. Aj ne'én 'unj se vaa amán rá so' nanj adōnj —taj Pabló rihaan síí cu'naj Agripa yo' a.

<sup>28</sup> Gaa ne cataj Agripa rihaan so' a:

—Ca'mij so' doj rihanj, gaa ne cuaj guún 'unj síí nocō' man Jesucristó, rá so' na' —taj Agripa rihaan Pabló a.

<sup>29</sup> Gaa ne cataj Pabló rihaan so' a:

—Achín nī'yáá 'unj rihaan Diose se vaa, ca'vee se doj nanā ca'mij, ca'vee se nocōo ndo'o ca'mij, tzaj ne nuveé curuún so' cuchuman rá se nanaj ma'. Tananj me rá 'unj cuchuman rá cunudanj soj sij uno nanā a'mij cuano, ne ase vaa 'unj ro', dānj gaa soj uún nanj adōnj. Tzaj ne se cunumij soj gā aga' ne' nihánj, rá 'unj ma' —taj Pabló rihaan nij so' a.

<sup>30</sup> Gaa ne canicun' caya síí nicaj suun rey do', síí nicaj suun gobernador do', chanā cu'naj Berenice do', yo'ó nij síí yanj gā nij so' do', <sup>31</sup> ne curihanj nij so', ne cataj nij so' rihaan tuvi' nij so' se vaa taj vaj cacun' qui'yaj Pabló, ne ne nó xcúún so' caví' so' do', qui'nij so' taga' do' ma'.

<sup>32</sup> Gaa ne cataj síí cu'naj Agripa rihaan síí cu'naj Festo a:

—Sese ne cachinj ni'yaj síí nihánj se vaa ca'ne' César cacun' che'é so', ne ca'vee curihanj so' taga' asuun saj á —taj síí cu'naj Agripa rihaan síí cu'naj Festo a.

**Nanā nihánj taj xna'anj se vaa ca'née síí cu'naj Festo man Pabló ca'anj Pabló chuman' Romá a**

**27** Dan me se guun ya rá síí cu'naj Festo se vaa ca'anj núj ndaa yo'óo nocōo Italia rej ne síí nicaj suun emperador cu'naj César a. Gaa ne tacuachén so' man Pabló do', man yo'ó doj síí 'nij taga' do', rihaan 'o tanuu uun chij rihaan 'o cientó tanuu, ne Julio cu'naj tanuu yo', ne síí nuu rihaan ma'an síí nicaj suun emperador me so' a. <sup>2</sup> Dan me se cavii núj gā tinú' Aristarco síí cavii chuman' Tesalónica chuman' naj estadó Macedonia rque 'o rihoo chéé rihaan na a. Ne xā' rihoo yo', tzaj ne rihoo cavii chuman' Adramitio me yo',

ne ca'anj yo' ndaa nij chuman' naj tu'va na ya'anj estadó Asia a. <sup>3</sup> Ne yo'ó güii me se cuchí' núj chuman' cu'naj Sidón, ne ve'é inanj qui'yaj síí cu'naj Julio ga Pabló, ne ca'vej rá so' ca'anj Pabló rihaan nij tuvi' Pabló síí yanj chuman' Sidón yo', che'é rej taj ya'anj nij so' man Pabló a.

<sup>4</sup> Gaa ne cavii uún núj rque rihoo, ne ca'anj uún rihoo, ne cachén núj rej sur rej nichrun' yo'óo taj rihaan na ya'anj cu'naj Chipre a. 'O se go' ndo'o nanā rej rihaan rihoo yo' a. <sup>5</sup> Gaa ne cachén uún núj rihaan na ya'anj, ne cachén núj tu'va estadó Cilicia do', estadó Panfilia do', ne cuchí' núj ndaa chuman' Mira chuman' naj estadó Lisia a. <sup>6</sup> Ne chuman' yo' ro', nari' tanuu yo' 'o rihoo cavii chuman' Alejandría, ne rihoo ca'anj ndaa Italia me yo' a. Che'é dan cavii núj rque rihoo yo' qui'yaj tanuu yo' a. <sup>7</sup> Dan me se nanaj ndo'o cachéé rihoo yo' rque que'ee güii, ne che'é dan sayuun ndo'o vaa cuchí' núj rihaan chuman' Gnido a. Ne ne ca'vee ca'anj núj a doj, qui'yaj nanā ma'. Che'é dan cachén núj nichrun' yo'óo taj rihaan na ya'anj cu'naj Creta, ne nichrun' rej cu'naj Salmón rej naj yo'óo Creta cachén núj a. <sup>8</sup> Ne sayuun uxrā vaa cachén núj rej yo', ne cuchí' núj ndaa 'o rej cu'naj Buenos Puertos, ne nichrun' naj chuman' yo' gā chuman' cu'naj Lasea a.

<sup>9</sup> Dan me se aj cachén ndo'o güii, qui'yaj rihoo yo', ne aj cachén güii toco' nij yuvij israelitá x'naa man ma'an nij so' che'é se arāj guēe nij so' rihaan Diose, ne nichrun' quisij dió avii nanā yuvāa rihaan na ya'anj a. Che'é dan chuchu'vi' núj se vaa quirān' núj sij man rque rihoo yo' sayuun a. Che'é dan narqué Pabló chrej rihaan nij síí man rque rihoo yo', <sup>10</sup> ne cataj so' rihaan nij so' a:

—Ne'én 'unj se vaa xā' rihoo nihánj, tzaj ne sese yo'ó ca'anj rihoo nihánj, ne quirān' ndo'o nij rasuun man rque rihoo nihánj do', ma'an rihoo nihánj do', sayuun, ne quirí' ndo'o nij yo', qui'yaj nanā yuvāa, ne ndaa caví' ma'an ní' adōnj —taj Pabló rihaan nij so' a.

<sup>11</sup> Tzaj ne tanuu uun chij rihaan 'o cientó tanuu yo' ro', ne cuchuman rá so' se nanā Pabló ma'. Tananj cuchumán rá so' se nanā síí tuguáj rihoo do', síí si'yaj rihoo do' a. <sup>12</sup> Dan me se rej cu'naj Buenos Puertos yo' ro', nuveé rej sa' quinaj rihoo nu' dió avii nanā yuvāa me rej yo' a. Che'é dan nocōo doj ta'aj nij síí man rque rihoo cataj se vaa guun rá nij so' curihanj rihoo rej yo', ne guun rá nij so' se vaa cuchí' rihoo chuman' Fenice ne guun raan rihoo chuman' yo' nu' dió avii nanā yuvāa a. Ne chuman' Fenice ro', me chuman' naj yo'óo cu'naj Creta, ne caráán qui' rihaan nanā yuvāa rej chuman' Fenice, rá nij so' a.

**Nanā nihánj taj xna'anj che'é sayuun quiran' nij so' rihaan na ya'anj, qui'yaj nanā yuvāa a**

<sup>13</sup> Dan me se cavii 'o nanā catun' rej rque tu'va na ya'anj, ne guun rá nij so' se vaa guun nucuaj nij so' qui'yaj nij so' ndaa vaa guun rá nij so' a. Che'é dan guun che'e rihoo ca'anj rihoo, ne nichrun' yo'óo cu'naj Creta vaj nij so' qui'yaj nanā a. <sup>14</sup> Dan me se doj orá vaj rihoo, gaa ne taj ni'yón cavii 'o nanā yuvāa rej xraj ri-

haan na ya'anj, ne go' uxrá nana yuvaá rihaan rihoo, ne nana cu'naj Euroclidón me yo' xna'ánj griego a.  
 15 Ne ne guun nucuaj rihoo ca'anj rihoo rej rihaan rihoo ne qui'yaj canaán rihoo rihaan nana yuvaá ma'. Che'é dan ca'ne' rá núj, ne canicaj rihoo ne vaj rma'an rihoo, qui'yaj nana yo' a. 16 Ne cachén núj nichrun' yo'o yo'óo nii taj rihaan na ya'anj, ne yo'óo cu'naj Clauda me yo' a. Ne sayuun uxrá guun nucuaj núj naxcaj núj rihoo cunii noco' rej xcõ rihoo xij ne naqui'yaj raan núj man rihoo cunii yo' rque rihoo xij yo' a. 17 Ne gaa quisij naxcaj núj man rihoo cunii yo', ne numij nij so' ne' naqui'yaj raan nij so' man rihoo xij yo' a. Dan me se cuchu'vi' ndo'o nij so' se vaa canõ rihoo rihaan yo'óo chruu naj rque na ya'anj rej cu'naj Sirte ne quiri' nu' rihoo yo' a. Che'é dan nacué nij so' mantá o' nana ma'an go' nana ro', ca'anj rihoo uún adõnj.

18 Ne yo'óo güii me se che'é se go' uxrá nana rihaan núj, ne che'é dan quiri'fij nij so' nij rasuun man rque rihoo rque na ya'anj, 19 ne güii va'nuy me se ma'an nij so' ra'a nij so' ri'fij nij so' nij rasuun rásuun ma'an yuviü tuguáj rihoo rque na ya'anj, che'é rej cunuu yõ rihoo ne nij so' a. 20 Ne güii dõ', yati' dõ', ne curuvi' ni'yaj núj que'eë güii a ma'. Ne yo'o go' nana yuvaá rihaan núj, ne che'é dan guun ya rá núj se vaa daj chihaa míj se ca'vee quinanij núj rihaan sayuun yo' a ma'. 21 Dan me se a'óo nij sifij man rque rihoo ne cha nij so', ne che'é dan canicun' Pabló sca'núj nij so', ne cataj so':

—Ve'é doj sese cuno nij soj se nanaj, tinuj. 'Q se sese ne cavij ní' yo'óo cu'naj Creta, ne ne quiran' ní' sayuun nihánj, ne ne ca'anj ni'ya cunudanij nij rasuun asuun saj ma'. 22 Ne nihánj me se cunõ soj chrej nago' 'unij man soj, ne naqui'yaj niha' soj nimán soj á. 'Q se a'óo tuvi' nij soj se cavi' ma'. Maan orún' rihoo nihánj ca'anj ni'ya a. 23 'Q se 'unij me sifij noco' man Diose, ne 'yaj suun 'unij che'é so', ne nij cua'aa ro', canicun' yo'o se mozó Diose rihanj, 24 ne cataj so': "Se cuchu'vi' so', man Pablo. 'Q se nõ xcúún so' canicún' so' rihaan sifij cu'naj César, ne nihánj me se cataj xna'anj 'unij rihaan so' se vaa aj guun rá Diose se vaa caráán Diose rihaan sayuun che'é so' ga cunudanij nij sifij nuu rque rihoo nihánj adõnj", taj se mozó Diose rihanj a. 25 Che'é dan naqui'yaj niha' soj nimán soj, tinuj. 'Q se 'unij me sifij amán ya rá ni'yaj Diose se vaa qui'yaj Diose nu' ndaa vaa cataj xna'anj se mozó Diose rihanj adõnj. 26 Tzaj ne 'õ se cataj se mozó Diose rihanj se vaa ya quiri' rihoo nihánj tu'va 'õ yo'óo taj rihaan na ya'anj adõnj —taj Pabló rihaan yo'óo nij so' a.

27 Dan me se quisij xca'anj güii vaj núj rihaan na ya'anj cu'naj Adria, qui'yaj nana a. Ne rej yan' ro', guun rá nij sifij tuguáj rihoo se vaa daj doj cuchí' núj rihaan 'õ yo'óo a. 28 Che'é dan xcax ta'nga' nij so' me daj metrõ cunuu nuú na, ne xcax nij so' cuentá se vaa icõ xnu' yaan metrõ nuú na rej yo' a. Gaa ne na'vij nij so' 'õ orá nii, ne xcax ta'nga' uún nij so', ne xcax nij so' cuentá se vaa icõ chij guëë metrõ cunuu nuú na a. 29 Che'é dan cuchu'vi' nij so' se vaa canõ rihoo yo' rihaan yuvej naj rque na ya'anj ne cachran' rihoo a.

Che'é dan ca'anj nij so' rej xcõ rihoo, ne tananij nij so' ca'anj aga' ganchó rque na ya'anj, che'é rej nucu'lu' aga' yo' rque nij yuvej naj rque na ya'anj, ne canicun' rihoo yo' a. Ne guun ndo'o rá nij so' se vaa cuaj cuaj quisij güii ne guun nucuaj nij so' quene'en nij so' me rej vaj nij so' a. 30 Gaa ne nij sifij tuguáj rihoo ro', guun rá nij so' cunanj ma'an inanj nij so', ne quinanij nij so' rihaan sayuun quiran' tuvi' nij so' qui'yaj rihoo yo', rá nij so' a. Che'é dan tu'va rma'an nij so' cataj nij so' se vaa ca'anj nij so' tananij nij so' doj aga' ganchó rque na ya'anj rej tacúún rihoo, ne ca'anj tananij nij so' rihoo cunii yo' rihaan na ya'anj catuu nij so' a. 31 Tzaj ne ca'mii Pabló rihaan tanuu uun chij rihaan 'õ cientõ tanuu dõ', rihaan yo'óo nij tanuu dõ', cataj so':

—Sese se quináj nij sifij nihánj rque rihoo nihánj, ne se ca'vee quinanij ma'an soj rihaan sayuun a ma' —taj Pabló rihaan nij so' a.

32 Gaa ne ca'anj nij tanuu, ca'ne' nij tanuu ne' numij rihoo cunii yo', ne quini ma'an rihoo cunii yo' rihaan na ya'anj, ca'anj ni'ya ma'an yo' a.

33 Ne nichrun' rá ranga', ne nago' Pabló chrej man yo'óo nij so' se vaa cha nij so' doj se chá a. Ne cataj so': —Cuan' me sifij 'õ xnu' güii quinanó ndo'o rá nij soj, ne a'õ doj ne cha soj se chá ma'. 34 Che'é dan narque 'unij chrej man nij soj cuanõ se vaa cha soj á. Gaa ne guun nucuaj soj quinanij soj rihaan sayuun nanj á. 'Q se a'óo yuvé raá a'óo nij soj se ca'anj ni'ya a ma' —taj so' rihaan yo'óo nij so' a.

35 Sifij ca'mii so' danj, gaa ne nica' so' rachrúún, ne nago' so' gracia rihaan Diose che'é rachrúún ni'yaj cunudanij nij so', gaa ne cuxra' ta'aj so' rachrúún, ne guun che'e so' chá so' a. 36 Gaa ne guun niha' rá cunudanij nij so', ne ndaa ma'an nij so' chá uún a. 37 Ne cunudanij núj sij vaj rque rihoo yo' ro', me vij cientõ táa va'nuy chihaa xnu' yaan ya yuviü a. 38 Ne gaa quisij caraa rque nij so', ne quiri'fij nij so' nu' 'núú trigó rihaan na ya'anj, che'é rej gaa yõ doj rihoo a.

39 Dan me se quisij güii, ne quene'en núj yo'óo, tzaj ne ne cunuu yaan núj yo'óo yo' a ma'. Tzaj ne quene'en nij so' 'õ rej atúj yanij doj tzin' na ya'anj, ne naj yo'óo chruu tu'va na ya'anj rej yo' a. Ne guun rá nij so' ca'anj rihoo rej yo' sese ca'vee ca'anj rihoo a.

40 Che'é dan ca'ne' nij so' ne' noco' nij aga' ganchó, ne quináj nij aga' ganchó rque na ya'anj, qui'yaj nij so' a. Ne nache nij so' ne' numij chruun tuguáj rihoo, ne naxumaan mantá rej tacúún rihoo, qui'yaj nij so', ne guun rá nij so' go' nana rihaan mantá ne ca'anj rihoo rej naj yo'óo chruu yo', rá nij so' a. 41 Tzaj ne ca'anj rihoo canó rihoo xráá 'õ tacaan yo'óo chruu naj rque na, ne raan canó tacúún rihoo yo'óo chruu, ne ne ca'vee cyrihanj yo' a ma'. Ne nucuaj ndo'o go' na rej xcõ rihoo, ne daj doj quiri' rej xcõ rihoo, qui'yaj na yo' a.

42 Ne guun rá nij tanuu ticavi' nij so' man nij sifij 'nij taga' tumé nij so', che'é rej se ca'vee go' nij so' xtáj rihaan na ne cunanj nij so' rihaan nij tanuu a. 43 Tzaj ne tanuu uun chij rihaan 'õ cientõ tanuu ro', ne ca'vej rá so' cavi' Pabló ma'. Che'é dan caráán so' chrej se qui'yaj yo'óo nij tanuu danj ma'. Ne ca'ne' so' suun se

vaa nij síí ne'en go' xtáj rihaan na ro', güej asino nij so' rihaan na go' nij so' xtáj rihaan na ca'anj nij so' rihaan yo'óo a. <sup>44</sup> Ne yo'óo nij so' ro', cano nij so' rcuchra' do', chruun cavii rihoo yo' gaa cachran' rihoo do', ne ca'anj nij so' rihaan yo'óo yo', taj so' a. Ne danj qui'yaj nij so', ne cuchi' cunudanj nij so' rihaan yo'óo, ne quinanii cunudanj nij so' a.

#### Nana nihánj taj xna'anj daj qui'yaj Pabló yo'óo cu'naj Malta a

**28** Dan me se gaa cuchi' sa' nuj yo'óo taj rihaan na ya'anj yo', ne xcaj nuj cuentá se vaa yo'óo cu'naj Malta me yo' a. <sup>2</sup> Ne nij síí chihanj yo'óo yo' ro', ve'é uxrá qui'yaj nij so' ga nuj a. 'O se nicaj tuvi' ndo'o nij so' ga nuj, ne che'é se caman' maan ne acoj tihá', ne che'é dan naran' nij so' ya'an cunuu guun nuj a. <sup>3</sup> Gaa ne naran' Pabló 'o nánj rca', ne cuta' so' rihaan ya'an a. Ne che'é se ya'gan ndo'o ya'an, ne che'é dan curihanj 'o xcuáá yuvaa rque rca' yo', ne cano xo' ra'a Pabló a. <sup>4</sup> Ne gaa quene'en nij síí man rej yo' se vaa nocó' xcuáá ra'a Pabló, ne cataj nij so' rihaan tuvi' nij so' a:

—Ya ya sij ticavi' yuvii me síí nihánj nanj á. 'O se ndá' se quinanii so' rihaan na ya'anj, tzaj ne che'é se tumé so' cacun', ne che'é dan ne no xcuún so' gaa i'na' so' ma' —taj nij so' rihaan tuvi' nij so' a.

<sup>5</sup> Tzaj ne nacunan' Pabló ra'a so', ne quini xcuáá rihaan ya'an, ne ne qui'yaj chi'ii xcuáá a doj man Pabló a ma'. <sup>6</sup> Tzaj ne nij síí man yo'óo yo' ro', guun rá nij so' se vaa caraa cu'maan ra'a so', ase taj ni'yón cavi' so' ne naxru' so' rihaan yo'óo, tzaj ne gaa guun raan na'vii nij so' quiran' so' danj, ne gaa quene'en nij so' se vaa ne quiran' so' a doj se chi'ii, ne noná nij so' se nana nij so', ne cataj nij so' se vaa 'o ya'anj me Pabló a.

<sup>7</sup> Dan me se nichrun' rej yo' me se naj to'óo síí uun chij doj rihaan yo'óo taj rihaan na ya'anj yo', ne Publio cu'naj so' a. Ne nicaj tuvi' so' ga nuj, ne va'nuy güii ve'é taj ya'anj so' man nuj a. <sup>8</sup> Dan me se naca ndo'o rej Publio yo', ne naj so' rihaan yuvéé, ne ran' ndo'o so' chi'ii ton a. Gaa ne catúj Pabló rej naj so', ne cachíin ni'yaj Pabló rihaan Diosé che'é so', gaa ne cuta' Pabló ra'a Pabló xráá so', ne dan me se nahuun sa' so', qui'yaj Pabló a. <sup>9</sup> Gaa quisíj qui'yaj Pabló danj, ne yo'óo nij síí anó chi'ii yanj yo'óo yo' ro', ca'na' nij so' uún rihaan Pabló, ne nahuun sa' nij so', qui'yaj Pabló a.

<sup>10</sup> Gaa ne caráj cochroj uxrá nij so' rihaan nuj, ne gaa curihanj nuj yo'óo yo', ne rque nij so' rihaan nuj cunudanj nij rasuun cachiin man nuj a.

#### Nana nihánj taj xna'anj se vaa cuchi' Pabló chuman' Romá a

<sup>11</sup> Dan me se cachén va'nuy yavii, gaa ne cavii nuj rque yo'óo rihoo chéé rihaan na ca'anj nuj a. Ne xa' rihoo yo', tzaj ne rihoo quináj sa' tu'va yo'óo taj rihaan na ya'anj yo' nu' nij yavii avii nana yuvaa me yo', ne rihoo cavii chuman' Alejandría me yo', ne no se tinanga' roj ya'anj cuaté cu'naj Cástor ga Pólux rihaan rihoo yo'

a. <sup>12</sup> Dan me se cuchi' nuj chuman' cu'naj Siracusa, ne va'nuy güii caran' nuj chuman' yo' a. <sup>13</sup> Gaa ne cavii uún rihoo chuman' Siracusa, ne cachén rihoo nichrun' tu'va na ya'anj, ne cuchi' rihoo ndaa chuman' Regio a. Gaa ne cachén 'o güii, gaa ne cavii 'o nana rej rque rihaan na ya'anj, ne ca'anj rihoo, ne rque vij güii cuchi' nuj ndaa chuman' cu'naj Puteoli a. <sup>14</sup> Ne chuman' Puteoli ro', nari' nuj doj tinúú ní', ne cachíin ni'yaj nij so' rihaan nuj se vaa caran' nuj chij güii ga nij so' a. Ne gaa quisíj chij nij güii, ne nayón nuj chrej, ne ca'anj nuj chrej vaj ndaa chuman' Romá a. <sup>15</sup> Ne cuchi' nana che'é nuj rihaan nij tinúú ní' síí yanj chuman' Romá, ne ca'na' nij so' nari' tuvi' nij so' ga nuj chuman' cu'naj Foro de Apio do', chuman' cu'naj Tres Tabernas do' a. Ne gaa quene'en Pabló man nij so', ne nago' so' graciá rihaan Diosé, ne nari' nucaj nimán so' a.

<sup>16</sup> Ne gaa quisíj catúj nuj chuman' Romá, ne tacuachén tanuu uun chij rihaan 'o cientó tanuu man nij síí 'nij taga' rihaan yo'óo tanuu uun chij doj, ne ca'vej rá nij síí nicaj suun caran' Pabló rá 'o ve' ne cayáán grún' so' ga tanuu tumé man so' a.

#### Nana nihánj taj xna'anj daj ca'mii Pabló ga nij síí uun chij rihaan nij yuvii israelitá yanj chuman' Romá a

<sup>17</sup> Dan me se cachén va'nuy güii, gaa ne canacúun Pabló man nij síí uun chij rihaan nij yuvii israelitá yanj chuman' Romá se vaa cunuu chre' nij so' ga so' a. Ne gaa quisíj cunuu chre' nij so', ne cataj so' rihaan nij so' a:

—Xa' 'unj nihánj, tzaj ne taj vaj cacun' qui'yáá 'unj rihaan tuvi' ní' sij israelitá do', rihaan se tucuanj xij ní' do' man tinuj. Tzaj ne tuvi' ní' síí yanj chuman' Jerusalén ro', numij nij so' manj ne tacuachén nij so' manj rihaan nij síí romanó adonj. <sup>18</sup> Ne nij síí romanó ro', taj se vaa taj che'é cavi' 'unj rá nij so' gaa naquiyaj cyu nij so' che'ej ma'. Ne guun rá nij so' quirii nij so' taga' manj a. <sup>19</sup> Tzaj ne cuta' ndo'o nij síí israelitá yo' cacun' xráj, ne che'é dan nó xcúnj cachinj ni'yáj rihaan síí cu'naj César se vaa ca'ne' so' cacun' che'ej a. Tzaj ne taj a 'ó cacun' cutá' 'unj xráá soj sij man chiháán 'unj ma'. <sup>20</sup> Che'é dan canacúun 'unj man nij soj ca'na' soj, che'é se guun rá 'unj quene'én 'unj man soj do', ca'mii 'unj ga soj do' a. 'O se che'é síí ca'vee qui'yaj cavii sa' ní' sij israelitá me se numii 'unj 'yaj aga' ne' ni'hánj adonj —taj Pabló rihaan yo'óo nij síí israelitá yo' a.

<sup>21</sup> Gaa ne cataj nij so' rihaan Pabló a:

—Xa' nij tuvi' ní' síí yanj estadó Judea, tzaj ne taj yanj cartá ca'née nij so' rihaan nuj nayaá nuj ma'. Ne a 'ó tinúú ní' ne ca'na' rihaan nuj nata' nana chi'ii che'é so' rihaan nuj ma'. <sup>22</sup> Ne vaa che'é cataj ma'an so' rihaan nuj daj uun rá so', rá nuj a. 'O se tucuaán ino nocó' nij tuvi' nij soj me se ne'en nuj se vaa me rej ma'an a'mii chi'ii yuvii che'é tucuaán yo' nanj á —taj nij so' rihaan Pabló a.

<sup>23</sup> Dan me se cachrón nij so' güii ca'na' uún nij so' ve' yanj Pabló, ne güii yo' me se ca'na' que'ee tuvi' nij so' a. Gaa ne nata' Pabló rihaan nij so' che'é suun uun chij Diosé nimán yuvii do', rihaan chumii nihánj vaa güii



dɔ' a. Ne nayaa so' se tucuɔnj sí cu'naj Moisés dɔ', nanə cachrón nij sí nata' se nanə Diose rihaan yanj gaa naá dɔ', ne cataj xna'anj so' me che'é nɔ xcúun nij so' cuchumən rá nij so' cunɔ nij so' se nanə Jesucristó a. Dan me se asij na'yaan guun che'e so' ca'mii so' rihaan nij so', ne ndaa ca'anj güii navij ca'mii so' a. <sup>24</sup> Ne ta'aj nij so' ro', cuchumán rá se nanə so', ne yo'ó ta'aj nij so' ne cuchumən rá nanə yo' ma'. <sup>25</sup> Ne ne guun cuyaan rá cunudənj nij so' a ma'. Ne guun che'e nij so' ca'anj nij so' a. Tzaj ne gaa ataa ca'anj nij so', ne ca'mii Pabló ɔrún' nanə rihaan nij so', cataj so':

—Cunaj uxrá vaa nanə nihánj nanə rqué Nimán Diose rihaan xji ní' gaa ca'mii sí cu'naj Isaías sí nata' se nanə Diose gaa naá rihaan nij so' a. <sup>26</sup> Nanə ca'mii Isaías rihaan nij so' me nanə ca'mii ma'an Diose rihaan so' a: “Cuchi' so' rihaan nij so' ne cataj xna'anj so' rihaan nij so' se vaa catuu uxrá nanə xréé nij so', tzaj ne se xcaj nij so' cuentá ma'. Ne nı'yaj uxrá nij so', tzaj ne se quene'en nij so' ma'. <sup>27</sup> 'O se caráan ma'an nij yuviı nihánj rihaan nij so' che'é rej na'vej rá nij so' quene'en ma'an nij so', ne caráan nij so' xréé nij so', che'é rej na'vej rá nij so' cunɔ nij so' uún a. Ne ne atúj

nanə nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' ma'. 'O se na'vej rá nij so' nahuun sa' nimán nij so' qui'yáá 'unj a man adonj”, me se nanə Diose ca'mii sí cu'naj Isaías gaa naá a. <sup>28</sup> Che'é dan xcaj soj cuentá se vaa aj ca'anj nanə nihánj rihaan nij sí yanj, ne nij so' me sí cuchumən rá se vaa tınanii Diose man nij so' rihaan chrej chi'ıı uun chij nimán nij so' a. 'O se nij so' me sí cunɔ ya nanə nihánj nənj á —taj Pabló rihaan nij sí uun chij rihaan nij yuviı israelitá yanj chuman' Romá yo' a.

<sup>29</sup> Sij ca'mii so' dən, gaa ne cavii nij yuviı israelitá yo' ca'anj nij so', ne ca'mii canó tuvi' ma'an nij so' ga tuvi' nij so' a.

<sup>30</sup> Dan me se vij ya yo' cayáan Pabló chuman' Romá yo', ne ma'an so' go' tu'vee ve' ne so' a. Ne ve'é ca'mii so' ga cunudənj nij sí ca'na' nı'yaj man so' a. <sup>31</sup> Ne ca'mii natáj so' che'é suun uun chij Diose nimán yuviı dɔ', rihaan chumiı nihánj vaa güii dɔ', ne tucu'yón so' se nanə Jesucristó sij 'nij ra'a man ní', ne a doj ne cucu'vi' so', ne ne caráan nii chrej rihaan so' qui'yaj so' dən a ma'.

# Romanos

**1** 'Unj me síf cu'naj Pablo, ne 'yaj sunj rihaan Jesucristó a. Dan me se canacúún Jesucristó mán 'unj guún 'unj apóstol che'é rej nata' 'unj se-nana Diose nana sa' rihaan yuvij, <sup>2</sup> ne dan me se gaa naá cataj Diose rihaan nij síf nata' se-nana Diose gaa naá, ne vaa güii tñanii ya Diose man yuvij rihaan sayuun, ne cuno nij síf nata' se-nana Diose, ne cachrón nij so' nana ca'mii Diose rihaan yanj cu'naj danj Diose nanj adonj.

<sup>3</sup> Dan me se cataj xna'anj Diose che'é Jesucristó sij 'nij ra'a man ní', ne dan me se ta'níí Diose me Jesucristó, ne sij nocó' xna'anj tuvi' ga síf cu'naj David síf cane gaa naá me so', ne dan me se ase vaa nee man síf cu'naj David ro', danj vaa nee man so' uún, tzaj ne cavi' so', gaa ne cunuu i'na' uún so', ne che'é dan me ne'en ní' se vaa ya ta'nij Diose me so' ne síf sa' nimán me uún so' a.

<sup>5</sup> Inañj che'é Jesucristó me qui'yaj Diose se luj che'ej se vaa cune' Diose manj ca'anj 'unj rihaan nij yuvij yanij a. Dan me se ne ca'anj 'unj rihaan nij yuvij israelitá ma'. Tzaj ne ca'anj 'unj rihaan nij yuvij yanij, ne dan me se me rá Diose cataj xna'anj 'unj se-nana Diose rihaan nij yuvij yanij yo', che'é rej cuchuman rá nij so' nana sa' yo', gaa ne cuno nij so' rihaan Diose adonj. <sup>6</sup> Ne yuvij yanij me ta'aj nij soj uún, ne canacúún Jesucristó man ma'an soj sij yanij canocó' soj man so' adonj.

<sup>7</sup> Dan me se 'yáá 'unj yanj nihánj ca'nej 'unj rihaan nij soj sij yanj chuman' Romá sij 'ee ndo'o rá Diose man, ne dan me se canacúún Diose man soj guun soj síf gaa sa' nimán, ne me raj qui'yaj Rej ní' Diose qui'yaj Jesucristó sij 'nij ra'a man ní' qui'yaj se luj che'é soj, ne me raj gaa xej nimán soj, qui'yaj uún roj so' adonj.

**Nana nihánj taj xna'anj se vaa me ndo'o rá síf cu'naj Pablo cuchij' so' chuman' Romá a**

<sup>8</sup> Cuno yuvij man nu' cachra' rihaan chumij se vaa amán rá nij soj ni'yaj soj Diose, ne che'é dan me nagó' 'unj graciá rihaan Diose, ne racu'ij Jesucristó mán 'unj nago' 'unj graciá rihaan Diose che'é cunudanj soj ei. <sup>9</sup> Dan me se 'yaj suun 'unj rihaan Diose, ne nata' 'unj nana sa' se-nana ta'níí Diose síf cu'naj Jesucristó, ne che'é dan ne'en Diose se vaa ya ya niganj achíín ni'yáj rihaan Diose che'é soj ei. <sup>10</sup> Ne gaa achíín ni'yáj rihaan Diose, ne achíín ni'yáj che'é soj, ne dan me se achíín ni'yáj rihaan Diose se vaa ca'vej so' cuchij chiháán soj vaa güii, <sup>11</sup> ne me raj quene'enj man soj, ne me raj narquej chrej nucuj man soj, che'é rej quinari' nucuj nimán soj a. <sup>12</sup> Dan me se nucuj ndo'o rá cunudanj ní'

man tuvi' ní', ne che'é dan me asa' nari' tuvi' ní', ne narque ní' chrej nucuj man tuvi' ní' á. <sup>13</sup> Ne me raj quene'en soj se vaa guun que'ee güii cachronj cuchij chiháán soj, tinuj, nocoj. Tzaj ne ne ca'vee cuchij, che'é se vaa ndo'o suun rihanj, tzaj ne ase vaa nata' 'unj rihaan yo'ó nij yuvij yanij ro', danj gaa guue nata' 'unj rihaan soj a. Ndáa síj, gaa ne cunuu rij doj tuvi' ní', qui'yaj ní' adonj. <sup>14</sup> Dan me se che'é se no xcúún 'unj nata' 'unj rihaan cunudanj nij yuvij yanij ro', che'é dan nata' 'unj rihaan soj, ne dan me se rihaan nij síf man chuman' nocó do', rihaan nij síf yanj quij do', rihaan nij síf avii raq do', rihaan nij síf ne nicaj cuentá do', rihaan cunudanj nij so' nata' 'unj a. <sup>15</sup> Che'é dan niha' ndo'o raj cuchij chuman' Romá ca'mij natáj 'unj se-nana Diose nana sa' rihaan soj uún adonj.

**Nana nihánj taj xna'anj se vaa vaa ndo'o yu'vee nó se-nana Diose nana sa' a**

<sup>16</sup> Taj a doj chrej na'aj nó rihanj ca'mij se-nana Diose nana sa' ma'. 'O se nana nucuj uxrá me se-nana Diose, ne dan me se ca'mii Diose se-nana Diose cuno yuvij, ne cuchuman rá nij yuvij cuno nij yuvij nana, ne tñanii Diose man nij yuvij rihaan sayuun, ne dan me se asino yaan me rá Diose tñanii Diose man nij yuvij israelitá rihaan sayuun, ne me rá uún Diose tñanii Diose man nij yuvij yanij rihaan sayuun uún adonj.

<sup>17</sup> Dan me se cataj se-nana Diose rihaan ní' se vaa ca'vee cunuu sa' nimán ní' rihaan Diose, qui'yaj Diose, gaa ne amán rá ní' ni'yaj ní' Diose, ne che'é dan cunuu sa' nimán ní' rihaan Diose a. Ndáa síj, gaa ne cuchuman doj rá ní' ni'yaj ní' man Diose a. Veé 'o cuyaan vaa nana nihánj ga nana no rihaan danj Diose, taj yo' se vaa: "Maan che'é se amán rá ní' ni'yaj ní' man Diose, che'é dan cunuu sa' nimán ní', ne gaa i'na' ní' rihaan Diose nu' cavii nu' ca'anj adonj", taj danj Diose a.

**Nana nihánj taj xna'anj che'é cacun' qui'yaj yuvij a**

<sup>18</sup> Aj cataj xna'anj Diose síf nicun' xtá' rihaan ní' se vaa a'maan rá Diose ni'yaj Diose cunudanj se chi'ij 'yaj nij yuvij, ne me rá Diose xcaj nij yuvij cuentá se vaa síf uun chij sa' me so', ne che'é dan qui'yaj Diose daj a rasuun man rihaan chumij nihánj ni'yaj yuvij a. Aj ne'en yuvij rasuun, ne xcaj nij yuvij cuentá se vaa síf uun chij sa' ndo'o me Diose, tzaj ne inañj cacun' 'yaj nij yuvij, ne che'é dan taj se 'yá' cuno nij yuvij nana ya a ma'. Che'é dan me a'maan rá Diose ni'yaj Diose man nij yuvij a. <sup>20</sup> Dan me se gaa qui'yaj Diose chumij, ne curuvi' nu' rasuun qui'yaj Diose ni'yaj yuvij, ne nuvi' ma'an

Diose ni'yaj yuvii, tzaj ne ne'en yuvii nij rasuun qui'yaj Diose, ne xcaj nij yuvii cuentá se vaa síi uun chij ndo'o me Diose, ne dan me se xcaj nij yuvii cuentá se vaa ya orún' so' me Diose, ne xcaj nij yuvii cuentá se vaa gaa nucuaj ndo'o Diose nu' cavii nu' ca'anj, rá Diose a. Che'é dan sese cataj nij yuvii se vaa ne ne'en nij yuvii daj vaa Diose, ne síi ne me nij yuvii nanj adonj. 'O se aj quene'en nij yuvii nu' rasuun qui'yaj Diose adonj.

<sup>21</sup> Dan me se aj quene'en nij yuvii daj vaa Diose, tzaj ne ne cataj nij yuvii se vaa sa' vaa Diose ma'. Ne nago' nij yuvii graciá rihaan Diose ma'. Me rá nij yuvii cavii raá ma'an nij so' daj vaa Diose, tzaj ne se guun nucuaj nij so' qui'yaj nij so' danj ma'. Che'é dan inanj raá ma'an nij so' vaj nij so', ne ne ca'vee xcaj nij so' cuentá a ma'. <sup>22</sup> Síi cyu raá me nij so', taj ma'an nij so', tzaj ne ca'mii ne nij so', ne tananj nahuun nij so' síi ni'yon doj a. <sup>23</sup> Diose me síi ve'é ndo'o vaa, ne daj chihaa míj ne avi' so', ne che'é dan no xcúun yuvii canoco' yuvii man so' adonj. Tzaj ne na'vej rá nij yuvii canoco' nij yuvii Diose ya ma'. Maan se yuvii do', xtâj do', xcuu do', xcuáá do', tinanga' nij yuvii, ne yo'ó rasuun 'anj ni'ya uun rihaan yo'ó nihánj tinanga' nij so', ne taj nij so' se vaa ya'anj me tinanga' nij so', taj nij so' nanj adonj.

<sup>24</sup> Che'é dan ca'ne' rá Diose ga' nij so' qui'yaj nij so' me se nij me rá ma'an nij so' qui'yaj nij so', ne inanj se nij ndo'o qui'yaj nij so' nanj adonj. Dan me se qui'yaj ndo'o nij so' cacun' man ma'an nij so', ne inanj se nij qui'yaj nij so' ga' tuvi' nij so', <sup>25</sup> ne se-nana Diose nana ya ne ca'vej nij so' cunõ nij so' a ma'. Maan se nana ne cuno nij so' nanj adonj. Ne na'vij nij so' rihaan nij rasuun qui'yaj Diose, tzaj ne rihaan ma'an Diose ne na'vij nij so' ma'. Ne Diose me síi guun chij uxrá rihaan cunudanj rasuun nu' cavii nu' ca'anj adonj. Veé danj gaa ya ei.

<sup>26</sup> Che'é dan ca'ne' rá Diose ga' nij yuvii qui'yaj ma'an nij yuvii se nij, ne nij chana me se ne ca'vej rá nij chana cotoj nij no' ga' nica' nij no' a ma'. 'O se naqui'yaj nij ta'aj nij chana chii man nij chana, ne otoj nij no' ga' tuvi' chana ma'an nij no' nanj adonj. <sup>27</sup> Ne adi' se 'yaj nij chana ga' tuvi' chana nij no' ro', danj qui'yaj guee' nij snó'o uún ga' tuvi' snõ'o so' uún nanj adonj. Dan me se síj cotoj nij snó'o ga' nica' nij so', ne guun rá nij so' cotoj nij so' ga' tuvi' snõ'o nij so', ne nij ndo'o qui'yaj nij snó'o, ne quiran' nij so' sayuun che'é se nij qui'yaj nij so' adonj.

<sup>28</sup> Ne ca'vej rá nij yuvii quene'en nij yuvii daj vaa Diose a ma'. Che'é dan ca'ne' rá Diose ga' nij yuvii, ne navij raá nij yuvii snúu nanj á. Ndaa síj, gaa ne inanj se nij 'yaj nij yuvii, ne dan me se 'yaj nij so' inanj se na'vej rá Diose qui'yaj nij so' nanj adonj. <sup>29</sup> Quij vaa nimán nij yuvii a. Inanj me rá nij yuvii guun nij yuvii síi ru'vee' doj, ne uun xcõj ruvaa rá nij yuvii ni'yaj nij so' tuvi' nij so' a. Ticavi' nij yuvii tuvi' nij yuvii, gaa ne anicaj nij yuvii unu' nij so' a. Nano' ndo'o nij yuvii daj qui'yaj nij yuvii, qui'yaj chi'ii nij yuvii man tuvi' nij yuvii a. Nanó nij so' cuentó ne che'é tuvi' nij so', <sup>30</sup> ne nij a'mii nij so' che'é tuvi' nij so' a. Na'vej uxrá rá nij so' ne'en nij so' Diose a ma'. Inanj nana xcõj ruvaa a'mii nij so' ga' tuvi' nij so'

a. Síi sa' uxrá me nij so', rá nij so', ne che'é dan guun chij nij so', rá nij so' a. Niganj yaj a'yuj nuchruj raá nij so' daj gaa qui'yaj nij so', qui'yaj chi'ii nij so' man tuvi' nij so' a. Ne uno nij so' a'mii rej nij so' a'mii nii nij so' a'mii a ma'. <sup>31</sup> Síi ni'yon me nij so', ne a' ó tuvi' nij so' ne nucuaj rá ni'yaj man nij so' a ma'. Ne 'ee' rá nij so' tuvi' nij so' ma'. <sup>32</sup> Ne'en nij so' se vaa quiran' nij so' sayuun, qui'yaj Diose, tzaj ne ne acáj nij so' cuentá ni'yaj nij so' nana a'mii Diose a ma'. Maan se inanj cacun' 'yaj nij so', ne ndaa niha' rá nij so' ni'yaj nij so' man yo'ó yuvii 'yaj cacun' adonj.

### Nana nihánj taj xna'anj daj qui'yaj Diose asa' ca'ne' Diose cacun' che'é 'o 'o yuvii a

**2** Me che'é taj so' se vaa orún' tuvi' so' tumé cacun' ga. 'O se 'o cuyaan vaa cacun' 'yaj ma'an so' ga' cacun' 'yaj tuvi' so', ne sese cutá' so' cacun' xráá tuvi' so', ne cutá' uún nii cacun' xráá ma'an so' adonj. <sup>2</sup> Ya uxrá Diose me síi ca'ne' cacun' che'é cunudanj síi 'yaj danj adonj. Dan me se inanj nana ya ca'mii Diose güii ca'ne' so' cacun' che'é yuvii, ne nu' síi chi'ii ro', quiran' ndo'o nij so' sayuun, qui'yaj Diose ei. <sup>3</sup> Dan me se utá' so' cacun' xráá tuvi' so', ne 'o cuyaan vaa cacun' 'yaj ma'an so' uún a. Asa' ca'vee quinanii so' rihaan sayuun asa' ca'ne' Diose cacun' che'é cunudanj yuvii, rá so' ga. <sup>4</sup> Me che'é ne guun ya rá so' se vaa me rá Diose qui'yaj sa' Diose che'é so' ga. Ne me rá uún Diose caraa x'naa Diose che'é so' adonj. Na'vej rá Diose qui'yaj Diose sayuun man so' ma'. Ne ne'en so' ase Diose me síi 'ee' rá ni'yaj man so' a. Ne me rá Diose canicaj nimán so' canocó' so' man so' adonj.

<sup>5</sup> Tzaj ne veé dan me se na'vej uxrá rá so' tanáj so' chrej noco' so', ne na'vej rá so' canicaj nimán so' canocó' so' man Diose ma'. Ne vaa güii ca'ne' Diose cacun' che'é yuvii, ne ca'mii ya Diose, ne caxrii yuvaa Diose man cunudanj nij síi tumé cacun', ne dan me se caxrii yuvaa Diose man ma'an so' uún adonj. Ma'an so' qui'yaj caxrii yuvaa Diose man so' nanj á. <sup>6</sup> Dan me se ca'ne' Diose cacun' che'é 'o 'o yuvii, ne sese sa' qui'yaj yo'ó so', ne sa' qui'yaj Diose ga' so', ne sese yo'ó so' qui'yaj cacun', ne ca'anj so' rihaan ya'an, qui'yaj Diose a. Danj gaa qui'yaj Diose adonj.

<sup>7</sup> Dan me se ta'aj yuvii racuij man tuvi' nij so', ne inanj 'yaj nij so' se sa' che'é tuvi' nij so', che'é rej cataj Diose se vaa sa' qui'yaj nij so' a. Me rá nij so' cayáan nij so' ga' Diose nu' cavii nu' ca'anj, ne ya uxrá danj gaa qui'yaj Diose á. Cayáan nij so' ga' Diose nu' cavii nu' ca'anj, qui'yaj Diose adonj. <sup>8</sup> Xcõj ruvaa ndo'o rá yo'ó ta'aj yuvii, ne ne uno nij so' nana ya ma'. Maan se tu-cuáan chi'ii inanj noco' nij so', ne che'é dan caxrii yuvaa Diose man nij so' a. <sup>9</sup> Qui'yaj Diose sayuun man cunudanj nij síi qui'yaj se nij, ne quiran' ndo'o nij so' sayuun, qui'yaj Diose, ne asino ca'ne' Diose cacun' che'é nij síi israelitá, gaa ne guun che'é so' ca'ne' so' cacun' che'é nij yuvii yaníj a.

<sup>10</sup> Tzaj ne sa' uxrá qui'yaj Diose ga' nij yuvii qui'yaj se sa', ne Diose me síi cataj se vaa sa' qui'yaj nij so', ne gaa xej nimán nij so', ne se cuchu'vi' nij so', qui'yaj

Diose ma'. Danj qui'yaj uún Diosē che'é nij yuvij israelitá qui'yaj se sa', gaa ne danj qui'yaj uún so' che'é nij yuvij yanij a. <sup>11</sup> Veé 'o cuyaān vaa cunudanj ní' rihaan Diosē, ne 'o cuyaān qui'yaj Diosē che'é 'o 'o ní', ne dan me se ase vaa qui'yaj ní' gaa cayáan ní' rihaan chumij nihánj ro', danj gaa guēē qui'yaj Diosē ga ní' adonj.

<sup>12</sup> Yuvij noco' se-tucuanj Moisés me nij yuvij israelitá, ne che'é dan, sese ne 'yaj nij yuvij israelitá nu' se-tucuanj Moisés, ne qui'yaj Diosē sayuun man nij so' a. Ne noco' nij yuvij yanij se-tucuanj Moisés, tzaj ne ne'en ma'an nij so' daj me rá Diosē qui'yaj nij so', ne che'é dan quirān' nij so' sayuun sese se ca'vej rá nij so' qui'yaj nij so' ndaa vaa taj Diosē adonj. <sup>13</sup> Ca'vee se ne'en uxrá ní' daj vaa se-tucuanj Moisés, tzaj ne sese se qui'yaj ní' ndaa vaa taj tucuaán yo', ne se cunuū sa' nimán ní' rihaan Diosē ma'. Tzaj ne sese qui'yaj ní' ndaa vaa taj tucuaán yo', ne ya cunuū sa' nimán ní' rihaan Diosē adonj. <sup>14</sup> Ndā' se ne ne'en nij yuvij yanij se-tucuanj Moisés, tzaj ne avii inanj raā ma'an nij so' qui'yaj ma'an nij so' ndaa vaa me rá Diosē qui'yaj yuvij adonj. Ne'en ní' se vaa 'yaj ma'an nij so' se vaa me rá Diosē qui'yaj nij so', ne xcaj ní' cuentá se vaa nicaj nij so' tucuaán me rá Diosē canoco' yuvij, <sup>15</sup> ne che'é se vaa 'yaj nij so' ro', che'é dan ne'en ní' se vaa ne'en ma'an nij so' daj me rá Diosē qui'yaj yuvij, ne dan me se sese 'yaj nij so' se nij, ne ne'en ma'an nij so' se vaa na'vej Diosē qui'yaj nij so' danj a. Ne nuchruj raā nij tuví' nij so' me tucuaán sa' qui'yaj nij so', ne che'é dan ne'en ní' se vaa ya ne'en nij so' daj me rá Diosē qui'yaj nij so' adonj. <sup>16</sup> Ne danj gaa ca'ne' Diosē cacun' che'é nij so' güii ca'ne' Diosē cacun' che'é nimán yuvij á. Danj a'mii se-nanā Jesucristó nana sa' a'mij rihaan yuvij ei.

### Nanā nihánj taj xna'anj se vaa ne noco' sa' nij yuvij israelitá se-tucuanj Moisés ma'

<sup>17</sup> Tzaj ne ya yuvij israelitá mé so', rá so' á. Nucuj rá so' se vaa cavij sa' so', qui'yaj se-tucuanj Moisés, ne ne'en so' Diosē, rá so' á. <sup>18</sup> Ne'en so' daj me rá Diosē qui'yáá so', ne tucuyón so' se-tucuanj Moisés, ne inanj sa' 'yáá so', rá ma'an so' á. <sup>19</sup> Ne'en ma'an so' tijaān so' chrej man nij yuvij aráan rihaan, rá so' á. <sup>20</sup> Ne'en so' tucuyón so' man nij yuvij ni'yón do', man nij xnii do', rá so' á. Che'é se tucuyón so' se-tucuanj Moisés, ne che'é dan ne'en so' nu' nana ya, rá so' á. <sup>21</sup> Sese ne'en so' tucuyón so' man yo'ó yuvij ro', me che'é na'vej rá so' tucuyón so' man ma'an so' ga. A'mii natáj so' rihaan yuvij se vaa se qui'yaj ituu yuvij ma'. Tzaj ne ma'an so' me síi ituu, ne me che'é 'yaj ituu so' ga. <sup>22</sup> Se cotoj yuvij ga nicā tuví' yuvij, taj so', tzaj ne me che'é otoj so' ga nicā tuví' so' ga. Nij ndo'o vaa ya'anj acój yuvij, rá so', tzaj ne me che'é 'yaj ituu so' sa'anj nuū tacóo nij ya'anj yo' ga. <sup>23</sup> Sa' uxrá 'yáá so' unó so' nu' se-tucuanj Moisés, taj so', tzaj ne veé dan me se 'yaj ndo'o so' cacun' na'vej rá Diosē qui'yáá so', ne che'é dan a'nga' nacoō yuvij ni'yaj nij yuvij Diosē, 'yáá so' adonj. <sup>24</sup> 'O se aj qui'yaj soj ndaa vaa taj nana

no rihaan danj Diosē adonj. Nanj taj danj Diosē, ne: "Ma'an soj sij israelitá 'yaj a'mii yuvij yanij nana nij che'é Diosē á". Nihánj me nana ca'mii Diosē che'é ma'an soj adonj.

### Nanā nihánj taj xna'anj se vaa me rá Diosē canoco' nimán yuvij man Diosē a

<sup>25</sup> Cuta' nii ta'nga' man neē mán so' asanj. Cunaj vaa yo', sese ya unó so' nana ca'mii Diosē, tzaj ne sese ne unó so' se-nanā Diosē, ne taj se gún' man ta'nga' yo' ma'. <sup>26</sup> Ne xa' síi yanij, tzaj ne sese 'yaj so' se vaa me rá Diosē qui'yaj yuvij, ne ase vaa síi taj ta'nga' man ro', danj vaa guēē so' rihaan Diosē adonj. <sup>27</sup> Dan me se ne'en so' sij israelitá nu' se-tucuanj Moisés, ne cuta' nii ta'nga' mán so', tzaj ne sese se cunó so' rihaan Diosē, ne cutā' nii cacun' xráá so', cataj nii se vaa sa' doj 'yaj síi yanij ase 'yáá so' á. Ndā' se taj ta'nga' táá man síi yanij, tzaj ne 'yaj so' ndaa vaa me rá Diosē qui'yaj so' a, cataj nii a.

<sup>28</sup> Tzaj ne ca'vee se qui'yaj yo' o so' nu' se-tucuanj nij yuvij israelitá, tzaj ne nuveé sij israelitá ve'é noco' man Diosē me so', qui'yaj tucuaán yo', ni'yaj Diosē ma'. Ca'vee se cuta' nii ta'nga' neē man yo' o so', tzaj ne se ca'vee guun so' síi sa' uno rihaan Diosē, qui'yaj ta'nga' yo' ma'. <sup>29</sup> Ca'vee se nu' nana no rihaan yanj noco' yo' o so', tzaj ne nuveé sij israelitá ve'é noco' man Diosē me so', qui'yaj yanj yo', ni'yaj Diosē ma'. Tzaj ne me ma'an síi noco' ya man Diosē ne nahuun sa' nimán, ne ase vaa yo' o yuvij israelitá ro', danj gaa so' rihaan Diosē, ne ca'vee se ca'mii yuvij nana chi'ii che'é so', tzaj ne ne rihuun rá so' ma'. 'O se ma'an Diosē cataj se vaa sa' uxrá qui'yaj so' adonj.

### Nanā nihánj taj xna'anj se vaa sa' uxrá qui'yaj Diosē che'é nij yuvij israelitá a

**3** A me se ca'vee doj qui'yaj canaán ní' sij israelitá, rá so' ga. Ne a me rasuun quirí' ní' qui'yaj yan ata' ní' ta'nga' ga. <sup>2</sup> 'O se vaa se uun ya ní' sij israelitá ei. Dan me se asino cataj xna'anj Diosē nu' se-nanā Diosē rihaan xii ní' gaa naá, ne nucuj rá Diosē man ní' se vaa cütumé sa' ní' se-nanā so', ne se quini'yón ní' man yo', rá Diosē a. <sup>3</sup> Ta'aj tuví' ní' ne cuchuman rá ni'yaj se-nanā Diosē ma'. Tzaj ne taj se 'yaj ma'. A 'ó güii se quini'yón Diosē nana ca'mii so' rihaan ní' sij israelitá ma'. Nucuj rá ní' man so' se vaa qui'yaj so' cunudanj se vaa cata' tu'va so', ne dan me se ca'vee se nana ne a'mii nu' yuvij, tzaj ne ya vaa cunudanj nana ca'mii Diosē adonj. Danj Diosē taj se vaa sese cunō yuvij nana a'mii Diosē, ne xcaj yuvij cuentá se vaa ya a'mii so', ne sese nana' nij yuvij cacun' xráá Diosē, ne a 'ó cacun' se nari' yuvij xráá Diosē ma'. Danj a'mii danj Diosē che'é ma'an Diosē nanj adonj.

### Nanā nihánj taj xna'anj se vaa sa' uxrá 'yaj Diosē axríj yuvaā Diosē man yuvij tumé cacun' a

<sup>5</sup> Vaa ta'aj nij yuvij cataj: "Me che'é yuvaā Diosē man ní' gaa 'yaj ní' cacun' ga. Nese tananj sa' 'yaj ní', gaa

ne ca'vee xcaj nii cuentá, gaa ne quene'en nii se vaa ní' ro', me síi chi'ii ne orún' raa Dioso ro', me síi sa', cataj nii a". Daj cataj ta'aj nij yuvii, <sup>6</sup> tzaj ne ne chihaj uxrá tu'va nij so' daj a ma'. 'O se sa' uxrá vaa 'yaj Dioso axrij yuvaa Dioso man yuvii tumé cacun', ne dan me se no xcúun Dioso ca'ne' Dioso cacun' che'é cunudanj yuvii, ne che'é dan no xcúun so' qui'yaj so' sayuun man yuvii qui'yaj cacun' adonj. <sup>7</sup> Ne vaa ta'aj nij yuvii cataj uún a: "Sese a'mii ne 'unj, ne sa' 'yáj, gaa ne doj xcaj nii cuentá se vaa Dioso me síi a'mii nana ya a. Sa' uxrá vaa Dioso, cataj nii a. Yuvii ro', me síi a'mii ne, ne orún' Dioso me síi a'mii nana ya, cataj nii a. Che'é dan me taj che'é cuta' Dioso cacun' xraj ma'". Daj a'mii uún ta'aj nij yuvii, <sup>8</sup> ne taj uún nij so', ne: "Sa' doj qui'yaj ndo'o ní' cacun', gaa ne cavi' sa' Dioso doj, qui'yaj ní' á", taj uún nij yuvii a. Ne a'mii nij so' nana nij che'é núj, ne taj nij so' se vaa 'o cuyaan vaa nana a'mii núj ga nana a'mii nij so', taj nij so', a'mii ne nij so' a. Ve'é uxrá qui'yaj Dioso, sese qui'yaj Dioso sayuun man nij síi ne yo' nanj adonj.

### Nana nihánj taj xna'anj se vaa cunudanj yuvii tumé cacun' a

<sup>9</sup> Me nana ca'mii ní' che'é ní' sij israelitá ga. Sa' doj vaa ní' rihaan nij yuvii yanij na'. Taj ma'. Maañ se aj cataj 'unj se vaa 'o cuyaan vaa se quij qui'yaj ní' sij israelitá ga se quij qui'yaj nij yuvii yanij, ne cunudanj ní' tumé cacun' a. <sup>10</sup> Ase vaa nana taj 'unj ro', daj vaa nana no rihaan daj Dioso a. Taj yo': "Taj yan vaj a yo'ó yuvii sa' ma'. <sup>11</sup> A 'ó yuvii ne ne'en daj vaa Dioso ma'. A 'ó yuvii ne tucu'yón daj vaa Dioso ma'. <sup>12</sup> Tanáj cunudanj yuvii se-tucuanj Dioso, ne taj se gún' man nij yuvii a ma'. A 'ó yuvii ne 'yaj se sa' ma'. <sup>13</sup> Ase vaa ri'yuj nee man xngá naj rihaan santó ro', daj vaa ri'yuj nana a'mii nij síi tumé cacun' yo' adonj. 'O se nana tiha' yu'unj a'mii nij so', ne dan me se ase vaa na xnaj man tu'va xcuáa ro', daj vaa nana tu'va nij so', ne 'yaj chi'ii nij so' man nimán yuvii adonj. <sup>14</sup> Dan me se inanj a'mii chree nij so' che'é tuvi' nij so' a. <sup>15</sup> Chée ndaa unánj nij so' ga tacóo nij so', che'é rej ticavi' nij so' tuvi' nij so' a. <sup>16</sup> Doj a rá' vaj nij so' 'yaj nij so' sayuun a. <sup>17</sup> Doj a rá' vaj nij so', ne unu' nij so' ga tuvi' nij so' a. Ne a 'ó tucuáan sa' ne ne'en nij so' nica'j nij so' ma'. <sup>18</sup> Ne chu'vi' nij so' qui'yaj Dioso sayuun man nij so' ma'". Daj vaa taj daj Dioso che'é cunudanj yuvii nanj adonj.

<sup>19</sup> Dan me se yuvii noco' se-tucuanj Moisés me ní' sij israelitá, ne dan me se ne'en ní' se vaa nu' nana yo' nana no rihaan daj Dioso ro', taj xna'anj rihaan ní' daj vaa ma'an ní' a. Ndaa síj, gaa ne guun na'aj ní' ga yo'ó nij yuvii man rihaan chumii nihánj, ne quene'en cunudanj ní' se vaa vaa che'é qui'yaj Dioso sayuun man ní' nanj adonj. <sup>20</sup> 'O se taj a yo'ó yuvii ne quisij qui'yaj nu' ndaa vaa taj se-tucuanj Moisés, ne che'é dan taj se 'yá' cunuu sa' a doj yuvii rihaan Dioso qui'yaj tucuáan yo' a ma'. Maañ se nari' yuvii se-tucuanj Moisés, ne xcaj yuvii cuentá se vaa ya ya sij tumé cacun' me ma'an nij yuvii rihaan Dioso ei.

### Nana nihánj taj xna'anj se vaa cunudanj yuvii cuchumán rá ni'yaj man Jesucristó ro', cunuu sa' nij so' rihaan Dioso a

<sup>21</sup> Ne yaj me se tihaan Dioso rihaan yuvii daj qui'yaj so' ne tinavij so' cacun' che'é yuvii a. Dan me se se cunuu sa' yuvii qui'yaj inanj nana ca'mii Dioso rihaan síi cu'naj Moisés ma'. 'O se cataj daj Dioso cataj nij síi nata' se-nana Dioso gaa naá cataj se vaa <sup>22</sup> cuchuman rá yuvii ni'yaj yuvii Jesucristó, gaa ne tinavij Dioso cacun' che'é nij yuvii, ne cunuu sa' nij yuvii rihaan Dioso a. Taj a 'ó yuvii ino vaa rihaan Dioso ma'. <sup>23</sup> 'O se cunudanj yuvii tumé cacun' nanj adonj. Ne quisij uxrá nij yuvii cunuu sa' inanj nij yuvii ndaa vaa Dioso a ma'. <sup>24</sup> 'O se maañ che'é rej cunuu 'ee rá Dioso man cunudanj yuvii ne qui'yaj ma'an Dioso se luj che'é nij yuvii me ca'vee tinavij Dioso cacun' che'é nij yuvii adonj. Dan me se ca'née Dioso man Jesucristó rihaan chumii, che'é rej ca'nee so' cacun' xraá nij síi amán rá ni'yaj man so', <sup>25</sup> ne dan me se ca'née Dioso man Jesucristó nayon Jesucristó rihaan yuvii tumé cacun', ne cuchuman rá nij síi tumé cacun' se vaa cavi' Jesucristó che'é nij so', ne quinanii nij so' rihaan sayuun nanj adonj. Dan me se ne'en ní' se vaa tinavij Dioso cacun' che'é yuvii, ne xcaj ní' cuentá se vaa vaa nica' rá Dioso gaa tinavij Dioso cacun' che'é nij yuvii cane gaa naá a. Yuvii cane gaa naá ro', ne quiran' nij so' sayuun che'é cacun' tumé nij so' ma'. <sup>26</sup> Maañ se caráj x'naa Dioso, ne na'vij Dioso ndaa se cavi' Jesucristó, gaa ne quinavij cacun' che'é nij síi cane gaa naá síi amán rá ni'yaj man Dioso a. Ne xcaj uún ní' cuentá se vaa vaa nica' rá Dioso gaa a'ne' so' cacun' che'é yuvii yanj rihaan chumii cuano a. Dan me se nica' vaa rá Dioso, ne uun nucuaj Dioso tinavij so' cacun' tumé cunudanj ní' sij amán rá ni'yaj man Jesucristó, gaa ne guun ní' síi sa' rihaan Dioso adonj.

<sup>27</sup> Se-tucuanj Moisés me se taj se 'yaj tucuáan yo' che'é cacun' tumé yuvii ma'. Dan me se nuveé che'e suun sa' qui'yaj suun ní' me navij cacun' xraá ní' ma'. Maañ se che'é se amán rá ní' ne'en ní' Jesucristó, che'é dan navij cacun' tumé ní' adonj. Che'é dan se guun cataj ní' maañ che'é se cuno ní' nu' nana cataj xna'anj Dioso rihaan Moisés, che'é dan guun ní' síi sa' ma'. Se ca'mii ní' daj ma'. Maañ se inanj che'é Jesucristó me quinanii ní' rihaan sayuun nanj adonj. <sup>28</sup> Dan me se cuchuman rá yuvii ni'yaj yuvii man Jesucristó, ne quinavij cacun' xraá yuvii yo' a. Taj se 'yaj ase ca'vee daj a se luj qui'yaj nij yuvii ma'. Maañ se inanj che'é Jesucristó navij cacun' xraá yuvii nanj adonj. Dan me nana guun ya rá ní' cuno ní' adonj. <sup>29</sup> Ne nuveé se-Dioso inanj ní' sij israelitá me Dioso ma'. 'O se se-Dioso taran' nij yuvii man rihaan chumii me Dioso nanj adonj. <sup>30</sup> Orún' Dioso nicun', ne sese cuchuman rá nij yuvii israelitá ni'yaj nij yuvii Dioso, ne cataj Dioso se vaa sa' qui'yaj nij so', ne sese cuchuman rá yuvii yanij ni'yaj nij so' Dioso, ne cataj uún Dioso se vaa sa' qui'yaj nij so' uún nanj adonj.

<sup>31</sup> Dan me se aj cataj núj se vaa taj se gún' man nana cataj xna'anj Diose gaa naá, rá soj na'. Daj chihaa mij se guun danj rá soj ma'. Vaa se gún' man yo' ei. Vaa che'é ndo'o cuchruj Moisés tucuáan ca'mii Diose che'é ní' ei. Inanj danj a'mii núj nanj adonj.

**Nana nihánj taj xna'anj daj qui'yaj síi cu'naj Abraham, ne cunuu sa' so' rihaan Diose a**

**4** Síi cu'naj Abraham me se xii ní' sij israelitá me so' gaa naá, ne ne'en ní' se vaa nuveé che'e se vaa qui'yaj ma'an so' me cavii sa' so' ma'. <sup>2</sup> 'Q se ne nó xcúún Abraham cataj Abraham se vaa maan che'é se sa' qui'yaj so', che'é dan guun niha' rá Diose ni'yaj Diose man so' ma'. Taj che'é ca'mii so' danj ma'. Ne'en Diose se vaa ne ya vaa nana yo' ma'. <sup>3</sup> Maan se ma'an danj Diose taj: "Cuchumán rá síi cu'naj Abraham ni'yaj so' Diose, ne che'é dan cataj Diose se vaa sij sa' me Abraham a. Danj ca'mii Diose che'é so' a". Inanj danj a'mii danj Diose nanj adonj.

<sup>4</sup> Dan me se sese yo'q mozó 'yaj suun rihaan 'o ru'vee, ne naru'vee ru'vee rihaan mozó yo', ne no xcúún mozó yo' qui'yaj canaán so' tu'vee so' a. <sup>5</sup> Tzaj ne ino qui'yaj Diose ga Abraham, ne dan me se ne qui'yaj suun Abraham rihaan Diose ma'. Ne nó xcúún Diose naru'vee Diose rihaan Abraham ma'. Maan che'é se xcaj Abraham cuentá se vaa ca'vee tinavij Diose cacun' tumé yuvij ro', che'é dan cuchumán rá Abraham ni'yaj so' Diose, ne che'é dan cataj Diose se vaa sij sa' me so', ne danj qui'yaj uun Diose se luj che'é so' nanj adonj.

<sup>6</sup> 'Q cuyaán vaa nana a'mij nihánj ga nana ca'mii síi cu'naj David gaa naá gaa cataj xna'anj David se vaa niha' rá yuvij tinavij ma'an Diose cacun' xraá, yuvij ne nó xcúún qui'yaj suun rihaan Diose a. Cataj síi cu'naj David a: <sup>7</sup> "Cavii sa' síi x'néj cacun' xraá qui'yaj Diose á. Nu' se nij qui'yaj so' ro', navij cuano á. <sup>8</sup> Cavii sa' so', ne ne'en so' se vaa a doj cacun' se cuta' uún Diose xraá so' daj chihaa mij ma'".

<sup>9</sup> Ne grún' nij yuvij israelitá yuvij ata' ta'nga' man me avii sa' rihaan Diose, rá soj na'. Ndaa nij yuvij yanij yuvij nuvi' ta'nga' ata' man avii sa' uún rihaan Diose, rá soj xa'. Cunudanj yuvij me ca'vee cavii sa' rihaan Diose ei. 'Q se aj ne'en ní' se vaa taj danj Diose: "Cuchumán rá síi cu'naj Abraham ni'yaj so' Diose, ne che'é dan cataj Diose se vaa sij sa' me so' a". Danj taj danj Diose a.

<sup>10</sup> Dan me se cataj Diose se vaa navij cacun' tumé síi cu'naj Abraham yo', che'é se cuchumán rá so' ni'yaj so' Diose, ne daj sij me Abraham gaa ca'mii Diose danj, rá soj ga. Sij cata' ta'nga' man me so', rá soj na'. Taj ma'. 'Q se danj ca'mii Diose gaa ataa cata' ta'nga' man so' nanj adonj. <sup>11</sup> Cachén xca'anj yo' ca'mii Diose danj che'é so', gaa ne cuta' ma'an so' ta'nga' man so', ne tihaan so' rihaan nij yuvij man rihaan chumii se vaa aj tinavij ya Diose cacun' xraá so', ne dan me se guun so' xii cunudanj nij yuvij nuu sa' rihaan Diose yuvij ne ata' ta'nga' man, ne ase vaa qui'yaj síi cu'naj Abraham ro', danj 'yaj uún nij so' a. Dan me se cuchumán rá síi

cu'naj Abraham ni'yaj so' Diose gaa ataa cata' ta'nga' man so', ne danj 'yaj uún nij síi yanij a. <sup>12</sup> Ne xii nij yuvij ata' ta'nga' man me uún so', sese ya noco' nij so' tucuáan noco' ma'an so', ne dan me se cuchuman rá nij so' ni'yaj nij so' Diose, ne tuvi' síi cu'naj Abraham guun nij so' a. Dan me se xii ní' me síi cu'naj Abraham, sese qui'yaj ní' ndaa vaa qui'yaj so' adonj.

**Nana nihánj taj xna'anj se vaa cuchumán rá síi cu'naj Abraham cuno so' nana ca'mii Diose rihaan so' a**

<sup>13</sup> Dan me se ne'en ní' se vaa cata' tu'va Diose rihaan síi cu'naj Abraham se vaa vaa güii, ne nıcaj yu'unj ma'an Abraham do', nıcaj yu'unj nij ta'nıf ta'nıj si'no Abraham do', man cunudanj chumii, ne dan me se ya ya guun yo' to'óo nij so', cataj Diose rihaan síi cu'naj Abraham, ne nuveé che'e se canoco' Abraham nu' se-tucuanj Moisés me ca'mii Diose danj rihaan Abraham ma'. 'Q se aj cuchumán rá so' cuno so' nana ca'mii Diose rihaan so', ne che'é dan cunuu sa' so' rihaan Diose, ne che'é dan me cataj xna'anj Diose rihaan so' se vaa ya ya nıcaj yu'unj so' man cunudanj chumii yo' adonj. <sup>14</sup> 'Q se sese inanj nij síi guun nucuaj qui'yaj nu' se-tucuanj Moisés me nij síi nıcaj yu'unj chumii, ne taj che'é cuchuman rá ní' nana cata' tu'va Diose rihaan Abraham a ma'. <sup>15</sup> 'Q se xa' se-tucuanj Moisés, tzaj ne taj a yo'ó síi uun nucuaj qui'yaj nu' tucuáan yo', ne che'é dan axrıj yuvaa uun Diose rihaan yuvij, 'yaj tucuáan yo' adonj. (Tzaj ne sese nuvi' tucuáan vaa danj noco' yuvij, ne taj cacun' tumé nij yuvij che'é tucuáan yo' ma'.)

<sup>16</sup> Che'é dan cunudanj ní' sij amán rá ni'yaj man Diose ro', me nij síi nıcaj yu'unj man chumii, ne veé dan me se luj qui'yaj Diose che'é ní' me yo', gaa ne ca'vee quisij ya nu' nana cata' tu'va Diose che'é taran' ní' a. Dan me se nuveé inanj nij síi guun nucuaj qui'yaj nu' se-tucuanj Moisés me nij síi cavii sa' danj ma'. Tananj cavii sa' taran' ní' sij amán rá ni'yaj man Diose, ndaa vaa qui'yaj Abraham adonj. 'Q se xii taran' ní' me so' adonj. <sup>17</sup> 'Q se danj Diose taj se vaa cune' Diose man so' guun so' xii yuvij man que'ee ndo'o chuman' a. Danj taj danj Diose che'é so', ne dan me se xii ní' me so' rihaan Diose á. 'Q se cuchumán rá so' ni'yaj so' Diose, ne Diose ro', me síi 'yaj nuu i'na' uún nij síi cavi', ne Diose me síi a'mii che'é rasuun ataa curuvi' rihaan chumii nihánj, ne taj so' se vaa aj nicun' nij rasuun nanj adonj.

<sup>18</sup> Ne nucuaj rá síi cu'naj Abraham man Diose se vaa gaa ta'nıf so', qui'yaj Diose, tzaj ne ne quene'en so' daj me qui'yaj Diose ne gaa ta'nıf so' ma'. Maan se cuchumán rá so' cuno so' nana ca'mii Diose rihaan so', gaa ne guun so' xii yuvij man que'ee ndo'o chuman' adonj. 'Q se aj cataj Diose rihaan so' se vaa gaa ndo'o ta'nıf ta'nıj si'no so', ne veé danj qui'yaj gıee Diose ga so' adonj. <sup>19</sup> Dan me se quisıj so' 'o cientó yo', ne taj vaj ta'nıf so', tzaj ne ne quiri' rá so' che'é rej chii nga me so' ne chana itıun me nıca so' chana cu'naj Sara ma'. 'Q se yo'q cuchumán rá so' ne'en so' Diose nanj adonj. <sup>20</sup> Ne ca'vej rá so' cataj so' se vaa se ca'vee

qui'yaj Diose ndaa vaa cataj Diose rihaan so' ma'. Tananj cuchumán ndo'o doj rá so' ni'yaj so' Diose, gaa ne nari' nucaj doj man so' a. Cataj so' se vaa sa' uxrá vaa Diose, <sup>21</sup> ne guun ya rá so' se vaa guun nucaj Diose qui'yaj Diose cunudanj se vaa cataj Diose a.

<sup>22</sup> Che'é dan me cataj Diose: "Sij sa' me Abraham a". Daj ca'mii Diose che'é so', <sup>23</sup> tzaj ne nuveé che'e orún' sí cu'naj Abraham a'mii nana yo' nana no rihaan danj Diose ma'. <sup>24</sup> 'Q se che'é ma'an ní' no nana yo' rihaan danj Diose uún, che'é rej sij amán rá ni'yaj man Diose me ní' uún, ne dan me se aj cataj Diose se vaa sij sa' me ma'an ní' uún adonj. Veé dan me se amán rá ní' se vaa cunuu i'na' uún Jesucristó sij 'nij ra'a man ní' qui'yaj Diose á. <sup>25</sup> Dan me se ca'vej rá Diose cavi' Jesucristó che'é cacun' qui'yaj ní', ne cunuu i'na' uún so', qui'yaj Diose, che'é yan me rá Diose cunuu sa' ní' rihaan ma'an Diose adonj.

**Nana nihánj taj xna'anj se vaa cavii sa' uxrá ní' che'é se cunuu sa' nimán ní' rihaan Diose a**

**5** Dan me se amán rá ní' quene'en ní' Diose, ne che'é dan navij cacun' tumé ní', ne cunuu sa' nimán ní' rihaan Diose, ne che'é dan me ne chu'vi' ní' yaj, ne vaa dínj nimán ní' che'é Jesucristó sij 'nij ra'a man ní' adonj. Ne yuvaa Diose man ní' ma'. <sup>2</sup> Dan me se amán rá ní' ni'yaj ní' man Jesucristó, ne che'é dan cavii sa' uxrá ní', qui'yaj Diose, ne yaj ro', vaa che'é guun niha' ndo'o rá ní' cataj xna'anj ní' rihaan yo'ó yuvi se vaa vaa güii ca'anj ní' cayáán ní' rej sa' ndo'o rej yanj ma'an Diose adonj. <sup>3</sup> Ne vaa che'é guun niha' rá ní' che'é sayuun ran' ní', ne dan me se ne'en ní' se vaa che'é sayuun ran' ní' me se nari' nucaj doj nimán ní', <sup>4</sup> ne che'é dan uun niha' rá Diose ni'yaj Diose man ní', ne che'é dan uun ya rá ní' se vaa vaa güii cayáán ní' ga so' a. <sup>5</sup> Che'é dan se guun na'aj ní' ma'. 'Q se rqué Diose Nimán Diose man ní', ne Nimán Diose taj xna'anj rihaan ní' se vaa ee rá Diose man ní' adonj.

<sup>6</sup> 'Q se Jesucristó me se gaa ne guun nucaj ma'an ní' sij man rihaan chumii nihánj qui'yaj sa' ní' do', gaa nuveé sij nocó' man Diose me ní' do', ne cavi' Jesucristó che'é ma'an ní', gaa güii cachrón ma'an Diose cavi' so' ei. <sup>7</sup> Dan me se taj vaj yuvi ca'vej rá nayon rihaan tuvi' cavi' ma'. Ca'vee se sí' ne tumé cacun' me tuvi' yuvi, tzaj ne se ca'vej rá yuvi cavi' yuvi che'é so' ma'. Ca'vee se ndaa sí' sa' uxrá nimán me tuvi' yuvi, tzaj ne doj yuvi quisij rá cavi' che'é tuvi' nanj adonj. <sup>8</sup> Tzaj ne ino vaa Diose ga yuvi ei. Dan me se nda' se tumé ní' cacun', tzaj ne cavi' Jesucristó che'é ní', ne nayón so' rihaan ní', qui'yaj Diose, ne veé dan me se tihaan Diose rihaan ní' se vaa ee ndo'o rá Diose man ní' adonj.

<sup>9</sup> Dan me se aj cunuu sa' ní' rihaan Diose cuango, che'é se cavi' Jesucristó, ne che'é dan ne'en ní' se vaa a 'ó güii se caxríj yuvaa Diose man ní' che'é cacun' tumé ní' ma'. 'Q se tinanii Jesucristó man ní' rihaan sayuun qui'yaj Diose man ní' a. <sup>10</sup> Dan me se asino yaan yuvaa Diose man cunudanj yuvi che'é cacun' tumé nij yuvi, tzaj ne ca'née Diose ta'níí Diose cavi' so'

che'é yuvi, ne guun tuvi' ní' ga Diose, qui'yaj so' a. Ne cunuu i'na' uún Jesucristó, ne che'é dan ne'en ní' se vaa ya quinanii ní' rihaan sayuun asa' ca'ne' Diose cacun' che'é cunudanj yuvi man rihaan chumii nihánj ei. <sup>11</sup> Ne uun niha' rá ní' cataj xna'anj ní' rihaan tuvi' ní' che'é se vaa qui'yaj Diose che'é ní', ne daj 'yaj ní' che'é Jesucristó sij 'nij ra'a man ní' ei. 'Q se so' me sí' qui'yaj guun tuvi' ní' ga Diose adonj.

**Nana nihánj taj xna'anj se vaa qui'yaj canaán Jesucristó rihaan cacun' xna'anj rihaan chumii nihánj a**

<sup>12</sup> Dan me se orún' snó'o cu'naj Adán me sí' guun yaan qui'yaj cacun' asino yaan, ne dan me se xi cunudanj nij yuvi man rihaan chumii me so', ne qui'yaj so' cacun', ne tanáj so' cacun' rihaan cunudanj nij yuvi man rihaan chumii, ne che'é dan ase vaa tumé Adán cacun' ro', daj vaa tumé cunudanj nij yuvi cacun' rihaan Diose a. 'Q se che'é cacun' qui'yaj Adán me se ya guun che'e yuvi qui'yaj yuvi cacun', gaa ne guun che'e nij yuvi cavi' nimán nij yuvi, ne che'é dan nu' 'na' avi' nimán cunudanj nij yuvi man rihaan chumii nihánj cuango adonj. <sup>13</sup> Dan me se asij ataa ca'mii Diose tucuaán cuchruj Moisés ro', asij daj me qui'yaj yuvi cacun', tzaj ne taj vaj se-tucuanj Moisés cunó' nij yuvi ma'. Che'é dan ne qui'yaj nij yuvi cacun' rihaan se-tucuanj Moisés ma'. <sup>14</sup> 'Q se cavi' nimán sí' cu'naj Adán cavi' nimán cunudanj tuvi' so' cavi' nimán, ne ndaa yuvi ne qui'yaj cacun' ndaa vaa qui'yaj sí' cu'naj Adán ro', ndaa nimán nij so' cavi' gaa ataa quinaj se-tucuanj Moisés ne gaa cuchruj Diose se-tucuanj Moisés uún a.

Dan me se ase vaa quiran' cunudanj nij yuvi man rihaan chumii sayuun, qui'yaj orún' sí' cu'naj Adán ro', daj vaa cavii sa' que'ee nij yuvi man rihaan chumii, qui'yaj orún' Jesucristó uún a. <sup>15</sup> Dan me se ne'en ní' se vaa orún' sí' cu'naj Adán qui'yaj cacun' rihaan Diose, ne quisij cacun' yo' tiri' yo' man nimán cunudanj nij yuvi man rihaan chumii cuango, ne che'é dan nu' 'na' avi' nimán nij yuvi nanj adonj. Tzaj ne doj a nucaj Diose rihaan Adán ei. Che'é dan guun ya rá ní' se vaa doj a guun nucaj Diose racuíj Diose man me ma'an yuvi, ne doj a ca'vee cavii sa' nij yuvi che'é se luj qui'yaj Jesucristó che'é nij so' nanj adonj. <sup>16</sup> Dan me se gaa qui'yaj orún' sí' cu'naj Adán cacun', ne quitáá cacun' xráá nij yuvi, tzaj ne ino uxrá vaa se luj qui'yaj Jesucristó che'é ní', ne dan me se gaa quisij qui'yaj ndo'o ní' cacun' ne cavi' so' che'é ní', ne dan me se güéj cacun' xráá ní', qui'yaj so' adonj. <sup>17</sup> 'Q se ne'en ní' se vaa gaa qui'yaj orún' sí' cu'naj Adán cacun' yo', ne quiran' cunudanj nij yuvi man rihaan chumii sayuun se vaa nu' 'na' avi' nimán cunudanj nij yuvi a. Che'é dan ní' sij cunuu sa' rihaan Diose che'é se luj qui'yaj orún' Jesucristó che'é ní' me se doj a ne'en ní' se vaa ga i'na' nimán ní' ne guun chij ní' rihaan chumii nihánj che'é so' adonj.

<sup>18</sup> Dan me se che'é orún' cacun' qui'yaj Adán me táá cacun' xráá cunudanj nij yuvi man rihaan chumii, tzaj ne orún' suun sa' ndo'o qui'yaj suun Jesucristó, ne

che'é dan ca'vee güej cacun' xráá cunudanj nij yuvii, qui'yaj so', ne ca'vee yo'o gaa i'na' nimán nij yuvii a. <sup>19</sup> Dan me se síí cu'naj Adán ro', orún' so' ne ca'vej rá cunō rihaan Diose, ne che'é dan que'ee ndo'o yuvii tumé cacun', tzaj ne cunō orún' síí cu'naj Jesucristó rihaan Diose, ne che'é dan cunūu sa' que'ee yuvii rihaan Diose adonj.

<sup>20</sup> Dan me se cataj xna'anj Diose daj gaa se-tucuanj Moisés rihaan Moisés gaa naá, tzaj ne quene'en Diose se vaa síí se cunō rihaan Diose me yuvii ne tananj guun que'ee doj cacun' qui'yaj yuvii che'é se-tucuanj Moisés a. Dan me se quisij cataj xna'anj Diose daj gaa se-tucuanj Moisés rihaan so', gaa ne doj a guun rá yuvií qui'yaj yuvii se chi'ii á. Tzaj ne gaa xna'anj doj cacun' tumé yuvii, ne Diose me síí quirii nimán qui'yaj doj se luj che'é nij yuvii, ne dan me se tinavij Diose cacun' tumé nij yuvii, gaa ne qui'yaj canaán se luj yo' rihaan cacun' yo' a. <sup>21</sup> Dan me se asino guun chij ndo'o cacun' rihaan nimán yuvii, gaa ne guun che'e yuvii cavi' nimán yuvii che'é cacun', ne quiran' nij yuvii sayuun nu' cavii nu' ca'anj a. Tzaj ne qui'yaj ndo'o Diose se luj che'é nij yuvii, che'é rej qui'yaj canaán se luj yo' rihaan cacun', ne guun chij ndo'o se luj yo' rihaan nimán nij yuvii, ne che'é dan nuu sa' nimán nij yuvii rihaan Diose, ne cayáán nij yuvii ga Diose nu' cavii nu' ca'anj a. Daj qui'yaj Diose che'é ní' gaa cavi' Jesucristó sij 'nij ra'a man ní' rihaan rcutze adonj.

**Nana nihánj taj xna'anj se vaa ní' sij amán rá ni'yaj man Jesucristó me se se ca'vee canoco' ní' chrej chi'ii yaj ma'**

**6** Daj qui'yaj ní', rá soj ga. 'O qui'yaj ní' cacun', ne qui'yaj Diose doj se luj che'é ní', rá soj na'. <sup>2</sup> Taj ma'. Se guun qui'yaj ní' danj ma'. 'O se aj tanáj ní' chrej chi'ii á. Asa' ca'vee canoco' uún ní' chrej chi'ii, rá soj ga. <sup>3</sup> 'O se aj ne'en ya soj se vaa gaa cata' ne ní' che'é Jesucristó, ne ase vaa cavi' so' rihaan chumii nihánj ro', danj cavi' ní' rihaan tucuáán chi'ii, ne se ca'vee canoco' ní' tucuáán chi'ii cuano a ma'. <sup>4</sup> Dan me se ase vaa quiran' Jesucristó gaa cachin' nii man so' rque yo'óo ro', danj quiran' ní' gaa cata' ne ní', ne dan me se gaa cachin' nii man so' rque yo'óo, ne va'nuy güii ne cachee so' rihaan yo'óo ma'. Ne ase vaa ne cachee so' rihaan yo'óo ro', danj gaa ní' cuano che'é se cata' ne ní', ne se cachéé ní' chrej chi'ii cuano ma'. Gaa ne ase vaa cunuu i'na' uún Jesucristó gaa cavi' so', qui'yaj Diose ro', danj gaa cunūu naca nimán ní', ne ve'é uxrá qui'yaj ní' cayáán ní' ga tuvi' ní', qui'yaj Diose ei. 'O se síí sa' nucuaj me Diose ei. <sup>5</sup> Dan me se sese ya ya tanáj ní' chrej chi'ii che'é so' ro', ne ya ya cunūu sa' nimán ní' che'é so' adonj.

<sup>6</sup> Ne'en ní' se vaa vaa chi'ii nimán ní' gaa ataa cavi' Jesucristó che'é ní', tzaj ne cavi' so' rihaan rcutze che'é ní', ne ve'é dan me se navij se chi'ii man nimán ní', qui'yaj so' gaa cavi' so', ne taj che'é qui'yaj ní' se chi'ii ne guun ní' se-mozó cacun' yaj a ma'. <sup>7</sup> 'O se ase vaa na'vee qui'yaj xngá cacun' ro', danj vaa ní', ne se ca'vee canoco' ní' chrej chi'ii yaj a ma'. <sup>8</sup> Dan me se

cavi' Jesucristó, ne canoco' ní' man so', ne dan me se cavi' se chi'ii man nimán ní' ei. Ne cunuu i'na' uún so', ne che'é dan amán rá ní' se vaa ca'vee cayáán sa' nimán ní' ga so' nanj adonj. <sup>9</sup> Dan me se ne'en ní' se vaa cunuu i'na' uún Jesucristó, ne daj chihaa mij se ca'vee cavi' uún so' a man adonj. <sup>10</sup> 'O se síí cavi' ro', daj chihaa mij se ca'vee qui'yaj so' cacun', ne síí cunuu i'na' uún me se che'é orún' Diose ne so' ei. <sup>11</sup> Ne che'é dan cataj ma'an soj se vaa aj cavi' se chi'ii man nimán nij soj, ne se qui'yaj uún nij soj cacun' a ma'. 'O se canoco' nij soj man Jesucristó, ne daj se 'yaj guee so', yanj so' che'é rej qui'yaj suun so' rihaan Diose ro', danj qui'yaj ní' uún a.

<sup>12</sup> Che'é dan se ca'vej rá soj guun chij cacun' rihaan nee man soj ma'. Ne'en soj se vaa vaa güii cavi' nee man soj, ne che'é dan se guun ca'vej rá soj qui'yaj nee man soj náá guun se nij ma'. Dan me se ase vaa síí cavi' vaa soj gaa rque, tzaj ne racuij Diose man soj, ne che'é dan ase vaa síí cunuu i'na' uún vaa soj, ne che'é dan nu' nee man soj qui'yaj suun che'é Diose, qui'yaj soj, ne inanj suun sa' qui'yaj suun soj che'é Diose á.

<sup>14</sup> Se guun chij cacun' rihaan soj yaj a ma'. 'O se ne'en soj se vaa se cuta' Diose cacun' xráá soj sese se canoco' soj nu' se-tucuanj Moisés ma'. Tzaj ne me rá Diose qui'yaj Diose se luj che'é soj, ne quinavij cacun' tumé soj, ne cavii sa' soj, qui'yaj ma'an Diose, ne che'é dan taj che'é guun chij cacun' rihaan soj a man adonj.

**Nana nihánj taj xna'anj se vaa qui'yaj suun ní' rihaan inanj Diose a**

<sup>15</sup> Ta'aj yuvii cataj: "Sese danj vaa, ne sese se cuta' Diose cacun' xráá ní' che'é se-tucuanj Moisés, ne sese qui'yaj Diose se luj che'é ní', ne ca'vee qui'yaj ndo'o ní' cacun' nanj á". Danj cataj ta'aj yuvii, tzaj ne quij ndo'o vaa nana yo' nana tu'va nij yuvii ei. <sup>16</sup> Ne acaj soj cuentá se vaa sese chrej chi'ii canoco' soj, ne guun soj se-mozó cacun' a. Danj inanj guun chij cacun' rihaan soj, ne inanj yun cacun' qui'yaj soj, qui'yaj cacun', gaa ne quirí' nimán soj, qui'yaj cacun' tumé soj a. Tzaj ne sese cunō soj rihaan Diose, ne cunūu soj rihaan Diose, ne cunūu sa' nimán soj rihaan Diose nanj ei. <sup>17</sup> Gaa rque me se se-mozó cacun' me soj, tzaj ne guun rá ma'an soj cunō soj nana tucu'yón núj rihaan soj che'é Diose, ne che'é dan nagó' 'unj graciá rihaan Diose adonj. <sup>18</sup> Dan me se quinanii soj rihaan cacun', ne inanj se sa' uun rá Diose 'yaj soj a. <sup>19</sup> (Dan me se nana nica achrón 'unj rihaan yanj nihánj nayaá soj a. Ne'én 'unj se vaa se guun nucuaj soj cunō soj nana nachran' ma'.) Dan me se gaa rque me se ca'vej rá soj qui'yaj nee man soj se chi'ii, ne qui'yaj soj inanj cacun' rihaan Diose, gaa ne guun nihá' rá soj qui'yaj soj doj cacun' uún a. Tzaj ne cuano nihánj me se ca'vej soj qui'yaj soj inanj se sa' ndaa vaa uun rá Diose, gaa ne guun soj síí sa' nimán rihaan Diose á.

<sup>20</sup> Dan me se gaa se-mozó cacun' me soj, ne guun rá soj se vaa ne nó xcúún soj qui'yaj soj se sa' ma'.

<sup>21</sup> Che'é dan me cavii sa' soj gaa canoco' soj chrej chi'ii, rá soj na'. Taj ma'. Maan se uun na'aj soj cuano che'é



cacun' aj qui'yaj soj gaa rque, ne che'é cacun' yo' me se quiri' nimán soj, ne ca'anj soj rihaan ya'an nu' cavii nu' ca'anj adonj. <sup>22</sup> Tzaj ne yaj ro', aj quinanii soj rihaan cacun', ne nuveé se-mozó cacun' me soj, tananj rihaan Diose nu' soj, ne che'é suun sa' 'yaj suun soj rihaan Diose ro', che'é dan cunyu sa' nimán soj, gaa ne cayáán soj gaa Diose nu' cavii nu' ca'anj ei. <sup>23</sup> Dan me se che'é cacun' 'yaj yuvij me se yo'o guun yanij nimán nij yuvij rihaan Diose nu' cavii nu' ca'anj, tzaj ne qui'yaj ma'an Diose se luj che'é ní' sij 'nij ra'a Jesucristó man se vaa ca'vee cayáán ní' gaa so' nu' cavii nu' ca'anj adonj.

**Nana nihánj taj xna'anj se vaa quisij canoco' ní' se-tucuanj Moisés, ne cuano nihánj ca'nej nimán ní' qui'yaj suun ní' che'é Diose a**

**7** Dan me se aj ne'en nij soj daj vaa se-tucuanj Moisés, tinuj, nocoj. Che'é dan ne'en soj se vaa ne nó xcúún nij síi cavi' canoco' nij so' tucuáán yo' ma'. <sup>2</sup> Ne dan me se sese vaa nicá chana, ne cano no' ga nicá no', taj nana cataj xna'anj Diose rihaan Moisés gaa naá yo' a. Tzaj ne sese cavi' nicá chana, ne ca'vee ca'anj no' xcaj no' yo'ó snó'o a. <sup>3</sup> Tzaj ne sese yanj nica chana ne xcaj chana yo'ó snó'o, ne tumé ndo'o no' cacun', tzaj ne sese cavi' nicá chana, ne ca'vee xcaj chana yo'ó snó'o, ne nuveé cacun' me yo' gaa ma'. <sup>4</sup> Ne ase vaa chana cavi' nicá ro', danj vaa ma'an ní', tinuj, nocoj. 'Q se che'é se cavi' Jesucristó ro', che'é dan quisij canoco' ní' se-tucuanj Moisés nanj á. Ne cunuu i'na' uún Jesucristó, ne canoco' ní' man so', ne che'é dan guun nucuaj ní' qui'yaj suun ní' suun sa' che'é Diose a. <sup>5</sup> Asij rque me se qui'yaj suun ndo'o ní' che'é se-tucuanj Moisés, ne guun ndo'o rá ní' cunó ní' rihaan Diose, tzaj ne ne guun nucuaj ní' cunó ní' ma'. Maan se tananj a guun doj rá ní' qui'yaj ní' cacun', gaa ne doj a vaa cacun' qui'yaj nee man ní', ne che'é dan vaa güii cavi' nu' nimán ní' ei. <sup>6</sup> Dan me se gaa naá canoco' uxrá ní' tucuáán yo' tucuáán no' rihaan yanj, ne no' xcúún ní' canoco' ní' tucuáán yo', rá ní' gaa rque, tzaj ne yaj nihánj me se taj che'é canoco' ní' tucuáán yo' a ma'. 'Q se aj cunuu sa' nimán ní', ne a'neé nimán ma'an ní' qui'yaj suun ní' che'é Diose cuano adonj.

**Nana nihánj taj xna'anj se vaa che'é se-tucuanj Moisés xcaj ní' cuentá se vaa tumé ní' cacun', tzaj ne taj se 'yá' cunyu sa' nimán ní' rihaan Diose qui'yaj tucuáán yo' ma'**

<sup>7</sup> Guun rá ní' se vaa tucuanj chi'ij me se-tucuanj Moisés na'. Taj a doj ma'. 'Q se se-tucuanj Moisés yo' qui'yaj don ca'vee xcaj 'unj cuentá me se uun cacun' a. Dan me se gaa naá cataj Diose se vaa na'vej rá Diose guun rá ní' si'yaj tuvi' ní', ne veé dan me se xcaj 'unj cuentá se vaa tananj a guun ndo'o raj si'yaj tuvij gaa quene'én 'unj tucuáán yo', ne danj inanj vaa nimanj nanj á. <sup>8</sup> Veé dan me se xcaj 'unj cuentá daj vaa se-tucuanj Moisés, gaa ne guun che'ej guun ndo'o raj

qui'yaj cacun' uún a. Sese nuvi' tucuáán canoco' ní' ne ne uun rá ní' qui'yaj ní' cacun' asuun saj ma'. <sup>9</sup> Ne asij ataa narí' 'unj se-tucuanj Moisés, ne guun raj se vaa sa' qui'yaj, tzaj ne naríj se-tucuanj Moisés, gaa ne guun che'ej guun raj qui'yaj cacun' se vaa na'vej rá Diose, <sup>10</sup> nda sít, gaa ne quiri' nu' nimanj nanj adonj. Sese cunó yuvij nu' se-tucuanj Moisés, ne ve'é uxrá cayáán nij yuvij, ne che'é dan vaa tucuáán yo', tzaj ne 'unj nihánj me se daj doj se quiri' nu' nimanj, qui'yaj tucuáán yo' adonj. <sup>11</sup> Dan me se gaa naríj se-tucuanj Moisés, ne guun raj canocoj nu' tucuáán yo', ne cavi sa' 'unj, qui'yaj tucuáán yo', raj a. Tzaj ne tananj a guun chi'ij ndo'o raj doj, qui'yaj cacun' 'nij nimanj, ne tiha' yu'unj cacun' yo' manj, ne che'é dan doj a qui'yaj cacun', ne quiri' nu' nimanj a adonj.

**Nana nihánj taj xna'anj se vaa na'vee canoco' ní' se-tucuanj Moisés, che'é se uun chij cacun' rihaan nee man ní' a**

<sup>12</sup> Dan me se guue uxrá se-tucuanj Moisés nanj á. 'Q gaa nicá nimán ní', sese cunó ní' man yo' ei. Ne cunaj uxrá vaa yo' ei. <sup>13</sup> 'Unj me se quiri' nimanj qui'yaj se-tucuanj Moisés tucuáán sa', rá nij soj na'. Taj ma'. Maan se che'é cacun' qui'yáá 'unj me quiri' nimanj nanj á. Gaa cunoj se-tucuanj Moisés, ne guun che'ej qui'yaj cacun', ne que'ee ndo'o cacun' qui'yaj, gaa ne xcaj 'unj cuentá se vaa man ndo'o cacun' nimanj a.

<sup>14</sup> Ne'en ní' se vaa nana ca'mii Nimán Diose me se-tucuanj Moisés, tzaj ne yuvij uun mej, ne inanj cacun' ne'enj qui'yaj a. <sup>15</sup> Ne ne'enj daj me che'é me 'yáá 'unj danj ma'. Dan me se me raj qui'yaj se sa', tzaj ne inanj cacun' 'yá, ne se chi'ij na'vej raj qui'yaj, tzaj ne inanj se chi'ij 'yá nanj adonj. <sup>16</sup> Chi'ij vaa cacun' qui'yaj, raj, ne dan me se ne'én 'unj se vaa sa' vaa se-tucuanj Moisés a. <sup>17</sup> Dan me se ne qui'yaj ma'anj cacun' ma'. Tzaj ne uun chij ndo'o cacun' rque nee manj, ne che'é dan nee manj qui'yaj cacun' a.

<sup>18</sup> Ne'enj se vaa taj se 'yá' qui'yaj nee manj se sa' ma'. Dan me se me raj qui'yaj se sa', tzaj ne na'vee qui'yaj nee manj se sa' ma'. Ne se chi'ij na'vej raj qui'yaj, tzaj ne dan me se inanj se chi'ij 'yá, 'yaj nee manj adonj. <sup>20</sup> Che'é dan me taj 'unj se vaa ne 'yaj ma'anj se chi'ij ma'. 'Q se uun chij ndo'o cacun' rque nee manj, ne che'é dan inanj nee manj 'yaj se chi'ij yo' a. <sup>21</sup> Me raj qui'yaj se sa' uun rá Diose, tzaj ne na'vee qui'yaj danj ma'. 'Q se tananj inanj 'na' cacun' rihanj a.

<sup>22</sup> Ne'enj se vaa sa' vaa se-tucuanj Moisés, <sup>23</sup> tzaj ne me ndo'o rá nee manj qui'yaj yo' cacun', ne na'vej nee manj cunó yo' rihaan Diose ma'. Inanj tucuáán chi'ij me rá nee manj canoco' yo' adonj. Dan me se na'vej raj qui'yaj cacun', tzaj ne nee manj inanj me rá se vaa qui'yaj cacun' a.

<sup>24</sup> Dan me se niquej, raj nanj ei. Inanj cacun' 'yaj nee manj, ne che'é dan quiri' nu' nimanj, ne vaa güii ca'anj 'unj rihaan ya'an, qui'yaj nee manj asuun nanj adonj. <sup>25</sup> Ne me síi tinanii manj rihaan nee manj, rá soj ga. 'Q se guun ni'yaj ndo'o ní' rihaan Diose se vaa tinanii Je-

sucristó sij 'njj ra'a man ní' manj rihaan sayuun yo' adonj.

Dan me se xá' mā'anj, tzaj ne noco' uxrá mā'anj se-tucuānj Diose, tzaj ne xá' nee manj, tzaj ne inānj se chi'ij 'yaj nee manj a.

**Nana nihánj taj xna'anj se vaa xcāj ní' cuentá che'é inānj Nimán Diose, ne cavij sa' nimán ní' a**

**8** Yaj me se daj chihāā mjj se cuta' Diose cacun' xráá ní' sij noco' man Jesucristó ma'. <sup>2</sup> 'Q se 'ujj nihánj me se che'é se canocó' 'ujj man Jesucristó, ne che'é dan Nimán Diose me síi guun chij rihaan nimanj, gāā ne dan me se cunuu sa' nimanj, ne che'é dan quinani' 'ujj rihaan cacun', ne se cavi' nu' nimanj qui'yaj cacun' a man adonj. <sup>3</sup> Ne guun nucuaj nee man ní' canoco' nee man ní' nu' se-tucuānj Moisés, ne che'é dan se guun nucuaj ní' quinani' ma'an ní' rihaan cacun' tumé ní' ma'. Tzaj ne Diose me síi tinanii man ní' rihaan cacun' yo', ne ca'neé Diose ma'an ta'níi Diose rihaan chumij, ne ase vaa nee man ní' ro', danj vaa nee man so' uún a. Xá' nee man ní', tzaj ne tumé ní' cacun', qui'yaj nee man ní', ne che'é dan ca'na' so', ne cayáán so' gā ní', ne cavi' so' che'é ní' a. Tzaj ne taj cacun' tumé ma'an so', ne che'é dan taj che'é qui'yaj ní' cacun' yaj ma'. <sup>4</sup> Cuanō yaj me se taj che'é qui'yaj ní' inānj se vaa me rá nee man ní' qui'yaj ní' ma'. Inānj rihaan orún' Nimán Diose cunō ní', ne qui'yaj ma'an ní' ndāa vaa me rá Diose qui'yaj ní' a. Dan me se Nimán Diose 'yaj uno ma'an ní' se-tucuānj Moisés adonj.

<sup>5</sup> Dan me se ta'aj yuvij xcāj cuentá inānj che'é nee man nij so', tzaj ne inō doj vaa yuvij noco' man Nimán Diose, ne dan me se che'é inānj se vaa me rá Nimán Diose xcāj nij so' cuentá adonj. <sup>6</sup> Sese inānj che'é nee man ní' xcāj ní' cuentá, ne cavi' nu' nimán ní' a. Tzaj ne sese che'é Nimán Diose xcāj ní' cuentá, ne cavij sa' ní', ne ca'vee cayáán ní' gā Diose nu' cavij nu' ca'anj, ne gāā xej nimán ní', qui'yaj Nimán Diose adonj. <sup>7</sup> Sese inānj che'é nee man ma'an ní' xcāj ní' cuentá, ne taj ri'yunj ní' man Diose vaa gāā adonj. Se guun nucuaj ma'an ní' cunō ní' se-tucuānj Diose vaa gāā ma'. <sup>8</sup> Ne aran' rá Diose ni'yaj Diose man nij yuvij acāj cuentá che'é nee man ma'an nij yuvij a man adonj.

**Nana nihánj taj xna'anj se vaa sese yanj Nimán Diose gā ní', ne sa' doj gāā ní' a**

<sup>9</sup> Tzaj ne inō doj vaa nij soj sese ya yanj Nimán Diose gā soj á. Che'é dan ne 'yaj soj ndāa vaa me rá nee man soj qui'yaj soj ma'. Tzaj ne inānj rihaan Nimán Diose uno soj, ne dan me se sese nuvi' Nimán Jesucristó yáán gā yo'ō so', ne nuveé sij 'njj ra'a Jesucristó man me so' ma'. <sup>10</sup> Ne'en soj se vaa cavi' nee man ní' che'é cacun' qui'yaj nee man ní', tzaj ne sese yanj Jesucristó gā ní', ne 'ō vaa sa' ní' rihaan Diose, ne che'é dan 'ō vaa i'nā' nimán ní' adonj. <sup>11</sup> Ne ne'en soj se vaa cunuu i'nā' uún Jesucristó gāā cavi' so', qui'yaj Diose, ne ma'an Nimán Diose nu' nimán soj, ne che'é dan

cunuu naca nee man soj asa' cavi' soj, qui'yaj uún Diose a.

**Nana nihánj taj xna'anj se vaa yuvij uno a'mii Nimán Diose me ta'níi Diose a**

<sup>12</sup> Che'é dan ne nó xcúún ní' qui'yaj ní' ndāa vaa me rá nee man ní' ma'. Se racuij ní' man nee man ní', man tinuj, man nocoj. <sup>13</sup> 'Q se sese aráya'anj ndo'o soj man nee man soj, ne ca'anj yanij soj rihaan Diose, qui'yaj ma'an soj adonj. Tzaj ne sese cunō soj nana a'mii Nimán Diose, ne se ca'vej rá soj qui'yaj nee man soj cacun', gāā ne yo'ō gāā i'nā' nimán soj adonj. <sup>14</sup> 'Q se yuvij uno a'mii Nimán Diose me ta'níi Diose ei. <sup>15</sup> Ne'en soj se vaa chu'vi' mozó ne'en so' se-ru'vee so', tzaj ne na'vej rá Diose qui'yaj soj danj rihaan Diose ma'. Se cuchu'vi' nimán soj ne'en soj Diose ma'. 'Q se nicāj yu'ujj Diose man soj, ne guun ta'nij Diose man soj, ne che'é dan me gāā niha' rá soj cataj soj: "Ataj" rihaan Diose á. <sup>16</sup> Dan me se yo'ō a'mii Nimán Diose gā nimán ní', ne taj Nimán Diose se vaa ta'níi Diose me ní' a. <sup>17</sup> Che'é dan vaa güii rque ndo'o Diose se sa' rihaan ní' gā Jesucristó, ne 'ō cuyāān gāā se sa' rihaan Jesucristó gā ní' a. Veé dan me che'é se ran' ní' sayuun ndāa vaa quiran' Jesucristó ro', che'é dan cavij sa' ní' gā so', ne guun chij ní' gā so' vaa güii adonj.

**Nana nihánj taj xna'anj se vaa vaa güii, ne ve'é ndo'o gāā cunudanj chumij, qui'yaj Diose che'é ní' a**

<sup>18</sup> Veé dan me se ran' xá' ní' sayuun cuanō, tzaj ne vaa güii, ne doj a cavij sa' ní' rihaan sayuun ran' ní' cuanō adonj. 'Q se ataa cataj xna'anj Diose rihaan ní' che'é nu' se sa' nīcāj ní', tzaj ne asa' rque Diose nu' se sa' rihaan ní', ne quini'yōn ní' nu' sayuun quiran' ní' ei. Danj vaa raj nanj adonj. <sup>19</sup> Na'vij uxrá cunudanj nij rasuun man rihaan chumij nihánj quisij güii tīhaan Diose man nij ta'níi Diose rihaan chumij, gāā ne quene'en chumij dāj gāā nij so' a. <sup>20</sup> Cuanō ro', taj yu'vee nó nij rasuun man rihaan chumij ma'. Gāā qui'yaj Diose chumij, ne vaa sa' cunudanj nij rasuun yo', tzaj ne quirí' nij rasuun che'é cacun' qui'yaj yuvij, ne ca'vej rá Diose quirí' nu' nij rasuun yo', tzaj ne ne'en Diose <sup>21</sup> se vaa vaa güii cunuu sa' cunudanj nij rasuun yo' rihaan chumij, ne asa' quisij güii yo', ne taj rasuun quirí' taj rasuun cuchruu ma'. 'Q se ve'é ndo'o gāā nu' nij rasuun yo' ei. Dan me se ase vaa ma'an nij ta'níi Diose ro', danj gāā uún nij rasuun uún, ne ve'é ndo'o gāā nij yo' adonj.

<sup>22</sup> Dan me se ne'en ní' se vaa ran' uxrá nu' rasuun man rihaan chumij sayuun cuanō, ne me uxrá rá yo' cunuu naca uún yo', ne na'vij yo' quisij güii cunuu sa' yo' adonj. <sup>23</sup> Vaj a doj, ne ráchej ma'an ní' uún, ne na'vij ní' cunuu naca ma'an ní' uún a. Dan me se yanj Nimán Diose gā ní', ne sa' uxrá vaa Nimán Diose, ne che'é dan ne'en ní' se vaa rque Diose se sa' doj rihaan ní', ne ne'en ní' se vaa vaa güii, ne quene'en yuvij se vaa guun ta'nij Diose man ma'an ní', ne cunuu sa' nu' nee man ní' a. <sup>24</sup> Dan me se tinanii Diose man ní' ri-

haan chrej chi'ij uun chij nimán ní, ne che'é dan guun ya rá ní se vaa cavij sa' ní, tzaj ne ataa quene'en ní nu' se vaa qui'yaj Diose che'é ní, ne che'é dan nucaj ndo'o rá ní man Diose se vaa ya ya qui'yaj so' che'é ní a. <sup>25</sup> Ne ne'en ní daj qui'yaj Diose che'é ní ma'. Maan se nucaj rá ní man Diose, ne che'é dan se gaa ra'yanj nimán ní ma'. Maan se gaa nanaj nimán ní, ne na'vij ní ndaa se cavij sa' ní qui'yaj Diose adonj.

**Nana nihánj taj xna'anj se vaa racuíj ndo'o Diose man ní' a**

<sup>26</sup> Sese ne ne'en ní qui'yaj ní nu' se vaa no xcúun ní qui'yaj ní, ne Nimán Diose racuíj man ní, ne guun nucaj ní a. Ne ne'en ní daj ca'mii ní gaa achín ni'yaj ní rihaan Diose ma'. Che'é dan achín ni'yaj Nimán Diose che'é ní, ne taj xna'anj Nimán Diose rihaan Diose nana me rá ma'an ní ca'mii ní a. <sup>27</sup> Dan me se Nimán Diose ne'en daj me rá ní cataj xna'anj ní rihaan Diose, ne uno Diose a'mii Nimán Diose che'é ní ei. Ne'en Nimán Diose me se achiin man ní, ne achín ni'yaj Nimán Diose rihaan Diose se vaa rque Diose se vaa achiin man ní a. Dan me se ne'en Diose se vaa inanj se vaa a'vej rá Diose nicaj ní achín ni'yaj Nimán Diose, ne danj 'yaj Nimán Diose che'é cunudanj ní sij cunuu sa' nimán rihaan Diose adonj.

<sup>28</sup> Dan me se ne'en ní se vaa racuíj ndo'o Diose man ní sij aráj cochroj rihaan Diose ei. 'O se canacúun Diose man ní cayáan ní ga Diose nu' cavii nu' ca'anj, ne che'é dan me avii sa' nu' suun 'yaj suun ní ga Diose adonj. <sup>29</sup> Gaa naá me se quene'en Diose se vaa canoco' ní man so' vaa güii, gaa ne yo'o guun rá Diose se vaa naqui'yaj sa' Diose nimán ní, ne ase vaa ta'nii Diose sí cu'naj Jesucristó ro', danj gaa ní uún, ne vaa güii cumán ndo'o tinúu Jesucristó do', ra'vij Jesucristó do', ne so' guun sí chava' rihaan cunudanj ní a. <sup>30</sup> Gaa ne canacúun Diose man ní, gaa ne cunuu sa' ní rihaan Diose, qui'yaj Diose, gaa ne ya guun chij ní ga Diose, qui'yaj ma'an Diose adonj.

**Nana nihánj taj xna'anj se vaa daj chihaa míj se guun tanáj Diose man ní' ma'**

<sup>31</sup> Dan me se Diose me tuvi' ní, ne che'é dan taj sí quisij qui'yaj sayuun man ní ma'. <sup>32</sup> 'O se ne cuhu'vi' Diose rque Diose ma'an ta'nii Diose caví che'é ní, ne che'é dan guun ya rá ní se vaa rque Diose nu' se sa' rihaan ní, ne cavij sa' ní adonj. <sup>33</sup> Ní' sij narii Diose man me se se guun cuta' yuvij cacun' xraá ní rihaan Diose ma'. 'O se ma'an Diose cataj se vaa cunuu sa' ní rihaan so' a. <sup>34</sup> Taj yuvij cuta' cacun' xraá ní sij narii Diose man ma'. 'O se caví Jesucristó che'é ní, ne cunuu i'na' uún Jesucristó, ne cuano nicun' so' x'núu Diose, ne ma'an so' me sí achín ni'yaj rihaan Diose che'é ní adonj.

<sup>35</sup> A 'ó güii se guun yanij Jesucristó rihaan ní, qui'yaj nij yuvij ma'. Yo'o 'ee rá Jesucristó man ní ei. Ca'vee se quiran' ní sayuun do', ca'vee se quinano ndo'o rá ní do', ca'vee se quitaj ri'yunj yuvij man ní do', ca'vee se

quina'aan rque ní do', ca'vee se quinavij sa'anj rihaan ní do', ca'vee se caví ní do', tzaj ne daj chihaa míj se guun yanij Jesucristó rihaan ní ma'. <sup>36</sup> No nana rihaan danj Diose se vaa che'é se noco' ní man Diose, che'é dan me rá yuvij ticavi' yuvij man ní daj a orá, ne ase vaa ticavi' nii man matzinj ro', danj me rá nii ticavi' nii man ní, taj danj Diose a. <sup>37</sup> Tzaj ne ca'vee se daj a sayuun ran' ní, tzaj ne taj se 'yaj ma'. 'O se Jesucristó me sí 'ee rá man ní, ne che'é dan qui'yaj canaán uxrá ní rihaan sayuun adonj.

<sup>38</sup> 'O se guun ya raj se vaa a 'ó rasuun se ca'vee qui'yaj guun yanij Diose rihaan ní ma'. Ca'vee se gaa i'na' ní do', ca'vee se caví ní do', tzaj ne yo'o 'ee rá Diose man ní a. Ca'vee se ma'an nij se-mozó Diose me rá qui'yaj guun yanij Diose rihaan ní, tzaj ne se ca'vee qui'yaj canaán nij so' ma'. Ca'vee se daj a sayuun quiran' ní, tzaj ne se tanáj Diose man ní ma'. Se guun yanij Diose rihaan ní qui'yaj yuvij do', qui'yaj sí chree do', qui'yaj nana chree do', qui'yaj naj guun rasuun do' ma'. Se guun nucaj nij so' qui'yaj nij so' danj ma'. Taj a 'ó rasuun man xtá' taj a 'ó rasuun man rej rque yo'óo qui'yaj ca'vee guun yanij Diose rihaan ní ma'. A 'ó rasuun qui'yaj Diose se ca'vee qui'yaj danj ma'. Yo'o 'ee rá Diose man ní, ne che'é dan ca'née so' man Jesucristó rihaan ní, ne 'nij ra'a Jesucristó man ní, ne 'ee rá so' man ní adonj.

**Nana nihánj taj xna'anj se vaa nanó ndo'o rá sí cu'naj Pablo che'é tuvi' so' nij yuvij israelitá a**

**9** Noco' nu' ní man Jesucristó, ne se ca'mii ne 'unj rihaan nij soj ma'. 'O se yanj Nimán Diose ga 'unj, ne ma'an Nimán Diose cataj rihanj se vaa nana ya ca'mij á. <sup>2</sup> Dan me se inanj nanó ndo'o raj che'é nij tuvij nij yuvij israelitá, ne me raj nayonj rihaan nij so', ne ndaa ca'née nimanj quinaj ma'anj rihaan sayuun, qui'yaj Diose, ne yo'o nacaj Diose man nij so' rihaan sayuun quiran' nij so', ne ca'née nimanj tanáj Jesucristó manj, ne nacaj Jesucristó man nij so' a. <sup>4</sup> Dan me se yuvij israelitá me nij so', ne guun ta'nij Diose man nij so', rá Diose á. Quene'en nij so' se vaa chuguun ndo'o Diose gaa canicun' ma'an Diose ga nij so' gaa naá, ne cataj xna'anj Diose rihaan nij so' daj qui'yaj Diose che'é nij so', ne cataj xna'anj Diose rihaan nij so' daj qui'yaj ma'an nij so' a. Tucuyón Diose man nij so' daj qui'yaj nij so' gaa na'vij nij so' rihaan Diose, ne cataj Diose rihaan nij so' se vaa ya ca'nej Diose 'o sí tñanani man nij so' rihaan sayuun a. <sup>5</sup> Xij nij yuvij israelitá me nij sí man gaa naá sí cu'naj Abraham do', sí cu'naj Isaac do', sí cu'naj Jacob do' a. Yo'o tuvi' nij so' me Jesucristó sí ca'née Diose tñanani man yuvij rihaan sayuun, ne Jesucristó me se Diose me so', ne uun chij so' rihaan cunudanj a. Ve'é ca'mii ní che'é so' nu' cavii nu' ca'anj ei. Veé danj gaa ya ei.

**Nanə nihánj taj xna'anj se vaa inənj nij yuvij israelitá narii Diose me ya ya yuvij israelitá rihaan Diose a**

<sup>6</sup> Dan me se gaa naá cataj Diose se vaa ya canoco' nij yuvij israelitá man so' nu' cavii nu' ca'anj, ne me che'é ne noco' nij yuvij israelitá man Diose cuano, rá soj ga. 'Q se quisij ya ndaa vaa ca'mii Diose, tzaj ne ne narij ya Diose man cunudənj nij yuvij israelitá ma'. Nuveé ya ya yuvij israelitá me cunudənj nij so' rihaan Diose ma'.

<sup>7</sup> Abraham sí cayáan gaa naá ro', doj ta'níí ta'nij si'no so' guun ta'níí Diose, ne dan me se cataj danj Diose se vaa grún' nij ta'níí ta'nij si'no sí cu'naj Isaac me ya ya ta'níí ta'nij si'no sí cu'naj Abraham rihaan Diose á. Dənj ca'mii Diose rihaan sí cu'naj Abraham gaa naá a.

<sup>8</sup> Dan me se cataj Diose se vaa se guun ta'nij Diose man cunudənj nij ta'níí ta'nij si'no sí cu'naj Abraham ma'. Məan se ta'aj nij so' narii Diose, ne inənj che'é nij sí narii Diose ca'mii Diose, gaa cata' tu'va Diose se vaa ya canoco' nij so' man so' a. <sup>9</sup> Dan me se gaa ataa ca'n-gaa sí cu'naj Isaac sí narii Diose man, ne ca'mii Diose che'é so', cataj Diose se vaa nasij 'o yo', gaa ne ca'na' uún Diose rihaan Abraham, ne ya gaa 'o ta'nij sno'o chana cu'naj Sara a. Ne sno'o cunii yo' ro', me Isaac a. Dənj cataj Diose rihaan Abraham a.

<sup>10</sup> Ne vaa chana cu'naj Rebeca uún, ne cotoj no' ga grún' nica no' sí cu'naj Isaac, ne nari' no' ndaa ne'ej cuaté nyu rque no' a. <sup>11</sup> Gaa ataa ca'ngaa ne'ej, ne cataj xna'anj Diose rihaan no' se vaa qui'yaj suun ne'ej taj yaan ca'ngaa rihaan ne'ej noco' xco, cataj Diose a. 'Q se ataa ca'ngaa ne'ej, ne taj a 'ó roj so' qui'yaj sa' do', qui'yaj chi'ij do' ma'. Taj se sa' qui'yaj sí guun chij rihaan tinúú, ne taj cacun' tumé sí qui'yaj suun che'é tinúú ma'. Məan se inənj danj qui'yaj Diose narii Diose man yo' o so' guun chij so' rihaan tinúú so', che'é rej aj guun rá Diose daj gaa suun čata 'o 'o so' rihaan Diose nanj ei. <sup>13</sup> Dan me se taj danj Diose se vaa cunuu 'ee rá Diose ne'en Diose man nij tuvi' sí cu'naj Jacob sí noco' xco, tzaj ne quiri' nij tuvi' sí cu'naj Esaú rihaan Diose, taj danj Diose adonj.

**Nanə nihánj taj xna'anj se vaa ca'vee narij Diose naj guun yuvij a**

<sup>14</sup> Dan me se nij qui'yaj Diose rihaan sí cu'naj Esaú, rá soj na'. Taj a doj ma'. <sup>15</sup> 'Q se gaa naá ca'mii Diose rihaan sí cu'naj Moisés, cataj Diose a:

—No xcuún 'unj gaa 'ee rá 'unj ne'én 'unj naj guun yuvij a. —Dənj ca'mii Diose rihaan Moisés gaa naá a.

<sup>16</sup> Dan me se ca'vee se daj a me rá yuvij, ca'vee se daj a qui'yaj yuvij, tzaj ne se ca'vee qui'yaj nij yuvij se vaa me rá ma'an nij yuvij ma'. Orún' Diose me sí cataj me sí cunuu 'ee rá so' man adonj.

<sup>17</sup> Ne rihaan danj Diose nó nana ca'mii Diose rihaan sí cu'naj Faraón gaa cataj Diose:

—Guún so' sí nicaj suun, qui'yáj, gaa ne quene'en yuvij daj quirán' so', qui'yáj, ne xcaj nij yuvij cuénta se vaa Diose sí nucaj mej a. —Nənj cataj Diose rihaan sí cu'naj Faraón gaa naá a.

<sup>18</sup> Dan me se ne'en ní' se vaa sese me rá Diose cunuu 'ee rá Diose man 'o so', ne cunuu 'ee rá Diose man so', ne sese me rá Diose guun nichraj rá 'o so', ne guun nichraj rá so', qui'yaj uún Diose a.

<sup>19</sup> Vaa yuvij cataj: "Che'é dan, me che'é uta' Diose cacun' xráa yuvij ga. 'Q se inənj se me rá Diose qui'yaj ní' 'yaj ní' á". Dənj cataj ta'aj yuvij a. <sup>20</sup> Tzaj ne ne nó xcuún ní' cataj ní' se vaa ne nó xcuún Diose qui'yaj so' ndaa vaa 'yaj so' ma'. 'Q se Diose me sí qui'yaj man ní', ne ne nó xcuún ní' cachinj na'anj ní' man Diose me che'é cavii nij ta'aj ní' ma'. <sup>21</sup> Dan me se sí 'yaj xruj me se doj yo'óo niquii gaa rihaan so', gaa ne ca'vee qui'yaj so' xruj a. Doj yo'óo niquii nicaj so' qui'yaj so' xruj ve'é ndo'o vaa, gaa ne doj yo'óo niquii nicaj so' qui'yaj so' xruj nij doj a. Ca'vee qui'yaj so' daj me rá ma'an so' á.

<sup>22</sup> Ne ase vaa 'yaj sí 'yaj xruj ro', danj vaa 'yaj Diose, ne dan me se quiri' ndo'o ta'aj yuvij qui'yaj Diose, ne vaa güii ca'anj nij so' rihaan ya'an a. Uun yuva Diose man nij so' che'é cacun' 'yaj nij so', ne me rá Diose caxrii yuva Diose man nij so', ne me rá Diose tijaan Diose se vaa nucaj ndo'o Diose, tzaj ne aráj x'naa uxrá Diose ni'yaj Diose man nij yuvij, <sup>23</sup> che'é rej guun rá Diose tijaan Diose rihaan nij yuvij nu' ndaa vaa qui'yaj so' che'é yo'óo nij yuvij, ne yo'óo nij so' me se aj guun rá Diose se vaa guun chij nij so' ga so', ne che'é dan cunuu 'ee rá so' man nij so', gaa ne xcaj cunudənj nij yuvij cuénta se vaa sí uun chij sa' ndo'o me Diose ei.

<sup>24</sup> Ma'an ní' me nij yuvij guun chij ga Diose, ne dan me se ta'aj ní' me yuvij israelitá, ne yo'óo ta'aj ní' me yuvij yanij, tzaj ne canacúún Diose man 'o 'o ní' guun chij ní' ga so' adonj.

<sup>25</sup> Ase vaa nana a'mij nihánj ro', danj vaa nana ca'mii Diose gaa naá nana cachrón sí cu'naj Oseas rihaan yanj a. Dan me se cataj Diose a:

—Yuvij ne noco' manj me se ne 'ee raj man nij so' ma'. Tzaj ne vaa güii guun nij so' tuvij, ne vaa güii cunuu 'ee raj man nij so' adonj.

<sup>26</sup> Dan me se məan rej nicun' 'unj gaa cataj 'unj se vaa nuveé tuvi' 'unj me nij yuvij ro', məan dan canicún' 'unj cataj 'unj se vaa ta'nij ma'anj me nij so' a. 'Q se Diose vaa i'na' mej adonj.

—Dənj ca'mii Diose gaa naá a.

<sup>27</sup> Ne nucaj ca'mii sí cu'naj Isaías gaa naá che'é nij yuvij israelitá a. Cataj so':

—Ca'vee se guun que'ee uxrá nij sí israelitá, ne ndaa ase uun rá' ne'én' yo'óo chruy naj tu'va na ya'anj guun rá' quene'én' man nij tuvi' nij so', tzaj ne taj que'ee nij so' cavij sa' ma'. 'Q se doj tuvi' nij so' cavij sa' nanj adonj. <sup>28</sup> Orá le'ej nii qui'yaj suun Diose nu' suun vaa rihaan so' ca'ne' so' cacun' che'é nu' yuvij man rihaan chumij adonj. —Dənj ca'mii sí cu'naj Isaías a.

<sup>29</sup> Veé dan ca'mii uún sí cu'naj Isaías che'é nij yuvij israelitá, ne cataj uún so'— Guun nucaj ndo'o Diose guun chij Diose á. Ne ní' me se avi' ní' che'é cacun' tumé ní', tzaj ne tjanii Diose man doj tuvi' ní' sij israelitá rihaan sayuun a. Sese taj tuvi' ní' quinanii rihaan sayuun, ne cavij cunudənj nij yuvij man chiháan ní', ne quinavij chiháan ní', ne ase vaa navij chuman' Sodoma do', ase vaa navij chuman' Gomorra do', danj

gaa quinavij chiháan ní' nanj adonj. —Veé danj ca'mii síí cu'naj Isaías che'é nij yuvij israelitá gaa naá a.

**Nanā nihánj taj xna'anj se vaa ne cunūu sã' nij yuvij israelitá rihaan Diose, che'é se ne cuchuman rá nij so' ni'yaj nij so' man Jesucristó a**

<sup>30</sup> Xcãj ní' cuentá daj qui'yaj nij yuvij israelitá do', daj qui'yaj nij yuvij yaníj do', rihaan Diose á. Dan me se nuveé yuvij israelitá me nij yuvij yaníj, ne ne guun rá nij so' qui'yaj suun nij so' yan cunūu sã' ma'an nij so' rihaan Diose, tzaj ne ta'aj nij so' me síí amán rá ni'yaj man Diose, ne che'é dan 'o cunūu sã' nij so' rihaan Diose ei. <sup>31</sup> Ino qui'yaj que'ee nij yuvij israelitá a. Dan me se qui'yaj suun uxrá nij so' nano' nij so' chrej cunūu sã' ma'an nij so' rihaan Diose, tzaj ne ne nari' nij so' chrej sã' ma'. <sup>32</sup> Dan me se ne nari' nij so', che'é se ne cuchuman rá nij so' ni'yaj nij so' man Jesucristó ma'. Ne guun ya rá nij so' se vaa račuíj Diose man nij so' cunūu sã' nij so' rihaan Diose ma'. Maan se cunūu sã' ma'an nij so', rá nij so', ne qui'yaj suun uxrá nij so' che'é rej ca'vee cunūu sã' ma'an nij so', rá nij so' a. Ne ca'vej rá nij so' cuchuman rá nij so' ni'yaj nij so' man Jesucristó, ne dan me se ase vaa 'o yuvej aráan chrej ro', danj vaa Jesucristó rihaan nij so', ne ase vaa uun na'aj yuvij naxru' rihaan yuvej ro', danj vaa guun na'aj nij yuvij israelitá che'é se ne ca'vej rá nij so' cuchuman rá nij so' ni'yaj nij so' man Jesucristó adonj.

<sup>33</sup> 'Q cuyaañ vaa nanā a'mij gã nanā a'mii danj Diose che'é Jesucristó, ne dan me se gaa naá cataj Diose a:

—Ni'yaj so' ei. Aj cuné' 'unj yo'q yuvij chuman' cu'naj Jerusalén, ne ase vaa 'o yuvej vaa so', nucuaj ndo'o so' a. Naxru' yuvij, qui'yaj yuvej yo', ne guun na'aj nij yuvij quene'en nij yuvij man so', tzaj ne sese cuchuman rá yo'q so' quene'en so' man síí cuné' 'unj, ne se guun na'aj so' ma'. Tananj cavij sã' so' adonj. —Dan me nanā ca'mii Diose che'é Jesucristó a.

**10** Dan me se achíin ni'yaj ndo'oj rihaan Diose che'é nij tuví' 'unj nij yuvij israelitá, tinuj, nocoj. 'Ee rá 'unj man nij so', ne che'é dan me ndo'o raj quinaniij nij so' rihaan sayuun a. <sup>2</sup> Dan me se sã' qui'yaj nij so' gaa guun ndo'o rá nij so' cunūu sã' nij so' rihaan Diose, tzaj ne ne ne'en nij so' daj qui'yaj nij so' ne ca'vee cunūu sã' nij so' rihaan Diose ma'. <sup>3</sup> Ne xcãj nij so' cuentá che'é se vaa aj qui'yaj Diose che'é nij so', ne ne xcãj nij so' cuentá se vaa ca'vee cunūu sã' nij so' rihaan Diose, qui'yaj ma'an Diose ma'. Maan se nano' ma'an nij so' chrej cunūu sã' ma'an nij so' rihaan Diose, ne che'é dan ataa qui'yaj nij so' ndaa vaa me rá Diose qui'yaj nij so', ne che'é dan ataa cunūu sã' nij so' adonj. <sup>4</sup> Gaa naá, ne canoco' yuvij se-tucuaj Moisés, ne veé dan me se cunūu sã' nij so' rihaan Diose, rá nij so', tzaj ne yaj nihánj me se aj quisíj se-tucuaj Moisés, qui'yaj Jesucristó, ne 'o se yo'q aman rá ní' ni'yaj ní' man Jesucristó, gaa ne cunūu sã' ní' rihaan Diose nanj adonj.

**Nanā nihánj taj xna'anj se vaa quinaniij cunudanj nij yuvij cuchumán rá ni'yaj man Jesucristó rihaan sayuun a**

<sup>5</sup> Gaa naá cachrón síí cu'naj Moisés nanā rihaan yanj, ca'mii so' che'é se-tucuaj ma'an so', ne cataj so' se vaa sese guun nucuaj yuvij cunū yuvij nu' tucuáan cuchruj ma'an so', ne cayáan nij yuvij rihaan Diose nu' cavii nu' ca'anj a. Danj ca'mii Moisés gaa naá a. <sup>6</sup> Tzaj ne cuano nihánj me se aj xcãj ní' cuentá se vaa nuu sã' ní' rihaan Diose che'é yan cuchumán rá ní' cuno ní' nanā ca'mii so', ne che'é dan yo'q a'mii ní' gã síí cu'naj Moisés gaa naá, taj ní' se vaa taj che'é cavij yuvij rej xtã' do', nanō' nij yuvij man síí tinanii man nij so' rihaan sayuun, <sup>7</sup> ne taj che'é ca'anj yuvij rej rque yo'óo do', nanō' nij yuvij man so' rej man nimán ma'. Danj taj ní' gã síí cu'naj Moisés a.

<sup>8</sup> Ne cataj uún síí cu'naj Moisés se vaa nanā achiin mán so' ro', nuveé nanā ca'na' rej gan' me nanā yo' ma'. Tananj ndaa tu'va ma'an so' do', ndaa nimán ma'an so' do', nuū nanā yo' nanj adonj, taj Moisés, ne nanā yo' me nanā a'mii yuvij taj yuvij se vaa amán rá yuvij ni'yaj yuvij man Jesucristó, ndaa vaa a'mii natáj nuj rihaan yuvij ei. <sup>9</sup> 'Q se sese ca'mii yá so' cataj so' rihaan tuví' so' se vaa Jesucristó 'nij ra'a mán so', ne sese guun ya rá so' se vaa cunūu i'na' uún Jesucristó, qui'yaj Diose, gaa cavi' so', ne quinaniij so' rihaan sayuun a. <sup>10</sup> 'Q se nimán ní' me se yo' me cuchuman rá ní' ne'en ní' Jesucristó, ne ca'vee cunūu sã' ní' rihaan Diose, ne tu'va ní' me se yo' me ca'mii ya ní' cataj ní' se vaa noco' ní' man Jesucristó, ne ca'vee quinaniij ní' rihaan sayuun adonj.

<sup>11</sup> Dan me se taj uún danj Diose se vaa xa' síí amán rá ni'yaj man Jesucristó, tzaj ne se guun na'aj so' ma'. Ya cavij sã' so' adonj. Danj taj danj Diose a. <sup>12</sup> 'Q se 'o cuyaañ vaa cunudanj yuvij rihaan Jesucristó, ne dan me se yuvij israelitá do', yuvij yaníj do', 'o cuyaañ vaa nij so' rihaan Jesucristó, tzaj ne 'nij ra'a Jesucristó man cunudanj nij so', ne uun nucuaj uxrá Jesucristó račuíj so' man cunudanj yuvij achíin ni'yaj rihaan so' a. <sup>13</sup> Dan me se taj uún danj Diose a: "Yuvij achíin ni'yaj rihaan síí 'nij ra'a man ní' ro', quinaniij cunudanj nij so' rihaan sayuun, ne cavij sã' nij so' adonj". Danj taj danj Diose a.

**Nanā nihánj taj xna'anj se vaa achiin ca'mii natáj nii che'é Jesucristó rihaan yuvij ataa cunū nanā che'é so' a**

<sup>14</sup> Tzaj ne taj che'é cachinj ni'yaj yuvij rihaan Jesucristó, sese ataa cuchuman rá nij yuvij ni'yaj nij yuvij man Jesucristó ma'. Ne se ca'vee cuchuman rá nij yuvij ni'yaj nij yuvij man so', sese ataa cunū nij yuvij se-nana so' ma'. Ne se ca'vee cunū nij yuvij, sese taj síí a'mii natáj rihaan nij yuvij ma'. <sup>15</sup> Ne se cuhi' síí a'mii natáj rihaan yuvij, sese se ca'née nii man so' ma'. Dan me se a'mii uún danj Diose, taj yo': "Ve'é ndo'o 'yaj síí ca'anj ca'mii natáj nanā sã' ei". Danj taj danj Diose a.

<sup>16</sup> Tzaj ne vaa yuvij na'vej rá cunō nana sã' ma'. Inañj ñanj ca'mii síí cu'naj Isaías gaa cachíín ni'yaj so' rihaan Diose, ne cataj so':

—Ataj síí hij. Doj yuvij amán rá cunō nana ca'mii núj a —taj so' rihaan Diose a.

<sup>17</sup> Tzaj ne veé dan me se asino a'mii natáj nii rihaan yuvij che'é Jesucristó, gaa ne uno nij yuvij, ne xcaj nij yuvij cuentá che'é se vaa taj xna'anj Diose rihaan nij yuvij, gaa ne chumán rá nij yuvij ni'yaj nij yuvij man Diose ñanj adonj.

**Nana nihánj taj xna'anj se vaa na'vej rá nij yuvij israelitá cunō nij so' se-nana Jesucristó nana sã' ma'**

<sup>18</sup> Tzaj ne cataj ta'aj yuvij se vaa ataa cuchí' nana sã' rihaan nij yuvij israelitá a. Ñanj ca'mii ta'aj nij so', tzaj ne aj cuchí' nana sã' rihaan nij yuvij israelitá ei. Dan me se taj ñanj Diose se vaa aj quene'en cunudanj nij yuvij man rihaan chumij se-nana Diose nana sã' a. Ñanj a'mii ñanj Diose á.

<sup>19</sup> Tzaj ne yo'ó ta'aj yuvij cataj se vaa ne ne'en ya nij yuvij israelitá se vaa tinanii Diose man cunudanj nij yuvij man rihaan chumij rihaan sayuun ma'. Ñanj cataj uún nij yuvij yo', tzaj ne taj ma'. Maan se aj ne'en nij yuvij israelitá ei. 'Q se gaa naá cachrón síí cu'naj Moisés nana ca'mii Diose rihaan nij yuvij israelitá rihaan ñanj, gaa cataj Diose se vaa vaa güii xcaj nij yuvij israelitá cuentá se vaa cavii sã' nij yuvij ñanj, qui'yaj Diose, ne che'é dan guun xcoj ruvaa rá nij yuvij israelitá quene'en nij so' nij yuvij ñanj yo' a. 'Q se nuveé yuvij acaj cuentá me yuvij ñanj, ne che'é dan guun xcoj ruvaa rá nij yuvij israelitá che'é se vaa cavii sã' nij yuvij ñanj qui'yaj Diose ei. Ñanj ca'mii Diose gaa naá a.

<sup>20</sup> Ne 'o cuyaan vaa nana nihánj gaa nana cachrón uún síí cu'naj Isaías rihaan ñanj gaa naá, ne dan me se quisíj rá so' cataj so' se vaa nij yuvij ñanj me se ne nano' nij so' man Diose, tzaj ne nari' nij yuvij ñanj man Diose, ne ndá' se ne guun rá nij so' quene'en nij so' me rej vaj Diose, tzaj ne curuvi' Diose rihaan nij so' a. Ñanj taj síí cu'naj Isaías gaa naá a.

<sup>21</sup> Tzaj ne inō vaa nana ca'mii Diose rihaan nij yuvij israelitá gaa naá, taj síí cu'naj Isaías a. Dan me se cataj Diose rihaan nij yuvij israelitá se vaa 'o me rá Diose nacaj Diose man nij yuvij israelitá, tzaj ne ne ca'vej rá nij so' cunō nij so' rihaan Diose ma'. Inañj tucuáá nij so' rihaan Diose ñanj á. Ñanj taj Diose, ne cachrón síí cu'naj Isaías rihaan ñanj a.

**Nana nihánj taj xna'anj se vaa cunuu 'ee rá Diose ni'yaj Diose ta'aj nij yuvij israelitá a**

**11** Che'é se tucuáá nij yuvij israelitá rihaan Diose, che'é dan quirí'ñj ñanj Diose man nij so', rá soj na'. Taj ma'. 'Q se ma'anj me síí israelitá uún ei. Ne dan me se xíí 'unj me síí cu'naj Abraham gaa naá, ne xíí 'unj me síí cu'naj Benjamín uún ei. <sup>2</sup> Ne quirí'ñj ñanj Diose man nij yuvij israelitá ma'. 'Q se gaa ataa qui'yaj Diose chumij, ne 'o quene'en Diose se vaa canoco' nij so' man Diose a.

Ne'en nij soj ñanj danj Diose che'é síí cu'naj Elías gaa naá a. Dan me se cuta' Elías cacun' xráá nij yuvij israelitá, <sup>3</sup> ne cataj so':

—Ataj síí hij. Ticavi' nij yuvij israelitá man nij síí nata' se-nana so' rihaan yuvij che'é so' á. Tiri' nij so' rej quina'víj yuvij rihaan so' á. Taj orunj quináj ñanj á. Ne me rá nij so' ticavi' nij so' mán 'unj uún adonj. —Ñanj ca'mii síí cu'naj Elías rihaan Diose a.

<sup>4</sup> Gaa ne ca'mii uún Diose rihaan so', cataj Diose:

—Taj ma'. Ne taj oruún so' ma'. Tzaj ne vaa 'o cunuu' hij míj yuvij israelitá noco' manj, ne a 'ó nij so' ne na'víj rihaan ya'anj cu'naj Baal ya'anj ne vaa i'na' ma'. —Ñanj ca'mii Diose rihaan síí cu'naj Elías a.

<sup>5</sup> Ne veé ñanj vaa uún nij yuvij israelitá síí man cuano, ne cunuu 'ee rá Diose man nij yuvij israelitá, ne narii Diose man ñanj tuvi' nij so' ei. <sup>6</sup> Inañj ñanj qui'yaj ma'ñ Diose che'é ta'aj nij yuvij israelitá, tzaj ne nuveé che'é se sã' qui'yaj ma'ñ nij so' me narii Diose man nij so' ma'. Sese che'é se sã' qui'yaj nij so' narii Diose man nij so', ne taj che'é cataj ní' se vaa cunuu 'ee rá uun Diose man nij so' ma'.

**Nana nihánj taj xna'anj se vaa vaa güii cunuu sã' uún nij yuvij israelitá rihaan Diose a**

<sup>7</sup> Cuanō ro', cunudanj nij yuvij israelitá me rá cunuu sã' rihaan Diose, tzaj ne ne guun nucuaj cunudanj nij so' cunuu sã' ma'ñ nij so' ma'. Tzaj ne narii Diose man ta'aj nij so', ne cunuu sã' ta'aj nij so' rihaan Diose, ne quináj uun yo'ó ta'aj nij yuvij israelitá yo' a. Ne xa' nij síí quináj me se ne guun nucuaj nij so' ñanj chihaa míj xcaj nij so' cuentá che'é Diose ma'. <sup>8</sup> Dan me se ñanj taj uún ñanj Diose, taj yo': "Ne ca'vee xcaj nij so' cuentá, qui'yaj Diose ma'. 'Q se ase vaa síí tuchri' ñoj', ase vaa síí so' ñoj', ñanj vaa nij so', ne ñanj vaa nij so' ndaa cuano ñanj adonj". Ñanj ca'mii ñanj Diose che'é nij yuvij israelitá a. <sup>9</sup> 'Q cuyaan vaa nana nihánj gaa nana ca'mii síí cu'naj David gaa naá uún, ne cataj so' se vaa ase ran' xcuu ata' ra'nga' ro', ñanj quiran' nij yuvij israelitá a. Dan me se cavii sã' uxrá nij so' rihaan chumij nihánj, tzaj ne taj ni'yón quiran' nij so' sayuun, ne quiran' nij so' sayuun che'é nu' sayuun qui'yaj nij so' a. <sup>10</sup> Se guun nucuaj nij so' xcaj nij so' cuentá, maan se quinano ndo'o rá nij so' che'é sayuun quiran' nij so' a. Ñanj ca'mii síí cu'naj David che'é se vaa quiran' nij yuvij israelitá, ne ya ñanj quiran' guuee nij so' ñanj adonj.

<sup>11</sup> Dan me se ne cuchuman rá nij yuvij israelitá nana ca'mii Diose, gaa ne quiri' nij so' rihaan Diose, ne veé ñanj gaa nij so' nu' cavii nu' ca'anj, rá nij soj na'. Taj ma'. 'Q se che'é se vaa qui'yaj nij yuvij israelitá, che'é dan vaa ya'núj rihaan nij yuvij ñanj quinani'ñj nij so' rihaan sayuun, gaa ne guun xcoj ruvaa rá nij yuvij israelitá quene'en nij so' nij yuvij ñanj a. <sup>12</sup> Gaa ne canicaj rá nij yuvij israelitá, ne canoco' nij so' Diose adonj. Dan me se che'é se quiri' nij so' rihaan Diose, ne che'é dan cavii sã' cunudanj nij yuvij man rihaan chumij, ne ndaa nij yuvij ñanj cavii sã', tzaj ne asã' nuu sã' nij yu-

vij israelitá rihaan Diose, ne doj a cavii sa' uún cunudanj nij yuvij man rihaan chumii adonj.

**Nana nihánj taj xna'anj se vaa se guun ca'mii xta' nij yuvij yanij rihaan nij yuvij israelitá ma'**

<sup>13</sup> Cuanõ ro', ca'mij rihaan nij soj sij yanij, ne aj cune' Jesucristó mán 'unj guún 'unj apóstol nata' se-nana so' rihaan nij soj sij yanij adonj. Ne aj guun que'ee ndo'o ca'mij rihaan nij yuvij israelitá che'é suun ca'ne' Jesucristó rihanj, ne dan me se aj guun que'ee ndo'o cataj xna'anj 'unj rihaan nij so' se vaa a'mii natáj 'unj se-nana Diose rihaan nij soj sij yanij a. <sup>14</sup> 'O se me raj guun xcoj rá nij so' ni'yaj nij so' man soj sij yanij, gaa ne canoco' ta'aj nij so' nana nocõ' soj, gaa ne quinaniij nij so' rihaan sayuun, raj a. <sup>15</sup> Gaa quiri'ij yanij Diose man nij yuvij israelitá, ne cunuu rcua'aan yo'ó nij yuvij man rihaan chumii ga Diose, ne che'é dan asa' nacaj uún Diose man nij yuvij israelitá, ne cavii sa' uxrá ma'an nij yuvij israelitá uún a. Dan me se ase vaa síi cavi' vaa nij so' cuanõ ei. Na'vee quinaniij nij so' rihaan sayuun, tzaj ne asa' nacaj uún Diose man nij so', ne ase vaa síi na'núj ro', danj gaa nij so', cavii sa' uxrá nij so' ei. <sup>16</sup> Ya nacaj uún Diose man nij yuvij israelitá nanj á. 'O se ne'en ní' se vaa sese go' nii ta'aj tan' rihaan Diose, ne cunuu guee ya stan' nii rihaan Diose, ne sese sa' vaa yáa chruun rihaan Diose, ne sa' vaa cunú' chruun yo' rihaan Diose ei. Che'é dan ne'en ní' se vaa sese cunuu sa' ta'aj nij yuvij israelitá rihaan Diose, ne gaa sa' cunudanj nij yuvij israelitá rihaan Diose adonj.

<sup>17</sup> Ne'en soj se vaa ne cuchuman rá ta'aj nij yuvij israelitá ni'yaj nij so' Diose ma'. Che'é dan, ase vaa 'yaj nii man ta'aj nij ra'a chruun olivó ne rii chruj ro', danj vaa qui'yaj Diose man nij so', ne quiri'ij yanij Diose man nij síi ne cuchuman rá yo', gaa ne nacaj Diose man soj sij yanij, ne dan me se ase vaa ra'a chruun olivó nicun' rco' quij vaa soj, tzaj ne nacaj Diose man soj, caxrij Diose man soj tacóo chruun olivó sa', ne guun soj 'o chruun sa' vaa, ne vaa i'na' soj, 'yaj yáa chruun yo' nanj ei. <sup>18</sup> Tzaj ne se guun cataj soj se vaa sa' doj vaa soj rihaan ra'a chruun ca'anj yanij qui'yaj Diose ma'. Dan me se sese vaa se uun uxrá ma'an soj rá soj, ne me ma'an rá soj nanj ei. Dan me se xcaj soj cuentá se vaa taj se uun soj rihaan yáa chruun yo' mei. 'O se ma'an yáa chruun yo' 'yaj don 'vee vaa i'na' soj sij uun ra'a chruun chuguanj. Xa' soj, tzaj ne maan chruun le'ej nata' nayón uun me soj nanj ei. <sup>19</sup> Xraj, ne cataj yo'o tuvi' soj: "Tzaj ne quiri'ij yanij Diose man yo'ó nij ra'a chruun yo' che'é rej ca'vee caxrij so' mán 'unj tacóo chruun yo' ei", rá yo'o tuvi' soj a. <sup>20</sup> Tzaj ne maan che'é se nuvee sij amán rá ni'yaj Diose me ta'aj nij yuvij israelitá yo' me quiri'ij yanij Diose man nij so', ne maan che'é se amán rá soj ni'yaj soj Diose me nicun' soj rihaan Diose cuanõ chuguanj. Tzaj ne se guun cataj soj se vaa vaa se uun ndo'o soj ma'. 'O se cuchu'vi' nimán soj ei.

<sup>21</sup> Dan me se nda' se chruun cavii man raá chruun ya me nij síi israelitá, tzaj ne ne caraá x'naa Diose man nij so', ne quiri'ij yanij Diose man ma'an ya nij so', ne

che'é dan táa a soj, ne se cuchu'vi' Diose quiri'ij yanij Diose man soj sij ra'a chruun cavii quij a mei. <sup>22</sup> Dan me se xcaj soj cuentá, ne nda' se yuvaa ya Diose ne ne'en Diose qui'yaj Diose sayuun man nij yuvij 'yaj se nij rihaan Diose, tzaj ne cunuu 'ee rá Diose man soj, ne ve'é ndo'o qui'yaj Diose rihaan soj ei. Ne ve'é qui'yaj Diose rihaan soj nu' cavii nu' ca'anj, sese se ca'anj yanij soj rihaan Diose ei. Sese ca'anj yanij soj, ne quiri'ij yanij Diose man soj nanj adonj. <sup>23</sup> Ne 'o rasuun uún me se nij yuvij quiri'ij yanij Diose me se sese ca'ne' rá nij so' ga suun ne amán rá ni'yaj man Diose, ne ca'vee caxrij uún Diose man nij so' tacóo chruun sa' yo' uún ei. 'O se guun nucuaj Diose qui'yaj Diose danj ei.

<sup>24</sup> Tananj soj, ne chruun le'ej cavii raá chruun olivó man rco' me soj, tzaj ne ca'vee ca'na' soj naxij soj tacóo chruun sa', ne táa a nij síi israelitá, ne maan ra'a chruun sa' me nij so', ne taj sayuun ca'vee ca'na' uún nij so' nanõ uún so' tacóo chruun sa' cavii nij so' a ma'.

**Nana nihánj taj xna'anj se vaa me rá Diose gaa 'ee rá Diose man cunudanj yuvij a**

<sup>25</sup> Dan me se me raj xcaj soj cuentá che'é nana cataj xna'anj Diose rihaan ní', tinuj, nocoj. Síj cuno soj nana nihánj, gaa ne se guun ca'mii xta' soj ma'. Cuanõ nihánj me se na'vee xcaj nij yuvij israelitá cuentá che'é se vaa qui'yaj Diose che'é nij so' ma'. Che'é dan vaa ya'núj catuu soj sij yanij canoco' soj man Diose adonj. Ne xa' nij síi yanij narii Diose, tzaj ne vaa güii canoco' cunudanj nij so' man Diose, gaa ne cuchuman rá nij yuvij israelitá ni'yaj nij so' man Diose, <sup>26</sup> gaa ne tinanii Diose man cunudanj nij yuvij israelitá rihaan sayuun ei. Danj a'mii danj Diose ei. Dan me se taj yo': "Chuman' Jerusalén cavii 'o síi tinanii man yuvij, ne tinavij so' se chi'ii man nimán nij yuvij israelitá a. <sup>27</sup> Danj qui'yaj yá 'unj che'é nij so' güii tinavii 'unj cacun' che'é nij so' adonj". Dan me nana ca'mii Diose, nana nõ rihaan danj Diose a. <sup>28</sup> Dan me se ne guun ya rá nij yuvij israelitá se-nana Diose nana sa' ma'. Che'é dan guun yanij nij so' rihaan Diose, ne vaa ya'núj rihaan Diose catuu soj sij yanij a. Tzaj ne asij naá narii Diose man xij nij yuvij israelitá, ne che'é dan yo'o 'ee rá Diose man nij so' ndaa cuanõ adonj. <sup>29</sup> Daj chihaa mij se natuná Diose se-nana Diose ma'. Se ca'vee ca'nee uún Diose se vaa go' Diose rihaan yuvij ma'. 'O se gaa naá narii Diose man nij yuvij israelitá canoco' nij so' man so', ne se ca'vee cataj uún Diose se vaa se ca'vej rá so' nacaj so' man nij so' ma'.

<sup>30</sup> Dan me se asino yaan ne cunõ nij soj sij yanij rihaan Diose ma'. Tzaj ne ne cuchuman rá que'ee nij yuvij israelitá ni'yaj nij so' man Diose, ne che'é dan cunuu 'ee rá Diose man soj a. <sup>31</sup> Veé dan me se cunuu 'ee rá Diose man soj cuanõ, tzaj ne ne uno nij yuvij israelitá rihaan Diose ma'. Inanj danj vaa nij so' cuanõ, qui'yaj Diose, gaa ne vaa güii cunuu 'ee rá uún Diose man nij so' adonj. <sup>32</sup> Dan me se 'o cuyaan vaa nij yuvij israelitá ga nij yuvij yanij, qui'yaj Diose, ne cunudanj nij yuvij na'vej rá cunõ rihaan Diose, ne che'é dan vaa ya'núj rihaan Diose cunuu 'ee rá Diose man cunudanj

nij yuvij, ne raçuíj yun Diose man cunudanj nij yuvij yo' adonj.

**Nana nihánj taj xna'anj se vaa sa' uxrá vaa Diose adonj**

<sup>33</sup> Inanj sa' uxrá avii raá Diose nanj á. Sa' uxrá ne'en so', ne se guun nucuaj yuvij naqui'yaj çuu yuvij nu' se vaa 'yaj Diose ma'. Veé danj ca'mii 'o síf nata' se-nana Diose gaa naá, cataj so': <sup>34</sup> "Taj vaj yuvij quisij nari' nana avii raá Diose ma'. Me yuvij ca'vee nago' nana çuu man Diose, rá soj ga. <sup>35</sup> Me rasuun ca'vee rque yuvij man Diose, rá soj ga. 'O se ne achiin si'yaj yuvij man Diose ma'. Ne 'yaj xcuún Diose rihaan yuvij ma'". Danj taj síf nata' se-nana Diose gaa naá yo' a. <sup>36</sup> Dan me se ma'an Diose qui'yaj cunudanj rasuun, ne che'é ma'an Diose mán rasuun rihaan chumij, ne se rásuun Diose me cunudanj rasuun a. Ve'é uxrá ca'mii ní' che'é Diose nu' cavii nu' ca'anj adonj. Veé danj gaa ya ei.

**Nana nihánj taj xna'anj se vaa ve'é qui'yaj suun ní' rihaan Diose a**

**12** Nuu 'ee ndo'o rá Diose man ní', tinuj, nocoj. Che'é dan cataj xna'anj 'unj rihaan soj nihánj cuano se vaa qui'yaj suun soj rihaan Diose yaj gaa vaa i'na' soj á. Inanj suun sa' che'é Diose qui'yaj suun soj, gaa ne guun niha' rá Diose, qui'yaj soj ei. Ne'en soj se vaa no xcuún soj qui'yaj soj danj ei. <sup>2</sup> Se cataj soj se vaa sa' ndo'o vaa tucuáán noco' cunudanj nij yuvij man chiháán soj ma'. Tzaj ne ca'vej rá soj cunu sa' nimán soj qui'yaj Diose, ne xcaj naca soj cuentá daj qui'yaj soj gaa yáán soj rihaan chumij nihánj, gaa ne nari' soj daj me rá Diose qui'yaj soj, ne xcaj soj cuentá me se me se sa' ni'yaj Diose á. Dan me se xcaj soj cuentá daj qui'yaj soj ne guun niha' rá Diose, ne xcaj soj cuentá me suun sa' qui'yaj suun soj ne cavii sa' soj doj nu' cavii nu' ca'anj adonj.

<sup>3</sup> Dan me se qui'yaj Diose se luj rihanj, ca'ne' Diose suun rihanj tucu'yonj man nij soj, ne che'é dan cataj xna'anj 'unj rihaan 'o 'o soj daj qui'yaj soj qui'yaj suun soj rihaan Diose á. Dan me se ino gaa suun qui'yaj suun 'o 'o soj rihaan Diose, ne che'é dan xcaj 'o 'o soj cuentá me suun qui'yaj suun 'o 'o soj, ne raçuíj Diose man soj se vaa guun ya rá 'o 'o soj, ne a me suun guun nucuaj 'o 'o soj qui'yaj suun soj suun rque Diose man soj a. Tzaj ne se nanó rá soj, ne se guun rá soj çata soj suun nocoj doj ma'. Maan se xcaj soj cuentá, ne cataj soj se vaa sa' vaa suun vaa rihaan soj ei.

<sup>4</sup> 'O se aj ne'en ní' se vaa vaa ndo'o nee man ní', ne dan me se vaa ra'a ní' vaa tacóo ní' vaa, ne vaa que'ee doj nee man ní', ne ino vaa suun 'yaj suun ra'a ní' do', tacóo ní' do', xréé ní' do', tu'va ní' do', ne ino doj vaa suun 'yaj suun yo'o yo'o nee man ní' a. <sup>5</sup> Dan me se aj canoco' cunudanj ní' man Jesucristó, ne che'é dan ase vaa nu' nee man 'o yuvij ro', danj vaa nu' ní', ne ino vaa suun vaa rihaan 'o 'o ní', tzaj ne raçuíj tuvi' ní', <sup>6</sup> gaa ne guun nucuaj 'o 'o ní' qui'yaj suun 'o 'o ní' suun vaa rihaan 'o 'o ní' a. Danj 'yaj Diose che'é 'o 'o ní', tzaj ne ino vaa suun ne'en 'o 'o ní' qui'yaj suun ní',

qui'yaj Diose a. Che'é dan sese vaa suun rihaan yo'o ní' ca'mii natáj ní' rihaan yuvij che'é Diose, ne sese suun ya rá ní' se vaa ya vaa nana nari' ní', ne ca'mii natáj ní' á. <sup>7</sup> Sese ca'ne' Diose suun rihaan yo'o ní' suun raçuíj ní' man yuvij, ne danj qui'yaj ní' qui'yaj suun ní' che'é tuvi' ní' uún á. Sese vaa suun rihaan yo'o ní' suun tucu'yón ní' se-nana Diose, ne danj qui'yaj uún ní', tucu'yón ní' se-nana Diose á. <sup>8</sup> Sese vaa suun rihaan yo'o ní' nago' ní' chrej nucuaj, ne danj qui'yaj ní' á. Sese vaa suun rihaan yo'o ní' go' ní' rasuun rihaan nij síf nique, ne guun niha' rá ní' qui'yaj ní' danj á. Sese vaa suun rihaan yo'o ní' guun chij ní' rihaan tuvi' ní', ne qui'yaj suun uxrá ní' nicaj yu'unj ní' man tuvi' ní' á. Sese vaa suun rihaan ní' cunu 'ee rá ní' tuvi' ní' do', raçuíj ní' tuvi' ní' do', ne gaa niha' rá ní' qui'yaj ní' danj á.

**Nana nihánj taj xna'anj daj qui'yaj ní' rihaan tuvi' ní' a**

<sup>9</sup> Se cataj soj se vaa 'ee rá soj man tinúú soj, sese ne ya 'ee rá soj tinúú soj ma'. Se tu'va rma'an soj danj ma'. Tzaj ne ya gaa 'ee rá soj tinúú soj, ne se ca'vej rá soj qui'yaj soj se chi'ii ma'. Tzaj ne inanj se sa' qui'yaj soj á. <sup>10</sup> Gaa 'ee ndo'o rá soj man tinúú soj síf noco' man Jesucristó, ne guun niha' rá soj caraá cochroj soj rihaan tinúú soj á. <sup>11</sup> Se gaa rmii soj ma'. Tzaj ne gaa niha' rá soj qui'yaj suun soj che'é síf 'nij ra'a man ní' ei. <sup>12</sup> Ne'en soj se vaa vaa güii cavii sa' ndo'o soj, qui'yaj Diose, ne che'é dan gaa niha' rá soj á. Ca'nej nucuaj soj nimán soj quiran' soj sayuun me rá yuvij qui'yaj yuvij man soj, ne se ca'ne' rá soj ga suun achiín ni'yaj rihaan Diose ma'. <sup>13</sup> Sese vaa se achiin rihaan tinúú soj síf sa' noco' man Diose ro', ne raçuíj soj si'yaj soj rihaan nij so' a. Ne ve'é qui'yaj soj ca'vej soj caran' yuvij tucuá soj do', cha yuvij chraa ga soj do' á.

<sup>14</sup> Xa' síf 'yaj sayuun man soj, tzaj ne ve'é qui'yaj soj rihaan nij so', ne se ca'mii chree soj che'é nij so' ma'. Tzaj ne cachinj ni'yaj soj rihaan Diose se vaa cavii sa' nij so' qui'yaj Diose a. <sup>15</sup> Guun niha' rá soj ga nij yuvij niha' rá, ne ta'vee soj ga síf ta'vee, <sup>16</sup> ne ve'é qui'yaj soj rihaan tinúú soj nij síf amán rá ni'yaj man Jesucristó a. Se guun rá soj çata ma'an soj suun sa' doj ma'. Maan se nago' soj man nij yuvij yun taj suun ata, ne canicun' soj ga nij so' a. Se cataj soj se vaa sij avii ndo'o raá me soj ma'.

<sup>17</sup> Sese qui'yaj yuvij se chi'ii man soj, ne se guun rá soj qui'yaj soj se chi'ii man nij yuvij ma'. Tananj ve'é qui'yaj soj rihaan cunudanj yuvij, ne inanj se sa' qui'yaj soj ni'yaj cunudanj yuvij á. <sup>18</sup> Ve'é cumán soj ga cunudanj yuvij, sese ca'vej rá nij yuvij, ne se cunu' ma'an soj ga yuvij ma'. <sup>19</sup> Se qui'yaj soj sayuun man yuvij 'yaj sayuun man soj ma'. Maan se ca'ne' rá soj, ne Diose me síf naru'vee rihaan nij yuvij qui'yaj sayuun, ne vaa güii caxrij yuvaa Diose man nij so' a. Danj me raj qui'yaj nij soj, tinuj, nocoj. 'O se danj Diose taj se vaa no xcuún Diose naru'vee ma'an Diose, ne vaa güii naru'vee Diose che'é sayuun nanj á. Danj taj danj Diose a. <sup>20</sup> Tzaj ne ino qui'yaj soj rihaan yuvij taj ri'yunj man ní' cuano, taj danj Diose a. Nihánj me nana a'mii



danj Diose a: "Sese na'aan rque síf taj ri'yunj man soj, ne go' soj chraa cha so' á. Sese nacoq so' na, ne go' soj na co'o so' á. Danj qui'yaj soj, ne guun na'aj síf taj ri'yunj man soj, ne quinano rá so' che'é sayuun qui'yaj so' ei". Danj taj danj Diose a. <sup>21</sup> Se guun qui'yaj canaán chi'ij rihaan soj ma'. Se guun guun ma'an soj síf noco' chrej chi'ij ma'. Maan se inanj se sa' qui'yaj soj rihaan síf chi'ij, gaa ne qui'yaj canaán soj rihaan síf chi'ij, ne canoco' so' chrej sa' nicaj soj adonj.

**Nana nihánj taj xna'anj se vaa cunq ní' rihaan nij síf nicaj suun a**

**13** Cunq cunudanj nij soj rihaan nij síf nicaj suun man tucua' suun chiháan soj ei. 'Q se sese nuveé Diose rá, ne se guun nucuaj nij so' quirii ta'nga' nij so' ma'. Diose me síf cune' man nij síf nicaj suun adonj. <sup>2</sup> Che'é dan cunq soj rihaan nij síf nicaj suun, ese danj me rá Diose qui'yaj soj, ne sese tucua' soj rihaan nij síf nicaj suun, ne cuta' Diose cacun' xraá soj adonj. <sup>3</sup> Yuvij ne 'yaj sayuun ro', taj che'é cuchu'vi' nij so' rihaan nij síf nicaj suun ma'. Maan se inanj síf 'yaj sayuun cuchu'vi' rihaan nij so', ne che'é dan sese na'vej rá soj cuchu'vi' soj rihaan nij síf nicaj suun, ne ve'é qui'yaj soj, ne ve'é ca'mii nij síf nicaj suun che'é soj adonj. <sup>4</sup> Dan me se 'yaj suun nij síf nicaj suun rihaan ma'an Diose, ne vaa suun rihaan nij síf nicaj suun racu'ij nij so' man soj, ne cavii sa' soj ei. Tzaj ne sese qui'yaj soj cacun', ne cuchu'vi' soj rihaan nij so' á. 'Q se ne ata rma'an nij so' suun ma'. 'Yaj suun nij so' che'é Diose, ne racu'ij nij so' man Diose axrij yuvaa Diose man nij síf 'yaj cacun' adonj. <sup>5</sup> Che'é dan cunq soj rihaan nij síf nicaj suun, ne cuchu'vi' soj qui'yaj nij so' sayuun man soj sese qui'yaj soj cacun', ne xcaj soj cuentá se vaa me rá Diose qui'yaj soj á. <sup>6</sup> 'Q se o' soj sa'anj ata' rihaan nij síf nicaj suun, ne ne'en soj se vaa 'yaj suun nij so' rihaan Diose, <sup>7</sup> ne dan me se no xcúun soj naruvee soj sa'anj ata' ei. Caraa cochroj soj rihaan nij síf nicaj suun, ne ve'é ca'mii soj rihaan nij so' ei.

**Nana nihánj taj xna'anj se vaa gaa 'ee rá ní' tuvi' ní' a**

<sup>8</sup> Se gaa xcúun rihaan nij soj ga tuvi' soj ma'. Tzaj ne vaa 'o xcúun rihaan soj ga tuvi' soj adonj. Nihánj ro', me xcúun vaa rihaan soj ga tuvi' soj adonj. No xcúun soj gaa 'ee rá soj tuvi' soj, ne sese ya 'ee rá soj tuvi' soj, ne ase vaa síf qui'yaj nu' ndaa vaa taj se-tucuanj Moisés ro', danj gaa soj uún adonj. <sup>9</sup> Dan me se aj ne'en soj nu' nana cataj xna'anj Diose rihaan Moisés gaa naá, ne dan me se na'vej rá Diose cotoj yuvij ga nicaj tuvi' yuvij, ne na'vej rá Diose ticavi' yuvij man tuvi' yuvij, ne na'vej rá Diose qui'yaj ituu yuvij, ne na'vej rá Diose guun rá yuvij ni'yaj yuvij si'yaj tuvi' yuvij man adonj. Nihánj me nana cataj xna'anj Diose gaa naá, ne vaa uxrá doj nana cataj xna'anj uún Diose, tzaj ne vaa orún' nana achiin uxrá qui'yaj ní' cuano, ne nana yo' taj: "A se 'ee rá so' man ma'an so' ro', danj gaa 'ee rá so' man tuvi' so' á". Nihánj me nana achiin uxrá cunq ní', ne sese cunq ní' ne qui'yaj ní' ndaa vaa taj nana ni-

hánj, ne sij 'yaj nu' nana cataj xna'anj Diose rihaan Moisés gaa naá me ní' ei. <sup>10</sup> Sese 'ee rá soj tuvi' soj, ne se qui'yaj chi'ij soj man tuvi' soj, ne che'é dan sese 'ee rá soj tuvi' soj, ne sij uno nu' nana cataj xna'anj Diose rihaan Moisés gaa naá me ma'an soj adonj.

**Nana nihánj taj xna'anj se vaa ase vaa qui'yaj Jesucristó ro', danj gaa qui'yaj ní' uún a**

<sup>11</sup> Danj qui'yaj nij soj, gaa 'ee rá nij soj tuvi' soj ei. 'Q se ne'en soj daj vaa chumii nihánj cuano nanj á. Xcaj soj cuentá á. Dan me se asij naca cuchumán rá ní' ni'yaj ní' man Jesucristó, ne nichrun' güii cavii sa' ní' cayáán ní' ga Diose, rá ní', tzaj ne cuano nihánj me se ya nichrun' güii cavii sa' ní' cayáán ní' ga Diose ei.

<sup>12</sup> Dan me se ase vaa chumii gaa vaa rmi' ro', danj vaa cunudanj nij yuvij man rihaan chumii nihánj cuano, ne vaa rmi' rihaan nij so', ne ne ne'en nij so' a doj ma'. Tzaj ne daj doj quisij güii ca'na' Jesucristó, ne che'é dan ca'ne' rá ní' ga cacun', ne se qui'yaj ní' ndaa vaa 'yaj yuvij chéé rej nij ma'. 'Q se adi' se chuguun rej ran-ga' ro', danj gaa cuchuguun nimán ní', qui'yaj ní', ne yo'o gaa nucuaj ní' qui'yaj suun ní' che'é Diose á. <sup>13</sup> Che'é se cuchuguun nimán ní', che'é dan inanj ve'é qui'yaj ní', ne se cachéé ní' cha'anj snúu rma'an, se guun xnq ní', ne se qui'yaj ní' cacun' ga chana, ne se cunu' ní', ne se guun xcoj ruvaa rá ní' ne'en ní' tuvi' ní' a. <sup>14</sup> Se guun rá ní' qui'yaj ní' ndaa vaa me rá nee man ní' ma'. Se ca'vej rá ní' qui'yaj ní' cacun' ma'. Tzaj ne tucuyón ní' ndaa vaa qui'yaj Jesucristó, ne ase vaa qui'yaj so' ro', danj gaa qui'yaj uún ní' nanj adonj.

**Nana nihánj taj xna'anj se vaa se cuta' ní' cacun' xraá tinúu ní' síf chá naj guun rasuun, ne se nachri' ní' ni'yaj ní' man tinúu ní' síf na'vej rá cha rasuun a**

**14** Ta'aj yuvij guun ya rá se vaa a'vej rá Diose cha yuvij naj guun rasuun, tzaj ne yo'ó ta'aj yuvij ro', chu'vi' nij so' cha nij so' nee a. Na'vej rá Diose cha nij so' nee, rá nij so', ne che'é dan inanj cuêj chá nij so' a. Dan me se se nachri' nij soj ni'yaj nij soj man nij yuvij na'vej rá cha naj guun rasuun ma'. Sese danj vaa rá nij so', ne se ca'mii cunu' nij soj ga nij so' ma'. <sup>3</sup> Se guun nachri' síf chá naj guun rasuun ni'yaj so' man síf chá inanj cuêj ma'. Se cuta' síf chá inanj cuêj cacun' xraá síf chá naj guun rasuun ma'. 'Q se quene'en so' se vaa 'nij ra'a Diose man síf chá naj guun rasuun do' nanj adonj. <sup>4</sup> Xa' síf chá naj guun rasuun, tzaj ne ne 'yaj suun so' rihaan síf chá inanj cuêj ma'. 'Q se rihaan Jesucristó 'yaj suun so', ne che'é dan ne nó xcúun síf chá inanj cuêj cuta' so' cacun' xraá so' ma'. Tzaj ne ma'an Jesucristó ca'ne' cacun' che'é so', ase cavii sa' so' ni', ase quiran' so' sayuun ni', ne dan me se ne ne'en ní' ma'. Dan me se nucuaj Jesucristó sij 'nij ra'a man ní' tucuyón so' man síf chá naj guun rasuun daj qui'yaj so', ne cavii sa' so', qui'yaj Jesucristó adonj.

<sup>5</sup> Dan me se ta'aj yuvij taj se vaa guue ta'aj güii, ne yo'ó ta'aj yuvij taj se vaa 'o cuyaan vaa nij güii, ne taj güii guue rihaan yo'ó ta'aj nij so' a. Ino vaa rá 'o 'o

ta'aj nij yuvij, ne che'é dan me xcaj yo'o yo'o nij soj cuentá daj vaa rá yo'o yo'o soj, ne guun ya rá yo'o yo'o soj daj vaa rá soj ei. <sup>6</sup> Xa' síi taj se vaa vaa güii guëe, tzaj ne danj vaa rá so' che'é síi 'nij ra'a man ní', ne danj nanj síi chá naj guun rasuun, ne danj 'yaj so' che'é síi 'nij ra'a man ní' uún a. Danj 'yaj yo'o yo'o nij so', ne nago' nij so' graciá rihaan Diose a. Ne xa' síi na'vej rá chá naj guun rasuun, tzaj ne veé danj vaa rá so' che'é síi 'nij ra'a man ní' uún, ne dan me se nago' so' graciá rihaan Diose uún a. <sup>7</sup> 'O se nuveé che'e orún' ní' vaa i'na' 'o 'o ní' ma'. Nuveé che'e orún' ní' cavi' 'o 'o ní' ma'. <sup>8</sup> 'O se sese vaa i'na' ní', ne vaa i'na' ní' qui'yaj suun ní' rihaan síi 'nij ra'a man ní', ne ca'vee se cavi' ní', tzaj ne yo'o qui'nij ra'a so' man ní' nanj adonj. <sup>9</sup> Dan me se me rá Jesucristó nıcaj yu'unj so' man yuvij vaa i'na' do', man yuvij cavi' do', ne che'é dan cavi' so', ne che'é dan cunuu i'na' uún so' a.

<sup>10</sup> Dan me se taj che'é cuta' ní' cacun' xráá tinúú ní', ne taj che'é nachri' ní' ni'yaj ní' man tinúú ní' ma'. 'O se canicun' cunudanj ní' rihaan Diose vaa güii, ne ca'ne' ma'an Diose cacun' che'é ní' nanj adonj. <sup>11</sup> Dan me se danj Diose taj se vaa ya ya canicun' ruj cunudanj yuvij rihaan Diose vaa güii, ne ve'é ndo'o ca'mii cunudanj yuvij che'é Diose a. Danj a'mii danj Diose a. <sup>12</sup> Dan me se vaa güii nata' 'o 'o ní' rihaan Diose che'é se vaa qui'yaj ní' gaa cayáan ní' rihaan chumij nihánj nanj adonj.

**Nana nihánj taj xna'anj se vaa se ca'vej rá ní' quiran' tinúú ní' cacun' che'é se vaa 'yaj ní' a**

<sup>13</sup> Che'é dan quisij cataj ní' se vaa tumé tinúú ní' cacun' á. Tzaj ne cataj ya nij soj se vaa se qui'yaj tinúú soj cacun', qui'yaj ma'an soj a. <sup>14</sup> Gaa canocó' 'unj Jesucristó sij 'nij ra'a man ní', ne guun ya raj se vaa a 'ó rasuun ne yu'va' quita'a' ma'. Tzaj ne sese vaa yo'o so' uun rá se vaa cacun' chá' 'o rasuun, ne ya uxrá cacun' chá so' a. <sup>15</sup> Sese yu'va' chá' yo'o rasuun rá tinúú so', ne sese chá so' maan, ne guun rá so' chá so' uún, ne dan me se chá so' maan, gaa ne quiran' so' cacun', qui'yáá so' á. Sese danj qui'yáá so', ne nuveé sij 'ee rá man tinúú mé so' gaa a ma'. Se ca'vej rá so' quiran' tinúú so' cacun' che'é se chá so' ma'. 'O se ne'en so' se vaa cavi' Jesucristó che'é ma'an tinúú so' adonj. <sup>16</sup> Ne se guun qui'yaj soj ca'mii yuvij nana nij che'é tucúáan sa' nocó' soj ma'.

<sup>17</sup> 'O se nicaj yu'unj Diose man ní', ne che'é dan se nanó rá ní' che'é se chá ní' do', che'é se co'o ní' do' ma'. Tzaj ne xcaj ní' cuentá che'é tinúú ní' á. 'O se che'é rej uun hij Diose, tzaj ne nuveé che'e se chá ní' do', nuveé che'e se co'o ní' do', me yo' ma'. Maan se che'é rej cunuu sa' nimán ní' ne che'é rej guun niha' rá ní' ne che'é rej gaa xej nimán ní' qui'yaj Nimán Diose me yo' a. <sup>18</sup> Dan me se sese xcaj ní' cuentá che'é tinúú ní', ne ya sij nocó' man Jesucristó me ní', ne guun niha' rá Diose ne'en Diose man ní', ne cataj yuvij ne amán rá ni'yaj man Jesucristó se vaa ve'é 'yaj ní' a.

<sup>19</sup> Che'é dan danj inanj qui'yaj ní', gaa ne gaa dínj cumán ní', ne racuíj ní' tinúú ní', gaa ne sa' doj cumán

ní', ne sa' doj canocó' ní' man Jesucristó adonj. <sup>20</sup> Dan me se qui'yaj suun Diose nimán tinúú so', ne che'é dan se ca'vej rá so' quirı' rá tinúú so' che'é se chá ma'. Ne'en ní' se vaa sa' vaa daj a rasuun qui'yaj Diose chá yuvij do', co'o yuvij do', tzaj ne sese yu'va' chá' 'o rasuun rá yo'o so', ne cacun' chá so' man yo' adonj.

<sup>21</sup> Sese yu'va' chá' 'o rasuun rá tinúú so', ne se chá so' maan, ne cunaj qui'yáá so' á. Sese yu'va' co'o' 'o na rá tinúú so', ne se co'o so' maan, ne cunaj qui'yáá so' á. Tadó so' se quiran' tinúú so' cacun' che'é se vaa qui'yáá so' á.

<sup>22</sup> Sese guun rá so' se vaa a'vej rá Diose chá so' naj guun rasuun, ne inanj danj gaa rá ma'an so' rihaan Diose á. Se natá so' danj rihaan yuvij ma'. Guun niha' rá so' rihaan Diose sese ne'en so' se vaa sa' vaa rá so', ne'en so' me se a'vej rá Diose qui'yáá so' nanj á. <sup>23</sup> Tzaj ne sese ne ne'en yo'ó so' sese ca'vej Diose chá so' 'o rasuun ni', sese se ca'vej Diose chá so' ni', ne se chá so' ma'. Sese chá so', ne tumé so' cacun' rihaan Diose che'é se ne guun ya rá so' se vaa a'vej Diose chá so', maan se chá ma'an so', ne che'é dan tumé so' cacun' adonj. Veé danj inanj vaa nu' se vaa qui'yaj ní' ei. Sese ne guun ya rá ní' se vaa a'vej rá Diose qui'yaj ní' 'o rasuun, ne se qui'yaj ní' danj ma'. Sese qui'yaj ní' danj, ne tumé ní' cacun' rihaan Diose nanj adonj.

**Nana nihánj taj xna'anj se vaa no xcuún ní' racuíj ní' tinúú ní' a**

**15** Xa' ní' sij amán rá se vaa a'vej rá Diose chá ní' naj guun rasuun, tzaj ne no xcuún ní' racuíj ní' man nij yuvij na'vee cuchuman rá se vaa a'vej rá Diose chá nij so' naj guun rasuun a. Ne racuíj ní' man yuvij na'vee cuchuman rá se vaa 'o cuyaan vaa nu' güii rihaan Diose á. Se qui'yaj ní' se inanj me rá ní' qui'yaj ní' ma'. <sup>2</sup> Tzaj ne racuíj 'o 'o ní' tinúú ní', ne guun niha' rá tinúú ní', ne sa' doj gaa tinúú ní', ne sa' doj quene'en tinúú ní' canocó' tinúú ní' Diose a. <sup>3</sup> 'O se ne qui'yaj Jesucristó se me rá ma'an Jesucristó qui'yaj so' ma'. 'O se danj Diose taj se vaa nana nij ca'mii yuvij che'é Diose ro', ca'mii uún yuvij che'é Jesucristó, ne ca'vej rá Jesucristó ca'mii nij yuvij nana nij che'é ma'an so' a. Danj a'mii danj Diose che'é ma'an Jesucristó a. <sup>4</sup> Gaa naá me se cacrón nii nana rihaan danj Diose yan quinari' ma'an ní' daj qui'yaj ní' gaa ne guun nucuaj ní' qui'yaj canaán ní' rihaan sayuun ne quinari' nucuaj nimán ní' gaa ne ca'vee guun ya rá ní' se vaa vaa güii cavij sa' ní' a. <sup>5</sup> Dan me se Diose me síi 'yaj uun nucuaj nimán ní', ne síi nocó' man Jesucristó me nij soj, ne che'é dan me raj yo'o cuyaan gaa rá taran' nij soj, qui'yaj Diose a. <sup>6</sup> Gaa ne 'o cuyaan ca'mii nij soj che'é Diose, ne ve'é ca'mii nij soj che'é Diose Rej Jesucristó sij 'nij ra'a man ní' adonj.

**Nana nihánj taj xna'anj che'é se vaa qui'yaj Jesucristó che'é nij yuvij israelitá do', che'é nij yuvij yanij do' a**

<sup>7</sup> Che'é dan ve'é ca'mii soj ga tinúú soj gaa 'na' tinúú soj rihaan soj á. Danj qui'yaj Jesucristó, ve'é ca'mii so'

gã ní' ei. Che'é dan ðanj qui'yaj guẽẽ ní', ve'é ca'mii ní' gã tinúú ní', nẽ ve'é ca'mii tinúú ní' che'é Diose á.

<sup>8</sup> Dan me se cataj xna'anj 'unj rihaan nij soj che'é suun qui'yaj suun Jesucristó che'é nij yuvii israelitá, nẽ gã naá me se cataj xna'anj Diose rihaan xii nij yuvii israelitá ðaj qui'yaj Diose che'é nij so', nẽ quisíj yã nu' nana yo', qui'yaj Jesucristó a. <sup>9</sup> Nẽ gã ca'na' Jesucristó, nẽ ve'é ca'mii nij yuvii yaníj che'é Diose, qui'yaj so' a. 'O se che'é se vaa qui'yaj Jesucristó, che'é dan xcaj nij yuvii yaníj cuentá se vaa cunuu 'eẽ rá Diose ne'en Diose man nij so' gã nij yuvii israelitá, nẽ che'é dan ve'é ca'mii nij yuvii yaníj che'é Diose a. ðanj a'mii ðanj Diose a.

Taj xna'anj ðanj Diose nana ca'mii síí cu'naj David rihaan Diose gã naá, gã cataj so':

—Che'é dan ve'é ca'mij rihaan nij yuvii yaníj che'é so', nẽ cachraj chra' rihaan so' a. —ðanj ca'mii síí cu'naj David gã naá a.

<sup>10</sup> Nẽ taj uún ðanj Diose se vaa guun niha' rá nij yuvii yaníj gã nij yuvii israelitá a. <sup>11</sup> Nẽ taj uún ðanj Diose se vaa ve'é ca'mii cunudanj nij yuvii yaníj che'é Diose a.

<sup>12</sup> Nẽ cataj uún síí cu'naj Isaías gã naá se vaa cumãj yo'õ ta'níí ta'nij si'nõ síí cu'naj Isaí rej síí cu'naj David gã naá, nẽ ca'nã' so', nẽ guun chij so' rihaan nij yuvii yaníj a. Gã nẽ gã nucuaj rá nij yuvii yaníj man so' se vaa tĩnanii so' man nij so' rihaan sayuun a. ðanj taj síí cu'naj Isaías che'é Jesucristó a. <sup>13</sup> Dan me se nucuaj rá ní' ne'en ní' Diose, nẽ ne'en ní' se vaa vaa güii cavii sã' ní', qui'yaj Diose á. Dan me se amán rá nij soj ni'yaj soj Diose, nẽ che'é dan me raj guun niha' ndo'o rá soj, nẽ gã xej nimán soj, qui'yaj Diose, gã nẽ guun yã ðoj rá soj se vaa cavii sã' soj vaa güii, qui'yaj Nimán Diose adõnj.

**Nana nihánj taj xna'anj che'é suun qui'yaj suun Pablo rihaan Diose a**

<sup>14</sup> Veé dan me se guun yã raj se vaa síí sã' me ma'ãnj soj, tinuj, nocoj. Xcaj ndo'o soj cuentá, nẽ ne'en soj nago' soj chrej sã' man tinúú soj ei. <sup>15</sup> Tzaj nẽ ca'ne' ndo'oj suun rihaan soj gã qui'yáj yanj cartá nihánj nanj á. 'O se ne'en soj se vaa sã' uxrã qui'yaj Diose che'ej, nẽ ase vaa 'yaj suun xrej rihaan Diose ro', ðanj vaa 'yaj suun ma'anj rihaan Jesucristó, nẽ dan me se 'yaj sunj tucu'yonj se-nãnj Diose nana sã' man soj sij yaníj, nẽ vaa güii nacaj Diose man soj, nẽ che'é dan tucu'yonj man soj, nẽ me raj ca'vej Diose nacaj Diose man soj, nẽ me raj cunuu sã' nimán soj rihaan Diose ei. Dan me se gã sã' soj, qui'yaj Nimán Diose, nẽ che'é dan ca'ne' ndo'oj suun rihaan soj, nẽ nu' nana nihánj cachronj rihaan yanj cartá nihánj a. <sup>17</sup> Dan me se racuíj ndo'o Jesucristó manj, nẽ che'é dan niha' raj che'é nu' se vaa 'yáj rihaan Diose ei.

<sup>18</sup> Dan me se se ca'mij che'é se vaa aj qui'yaj yo'õ yuvii ma'. 'O se ne nó xcúnj qui'yáj ðanj ma'. Maã se cataj xna'anj 'unj che'é inãnj se vaa qui'yaj Jesucristó gã racuíj so' manj se vaa guun nucuaj cataj xna'anj 'unj rihaan soj sij yaníj che'é ma'ãnj so', nẽ che'é dan cuno soj sij yaníj se-nãnj Diose, nẽ dan me se Jesu-

cristó me síí racuíj manj narij nu' nana nihánj ca'mij rihaan soj, nẽ veé so' racuíj manj 'yaj sunj nu' suun 'yaj sunj nanj adõnj. <sup>19</sup> Dan me se suun sã' nocõ 'yáj, 'yaj Jesucristó, nẽ Nimán Diose racuíj manj ca'mij se-nãnj Diose, 'yaj uún Jesucristó, gã nẽ xcaj yuvii yanj nu' anicaj chuman' Jerusalén cuentá che'é se-nãnj Jesucristó nana sã', nẽ ndã yuvii yanj yo'õ chuman' gan' ðoj ndã estadó cu'naj Ilírico ðõ', xcaj cuentá che'é se-nãnj Jesucristó nana sã', nẽ dan me se cuno nij so' nana, qui'yáj a. <sup>20</sup> 'O se inãnj me raj cataj xna'anj 'unj che'é Jesucristó rihaan yuvii ataa quene'en nana che'é so', nẽ se tucu'yonj man yuvii aj nari' nana che'é so' ma'.

<sup>21</sup> Veé ðanj a'mii uún ðanj Diose, taj yo': "Yuvii ataa quene'en se-nãnj so' ro', xcaj nij so' cuentá a". ðanj taj ðanj Diose nanj adõnj.

**Nana nihánj taj xna'anj se vaa ca'anj Pablo chuman' Jerusalén, nẽ ca'anj uún so' chuman' Romá a**

<sup>22</sup> Che'é dan me ca'vee cuchij rihaan nij soj a. Quisíj que'eẽ güii cachronj se vaa cuchij rihaan nij soj, tzaj nẽ ne ca'vee cuchij rihaan soj ma'. <sup>23</sup> Tzaj nẽ cuano nihánj me se navij suun rihanj chuman' nihánj, nẽ guun que'eẽ guun raj cuchij rihaan nij soj, <sup>24</sup> nẽ che'é dan me quene'en 'unj man soj gã ca'anj 'unj rej cu'naj España, raj a. Me rá 'unj çarán' 'unj chiháán soj ðoj güii, nẽ niha' raj çayánj gã soj, nẽ nanõ ní' cuentó, gã nẽ ca'anj ta'aj soj gaj rej cu'naj España, raj a.

<sup>25</sup> Dan me se ca'anj 'unj chuman' Jerusalén cuano, nẽ qui'yaj sunj rihaan nij síí amán rá ni'yaj man Jesucristó yanj chuman' yo' adõnj. <sup>26</sup> 'O se nij síí amán rá ni'yaj man Jesucristó yanj estadó cu'naj Macedonia ðõ', estadó cu'naj Acaya ðõ', me se me ndo'o rá nij so' rque nij so' ðoj sa'anj rihaan nij síí nique amán rá ni'yaj man Jesucristó yanj chuman' Jerusalén ei. <sup>27</sup> ðanj me rá ma'ãnj so' qui'yaj nij so', nẽ cataj xna'anj ma'ãnj so' rihanj se vaa me ndo'o rá nij so' racuíj nij so' man nij síí nique yanj chuman' Jerusalén yo' adõnj. 'O se yuvii israelitá me nij síí man Jerusalén, nẽ nij yuvii israelitá qui'yaj nari' yuvii yaníj se-nãnj Diose, nẽ che'é dan cunuu sã' nimán nij yuvii yaníj, taj nij síí yaníj man roj estadó yo' adõnj. Che'é dan nõ xcúún nij yuvii yaníj racuíj nij so' man nij yuvii amán rá ni'yaj man Jesucristó man Jerusalén, rá nij so' a. 'O se sa'anj achiin man nij so', nẽ che'é dan rque nij yuvii yaníj ðoj sa'anj man nij so' adõnj. <sup>28</sup> Che'é dan vaa suun rihanj taçuachenj sa'anj rihaan nij síí amán rá ni'yaj man Jesucristó yanj chuman' Jerusalén, nẽ dan me se nagoj sa'anj rihaan nij so', nẽ x'nyu rihanj, nẽ asa' ca'anj 'unj yo'õ nocõ cu'naj España nẽ vaj 'unj chrej, nẽ çarán' 'unj chiháán soj a. <sup>29</sup> 'O se ne'enj se vaa me rá Jesucristó cuchij rihaan soj, nẽ racuíj so' manj cuchij chiháán soj ei.

<sup>30</sup> Dan me se che'é se canoco' nu' ní' man síí cu'naj Jesucristó sij 'nij ra'a man ní', che'é dan 'eẽ rá ní' tinúú ní', 'yaj Nimán Diose, nẽ che'é dan cataj xna'anj 'unj rihaan nij soj se vaa racuíj soj manj cachinj ni'yaj ní' rihaan Diose che'ej á. <sup>31</sup> Cachinj ni'yaj soj se vaa quinanij rihaan nij síí israelitá yanj estadó Judea síí ne amán rá

ni'yaj man Jesucristó a. Cachinj ni'yaj nij soj se vaa ve'é nacaj nij síi man chuman' Jerusalén sa'anj ra'aj nagoj man nij so' a. Dan me se me raj gaa nica' nimán nij so', ne ca'vej rá nij so' nacaj nij so' sa'anj rque' nij yuvij yanij a. <sup>32</sup> Gaa ne guun niha' uxrá raj asa' cuchij chiháán soj, ne cuchij' yá 'unj chiháán soj, sese ca'vej Diose, gaa ne cunyu cujj rá taran' ní' ei. <sup>33</sup> 'O se me raj gaa xej nimán soj, qui'yaj Diose adonj. Veé danj gaa ya ei.

**Nana nihánj taj xna'anj se vaa ve'é cumán nij síi amán rá ni'yaj man Jesucristó nij síi yanj chuman' Romá, rá Pablo a**

**16** Cuchij' chana cu'naj Febe rihaan nij soj, ne dan me se ra'vij ní' ní' noco' man Jesucristó me no', ne 'yaj suun ndo'o no' rihaan nij yuvij amán rá ni'yaj man Jesucristó nij síi yanj chuman' cu'naj Cencrea a. <sup>2</sup> Sij noco' man Diose me soj, ne che'é dan ve'é ca'mij soj ga no' á. 'O se racu'ij no' man que'ee yuvij, ne racu'ij no' man ma'anj, ne che'é dan sese vaa se cachijin man no', ne racu'ij soj man no' ei.

<sup>3</sup> Cataj soj rihaan chana cu'naj Priscila do', rihaan síi cu'naj Aquila do', se vaa ve'é cayáán roj so', raj á. 'O se qui'yaj suun roj so' gaj che'é Jesucristó a. <sup>4</sup> Dan me se ca'née nimán roj so' cavi' roj so' che'ej, ne che'é dan nago' 'unj graciá rihaan roj so', ne nago' núj ga nij síi yanij graciá rihaan roj so' a. <sup>5</sup> Cataj uún soj rihaan nij yuvij noco' man Jesucristó yuvij nuu chre' tucua' roj so' se vaa ve'é cumán nij so', raj á. Ne danj cataj uún soj rihaan síi cu'naj Epeneto á. 'O se 'ee raj man so', ne so' me síi cuchumán rá ni'yaj man Jesucristó asino yaan rihaan cunudanj nij yuvij man estadó cu'naj Asia a.

<sup>6</sup> Ne cataj soj rihaan chana cu'naj Mariá se vaa ve'é cayáán no' á. 'O se que'ee ndo'o qui'yaj suun no' che'é soj a. <sup>7</sup> Ne cataj soj rihaan síi cu'naj Andrónico do', rihaan síi cu'naj Junias do', se vaa ve'é cayáán roj so', raj á. 'O se yuvij israelitá me roj so' gaj, ne qui'nij roj so' taga' gaj uún a. Nij apóstol cune' Jesucristó man nata' se-nana so' rihaan yuvij ro', ne'en man roj so', ne gaa asij ataa cuchuman raj ni'yaj 'unj man Jesucristó, ne cuchumán rá roj so' ni'yaj roj so' man Jesucristó a. <sup>8</sup> Ne cataj soj rihaan síi cu'naj Amplias se vaa ve'é cayáán so', raj á. 'O se noco' núj man Jesucristó, ne che'é dan 'ee raj man so' a. <sup>9</sup> Ne cataj soj rihaan síi cu'naj Urbano se vaa ve'é cayáán so' á. 'Yaj suun so' gaj che'é Jesucristó a. Ne cataj uún soj rihaan síi cu'naj Estaquis se vaa ve'é cayáán so', raj, che'é rej 'ee raj man so' a.

<sup>10</sup> Ne cataj soj rihaan síi cu'naj Apeles se vaa ve'é cayáán so', raj á. Ne'en ní' se vaa síi noco' raan man Jesucristó me so' a. Cataj soj rihaan nij tuvi' síi cu'naj Aristóbulo se vaa ve'é cumán nij so', raj á. <sup>11</sup> Ne cataj soj rihaan síi cu'naj Herodión se vaa ve'é cayáán so' á. 'O se síi israelitá me so' gaj a. Ne cataj soj rihaan nij síi noco' man Jesucristó nij tuvi' síi cu'naj Narciso se vaa ve'é cumán nij so', raj á. <sup>12</sup> Ne cataj soj rihaan chana cu'naj Trifena do', rihaan chana cu'naj Trifosa do', se vaa ve'é cayáán roj no', raj á. 'O se 'yaj suun ndo'o roj chana yo' che'é síi 'nij ra'a man ní' a. Ne cataj soj ri-

haan chana cu'naj Pérsida se vaa ve'é cayáán no', raj á. 'Ee rá ní' man no', ne que'ee ndo'o qui'yaj suun no' che'é síi 'nij ra'a man ní' a. <sup>13</sup> Ne cataj soj rihaan síi cu'naj Rufo se vaa ve'é cayáán so', raj, che'é se sa' uxrá noco' so' man síi 'nij ra'a man ní' a. Cataj uún soj rihaan nii so' se vaa ve'é cayáán no', raj á. 'O se ase vaa ve'é 'yaj chana rihaan ta'níi chana ro', danj 'yaj no' rihaan a.

<sup>14</sup> Ne cataj soj rihaan síi cu'naj Asíncrito do', rihaan síi cu'naj Flegonte do', rihaan síi cu'naj Hermas do', rihaan síi cu'naj Patrobas do', rihaan síi cu'naj Hermes do', rihaan cunudanj yo'ó nij tinúú ní' síi yanj ga nij so' do', se vaa ve'é cumán nij so' á. <sup>15</sup> Cataj soj rihaan síi cu'naj Filólogo do', rihaan chana cu'naj Julia do', rihaan síi cu'naj Nereo do', rihaan ra'vij so' do', rihaan síi cu'naj Olimpás do', rihaan cunudanj yo'ó nij síi sa' noco' man Diose yanj ga nij so' do', se vaa ve'é cumán cunudanj nij so', raj á. <sup>16</sup> Gaa nari' tuvi' nij soj, ne ve'é ndo'o ca'mij soj ga tinúú soj á. Danj qui'yaj nij soj, tihaaan nij soj se vaa 'ee rá nij soj tinúú soj ei. Ne cunudanj nij síi amán rá ni'yaj man Jesucristó yanj nu' rihaan chumij me se ve'é cumán nij soj, rá nij so' nanj adonj.

**Nana nihánj taj xna'anj se vaa guun yanij ní' rihaan nij síi qui'yaj quixra' ta'aj ní' ga tinúú ní' a**

<sup>17</sup> Chrej nucuaj me narquej rihaan soj nihánj, tinuj, nocoj. Dan me se vaa yuvij me rá cunú' soj ga tinúú soj che'é nana aj nari' soj, ne guun na'aj soj che'é se-nana Diose, qui'yaj nij so', ne che'é dan guun yanij soj rihaan yuvij 'yaj danj á. <sup>18</sup> Ne 'yaj suun nij so' rihaan Jesucristó sij 'nij ra'a man ní' ma'. Maan se 'yaj suun nij so' che'é ma'an nij so' adonj. 'O se ve'é ndo'o vaa nana a'mii nij so' che'é yuvij, ne danj 'yaj nij so', tiha' yu'unj nij so' man yuvij, ne ndaa yuvij ne tumé cacun' tiha' yu'unj nij so' man ei. <sup>19</sup> Dan me se aj cuno cunudanj yuvij se vaa sa' uxrá cuno soj se-nana Diose, ne che'é dan guun niha' raj che'é soj, ne me raj xcaj soj cuentá, ne qui'yaj soj se sa' ni'yaj Diose a. Tzaj ne na'vej raj nari' soj qui'yaj soj tucuaán chí'ii mei. <sup>20</sup> Dan me se vaa xej nimán ní', 'yaj Diose á. Ra'yanj qui'yaj canaán soj rihaan síi cu'naj Satanás, qui'yaj Diose, ne me raj qui'yaj Jesucristó sij 'nij ra'a man ní' se luj che'é soj nanj adonj.

**Nana nihánj taj xna'anj se vaa ve'é cumán nij síi cuchumán rá ni'yaj man Jesucristó yanj chuman' Romá, rá nij tuvi' Pabló a**

<sup>21</sup> Dan me se ve'é cumán nij soj, rá síi cu'naj Timoteo síi 'yaj suun gaj a. Ne síi cu'naj Lucio do', síi cu'naj Jasón do', síi cu'naj Sosípater do', nu' nij so' me síi taj se vaa ve'é cumán soj, rá nij so' a. Yuvij israelitá me nij so' gaj a. <sup>22</sup> Síi cu'naj Tercio mej, ne 'unj me síi achrón se-nana síi cu'naj Pabló rihaan yanj nihánj, ne ve'é cumán nij soj, raj a. <sup>23</sup> Ne me rá síi cu'naj Gayo se vaa ve'é cumán nij soj, ne ve' tucua' so' yáán 'unj, ne nuu chre' cunudanj nij síi amán rá ni'yaj man Jesucristó ve'

tucúá so' a. Ne ve'é cumān soj, taj síí cu'naj Erasto, ne síí atā sa'anj rihaan chuman' nihánj me so' a. Ne ve'é cumān soj, rá tinúú ní' síí cu'naj Cuarto a. <sup>24</sup> Dan me se me raj qui'yaj Jesucristó sij 'nij ra'a man ní' se luj che'é cunudānj nij soj a. Veé dānj gāā yā ei.

**Nanā nihánj taj xna'anj se vaa sá' uxrá vaa Diose a**

<sup>25</sup> Guun nucuaj Diose račuíj Diose man soj narí' soj nu' nanā sá' ca'mij rihaan soj a. Nanā sá' che'é Jesucristó me nanā yo' a. Dan me se gāā naá me se ne ca'vee xcaj yuvij cuentá che'é se-nānā Diose ma'. Tzaj ne yaj ro', ne tihaan Diose se-nānā Diose rihaan ní' a.

<sup>26</sup> Dan me se ca'ne' Diose suun rihaan nij síí nata' se-nānā Diose gāā naá, cachron nij so' se-nānā Diose rihaan yanj, ne dānj qui'yaj nij so', ne xcaj cunudānj nij yuvij cuentá che'é se-nānā Diose, ne me rá Diose cuchuman rá nij yuvij se-nānā Diose, ne canoco' nij yuvij man Diose, ne Diose me se daj chihāā mīj se cavi' so' ma'.

<sup>27</sup> Ne Diose me se oruun Diose, ne raā orún' so' avii cunudānj nanā cuu sá' a. Sā' uxrá qui'yaj ta'níí so' Jesucristó che'é ní', ne che'é dan ve'é ca'mij ní' che'é Diose nu' cavii nu' ca'anj a. Sā' uxrá qui'yaj so' adonj. Yā yā dānj guun adonj.

# I Corintios

**1** 'Unj ro', me síí cu'naj Pabló, ne me rá Diose cataj xna'anj 'unj rihaan yuvij che'é Jesucristó, ne che'é dan cune' Jesucristó mán 'unj guún 'unj apóstol nata' se-nana so' rihaan yuvij a. Ne vaa tinúú ní' síí cu'naj Sóstenes, ne ne so' gaj nihánj, <sup>2</sup> ne 'yaj núj yanj nihánj ca'nej núj rihaan nij soj sij amán rá ni'yaj man Diose yanj chuman' Corinto sij naqui'yaj guee nimán che'é Jesucristó a. Dan me se canacúún Diose man soj guun soj síí naqui'yaj guee nimán, ne veé ca'nej yanj nihánj cachee rihaan cunudanj yo'ó nij síí yanj me rej ma'an síí táá tu'vā se-chuvij Jesucristó sij 'nij ra'a man ní' a. Dan me se síí 'nij ra'a man nij so' ne síí 'nij ra'a man ma'an ya ní' me ya so' a. <sup>3</sup> Me rá núj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é soj, ne me rá núj gaa xej nimán soj, qui'yaj roj so' adonj.

**Nana nihánj taj xna'anj se vaa nago' síí cu'naj Pabló graciá rihaan Diose che'é nij síí cuchumán rá ni'yaj man Jesucristó yanj chuman' cu'naj Corinto a**

<sup>4</sup> Niganj nagó' 'unj graciá rihaan Diose che'é nij soj che'é se luj qui'yaj Diose che'é soj che'é se noco' soj man Jesucristó adonj. <sup>5</sup> 'Q se che'é Jesucristó ro', cavii sa' uxrá soj, qui'yaj Diose á. Dan me se uxrá xcaj soj cuentá, ne uxrá nari' soj nana sa', qui'yaj Diose, <sup>6</sup> ne danj qui'yaj soj che'é se sa' uxrá nari' soj se-nana Jesucristó nana tucu'yón 'unj man soj a. <sup>7</sup> Ne a 'ó se sa' rqué Nimán Diose rihaan ní' ne achiin man soj a ma'. 'Q se aj vaa nu' yo' rihaan soj, ne na'vij ndo'o soj ca'na' uún Jesucristó sij 'nij ra'a man ní' rihaan chumij nihánj nanj adonj. <sup>8</sup> Ne so' me síí racuij ndo'o man soj, ne guun nucuaj soj canoco' raan soj man so' ndaa güii ca'ne' so' cacun' che'é yuvij, ne se tumé soj cacun', qui'yaj so' a ma'. <sup>9</sup> Vaa che'é gaa nucuaj rá ní' man Diose, ne Diose me síí canacúún man soj guun tuvi' soj ga ta'níí so' Jesucristó sij 'nij ra'a man ní' adonj.

**Nana nihánj taj xna'anj se vaa nij qui'yaj nij síí cuchumán rá ni'yaj man Jesucristó yanj chuman' Corinto, naqui'yaj nij so' que'ee x'ne' man nij so' a**

<sup>10</sup> Dan me se cunō soj ca'mij, tinuj, nocoj. Ne che'é se-chuvij ya Jesucristó sij 'nij ra'a man ní' ro', me achíín ni'yáj yaj rihaan nij soj se vaa yo'ō cuyaān gaa rá taran' soj do', yo'ō cuyaān ca'mij soj do', yo'ō rcua'ān gaa soj do', raj chuguanj. <sup>11</sup> Dan me se cataj xna'anj nij tuvi' síí cu'naj Cloé rihanj se vaa unu' soj ga tinúú soj ne uun vij ndo'o soj, nanj tinuj, nocoj. <sup>12</sup> Dan me se ta'aj nij soj taj: "'Unj me síí noco' se-nana síí cu'naj Pabló a".

Yo'ó ta'aj nij soj taj: "'Unj me síí noco' se-nana síí cu'naj Apolos a". Yo'ó ta'aj nij soj taj: "'Unj me síí noco' se-nana síí cu'naj Pedró a". Yo'ó ta'aj nij soj taj: "'Unj me síí noco' se-nana Jesucristó a". Dan me se danj vaa 'o 'o ta'aj soj a. <sup>13</sup> Ne me che'é 'yaj soj danj ga. 'Q se nuvi' que'ee Jesucristó vaa ma'. Taj che'é gaa que'ee x'ne' soj ma'. Cavi' ma'án 'unj rihaan rcutze che'é soj na'. Cata' ne soj che'é ma'án 'unj na'. Taj ma'. Che'é dan, me che'é taj ta'aj soj se vaa sij noco' manj me ta'aj soj ga.

<sup>14</sup> Dan me se ne cuta' ne 'unj man soj ma'. Maan se grún' síí cu'naj Crispo do', síí cu'naj Gayo do', cata' ne qui'yáj, ne che'é dan se ca'vee cataj soj se vaa che'ej cata' ne soj ma'. Danj gaa, ne guun niha' raj á. 'Q se cata' ne soj che'é Jesucristó, cataj soj, ne ca'mij ya soj á. <sup>16</sup> Cuta' ne uún 'unj man nij tucua' síí cu'naj Estéfanas, tzaj ne ne nuú sa' raj sese cuta' ne 'unj man yo'ó ta'aj yuvij a ma'. <sup>17</sup> 'Q se nuvi' suun cuta' ne yuvij ataj ma'. 'Q se ca'née xa' Jesucristó manj nataj se-nana Diose nana sa' rihaan yuvij, tzaj ne na'vej rá so' cavii raá 'unj nana cuu nachran' ca'mij 'unj ma'. Maan se nana nica inanj ca'mij 'unj, gaa ne ca'vee xcaj yuvij cuentá se vaa nuveé nana avii raā yuvij me nana yo', maan ne se-nana Jesucristó ya me yo' adonj. Dan me se ya xcaj nij yuvij cuentá se vaa ya cavi' Jesucristó rihaan rcutze che'é nij so', ne ca'vee cuchuman rá nij yuvij cunō nij yuvij nana nica ca'mij 'unj adonj.

**Nana nihánj taj xna'anj se vaa che'é se ca'née Diose man Jesucristó rihaan chumij nihánj, che'é dan ne'en ní' se vaa avii ndo'o raā Diose a**

<sup>18</sup> Dan me se vaa yuvij cacaa nu' cavii nu' ca'anj, ne nata' nii nana se vaa cavi' Jesucristó rihaan rcutze uno nij yuvij yo', tzaj ne taj se 'yá' cuchuman rá nij yuvij ma'. Nana snúú rma'an me nana yo' rihaan nij so' nanj adonj. Tzaj ne inō vaa rá ní' sij cavii sa', ne ne'en ní' se vaa che'é nana yo' ro', guun nucuaj Diose tinanii Diose man ní' rihaan sayuun adonj. <sup>19</sup> Ne danj Diose taj: "Nij síí avii ndo'o raā ro', guun nij so' síí ni'yōn, qui'yáj, ne se guun nucuaj nij so' xcaj nij so' cuentá che'é nana sa', qui'yáj ma'", taj nana nō rihaan danj Diose á. <sup>20</sup> Ne daj ran' nu' nij síí avii ndo'o raā man rihaan chumij nihánj cuano, rá soj ga. Yaj nihánj me se nana snúú rma'an avii raā nij so', qui'yaj Diose nanj adonj. <sup>21</sup> 'Q se nij síí man rihaan chumij nihánj ro', ne cavii raā nij so' daj vaa Diose ma'. Tzaj ne síí cuu raā me Diose, ne ma'an Diose caráán chrej rihaan nij so', gaa ne se gaa nanj xcaj nij so' cuentá che'é so' adonj. 'Q se me rá

Diose cunq̄ nij yuvii nanā a'mii natáj núj, ne sese cunq̄ nij yuvii, ne t̄inanii Diöse man nij yuvii rihaan sayuun, ne dan me se nda' se nanā snúu rma'an me nanā a'mii núj, rá ta'aj nij yuvii ro', tzaj ne orún' nanā yo' me nanā t̄inanii man yuvii rihaan sayuun nanj adonj.

<sup>22</sup> Ne x̄a' nij yuvii israelitá, tzaj ne me uxrá rá nij so' qui'yaj Diöse suun sa' nocq̄o quene'en nij so', ne x̄a' nij yuvii yaníj, tzaj ne me rá nij so' cunq̄o nij so' nanā c̄u u á. <sup>23</sup> Tzaj ne a'mii natáj núj nanā se vaa cavi' Jesucristó rihaan rcutze che'é yuvii, ne na'aj nij yuvii israelitá cunq̄o nij so' nanā yo', ne nij yuvii yaníj taj se vaa nanā snúu rma'an me nanā yo' uún adonj. <sup>24</sup> Tzaj ne aj canacúun Diöse man ta'aj nij yuvii israelitá d̄o', man ta'aj nij yuvii yaníj d̄o', se vaa canocq̄o' nij so' man so', ne ḡaa uno nij so' nanā a'mii natáj núj, ne uun ya rá nij so' se vaa sí ca'née Diöse t̄inanii man yuvii rihaan sayuun me Jesucristó, ne xcaj nij so' cuentá se vaa ya nucuaj ndo'o Diöse ne ya avii ndo'o raq̄ Diöse, che'é se ca'née Diöse man Jesucristó rihaan chumii nihánj adonj. <sup>25</sup> Dan me se nda' se nanā snúu rma'an me nanā rqué Diöse, rá ta'aj nij yuvii, tzaj ne nuveé nanā snúu rma'an me nanā yo' ma'. 'O se avii doj raq̄ Diöse rihaan nij yuvii nanj ei. Ne nda' se ninaj ndo'o Diöse, rá ta'aj nij yuvii, tzaj ne ne ninaj Diöse ma'. 'O se Diöse ro', me sí nucuaj ndo'o doj rihaan nij yuvii nucuaj ndo'o adonj.

**Nanā nihánj taj xna'anj se vaa che'é se sí ni'yon me ní', che'é dan ne'en ní' se vaa inanj che'é Jesucristó me cavii sa' ní' a**

<sup>26</sup> Dan me se xcaj nij soj cuentá daj qui'yaj Diöse ḡaa canacúun Diöse man ma'an soj, tinuj, nocq̄o. Doj vaa nij sí avii ndo'o raq̄ 'nij sca'núj soj á. Doj vaa nij sí nucuaj 'nij sca'núj soj á. Doj vaa nij sí xna'anj 'nij sca'núj soj á. Nuveé yuvii sa' doj rihaan yo'ó yuvii me ma'an soj ma'. <sup>27</sup> Maan se inanj sí ni'yon narii Diöse, ne dan me se nacaj Diöse man nij sí ni'yon, che'é rej me rá Diöse guun na'aj nij sí avii ndo'o raq̄ nanj á. Ne sí uun narii Diöse, ne dan me se nacaj Diöse man nij so', che'é rej me rá Diöse guun na'aj nij sí vaa suun nanj adonj. <sup>28</sup> Ne taj yu'vee nó nij sí narii Diöse man ma', taj nij yuvii man rihaan chumii nihánj, tzaj ne nacaj Diöse man nij so', ne qui'yaj canaán nij so' rihaan nij sí guun chij doj man rihaan chumii nihánj adonj. <sup>29</sup> Dan me se asa' quisíj, ḡaa ne a' ó yuvii se quisíj rá ca'mii sa' che'é ma'an rihaan Diöse se vaa sij sa' uxrá me ma'an a. <sup>30</sup> Dan me se Diöse me sí 'yaj 'nij ra'a Jesucristó man soj, ne che'é orún' Jesucristó avii raq̄ ní', qui'yaj Diöse á. Che'é orún' Jesucristó cunuu sa' nimán ní' rihaan Diöse á. Che'é Jesucristó me ní' sí sa' rihaan Diöse, qui'yaj Diöse á. Che'é Jesucristó quinanii ní' rihaan sayuun, qui'yaj Diöse á. <sup>31</sup> Che'é dan nq̄ xcúun ní' qui'yaj ní' ndaa vaa taj danj Diöse á. Dan me se taj danj Diöse: "Se ca'mii sa' ní' che'é ma'an ní' ma'. Inanj che'é ma'an Diöse guun rá ní' ca'mii sa' ní' á". Danj taj danj Diöse adonj.

**Nanā nihánj taj xna'anj se vaa ne ca'mii Pabló nanā nachran' rihaan nij sí man Corinto ma'. Maan se inanj cataj xna'anj so' se vaa cavi' Jesucristó rihaan rcutze che'é ní' a**

<sup>2</sup> Ne'en nij soj se vaa ḡaa cuchí' 'unj chiháan soj, ne natá' 'unj se-nanā Diöse rihaan soj, ne ne guun rá 'unj ca'mii 'unj nanā nachran' ndo'o rihaan soj, man tinuj, man nocq̄o. 'O se ne guun rá 'unj cataj soj se vaa avii ndo'o raá 'unj ma'. <sup>2</sup> Tananj yo'ó guun rá 'unj cataj xna'anj 'unj che'é orún' Jesucristó se vaa cavi' so' rihaan rcutze che'é soj a. <sup>3</sup> Dan me se ḡaa cuchí' 'unj rihaan soj, ne guun na'aj 'unj ca'mii 'unj, ne cuchu'vi' ni-manj, ne quiri'íj ndo'o manj nanj á. <sup>4</sup> Ne x̄a' nanā natá' 'unj rihaan nij soj, tzaj ne nuveé nanā cavii raq̄ yuvii me nanā yo' ma'. Tzaj ne cunq̄o nij soj nanā, ne guun ya rá soj se vaa Nimán Diöse rqué nanā yo' manj, ne guun ya rá soj se vaa ma'an Diöse rqué se nucuaj manj ca'mij nanā yo' rihaan soj adonj. <sup>5</sup> Che'é dan nuveé che'é se cavii ndo'o raá 'unj me cuchumán rá soj cunq̄o soj nanā yo' ma'. Tananj che'é se vaa rqué Diöse se nucuaj man ní' me cuchumán rá soj adonj.

**Nanā nihánj taj xna'anj se vaa inq̄ uxrá vaa nanā avii raq̄ nij sí man rihaan chumii nihánj ḡa se-nanā Diöse nanā sa' a**

<sup>6</sup> Dan me se nanā c̄u a'mii núj rihaan nij yuvii vaa chij rá, tzaj ne nuveé nanā avii raq̄ yuvii man rihaan chumii nihánj cuanq̄o me nanā a'mii núj ma'. Ne a'mii núj nanā avii raq̄ nij sí uun chij rihaan chumii nihánj ma'. 'O se ne'en núj se vaa nichrun' ca'neq̄ Diöse suun uun chij at̄a' nij so' nanj adonj. <sup>7</sup> Tzaj ne a'mii núj se-nanā Diöse nanā c̄u adonj. Dan me se ḡaa ataa qui'yaj Diöse chumii, ne yo'ó guun rá Diöse se vaa cunq̄o yuvii nanā c̄u yo', ne cavii sa' yuvii, ne ve'é ndo'o ḡaa yuvii, tzaj ne nij sí man ḡaa naá ro', ne quene'en nij so' nanā yo' ma'. Ndaa yaj me tihaan naca Diöse nanā yo' rihaan yuvii nanj adonj. <sup>8</sup> Ne quene'en nij sí uun chij man rihaan chumii nihánj se-nanā Diöse nanā c̄u ma'. Dan me se Jesucristó me sí guun chij ndo'o rej xta', ne sese quene'en nij sí uun chij man rihaan chumii nihánj se-nanā Diöse, ne ne cachron' nij so' man Jesucristó rihaan rcutze asuun saj ma'.

<sup>9</sup> Tzaj ne danj Diöse taj se vaa a' ó yuvii ne guun nucuaj xcaj cuentá che'é se vaa qui'yaj Diöse che'é ní' sij aráj cochroj rihaan Diöse a. Danj taj danj Diöse á.

<sup>10</sup> Tzaj ne tihaan Nimán Diöse man núj che'é nij rasuun qui'yaj Diöse che'é ní' sij aráj cochroj rihaan Diöse, ne dan me se tihaan Nimán Diöse rasuun yo' man núj, qui'yaj ma'an Diöse á. Dan me se nuchruj raq̄ Nimán Diöse cunudanj rasuun, ne sa' uxrá nuchruj raq̄ Nimán Diöse daj vaa ma'an Diöse adonj.

<sup>11</sup> 'O se a' ó yuvii ne ne'en daj vaa rasuun 'nij yuve nimán yo'ó yuvii ma'. 'O se orún' nimán yuvii ne'en daj vaa nimán ma'an yuvii nanj adonj. Ne danj vaa Diöse uún a. A' ó ní' se ca'vee xcaj cuentá daj vaa Diöse ma'. Maan se orún' Nimán Diöse me sí ne'en daj vaa Diöse

nanj adonj. <sup>12</sup> Ne ino uxrá vaa nimán núj gá nimán nij yuvii man rihaan chumii nihánj, ne xa' núj, tzaj ne nuu Nimán Diose nimán núj, ne che'é dan me xcaj núj cuentá daj vaa nij se sa' rqué Diose rihaan ní' adonj. <sup>13</sup> Dan me se gaa nata' núj rihaan yuvii che'é nij se sa' rqué Diose rihaan ní', ne ne a'mii núj nana avii raá yuvii ma'. Maan se a'mii núj nana tucu'yón Nimán Diose man núj, ne tucu'yón núj nana yo' rihaan yuvii nuu Nimán Diose nimán adonj.

<sup>14</sup> O se na'vej rá yuvii man rihaan chumii nihánj cunoj nij so' nana a'mii Nimán Diose ma'. 'O se snúu rma'an nana a'mii Nimán Diose, rá nij so', ne ne racuíj Nimán Diose man nij so' naqui'yaj cuu nij so' nana yo' a man adonj. Che'é dan taj se 'yá' cunoj nij so' ma'. <sup>15</sup> Xa' sís racuíj Nimán Diose man, tzaj ne ne'en so' naqui'yaj cuu so' cunudanj rasuun, tzaj ne se ca'xee naqui'yaj cuu yo'ó yuvii man so' ma'. Se guun nucuaj nij yuvii xcaj nij yuvii cuentá daj vaa rá so' ma'. <sup>16</sup> Dan me se danj Diose taj: "A' ó yuvii ne ne'en daj vaa rá sís 'nij ra'a man ní' ma'. Se guun nucuaj yuvii nago' yuvii chrej man sís 'nij ra'a man ní' ma'". Danj taj danj Diose á. Ne ase vaa rá Jesucristó ro', danj vaa rá ma'an núj, ne che'é dan se guun nucuaj yuvii naqui'yaj cuu yuvii man núj a man adonj.

**Nana nihánj taj xna'anj che'é suun qui'yaj suun Pabló rihaan Diose se vaa tucu'yón so' se-nana Diose rihaan nij sís man Corinto a**

**3** Dan me se ase vaa yuvii tihaj guun che'e canoco' man Jesucristó ro', danj vaa nij soj gaa cuchí' 'unj rihaan soj, tinuj, nocoj. 'O se vaa ni'yón doj rá soj, ne ataa doj nari' soj cunoj soj rihaan Nimán Diose, ne qui'yaj ndo'o soj se vaa me rá nee man soj qui'yaj soj, ne che'é dan ne ca'vee ca'mij nana chij rihaan soj a ma'. <sup>2</sup> Ne guun nucuaj soj cunoj soj nana chij a'mii Nimán Diose a ma'. Maan se inanj nana tucu'yón nii man xnii ca'mii 'unj rihaan soj, ne veé danj vaa soj ndaa se cuano nihánj, ne ne guun nucuaj soj cunoj soj nana chij a man adonj. <sup>3</sup> Dan me se 'yaj ndo'o soj se vaa me rá inanj nee man soj qui'yaj soj, ne dan me se uun xcoj ruvaá ndo'o rá soj ni'yaj soj tinúu soj, ne che'é dan unu' soj gá tinúu soj, ne che'é dan me ne'en núj se vaa ne uno soj a'mii Nimán Diose a man chuguanj. Maan se ase vaa naj guun yuvii man rihaan chumii nihánj ro', danj vaa soj adonj.

<sup>4</sup> Dan me se taj yo'ó tuvi' soj: "Sij noco' man sís cu'naj Pabló mej á". Ne yo'ó so' ro', taj: "Sij noco' man sís cu'naj Apolos mej á". Danj a'mii 'o' 'o' ta'aj soj, ne che'é dan ase vaa naj guun yuvii man rihaan chumii nihánj vaa soj, rá 'unj nanj á. <sup>5</sup> Daj sij me sís cu'naj Apolos, ne daj sij mej, rá soj gá. Maan se sís 'yaj suun un rihaan sís 'nij ra'a man ní' me núj, ne ino vaa suun ata' 'o' 'o' núj, qui'yaj so', ne che'é suun qui'yaj suun núj ro', che'é dan amán rá soj ni'yaj soj man sís 'nij ra'a man ní' a. <sup>6</sup> Dan me se asino yaan cataj xna'anj 'unj se-nana Diose rihaan soj, gaa ne cuchí' sís cu'naj Apolos uún rihaan soj, gaa ne sa' doj tucu'yón so' nu' se-nana Diose rihaan soj, tzaj ne ma'an Diose me sís qui'yaj canoco'

sa' nimán soj man so', <sup>7</sup> ne che'é dan taj che'é canoco' soj manj do', man sís cu'naj Apolos do' ma'. Maan se no xcuún soj canoco' soj man orún' Diose adonj. <sup>8</sup> Ne 'o' cuyaan vaa 'unj gá sís cu'naj Apolos, ne vaa güii naru'vee Diose rihaan núj che'é suun 'yaj suun núj, <sup>9</sup> ne dan me se 'yaj suun núj che'é Diose, ne ca'ne' Diose suun rihaan núj tucu'yón núj se-nana Diose rihaan soj nanj adonj.

**Nana nihánj taj xna'anj se vaa no xcuún 'o' 'o' sís me rá tucu'yón se-nana Diose tumé so' man ma'an so', gaa ne sa' tucu'yón so' a**

<sup>10</sup> Dan me se ase vaa sís ve'é uchruj ta'nga' chihón cayáan ve' ro', vaa 'unj, ne ve'é cuchruj 'unj tucuáan canoco' soj, che'é yan ca'ne' Diose suun yo' rihaan, ne cuano ro', tucu'yón yo'ó so' nana rihaan soj a. Dan me se no xcuún 'o' 'o' sís tucu'yón nana rihaan soj tumé so' man ma'an so', ne sa' gaa nana tucu'yón so' rihaan soj á. <sup>11</sup> Se guun cuchruj nii yo'ó tucuáan rihaan soj ma'. 'O se se-tucuanj Jesucristó me tucuáan cuchruj 'unj rihaan soj, ne ne nó xcuún nii cuchruj nii yo'ó tucuáan rihaan soj man adonj. <sup>12</sup> Ne ve'é ndo'o tucu'yón ta'aj nij yuvii se-tucuanj Jesucristó rihaan soj, ne nana nij doj tucu'yón yo'ó ta'aj nij yuvii rihaan soj, <sup>13</sup> tzaj ne vaa güii quene'en ní' daj vaa nana tucu'yón 'o' 'o' so' rihaan soj, ne dan me se ca'na' uún Jesucristó rihaan chumii nihánj, ne xa' suun qui'yaj suun 'o' 'o' núj sij tucu'yón se-nana Diose, tzaj ne cachén suun yo' rque ya'an, qui'yaj Jesucristó, ne quene'en núj daj vaa nana tucu'yón 'o' 'o' núj nanj adonj.

<sup>14</sup> Dan me se sese se cacaa nana tucu'yón yo'ó so', ne quene'en ní' se vaa ve'é tucu'yón so' se-nana Diose, ne naru'vee Diose rihaan so', <sup>15</sup> tzaj ne sese ca'caá nu' nana tucu'yón so', ne quene'en ní' se vaa taj yu'vee nó nana tucu'yón so' rihaan yuvii, ne a' 'o' xco' se naru'vee Diose rihaan so' nu' che'é suun qui'yaj suun so' a ma'. Dan me se quinanii ma'an so' rihaan sayuun, tzaj ne nana tucu'yón so' cacaa, ne orún' so' quinanii rihaan sayuun nanj adonj. <sup>16</sup> Ne ne'en soj se vaa sese tiri' yo'ó so' man ve' na'vii yuvii rihaan Diose ro', ne tiri' Diose man so' uún, ne ase vaa ve' na'vii yuvii rihaan Diose ro', ta'nga' danj vaa ma'an soj rihaan Diose, ne yanj Nimán Diose gá soj, ne che'é dan ne nó xcuún yuvii tucunu' yuvii man soj ma'. 'O se sese cunu' soj gá tinúu soj, ne quirí' soj, ne tiri' Diose man sís qui'yaj danj man soj, ne cacaa so' adonj.

<sup>18</sup> Sese vaa yo'ó tuvi' soj avii ndo'o raá nana cuu chij nana uno yuvii man rihaan chumii nihánj cuano, ne dan me se ca'ne' rá so' gá rej a'mii danj nanj ei. Se guun tihaj yu'unj so' man ma'an so' ma'. Maan se xcaj so' cuentá ne naqui'yaj so' sís snúu rma'an man so', gaa ne ca'vee quisij so' guun so' sís avii ndo'o raá doj chuguanj. Dan me se tananj a nari' so' nana ya, ne yá nu' cavii sa' so' doj nanj adonj. <sup>19</sup> Nana avii raá yuvii man rihaan chumii nihánj cuano ro', daj chihaa mój taj se uun nana yo' rihaan Diose ma'. 'O se danj Diose taj se vaa yuvii avii raá ro', me rá nij so' tihaj yu'unj nij so' tuvi' nij so', tzaj ne nicaj Diose nana avii raá nij so', ne



tihá' yu'unj Diose man ma'án nij so' nanj adonj. Danj taj danj Diose ei. <sup>20</sup> Ne taj uún danj Diose se vaa ne'en Diose se vaa taj yu'vee nó nana avii raá yuvií man rihaan chumií nihánj a ma'. Danj taj danj Diose a.

<sup>21</sup> Che'é dan ne nó xcúún ní' ca'mií xtá' ní' che'é nana avii raá yo'o yuvií ma'. Se guun cataj ní' se vaa sa' doj avii raá yo'o so', ne yo'ó so' nij 'yaj, cataj ní' ma'. Tzaj ne xcaj ní' cuentá daj a'mií 'o 'o nij so' á. 'O se nana a'mií yuvií do', nu' rasuun man rihaan chumií nihánj do', ca'vee cavii sa' doj ma'án soj qui'yaj me ma'án rasuun yo', ne vaa se uun nana a'mií nij snó'o do', rasuun man rihaan chumií nihánj do', rihaan soj ei.

<sup>22</sup> Dan me se nana a'mií do', nana a'mií síí cu'naj Apolos do', nana a'mií síí cu'naj Pedró do', vaa se uun nana yo' rihaan soj, ne rasuun man rihaan chumií nihánj ro', vaa se uun yo' rihaan soj á. Ne sese vaa i'ná' soj, ne cavii sa' soj, che'é se vaa i'ná' soj a. Sese cavii soj, ne ca'vee cavii sa' soj uún a. Ne sese ran' soj cuano nihánj do', sese quirán' soj rej rihaan ní' do', ne nu' nij rasuun yo' me vaa se uun rihaan soj á. <sup>23</sup> 'O se síí noco' man Jesucristó me soj, ne ta'nij Diose me Jesucristó uún a.

**Nana nihánj taj xna'anj se vaa síí 'nij ra'a man ní' me síí naqui'yaj cyu man ní' vaa güii a**

**4** Dan me se me rá núj xcaj cunudanj yuvií cuentá se vaa sij 'yaj suun rihaan Jesucristó me núj, ne no xcúún núj nata' núj nana me rá Diose tiháan naca Diose man yuvií nanj á. <sup>2</sup> Dan me se no xcúún núj qui'yaj suun núj nu' suun ca'ne' Diose rihaan núj, ne se ca'vee ca'ne' rá núj ga suun yo' a ma'. <sup>3</sup> Tzaj ne ca'vee se naqui'yaj cyu soj manj do', ca'vee se naj guun cuese naqui'yaj cyu che'ej do', tzaj ne taj se 'yaj ma'. 'O se a ma'án 'unj ne naqui'yaj cuú 'unj daj 'yá' ma'. <sup>4</sup> A 'ó cacun' ne tumé 'unj cuano, rá 'unj, tzaj ne dan me se ne ne'én 'unj daj vaa man ma'anj ma'. 'O se orún' síí 'nij ra'a man ní' me síí no xcúún naqui'yaj cyu che'ej nanj adonj. <sup>5</sup> Che'é dan se guun naqui'yaj cyu soj cacun' che'é yuvií ma'. Maan se na'vij soj ca'na' uún síí 'nij ra'a man ní' rihaan chumií nihánj ei. Cuano nihánj me se ne ne'en sa' ní' daj vaa 'yaj 'o 'o yuvií, tzaj ne asa' ca'na' síí 'nij ra'a man ní', ne tiháan so' rihaan ní' daj vaa 'yaj 'o 'o yuvií man rihaan chumií nihánj, ne sese sa' qui'yaj yo'o so', ne ma'án Diose cataj se vaa sa' qui'yaj so' adonj.

**Nana nihánj taj xna'anj se vaa ne noco' sa' nij síí man Corinto nana tucu'yón Pabló man nij so' a**

<sup>6</sup> Dan me se aj cataj xna'anj 'unj rihaan soj se vaa ma'án Jesucristó naqui'yaj cyu che'é núj ga síí cu'naj Apolos, ne me raj quene'en soj man núj, ne xcaj soj cuentá se vaa no xcúún soj cunó soj nana aj cataj xna'anj Diose rihaan ní' nana no rihaan yanj á. Dan me se se cataj soj se vaa sa' doj vaa yo'o tuvi' núj rihaan yo'ó tuvi' núj ma'. <sup>7</sup> Sa' doj vaa so' rihaan yo'ó yuvií, rá so' na'. Me síí cataj rihaan so' se vaa sa' doj vaa so' ga, man tinuj, man nocoj. Si'yáá so' ro', me se me síí rqué

yo' rihaan so' ga. Ma'án so' qui'yaj na'. Ase Diose qui'yaj xa'. Sese rqué Diose nu' si'yáá so' rihaan so', ne taj che'é ca'mií xtá' so' a doj ma'. <sup>8</sup> Ne xa' soj, tzaj ne a 'ó rasuun ne achiin man soj, rá soj, ne ru'vee me soj, rá soj, ne rii ta'nga' ndo'o soj, rá soj a. Ne xa' núj, tzaj ne a doj ne rii ta'nga' núj, rá soj a. Sese ya rii ta'nga' soj, ne guun niha' uxrá raj, ne ndaa a núj quirii ta'nga' ga soj ei.

<sup>9</sup> Ne xa' núj apóstol cune' Jesucristó man nata' se-nana so' rihaan cunudanj nij yuvií man rihaan chumií nihánj, tzaj ne ase vaa síí naj rma'án ro', danj vaa núj rihaan chumií nihánj, ne sij daj doj cavii me núj, qui'yaj Diose, raj a. Che'é dan ni'yaj ndo'o nij síí man rihaan chumií nihánj ni'yaj ma'án nij se-mozó Diose ni'yaj ndo'o man núj, che'é se vaa síí yanj rma'án me núj a.

<sup>10</sup> Dan me se ase vaa síí ni'yón vaa núj rihaan chumií nihánj, che'é Jesucristó, tzaj ne síí cyu raá me soj che'é Jesucristó, rá soj a. Ne síí nucuaj ndo'o me soj, rá soj, tzaj ne núj me se síí inaj me núj a. Ne ve'é ndo'o aráj cochroj yuvií rihaan soj, tzaj ne xa' ma'án núj, tzaj ne tananj a nachri' yuvií ni'yaj yuvií man núj a.

<sup>11</sup> Nu' ca'na' me se achiin se chá rihaan núj do', achiin se co'o núj do', achiin yatzií quitaj xráá núj do' á. Tucuxru' ndo'o nii man núj, ne ne'en nii se vaa taj vaj to'óo núj a. <sup>12</sup> Dan me se 'yaj suun ndo'o núj, ga ne a'vee ri' núj se achiin man núj a. Nachri' nii ni'yaj nii man núj, tzaj ne a'mií núj nana luj rihaan nij síí nachri' ni'yaj man núj, ne 'yaj nii sayuun man núj, tzaj ne ne a'ne' rá núj ga suun vaa rihaan núj a man adonj.

<sup>13</sup> Nana nij a'mií nii rihaan núj, tzaj ne nana sa' a'mií núj ga nij síí a'mií nij che'é núj a. Ase vaa nacaj na'nu' nii rihaan cunudanj rasuun man rihaan chumií ro', danj vaa núj rihaan chumií nihánj nu' ca'na', ne veé danj vaa núj ndaa cuano nihánj nanj adonj.

<sup>14</sup> Dan me se quisij cachron 'unj nana nihánj nayaa soj, ne nuveé che'e se me raj guun na'aj soj me cachronj nana nihánj ma'. 'O se ase vaa ta'nij vaa soj rihanj, tinuj, nocoj, ne che'é se 'ee raj man soj, che'é dan me raj narquej chrej sa' man soj ei. <sup>15</sup> Ca'vee se cuchi! chi' mij síí tucu'yón che'é Jesucristó rihaan soj, tzaj ne asinoj me síí cataj xna'anj se-nana Diose nana sa' rihaan soj á. Canoco' soj man Jesucristó ga 'unj, ne che'é dan ase vaa rej soj vaa 'unj, tinuj, nocoj. <sup>16</sup> Che'é dan me cataj xna'anj 'unj rihaan soj se vaa ase vaa 'yáá 'unj ro', danj gaá qui'yaj guéé soj uún a. <sup>17</sup> Che'é dan ca'nej 'unj man síí cu'naj Timoteo cuchi' so' rihaan soj, ne síí noco' man síí 'nij ra'a man ní' me so' ga 'unj, ne che'é dan ase vaa ta'nij vaa so' a. 'Ee raj man so', ne nucuaj raj man so' nanj adonj. Cataj xna'anj uún so' rihaan soj nu' tucuáán noco' 'unj che'é Jesucristó, ne 'o cuyaán vaa nana tucu'yón so' ga nana tucu'yón 'unj rihaan nij síí amán rá ni'yaj man Jesucristó man cunudanj nij chuman' rej vaj 'unj a.

<sup>18</sup> Guun che'e ta'aj nij soj ca'mií xtá' ta'aj nij soj, ne xa' nij síí a'mií xtá', tzaj ne se cuchi' ma'anj rihaan soj, rá nij so' a. <sup>19</sup> Tzaj ne ra'yanj ya cuchi! ma'anj rihaan soj, sese ca'vej síí 'nij ra'a man ní', ga ne nuveé inanj che'é nana a'mií xtá' nij so' xcaj 'unj cuentá ma'. 'O se

xcaj 'unj cuentá sese ya quisij nij so' qui'yaj nij so' ndaa vaa taj nij so' adonj. <sup>20</sup> 'O se se guun chij ní' ga Diose qui'yaj nana tu'va uun ní' ma'. 'O se guun chij ní' ga Diose, qui'yaj suun guun nucuaj ní' qui'yaj suun ní' che'é Diose adonj. <sup>21</sup> Me se me rá soj qui'yáa ga soj asa' cuchí' 'unj rihaan soj ga. Me rá soj qui'yáa 'unj sayuun man soj na'. Ase me rá soj gaa 'ee rá 'unj man soj ne ve'é ca'mij ga soj xa'.

**Nana nihánj taj xna'anj se vaa a'ne' Pabló suun rihaan nij sí' man Corinto se vaa quirij yanij nij so' man 'o sí' tumé cacun' 'nij sca'núj nij so' a**

**5** Dan me se nata' nii rihanj se vaa 'nij 'o sí' tumé ndo'o cacun' sca'núj nij soj, ne cacun' chí'ii ndo'o me yo', ne a nij sí' ne noco' man Diose ne 'yaj danj ma'. Dan me se vaa yo'o sí' otoj ga nica rej 'nij sca'núj soj, taj nii ei. <sup>2</sup> Me che'é a'mii xta' soj ga. Me che'é ne nanó rá soj ga. Me che'é ne quirij yanij soj man sí' tumé cacun' 'nij sca'núj soj ga. <sup>3</sup> Nuvi' ya xa' 'unj ne ga soj cuano, tzaj ne nuchruj raa ndo'oj che'é soj, ne nana nihánj ro', a'mii 'unj, ne ase uun rá soj gaa nej ga soj ro', danj guun rá soj cunó soj nana nihánj á. Che'é dan asa' cunuu chre' soj, ne xcaj soj cuentá che'é rej ya nicun' nimán 'unj sca'núj soj, qui'yaj Jesucristó sij 'nij ra'a man ní', ne che'é Jesucristó sij 'nij ra'a man ní' taj xna'anj 'unj rihaan soj se vaa ya tumé ndo'o snó'o yo' cacun', <sup>5</sup> ne taj xna'anj 'unj rihaan soj se vaa tacuachén soj man sí' tumé cacun' yo' rihaan sí' chree cu'naj Sataánas, gaa ne quiran' ndo'o nee man so' sayuun, qui'yaj sí' chree, gaa ne sese xcaj sa' so' cuentá, ne gaa asa' ca'na' sí' 'nij ra'a man ní' ca'ne' so' cacun' che'é yuvij, gaa ne quinaniij nimán so', qui'yaj sí' 'nij ra'a man ní' a.

<sup>6</sup> Ne chihan' uxrá vaa gaa a'mii xta' soj, man tinuj, man nocoj. Ne'en soj se vaa yo'óo cu'naj levadura 'yaj naraa nana rque rachruún a. Doj tzin' yo'óo cu'naj levadura 'yaj naraa nana rque nocoo ndo'o cunj adonj. Ne ase vaa levadura rihaan cunj yo' ro', danj vaa orún' sí' 'yaj cacun' rihaan soj, ne dan me se quirij que'ee soj, qui'yaj orún' sí' tumé cacun' 'nij sca'núj soj ei. <sup>7</sup> Che'é dan me, ne quirij yanij soj nu' se nij 'nij sca'núj soj, gaa ne ase vaa cunj naca sa' ro', danj gaa soj, ne se guun qui'nij se nij sca'núj soj a ma'. Xa' soj, tzaj ne ya vaa sa' soj, qui'yaj Jesucristó, ne dan me se aj cavi' so' che'é ní', ne ase vaa caráán matzinj rihaan sayuun che'é nij yuvij israelitá gaa naá ro', danj vaa caráán Jesucristó rihaan nu' sayuun che'é ní', ne se quiran' ní' sayuun che'é cacun' tumé ní' a ma'. <sup>8</sup> Che'é dan, ase vaa navij rá nij yuvij israelitá cha'anj pascuá cha'anj avi' matzinj che'é nij so' ro', danj gaa ve'é ndo'o qui'yaj ma'an ní' rihaan Diose cuano, che'é rej cavi' Jesucristó che'é ní' á. Dan me se yuvij israelitá ro', ri'ij nij so' nu' se cu'naj levadura man tucua nij so' gaa navij rá nij so' cha'anj pascuá, ne 'o cuyaaj qui'yaj ní' ga nij so', quirij ní' nu' se chí'ii man nimán ní', gaa ne se gaa chí'ii nimán ní' ei. Se qui'yaj ní' se nij qui'yaj ní' gaa rque ma'. Tananj ca'mij chij ní', ne inanj tucuaán ya qui'yaj ní' á.

**Nana nihánj taj xna'anj se vaa sese vaa 'o sí' taj se vaa tinúu ní' me so', tzaj ne sese 'yaj ndo'o so' cacun', ne se chá ní' chraa ga so' a**

<sup>9</sup> Aj ca'neé 'unj nana rihaan soj rihaan yo'óo yanj se vaa se cunuu chre' soj ga nij sí' 'yaj cacun' ga chana adonj. <sup>10</sup> Tzaj ne ne ca'mij 'unj che'é sí' man rihaan chumij nihánj sí' ne noco' man Jesucristó ma'. Dan me se nij so' me sí' 'yaj ndo'o cacun' ga chana, ne uun xcoj ruvaa rá nij so' ne'en nij so' tuvi' nij so', ne 'yaj ituu nij so' si'yaj tuvi' nij so', ne na'vij nij so' rihaan ya'anj ne vaa i'na' uún a. Tzaj ne sese me rá soj guun yanij soj ga nij sí' 'yaj cacun' man rihaan chumij nihánj, ne me rej ca'anj soj ga. 'O se man nij so' rihaan nu' cachra' chumij nihánj, ne se ca'vee curihanj soj rihaan nij so' rihaan chumij nihánj ma'. <sup>11</sup> Maan se che'é soj cachron 'unj nana nihánj se vaa se guun cunuu chre' soj ga yo'o sí' taj uun tinúu man soj, ne ne ya noco' so' man Jesucristó, ne 'nij so' sca'núj soj ei. Dan me se sese tinúu soj me so', taj yo'o so', tzaj ne sese 'yaj so' cacun' ga chana do', sese uun xcoj ruvaa rá so' do', sese na'vij so' rihaan ya'anj ne vaa i'na' do', sese nachri' so' ni'yaj so' tuvi' so' do', sese sí' xno me so' do', sese sí' ituu me so' do', ne se cunuu chre' soj ga so' do', a ne nó xcúun so' cataj tinuj soj man so' a mei. Ne a 'o chraa se chá soj ga so' a ma'.

<sup>12</sup> Dan me se ne nó xcúun 'unj ca'ne' 'unj cacun' che'é nij sí' ne noco' man Diose ma'. Ma'an Diose nó xcúun ca'ne' cacun' che'é nij so' adonj. Tzaj ne no xcúun soj ca'ne' soj cacun' che'é nij tinúu soj sí' nuu chre' ga soj, ne danj Diose taj: "Quirij yanij soj man sí' chí'ii 'nij sca'núj ma'an soj á". Danj taj danj Diose adonj.

**Nana nihánj taj xna'anj se vaa ne nó xcúun ní' ca'mij ní' che'é pleitó man sca'núj ní' rihaan nij cuesé man chiháán ní' a. Ne se guun qui'yaj ní' cacun' man tinúu ní' ma'**

**6** Gaa unu' soj ga tinúu soj, ne 'anj soj uchruj soj cacun' rihaan cuesé sí' ne amán rá ni'yaj man Jesucristó ne ne 'anj soj rihaan yo'o tuvi' nij sí' sa' noco' man Diose man chuguanj. Nij uxrá vaa 'yaj soj danj ei. <sup>2</sup> Ne ne ne'en soj se vaa vaa güii, ne ca'ne' ní' sij sa' noco' man Diose cunudanj cacun' che'é cunudanj nij yuvij man rihaan chumij nihánj a. Sese ca'ne' soj cacun' che'é cunudanj chumij vaa güii, gaa ne me che'é se guun nucuaj soj ca'ne' soj cacun' che'é cacun' le'ej nii cuano ga. <sup>3</sup> Ne ne'en soj se vaa vaa güii, ne ndaa che'é ya se-mozó Diose ca'ne' ní' cacun' vaa güii a. Che'é dan me ya guun nucuaj ya soj ca'ne' soj cacun' che'é daj a nij sí' man rihaan chumij nihánj cuano ei. <sup>4</sup> Che'é dan, sese vaa cacun' sca'núj soj rihaan chumij nihánj, ne ca'anj cuchruj soj cacun' rihaan naj guun sí' amán rá ni'yaj man Jesucristó ei. Me ma'an sí' nica' doj rihaan cunudanj soj ro', guun nucuaj so' ca'ne' so' cacun' che'é tinúu soj ei. <sup>5</sup> Dan me se vaa che'é guun na'aj ya soj che'é se vaa 'yaj soj danj ei. Ne nuvi' a 'o

tinúú soj síí guun nucuaj naqui'yaj cyu man pleitó che'é tinúú soj síí man sca'núj soj a a. <sup>6</sup> Tzaj ne nuveé, maan se inan unu' soj ga tinúú soj, maan ne ndaa 'anj soj uchruj soj cacun' 'yaj soj rihaan nij síí ne amán rá ni'yaj man Jesucristó, ne nij uxrá vaa 'yaj soj adonj.

<sup>7</sup> Che'é yan unu' soj ga tinúú soj me se aj tumé uxrá soj cacun' vaa nanj adonj. Aj quiri' nu' soj, ne sa' doj sese ca'ne' cachrij rá soj qui'yaj chi'ii tinúú soj man soj do', ca'ne' rá soj qui'yaj ituu cachrij tinúú soj man si'yaj soj do', nanj ei. <sup>8</sup> Tzaj ne na'vej rá soj qui'yaj soj danj, maan ne tananj a ma'an soj 'yaj chi'ii man tinúú soj do', 'yaj ituu soj si'yaj tinúú soj do', nanj chiha'. <sup>9</sup> Ne ne'en soj se vaa se cayáán nij síí chi'ii ga Diose asa' guun hij Diose rihaan chumii nihánj a'. Se guun tiha' yu'unj soj man ma'an soj ma'. 'O se síí chi'ii do', síí na'víj rihaan ya'anj ne vaa i'na' do', síí otoj ga nicá tuvi' do', chii chana do', síí otoj ga chii chana do', <sup>10</sup> síí ituu do', síí uun xcoj ruvaá rá do', síí xno do', síí nachri' ni'yaj tuvi' do', síí tiha' yu'unj man tuvi' do', se cayáán nij so' ga Diose asa' guun hij Diose rihaan chumii nihánj a ma'. <sup>11</sup> Dan me se danj inan qui'yaj ta'aj soj gaa rque, tzaj ne yaj me se x'néj cacun' taj xraá soj, ne cunuu sa' nimán soj, ne cunuu sa' soj rihaan Diose, qui'yaj Jesucristó sij 'nij ra'a man ní' do', qui'yaj Nimán Diose síí noco' ní' man do', cuano ei.

#### Nana nihánj taj xna'anj se vaa ne nó xcúún ní' qui'yaj ní' cacun' ga chana ma'

<sup>12</sup> Dan me se taj ya uún nii, ne: "Síí vaa ya'núj rihaan mej a. Ca'vee qui'yáá 'unj naj guun rasuun me raj qui'yáá á". Tzaj ne se cavii sa' 'unj, qui'yaj naj guun rasuun me raj qui'yáá a ma'. Dan me se ya uxrá síí vaa ya'núj rihaan mej, tzaj ne se ca'vej raj guun hij a doj rasuun rihanj ma'. <sup>13</sup> Dan me se taj ya uún nii, ne: "Vaa rque ní' a. Che'é dan cha ní' a. Inanj che'é rque ní' ro', vaa se chá yo' a. Ne che'é se chá yo' vaa rque ní' uún", taj uún nii a. Dan me se ya uxrá ei. Danj vaa roj yo' ei. Tzaj ne Diose qui'yaj navij roj yo' nanj chuguanj. Dan me se xa' nee man ní', tzaj ne nuveé se qui'yaj naj guun rasuun chi'ii ga chana me yo' ma'. Se cayáán ga síí 'nij ra'a man ní' me yo', ne rej ne so' me uún yo' chuguanj. <sup>14</sup> Dan me se nda' rá se vaa naqui'yaj i'na' Diose man síí 'nij ra'a man ní' gaa cavi' so' ro', danj guun nucuaj Diose cunuu i'na' uún ma'an ní' qui'yaj uún so' nanj adonj.

<sup>15</sup> Ne ne ne'en soj se vaa nee man nij soj me se ase vaa nee man Jesucristó ro', vaa nee man soj a. Dan me se ca'vee nicaj ní' nee man Jesucristó, ne cunuu rcua'agan yo' ga chana niha' rá ga chii, qui'yaj ní' na'. Se ca'vee gaa danj qui'yaj ní' a ma'. <sup>16</sup> Dan me se ne ne'en soj se vaa síí otoj ga chana niha' rá ro', nuu 'o nee man so' ga chana yo' a. Dan me se ase vaa orún' yuvii vaa so' ga chana yo' nanj chuguanj. Danj Diose taj: "Ase vaa orún' yuvii ro', danj vaa roj so' a". Danj a'mii danj Diose ei. <sup>17</sup> Tzaj ne sese guun tuvi' ní' ga síí 'nij ra'a man ní', ne 'o vaa nimán ní' ga so' adonj.

<sup>18</sup> Tumé uxrá soj man soj, ne naxuun soj man soj rihaan nij chana niha' chana me rá cotoj ga soj ei. Se

ca'vej uxrá rá soj qui'yaj soj danj ma'. Naj guun cacun' qui'yaj ma'an snó'o ro', nuveé cacun' qui'yaj so' man ma'an nee man so' me cacun' yo' ma'. Tzaj ne sese qui'yaj snó'o cacun' ga chana niha' rá, ne yo' me cacun' qui'yaj so' man ma'an nee man so' adonj.

<sup>19</sup> Ne ne ne'en soj se vaa ase vaa nuví sa' ndo'o vaa nee man soj, ne rej yanj Nimán Diose me yo' a. Dan me se Diose me síí rque nee man soj rihaan soj, ne nuveé si'yaj ma'an soj me nee man soj a man adonj.

<sup>20</sup> Dan me se vaa ndo'o yu'vee nó soj rihaan Diose, ne noco ndo'o naru'vee so' gaa quiránj so' man soj, ne che'é dan no xcúún soj qui'yaj suun nee man soj che'é Diose, ne ve'é ndo'o ca'mii yuvii che'é Diose, qui'yaj soj ei.

#### Nana nihánj taj xna'anj daj qui'yaj ní' sese vaa nicá ní' do', sese taj vaj nicá ní' do' a

**7** Ne cuano nihánj me cataj xna'anj 'unj rihaan soj che'é rasuun xna'anj soj manj a. Dan me se sa' vaa sese se xcaj tuvi' snó'o ga chana saj adonj. Sa' vaa sese quinaj uun so', cayáán ma'an so' adonj. <sup>2</sup> Tzaj ne cuano nihánj me se 'yaj ndo'o yuvii cacun' ga chana, ne che'é dan ca'vee a doj xcaj snó'o man nicá so' nanj á. Dan me se no xcúún snó'o xcaj so' man chana, ne no xcúún chana xcaj no' man snó'o, <sup>3</sup> ne ve'é qui'yaj snó'o cotoj so' ga chana nicá so', ne ve'é qui'yaj chana cotoj no' ga snó'o nicá no' uún a. No xcúún roj so' cotoj roj so' ga tuvi' roj so' ei. <sup>4</sup> Dan me se chana ro', se quirii ta'nga' no' rihaan nee man ma'an no' ma'. 'O se nicá no' quirii ta'nga' rihaan nee man no', ne vaa snó'o uún, ne se quirii ta'nga' so' rihaan nee man ma'an so' uún ma'. 'O se nicá so' quirii ta'nga' rihaan nee man so' uún adonj.

<sup>5</sup> Se guun cataj yo'o so' se vaa na'vej rá so' cotoj so' ga nicá so' ma'. Tzaj ne sese 'o cuyáan guun rá roj nicá roj so' se vaa me rá roj so' guun yanij roj so' rihaan tuvi' roj so' che'é yan yo'o cachinj ni'yaj roj so' rihaan Diose doj güii, ne ca'vee qui'yaj roj so' danj ei. Dan me se ndaa quisij cachíin ni'yaj roj so' rihaan Diose, gaa ne cunuu rcua'agan uún roj nicá roj so', cotoj rcua'agan uún roj so' ei. Sese se cuno soj nana nihánj, ne caxrij síí chree chrej chi'ii rque soj, che'é se se guun nucuaj soj guun yanij soj rihaan nicá soj que'ee güii ma'.

<sup>6</sup> Ne a'né' 'unj suun rihaan soj se vaa xcaj tuvi' soj, man tinuj, man nocoj. Maan se ataj 'unj se vaa sese me rá soj xcaj tuvi' soj, ne ca'vee qui'yaj soj danj ei. <sup>7</sup> Dan me se sa' doj sese 'o cuyáan gaa cunudanj yuvii ga 'unj, ne guun nucuaj cunudanj nij yuvii cayáán ma'an nij yuvii, rá 'unj, tzaj ne se guun nucuaj cunudanj yuvii qui'yaj nij so' danj a ma'. Dan me se ndaa ino vaa se nucuaj 'o 'o ní' 'yaj ní', 'yaj Diose, ne dan me se ino vaa se nucuaj yo'o tinúú ní' qui'yaj so', ne ino doj vaa se nucuaj yo'o tinúú ní' qui'yaj so' uún a.

<sup>8</sup> Dan me se cataj xna'anj 'unj rihaan nij soj sij yaan do', rihaan soj chana yaan do', rihaan soj chana cavi' nicá do', se vaa sa' vaa sese guun nucuaj soj cayáán ma'an soj, ne ase vaa uun ma'anj ro', danj gaa cane

ma'an soj tzaj adonj. <sup>9</sup> Tzaj ne sese se guun nucuaj nij soj cayáan ma'an soj, ne táa a se xcaj tuvi' cachrij soj nanj ei. Che'é se acaa tiha' gaa me uun rá soj cotoj soj ga 'o chana, táa a se xcaj tuvi' cachrij soj nanj adonj.

<sup>10</sup> Nihánj me cataj xna'anj 'unj rihaan soj sij vaa nica daj qui'yaj soj ga nica soj ei. Dan me se nuveé nana cavii raq ma'anj me nana nihánj ma'. 'O se nana cataj xna'anj síi 'nij ra'a man ní' rihaan ní' me nana nihánj adonj. Dan me se se cunanj chana rihaan nica no' ma'. <sup>11</sup> Sese cunanj chana rihaan nica no', ne quinaj uun no', ne se xcaj no' yo'ó snó'o ma'. Maan se ca'vee canicaj uun no' nan' no' rihaan nica no', ne guun tuvi' uun no' ga nica no' ei. Ne snó'o uun me se se tanáj so' man nica so' ma'.

<sup>12</sup> Vaa doj nana cataj xna'anj uun 'unj rihaan soj sij vaa nica, tzaj ne nuveé nana cataj xna'anj síi 'nij ra'a man ní' me nana nihánj, tzaj ne nana ya me nana nihánj, raj adonj. Dan me se sese vaa nica yo'ó tinúú ní', ne nuveé chana amán rá ni'yaj man Jesucristó me no', tzaj ne taj che'é quirij tinúú ní' man no', sese a'vej rá no' cané no' ga so' a. <sup>13</sup> Ne sese vaa chana ra'vij ní' chana amán rá ni'yaj man Jesucristó, ne nica no' ne amán rá ni'yaj man Jesucristó, tzaj ne cané no' ga so', ne taj che'é cunanj no' rihaan so', sese a'vej rá so' cané no' ga so' ma'. <sup>14</sup> Snó'o ne amán rá ni'yaj man Jesucristó ro', me rá Diose qui'yaj suun Diose nimán so' che'é nica so' chana ra'vij ní', ne chana ne amán rá ni'yaj man Jesucristó ro', me rá Diose qui'yaj suun Diose nimán no' che'é nica no' tinúú ní', ne che'é dan me cunuu sa' ta'níí roj so' rihaan Diose, qui'yaj Diose vaa güii adonj. Sese se qui'yaj Diose danj, ne sij yo'ó tumé cacun' me ta'níí soj rihaan Diose asuun tzaj adonj. Nihánj me se che'é se sij amán rá ni'yaj man Diose me ma'an soj, ne ya uxrá cunuu sa' ta'níí soj rihaan Diose vaa nanj adonj.

<sup>15</sup> Sese nica ní' ne amán rá ni'yaj man Jesucristó, ne me rá nica ní' ca'anj yanij yo' rihaan ní', ne ca'ne' cachrij rá ní' ca'anj nica ní' nanj ei. Gaa ya'núj rihaan ní' gaa nanj adonj. Sese ne amán rá nica ní' ni'yaj nica ní' man Jesucristó, ne taj che'é qui'yaj ní' fuerzá man nica ní' cané nica ní' ga ní' a ma'. 'O se canacúún Diose man ní' che'é rej dínj cumán ní' adonj. <sup>16</sup> Asa' ne'én so' chana gaa xraj, ne ca'vee quinanií snó'o nica so' rihaan sayuun qui'yáa so' ga. Ne asa' ne'én so' snó'o quinanií chana nica so' rihaan sayuun qui'yaj uun so' ga.

<sup>17</sup> Veé ndaa se vaa 'o 'o ní' gaa canacúún Diose man ní' ca'na' ní' xrej so' ro', veé danj gaa ní' nanj á. 'O se nihánj me chrej narqué 'unj man daj a nij síi noco' man Jesucristó man daj a chuman' a. <sup>18</sup> Sese Diose me síi canacúún man síi aj taj ta'nga' man canoco' so' man so', gaa ne taj se 'yaj mei. Veé danj gaa quitaj ta'nga' man nij so' nanj ei. Ne veé danj vaa nij síi nuvi' ta'nga' táa man uun gaa canacúún Diose man nij so' canoco' nij so' man Diose uun, ne taj che'é guun rá nij so' cano ta'nga' man nij so' ma'. Veé danj gaa cachrij nij so' nanj ei. <sup>19</sup> Dan me se ca'vee se taj ta'nga' man ní', ca'vee se nuvi' ta'nga' táa man ní', ca'vee se, tzaj ne taj

se 'yaj ma'. Maan se inanj no xcuún ní' cunó ní' nu' nana cataj xna'anj Diose rihaan ní' nanj adonj. <sup>20</sup> Veé ase vaa ní' gaa canacúún Diose man ní' canoco' ní' man Diose ro', veé danj gaa cayáan ní' rej rihaan ní' nanj ei.

<sup>21</sup> Dan me se sese mozó mé so' gaa canacúún Diose mán so' canoco' so' man Diose, ne se nanó rá so' ma'. 'O se mozó sij canacúún Diose man canoco' man Diose ro', nuveé mozó uun me so', ni'yaj Diose ma'. 'O se vaa ya'núj rihaan so' canoco' so' man síi 'nij ra'a man ní' nanj adonj. Ne síi ne uun mozó gaa canacúún Diose man so' me se no xcuún so' guun so' mozó nuu rihaan Jesucristó yaj adonj. Tzaj ne sese gaa ya'núj rihaan mozó guun yanij so' rihaan ru'vee rii ta'nga' rihaan so', ne vaa che'é guun yanij so' chuguanj.

<sup>23</sup> Sayuun ndo'o quiran' Diose gaa quiranj Diose man soj, ne che'é dan se ca'vej rá soj quirij ta'nga' rma'an yuvij rihaan soj a ma'. <sup>24</sup> Dan me se ase vaa cayáan ní' gaa canacúún Diose man ní' canoco' ní' man Diose ro', veé danj gaa cayáan ní' rej rihaan ní' che'é Diose, tinuj, nocoj.

<sup>25</sup> Cataj xna'anj 'unj rihaan nij soj che'é rej xcaj tuvi' ní', tinuj, nocoj. Nuveé nana cataj xna'anj síi 'nij ra'a man ní' rihaan ní' me nana nihánj, tzaj ne cunuu 'ee rá síi 'nij ra'a man ní' manj, ne che'é dan me ca'ne' so' suun rihanj, ne che'é dan cataj xna'anj 'unj rihaan soj daj me raj, ne ca'vee guun nucuaj rá soj man nana nihánj nana cataj xna'anj 'unj rihaan soj a. <sup>26</sup> Dan me se vaj ní' quiran' ndo'o ní' sayuun rihaan chumij nihánj, ne che'é dan me sa' a doj sese cayáan ma'an snó'o ndaa vaa ne so' cuano, raj a.

<sup>27</sup> Dan me se sese vaa nica so', ne se nanó rá so' rej quirij so' man nica so' ma'. Ne sese nuvi' nica so', ne se xcaj so' chana ma'. <sup>28</sup> Tzaj ne sese xcaj so' 'o chana, ne nuveé cacun' me yo' mei. Ne sese xcaj chana yaan man 'o snó'o, ne nuveé cacun' me yo' uun mei. Tzaj ne nij síi vaa nica ro', me se quiran' nij so' sayuun rihaan chumij nihánj, ne me raj quinanií soj rihaan sayuun yo' ei.

<sup>29</sup> Dan me se me raj quene'en soj se vaa nichrun' quisij güii ca'na' uun Jesucristó rihaan chumij nihánj, ne che'é dan me se nica raan ní' man rasuun man rihaan chumij nihánj ma'. 'O se ra'yanj navij nu' rasuun man rihaan chumij nihánj nanj ei. Dan me se síi vaa nica ro', ase vaa síi yaan ro', danj gaa so' cayáan so' á. <sup>30</sup> Ne síi nanó ndo'o rá ro', se ta'vee so' ma'. Ne síi nihá' ndo'o rá ro', se ca'nga' so' ma'. Ne síi naránj natu'vej ro', ase vaa síi nuvi' rasuun rihaan danj gaa so', ne inanj qui'yaj suun so' che'é Jesucristó á. <sup>31</sup> Ne síi 'yaj suun ga chumij nihánj ro', ase vaa síi ne achiin chumij nihánj rihaan ro', danj gaa so' á. 'O se vaj navij chumij nihánj, ne ino uxrá gaa chumij nihánj vaa güii nanj ei.

<sup>32</sup> Ne na'vej raj nana ndo'o rá nij soj ma'. Dan me se síi nuvi' nica vaa ro', inanj acaj so' cuentá daj qui'yaj so', ne guun nihá' rá síi 'nij ra'a man ní' ni'yaj síi 'nij ra'a man ní' man so' a. <sup>33</sup> Tzaj ne síi vaa nica ro', me se acaj ndo'o so' cuentá che'é chumij nihánj daj qui'yaj

so', gaa ne guun niha' rá nica so' ni'yaj no' man so',<sup>34</sup> ne uun vij rá so' a. Ne ase vaa snó'o ro', danj vaa chana uún, ne chana yaan do', chana ne vaa nica do', inanj che'é sí 'nij ra'a man ní' acaj no' cuentá, ne acaj ndo'o no' cuentá daj qui'yaj no' che'é rej inanj sa' uxrá gaa nee man no' do', nimán no' do', rihaan Diose a. Tzaj ne chana vaa nica ro', me se acaj ndo'o no' cuentá che'é chumii nihánj daj qui'yaj no', gaa ne guun niha' rá nica no' ni'yaj so' man no' a.<sup>35</sup> Maan che'é se inanj me raj cavii sa' soj me a'mij nana nihánj rihaan soj ei. Nuveé che'e se me raj caránj chrej rihaan soj daj qui'yaj soj me a'mij nana nihánj rihaan soj ma'. Maan che'é se me raj ve'é inanj qui'yaj soj ne yo'o canoco' sa' soj man sí 'nij ra'a man ní' ro', che'é dan ca'mij danj, ne na'vej raj guun vij rá soj a man adonj.

<sup>36</sup> Dan me se vaa ta'níi ta'aj soj chana yaan, ne sa' doj cane ma'an no' tucua soj, rá soj, tzaj ne sese chana yaan cachij me no' ne me ndo'o rá no' xcáj no' man snó'o, ne sese aj xcáj rej no' cuentá se vaa nanó rá no' 'yaj ma'an so', gaa ne ca'vee go' so' man no' rihaan snó'o, ne xcáj tuvi' roj so' ei. Dan me se sese se ca'vee quinaj uun no', rá rej no', ne no xcúún rej no' rque so' man no' adonj. Nuveé cacun' me yo' ma'. Ca'vee xcáj tuvi' chana yaan ga 'o snó'o ei.<sup>37</sup> Tzaj ne sese me ndo'o rá rej chana se vaa cane no' tucua so', ne cane no', ne sese taj che'é xcáj chana man snó'o, ne guun nucuaj rej no' qui'yaj so' ndaa vaa me rá ma'an so' qui'yaj so' a. Cane ta'nij chana so' tucua so', qui'yaj so', ne sa' uxrá vaa 'yaj so' sese danj 'yaj so' ei.<sup>38</sup> Che'é dan me, sí o' ta'nij chana rihaan snó'o ro', sa' 'yaj so', ne sí na'vej rá go' ta'nij chana rihaan snó'o ro', me se sa' doj 'yaj so' adonj.

<sup>39</sup> No xcúún chana cayáan chana ga nica chana ndaa se cavi' so', tzaj ne sese cavi' nica chana, ne ca'vee xcáj chana man naj guun snó'o me rá ma'an no' xcáj no', tzaj ne no xcúún no' xcáj no' man sí nocó' man sí 'nij ra'a man ní' a.<sup>40</sup> Tzaj ne sese quinaj uun no', ne ve'é doj gaa cane ma'an no' ei. Danj inanj vaa rá 'unj, ne ase vaa yáan Nimán Diose ga soj ro', danj vaa ne Nimán Diose ga 'unj uún nanj ei.

### Nana nihánj taj xna'anj se vaa se guun quiran' tinúú ní' sayuun, qui'yaj ní' ma'

**8** Ne cataj xna'anj 'unj rihaan soj che'é nee aj cuta' nii rihaan ya'anj cacój yuvii a. Ne'en ní' se vaa sí acaj cuentá me cunudanj ní', ne nuveé se ya'anj tiha' me ne'en ní', ne ca'mii xta' ní' ma'. 'O se nij ndo'o vaa sese danj qui'yaj ní' adonj. Tzaj ne sese 'ee rá ní' man tinúú ní', ne racuíj ní' man tinúú ní', gaa ne cavii sa' tinúú ní' doj á.<sup>2</sup> Dan me se sí taj se vaa sa' uxrá ne'en ma'an so' ro', ataa doj nari' so' nana achiin man so' ei.<sup>3</sup> Tzaj ne sese ya' aráj cochroj yo'o so' rihaan Diose, ne ya' ne'en Diose man so' uún adonj.

<sup>4</sup> Dan me se cataj xna'anj 'unj rihaan soj se vaa ne no xcúún ní' cha' ní' nee cuta' nii rihaan ya'anj cacój yuvii a. Ne ya' ne'en ní' se vaa taj se guun ya'anj cacój yuvii rihaan chumii nihánj ma'. Ne xa' Diose, tzaj ne oruun ya' so' adonj.<sup>5</sup> Dan me se man ndo'o ya'anj nocó' nij

yuvii man rihaan chumii nihánj, ne tumé ya'anj yo' man nij yuvii, rá nij yuvii, ne ya'anj me yo', rá nij so', ne ta'aj ya'anj yo' rii ta'nga' rej xta', ne yo'ó ta'aj ya'anj yo' rii ta'nga' rihaan yo'óo, rá nij so' a.<sup>6</sup> Ne xa' ní', tzaj ne ne'en ní' se vaa oruun ya' Diose á. Rej ní' Diose me so', ne orún' so' me sí qui'yaj cunudanj rasuun man rihaan chumii nihánj, ne inanj che'é ma'an so' vaa i'na' ní' a. Ne vaa orún' sí 'nij ra'a man ní', ne Jesucristó cu' náj so', ne che'é so' curuvi' nu' rasuun man rihaan chumii nihánj, ne che'é so' cunuu i'na' cunudanj ní' ya' adonj.

<sup>7</sup> Tzaj ne nuveé cunudanj tinúú ní' ne'en nana nihánj ma'. Tzaj ne 'o se vaa ta'aj nij so' canoco' man ya'anj cacój yuvii gaa rque, ne ta'aj nij tinúú ní' me se ne nucuaj nimán nij so', ne gaa chá nij so' nee cuta' nii rihaan ya'anj me se uun vij rá nij so' ni'yaj nij so' man nee yo', che'é se nee cuta' nii rihaan ya'anj me yo', rá nij so' a. Cacun' me cha' man nee cuta' nii rihaan yo', rá nij so', ne che'é dan me sese cha' nij tinúú ní' sí vaa danj rá man nee yo', ne quirí' rá nij so' nanj adonj. Dan me se qui'yaj nij so' cacun' rihaan Diose, rá nij so', ne che'é dan me no xcúún ní' racuíj ní' man tinúú ní', ne se chá ní' nee yo', sese cacun' me yo' rihaan tinúú ní' mei.<sup>8</sup> Nuveé che'e se chá ní' me cavii sa' ní' doj rihaan Diose ma'. Dan me se ca'vee se se chá ní' man nee yo' do', tzaj ne se quina'aan tiha' rque ní' do' a ma'. Ne ca'vee se cha' ní' man nee yo', tzaj ne se nari' nucuaj tiha' ní' do', qui'yaj nee yo' nanj ma'. Nuveé nee yo' me 'yaj vaa i'na' ní' a man adonj.

<sup>9</sup> Nda' se ca'vee cha' soj me ma'an rasuun, tzaj ne tadó soj se vaa maan che'é se chá quiran' tinúú soj cacun', qui'yaj soj á.<sup>10</sup> 'O se sese aj ne'en so' nu' rasuun nihánj, tzaj ne 'anj so' rej na'víj nii rihaan ya'anj cacój yuvii, ne ca'anj cayáan so' chá nee yo' ga' nij sí na'víj rihaan ya'anj yo', gaa ne ne'en tinúú so' sí ne nucuaj nimán, gaa ne dan me se ndaa a so' ndaa a ca'anj cayáan chá, gaa ne uun vij rá so' che'é se chá yo', gaa ne 'yaj so' cacun' rihaan sí 'nij ra'a man nij ma'an soj nanj adonj.<sup>11</sup> Dan me se quirí' rá so' che'é se vaa qui'yaj soj nanj adonj. Dan me se ma'an soj me se guun ya' rá xa' soj cha' soj, tzaj ne tinúú soj sí ne guun ya' rá ro', me se quirí' so' gaa nanj adonj. Dan me se cavi' Jesucristó che'é tinúú soj, tzaj ne quirí' tinúú soj, qui'yaj ma'an soj, sese danj qui'yaj soj chuguaj.<sup>12</sup> Dan me se qui'yaj soj cacun' rihaan tinúú soj, ne quirí' rá so', qui'yaj soj, ne yo' me cacun' cütumé soj rihaan Jesucristó sese danj qui'yaj soj adonj.<sup>13</sup> Che'é dan me sese quiran' tinúú 'unj sayuun che'é nee chá 'unj, ne daj chihaa mij se chá 'unj nee, gaa ne se gaa nanj quiran' tinúú 'unj sayuun, qui'yáa 'unj a ma'.

**Nana nihánj taj xna'anj se vaa nda' se no xcúún Pabló ca'neé so' rasuun rihaan nij sí uno nana a'mii natáj so', tzaj ne ne 'yaj so' danj ma'. Maan se inanj me rá so' cavii sa' nij so' rihaan Diose a**

**9** Ne'en soj se vaa nuveé mozó uun mé 'unj ma'. Apóstol cune' Jesucristó man nata' se-nana so' rihaan cunudanj yuvii man rihaan chumii mej, ne

quene'en yá 'unj man Jesucristó sij 'nij ra'a man ní', ne che'é suun qui'yaj suun 'unj canoco' ma'an nij soj man sí 'nij ra'a man ní' adonj. <sup>2</sup> Dan me se vaa yuvií taj se vaa nuveé yá apóstol cune' Jesucristó man mé 'unj, tzaj ne yá ne'en soj se vaa cune' Jesucristó mán 'unj natá' 'unj se-nanā so' rihaan soj, ne dan me se che'é se canoco' soj man sí 'nij ra'a man ní', che'é dan xcáj yuvií cuentá se vaa yá cune' Dioso mán 'unj natá' 'unj rihaan yuvií che'é so' adonj. <sup>3</sup> Ne gāa achíin na'anj nij yuvií manj sese yá yá cune' Dioso manj, ne dan me se taj xna'anj 'unj rihaan nij yuvií se vaa yá yá canoco' nij soj man Jesucristó che'é nanā natá' 'unj rihaan soj a.

<sup>4</sup> Che'é dan nō xcúún nūj chá nūj chraa á. Nō xcúún nūj co'ō nūj á. <sup>5</sup> Nō xcúún nūj xcáj nūj man ra'vij nūj ní noco' man Jesucristó, ca'anj no' me rej ma'an ca'anj nūj á. Ne'en soj se vaa nij tinúú sí 'nij ra'a man ní' do', sí cu'naj Pedró do', yo'ó nij apóstol cune' Jesucristó man natá' se-nanā so' rihaan yuvií do', vaa nicá 'ō 'ō nij so' a. <sup>6</sup> Nō xcúún nūj nijcaj nūj sa'anj rque yuvií a. Me che'é vij ran' guee nūj gā sí cu'naj Bernabé me sí 'yaj suun che'é rej quirí' nūj sa'anj chá nūj gā chéé nūj gā soj gā. Me che'é ne 'yaj nūj ndāa vaa 'yaj yo'ó nij apóstol cune' Jesucristó man natá' rihaan yuvií che'é so', rá soj gā. <sup>7</sup> Tanuu ro', o' so' sa'anj che'é se vaa achiin rihaan ma'an so' na'. Taj, man tinuj, man nocoj. Maan se gobiernó rque nū' se vaa achiin rihaan tanuu yo' ei. Ne sí 'yaj suun naā ro', me se inanj 'yaj suun rma'an so' náa. Taj, man tinuj, man nocoj. Maan se me rá so' chá so' se achij man raā naā yo' ei. Ne sí tumé matzinj ro', cataj so' se vaa ne nó xcúún so' co'ō so' stoo matzinj na'. Taj, man tinuj, man nocoj. 'O se anuu so' too, ne co'ō so' ei. Ne danj vaa guee nūj, raj, tinuj, nocoj. Vaa nūj, ne nō xcúún nūj nijcaj nūj se vaa me rá soj rque soj rihaan nūj nanj adonj.

<sup>8</sup> Nuveé nanā avii raā yuvií me nanā nihánj ma'. 'O cuyaān a'mii se-tucuanj Moisés gā nanā nihánj, ne: <sup>9</sup> "Sē numíj so' tu'va scúj gā 'yaj suun xo' gā tuguáj che'é xo' 'núú trigó cunūu sa' 'núú trigó ma'", taj se-tucuanj Moisés yo' a. Inanj che'é scúj nanó rá Dioso, rá soj na'. <sup>10</sup> Ase che'é ma'an yá ní' a'mii nanā nihánj xa'. Che'é ma'an yá ní' a'mii nanā nihánj ei. Sí uxra' yo'ó ro', me se nō xcúún so' gāa nucuaj rá so' se vaa yá quirí' so' ta'aj se achij rihaan yo'ó ro', vaa güii ei. Ne sí rii tan' ro', nō xcúún so' gāa nucuaj rá so' se vaa quirí' ma'an so' ta'aj tan' rii so' man rque naā yo' chuguānj.

<sup>11</sup> Ne ase vaa sí 'yaj suun yo'ó ro', danj vaa nūj che'é soj, ne dan me se caxríj nūj se-nanā Dioso nimán soj, ne cavii sa' nij soj nu' cavii nu' ca'anj, ne che'é dan, sese rque soj doj se chá man rihaan chumii nihánj rihaan nūj, ne nuveé se ya'anj tiha' me yo' rihaan nūj ma'. <sup>12</sup> Sese nō xcúún yo'ó yuvií chá nij so' se vaa rque soj rihaan nij so', ne táá ā nūj, ne doj ā nō xcúún nūj chá nūj se vaa rque soj rihaan nūj, raj a. Tzaj ne ne achíin nūj se chá rihaan soj ma'. 'O se chu'vi' nūj se vaa guun rá yuvií se vaa a'mii natáj nūj se-nanā Dioso che'é sa'anj do', che'é se chá do', ne se cuchumán rá nij yuvií cunō nij yuvií se-nanā Dioso nanā sa', rá nūj,

ne che'é dan na'vej rá nūj nijcaj nūj sa'anj che'é nanā a'mii natáj nūj ma'. 'O se a'vej rá nūj quirān' nūj me ma'an sayuun che'é se-nanā Dioso nanj adonj.

<sup>13</sup> Ne'en soj se vaa nij sí 'yaj suun rihaan Dioso rque nuví ro', chá nij so' ta'aj rasuun 'anj nicaj yuvií rque nuví yo', ne nij sí racúj man yuvií rque rasuun rihaan Dioso ro', chá ma'an nij so' ta'aj rasuun yo', ne dan me se nō xcúún nij so' chá nij so' rasuun yo' adonj. <sup>14</sup> Ne xa' nūj sij nata' se-nanā Dioso nanā sa' rihaan yuvií, tzaj ne cataj xna'anj sí 'nij ra'a man ní' rihaan ní' se vaa nō xcúún nūj qui'yaj nūj se vaa 'yaj nij sí 'yaj suun rá nuví yo', ne nō xcúún nūj chá nūj se vaa rque yuvií rihaan nūj che'é se-suun nūj suun nata' se-nanā Dioso rihaan yuvií a. Danj taj sí 'nij ra'a man ní' adonj.

<sup>15</sup> Tzaj ne ā 'ó güii ne qui'yáj danj ma'. Nuveé che'e se me raj rque soj rasuun rihanj me cachronj nanā nihánj ma'. 'O se ndá' se cavii, tzaj ne se guun raj daj chihāa mij rque soj sa'anj manj ma'. 'O se sí nucuaj nimán mej adonj. Sese cata'aa 'unj sa'anj, ne cataj yuvií se vaa tu'va rma'an 'unj taj 'unj se vaa se cata'aa 'unj sa'anj che'é se-suun 'unj suun a'mii natáj se-nanā Dioso nanā sa', ne che'é dan daj chihāa mij se qui'yáj danj ma'. <sup>16</sup> Dan me se a'mii natáj 'unj se-nanā Dioso, tzaj ne se ca'mii xtá' 'unj che'é suun yo' mei. Maan se suun ca'ne' Dioso rihaan 'unj me suun yo', ne sese se ca'mii natáj 'unj se-nanā Dioso nanā sa', gāa ne quirān' 'unj cacun' nocoō ndo'ō gāa nanj adonj. <sup>17</sup> Sese guun nihā' raj qui'yáj sunj suun ca'ne' Dioso rihanj, ne naru'vee Dioso rihanj, tzaj ne ca'vee se ne gāa nihā' raj qui'yáj sunj che'é Dioso, tzaj ne daj chihāa mij se ca'ne' raj gā suun a'mii natáj se-nanā Dioso ma'. Maan se yo'ō qui'yáj sunj nanj ei. <sup>18</sup> Ne me se naru'vee Dioso rihanj, rá soj gā. 'O se inanj ca'vej rá Dioso rque uun 'unj se-nanā Dioso rihaan yuvií, ne cunō uun yuvií se-nanā Dioso nanā sa' ca'mii natáj 'unj, ne se rque yuvií sa'anj rihanj ma'. Nō xcúnj cachinj sa'anj rihaan yuvií cunō nanā sa', tzaj ne na'vej rá Dioso qui'yáj danj ma'. Maan se cunō uun nij yuvií, ne se luj rque Dioso manj me nanā yo' a. Se naru'vee yuvií rihanj ma'.

<sup>19</sup> Nuveé mozó mej rihaan yuvií ma'. A 'ó yuvií se guun nucuaj quirii ta'nga' rihanj, tzaj ne naqui'yaj yá 'unj mozó manj rihaan cunudanj yuvií, che'é se me raj cunūu rii ndo'ō yuvií, ne cumān doj nij so' canoco' man Jesucristó adonj. <sup>20</sup> Dan me se gāa vaa 'unj sca'núj nij yuvií israelitá, gāa ne naqui'yaj manj ndāa vaa 'yaj ma'an nij so', gāa ne ca'vee canoco' nij so' se-tucuanj Jesucristó, che'é se me raj cunō nij so' se-nanā Jesucristó ei. Ase vaa nij sí noco' uxrá se-tucuanj Moisés ro', danj vaa ma'anj gāa taj xna'anj 'unj rihaan nij so' che'é Jesucristó ei. Taj che'é canoco' ma'anj se-tucuanj Moisés, tzaj ne maan che'é rej me raj cunō nij so' se-nanā Jesucristó me 'yá danj nanj adonj. <sup>21</sup> Ase vaa nij sí ne noco' se-tucuanj Moisés ro', danj vaa 'unj gāa taj xna'anj 'unj rihaan nij so' che'é Jesucristó, che'é rej me raj cunō nij so' se-nanā Jesucristó, ne dan me se ne 'yáá 'unj naj guun se vaa me raj qui'yáj ma'. 'O se unō 'unj rihaan Dioso, ne unō 'unj cunudanj nanā cataj xna'anj Jesucristó rihaan ní'

adonj. <sup>22</sup> Ase vaa nij síí ne guun ya rá se vaa a'vej rá Diose chá nij so' naj guun rasuun ro', danj vaa ma'anj gaa tucu'yonj se-nana Diose rihaan nij so', che'é rej me raj raan doj canoco' nij so' man Jesucristó ei. Dan me se ase vaa 'o 'o nij yuvií ro', danj vaa naquiyáj man ma'anj gaa taj xna'anj 'unj rihaan 'o 'o nij so' che'é Jesucristó, gaa ne canoco' ta'aj 'o 'o nij yuvií man Jesucristó, quiyáj adonj.

<sup>23</sup> Inanj danj 'yáá 'unj gaa se-nana Diose nana sa', gaa ne cavii sa' ma'anj, quiyáj se-nana Diose, raj a.

<sup>24</sup> Ne'en soj se vaa nij síí unánj tico tuvi' ro', nucuaj unánj cunudanj nij so', tzaj ne orún' tuvi' nij so' 'yaj canaán, ne dan me se ase vaa 'yaj suun ndo'o síí 'yaj canaán ro', danj gaa soj quiyáj suun soj che'é Jesucristó, gaa ne quiyáj canaán soj, ne cavii sa' soj ei.

<sup>25</sup> Dan me se síí me rá quiyáj canaán gaa tico nii ro', tumé uxrá so' man ma'an so' daj quiyáj so', ne se náj quiyáj rma'an so' ma'. 'O se me rá so' guun nucuaj so' quiyáj canaán so' 'o cachriin coj cunuú raa so', tzaj ne nuveé 'o cachriin coj gaa nu' cavii nu' ca'anj me yo' ma'. Maan se vaa güii canaco' yo' nanj adonj. Tzaj ne ino vaa se rque Diose man ní' sese quiyáj canaán ní', ne dan me se se rque Diose man ní' ro', yo'o gaa yo' nu' cavii nu' ca'anj, ne che'é dan cütumé uxrá ní' man ma'an ní' ei.

<sup>26</sup> Xa' síí unánj tico tuvi', tzaj ne ne'en so' me rej cuchí' so', ne ne 'anj so' naj guun chrej ma'. Ne danj 'yaj guee 'unj nanj á. Dan me se ne'en yaj me rej cuchí' 'unj, ne che'é dan inanj 'yaj sunj adonj. Ne síí tico tuvi' cuxru', tzaj ne ne o' so' rihaan nana uun ma'. 'O se ne'en so' daj quiyáj so', ne quiyáj canaán so', ne ase 'yaj so' ro', danj 'yá adonj. Ne'enj daj quiyáj, ne quiyáj cananj ni'yaj Diose, ne danj 'yaj guee 'unj nanj á. <sup>27</sup> Dan me se síí tico tuvi' cuxru' ro', me se o' so' man ma'an so', che'é se me rá so' gaa sca' nee man so', gaa ne quiyáj canaán so' man tuvi' so' a. Uxrá tumé so' man nee man ma'an so', ne ase vaa tumé so' man ma'an so' ro', danj vaa tumej man ma'anj a. Dan me se ca'mii natáj 'unj rihaan yo'ó yuvií se vaa canoco' nij so' man Jesucristó, ne na'vej raj cataj Jesucristó se vaa ne canoco' ya ma'anj man so' ma'.

**Nana nihánj taj xna'anj se vaa tadó uxrá ní' se vaa se quiyáj ní' cacun' rihaan Diose, ne se na'víj ní' rihaan ya'anj cacój yuvií a**

**10** Me raj xcaj nij soj cuentá che'é xii núj sji israelitá nij síí cumán gaa naá, gaa ne quene'en soj me che'é canoco' raan ní' man síí 'nij ra'a man ní', tinuj, nocoj. Xii núj sji israelitá nij síí cumán gaa naá ro', me se caráán ngaa rihaan güii xráá cunudanj nij so', quiyáj Diose, ne cachén sa' nij so' tanuu na ya'anj, ne canó nij so' ndaa rej xco na ya'anj, quiyáj Diose, <sup>2</sup> ne gaa cachén nij yuvií israelitá rej caráán ngaa rihaan güii xráá nij so' do', gaa cachén sa' nij so' ndaa rej xco na ya'anj do', ne yo' me cata' ne nij so' vaa, ne cunuu rcua'aaan nij so' ga síí cu'naj Moisés, ne canoco' cunudanj nij so' man Diose ga síí cu'naj Moisés ei. <sup>3</sup> Ne vaa se rqué Jesucristó rihaan nij so' chá cunudanj nij

so', <sup>4</sup> ne vaa na rqué Jesucristó rihaan nij so' co'o cunudanj nij so', ne rqué Jesucristó cunudanj rasuun cachiin man nee man nij so' do', man nimán nij so' do', nanj adonj. Dan me se cachéé Jesucristó ga nij so' me rej ma'an vaj nij so', ne ase vaa yuvej quixra' cavii na co'o nij yuvií israelitá ro', danj vaa Jesucristó rihaan nimán nij so', rqué Jesucristó nu' se vaa cachiin man nimán nij so' adonj. <sup>5</sup> Tzaj ne ne guun nihá' uxrá rá Diose ni'yaj Diose man que'ee nij so' ma'. Doj tzin' tuvi' nij so' me síí sa' rihaan Diose, ne che'é dan cavi' nu' yo'ó ta'aj nij so' rej tacaan, quiyáj Diose ei.

<sup>6</sup> Xcaj raa ní' daj quiyáj nij yuvií israelitá gaa naá, ne xcaj ní' cuentá daj quiyáj ní' yo' yaj á. Dan me se guun ndo'o rá nij yuvií israelitá quiyáj nij so' se nij, gaa ne quiran' nij so' sayuun, ne che'é dan xcaj ní' cuentá se vaa ne nó xcúún ní' guun rá ní' quiyáj ní' se nij ma'.

<sup>7</sup> Dan me se quina'víj ta'aj nij so' rihaan ya'anj cacój yuvií, ne dan me se cayáán nij yuvií israelitá rej rihaan nij ya'anj yo', gaa ne chá nij so' chraa, gaa ne co'o nij so' na, gaa ne canicun' nij so', gaa ne quij tico tuvi' nij so' ga tuvi' nij so' rihaan ya'anj yo', taj danj Diose a. Gaa ne quiran' ndo'o nij so' sayuun, che'é yan quiyáj nij so' danj a. Dan me se xcaj ní' cuentá se vaa se quina'víj ní' rihaan ya'anj cacój yuvií ma'. <sup>8</sup> 'O se quiyáj yo'ó ta'aj nij yuvií israelitá cacun' ga chana, ne dan me se cavi' icó va'nuj mój tuvi' nij so' rque 'o güii yo', quiyáj cacun' yo' a. Che'é dan xcaj ní' cuentá se vaa se quiyáj ní' danj ma'. <sup>9</sup> Ne ne kuchu'ví' nij yuvií israelitá quiyáj nij so' cacun' ma'. Maan se guun rá nij so' quene'en nij so' sese ya ya quiyáj Diose sayuun man nij so' che'é cacun' tumé nij so' a. Doj a quiyáj nij so' cacun', tzaj ne cavi' que'ee nij so', quiyáj xcuáá, ne che'é dan xcaj ní' cuentá se vaa se quiyáj ní' danj ma'. <sup>10</sup> Ne ca'mii ta'aj nij so' nana nij rihaan Diose, se vaa ne ve'é quiyáj Diose rihaan nij so' a. Ne che'é dan cavi' yo'ó ta'aj nij so', quiyáj se-mozó Diose síí ca'néé Diose rihaan nij so', ne che'é dan xcaj ní' cuentá se vaa se quiyáj ní' danj ma'.

<sup>11</sup> Inanj danj quiran' nij yuvií israelitá nij síí cumán gaa naá, gaa ne cachrón nii nana nihánj che'é nij so' rihaan yanj, che'é yan xcaj ní' cuentá daj quiyáj ní' yo' yaj a. Nichrun' quinavij chumii nihánj, ne che'é dan no xcúún ní' xcaj ní' cuentá daj quiyáj ní' a. <sup>12</sup> Sese sa' uxrá noco' ní' man Jesucristó rá ní', ne tumé uxrá ní' man ní' se gaa nanj ca'anj yaníj ní' ne quiri' ní' a. <sup>13</sup> Xa' soj, tzaj ne ne cachén soj rihaan sayuun nocoo ndo'o ne guun nucuaj soj quiran' soj ma'. Maan se inanj sayuun le'ej nii 'vee guun nucuaj soj 'na' rihaan soj nanj adonj. Tzaj ne vaa che'é gaa nucuaj rá soj man Diose, gaa ne se gaa nanj ca'na' sayuun nocoo ndo'o rihaan soj ei. Tzaj ne asa' ca'na' sayuun nocoo ndo'o rihaan soj, ne gaa nucuaj rá soj man Diose, ne racuíj so' man soj daj gaa quiyáj soj, gaa ne quinanií soj rihaan chrej chi'ii yo', gaa ne se gaa nanj quiyáj soj cacun' chuguanj. Dan me se daj chihaa mój se guun nucuaj sayuun nocoo yo' quiyáj canaán yo' rihaan soj ma'. 'O se Diose racuíj nanj adonj.

<sup>14</sup> Che'é dan tyme uxrá soj man soj ei. Se quina'víj soj rihaan ya'anj cacój yuvii, man tinuj, man nocoj. <sup>15</sup> Síí aj acaj cuentá me soj, raj, ne che'é dan me nuchruj raa soj nana a'mij á. <sup>16</sup> Dan me se gaa nuu chre' ní, ne vaa yo'ó tazá na vinó rihaan ní, ne nago' ní' graciá rihaan Diose che'é tazá se vaa che'é inanj orún' Diose gaa na vinó yo', ne ase vaa ton man Jesucristó ro', danj vaa na vinó yo' rihaan ní' a. Ne ne'en ní' se vaa cavi' Jesucristó che'é nu' nij tinuj ní' a. Gaa ne uxra' ta'aj ní' rachrúun, gaa ne chá taran' ní' doj rachrúun yo', ne ase vaa nee man Jesucristó ro', danj vaa rachrúun yo' rihaan ní' a. Ne ne'en ní' se vaa cavi' Jesucristó che'é nu' nij tinuj ní' a. <sup>17</sup> Dan me se orún' rachrúun vaa rihaan ní' chá cunudanj ní' a. Che'é dan me ase vaa orún' yuvii ro', danj vaa cunudanj nij tinuj ní' a. <sup>18</sup> Ne xcáj soj cuentá se vaa ase vaa 'yaj ní' cuano ro', danj qui'yaj nij yuvii israelitá nij síí man gaa naá, chá cunudanj nij so' nee rqué nij so' rihaan Diose, ne che'é dan ase vaa orún' yuvii ro', danj vaa cunudanj nij so' rihaan Diose a.

<sup>19</sup> Xcáj nij soj cuentá ni'yaj soj nana a'mij á. Yu'va' chá' nee uta' nii rihaan ya'anj cacój yuvii na'. Taj ma'. Ya' ya'anj me nij ya'anj cacój yuvii na'. Taj ma'. <sup>20</sup> Inanj me rá 'unj cataj 'unj se vaa nee uta' nii rihaan ya'anj cacój yuvii ro', nuveé Diose me síí rqué nii nee yo' rihaan ma'. Maan se rihaan nana chree rqué nii nee yo' nanj adonj. Ne na'vej raj guun tuvij' soj ga nij nana chree ma'. <sup>21</sup> Sese co'ó soj na vinó che'é síí 'nij ra'a man ní', ne se ca'vee canicaj soj co'ó soj na vinó che'é nij nana chree ma'. Se guun co'ó soj vij na yo' ma'. Sese chá soj chraa rihaan síí 'nij ra'a man ní', ne se ca'vee canicaj soj chá soj chraa rihaan nij nana chree ma'. <sup>22</sup> Sese danj qui'yaj ní', ne caxrij yuvaá síí 'nij ra'a man ní' man ní' nanj adonj. Che'é se sa' Diose, ne nana' ní' daj qui'yaj ní', gaa ne ca'maan rá Diose ni'yaj Diose man ní' na'. Taj ma'. Sese danj qui'yaj ní', ne se guun nucuaj ní' quinanií ní' rihaan so' a ma'.

<sup>23</sup> "Ca'vee qui'yaj naj guun se me raj á", taj ta'aj yuvii, ne ya vaa nana a'mii nij so', tzaj ne se cavii sa' ní' a doj, qui'yaj naj guun se 'yaj ní' ma'. Se cunuu sa' ní', qui'yaj naj guun se 'yaj ní' man chuguanj. <sup>24</sup> Se guun nana' ní' se sa' gaa rihaan ma'an inanj ní' ma'. 'O se no xcúun ní' nana' ní' se sa' gaa rihaan yo'ó yuvii adonj. Danj qui'yaj ní', gaa ne cavii sa' doj ní' ei.

<sup>25</sup> Ca'vee chá soj naj guun nee ane' rihaan yu'vee, ne se nana' rá soj sese nee cuta' nii rihaan ya'anj cacój yuvii me nee yo' mei. Maan se chá uun soj ei. <sup>26</sup> Danj Diose taj se vaa nu' cachra' chumii do', cunudanj rasuun man rihaan chumii do', me si'yaj síí 'nij ra'a man ní' a. Danj taj danj Diose, ne taj che'é chuchuví' ní' chá ní' man si'yaj síí 'nij ra'a man ní' ma'.

<sup>27</sup> Sese nacúun yo'ó síí ne amán rá ni'yaj man Jesucristó man soj chá soj chraa ga so', ne ca'vee ca'anj soj chá soj ga so', sese danj me rá soj, ne ca'vee chá soj naj guun rasuun rque so' chá soj ei. Se xcáj soj cuentá sese nee cuta' nii rihaan ya'anj cacój yuvii me nee yo' ma'. Chá soj cuaj ei. <sup>28</sup> Tzaj ne sese cataj xna'anj yo'ó so' rihaan soj se vaa nee uta' nii rihaan ya'anj cacój yuvii me nee chá soj, ne se chá soj man nee yo' a mei. 'O

se síí cataj xna'anj rihaan soj ro', ne guun ya rá so' se vaa ca'vee chá soj nee yo', ne che'é dan me se guun chá soj a ma'. <sup>29</sup> Dan me se ne'en ma'an soj se vaa nuveé cacun' me chá soj nee yo' ma'. Tzaj ne tinúú soj síí cataj xna'anj rihaan soj ro', cacun' me chá' nee yo', rá so', ne che'é dan me se táá a se chá soj nee yo' a man adonj. Ca'vee chá 'unj nee yo', raj, tzaj ne sese chá 'unj nee yo', gaa ne cuta' tinúú 'unj cacun' xráj, ne nda' se nago' 'unj graciá rihaan Diose che'é nee yo', tzaj ne cataj tinúj se vaa chi'ii vaa nimanj, ne na'vej uxrá raj ca'mii tinúj danj a ma'. Che'é dan me taj che'é chaj nee yo' ma'.

<sup>31</sup> 'O se veé danj qui'yaj soj uún ei. Dan me se nu' se chá soj do', nu' se co'ó soj do', naj guun se qui'yaj soj do', inanj che'é Diose qui'yaj soj cunudanj nij rasuun yo', gaa ne ve'é doj ca'mii yuvii che'é Diose, qui'yaj soj chuguanj. <sup>32</sup> Tananj uún, ne se quinano rá nij yuvii israelitá do', nij yuvii yanij do', cunudanj nij síí nocoj man Jesucristó do', qui'yaj soj ma'. <sup>33</sup> Inanj danj 'yaj ma'anj, ne nu' se vaa me rá 'o 'o ta'aj yuvii qui'yáá 'unj ro', 'yáá 'unj, ne ne 'yáá 'unj inanj se me raj qui'yaj ma'. 'O se 'yáá 'unj ndaa vaa me rá nij yuvii nanj adonj. 'O se nana' 'unj chrej cavii sa' cunudanj nij yuvii doj, gaa ne quinanií nij so' rihaan sayuun che'é se sa' yo' adonj. Inanj danj qui'yaj soj uún ei.

**11** Dan me se xcáj 'unj cuentá daj qui'yaj Jesucristó, ne inanj danj 'yáá 'unj, ne xcáj soj cuentá daj 'yáá 'unj, ne inanj danj qui'yaj soj uún ei.

#### Nana nihanj taj xna'anj daj qui'yaj ní' gaa na'víj ní' rihaan Diose a

<sup>2</sup> A 'ó güii ne quini'yon nij soj manj, ne ve'é 'yaj soj nu' tucuaán tucu'yonj rihaan soj, ne che'é dan sa' uxrá qui'yaj soj á. <sup>3</sup> Me raj xcáj soj cuentá se vaa uun chij Jesucristó rihaan nu' snó'o, ne snó'o uun chij rihaan chana nica so', ne uun chij Diose rihaan Jesucristó a.

<sup>4</sup> Dan me se gaa achíin ni'yaj snó'o rihaan Diose do', gaa nata' so' se-nana Diose cunó cunudanj nij síí amán rá ni'yaj man Jesucristó do', ne sese caráán so' raá so', ne nij ndo'o 'yaj so' rihaan ma'an so' do', rihaan Jesucristó do', vaa ei. <sup>5</sup> Ne chana me se gaa achíin ni'yaj no' rihaan Diose do', gaa nata' no' se-nana Diose cunó cunudanj nij síí cuchumán rá ni'yaj man Jesucristó do', ne sese se caráán no' raá no', ne nij 'yaj no' rihaan ma'an no' do', rihaan nica no' do', vaa ei. Ase vaa chana raá can ro', vaa no', <sup>6</sup> sese se ca'vej rá no' caráán raá no' ei. Táá a se ca'vej cachrij rá no' caca can nii raá no', sese ne na'aj no' gaa danj raá no' ei. Sese na'aj no', ne caráán no' raá no' adonj.

<sup>7</sup> Ne nó xcúun núj snó'o caráán núj raá núj ma'. 'O se ase vaa Diose ro', danj vaa ma'an núj snó'o, ne che'é dan ni'yaj yuvii man snó'o ne xcáj yuvii cuentá se vaa ve'é ndo'o vaa Diose síí qui'yaj man snó'o adonj. Ne ni'yaj yuvii man chana ne xcáj yuvii cuentá se vaa ve'é ndo'o vaa snó'o, che'é se cúu man snó'o ro', guun chana a. <sup>8</sup> Ne'en soj se vaa cúu man ma'an snó'o ro', cavii chana, ne nuveé cuj man chana cavii snó'o ma'. <sup>9</sup> Ne nuveé che'e chana me qui'yaj Diose man snó'o



ma'. Che'e snó'o ro', me qui'yaj Diose man chana adonj. <sup>10</sup> Che'é dan no xcúun chana tihagan chana se vaa uun chij snó'o rihaan no', ne che'é dan caráan no' raá no', ne quene'en nij se-mozó Diose se vaa ve'é 'yaj no' ei.

<sup>11</sup> Tzaj ne ní' sij noco' man síi 'nij ra'a man ní' ro', se guun cataj ní' se vaa taj se uun snó'o rihaan chana, ne se guun cataj ní' se vaa taj se uun chana rihaan snó'o ma'. <sup>12</sup> 'O se che'e snó'o guun chana rihaan chumii nihánj, tzaj ne che'é chana me a'ngaa snó'o, ne Diose me síi qui'yaj man cunudanj ní' adonj. <sup>13</sup> Nuchruj raá ma'an soj daj qui'yaj soj á. Cunaj vaa cachinj ni'yaj chana rihaan Diose sese se caráan raá no', rá soj na'. Taj ma'. <sup>14</sup> Ne'en cunudanj yuvii se vaa sese gaa xcaan ndo'o yuvé raá snó'o, ne guun na'aj so', <sup>15</sup> tzaj ne sese xcaan yuvé raá chana, ne ve'é vaa no', rá yuvii a. Me rá Diose gaa xcaan yuvé raá chana, ne che'é dan me rqué Diose yuvé raá no', me rá Diose caráan yo' raá no' ei. <sup>16</sup> Sese vaa 'o síi na'vej rá cunó nana nihánj, ne taj se qui'yaj ní' a ma'. 'O se nuvi' yo'ó tucuáan canoco' ní' a ma'. 'O se veé nihánj me tucuáan noco' ní' do', tucuáan noco' taran' nij síi amán rá ni'yaj man Jesucristó man cunudanj chuman' do', nanj adonj.

<sup>17</sup> Vaa yo'ó nana cataj xna'anj uún 'unj rihaan soj, tzaj ne se cataj 'unj se vaa ve'é 'yaj soj ma'. Maan se nij 'yaj soj gaa nuu chre' soj, ne se cavii sa' soj, qui'yaj se vaa 'yaj soj ma'. Maan se nij doj cavii soj adonj. <sup>18</sup> Asino yaan cataj xna'anj 'unj rihaan soj che'é se vaa ne cuyaan vaa rá taran' soj a man chuguanj. Dan me se ca'na' nana rihanj, ne cunoj se vaa gaa nuu chre' soj, ne uun yanij ta'aj soj rihaan tuvi' soj, ne ino vaa rá ta'aj 'o 'o soj, ne xa' nana yo', tzaj ne nana ya ya me nana yo', raj nanj á. <sup>19</sup> 'O se cunaj uxrá vaa cuxra' ta'aj soj man ma'an soj axeé. Ne yaj me se xcax ní' cuentá ni'yaj ní' me tuvi' soj me síi noco' ya man Jesucristó raá adonj. <sup>20</sup> Dan me se gaa nuu chre' soj, navij rá soj chá xti'no soj che'é síi 'nij ra'a man ní', rá soj, tzaj ne ino uxrá 'yaj soj, ne nuveé che'e ya síi 'nij ra'a man ní' chá xti'no soj ga tinúú soj a ma'. <sup>21</sup> Maan se che'é ma'an soj chá xti'no 'o 'o soj, ne dan me se ta'aa 'o 'o soj chá ma'an soj, ne na'vej rá soj go' soj chraa cha tinúú soj ma'. Che'é dan na'aan rque yo'ó ta'aj tinúú soj, 'yaj soj ei. Ne yo'ó ta'aj soj me se uun xnó soj ei. <sup>22</sup> Sese inanj me rá soj cha soj do', co'ó soj do', ne me che'é ne quinan' soj tucua soj cha soj do', co'ó soj do' ga. Taj vaj tucua soj vaa, don 'yaj soj danj na'. Nachri' soj ni'yaj soj man tinúú soj síi noco' man Jesucristó, don 'yaj soj danj na'. Me che'é me rá soj guun na'aj nij tinúú soj nij síi nique ga. Daj cataj 'unj rihaan soj, rá soj ga. Ca'vee cataj 'unj se vaa sa' uxrá 'yaj soj axeé.

<sup>23</sup> Dan me se cataj xna'anj síi 'nij ra'a man ní' rihanj daj qui'yaj ní' gaa cha xti'no ní' che'é so', ne aj cataj xna'anj 'unj nana yo' rihaan soj á. Dan me se gaa quisij güii tacuachén síi cu'naj Judas man Jesucristó sij 'nij ra'a man ní' rihaan nij síi taj ri'yunj man Jesucristó, gaa ne maan ti'nuu dan ro', nicaj síi 'nij ra'a man ní' rachrúun, <sup>24</sup> ne nago' so' graciá rihaan Diose che'é

rachrúun yo', ne guun che'e so' cuxra' ta'aj so' man rachrúun yo', gaa ne dan me se cataj so':

—Nihánj me nee manj, ne inanj che'é soj vaa nihánj adonj. Cha soj man nihánj, gaa ne yo'ó cunuú rá soj manj á —taj Jesucristó rihaan nij síi noco' man so' a.

<sup>25</sup> Gaa ne quisij chá xti'no nij so', gaa ne nicaj Jesucristó 'o copá nuu na vinó, gaa ne cataj uún so':

—Na vinó nihánj ro', me ton manj, ne che'é ton manj ro', rqué naca Diose 'o nana rihaan soj daj qui'yaj Diose ga soj, ne me ma'an güii co'ó soj na nihánj, ne na'nuj rá soj manj á —taj Jesucristó rihaan nij síi noco' man so' a.

<sup>26</sup> Dan me se me ma'an güii cha soj rachrúun yo' do', me ma'an güii co'ó nij soj na vinó yo' do', ne tihagan soj rihaan taran' nij yuvii man rihaan chumii se vaa cavi' Jesucristó che'é soj, ne inanj danj qui'yaj soj ndaa se quisij güii ca'na' uún Jesucristó rihaan chumii nihánj a.

<sup>27</sup> Che'é dan me sese nij 'yaj yo'ó tinúú ní' gaa chá so' rachrúun do', gaa 'o so' na vinó do', che'é síi 'nij ra'a man ní', ne tumé so' cacun', che'é yan 'yaj so' danj adonj. Tumé so' cacun' rihaan nee man síi 'nij ra'a man ní' do', rihaan ton man síi 'nij ra'a man ní' do', nanj adonj. <sup>28</sup> Che'é dan xcax 'o 'o nij soj cuentá daj qui'yaj 'o 'o soj, gaa ne ve'é cha soj rachrúun do', ve'é co'ó soj na vinó do' á. <sup>29</sup> Sese ne acax soj cuentá sese nee man síi 'nij ra'a man ní' me se chá soj, ne quiran' soj sayuun, ne sese ne acax soj cuentá sese ton man síi 'nij ra'a man ní' me se 'o soj, ne quiran' soj sayuun ei.

<sup>30</sup> Dan me se maan che'é se nij 'yaj soj rihaan síi 'nij ra'a man ní' ro', che'é dan aj ran' que'ee soj sayuun chuguanj. Dan me se ta'aj soj anó chi'ii man, ne yo'ó ta'aj soj yo'ó inaj, ne yo'ó ta'aj soj aj cavi' nanj ei.

<sup>31</sup> Sese naqui'yaj cuu ní' che'é ma'an ní' daj vaa ní', gaa ne se qui'yaj síi 'nij ra'a man ní' sayuun ma'. <sup>32</sup> Tzaj maan che'é se nij 'yaj ní', rá síi 'nij ra'a man ní', ne che'é dan 'yaj so' sayuun man ní', che'é rej quinari' ní' daj qui'yaj ní' cavii sa' ní' adonj. Sese nari' sa' ní' chrej sa', gaa ne se quiran' ní' sayuun qui'yaj Diose, asa' qui'yaj so' sayuun man cunudanj yuvii man rihaan chumii nihánj, gaa güii qui'yaj Diose sayuun man nij so' ma'.

<sup>33</sup> Che'é dan, gaa nuu chre' soj cha soj, gaa ne na'vij soj ca'na' cunudanj tinúú soj, tinuj, nocoj. <sup>34</sup> Sese na'aan ndo'o rque yo'ó tuvi' soj ta' asuun, ne cha so' chraa tucua so', gaa ne se quiran' soj sayuun che'é se vaa 'yaj soj gaa nuu chre' soj ei. Ne yo'ó nana xna'anj soj manj ro', cataj xna'anj 'unj nana yo' rihaan soj asa' cuchij chiháan soj ei.

**Nana nihánj taj xna'anj che'é suun sa' nicaj ní' 'yaj Nimán Diose a**

**12** Me raj xcax soj cuentá che'é suun sa' nicaj ní' 'yaj Nimán Diose, tinuj, nocoj. <sup>2</sup> Ne'en soj se vaa gaa ataa canoco' soj man Diose, ne 'anj yanij soj rihaan Diose, ne chéé soj rihaan ya'anj acóy yuvii, qui'yaj nii, ne náa qui'yaj rma'an nii man soj, tiha' yu'unj nii man soj ei. Ne nij ya'anj yo' me se ne uno nij yo' nana a'mii soj a man adonj. <sup>3</sup> Che'é dan xa' ní' sij noco' man

Jesucristó nihánj me se ino 'yaj ní', ne che'é dan cataj xna'anj 'unj rihaan soj se vaa nda' se cataj yo' o so' se vaa quij ndo'o vaa Jesucristó, tzaj ne nuveé nana rqué Nimán Diose rihaan so' me nana a'mii so' a ma'. Tzaj ne sese cataj yo' o so' se vaa 'nij ra'a Jesucristó man ní', ne nana yo' me nana rqué Nimán Diose rihaan so', don a'vee a'mii so' danj adonj. Che'é se racuj Nimán Diose man ní', che'é dan guun nucuaj ní' ca'mij ní' danj ei.

<sup>4</sup> Dan me se ino vaa 'o 'o suun sa' rqué Nimán Diose man ní' nicaj 'o 'o ní' chuguanj. Tzaj ne orún' Nimán Diose me sí rqué man 'o 'o suun sa' yo' ei. <sup>5</sup> Ne ino vaa 'o 'o suun 'yaj suun 'o 'o ní' rihaan tinúú ní' ei. Tzaj ne veé orún' sí 'nij ra'a man ní' me 'yaj nu' rasuun yo' ei. <sup>6</sup> Ne ino vaa suun 'yaj suun Diose nimán 'o 'o ní', tzaj ne veé orún' Diose 'yaj nu' daj a rasuun sa' yo' ei. Ne Diose me sí 'yaj suun nimán 'o 'o ní', ne inanj ma'an so' 'yaj don a'vee qui'yaj suun ní' ei.

<sup>7</sup> Dan me se vaa suun sa' nicaj 'o 'o ní', 'yaj Nimán Diose, ne che'é dan ne'en ní' se vaa yanj Nimán Diose ga ní', ne che'é suun sa' nicaj ní' ro', cavij sa' doj nu' nij tinuj ní', qui'yaj ní' adonj. <sup>8</sup> Dan me se yo' o tinúú ní' a'mii nana cuu, 'yaj Nimán Diose, ne avii ndo'o raá yo' o tinúú ní', 'yaj uún ma'an Nimán Diose, <sup>9</sup> ne yo' o tinúú ní' me sí nucuaj ndo'o rá man Diose se vaa racuj ndo'o Diose man ní', ne inanj danj vaa rá so', 'yaj uún ma'an Nimán Diose, ne uun nucuaj yo' o tinúú ní' tinahuun so' man sí ran', 'yaj uún ma'an Nimán Diose, tzaj ne veé orún' Nimán Diose 'yaj nanj adonj. <sup>10</sup> Yo' o tinúú ní' me sí uun nucuaj 'yaj suun sa' nocoo, ne yo' o tinúú ní' uun nucuaj nata' nana rqué Diose rihaan, ne yo' o tinúú ní' me sí uun nucuaj xcaj cuentá daj vaa nana a'mii 'o 'o ní', ne so' ro', me sí ne'en sese se-nana Nimán Diose a'mii ní' ni', ase se-nana sí chree a'mii ní' a. Dan me se ne'en so' nu' nana a. Ne vaa yo' o tinúú ní' a'mii xna'ánj naca xna'ánj ne ne'en a ma'an nij so' ma'. Ne yo' o tinúú ní' ro', me sí nata' daj ca'mii tinúú ní' sí a'mii xna'ánj naca yo' a.

<sup>11</sup> Ne ma'an Nimán Diose me sí 'yaj uun nucuaj 'o 'o tinúú ní' qui'yaj suun tinúú ní' suun sa' nicaj so', ne orún' Nimán Diose me sí 'yaj suun nimán 'o 'o ní' nanj adonj. Ne'en Nimán Diose daj vaa 'o 'o ní', ne rqué so' rihaan 'o 'o ní' se vaa me rá so' rque so' man ní', ne dan me se nda ino vaa se rqué so' rihaan 'o 'o ní' a.

<sup>12</sup> Ne'en nij soj se vaa vaa orún' nee man ní', tzaj ne man que'ee rej 'yaj suun man ní' adonj. Man ra'a ní' do', man tacóo ní' do', man xréé ní' do', man rlij rihaan ní' do' a. Dan me se que'ee nee 'yaj suun man ní', tzaj ne orún' ní', ne ase vaa nee man orún' yuvij ro', danj vaa taran' ní' sij nocoo man Jesucristó adonj. Dan me se 'o yuvij me ní' nanj ei. <sup>13</sup> Dan me se canoco' cunudanj ní' man Jesucristó, ne cayáan Nimán Diose ga 'o 'o ní', ne che'é dan cata' ne ní', ga ne cunuu rcua'agan taran' ní', ne che'é dan ase vaa nee man orún' yuvij ro', vaa taran' ní' cuano nanj chuguanj. Ino vaa ta'aj 'o 'o ní', ne veé dan me se ta'aj ní' me yuvij israelitá do', ta'aj ní' me yuvij yanij do', ta'aj ní' me mozó do', ta'aj ní' ne uun mozó me do', tzaj ne ase vaa nee

man orún' yuvij ro', vaa taran' ní' cuano, ne yanj ndo'o Nimán Diose ga cunudanj ní' cuano ei.

<sup>14</sup> Ne'en soj se vaa ne 'o cyaan vaa cunudanj nee man yo' o yuvij ma'. Maan se ino vaa 'o 'o rej 'yaj suun man yuvij adonj. <sup>15</sup> Dan me se ca'vee se guun rá tacóo ní' se vaa, che'é se na'vee qui'yaj suun yo' se-suun ra'a ní' ro', che'é dan naxuun yo' man ma'an yo' rihaan ní' cataj yo', tzaj ne se guun nucuaj yo' qui'yaj yo' danj ma'. 'O se nee man ma'an ní' me tacóo ní' nanj adonj. <sup>16</sup> Ne ca'vee se guun rá xréé ní' se vaa, che'é se na'vee qui'yaj suun yo' se-suun rlij rihaan ní', ne che'é dan naxuun yo' man ma'an yo' rihaan ní', tzaj ne se guun nucuaj yo' qui'yaj yo' danj ma'. 'O se nee man ma'an ní' me xréé ní' nanj adonj. <sup>17</sup> Ne vaa se uun nu' nee man ní' rihaan ní', ne sese inanj rlij rihaan ní' me nu' nee man ní', ne asa' ca'vee cunoo ní', rá soj ga. Ne sese inanj xréé ní' me nu' nee man ní', ne asa' ca'vee naxuun ní' nana, rá soj ga.

<sup>18</sup> Diose me sí qui'yaj nu' nee man ní', ne Diose ro', me sí rqué suun rihaan 'o 'o nee man ní' daj qui'yaj nij yo' ei. <sup>19</sup> Sese cyaan ga cunudanj nee man ní', ne nuveé yuvij me ní' ma'. <sup>20</sup> Dan me se nda' se ino vaa 'o 'o nee man ní', tzaj ne ve'é vaa nu' nee man ní' ei. <sup>21</sup> Ne nó xcúun rlij rihaan ní' cataj yo' rihaan ra'a ní': "Taj se uún so' rihanj ma". Se guun tu'va yo' danj ma'. Ne ne nó xcúun raá ní' cataj yo' rihaan tacóo ní': "Taj se uún so' rihanj ma". Se guun tu'va yo' danj ma'.

<sup>22</sup> 'O se nee man ní' nee ninaj doj ro', doj a achiin nee yo' man ní', <sup>23</sup> ne nee man ní' nee nij doj ro', ve'é a doj niquee sa' yo', 'yaj ní', ne na'vej rá ní' quene'en yuvij man nee yo', ne che'é dan aráan ní' yatzij man nee yo' a. <sup>24</sup> Tzaj ne nee man ní' nee ve'é doj ro', taj se qui'yá' caráan ní' yatzij man nee yo' ma'. Ne ve'é ndo'o vaa rcua'agan nu' nee man ní', qui'yaj Diose, ne ve'é doj qui'yaj so' che'é nee man ní' nee cunii doj, <sup>25</sup> che'é rej na'vej rá so' ga yanij nee yo' man ní' a. Maan se ve'é cytumé 'o nee man ní' man tuvi' nee man ní', rá Diose, <sup>26</sup> ne sese quiran' chi'ij doj nee man ní', ne nana rá nu' nee man ní', ne danj inanj uún, ne sese ve'é cavij sa' doj nee man ní', ne guun niha' rá nu' nee man ní' uún a.

<sup>27</sup> Yaj me se aj canoco' taran' soj man Jesucristó, ne che'é dan ase vaa nee man Jesucristó vaa cunudanj soj, ne ase vaa doj nee man Jesucristó vaa 'o 'o nij soj á. <sup>28</sup> Ne Diose ro', me sí cune' man 'o 'o soj qui'yaj suun soj che'é cunudanj nij sí nocoo man Jesucristó, ne ino vaa suun ca'ne' Diose rihaan 'o 'o soj, ne dan me se asino cune' Diose man núj sij apóstol nata' se-nana so' rihaan cunudanj nij yuvij man rihaan chumij, ga ne cune' uún Diose man nij sí nata' nana rqué Diose rihaan nij so' a. Ga ne cune' uún Diose man nij sí tu-cu'yón se-nana Diose rihaan yuvij, ga ne cune' uún Diose man nij sí 'yaj suun sa' nocoo a. Ga ne cune' uún Diose man nij sí uun nucuaj tinahuun man yuvij ran', ne cune' uún Diose man nij sí racuj man yuvij quiran' sayuun a. Ne cune' Diose man nij sí uun chij rihaan nij sí nocoo man Jesucristó, ne cune' Diose man nij sí ne'en ca'mij xna'ánj naca a.

<sup>29</sup> Tzaj ne nuveé apóstol nata' se-nanā Jesucristó rihaan cunudanj yuvij man rihaan chumij me taran' soj ma'. Nuveé sij nata' nanā rqué Diose rihaan nij so' me cunudanj soj ma'. Nuveé sij tucu'yón se-nanā Diose rihaan tinúú ní' me cunudanj soj ma'. Ne uun nucuaj cunudanj ní' qui'yaj suun ní' suun sa' nocoo ma'. <sup>30</sup> Ne uun nucuaj taran' soj tinahuun taran' soj man yuvij ran' ma'. Ne a'mii cunudanj soj xna'ánj naca ma'. Ne uun nucuaj taran' soj cataj xna'anj soj me taj nanā a'mii tinúú ní' gaa a'mii tinúú ní' xna'ánj naca ma'. <sup>31</sup> 'O se nano' soj daj qui'yaj soj, gaa ne ca'ne' Diose suun rihaan soj qui'yaj suun soj nij suun sa' doj á. Sese danj qui'yaj soj, ne cavii sa' taran' soj chuguanj. Tzaj ne me rá 'unj cataj 'unj yo'ó nanā rihaan soj, ne me ya raj nari' soj yo'ó tucuáan sa' inanj ei.

**Nanā nihánj taj xna'anj se vaa nō xcúún ní' cunūu 'ee rá ní' man yuvij a**

**13** Dan me se ca'vee se ca'mij xna'ánj a'mii yuvij do', ca'vee se ca'mij xna'ánj a'mii se-mozó Diose do', tzaj ne sese ne 'ee raj tuvij, ne se guun niha' rá yuvij cunō yuvij nanā ca'mij ma'. Maan se tu'va rma'anj, cataj nij yuvij, ne ase uun gaa agüiin aga' do', ase uun gaa anó aga' do', ta'nga' danj vaa se-nanā, cataj yuvij nanā á. <sup>2</sup> Ca'vee se ve'é ndo'o natá' 'unj nanā rqué Diose manj do', ca'vee se ne'enj nu' nanā tihaan Diose rihaan yuvij do', ca'vee se sa' uxrá avii raj do', ca'vee se amán uxrá raj ni'yaj 'unj man Diose do', ca'vee se guun nucuaj natunaj rej nicun' 'o quij xcaan che'é se amán uxrá raj ni'yaj 'unj man Diose do', tzaj ne sese ne 'ee raj tuvij, ne taj se uún 'unj gaa a ma'. <sup>3</sup> Ca'vee se rque uun 'unj cunudanj si'yaj rihaan nij sí nique do', ca'vee se rque 'unj ndaa nee man ma'anj do', tzaj ne sese ne 'ee raj man nij sí nique, ne se cavii sa' 'unj daj chihaa mij ma'.

<sup>4</sup> Ne ra'yanj rá sí 'ee rá man tuvi' qui'yaj so' sayuun man tuvi' so' ma'. Tzaj ne vaa inaj nimán so', ne 'ee rá so' man tuvi' so', ne inanj ve'é 'yaj so' rihaan tuvi' so' á. Ne uun xcoj ruvaá rá sí 'ee rá man tuvi' ni'yaj so' tuvi' so' ma'. Ne a'mii xta' so' ma'. 'O se nica' vaa nimán so' a. <sup>5</sup> Sí 'ee rá man tuvi' ro', inanj ve'é 'yaj so' rihaan tuvi' so', ne ne aráya'anj so' inanj ma'an so' ma'. 'O se aráya'anj so' tuvi' so' a. Ne ra'yanj rá so' caxrii yuvaá so' ma'. Ne nuú rá so' sayuun qui'yaj yuvij man so' gaa rque ma'. <sup>6</sup> Nuveé sij niha' rá ne'en man yuvij 'yaj cacun' me so' ma'. Tzaj ne niha' rá so' ne'en so' se vaa uno yuvij nanā ya a. <sup>7</sup> Uun nucuaj so' ran' so' naj guun sayuun, ne ne tanáj ma'an so' man tinúú so' ma'. 'O se yo'ó amán rá so' uno so' cunudanj nanā sa', ne yo'ó ne'en so' se vaa inanj sa' uxrá cavii ní' vaa güii, ne inanj danj vaa rá sí 'ee rá man tuvi' adonj.

<sup>8</sup> Xa' suun 'ee rá tuvi', tzaj ne yo'ó gaa yo' nu' cavii nu' ca'anj ei. Cuanō nihánj me se man sí nata' nanā rqué Diose rihaan nij so', tzaj ne vaa güii ca'ne' rá nij so' gā suun yo' ei. Ne cuanō nihánj me se man yuvij a'mii xna'ánj naca xna'ánj ne ne'en ma'an yuvij, tzaj ne vaa güii ca'ne' rá nij so' gā suun a'mii xna'ánj yo' a. Ne cuanō nihánj me se man sí avii ndo'o raa, 'yaj Nimán

Diose, tzaj ne vaa güii se go' nij so' doj nanā rihaan yuvij a ma'. <sup>9</sup> Dan me se nu' nanā sa' a'mii ní' do', nu' nanā cyu avii raa ní' 'yaj Diose do', me se ta'aj guē nanā me yo' nanj adonj. Tzaj ne vaa güii quinavij yo' nanj adonj. <sup>10</sup> 'O se güii quinān' ní' rihaan Diose me se Diose me sí qui'yaj yo'ó quene'en ní' cunudanj nanā, ne se cachiin a doj nanā ca'mii ní' a ma'.

<sup>11</sup> Gaa mej xnii me se a'mii xnií 'unj, ne daj se uun rá xnii, danj uun raj, ne daj se nuchruj raa xnii, danj nuchruj raa 'unj a. Tzaj ne yaj cachij 'unj, guún 'unj snó'o nocoo, ne tanáj xco 'unj nu' se vaa qui'yaj gaa mej xnii a. Dan me se ase vaa se 'yaj inanj xnii ro', danj vaa 'yaj ní' cuanō, tzaj ne vaa güii tanáj xco ní' man nu' se vaa 'yaj ní' cuanō á. <sup>12</sup> Vaa se ne'en ní' cuanō, rá ní', tzaj ne ne ne'en sa' ní' man yo' ma'. Dan me se ase vaa yuvij ni'yaj rihaan 'o se ni'yaj rihaan ro', danj vaa ní', ne sese ne naruvij rihaan se ni'yaj rihaan, ne se quene'en sa' yuvij rihaan yuvij ma'. Ne danj vaa ní' uún, ne man ndo'o rasuun ne ne'en sa' ní' ei. Tzaj ne vaa güii canicun' ní' rihaan ma'an Diose, ne sa' uxrá quene'en ní' man ma'an so' a. Cuanō nihánj me se ne ne'enj cunudanj, tzaj ne vaa güii, ne ase vaa ne'en Diose manj ro', danj gaa quene'enj man cunudanj adonj. <sup>13</sup> Tzaj ne vaa va'nuj suun sa' nō xcúún ní' qui'yaj ní' cuanō, ne dan me se guun nucuaj rá ní' man Diose, ne guun ya rá ní' se vaa ya cavii sa' ní', ne gaa 'ee rá ní' tuvi' ní' a. Yo' me va'nuj se nō xcúún ní' qui'yaj ní', tzaj ne orún' suun gaa 'ee rá man tuvi' ro', yo' me suun nocoo doj rihaan cunudanj yo'ó suun ei.

**Nanā nihánj taj xna'anj che'é xna'ánj naca xna'ánj ne ne'en ma'an yuvij a**

**14** Che'é dan yo'ó gaa suun 'ee rá man tuvi' nimán soj ei. Tzaj ne nano' soj daj qui'yaj soj, ne nica' soj suun sa', qui'yaj Nimán Diose ei. Tzaj ne doj a guun rá soj nata' soj nanā rqué Diose rihaan soj ei. 'O se sa' doj vaa suun yo' chuguanj. <sup>2</sup> Dan me se xa' sí a'mii xna'ánj naca, tzaj ne ne a'mii so' rihaan yuvij ma'. Rihaan Diose a'mii so', ne taj sí uno nanā a'mii so' ma'. 'O se racuíj Nimán Diose man so' a'mii so' nanā tihaan Diose rihaan ma'an so' adonj. <sup>3</sup> Tzaj ne sí nata' nanā rqué Diose rihaan, tzaj ne rihaan yuvij a'mii so', ne sa' doj xcaj nij yuvij cuentá daj qui'yaj nij yuvij canoco' nij yuvij man Diose, ne nari' nucuaj nimán nij yuvij, qui'yaj so', ne se nanó rá nij yuvij ma'. 'O se guun niha' doj rá nij so' adonj. <sup>4</sup> Dan me se sí a'mii xna'ánj naca ro', orún' ma'an so' noco' sa' doj man Diose, 'yaj so', tzaj ne sí nata' nanā rqué Diose rihaan me se sa' doj noco' cunudanj nij sí amán rá ni'yaj man Jesucristó man Diose, 'yaj so' adonj. <sup>5</sup> Me raj ca'mii taran' soj xna'ánj naca, tzaj ne sa' doj nata' soj nanā rqué Diose rihaan soj ei. Dan me se sa' doj 'yaj sí nata' se-nanā Diose rihaan sí a'mii xna'ánj naca, tzaj ne sese guun nucuaj sí a'mii xna'ánj naca cataj xna'anj so' rihaan nij yuvij me taj nanā a'mii so' gaa uun che'e so' a'mii so' xna'ánj naca, ne sa' doj qui'yaj so', ne cavii sa' doj nij sí amán rá ni'yaj man Jesucristó, qui'yaj so', sese danj qui'yaj so' adonj.

<sup>6</sup> Cuno soj ca'mij, tinuj, nocoj, ne dan me se sese cuchij 'unj rihaan soj, ne cuno soj sese inanj xna'anj naca ca'mij rihaan soj, ra soj na'. Taj ma'. Me nana nar-i' soj, sese danj quiyaj ga. Tzaj ne sese tijaan 'unj yo'o nana naca nana ca'mii Diose rihanj rihaan soj, ne cuno soj doj, ne sese cavij ndo'o raá 'unj do', sese nata' 'unj nana rque Diose manj do', sese tucu'yonj rihaan soj do', ne cuno sa' soj doj ei. <sup>7</sup> Dan me se ne'en soj daj vaa ya'anj, ne ne vaa i'na' ya'anj, tzaj ne vaa che'e aguiin sca' yo', ne sese ne tica'mii sca' nii man ya'aã nuu rihaan ya'anj yo' gaa anicaj 'o 'o chra', gaa ne asa' ca'vee xcay yuvij cuentá me chra' me achraá nii rihaan ya'anj yo' ga. <sup>8</sup> Sese ne tunacaj nii se-nana chruun a'yánj yo' gaa a'yánj nii, gaa ne asa' ca'vee xcay nij tanuu cuentá se vaa ca'anj nij so' cunu' nij so' ga. <sup>9</sup> Ne ase vaa ya'anj do', chruun a'yánj do', ta'nga' danj vaa nij soj uún, ne sese ca'mij soj xna'anj naca, ne sese se gaa nica nana ca'mij soj, ne asa' ca'vee cuno yuvij me taj soj ga. 'O se se ca'mij soj rihaan yuvij a ma'. Maan rihaan nana uun ca'mij soj, raj a.

<sup>10</sup> Dan me se man uxrá xna'anj a'mii yuvij rihaan chumij nihánj, raj, ne vaa yuvij uno cunudanj nij xna'anj yo', <sup>11</sup> tzaj ne sese ca'mij yo'o so' xna'anj a'mii ma'an so' rihanj, ne sese se cunoj nana ca'mij so', gaa ne sij 'na' yo'ó chuman' guun so' rihanj, ne tananj 'unj, ne guún 'unj sij 'na' yo'ó chuman' rihaan so' a.

<sup>12</sup> Che'é dan me xcay soj cuentá daj quiyaj ma'an soj uún, ne dan me se guun rá soj nica soj suun sa', quiyaj Nimán Diose, tzaj ne nano' soj daj quiyaj soj, ne ca'vee nica soj suun sa' doj suun racuuj man cunudanj yo'ó nij sí amán rá ni'yaj man Jesucristó, quiyaj Nimán Diose a. 'O se cavij sa' soj doj, sese danj quiyaj soj adonj. <sup>13</sup> Che'é dan me sese vaa yo'o tinúú soj sí a'mii xna'anj naca, ne no xcúún so' cachinj ni'yaj so' rihaan Diose se vaa guun nucuaj so' cataj xna'anj so' me taj nana ca'mij so' rihaan nij yuvij cuno nana yo' adonj. <sup>14</sup> Tzaj ne sese ca'mij 'unj xna'anj naca cachinj ni'yáá 'unj rihaan Diose, ne inanj maan nimán 'unj me cachinj ni'yaj rihaan Diose, ne cúú yavej, tzaj ne se cachín ni'yaj yo' rihaan Diose a ma'. <sup>15</sup> 'O se me se no xcúún 'unj quiyaj ga. 'O se no xcúún 'unj asino yaan cachinj ni'yaj rihaan Diose ga nimanj, gaa ne cachinj ni'yaj cúú yavej uún rihaan Diose, ne asino yaan cachraá 'unj chra' rihaan Diose ga nimanj, gaa ne nu' cúú yavej cachraá chra' uún rihaan Diose adonj.

<sup>16</sup> Danj quiyaj soj che'é se asa' nuu chre' soj cachinj ni'yaj soj rihaan Diose, ne 'na' nij sí ataa nari' sa' se-nana Diose a. Ne sese inanj nimán so' cachinj ni'yáá so' rihaan Diose do', sese inanj nimán so' nago' so' graciá rihaan Diose do', sese inanj nimán so' cataj se vaa sa' vaa Diose do', ne asa' ca'vee cuno sí 'na' naca nana ca'mij so' ga. Asa' ca'vee cataj so' se vaa ya uxrá vaa nana ca'mii so' ga. <sup>17</sup> Ca'vee se ve'é uxrá gaa nana cachinj ni'yáá so' rihaan Diose, tzaj ne yo'ó so' ro', se ca'vee guun niha' rá so', quiyáá so' ma'.

<sup>18</sup> Nagó 'unj graciá rihaan Diose che'é se xcaan vaa xna'anj naca a'mij rihaan taran' nij soj, che'é se 'unj me sí ne'en doj xna'anj naca rihaan taran' soj a. <sup>19</sup> Tzaj

ne gaa nuu chre' 'unj ga nij tinúú ní' nij sí amán rá ni'yaj man Jesucristó, ne no xcúnj ca'mij nana avii cúú yavej rihaan nij so', ne dan me se ca'vee se chi' mij nana xna'anj naca ca'mij, tzaj ne se cavii sa' doj tinúú, quiyaj nana yo' a ma'. Tzaj ne sese ca'mij nuj se 'un' guée nana cavij cúú yavej rihaan tinúú ní', tzaj ne cavij sa' nij so' doj, quiyaj nana yo', che'é se nana uno nij so' me yo' ei.

<sup>20</sup> Gaa sca' raá nij soj, tinuj, nocoj. Se gaa raá soj ase vaa raá 'o xnii ma'. Dan me se ase vaa ne'ej ataa nari' quiyaj cacun' ro', danj gaa soj, tzaj ne gaa sca' raá soj ei. <sup>21</sup> Dan me se vaa nana no rihaan danj Diose taj se vaa: "Ca'nej 'unj yuvij man gan' cuchij' rihaan nij yuvij israelitá, ne yo'ó xna'anj quinata' nij so' rihaan nij yuvij israelitá, tzaj ne se cuno nij yuvij israelitá nana ca'mij rihaan nij so' ma'." Danj cataj Diose rihaan nij yuvij israelitá gaa naá a. <sup>22</sup> Dan me se xcay ní' cuentá se vaa nuveé che'e ma'an ní' sij amán rá ni'yaj man Jesucristó vaa xna'anj naca xna'anj ne ne'en a 'ó yuvij yo' ma'. 'O se che'é nij sí ne amán rá ni'yaj man Jesucristó vaa xna'anj naca yo', ne dan me se cuno nij so' xna'anj naca, gaa ne xcay nij so' cuentá se vaa nuveé sij noco' man Diose me ma'an nij so' a. Ne se-nana Diose nana nata' nii ro', nuveé che'e nij sí ne amán rá ni'yaj man Jesucristó vaa nana yo' ma'. 'O se che'é ní' sij amán rá ni'yaj man Jesucristó vaa nana yo' adonj.

<sup>23</sup> Dan me se sese inanj xna'anj naca ca'mij taran' soj gaa nuu chre' soj, ne catuu nij sí ataa nari' sa' tucuáán noco' ní' catuu sí ne amán rá ni'yaj man Jesucristó catuu rá ve' ga nij soj, ne daj cataj nij so', rá soj ga. Se cuno nij so' xna'anj ca'mii soj a ma'. Che'é dan: "Snúú rma'an nij soj", cataj nij so' nanj adonj. <sup>24</sup> Tzaj ne sese nata' taran' soj nana rque Diose rihaan soj, ne catuu nij sí ataa nari' tucuáán noco' ní' catuu nij sí ne amán rá ni'yaj man Jesucristó catuu rá ve', gaa ne xcay nij so' cuentá che'é cacun' tumé nij so', quiyaj taran' soj, ne quinano rá nij so' che'é cacun' tumé nij so', quiyaj taran' soj chuguanj. <sup>25</sup> Cuno nij so' nana ca'mij taran' soj, gaa ne xcay nij so' cuentá che'é nu' se chi'ij man nimán nij so', ne ca'anj canicun' ruj nij so', gaa ne na'vij nij so' rihaan Diose, ne cataj ya nij so' se vaa ya Diose ne ga soj ei.

<sup>26</sup> Che'é dan nihánj me cataj xna'anj 'unj rihaan soj daj quiyaj soj, tinuj, nocoj. Gaa nuu chre' soj, ne ino gaa se quiyaj 'o 'o soj ei. Yo'o tinúú soj cachraá 'o chra', ne tucu'yón yo'ó tinúú soj se-nana Diose rihaan soj, ne nata' yo'ó tinúú soj nana rque Diose rihaan so', ne ca'mij yo'ó tinúú soj xna'anj naca, ne cataj xna'anj yo'ó tinúú soj me taj nana ca'mii tinúú soj sí ca'mii xna'anj naca, ne inanj danj quiyaj soj, racuuj taran' soj man tinúú soj, gaa ne ve'é doj canoco' sa' soj man Jesucristó a.

<sup>27</sup> Sese vaa vij va'nuj soj me rá ca'mij xna'anj naca, ne ca'vee ca'mij nij so', tzaj ne sese que'ee soj doj me rá ca'mij, gaa ne se ca'vee ma'. 'O se dínj tu'va ta'aj soj, gaa ne canicun' yo'ó tuvi' soj nata' so' me nana me ca'mii nij sí ca'mii xna'anj naca yo' á. <sup>28</sup> Tzaj ne sese taj vaj a 'ó soj guun nucuaj nata' che'é nana ca'mii nij sí

ca'mii xna'ánj naca, ne táá a se se ca'mii nij so' xna'ánj naca rihaan yuvij a ma'. Maan se dínj gaa tu'va nij so' gaa nuu chre' soj á. Inanj rihaan ma'an nij so' do', rihaan Diose do', ca'mii nij so' xna'ánj naca yo' á.

<sup>29</sup> Dan me se veé danj qui'yaj guée soj asa' nata' soj se-nana Diose uún a. Nata' vij va'nuy tinúú soj, sí rque Diose se-nana so' rihaan, ne nuchruj raa yo'ó tinúú soj nana nata' nij so', sese ya ya se-nana Nimán Diose me nana nata' nij so' a. <sup>30</sup> Sese nata' yo'ó so', ne sese guun rá yo'ó so' nata' so' yo'ó nana rque Diose rihaan ma'an so', ne ca'ne' rá sí nicun' a'mii yo' ca'mii yo'ó tinúú so' á. <sup>31</sup> Veé dan me se gaa ya'núj rihaan taran' soj, ne ndaa yo'ó yo'ó soj nata' nana rque Diose rihaan soj, ne nari' cunudanj soj nana achiin man soj, gaa ne nari' nucaj nimán taran' soj a. <sup>32</sup> Sese uun nucaj nij sí nata' nana rque Diose rihaan nij so' quiri' ta'nga' nij so' rihaan nimán ma'an nij so', ne uun nucaj nij so' ca'ne' rá nij so' gaa nana a'mii nij so' adonj.

<sup>33</sup> Dan me se xa' Diose, tzaj ne nuveé sij tinachej rasuun me Diose ma'. 'O se Diose ro', me sí 'yaj nica vaa nu' rasuun adonj.

Díj gaa tu'va chana gaa nuu chre' nij soj sij amán rá ni'yaj man Jesucristó á. Ne nó xcúún chana ca'mii chana ma'. Maan se danj nana xrej no' á. Inanj danj taj se-tucaj Moisés, ne inanj danj vaa tucuaán noco' cunudanj ní' sij sa' noco' man Diose man daj a chuman' a. <sup>35</sup> Sese vaa 'o nana me rá chana nari' no', ne xna'anj no' man snó'o nica no' ve' tucua no', ne cataj xna'anj so' rihaan no' a. Tzaj ne nij vaa sese canicun' chana ca'mii no' rihaan cunudanj nij sí amán rá ni'yaj man Jesucristó gaa nuu chre' nij so' adonj.

<sup>36</sup> Nuveé nana cavii raa nij soj me se-nana Diose ma'. Nuveé inanj soj me sí cuchi' se-nana Diose rihaan ma'. Che'é dan me xcaj soj cuentá daj vaa tucuaán noco' núj sij amán rá ni'yaj man Jesucristó á. <sup>37</sup> Sese guun rá yo'ó so' se vaa ne'en so' nata' so' nana rque Diose rihaan so' do', sese guun rá so' se vaa yanj Nimán Diose ga ma'an so' do', ne xcaj so' cuentá se vaa nana nihánj nana cachrón 'unj che'é soj ro', nana cataj xna'anj ma'an sí 'nij ra'a man ní' rihaan ní' me nana nihánj a.

<sup>38</sup> Sese vaa yo'ó sí taj se vaa nuveé nana cataj xna'anj sí 'nij ra'a man ní' me nana nihánj, ne se cuchumán rá ní' se vaa sij nata' se-nana Diose me ma'an so' ma'.

<sup>39</sup> Che'é dan me nana uxrá soj daj qui'yaj soj, ne guun nucaj soj nata' soj nana rque Diose rihaan soj, tinuj. Ne se cataj soj se vaa se ca'vee ca'mii yuvij xna'ánj naca mei. <sup>40</sup> Tzaj ne ve'é inanj qui'yaj soj nu' se vaa 'yaj soj, ne chij inanj qui'yaj soj nu' se-suun Diose ei.

**Nana nihánj taj xna'anj se vaa cunuu i'na' ya uún Jesucristó gaa cavi' so', ne danj gaa cunuu i'na' ya ma'an ní' uún a**

**15** Yaj me se me raj na'nuy rá soj nana cataj xna'anj 'unj rihaan soj, tinuj, nocoj. Dan me se nana sa' aj natá' 'unj rihaan soj asij rque me nana nihánj, ne cuno soj nana nihánj, ne raan noco' soj man nana nihánj a. <sup>2</sup> Dan me se che'e nana nihánj nana natá' 'unj rihaan soj me quinani' soj rihaan sayuun, sese yo'ó

raan canoco' soj nana nihánj ei. Tzaj ne sese tu'va rma'an soj do', sese ne ya noco' soj nana sa' nihánj do', ne se cavii sa' soj ma'. Maan se quiran' soj sayuun nana adonj.

<sup>3</sup> 'O se asino yaan nataj nana sa' nari' 'unj rihaan soj, ne nana cataj xna'anj nii rihanj me nana nihánj, se vaa cavi' Jesucristó che'é cacun' tumé ní', ndaa vaa taj danj Diose a. <sup>4</sup> Dan me se cachin' nii man so' rque yo'ó, gaa ne dan me se cachén va'nuy güii, ne cunuu i'na' uún so', ne dan me se ase vaa tu'va guée danj Diose vaa quiran' so' a. <sup>5</sup> Dan me se curuvi' so' ni'yaj sí cu'naj Pedró, ne gaa doj, gaa ne curuvi' uún so' ni'yaj nu' chuvij nij apóstol cune' so' man nata' se-nana so' a.

<sup>6</sup> Cachén doj güii, gaa ne curuvi' uún so' rihaan 'unj cientó táá doj tinúú ní' sí noco' man so' a. Dan me se ta'aj nij so' cavi', tzaj ne yo'ó ta'aj nij so' vaa i'na' cuano ga ní' a. <sup>7</sup> Gaa ne cachén doj, gaa ne curuvi' uún Jesucristó ni'yaj sí cu'naj Santiagó, ne veé dan, gaa ne curuvi' uún so' ni'yaj cunudanj nij apóstol cune' so' man nata' se-nana so' a. <sup>8</sup> Veé dan, gaa ne curuvi' uún so' ni'yaj ma'anj a. Sí noco' xcó taran' nij sí quene'en man so' mej, ne ase vaa 'o ne'ej ni'ya' vaa 'unj rihaan nij so' nana ei. 'O se ne nó xcúún 'unj guún 'unj apóstol rihaan nij so' a ma'.

<sup>9</sup> 'O se gaa ataa canocoj man Jesucristó, ne qui'yaj ndo'oj sayuun man nij sí cuchumán rá ni'yaj man Jesucristó, ne che'é dan yaj mej sí noco' rihaan cunudanj nij apóstol cune' Jesucristó man nata' se-nana so' a. Che'é dan nuveé sij no xcúún nata' rihaan yuvij che'é so' mej, raj a ma'. <sup>10</sup> Tzaj ne sa' uxrá qui'yaj Diose che'ej, ne racuíj ma'an Diose manj, ne che'é dan mej apóstol cuano adonj. Nuveé se qui'yaj rma'an Diose danj manj ma'. 'O se 'unj nihánj ro', me sí 'yaj suun doj rihaan cunudanj nij apóstol cune' Jesucristó man, tzaj ne nuveé ma'anj 'yaj suun ma'. 'O se che'é se racuíj Diose manj ro', che'é dan 'yaj danj, ne ma'an Diose 'yaj danj adonj. <sup>11</sup> Ne a'mii natáj 'unj a'mii natáj yo'ó nij apóstol cune' Jesucristó man a'mii natáj se-nana Diose nana sa', ne che'é se ca'mii natáj cunudanj núj rihaan soj, che'é dan cuchumán rá soj cuno soj nana sa' yo' ei.

<sup>12</sup> Dan me se ne'en soj se vaa a'mii natáj núj se vaa cunuu i'na' uún Jesucristó gaa cavi' so', ne che'é dan me che'é taj ta'aj yuvij 'nij sca'núj soj se vaa se ca'vee cunuu i'na' uún nij sí cavi' ga. <sup>13</sup> Sese ya se ca'vee cunuu i'na' uún nij sí cavi', gaa ne me che'é cunuu i'na' uún Jesucristó, rá soj ga. <sup>14</sup> Sese ya ne cunuu i'na' uún Jesucristó, gaa ne tu'va rma'an núj gaa a'mii natáj núj aj na'. Amán rma'an rá soj ni'yaj soj nana ne a'mii núj gaa aj na'. <sup>15</sup> Aj cataj xna'anj núj rihaan soj se vaa cunuu i'na' uún Jesucristó, qui'yaj Diose, tzaj ne sese se ca'vee cunuu i'na' uún nij sí cavi', gaa ne ne cunuu i'na' uún Jesucristó vaa gaa na'. Sí ne me núj, ne ca'mii ne núj che'é ma'an Diose vaa gaa aj na'. <sup>16</sup> 'O se sese se ca'vee cunuu i'na' uún nij sí cavi', gaa ne ne cunuu i'na' uún Jesucristó vaa gaa a ma'. <sup>17</sup> Ne sese ya ne cunuu i'na' uún Jesucristó, ne nana amán rá soj yo' ro', nana tiha' yu'unj me yo' vaa gaa asanj. Ne quiran'

ma'an soj sayuun che'é nu' cacun' tumé soj, <sup>18</sup> ne nij sí cavi' sí cuchumán rá ni'yaj man Jesucristó me se cuchumán rma'an rá nij so', ne ca'anj nij so' rihaan ya'an vaa gaa nanj asanj. <sup>19</sup> Ne ní' sij guun ya rá se vaa cavij sa' ní' qui'yaj Jesucristó me se doj a quij quiran' ní' rihaan daj a nij yuvii man rihaan chumii nihánj vaa gaa asanj. Dan me se che'é se nana tiha' yu'unj noco' ní', gaa ne doj a quij quiran' ní' vaa gaa ei.

<sup>20</sup> Tzaj ne, taj ma'. 'O se ya uxrá cunuu i'na' uún Jesucristó gaa cavi' so' adonj. Che'é se cunuu i'na' uún so' ro', che'é dan ne'en ya ní' se vaa cunuu i'na' uún nij sí cavi' cuchumán rá ni'yaj man so' adonj. <sup>21</sup> Dan me se che'é se orún' snó'o me qui'yaj cavi' cunudanj yuvii man rihaan chumii ro', che'é dan orún' snó'o me qui'yaj cunuu i'na' uún yuvii adonj. <sup>22</sup> Dan me se che'é se vaa qui'yaj orún' sí cu'naj Adán ne cavi' taran' yuvii ro', veé daj qui'yaj Jesucristó, ne che'é orún' so' ro', me cunuu i'na' uún cunudanj yuvii noco' man so' adonj.

<sup>23</sup> Tzaj ne ndaa 'o 'o orá quisij 'o 'o rasuun adonj. Dan me se Jesucristó me sí cunuu i'na' asino yaan rihaan cunudanj yuvii, gaa ne güii ca'na' uún so' rihaan chumii nihánj ro', me se asino nij sí cuchumán rá ni'yaj man so' cunuu i'na' uún ei. Dan me se quisij cunuu i'na' taran' nij sí noco' man so', <sup>24</sup> gaa ne quinavij nu' chumii nihánj a. Dan me se asino yaan ca'neé Jesucristó nu' suun atá taran' nij yuvii do', taran' nij ya'anj uun chij rihaan chumii nihánj do', gaa ne nago' Jesucristó nu' chumii nihánj rihaan Rej ní' Diose, gaa ne ma'an Diose guun chij rihaan chumii nihánj adonj. <sup>25</sup> 'O se no xcúun Jesucristó guun chij Jesucristó rihaan chumii nihánj ndaa se qui'yaj canaán ya ya so' rihaan taran' nij sí taj ri'yunj man so' adonj. <sup>26</sup> 'O se sí taj ri'yunj man Jesucristó me se 'yaj avi' yuvii, ne dan me se yo'o qui'yaj canaán Jesucristó rihaan se 'yaj avi' yuvii, gaa ne quisij quinavij cunudanj nij sí taj ri'yunj man Jesucristó ei.

<sup>27</sup> Danj Diose taj se vaa qui'yaj canaán Jesucristó rihaan cunudanj rasuun, qui'yaj Diose a. Danj a'mii danj Diose, tzaj ne se guun chij Jesucristó rihaan ma'an Diose ma'. 'O se Diose me sí qui'yaj guun chij so' rihaan cunudanj yo'ó nij rasuun adonj. <sup>28</sup> Asa' guun chij Jesucristó rihaan nu' rasuun qui'yaj Diose, ne guun chij Diose rihaan ma'an Jesucristó, ne dan me se qui'yaj canaán Jesucristó rihaan cunudanj rasuun, qui'yaj Diose, gaa ne guun chij Diose rihaan ma'an so', gaa ne Diose me sí guun chij ndo'o rihaan cunudanj rasuun adonj.

<sup>29</sup> Sese se cunuu i'na' sí cavi', gaa ne me che'é ata' ne nii che'é 'o xngá, rá soj gaa. Sese se cunuu i'na' ya uún nij sí cavi', gaa ne ata' ne rma'an nii che'é sí cavi' a. Tzaj ne 'o se ya uxrá cunuu i'na' uún nij sí cavi', rá nii ei. <sup>30</sup> Me che'é niganj vaj núj rihaan sayuun che'é se-nana Diose, rá soj gaa. <sup>31</sup> Ya inanj daj vaj núj rihaan sayuun, tinuj, nocoj. Ne'en soj se vaa niha' ndo'o rá núj che'é suun 'yaj suun núj sca'núj soj che'é sí 'nij ra'a man ní', ne dan me se ya taj xna'anj 'unj rihaan soj se vaa maan na'vij núj 'o 'o güii cavi' núj che'é

se-nana Diose ei. <sup>32</sup> Quiran' ndo'oj sayuun chuman' Efeso, ne dan me se ase vaa sayuun ran' sí unu' ga xcuu yuva ro', ta'nga' daj vaa sayuun quiranj, ne me che'é qui'yaj daj, rá soj, sese yuun che'e cavij ga. 'O se qui'yaj suun yuun 'unj vaa gaa nanj ei. Sese ya uxrá se cunuu i'na' uún nij sí cavi', gaa ne doj a ve'é sese canoco' ní' nana a'mii yuvii man rihaan chumii nihánj chuguanj. Dan me se yuvii man rihaan chumii nihánj taj: "Daj doj quisij güii cavi' ní' á. Che'é dan cha ní' chraa do', co'o ní' tzi' do', yaj gaa vaa i'na' ní' á", taj nij yuvii man rihaan chumii nihánj yuvii ne guun ya rá se vaa cunuu i'na' uún ní' a. Tzaj ne ne 'yaj núj daj ma'. 'O se ne'en ya núj se vaa cunuu i'na' ya uún nij sí cavi' adonj.

<sup>33</sup> Ca'ne' rá soj ga suun tiha' yu'unj man ma'an ei. Nda' se sa' vaa nimán soj, tzaj ne sese cachee soj ga sí chi'ii, ne nuu chi'ii nimán soj, qui'yaj nij so' ei. <sup>34</sup> No xcúun soj xcaj naca soj cuentá, ne ca'ne' rá soj ga suun 'yaj cacun' ei. 'O se ta'aj soj me sí ne ne'en uxrá daj vaa Diose, raj a ma'. 'O se vaa che'é guun na'aj soj chuguanj.

#### Nana nihánj taj xna'anj daj quiran' ní' güii cunuu i'na' uún ní' a

<sup>35</sup> Tzaj ne vaa yuvii cataj: "Asa' ca'vee cunuu i'na' uún nij sí cavi' ga. Daj gaa nee man nij so' asa' cunuu i'na' uún nij so' ga", taj nij yuvii, xná'anj nij yuvii a. <sup>36</sup> Tzaj ne sí ni'yon mé so', sese daj a'mii so' chuguanj. Ne'én so' daj ran' 'núu unô so' ei. Asino yaan uchruy 'núu yo' rque yo'óo, gaa ne xtun' ma'an 'núu yo', gaa ne xra' naa le'ej man 'núu yo' a. Sese se cuchruy 'núu yo' rque yo'óo, ne daj chihaa mij se xra' naa ma'. 'O se ase vaa ran' 'núu gaa unô nii man yo' rque yo'óo ro', daj gaa quiran' ní' adonj.

<sup>37</sup> Ne sese cunoo so' yo'o caân 'núu trigó do', naj guun caân do', rque yo'óo, ne nuveé ma'an coj me se caxrij so' rque yo'óo ma'. Maan se caân me yo', tzaj ne síj xra' yo', gaa ne nahuun yo' coj adonj. <sup>38</sup> Tzaj ne ino vaa coj xra' man 'o 'o caân, ne ase vaa me rá Diose gaa 'o 'o coj ro', ta'nga' daj vaa 'o 'o coj xra', 'yaj Diose adonj. <sup>39</sup> Ne ne 'o cuyaan vaa nu' nee ma'. 'O se ca'vee se nee man yuvii do', ca'vee se nee man xcuu do', ca'vee se nee man xtâj do', ca'vee se nee man xcuaj do', tzaj ne ino vaa a'ngaa 'o 'o nij nee yo' adonj. <sup>40</sup> Ne man rasuun rej xta', ne man rasuun rihaan yo'óo, ne ino doj vaa rasuun man rej xta' ga rasuun man rihaan yo'óo nihánj, tzaj ne ve'é uxrá vaa cunudanj nij rasuun yo' ei. <sup>41</sup> Dan me se ve'é vaa güii do', ve'é vaa yavii do', ve'é vaa yati' do', tzaj ne ino vaa ruvi' 'o 'o nij rasuun yo' gaa ni'ya' man nij yo', ne veé daj ino vaa 'o 'o nij yati' uún chuguanj.

<sup>42</sup> Dan me se ase vaa ino vaa 'o 'o nij rasuun yo' ro', vaa 'o 'o ní' uún chuguanj. Ne nee man ní' asa' quisij cunuu i'na' uún ní' me se ino gaa nee yo' ga nee man ní' cuano chuguanj. Ne nee man ní' cuano, tzaj ne daj doj cavi' yo', ne vaa güii cavi' ní', gaa ne cachin' nii man nee man ní' rque yo'óo, gaa ne cunuu ino yo' ei. Tzaj ne asa' cunuu i'na' uún ní', gaa ne daj chihaa mij

se cavi' uún nee man ní' a ma'. <sup>43</sup> Xa' nee man ní' cuano, tzaj ne nij vaa yo', tzaj ne asa' cunuu i'na' uún ní', ne inanj ve'é ndo'o gaa nee man ní' asa' cunuu i'na' uún ní' ei. Tzaj ne cuano me se taj se 'ya' guun nucuaj yo' ma'. Tzaj ne asa' cunuu i'na' uún ní', ne gaa nucuaj ndo'o nee man ní' adonj. <sup>44</sup> Nee man uun rihaan chumii nihánj cuano me ní', tzaj ne asa' cunuu i'na' uún ní', ne nee yo'o canoco' sa' man Diose guun nee man ní' adonj. Dan me se sese ne'en ní' se vaa ya vaa nee man ní' cuano, ne veé danj ya uxrá gaa yo'ó nee sa' man ní', qui'yaj Diose ei. Ne nee yo' me yo'ó canoco' sa' man Diose chuguanj.

<sup>45</sup> Ne danj Diose taj se vaa snó'o qui'yaj Diose asino yaan me sí' cu'naj Adán, ne gaa tihaj qui'yaj Diose man so' me se ca'née Diose nana vaa i'na' rque nee man so' a, taj danj Diose a. Dan me se ase vaa sí' cu'naj Adán ro', danj vaa sí' cu'naj Jesucristó, tzaj ne ino doj vaa Jesucristó, ne dan me se gaa cunuu i'na' uún Jesucristó, ne cunuu ino un' nee man so', ne dan me se 'vee vaa i'na' ndaa ma'an ní', 'yaj so' a. Ne che'é dan cunuu i'na' uún taran' ní' chuguanj. <sup>46</sup> Tzaj ne asino yaan vaa nee man ní' gaa man ní' rihaan chumii nihánj, gaa ne vaa güii, gaa ne ma'an ní' nıcaj nee sa' doj yo' a. <sup>47</sup> Xa' snó'o qui'yaj Diose asino yaan, tzaj ne yo'óo uun guun so' a. Dan me se nicaj Diose yo'óo man rihaan chumii nihánj, qui'yaj Diose man so', tzaj ne xa' yo'ó snó'o, tzaj ne Jesucristó me so', ne so' me sí' cavii rej xtá' ca'na' rihaan ní' adonj. <sup>48</sup> Ne ase vaa sí' cu'naj Adán sí' guun yo'óo ro', ta'nga' danj vaa cunudanj yuvii man rihaan chumii nihánj, tzaj ne ase vaa Jesucristó sí' cavii rej xtá' ro', ta'nga' danj vaa cunudanj yuvii yanj rej xtá' nanj á. <sup>49</sup> Gaa man ní' rihaan chumii nihánj me se ase vaa Adán sí' guun yo'óo ro', danj vaa ma'an ní', tzaj ne vaa güii, ne ase vaa Jesucristó sí' cavii rej xtá' ro', ta'nga' danj gaa ní' adonj.

<sup>50</sup> Cuanó nihánj me se cataj xna'anj 'unj rihaan nij soj se vaa se guun nucuaj nee man ní' do', ton man ní' do', cúu man ní' do', cayáan yo' ga Diose asa' guun chij Diose rihaan chumii nihánj, man tinuj, man nocoj. 'O se se guun cuman rasuun cuchruu ga rasuun ne uchruu mei.

<sup>51</sup> Tzaj ne cataj xna'anj 'unj rihaan nij soj yo'ó nana yuve tihaa nacá Diose rihanj, se vaa se cavi' taran' ní' ma'. 'O se vaa güii, ne rque orún' orá le'ej nii yuun che'e cunuu ino taran' ní', <sup>52</sup> ne dan me se daj se uun rá' gaa nanij doj yuvé scu'ly' rihan' ro', danj guun uun doj rá' asa' quisij orá cunuu ino ní' nanj adonj. Dan me se güii quinavij chumii nihánj me se nu' ca'yanj se-mozó Diose chruun a'yanj, ne cunuu ino taran' ní' nanj adonj. 'O se asa' ca'yanj so' chruun a'yanj, ne cunuu i'na' nu' nij sí' cavi', tzaj ne ino gaa nij so', ne se cavi' uún nij so' daj chihaa mij gaa a ma'. Dan me se quisij cunuu i'na' nij sí' cavi', gaa ne cunuu ino taran' ní' sij gaa i'na' rihaan chumii nihánj adonj.

<sup>53</sup> Sese ase vaa ní' cuano nihánj ro', danj gaa ní' ca'anj ní' rihaan Diose, rá ní', gaa ne se ca'vee daj chihaa mij ma'. 'O se vaa che'é asino cunuu sa' nee man ní', gaa ne ca'vee quinan' ní' rihaan Diose adonj. Dan

me se che'é se nichrun' cavi' nee man ní', che'é dan vaa che'é cunuu sa' yo', ne daj chihaa mij se cavi' yo' gaa a ma'. <sup>54</sup> Dan me se asa' nanó nee se cavi' uún xráa ní', gaa ne daj chihaa mij se cavi' nee man ní' a ma'. 'O se güii dan ro', quisij ya nu' nana nihánj nana no rihaan danj Diose nana taj: "Sa' uxrá qui'yaj canaán ní', ne daj chihaa mij se cavi' ní' a ma'. 'O se quisij ní' qui'yaj canaán ní' rihaan ta'naj 'yaj avi' yuvii adonj. <sup>55</sup> Me rej vaj ta'naj 'yaj avi' yuvii ga. Me rej vaj se nucuaj so' ga. Yaj me se se nanó rá ní' se vaa quiran' uún ní' sayuun ma'. 'O se daj chihaa mij se cavi' ní' ma'. 'O qui'yaj canaán ya ní' adonj", taj danj Diose, ne quisij ya nu' nana yo' adonj. <sup>56</sup> Se nucuaj ta'naj 'yaj avi' ní' ro', me cacun' tumé ní' adonj. Ne che'é se-tucuanj Moisés qui'yaj ní' cacun', <sup>57</sup> tzaj ne tinavij Jesucristó sij 'nij ra'a man ní' cacun' tumé ní', ne dan me se ya qui'yaj canaán ní', qui'yaj Diose, ne che'é dan no xcúun ní' nago' ní' graciá rihaan Diose ei.

<sup>58</sup> Ne'en soj se vaa 'ee raj man soj, tinuj, nocoj. Che'é se vaa cataj 'unj rihaan soj ro', che'é dan raan canoco' soj man Jesucristó á. Se ca'ne' rá soj ma'. 'O se niganj qui'yaj suun ndo'o soj che'é sí' 'nij ra'a man ní' á. Ne'en soj se vaa suun 'yaj suun soj che'é sí' 'nij ra'a man ní' ro', nuveé suun snúu rma'an me yo' ma'. 'O se cavii sa' soj che'é se noco' sa' soj man so' adonj.

**Nana nihánj taj xna'anj che'é sa'anj naqui'yaj chre' nij sí' man chuman' cu'naj Corinto rque nij so' man nij sí' nique man chuman' cu'naj Jerusalén a**

**16** Cataj xna'anj 'unj rihaan nij soj che'é sa'anj naqui'yaj chre' soj rque soj man nij sí' nique sí' sa' noco' man Diose á. Dan me se qui'yaj soj ndaa se vaa cataj xna'anj 'unj rihaan nij sí' amán rá ni'yaj man Jesucristó yanj estadó Galacia, <sup>2</sup> ne rque 'o 'o cotungó ro', ca'nej sa' soj doj sa'anj tucua' soj che'é nij sí' nique á. Sese noco' doj qui'yaj canaán yo'ó soj, ne noco' doj ca'nej sa' soj, ne sese doj doj qui'yaj canaán yo'ó soj, ne doj doj ca'nej sa' soj á. Ve'é cütumé soj sa'anj yo' ndaa se cuchí' 'unj chiháan soj á. 'O se na'vej raj naqui'yaj chre' soj sa'anj ndaa güii cuchí' 'unj ma'. 'O se güii yo' aj naqui'yaj chre' soj sa'anj, raj ei. <sup>3</sup> Asa' cuchí' 'unj rihaan soj, ne go' soj sa'anj naqui'yaj chre' soj man tinúu soj sí' me rá soj nıcaj sa'anj yo' a. Ne tinúu soj sí' nıcaj sa'anj yo' ro', ca'anj nıcaj nij so' sa'anj yo' ndaa chuman' Jerusalén a. Ne me raj nıcaj nij so' yanj cartá ca'anj nij so', ne yanj cartá yo' ro', cataj xna'anj yo' rihaan nij sí' man Jerusalén se vaa vaj sa'anj yo' rihaan nij so', 'yaj nij tinúu ní' a. <sup>4</sup> Sese vaa che'é ca'anj ma'anj chuman' Jerusalén, ne nıcaj tuvi' núj ca'anj núj a.

**Nana nihánj taj xna'anj me güii cuchí' Pabló chuman' cu'naj Corinto a**

<sup>5</sup> Cachén 'unj estadó Macedonia, gaa ne cuchí' 'unj chiháan soj a. Se guun raan 'unj estadó Macedonia ma'. <sup>6</sup> 'O se xraj, ne carán' 'unj chiháan soj que'ee güii, tzaj ne ne ne'enj sese canej ga soj nu' yavii ayuu yu've'

man adonj. 'O se veé maan chiháan soj me raj cavij 'unj ca'anj 'unj adonj. <sup>7</sup> Na'vej raj cachēn ra'yanj uún 'unj chiháan soj ma'. 'O se me raj guun raan 'unj que'ee güii, sese ca'vej sí 'nij ra'a man ní' danj gaa adonj. <sup>8</sup> Tzaj ne me raj cunuú 'unj chuman' Efeso nihánj ndaa se cachēn ya cha'anj Pentecostés adonj. <sup>9</sup> 'O se vaa ndo'o rej rihanj qui'yaj sunj se-suun Diose, tzaj ne 'o se man ndo'o sí taj ri'yunj man ní' chuman' yo' ei.

**Nana nihánj taj xna'anj che'é nij tinúú Pabló sí canoco' man Jesucristó a**

<sup>10</sup> Tzaj ne sese cuchí' sí cu'naj Timoteo rihaan soj, ne ve'é ca'mii soj ga so', gaa ne guun niha' rá so' ga soj ei. 'O se 'yaj suun so' che'é sí 'nij ra'a man ní', ne ase vaa 'yaj sunj ro', ta'nga' danj vaa 'yaj suun ma'an so' che'é sí 'nij ra'a man ní' adonj. <sup>11</sup> Se nachri' soj ni'yaj soj man so' ma'. Maan se dínj cumān soj ga so', ne ve'é raçuíj soj man so' yan ca'na' uún so' rihanj nihánj á. Na'vij uxraj ca'na' uún so' ga yo'ó nij tinúú ní' adonj.

<sup>12</sup> Ne tinúú ní' sí cu'naj Apolos me se cataj xna'anj ndo'oj rihaan so' se vaa cuchí' so' ga yo'ó nij tinúú ní' rihaan soj, tzaj ne ne ca'vej so' cuchí' so' cuano mei. Tzaj ne ndaa güii quix'núj rihaan so' asuun, gaa ne cuchí' so' rihaan soj a.

<sup>13</sup> Týmé soj man soj á. Raan canoco' soj man Jesucristó á. Gaa nucuaj nimán soj, ne 'o ca'nej nimán soj qui'yaj suun soj á. <sup>14</sup> Ne gaa 'yaj suun soj nu' suun vaa rihaan soj, ne uxrá gaa 'ee rá soj man tinúú soj á.

<sup>15</sup> Ne'en nij soj man nij tucua tinúú ní' sí cu'naj Estéfanos se vaa nij so' me sí cuchumán rá ni'yaj man Jesucristó asino yaan rihaan cunudanj nij yuvij man estadó Acaya a. Ne ca'née nimán ma'an nij so' qui'yaj suun nij so' raçuíj nij so' man nij sí sa' noco' man Diose á. Cuano nihánj me se cataj xna'anj 'unj rihaan soj se

vaa ve'é cunō soj rihaan cunudanj yuvij 'yaj suun ndaa vaa 'yaj suun nij so', tinuj, nocoj. Ne cunō uún soj rihaan cunudanj nij sí a'née ndo'o nimán qui'yaj suun ga nij so' ei. <sup>17</sup> Guun niha' ndo'o raj se vaa ca'na' ma'an sí cu'naj Estéfanos do', sí cu'naj Fortunato do', sí cu'naj Acaico do', ei. Dan me se guun niha' uxrá raj gaa ca'na' va'nuj nij sí nihánj rej nej, ne gaa quene'enj man nij so', ne ndaa ma'an ya soj quene'enj nda' rá se 'yaa raj nanj ei. 'O se nayón nij so' rihaan soj ei. <sup>18</sup> Dan me se nuu cuj nimanj, qui'yaj nij so', ne dan me se nuu cuj nimán ma'an soj, qui'yaj uún nij so' a. 'O se nij yuvij vaa danj me se no xcúún ya soj caraa cochroj soj rihaan nij so' nanj adonj.

**Nana nihánj taj xna'anj che'é saludó a'née nij sí amán rá ni'yaj man Jesucristó a'née ma'an Pabló a'née a**

<sup>19</sup> Cunudanj nij sí amán rá ni'yaj man Jesucristó man estadó Asia a'née saludó rihaan soj, ga sí cu'naj Aquila do', chana cu'naj Priscila do', taran' nij sí amán rá nuu chre' tucua roj so' do', a'née ndo'o saludó rihaan soj a. <sup>20</sup> Dan me se cunudanj nij tinúú ní' a'née saludó rihaan nij soj ei. Gaa nari' tuvi' soj, ne ve'é ndo'o ca'mii soj ga tinúú soj, ne go' soj 'o xto guee rihaan tinúú soj asa' nari' tuvi' soj ei.

<sup>21</sup> A'née ma'anj saludó do' rihaan soj uún ei. Nihánj me nana cachrón ma'anj ra'aj ya rihaan yanj nihánj adonj.

<sup>22</sup> Sese vaa yo'o tuvi' soj ne amán rá ni'yaj man sí 'nij ra'a man ní', ne quene'en soj se vaa ya quirān' sí vaa danj sayuun nanj chuguanj. Ya ca'na' uún sí 'nij ra'a man ní' ei.

<sup>23</sup> Me rá 'unj qui'yaj ndo'o Jesucristó sij 'nij ra'a man ní' se luj che'é soj ei. <sup>24</sup> Ne se sa' 'ee rá yuvij nuu nimanj 'yaj Jesucristó me se a'néj rihaan soj cunuú nimán soj ei.



## II Corintios

**1** 'Unj me síf cu'naj Pabló sij apóstol cune' Jesu-cristó man nata' se-nanā so' rihaan yuvij, ndaa vaa me rá ma'an Diose qui'yáj a. Yānj tinú' Timoteo gaj, ne 'yaj núj yanj nihánj ca'nej núj rihaan soj sij no-co' man Diose yanj chuman' cu'naj Corinto, ne ca'nej núj yanj nihánj rihaan cunudanj yo'ó nij soj sij sa' no-co' man Diose yanj nu' estadó cu'naj Acaya uún a. <sup>2</sup> Dan me se me rá núj qui'yaj ndo'o Rej ní' Diose do', Jesucristó sij 'nij ra'a man ní' do', se luj che'é nij soj, ne me rá núj gaa xej nimán soj qui'yaj roj so' a.

**Nanā nihánj taj xna'anj se vaa quiran' ndo'o nij tuvi' Pabló sayuun, tzaj ne tinanii Diose man nij so' rihaan sayuun yo' a**

<sup>3</sup> Ve'é ndo'o vaa Diose ei. Se-Diose Jesucristó sij 'nij ra'a man ní' me Diose, ne Rej Jesucristó me uún Diose chuguānj. Ne so' me síf 'ee ndo'o rá man yuvij, ne so' me síf racuíj ndo'o nanā sa' nimán yuvij chuguānj. <sup>4</sup> Ca'vee se me ma'an sayuun ran' núj, tzaj ne Diose ro', me síf narqué ndo'o chrej nucuaj man núj, ne che'é dan guun nucuaj núj nago' núj chrej nucuaj man tinúú núj güii quiran' tinúú núj sayuun uún chuguānj. Che'é dan asa' ran' tinúú núj sayuun, ne ca'vee nago' núj chrej nucuaj man tinúú núj chrej narqué ma'an Diose man núj nago' núj man tinúú núj chuguānj. <sup>5</sup> Dan me se ndā' rá se vaa quiran' uxrá Jesucristó sayuun ro', danj vaa 'na' uxrá sayuun xráá núj, ne che'é dan cunuu 'ee uxrá rá Jesucristó man núj che'é sayuun ran' núj ei. Che'é dan nari' nucuaj rá núj che'é Jesucristó, 'yaj Diose a. <sup>6</sup> 'Q se sese ran' núj sayuun, ne che'é yan nari' nucuaj nimán soj do', che'é yan nani' soj rihaan cacun' tumé soj do', me ran' núj sayuun adonj. Dan me se sese Diose rqué se nucuaj nuu nimán núj, ne veé danj gaa guee cunuú se nucuaj nimán soj asa' quiran' soj sayuun se vaa ran' núj adonj. <sup>7</sup> Dan me se yo'q guun ya rá núj ni'yaj núj man soj che'é se vaa ran' soj ei. 'Q se ndā' rá se vaa 'na' sayuun xráá soj ro', veé danj vaa a'née Diose se nucuaj nimán soj uún chuguānj. Ase vaa ran' núj sayuun ro', danj vaa ran' guee soj sayuun, ne ase vaa nari' nucuaj rá núj 'yaj Diose ro', danj vaa nari' nucuaj rá soj 'yaj uún Diose a. <sup>8</sup> Me rá núj na'nuj rá soj se vaa quiran' núj sayuun estadó Asia, tinuj, nocoj. Ne me rá núj quene'en soj se vaa uxrá quiran' ya núj sayuun, ne daj doj se cavi' ya núj ei. <sup>9</sup> Dan me se 'q sayuun nocqo ya ya me yo', ne nuveé sayuun guun nucuaj yá' me sayuun yo' a ma'. 'Q se ne gaa ya ya rá núj gaa i'na' núj a ma'. 'Q se

ca'née nimán núj quinaj nimán núj rej yo' nanj adonj. Nda' rá se vaa síf nata' se-cacun' cavi' ro', danj vaa guun rá núj nanj adonj. Tzaj ne 'q se cunaj uxrá quiran' núj danj, gaa ne yuun che'e, gaa ne se gaa nucuaj rá núj man ma'an núj ma'. 'Q se vaa che'é gaa nucuaj ya rá núj man Diose síf naqui'yaj i'na' man yuvij cavi' nanj adonj. <sup>10</sup> Dan me se daj doj se cavi' núj, tzaj ne Diose me síf tinanii man núj rihaan sayuun yo', ne so' me síf tinanii man núj rihaan sayuun quiran' núj rej rihaan, ne nucuaj rá núj man so', ne ya ya tinanii so' man núj rihaan sayuun, <sup>11</sup> che'é se racuíj ndo'o soj man núj achíin ni'yaj soj rihaan Diose che'é núj ei. Dan me se cuno Diose se vaa achíin ni'yaj que'ee yuvij rihaan so' che'é núj, ne qui'yaj so' se luj che'é núj tinanii so' man núj rihaan sayuun ei. Ne nago' que'ee ní' graciá rihaan Diose che'é se vaa tinanii so' man núj rihaan sayuun ei.

**Nanā nihánj taj xna'anj me che'é ne cuchí' Pabló chuman' cu'naj Corinto a**

<sup>12</sup> Ne'en núj se vaa quinani' núj rihaan sayuun, ne ni-hā' ndo'o rá núj, che'é se ne'en núj se vaa nuvi' cacun' tumé núj a. 'Q se ve'é qui'yaj núj gā soj gaa chéé núj rihaan chumi' nihánj, ne ne tihā' yu'unj núj man soj ma'. Maan se cuno núj rihaan Diose, ne ca'mii chij núj rihaan soj, ne ne qui'yaj núj inanj se vaa cavii raā ma'an núj ma'. 'Q se ma'an Diose racuíj man núj, ne qui'yaj núj inanj se vaa me rá Diose qui'yaj núj nanj adonj. <sup>13</sup> Dan me se taj vaj nanā nachran' cachrón núj nayaā soj ma'. Inanj nanā guun nucuaj soj nayaā soj do', inanj nanā guun nucuaj soj cunq soj do', me nanā cachrón núj nayaā soj nanj adonj. Cuanq ro', aj nari' soj ta'aj nanā cataj xna'anj núj rihaan soj, ne me rá núj nari' guee soj nu' nanā yo' ei. Danj me rá núj, che'é yan guun niha' rá núj che'é soj güii ca'na' uún Jesucristó sij 'nij ra'a man ní' rihaan chumi' nihánj, ne veé danj guun niha' rá soj che'é núj uún ei.

<sup>15</sup> Che'é se guun ya raj se vaa cavij sa' taran' ní' vaa güii, che'é dan guun raj ca'anj 'unj chiháan soj, gaa ne quisij vij ca'anj ni'yaj 'unj man soj, che'é se me raj guun niha' rá soj doj, raj a. <sup>16</sup> Dan me se gaa vaj 'unj ca'anj 'unj estadó Macedonia, ne guun raj çaranj chiháan soj gaa cachén 'unj chrej ca'anj 'unj estadó yo' ei. Dan me se guun raj çaranj chiháan soj rej ca'anj 'unj ne rej 'na' niquej uún ei. Danj guun raj qui'yáj che'é se guun raj racuíj soj manj ca'anj 'unj estadó Judea ei. Tzaj ne ne çaranj chiháan soj gaa ca'naj nihánj a mei.

<sup>17</sup> Me che'é me ne carán' 'unj chiháan soj, rá soj gá. Guun vij rá 'unj gaa cataj 'unj se vaa guun rá 'unj carán' 'unj chiháan soj, rá soj na'. Gaa nuchruj raa 'unj daj qui'yáj, ne naj guun nana avii raá 'unj ca'mii 'unj, rá soj na'. 'O cuyaan vaa nana ya gá nana ne rihanj, rá soj na'. <sup>18</sup> Taj ma'. 'O se Diose me testigó se vaa ya uxrá vaa nu' nana a'mii núj rihaan soj ei. Xá' núj, tzaj ne ne a'mii rma'an núj nana rihaan soj ma'. <sup>19</sup> 'O se a'mii natáj ma'anj gá síí cu'naj Silvano do', síí cu'naj Timoteo do', rihaan soj che'é ta'níí Diose síí cu'naj Jesucristó, ne ne tinachej núj nana ne gá nana ya gaa a'mii natáj núj rihaan soj ma'. Tananj inanj nana ya me nana a'mii núj rihaan soj, che'é se quene'en núj se vaa ya uxrá vaa nu' se-nana Jesucristó nana sa' chuguanj. <sup>20</sup> Cunudanj nij nana cata' tu'va Diose che'é ní' ro', ni'yaj ní' man Jesucristó ne xcaj ní' cuentá se vaa ya vaa nu' nana yo' chuguanj. Ne che'é se sij noco' man Jesucristó me ní', che'é dan taj ní' "Veé danj gaa ya ei", taj ní' rihaan Diose, ne sa' doj xcaj yuvii cuentá se vaa ve'é ndo'o 'yaj Diose á. <sup>21</sup> Diose me síí racuúj man núj noco' sa' núj man Jesucristó gá soj, ne so' me síí cune' man núj qui'yaj suun núj rihaan so' a. <sup>22</sup> Ne so' me síí cataj se vaa ya ya ta'nij so' me ní', ne ca'neé so' Nimán so' cayáan nimán ní', ne che'é dan guun ya rá ní' se vaa ya rque so' se sa' man ní', vaa güii adonj.

<sup>23</sup> Tzaj ne sese ne cuchij rej man soj, ne me raj quene'en Diose nimanj, se vaa ya vaa nana a'mij rihaan soj cuano nihánj, ne che'é se ne ca'vej ya raj qui'yáj sayuun man soj, che'é dan ne cuchij chuman' Corinto adonj. <sup>24</sup> 'O se ne me rá núj qui'ri ta'nga' núj rihaan soj daj qui'yaj soj canoco' soj man Jesucristó ma'. 'O se síí 'yaj suun gá soj yan cavii sa' soj ne guun niha' rá soj me núj, ne aj nari' sa' soj canoco' ma'an soj man Jesucristó nanj adonj.

**2** Maan che'é se guun raj yo'o gaa niha' nimán soj ro', che'é dan ne cuchij rej man soj nanj adonj. <sup>2</sup> Sese nanó rá soj qui'yáj, gaa ne me síí qui'yaj guun niha' raj gá. 'O se soj me síí naqui'yaj niha' nimanj adonj. Tzaj ne sese nuvi' soj, gaa ne a me síí qui'yaj danj gá. <sup>3</sup> 'O se che'é dan qui'yáj yanj cartá yo', ndaa vaa me rá ma'anj, che'é se ne ca'vej raj cuchij ne quinano raj qui'yaj soj ei. Tzaj ne 'o se no xcúún soj guun niha' raj qui'yaj soj, ne ndaa ma'an soj do', guun niha' rá gaa chuguanj. <sup>4</sup> Tzaj ne gaa qui'yáj yanj cartá yo' me se nuu quitziji ndo'o raj, ne nanó ndo'o raj, ne ndaa ta'vee ma'anj, qui'yaj suun nanó rá chuguanj. Tzaj ne nuveé che'e se me raj quinano rá soj me qui'yáj yanj cartá yo' ma'. 'O se me raj quene'en soj se vaa 'ee uxrá raj man soj nanj adonj.

**Nana nihánj taj xna'anj se vaa ve'é na'mii sa' uún nij síí man Corinto gá tinúú nij so' síí tanáj cacun' tumé so' a**

<sup>5</sup> Tzaj ne sese vaa yo'o síí 'yaj nanó raj doj, ne nuveé inanj ma'anj nanó rá 'yaj so', cataj ní' vaa ma'. 'O se ndaa ma'an soj do', nanó rá, cataj ní' vaa, che'é se na'vej rá ní' cutá' ní' doj vaa nanj adonj. <sup>6</sup> Ne sayuun cuta' soj xráá síí qui'yaj cacun' yo' me se veé dan ca'vee, ne ca'neé soj sayuun xráá so' nanj ei. Taj che'é

qui'yaj soj doj sayuun man so' a ma'. <sup>7</sup> Maan se caraa x'naa soj rihaan so', ne veé dan quisij qui'yaj soj sayuun man so', tadó soj se nanó ndo'o rá so', qui'yaj soj, ne quirí' nimán so', qui'yaj soj ei. <sup>8</sup> Che'é dan cataj xna'anj 'unj rihaan soj se vaa me raj ve'é qui'yaj soj, gaa ne guun ya rá so' se vaa ya ya 'ee rá soj man so' ei. <sup>9</sup> Gaa qui'yáj yanj cartá ca'neé rihaan soj gaa rque, ne ca'ne' 'unj suun rihaan soj se vaa qui'yaj soj sayuun man síí qui'yaj cacun' yo', che'é rej me rá 'unj xcaj 'unj cuentá daj sij me soj, ne me raj quene'enj sese sij uno nu' nana a'mij rihaan me soj a. <sup>10</sup> Sese ca'vej rá soj caraa x'naa soj che'é so', ne veé danj qui'yáj, ne caraa x'naj che'é so', che'é rej me raj cavii sa' doj soj, ne ne'enj se vaa tumé Jesucristó man ní' ei. <sup>11</sup> Danj qui'yaj ní', gaa ne se gaa nanj qui'yaj canaán síí cu'naj Sata'nás man ní' ei. 'O se aj ne'en ní' daj me rá so' qui'yaj so' gá ní' ei.

**Nana nihánj taj xna'anj se vaa cavii Pabló chuman' cu'naj Troas, ne ca'anj so' estadó cu'naj Macedonia a**

<sup>12</sup> Dan me se ca'anj 'unj chuman' cu'naj Troas ca'mii natáj 'unj se-nana Jesucristó nana sa', ne dan me se vaa ndo'o rej ca'mii natáj 'unj nana sa', qui'yaj síí 'nij ra'a man ní', <sup>13</sup> tzaj ne ne nari' 'unj man tinúú ní' síí cu'naj Titó, ne nanó ndo'o raj, ne che'é dan tanáj 'unj man nij tinúú ní' síí ne chuman' Troas yo', ne cavii 'unj ca'ná' 'unj estadó Macedonia nihánj nanj adonj.

**Nana nihánj taj xna'anj che'é nana a'mii natáj nij tuvi' Pabló rihaan nij yuvii a**

<sup>14</sup> Tzaj ne nago' ní' graciá rihaan Diose, che'é se Diose me síí 'yaj se vaa 'yaj canaán uxrá núj rihaan síí chree che'é Jesucristó a. Ne Diose me síí 'yaj uno yuvii man rihaan nu' cachra' chumii nana sa' yo' rihaan nu' cachra' chumii, nda' rá se vaa avii se gun' daj man yâj gaa naxra' yo' ro', danj vaa cha'nuu se-nana Diose chuguanj. <sup>15</sup> Dan me se nda' rá se vaa yachruu squíí gun' daj, ne achén yo' sca'núj nij síí quinanií rihaan sayuun, ne achén yo' sca'núj nij síí ca'anj rihaan ya'an, danj vaa núj gaa nata' núj se-nana Jesucristó rihaan yuvii che'é Diose ei. <sup>16</sup> Ne xa' nij síí ca'anj rihaan ya'an, tzaj ne nda' rá se vaa gun' squíí rihaan nij yuvii cavi' ro', danj vaa se-nana Diose rihaan nij so' ei. Tzaj ne xa' nij síí quinanií rihaan sayuun me se nda' rá se uun rá' gaa sa' uxrá gun' squíí ro', danj uun rá nij so' gaa uno nij so' se-nana Diose ei. Tzaj ne a me síí uun nucuaj 'yaj danj, rá soj gá. <sup>17</sup> 'O se núj me se ne 'yaj núj ndaa vaa 'yaj ta'aj nij síí a'mii natáj se-nana Diose a ma'. 'O se ta'aj nij so' me se me inanj nij síí me rá qui'yaj canaán sa'anj che'é se-nana Diose, ne xa' núj, tzaj ne inanj nana ya me rá núj ca'mii núj, ne na'vej rá núj ca'neé núj sa'anj che'é se-nana Diose rihaan yuvii ma'. 'O se Diose me síí ca'ne' suun rihaan núj ca'mii natáj núj, ne tumé Diose man núj daj ca'mii núj, ne síí noco' man Jesucristó me núj adonj.

Nanā nihánj taj xna'anj se vaa ase vaa 'o' yanj cartá qui'yaj Jesucristó vaa nij síf amán rá ni'yaj man Jesucristó yanj chuman' Corinto ga nu' ní' a

3 Dan me se gaa a'mii núj nanā nihánj me se uun che'e uún núj a'mii núj che'é ma'an núj, rá soj na'. Taj mei. Dan me se ase vaa yanj cartá vaa nu' ní' síj amán rá ni'yaj man Jesucristó ei. Dan me se nuveé che'e nucuí' rá núj a'mii núj danj ma'. 'O se veé danj vaa ya ei. Nda' se me rá soj tijaan núj yanj cartá a'mii sa' che'é núj chihá'. Nda' se me rá soj cachinj núj yanj cartá a'mii sa' che'é núj rihaan soj chihá'. 'O se taj ma'. Ne vaa danj mei. 'O se aj ne'en soj man núj á. Ne taj che'é qui'yaj soj yanj cartá cataj xna'anj rihaan yo'ó yuvij daj síj me núj ma'. <sup>2</sup> 'O se ase vaa yanj cartá a'mii che'é núj vaa ma'an soj adonj. Dan me se aj ne'en cunudanj yuvij daj vaa nimán núj se vaa 'ee rá núj man soj, ne che'é dan xcaj nij yuvij cuentá se vaa síj sa' me núj ei. <sup>3</sup> Dan me se ne'en ya ya ní' adi' se vaa yanj cartá qui'yaj ma'an Jesucristó vaa soj chuguanj. Tzaj ne nuveé yanj cartá qui'yaj nii ga tintá me yo' ma'. Nuveé letrá cachrón nii rihaan yahij me yo' ma'. 'O se letrá cachrón ya ma'an Jesucristó ndaa nimán soj me nanā yo' adonj. Ne yo' me qui'yaj Nimán Diose, ne che'é Nimán Diose me nuú nanā yo' ndaa rque nimán soj ei.

Nanā nihánj taj xna'anj se vaa guun nucuaj nij tuvi' Pabló ca'mii natáj nij so', qui'yaj ma'an Diose a

<sup>4</sup> Yo' o nucuaj rá núj man Diose che'é Jesucristó se vaa ya racuj Diose man núj ei. <sup>5</sup> Dan me se ne nó xcúun núj cataj núj se vaa guun nucuaj núj qui'yaj suun núj che'é Diose ma'. 'O se ma'an Diose me síf 'yaj uun nucuaj núj qui'yaj suun núj adonj. <sup>6</sup> Ne Diose me síf qui'yaj guun nucuaj núj cataj xna'anj núj che'é tucuaán naca cuchruj Diose che'é yuvij adonj. Ne xa' tucuaán naca yo', tzaj ne nuveé inanj tucuaán no rihaan yanj daj vaa no xcúun ní' canoco' ní' me tucuaán naca yo' ma'. 'O se se guun nucuaj ní' canoco' ní' tucuaán no rihaan yanj ma'. Xa' tucuaán no rihaan yanj, tzaj ne cavi' nimán ní', qui'yaj tucuaán vaa danj ei. Dan me se xa' tucuaán naca cuchruj Diose che'é ní', tzaj ne tananj a cunuu i'na' nimán ní' qui'yaj Nimán Diose che'é tucuaán naca yo' nanj adonj.

Nanā nihánj taj xna'anj se vaa ve'é ndo'o vaa nanā a'mii natáj nij tuvi' Pabló nanā a'mii che'é Nimán Diose a

<sup>7</sup> Nanā cataj xna'anj Diose rihaan Moisés gaa naá ro', cachrón Diose nanā yo' rihaan yahij caxra', ne cataj so' se vaa síf se cuno nu' nanā yo' ro', yuun che'e cavi' so', taj so' a. Dan me se gaa tucuaachén Moisés tucuaán yo' rihaan nij yuvij, ne chuguanj uxrá rihaan so', ne ndaa do' do' quina'áj ya'an rihaan Moisés, tzaj ne ne guun nucuaj nij yuvij israelitá ni'yaj nij so' rihaan Moisés ma'. <sup>8</sup> Táa a suun vaa rihaan núj suun nata' se-tucuanj Nimán Diose chuguanj. <sup>9</sup> 'O se nanj se-tucuanj Moisés, tzaj ne sa' uxrá ca'mii nii ni'yaj nii se-suun Moisés suun

nata' che'é tucuaán 'yaj 'na' cacun' xráa yuvij, ne táa a se-suun núj, ne sa' doj 'yaj núj nata' núj tucuaán 'yaj nuu sa' yuvij rihaan Diose ei. <sup>10</sup> Dan me se gaa naá ro', ve'é ndo'o chuguanj rihaan Moisés, rá nij yuvij israelitá, tzaj ne yaj ro', me se ne ve'é vaa nanā nga yo' rihaan ní' a ma'. Ne tucuaán naca cuchruj Diose che'é ní' ro', yo' ve'é vaa rihaan ní' yaj adonj. 'O se ve'é doj vaa tucuaán cuchruj Diose cuano rihaan nanā ca'mii Diose gaa naá nanj adonj. <sup>11</sup> 'O se doj orá chuguanj rihaan Moisés, qui'yaj nanā ca'mii Diose rihaan so' gaa naá, tzaj ne sa' doj vaa nanā ca'mii Diose cuno ní' yaj, ne ve'é uxrá doj cumán ní' nu' cavii nu' ca'anj, qui'yaj nanā naca yo' adonj.

<sup>12</sup> Che'é se guun ya rá núj se vaa gaa i'na' núj nu' cavii nu' ca'anj, che'é dan niha' rá núj, ne ne na'aj núj a ma'. <sup>13</sup> Ne 'yaj núj ndaa vaa qui'yaj Moisés gaa naá ma'. Dan me se caráán so' yatzij rihaan so', che'é yan ne ca'vej rá so' ni'yaj nij yuvij israelitá rihaan so' daj guun quiti'inj chuguanj rihaan so' a. <sup>14</sup> Dan me se ne quene'en nij so' daj vaa canicun' se chuguanj rihaan Moisés ma'. 'O se ne guun nucuaj nij so' xcaj nij so' cuentá a man adonj. Ne inanj danj vaa uún nij yuvij israelitá ndaa cuano nihánj, ne aráán rihaan nij so' gaa nayaa nij so' nanā ca'mii Diose gaa naá, ne taj se 'yá' xcaj nij so' cuentá che'é nanā yo' a man adonj. Inanj nij síf noco' man Jesucristó me síf uun nucuaj xcaj cuentá che'é nanā yo' nanj ei. <sup>15</sup> Tzaj ne veé danj vaa ndaa cuano, ne ne guun nucuaj nij yuvij israelitá xcaj sa' nij so' cuentá gaa nayaa nij so' se-tucuanj Moisés ma'. Veé danj aráán rihaan nij so' nanj á. <sup>16</sup> Ne gaa canicaj ní' noco' ní' man síf 'nij ra'a man ní', gaa ne x'néj yatzij aráán rihaan ní', ne a'vee ruvi' sa' rihaan ní' ni'yaj ní' ei. <sup>17</sup> (Dan me se daj vaa ese Nimán Diose me síf 'nij ra'a man ní', ne dan me se rej yanj Nimán Diose me se vaa ya'núj rej yo' ei.) <sup>18</sup> Ne taj se aráán rihaan taran' ní' ma'. 'O se uun nucuaj ní' ne'en ní' man síf 'nij ra'a man ní', se vaa ve'é uxrá vaa so', ne ase vaa so' ro', danj gaa uún ma'an ní', che'é se ni'yaj ní' man so' ei. Dan me se do' do' naqui'yaj sa' síf 'nij ra'a man ní' nimán ní', ne dan me se ne so' nimán ní', ne ase vaa ma'an so' ro', danj gaa taran' ní' uún adonj.

Nanā nihánj taj xna'anj se vaa nda' se ran' ndo'o nij tuvi' Pabló sayuun, tzaj ne uun nucuaj nij so' a'mii natáj nij so' se-nanā Diose, qui'yaj Diose a

4 Dan me se cunuu 'ee rá Diose man núj, ne ca'ne' so' suun rihaan núj ca'mii natáj núj, ne che'é dan ne ri' rá núj ca'mii natáj núj se-nanā Diose ma'. <sup>2</sup> Tananj a 'o tanáj xco núj nu' nij rasuun na'aj chi'ij 'yaj yuvee nii ei. Se cuchu'vi' núj quene'en yuvij me 'yaj núj ma'. Se ca'mii núj nanā tiha' yu'unj ma'. Se ca'mii ne núj che'é se-nanā Diose ma'. Inanj nanā ya ca'mii núj cuno cunudanj yuvij, ne xcaj ma'an nij yuvij cuentá se vaa ya vaa nanā a'mii núj, ne Diose me síf cuno nu' nanā ca'mii núj nanj ei. <sup>3</sup> Tzaj ne sese nanā yuvee me nu' nanā a'mii natáj núj, rá ta'aj nij yuvij, ne inanj nij síf chi'ij ca'anj rihaan sayuun me nij síf uun danj rá nanj ei. <sup>4</sup> Ne xa' nij so', tzaj ne ne amán rá nij so' ni'yaj nij

so' man Jesucristó ma'. 'O se caráan xréé nij so', qui'yaj síi chree síi noco' nij so' man, ne ne guun nu-cuaj nij so' xcaj nij so' cuentá che'é se-nana Jesucristó ma'. Ne ne'en nij so' se vaa sa' ndo'o vaa Jesucristó ma'. Ne xa' Jesucristó, tzaj ne ase vaa ma'an Dioso vaa so' ni'yaj ní' man so' adonj.

<sup>5</sup> Xa' núj, tzaj ne ne a'mii natáj núj che'é ma'an núj ma'. Inanjan che'é Jesucristó sij 'nij ra'a man ní' a'mii natáj núj, ne taj núj se vaa che'é se noco' ní' man so', che'é dan sij 'yaj suun rihaan soj me núj ei. <sup>6</sup> 'O se Dioso me síi cataj se vaa chuguun rihaan chumii, ne danj ca'mii Dioso gaa naá uxrá gaa vaa rmi' rihaan chumii nihánj, gaa ne cuchuguun rihaan chumii nihánj, ne yaj me se chuguun nimán núj, qui'yaj uún Dioso á. Che'é dan me guun nucaj núj cataj xna'anj núj rihaan yuvi se vaa sa' uxrá vaa Dioso, ne sese cunqo nij yuvi se-nana Jesucristó, ne xcaj nij so' cuentá se vaa sa' uxrá qui'yaj Dioso adonj.

<sup>7</sup> Dan me se nuu nu' rasuun sa' yo' nimán núj, tzaj ne ase vaa 'o xruj yo'óo niquii uun vaa núj, ne che'é dan ne'en ya ní' se vaa nu' se sa' nucaj yo' 'na' 'yaj Dioso ei. Ne nuveé ma'an núj 'yaj veé 'na' se sa' yo' ma'. Dioso me síi rqué se nucaj man núj che'é rej ca'vee nata' núj se-nana so' adonj. <sup>8</sup> Dan me se me rej ma'an vaj núj me se 'yaj nii sayuun man núj, tzaj ne rqué Dioso rej quinanj núj rihaan sayuun yo' a. Chu'vi' nimán núj, tzaj ne ne ri' nimán núj ma'. <sup>9</sup> Noco' uxrá yuvi man núj che'é yan me rá nij so' go' nij so' man núj, tzaj ne ne tanáj Dioso man núj ma'. 'Yaj ya nii sayuun man núj, tzaj ne ne avi' núj a ma'. <sup>10</sup> Niganj ne'en ya núj se vaa ase guun rá nii gaa ticavi' nii man Jesucristó ro', cunudanj me rá nii ticavi' nii man núj adonj. Che'é se ne cavi' núj, gaa ne caraya'anj uxrá nij yuvi adonj. Ne xcaj nij yuvi cuentá se vaa vaa i'na' núj che'é se 'nij Jesucristó nimán núj ne tumé so' man núj adonj. <sup>11</sup> Dan me se vaa i'na' núj rihaan chumii nihánj, tzaj ne niganj ne'en núj se vaa ca'vee cavi' núj che'é se noco' núj man Jesucristó, ne ne'en yuvi se vaa ca'vee cavi' núj, tzaj ne xcaj nij yuvi cuentá se vaa vaa i'na' núj che'é se 'nij Jesucristó nimán núj ne racuíj ndo'o so' man núj adonj. <sup>12</sup> Dan me se núj me se sij daj doj cavi' me núj, tzaj ne soj ro', tananj a yo'o gaa i'na' nimán nij soj á.

<sup>13</sup> No naná ca'mii 'o síi cane gaa naá rihaan danj Dioso se vaa cataj so':

—Cuchumán raj ni'yaj 'unjan man Dioso, ne che'é dan ca'mij che'é so' a —taj yo'o síi cane gaa naá yo' a.

Ne ase vaa cuchumán rá síi cane gaa naá yo' ro', danj vaa amán rá núj, ne che'é dan a'mii núj che'é Dioso, <sup>14</sup> che'é se ne'en núj se vaa Dioso me síi qui'yaj cunuu i'na' uún Jesucristó sij 'nij ra'a man ní', ne che'é dan cunuu i'na' uún ma'an núj gaa Jesucristó, qui'yaj uún Dioso, gaa ne canicun' núj rihaan Jesucristó, qui'yaj uún Dioso, ne danj qui'yaj uún Dioso che'é soj uún adonj. <sup>15</sup> 'O se inanjan che'é soj ran' núj nu' se vaa ran' núj, tzaj ne che'é se me rá núj njcaj que'ee soj se luj qui'yaj Dioso, gaa ne guun rij doj ní' sij nago' graciá

rihaan Dioso, ne guun rij doj ní' sij ve'é a'mii che'é Dioso adonj.

**Nana nihánj taj xna'anj se vaa nata' ndo'o nij tuvi' Pabló se-nana Dioso, che'é se ne'en nij so' se vaa naru'vee Jesucristó rihaan nij so' a**

<sup>16</sup> Che'é dan se ca'ne' rá núj ma'. Dan me se núj me se daj doj cavi' nee man núj, tzaj ne daj a güii tananj a nahuun sca' doj nimán núj nanj ei. <sup>17</sup> Cuanqo yaj me se vaa doj sayuun ran' núj, tzaj ne ra'yanj cachon nu' sayuun yo', ne che'é sayuun ro', ve'é uxrá cavi' núj nu' cavii nu' ca'anj ei. <sup>18</sup> Che'é dan ne xcaj núj cuentá che'é nij rasuun ruvi' ni'yaj yuvi ma'. 'O se rasuun ruvi' ni'yaj yuvi ro', vaa güii quinavij nu' rasuun yo', ne che'é dan inanjan che'é nij rasuun ne ruvi' ni'yaj yuvi cuanqo xcaj núj cuentá, che'é se rasuun cumán nu' cavii nu' ca'anj me rasuun yo' adonj.

**5** Dan me se ne'en núj se vaa ase vaa 'o ve' mantá uta' uun nii 'o orá le'ej nii ne doj orá a'nej nii mantá ro', vaa nee man núj, ne yanj nee man núj gaa vaa i'na' núj rihaan chumii nihánj, tzaj ne ne'en núj se vaa ca'vee navij nee man núj vaa güii, ne asa' navij yo', gaa ne rque Dioso yo'óo nee naca cunuú núj, ne daj chihaa mij se quinavij nee naca yo' a ma'. Tananj a cayáan núj rej xta' nu' cavii nu' ca'anj adonj. <sup>2</sup> 'O se aráj chej núj, che'é se me uxrá rá núj cunuú núj nee naca yo', nee qui'yaj Dioso rej xta' che'é núj a. <sup>3</sup> Ne nee naca yo' me caráan xráá núj, gaa ne se gaa nanj gaa canj núj ei.

<sup>4</sup> Dan me se nuú núj nee nga nihánj cuanqo, ne che'é dan nanó rá núj, ne aráj chej núj, che'é se na'vej rá núj cavi' núj a man adonj. Dan me se na'vej rá núj tanáj núj nee nuu núj cuanqo, tzaj ne me ndo'o rá núj cunuú núj nee naca yo', ne veé dan me se nee man núj nee daj doj cavi' nihánj ro', cunuu naca uún yo', ne gaa i'na' yo' nu' cavii nu' ca'anj ei. <sup>5</sup> Ne Dioso me síi 'yaj suun nimán núj yan ca'vee cunuu naca nee man núj vaa güii, ne rqué so' Nimán so' man núj, ne che'é dan guun ya rá núj se vaa cunuu naca ya núj adonj. <sup>6</sup> Che'é dan niganj vaa nucaj nimán núj, ne dan me se ne'en núj se vaa gaa vaa nee man núj nihánj cuanqo ro', ne taj vaj núj ne rej xta' ga síi 'nij ra'a man ní' ma'. <sup>7</sup> 'O se ataa quita'aa núj se vaa rque Dioso rihaan núj, tzaj ne amán rá núj ni'yaj núj man Dioso se vaa ya vaa nana cataj xna'anj so' rihaan núj, ne che'é dan uno núj rihaan so' nanj adonj. <sup>8</sup> Dan me se nari' nucaj nimán núj, ne uun rá núj se vaa cunaj uxrá gaa tanáj núj nee man núj, ne ca'anj núj cayáan núj ga síi 'nij ra'a man ní', ne sa' doj cavi' núj asa' qui'yaj núj danj adonj.

<sup>9</sup> Che'é dan me ndo'o rá núj guun niha' rá síi 'nij ra'a man ní' ni'yaj so' man núj á. Ca'vee se cayáan núj rihaan chumii nihánj, ca'vee se cayáan núj rej xta', tzaj ne me rá núj guun niha' rá síi 'nij ra'a man ní' ni'yaj so' man núj nanj adonj. <sup>10</sup> Ne'en núj se vaa vaa güii no xcúun taran' ní' canicun' taran' ní' rihaan Jesucristó, ne naquiyaj cuu so' che'é ní' a. Gaa ne naru'vee Jesucristó rihaan ní' che'é se vaa qui'yaj ní' gaa vaa i'na' ní' rihaan chumii nihánj, ne sese sa' qui'yaj ní', ne se sa'

naꝛu'vee Jesucristó rihaan ní', ne sese nij qui'yaj ní', ne se nij quinicaj ní' nanj adonj.

<sup>11</sup> Chu'vi' núnj che'é se ne'en núnj se vaa qui'yaj síi 'nij ra'a man ní' sayuun man nij síi tumé cacun', ne che'é dan nago' núnj chrej nucuj man yuvii canoco' nij yuvii man so', ne aj ne'en Dioso daj vaa nimán núnj a. Ne guun ya rá 'unj se vaa xcaj ma'an nij soj cuentá daj vaa nimán núnj nanj adonj. <sup>12</sup> Nuveé che'e se me rá núnj ca'mii núnj nana sa' che'é ma'an núnj me a'mii 'unj danj ma'. Maan se me rá núnj guun nucuj soj ca'mii nacaj soj ni'yaj soj man núnj nanj adonj. 'O se nij síi taj ri'yunj man núnj me se inanj xcaj nij so' cuentá daj ruvi' yuvii ni'yaj nij so', tzaj ne ne acaj nij so' cuentá daj vaa nimán yuvii ma'. <sup>13</sup> Ca'vee se snúu rma'an núnj rá nij so', tzaj ne inanj che'é se nocó' núnj Dioso me 'yaj núnj ndaa vaa 'yaj núnj, ne ca'vee se nuvi' nana nihá' nimán núnj rá nij so', tzaj ne inanj che'é se me rá núnj racuíj núnj man soj me 'yaj núnj ndaa vaa 'yaj núnj adonj.

<sup>14</sup> 'O se ne'en núnj se vaa 'ee rá Jesucristó man cunudanj yuvii, ne che'é dan 'o me rá núnj cataj xna'anj núnj rihaan yuvii che'é so' a. 'O se guun ya rá núnj se vaa orún' Jesucristó me síi cavi' che'é cunudanj yuvii, ne che'é dan ase vaa síi cavi' ro', danj vaa cunudanj nij yuvii nocó' man so' ni'yaj nij so' chrej chi'ii a. <sup>15</sup> Ne che'é se cunuu sa' nimán nij yuvii ro', che'é dan se guun rá nij yuvii se vaa vaa i'na' nij yuvii rihaan chumii nihánj che'é yan qui'yaj suun nij yuvii che'é ma'an nij yuvii ma'. 'O se gaa i'na' nij so' che'é yan canoco' nij so' man Jesucristó, ne Jesucristó me se so' me síi cavi' che'é nij so', ne cunuu i'na' uún so' che'é yan cavii sa' nij yuvii doj nanj adonj.

**Nana nihánj taj xna'anj se vaa a'mii natáj nij tuvi'  
Pabló se vaa ca'vej rá yuvii tinanii Dioso man nij yuvii  
rihaan sayuun a**

<sup>16</sup> Che'é dan me ca'ne' rá núnj ga suun acaj cuentá ndaa vaa ruvi' yuvii ni'yaj tuvi' yuvii á. Asij rque me se nanj yuvii me Jesucristó rá núnj, ne inanj xcaj núnj cuentá ndaa vaa ruvi' so', tzaj ne yaj me se ne 'yaj núnj danj a ma'. <sup>17</sup> Ne che'é se cunuu sa' nimán núnj, che'é dan ne'en núnj se vaa me ma'an yuvii amán rá ni'yaj man Jesucristó ro', cunuu sa' nimán so', qui'yaj Dioso á. Ne síi amán rá ro', se guun rá uún so' qui'yaj so' ndaa vaa qui'yaj so' gaa rque ma'. 'O se síi acaj naca cuentá me so' adonj.

<sup>18</sup> Ne xa' nu' nihánj, tzaj ne Dioso me síi 'yaj nu' nihánj che'é yuvii, ne so' me síi qui'yaj cunuu rcua'aan ní' ga ma'an so' che'é se vaa qui'yaj Jesucristó, ne ca'ne' ma'an Dioso suun rihaan núnj cataj xna'anj núnj rihaan yuvii se vaa ca'vee cunuu rcua'aan nij yuvii ga Dioso adonj. <sup>19</sup> Dan me se ma'an Dioso ca'née man Jesucristó rihaan chumii nihánj, ne che'é se vaa qui'yaj Jesucristó ro', che'é dan ca'vee cunuu rcua'aan yuvii ga Dioso, qui'yaj Dioso, ne tirí' Dioso cuentá cacun' vaa rihaan nij yuvii a. Ne Jesucristó me síi rque nana nihánj man núnj cataj xna'anj núnj nana nihánj rihaan yuvii, qui'yaj uún Dioso ei.

<sup>20</sup> Dan me se a'mii núnj se-nana Jesucristó rihaan yuvi-  
i, ne ma'an Dioso rque se-nana Dioso rihaan núnj ca'mii núnj che'é ma'an Dioso, ne che'é dan achíin ni'yaj ndo'o núnj rihaan nij yuvii, ne a'mii núnj nana nihánj rihaan nij yuvii a: "Cunuu rcua'aan nij soj ga Dioso ei. <sup>21</sup> A 'o cacun' ne tumé Jesucristó ma'. Tzaj ne naraa Dioso nu' cacun' tumé ní' xraá ma'an Jesucristó, ne quiran' Jesucristó sayuun che'é cacun' yo', ne che'é dan ca'vee cunuu sa' ya ní' rihaan Dioso che'é se sij nocó' man Jesucristó me ní' adonj." Yo' me nana a'mii natáj núnj rihaan yuvii nanj adonj.

**6** Dan me se 'yaj suun núnj suun ca'ne' Dioso rihaan núnj, ne che'é dan taj xna'anj núnj rihaan soj se vaa se quiri'ij yanij soj se luj qui'yaj Dioso che'é soj ma'.

<sup>2</sup> 'O se nana nihánj me nana ca'mii Dioso á:

—Maan güii cunó 'unj cachíin ni'yaj soj rihanj, ne güii dan me racuíj 'unj man soj cavii sa' soj a —cataj Dioso ga naá a.

Ne xcaj soj cuentá se vaa cuano nihánj me güii cunuu 'ee rá Dioso man soj, ne cuano nihánj me güii ca'vee cavii sa' soj chuguanj.

**Nana nihánj taj xna'anj se vaa tumé ndo'o nij tuvi'  
Pabló man ma'an nij so' daj 'yaj nij so' che'é yan cunó  
yuvii nana a'mii nij so' a**

<sup>3</sup> Ne tumé uxrá núnj man núnj che'é chrej sa', che'é se na'vej rá núnj guun yanij soj rihaan chrej sa' a. Ne na'vej rá núnj cataj soj se vaa nij vaa suun 'yaj suun núnj rihaan Dioso uún a. <sup>4</sup> 'O se me rá núnj ni'yaj soj man núnj ne cataj soj se vaa ya ya sij 'yaj suun rihaan Dioso me núnj, ne che'é dan a'vee se daj a ran' núnj sayuun, tzaj ne vaa inaj nimán núnj nanj adonj. Dan me se ran' núnj sayuun, ne achiin rasuun man núnj, ne chu'vi' nimán núnj, ne o' nii cuxru' xraá núnj, ne axríj nii taga' man núnj, ne nuu chre' nii caxrii yuvaa nii man núnj, ne 'yaj suun ndo'o núnj che'é se qui'yaj canaan núnj cha' núnj, ne vaa güii narii ndo'o núnj nej, ne vaa güii, ne ne vaa ya'núnj rihaan núnj cha' núnj, tzaj ne vaa inaj nimán núnj, ne ne a'ne' rá núnj a ma'. <sup>6</sup> Ne a'née nimán núnj qui'yaj suun núnj rihaan Dioso, ne núnj ro', ne uun yuvaa núnj man tuvi' núnj ma'. Tananj ve'é 'yaj núnj rihaan tuvi' núnj, ne nocó' núnj Nimán Dioso, ne ya ya 'ee rá núnj man tuvi' núnj adonj. <sup>7</sup> Nana ya a'mii núnj, ne rque Dioso se nucuj man núnj, ne cunuu sa' nimán núnj rihaan Dioso, ne che'é dan a'vee unu' núnj ga síi chree, ne tumé núnj man núnj se vaa se qui'yaj síi chree chi'ii man núnj a. <sup>8</sup> Vaa yuvii a'mii sa' che'é núnj, ne vaa yuvii a'mii nij che'é núnj, ne vaa yuvii taj se vaa síi ne me núnj, tzaj ne nana ya a'mii núnj ei. <sup>9</sup> Ne nuvi' se uun núnj, taj uún nii, tzaj ne sij ne'en uxrá yuvii man me núnj a. Ne taj uún nii se vaa daj doj cavii' núnj, tzaj ne ne'en soj se vaa vaa nucuj núnj a. Ne ma'an Dioso 'yaj sayuun man núnj che'é rej nari' núnj cunó núnj doj rihaan Dioso, tzaj ne ne avi' núnj, 'yaj Dioso ma'. <sup>10</sup> Ne nanó rá núnj che'é sayuun, tzaj ne nihá' rá núnj rihaan Dioso uún a. Ne síi nique me núnj, tzaj ne avii sa' doj que'ee yuvii, 'yaj núnj a. Ne taj si'yaj núnj, tzaj ne cunudanj chumii nihánj me si'yaj núnj a.

Nanā nihánj taj xna'anj se vaa me rá Pabló cunuu 'ee rá nij síf man Corinto ni'yaj nij so' man nij tuvi' Pabló a

<sup>11</sup> Dan me se nihánj me cataj xna'anj 'unj rihaan soj sij man chuman' Corinto daj vaa nimán núj a. Dan me se ne'en soj se vaa 'ee ndo'o rá núj man soj á. <sup>12</sup> Nuveé che'e se vaa qui'yaj núj me nanó rá soj ma'. Maan che'é se ne nucuaj rá soj man núj ro', che'é dan nanó rá soj adonj. <sup>13</sup> Daj se uun rá nii ne'en nii ta'níi nii ro', danj vaa uun raj ne'enj man soj, ne che'é dan cataj xna'anj 'unj rihaan soj se vaa, ase vaa qui'yaj núj che'é soj ro', danj qui'yaj uún soj che'é núj, ne gaa nucuaj rá soj man núj á.

Nanā nihánj taj xna'anj se vaa no xcúún ní' tanáj ní' chrej chi'ii, ne cunuu sa' nimán ní' rihaan Diose a

<sup>14</sup> Se guun guun tuvi' soj gā nij síf ne amán rá ni'yaj man Jesucristó ma'. Se guun qui'yaj soj ndaa vaa 'yaj nij so' ma'. Asa' ca'vee cuyaān gaa rej ranga' gā rej rmi', rá soj gā. Che'é dan, asa' ca'vee guun tuvi' síf me rá qui'yaj sa' gā síf me rá qui'yaj cacun', rá soj gā. <sup>15</sup> Asa' ca'vee cuyaān gaa rá Jesucristó gā síf chree, rá soj gā. Ne ca'vee cuyaān gaa rá síf amán rá ni'yaj man Diose gā síf na'vej rá cuchuman rá, rá soj na'. Taj ma'. <sup>16</sup> Ne xa' ní' sij nocó' man Diose, tzaj ne asa' ca'vee cunuu chre' ní' gā ya'anj cacó'j yuvii, rá soj gā. Xa' ya'anj cacó'j yuvii, tzaj ne ne vaa i'na' yo' ma'. Ne xa' Diose, tzaj ne síf vaa i'na' me so', ne ne so' nimán ní' ei. 'O cuyaān vaa nanā nihánj gā nanā ca'mii Diose gaa naá gaa cataj Diose:

—Cayáán 'unj gā nij so', ne cachee 'unj gā nij so', ne guún 'unj Diose nocó' nij so', ne guun nij so' yuvii tumé 'unj man a —taj Diose gaa naá che'é ní' sij nocó' man so' a.

<sup>17</sup> Ne cataj uún Diose rihaan ní' sij nocó' man so':

—Che'é dan guun yanij soj rihaan nij síf chi'ii yo', ne a 'ó se chi'ii se qui'yaj soj, gaa ne nacaj 'unj man soj, <sup>18</sup> ne guun Rej soj manj, ne guun soj ta'nij a. Veé danj síf nanā cataj xna'anj 'unj sij 'nij ra'a man soj rihaan soj, ne sij guun nucuaj qui'yaj nu' nanā nihánj mej adonj —taj uún Diose rihaan ní' a.

**7** Dan me se nu' nanā nihánj nanā ca'mii ya Diose gaa naá ro', ca'mii Diose nanā yo' rihaan ní', tinuj, nocoj. Che'é dan quirii yanij ní' man cunudanj se chi'ii qui'yaj ní' asij rque do', man cunudanj se chi'ii man nimán ní' do', ne gaa cuj nimán ní' á. Ne naqui'yaj sa' inanj ní' nimán ní', che'é se uxrá aráj cochroj ní' rihaan Diose á.

Nanā nihánj taj xna'anj se vaa guun niha' rá Pabló cuno so' nanā se vaa cuno nij síf man Corinto se-nanā Pabló a

<sup>2</sup> Me rá núj ve'é ca'mii soj gā núj á. 'O se a 'ó soj ne qui'yaj chi'ii núj man ma'. A 'ó soj ne tiha' yu'unj núj man ma'. <sup>3</sup> Dan me se nuveé che'e se me rá 'unj cuta' 'unj cacun' xráá soj me a'mij danj ma'. 'O se aj cataj xna'anj 'unj rihaan soj se vaa 'ee uxrá rá núj man soj,

ne ca'vee se gaa i'na' ní' do', ca'vee se cavi' ní' do', tzaj ne yo'o gaa 'ee rá núj man soj nanj adonj. <sup>4</sup> Inanj nucuaj ndo'o rá 'unj ni'yaj 'unj man soj se vaa ve'é qui'yaj soj, ne niha' ndo'o rá 'unj ni'yaj 'unj man soj, ne nda' se sayuun ran' núj, tzaj ne uun niha' ndo'o raj adonj.

<sup>5</sup> Dan me se ca'anj núj estadó Macedonia, tzaj ne taj se 'yá' canē sa' núj a ma'. 'O se qui'yaj ndo'o nii sayuun man núj, ne vaa yuvii ca'mii cunu' gā núj, ne cuchu'vi' ndo'o núj a. <sup>6</sup> Tzaj ne Diose me síf racuíj ndo'o man nij síf ni'yanj nimán, ne dan me se racuíj ndo'o Diose man núj se vaa ca'na' tinú' Titó rihaan núj, qui'yaj Diose, ne cunuu cuj rá núj, qui'yaj so' a. <sup>7</sup> Ne veé uún so' me síf cataj xna'anj rihaan núj se vaa guun niha' rá so' quene'en so' man soj, ne cataj xna'anj so' se vaa me ndo'o rá soj quene'en soj man núj do', se vaa nanó rá soj che'é síf qui'yaj cacun' 'nij sca'núj soj do', se vaa niha' rá soj ca'mii sa' soj che'é núj do', ne che'é dan doj a guun niha' raj adonj.

<sup>8</sup> Dan me se nda' se quinanó rá soj, qui'yaj yanj cartá ca'néj, tzaj ne cunaj qui'yaj, raj ei. 'O se quinanó rá soj che'é se cataj xna'anj 'unj che'é cacun' tumé soj, tzaj ne ne'en 'unj cuano se vaa ya quinanó rá soj doj güii, qui'yaj yanj cartá yo' chuguanj. Dan me se ne guun niha' raj gaa cachronj nanā nucuaj yo' rihaan soj ma'.

<sup>9</sup> Tzaj ne yaj me se guun niha' raj, ne nuveé che'e inanj se quinanó rá soj me guun niha' raj ma'. Che'é se tanáj soj cacun' tumé soj, ne canicaj nimán soj ro', che'é dan guun niha' raj adonj. 'O se quinanó rá soj, ne canicaj nimán soj ndaa vaa me rá Diose qui'yaj soj, ne che'é dan ne quiran' soj sayuun, qui'yaj núj a ma'. Tananj a cavii sa' soj doj, qui'yaj núj adonj. <sup>10</sup> 'O se sese quinanó rá ní' ndaa vaa me rá Diose qui'yaj ní', ne canicaj nimán ní', ne cavi' sa' ní', ne guun rá ní' se vaa sa' qui'yaj Diose che'é ní' adonj. Tzaj ne sese quinanó rá ní' ndaa vaa nanó rá nij síf man rihaan chumii nihánj, ne quirii' nu' nimán ní' nu' cavii nu' ca'anj nanj adonj.

<sup>11</sup> 'O se xcaj soj cuentá se vaa ve'é ndo'o qui'yaj soj, che'é se quinanó rá soj che'é cacun' qui'yaj soj, qui'yaj Diose á. 'O se cunaj ca'mii soj che'é nanā ca'mii núj do', ne niha' rá soj ni'yaj soj cacun' tumé yuvii 'nij sca'núj soj do', caráj cochroj ndo'o soj ni'yaj soj Diose do', guun rá soj quene'en soj man núj do', guun niha' rá soj qui'yaj soj sayuun man síf qui'yaj cacun' do' a. Nu' nihánj qui'yaj soj, tihaan soj se vaa nuveé sij tumé cacun' me ma'an soj ma'. 'O se síf sa' me soj nanj ei.

<sup>12</sup> Nuveé che'e síf tumé cacun' me qui'yáá 'unj yanj cartá yo' ma'. Nuveé che'e síf qui'yaj so' cacun' rihaan me qui'yáá 'unj yanj cartá yo' ma'. 'O se qui'yáá 'unj yanj cartá yo' che'é se guun rá 'unj xcaj ma'an soj cuentá se vaa niha' rá ma'an soj cunó soj nanā ca'mii núj rihaan soj, che'é se nocó' nu' ní' man Diose adonj. <sup>13</sup> Ne che'é se vaa qui'yaj soj ro', che'é dan guun niha' rá núj nanj adonj.

Ne dan me se guun niha' rá núj che'é se cunuu cuj rá síf cu'naj Titó ne guun niha' rá so', qui'yaj soj a.

<sup>14</sup> Dan me se ca'mii 'unj nanā sa' rihaan síf cu'naj Titó che'é soj, ne quisij ya nu' nanā ca'mii 'unj rihaan so' che'é soj vaa ei. Dan me se ya vaa nu' nanā a'mii núj

rihaan soj, ne ya vaa nana ca'mii núj rihaan Titó, ne che'é dan taj a yo'ó chrej na'aj nó rihaan 'unj ma'.

<sup>15</sup> Ne nuu rá síí cu'naj Titó se vaa uxrá ve'é cuno soj nana cataj xna'anj so' rihaan soj, ne uxrá caráj cochroj soj rihaan so' asij cuchí' so' rihaan soj, ne cuchu'vi' soj caxrii yuvaá so' man soj a. Che'é dan uxrá doj 'ee rá so' man soj chuguanj. <sup>16</sup> Guun niha' rá 'unj, che'é se ca'vee gaa nucuaj yá yá 'unj man soj adonj.

**Nana nihánj taj xna'anj daj qui'yaj nij síí man Corinto, ne quirii nij so' sa'anj rihaan nij síí man Jerusalén a**

**8** Ne cataj xna'anj núj rihaan soj che'é se luj qui'yaj Diose che'é nij síí sa' nocó' man Diose man estadó Macedonia, tinuj, nocoj. <sup>2</sup> Dan me se quiran' uxrá nij so' sayuun, tzaj ne guun niha' uxrá rá nij so', ne nda' se síí nique ndo'o me nij so', tzaj ne guun niha' rá nij so' quirii nij so' sa'anj rihaan tinúú nij so' síí nique a. Nda' rá se 'yaj síí ru'vee 'yaj nij so' nanj adonj.

<sup>3</sup> Dan me se cavii raá ma'an nij so' rque nij so' nu' se vaa guun nucuaj nij so' rque nij so' ei. Nuveé sij quirii sa'anj me nij so' vaa, tzaj ne quirii nij so' nocóo sa'anj adonj. <sup>4</sup> Ne cachíin ni'yaj uxrá nij so' rihaan núj se vaa qui'yaj núj se ndo'o ca'vej núj qui'yaj nij so' ndaa vaa qui'yaj yo'ó tinúú ní' síí quirii sa'anj rihaan yo'ó nij síí sa' nocó' man Diose, <sup>5</sup> ne doj a qui'yaj nij so' rihaan se vaa me rá núj qui'yaj nij so' nanj chuguanj. Dan me se asino yaan guun rá nij so' qui'yaj nij so' nu' se vaa me rá síí 'nij ra'a man ní' qui'yaj nij so', gaa ne guun rá uún nij so' qui'yaj nij so' nu' se vaa me rá núj qui'yaj nij so', ne dan me se sa' uxrá cuno nij so' rihaan Diose nanj adonj.

<sup>6</sup> Che'é dan cataj xna'anj núj rihaan síí cu'naj Titó se vaa cuchí' so' rihaan soj sij ne chuman' Corinto, ne cataj so' se vaa ase vaa qui'yaj nij síí man estadó Macedonia ro', danj gaa ca'vee qui'yaj ma'an nij soj uún, gaa ne quisij quirii taran' soj sa'anj rihaan nij síí nique yo' ei. <sup>7</sup> Dan me se 'yaj suun ndo'o nij soj nu' suun sa' adonj. Tzaj ne soj me se veé danj síí nucuaj ndo'o rá man Jesucristó me soj do', síí a'mii sa' me soj do', síí avii raá me soj do', síí niha' rá qui'yaj suun me soj do', síí 'ee rá man núj me soj do' ei. Che'é dan guun soj síí rii ndo'o sa'anj rihaan tinúú á.

<sup>8</sup> Se ca'né' 'unj suun rihaan soj daj qui'yaj soj ma'. Maan se me rá 'unj xcáj 'unj cuentá sese ya ya 'ee rá soj tinúú soj ndaa vaa 'ee rá nij síí man Macedonia tinúú nij so' a. <sup>9</sup> 'O se aj ne'en soj se vaa qui'yaj ndo'o Jesucristó sij 'nij ra'a man ní' se luj che'é ní' á. Dan me se ru'vee ndo'o so' gaa cayaán so' rej xta', tzaj ne naqui'yaj nique so' man so' ne ca'na' so' rihaan chumii nihánj che'é ní', gaa ne che'é se danj qui'yaj so' ro', che'é dan cavii sa' doj ní' nanj adonj.

<sup>10</sup> Maan se cataj xna'anj 'unj se vaa me raj qui'yaj soj á. Ne'en soj se vaa yo' cachén qui'yaj suun ndo'o soj, ne guun che'e soj racuíj soj man nij síí nique, ne che'é dan cavii sa' soj doj, sese <sup>11</sup> tinavij soj suun guun che'e soj ei. Dan me se ase vaa ya ya guun niha' rá soj racuíj soj asij tacóo gaa guun che'e soj ro', veé danj guun rá soj tinavij soj nu' suun yo', ne racuíj soj sa'anj guun

nucuaj soj man nij síí nique ei. <sup>12</sup> Sese ya ya rii nimán soj rque soj sa'anj yo', ne guun niha' rá Diose nacaj Diose sa'anj guun nucuaj soj rque soj a. Se cataj Diose rque soj doj sa'anj, sese se guun nucuaj soj qui'yaj soj danj ma'. <sup>13</sup> Nuveé che'e se me rá núj cunuu nique soj ne cunuu ru'vee yo'ó yuvii me a'mii núj danj ma'. 'O se me rá núj cuyaán gaa nu' nij tinuj ní' adonj. <sup>14</sup> Maan se cuano nihánj ro', vaa ndo'o sa'anj rihaan soj, ne nique ndo'o yo'ó tinúú ní', ne che'é dan no xcuún soj racuíj soj man nij so' ei. Ne xraj, ne cachíin sa'anj rihaan soj, ne sese vaa sa'anj rihaan yo'ó tinúú ní', ne racuíj nij so' man soj, gaa ne cuyaán gaa nij tinuj ní' a. <sup>15</sup> Ne ase vaa nana nihánj ro', danj vaa nana no rihaan danj Diose che'é nij yuvii israelitá, taj yo': "Ne quinaj se chá rihaan síí vaa ndo'o se chá rihaan ma'. Tananj uún, ne ne cachíin se chá rihaan síí vaa doj se chá rihaan ma'", taj nana yo' a.

<sup>16</sup> Nago' uxrá núj gracia rihaan Diose, che'é se ase vaa me ndo'o rá núj racuíj núj man soj ro', danj vaa guun ndo'o rá síí cu'naj Titó racuíj so' man soj, qui'yaj Diose chuguanj. <sup>17</sup> Dan me se cuno so' nana cataj xna'anj núj rihaan so' se vaa ca'anj so' chiháán soj, tzaj ne guun niha' rá ma'an so' racuíj so' man soj, ne che'é dan quirii nimán so' ca'anj so', ne dan me se ca'anj so' chiháán soj a.

<sup>18</sup> Ne cuchí' yo'ó tinúú ní' ga síí cu'naj Titó, ne yo'ó so' ro', me síí a'mii natáj ndo'o se-nana Diose nana sa', ne che'é dan ve'é a'mii taran' nij síí amán rá ni'yaj man Jesucristó ni'yaj nij so' man so' ei. <sup>19</sup> Ne ca'ne' taran' nij síí amán rá ni'yaj man Jesucristó suun rihaan so' ca'anj so' ga núj racuíj so' man núj tacuachén núj sa'anj yo' rihaan nij síí nique yo', gaa ne uxrá ve'é ca'mii yuvii che'é síí 'nij ra'a man ní', ne guun niha' doj rá ma'an núj qui'yaj suun núj suun yo' chuguanj. <sup>20</sup> Tzaj ne na'vej rá núj cataj yuvii se vaa caxrii yuve núj ta'aj sa'anj ma'. <sup>21</sup> 'O se nuchruj raá núj daj qui'yaj núj ne guun niha' rá síí 'nij ra'a man ní' ni'yaj so' man núj, ne guun niha' rá yuvii uún ni'yaj nij yuvii man núj adonj.

<sup>22</sup> Ne ca'nej uún núj man yo'ó tinúú ní' ga roj so' á. Guun que'ee uxrá quene'en núj se vaa sij ya ya me rá qui'yaj suun me so', ne yaj ro', guun ya rá so' se vaa ya ya racuíj soj man nij síí nique, ne che'é dan niha' doj rá so' qui'yaj suun so' che'é soj nanj adonj. <sup>23</sup> Dan me se xa' tinúú Titó, tzaj ne síí 'yaj suun ga 'unj me so', 'yaj suun so' che'é ma'an soj, ne yavij roj tinúú ní' ro', síí cune' nij síí amán rá ni'yaj man Jesucristó cütumé sa'anj yo' me roj so', ne ve'é ca'mii yuvii che'é Jesucristó, qui'yaj roj so' nanj adonj. <sup>24</sup> Che'é dan gaa 'ee rá soj man nij so', ne ve'é ndo'o qui'yaj soj ga nij so', gaa ne quisij ya 'unj nana ve'é ca'mii núj che'é soj rihaan nij so', ne quene'en taran' nij síí amán rá ni'yaj man Jesucristó daj qui'yaj soj ei.

**9** Taj che'é cataj xna'anj 'unj rihaan soj che'é sa'anj quirii soj rihaan nij síí sa' nocó' man Diose ma'. <sup>2</sup> 'O se aj ne'én 'unj se vaa guun niha' rá soj quirii soj sa'anj rihaan nij so', ne ve'é ca'mii 'unj rihaan nij tinúú ní' síí man estadó Macedonia che'é soj, cataj 'unj: "Yo' cachén ro', guun che'e nij síí man estadó Acaya quirii

nij so' sa'anj rihaan nij síi sa' noco' man Dioso adonj", taj 'unj che'é soj, gaa ne guun niha' doj rá que'ee nij so' quirii ma'an nij so' sa'anj a.

<sup>3</sup> Tzaj ne ca'nej 'unj nij tinúu ní' cuchí' nij so' rihaan soj, ne racuíj nij so' man soj qui'yaj soj nu' se vaa cataj xna'anj 'unj che'é soj rihaan nij síi man estadó Macedonia a. Me rá 'unj racuíj nij so' man soj naqui'yaj chre' soj sa'anj yo', gaa ne quisij ya nu' nana ca'mii núj che'é soj, raj a. <sup>4</sup> 'O se sese cuchí' ta'aj nij síi man estadó Macedonia chiháan soj ga núj, ne sese xcáj nij so' cuentá se vaa taj vaj sa'anj nuu chre' qui'yaj soj, ne guun na'aj uxrá núj ei. Ne guun na'aj doj ma'an soj che'é nana ca'mii núj se vaa guun ya rá núj se vaa quirii soj sa'anj adonj.

<sup>5</sup> Che'é dan guun rá núj se vaa ca'nej núj man nij tinúu ní' cuchí' nij so' rihaan soj chuguanj. Dan me se asino yaan cuchí' nij tinúu ní' rihaan soj, ne racuíj nij so' man soj naqui'yaj chre' soj sa'anj yo', ne asa' cuchí' núj, gaa ne aj cunuu chre' sa'anj yo' a. 'O se danj qui'yaj soj, gaa ne se gaa nanj guun rá nij síi man Macedonia se vaa na'vej rá soj qui'yaj soj se vaa cataj soj a. 'O se quene'en nij so' se vaa ya me rá soj qui'yaj suun soj nu' suun yo' ei.

<sup>6</sup> Dan me se ne'en soj se vaa síi unô doj tzin' 'núu ro', doj tan' quirii so', ne síi unô nocoo uxrá 'núu ro', nocoo uxrá tan' quirii so', ne ase vaa ran' síi unô 'núu ro', danj quiran' soj che'é sa'anj rque soj vaa adonj. <sup>7</sup> Xcáj yo' o yo' o soj cuentá me daj sa'anj rque yo' o soj, ne se quinanó rá soj che'é sa'anj rque soj mei. Se cataj soj se vaa maan che'é se no xcúun soj rque soj sa'anj, che'é dan rque soj ma'. 'O se síi niha' rá quirii sa'anj rihaan tinúu ro', 'ee rá Dioso man so' adonj. Che'é dan inanj sa'anj rii nimán soj ro', go' soj á. <sup>8</sup> Ne guun nucuaj Dioso rque ndo'o Dioso nu' se sa' man soj, ne ca'vee se me ma'an sayuun quiran' soj, tzaj ne niganj nicaj soj nu' se cachijn man soj, ne guun nucuaj soj qui'yaj soj nu' suun sa' ca'ne' Dioso rihaan soj chuguanj. <sup>9</sup> Ase vaa nana nihánj vaa nana no rihaan danj Dioso, taj yo': "Síi niha' rá racuíj man nij síi nique ro', daj chihaa mij se quini'yón Dioso se sa' qui'yaj so' a ma'", taj danj Dioso a. <sup>10</sup> Dan me se Dioso me síi rque 'núu rihaan síi unô naa, ne Dioso me síi rque se chá rihaan síi na'aan rque, ne cavii sa' uxrá nij tinúu ní' che'é se sa' qui'yaj soj, qui'yaj uún Dioso ei. <sup>11</sup> Ne me a' se sa' nicaj soj, gaa ne guun niha' doj rá soj racuíj soj man tinúu ní', ne nago' tinúu ní' graciá rihaan Dioso che'é se vaa rque soj sa'anj man núj tacuachén núj rihaan nij so' ei.

<sup>12</sup> Ne xa' suun qui'yaj suun ní' che'é tinúu ní', tzaj ne nuveé inanj suun qui'yaj suun ní' yan caraa rque nij síi sa' noco' man Dioso me yo' ma'. 'O se suun qui'yaj suun ní' yan nago' ndo'o yuvii graciá rihaan Dioso me suun yo' adonj. <sup>13</sup> Ne quene'en nij yuvii se vaa ya uno soj se-nana Jesucristó nana sa' noco' ní', ne quene'en nij yuvii se vaa niha' rá soj rque soj si'yaj soj man nij síi sa' yanj chuman' Jerusalén do', man taran' nij tinúu ní' do', ne che'é dan guun ya rá nij so' se vaa ya ya sij nocoo' man Dioso me soj, ne ve'é uxrá ca'mii nij so' che'é Dioso a. <sup>14</sup> Ne cunuu 'ee rá ma'an nij tinúu ní' man

chuman' Jerusalén man soj, ne cachinj ni'yaj nij so' rihaan Dioso che'é soj, che'é yan uxrá racuíj Dioso man soj qui'yaj suun soj che'é nij so' nanj ei. <sup>15</sup> Nago' uxrá ní' graciá rihaan Dioso che'é se ve'é uxrá qui'yaj Dioso che'é ní', ne daj chihaa mij se guun nucuaj ní' cataj ní' nu' se vaa qui'yaj Dioso che'é ní' a ma'.

**Nana nihánj taj xna'anj se vaa no xcúun nij síi man Corinto cunoo nij so' rihaan Pabló, ne se cuno nij so' rihaan nij síi tiha' yu'unj a**

**10** Xa' 'unj sij cu'naj Pabló, tzaj ne me rá 'unj gaa 'unj ndaa rá se vaa ma'an Jesucristó adonj. Dan me se na'vej rá 'unj caxrii yuvaa 'unj man soj ma'. Maan se ve'é inanj ca'mij ga soj, raj a. Ne'en soj se vaa vaa yuvii 'nij sca'núj soj taj se vaa ve'é uxrá a'mii 'unj rihaan soj gaa nicún' 'unj rihaan soj, tzaj ne axrij yuvaa 'unj man soj gaa nicun' yanij 'unj a. Danj tu'va nij yuvii yo', tzaj ne cuano nihánj me cataj xna'anj 'unj rihaan soj <sup>2</sup> se vaa qui'yaj soj se ndo'o, ne se qui'yaj tuchi' soj cumán soj, ne asa' cuchí' 'unj, gaa ne se caxrij yuvaa 'unj man soj man ruguanj. Ya quisij rá 'unj caxrii yuvaa 'unj man nij síi taj se vaa inanj 'yaj núj se vaa me rá nee man núj qui'yaj núj nanj á. Tzaj ne taj che'é caxrii yuvaa 'unj man ma'an soj, sese ve'é qui'yaj soj ma'.

<sup>3</sup> Dan me se vaa i'na' nee man núj cuano, tzaj ne ne unu' ma'an nee man núj ga síi chree ma'. <sup>4</sup> Xa' se nucuaj núj, tzaj ne nuveé se nucuaj man rihaan chumii nihánj me yo' ma'. 'O se se nucuaj rque ma'an ya Dioso man núj me yo' adonj. Che'é dan guun nucuaj núj qui'yaj canaán núj rihaan cunudanj nij síi me rá cunú' ga Dioso, ne dan me se tirí' núj nana tiha' yu'unj nana avii raá yuvii, <sup>5</sup> ne tirí' núj nu' nana aráan chrej rihaan yuvii cunoo nij yuvii se-nana Dioso, gaa ne guun rá nij yuvii cunoo nij yuvii rihaan Jesucristó, qui'yaj núj a. <sup>6</sup> Ne asa' cuno ma'an soj rihaan Dioso, ne guun nucuaj núj qui'yaj núj sayuun man cunudanj nij tuvi' soj síi na'vej rá cunoo rihaan Dioso ei.

<sup>7</sup> Dan me se ni'yaj sa' soj man núj, ne xcáj soj cuentá daj vaa núj, ne sese vaa yo' o tuvi' soj me rá se vaa ya ya noco' so' man Jesucristó, ne xcáj so' cuentá se vaa ase vaa noco' so' man Jesucristó ro', ta'nga' danj vaa nocoo' ma'an núj uún man Jesucristó nanj adonj. <sup>8</sup> Dan me se ne'en soj se vaa ca'ne' síi 'nij ra'a man ní' suun rihanj, ne veé dan me se na'vej rá so' tirí' 'unj man soj ma'. 'O se me rá so' cavii sa' soj doj qui'yaj nanj adonj. Ne ca'vee se ve'é ca'mij che'é suun atá 'unj, tzaj ne se guun na'aj 'unj daj chihaa mij ma'. 'O se ma'an ya síi 'nij ra'a man ní' ca'ne' suun rihanj se vaa ya no xcúnj ca'nej suun rihaan soj se vaa naqui'yaj sa' soj doj nimán soj adonj.

<sup>9</sup> Dan me se na'vej uxrá rá 'unj guun rá soj se vaa maan che'é se me rá 'unj tuchu'ví' 'unj man soj me a'née 'unj nij yanj cartá rihaan soj a mei. <sup>10</sup> 'O se ne'en soj se vaa cataj ta'aj nij síi 'nij sca'núj soj se vaa nda' se nana nucuaj achrón 'unj rihaan yanj cartá, tzaj ne gaa nicún' 'unj rihaan soj, ne ne guun nucuáá 'unj ca'mii sca' 'unj rihaan soj, taj nij so' a. Maan se taj yu'vee nó nana a'mii 'unj rihaan soj gaa nicún' 'unj rihaan soj, taj



nij so' a. <sup>11</sup> Tzaj ne xcaj nij sí a'mii danj cuentá se vaa ase vaa naná achrón núj rihaan yanj cartá gaa nuvi' núj yáán gá soj ro', ta'nga' danj gaa suun qui'yaj suun núj asá' cuchí' núj rihaan soj adonj.

<sup>12</sup> Dan me se xa' nij sí a'mii danj, tzaj ne taj nij so' se vaa sa' uxrá vaa ma'an nij so', ne che'é dan se quisíj rá núj cataj núj se vaa 'yaj nij so' ndaa vaa 'yaj ma'an núj a. 'Q se ne'en núj se vaa nuveé sij acaj cuentá me nij so' ma'. 'Q se ma'an nij so' taj se vaa cunudanj yuvií 'yaj tucuaán noco' nij so' ro', me sí sa', ne taj uún nij so' se vaa ma'an nij so' me sí sa' doj rihaan yo'ó nij yuvií noco' tucuaán noco' ma'an nij so', ne inanj danj tu'va nij so', <sup>13</sup> tzaj ne daj chihaa míj se ca'mii xtá' núj ndaa vaa tu'va nij so' danj ma'. Maan se inanj che'é suun ca'ne' ma'an Diose rihaan ma'an núj me ca'mii núj a. Ne Diose me sí ca'ne' suun rihaan núj nata' núj se-nana Diose ndaa rihaan ma'an soj nanj adonj.

<sup>14</sup> Dan me se ne 'anj núj qui'yaj suun núj rej na'vej rá Diose ca'anj núj ma'. 'Q se me rá Diose cuchí' núj rihaan soj cataj xna'anj núj se-nana Jesucristó nana sa' rihaan soj, ne danj qui'yaj núj, ne asino núj me sí cataj xna'anj se-nana Jesucristó rihaan soj nanj adonj. <sup>15</sup> Dan me se se ca'mii xtá' núj che'é se vaa qui'yaj yo'ó yuvií ma'. Se cataj núj se vaa ma'an núj me sí qui'yaj se vaa qui'yaj suun yo'ó yuvií ma'. Ne nó xcúún núj qui'yaj núj danj ma'. Maan se na'vij ndo'o núj se vaa cuchuman doj rá soj ni'yaj soj man Diose, gaa ne uxrá doj qui'yaj suun núj sca'núj soj, ndaa vaa me rá Diose qui'yaj núj, <sup>16</sup> gaa ne ndaa guun nucuaj núj cataj xna'anj núj se-nana Diose nana sa' rihaan nij yuvií man yo'ó chuman' gan' doj uún a. Tzaj ne taj che'é cataj núj se vaa ma'an núj me sí qui'yaj se vaa qui'yaj suun yo'ó so' a ma'.

<sup>17</sup> 'Q se sí me rá ca'mii sa' che'é ma'an ro', no xcúún so' cataj so' se vaa sa' qui'yaj so' canoco' so' man sí 'nij ra'a man ní' ei. <sup>18</sup> 'Q se sese cataj yo'ó so' se vaa ma'an so' qui'yaj sa', ne taj se 'yaj ma'. Tzaj ne sese cataj sí 'nij ra'a man ní' se vaa sa' qui'yaj so', ne ya ya sa' qui'yaj so' chuguanj.

**11** Me rá 'unj ca'vej rá soj ca'mii snuj 'unj doj rihaan soj ei. 'Q se danj vaa ma'an, tzaj ne 'o se caraa x'naa soj doj chuguanj. Dan me se yo'ó danj qui'yaj soj nanj á. <sup>2</sup> Dan me se ase vaa me ndo'o rá Diose cütumé Diose man soj ro', danj vaa me rá 'unj cütumé 'unj man soj ei. 'Q se ase vaa yo'ó chana yaan taj cacun' tumé ro', danj vaa cunudanj nij soj rihaan 'unj, ne cataj 'unj rihaan Jesucristó se vaa ya nacaj so' man soj canoco' soj man orún' so', taj 'unj rihaan so' ei. <sup>3</sup> Tzaj ne chu'ví' 'unj se vaa ase vaa tiha' yu'unj xcuáá man chana cu'naj Eva gaa naá ro', danj gaa tiha' yu'unj sí chree man soj, ne se guun nucuaj soj xcaj sa' soj cuentá, gaa ne tanáj xcó soj man nana sa' nari' soj gaa canoco' soj man Jesucristó, raj nanj adonj. <sup>4</sup> 'Q se ca'vee se ca'na' me ma'an yo'ó so' rihaan soj, ne ca'vee se nata' so' yo'ó nana rihaan soj che'é Jesucristó, ne ca'vee se ino doj gaa se-nana so' ga se-nana núj, tzaj ne nuveé sij rihuun rá me soj a ma'. Ase ra'yanj tanáj xcó soj Nimán Diose canoco' soj yo'ó nana xee. <sup>5</sup> Taj che'é tiha' yu'unj nij sí ca'na' man soj

ma'. 'Q se sij sa' ndo'o me nij so', rá soj, ne apóstol cune' Jesucristó man me nij so', rá soj, tzaj ne nuveé sij sa' doj me nij so' rihaan 'unj, rá 'unj a ma'. <sup>6</sup> Nda' se ataa nari' sa' 'unj ca'mii natáj 'unj rihaan soj, tzaj ne aj ne'en soj se vaa sij avii raá mej, ne nu' se vaa qui'yaj núj ve'é qui'yaj núj, quene'en cunudanj soj nanj adonj.

<sup>7</sup> Ne'en soj se vaa ne ca'nee 'unj sa'anj man soj gaa ca'mii natáj 'unj se-nana Diose nana sa' rihaan soj ma'. Ne dan me se nuu níqué 'unj doj, tzaj ne cavii sa' soj doj adonj. Che'é dan nij qui'yáá 'unj, rá soj na'. Cacun' me se vaa qui'yáj, rá soj na'. <sup>8</sup> Ne nicaj 'unj sa'anj rqué nij sí amán rá ni'yaj man Jesucristó sí man yo'ó chuman', ne cutún' 'unj sa'anj yo' yan guun nucuáá 'unj qui'yaj suun 'unj che'é soj nanj adonj. <sup>9</sup> Ne gaa cayáán 'unj ga soj, ne gaa cachiin rasuun mán 'unj, ne ó rasuun ne cachinj 'unj man soj a ma'. Maan se nij tinúú ní' nij sí ca'na' estadó Macedonia ro', rqué nij so' nu' se vaa cachiin manj, ne dan me se ne caraa chrúú 'unj a doj rihaan soj a ma'. Dan me se veé danj qui'yáj rej rihaan, ne se caráj chrúj rihaan soj, raj man adonj.

<sup>10</sup> Che'é se yanj Jesucristó ga 'unj, che'é dan ne'en soj se vaa ya vaa nana a'mii 'unj rihaan soj, ne cataj xna'anj 'unj rihaan soj cuano se vaa se guun daj chihaa míj cataj yuvií man estadó man soj se vaa quita'aj se-sa'anj soj ma'. <sup>11</sup> Me che'é tu'vaj danj, rá soj ga. Danj tu'vaj che'é se ne 'ee raj man soj, rá soj na'. Taj ma'. 'Q se Diose me sí ne'en se vaa ya ya 'ee rá 'unj man soj ei.

<sup>12</sup> Tzaj ne ne'en soj se vaa me rá yo'ó nij so' cataj nij so' se vaa 'o cuyaan vaa se 'yaj núj ga se 'yaj nij so', ne che'é dan ase vaa 'yáá 'unj cuano ro', ta'nga' danj qui'yáá 'unj xraj, ne se ca'néj 'unj sa'anj man soj ma'. Ne se ca'vee cataj nij so' se vaa 'o cuyaan 'yaj nij so' ga núj a ma'. <sup>13</sup> Dan me se taj nij so' se vaa me nij so' apóstol cune' Jesucristó man nata' se-nana so', tzaj ne a'mii ne nij so', ne dan me se 'yaj suun nij so' rihaan soj, tzaj ne tiha' yu'unj nij so' man soj nanj adonj. Ne ase vaa apóstol cune' Jesucristó man ro', danj vaa nij so' rihaan soj a. <sup>14</sup> Tzaj ne taj se 'yaj sese cuchumán rá soj ni'yaj soj man nij so' ma'. 'Q se ma'an sí chree cu'naj Satanás naqui'yaj ino man, ne naqui'yaj sí chree yo' man yo' yo' se-mozó Diose chuguun ndo'o, ne tiha' yu'unj so' man soj nanj adonj. <sup>15</sup> Ne ase vaa 'yaj sí chree ro', danj 'yaj uún nij so' a. Che'é dan, nuveé se ya'anj tiha' me yo', sese ne'en nij sí 'yaj suun che'é sí cu'naj Satanás qui'yaj nij so' danj a ma'. Ca'vee natuna nij so' man ma'an nij so' guun nij so' sí 'yaj suun che'é rej cunyu sa' nimán yuvií ei. Tzaj ne che'é se 'yaj ndo'o nij so' sayuun ro', che'é dan uxrá quirán' nij so' sayuun nu' cavii nu' ca'anj adonj.

<sup>16</sup> Dan me se cataj xna'anj uún 'unj rihaan soj se vaa se guun cataj soj se vaa sij snúú mé 'unj ma'. Ca'vee se sij snúú ya ya mé 'unj rá soj, tzaj ne ve'é nacaj soj manj, ne ve'é cunó soj nana ca'mij, ne ca'mii xtá' 'unj doj che'é ma'anj ndaa ase vaa 'yaj yo'ó nij so' ei.

<sup>17</sup> (Nuveé nana rqué sí 'nij ra'a man ní' rihaan 'unj me nana nihánj nana ca'mii 'unj rihaan soj cuano ma'. Tananj che'é se snúú rmá'anj, don ca'mii 'unj nana ni-

hánj rihaan soj nanj ei.)<sup>18</sup> Dan me se che'é se que'ee yuvij a'mii xtá' che'é se vaa qui'yaj ma'an nij so' ro', che'é dan ca'mii xtá' ma'an 'unj doj rihaan soj gaa ei.<sup>19</sup> 'O se ne'én 'unj se vaa síí avii ndo'o raá me soj, rá ma'an soj, ne che'é dan ne ne'en soj se vaa sij snúú me nij síí ca'na' rihaan soj, ne che'é dan nihá' rá soj ve'é cunó soj rihaan nij so' a.<sup>20</sup> Ne ndá' se rii ta'nga' ndo'o nij so' rihaan soj do', ndá' se a'néj nij so' nu' si'yaj soj do', ndá' se tiha' yu'unj nij so' man soj do', ndá' se sa' doj vaa nij so' rihaan soj rá nij so' do', ndá' se ase vaa síí oxro xruu soj vaa nij so' do', tzaj ne ve'é uno soj rihaan nij so' á.<sup>21</sup> Che'é dan guun na'aj núj doj tzin' rihaan soj, che'é se ne guun nucuaj núj qui'yaj núj se nij yo' rihaan soj a mei. 'O se che'é se ne quisij rá núj qui'yaj quij núj ro', che'é dan sa' doj vaa yo'ó nij so', rá soj asanj.

Ne ndá' se nana snuj me nana nihánj, tzaj ne ase vaa quisij rá nij so' ca'mii xtá' nij so' ro', danj gaa quisij rá ma'anj ca'mii xtá' ma'anj rihaan soj ei.<sup>22</sup> Dan me se yuvij israelitá me nij so', taj nij so' na'. 'O se veé danj sij israelitá me ma'anj uún nanj á. Noco' xna'anj tuví' nij so' ga síí cu'naj Abraham síí cane gaa naá, taj nij so' na'. 'O se veé danj sij noco' xna'anj tuví' ga so' mej uún nanj ei.<sup>23</sup> 'Yaj suun nij so' che'é Jesucristó, taj nij so' na'. 'O se veé danj qui'yaj suun gaa 'unj do', nanj á. 'O se nihánj me nana snuj cataj 'unj rihaan soj se vaa 'unj me síí 'yaj suun doj che'é Jesucristó rihaan nij so' nanj ei. Dan me se 'unj nihánj ro', me síí qui'nij doj taga' che'é Jesucristó rihaan nij so' do', uxrá go' nii cuartá xráá 'unj che'é Jesucristó do', que'ee güii daj doj se caví' 'unj che'é Jesucristó do',<sup>24</sup> quisij 'un' ya quita'aa nij síí uun chij rihaan nij yuvij israelitá manj, ne icó xnu' ca'anj ya go' nij so' cuartá xrá a.<sup>25</sup> Va'núj go' nii chruun xrá a. Ne yuun go' nii yahij manj a. Quisij va'núj quirí' rihoo vaj 'unj rihaan na ya'anj, ne ca'anj cunuu rihoo yo' rque na ya'anj, ne 'o güii 'o yan' quitáá 'unj rihaan na ya'anj cunuu ndo'o ya a.<sup>26</sup> Dan me se aj cachéé ndo'oj nu' nij chrej, ne vaa ndo'o sayuun quirán' 'unj rihaan chráá do', che'é síí ituu do', che'é nij síí israelitá ne noco' man Jesucristó do', che'é nij síí yanij do', che'é yuvij yanj chuman' do', che'é nij yuvij yanj quij do', che'é na ya'anj do', che'é síí tiha' yu'unj manj se vaa tinúj me nij so' do' á.

<sup>27</sup> Dan me se aj suun ndo'o quirán' 'unj rihaan nij sayuun, ne que'ee yan' ne ca'vee cotoj, ne ta'aj güii me se quina'aan ndo'o rquej, ne yo'ó ta'aj güii canacoó ndo'oj na, ne quisij que'ee ndo'o ne quirij chraa chaj, ne ta'aj güii me se go' ndo'o ya nuvij xrá, ne yo'ó ta'aj güii me se ne quirí' yá 'unj yatzíj caráán xráá 'unj uún, ne dan me se vaa canj yá 'unj ndá' rasuun nanj á.<sup>28</sup> Tzaj ne se ca'mii 'unj che'é yo'ó sayuun quirán' 'unj a ma'. Maan se nihánj nanó rá 'unj che'é cunudanj nij síí amán rá ni'yaj man Jesucristó man 'o 'o chuman' a.<sup>29</sup> Sese ne nucuaj nimán yo'ó tinúú ní', ne ase vaa ran' nimán so' ro', danj ran' nimanj, ne sese qui'yaj yo'ó tinúú ní' cacun', ne uun na'aj uxrá ma'anj adonj.

<sup>30</sup> Dan me se, sese me rá soj ca'mii xtá' 'unj, tzaj ne inanj cataj xna'anj yaj se vaa ne guun nucuaj ma'anj

qui'yaj suun ma'anj a ma'.<sup>31</sup> Diose Rej Jesucristó sij 'unj ra'a man ní' ro', ne'en se vaa a'mii yá 'unj, ne ve'é uxrá ca'mii ní' che'é so' nu' cavii nu' ca'anj nanj ei.<sup>32</sup> Gaa ca'anj 'unj chuman' cu'naj Damasco ro', ne síí nicaj suun 'yaj suun che'é rey cu'naj Aretas ro', caráán so' rej atúj yuvij chuman', che'é yan guun rá so' quita'aa so' manj,<sup>33</sup> tzaj ne na'núj nij tuví' 'unj yo'ó ta'yaa nii taj chraan nicun' nu' anicaj tu'va chuman' yo', ne ca'née nij so' rá 'o scaa manj, ne tinanij nij so' rej xe' manj, ne dan me se curihanj 'unj chuman' yo', ne quinanii 'unj rihaan síí nicaj suun yo' ei.

**12** Dan me se taj a doj se quirí' ní' che'é yan ca'mii sa' ní' che'é ma'an ní', tzaj ne nihánj me ca'mii 'unj che'é doj rasuun curuvi' rihanj ei. Ne cataj xna'anj 'unj che'é se vaa tihaan síí 'nij ra'a man ní' rihanj a.

<sup>2</sup> Dan me se ne'enj man 'o síí amán ndo'o rá ni'yaj man síí 'nij ra'a man ní' ei. Ne quisij xca'anj yo' nicaj Diose man so', ca'anj so' rej xtá', qui'yaj Diose, ne ndaa va'núj xtá' cavii so' ca'anj so' ei. Dan me se ma'anj me yo' ei. Tzaj ne ne ne'enj sese inanj nimanj cavii ni', ase nu' nee manj cavii ca'anj ni', ne ne'en uxraj ma'. Qrún' Diose me síí ne'en daj vaa 'unj gaa cavii 'unj ca'anj 'unj a.<sup>3</sup> Ne ne'én 'unj se vaa cavii 'unj ndaa rej sa' ndo'o yanj ma'an Diose, qui'yaj Diose, ne cunó 'unj nana sa' ndo'o nana ne nó xcúún yuvij ca'mii yuvij a. Tzaj ne ne ne'enj sese inanj nimanj cavii ca'anj ni', ase nu' nee manj cavii ca'anj ni', ne ne'en yaj a mei. Qrún' Diose me síí ne'en daj vaa 'unj gaa cavii 'unj ca'anj 'unj ei.

<sup>5</sup> Dan me se ve'é ca'mij che'é se vaa quiranj ndá' rasuun, tzaj ne se ca'mij che'é se vaa qui'yaj danj ma'. Maan se inanj cataj xna'anj 'unj se vaa nuveé 'o síí sca' mej ma'.<sup>6</sup> Dan me se ca'vee se ve'é ca'mij che'é ma'anj, tzaj ne se ca'mii snuj 'unj ma'. 'O se nana ya ca'mij á. Dan me se me rá 'unj xcaj yuvij cuentá che'é inanj daj vaa 'yáá 'unj ni'yaj nij so' do', che'é inanj nana a'mii 'unj uno nij so' do', gaa ne ca'vee xcaj sa' nij yuvij cuentá daj sij mé 'unj á. Tzaj ne taj che'é cataj xna'anj 'unj yo'ó nana rihaan nij yuvij a mei. Che'é dan se cataj xna'anj 'unj<sup>7</sup> che'é cunudanj nij nana tihaan naca Diose rihanj a mei.

Dan me se ne ca'vej rá Diose ca'mii xtá' 'unj ma'. Che'é dan ca'vej Diose qui'yaj síí chree cu'naj Satanás sayuun man nee manj, che'é rej se guun rá 'unj se vaa sij sa' ndo'o mej a.<sup>8</sup> Ne quisij va'núj ya cachín ni'yáá 'unj rihaan síí 'nij ra'a man ní' se vaa ca'nee so' sayuun yo' rihanj a.<sup>9</sup> Tzaj ne 'o se cataj so' rihanj a:

—Ma'anj racuíj mán so', ne cavii sa' so' á. Che'é dan se ca'néj 'unj sayuun yo' rihaan so' ma'. 'O se che'é se vaa ninaj nee mán so' ro', che'é dan guun nucuáá 'unj racuíj 'unj mán so' qui'yaj suun so' adonj —taj síí 'nij ra'a man ní' rihanj a.

Che'é dan guun nihá' rá 'unj cataj xna'anj 'unj se vaa ninaj 'unj, ne guun nucuaj Jesucristó racuíj so' manj qui'yaj sunj a.<sup>10</sup> Dan me se che'é se ninaj 'unj do', che'é se uun na'aj 'unj do', che'é se rán' 'unj sayuun do', che'é se 'yaj ndo'o nii sayuun manj do', che'é nu' se rán' 'unj che'é Jesucristó do', che'é dan guun nihá'

ndo'o raj chuguñj. 'Q se che'é se sí ninaj mej ro', che'é dan guun nucuaj qui'yaj sunj ñanj adonj.

<sup>11</sup> Dan me se nda' rá se tu'va 'o sí snúu tu'vaj, tzaj ne ma'an soj qui'yaj don tu'vaj ñanj ca'mii snuj 'unj doj ei. 'Q se ma'an soj me sí nō xcúun cataj se vaa sa' 'yá ei. Nda' se taj yu'vee nó 'unj, tzaj ne nuveé sij sa' doj me yo'ó nij so' rihanj ma'. Dan me se sij sa' uxrá me nij so', ne ma'an nij apóstol cune' ya ma'an Jesucristó me nij so', rá soj, tzaj ne nuveé sij sa' doj me nij so' rihanj ma'. <sup>12</sup> 'Q se 'unj me se suun sa' nocōo ya qui'yá ni'yaj soj, ne suun sa' nocōo 'yaj nij apóstol cune' Jesucristó man me suun sa' qui'yá ni'yaj soj, ne dan me se naqui'yaj ñaj ndo'o 'unj nimanj, ne ne ca'ne' raj ga suun 'yaj suun sa' nocōo yo' ma'. <sup>13</sup> 'Q se caraā x'naa soj doj rihanj sese nij ca'mij rá soj ei. Xa' 'unj, tzaj ne a doj ne naqui'yaj yaníj 'unj man soj ma'. 'Q se orún' rasuun me naqui'yaj yaníj 'unj adonj. Ne ca'vej ya raj naqui'yaj chrúj rihanj soj ma'. Tzaj ne sese nij qui'yá ne cachinj 'unj sa'anj rihanj soj, rá soj, ne caraā x'naa soj ei.

<sup>14</sup> Dan me se aj qui'yaj chuvii uún 'unj cuchí' 'unj rihanj soj, ga ne quisij va'nuj cuchí' 'unj rihanj soj, ne asa' cuchí' 'unj rej man soj, ne se ca'néj 'unj rasuun man soj ma'. Mañ se me raj cunō sa' ma'an soj rihanj ei. Dan me se ase vaa ta'níj vaa soj rihanj, ne ne nó xcúun xnii caraā sa' xnii rasuun che'é rej xnii ma'. 'Q se mañ rej xnii nō xcúun caraā sa' rasuun che'é ta'níj so' adonj. <sup>15</sup> Guun niha' rá 'unj cutun' 'unj sa'anj che'é nimán soj, ne ndaa nimán yá 'unj me raj qui'yaj sunj che'é nimán soj chuguñj. Dan me se che'é se 'ee raj man soj, ne doj a rá soj chiha'. Me che'é 'yaj soj ñanj ga. <sup>16</sup> Dan me se ne ca'ne' 'unj rasuun man soj ma'. Tzaj ne vaa yuvii cataj se vaa tiha' yu'unj uxrá 'unj man soj, <sup>17</sup> ne cataj nij yuvii se vaa ca'néé 'unj yo'ó so' cuchí' so' rihanj soj, ne racuí yo'ó so' manj tiha' yu'unj nuj man soj, ne ca'néj nuj rasuun rihanj soj, cataj nij yuvii adonj. <sup>18</sup> Dan me se ya cataj xna'anj 'unj rihanj sí cu'ñaj Titó se vaa cuchí' so' rihanj soj, ne ca'néé 'unj yo'ó tinúu ní' ca'anj ga so' á. Tiha' yu'unj sí cu'ñaj Titó man soj na'. Taj ma'. 'Q se veé orún' Nimán Diosē noco' nuj ga sí cu'ñaj Titó, ne cuyañ qui'yaj sí cu'ñaj Titó ga 'unj ñanj adonj.

**Nana nihánj taj xna'anj se vaa me rá Pabló ñanj nij sí man Corinto chrej chí'ii, ne se canō xcúun Pabló qui'yaj so' sayuun man nij sí tumé cacun' a**

<sup>19</sup> Dan me se che'é se chu'vi' ndo'o nuj se vaa cuta' soj cacun' xraá nuj me se ca'mii ndo'o nuj nu' nana nihánj, rá soj na'. Taj ma'. 'Q se ne'en Diosē ñanj a'mii nuj, ne che'é se sij noco' man Jesucristó me nuj, ne ca'mii nuj nu' nana nihánj che'é se 'ee rá nuj man soj, ne me rá nuj narí' sa' soj canoco' soj man Diosē, tinuj, nocoj. <sup>20</sup> 'Q se chu'vi' 'unj doj tzin' se vaa cuchí' 'unj chiháan soj ne quene'enj se vaa ne 'yaj soj ndaa vaa nō xcúun soj qui'yaj soj, ne cataj soj se vaa ne 'yáá 'unj ndaa vaa me rá soj qui'yáá 'unj a. Chu'vi' 'unj se vaa quene'én 'unj se vaa guun yuvaā soj rihanj tinúu soj do', se vaa guun xcoj ruvaā rá soj ni'yaj soj tinúu soj do', se vaa caxrii yuvaā soj man tinúu soj do', se vaa cuxra' ta'aj

soj man ma'an soj ne guun rá soj cunuj soj do', se vaa nana soj cuentó ne che'é tinúu soj do', se vaa ca'mii xta' soj do', se vaa gaā sayuun sca'núj soj do' chuguñj. <sup>21</sup> Dan me se chu'vi' uún 'unj se vaa asa' cuchí' 'unj rihanj soj, ne guun na'aj ndo'o 'unj qui'yaj Diosē che'é soj, ne quinano ndo'o rá 'unj che'é que'ee nij tinúu ní' nij sí tumé cacun', che'é se na'vej rá nij so' ñanj nij so' cacun' ne cunuj sa' nimán nij so' a. 'Q se yo'ó cutumé nij so' cacun' se vaa nij ndo'o 'yaj nij so' do', se vaa 'yaj nij so' cacun' ga yo'ó chana do', ñanj ei.

**13** Dan me se cuchí' uún 'unj, ne quisij va'nuj cuchí' 'unj rihanj soj, ne sese vaa yo'ó tinúu soj sí tumé cacun', ne sese canicun' vij sí quene'en do', sese canicun' va'nuj sí quene'en do', ne quirí' so' sayuun ñanj á. <sup>2</sup> Gaā quisij vij cuchí' 'unj rihanj soj, ne cataj xna'anj 'unj rihanj soj se vaa sese cuchí' uún 'unj rihanj soj, ne se caráj x'ñaj quene'enj man sí qui'yaj cacun' ma'. Ne cuano nihánj me se nuví' 'unj ne rej man soj, tzaj ne cataj xna'anj uún 'unj rihanj soj se vaa ya ya qui'yáá 'unj sayuun man cunudanj nij sí tumé cacun' yo' ei. <sup>3</sup> 'Q se ca'vee don ma'an soj me rá quene'en sese ya ya Jesucristó me sí rque nana a'mii 'unj rihanj soj ei. Xa' Jesucristó, tzaj ne nuveé sij ninaj me so' rihanj soj ma'. 'Q se sij guun nucuaj ndo'o tumé man soj me Jesucristó ei. <sup>4</sup> Dan me se ca'vej rá Jesucristó guun nucuaj doj yuvii rihanj so', ne cachrón nii man so' rihanj cutze, tzaj ne guun nucuaj so' cunuu i'na' uún so', qui'yaj Diosē, ne che'é se noco' nuj man Jesucristó ro', che'é dan ase vaa sí ninaj vaa ma'an nuj rihanj chumii nihánj, tzaj ne Diosē ro', me sí rque se nucuaj man nuj, ga ne guun nucuaj nuj ga Jesucristó qui'yaj suun nuj ga nij soj ñanj adonj.

<sup>5</sup> Xcaj ma'an soj cuentá sese ya ya noco' soj se-tucunj Jesucristó ei. Ne'en soj se vaa yanj Jesucristó ga soj na'. Ase ne ne'en soj xa'. Ya ne Jesucristó ga soj, sese nuveé sij tiha' yu'unj me soj chuguñj. <sup>6</sup> 'Q se amán ya raj, ne me raj quene'en soj se vaa nuveé sij tiha' yu'unj me nuj man chuguñj. <sup>7</sup> 'Q se achíin ni'yaj nuj rihanj Diosē se vaa a 'o se chí'ii se qui'yaj soj mei. Nuveé che'e se me rá nuj cataj yuvii se vaa sa' qui'yaj nuj me achíin ni'yaj nuj ñanj ma'. 'Q se che'é se me rá nuj qui'yaj sa' inanj soj, che'é dan achíin ni'yaj nuj ñanj rihanj Diosē ei. Ca'vee se cataj yuvii se vaa sí tiha' yu'unj me ma'an nuj, tzaj ne yo'ó qui'yaj sa' soj ei. <sup>8</sup> 'Q se se guun nucuaj nuj tiha' yu'unj nuj man Diosē ñanj vaa nimán 'o 'o ní' ma'. Mañ se inanj a tananj rquee nuj ca'mii nuj nana ya che'é 'o 'o ní' a. <sup>9</sup> Ne ca'vee se nuveé sij nucuaj me nuj, tzaj ne uun niha' rá nuj che'é se sij nucuaj me soj, ne achíin ni'yaj nuj rihanj Diosē se vaa rque Diosē nu' se vaa achiin man soj, ga ne qui'yaj suun soj che'é so' a. <sup>10</sup> Che'é dan cuano nihánj me se cachrón 'unj nana nihánj rihanj yanj cartá nayaā soj a. Dan me se nda' se nuví' 'unj yáan ga soj cuano, tzaj ne cachrón 'unj nana nihánj, ga ne güii cuchí' 'unj rihanj soj me se se gaa suun rihanj qui'yaj ndo'oj sayuun man soj a. Dan me se ca'ne' sí 'nij ra'a man ní' suun rihanj cutumej man soj, ne dan me se

na'vej rá so' quirij' soj qui'yáj ma'. 'O se me rá so' račuáj  
'ujj man soj yan canoco' sa' soj man so' adonj.

**Nana nihánj taj xna'anj se vaa a'néé nij tuvi' Pablo  
saludó rihaan nij síj man Corinto a**

<sup>11</sup> Ne vaa doj nana me raj cataj xna'anj 'ujj rihaan  
soj, tinuj, nojoj. Dan me se gaa niha' nimán soj ei.  
Račuj soj nana sa' man tinúú soj yan guun nucaj soj  
canoco' soj man Diose á. Se guun cano tuvi' soj ga tu-  
vi' soj ma'. 'O se cyaan gaa nimán soj ga tuvi' soj ei.

Ne cayaán Diose ga soj ei. 'O se Diose me síj 'yaj nuu  
'ee rá ní' tinúú ní', ne vaa xej nimán ní', 'yaj Diose a.  
<sup>12</sup> Ne gaa nari' tuvi' soj ga tinúú soj, ne uxrá ve'é ca'mii  
soj ga tinúú soj ei. Danj me rá Diose qui'yaj soj  
chuguanj. <sup>13</sup> Ve'é cayaán nij soj, rá cunudanj nij síj sa'  
rihaan Diose ei. <sup>14</sup> Dan me se me rá núj qui'yaj ndo'o  
Jesucristó sij 'nij ra'a man ní' se luj che'é cunudanj soj,  
ne me rá núj gaa 'ee rá Diose ni'yaj Diose man  
cunudanj soj, ne me rá núj ve'é ca'mii cunudanj soj ga  
tinúú soj qui'yaj Nimán Diose nanj adonj.

# Gálatas

**1** Síí cu'naj Pabló mej, ne dan me se gaa cavi' Jesucristó, ne cunuu i'nā' uún so', qui'yaj Diose, ne Jesucristó do', Rej ní' Diose do', me roj síí cune' mán 'unj guún 'unj apóstol nata' se-nānā Jesucristó rihaan cunudanj nij yuvii mān rihaan chumii a. Nuveé inānj yuvii me síí cune' mán 'unj ma'. Ma'an ya Diose cune' mán 'unj adonj. <sup>2</sup> Dan me se taran' nij tinúú ní' síí ne ga 'unj ro', 'yaj yanj cartá nihánj ga 'unj, ne ca'nej núj yanj nihánj rihaan nij soj sij amán rá ni'yaj man Jesucristó sij yanj nij chuman' naj rihaan estadó Galacia a. <sup>3</sup> Dan me se me rá núj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é nij soj, ne me rá núj gaa xej nimán soj qui'yaj roj so' adonj. <sup>4</sup> Dan me se chi'ij vaa nimán yuvii mān rihaan chumii nihánj cuano, ne me rá Rej ní' Diose quinānii ní' rihaan sayuun quirān' nij yuvii mān rihaan chumii nihánj, ne che'é dan ca'vej Jesucristó sij 'nij ra'a man ní' cavi' ya ma'an so' che'é cacun' tumé ní' adonj. <sup>5</sup> Sa' uxrá vaa 'yaj Diose, cataj ní' nu' cavii nu' ca'anj a. Veé danj gaa ya ei.

**Nanā nihánj taj xna'anj se vaa se canoco' ní' yo'ó nanā ma'. Maan se inānj se-nānā Jesucristó canoco' ní' a**

<sup>6</sup> Ne ne'en uxraj me che'é me rá nij soj tanáj ra'yanj soj man Diose ne canoco' soj yo'ó nanā ma'. Ne'en soj se vaa qui'yaj ndo'o Jesucristó se luj che'é soj, ne che'é dan canacúún ma'an Diose man soj canoco' soj man so', ne me che'é me rá soj tanáj soj man Diose ga. <sup>7</sup> Nuveé se vaa yo'ó se-tucuānj Diose ma'. Maan se vaa nij síí me rá naqui'yaj ino se-tucuānj Jesucristó chuguānj. Tzaj ne inānj se-nānā Diose nanā cataj xna'anj núj rihaan soj che'é Jesucristó me nanā sa' adonj. <sup>8</sup> Che'é dan se ca'vej rá soj nata' yuvii yo'ó nanā nacā rihaan soj mei. 'O se inānj nanā nata' núj rihaan soj asij rque ro', cuchuman rá soj ei. Dan me se ca'vee se ndaa ma'an núj do', ca'vee se ndaa 'o se-mozó Diose nanij rej xta' do', nata' yo'ó nanā nacā rihaan soj, tzaj ne yo'ó guun ya rá soj se vaa quirān' ndo'o síí a'mii yo'ó nanā yo' sayuun qui'yaj Diose á. 'O se taj síí no xcúún natunā se-nānā Diose ma'. <sup>9</sup> Dan me se aj cataj xna'anj núj rihaan soj, ne cuano nihánj me cataj xna'anj uún 'unj rihaan soj, se vaa sese ino gaa nanā nata' yo'ó so' rihaan soj ga nanā canoco' soj asij rque, ne guun ya rá soj se vaa quirān' uxrá síí nata' yo'ó nanā yo' sayuun, qui'yaj Diose ei.

**Nanā nihánj taj xna'anj se vaa inānj me rá síí cu'naj Pabló gaa nihā' rá Diose ni'yaj Diose man so' a**

<sup>10</sup> Me rá 'unj gaa nihā' rá yuvii ni'yaj yuvii mán 'unj, rá soj na'. Taj mei. 'O se inānj me rá 'unj gaa nihā' rá Diose ni'yaj Diose manj ei. Dan me se gaa rque me se inānj me rá 'unj gaa nihā' rá yuvii ni'yaj yuvii manj, tzaj ne yaj ro', me taj ma'. Sese inānj guun rá 'unj gaa nihā' rá yuvii ni'yaj yuvii mán 'unj, ne nuveé sij 'yaj suun che'é Jesucristó mé 'unj a man chuguānj.

**Nanā nihánj taj xna'anj se vaa nanā a'mii natáj Pabló ro', orún' Jesucristó me síí tucu'yón nanā yo' man so' a**

<sup>11</sup> Me rá 'unj xcaj nij soj cuentá se vaa se-nānā Diose nanā sa' a'mii natáj 'unj ro', nuveé nanā cavii raā yuvii me nanā yo' ma'. <sup>12</sup> Ne nuveé yuvii nata' nanā yo' rihaanj ma'. Ne taj síí tucu'yón nanā yo' manj ma'. Tzaj ne ma'an ya Jesucristó me síí qui'yaj xcaj 'unj cuentá che'é nanā sa' yo' adonj.

<sup>13</sup> Aj ne'en soj daj vaa raj asij rque doj adonj. Dan me se gaa canocó' 'unj tucuáán noco' nij yuvii israelitá, ne dan me se qui'yaj ndo'o 'unj sayuun man taran' nij síí cuchumán rá ni'yaj man Diose, ne qui'yaj suun uxrá 'unj che'é se me rá 'unj tír' 'unj man nij so' a. <sup>14</sup> Ne tucuáán noco' nij yuvii israelitá ro', 'unj me síí noco' sa' doj tucuáán yo' rihaan que'ee nij tuví 'unj síí israelitá vaa cuyān ga 'unj ei. Ne 'unj ro', me síí a'née sa' doj nu' se-tucuānj xií 'unj sij israelitá adonj.

<sup>15</sup> Tzaj ne asij ataa ca'ngaa 'unj, ne guun rá Diose se vaa qui'yaj sunj che'é so' ei. Dan me se qui'yaj ndo'o Diose se luj che'ej se vaa canacúún so' manj qui'yaj sunj che'é so', <sup>16</sup> ne tihaan so' ta'níí so' Jesucristó rihaanj, che'é se me rá so' ca'anj 'unj nata' 'unj se-nānā so' nanā sa' rihaan nij yuvii yanj nanj adonj. Tzaj ne 'unj me se a doj ne ca'anj 'unj xna'anj 'unj man yuvii daj qui'yaj canocoj man Diose ma'. <sup>17</sup> Dan me se vaa nij síí yanj chuman' Jerusalén, ne apóstol cune' Jesucristó nata' se-nānā so' rihaan yuvii me nij so', ne dan me se asij ataa cune' Jesucristó mán 'unj ro', cune' Jesucristó man nij so', tzaj ne ne cuchí' 'unj rihaan nij so' xna'anj 'unj man nij so' daj qui'yaj ma'. Maan se ra'yanj ca'anj 'unj cuaj estadó Arabia, ne canicaj 'unj ca'naj chuman' Damasco adonj.

<sup>18</sup> Quisíj va'nuy ya yo' nocoj man Jesucristó ta' asuun, gaa ne ca'anj 'unj chuman' Jerusalén, gaa ne cunuu yaan 'unj man síí cu'naj Pedró a. Dan me se nanó 'unj cuentó ga so', ne cayáán 'unj tucúá so' rque xnu' güii a. <sup>19</sup> Ne dan me se gaa canej ga so' me se quene'enj

man sí cu'naj Santiagó tinúú sí 'nij ra'a man ní' uún a. Tzaj ne orún' so' quene'enj nanj á. Ne ne quene'én 'unj man yo'ó nij apóstol ma'. <sup>20</sup> Ne'en ya Diose se vaa ya vaa nana nihánj nana cachrón 'unj rihaan yanj nihánj adonj. Nuveé nana ne me nana nihánj ma'.

<sup>21</sup> Dan me se curihanj 'unj chuman' Jerusalén, ne cachéé 'unj nu' chuman' naj estadó Siria do', nu' chuman' naj estadó Cilicia do', <sup>22</sup> tzaj ne nij sí man estadó Judea sí cuchumán rá ni'yaj man Jesucristó ro', me se ne quene'enj nij so' mán 'unj ma'. <sup>23</sup> Maan se cuno nij so' cuentó cataj xna'anj tuvi' nij so' che'é 'unj se vaa sí chi'ij ndo'o mé 'unj, tzaj ne yaj nihánj cuano me se sij a'mii natáj se-nana Diose mé 'unj cuano, taj nij so', caráya'anj nij so' a. "Sí qui'yaj ndo'o sayuun man ní' gaa rque me se cuano nihánj nata' ma'an so' nana sa' nana noco' ní' nana me rá so' tirí' so' gaa rque chuguanj", taj tuvi' nij so' a. <sup>24</sup> Dan me se caráya'anj ndo'o nij so', ne cataj nij so' se vaa sa' uxrá qui'yaj Diose se vaa quene'enj nij so' manj a.

**2** Dan me se cachén xca'anj yo' gaa curihanj 'unj chuman' Jerusalén, gaa ne canicaj uún 'unj ca'anj 'unj chuman' Jerusalén gá sí cu'naj Bernabé, ne dan me se nicaj núj man sí cu'naj Titó ca'anj núj rej yo' a. <sup>2</sup> Dan me se ca'anj 'unj chuman' Jerusalén, che'é se cataj xna'anj Diose rihaan 'unj se vaa me rá Diose ca'anj 'unj chuman' Jerusalén, ne cataj xna'anj 'unj rihaan nij tinúú ní' sí israelitá daj vaa nana sa' nana ca'mii natáj 'unj rihaan nij soj sij yaníj a. Tzaj ne quirii yaníj 'unj man nij sí uun chij doj rihaan nij so', ne natá' 'unj rihaan ma'an inanj nij so' che'é nana a'mii natáj 'unj rihaan nij soj a. Dan me se me rá 'unj xcaj sa' nij sí uun chij yo' cuentá daj vaa se-nanaj, gaa ne se gaa nanj tirí' nij so' nu' suun qui'yaj suun 'unj che'é Jesucristó a.

<sup>3</sup> Ne nicun' sí cu'naj Titó gá 'unj, ne nda' se nuveé sij israelitá me so', tzaj ne ne qui'yaj nij sí man Jerusalén fuerzá man so' cata' ta'nga' man so' ma'. <sup>4</sup> Tzaj ne doj nij sí tiha' yu'unj, ne dan me se taj nij so' se vaa tinúú ní' me nij so', tzaj ne nuveé tinuj ní' me nij so' ma'. 'O se tu'va rma'an nij so' nanj adonj. Dan me se catúj yuve nij so' rej nuu chre' núj, ne me rá nij so' quene'enj yuve nij so' daj qui'yaj núj a. Tzaj ne xa' ní' sij canoco' man Jesucristó, tzaj ne daj chihaa míj ne nó xcúún ní' canoco' ní' nu' se-tucuaj Moisés a ma'. Che'é dan guun rá nij so' xcaj nij so' cuentá daj 'yaj ní', gaa ne tijaan uún nij so' man ní' canoco' ní' nana noco' nij so', rá a nij so' a. <sup>5</sup> Tzaj ne núj me se a 'ó xco' nii ne cuno núj rihaan nij so' a ma'. 'O se guun rá núj se vaa ve'é ya quinaj nu' se-nana Diose nana ya rihaan soj, rá núj adonj. <sup>6</sup> Dan me se ase vaa sí uun chij vaa ta'aj nij sí man Jerusalén, rá nii, tzaj ne taj vaj sí sa' doj rihaan tuvi', rá 'unj a ma'. Maan se 'o cyaan vaa cunudanj yuvi' rihaan Diose nanj adonj. Dan me se nij sí uun chij yo' ro', ne cataj xna'anj nij so' a doj nana rihaan 'unj ma'. Maan se cunaj vaa nana ca'mii natáj 'unj, taj nij so' a.

<sup>7</sup> Dan me se Diose me sí qui'yaj guun nucaj sí cu'naj Pedró nata' so' se-nana Diose nana sa' rihaan nij

yuvi' israelitá, ne danj qui'yaj guue Diose gá 'unj uún, ne dan me se guun nucaá 'unj nata' 'unj se-nana Diose nana sa' rihaan nij yuvi' yaníj, qui'yaj Diose, ne che'é dan me xcaj nij sí uun chij man Jerusalén cuentá se vaa ne cachin doj nana mán 'unj a. Maan se ase vaa ata' sí cu'naj Pedró suun nata' rihaan nij yuvi' israelitá, qui'yaj Diose ro', danj vaa ata' 'unj suun nata' rihaan nij yuvi' yaníj, qui'yaj uún Diose a. <sup>9</sup> Ne quene'en sí cu'naj Santiagó do', sí cu'naj Pedró do', sí cu'naj Juan do', se vaa qui'yaj ndo'o Diose se luj che'é 'unj do', che'é sí cu'naj Bernabé do', se vaa guun nucaá 'unj nata' 'unj se-nana Diose nana sa' rihaan yuvi', qui'yaj Diose, ne guun ya nu' rá nij so' se vaa Diose me sí ca'ne' suun rihaan núj ei. Dan me se sí uun chij rihaan nij sí cuchumán rá ni'yaj man Jesucristó man Jerusalén me nij so', tzaj ne guun ya rá nij so' se vaa tuvi' ma'an nij so' me núj, ne 'o cyaan vaa suun vaa rihaan núj gá suun vaa rihaan nij so', rá nij so' a. Dan me se ne nata' nij so' se-nana Diose nana sa' rihaan nij yuvi' israelitá, ne tananj núj uún, ne nata' núj rihaan nij sí yaníj, cataj nij so' uún a. <sup>10</sup> Tzaj ne orún' ya rasuun me cachín ni'yaj ndo'o nij so' rihaan núj se vaa asino' nij sí nique me racuíj núj, taj nij so' a. Tzaj ne tumé ndo'o núj man nij sí nique, ne asino' yo' me 'yaj núj chéé núj ei.

**Nana nihánj taj xna'anj che'é nana cataj xna'anj Pabló rihaan sí cu'naj Pedró, se vaa inanj che'é Jesucristó cunuu sa' ní' rihaan Diose a**

<sup>11</sup> Cachén doj güii, gaa ne cuhi' sí cu'naj Pedró chuman' cu'naj Antioquía a. Tzaj ne qui'yaj so' doj se nij, ne tumé so' cacun' che'é se nij qui'yaj so', rá 'unj, ne che'é dan ca'mii rihaa yaj gá so' rihaan cunudanj yuvi', ne cataj 'unj se vaa tumé so' cacun' che'é se vaa qui'yaj so' a. <sup>12</sup> Dan me se gaa ca'na' so' chuman' Antioquía, ne xcaj so' cuentá se vaa ca'vee cha' so' chraa gá nij yuvi' yaníj, ne danj qui'yaj so', ne chá so' chraa gá nij so' chuguanj. Tzaj ne gaa namán nij sí ca'na' suun qui'yaj sí cu'naj Santiagó chuman' nihánj, gaa neuchu'vi' Pedró ca'mii nij sí man Jerusalén sí taj se vaa no xcúún cunudanj nij snó'o noco' man Diose cata' ta'nga' man nij so' a. Dan me se chu'vi' Pedró se vaa xcaj nij so' cuentá se vaa chá so' chraa gá nij yuvi' yaníj, ne cataj nij so' se vaa ne nó xcúún so' qui'yaj so' danj, rá so', ne che'é dan me ca'ne' rá so' gá rej chá chraa gá nij yuvi' yaníj, ne naxuun yaníj so' man so' rihaan nij yuvi' yaníj nanj adonj. <sup>13</sup> Quene'en ma'an so' se vaa ca'vee cha' so' chraa gá nij yuvi' yaníj, tzaj ne nuveé sij 'o vaa rá gá nana a'mii me so' a ma'. Ne ase vaa qui'yaj so' ro', ta'nga' danj qui'yaj uún taran' nij yuvi' israelitá, ne ndaa sí cu'naj Bernabé qui'yaj cacun' gá nij so' se vaa ca'ne' rá so' gá rej chá chraa gá nij yuvi' yaníj nanj adonj.

<sup>14</sup> Dan me se xcaj 'unj cuentá se vaa ne raan noco' nij so' se-nana Diose nana ya ma'. Dan me se ca'mii yá 'unj rihaan Pedró, ne cuno taran' nij so', ne cataj 'unj:

—Sí israelitá mé so', tzaj ne ne noco' so' tucuaán noco' nij yuvi' israelitá ma'. Maan se ase vaa 'yaj nij yuvi'

yanj ro', danj vaa 'yáá so' chuguñj. Me che'é qui'yáá so' fuerzá man nij yuvij yanij canoco' nij yuvij yanij tucuaán noco' nij yuvij israelitá gá. <sup>15</sup> Dan me se yuvij israelitá me ní' á. Nuveé yuvij yanij yuvij 'yaj ndo'o cacun' me ní' ma'. <sup>16</sup> Tzaj ne ne'en ní' se vaa ndá' se ve'é noco' yo' o so' se-tucuñj Moisés, tzaj ne se cunuu sá' ma'an so' rihaan Dioso ma'. 'O se cunuu sá' yá so' rihaan Dioso sese cuchuman rá so' ni'yaj so' man Jesucristó adonj. Dan me se cuchuman rá ma'an ní' ni'yaj ní' Jesucristó, yan cunuu sá' ní' rihaan Dioso, tzaj ne se cunuu sá' ní', qui'yaj se-tucuñj Moisés ma'. Inañ danj taj danj Dioso á. A 'ó yuvij se cunuu sá' rihaan Dioso qui'yaj se-tucuñj Moisés ma', taj uún danj Dioso adonj. <sup>17</sup> 'O se ní' me se canoco' ní' man Jesucristó, gáa ne ca'vee x'neé cacun' xráá ní' qui'yaj so', rá ní', tzaj ne 'o se veé danj 'yaj ní' cacun' tá' rasuun chihá'. Me che'é 'yaj ní' danj gá. 'O se Cristó me síí ca'ne' suun qui'yaj ní' cacun', rá so' na'. Taj ma'. —Nu' nana nihánj me nana ca'mii 'unj rihaan síí cu'naj Pedró adonj.

<sup>18</sup> Dan me se ma'an 'unj me síí tiri' chrej canoco' se-tucuñj Moisés, ne veé dan, gáa ne sese guun che'é uún 'unj naqui'yaj sá' uún 'unj man chrej yo', ne dan me se ma'an inañ yá 'unj me síí tumé cacun' gáa nanj adonj. <sup>19</sup> Asij rque me se canocó' 'unj tucuaán yo', tzaj ne quiriri' rá 'unj, qui'yaj tucuaán yo', ne yaj me se ase vaa cavi' Jesucristó rihaan rcutzé ro', danj vaa cavi' 'unj rihaan tucuaán yo' chuguñj. Ne yaj me se inañ che'é Dioso gáa i'na' 'unj ei. <sup>20</sup> Che'é se amán rá 'unj ni'yaj 'unj Jesucristó ro', maan che'é dan vaa i'na' 'unj ei. Yaj me se nuvé 'unj me síí yanj cuano ma'. 'O se Jesucristó me síí yanj nimanj, ne che'é dan vaa i'na' 'unj cuano ei. Che'é se amán rá 'unj ni'yaj 'unj man ta'níí Dioso ro', che'é dan inañ nocó' 'unj man so' gáa chéé 'unj rihaan chumii nihánj adonj. Ne dan me se maan che'é se cunuu 'eé uxrá rá so' mán 'unj ro', che'é dan ca'ne' guéé rá so' cavi' so' rihaan rcutzé che'é 'unj nanj adonj. <sup>21</sup> Ne na'vej rá 'unj tanáj yanij 'unj se luj qui'yaj Dioso che'é 'unj ma'. 'O se vaa che'é yá qui'yaj Dioso se luj adonj. Dan me se sese ca'vee yá navij cacun' che'é qui'yaj se-tucuñj Moisés, gáa ne cavi' uun ma'an Jesucristó vaa gáa aj na'. Taj ma'. 'O se ne cavi' uun so' mei.

**Nana nihánj taj xna'anj se vaa inañ che'é se amán rá ní' ni'yaj ní' man Jesucristó, che'é dan yanj Nimán Dioso gá ní' a**

**3** Síí nij snúú rma'an yá me soj sij man estadó Galacia nanj chuguñj. Me che'é guun rá soj tanáj soj tucuaán sá' gá. Vaa síí qui'yaj chree man soj na'. Nuveé se sá' uxrá nata' nii rihaan soj se vaa cavi' Jesucristó rihaan rcutzé che'é soj á. <sup>2</sup> 'O se me rá 'unj xna'anj 'unj 'o nana man soj chuguñj. Che'é se canoco' nij soj se-tucuñj Moisés me yáán Nimán Dioso gá soj na'. Ase che'é se amán rá soj cuno soj se-nana Jesucristó me yáán Nimán Dioso gá soj xa'. <sup>3</sup> 'O se síí nij snúú rma'an yá me soj nanj chuguñj. Gáa guun che'é soj canoco' soj man Jesucristó, ne guun nucaj rá soj man Nimán Dioso se vaa racuj Nimán

Dioso man soj, tzaj ne yaj me se nucaj rá soj man ma'an soj se vaa cunuu sá' soj qui'yaj ma'an soj nanj ason. <sup>4</sup> Nu' se sá' qui'yaj Dioso che'é soj gáa canoco' naca soj man Jesucristó ro', taj yu'vee nó yo', qui'yaj soj a a' man ason. Yá yá aj na'. Ne cuchuman yá raj se vaa qui'yaj soj a mei. <sup>5</sup> Gáa rque Dioso Nimán so' rihaan soj qui'yaj ndo'o soj rasuun sá', gáa ne me che'é qui'yaj Dioso danj, rá soj gá. Che'é se canoco' soj se-tucuñj Moisés me qui'yaj Dioso danj na'. Taj mei. Dan me se che'é se amán rá soj ni'yaj soj man Jesucristó me qui'yaj Dioso danj chuguñj.

<sup>6</sup> Dan me se ase vaa qui'yaj síí cu'naj Abraham síí cayáán gáa naá ro', inañ danj qui'yaj soj ei. Dan me se síí cu'naj Abraham ro', me se cuchuman rá so' ni'yaj so' Dioso, ne che'é dan cataj Dioso se vaa sij sá' me Abraham, ne cunuu sá' so' rihaan Dioso á. Inañ danj a'mii danj Dioso adonj. <sup>7</sup> Che'é dan xcáj soj cuentá se vaa ní' sij amán rá ni'yaj man Dioso me se ase vaa síí cu'naj Abraham ro', ta'nga' danj vaa ma'an ní' chuguñj.

<sup>8</sup> Dan me se gáa naá ne'en Dioso se vaa cuchuman rá nij yuvij yanij ni'yaj nij so' man Dioso, ne ne'en Dioso se vaa cunuu sá' nij so' rihaan Dioso, qui'yaj ma'an Dioso, ne che'é dan me nata' Dioso se-nana Dioso nana sá' rihaan Abraham, cataj Dioso:

—Che'é se vaa qui'yáá so' ro', che'é dan me qui'yáá 'unj se luj che'é taran' nij yuvij yanij adonj —taj Dioso rihaan síí cu'naj Abraham asij taj vaj a 'ó yuvij ne'en se-nana Dioso nana sá', ne nu' nana yo' nana ca'mii Dioso rihaan síí cu'naj Abraham ro', canó nana yo' rihaan danj Dioso a.

<sup>9</sup> Dan me se cuchuman rá Abraham ni'yaj so' Dioso, ne qui'yaj Dioso se luj che'é so', ne ase vaa qui'yaj Dioso che'é síí cu'naj Abraham ro', danj qui'yaj uún Dioso che'é taran' nij síí cuchuman rá ni'yaj man so', ne qui'yaj uún Dioso se luj che'é nij so' adonj.

**Nana nihánj taj xna'anj se vaa se ca'vee cunuu sá' ní' rihaan Dioso, qui'yaj se-tucuñj Moisés a ma'**

<sup>10</sup> Tzaj ne a'mii uún danj Dioso che'é yuvij nucaj rá man se-tucuñj Moisés, taj yo': "Sese se qui'yaj yo' o so' cunudanj nij nana no' rihaan danj Dioso nana cataj xna'anj Moisés ro', ne so' me síí cachran' xna'anj ni'yaj rihaan Dioso á", taj danj Dioso, ne a 'ó yuvij se guun nucaj qui'yaj nu' se-tucuñj Moisés a ma'. Che'é dan me taran' nij yuvij nucaj rá man se-tucuñj Moisés ro', quiran' nij so' sayuun, qui'yaj Dioso adonj. <sup>11</sup> Tzaj ne: "Síí amán rá ni'yaj man Dioso ro', me se cunuu sá' so' rihaan Dioso, ne cayáán so' gá Dioso nu' cavii nu' ca'anj a", taj uún danj Dioso, ne che'é dan me ne'en ní' se vaa inañ nij yuvij amán rá ni'yaj man Dioso me yuvij cunuu sá' rihaan Dioso á. Se cunuu sá' nij yuvij nucaj rá man se-tucuñj Moisés ma'. <sup>12</sup> Dan me se xa' se-tucuñj Moisés, tzaj ne ne che'é yan cuchuman rá' me nani' rihaan sayuun ma'. Maan che'é yan qui'yá' nu' rasuun taj tucuaán yo' me nani' rihaan sayuun, taj se-tucuñj Moisés nanj adonj.

<sup>13</sup> Dan me se gaa naá me se ne guun nucuaj ní' qui'yaj ní' nu' se-tucuaj Moisés ma'. Che'é dan me sij cachran' xna'anj ni'yaj me ya ní' gaa rque, tzaj ne cavi' Jesucristó rihaan rcutze che'é ní', ne guun so' síí cachran' xna'anj ni'yaj che'é ní', ne che'é dan se quiran' ma'an ní' sayuun daj chihaa mij a man chuguaj. "Síí aj noco' rihaan rcutze me síí cachran' xna'anj ni'yaj rihaan Dioso", taj danj Dioso á. Dan me se guun Jesucristó 'o síí cata se-cacun' cunudanj ní' nago' so' nu' nij cacun' yo' rihaan rcutze, ne cuano ni-hánj me se síí vaa uun xráa me ní' cuano ei. <sup>14</sup> Ndaa síj, gaa ne se luj cata' tu'va Dioso rihaan síí cu'naj Abraham ro', ca'na' se luj yo' ndaa rihaan nij yuvii yaníj, che'é se vaa qui'yaj Jesucristó a. Dan me se gaa naá, ne cata' tu'va Dioso se vaa catuu Nimán Dioso nimán ní', ne cuchumán rá ní' ni'yaj ní' man Dioso, ne che'é dan catúj ya Nimán Dioso nimán taran' ní' cuano ei.

**Nana nihánj taj xna'anj se vaa cata' tu'va Dioso rihaan síí cu'naj Abraham cataj Dioso se vaa rque ndo'o Dioso se sa' rihaan nij ta'níí ta'nij si'no Abraham a**

<sup>15</sup> Ne ca'mii 'unj che'é ndaa vaa 'yaj nij síí man rihaan yo'óo nihánj, tinuj, nocoj. Sese vaa vij roj so' numij nana, ne asa' quisij numij roj so' nana, gaa ne naxcaj roj so' 'o yanj a'mii che'é ndaa vaa qui'yaj roj so', gaa ne dan me se ndaa vaa taj yanj naxcaj roj so' ro', 'yaj roj so' a. Se guun ca'ne' rá roj so' ma'. <sup>16</sup> Ne dan me se ta'nga' danj qui'yaj guée Dioso ga síí cu'naj Abraham, ne dan me se cunumij roj so' nana ndaa vaa qui'yaj Dioso ga síí cu'naj Abraham a. Dan me se cataj Dioso se vaa cavii sa' so' do', cavii sa' ta'níí ta'nij si'no so' do' a. (Dan me se danj a'mii danj Dioso, tzaj ne ne cataj Dioso se vaa cavii sa' que'ee ta'níí ta'nij si'no síí cu'naj Abraham ma'. 'O se che'é orún' ta'níí ta'nij si'no síí cu'naj Abraham ca'mii danj Dioso adonj. Ne síí cu'naj Jesucristó me síí cavii sa' nanj adonj.)

<sup>17</sup> Ne inanj nihánj me nana me rá 'unj cataj xna'anj 'unj rihaan soj ei. Dan me se Dioso cataj rihaan síí cu'naj Abraham daj qui'yaj Dioso che'é Abraham do', che'é ta'níí ta'nij si'no Abraham do', ne cachén yo'ó ca'anj cientó táa yo'ó ico chi' yo', gaa ne rque Dioso se-tucuaj Moisés, tzaj ne ne quirí' nana cata' tu'va Dioso qui'yaj Dioso che'é síí cu'naj Abraham qui'yaj se-tucuaj Moisés ma'. 'O se ya qui'yaj so' ndaa vaa cataj so' adonj. <sup>18</sup> Dan me se sese che'e se-tucuaj Moisés me rque Dioso rasuun sa', gaa ne nuveé che'e yan cata' tu'va so' rque so' rasuun sa' asij naá me yo' gaa a ma'. Maan se ca'mii uun so' vaa gaa nanj adonj. Tzaj ne sese inanj nij síí noco' se-tucuaj Moisés me síí nıcaj nij rasuun sa' yo', gaa ne taj yu'vee nó nana cata' tu'va Dioso rihaan Abraham gaa naá vaa gaa a ma'. Tzaj ne ne vaa danj a ma'. 'O se che'é nana ca'mii Dioso rihaan Abraham me nıcaj ní' nij rasuun sa' ei. Dan me se quirí' uun ní' nu' nij rasuun sa' yo', qui'yaj Abraham chuguaj. Ne a doj sa'anj ne cyru'vee ní' che'é nu' rasuun sa' yo' a ma'.

**Nana nihánj taj xna'anj se vaa rque Dioso se-tucuaj Moisés che'é yan xcaj yuvii cuentá se vaa síí tumé ndo'o cacun' me yuvii a**

<sup>19</sup> Dan me se sese danj vaa, gaa ne me che'é rque Dioso se-tucuaj Moisés, rá soj ga. Rque Dioso tucuáan yo' rihaan Moisés che'é cacun' tumé yuvii, ne me rá Dioso canoco' yuvii tucuáan yo' ndaa se ca'na' ta'níí ta'nij si'no Abraham síí cu'naj Jesucristó rihaan chumii nihánj, gaa ne so' ro', me síí rque nu' nij rasuun sa' rihaan yuvii, ndaa vaa cataj Dioso rihaan síí cu'naj Abraham gaa naá ei. Dan me se guun rá Dioso se vaa gaa ca'na' Jesucristó, ne ca'ne' rá yuvii ga se-tucuaj Moisés yo' adonj. Tzaj ne se-mozó Dioso me nij síí cataj xna'anj tucuáan yo' rihaan síí cu'naj Moisés, gaa ne cataj xna'anj so' tucuáan yo' rihaan nij yuvii a. Dan me se cataj xna'anj Moisés rihaan nij yuvii, <sup>20</sup> tzaj ne gaa ca'mii Dioso rihaan síí cu'naj Abraham, ne ma'an ya so' ca'mii adonj. Taj vaj síí ca'mii che'é Dioso ma'. Taj vaj síí cataj xna'anj rihaan Dioso daj me rá síí cu'naj Abraham ma'. Maan se ma'an ya so' me síí ca'mii ga síí cu'naj Abraham, ese orún' ya so' me Dioso nanj adonj.

<sup>21</sup> Tzaj ne taj ri'yun se-tucuaj Moisés man nana cata' tu'va Dioso rihaan Abraham gaa naá, rá soj na'. Daj chihaa mij ne vaa danj ma'. Tzaj ne sese guun nucuaj yuvii qui'yaj yuvii 'o tucuáan rque Dioso, ne ya cunyu sa' yuvii rihaan Dioso, qui'yaj tucuáan yo' ei. Tzaj ne se guun nucuaj yuvii qui'yaj yuvii tucuáan vaa danj ma'. <sup>22</sup> Che'é dan me taj danj Dioso se vaa cunudanj yuvii tumé ndo'o cacun' nanj adonj. Inanj danj vaa tumé taran' yuvii cacun', taj danj Dioso, ne che'é dan me nana cata' tu'va Dioso rihaan síí cu'naj Abraham ro', quisij ya nu' nana yo' che'é taran' ní' sij amán rá ni'yaj man Jesucristó adonj.

**Nana nihánj taj xna'anj se vaa gaa ca'na' Jesucristó, ne taj che'é canoco' ní' se-tucuaj Moisés a man adonj**

<sup>23</sup> Tzaj ne gaa ataa doj quisij güii cuchuman rá ní' ni'yaj ní' man Jesucristó, ne inanj se-tucuaj Moisés canoco' ní', ne ase vaa 'o síí tumé man ní' ro', danj vaa se-tucuaj Moisés rihaan ní' gaa rque ei. Inanj se-tucuaj Moisés vaa rihaan ní' canoco' ní' ndaa se ca'na' güii tihaan Dioso rihaan ní' se vaa cuchuman rá ní' ni'yaj ní' man Jesucristó a. <sup>24</sup> Dan me se ase vaa síí tumé man xnii daj qui'yaj xnii ro', ta'nga' danj vaa se-tucuaj Moisés rihaan ní' gaa rque, cutumé yo' man ní' ndaa se ca'na' Jesucristó ei. Ndaa síj, gaa ne no xcúun ní' cuchuman rá ní' ni'yaj ní' man so', ne ca'vee cunyu sa' ní' rihaan Dioso adonj. <sup>25</sup> Cuano ro', nihánj me se aj cuchumán rá ní' ni'yaj ní' man Jesucristó, ne che'é dan me taj che'é tumé se-tucuaj Moisés man ní' a ma'.

<sup>26</sup> Che'é se amán rá nij soj ni'yaj soj man Jesucristó ro', che'é dan ta'níí Dioso me taran' soj cuano nanj adonj. <sup>27</sup> Dan me se che'é se cata' ne soj che'é Jesucristó ro', che'é dan me ase vaa Jesucristó ro', ta'nga'



dənj vaa soj cuano nənj ei. <sup>28</sup> Nə se cataj soj se vaa ta'aj soj me yuvii israelitá nə yo'ó ta'aj soj me yuvii yanij ma'. Nə se cataj soj se vaa ta'aj soj me mozó nə yo'ó ta'aj soj, nuveé sij uun mozó me yo'ó ta'aj soj, cataj soj ma'. Nə se cataj soj se vaa ta'aj soj me snó'o nə yo'ó ta'aj soj me chana ma'. 'O se tanənj ase vaa orún' yuvii vaa taran' soj, nə 'o cyaan vaa taran' soj che'é se noco' soj man Jesucristó nənj ei. <sup>29</sup> Che'é se sij noco' man Jesucristó me soj ro', che'é dan ma'an ya ta'nii ta'nij si'no síi cu'naj Abraham me soj rihaan Diose, ndaa vaa cataj Diose rihaan síi cu'naj Abraham se vaa rque so' rasuun sa' rihaan taran' nij ta'nii ta'nij si'no síi cu'naj Abraham adənj.

**4** Nə ne'en soj daj vaa xnii, se vaa vaa güii, nə guun si'yaj xnii nu' rasuun man tucua rej xnii ei. Tzaj nə gaa xnii me so', nə ase vaa mozó ro', dənə vaa so' tucua rej so' gaa yaan rej so' ei. <sup>2</sup> Dan me se vaa yuvii tumé man xnii daj qui'yaj xnii, nə inənj dənə vaa tumé nii man xnii ndaa se cachij ya xnii, gaa nə vaa güii ca'vej rá rej xnii quita'aa xnii rasuun man tucua xnii ei. <sup>3</sup> Nə ase vaa xnii ataa cachij ro', ta'nga' dənə vaa ma'an ní' gaa rque, nə inənj ne'en ní' canoco' ní' man nij ya'anj uun chij rihaan chumii nihánj a.

<sup>4</sup> Tzaj nə quisij güii me rá Diose rque Diose nu' se sa' rihaan ní', nə che'é dan ca'née Diose ta'nii so' ca'na' ta'nii so' rihaan chumii nihánj, nə cuchruj 'o chana man ta'nii Diose, nə síi noco' se-tucuanj Moisés me nu' nij tuvi' so' gaa cayaán so' rihaan chumii nihánj adənj. <sup>5</sup> Dan me se me rá Jesucristó racu'ij so' man taran' ní' sij noco' tucuaán noco' yuvii man rihaan chumii nihánj, se vaa ca'vee tanáj ní' tucuaán noco' yuvii man rihaan chumii, nə nica'j ní' nu' se sa' me rá Diose rque Diose rihaan ta'nii Diose ei. Nə dənə me rá Jesucristó qui'yaj so' che'é ní' chuguənj. <sup>6</sup> Cuanə nihánj me se ta'nii Diose me nij soj ei. Che'é dan ca'née Diose man Nimán ta'nii so' nimán ní', nə che'é dan me: "Ataj chij. Rej núj mé so' á", taj ní', aguáj ní', 'yaj Nimán ta'nii so' ei. <sup>7</sup> Che'é dan me nuveé mozó me soj rihaan Diose cuano nihánj ma'. Ase vaa mozó vaa soj gaa rque, tzaj nə xa' yaj, nahuun soj ta'nii Diose, nə vaa güii nacaj soj nu' se sa' rque Diose rihaan nij ta'nii so' adənj.

**Nana nihánj taj xna'anj se vaa ne nó xcúun ní' qui'yaj ní' tucuaán noco' yuvii man rihaan chumii nihánj cuano mei**

<sup>8</sup> Gaa rque me se ne ne'en ya soj daj vaa Diose ma'. Che'é dan me qui'yaj suun soj rihaan ya'anj uun chij rihaan rasuun man rihaan chumii nihánj, tzaj nə nuveé ya'anj ya me nij ya'anj qui'yaj suun soj rihaan ma'. <sup>9</sup> Tzaj nə cuano nihánj me se ne'en nij soj man ma'an ya Diose ei. Tzaj nə sa' doj cataj 'unj se vaa ne'en Diose man nij soj chuguənj. Sese aj ne'en soj man ma'an ya Diose, gaa nə me che'é canicaj uun soj canoco' soj man nij ya'anj uun chij rihaan rasuun man rihaan chumii nihánj gaa. Ne'en soj se vaa se guun nucuaj nij so' racu'ij nij so' man soj ma'. Taj yu'vee a 'ó xco' nó ma'an nij so' ma'. Me che'é me rá uun soj qui'yaj suun soj rihaan nij so' gaa. <sup>10</sup> Nə navij rá soj güii guee do', navij rá

soj cha'anj che'é 'o 'o yavii do', vaa dió guee rihaan soj do', vaa yo' guee rihaan soj do' gaa. Me che'é 'yaj soj dənə gaa. <sup>11</sup> Nanó ndo'o rá 'unj se vaa 'yaj soj, nə nanó rá 'unj se vaa quirii' rma'an nu' suun qui'yaj suun 'unj tucu'yón 'unj se-nana Diose nana sa' man nij soj nənj chuguənj.

**Nana nihánj taj xna'anj se vaa nanó rá Pabló che'é se tanáj nij síi man Galacia nana tucu'yón so' man nij so' a**

<sup>12</sup> Ase vaa 'unj ro', dənə gaa guee soj, ése ndaa adi' se vaa soj ro', dənə vaa guee 'unj, tinuj, nocoj. Che'é dan me daj se 'yaj guee cuano ro', dənə qui'yaj guee soj ei. Nuveé che'e se qui'yaj chi'ii soj manj ma'. Tanənj a, nə inənj ve'é qui'yaj soj gaa cayaán 'unj gaa soj ei. <sup>13</sup> Aj ne'en soj se vaa che'é se canó chi'ii manj, che'é dan natá 'unj se-nana Diose nana sa' rihaan soj gaa asino yaan ei. <sup>14</sup> Nə gaa quirán' 'unj rihaan soj me se ne nachri' soj ni'yaj soj manj ma'. Tanənj a, nə caraya'anj ndo'o soj ni'yaj soj manj, nə ndaa adi' ve'é 'yaj nii gaa 'o se-mozó Diose ro', dənə qui'yaj soj, gaa nə ve'é ndo'o ca'mii soj gaj ei. Nə ase vaa ma'an ya Jesucristó ro', ta'nga' dənə vaa 'unj, rá soj, <sup>15</sup> nə che'é dan me guun niha' uxrá rá nij soj nə ve'é uxrá cuno soj nana ca'mij, nə cunuu 'ee uxrá rá soj manj nənj adənj. Dan me se cataj yá' ta' asuun, nə sese guun nucuaj nij soj quirii soj rli' rihaan soj cunu' yo' rihaan, nə ca'vej rá soj qui'yaj soj dənə, nda' rasuun nənj chuguənj. Tzaj nə yaj me se me che'é ne niha' rá soj gaa uno soj nana a'mij cuano gaa. <sup>16</sup> Maan che'é se ca'mij nana ya ya rihaan soj, che'é dan mej síi taj ri'yun' man soj, rá soj nənj na'. Taj ma'.

<sup>17</sup> Dan me se araya'anj uxrá yo'ó nij so' man soj, tzaj nə ne cunaj daj chihaa mij 'yaj nij so' ma'. Maan se me rá nij so' tanáj xco soj nana noco' ní' sij amán rá ni'yaj man Jesucristó, nə inənj ma'an nij so' canoco' soj, rá nij so' nənj adənj. <sup>18</sup> Sese ve'é 'yaj yuvii gaa soj, nə cunaj uxrá sese caraya'anj nij yuvii man soj, rá 'unj á. Tzaj nə yo'ó dənə qui'yaj nij so', sese ya me sa' rá nij so' ni'yaj nij so' man nij soj ei. Tzaj nə taj ma'. Me che'é gaa yaan 'unj gaa soj, gaa nə uun che'e nij so' 'yaj nij so' se sa' gaa soj gaa. Nuveé se sa' 'yaj nij so' gaa soj man chuguənj. <sup>19</sup> Dan me se ase vaa ta'nii 'unj ne'ej ro', dənə vaa nij soj, tinuj, nocoj. Cuanə nihánj me se uun che'e uun 'unj nanó ndo'o raj che'é soj ndaa vaa nanó raj gaa rque, nə me rá 'unj se vaa nari' sa' ya soj se-nana Diose nana sa' ya ei. Dan me se ase vaa nanó rá chana nichru' cuchruj ne'ej che'é se ne ne'en no' sese ca'ngaa sa' ta'nii no' ro', dənə vaa nanó rá 'unj che'é soj cuano chuguənj. Nə ve'e inənj dənə nanó ndo'o rá uun 'unj che'é nij soj ndaa nari' ya ya soj ndaa vaa qui'yaj ma'an ya Jesucristó nənj ei. <sup>20</sup> 'O se 'vee, nə ndaa cuano cayaán yá 'unj gaa soj, gaa nə ca'mii ma'an yá 'unj gaa soj, raj ei. Tzaj nə ne ne'en yaj daj nanə raj che'é soj a mei.

Nana nihánj taj xna'anj se vaa sese noco' ní' se-tucuanj Moisés, ne mozó me ní', ne ne nó xcúún ní' qui'yaj ní' danj a ma'

<sup>21</sup> Me rá 'unj cataj ya soj 'o nana rihanj ei. Me rá nij soj canoco' soj se-tucuanj Moisés, tzaj ne ne'en soj daj taj nana cachrón Moisés rihaan yanj yo' na'. <sup>22</sup> Dan me se cachrón Moisés nana nihánj rihaan yanj, se vaa vaa vij ta'níí síí cu'naj Abraham snó'o cunii, ne yo'ó ta'níí so' me ne'ej cuchruj mozó chana nuu rihaan so', ne yo'ó ta'níí so' me ne'ej cuchruj ma'an nica so' a. Xa' nica so', tzaj ne nuveé mozó me chana nica so' ma'. Nica ya so' me yo' adonj. <sup>23</sup> Dan me se ne'ej cuchruj mozó chana ro', me se ase vaa a'ngaa naj guun ne'ej ro', danj vaa ca'ngaa so' a. Tzaj ne xa' ne'ej cuchruj ma'an nica Abraham, tzaj ne aj cata' tu'va Diose daj qui'yaj Diose che'é so' asij gaa ataa ca'ngaa so' a.

<sup>24</sup> Ne ase vaa cuentó che'é roj chana cuchruj ne'ej ro', danj vaa yo'ó nana tucu'yón ní', rá 'unj, ne ase vaa roj chana ro', danj vaa vij nana cataj xna'anj Diose rihaan yuvij a. Dan me se yo'ó chana me se-mozó Abraham, ne Agar cu'naj se-chuvij no', ne ase vaa mozó chana cu'naj Agar ro', ta'nga' danj vaa nana cataj xna'anj Diose rihaan síí cu'naj Moisés gaa ca'mii Diose ga Moisés xráá quij xcaan cu'naj Sinaí a. Se-tucuanj Moisés me nana yo', ne ase vaa mozó ro', danj vaa yuvij noco' nana yo' a. Nicun' quij xcaan cu'naj Sinaí rej cu'naj Arabia, tzaj ne ase vaa chana cu'naj Agar ro', ta'nga' danj vaa nij yuvij man chuman' Jerusalén cuano a. Dan me se taran' nij yuvij man chuman' Jerusalén me yuvij israelitá yuvij noco' se-tucuanj Moisés, ne ase vaa mozó ro', danj vaa taran' nij so' nanj ei. <sup>26</sup> Tzaj ne síí man yo'ó chuman' Jerusalén chuman' naj rej xtá' me ní', ne nuveé mozó me ní' ma'. 'O se aj guun nij ní' man chuman' Jerusalén naj rej xtá' adonj.

<sup>27</sup> Nihánj me nana no rihaan danj Diose a: "Gaa nihá' nimán so', chana ityun á. Ataa cuchruj so' ne'ej, tzaj ne gaa nihá' uxrá nimán so' á. 'O ruún so' cuano, tzaj ne vaa güii, ne doj a gaa ta'níí so' rihaan ta'níí chana otoj ga snó'o adonj". Inanj danj a'mii danj Diose che'é nica Abraham chana cuchruj man síí cu'naj Isaac a.

<sup>28</sup> Ne ase vaa ta'níí no' síí cu'naj Isaac ro', ta'nga' danj vaa nij soj, tinuj, nocoj. Soj me ne'ej se vaa cataj ya Diose ca'ngaa ya ei. Ne ase vaa cavii sa' síí cu'naj Isaac ro', danj cavii sa' soj uún ei. <sup>29</sup> Ne'en nij soj se vaa xnii ca'ngaa ma'an ta'níí yo'ó chana ro', me se taj ri'yunj ndo'o so' man ne'ej tucua ya ve' chuguanj. Dan me se ta'nga' danj ran' guee ní' cuano nihánj, ne dan me se 'yaj ndo'o nij yuvij noco' ma'an se-tucuanj Moisés sayuun man ní' sij cunuu sa' nimán che'é nimán Diose chuguanj.

<sup>30</sup> Tzaj ne xcá' ní' cuentá me taj danj Diose ei. Dan me se taj yo' se vaa: "Quirij so' man roj ta'nij mozó chana ca'anj yanij roj ta'nij no' á. 'O se orún' ta'níí nica so' níí ne uun mozó me síí guun síí si'yaj nu' si'yáá so' vaa güii ei. Ne xa' ta'níí chana uun mozó, tzaj ne daj chihaa mij ne nó xcúún ta'níí mozó chana yo' quirij' yo' ta'aj

si'yáá so' ma'". Dan me se danj vaa nana ca'mii Diose rihaan Abraham nana no rihaan danj Diose a. <sup>31</sup> Dan me se nuveé ta'nij mozó chana me ní', man tinuj, man nocoj. Nuveé yuvij 'yaj suun ndo'o canoco' se-tucuanj Moisés me ní' ma'. Maan se ase vaa ta'níí chana ne uun mozó ro', danj vaa ní', ne a 'ó tucuaán ne nó xcúún ní' canoco' ní' a ma'.

**5** Maan se aj ca'néj Jesucristó nu' suun taj xráá ní', ne che'é dan vaa ya'núj rihaan ní' canoco' ní' man Diose cuano ei. Che'é dan me ca'nej nucua' soj nimán soj, ne se ca'vej uún soj qui'yaj suun soj suun uun mozó a ma'. Se guun rá soj canoco' soj nu' se-tucuanj Moisés a ma'.

Nana nihánj taj xna'anj se vaa taj che'é cutá' nii ta'nga' man nee man ní' ma'

<sup>2</sup> Xcá' nij soj cuentá se vaa nihánj me nana taj xna'anj ma'an 'unj sij cu'naj Pabló rihaan soj ei. Dan me se sese cutá' nii ta'nga' man soj, ne taj yu'vee nó Jesucristó rihaan soj vaa gaa a ma'. <sup>3</sup> Nihánj me cataj xna'anj uún 'unj rihaan soj se vaa taran' nij snó'o a'vej rá cutá' nii ta'nga' man ro', no xcúún nij so' canoco' nij so' nu' se-tucuanj Moisés adonj. <sup>4</sup> Ta'aj nij soj me rá canoco' se-tucuanj Moisés, ne cunuu sa' nij so' rihaan Diose, rá nij so', tzaj ne nuveé sij noco' man Jesucristó me síí 'yaj danj ma'. 'O se síí tanáj xcó se luj qui'yaj Diose che'é ní' me nij so' adonj. <sup>5</sup> Xa' ní', tzaj ne nuu Nimán Diose nimán ní', ne amán rá ní' ni'yaj ní' man Jesucristó, ne che'é dan me guun ya rá ní' se vaa vaa güii cunuu sa' ní' rihaan Diose, ne yo'ó na'vij ní' ndaa se quisij ya güii yo' adonj. <sup>6</sup> Xa' ní' sij noco' man Jesucristó me se taj se 'yaj sese quitaj ta'nga' man ní', taj se 'yaj sese se quitáá ta'nga' man ní', taj se 'yaj ma'. 'O se amán rá ní' ni'yaj ní' man Jesucristó, ne che'é dan cunuu ee rá ní' ni'yaj ní' man tinúú ní', ne che'é roj yo' me cavii sa' ní' adonj.

<sup>7</sup> Gaa rque me se aj sa' uxrá noco' soj man Diose tzaj niha'. Me síí caráán chrej rihaan soj se cuchumán rá soj cunoo soj nana ya yaj ga. <sup>8</sup> Xa' nana uno soj cuano, tzaj ne nuveé Diose me síí ca'mii nana yo' rihaan soj ma'. Dan me se xa' Diose, tzaj ne yo'ó canacúún so' man soj canoco' soj man orún' ya so' adonj. <sup>9</sup> Ne'en nij soj se vaa yo'ó cu'naj levadura se 'yaj namij rque rachruún, me se doj tzin' yo' araa nii rque cunj, tzaj ne namij rque cunudanj cunj, 'yaj yo', ne ase vaa yo'ó cu'naj levadura ro', ta'nga' danj vaa nana ne uno soj adonj. Dan me se doj tzin' nana ne uno soj, tzaj ne ca'anj ni'ya que'ee nij soj, qui'yaj nana ne yo' ei.

<sup>10</sup> Dan me se 'unj me se yo'ó amán raj ni'yaj 'unj man síí 'nij ra'a man ní' se vaa yo'ó cuyaan gaa rá soj ga 'unj chuguanj. Ne síí a'mii yo'ó nana ro', tzaj ne 'yaj chruj so' rihaan soj se vaa se canoco' sa' soj man Diose chuguanj. Che'é yan 'yaj so' danj ro', che'é dan quirán' so' sayuun, qui'yaj Diose nanj adonj. Me ma'an sij me so', tzaj ne ya quirán' so' sayuun, qui'yaj Diose ei.

<sup>11</sup> A'mii natáj ma'an 'unj rihaan yuvij se vaa cutá' nii ta'nga' man yuvij, rá soj na'. Taj, man tinuj, man nocoj.

Sese danj vaa naná a'mii natáj 'unj, ne ne guun na'aj yuviij cunō yuviij naná se vaa cavi' Jesucristó rihaan rcutze asuun saj ma'. Tzaj ne guun na'aj nij yuviij ei. Ne maan che'é dan 'yaj ndo'o nij yuviij sayuun manj adonj. <sup>12</sup> Dan me se vaa che'é cataj ní' se vaa nij sí' 'yaj sayuun man soj ro', 'o se veé, ne vaa che'é ca'ne' nij so' nu' nee man ma'an nij so' vaa tzaj adonj.

**Nanā nihánj taj xna'anj se vaa ve'é qui'yaj ní' nu' se vaa me rá Nimán Diose qui'yaj ní' á**

<sup>13</sup> Dan me se canacúun Diose man nij soj guun niha' nimán soj canoco' soj man so', tinuj, nocoj. Tzaj ne se guun rá soj se vaa ca'vee qui'yaj soj náá guun se me rá nee man ma'an soj qui'yaj soj ma'. Tananj cunyu 'ee rá soj tinúu soj, ne yo'ō qui'yaj suun soj che'é tinúu soj ei. <sup>14</sup> Dan me se 'o cuyan ya vaa nu' se-tucuanj Moisés ga orún' nanā nihánj chuguanj: "Adi' se 'ee rá so' man ma'an so' ro', ta'nga' danj gaa 'ee rá so' man yo'ó yuviij á". Ne nihánj me nanā nō xcúun ní' cunō ní', ne sese danj qui'yaj ní', ne sí' 'yaj nu' se-tucuanj Moisés me ya ní' adonj. A 'ó nanā se cachiin cunō uún ní', sese danj qui'yaj ní' a ma'. <sup>15</sup> Tzaj ne sese cunū' soj do', sese guun xcoj ruvaā rá soj ni'yaj soj tuvi' soj do', sese qui'yaj soj sayuun man tuvi' soj do', ne dan me se tadó uxrá soj ei. 'O se sese danj uun rá soj, ne quirí' cunudanj tuvi' soj, qui'yaj soj nanj chuguanj.

<sup>16</sup> Ne cataj xna'anj 'unj rihaan soj se vaa yo'ō cunō soj a'mii Nimán Diose gaa chéé soj rihaan chumiij nihánj, ne sese inanj danj qui'yaj soj, ne daj chihāā mīj se guun qui'yaj soj se vaa me rá nee man ma'an soj qui'yaj soj ma'. <sup>17</sup> Dan me se inō uxrá vaa se me rá nee man ní' qui'yaj yo' gā se me rá Nimán Diose qui'yaj yo' ei. Dan me se inō me rá 'o 'o roj yo' ei. Sese me rá ní' cunō ní' rihaan Nimán Diose, ne aráan nee man ní' chrej rihaan ní' cunō ní' rihaan Diose chuguanj. Ne sese me rá ní' qui'yaj ní' se nij me rá nee man ní' qui'yaj yo', ne aráan Nimán Diose chrej rihaan ní' se qui'yaj ní' danj ma'. Ne unu' Nimán Diose gā nee man ní', ne ca'vee se me rá ní' qui'yaj ní' ndāa vaa me rá ma'an ní' qui'yaj ní', tzaj ne se guun nucuaj ní' qui'yaj ní' danj a man adonj. <sup>18</sup> Tzaj ne sese noco' soj man Nimán Diose, ne taj che'é canoco' soj se-tucuanj Moisés a mei.

<sup>19</sup> Dan me se aj ne'en soj daj vaa rasuun me rá nee man ma'an soj qui'yaj yo' ei. Me rá yo' qui'yaj yo' cacun' gā yo'ó chanā do', me rá yo' qui'yaj yo' se nij ndo'o do', me rá yo' qui'yaj yo' se na'aj ndo'o do', <sup>20</sup> quina'vij soj rihaan ya'anj acóy yuviij do', me rá uún yo' ca'miij soj gā sí' chruun nano' so' chrej che'é soj do', uun xcoj ruvaā rá soj ni'yaj soj tinúu soj do', unu' soj gā tinúu soj do', axríj yuvaā soj man tinúu soj do', inanj me rá 'o 'o soj cavii sá' uún soj do', uxrá' ta'aj nij soj man nij soj do', <sup>21</sup> uun xcoj ruvaā rá soj ni'yaj soj tinúu soj do', achráá ndo'o soj chra' xno gā tuvi' soj do', ne dan me se que'ee doj tuvi' cacun' nihánj 'yaj uún soj, 'yaj nee man ma'an soj nanj adonj. Aj cataj xna'anj 'unj rihaan soj, ne cuano nihánj me se cataj xna'anj uún 'unj rihaan soj se vaa yuviij 'yaj danj ro',

daj chihāā mīj se cayáan nij so' gā Diose asá' guun chij Diose rihaan chumiij nihánj a ma'.

<sup>22</sup> Tzaj ne sese inanj rihaan Nimán Diose cunō ní', ne cunyu 'ee rá ní' tuvi' ní' do', guun niha' rá ní' do', gaa xej nimán ní' do', gaa inaj nimán ní' do', ve'é qui'yaj ní' rihaan yuviij do', yo'ō cuchuman rá ní' do', <sup>23</sup> sí' ni'yanj a'mii guun ní' do', ve'é cūtumé ní' man ní' daj qui'yaj ma'an ní' do', qui'yaj Nimán Diose ei. Inanj danj gaa ní' sese ve'é cunō ní' rihaan Nimán Diose nanj adonj. Yo' me sese qui'yaj ní' ndāa vaa taj nanā nihánj, ne taj cacun' quitaj xráá ní' qui'yaj nanā nihánj a ma'. <sup>24</sup> Dan me se ní' sij aj canoco' man Jesucristó ro', me se aj ticavi' Jesucristó man nu' se chi'ii man nimán ní', gaa cavi' so' rihaan rcutze, ne dan me se quisij qui'yaj nee man ní' cacun', ne daj chihāā mīj se qui'yaj uún ní' se chi'ii me rá nee man ní' qui'yaj yo' a ma'. <sup>25</sup> Dan me se che'é se cunuu sá' nimán ní', qui'yaj Nimán Diose, che'é dan yo'ō cunō ní' nu' se vaa cataj xna'anj Nimán Diose rihaan ní' ei. <sup>26</sup> Se ca'mii xtá' ní' a 'ó xco' a ma'. Se ca'mii ra'yunj ní' rihaan tinúu ní' a ma'. Se guun xcoj ruvaā rá ní' ni'yaj ní' tinúu ní' a ma'.

**Nanā nihánj taj xna'anj se vaa ve'é raçuíj ní' man tinúu ní' a**

**6** Sese ya xcaj nij soj cuentá se vaa qui'yaj 'o tinúu soj cacun', ne soj sij ve'é noco' Nimán Diose ro', nago' soj chrej man sí' tumé cacun' daj qui'yaj so' rej rihaan so', tinuj, nocoj. Tzaj ne nica' gaa nimán soj, ne ve'é ca'miij soj nanā sá' gā sí' tumé cacun' ei. Dan me se tadó soj gā ma'an soj gaa nago' soj chrej ei. Sese se tadó soj, ne ma'an soj do' ca'anj chrej chi'ii nanj chuguanj. <sup>2</sup> Dan me se ca'vee se me ma'an sayuun ran' tinúu soj, tzaj ne raçuíj soj man so' ei. Sese danj qui'yaj soj, ne sí' qui'yaj nu' tucúáan cuchruj Jesucristó che'é ní' me soj gaa nanj chuguanj. <sup>3</sup> Ne sese vaa sí' guun rá se vaa sí' sá' me ma'an so', ne sí' ne ne'en uxrá me so', ne sí' tiha' yu'unj man ma'an me so' nanj ei. <sup>4</sup> Tzaj ne naqui'yaj cyu 'o 'o ní' daj 'yaj ma'an ní', ne sese ve'é 'yaj ní', ne guun niha' rá ní' che'é se vaa ve'é 'yaj ma'an ní' ei. Tzaj ne ne nó xcúun ní' naqui'yaj cyu ní' daj 'yaj tinúu ní' ma'. Se cataj ní' se vaa sá' doj 'yaj ní' rihaan tinúu ní' ma'. <sup>5</sup> Maan se inō vaa suun atā 'o 'o ní', ne nō xcúun 'o 'o ní' catā ní' suun vaa rihaan ma'an ní' nanj adonj.

<sup>6</sup> Dan me se sí' tucúyón se-nanā Diose ro', me se nō xcúun so' cuxra' ta'aj so' nu' se sá' rihaan sí' tihaan se-nanā Diose nanā sá' rihaan so' a.

<sup>7</sup> Tzaj ne se tiha' yu'unj soj man ma'an soj ma'. Se ca'vee tiha' soj man Diose ma'. Dan me se sese 'yaj yo'ō so' sayuun rihaan chumiij nihánj, ne gaa ndo'o sayuun quitaj xráá so', <sup>8</sup> ne sese qui'yaj yo'ō so' inanj se vaa me rá nee man ma'an so' qui'yaj so', ne nee man so' qui'yaj quirí' nu' so' nanj adonj. Sese qui'yaj yo'ō so' inanj se vaa me rá Nimán Diose qui'yaj so', ne Nimán Diose qui'yaj gaa i'na' so' cayáan so' gā Diose nu' cavii nu' ca'anj adonj. <sup>9</sup> Se guun rmiij ní' qui'yaj sá' ní' ma'. Sese se quirí' rá ní', ne quisij güii cachrón Diose, ne sá' uxrá doj cavii ní', qui'yaj Diose ei. <sup>10</sup> Dan

me se yaj vaa ya'núj rihaan ní' ro', qui'yaj suun ndo'o ní' che'é se sa' cuano ei. Che'é dan ve'é uxrá qui'yaj suun ní', račuúj ní' man cunudañj yuvií ei. Tzaj ne doj a guun rá ní' račuúj ní' man nij tinúú ní' nij síí amán rá ni'yaj man Jesucristó adonj.

**Nana nihánj taj xna'anj se vaa guun niha' rá Pabló in-  
anj che'é se cavi' Jesucristó rihaan rcutze che'é ní' a**

<sup>11</sup> Ni'yaj soj ei. Xij ndo'o vaa letrá cachrón ra'aj ma'anj che'é nij soj chuguñj. <sup>12</sup> Nij síí me rá ve'é ca'mii yuvií che'é ro', ma'an nij so' me síí me rá cata' ta'nga' man soj ñanj adonj. Danj 'yaj nij so' che'é se na'vej rá nij so' qui'yaj yuvií sayuun man nij so' che'é se noco' nij so' man Jesucristó síí cavi' rihaan rcutze ñanj chuguñj. Maan che'é dan a'mii nij so' ñanj rihaan soj ñanj adonj. <sup>13</sup> Dan me se ata' ta'nga' man nij so', tzaj ne ne noco' sa' ma'an nij so' se-tucuñj Moisés ma'. Tzaj ne inañj me rá nij so' cata' ta'nga' man soj, gaa ne ca'mii xta' nij so' cataj nij so' se vaa cata' ta'nga' man soj qui'yaj ma'an ya nij so', che'é se qui'yaj nij so' fuerzá man soj, cataj nij so' a. <sup>14</sup> Ne xa' 'unj, tzaj ne daj chihaa míj se ca'mii xta' 'unj ma'. 'Q se

guun niha' rá 'unj inañj che'é se cavi' Jesucristó sij 'nij ra'a man ní' rihaan rcutze che'é ní', ne xa' chumii nihánj, tzaj ne ase vaa se cavi' ro', ñanj vaa chumii nihánj rihaan 'unj, ne taj yu'vee nó chumii nihánj rihaan 'unj, ne yo'o tanáj 'unj man se vaa 'yaj nij yuvií man rihaan chumii nihánj ñanj adonj. <sup>15</sup> Taj se 'yaj sese taj ta'nga' man ní' do', taj se 'yaj sese nuvi' ta'nga' táá man ní' do' ma'. Núj naqui'yaj naca' Diosé man ní', ne cavií sa' ya ní' ñanj adonj. <sup>16</sup> Me rá 'unj gaa xej nimán taran' soj sij noco' tucuáán nihánj, ne gaa 'ee rá Diosé man soj ei. Ya yuvií israelitá me soj rihaan Diosé ñanj chuguñj. <sup>17</sup> Dan me se aj quiran' ndo'o nee mán 'unj sayuun che'é se 'yaj suun 'unj che'é Jesucristó natá' 'unj rihaan yuvií che'é so', ne che'é dan na'vej rá 'unj qui'yaj soj doj sayuun mán 'unj a ma'.

**Nana nihánj taj xna'anj se vaa me rá Pabló qui'yaj Je-  
sucristó se luj che'é nij síí man Galacia a**

<sup>18</sup> Me rá 'unj qui'yaj ndo'o Jesucristó sij 'nij ra'a man ní' se luj che'é nimán nij soj, tinuj, nocoj. Ya uxrá ei. Veé ñanj gaa ya ei.

# Efesios

**1** Síí cu'naj Pabló mej, ne cune' Jesucristó mán 'unj guún 'unj apóstol nata' se-nana so' rihaan nij yuvij, che'é se danj me rá Diose qui'yáj a. 'Yáá 'unj yanj cartá nihánj ca'nej 'unj rihaan nij soj sij sa' rihaan Diose yanj chuman' cu'naj Efeso sij amán rá ni'yaj man Jesucristó a. <sup>2</sup> Me rá 'unj qui'yaj ndo'o Rej ní' Diose do', qui'yaj Jesucristó sij 'nij ra'a man ní' do', se luj che'é nij soj, ne me rá 'unj gaa xej nimán nij soj, qui'yaj roj so' a.

**Nana nihánj taj xna'anj che'é nu' se luj qui'yaj ndo'o Diose che'é nij yuvij israelitá do', che'é ní' sij yaníj do' a**

<sup>3</sup> Inanj sa' uxrá vaa Diose Rej Jesucristó sij 'nij ra'a man ní', ne ve'é ndo'o qui'yaj so' che'é ní', ne rqué ndo'o so' se sa' man ní', ne se sa' cavii rej xta' cavii ma'an ya Nimán Diose me rqué Diose man ní', che'é se síí noco' man Jesucristó me ní' a. <sup>4</sup> Ne dan me se che'é se sij noco' man Jesucristó me ní', che'é dan me asij ataa qui'yaj Diose chumij nihánj me narii so' man ní' guun ní' síí sa' rihaan ma'an so', ne se tumé ní' cacun', rá so' a ma'. Ne dan me se cunuu 'ee rá so' man ní', <sup>5</sup> ne cune' so' man ní' canoco' ní' man Jesucristó ne guun ta'nij ma'an so' man ní', ndaa vaa quirii nimán ma'an so' qui'yaj so' che'é ní', <sup>6</sup> gaa ne che'é dan ve'é ca'mij ní' ni'yaj ní' man Diose, ne cataj ní' se vaa ve'é ndo'o qui'yaj so' se luj che'é ní', che'é se noco' ní' man Jesucristó síí 'ee rá so' man adonj.

<sup>7</sup> Ne che'é se cavi' Jesucristó che'é ní' ro', che'é dan navij cacun' xráá ní', che'é se sa' uxrá vaa rá Diose ni'yaj Diose man ní', <sup>8</sup> ne Diose ro', me síí qui'yaj ndo'o se luj che'é ní' se vaa rqué ndo'o so' nana cuu man ní', ne xcaj ndo'o ní' cuentá, qui'yaj so' adonj. <sup>9</sup> 'O se so' me síí qui'yaj xcaj ní' cuentá che'é nana naca nana a'mii che'é daj me rá ma'an so' qui'yaj so' che'é ní' sij noco' man Jesucristó, <sup>10</sup> asa' quisíj güii ca'na' uún Jesucristó rihaan chumij nihánj a. Dan me se güii yo' me se guun chij Jesucristó rihaan cunudanj rasuun, qui'yaj Diose, ne guun chij Jesucristó rihaan taran' nij rasuun man rej xta' do', rihaan cunudanj nij rasuun man rihaan chumij nihánj do' a.

<sup>11</sup> Ne che'é Jesucristó me se narii Diose man núj sij israelitá sij amán rá ni'yaj man Jesucristó, ne dan me se narii so' man núj che'é se aj cune' so' man núj guun núj nij síí gaa nucuaj rá gaa asino yaan man Jesucristó, che'é rej ve'é nata' núj se vaa sa' uxrá vaa Diose a. Dan me se inanj danj guun rá Diose qui'yaj so', ne so' me síí avii ndo'o raq daj qui'yaj, ne so' me síí 'yaj nu' ndaa vaa avii raq so' qui'yaj so' adonj.

<sup>13</sup> Ne vaa nij soj sij yaníj uún, ne cuno soj nana ya se vaa ca'vee cavii sa' uxrá ní' qui'yaj Jesucristó, ne cuchumán rá soj ni'yaj soj man Jesucristó, ne che'é Jesucristó me se ca'na' Nimán Diose catúj Nimán Diose nimán soj, ne Nimán Diose me se ca'na' rihaan ní' sij noco' man Diose, ndaa vaa cata' tu'va Diose gaa naá, ne che'é se nuu Nimán Diose nimán ní' ro', che'é dan ne'en ya ní' se vaa me ní' ta'níí Diose <sup>14</sup> ne ya rque ndo'o Diose se sa' man ní' vaa güii nanj adonj. Dan me se rqué Diose Nimán Diose rihaan ní', cataj Diose se vaa ya naca Diose man ní' vaa güii, ne quinanii ní' rihaan sayuun, che'é rej ve'é nata' taran' ní' se vaa sa' uxrá vaa Diose a.

**Nana nihánj taj xna'anj se vaa achíín ni'yaj Pabló rihaan Diose se vaa xcaj sa' doj nij síí man Efeso cuentá che'é Jesucristó qui'yaj Diose a**

<sup>15</sup> Dan me se cunó 'unj nana se vaa amán rá nij soj ni'yaj nij soj man Jesucristó sij 'nij ra'a man ní', ne cunó 'unj nana se vaa 'ee rá soj man taran' nij síí sa' noco' man Diose, ne che'é se vaa qui'yaj Diose che'é ní' sij noco' man Jesucristó ro', che'é dan <sup>16</sup> yo' o nagó' 'unj graciá rihaan Diose che'é soj gaa achíín ni'yáá 'unj che'é soj rihaan Diose adonj. <sup>17</sup> Dan me se Diose me síí ca'née man Jesucristó sij 'nij ra'a man ní' ca'na' so' rihaan chumij, ne Rej ní' nicun' xta' me uún Diose, ne síí uun chij sa' uxrá me so', ne che'é dan achíín ni'yáá 'unj rihaan Diose se vaa rque ndo'o so' nana cuu sa' nimán soj, ne achíín ni'yáá 'unj se vaa guun nucuaj soj nari' soj nu' nana naca tihaan so' man ní', gaa ne sa' doj xcaj ma'an soj cuentá che'é so' ei.

<sup>18</sup> Dan me se xcaj soj cuentá sa' doj, ne quene'en soj me che'é nacúún Diose man soj, ne quene'en soj nu' se vaa qui'yaj Diose che'é soj, ne guun rá soj se vaa vaa che'é ndo'o canoco' soj man Jesucristó adonj. Quene'en soj se vaa sa' uxrá vaa se qui'yaj Diose che'é taran' ní' sij sa' noco' man so', <sup>19</sup> ne quene'en soj se vaa guun nucuaj ndo'o Diose racuíj Diose man ní' sij amán rá ni'yaj man so' a. Nucuaj ndo'o Diose adonj.

<sup>20</sup> Che'é se nucuaj Diose ro', che'é dan cunuu i'na' ya uún Jesucristó, qui'yaj Diose gaa cavi' Jesucristó, ne guun chij uxrá Jesucristó rej xta' rej x'nuj Diose, qui'yaj uún Diose adonj. <sup>21</sup> Veé dan, ne uun chij ya Jesucristó rihaan taran' nij yuvij do', rihaan taran' nij ya'anj rii ta'nga' rihaan chumij nihánj do', tzaj ne ne doj cuano me uun chij so' ma'. 'O se guun chij so' nu' cavii nu' ca'anj nanj adonj. <sup>22</sup> Ne uun chij Jesucristó rihaan cunudanj rasuun qui'yaj Diose, ne dan me se Diose me

sí qui'yaj rii ta'nga' Jesucristó rihaan cunudanj rasuun che'é ní' sij amán rá ni'yaj man so' adonj. <sup>23</sup> Ne ase vaa nee man Jesucristó ro', danj vaa ní', uno ní' rihaan so', ne dan me se so' me sí' 'nij ra'a man cunudanj rasuun man rihaan nu' cachra' chumii, ne so' me sí' rquē nu' se vaa achiin man nu' nij rasuun man rihaan chumii ni-hánj adonj.

**Nana nihánj taj xna'anj daj vaa cavii sa' ní' sij yanij, qui'yaj Diose, ne sí' cunuu sa' nimán rihaan Diose me ní' cuano, che'é se luj qui'yaj uun Diose che'é ní' a**

**2** Gaa rquē me se ma'an nij soj me sí' tumé ndo'o cacun', ne che'é dan quiri' nu' nimán nij soj, ne taj se qui'yá' ca'vee quinanii soj rihaan sayuun a ma'.

<sup>2</sup> Dan me se qui'yaj soj ndaa vaa 'yaj yuvii man rihaan chumii nihánj, ne qui'yaj soj nu' rasuun chi'ii rasuun niha' rá sí' chree sí' rii ta'nga' rihaan chumii nihánj cuano sí' chéé uun chij rquē nana, ne so' me sí' rii ta'nga' rihaan nimán nij yuvii na'vej rá cuño rihaan Diose a. <sup>3</sup> Ne ase vaa 'yaj nij yuvii vaa danj ro', danj qui'yaj guēe taran' ní' gaa rquē, ne qui'yaj ní' cacun' ga nij so', ne qui'yaj ní' inanj se me rá nee man ní' qui'yaj ní' a. Inanj se cavii raá ma'an ní' qui'yaj ní', ne yuvii ca'-maan rá Diose ni'yaj Diose man me ní' gaa rquē, ne ase vaa nij yuvii chéé rihaan chumii nihánj cuano ro', ta'nga' danj vaa ní' gaa rquē ei.

<sup>4</sup> Tzaj ne cunuu 'ee ndo'o rá Diose man ní', <sup>5</sup> ne quene'en Diose se vaa aj quiri' nu' nimán ní' che'é cacun' tumé ní', ne che'é dan, ase vaa cunuu i'na' uún Jesucristó, qui'yaj Diose ro', ta'nga' danj vaa uún ní' cunuu sa' nimán ní', qui'yaj Diose, ne che'é dan ca'vee cayáán ní' ga Diose nu' cavii nu' ca'anj nanj adonj. (Dan me se maan che'é se luj qui'yaj Diose che'é soj me se ca'vee quinanii soj rihaan chrej chi'ii uun chij nimán soj ne cavii sa' soj ei.) <sup>6</sup> Ne ase vaa cavii Jesucristó cayáán so' rej xta', qui'yaj Diose ro', danj qui'yaj uún Diose che'é ní', che'é se sij noco' man Jesucristó me ní', ne vaa güii cavii ní' cayáán ní' ga so' rej xta' ei. <sup>7</sup> Ndaa síj, gaa ne nu' cavii nu' ca'anj quene'en nij yuvii se vaa qui'yaj ndo'o Diose se luj che'é ní', ne dan me se quene'en nij yuvii se vaa cunuu 'ee ndo'o rá Diose man ní' che'é se sí' noco' man Jesucristó me ní' nanj adonj.

<sup>8</sup> Dan me se xcaj nij soj cuentá se vaa inanj che'é se luj qui'yaj Diose che'é soj me quinanii soj rihaan chrej chi'ii uun chij nimán soj ne cavii sa' soj á. Dan me se maan che'é se amán rá soj ni'yaj soj man so' me cavii sa' soj ei. Nuveé ma'an soj me sí' 'yaj a'vee avii sa' soj ma'. Maan se Diose racuíj man soj don a'vee avii sa' soj nanj adonj. <sup>9</sup> Nuveé che'e rasuun sa' qui'yaj soj me cavii sa' soj ma'. 'O se na'vej Diose ca'mii xta' yuvii cataj yuvii se vaa ma'an nij yuvii me sí' qui'yaj cavii sa' nij yuvii ma'. <sup>10</sup> 'O se Diose me sí' qui'yaj man ní', ne qui'yaj Diose man ní' che'é rej canoco' ní' man Jesucristó ne ve'é qui'yaj suun ní' suun sa', rá Diose, ne che'é ma'an Diose me a'vee qui'yaj suun ní' suun sa' yo' nanj adonj.

<sup>11</sup> Dan me se ne'en soj se vaa nuveé yuvii israelitá me soj ma'. 'O se yuvii yanij me soj, ne dan me se cataj núj sij israelitá se vaa nij vaa nee man soj adonj. Tzaj ne cuta' núj ta'nga' man nee man ma'an núj, ne che'é dan me sí' atá ta'nga' me núj, taj yuvii ni'yaj yuvii man núj adonj. Yo'o xcaj soj cuentá <sup>12</sup> se vaa gaa rquē ro', nuveé sij noco' man Jesucristó me nij soj ma'. 'O se sij yanij rihaan núj sij israelitá me soj gaa naá nanj adonj. Dan me se nuveé sij no xcuún a 'ó xco' canoco' man Diose me soj gaa rquē ma'. Maan se sij 'yaj rma'an rihaan chumii me soj nanj adonj. Dan me se ya cata' tu'-va Diose che'é núj sij israelitá se vaa cavii sa' núj, tzaj ne taj nana cata' tu'va Diose che'é nij soj gaa rquē ma'. Dan me se aj quene'en nij soj se vaa se cavii sa' nij soj do', se racuíj Diose man nij soj do', gaa man adonj. Maan se chéé uun nij soj rihaan chumii gaa rquē nanj adonj. <sup>13</sup> Tzaj ne yaj me se nda' se ne quene'en uxrá soj man Diose, tzaj ne ca'na' Jesucristó cavi' Jesucristó che'é soj, ne guun che'e soj canoco' soj man Diose, qui'yaj Jesucristó, ne guun che'e Jesucristó naqui'yaj chre' so' man nij soj che'é ton cayanj man so' rihaan rcutze nanj adonj.

<sup>14</sup> Ne Jesucristó ro', me sí' naqui'yaj dínj man núj sij israelitá ga soj sij yanij, gaa ne orún' ya chuman' me taran' ní' cuano, qui'yaj so' a. 'O se tiri' so' chingá ca'ne' tanuu man ní' ga tuvi' ní', gaa cavi' ma'an so' rihaan rcutze, <sup>15</sup> ne dan me se chingá yo' ro', me se-tucuanj Moisés, ne yo'o tinavij Jesucristó tucuáán yo' nanj adonj. Che'é dan me 'o cuyaán vaa taran' ní' cuano, ne cunuu 'ee rá ní' man tuvi' ní', qui'yaj Jesucristó, ne yo'o cunuu naca nimán ní', qui'yaj Jesucristó, ne dínj vaa nimán taran' ní', qui'yaj ya so' adonj. <sup>16</sup> Che'é se cavi' Jesucristó rihaan rcutze ro', che'é dan orún' ya chuman' me ní' cuano, ne yo'o qui'yaj canaán Jesucristó man nu' se a'maan rá man nimán taran' ní', ne dan me se cunuu rcua'aan taran' ní' ga Diose, qui'yaj Jesucristó a.

<sup>17</sup> Dan me se ca'na' Jesucristó, ne nata' so' rihaan nu' soj sij yanij do', rihaan núj sij israelitá sij nicaj se-tucuanj Diose do', se vaa dínj cumán taran' ní' rihaan Diose á. <sup>18</sup> 'O se che'é Jesucristó me se nuu Nimán Diose nimán taran' ní', ne che'é dan vaa ya'núj rihaan taran' ní' cachinj ni'yaj ma'an ní' rihaan Rej ní' Diose adonj.

<sup>19</sup> Che'é dan nuveé sij man yo'ó chuman' me soj a ma'. 'O se sij ne'en man Diose me nij soj cuano nanj adonj. Nuveé sij noco' yo'ó tucuáán me soj ma'. Maan se ma'an soj me sí' cunuu sa' nimán, ne noco' nu' taran' ní' man Diose yaj adonj. <sup>20</sup> Xa' tucuáán noco' taran' ní' cuano ro', ase vaa 'o ve' sa' 'yaj nii xráá yuvej sa' inanj ro', danj vaa ní', ne nij yuvej sa' yo' ro', me núj sij apóstol cune' Jesucristó do', nij sí' nata' se-nana Diose gaa naá do', ne yuvej sa' doj rihaan taran' nij yuvej naj tacóó ve' yo', tzaj ne ma'an ya Jesucristó me yo' vaa nanj chuguanj. <sup>21</sup> Dan me se yo'o chre' gaa ní' sij noco' man Jesucristó, gaa ne yo'o cuyaán naxcaj nuvií ei. Ne nuvií yo' ro', me nu' ní' sij noco' man sí' 'nij ra'a man ní' nanj adonj. <sup>22</sup> Ne ma'an nij soj ro', me se che'é

se noco' soj man síi 'nij ra'a man ní', che'é dan cunuu rcua'aan soj ga yo'ó nij síi guun nuvíi, ne nihánj me se ma'an ya Nimán Dioso yáan sca'núj taran' ní' ei.

Nana nihánj taj xna'anj se vaa ca'ne' Dioso suun rihaan Pabló nata' so' se-nana Dioso nana sa' rihaan ní' sij yaníj a

**3** Ne'en nij soj se vaa 'nij 'unj taga' che'é se nocó' 'unj man Jesucristó, ne 'yaj suun 'unj a'mii natáj 'unj rihaan nij soj sij yaníj che'é so', <sup>2</sup> ne aj ne'en soj se vaa atá 'unj suun qui'yaj Dioso che'é soj sij yaníj nanj adonj. Dan me se qui'yaj ndo'o Dioso se luj che'é 'unj, ne ca'ne' so' suun rihanj qui'yaj sunj che'é soj ei. <sup>3</sup> Dan me se tihaan naca Dioso rihanj daj me rá Dioso qui'yaj Dioso che'é nij yuvií man rihaan chumií nihánj, ne aj cachrón 'unj doj nana che'é se vaa tihaan Dioso manj rihaan yanj cartá ca'née 'unj rihaan soj gaa rque adonj. <sup>4</sup> Nayaá soj yanj cartá yo', ne xcaj soj cuentá che'é nu' nana narí' 'unj nana che'é nu' se vaa qui'yaj Jesucristó che'é yuvií ei. <sup>5</sup> Gaa rque ro', ne cataj xna'anj Dioso nana yo' rihaan yuvií ma'. Tzaj ne ndaa yaj ro', me tihaan Nimán Dioso nana yo' rihaan núj sij apóstol sij sa' cune' Jesucristó man nata' se-nana so' rihaan yuvií, ne tihaan so' nana yo' rihaan yo'ó nij síi nata' se-nana Dioso rihaan yuvií a. <sup>6</sup> Dan me se tihaan so' nana se vaa cunq nij soj sij yaníj se-nana Dioso nana sa', ne cunyu sa' soj ga núj sij israelitá adonj. Ne nana cata' tu'va Dioso che'é nij síi canocó' man Jesucristó ro', quisíj ya nu' nana yo' che'é nij soj sij yaníj ga núj sij israelitá nanj chuguanj.

<sup>7</sup> Ne vaa ndo'o suun rihanj nata' 'unj nana sa' yo', ne yo' me se luj qui'yaj Dioso che'ej adonj. Nda' se ne nó xcúún 'unj quirí' 'unj se luj nihánj, tzaj ne ma'an ya Dioso me síi rque se luj nihánj manj nanj ei. So' me síi nucuaj ndo'o, ne guun nucuáj qui'yaj sunj, qui'yaj Dioso nanj chuguanj. <sup>8</sup> Nda' se síi nicá' doj rihaan taran' nij síi sa' noco' man Dioso mej, tzaj ne qui'yaj Dioso se luj yo' rihanj, ne ca'ne' so' suun rihanj nataj nana sa' rihaan nij soj sij yaníj se vaa sa' uxrá vaa se qui'yaj Jesucristó che'é ní' adonj. <sup>9</sup> Ne me rá Dioso cataj xna'anj 'unj rihaan yuvií nu' se vaa qui'yaj so' che'é nij yuvií a. Dan me se Dioso me síi qui'yaj nu' rasuyun, ne aj ne'en so' daj qui'yaj so' che'é yuvií, tzaj ne ne cataj xna'anj so' rihaan yuvií nu' cavii nu' ca'na' ma'. <sup>10</sup> Tzaj ne nij ya'anj man rej xta' ro', me rá Dioso xcaj nij so' cuentá cuano se vaa inanj nana cuu sa' ndo'o avii raá Dioso, ne quene'en nij so' man taran' ní' sij noco' man Jesucristó, ne xcaj nij so' cuentá se vaa avii ndo'o raá Dioso adonj. <sup>11</sup> Dan me se guun rá Dioso nu' cavii nu' ca'na' se vaa qui'yaj so' danj tió man ní', ne guun rá so' se vaa ca'nej so' man Jesucristó sij 'nij ra'a man ní' rihaan chumií nihánj a. <sup>12</sup> Ne che'é se amán rá ní' ni'yaj ní' Jesucristó ro', che'é dan ca'vee cachinj ni'yaj ma'an ní' rihaan Dioso, ne taj che'é cucu'vi' ní' ca'mii ní' ga Dioso ma'.

<sup>13</sup> Che'é dan cataj xna'anj 'unj rihaan soj se vaa se cucu'vi' nimán soj quene'en soj sayuun quirán' 'unj

che'é soj ma'. Maan se tananj a cavii sa' soj doj che'é sayuun rán' 'unj nihánj nanj adonj.

Nana nihánj taj xna'anj se vaa achíin ni'yaj Pabló rihaan Dioso se vaa sa' doj xcaj nij síi man Efeso cuentá se vaa 'ee ndo'o rá Jesucristó man ní' a

<sup>14</sup> Che'é se cavii sa' ndo'o nij soj ga núj, che'é dan canicun' ruj 'unj, ne achíin ni'yáá 'unj rihaan Rej ní' Dioso che'é soj adonj. <sup>15</sup> Dan me se Dioso me Rej nu' taran' nij x'ne' nij síi man rej xta' do', Rej nu' taran' nij x'ne' ní' sij man rihaan chumií nihánj do', <sup>16</sup> ne achíin ni'yáj rihaan so' che'é soj se vaa nari' nucuaj nimán soj qui'yaj Nimán Dioso adonj. <sup>17</sup> Ne achíin ni'yáj se vaa cuchuman doj rá soj quene'en soj man Jesucristó, ne yo'q natuu Jesucristó nimán soj qui'yaj Dioso, gaa ne yo'q cunyu 'ee rá soj man taran' tinúú soj adonj.

<sup>18</sup> Ndaa síj, gaa ne nari' nucuaj ndo'o nimán soj, ne guun nucuaj soj xcaj sa' soj cuentá se vaa 'ee uxrá rá Jesucristó man ní', ne quene'en taran' ní' sij cunuu sa' nimán rihaan Dioso se vaa 'ee uxrá rá Jesucristó man ní' adonj. Taj a 'ó síi guun nucuaj ma'an quene'en se vaa 'ee uxrá rá Jesucristó man ní' ma'. Tzaj ne guun nucuaj ní' xcaj ní' cuentá se vaa 'ee uxrá rá Jesucristó man ní', qui'yaj Dioso, ne qui'yaj ndo'o Dioso se luj che'é ní', ne dan me se cunyu sa' inanj ní', ndaa vaa ma'an Dioso adonj.

<sup>20</sup> Dan me se yaj me se síi sa' uxrá me Dioso, ne uun nucuaj so' rque so' nu' rasuyun achíin ní' gaa rihaan ní' a. Tzaj ne ne rque so' maan inanj nij rasuyun achíin ni'yaj ní' gaa rihaan ní' ma'. 'O se rque so' nu' rasuyun achíin ní' rihaan so', ne rque so' yo'ó doj a rasuyun rihaan ní' ei. <sup>21</sup> Che'é dan cataj ní' sij noco' man Jesucristó se vaa inanj sa' uxrá vaa Dioso, ne yo'q danj ca'mii ní' ga ta'níi ní' nu' cavii nu' ca'anj che'é Jesucristó a. Veé danj gaa ya ei.

Nana nihánj taj xna'anj se vaa ve'é qui'yaj ní' rihaan tinúú ní', che'é se ase vaa nee man yo'q yuvií ro', danj vaa taran' nij tinuj ní' a

**4** Ne'en nij soj se vaa 'nij 'unj taga' che'é se nocó' 'unj man síi 'nij ra'a man ní', ne cataj xna'anj 'unj rihaan nij soj se vaa ve'é qui'yaj ma'an soj rihaan Dioso á. Dioso me síi canacúún man soj canocó' soj man so', ne che'é dan ve'é canocó' soj man so' gaa chéé soj rihaan chumií nihánj á. <sup>2</sup> Ne guun nij soj síi ni'yanj a'mii, ne ve'é qui'yaj soj ga tinúú soj, ne se guun yuvaá soj man tinúú soj ma'. Maan se inanj cunyu 'ee rá soj man tinúú soj, ne gaa inaj nimán soj ga tinúú soj á. <sup>3</sup> Ne se cunu' soj ga tuvi' soj, ne se quitáá ri'yunj soj tuvi' soj ma'. Maan se dínj cumán soj ga tinúú soj á. Ve'é cunq taran' soj rihaan Nimán Dioso, ne ase vaa nimán orún' yuvií ro', danj gaa nimán soj ga tinúú soj á. <sup>4</sup> Dan me se orún' ya yuvií me ní' vaa, ne orún' ya nimán ní' vaa, ne dan me se orún' ya Nimán Dioso me nuú nimán ya ní', ne guun ya rá taran' ní' se vaa canacúún Dioso man taran' ní', ne 'o cuyaán cavii sa' taran' ní', qui'yaj Dioso adonj. <sup>5</sup> Oruun síi 'nij ra'a man

ní', ne ɔruun naná sá' amán rá ní', ne sji cata' ne che'é Jesucristó me taran' ní', <sup>6</sup> ne ɔrún' Rej taran' ní' Diose uún a. Nicaj yu'unj so' man taran' ní', ne 'yaj suun so' nimán taran' ní', ne yanj so' gá taran' ní' nanj adonj.

<sup>7</sup> Tzaj ne ndaa 'o 'o ní' rqué Jesucristó 'o 'o suun sá' rihaan a. Dan me se yo' me rsuun sá' rqué Jesucristó, ndaa vaa me rá so' rque so' man ní' ei. Ne qui'yaj ndo'o Diose se luɔ rihaan 'o 'o ní' se vaa guun nucuaj 'o 'o ní' qui'yaj suun ní' suun ca'ne' Jesucristó rihaan ní' a. <sup>8</sup> 'O cuyaan vaa naná nihánj gá naná nɔ rihaan danj Diose, ne dan me se naná nɔ rihaan danj Diose taj se vaa qui'yaj canaán Jesucristó rihaan nij sí' taj ri'yunj man so', gaa ne ca'anj nicaj so' man nij so' rej xtá', gaa ne rqué so' se sá' rihaan nij yuvii a. Danj taj danj Diose a. <sup>9</sup> (Ne naná yo' taj se vaa cavii so' xtá', ne ne'en ní' se vaa asino yaan nanij so' rej man nij sí' cavii rque yo'ó a. <sup>10</sup> Ne ɔrún' so' me sí' nanij rej man nij sí' cavii, ne ɔrún' so' me sí' cavii rej xtá' uún adonj. Dan me se xtá' doj cavii so' rihaan daj a rasuun, gaa ne guun so' sí' nicaj yu'unj man daj a rasuun adonj.)

<sup>11</sup> Ne ma'an so' me sí' cune' man ta'aj ní' guun ta'aj ní' apóstol natá se-nana so' rihaan cunudanj nij yuvii man rihaan chumi, ne yo'ó ta'aj ní' me sí' cune' so' natá' naná tihaan naca Diose rihaan so', ne yo'ó ta'aj ní' me sí' cune' so' natá' se-nana Diose naná sá' rihaan nij sí' ataa cuchuman rá ni'yaj man so', ne yo'ó ta'aj ní' me sí' nicaj yu'unj man nij sí' amán rá ni'yaj man so', qui'yaj so', ne yo'ó ta'aj ní' me sí' ticha'nuu se-nana Diose rihaan nu' tinúú ní', qui'yaj so', ne dan me se ndaa inɔ vaa 'o 'o suun sá' nicaj 'o 'o ní', qui'yaj Jesucristó a. <sup>12</sup> Dan me se danj qui'yaj Jesucristó, che'é se me rá Jesucristó guun nucuaj ní' sji cunuu sá' rihaan Diose qui'yaj suun ní' racuɔj ní' man tinúú ní', gaa ne ve'é doj cumán taran' ní' sji noco' man Jesucristó, ne sá' doj qui'yaj suun ní' rihaan so' nanj adonj. <sup>13</sup> Ne sá' doj cuchuman rá ní' quene'en ní' ta'ní' Diose, ne sá' doj quene'en ní' daj vaa so', ne ve'é cunuu rcua'aa taran' ní' adonj. Chij inanj gaa rá ní', gaa ne daj se sá' ndo'o vaa Jesucristó ro', danj gaa sá' taran' ní' nanj adonj.

<sup>14</sup> Tzaj ne cuano ro', me se ase vaa xnii vaa ní', ne vaa yuvii tiha' yu'unj ndo'o man ní', ne dan me se nuchruj raa ndo'o nij yuvii daj qui'yaj nij so', ne tiha' yu'unj nij so' man ní', ne tucu'yón ndo'o nij sí' tiha' yu'unj naná naca man ní', ne amán rá ní' uno ní' náá guun naná tiha' yu'unj yo', 'yaj nij so' a. Tzaj ne asa' quisij cunuu chij rá ní', ne se cuno ní' naná tiha' yu'unj yo' a ma'.

<sup>15</sup> Maan inanj naná ya ca'mii ní' rihaan tinúú ní', che'é se 'ee rá ní' man tinúú ní', gaa ne sá' doj quene'en ní' canoco' ní' man Jesucristó, nu' se vaa qui'yaj ní' adonj. Dan me se ase vaa rii ta'nga' cúu yave yuvii rihaan nu' nee man yuvii ro', danj vaa rii ta'nga' Jesucristó rihaan ní' adonj. <sup>16</sup> Ne maan che'é so' ro', me ase vaa orɔ' tuvi' nu' cúu man yo'o yuvii ro', danj vaa noco' tuvi' ní' gá tinúú ní', ne narqué Jesucristó se nucuaj achiin rihaan nu' nij tinuj ní', ne che'é dan ve'é doj cumán taran' ní', ne ve'é doj cunuu 'ee rá ní' tinúú ní' adonj.

**Naná nihánj taj xna'anj se vaa ca'ne' rá ní' gá suun 'yaj ndaa vaa 'yaj nij sí' ne amán rá ni'yaj man Jesucristó, ne ve'é qui'yaj ní' gá tinúú ní' do', gá sí' 'nij ra'a man ní' do' ei**

<sup>17</sup> Che'é dan me cataj xna'anj yá 'unj 'o naná rihaan soj, che'é se noco' ní' man sí' 'nij ra'a man ní' ei. Dan me se quisij qui'yaj soj se vaa 'yaj yo'ó nij sí' yanij nij sí' ne amán rá ni'yaj man Jesucristó nanj ei. Nij sí' yanij yo' me se noco' nij so' naná snúú rma'an naná avii raa ma'an nij so', <sup>18</sup> ne ne uun nucuaj nij so' xcaj sá' nij so' cuentá a ma'. Se cavii sá' nimán nij so', qui'yaj Diose ma'. Maan se quiran' nij so' sayuun che'é se sí' ni'yon me nij so' ne nichraj ndo'o rá nij so' adonj. <sup>19</sup> Ne rihuun rá nij so' che'é cacun' 'yaj nij so' ma'. Tananj yo'o noco' nij so' tucuáan chi'ii, ne 'yaj ndo'o nij so' cacun' se vaa me rá nee man nij so' qui'yaj nij so', ne niha' ndo'o rá nij so' qui'yaj nij so' cacun' yo' a. Ne a'ne' rá nij so' gá suun 'yaj cacun' a ma'.

<sup>20</sup> Tzaj ne inɔ uxrá vaa naná nari' soj asij guun che'e soj canoco' soj man Jesucristó ei. <sup>21</sup> Ya uxrá cuno nij soj se-nana Jesucristó, ne nari' nij soj naná ya adonj.

<sup>22</sup> Naná nari' nij soj taj se vaa nɔ xcúun soj tanáj soj chrej chi'ii chrej canoco' soj asino yaan a. Dan me se inanj se me rá nee man soj qui'yaj soj asino yaan, ne che'é dan tiha' yu'unj sí' chree man soj, ne ve'é danj vaj soj, ne ca'anj soj rihaan ya'an nanj á. <sup>23</sup> Tzaj ne cuano nihánj nɔ xcúun soj ca'vej soj cunuu sá' nimán soj, ne xcaj naca soj cuentá ei. <sup>24</sup> Ne ca'vej soj guun soj yuvii naca qui'yaj Diose á. Dan me se Diose me sí' qui'yaj cunuu nica ya nimán soj, ne cunuu sá' ya nimán soj, qui'yaj so' adonj.

<sup>25</sup> Che'é dan ca'ne' rá soj gá naná ne, ne inanj naná ya ca'mii soj rihaan tinúú soj, che'é se ase vaa nee man ma'an soj ro', vaa nee man taran' nij tinuj ní' a.

<sup>26</sup> Ndá' se a'maan ndo'o rá soj, tzaj ne se qui'yaj soj cacun' ma'. Ne ra'yanj na'maan rá uún soj cuaj ei. Se ca'vej rá soj yo'o gaa yuvaa nimán soj cunuu' güii ma'.

<sup>27</sup> Se gaa ya'núj rihaan sí' chree caxrii sí' chree chrej chi'ii rque soj, qui'yaj soj mei. <sup>28</sup> Sese vaa sí' ituu 'nij sca'núj soj, ne ca'ne' rá nij so' gá suun 'yaj ituu rasuun ei. Maan se ve'é qui'yaj suun ma'an nij so' suun sá', gaa ne sese achiin rasuun rihaan tinúú so', ne guun nucuaj so' rque ma'an so' rasuun rihaan tinúú so' ei.

<sup>29</sup> Se ca'vej soj ca'mii soj naná quij ma'. Maan se inanj guun rá soj ve'é ca'mii soj, ne naná sá' naná achiin man tinúú soj ro', yo' me nago' soj rihaan tinúú soj á. Ne cavii sá' doj taran' nij sí' cunɔ naná ca'mii soj, sese sá' ca'mii soj ei.

<sup>30</sup> Ne se guun quinano rá Nimán Diose, qui'yaj soj ma'. Che'é se yanj Nimán Diose gá soj ro', che'é dan ne'en ya soj se vaa cavii sá' soj asa' quisij güii tinanii Diose man ní' rihaan sayuun adonj. Che'é se Nimán Diose yáan nimán soj ro', che'é dan me ne'en Diose se vaa ta'nij ya Diose me soj adonj. <sup>31</sup> Ca'ne' rá soj gá suun nachri' ni'yaj tinúú á. Ca'ne' rá soj gá suun axri' yuvaa man tinúú á. Ca'ne' rá soj gá suun a'maan rá á. Se caguáj soj doj rihaan tinúú soj ma'. Se ca'mii soj doj



nana nij che'é tinúú soj ma'. Quiri'ij soj cunudanj chrej chi'ij yo' á. <sup>32</sup> Dan me se ve'é qui'yaj soj rihaan tinúú soj á. Gaa 'ee rá soj ni'yaj soj tinúú soj á. Ne'en soj se vaa caráj x'naa Diose che'é cacun' tumé ní', che'é se cavi' Jesucristó che'é ní' a. Che'é dan nō xcúún ya soj caraa x'naa soj ni'yaj soj tinúú soj adonj.

**5** Ne'en nij soj se vaa ta'nij Diose me soj cuano, ne 'ee uxrá rá Diose man soj, ne che'é dan ase vaa 'yaj ma'an Diose ro', danj gaa qui'yaj uún ma'an soj ei. <sup>2</sup> Gaa 'ee rá soj man tinúú soj gaa chéé soj rihaan chumii nihánj á. Inanj danj qui'yaj Jesucristó, cunuu 'ee rá so' man ní', ne ca'vej so' cavi' so' che'é ní', ne ase vaa se luj nago' yuvi rihaan Diose ro', ta'nga' danj vaa Jesucristó che'é ní' nanj chuguanj.

<sup>3</sup> Se qui'yaj soj cacun' ga chana ma'. A 'ó se chi'ij se qui'yaj soj ma'. Ne se guun niha' rá soj quiri'í ndo'o soj rasuun ma'. Sí sá' noco' man Diose me soj, ne daj chihaa mij se qui'yaj soj a doj cacun' vaa danj mei. <sup>4</sup> Ne se ca'mii soj nana chi'ij do', nana nij do' ma'. Se ca'mii soj nana snúú rma'an ma'. 'O se taj che'é ca'mii soj nana vaa danj mei. Maan se nō xcúún soj nago' inanj soj graciá rihaan Diose ei. <sup>5</sup> Dan me se sí 'yaj cacun' ga chana ro', quiran' so' sayuun, ne sí niha' rá quiri'í ndo'o rasuun ro', quiran' so' sayuun adonj. 'O se ase vaa sí na'víj rihaan ya'anj cacóy yuvi ro', danj vaa uún sí niha' rá quiri'í ndo'o rasuun ei. Xcaj ya soj cuentá se vaa a 'ó sí 'yaj cacun' yo' se cayáan ga Diose asa' quisij güii guun chij Jesucristó do', guun chij Diose do', rihaan chumii nihánj a ma'.

<sup>6</sup> Se ca'vej rá soj ca'mii yuvi nana ne rihaan soj ne tiha' yu'unj nij yuvi man soj ma'. Se qui'yaj soj se chi'ii me rá nij yuvi qui'yaj soj ma'. Maan se yo' me se 'yaj nij sí na'vej rá cunō rihaan Diose, ne che'é dan axrij yuvaa Diose man nij so' adonj. <sup>7</sup> Che'é dan naxuun yanij soj man soj rihaan nij sí 'yaj danj ei. <sup>8</sup> Asij rque ro', ase vaa nij sí chéé rej rmi' ro', danj vaa ma'an soj, ne nuvi' cuentá nicaj soj ma'. Tzaj ne yaj ro', canoco' soj man sí 'nij ra'a man ní', ne che'é dan ase vaa sí chéé rej ranga' ro', danj vaa soj, nicaj ndo'o soj cuentá, ne che'é dan ve'é qui'yaj soj gaa chéé soj rihaan chumii nihánj ei. <sup>9</sup> Sí chéé rej ranga' ro', sa' 'yaj so', ne nicaj vaa rá so', ne nana ya inanj a'mii so' adonj. <sup>10</sup> Dan me se nuchruj raa soj daj qui'yaj soj, ne guun niha' rá sí 'nij ra'a man ní' quene'en so' man soj adonj.

<sup>11</sup> Tzaj ne se guun guun tuvi' soj ga nij sí chi'ii ne acay cuentá ne qui'yaj soj se chi'ii ga nij so' ma'. 'O se xa' se vaa 'yaj nij so', tzaj ne taj se guun yo' rihaan nij so' a ma'. 'O se tananj a guun rá soj tihaan soj man nij sí 'yaj danj se vaa ne sa' vaa se 'yaj nij so' a. <sup>12</sup> 'O se xa' se vaa 'yaj yuve nij so', tzaj ne ndaa uun na'aj yá' ca'mi' che'é se vaa 'yaj yuve nij so' chuguanj. <sup>13</sup> Tzaj ne sese tihaan ní' rihaan nij yuvi daj vaa nu' rasuun 'yaj yuve nij so', gaa ne quene'en nij so' daj vaa yo', ne xcaj ya nij so' cuentá se vaa nij vaa qui'yaj nij so' ei. <sup>14</sup> 'O se ya'an chuguun me se ya ruvi' nu' nij rasuun, 'yaj ya'an adonj. Che'é dan taj nana nihánj: "Narij soj nej, sij otoj sca'núj nij xngá, ne naxagaa soj, canicun' caya soj,

ne Cristó me sí quichuguun rihaan soj a", taj nana yo' a.

<sup>15</sup> Che'é dan tumé uxrá nij soj daj vaa 'yaj soj gaa chéé soj rihaan chumii nihánj ei. Se qui'yaj soj se vaa 'yaj nij sí ne ne'en ma'. Tananj qui'yaj soj ndaa vaa 'yaj sí cūu raa á. <sup>16</sup> Ne se ca'ne' uun rá soj cachēn ndo'o orá rihaan soj ma'. 'O se uun ndo'o cacun' cuano ni-hánj, ne che'é dan nō xcúún soj qui'yaj suun ndo'o soj yaj gaa vaa ya'núj rihaan soj chuguanj. <sup>17</sup> Ne se guun soj sí ni'yōn ma'. Tananj xcaj soj cuentá daj me rá sí 'nij ra'a man ní' qui'yaj soj ei. <sup>18</sup> Ne se guun xno soj ma'. Che'é se uun xno yuvi ro', che'é dan 'yaj ndo'o nij yuvi cacun' chi'ii ndo'o adonj. Tzaj ne yo' o cūnuú Nimán Diose nimán soj ei. <sup>19</sup> Ase vaa nana achraá soj rihaan Diose ro', danj gaa nana ca'mii soj rihaan tinúú soj á. Ne cachraa nimán soj chra' rihaan sí 'nij ra'a man ní' á. <sup>20</sup> Ne niganj nago' soj graciá rihaan Diose che'é cunudanj rasuun, che'é se sí noco' man ta'ní Diose Jesucristó sij 'nij ra'a man ní' me soj á. <sup>21</sup> Ne ve'é qui'yaj cunudanj soj ndaa vaa me rá tuvi' soj, ne yo' o cūnuú rá soj se vaa Jesucristó me sí ca'ne' cacun' che'é ní' vaa güii a.

**Nana nihánj taj xna'anj daj qui'yaj 'o 'o ní' rihaan tuvi' ní' a**

<sup>22</sup> Dan me se ve'é qui'yaj nij chana ndaa vaa me rá nicaj no' á. Dan me se daj se uun rá ní' ni'yaj ní' man sí 'nij ra'a man ní' ro', danj guun rá chana ni'yaj chana nicaj no' á. <sup>23</sup> Dan me se Jesucristó me sí qui'yaj cavii sa' ní' sij noco' man so' rihaan sayuun, ne guun chij so' rihaan ní', ne che'é dan daj se uun rá ní' ni'yaj ní' man so' ro', danj inanj guun rá chana ni'yaj no' man nicaj no' a. <sup>24</sup> Ne ase vaa uno taran' ní' sij noco' man Jesucristó rihaan Jesucristó ro', ta'nga' danj qui'yaj nij chana cunō no' nu' nana sa' a'mii nicaj no' rihaan no' á.

<sup>25</sup> Ne nij snó'o ro', me se gaa 'ee uxrá rá nij so' man nicaj nij so' uún á. Dan me se ase vaa 'ee rá Jesucristó man taran' ní' sij noco' man so' ro', danj gaa 'ee rá nij snó'o man nicaj nij so' uún adonj. Ne'en soj se vaa ca'née nimán Jesucristó cavi' so' che'é ní' sij noco' man so', <sup>26</sup> che'é se me rá so' cata' ne ní' ne naruvii nimán ní' ne x'neē cacun' taj xraá ní' ne cunō ní' se-nana Diose ne cunū sa' ní' rihaan Diose, rá Jesucristó a. Danj me rá Jesucristó qui'yaj so' che'é taran' ní' sij noco' man so' adonj. <sup>27</sup> Ndaa síj, gaa ne vaa güii, ne cachron so' man ní' sij noco' man so' rihaan ma'an so', ne ve'é uxrá gaa taran' ní' ni'yaj so', ne a 'ó cacun' do', a 'ó se nij do', se quitáá xraá ní' a ma'. Maan se ase vaa vaa sa' Diose ro', danj gaa sa' taran' ní' adonj.

<sup>28</sup> Dan me se ase vaa 'yaj Jesucristó che'é ní' sij noco' man so' ro', danj qui'yaj uún nij snó'o che'é nicaj snó'o, ne ase vaa araya'anj snó'o man nee man ma'an so' ro', danj gaa caraya'anj so' man nicaj so' uún á. Dan me se ase vaa nee man ma'an ní' ro', danj vaa chana nicaj ní' rihaan ní', ne che'é dan me se sese araya'anj snó'o man nicaj snó'o, ne sí araya'anj man ma'an me uún so' nanj chuguanj. <sup>29</sup> Ne a 'ó yuvi se qui'yaj chi'ii

man nee man ma'an ma'. Tananj sese na'aan rque ní', ne ri' ní' se cha ní', ne aráya'anj uxrá ní' man nee man ní' nanj adonj. Dan me se ase vaa 'yaj Jesucristó aráya'anj Jesucristó man taran' ní' sij noco' man so' ro', danj inanj 'yaj uún ní' aráya'anj uxrá ní' man nee man ní' ei. <sup>30</sup> Dan me se ase vaa nee man ma'an Jesucristó ro', danj vaa taran' ní' sij noco' man so' rihaan so' uún adonj. <sup>31</sup> Ne nihánj me nana no rihaan danj Diose a: "Che'é dan tanáj snó'o man rej so' do', man nii so' do', ne ve'é nacaj snó'o man chana nica so', ne ase vaa orún' yuvij ro', danj gaa roj so' a", taj danj Diose a.

<sup>32</sup> Nana noco' ndo'o me nana nihánj nana tihaan naca Diose rihaan ní', ne a'mii nana nihánj che'é Jesucristó do', che'é taran' ní' sij noco' man so' do', nanj adonj. <sup>33</sup> Dan me se sese snó'o me soj, ne no xcúún 'o 'o soj gaa 'ee rá soj man nica soj, ne ase vaa aráya'anj soj man ma'an soj ro', danj gaa caraya'anj soj man nica soj ei. Ne chana ro', no xcúún chana caraa cochroj chana rihaan nica chana uún ei.

**6** Ne nij xnii noco' man sí' 'nij ra'a man ní' ro', no xcúún nij xnii ve'é cunō nij xnii rihaan rej xnii do', rihaan nii xnii do' ei. <sup>2</sup> Nihánj me 'o nana noco' taj xna'anj danj Diose rihaan ní' a: "Ve'é caraa cochróo so' rihaan rée so' do', rihaan ní' so' do' á", taj danj Diose rihaan ní', ne cata' tu'va Diose se vaa sese cunō ní' nana nihánj, ne sa' uxrá qui'yaj Diose che'é ní', ne orún' nana nihánj me nana ca'mii Diose asino yaan rihaan nu' yo'ó nij tuvi' nana nihánj adonj. <sup>3</sup> Dan me se cataj Diose se vaa sese danj qui'yaj ní' ndaa nihánj, gaa ne cavij sa' ní', ne guun que'ee doj güii cane ní' rihaan chumii nihánj a. Danj qui'yaj Diose che'é ní', sese cunō ní' rihaan rej ní' do', rihaan nii ní' do' adonj. <sup>4</sup> Ne sese rej xnii me soj, ne se ca'maan rá ta'ní' soj qui'yaj soj ma'. Tananj ve'é tacuachij soj man ta'ní' soj, ne dan me se tucu'yón soj suun man ta'ní' soj, ne tucu'yón soj se-nana sí' 'nij ra'a man ní' man ta'ní' soj á.

<sup>5</sup> Ne mozó ro', me se ve'é cunō so' rihaan se-ru'vee so', ne gaa ni'yanj nimán mozó, ne caraa cochroj uxrá mozó rihaan se-ru'vee mozó á. Ase vaa 'yaj mozó rihaan ma'an Jesucristó ro', danj qui'yaj uún mozó rihaan se-ru'vee mozó á. <sup>6</sup> Ne se qui'yaj mozó yo' se vaa 'yaj nij sí' vaa quij nimán ma'. Dan me se nij sí' vaa quij nimán ro', me rá nij so' gaa niha' rá se-ru'vee nij so' ni'yaj so' man nij so', tzaj ne inanj gaa ni'yaj ru'vee man nij so' 'yaj suun nij so', ne se guun qui'yaj soj danj ma'. Tananj 'o ca'nej nimán soj qui'yaj suun soj, ne guun rá soj se vaa se-mozó Jesucristó me soj, ne qui'yaj soj nu' se vaa me rá Diose qui'yaj soj á. <sup>7</sup> Guun niha' rá soj qui'yaj suun soj á. Se guun rá soj se vaa rihaan yuvij 'yaj suun soj mei. Tananj guun rá soj se vaa mozó 'yaj suun rihaan ma'an sí' 'nij ra'a man ní' me soj á. <sup>8</sup> Xcaj soj cuentá se vaa sese qui'yaj suun sa' ní', ne taj se 'yaj sese ca'vee se mozó me ní' do', ca'vee se nu-vee mozó me ní' do', taj se 'yaj mei. Dan me se ya naru'vee sí' 'nij ra'a man ní' che'é suun 'yaj suun sa' ní' nanj adonj.

<sup>9</sup> Ne soj sij ru'vee ro', me se ve'é qui'yaj uún soj ga se-mozó soj ei. Ca'ne' rá soj ga suun axrj yuva man mozó, ne ca'ne' rá soj ga suun tuchu'vi' man mozó uún á. 'O se ne'en soj se vaa nicun' sí' 'nij ra'a man soj do', man se-mozó soj do', rej xta', ne 'o cuyaan vaa taran' ní' rihaan so' adonj.

**Nana nihánj taj xna'anj daj qui'yaj ní', ne ca'vee qui'yaj canaán ní' rihaan sí' chree a**

<sup>10</sup> Taj vaj yo'ó nana cataj xna'anj 'unj rihaan soj, man tinuj, man nocoj. Yo' o gaa chre' soj ga sí' 'nij ra'a man ní' ei. Ca'vej soj ca'nej sí' 'nij ra'a man ní' se nucuaj nimán soj, ne daj se vaa se nucuaj nica ma'an so' ro', danj gaa se nucuaj nica ma'an soj, qui'yaj so' chuguanj. <sup>11</sup> Dan me se nu' se nucuaj rque Diose man soj ro', ca'nej soj se nucuaj yo' nimán soj, ne guun nucuaj soj qui'yaj canaán soj rihaan sí' chree gaa me rá sí' chree tiha' yu'unj sí' chree man soj ei. <sup>12</sup> 'O se nuvee inanj yuvij man rihaan chumii nihánj me nij sí' unu' ga soj mei. 'O se nij ya'anj rii ta'nga' rihaan chumii nihánj me nij sí' unu' ga soj, ne ase vaa nimán vaa nij so', ne vaj nij so' rque nana vaj xta' ndo'o, ne chi'ii ndo'o vaa nij so', ne yuvij man rihaan chumii nihánj cuano, tzaj ne vaj ndo'o nij so' rej rmi', ne che'é dan rii ta'nga' ndo'o nij ya'anj yo' rihaan nij so' adonj. <sup>13</sup> Che'é dan ca'nej soj nu' se nucuaj rque Diose man soj nimán soj, ne güii qui'yaj ndo'o sí' chree sayuun rihaan chumii nihánj ro', ne guun nucuaj soj qui'yaj canaán soj rihaan sí' chree ei. Ne asa' cunu' soj ga sí' chree yo', ne sí' gaa nucuaj doj rihaan sí' chree guun soj adonj.

<sup>14</sup> Dan me se nana' soj daj qui'yaj soj cunu' soj ga sí' chree yo' á. Uxrá canoco' soj nana ya, ne ase vaa nuj 'nij catuun tanuu ro', danj gaa nana yo' rihaan soj, ne guun nucuaj soj cunu' soj ga sí' chree yo' ei. Ne ca'vej soj cunu sa' nimán soj rihaan Diose, ne ase vaa aga' aráan nu' rucuaa tanuu ro', danj gaa se caráan nimán soj, qui'yaj Diose, gaa ne se guun nucuaj sí' chree qui'yaj chi'ii sí' chree yo' nimán soj a mei. <sup>15</sup> Ne gaa listó soj, ne cavij soj ca'anj soj, nata' soj se-nana Diose nana sa' rihaan yuvij, ne cunō nij yuvij nana sa' yo', ne cavij sa' nij yuvij, ne ve'é cayáan nij yuvij ga Diose, qui'yaj nana sa' yo' ei. Ne ase vaa canuj 'nij tacóo tanuu ro', danj gaa nana sa' yo' rihaan soj a. Qui'yaj canaán soj rihaan sí' chree qui'yaj nana sa' yo' adonj. <sup>16</sup> Ne niganj gaa nucuaj uxrá rá soj man Jesucristó, gaa ne ase vaa tanuu noco' rcuchra' manj ra'a ro', danj gaa ma'an soj uún, ne sese go' sí' chree chruun taj tanj ra aco' ya'an man soj, ne guun nucuaj soj tina'áj soj ya'an yo' chuguanj. <sup>17</sup> Ne guun ya rá soj se vaa quinanii soj rihaan sayuun, qui'yaj Diose, ne ase vaa nave aga' nuu ra a tanuu ro', danj gaa nana sa' cunuú ra soj, ne se guun nucuaj sí' chree qui'yaj sí' chree se chi'ii man soj, che'é se guun ya rá soj se vaa quinanii soj rihaan sayuun adonj. Ne canoco' uxrá soj se-nana Diose nana sa' nana rque Nimán Diose rihaan ní', ne ase vaa nee es-pada noco' ra'a tanuu ro', danj gaa se-nana Diose rihaan soj, ne guun nucuaj soj go' soj man sí' chree, qui'yaj se-nana Diose yo' adonj.

<sup>18</sup> Ne niganj cachinj ni'yaj uxrá soj rihaan Diose, ne racuj Nimán Diose man soj cachinj ni'yaj soj ei. Se ca'ne' rá soj ma'. Tananj a yo'o cachinj ni'yaj uxrá soj che'é taran' ní' sij sa' noco' man Diose ei. <sup>19</sup> Ne cachinj ni'yaj soj che'é ma'án 'unj se vaa rque Diose nana cuu ca'mij 'unj rihaan yuvij, ne sca' tiháan 'unj nu' se-nana Diose nana sa' rihaan nij yuvij á. Dan me se nana tihaan naca Diose man ní' me nana sa' yo', <sup>20</sup> ne nda' se numií 'unj aga' ne', tzaj ne 'unj me sí' quiri' suun nata' nana sa' yo' rihaan yuvij, ne cachinj ni'yaj soj rihaan Diose se vaa se cuchu'ví' 'unj ca'mij 'unj nana sa' yo' rihaan yuvij, che'é se no xcúun yá 'unj ca'mij sca' yá 'unj nana sa' yo' rihaan yuvij adonj.

**Nana nihánj taj xna'anj se vaa ca'neé Pabló man sí' cu'naj Tíquico cuchj' so' rihaan nij sí' man Efeso a**

<sup>21</sup> Cataj xna'anj tinúú ní' sí' cu'naj Tíquico rihaan soj nu' se vaa quirán' 'unj a. 'Ee ndo'o rá 'unj man so', ne

ve'é ndo'o 'yaj suun so' rihaan 'unj, che'é se sí' noco' man sí' 'nij ra'a man ní' me núj chuguanj. Ne a'ne' rá so' ga suun 'yaj suun ma'. Tananj 'o' 'yaj suun so' che'é se-nana Diose nanj adonj. <sup>22</sup> Ne me rá 'unj quene'en soj nu' se vaa quiran' núj, ne me rá 'unj quinari' nucuj nimán soj, ne che'é dan ca'nej 'unj man so' cuchj' so' rihaan soj ei.

**Nana nihánj taj xna'anj se vaa me rá Pabló qui'yaj ndo'o Diose se luj che'é nij sí' cuchumán rá ni'yaj man Jesucristó yanj chuman' Efeso a**

<sup>23</sup> Me rá 'unj gaa xej nimán nij tinuj nij soj, ne gaa 'ee rá soj tinúú soj, ne gaa nucuj rá soj man Diose, qui'yaj Rej ní' Diose do', qui'yaj Jesucristó sij 'nij ra'a man ní' do' adonj. <sup>24</sup> Ne me rá 'unj qui'yaj ndo'o Diose se luj che'é taran' nij soj sij yo'o aráj cochroj rihaan Jesucristó sij 'nij ra'a man ní' nu' cavii nu' ca'anj a.

# Filipenses

**1** Síí cu'naj Pabló gá síí cu'naj Timoteo me rój, ne síí 'yaj suun rihaan Jesucristó me rój, ne nihánj me se 'yaj rój yanj cartá nihánj ca'nej rój rihaan cunudanj nij soj sij sa' rihaan Diose nocó' man Jesucristó sij yanj chuman' cu'naj Filipos a. Me rá rój nayaá nij soj nayaá nij síí uun chij rihaan soj nayaá nij síí 'yaj suun che'é soj nayaá yanj cartá nihánj a.

<sup>2</sup> Dan me se me rá rój qui'yaj Rej ní' Diose qui'yaj Jesucristó sij 'nij ra'a man ní' qui'yaj se luj che'é nij soj, ne me rá rój gaa xej nimán nij soj qui'yaj roj so' a.

**Nana nihánj taj xna'anj se vaa achíín ni'yaj ndo'o Pabló rihaan Diose che'é nij síí cuchumán rá ni'yaj man Jesucristó yanj chuman' cu'naj Filipos a**

<sup>3</sup> Gaa na'nuj rá 'unj man nij soj, ne nagó' 'unj graciá rihaan Diose che'é soj a. <sup>4</sup> Ne gaa achíín ni'yaj rihaan Diose, ne uun niha' ndo'o raj gaa achíín ni'yaj che'é taran' soj rihaan Diose chuguanj. <sup>5</sup> Dan me se nagó' 'unj graciá rihaan Diose che'é se vaa gaa cuno soj se-nana Diose, ne yuun che'e racuíj soj manj cataj xna'anj cunudanj ní' se-nana Diose rihaan yuvii, ne veé danj 'yaj soj ndaa cuano ei. <sup>6</sup> Veé danj nagó' 'unj graciá rihaan Diose che'é soj che'é se guun ya raj se vaa ya uxrá guun che'e ya Diose qui'yaj suun ma'an Diose nimán soj, ne guun ya raj se vaa guun nucuaj soj tinavij soj nu' suun ca'ne' Diose rihaan soj, qui'yaj uún Diose, ne asa' quisij güii ca'na' uún Jesucristó rihaan chumii nihánj ro', ne quisij guee nu' suun vaa rihaan soj adonj. <sup>7</sup> Ne vaa che'é ya ca'mij danj che'é taran' nij soj, ese ya no xcúún soj chuguanj. Dan me se ya caráya'anj uxrá soj manj, ne gaa 'nij 'unj taga' do', gaa ca'mii 'unj rihaan nij síí na'vej rá cuno se-nana Diose do', gaa vaj 'unj rihaan nij síí nicaj suun che'é yan a'ne' nij so' cacun' che'ej do', gaa tucu'yón 'unj se-nana Diose man yuvii do', ne racuíj ndo'o cunudanj nij soj manj, ne che'é dan me se soj sij 'yaj suun gaj me se me ndo'o ya raj quene'enj man soj ei. <sup>8</sup> Ne Diose me síí ne'en ya se vaa ase vaa 'ee rá Jesucristó man nij soj ro', veé danj 'ee guee rá ma'anj man cunudanj nij soj chuguanj.

<sup>9</sup> Ne achíín ni'yaj rihaan Diose se vaa cunu 'ee doj rá soj tuvi' soj 'o 'o güii, ne sa' doj xcaj soj cuentá daj vaa 'o 'o rasuun, <sup>10</sup> gaa ne inanj chrej sa' doj narij soj canoco' soj nanj adonj. Ndaa síj, gaa ne asa' ca'na' uún Jesucristó rihaan chumii nihánj, ne sa' inanj gaa nimán soj, ne taj cacun' cytumé soj a ma'. <sup>11</sup> Dan me se ya guun soj yuvii cunu sa' nimán, ese ya qui'yaj canaán soj nacaj ndo'o soj rihaan cacun', ne dan me

se gaa güii ca'na' uún Jesucristó me se cataj nii se vaa sa' uxrá vaa Diose síí naqui'yaj sa' nimán soj adonj.

**Nana nihánj taj xna'anj se vaa cuno ndo'o yuvii se-nana Diose nana sa' a**

<sup>12</sup> Me rá 'unj xcaj nij soj cuentá se vaa cavii sa' doj se-nana Diose nana sa' che'é nu' sayuun quirán' 'unj, tinuj, nocoj. <sup>13</sup> Dan me se nij tanuu man tucua' suun do', cunudanj nij yuvii man nihánj do', ne'en nij so' se vaa 'nij 'unj taga' che'é se canocó' 'unj man Jesucristó, <sup>14</sup> ne yo'ó nij tinúú ní' síí nocó' man síí 'nij ra'a man ní' ro', nari' nucuaj nimán que'ee ndo'o nij so', che'é se ne'en nij so' se vaa 'nij 'unj taga', ne ne chu'vi' nij so' ca'mii nij so' se-nana Diose rihaan yuvii cuano ma'.

<sup>15</sup> Dan me se, ta'aj nij so' a'mii natáj se-nana Jesucristó che'é se uun xcoj ruvaa rá nij so' ni'yaj nij so' manj, tzaj ne yo'ó ta'aj nij so' a'mii natáj che'é se me inanj rá nij so' qui'yaj sa' nij so' adonj. <sup>16</sup> Nij síí sa' yo' ro', 'ee rá nij so' manj, ne ne'en nij so' se vaa cune' Diose manj ca'mij rihaan nij yuvii na'vej rá cuno nana sa' yo' a. <sup>17</sup> Tzaj ne yo'ó nij so' ro', me se che'é se guun xcoj ruvaa rá nij so' ni'yaj nij so' manj, che'é dan a'mii natáj nij so' se-nana Jesucristó, tzaj ne ne a'mii chij nij so' ma'. Maan se danj 'yaj nij so' che'é se me rá nij so' nanó doj rá 'unj che'é se 'nij 'unj taga' adonj. <sup>18</sup> Tzaj ne ca'vee se vaa nicá nimán ta'aj nij so' do', ca'vee se ne vaa nicá nimán ta'aj nij so' do', tzaj ne taj se 'yaj ma'. Maan se nata' cunudanj nij so' se-nana Jesucristó rihaan yuvii, ne che'é dan guun niha' raj adonj. Tzaj ne vaa güii, ne guun niha' doj rá yá 'unj nanj ei. <sup>19</sup> 'O se ne'én 'unj se vaa cavii sa' 'unj doj vaa güii, che'é nu' se vaa rán' 'unj nihánj adonj. Dan me se guun ni'yaj ní' che'é se achíín ni'yaj soj rihaan Diose che'é 'unj, ne guun ni'yaj ní' che'é se racuíj ya Nimán Diose manj, ne che'é dan cavii sa' yá 'unj doj ei.

**Nana nihánj taj xna'anj se vaa vaa i'na' Pabló che'é Jesucristó a**

<sup>20</sup> Dan me se daj chihaa mij se canó chrej na'aj rihanj, raj ma'. Ca'vee quitaj xta' rihanj ca'mij nana ya rihaan nij yuvii, ne dan me se guun ya raj se vaa se guun na'aj 'unj ma'. Dan me se asij rque ro', xcaj ndo'o yuvii cuentá se vaa sa' uxrá vaa Jesucristó, qui'yaj, ne ca'vee se gaa i'na' 'unj do', ca'vee se cavii 'unj do', tzaj ne danj inanj qui'yaj cuano nihánj, rá 'unj, ne se chuchuví' 'unj daj chihaa mij, rá 'unj ma'. <sup>21</sup> Vaa i'na' 'unj che'é Jesucristó, ne sese cavii 'unj che'é Jesucristó, ne cavii sa' 'unj doj, qui'yaj so' adonj. <sup>22</sup> Dan me se sese yo'ó gaa

i'na' 'un̄j rihaan chumīj nihánj, nē gaā ya'núj rihan̄j qui'yaj sunj che'é Jesucristó, nē che'é dan ne ne'en̄j ase sa' doj cavi' 'un̄j ni', ase sa' doj çanej ni', ne ne'en̄j daj qui'yáj ā mei. <sup>23</sup> 'O se sa' cuyāan vaa roj chrej chuguan̄j. Dan me se sese cavi' 'un̄j, nē quínán' 'un̄j rihaan Jesucristó, nē ve'é uxrá doj gaā uún nan̄j ei. <sup>24</sup> Tzaj nē achiin doj cayánj qui'tihan̄j se-nanā Diosē rihaan soj, <sup>25</sup> nē che'é dan ne'én' 'un̄j se vaa sē guun cavi' 'un̄j cuanō ma'. Māan se quinaj 'un̄j gā soj doj, nē raçūij 'un̄j man soj, nē sa' doj canoco' soj Diosē, qui'yáj adon̄j. Ndāa síj, gaā nē guun niha' doj rá soj rihaan Diosē adon̄j. <sup>26</sup> Dan me se asa' curihan̄j 'un̄j taga', nē quene'én uún soj manj, nē che'é dan ve'é uxrá doj ca'mij soj che'é Jesucristó ei.

**Nanā nihánj taj xna'an̄j se vaa ve'é qui'yaj suun ní' che'é Jesucristó a**

<sup>27</sup> Síi noco' se-nanā Jesucristó nanā sa' me nij soj, nē che'é dan cun̄o soj tucuaán yo', nē ve'é qui'yaj soj can̄e soj gā tinúú soj á. Nē sese cuchí' 'un̄j chiháan soj, nē quene'én 'un̄j se vaa cuyāan vaa rá cunudan̄j soj a. Dan me se nda' se sē cuchí' 'un̄j, tzaj nē nda' se nanā uun̄ cun̄oj se vaa cuyāan vaa rá cunudan̄j soj á. Dan me se cuyāan gaā rá soj, nē raçūij soj tinúú soj, nē yo'o qui'yaj suun soj che'é nanā sa' noco' ní' á. <sup>28</sup> Nē daj chihaā mij sē cuchu'vi' soj ni'yaj soj man nij síi taj ri'yun̄j man ní' ma'. Nē yo' me quene'én nij so' daj 'yaj soj, nē xcaj nij so' cuentá se vaa xa' ma'an̄ nij so', tzaj nē cacaā nij so' vaa güii, nē xa' soj, tzaj nē cavii sa' soj a. Veé dan̄j xcaj yā nij so' cuentá, qui'yaj Diosē nan̄j adon̄j. <sup>29</sup> Māan che'é Jesucristó qui'yaj ndo'o Diosē se luj rihaan soj se vaa cuchumán rá soj ni'yaj soj man Jesucristó qui'yaj ma'an̄ Diosē adon̄j. Tzaj nē yo'ó se luj qui'yaj Diosē me se ca'vej rá Diosē quiran' soj sayuun che'é Jesucristó, nē doj a ve'é gaā sese quiran' soj sayuun che'é so' adon̄j. Nē yo' me yo'ó se luj qui'yaj uún Diosē rihaan soj a. <sup>30</sup> Dan me se cuyāan vaa sayuun ran' soj gā sayuun rán' 'un̄j nan̄j ei. Tzaj nē aj ne'en̄ soj daj vaa canó tuvi' 'un̄j gā sayuun yo' adon̄j. Nē cuanō nihánj me se aj cuchí' uún nanā nihánj rihaan soj se vaa anó tuvi' uún 'un̄j gā sayuun nan̄j adon̄j.

**Nanā nihánj taj xna'an̄j se vaa ase vaa rá Jesucristó ro', dan̄j gaā rá ma'an̄ ní' uún a**

**2** Yā yā nari' nucaj nimán ní', 'yaj Jesucristó, rá soj na'. Yā yā uun niha' nimán ní', 'yaj tinúú ní' síi 'eē rá man ní', rá soj na'. Yā yā ve'é mán nu' nij tinuj ní', 'yaj Nimán Diosē, rá soj na'. Yā yā nuu 'eē rá ní' sij noco' man Jesucristó man tinúú ní' síi quiran' sayuun, rá soj na'. Dan me se nanā nihánj ro', me yā uxrá vaa nan̄j adon̄j. <sup>2</sup> Che'é dan qui'yaj soj ndaa vaa taj nanā nihánj, gaā nē guun niha' uxrá raj, nē dan me se cuyāan gaā nimán soj gā tinúú soj, nē cun̄u 'eē rá soj man tinúú soj, nē guun niha' uxrá raj adon̄j. <sup>3</sup> Sē guun xcoj ruvaā rá soj ni'yaj soj tinúú soj ma'. Sē guun rá soj se vaa cataj tinúú soj se vaa sa' uxrá vaa ma'an̄ soj ma'. Tzaj nē gaā nica' nimán soj, cataj soj se vaa sa' doj

vaa tinúú soj rihaan ma'an̄ soj á. <sup>4</sup> Sē caráya'an̄j soj man in̄an̄j ma'an̄ soj ma'. Tzaj nē caráya'an̄j 'o' 'o' soj man tinúú soj á.

<sup>5</sup> Ase vaa rá ma'an̄ Jesucristó ro', dan̄j gaā rá ma'an̄ soj uún á. <sup>6</sup> Nē Jesucristó me se Diosē yā me so', nē so' me síi n̄o xcuún guun chij ndo'o, tzaj nē nē guun niha' ndo'o rá so' guun chij so' ma'. <sup>7</sup> Tanan̄j ā tanáj so' nu' suun uun chij yo', nē guun so' yuvii guun so' se-mozó yuvii guun so', nē ase vaa yuvii ro', dan̄j vaa so' gaā ca'na' so' rihaan chumīj nihánj adon̄j. <sup>8</sup> Dan me se cunuu nica' nimán so', nē cuno so' ca'mii Diosē, nē ndaa ca'vej rá so' cachron̄ nii man so' rihaan rcutzē yā, nē veé dan̄j me nó so' gaā cavi' so' nan̄j adon̄j. <sup>9</sup> Che'é dan guun chij ndo'o so' rej xta', qui'yaj Diosē, nē guun so' síi gueē doj rihaan cunudan̄j yuvii, qui'yaj uún Diosē nan̄j adon̄j. <sup>10</sup> Che'é dan vaa güii, nē canicun' ruj cunudan̄j nij síi man̄ xta' do', nij síi man̄ rihaan chumīj do', nij síi man̄ rej rque yo'ó do', asa' cuno nij so' se-chuvii Jesucristó, <sup>11</sup> nē cataj yā nij so' se vaa ma'an̄ Jesucristó me síi 'nij ra'a man ní', nē quene'én nij so' se vaa sa' uxrá qui'yaj Rej ní' Diosē adon̄j.

**Nanā nihánj taj xna'an̄j se vaa qui'yaj suun ní' yan cun̄u sa' nimán ní' a**

<sup>12</sup> Che'é dan cun̄o soj ca'mij, tinuj, nocoj. Gaā cayáan 'un̄j gā soj, nē cuno soj nu' nanā ca'mij, nē qui'yaj suun uxrá soj che'é rej quinaj nu' chrej chi'ii uun chij nimán soj, nē cun̄u sa' nimán soj a. Cuanō nihánj me se nda' se nuví' 'un̄j yáan gā soj, tzaj nē me rá 'un̄j doj cun̄o soj a. Ase 'yaj xnii gaā chu'vi' xnii ni'yaj xnii rej xnii ro', dan̄j gaā qui'yaj soj cuchu'vi' soj ni'yaj soj Diosē, nē doj a qui'yaj suun soj che'é rej quinaj nu' chrej chi'ii uun chij nimán soj, nē cun̄u sa' nimán soj rihaan Diosē á. <sup>13</sup> Diosē me síi 'yaj suun nimán soj yan guun rá soj cun̄o soj se-nanā so', nē so' me síi qui'yaj guun nucaj soj qui'yaj soj nu' se vaa me rá so' qui'yaj soj adon̄j.

<sup>14</sup> A' ó güii sē ca'mii tu'va yuvē soj che'é tinúú soj ma'. In̄an̄j ve'é qui'yaj suun soj gā tinúú soj á. <sup>15</sup> Nē guun soj síi sa', nē taj cacun' cutumé soj rihaan Diosē mei. Nē nda' se cheé soj gā yuvii vaa quij nimán man rihaan chumīj nihánj cuanō, tzaj nē ve'é cun̄o soj rihaan Diosē, nē yo'o yā guun ta'nij Diosē man soj chuguan̄j. Dan me se ase vaa ve'é ndo'o vaa chuguan̄ yati' rej xta' ro', dan̄j ve'é uxrá quene'én yuvii man soj v̄aj soj rihaan chumīj nihánj, nē <sup>16</sup> raan canoco' soj se-nanā Diosē nanā 'yaj vaa i'na' nimán ní', gaā nē guun niha' raj ni'yaj 'un̄j man soj gaā güii ca'na' uún Jesucristó rihaan chumīj nihánj, che'é se quene'én so' se vaa qui'yaj suun uxraj tucuyon̄j man soj nē cavii sa' nu' suun qui'yaj sunj a.

<sup>17</sup> Nē nda' se ndaa ayanj ma'an̄ ton manj che'é sayuun rán' 'un̄j che'é se me ndo'o raj yo'o cuchuman̄ rá soj ni'yaj soj Diosē, tzaj nē guun niha' ndo'o raj, nē tucuačen̄j doj se niha' nuu niman̄j nimán soj ei. <sup>18</sup> Nē guun niha' rá soj uún, nē guun niha' rá 'un̄j che'é soj a.

**Nana nihánj taj xna'anj se vaa cuchi' síf cu'naj Timoteo do', síf cu'naj Epafrodito do', chuman' cu'naj Filipos a**

<sup>19</sup> Me rá 'unj ca'nej 'unj man síf cu'naj Timoteo cuchi' so' rihaan soj, sese ca'vej rá Jesucristó sij 'nij ra'a man ní' cuchi' so' a. Ne çanicaj so' ca'na' so' rihanj, ne cataj xna'anj so' rihanj ðaj quiran' soj, gaa ne guun niha' raj a. <sup>20</sup> Orún' so' me síf nanó ndo'o rá che'é soj ðaj ran' soj, ne taj vaj yo'ó síf sa' ase sa' orún' so' ma'. <sup>21</sup> Tzaj ne yo'ó nij so' ro', inanj che'é ma'an nij so' aráya'anj nij so', tzaj ne ne aráya'anj nij so' che'é Jesucristó ma'. <sup>22</sup> Tzaj ne aj ne'en soj se vaa síf sa' uxrá me síf cu'naj Timoteo, ne ðaj se 'yaj xnii 'yaj suun xnii ga rej xnii ro', ðanj vaa 'yaj Timoteo 'yaj suun so' che'é se-nana Diose gaj ei. <sup>23</sup> Che'é dan xcaj 'unj cuentá ðaj quirán' 'unj rej rihaan, gaa ne nu' ca'nej 'unj man so' cuchi' so' rej yanj soj a. <sup>24</sup> Ne nucuaj rá 'unj man síf 'nij ra'a man ní' se vaa ra'yanj cuchi' ma'anj rihaan soj adonj.

<sup>25</sup> Vaa che'é ndo'o ca'nej 'unj man tinúu ní' síf cu'naj Epafrodito cuchi' so' rihaan soj vaa nanj ei. So' me síf qui'yaj suun ndo'o gaj rej man síf taj ri'yunj man ní', ne ma'an nij soj me síf ca'née man so' ca'na' so' rque so' se vaa achiin manj, <sup>26</sup> ne me ndo'o rá so' quene'en uún so' man nij soj nanj adonj. Dan me se nanó rá so' se vaa cuno soj nana che'é so' se vaa canó chi'ii man so' adonj. <sup>27</sup> Ya ðaj doj se cavi' so', tzaj ne cunuu 'ee rá Diose man so', ne cunuu 'ee rá Diose man 'unj do', ne ne cavi' so' ma'. 'Q se sese cavi' síf cu'naj Epafrodito, ne nanó ndo'o raj nanj ei. <sup>28</sup> Che'é dan ra'yanj ca'nej 'unj man so' cuchi' so' rihaan soj, ne guun niha' rá soj quene'en soj man so', ne che'é dan se nanó rá 'unj che'é soj ma'. <sup>29</sup> Che'é dan asa' cuchi' so', ne gaa niha' ndo'o rá soj ca'mii soj ga so' ei. Dan me se ya tinúu ní' sij noco' man síf 'nij ra'a man ní' me so' ei. Caraa cochroj soj rihaan cunudanj nij yuvi 'yaj ndaa vaa 'yaj síf cu'naj Epafrodito yo' ei. <sup>30</sup> 'Q se ðaj doj se cavi' so' che'é suun qui'yaj suun so' che'é Jesucristó nanj adonj. Dan me se ca'née nimán so' cavi' so' che'é se nayón so' rihaan soj racuij so' manj nanj chuguanj.

**Nana nihánj taj xna'anj se vaa sa' doj vaa Jesucristó rihaan cunudanj a**

**3** Dan me se gaa niha' rá soj ni'yaj soj síf 'nij ra'a man ní', tinuj, nocoj. Ne sayuun vaa cachrón uún 'unj nana nihánj nayaa soj ma'. Ne cavii sa' doj soj, sese cunō soj nana nihánj chuguanj. <sup>2</sup> Dan me se tumé soj man soj sese cuchi' nij síf chi'ii, nij síf niha' rá ca'ne' nee man yuvi rej man soj á. 'Q se ase vaa chuvee ro', ðanj vaa nij so' adonj. <sup>3</sup> Ne xa' ní', tzaj ne ino 'yaj ní' ei. 'Q se síf ya cunuu sa' rihaan Diose me ní', ne inanj Nimán Diose noco' ní' gaa 'yaj suun ní' rihaan Diose adonj. Ne nucuaj rá ní' man ma'an ní' se vaa cavii sa' ní' che'é se vaa 'yaj ma'an ní' ma'. Tananj niha' rá ní' nata' ní' se vaa Jesucristó me síf 'yaj ca'vee cavii sa' ní' adonj.

<sup>4</sup> Dan me se nij síf chi'ii ro', sa' uxrá 'yaj ma'an nij so', rá nij so', ne che'é dan cavii sa' nij so' qui'yaj ma'an nij

so', rá nij so', tzaj ne 'unj nihánj me se sa' doj qui'yaj ma'anj rihaan nij so' ei. <sup>5</sup> Dan me se ya síf israelitá mej, ne gaa cachén tunj güii ca'ngaa 'unj, ne cuta' nii ta'nga' man nee manj a. Yo'o ta'nii ta'nij si'no síf cu'naj Benjamín gaa naá mej, ne xii 'unj do', réj do', ma'anj do', me síf a'mii xna'ánj hebreo, ne síf fariseo mej, ne canocó' 'unj se-tucuanj Moisés ga nij so' a. <sup>6</sup> Gaa rque doj, ne síf nichraj nimán mej, ne qui'yaj uxraj sayuun man nij síf noco' man Jesucristó, che'é se me raj guun niha' rá Diose ni'yaj Diose manj, ne ve'é uxrá canocó' 'unj nu' se-tucuanj Moisés, ne a 'ó nana yo' ne quinaj, qui'yaj ma'.

<sup>7</sup> Ne sa' uxrá qui'yaj, raj gaa rque, tzaj ne yaj ro', quene'enj se-nana Jesucristó, ne nu' rasuun qui'yaj gaa naá ro', ase vaa sigui' ri'yuj vaa nu' rasuun qui'yaj gaa naá, raj nanj ei. <sup>8</sup> Dan me se che'é se me ndo'o raj xcaj sa' 'unj cuentá che'é Jesucristó sij 'nij ra'a manj ro', che'é dan nu' se vaa qui'yaj gaa rque ro', ðaj se me raj ne'enj sigui' ri'yuj ro', ðanj me raj ne'enj man yo' cuano, ne che'é se ni'ya uun me yo' rihanj ro', che'é dan ca'vee canocó' 'unj man Jesucristó adonj. <sup>9</sup> Gaa ne vaa güii, ne cunuu sa' 'unj rihaan Diose, tzaj ne nuveé se-tucuanj Moisés me se qui'yaj cunuu sa' 'unj rihaan Diose man'. Maan se che'é se amán rá 'unj ni'yaj 'unj Jesucristó ro', che'é dan me cunuu sa' 'unj qui'yaj ma'an Diose adonj. <sup>10</sup> Inanj me rá 'unj sa' doj xcaj 'unj cuentá che'é Jesucristó á. Dan me se nucuaj Diose, ne cunuu i'na' uún Jesucristó gaa cavi' so', qui'yaj Diose, ne che'é dan me ndo'o raj quene'enj ðaj qui'yaj Diose che'é 'unj a. Ne ase vaa quiran' Jesucristó sayuun ro', ðanj gaa quiran' ma'an 'unj sayuun ga so', raj, ne ase vaa ca'vej rá Jesucristó cavi' so' che'é ní' ro', ðanj gaa 'unj, raj, ne yo'o qui'yaj sunj che'é tinúu 'unj rihaan Diose adonj. <sup>11</sup> Ndaa síj, gaa ne sese yo'o canocó' 'unj man so', ne ca'vee cunuu i'na' uún 'unj asa' cavi' 'unj, qui'yaj so' nanj adonj.

**Nana nihánj taj xna'anj se vaa qui'yaj suun uxrá ní', ne ca'anj ní' rej xta', qui'yaj Diose a**

<sup>12</sup> Nuveé se aj quisij 'unj cunuu sa' 'unj, taj 'unj ma'. Maan se ataa quisij 'unj se vaa me rá Diose gunj, ne che'é dan me yo'o raan noco' 'unj man Jesucristó, che'é rej me raj cunuu sa' 'unj, vaa güii a. Jesucristó me síf qui'yaj canocó' 'unj man so', che'é se me rá ma'an so' cunuu sa' 'unj adonj. <sup>13</sup> 'Unj me síf ne'en se vaa ataa quisij 'unj se me raj gunj, tinuj, nocoj. Che'é dan orún' suun vaa rihanj cuano nihánj me 'yaj tanaj xcō 'unj nu' se vaa qui'yaj asij rque, ne guun niha' uxrá raj qui'yaj nu' se vaa qui'yaj rej rihanj, <sup>14</sup> ne 'yaj suun uxraj, ne ca'na' güii qui'yaj cananj qui'yaj Diose, ne cavii sa' 'unj, qui'yaj Diose, ne nacunj Diose manj cavii 'unj rej xta', che'é se 'unj me síf noco' man Jesucristó adonj. <sup>15</sup> Ne sese aj cuchumán sa' rá ní', ne inanj ðanj gaa rá taran' ní' á. Tzaj ne sese ino vaa rá nij soj, ne Diose me síf tijaan rihaan soj me ma'an nana cachijn rihaan soj a. <sup>16</sup> Tzaj ne tucuaán aj nari' ní' ro', raan canoco' ní' tucuaán yo' á.

<sup>17</sup> Xcaj nij soj cuentá daj 'yaj ma'anj do', daj 'yaj nij síf noco' manj do', ne cuyaañ danj qui'yaj soj ga núj á. <sup>18</sup> Ino vaa rá que'ee yuvii, ne aj cataj xna'anj uxraj rihaan soj che'é nij so', ne nihánj me cataj xna'anj uún 'unj rihaan soj daj vaa nij so', tzaj ne 'o se ta'vee 'unj che'é nij so' nanj adonj. Dan me se cavi' Jesucristó che'é ní' rihaan rcutze, tzaj ne me rá nij so' tirí' nij so' se vaa qui'yaj Jesucristó che'é ní' adonj. <sup>19</sup> Vaa güii ca-cañ ndo'o nij so' ei. Inañj nee man nij so' aráya'anj nij so', tzaj ne Diose ne noco' nij so' ma'. Nij 'yaj nij so', tzaj ne ne na'aj nij so' ma'. Tzaj ne sa' uxrá 'yaj nij so', rá ma'an nij so' chuguñj. Inañj che'é rasuun ruvi' rihaan chumii nihánj xcaj nij so' cuentá nanj adonj. <sup>20</sup> Xa' ní', tzaj ne ino vaa ní', ne chiháán ní' me rej xta', ne na'vij uxrá ní' cavii Jesucristó sij 'nij ra'a man ní' rej xta' ca'na' so' tñanii so' man ní' rihaan sayuun, <sup>21</sup> ne nñcaj so' nee man ní', ne nda' se ninaj uxrá nee man ní' cuano, tzaj ne natuna so' man yo', ne ase vaa nee man so' nee sa' ndo'o ro', danj inañj gaa nee man ní', qui'yaj so' adonj. Dan me se che'é se me so' síf guun nucuaj qui'yaj canaán rihaan cunudañj rasuun, ne che'é se quirii ta'nga' so' rihaan cunudañj rasuun ro', che'é dan ne'en ní' se vaa guun nucuaj so' natuna so' man nee man ní' ei.

**4** Dan me se 'ee ndo'o raj man soj, ne me uxrá raj ni'yaj 'unj man soj, tinuj, nocoj. Nihá' ndo'o raj, qui'yaj soj, ne vaa güii cataj Diose se vaa sa' uxrá qui'yaj, tucu'yón 'unj man soj, ne che'é dan vaa che'é cunō soj nu' nana nihánj, ne raan canoco' soj man síf 'nij ra'a man ní', tinuj, nocoj.

**Nana nihánj taj xna'anj se vaa nago' Pabló chrej sa' man nij síf cuchumán rá ni'yaj man Jesucristó yanj chuman' cu'naj Filipos a**

<sup>2</sup> Achíin ni'yáá 'unj rihaan chana cu'naj Evodia do', rihaan chana cu'naj Síntique do', se vaa yo'o cuyaañ gaa rá roj no', che'é se chana noco' man síf 'nij ra'a man ní' me roj no' á. <sup>3</sup> Vaa so', ne tuvi' 'unj síf sa' noco' raan man Diose mé so', ne síf 'yaj suun ga 'unj me uún so', ne dan me se achíin ni'yaj rihaan so' racuíj so' man roj chana yo', tinuj. Roj chana nihánj ga yo'ó síf cu'naj Clemente do', yo'ó nij tinúú 'unj do', qui'yaj suun ndo'o nij so' racuíj nij so' mán 'unj ca'mii núj se-nana Diose nana sa' rihaan yuvii, ne no se-chuvii nij so' rihaan yanj taj rihaan Diose se vaa gaa i'na' nij so' rihaan Diose nu' cavii nu' ca'anj ei.

<sup>4</sup> Gaa niha' nigañj rá soj ni'yaj soj man síf 'nij ra'a man ní' á. Dan me se cataj xna'anj uún 'unj rihaan soj se vaa no xcúun soj gaa niha' nigañj rá soj ei.

<sup>5</sup> Inañj ni'yanj ca'mii soj rihaan cunudañj yuvii man rihaan chumii nihánj, ne xcaj nij yuvii cuentá se vaa síf sa' me soj á. Nichrun' ca'na' uún síf 'nij ra'a man ní' nanj adonj. <sup>6</sup> Se nanó rá soj mei. Tzaj ne cachinj ni'yaj soj rihaan Diose, ne me ma'an rasuun achiin man soj, ne cachinj soj rihaan Diose, ne nago' soj graciá rihaan Diose ei. <sup>7</sup> Danj qui'yaj soj, gaa ne yo'o gaa díñj nimán soj, qui'yaj Diose, che'é se sij noco' man Jesucristó me soj, ne dan me se guun nucuaj Diose qui'yaj canaán

Diose rihaan cunudañj nana cavii raá yuvii nanj adonj.

<sup>8</sup> Dan me se inañj che'é se ya do', che'é se sa' do', che'é tucuáán sa' do', che'é se luñ do', che'é se nica vaa nimán do', che'é se ni'yanj do', nuchruj raá soj, tinuj, nocoj. Dan me se sese ve'é vaa se 'yaj yo'o so' rá soj, ne xcaj soj cuentá, ne nuchruj raá soj daj 'yaj so' ei. <sup>9</sup> Nu' nana tucu'yón 'unj man soj do', nu' rasuun qui'yáá 'unj quene'en soj do', nu' nana ca'mii 'unj cuno soj do', danj qui'yaj uún soj á. Gaa ne cayáán ma'an Diose ga soj, ne Diose me síf naqui'yaj díñj nimán yuvii ei.

**Nana nihánj taj xna'anj se vaa sa' uxrá qui'yaj nij síf cuchumán rá ni'yaj man Jesucristó yanj chuman' Filipos racuíj nij so' man Pabló a**

<sup>10</sup> Guun niha' ndo'o raj rihaan síf 'nij ra'a man ní', che'é se yo'ó uun che'e soj caráya'anj soj manj ne rque soj nu' se vaa cachiin manj ei. 'O se ne taj 'unj rihaan soj se vaa ne racuíj soj manj ma'. Maan se gaa rque me se ne gaa ya'núj rihaan soj racuíj soj manj man adonj. <sup>11</sup> Nuveé che'e se vaa doj rasuun achiin manj me tu'vaj danj rihaan soj cuano ma'. Nda' se doj rasuun man rihanj, tzaj ne ne nanó rá 'unj ma'. 'O se aj narí' 'unj naqui'yaj inaj 'unj nimanj, ne niha' inañj raj nanj adonj. <sup>12</sup> Dan me se vaa güii achiin ndo'o rasuun manj, ne vaa güii vaa ndo'o rasuun rihanj, tzaj ne ca'vee se vaa raan rquej do', ca'vee se na'aan rquej do', ca'vee se vaa se achiin manj do', ca'vee se man ndo'o rasuun rihanj do', tzaj ne taj se 'yaj ma'. Maan se daj a güii vaa inaj nimanj, ne vaa niha' raj, ne ne nanó raj ma'. <sup>13</sup> Che'é se rque ndo'o Jesucristó se nucuaj manj ro', che'é dan uun nucuaj 'yaj sunj nu' suun vaa rihanj adonj.

<sup>14</sup> Tzaj ne cunaj uxrá qui'yaj soj racuíj soj manj gaa quirán' 'unj sayuun gaa rque chuguñj. <sup>15</sup> Ne'en ma'an soj se vaa gaa curihanj 'unj estadó Macedonia ne guun che'ej tucu'yonj se-nana Diose, ne nu' rque soj sa'anj manj cuaj nanj niha'. Taj vaj yo'ó yuvii cuchumán rá ni'yaj man Jesucristó racuíj manj ma'. Maan se orún' soj me síf racuíj manj nanj niha'. <sup>16</sup> Ne gaa cayánj qui'yaj sunj chuman' Tesalónica, ne yavij nu' rque uún soj sa'anj cachiin manj rihanj a'. <sup>17</sup> Nuveé che'e se me raj rque uun soj doj sa'anj manj me tu'va uún 'unj danj nihánj cuano ma'. Maan se che'é se me raj naru'vee Diose doj se sa' rihaan soj, che'é dan tu'vaj danj adonj. <sup>18</sup> Dan me se nacaj 'unj cunudañj se vaa ca'née soj rihanj, ne a 'ó rasuun ne achiin manj a ma'. Ne sa'anj ca'née soj rihanj ga síf cu'naj Epafrodito me se narqué so' nu' sa'anj yo' rihanj, ne guun niha' rá Diose ne'en Diose se vaa rque soj sa'anj yo' manj, ne ase vaa xcuu sa' acaa rihaan chraan altar, ne daj ndo'o gun' yo' ro', danj vaa sa'anj yo' ni'yaj Diose adonj. <sup>19</sup> Dan me se 'unj me síf noco' man Diose, ne sese vaa se achiin man soj, ne rque Diose nu' rasuun yo' rihaan soj che'é se me soj síf noco' man Jesucristó, ne xa' Diose, tzaj ne taj vaj rasuun achiin rihaan Diose ma'. 'O se so' me síf uun hij rihaan cunudañj rasuun, <sup>20</sup> ne ve'é uxrá uun chij

Rej ní' Dioŕe, cataj ní' nŭ' cavii nŭ' ca'anj adonj. Veé danj gaa ya ei.

**Nana nihánj taj xna'anj se vaa ve'é cumañ nij síí cuchumán rá ni'yaj man Jesucristó yanj chuman' cu'naj Filipos, rá nij tuvŭ' Pabló a**

<sup>21</sup> Me raj cataj nij soj rihaan cunudanj nij síí sa' rihaan Dioŕe síí noco' man Jesucristó se vaa ve'é çayáán nij

so' raj, ne vaa nij tinúú ní' síí mañ gaj, ne ve'é cumañ nij soj, rá nij so', <sup>22</sup> ne vaa nij síí sa' noco' man Dioŕe mañ chuman' nihánj, ne ve'é cumañ soj, rá daj a nij so' uún, ne vaa nij síí 'yaj suun tucúa síí nicaj suun emperador cu'naj César, ne ve'é cumañ soj, rá nij so' uún adonj.

<sup>23</sup> Me raj qui'yaj ndo'o Jesucristó sŭj 'nij ra'a man ní' se luŭj che'é soj ei.



# Colosenses

**1** 'Unj ro', me síí cu'naj Pabló, ne sij apóstol cune Jesucristó man nata' se-nana so' rihaan yuvii mej ndaa vaa guun rá Diosé, ne yanj tinú' Timoteo ga 'unj cuano a.

<sup>2</sup> 'Yaj rój yanj nihánj ca'nej rój rihaan nij soj sij sa' nocó' man Diosé yanj chuman' cu'naj Colosas a. Che'é se amán rá soj ni'yaj soj man Jesucristó ro', che'é dan nuu tinuj ní', ne nucuaj rá rój ne'en rój man soj cuano, tinuj, nocoj.

Me rá rój qui'yaj Rej ní' Diosé se luj che'é soj, ne me rá rój gaa xej nimán soj, qui'yaj Diosé uún ei.

**Nana nihánj taj xna'anj che'é se vaa achíín ni'yaj Pabló rihaan Diosé che'é nij síí cuchumán rá ni'yaj man Diosé yanj chuman' Colosas a**

<sup>3</sup> Niganj achíín ni'yaj rój rihaan Diosé Rej Jesucristó sij 'nij ra'a man ní' che'é soj, ne nago' rój graciá rihaan Diosé che'é soj, <sup>4</sup> che'é se ca'na' nana rihaan rój se vaa amán rá soj ni'yaj soj man Jesucristó ne 'ee rá soj ne'en soj cunudanj yo'ó nij síí sa' nocó' man Diosé a.

<sup>5</sup> Danj vaa rá soj cuano, che'é se cuno soj se-nana Jesucristó nana ya, ne guun ya rá soj se vaa man ndo'o se sa' rej xta' nacaj soj vaa güii ei. <sup>6</sup> Dan me se aj cuchi' nana sa' nihánj rihaan cunudanj nij yuvii man rihaan chumii, ne cuchumán rá que'ee nij yuvii cuno nij yuvii nana sa' yo', ne 'o' cuyaaj qui'yaj nij soj ga yo'ó nij síí cuno nana yo', ne dan me se gaa cuchi' nana nihánj rihaan soj, ne cuno soj, ne xcaj soj cuentá che'é se luj qui'yaj Diosé che'é ní', ne cuchumán rá soj adonj. <sup>7</sup> Ne síí cu'naj Epafras me síí tucu'yón nana yo' man soj, ne dan me se síí 'yaj suun ga núj me so', ne 'ee rá núj man so', ne yo'q' 'yaj suun so' rihaan Jesucristó che'é soj adonj. <sup>8</sup> Ne cataj xna'anj so' rihaan núj se vaa 'ee uxrá rá soj man tinúú soj, qui'yaj Nimán Diosé adonj.

<sup>9</sup> Che'é dan gaa cuno núj nana cataj so' rihaan núj, ne niganj achíín ni'yaj núj rihaan Diosé che'é soj se vaa rque Nimán Diosé nana sa' cuu nimán soj, ne xcaj soj cuentá daj me rá Diosé qui'yaj soj, <sup>10</sup> che'é rej qui'yaj soj nu' se vaa no xcuún ní' sij nocó' man síí 'nij ra'a man ní' qui'yaj ní', ne guun niha' rá Diosé ni'yaj Diosé man soj ei. Ne cunudanj suun sa' qui'yaj suun ndo'o soj, gaa ne sa' doj xcaj soj cuentá daj vaa ma'an Diosé ei. <sup>11</sup> Diosé me síí uun chij ndo'o, ne achíín ni'yaj núj se vaa ca'nej ndo'o Diosé se nucuaj nimán soj, gaa ne ca'vee gaa raan rá soj rihaan sayuun qui'yaj yuvii man soj, ne gaa inaj nimán soj, ne gaa niha' rá soj, <sup>12</sup> ne nago' soj graciá rihaan Diosé Rej Jesucristó ei. Nu' dan me se vaa achíín ni'yáá 'unj rihaan Diosé che'é soj, ne

ne'en soj se vaa aj cunuu sa' ní' qui'yaj Diosé, ne che'é dan me vaa güii quirí' ní' se sa' rque Diosé man taran' nij síí sa' nocó' man so', che'é se yuvii xcaj cuentá chéé rej ranga' me ní' chuguaj. <sup>13</sup> Asino yaan me se guun chij síí chree rihaan ní', ne inanj cacun' qui'yaj ní', ne ase vaa síí chéé rej rmi' ro', danj vaa ní', ne taj se qui'yá' xcaj ní' cuentá che'é Diosé tzaj ma'. Tzaj ne yaj me se tinanii Diosé man ní' rihaan síí chree, ne guun chij Jesucristó ta'níí Diosé rihaan ní', qui'yaj Diosé yaj ei. Dan me se 'ee ndo'o rá Diosé man ta'níí so', <sup>14</sup> ne che'é ta'níí so' navij cacun' tumé ní', ne che'é dan se qui'yaj Diosé sayuun man ní' a man adonj. Tananj tinanii Jesucristó man ní' rihaan sayuun adonj.

**Nana nihánj taj xna'anj me síí me Jesucristó a**

<sup>15</sup> Ne ruvi' Diosé ni'yaj yuvii ma'. Maan se quene'en ní' man Jesucristó, ne xcaj ní' cuentá daj vaa ma'an Diosé adonj. Asij ataa qui'yaj Diosé chumii, ne aj nicun' Jesucristó ga so' ei. <sup>16</sup> Dan me se nicun' Jesucristó ga Diosé gaa qui'yaj Diosé se man xta' do', se man rihaan chumii do', nu' rasuun ruvi' ni'yaj yuvii do', nu' rasuun ne ruvi' ni'yaj yuvii do', nij ya'anj uun chij rihaan chumii nihánj do', cunudanj rasuun yo' me se qui'yaj Diosé á. Dan me se ca'ne' Diosé suun rihaan Jesucristó qui'yaj Jesucristó nu' rasuun, ne che'é dan qui'yaj Jesucristó nu' rasuun yo', ne inanj che'é Jesucristó vaa nu' rasuun yo', ne dan me se me rá Diosé nicaj yu'unj Jesucristó man chumii nanj adonj. <sup>17</sup> Asij ataa curuvi' rasuun man rihaan chumii nihánj, ne nicun' Jesucristó, ne che'é orún' Jesucristó vaa cunudanj rasuun yo' cuano ei.

<sup>18</sup> Ne so' me síí uun chij ndo'o rihaan ní' ei. Dan me se ase vaa rii ta'nga' cúú yave yuvii rihaan ma'an yuvii ro', danj vaa rii ta'nga' Jesucristó rihaan cunudanj ní' sij nocó' man so' chuguaj. Asino so' me síí cunuu i'na' uún gaa cavi' so', ne danj inanj gaa cunuu i'na' uún ní', qui'yaj so', gaa ne guun so' síí sa' doj rihaan cunudanj ní' ei. <sup>19</sup> Ase vaa ma'an Diosé ro', danj vaa Jesucristó, qui'yaj Diosé, ne so' me síí nicaj cunudanj se sa' ei. <sup>20</sup> Asino quiri' nu' chumii rihaan Diosé che'é cacun' qui'yaj yuvii, tzaj ne cavi' Jesucristó rihaan rcutze che'é yuvii, qui'yaj Diosé, ne ca'vee cunuu sa' yuvii do', nu' chumii do', rihaan Diosé, ne guun niha' rá Diosé ni'yaj Diosé nu' se man rihaan chumii do', nu' se man xta' do', nanj adonj. Yo' me se vaa qui'yaj Diosé gaa ca'née Diosé man Jesucristó rihaan chumii nihánj nanj adonj.

**Nana nihánj taj xna'anj se vaa cunuu rcua'aan ní' ga  
Diose, qui'yaj Jesucristó a**

<sup>21</sup> Gaa naá me se yuvii yanij me soj, ne yuvii taj ri'yunj man Diosé me soj gaa naá ei. 'Q se quij vaa rá soj, ne inanj se chi'ii qui'yaj soj, ne síf taj ri'yunj man Diosé guun soj gaa rque che'é se ne guun soj tuvi' Diosé gaa rque ma'. <sup>22</sup> Tzaj ne guun Jesucristó yuvii, ne cavi' so', ne che'é dan cunuu rcua'aan soj ga Diosé, qui'yaj so', ne vaa güii canicun' soj rihaan Diosé, qui'yaj Jesucristó, ne sij sa' guun soj rihaan Diosé, ne taj cacun' cutumé soj a ma'. <sup>23</sup> Dan me se cavii sa' soj, sese yo'o canoco' soj se-tucuanj Jesucristó nanj adonj. Raan canoco' soj man so' ei. Aj cuno soj se-nana Diosé nana sa', ne che'é dan guun ya rá soj se vaa cavii sa' soj, ne se guun cataj soj se vaa ne ya vaa nana sa' cuno soj ma'. 'Q se nana ca'mii natáj nii rihaan cunudanj nij yuvii man rihaan chumii me nana sa' yo', ne 'unj nihánj me síf a'mii natáj se-nana Diosé nana sa' yo' rihaan yuvii nanj adonj.

**Nana nihánj taj xna'anj che'é suun 'yaj suun Pabló  
che'é nij síf cuchumán rá ni'yaj man Jesucristó a**

<sup>24</sup> Aj quirán' 'unj sayuun che'é nij soj, ne nihánj me guun niha' raj che'é sayuun rán' 'unj á. Dan me se ase vaa sayuun quiran' Jesucristó che'é nij síf noco' man so' ro', danj vaa sayuun ran' ma'an 'unj che'é nij soj sij noco' man so' a. <sup>25</sup> Síf 'yaj suun che'é nij soj sij noco' man Jesucristó mej, ne Diosé me síf cune' mán 'unj nata' 'unj cunudanj se-nana Diosé rihaan nij soj a. <sup>26</sup> 'Q vaa yuve se-nana Diosé nana sa' gaa naá, tzaj ne ndaa yaj me tinaruvi' sa' Diosé nu' se-nana Diosé nana sa' rihaan ní' sij sa' noco' man so' yaj ei. <sup>27</sup> Dan me se guun rá Diosé xcax cunudanj ní' sij sa' noco' man so' cuentá che'é nana naca nihánj se vaa sa' uxrá qui'yaj Diosé che'é soj sij yanij nanj adonj. Dan me se nuveé yuvii israelitá me nij soj ma'. Yuvii yanij me soj, tzaj ne yanj Jesucristó nimán soj, ne che'é dan guun ya rá ní' se vaa vaa güii cavii sa' uxrá soj ga Diosé nanj adonj. <sup>28</sup> Ne ma'an núj me síf nata' rihaan cunudanj yuvii che'é Jesucristó, ne nago' núj chrej nucuaj man nij yuvii se vaa canoco' nij yuvii man Jesucristó, ne tucu'yón núj nana sa' cuu rihaan cunudanj yuvii, che'é rej gaa asa' cachrón núj man nij so' rihaan Diosé, ne sa' inanj gaa nij so', che'é se sa' uxrá noco' nij so' man Jesucristó a. <sup>29</sup> Che'é dan 'yaj suun uxraj tucu'yónj se-nana Jesucristó a. Ne danj 'yá che'é se nucuaj do', nana sca' nuu nimanj qui'yaj Jesucristó do' ei.

**2** Me rá 'unj quene'en nij soj se vaa 'yaj suun ndo'oj che'é soj do', che'é nij síf amán rá ni'yaj man Jesucristó yanj chuman' Laodicea do', che'é yo'ó nij yuvii amán rá yuvii ataa quene'en manj do' a. <sup>2</sup> 'Q se rquee ndo'oj nari' nucuaj nimán soj ne yo'ó cunuú se sa' nimán soj cumán soj ga tuvi' soj, ne yo'ó nari' ndo'ó soj ndaa guun ya ya rá soj nana naca se vaa Jesucristó me se veé ma'an so' me nana naca yo' ei. <sup>3</sup> Dan me se veé rihaan Jesucristó me mán sa' cunudanj rasuun cuu

do', rasuun sa' do', nu' yo'ó rasuun achiin quene'en yuvii do' ei.

**Nana nihánj taj xna'anj se vaa se cuno ní' nana tiha'  
yu'unj a. 'Q se inanj Jesucristó canoco' ní' a**

<sup>4</sup> Nana nihánj me taj xna'anj 'unj rihaan nij soj che'é se na'vej rá 'unj tiha' yu'unj yuvii man soj a. Dan me se vaa yuvii me rá caxrii nana chi'ii rque soj, tzaj ne me rá 'unj caráan 'unj chrej rihaan nij yuvii se vaa se qui'yaj nij so' danj ga soj ma'. <sup>5</sup> Nda' se nuvi' 'unj nicun' ni'yaj soj, tzaj ne nicun' nimán 'unj ga soj chuguanj. 'Q se guun niha' uxrá ya raj se vaa 'o sa' mán soj, ne yo'ó Jesucristó nucuaj rá soj, mán soj ei. <sup>6</sup> Dan me se nda' rá se guun rá soj gaa guun che'e soj canoco' soj man Jesucristó ro', danj guun rá soj yo'ó canoco' chre' soj man so' ei. <sup>7</sup> Dan me se yo'ó guun xej soj rihaan so', ne yo'ó canicun' raan soj rihaan so', ne yo'ó cunó soj rihaan so', ne tucu'yón uxrá soj tucuáan tucu'yón núj man soj, ne yo'ó so' cuchumán rá soj ni'yaj soj, ne nago' uxrá soj gracia rihaan Diosé á.

<sup>8</sup> Tumé soj man soj se gaa nanj tiha' yu'unj yuvii man soj á. Me rá nij yuvii canoco' soj se-tucuanj nij so', tzaj ne nuvi' yu'vee nó se-tucuanj nij so' rihaan tucuáan sa' noco' ní' mei. Maan se nana tiha' yu'unj me nana a'mii nij so', ne se quinanii soj rihaan cacun' tumé soj, qui'yaj nana yo' a man adonj. Maan se nana yo' ro', nana tucu'yón nanj tuvi' nij yuvii rihaan nij yuvii me nana yo', ne se-nana nij ya'anj man rihaan chumii nihánj me nana yo', tzaj ne nuveé se-nana Jesucristó me nana yo' ma'. <sup>9</sup> 'Q se ase vaa ma'an Diosé ro', danj vaa Jesucristó, tzaj ne vaa nee man Jesucristó, ne che'é dan ruvi' Jesucristó rihaan ní', ne ne'en ní' Jesucristó, ne xcax ní' cuentá daj vaa ma'an Diosé uún chuguanj. <sup>10</sup> Ne Jesucristó me síf guun chij rihaan nij ya'anj man rihaan chumii nihánj, ne yanj Jesucristó ga soj, ne che'é dan taj se achiin man soj cuano mei. <sup>11</sup> Tananj uún, ne maan che'é se nuu rcua'aan soj ga Jesucristó ro', maan che'é dan aj táa ta'nga' sa' inanj man soj vaa ei. Nuveé ta'nga' taj nee man yuvii me ta'nga' yo' ma'. Ta'nga' 'yaj ca'vee tanáj soj nu' rasuun chi'ii me yo' adonj. 'Q se che'é yan tanáj soj nu' rasuun chi'ii ro', che'é dan ase vaa táa ta'nga' man soj vaa ya ei. <sup>12</sup> 'Q se gaa cata' ne soj, ne ase vaa cachin' nii man Jesucristó rque yo'ó rque va'nuy güii ne na'núj uún so' ro', danj vaa soj, che'é se cuchumán rá soj se vaa veé ya Diosé sij nucuaj ndo'o qui'yaj ya cunuu i'na' ya uún Jesucristó ei.

<sup>13</sup> Gaa naá gaa ataa quene'en soj sij yanij man Jesucristó, ne qui'yaj ndo'o soj cacun', ne taj ta'nga' cuta' nii man nee man soj ma'. Tzaj ne ca'néj uun Diosé nu' cacun' taj xráa ní', ne ase vaa cunuu i'na' uún Jesucristó gaa cavi' so' ro', danj vaa soj, ne yo'ó cunuu sa' nimán soj, qui'yaj Diosé ei. <sup>14</sup> Ne dan me se tinavij so' nu' suun vaa rihaan ní' suun cunó ní' nu' se-tucuanj Moisés, ne xa' se-tucuanj Moisés yo', tzaj ne que'ee ndo'o nana ne guun nucuaj ní' qui'yaj ní' ndaa vaa taj tucuáan yo' a ma'. 'Q se che'é se ne guun nucuaj ní' cunó ní' nu' tucuáan yo' ro', che'é dan cutumé ndo'o

ní' cacun', qui'yaj yo' adonj. Tzaj ne gaa go' nii caquí' ra'a Jesucristó ne cachrón nii man so' rihaan rcutze, gaa ne Diose me sí tinavij man nu' suun vaa rihaan ní' cunqo ní' nu' se-tucuaj Moisés yo' adonj. <sup>15</sup> Maan che'é rasuun sa' qui'yaj Jesucristó ro', maan che'é dan qui'yaj canaán Diose rihaan taran' nij ya'anj man rihaan chumii nihánj, ne tihaan so' man nij so' se vaa daj chihaa míj se guun nucuaj nij ya'anj yo' guun chij nij yo' rihaan ní' ma'. Dan me se che'é se cavi' Jesucristó rihaan rcutze ro', che'é dan qui'yaj canaán Diose man cunudanj nij ya'anj man rihaan chumii nihánj, ne yo'o caxríj yuve Diose man nij ya'anj man nihánj vaa, ne guun na'aj ndo'o taran' nij ya'anj yo', qui'yaj Diose chuguanj.

<sup>16</sup> Che'é dan se ca'vej rá soj cataj xna'anj yuvii rihaan soj daj qui'yaj soj ma'. Se guun cataj yuvii me rasuun se ca'vee cha soj do', me rasuun se ca'vee co'o soj do', me güii quinaavij rá soj cha'anj do', daj qui'yaj soj güii naránj rá soj do' ma'. Se ca'vej soj cataj xna'anj yuvii daj qui'yaj soj mei. <sup>17</sup> Tucuáan tucuyón nij yuvii rihaan soj ro', tucuáan yo' me se canoco' ní' nu' israelitá gaa naá, ne xcaj nij so' cuentá daj gaa qui'yaj ní' gaa cayáan ní' ga Diose nu' cavii nu' ca'anj, qui'yaj tucuáan yo', tzaj ne yaj ro', che'é Jesucristó me se xcaj ní' cuentá sa' doj, se vaa ma'an so' canoco' ní' nu' cavii nu' ca'anj, ne taj che'é canoco' ní' yo'ó tucuáan cuano ma'. Tananj orún' so' canoco' ní' nanj adonj.

<sup>18</sup> Se ca'vej soj quirí' soj qui'yaj nij síj taj se vaa nica' ndo'o a'mii nij so' mei. Ca'vee se cataj nij so' se vaa na'viij nij so' rihaan se-mozó Diose do', ca'vee se nucui' ndo'o rá nij so' se vaa ne'en nij so' rasuun tihaan Diose rihaan nij so' taj nij so' do', tzaj ne tu'va rma'an nij so', ne maan rasuun avii raá ma'an nij so' me tu'va rma'an nij so' danj ei. <sup>19</sup> Dan me se taj cúu yave nij so' táá gaán chihá nij so' vaa, ese taj Jesucristó rihaan nij so' mei. Ne uno nij so' se-nana Jesucristó ma'. Ne Jesucristó me se ase vaa rii ta'nga' cúu yave ní' rihaan nee man ní' ro', danj vaa rii ta'nga' Jesucristó rihaan taran' ní' sij noco' man so', ne sa' doj noco' ní' man Diose, 'yaj Jesucristó, ne inanj danj me rá Diose qui'yaj ní' nanj adonj. Ne ase vaa vaa sca' nee man ní' 'yaj ya'aá man ní' ro', danj vaa cyaan rá taran' ní' sij noco' man Diose 'yaj Jesucristó adonj.

<sup>20</sup> Che'é se cavi' Jesucristó che'é nij soj ro', che'é dan ne nó xcúun soj daj chihaa míj cunqo soj se-nana nij ya'anj man rihaan chumii nihánj a mei. Che'é dan, me che'é 'yaj ndo'o soj se vaa 'yaj nij yuvii man uun rihaan chumii nihánj ga. Dan me se me che'é niha' rá soj cunqo soj nana se vaa <sup>21</sup> vaa rasuun se guun cha soj do', vaa rasuun se guun xcaj tu'va soj daj chá yo' do', vaa rasuun se guun cano ra'a soj do' ga. <sup>22</sup> Me che'é uno rma'an soj nana vaa danj ga. 'Q se rasuun yo' me se cha yuvii man rasuun yo', ne quinaavij nu' rasuun yo' vaa güii adonj. Ne xa' nana vaa danj, tzaj ne nana avii raá uun yuvii me nana yo', ne niha' rá nij yuvii cataj nij yuvii nana vaa danj rihaan tuvi' nij yuvii nanj adonj.

<sup>23</sup> Ne avii raá yuvii uno nana yo', taj nii, ne sa' uxrá nar-i' nij so' chrej canoco' nij so' Diose, taj nii, ne sí ni'yanj

a'mii me nij so', taj nii, tzaj ne ne ya ya sij noco' man Diose me nij so' ma'. Maan se che'é nana noco' nij so' ro', 'yaj ndo'o nij so' naj guun cacun' me rá nee man nij so' qui'yaj nij so' nanj adonj.

**3** Dan me se ase vaa cunuu i'na' uún Jesucristó ro', danj vaa cunuu sa' nimán soj, ne canoco' soj chrej sa', qui'yaj Jesucristó a. Che'é dan che'é inanj rasuun man rej xta' xcaj soj cuentá, ne cuano nihánj me se x'núu Diose rej nuva' Diose nicun' Jesucristó cuano ei. <sup>2</sup> Dan me se xcaj soj cuentá che'é rasuun man rej xta', ne se nanó rá soj che'é rasuun man rihaan chumii nihánj mei. <sup>3</sup> Dan me se aj cavi' nee man soj rihaan chumii nihánj vaa, ne cuano nihánj me se táá nimán soj rej xta' rej yanj Diose, 'yaj Jesucristó ei. <sup>4</sup> Ne che'é dan ca'vee cayáan soj ga Diose nu' cavii nu' ca'anj, ne vaa güii ca'na' uún Jesucristó rihaan chumii nihánj, ne curuvi' soj ga so', ne ve'é ndo'o gaa cumán soj ga so' nanj adonj.

**Nana nihánj taj xna'anj che'é tucuáan nga ne che'é tucuáan cuchruj Pabló che'é ní' a**

<sup>5</sup> Yaj me se se qui'yaj uún nij soj cacun' qui'yaj soj asij naá mei. Se qui'yaj soj se vaa 'yaj yuvii man rihaan chumii nihánj a ma'. 'Q se sa' xcaj soj cuentá, ne orún' nica soj cotoj ga soj, ne se guun rá soj qui'yaj soj se nij a ma'. Se guun rá soj qui'yaj ituu soj si'yaj tuvi' soj ma'. Ase vaa yuvii na'viij rihaan naj guun ya'anj ro', danj vaa yuvii 'yaj ituu si'yaj tuvi' adonj. Nij vaa Diose, ne sa' doj vaa rasuun yo', rá nij so', ne <sup>6</sup> che'é cacun' yo' guun yuvaá uxrá Diose, ne qui'yaj ndo'o Diose sayuun man nij síj 'yaj cacun' yo' adonj. <sup>7</sup> 'Q cyaan vaa cacun' yo' ga cacun' qui'yaj ma'an soj asij naá, gaa canoco' soj tucuáan chi'ii ei.

<sup>8</sup> Tzaj ne cuano nihánj me se se qui'yaj nij soj danj ma'. Se guun yuvaá soj ma'. Se guun rá soj qui'yaj soj chi'ii man yo'ó yuvii ma'. Se ca'mii soj nana nij che'é tuvi' soj ma'. Se nachri' soj ni'yaj soj tuvi' soj ma'. <sup>9</sup> Se ca'mii ne soj che'é tuvi' soj ma'. Yo' me se qui'yaj soj gaa ataa canoco' soj man Jesucristó, tzaj ne yaj me se cunuu sa' soj, ne se qui'yaj soj a doj danj a mei.

<sup>10</sup> Cunuu sa' nimán soj, qui'yaj Diose, ne che'é dan sa' doj namán nana sa' cuu raá soj 'o 'o güii adonj. Ne'en soj se vaa Diose me sí qui'yaj man soj, ne ase vaa ma'an Diose ro', danj gaa uún soj ei. <sup>11</sup> Yaj me se taj se 'yaj sese naj guun yuvii me soj mei. Ca'vee se sij israelitá do', ca'vee se sij yanij do', ca'vee se sij taj ta'nga' man do', ca'vee se nuveé sij taj ta'nga' do', ca'vee se sij man yo'ó chuman' do', ca'vee se sij ru'vee do', ca'vee se sij nique do', ca'vee se sij chéé ma'an do', taj se 'yaj a doj mei. Orún' ya ya rasuun sa' me Jesucristó, ne orún' so' me nicun' rihaan daj a rasuun nanj ei.

<sup>12</sup> Dan me se narii Diose man soj canoco' soj man so', ne guun soj sí sa' noco' man Diose, ne 'ee rá Diose man soj, ne che'é dan cunuu 'ee rá soj tuvi' soj chuguanj. Dan me se gaa sa' nimán soj, ne ca'mii sa' soj, ne se guun yuvaá soj man tuvi' soj ma'. Maan se gaa inaj nimán soj ei. <sup>13</sup> Sese qui'yaj chi'ii tuvi' soj rihaan soj, ne caraá x'naa yo'ó yo'ó soj rihaan tuvi' soj

ei. Dənj qui'yaj sí 'nij ra'a man ní' che'é soj, caráj x'naa so' rihaan soj, ne che'é dan dənj qui'yaj soj rihaan tuvi soj ei. <sup>14</sup> Nu' yo' qui'yaj soj, ne vaa yo'ó se sa' doj qui'yaj uún soj, ne yo' me se gaa 'ee ya ya rá soj tuvi soj, ne yo' me qui'yaj guun raan cumən soj ei. <sup>15</sup> Ne ca'vej soj gaa dínj nimán soj qui'yaj Jesucristó a. Che'é se me rá ma'an Diose gaa dínj nimán soj, che'é dan narii Diose man soj, ne naqui'yaj rcua'aan so' man nu' nij tinuj soj, ne che'é dan nago' soj graciá rihaan Diose ei. <sup>16</sup> Cunə uxrá soj se-nəna Jesucristó, ne cavij nana sa' cuu raə soj, ne tucu'yón soj nana sa' rihaan tuvi soj, ne nago' soj chrej sa' man tuvi' soj ei. Cachraə soj chra' rihaan Diose, ne nago' soj graciá rihaan Diose ei. <sup>17</sup> Yuvij noco' man Jesucristó me soj, ne che'é dan xcaj soj cuentá daj me rá Jesucristó qui'yaj soj do', daj me rá Jesucristó ca'mii soj do', daj qui'yaj soj canoco' soj man Jesucristó sí 'nij ra'a man ní' do', ne maan che'é Jesucristó sij 'nij ra'a man ní' nago' soj graciá rihaan Rej ní' Diose ei.

#### Nana nihánj taj xna'anj daj qui'yaj 'o 'o ní' rihaan tuvi ní' a

<sup>18</sup> Cataj xna'anj 'unj rihaan nij chana vaa nica, se vaa ve'é cunə nij no' rihaan nica nij no' á. Dənj vaa nə xcúun nij no' qui'yaj nij no', ese chana noco' man sí 'nij ra'a man ní' me nij no' a.

<sup>19</sup> Ne ve'é gaa 'ee rá nij snó'o man nica nij so' uún á. Se caxrj yuvaə nij snó'o man nica nij so' ma'. Se qui'yaj quij snó'o man no' ma'.

<sup>20</sup> Ve'é cunə nij xnii nu' nana a'mii rej xnii nu' nana a'mii nii xnii uún á. Dənj qui'yaj nij xnii noco' man sí 'nij ra'a man ní', ne guun niha' rá Diose ni'yaj Diose man xnii ve'é uno a.

<sup>21</sup> Se ca'mii rej xnii nana chi'ij rihaan xnii, gaa ne se quiri' nimán xnii, qui'yaj rej xnii a.

<sup>22</sup> Cunə sa' mozó rihaan se-ru'vee mozó á. Se naqui'yaj rmii mozó man mozó rihaan se-ru'vee mozó ma'. Nda' se nuvi' se-ru'vee mozó, tzaj ne yo'ó qui'yaj suun mozó á. Sí 'nij ra'a man ní' ro', tumé so' man mozó yo', ne che'é dan cuchu'vi' mozó ne ve'é qui'yaj suun so' a. <sup>23</sup> Ne rihaan yuvij uun 'yaj suun mozó ma'. Tanənj rihaan sí 'nij ra'a man ní' 'yaj suun so', ne che'é dan 'o ca'nej nimán so' qui'yaj suun uxrá so' nu' suun vaa rihaan so', ne se naqui'yaj rmii so' nimán so' ma'. <sup>24</sup> Aj ne'en soj se vaa ma'an sí 'nij ra'a man ní' me sí qui'yaj cayáan soj rej sa' ga Diose nu' cavii nu' ca'anj, ne che'é dan ve'é qui'yaj suun soj rihaan Jesucristó sij 'nij ra'a man ní' á. <sup>25</sup> Ne sí qui'yaj cacun' ro', inənj sayuun quirən' so', ne 'o cuyaan qui'yaj Diose ca'ne' Diose cacun' che'é mozó do', che'é ru'vee do', che'é taran' yuvij do', nanj adənj. Xa' Diose, tzaj ne taj vaj sí cunii do', taj vaj sí le'ej do', taj vaj sí uun chij do', rihaan Diose man adənj.

**4** Dan me se ve'é qui'yaj soj sij ru'vee rihaan se-mozó soj uún á. Se tiha' yu'unj soj sij ru'vee man se-mozó soj ma'. Xcaj soj sij ru'vee cuentá se vaa ase vaa mozó rihaan soj ro', dənj vaa ma'an soj rihaan Diose uún ei.

#### Nana nihánj taj xna'anj se vaa cachinj ni'yaj nij sí cuchumán rá ni'yaj man Jesucristó rihaan Diose che'é Pabló a

<sup>2</sup> Dan me se yo'ó cachinj ni'yaj uxrá soj rihaan Diose daj a güii ei. Se ca'ne' rá soj ga suun achíin ni'yaj rihaan Diose mei. Ne tadó soj cumən soj, ne nigənj nago' soj graciá rihaan Diose á. <sup>3</sup> Dan me se cachinj ni'yaj uún soj rihaan Diose che'é núj se vaa gaa ya'núj rihaan núj ca'mii núj se-nəna Jesucristó nana tihaan naca Diose rihaan ní' á. Che'é nana yo' me 'nij 'unj taga' nihánj cuanə ei. <sup>4</sup> Vaa suun rihaan 'unj tihaan 'unj se-nəna Jesucristó rihaan yuvij, ne che'é dan cachinj ni'yaj soj rihaan Diose se vaa ca'vee ca'mii natá sca' 'unj rihaan nij so' ei.

#### Nana nihánj taj xna'anj se vaa nuchruj raa ní' daj ca'mii ní' rihaan nij sí ataa cuchumən rá ni'yaj man Jesucristó a

<sup>5</sup> Asa' chéé soj ga nij sí ataa cuchumən rá ni'yaj man Jesucristó, ne sa' nuchruj raa soj daj ca'mii soj ga nij so', ne se quiri' uun tiempó qui'yaj soj ga nij so' mei. <sup>6</sup> Nu' cuentó nanó soj ga nij so' me se inənj cuentó ve'é do', inənj cuentó sa' aran' rá nij so' do', inənj cuentó a'mii danj Diose do', ca'mii soj, ne quene'en soj me nana ca'mii soj rihaan 'o 'o sí xna'anj man soj che'é tucuaán noco' soj adənj.

#### Nana nihánj taj xna'anj se vaa ve'é cumən nij sí cuchumán rá ni'yaj man Jesucristó yanj chuman' Colosas, rá nij tuvi' Pabló a

<sup>7</sup> Tinúú ní' sí 'ee ndo'o rá ní' man sí sa' ndo'o 'yaj suun gaj che'é sí 'nij ra'a man ní' sí cu'naj Tíquico me sí ca'nej 'unj cuchí' nica nana che'é núj rihaan soj ei.

<sup>8</sup> Ne me rá 'unj cataj xna'anj so' rihaan soj daj quiran' núj, gaa ne guun ya rá soj, ne nari' nucaj nimán soj ei. <sup>9</sup> Ne ca'nej 'unj man tinú' Onésimo cuchí' so' ga tinú' Tíquico yo', ne sí man chiháan soj me tinú' Onésimo, ne 'ee rá ní' man so', ne nucaj rá 'unj man so', ne cataj xna'anj roj so' rihaan soj nu' se vaa quiran' núj rej nihánj ei.

<sup>10</sup> Aj ne'en soj man sí cu'naj Aristarco uún a. Cuanə nihánj me se 'nij so' taga' ga 'unj, ne me rá so' se vaa ve'é cumən soj a. Ne vaa sí cu'naj Marcos tinúú tachruyú sí cu'naj Bernabé a. Veé dənj ve'é cumən soj, rá so' uún a. Aj cuchí' nana rihaan soj che'é sí cu'naj Marcos, se vaa sese cuchí' so' chiháan soj, ne ve'é ca'mii soj ga so' á. <sup>11</sup> Ne ne'en soj man sí cu'naj Jesús Justo uún a. So' ro', me rá se vaa ve'é cumən soj a. Sí cu'naj Aristarco do', sí cu'naj Marcos do', sí cu'naj Jesús do' a. 'O se orún' va'nuj nij so' me yuvij israelitá 'yaj suun ga núj che'é yan guun chij Diose rihaan chumii nihánj, ne nari' nucaj doj rá 'unj, qui'yaj nij so' ei.

<sup>12</sup> Ne ve'é cumən soj, rá sí cu'naj Epafras uún a. Sí cavii chiháan soj me so', ne 'yaj suun uxrá so' che'é Jesucristó, ne nu' güii achíin ni'yaj uxrá so' rihaan Diose che'é soj, ne me rá so' gaa chij rá soj, ne guun ya rá soj

se vaa ne'en soj daj me rá Diose qui'yaj soj, <sup>13</sup> ne 'ujj me síi ne'en ya se vaa qui'yaj suun uxrá so' che'é soj do', che'é nij yuvij amán rá ni'yaj man Jesucristó yanj chuman' Laodicea do', che'é nij yuvij amán rá ni'yaj man Jesucristó yanj chuman' Hierápolis do' a. <sup>14</sup> Doctor síi cu'naj Lucas síi 'ee ndo'o rá ní' me se me rá uún so' se vaa ve'é cumān soj a. Ne tanānj síi cu'naj Demas uún, ne me rá so' se vaa ve'é cumān soj a.

<sup>15</sup> Catāj soj rihaan nij yuvij amán rá ni'yaj man Jesucristó yanj chuman' Laodicea do', rihaan chana cu'naj Ninfas do', rihaan nij yuvij amán rá na'vúj rihaan Diose tucúa no' do', se vaa ve'é cumān nij so', rá 'ujj ei.

<sup>16</sup> Asa' navij nayaa soj yanj cartá nihánj, ne ca'nej soj yanj nihánj ca'anj yo' rihaan nij yuvij amán rá ni'yaj man Jesucristó yanj chuman' Laodicea, ne nayaa nij so' uún á. Ne ca'nej nij so' yanj ca'née 'ujj rihaan nij so', nayaa soj uún a.

<sup>17</sup> Ne catāj soj rihaan síi cu'naj Arquipo se vaa 'o ca'nej nimán so' qui'yaj suun so' nu' suun ca'ne' síi 'nij ra'a man ní' rihaan so' á.

<sup>18</sup> Ma'anj ra'aj sij cu'naj Pabló cachrón nana nihánj adonj. Se quini'yón soj se vaa 'nij 'ujj taga' ma'. Me rá 'ujj qui'yaj ndo'o Diose se luj che'é nij soj ei.

# 1 Tesalonicenses

**1** Síí cu'naj Pabló dɔ', síí cu'naj Silvano dɔ', síí cu'naj Timoteo dɔ', me núj, ne tu'va taran' núj avii 'yaj núj yanj nihánj ca'nej núj rihaan nij soj sij yanj chuman' cu'naj Tesalónica sij noco' man Rej ní' Diose dɔ', man Jesucristó sij 'nij ra'a man ní' dɔ' a. Me rá núj qui'yaj ndo'o Diose se luj che'é soj, ne me rá núj gaa xej nimán soj, qui'yaj Diose a.

**Nana nihánj taj xna'anj se vaa nij síí cuchumán rá ni'yaj man Jesucristó yanj chuman' cu'naj Tesalónica ro', sa' uxrá noco' nij so' man Diose a**

<sup>2</sup> Niganj nago' núj graciá rihaan Diose che'é cunudanj soj, ne gaa achíín ni'yaj núj rihaan Rej ní' Diose, ne achíín ni'yaj ndo'o núj che'é taran' nij soj ei. Dan me se yo'ɔ <sup>3</sup> nuú rá núj se vaa qui'yaj suun ndo'o soj che'é se amán rá soj ni'yaj soj man Jesucristó, ne caran' rá soj ni'yaj soj man so', ne nuu rá núj se vaa ne'en soj se vaa cavii sa' soj qui'yaj Jesucristó sij 'nij ra'a man ní' vaa güii, ne che'é dan yo'ɔ a'neé nimán soj qui'yaj suun soj che'é so' adonj. <sup>4</sup> Dan me se 'ee rá Diose man soj, tinuj, nocoj. Ne ne'en núj se vaa narii Diose man soj canoco' soj man so' adonj.

<sup>5</sup> 'Q se cuno soj nana sa' nana nata' núj rihaan soj, ne ne cuno rma'an soj nana yo' ma'. Dan me se gaa cuno soj nana yo', ne yuun che'e guun ya rá soj se vaa nana ya me yo', ne guun nucuaj ndo'o soj canoco' soj nu' nana yo' ei. 'Q se Nimán Diose ne ga soj ei. 'Q se gaa cane núj ga soj, ne quene'en soj daj qui'yaj núj che'é se me rá núj cavii sa' soj a. <sup>6</sup> Ne ase qui'yaj guee núj dɔ', ase 'yaj guee síí 'nij ra'a man ní' dɔ', danj qui'yaj guee soj chuguanj. Dan me se nda' se quiran' soj sayuun qui'yaj nij yuvii ne amán rá ni'yaj man Jesucristó, tzaj ne yo'ɔ canoco' soj se-nana Diose, ne guun niha' rá soj, qui'yaj Nimán Diose adonj. <sup>7</sup> Ne cunudanj nij yuvii noco' man Diose man estadó Macedonia dɔ', man estadó Acaya dɔ', xcaj nij so' cuentá che'é se vaa qui'yaj soj, ne danj qui'yaj guee nij so' uún ei.

<sup>8</sup> Dan me se aj cuno ndo'o yuvii se-nana síí 'nij ra'a man ní', qui'yaj soj, ne dan me se nuveé inanj nij yuvii man estadó Macedonia dɔ', nij yuvii man estadó Acaya dɔ', me yuvii cuno nana se vaa amán rá soj ni'yaj soj man Diose ma'. 'Q se yuvii man rihaan nu' cachra' chumii me yuvii cuno nana yo' nanj adonj. Che'é dan me taj che'é cataj xna'anj núj rihaan nij yuvii che'é se vaa qui'yaj soj ma'. <sup>9</sup> Ma'an nij yuvii taj xna'anj rihaan tuvi' nij so' se vaa ve'é uxrá ca'mii soj ga núj gaa cayáán núj ga soj, ne taj xna'anj nij so' se vaa tanáj soj ya'anj canoco' soj gaa rque, ne dan me se chruun cacój soj

dɔ', yahij cacój soj dɔ', me nij ya'anj yo', ne yaj me se canicaj soj canoco' soj man Diose síí vaa i'na' ya ya, <sup>10</sup> ne na'vij soj ca'na' uún ma'an Jesucristó ta'níí Diose rej xtá' a. Ne Jesucristó ro', me síí cunuu i'na' ya uún qui'yaj Diose gaa cavi' so', ne tinanii Jesucristó man ní' rihaan sayuun asa' quisij güii caxrii yuvaá Diose man nij síí tumé cacun' ne qui'yaj Diose sayuun man nij so' ei.

**Nana nihánj taj xna'anj se vaa ve'é tucu'yón síí cu'naj Pabló se-nana Diose nana sa' rihaan nij síí cuchumán rá ni'yaj man Jesucristó yanj chuman' cu'naj Tesalónica a**

**2** Ne'en ma'an soj se vaa cavii sa' suun qui'yaj suun núj gaa cayáán núj ga soj, tinuj, nocoj. <sup>2</sup> Dan me se asino yaan quiran' núj sayuun chuman' Filipos, ne nachri' ndo'o nij síí man chuman' yo' ni'yaj nij so' man núj, tzaj ne che'é se sij noco' man Diose me núj, che'é dan nda' se sayuun ndo'o vaa nata' núj se-nana Diose nana sa' rihaan soj qui'yaj nij síí man chiháán soj, tzaj ne ne chuchuvi' núj ma'. Tananj ca'neé nimán núj nata' núj doj nana sa' rihaan soj a.

<sup>3</sup> Vaa che'é a'mii natáj núj se-nana Diose rihaan soj, ne dan me se nuveé sij noco' tucuaán ne me núj ma'. Ne quij vaa nimán núj ma'. Nuveé sij tiha' yu'unj man yuvii me núj ma'. <sup>4</sup> 'Q se guun nucuaj rá Diose man núj, ne ca'ne' so' suun rihaan núj nata' núj se-nana so' nana sa', ne danj 'yaj guee núj adonj. Ne uun rá núj se vaa cataj yuvii se vaa ve'é 'yaj núj ma'. Maan se me rá núj guun niha' rá Diose ni'yaj Diose man núj, ne che'é dan 'yaj suun núj che'é Diose, ne Diose me síí acaj cuentá che'é núj daj vaa nimán núj adonj. <sup>5</sup> Ne'en soj dɔ', ne'en ma'an Diose dɔ', se vaa ne ca'mii ya'anj ndo'o núj ga soj che'é rej ca'vee ca'neé núj sa'anj man soj ma'. <sup>6</sup> Ne guun rá núj cataj soj dɔ', cataj yo'ó yuvii dɔ', se vaa ve'é 'yaj núj ma'. Nda' se Jesucristó me síí cune' man núj guun núj apóstol nata' se-nana so', tzaj ne ne cachinj núj rasuun rihaan soj ma'.

<sup>7</sup> Tananj ase 'yaj nij chana ga ta'níí chana ro', danj qui'yaj núj ga soj gaa cayáán núj ga soj, ne ve'é inanj qui'yaj núj ga soj adonj. <sup>8</sup> Dan me se cunuu 'ee rá núj man soj, ne che'é dan nuveé inanj se-nana Diose me se vaa rque núj man soj ma'. Rque núj se-nana Diose man soj, ne yo'ɔ ca'neé nimán núj qui'yaj suun núj che'é soj uún adonj. <sup>9</sup> Dan me se ne'en soj se vaa nuvii nigan' 'yaj suun núj, gaa ne ri' núj sa'anj, ne ránj ma'an núj se chá núj, ne ne ca'vej rá núj ca'neé núj se chá man soj, man tinuj, man nocoj. Danj inanj qui'yaj

núj gaa ca'mii natáj núj se-nānā Dioṣe nana ṣa' rihaan soj adonj.

<sup>10</sup> Quene'en ma'aṅ soj do', quene'en Dioṣe do', se vaa sij nica nimán me núj rihaan soj sij amán rá ni'yaj man Dioṣe, ne dan me se qui'yaj núj inanj se me rá Dioṣe qui'yaj núj, ne ne qui'yaj núj cacun' a ma'.

<sup>11</sup> Ne'en soj se vaa ase vaa 'yaj snó'o gā ta'níí snó'o ro', danj vaa qui'yaj núj gā 'o 'o nij soj, ne dan me se guun nucuaj nimán soj, qui'yaj núj, ne narqué núj chrej nucuaj man soj <sup>12</sup> se vaa qui'yaj soj se vaa nō xcúún soj qui'yaj soj che'é se narii Dioṣe man soj canē soj gā Dioṣe güii guun chij Dioṣe rihaan chumií nihánj, ne ve'é ndo'o cumān soj gā Dioṣe a.

**Nana nihánj taj xna'anj se vaa nij síí cuchumán rá ni'yaj man Jesucristó man chuman' Tesalónica ro', quiran' nij so' sayuun, qui'yaj nij síí ne amán rá ni'yaj man Jesucristó man chiháán nij so' a**

<sup>13</sup> Niganj nago' núj graciá rihaan Dioṣe che'é soj ei. Dan me se gaa cuno soj se-nānā Dioṣe nana ca'mii natáj núj rihaan soj, ne ne cataj soj se vaa se-nānā yuvií uun me nana yo' ma'. Ya cataj soj se vaa se-nānā Dioṣe me nana nata' núj, ne veé ya se-nānā Dioṣe me yo' adonj. Ne nuu ṣa' nimán soj, 'yaj nana yo', che'é se cuchumán rá soj cuno soj nana yo' ei. <sup>14</sup> 'Q se ase vaa quiran' nij síí noco' man Dioṣe síí man estadó Judea ro', danj quiran' uún soj, che'é se sij noco' man Jesucristó me taran' soj, tinuj, nocoj. Dan me se quiran' nij síí man estadó Judea sayuun, qui'yaj nij yuvií israelitá síí man chiháán nij so', ne quiran' uún soj sayuun, qui'yaj nij síí man chiháán soj ei. <sup>15</sup> Ne xā' nij síí israelitá yo', tzaj ne nij so' me síí ticavi' man Jesucristó sij 'nij ra'a man ní' do', man nij síí nata' se-nānā Dioṣe gaa naá do', ne veé uún nij so' canoco' ndo'o man núj, guun rá nij so' go' nij so' man núj uún nanj adonj. Nij ndo'o 'yaj nij so' ni'yaj Dioṣe, ne taj ri'yunj nij so' man cunudanj yuvií uún adonj. <sup>16</sup> Dan me se me rá núj nata' núj se-nānā Dioṣe rihaan soj sij yaníj che'é yan quinanií soj rihaan sayuun, tzaj ne aráán ndo'o nij síí israelitá yo' chrej rihaan núj, ne guun nocoj uxrá cacun' quitaj xráá nij so' nu' cavii nu' ca'anj, ne che'é dan yo'o ca'maan rá Dioṣe ni'yaj Dioṣe man nij so', ne yuun che'e quiran' nij so' sayuun, qui'yaj Dioṣe ei.

**Nana nihánj taj xna'anj se vaa me ndo'o rá síí cu'naj Pabló quene'en so' man nij síí cuchumán rá ni'yaj man Jesucristó man chuman' cu'naj Tesalónica a**

<sup>17</sup> Xā' yaj me se guun gan' ya núj doj rihaan chiháán soj doj güii nihánj, tzaj ne 'o nuú rá núj man soj, ne che'é dan me ndo'o rá núj quene'en yucuān' núj man soj, <sup>18</sup> ne che'é dan guun rá núj cuchí' núj rihaan soj, ne xā' 'unj sij cu'naj Pabló me se guun que'ee ndo'o me raj cuchíj rej man soj, tzaj ne caráán Satanás chrej rihaan núj cuchí' núj rihaan soj ei. <sup>19</sup> Dan me se asa' ca'na' uún Jesucristó rihaan chumií nihánj ne guun niha' uxrá rá núj che'é soj, ne nata' núj rihaan Jesucristó se vaa ve'é canoco' soj man so' qui'yaj núj, ne cavii ṣa'

núj rihaan so' che'é soj ei. Taj vaj yo'ó yuvií 'yaj danj a ma'. 'Q se grún' ya soj me síí 'yaj danj ei. <sup>20</sup> 'Q se soj me síí qui'yaj cavii ṣa' núj, ne soj me síí qui'yaj guun niha' rá núj adonj.

**Nana nihánj taj xna'anj se vaa cataj xna'anj síí cu'naj Timoteo rihaan Pabló se vaa ṣa' uxrá cuchumán rá nij síí man chuman' Tesalónica ni'yaj nij so' man Jesucristó a**

**3** Che'é dan ne ca'vej uxrá rá núj canē raṅn taran' núj chuman' nihánj a ma'. Che'é dan cavii raṅn núj se vaa víj ran' guēē rój me síí quinaj chuman' Atenas nihánj, <sup>2</sup> ne dan me se ca'née núj man tinú' Timoteo cuchí' so' rej man soj a. Dan me se so' me síí 'yaj suun ndo'o rihaan Dioṣe gā núj suun nata' se-nānā Jesucristó nana ṣa', ne me rá núj raçuíj so' man soj, narque so' chrej nucuaj man soj, ne raan doj canoco' soj man Jesucristó, qui'yaj so', <sup>3</sup> ne a 'ó tuvi' soj se quiri'íj tu-cuáán noco' soj che'é sayuun qui'yaj yuvií man soj, rá núj a ma'. 'Q se ne'en soj se vaa nō xcúún ní' quiran' ní' sayuun rihaan chumií nihánj, <sup>4</sup> ne gaa cayáán núj gā soj, ne cataj ya núj rihaan soj se vaa xraj, ne quiran' ní' sayuun, ne ne'en soj se vaa ya quiran' ní' sayuun niha'. <sup>5</sup> Che'é se me uxrá rá 'unj quene'en 'unj danj quiran' soj, ne che'é dan ca'née 'unj man Timoteo cuchí' so' rej man soj, ne cataj xna'anj so' rihanj danj 'yaj soj noco' soj man Dioṣe, raj a. Dan me se quinano rá 'unj sese aj caxríj síí chree chrej chi'ii rque soj do', sese quiri' nu' suun qui'yaj suun núj che'é soj do', raj a.

<sup>6</sup> Dan me se canicaj uún Timoteo namán so' rihaan núj, ne cataj xna'anj so' se vaa ve'é uxrá amán rá soj ni'yaj soj man Jesucristó, ne 'ee rá soj tinúú soj, taj so', ne niganj ve'é nuú rá soj man núj, taj so', ne ase vaa me rá núj quene'en núj man soj ro', danj vaa rá soj me rá soj quene'en soj man núj, taj so', ne guun niha' ndo'o rá núj gaa cuno núj se-nānā so' adonj. <sup>7</sup> Dan me se quiran' ndo'o núj sayuun gaa rque gaa qui'yaj suun núj yan cuchuman rá soj ni'yaj soj Dioṣe, tzaj ne cuano nihánj me guun niha' uxrá rá núj che'é rej nata' Timoteo che'é soj rihaan núj, tinuj, nocoj. <sup>8</sup> Dan me se che'é se raan noco' soj man síí 'nij ra'a man ní', che'é dan vaa che'é gaa niha' rá núj qui'yaj suun núj rihaan chumií nihánj adonj. <sup>9</sup> Dan me se guun niha' uxrá rá núj rihaan Dioṣe che'é soj, ne che'é dan nō xcúún núj nago' ndo'o núj graciá rihaan Dioṣe che'é soj, <sup>10</sup> ne nuvíi nigan' cachinj ni'yaj núj rihaan Dioṣe se vaa ca'vej Dioṣe quene'en núj man soj, ne sese ataa narí' soj nu' tu-cuáán noco' ní', ne me rá núj narque núj doj chrej ṣa' man soj, ne ṣa' doj canoco' soj Dioṣe nanj adonj.

**Nana nihánj taj xna'anj se vaa cunyu 'ee rá ní' man cunudanj yuvií a**

<sup>11</sup> Me rá núj raçuíj ma'aṅ Rej ní' Dioṣe raçuíj Jesucristó sij 'nij ra'a man ní' raçuíj man núj cuchí' núj rihaan soj, <sup>12</sup> ne ase vaa 'ee rá núj man soj ro', danj gaa cunyu 'ee ndo'o rá soj ni'yaj soj tinúú soj do',

cunudañj yuvij do', qui'yaj sí 'nij ra'a man ní', rá núj a. <sup>13</sup> Ndaa síj, gaa ne yo' o cunuu sa' nimán soj rihaan Rej ní' Diose gaa güii ca'na' uún Jesucristó sij 'nij ra'a man ní' rihaan chumiij nihánj gaa cunudañj nij se-mozó so' sí guée, ne a 'ó cacun' se tumé soj vaa gaa man adonj.

**Nana nihánj taj xna'anj daj qui'yaj ní', ne ve'é cumañ ní' ga nij tinúú ní' a**

**4** Yaj me se che'é se sij aj noco' man sí 'nij ra'a man ní' me nu' ní' ro', che'é dan cuano nihánj me cataj xna'anj núj rihaan soj se vaa doj a canoco' soj nu' tucuáán noco' soj tucuáán cuchruj núj rihaan soj gaa cataj núj daj qui'yaj soj gaa man soj rihaan chumiij nihánj gaa ne gaa niha' rá Diose ni'yaj Diose man soj, tinuj, nocoj. <sup>2</sup> 'Q se aj ne'en soj se vaa vaa doj nana cataj xna'anj núj rihaan soj che'é Jesucristó sij 'nij ra'a man ní' nanj á. <sup>3</sup> 'Q se nihánj me se vaa me rá Diose qui'yaj soj, ne dan me se me rá Diose guun soj sí sa' rihaan so', ne na'vej rá Diose cotoj nij snó'o ga náa guun chana ma'. <sup>4</sup> Maan se ve'é qui'yaj 'o 'o snó'o, nanó' so' orún' chana xcaj so', ne ve'é qui'yaj snó'o rihaan Diose, ne ve'é qui'yaj so' rihaan chana uún a. <sup>5</sup> Dan me se se guun canoco' soj tucuáán noco' nij yuvij ne ne'en man Diose ma'. Maan che'é se ve'é vaa chana rihaan nij so', ne uun rá nij so' xcaj nij so' man chana, tzaj ne ne acaj nij so' cuentá daj qui'yaj nij so' taj ya'anj nij so' man chana ma'. <sup>6</sup> Sese cunó soj nana nihánj, ne se guun soj sí tiha' yu'unj man tinúú ní' che'é chana ma'. 'Q se aj cataj ya núj rihaan soj se vaa qui'yaj sí 'nij ra'a man ní' sayuun man yuvij tiha' yu'unj man tinúú nanj adonj. <sup>7</sup> Nuveé che'e se me rá Diose qui'yaj ní' cacun' me canacúun Diose man ní' ma'. Canacúun Diose man ní', tzaj ne che'é rej cunuu sa' nimán ní' rihaan Diose me canacúun Diose man ní' adonj. <sup>8</sup> Che'é dan xcaj soj cuentá se vaa sí ri'ij yanij man nana nihánj ro', nuveé se-nana yuvij me ri'ij yanij so' ma'. Se-nana Diose sí rqué Nimán cunuú nimán ní' me nana ri'ij so' nanj adonj.

<sup>9</sup> Dan me se taj che'é cachron 'unj nana rihaan yanj cartá nihánj cataj xna'anj 'unj rihaan soj se vaa no xcúun soj gaa 'ee rá soj man tinúú soj ma'. 'Q se ma'an Diose me sí tucu'yón man soj se vaa qui'yaj soj danj adonj. <sup>10</sup> 'Q se danj inanj 'yaj ya soj nuu 'ee rá soj man nu' nij tinúú ní' sí man estadó Macedonia, tzaj ne inanj me rá núj narque núj chrej man soj se vaa doj a cunuu 'ee rá soj man tinúú ní', tinuj, nocoj. <sup>11</sup> Ne guun rá soj gaa dínj cumañ soj, ne se tiguíj soj man soj rihaan se-suun tinúú soj ma'. Maan se ndaa se-suun 'o 'o soj qui'yaj suun soj á. Danj inanj vaa chrej narque núj rihaan soj asij rque á. <sup>12</sup> Sese danj qui'yaj soj, ne nij sí ne amán rá ni'yaj man Jesucristó ro', cataj nij so' se vaa ve'é 'yaj soj ei. Ne se cachiin a doj rasuun man soj ma'. 'Q se ma'an soj nanó' rej cavii rasuun achiin man soj adonj.

**Nana nihánj taj xna'anj daj quiran' ní' asa' quisij güii ca'na' uún Jesucristó rihaan chumiij nihánj a**

<sup>13</sup> Me rá núj quene'en soj daj quiran' nij tinúú ní' nij sí noco' man Jesucristó nij sí cavi', tinuj, nocoj. Ne se quinano rá soj che'é tinúú ní' sí cavi' ma'. Dan me se nij sí ne amán rá ni'yaj man Diose ro', nanó ndo'o rá nij so' che'é tuvi' nij so' sí cavi' che'é se taj se qui'yá' cavii sa' tuvi' nij so', rá nij so' a. <sup>14</sup> Tzaj ne cuchumán ya rá ní' se vaa cavi' Jesucristó, ne cunuu i'na' uún so', qui'yaj Diose, ne che'é dan ne'en ní' se vaa xa' nij tinúú ní' sí cavi', tzaj ne che'é se cavi' Jesucristó che'é nij so' ro', che'é dan cunuu i'na' uún nij so', ne ca'na' uún nij so' ga so', qui'yaj Diose adonj.

<sup>15</sup> Nihánj me nana cataj xna'anj ma'an sí 'nij ra'a man ní' rihaan núj, ne dan me se asa' quisij güii ca'na' uún sí 'nij ra'a man ní' rihaan chumiij nihánj, ne ní' sij gaa i'na' rihaan chumiij nihánj ro', se quitáa yaan ní' rihaan nij sí cavi' ma'. <sup>16</sup> 'Q se caguaj ma'an sí 'nij ra'a man ní' gaa cavii so' rej xta' nanij so' rihaan chumiij nihánj, ne caguaj nij se-mozó Diose nij sí uun chij doj, ne ca'yanj se-mozó Diose xrúun Diose chruun a'yánj, gaa ne nij tinúú ní' nij sí canoco' man Jesucristó nij sí cavi' me se asino nij so' cunuu i'na' a. <sup>17</sup> Ne sese gaa i'na' ní' cayáán ní' rihaan chumiij nihánj, ne nacaj nij se-mozó Diose man ní', ne cavii ní' rej xta' raá ngaa ga nij sí cunuu i'na' uún, ne nari' tuvi' ní' ga sí 'nij ra'a man ní' rej xta', gaa ne cayáán ní' ga sí 'nij ra'a man ní' nu' cavii nu' ca'anj nanj adonj. <sup>18</sup> Nihánj me nana cataj xna'anj soj rihaan tinúú soj, ne nari' nucaj nimán 'o 'o soj, qui'yaj nana nihánj ei.

**Nana nihánj taj xna'anj se vaa xcaj ní' cuentá daj qui'yaj ní' ndaa se quisij güii ca'na' uún Jesucristó a**

**5** Taj che'é cachron núj nana rihaan yanj cartá nihánj cataj xna'anj núj rihaan soj me güii ca'na' uún Jesucristó, man tinuj, man nocoj. <sup>2</sup> 'Q se aj ne'en ya soj se vaa ase vaa ne ne'en ní' me güii catuu sí ituu qui'yaj ituu so' ro', danj vaa ne ne'en ní' me güii ca'na' uún sí 'nij ra'a man ní' rihaan chumiij nihánj a ma'.

<sup>3</sup> Dan me se vaa güii cataj yuvij: "Yaj me se dínj vaa rihaan chumiij, ne taj che'é cuchu'vi' ní' ma'", cataj nij yuvij a. 'Q se güii yo' me taj ni'yón ase vaa ran' chana cuchruj ne'ej ro', danj gaa quiran' ndo'o nij yuvij sayuun, ne se quinaniij nij so' ma'. 'Q se yuun che'e cutuna nij so' nanj adonj.

<sup>4</sup> Xa' soj, tzaj ne nuveé sij chéé rej rmi' ne acaj cuentá me soj, man tinuj, man nocoj. 'Q se güii ca'na' uún Jesucristó me se taj che'é cuchu'vi' soj ndaa vaa chu'vi' nij sí ne'en man sí ituu ma'. <sup>5</sup> Ino vaa soj rihaan nij sí ne amán rá ni'yaj man Jesucristó ei. Dan me se xa' soj, tzaj ne sij chéé ranga' man naán güii me soj, ne sij acaj sa' cuentá me soj uún, ne nuveé sij chéé rej rmi' do', rej nij do', me soj ma'. 'Q se sij chéé rej ranga' me soj ei. <sup>6</sup> Che'é dan se guun guun ní' sí otoj nda' rá se vaa 'yaj ta'aj nii ma'. 'Q se vaa che'é ni'yaj ranga' rlij rihaan ní' ei. Se canoco' ní' tucuáán noco' yo'ó nij yuvij mei.



Tañanj yo'ò gaā yu've ní', ne se gaā xnò ní' mei. <sup>7</sup> Dan me se nij síi man rihaan chumī nihánj ro', síi vaj rej rmi' me nij so', ne taj se 'yá' xcáj nij so' cuentá ma'. Che'é dan ase vaa 'ò síi otoj nu' dò', ase vaa síi xnò dò', vaa nij so', ne ne ne'en nij so' daj 'yaj nij so' a ma'. <sup>8</sup> Xa' ní', tzaj ne sij vaj rej ranga' me ní', ne acaj ní' cuentá daj qui'yaj ní' nanj á. Dan me se yo'ò gaā nu-cuaj rá ní' man síi 'nij ra'a man ní', ne gaā 'ee rá ní' man tinúú ní', ne ase vaa aráán rihaan nimán tanuu 'yaj aga' nò rucuāā tanuu ro', danj gaā caráán rihaan nimán ní' a. Ne guun ya rá ní' se vaa ya cavii sa' ní', ne ase vaa avii sa' tanuu 'yaj aga' nuu raā tanuu ro', danj gaā cavii sa' ní' che'é se guun ya rá ní' se vaa cavii sa' ní' a.

<sup>9</sup> Nuveé che'e se me rá Diosē caxrii yuvaā Diosē man ní' me cataj Diosē se vaa canoco' ní' man so' ma'. 'O se cataj Diosē danj che'é se me rá Diosē quinanii ní' rihaan sayuun ne cavii sa' ní' che'é Jesucristó sij 'nij ra'a man ní' adonj. <sup>10</sup> Ne Jesucristó me síi cavi' che'é ní', ne che'é dan ca'vee se cavi' ní', ca'vee se gaā i'na' ní', tzaj ne cayáán rcua'āan cunudanj ní' gā so' adonj. <sup>11</sup> Che'é dan ase vaa 'yaj soj cuano ro', danj inanj qui'yaj soj, raj a. Dan me se nago' soj nana sa' man tinúú soj, nari' nucaj nimán tinúú soj, ne raçuíj soj man tinúú soj yan sa' doj canoco' nij tinuj nij soj man Diosē á.

**Nanā nihánj taj xna'anj se vaa nago' Pabló chrej man nu' nij síi noco' Diosē a**

<sup>12</sup> Cuanō nihánj me cataj xna'anj núj rihaan soj se vaa carāā cochroj soj rihaan nij síi uun chij rihaan soj, tinuj, nocoj. Dan me se nij so' ro', me síi nicaj yu'unj man soj rihaan síi 'nij ra'a man ní', ne narqué nij so' chrej sa' man soj, <sup>13</sup> ne 'yaj suun ndo'o nij so' che'é soj, ne che'é dan gaā 'ee rá soj man nij so', ne carāā cochroj soj rihaan nij so' á. Ne ve'é cumān soj gā tinúú soj á. <sup>14</sup> Ne cuanō nihánj me cataj xna'anj núj rihaan soj se vaa nago' soj chrej nucaj man nij síi rmī se vaa qui'yaj suun nij so', tinuj, nocoj. Sese vaa 'ò síi chu'vi'

nimán, ne ca'mii soj nana sa' rihaan so', ne nari' nu-cuaj nimán so', qui'yaj soj á. Raçuíj soj man nij yuvī ni-naj, ne gaā inaj nimán soj ni'yaj soj man cunudanj yuvī á. Se guun ca'māan ra'yanj rá soj ma'. <sup>15</sup> Tumé soj man soj se guun qui'yaj chi'ii yo'ò tuvi' soj man síi 'yaj chi'ii man soj ma'. Māan se inanj suun sa' qui'yaj suun soj che'é tuvi' soj dò', che'é cunudanj yuvī dò' á.

<sup>16</sup> Niganj gaā niha' rá soj, <sup>17</sup> ne se ca'ne' rá soj gā suun achíin ni'yaj rihaan Diosē mei. <sup>18</sup> Ne ca'vee se me ma'ān sayuun quirān' soj, tzaj ne yo'ò nago' soj graciá rihaan Diosē á. Danj me rá Diosē qui'yaj soj che'é se sij noco' man Jesucristó me soj adonj.

<sup>19</sup> Se guun caráán soj chrej rihaan Nimán Diosē tucu'yón Nimán Diosē nana sa' man soj ma'. <sup>20</sup> Se quir-i'ij yanij soj man nana cataj xna'anj nacā Nimán Diosē rihaan soj ma'. <sup>21</sup> Tzaj ne xcáj soj cuentá daj vaa 'ò 'ò nanā cunò soj, gaā ne quene'en soj sese ya nanā ca'mii Nimán Diosē me yo', ne sa' cūnuū rá soj nu' nana sa' yo' á. <sup>22</sup> Ne a 'ó se nij se ca'vej rá soj qui'yaj soj ma'. <sup>23</sup> Diosē ro', me síi naqui'yaj xej nimán ní', ne me rá núj cunuu sa' inanj nimán soj rihaan so', qui'yaj ma'ān so', ne me rá núj tumé Diosē man ma'ān soj ndāa se quisij güii ca'na' uún Jesucristó sij 'nij ra'a man ní' rihaan chumī nihánj, ne dan me se me rá núj tumé Diosē man nimán soj dò', man nee man soj dò', ne a 'ó cacun' se tumé soj a mei. <sup>24</sup> Dan me se Diosē me síi nacúún man soj canoco' soj man so', ne vaa che'é gaā nucaj rá soj man so' se vaa tumé so' man soj adonj.

<sup>25</sup> Ne cachinj ni'yaj soj rihaan Diosē che'é núj, tinuj, nocoj.

<sup>26</sup> Asa' nari' tuvi' soj gā tinúú ní' síi noco' man Diosē, ne ve'é ca'mii soj gā nij so', ne go' soj 'ò xto man nij so' rihaan Diosē ei. <sup>27</sup> Māan che'é se síi'nij ra'a man ní' rqué suun manj, che'é dan me nò xcúnj cataj xna'anj 'unj rihaan soj se vaa nayāā soj yanj cartá nihánj rihaan cunudanj nij tinúú ní' síi noco' man Diosē ei. <sup>28</sup> Ne me rá núj qui'yaj ndo'o Jesucristó sij 'nij ra'a man ní' se luj che'é soj adonj.

## 2 Tesalonicenses

**1** Síí cu'naj Pabló dɔ', síí cu'naj Silvano dɔ', síí cu'naj Timoteo dɔ', me núj, ne 'yaj núj yanj cartá nihánj ca'nej núj rihaan nij soj sij yanj chuman' cu'naj Tesalónica sij noco' man Rej ní' Diose dɔ', man Jesucristó sij 'nij ra'a man ní' dɔ' a. <sup>2</sup> Me rá núj qui'yaj Rej ní' Diose dɔ', qui'yaj Jesucristó sij 'nij ra'a man ní' dɔ', se luj che'é soj, ne me rá núj gaa xej nimán soj, qui'yaj roj so' a.

**Nana nihánj taj xna'anj se vaa ve'é noco' nij síí cuchumán rá ni'yaj man Jesucristó yanj chuman' Tesalónica man Diose a**

<sup>3</sup> Sa' uxrá doj canoco' nij soj man Diose, ne cunuu 'ee doj rá 'o 'o soj tinúú soj daj a güii, ne che'é dan no xcúún núj niganj nago' núj graciá rihaan Diose che'é soj, tinuj, nocoj. <sup>4</sup> Ne ma'an núj nata' rihaan nij yuvii noco' man Diose yanj que'ee chuman' se vaa ve'é 'yaj soj, ne dan me se taj núj se vaa 'yaj ndo'o nii sayuun man soj, tzaj ne yo'o amán rá soj ni'yaj soj man Diose, ne 'o vaa sca' rá soj rihaan sayuun, ne yo'o noco' raan soj man Diose ei. Dan me se yo'o a'mii sca' ya ma'an núj che'é soj rihaan daj a nij síí noco' Diose yanj daj a chuman' se vaa uxrá táá ri'yunj nii man soj ne uxrá ran' soj sayuun, taj núj rihaan nij so' ei.

**Nana nihánj taj xna'anj che'é güii qui'yaj Diose sayuun man nij yuvii 'yaj sayuun man nij síí cuchumán rá ni'yaj man Jesucristó a**

<sup>5</sup> Che'é se vaa 'yaj soj, che'é dan ne'en ní' se vaa nica vaa nana cataj xna'anj Diose che'é soj a. Dan me se nuchruj raa Diose che'é soj, ne cataj xna'anj Diose se vaa ca'vee cayáán soj ga Diose asa' guun chij Diose rihaan chumii nihánj, ne che'é ma'an güii dan ran' soj sayuun nanj á. <sup>6</sup> Dan me se ne'en ní' se vaa nica vaa rá Diose qui'yaj Diose sayuun man nij yuvii qui'yaj sayuun man soj, <sup>7</sup> ne nica vaa rá Diose cataj xna'anj Diose se vaa navij güii ran' soj sayuun, ne naraan rá soj ga núj, ne veé danj naraan rá taran' ní' güii curuvi' uún Jesucristó sij 'nij ra'a man ní' dɔ', curuvi' nij se-mozó so' síí nucaj ndo'o dɔ', curuvi' rej xtá' rque 'o ya'an chuguun a. <sup>8</sup> Ne qui'yaj Jesucristó sayuun man nij yuvii ne ne'en man Diose dɔ', man nij yuvii na'vej rá cunɔ se-nana Jesucristó sij 'nij ra'a man ní' nana sa' dɔ' a. <sup>9</sup> Dan me se quiran' nij so' sayuun che'é cacun' qui'yaj nij so', ne dan me se rej yanij cumán nij so', cacaa nij so' nu' cavii nu' ca'anj a. Se quene'en nij so' man síí 'nij ra'a man ní' dɔ', se quene'en nij so' se vaa ve'é ndo'o vaa so' dɔ', yan nucaj ndo'o so' dɔ' ma'. <sup>10</sup> 'O se güii

ca'na' uún síí 'nij ra'a man ní' rihaan chumii nihánj me se cataj nij síí sa' noco' man so' se vaa ve'é ndo'o vaa so', ne sa' uxrá vaa nu' se vaa qui'yaj so' a. 'O se cuchumán ya rá soj cuno soj nana nata' núj rihaan soj ei.

**Nana nihánj taj xna'anj se vaa achíin ni'yaj Pabló rihaan Diose se vaa racuíj Diose man nij síí cuchumán rá ni'yaj man Jesucristó a**

<sup>11</sup> Che'é dan niganj achíin ni'yaj núj rihaan Diose che'é soj se vaa ca'vee quisij soj guun soj nu' ndaa vaa me rá Diose guun soj ga canacúún Diose man soj canoco' soj man so' a. Ne achíin ni'yaj núj se vaa racuíj ndo'o Diose man soj qui'yaj suun soj nu' suun sa' me rá soj qui'yaj suun soj, che'é se sij amán rá ni'yaj man Jesucristó me soj a. <sup>12</sup> Dan me se ndaa síj, gaa ne ca'vee cavii sa' doj Jesucristó sij 'nij ra'a man ní' ni'yaj yuvii che'é se vaa qui'yaj ma'an soj, ne cavii sa' ma'an soj ni'yaj yuvii che'é se sij noco' man Jesucristó me soj a. Danj inanj me se luj me rá Diose síí noco' ní' man dɔ', Jesucristó sij 'nij ra'a man ní' dɔ', qui'yaj roj so' che'é soj adonj.

**Nana nihánj taj xna'anj che'é síí chi'ii ca'na' rihaan chumii a**

**2** Dan me se aj ne'en soj se vaa ca'na' uún Jesucristó sij 'nij ra'a man ní', ne cunuu chre' ní' ga so', tinuj, nocoj. Che'é dan cataj xna'anj núj rihaan soj cuano <sup>2</sup> se vaa se guun vij ra'yanj rá soj ma'. Se caráya'anj soj nana cuno soj se vaa aj quisij güii ca'na' uún Jesucristó rihaan chumii ma'. Nuveé nana ya me nana yo' ma'. Ca'vee se nana ca'mii Nimán Diose me yo' taj nii, ca'vee se danj a'mii 'o síí a'mii natáj taj nii, ca'vee se nana cachrón núj rihaan 'o yanj cartá me yo' taj nii, tzaj ne taj se 'yaj ma'. 'O se ataa quisij güii ca'na' uún Jesucristó adonj. <sup>3</sup> Dan me se na'vej uxrá raj tiha' yu'unj nii a doj man soj a mei. Dan me se asino tucua' yuvii rihaan Diose, ne ca'na' yo'o síí chi'ii rihaan chumii, ne síí se ca'vej rá cunɔ rihaan Diose guun so' a. Dan me se xa' so', tzaj ne sij aj cacaa guun so' vaa güii ei. <sup>4</sup> Dan me se quinachri' so' man cunudan' ya'anj, ne a 'ó rasuun se ca'vej rá so' na'vij yuvii rihaan ma'. Dan me se catuu ma'an so' nuví noco' cayáán so' rej na'vij yuvii rihaan Diose, gaa ne ca'mii ne so' cataj so' se vaa ma'an so' me Diose á.

<sup>5</sup> Sese na'nuj rá soj, ne nu' nana nihánj me nana cataj xna'anj 'unj rihaan soj asij rque doj gaa cayáán 'unj ga soj ei. <sup>6</sup> Ne aj ne'en soj me rasuun aráán chrej

rihaan síi chí'ii yo', se vaa se ca'vee ca'na' so' cuango ma'. Dan me se caráan chrej rihaan so' ndaa se quisij güii cachrón Diose ca'na' so', gaa ne ca'na' so' adonj. <sup>7</sup> Cuango nihánj me se uun ndo'o cacun', tzaj ne ataa quene'en ní' daj gaa nu' cacun' qui'yaj síi chí'ii yo' ei. Ne xa' síi aráan chrej ca'na' síi chí'ii, tzaj ne vaa güii naxuyun so' man ma'an so', <sup>8</sup> gaa ne ca'na' síi chí'ii yo' síi na'vej rá cunõ rihaan Diose, gaa ne quene'en ní' daj guun ei. Tzaj ne asa' ca'na' Jesucristó sij 'nij ra'a man ní', ne ca'yanj yun so' man síi chí'ii yo', ne quirí' nu' so' adonj. <sup>9</sup> Síi chree síi cu'naj Satanás me síi qui'yaj ca'na' síi chí'ii yo', ne ma'an síi chree qui'yaj guun nucuaj síi chí'ii yo' qui'yaj ndo'o so' suun nocõõ ni'yaj yuvii, che'é yan tiha' yu'unj so' man nij yuvii a. <sup>10</sup> Ne nu' se chí'ii ndo'o qui'yaj so', tiha' yu'unj so' man nij yuvii ca'anj cacaa nu' cavii nu' ca'anj a. Ne nij yuvii yo' me se nu-vee yuvii aran' rá cunõ nana ya nana qui'yaj quinanii nij so' rihaan sayuun me nij so' ma'. <sup>11</sup> Che'é dan ma'an Diose qui'yaj cuchuman rá nij so' nana ne, ne canocõ' nij so' chrej tiha' yu'unj, qui'yaj Diose adonj. <sup>12</sup> Daj inanj qui'yaj Diose ga cunudanj nij yuvii ne cuchuman rá nana ya, ne inanj chrej chí'ii niha' rá nij so' canocõ' nij so' adonj.

**Nana nihánj taj xna'anj se vaa narii Diose man ní' canocõ' ní' man so' a**

<sup>13</sup> Tzaj ne nõ xcúun nuj niganj nago' nuj gracia rihaan Diose che'é soj sij 'ee rá síi 'nij ra'a man ní' man, tinuj, nocõj. 'O se narii Diose man soj cunõõ sa' soj qui'yaj Nimán Diose, ne cuchuman rá soj cunõõ soj nana ya, ne quitaj yaan soj rihaan yo'ó nij síi cavii sa' nu' cavii nu' ca'anj adonj. <sup>14</sup> Dan me se gaa nata' nuj se-nana Diose nana sa' rihaan soj, ne canacúun Diose man soj se vaa cavii sa' soj ga so', ne che'é dan daj se ve'é ndo'o vaa Jesucristó sij 'nij ra'a man ní' ro', daj gaa soj uun adonj. <sup>15</sup> Che'é dan canocõ' raan soj tucuaán cuchruj nuj rihaan soj gaa ca'mii nuj ga soj dõ', gaa qui'yaj nuj yanj cartá ca'née nuj rihaan soj dõ' ei. <sup>16</sup> Ne me rá nuj quinarí' nucuaj nimán soj, qui'yaj ma'an Jesucristó sij 'nij ra'a man ní' dõ', Rej ní' Diose dõ' a. Ne Diose ro', me síi 'ee rá man ní', ne qui'yaj ndo'o so' se luj ga ní' se vaa naqui'yaj nucuaj so' nimán ní' nu' cavii nu' ca'anj, ne guun ya rá ní' se vaa cavii sa' ní', qui'yaj uun so' ei. Ne me rá nuj guun nucuaj soj qui'yaj suun soj nu' suun sa', ne ca'mii soj nu' nana sa', qui'yaj Diose adonj.

**Nana nihánj taj xna'anj se vaa cachinj ni'yaj nij síi cuchuman rá ni'yaj man Jesucristó rihaan Diose che'é síi cu'naj Pabló a**

**3** Dan me se vaa yo'ó nana me rá nuj ca'nej nuj rihaan soj, tinuj, nocõj. Ne me rá nuj cachinj ni'yaj soj rihaan Diose se vaa xna'anj uxrá se-nana síi 'nij ra'a man ní', ne cavii sa' nana yo' rej cunõõ yo'ó yuvii nana yo', ndaa vaa cavii sa' nana yo' gaa cunõõ ma'an soj nana yo' a. <sup>2</sup> Ne cachinj ni'yaj soj che'é nuj se vaa

quinanii nuj rihaan nij síi chí'ii uun á. 'O se vaa yuvii ne amán rá ni'yaj man Jesucristó a man adonj.

**Nana nihánj taj xna'anj se vaa vaa che'é gaa nucuaj rá ní' man síi 'nij ra'a man ní' a**

<sup>3</sup> 'O se síi sa' ndo'o me síi 'nij ra'a man ní', ne vaa che'é ndo'o gaa nucuaj rá ní' man so', ne so' me síi qui'yaj nari' nucuaj rá soj, ne tumé so' man soj se vaa se qui'yaj canaán síi chree rihaan soj adonj. <sup>4</sup> Ne nucuaj rá nuj man síi 'nij ra'a man ní' se vaa yo'õ 'yaj ya soj nu' se vaa cataj nuj rihaan soj, ne dan me se ve'e 'õ daj ya qui'yaj soj ei.

<sup>5</sup> Ne me rá nuj se vaa racuíj síi 'nij ra'a man ní' man ma'an soj daj qui'yaj soj, caraa cochroj soj rihaan Diose, ne yo'õ canocõ' soj man Diose ndaa vaa qui'yaj ma'an Jesucristó, ne se ca'ne' rá soj ga suun 'yaj daj ma'.

**Nana nihánj taj xna'anj se vaa se gaa rmii ní' ma'**

<sup>6</sup> Ne che'é se sij nocõ' man síi 'nij ra'a man ní' me nu' ní', ne che'é dan cataj xna'anj 'unj yo'ó nana rihaan soj, tinuj, nocõj. Dan me se guun yanij soj rihaan nu' nij tinúú ní' nij síi nocõ' chrej rmii na'vej rá qui'yaj suun ei. 'O se sij ne nocõ' tucuaán narqué nuj rihaan me nij so' nanj adonj. <sup>7</sup> 'O se aj ne'en soj se vaa nõ xcúun soj qui'yaj soj ndaa vaa qui'yaj nuj gaa cayáan nuj ga soj, ne dan me se ne vaa rmii nuj gaa cane nuj ga soj ma'. <sup>8</sup> Ne ne cha' yun nuj chraa rihaan soj ma'. 'O se nu' se chá nuj naru'vee nuj sa'anj rihaan soj adonj. Tzaj ne 'õ se nuvij nigan' qui'yaj suun uxrá nuj quirí' nuj chá nuj, ne ne qui'yaj suun soj che'é nuj, qui'yaj nuj ma'. <sup>9</sup> Dan me se sese guun rá nuj cachinj nuj se chá rihaan soj, ne cunõõ xcúun nuj qui'yaj nuj daj, tzaj ne ne ca'vej rá nuj qui'yaj nuj daj ma'. Maan se guun rá nuj cuchruj nuj tucuaán rihaan soj daj qui'yaj ma'an soj adonj. <sup>10</sup> 'O se gaa cayáan nuj ga soj, ne tananj nata' nuj nana nihánj rihaan soj ca'mii soj a: "sese vaa 'õ síi na'vej rá qui'yaj suun, ne se chá so' chraa ma'", taj nuj rihaan soj adonj.

<sup>11</sup> Aj cuchi' nana rihaan nuj se vaa ta'aj síi rmii 'nij sca'núj soj, ne nij so' me se na'vej rá nij so' qui'yaj suun nij so', tzaj ne na'née rma'an nij so' nana rihaan tuvi' nij so' a. <sup>12</sup> Che'é Jesucristó sij 'nij ra'a man ní' a'ne' nuj suun cuango rihaan yuvii 'yaj daj, se vaa dínj gaa tu'va nij so', ne qui'yaj suun nij so', ne inanj se chá qui'yaj canaán ma'an nij so' cha' nij so' á.

<sup>13</sup> Ne xa' ma'an soj, tzaj ne se ca'ne' rá soj qui'yaj suun soj suun sa', man tinuj, man nocõj. <sup>14</sup> Sese yo'õ tuvi' soj na'vej rá cunõõ nana cachrón nuj rihaan yanj nihánj, ne xcaj soj cuentá me síi na'vej rá cunõõ nana, ne se cayáan rcua'aaan soj ga so' ma'. Ndaa síj, gaa ne guun na'aj so' a. <sup>15</sup> Tzaj ne se nachri' soj ni'yaj soj man síi rmii yo' ma'. Tananj ve'é qui'yaj soj, nago' soj chrej nucuaj man so' á. 'O se tinúú soj me so' adonj.

Nana nihánj taj xna'anj se vaa ve'é cumañ nij síí  
cuchumán rá ni'yaj man Jesucristó yo', rá síí cu'naj  
Pabló a

<sup>16</sup> Qrún' síí 'nij ra'a man ní' ne'en qui'yaj gaa xej  
nimán ní', ne me rá núj qui'yaj so' danj che'é soj nu'  
güii a. Ne ca'vee se me ma'an sayuun quiran' soj, tzaj

ne dínj gaa nimán soj, qui'yaj so' á. Ne me rá núj  
cayáán síí 'nij ra'a man ní' ga taran' soj adonj.

<sup>17</sup> Ma'anj sij cu'naj Pabló ra'aj achronj nana nihánj se  
vaa ve'é cumañ soj raj a. Danj inanj 'yáá 'unj doj nana  
rihaan cunudanj nij yanj cartá a'née 'unj, ne nanj vaa  
letrá achronj a. <sup>18</sup> Me rá núj qui'yaj ndo'o Jesucristó sij  
'nij ra'a man ní' se luj che'é cunudanj soj adonj.

# 1 Timoteo

**1** 'Unj nihánj me síf cu'naj Pabló síf uun apóstol síf nata' se-nānā Jesucristó rihaan yuvij a. Yo' me suun ca'ne' Diose dō', Jesucristó dō', rihanj, ne Diose me síf tinanii man ní' rihaan sayuun, ne guun ya rá ní' se vaa cavij sa' ní' qui'yaj Jesucristó adonj.

<sup>2</sup> 'Yáá 'unj yanj cartá nihánj ca'nej 'unj rihaan so' sij cu'naj Timoteo a. Dan me se tihaán 'unj se-nānā Diose rihaan so', ne cuchumán rá so' nana yo', ne che'é dan ase vaa 'o ta'nij ro', danj vaa yá so' rihanj ei.

Me rá 'unj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é so', ne gaa 'ee rá roj so' mán so', ne gaa xej nimán so', qui'yaj roj so', raj a.

**Nana nihánj taj xna'anj che'é nij síf tucu'yón tucuáán ne a**

<sup>3</sup> Dan me se aj ne'én so' se vaa gaa ataa ca'anj 'unj estadó Macedonia, ne cataj xna'anj 'unj rihaan so' se vaa cané so' chuman' Efeso á. Dan me se me rá 'unj cataj xna'anj so' rihaan ta'aj nij síf man Efeso se vaa se tucu'yón nij so' tucuáán ne rihaan nij tinúú ní' mei.

<sup>4</sup> Dan me se cataj so' rihaan nij tinúú ní', ne a se cuta' xrej nij so' cuentó yo' ma'. 'O se cuentó man gaa naá dō', cuentó che'é daj vaa daj a xij nij so' man gaa naá dō', me yo' ei. 'O se a'mii unu' uxrá yuvij che'é nana yo', tzaj ne ne racuíj nana yo' man ní' canoco' ní' man Diose ma'. 'O se me rá Diose gaa nucuaj rá ní' man ma'an Diose ei. <sup>5</sup> 'O se che'é suun a'né' 'unj rihaan so' me se a'né' 'unj suun yo' rihaan so' che'é rej gaa 'ee rá ní' tuvi' ní' ndaa nimán ya ya ní' ndaa vaa cuchumán ya rá ní' ni'yaj ní' man Jesucristó ei. <sup>6</sup> Dan me se vaa ta'aj nij yuvij, ne ta'aa nij so' yo'ó chrej a'mii nij so', ne dan me se ri' rma'an tiempÓ, 'yaj nij so', a'mii nij so' che'é yo'ó tucuáán ei. <sup>7</sup> 'O se me rá nij so' guun nij so' maestró tucu'yón se-tucuaj Moisés, tzaj ne na'vee ran' nij so' a ma'. A ma'an nij so' ne ne'en nana tucu'yón nij so' a mei.

**Nana nihánj taj xna'anj se vaa inanj che'é nij síf 'yaj cacun' vaa se-tucuaj Moisés a**

<sup>8</sup> Ne'en ní' se vaa sa' vaa se-tucuaj Moisés, ne cataj Diose rihaan Moisés daj qui'yaj nij yuvij israelitá canoco' nij so' man Diose, tzaj ne xcaj ní' cuentá me che'é me ca'mii Diose danj á. <sup>9</sup> Ne'en ní' se vaa xa' yuvij nica nimán, tzaj ne taj tucuáán achiin man yuvij nica nimán canoco' nij so' Diose ma'. 'O se ma'an Diose uun chij nimán nij so' daj gaa qui'yaj nij so' nanj á. Maan se che'é nij yuvij 'yaj cacun' dō', yuvij na'vej rá

canoco' Diose dō', yuvij a'mii nana nij che'é Diose dō', yuvij ticavi' rej dō', yuvij ticavi' nii dō', <sup>10</sup> síf 'yaj cacun' ga yo'ó chana dō', chii chana dō', síf otoj ga chii chana dō', yuvij tu'vej man tuvi' dō', yuvij a'mii nana ne dō', yuvij na'vej rá cunō nana ya dō', me cuchruj Diose se-tucuaj Moisés adonj. <sup>11</sup> Inanj danj a'mii se-nānā Diose nana sa' che'é se-tucuaj Moisés, ne 'unj me síf cune' Diose nata' nana yo' rihaan yuvij se vaa ve'é uxrá yáán Diose, ne guun chij so' nu' cavii nu' ca'anj ei.

**Nana nihánj taj xna'anj se vaa cunuu 'ee ndo'o rá Jesucristó man síf cu'naj Pabló, ne 'ee ndo'o rá Jesucristó man cunudanj ní' sij noco' man so' uún a**

<sup>12</sup> Nagó' 'unj graciá rihaan Jesucristó sij 'nij ra'a man ní' che'é se guun nucuáá 'unj qui'yaj suun 'unj, qui'yaj so' a. Dan me se nucuaj rá so' mán 'unj, ne cune' so' mán 'unj qui'yaj suun 'unj rihaan so' adonj. <sup>13</sup> Asino yaan me se nij uxrá ca'mii 'unj che'é Jesucristó, ne qui'yaj ndo'o 'unj sayuun man so', ne ca'mii xta' 'unj ni'yaj 'unj man so', tzaj ne quene'en Jesucristó se vaa che'é se ne quene'en yá 'unj daj vaa so' ro', che'é dan ne cuchuman rá 'unj ni'yaj 'unj man so' a. Tzaj ne cunuu 'ee rá Jesucristó manj, ne ne qui'yaj so' sayuun manj ma'.

<sup>14</sup> Tananj sa' uxrá qui'yaj uun Jesucristó sij 'nij ra'a man ní' manj, se vaa cuchumán rá 'unj ni'yaj 'unj man so', ne cunuu 'ee raj tuvij, qui'yaj so' adonj. <sup>15</sup> Dan me se ya uxrá vaa nana nihánj, ne taran' ní' nō xcúún cunō nana nihánj se vaa me rá Jesucristó tinanii so' man nij yuvij rihaan chrej chi'ii uun chij nimán nij so', ne na'vej rá so' quiran' nij so' sayuun ma'. Che'é dan ca'na' so' rihaan chumij nihánj ei. Dan me se nocoj doj cacun' qui'yáá 'unj rihaan cacun' qui'yaj taran' yo'ó nij yuvij, <sup>16</sup> tzaj ne cunuu 'ee rá Jesucristó ni'yaj so' manj, che'é se guun rá Jesucristó se vaa xcaj yo'ó nij síf cuchuman rá ni'yaj man so' cuentá se vaa canoco' nij so' man Jesucristó, ne x'neē cacun' xráá nij so', ne ca'vee cayáán nij so' ga so' nu' cavii nu' ca'anj ei. <sup>17</sup> Nu' cavii nu' ca'anj cataj ní' se vaa sa' uxrá vaa Diose, ne so' me síf guun chij nu' cavii nu' ca'anj, ne daj chihaa mij se cavi' so' ma'. Ne ruvi' so' ni'yaj yuvij ma'. Taj vaj 'ó Diose ma'. Qrún' so' me Diose ya adonj. Veé danj gaa ya ei.

<sup>18</sup> Timoteo. Ase vaa ta'níí ya ma'anj vaa yá so' ei. Dan me se a'ne' yá 'unj suun rihaan so' yo'ó ca'mii cunū' sa' yá so' che'é chrej sa' ya nihánj ei. Daj chihaa mij se ca'ne' rá so' ma'. Tzaj ne yo'ó gaa nica nimán so', ne yo'ó gaa nucuaj rá so' cuchuman rá so', gaa ne quisij

yā ndaa vaa yā ca'mii nij sí naruvi' Diose rihaan che'é so' ei. Dan me se vaa ta'aj nij sí quiri' rá, ne ne cuchuman yā rá nij so' ma'. <sup>20</sup> Dan me se vij tuvi' nij so' me roj sí cu'naj Himeneo gā Alejandro sí ca'mii nij che'é Diose a. Dan me se nago' yá 'unj man roj so' ra'a Satanás, gā ne ri' rá roj so', gā ne xcaj roj so' cuentá, ne yuún che'e me se se ca'mii nij roj so' che'é Diose ma'.

**Nanā nihánj taj xna'anj se vaa cachinj ni'yaj ní' rihaan Diose che'é cunudanj yuvij a**

**2** Nihánj me se asino yaan a'né' 'unj suun rihaan nij soj se vaa cachinj ni'yaj soj rihaan Diose che'é cunudanj yuvij, ne nago' soj graciá rihaan Diose che'é cunudanj nij yuvij, <sup>2</sup> ne cachinj ni'yaj soj che'é cunudanj nij sí nicaj suun, gā ne gāa díj cayáán ní' rihaan chumij nihánj, ne ve'é qui'yaj ní', canocó' ní' man Diose á. <sup>3</sup> Sa' uxrá vaa sese danj qui'yaj ní' ni'yaj Diose, ne aj ne'en soj se vaa Diose me sí' yaj avij sa' ní' ei. <sup>4</sup> Me rá Diose racuj Diose man cunudanj yuvij, che'é rej cavij sa' cunudanj yuvij, ne me rá Diose nari' cunudanj yuvij nanā yā ei.

<sup>5</sup> 'Q se oruun Diose, ne oruun 'o snó'o cataj xna'anj rihaan ní' daj vaa Diose, ne so' me sí' racuj man yuvij cunū sa' yuvij rihaan Diose, ne yo' o snó'o cu'naj Jesucristó me sí' qui'yaj danj ei. <sup>6</sup> Ne Jesucristó me se ca'ne' rá so' caví' so' che'é cunudanj yuvij, ne nani' nij yuvij rihaan sayuun a. Dan me se cachrón Diose güii cavi' Jesucristó, ne güii dan cavi' Jesucristó, ne tihaan Jesucristó se vaa me uxrá rá Diose cavij sa' cunudanj yuvij a. <sup>7</sup> Ne cune' Diose mán 'unj guún 'unj apóstol nata' rihaan yuvij se vaa me rá Diose cavij sa' nij yuvij, tzaj ne ne tucuyón 'unj man nij yuvij israelitá ma'. Maan se inanj nij yuvij yanij tucuyón 'unj daj qui'yaj nij so', se vaa cuchuman rá nij so' ni'yaj nij so' man Diose, ne cunō nij so' nanā yā ca'mii Diose, taj 'unj rihaan nij so' adonj. Xā' nanā nihánj, tzaj ne nanā yā uxrá me nanā nihánj, ne ne a'mii ne 'unj ma'.

<sup>8</sup> Dan me se gāa nuu chre' soj sij amán rá ni'yaj man Jesucristó, ne me rá 'unj cachinj ni'yaj nij snó'o rihaan Diose, ne naxcaj ra'a nij so' rej xta' cachinj ni'yaj nij so' rihaan Diose, ne yo' o guun rá nij so' se vaa ve'é canocó' nij so' man Diose, ne se ca'maan rá nij so' do', se canó tuvi' nij so' do', se ca'mii cunu' nij so' do', 'o se sa' inanj cachinj ni'yaj nij so' nanj adonj.

**Nanā nihánj taj xna'anj daj qui'yaj chanā cuchumán rá ni'yaj man Jesucristó a**

<sup>9</sup> Ne xa' chanā, tzaj ne se guun rá chanā cunū chanā yatzíj sa' ndo'o vaa ma'. Maan se ve'é qui'yaj chanā çaráán chanā nee man chanā, gā ne cataj nii se vaa chanā sa' me no' ei. Tzaj ne se caxríj chanā que'ee quitzi' yuvé raā chanā do', se toco' chanā que'ee caquí' xrée chanā do', se ca'née chanā ticuu gaán chihá no' do' ma'. <sup>10</sup> Tzaj ne qui'yaj suun chanā racuj chanā man yuvij, ne quene'en nii se vaa yā vaa nanā a'mii chanā yo', se vaa nocó' no' man Diose

adonj. <sup>11</sup> Ve'é cunō chanā gā tucuyón nii nanā sa' man no' á. <sup>12</sup> Se ca'vee tucuyón chanā man snó'o ma'. Se guun guun chij chanā rihaan snó'o ma'. Maan se díj gā tu'va chanā adonj.

<sup>13</sup> Dan me se gāa guun che'e chumij, ne asino qui'yaj Diose man snó'o cu'naj Adán, gā ne qui'yaj Diose man chanā cu'naj Eva adonj. <sup>14</sup> Ne tiha' yu'unj sí chree man sí' cu'naj Adán ma'. Tzaj ne chanā tiha' yu'unj so', ne qui'yaj no' cacun' rihaan Diose, qui'yaj sí chree adonj. Che'é dan se guun chij chanā rihaan snó'o ma'. <sup>15</sup> Tzaj ne cavij sa' nij chanā che'é se cunū se uun nij chanā se vaa cuchruj chanā ne'ej adonj. Danj gā cavij sa' chanā, sese cuchuman rá chanā ni'yaj chanā man Diose do', sese cunū 'ee rá chanā tuvi' chanā do', sese cunō chanā se-nanā Diose do', sese tumé chanā man ma'an chanā daj qui'yaj no' do' adonj.

**Nanā nihánj taj xna'anj daj gāa nij snó'o guun sí' chij nicaj yu'unj man nij yuvij nocó' man Diose a**

**3** Yā vaa nanā nihánj ei. Sese me rá yo' o so' guun so' sí' chij nicaj yu'unj man nij yuvij nocó' man Diose, ne sa' vaa suun me rá so' çata so' ei. <sup>2</sup> Che'é dan inanj snó'o ne a'mii chree nii che'é guun sí' chij nicaj yu'unj man nij yuvij nocó' man Diose á. Orún' nicaj so' njcaj so', ne sí' chij vaa rá guun so', ne sí' a'mii nicaj inanj guun so', ne sí' aráj cochroj do', sí' aráj x'naa do', sí' yaj se luj rihaan taran' yuvij do', sí' yo' o a'née nimán racuj man yuvij do', sí' aran' rá çaran' yuvij tucú do', sí' ne'en tihaan sa' man yuvij do', sí' ne aran' rá gāa xno do', sí' ne aran' rá cunū' gā yuvij do', sí' se guun rá gāa que'ee uxrá si'yaj do', guun so' ei. <sup>4</sup> Maan se yan gāa so' me se inanj sí' tumé sa' uxrá tucú guun chij do', yan ve'é uxrá cunō ta'ní' so' rihaan so' do', se tucúáá nij xnii rihaan so' do' adonj. <sup>5</sup> 'Q se sese ne ne'en so' guun chij so' rihaan tucú so', ne asa' ca'vee çutumé so' man cunudanj nij yuvij nocó' man Diose gā. <sup>6</sup> Sese sí' nocó' naca se-tucuanj Diose me yo' o so', ne se gāa nanj ca'mii so' ne quiran' so' sayuun gā sí' chree se vaa cacāa so', qui'yaj Diose ei. <sup>7</sup> Tananj uún, ne chij gāa rá so' gā nij yuvij ne nocó' man Jesucristó, gāa ne xcaj nij so' cuentá se vaa yā chij a'mii sí' nicaj yu'unj man nij sí' nocó' man Jesucristó, gāa yā rá nij so' a. 'Q se danj qui'yaj sí' me rá quinicaj yu'unj man nij sí' nocó' man Jesucristó, gāa ne se gāa nanj tiha' yu'unj sí' chree man so' ei.

**Nanā nihánj taj xna'anj daj gāa nij snó'o do', nij chanā do', guun diácono a**

<sup>8</sup> Ne veé danj gāa guee nij sí' guun diácono uún, ne sí' ni'yanj guun nij so' á. Se ca'mii nij so' nanā tiha' yu'unj mei. Se gāa niha' rá nij so' co' o ndo'o nij so' na vinó mei. Se tiha' yu'unj nij so' man yuvij ca'nee uun nij so' sa'anj mei. <sup>9</sup> Canocó' raan nij so' nanā tucuyón Diose man ní' á. Se guun vij rá nij so' ma'. <sup>10</sup> 'Q se asino xcaj nii cuentá ni'yaj nii man nij so' sese taj cacun' tumé nij so', gāa ne ca'vee guun nij so' diácono ei.

<sup>11</sup> Veé danj gāa guee nij chanā me rá guun diácono, ne

chij gaa rá nij no' dɔ', chij ca'mij nij no' rihaan nij yuvij dɔ', se gaa ne nij no' dɔ', se guun xno nij no' dɔ', yo'o ve'é qui'yaj nij no' daj a rasuun dɔ' ei. <sup>12</sup> Xa' nij sí guun diácono, tzaj ne orún' nicaj nij so' nicaj nij so' dɔ', sa' cütumé nij so' man ta'níi nij so' dɔ', sa' cütumé nij so' man nu' nij tucua' nij so' dɔ' ei. <sup>13</sup> Ne sese sa' 'yaj nij so' nu' suun vaa rihaan nij so', ne síi sa' me nij so', cataj nij yuvij nocɔ' man Diose, ne se cuchu'vi' nij so' cataj xna'anj nij so' daj qui'yaj ní' canocɔ' ní' man Jesucristó ma'.

**Nana nihánj taj xna'anj se vaa sa' uxrá vaa nana cataj xna'anj Diose rihaan ní' nana canoco' ní' a**

<sup>14</sup> Dan me se cachrón 'unj nana nihánj rihaan yanj nihánj, ne ca'nej 'unj rihaan so' á. Tzaj ne me ndo'o rá 'unj cuchí' 'unj rihaan so' rque doj güii ei. <sup>15</sup> Tzaj ne asa' ne cuchí' ra'yanj 'unj, ne taj se 'yaj mei. Aj ne'en so' daj qui'yaj soj sij nocɔ' man Diose gaa yáan soj ga tinúú soj ei. 'Q se tucua' Diose me ma'an cunudanj soj sij nocɔ' man Diose síi vaa i'na' ya ei. Che'é ma'an soj me se acaj yuvij cuentá se vaa ya vaa se-nana Diose ne ma'an soj me síi nicaj nana ya ei. <sup>16</sup> Ne'en cunudanj ní' sij amán rá ni'yaj man Jesucristó se vaa sa' uxrá vaa nana cataj xna'anj Diose rihaan ní' nana canoco' ní', ne nihánj me nana yo' a: "Ca'na' Jesucristó a. Curuvi' so' ni'yaj yuvij a. Guun so' yuvij a. Ve'é ndo'o qui'yaj so', cataj Nimán Diose, ne quene'en rihaan nij se-mozó Diose daj qui'yaj so' a. Dan me se nata' nii che'é so' rihaan nij yuvij yanj yuvij ne nocɔ' se-nana Diose, ne cuchumán rá ta'aj nij so' quene'en nij so' man so' a. Ne quinan' so' xtá', qui'yaj Diose, ne ve'é ndo'o yáan so' rej xtá' cuano adonj". Dan me nana nocɔ' ní' a.

**Nana nihánj taj xna'anj se vaa cunɔ ta'aj yuvij se-nana nij síi ne, gaa ne quiri'ij nij yuvij se-tucuanj Diose a**

**4** Tzaj ne taj xna'anj Nimán Diose se vaa vaa güii, ne quiri'ij ta'aj yuvij se-tucuanj Diose, ne canocɔ' nij so' yo'ó tucuaán, ne cunɔ nij so' nana tiha' yu'unj nana tucuyón nij nana chree adonj. <sup>2</sup> Dan me se cuchuman rá nij so' nana ca'mij síi taj a'mii sa' tu'va rma'an ei. Ne síi ne ndo'o me nij so' ei. Ne xa' nij síi ne yo', tzaj ne a'mii rma'an nij so', ne nimán nij so' me se nda' rá se vaa táa yaan cavi' i'na' ro', vaa táa yaan chí'ij nimán nij so' a. <sup>3</sup> Ne tucuyón nij síi ne rihaan yuvij se vaa se ca'vee xcaj yuvij chana, ne cacun' me yo', taj nij so' a. Ne tucuyón nij so' se vaa se ca'vee cha yuvij náá guun rasuun uún a. Tzaj ne 'o se nu' nij rasuun man rihaan yo'ó me se rasuun chá nago' graciá rihaan Diose me yo', rá Diose, don araa so' rasuun yo' rihaan yo'ó che'é nij síi mán raá nana ya ei. <sup>4</sup> Dan me se nu' rasuun qui'yaj Diose me se sa', ne ne nó xcúun ní' nachri' ní' ni'yaj ní' man se vaa qui'yaj Diose che'é ní' ma'. Maan se nicaj ní' man yo', ne nago' ní' graciá rihaan Diose che'é rasuun yo' cha ní' ei. <sup>5</sup> Ne'en ní' daj taj se-nana Diose, ne che'é dan ne'en ní' se vaa sese

cachinj ni'yaj ní' asino yaan rihaan Diose, ne Diose me síi naqui'yaj sa' yo' cha ní' ei.

**Nana nihánj taj xna'anj se vaa ve'é qui'yaj suun Timoteo suun ca'ne' Diose rihaan so' a**

<sup>6</sup> Sese tucuyón so' nana nihánj rihaan yo'ó nij tinúú ní' síi nocɔ' man Jesucristó, ne síi ve'é 'yaj suun rihaan Jesucristó mé so', ne síi ve'é nari' nu' nana nocɔ' ní' mé so' chuguanj. 'Q se tucuyón nii nana sa' yo' rihaan so', ne cuchumán rá so', ne canocɔ' so' nana yo', ne che'é dan guun nucuaá so' tucuyón so' nana yo' rihaan tinúú ní' a. <sup>7</sup> Se cunɔ so' cuentó nata' yuvij cuentó ne ya a'mii che'é Diose ma'. 'Q se nana snúú rma'an me nana yo' nanj á. Tzaj ne tucuyón so' daj qui'yáa so', ne ve'é doj canocó' so' se-tucuanj Diose á. <sup>8</sup> Nda' se vaa yu'vee nó suun 'yaj suun nee man ní', tzaj ne vaa doj yu'vee nó nimán ní', canocɔ' nimán ní' man Diose ei. Che'é suun 'yaj suun nimán ní' me se cavii sa' ní' gaa yáan ní' rihaan chumij nihánj, ne ne'en ní' se vaa cavii sa' ní' cayáan ní' ga Diose nu' cavii nu' ca'anj ei. <sup>9</sup> Ya vaa nana yo', ne vaa che'é cunɔ ní' man yo' chuguanj. <sup>10</sup> Dan me se nucua' rá ní' man Diose síi vaa i'na' se vaa cavii sa' ní' qui'yaj Diose, ne che'é dan 'yaj suun uxrá ní', ne ne chu'vi' ní' ca'mij yuvij nana nij che'é ní' a mei. Orún' Diose ca'vee cavii sa' cunudanj yuvij ei. Ne ya cavii sa' cunudanj nij yuvij amán rá ni'yaj man Diose adonj. <sup>11</sup> Tucuyón so' nana yo' rihaan yuvij, ne ca'ne' so' suun rihaan nij yuvij se vaa canocɔ' nij yuvij nana yo' á.

<sup>12</sup> 'Q se xnii mé so', ne ataa cachij so', tzaj ne taj se 'yaj yo' mei. Se guun cataj yuvij se vaa taj se uún so' mei. Maan se ve'é qui'yáa so' nu' tucuaán nocɔ' ní', se vaa ve'é ca'mij so' dɔ', ve'é qui'yáa so' dɔ', gaa ee rá so' man tinúú so' dɔ', gaa nucua' rá so' man Diose dɔ', cütumé so' mán so' se qui'yáa so' cacun' dɔ', gaa ne xcaj nij síi nocɔ' man Diose cuentá daj 'yáa so', ne danj qui'yaj nij so' uún adonj. <sup>13</sup> Asa' guun raan 'o xco' le'ej nii cuchij, ne naya' so' se-nana Diose cunɔ nij so', tucuyón sa' so' man nij so', ne inanj danj gaa suun qui'yaj suun so' ndaa güii cuchí' 'unj rihaan so' ei. <sup>14</sup> Se quini'yón so' suun sa' ca'ne' Diose rihaan so' mei. 'Q se che'é suun sa' yo' me tihaan Diose 'o nana che'é so' rihaan nij síi chij nicaj yu'unj man nij yuvij nocɔ' man Diose, ne cuta' nij so' ra'a nij so' raá so' ei. <sup>15</sup> Dan me se yo'ó ca'nej so' raá so' man nij rasuun yo', gaa ne quene'en cunudanj nij yuvij se vaa vaj nari' so' qui'yaj suun so' se-suun Diose, ni'yaj nij yuvij ei. <sup>16</sup> Xcaj so' cuentá se vaa 'yáa so' dɔ', se vaa tucuyón so' dɔ' á. Canocó' so' nu' nana nihánj, gaa ne cavii sa' mán so' cavii sa' nij yuvij uno nana a'mii so' cavii sa', qui'yáa so' a.

**Nana nihánj taj xna'anj daj ca'mij ní' rihaan 'o 'o yuvij nocɔ' man Diose a**

**5** Se caxrij yuvaa so' man nij chii nga ma'. Maan se ve'é ca'mij so' rihaan nij so' nago' so' chrej sa' man nij so' á. Daj se a'mii so' rihaan rée so' ro', danj

ca'mij so' rihaan nij chii nga á. Ase a'mii so' rihaan tinúú so' ro', danj ca'mij so' rihaan nij sí tachruu uún a. <sup>2</sup> Ase a'mii so' rihaan ní so' ro', danj ca'mij so' rihaan nij vichij uún a. Ase a'mii so' rihaan ra'vij so' ro', danj ca'mij so' rihaan nij chana tachruu á. Se ca'mii so' a doj nana chi'ij ga nij no' ma'.

**Nana nihánj taj xna'anj che'é nij chana cavi' nicá a**

<sup>3</sup> Caraa cochróo so' rihaan nij chana cavi' nicá á. Go' so' rasuun achiin man nij no', sese nuvi' tuvi' chana racuíj man chana a. <sup>4</sup> Tzaj ne sese vaa ta'ní chana do', ta'nij si'nó chana do', ne taj ya'anj nij so' man chana yo' á. Danj qui'yaj nij so', gaa ne quinari' nij so' suun ca'ne' Diose rihaan nij so' se vaa taj ya'anj nij so' man tuvi' nij so' á. 'O se danj gaa ya, gaa ne cunuú rá nij so' se vaa asij xnii me nij so', ne taj ya'anj nii nij so' do', xcua'anj nij so' do', man ma'an nij so', ne ase vaa qui'yaj nii nij so' do', ase vaa qui'yaj xcua'anj nij so' do', man nij so' ro', danj qui'yaj ma'an nij so' man nii nij so' do', man xcua'anj nij so' do' ei. Yo' me, gaa ne guun niha' rá Diose ni'yaj Diose man nij so' a. <sup>5</sup> Sese ya chana nique me yo'ó no', ne gaa nucuaj rá no' ni'yaj no' Diose á. Se-suun no' guun suun achín ni'yaj rihaan Diose nuvij nigan' a. <sup>6</sup> Tzaj ne sese me inanj rá no' guun niha' rá no' rihaan chumij nihánj, ne nda' se vaa i'na' nee man no', tzaj ne nimán no' me se aj cavi' a. <sup>7</sup> Nagó so' nana nihánj rihaan nij sí amán rá ni'yaj man Diose, ne se cuta' yuvij a doj cacun' xraá nij so' mei. <sup>8</sup> Sese vaa yuvij na'vej rá taj ya'anj man tuvi' yuvij do', man nij tucua yuvij do', ne nuveé yuvij noco' se-tucuanj ní sij noco' man Diose me nij so' ma'. Nij doj 'yaj yuvij yo' rihaan nij yuvij ne amán rá ni'yaj man Diose adonj.

<sup>9</sup> Inanj se-chuvij nij chana vaj va'nuj chihaa yo' taj doj cachron so' rihaan yanj no se-chuvij nij chana cavi' nicá á. Ne inanj se-chuvij chana nicaj raan man orún' nicá cachron so' uún á. <sup>10</sup> Ne quene'en cunudanj nii man nij no' se vaa ve'é 'yaj suun nij no' che'é tuvi' nij no' do', se vaa ve'é tucua'chij nij no' ta'ní nij no' do', se vaa rqué nij no' chraa chá yuvij ca'na' rej man gan' do', se vaa na'nu' nij no' tacóo nij yuvij noco' man Diose do', se vaa racuíj nij no' man nij sí quiran' sayuun do', ne nij no' me ca'vee cachron so' se-chuvij rihaan yanj no se-chuvij nij chana cavi' nicá a.

<sup>11</sup> Tzaj ne se cachron so' se-chuvij chana ta'aj rihaan yanj ma'. 'O se vaa güii guun niha' rá nij chana ta'aj yo' canoco' nij no' yo'ó chii, ne quiri'ij nij no' suun atá nij no' che'é Jesucristó nanj adonj. <sup>12</sup> Sese danj qui'yaj nij chana ta'aj, gaa ne cütumé nij no' cacun' che'é se tanáj nij no' suun 'yaj suun che'é Jesucristó a. <sup>13</sup> Tananj uún, ne ne yáán xej nij no' ve', ne chéé rma'an nij no' daj a ve', ne uun rmii nij no', ne achén uun tiempó, 'yaj nij no', ne nanó nij no' cuentó ne uún, ne tiguíj nij no' se-cuento nij no' rihaan se-cuento nij yo'ó yuvij, ne a'mii nij no' náá guun rasuun ne nó xcúún nij no' ca'mij nij no' a. <sup>14</sup> Maan che'é dan me rá 'unj xcaj nij chana ta'aj yo' yo'ó chii, ne cuchruj nij no' ne'ej, ne cütumé nij no' ve' tucua' nij no', ne danj gaa, gaa ne se

ca'vee ca'mij nij sí taj ri'yunj man ní nana chi'ij che'é ní adonj. <sup>15</sup> 'O se vaa ta'aj nij chana cavi' nicá, ne aj quiri'ij ta'aj nij no' tucuaán noco' ní, ne canoco' nij no' man sí cu'naj Satanás nanj adonj. <sup>16</sup> Tzaj ne sese vaa chana noco' man Diose, ne sese vaa tuvi' nij no' chana cavi' nicá 'nij sca'núj nij no', ne racuíj chana noco' man Diose man tuvi' no' chana cavi' nicá á. Gaa ne se cachiin taj ya'anj cunudanj nij sí noco' man Diose man chana cavi' nicá yo' a. Maan se taj ya'anj nij so' man nij chana quináj uun inanj ei.

**Nana nihánj taj xna'anj daj qui'yaj ní man nij sí uun chij nicaj yu'unj man nij yuvij noco' man Diose a**

<sup>17</sup> Vij ya nuu che'e soj go' soj tu'vee nij sí uun chij nicaj yu'unj man nij sí noco' man Diose ei. Danj qui'yaj soj, ne caraa cochroj soj rihaan nij so' sese ya sij 'yaj suun uxrá a'mii natáj se-nana Diose me nij so' do', sese ya tucuyón nij so' nana rihaan yuvij do' ei. <sup>18</sup> Danj Diose taj, ne: "Se numij so' tacúún scúj gaa 'yaj suun scúj utun' scúj 'núú trigó cunuu sa' 'núú trigó ma'", taj yo' a. Ne taj uún yo': "Nacaj mozó sa'anj tu'vee so' sese 'yaj suun so' á". Danj taj danj Diose a. Ne che'é dan xcaj ní cuentá se vaa no xcúún ní naru'vee ní rihaan nij sí 'yaj suun tucuyón man ní á. <sup>19</sup> Sese cuta' nii cacun' xraá 'o sí uun chij nicaj yu'unj man nij sí noco' man Diose, ne se cuchumán rá so' ma'. Tzaj ne sese vaa vij va'nuj sí quene'en se vaa tumé so' cacun', ne cunó so' nana ca'mij nij so' á. <sup>20</sup> Sese vaa 'o sí uun chij qui'yaj ndo'o cacun', ne ca'ne' so' cacun' che'é so' quene'en cunudanj yo'ó nij sí uun chij, gaa ne cuchu'vi' nij so' qui'yaj ma'an nij so' cacun' uún a.

<sup>21</sup> Nihánj me suun ca'ne' 'unj rihaan so' ni'yaj Diose do', ni'yaj Jesucristó do', ni'yaj nij se-mozó Diose narii Diose man do' a. Dan me se ca'ne' so' cacun' che'é yuvij, ne 'o cuyaan qui'yáá so' ga 'o 'o nij so' a. Taj se 'yaj sese sij sa' doj me yo'ó so' rihaan so' ma'. Maan se ca'ne' yá so' cacun' me ma'an cacun' tumé 'o 'o nij so' a. <sup>22</sup> Se gaa ra'yanj rá so' cuta' ra'á so' raá me ma'an 'o so' che'é yan guun so' sí cata' suun che'é Diose mei. 'O se sese sij tumé cacun' me so', ne taj che'é racuíj so' man so' guun chij so' ma'. Danj inanj qui'yáá so', gaa ne se gaa nanj cütumé so' se-cacun' so' a. Dan me se yo'ó inanj se ca'vee catuu a yo'ó se chi'ij mei.

**Nana nihánj taj xna'anj se vaa co'ó sí cu'naj Timoteo doj tzin' na vinó a**

<sup>23</sup> Che'é se ran' ndo'o so', ne ve'ee rqué so', ne se co'ó so' inanj na uun ma'. Maan se co'ó so' doj tzin' na vinó a.

**Nana nihánj taj xna'anj se vaa vaa güii, ne ya quene'en ní me yuvij tumé cacun' do', me yuvij qui'yaj suun sa' do' a**

<sup>24</sup> Vaa yuvij tumé cacun', ne nda' se ataa quiran' nij so' sayuun, tzaj ne aj ne'en cunudanj yuvij man rihaan chumij se vaa tumé nij so' cacun' ei. Tzaj ne ino' vaa yo'ó ta'aj nij yuvij tumé cacun' uún ei. Nda' se ne ne'en



nii se vaa cacun' qui'yaj nij so', tzaj ne vaa güii quiran' nij so' sayuun che'é cacun' tumé nij so', ne quene'en nii man nij so', ne xcaj nii cuentá se vaa ya tumé nij so' cacun' adonj. <sup>25</sup> Veé danj vaa uún nij suun sa' 'yaj suun yo'ó ta'aj nij yuvii, ne canó yuvii ni'yaj man nij suun sa' adonj. Tzaj ne sese vaa suun sa' ne ruvi' do', ne acay yuvii cuentá do', ne taj se 'yaj mei. Maan se vaa güii, ne xcaj cunudanj yuvii man rihaan chumii cuentá se vaa sa' qui'yaj suun nij so' ei.

**Nana nihánj taj xna'anj se vaa ve'é qui'yaj suun mozó rihaan se-ru'vee mozó a**

**6** Ne nij mozó me se ve'é caraa cochroj nij mozó rihaan se-ru'vee nij so' a. 'Q se yo' me qui'yaj nij so', gaa ne se gaa nanj ca'mii chi'ii yuvii che'é Diose do', che'é nana tucu'yón ní' do' a. <sup>2</sup> Ne sese síi noco' man Diose me ru'vee, ne se guun cataj mozó: "Tinúú 'unj me se-ru'vee 'unj, ne taj che'é qui'yaj suun nucuáa 'unj rihaan so' ma". Se guun ca'mii mozó danj ma'. Maan se ve'é qui'yaj suun so' rihaan se-ru'vee so', ne gaa 'ee rá so' se-ru'vee so' á. 'Q se ne'en mozó se vaa sij noco' man Diose me se-ru'vee mozó, ne guun niha' rá mozó se vaa cavii sa' 'o tinúú so' che'é suun 'yaj suun so' adonj.

**Nana nihánj taj xna'anj se vaa nij síi tucu'yón yo'ó tucuáan ro', nij 'yaj nij so', ne inanj me rá nij so' qui'yaj canaán nij so' sa'anj a**

Nana nihánj me chrej nucuaj nago' so' man nij yuvii a. <sup>3</sup> Ino vaa ta'aj nij síi tucu'yón yo'ó tucuáan, ne ino vaa nana a'mii nij so' ga nana ya ca'mii Jesucristó sij 'nij ra'a man ní' adonj. Nuveé se-tucuanj Diose me tucuáan tucu'yón nij so' ma'. <sup>4</sup> Síi sa' uxrá me nij so', rá nij so', tzaj ne síi tuchrii me nij so', ne ne ne'en uxrá nij so' a ma'. Niha' uxrá rá nij so' ca'mii cunu' nij so' che'é nana a'mii nij so', ne che'é dan uun xcoj ruvaa rá nij so' ni'yaj nij so' tuvi' so', ne unu' ndo'o nij so', ne a'mii naco' nij so' che'é Diose, ne nij 'yaj nij so', uta' nij so' cacun' rmi' xráa tuvi' nij so' adonj. <sup>5</sup> Síi ni'yón me nij so', ne na'vee xcaj nij so' cuentá a ma'. Nana ya na'vee cunó nij so' mei. Maan se sese ve'é canoco' nij so' man Diose, ne qui'yaj canaán ndo'o nij so' sa'anj, rá nij so' adonj.

<sup>6</sup> Dan me se ya uxrá danj vaa, ne sij quirí' uxrá ya se sa' me ní', tzaj ne yo'ó gaa xej nimán ní' canoco' ní' Diose, gaa ne ca'vee guun ní' síi ru'vee rej xtá' ei.

<sup>7</sup> Dan me se xcaj ní' cuentá, ne gaa ca'ngaa ní' rihaan chumii nihánj, ne taj se nicaj ní' ca'na' ní' ma'. Ne taj rasuun nicaj ní' ca'anj ní' asa' cavi' ní' uún mei. <sup>8</sup> Che'é dan me sese vaa se chá ní' do', sese vaa yatzi' taj xráa ní' do', ne taj che'é guun rá ní' nicaj ní' doj rasuun ma'. <sup>9</sup> Tzaj ne xa' nij yuvii me rá guun ru'vee me se achiin que'ee rasuun man nij so', rá nij so', ne ne uun nucuaj nij so' canoco' nij so' man Diose a mei. Ne ndaa uun rá nij so' qui'yaj nij so' cacun' che'é rej qui'yaj canaán nij so' rasuun gaa rihaan nij so', ne dan me se ran' ndo'o nij so' sayuun, ne síj, gaa ne yuun che'e quirí' nij so'

nanj ei. <sup>10</sup> Maan che'é se uun ndo'o rá yuvii ni'yaj yuvii sa'anj ro', che'é dan 'na' daj a sayuun ei. Man yuvii aran' rá sa'anj, ne che'é dan quirí'ij nij so' se-tucuanj Diose tucuáan canoco' nij so' asij rque doj, gaa ne quiran' ndo'o nij so' sayuun, ne quinano' ndo'o rá nij so' adonj.

**Nana nihánj taj xna'anj se vaa ve'é cunó ní' nu' se-nana Diose a**

<sup>11</sup> Tzaj ne so' sij noco' man Diose me se se guun rá so' qui'yaj canaán so' noco' sa'anj ma'. Tananj gaa niha' rá so' qui'yáa so' se vaa me rá Diose qui'yáa so' á. Gaa nucuaj rá so' man Diose, ne cunu' 'ee doj rá so' tuvi' so', ne caraa x'naa so', ne se caxri' yuvaa so' man tuvi' so' ma'. Ve'é inanj qui'yáa so' che'é nij so' á.

<sup>12</sup> Qui'yaj suun uxrá so' suun sca' sa' ca'ne' Diose rihaan ní' sij noco' man so', gaa ne cayáan so' ga Diose nu' cavii nu' ca'anj a. Che'é dan cune' Diose man so' qui'yaj suun so', ne cataj ya so' se vaa ya qui'yaj suun so' che'é Diose gaa canoco' so' man so' ei. Dan me se danj ca'mii so' cunó que'ee tinúú ní', ne se ca'ne' rá so' ca'anj yanij so' rihaan chrej sa' rque Diose mei.

<sup>13</sup> Ne'én so' se vaa Diose me síi qui'yaj vaa i'na' ní', ne ne'én so' daj qui'yaj síi cu'naj Jesucristó gaa canicun' so' rihaan síi nicaj suun síi cu'naj Poncio Pilato, se vaa nata' ya so' che'é suun cata so' a. Ne cunó Diose cunó Jesucristó cunó chrej narqué 'unj nihánj man so' á. <sup>14</sup> Dan me se cunó so' se-nana Diose, ne qui'yáa so' cunudanj yo' á. Se qui'yáa so' cacun' ma'. Danj qui'yáa so' ndaa güii ca'na' uún Jesucristó sij 'nij ra'a man ní' rihaan chumii nihánj á. <sup>15</sup> 'Q se Diose me síi qui'yaj ca'na' so' güii cachrón ma'an Diose, ne xa' Diose, tzaj ne sa' uxrá vaa so', ne orún' so' uun nucuaj guun chij rihaan chumii nihánj, ne uun chij so' rihaan cunudanj nij síi nicaj suun vaa rihaan chumii nihánj adonj. <sup>16</sup> Orún' so' me síi uun nucuaj qui'yaj gaa i'na' ní' nu' cavii nu' ca'anj, ne yanj so' rej aco' ya'an chuguun rej na'vee quinichrun' yuvii ei. A 'ó yuvii ne quene'en man so', ne daj chihaa mij se ca'vee quene'en yuvii man so' ma'. Che'é dan caraa cochroj ní' rihaan so', ne so' me síi nucuaj ndo'o nu' cavii nu' ca'anj adonj. Veé danj gaa ya ei.

**Nana nihánj taj xna'anj daj qui'yaj nij ru'vee a**

<sup>17</sup> Nago' so' chrej nucuaj man nij síi ru'vee yanj rihaan chumii nihánj cunó se vaa se guun cataj nij so' se vaa sij sa' uxrá me nij so' che'é se vaa sa'anj rihaan nij so' mei. Se gaa nucuaj rá nij so' man si'yaj nij so' mei. 'Q se sese quiran' nij so' sayuun, ne se racu'ij si'yaj nij so' man nij so' ma'. Che'é dan yo'ó gaa nucuaj rá nij ru'vee man Diose, ne Diose me síi rque cunudanj se sa' rihaan ní', che'é rej guun niha' rá ní' qui'yaj rasuun yo' a. <sup>18</sup> Maan se cataj xna'anj so' rihaan nij síi ru'vee se vaa suun sa' qui'yaj suun nij so', che'é rej guun ru'vee nij so' rihaan Diose, ne ve'é rque nij so' rasuun achiin man tinúú nij so' síi nique á. <sup>19</sup> Danj qui'yaj nij ru'vee che'é rej cataj Diose vaa güii se vaa ya cunó

ru'vee yo' rihaan Diose, gaa ne çayáán ru'vee yo' ga Diose nu' cavii nu' ca'anj, ne doj a gaa i'na' nij sí çayáán ga Diose rihaan nij sí man rihaan chumij nihánj cuano adonj.

**Nana nihánj taj xna'anj se vaa se cuno ní' yo'ó nana ma'**

<sup>20</sup> Yo'ó tumé so' se-suun Diose suun ca'ne' Diose rihaan so', tinuj. Se cuno so' yo'ó nana cuu tucu'yón nii,

nana a'mii yuvij uun ma'. Nuveé se-nana Diose me yo' a ma'. 'O se avii ndo'o raá nij sí noco' yo'ó nana, rá nij so', tzaj ne ne ne'en uxrá nij so' a ma'. <sup>21</sup> Vaa yuvij noco' yo'ó nana yo', tzaj ne veé danj aj tanáj nij so' se-tucuano Diose nanj adonj.

Me rá 'uj qui'yaj ndo'o Diose se luj che'é taran' soj adonj.

## 2 Timoteo

**1** 'Unj nihánj me síí cu'naj Pabló, ne cune' Jesu-  
cristó mán 'unj guún 'unj apóstol nata' rihaan yu-  
vij se vaa gaa i'na' ní' nu' cavii nu' ca'anj qui'yaj Jesu-  
cristó, ne yo' me suun me rá Diose qui'yaj sunj adonj.

<sup>2</sup> Yáá 'unj yanj nihánj ca'nej 'unj rihaan so' sij cu'naj  
Timoteo a. 'Ee rá 'unj mán so', tinuj. Ase vaa 'o ta'níí  
'unj, danj vaa so' rihanj á. Me rá 'unj qui'yaj ndo'o  
Diose Rej ní' do', Jesucristó sij 'nij ra'a man ní' do', se  
luj che'é so', ne me rá 'unj gaa 'ee rá roj so' mán so',  
ne gaa xej nimán so', qui'yaj roj so' a.

**Nana nihánj taj xna'anj se vaa guun niha' doj rá ní'  
qui'yaj suun ní' rihaan Diose a**

<sup>3</sup> Dan me se 'unj nihánj me síí 'yaj suun rihaan Diose  
ndaá vaa qui'yaj nij xíí 'unj gaa naá, ne nuvi' cacun'  
tumej mei. Ne dan me se tananj nagó' 'unj graciá ri-  
haan Diose che'é so', ne yo'o nuú raj mán so', ne 'o  
achíín nī'yáj che'é so' rihaan Diose nuví nigan' ei. <sup>4</sup> Ne  
na'nuj rá 'unj se vaa ta'veé so' gaa tanáj 'unj mán so',  
ne che'é dan me ndo'o rá 'unj quene'en uún 'unj mán  
so', gaa ne cunuu cuij nimanj qui'yáá so', raj a. <sup>5</sup> Dan  
me se achíín nī'yáá 'unj che'é so' che'é se nuú rá 'unj  
se vaa ne tihá' yu'unj so' mei. Ya nocó' so' man Diose,  
ne dan me se tucuáán nicaj níí so' chana cu'naj Eunice  
ga Xcuá'áán so' chana cu'naj Loida ro', nicaj ma'án so'  
uún, raj a. <sup>6</sup> Che'é dan cataj xna'anj 'unj rihaan so' se  
vaa yuun che'e ca'nej so' nimán so' qui'yaj suun so',  
ndaá vaa rqué Diose se nucuaj mán so' qui'yaj suun  
so', gaa cutaj ra'aj raá so' á. <sup>7</sup> 'O se nuveé sij chu'vi'  
nimán me ní', qui'yaj Diose ma'. Tananj nari' nucuaj  
nimán ní', ne nuu 'ee rá ní' tuvi' ní', ne tumé ní' man  
ní' me daj 'yaj ní', qui'yaj Diose adonj.

<sup>8</sup> Che'é dan se guun na'aj so' nata' so' rihaan yuvij  
che'é síí 'nij ra'a man ní' mei. Ne se guun na'aj so'  
che'é se 'nij 'unj taga' ma'. Se cuchu'ví' so' qui'rán' so'  
sayuun ma'. Racuíj so' manj ca'mii natáj ní' se-nana  
Diose nana sa', ne Diose me síí qui'yaj guun nucuaj ní'  
adonj. <sup>9</sup> Ne Diose me síí tinanii man ní' rihaan sayuun,  
ne canacúún so' man ní' canoco' ní' man so' ei. Nuveé  
che'e suun qui'yaj suun ma'an ní' me qui'yaj Diose  
danj ma'. Maan se danj guun rá ma'an so' qui'yaj so',  
ne guun rá so' qui'yaj uun so' se luj che'é ní' ei. Asij  
ataa qui'yaj so' chumii, ne qui'yaj so' se luj che'é ní'  
che'é se sij nocó' man Jesucristó me ní' a. <sup>10</sup> Ne yaj me  
se tihaan Diose rihaan ní' nu' se sa' nuu nimán so', se  
vaa ca'na' Jesucristó síí tinanii man ní' rihaan sayuun,  
qui'yaj Diose a. Yaj me se se ca'vee caví' ní', qui'yaj Je-  
sucristó yaj a mei. Tzaj ne yo'o gaa i'na' nimán ní' ga

Diose nu' cavii nu' ca'anj, qui'yaj so', ne danj taj se-na-  
na Jesucristó nana sa' adonj.

<sup>11</sup> Ne 'unj nihánj me síí cune' Diose se vaa guún 'unj  
apóstol nata' nana yo' rihaan yuvij, ne tucu'yonj nana  
yo' man yuvij adonj. <sup>12</sup> Maan che'é dan rán' 'unj sayu-  
un nihánj cuano, tzaj ne ne na'aj 'unj a doj se vaa rán'  
'unj mei. 'O se ne'én 'unj se vaa Diose me síí  
cuchumán raj ni'yaj 'unj man, ne guun ya raj se vaa  
uun nucuaj so' tumé so' manj qui'yaj sunj nu' suun  
ca'ne' so' rihanj, ne danj inanj qui'yaj so', racuíj so'  
manj ndaa güii ca'na' uún Jesucristó adonj.

<sup>13</sup> Dan me se aj cunó so' nij nana ya ca'mii 'unj rihaan  
so' á. Ne ase cunó so' ro', danj qui'yáá so', ne yo'o gaa  
nucuaj rá so' man Diose, ne gaa 'ee rá so' man tuví'  
so' che'é se sij nocó' man Jesucristó mé so' á. <sup>14</sup> Ne  
Nimán Diose nuu nimán so' ro', racuíj mán so' se vaa  
yo'o qui'yaj suun so' suun sa' suun ca'ne' Diose rihaan  
so' qui'yáá so' á. Ne ve'é nicaj so' tucuáán sa' nari' so'  
á.

<sup>15</sup> Aj ne'én so' se vaa cunudanj nij síí cuchumán rá  
ni'yaj man Jesucristó yanj estadó Asia ro', tanáj nij so'  
manj, ne canoco' nij so' yo'ó tucuáán a. Vij tuvi' nij so'  
me síí cu'naj Figelo do', síí cu'naj Hermógenes do' a.

<sup>16</sup> Me rá 'unj gaa 'ee rá Diose man nij tucuá síí cu'naj  
Onesíforo a. 'O se aj guun que'ee ndo'o racuíj so'  
manj, ne ndaa nuu cuij nimán 'unj qui'yaj so', ne ne  
guun na'aj so' se vaa 'nij 'unj taga' ma'. <sup>17</sup> Tzaj ne gaa  
ca'na' so' chuman' Romá, ne cuaj nano' so' manj, ne  
nari' so' manj ei. <sup>18</sup> Me ndo'o raj gaa 'ee rá síí 'nij ra'a  
man ní' man so' se vaa se quiran' so' sayuun gaa güii  
ca'na' uún síí 'nij ra'a man ní' rihaan chumii nihánj a.  
Ne so' me síí ne'en doj rihanj se vaa qui'yaj suun ndo'o  
síí cu'naj Onesíforo che'é ní' sij nocó' man Jesucristó  
gaa cane so' chuman' Efeso a.

**Nana nihánj taj xna'anj se vaa se cunanj ní' rihaan  
sayuun a**

**2** Ase vaa 'o ta'níj, danj vaa so' rihanj, tinuj. Ne me  
rá 'unj ca'vej rá so' nari' nucuaj nimán so', qui'yaj  
Jesucristó síí 'yaj ndo'o se luj che'é ní' a. <sup>2</sup> Dan me se  
man ndo'o síí cuno nana cataj xna'anj 'unj rihaan so',  
ne me rá 'unj tucu'yón so' nana yo' man doj nij snó'o  
luj nicaj tuvi' ga so' guun nij so' síí gaa nucuaj nimán  
nata' rihaan yuvij guun nij so' uún a.

<sup>3</sup> Se cuchu'ví' so' qui'rán' so' sayuun che'é se sij nocó'  
man Jesucristó mé so' mei. Maan se ase vaa uno tanuu  
nana a'mii tanuu uun chij ro', danj gaa cunó ma'án so'  
se-nana Jesucristó á. <sup>4</sup> Dan me se vaa nij tanuu 'nij

cuarteé, ne ne avii yaníj nij so' 'yaj suun nij so' ma'. Maañ se ve'é 'yaj suun nij so' inañj suun a'ne' nii rihaan nij so', che'é se me rá nij so' guun niha' rá tanuu uun chij ni'yaj so' man nij so' a. Ne ase 'yaj guée tanuu, danj qui'yáá so', ve'é qui'yaj suun so' rihaan orún' Jesucristó á. <sup>5</sup> Dan me se veé danj 'yaj nij sí tico canaán uún, ne no xcúún nij so' cunə sa' nij so' nu' suun a'ne' nii rihaan nij so' qui'yaj nij so' adonj. Tzaj ne sese se cuno sa' nij so' suun a'ne' nii rihaan nij so' qui'yaj nij so', ne daj chihaa míj se qui'yaj canaán nij so' cachriin yâj cunuú raá nij so' ma'. Che'é dan sese me rá so' qui'yaj canaán so' ni'yaj Jesucristó, ne ve'é cunó so' rihaan so' ei. <sup>6</sup> Ne veé danj vaa sí 'yaj suun ndo'o naa uún, ne gaa rii nii naa, ne so' me sí quirí' tan' asino yaan gaa cuxra' ta'aj nii tan' uún adonj. Ne ase vaa ran' sí 'yaj suun naa ro', danj quirán' ma'án so', ne cavii sa' uxrá so' sese yo'ə qui'yaj suun so' che'é Diose ei. <sup>7</sup> Cuno so' nana nihánj, ne raquíj Diose mán so' nari' so' cunudanj yo'ó nij nana chuguanj. <sup>8</sup> Se quini'yón so' man sí cu'naj Jesucristó a doj mei. Se quini'yón so' se vaa cunuu i'na' uún so' gaa cavi' so', ne se quini'yón so' se vaa noco' xna'anj tuvi' so' ga sí cu'naj David sí cayáán gaa naá mei. Nihánj me nana sa' a'mii natáj 'unj á. <sup>9</sup> Che'é nana nihánj quirán' 'unj sayuun, ne ndaa 'nij 'unj taga', ne nda' rá se vaa ran' sí tumé cacun' chuguanj. 'Q se taj se 'yaj mei. Xa' se-nana Diose, tzaj ne se ca'vee numíj nii man yo' do', se ca'vee caxrii nii taga' man nana yo' do' mei. <sup>10</sup> Che'é dan ne chu'ví' 'unj quirán' 'unj me ma'án sayuun che'é nij sí nari' Diose man ma'. 'Q se danj gaa quirán' 'unj, gaa ne ca'vee cavii sa' nij so' ga 'unj che'é se vaa qui'yaj Jesucristó che'é ní', ne ve'é ndo'o gaa ní' ga Diose nu' cavii nu' ca'anj a. <sup>11</sup> Ya vaa nana nihánj ei. "Ne sese aj cavi' ní' ga so', ne gaa i'na' ní' ga so' uún a. <sup>12</sup> Sese se cunanj ní' rihaan sayuun, ne guun chij ní' ga so' uún a. Sese cataj ní' se vaa nuveé sij noco' man so' me ní', ne cataj so' se vaa nuveé tuvi' so' me ní' uún a. <sup>13</sup> Nda' se ne sa' rá ní' ga so', tzaj ne so' me se sa' inañj so' ga ní' uún a. 'Q se ne ne'en so' naqui'yaj inə so' nana ca'mii so' rihaan ní' a man adonj". Nana ya cunə ní' me nu' nana nihánj ei.

### Nana nihánj taj xna'anj se vaa se cuno ní' nana a'mii rma'an yuvií ma'

<sup>14</sup> Dan me se cataj xna'anj so' rihaan nij sí noco' man Diose se vaa se quini'yón nij so' nana nihánj mei. Ne nago' so' chrej nucuaj man nij so' se vaa se canó tuvi' nij so' che'é nana tucu'yón nij so' ma'. 'Q se taj che'é qui'yaj nij so' danj man adonj. Maañ se sí quene'en che'é yan unu' nij so' ro', quirí' rá nij so' adonj. <sup>15</sup> Ca'nej nucuaj nimán so', gaa ne ca'vee cataj Diose se vaa sí ve'é qui'yaj suun rihaan so' mé so', ne se cunó rej na'aj rihaan so' che'é suun 'yaj suun so' mei. Tananj nata' nicá so' se-nana Diose nana ya ei. <sup>16</sup> Se nanó xrej so' nana a'mii rma'an ta'aj yuvií ma'. A'mii a'mii yun nij so', tzaj ne che'é nana a'mii nij so' ro', me se doj a 'yaj nij so' se vaa na'vej rá Diose qui'yaj nij so' adonj. <sup>17</sup> Ase vaa ran' yuvií nó luj yuvaa

ro', danj quirán' nij sí cunə nana a'mii nij so', ne nij doj quirán' nij yuvií uno nana avii tu'va nij so' adonj. Vij tu'vi' nij so' me sí cu'naj Himeneo do', sí cu'naj Fileto do' chuguanj. <sup>18</sup> Dan me se cataj roj so' se vaa aj quisíj cunuu i'na' uún nij sí cavi', ne se cunuu i'na' uún doj yuvií, taj roj so' a. Danj tu'va roj so', tzaj ne ne ne'en uxrá roj so' a doj a ma'. Tzaj ne vaa ta'aj yuvií cuchumán rá nana ca'mii roj so', ne che'é dan ca'ne' rá nij yuvií ga suun nucuaj rá man Diose, qui'yaj roj so', <sup>19</sup> tzaj ne aj cuchruj sca' Diose tucuáán noco' ní', ne aj naj se-selló so', qui'yaj so' a. Ne nihánj me nana no rihaan se-selló so' a: "Ne'en sí 'nij ra'a man ní' man nij sí noco' man so' a". Ne yo'ó nana no rihaan se-selló so' taj: "Nu' nij sí nata' se vaa sij noco' man sí 'nij ra'a man ní' me nij so' ro', no xcúún nij so' tanáj nij so' nu' chrej chi'ii á". Dan me roj nana noco' ní' adonj.

<sup>20</sup> Dan me se ve' tucuá 'o ru'vee me se mán xruj tu'vee ndo'o do', man xruj aga' oró mí do', man xruj aga' platá catzií do' a. Tananj uún, ne vaa xruj nij doj do' uún a. Vaa se rii nii man chruun do', vaa se rii nii man yo'ó niqii do' a. Dan me se vaa se sa' doj, ne vaa uún se nij doj uún a. <sup>21</sup> Dan me se sese guun yaníj so' ga nij yuvií tu'va rma'an yo', ne ase vaa xruj sa' doj ro', danj gaa ma'án so' rihaan nij so' a. Dan me se inañj suun sa' doj qui'yaj suun so' che'é Diose, ne guun nucuáá so' qui'yaj suun so' nu' suun sa' che'é Diose á.

<sup>22</sup> Tzaj ne se ca'vej rá so' qui'yáá so' ndaa vaa me rá nij sí tachruu qui'yaj nij so' mei. Maañ se guun rá so' qui'yáá so' se sa' ni'yaj Diose á. Gaa nucuaj rá so' man so' á. Gaa 'ee rá so' tuví' so' á. Díj cayáán so' ga yo'ó nij sí sa' nimán nij sí achíin ni'yaj rihaan sí 'nij ra'a man ní' á. <sup>23</sup> Se ca'vej rá so' canə tuvi' so' ga yuvií che'é nana mei. Ne acaj nij sí 'yaj danj cuentá ma'. Sij ataa nari' sa' me nij so' nanj adonj. Ne che'é se vaa 'yaj nij so', che'é dan unu' ndo'o nij so' ga tuvi' nij so' ei.

<sup>24</sup> Ne nó xcúún sí 'yaj suun che'é sí 'nij ra'a man ní' cunú' so' danj ma'. Maañ se ve'é qui'yaj so' che'é cunudanj yuvií, ne ve'é tucu'yón so', <sup>25</sup> ne tijaan so' chrej sa' man nij sí me rá cunú' ga so' uún a. 'Q se xcax so' cuentá se vaa ca'vee raquíj Diose man nij so', ne quinano rá nij so' che'é cacun' tumé nij so', ne quinari' nij so' nana ya a. <sup>26</sup> Gaa ne ca'vee xcax nij so' cuentá, gaa ne quinanií nij so' rihaan sí chree a. Ne sí chree me se so' me sí tiha' yu'unj man nij yuvií, ne quita'aa so' man nij so', ne cuano nihánj me se 'yaj so' ndaa vaa me rá ma'an so' qui'yaj so' man nij so' adonj.

### Nana nihánj taj xna'anj daj qui'yaj nij sí chi'ii asa' nichrun' ca'na' uún Jesucristó a

**3** Ne'én so' se vaa asa' nichrun' ca'na' uún Jesucristó, ne guun ndo'o sayuun a. <sup>2</sup> 'Q se gaa 'ee uxrá rá nij yuvií man ma'an yuvií, ne guun ndo'o rá nij yuvií qui'yaj canaán nij so' sa'anj, ne cataj uxrá nij so' se vaa sij sa' ndo'o me ma'an nij so', ne nij ndo'o ca'mii nij so' che'é Diose uún a. Se cuno nij so' ca'mii rej nij so' do', nii nij so' do', uún ma'. Ca'mii nij so', ne se nago' nij so' graciá che'é rasuun, ne se guun rá nij so' canoco' nij so' man Diose mei. <sup>3</sup> Se gaa 'ee rá nij so'

man tuvi' nij so', ne o ra'yunj tuvi' nij so', ne nano ndo'o nij so' cuentó ne che'é tuvi' nij so', ne se guun na'aj nij so' ni'yaj nij so' man nij so' mei. Ne se guun nucuaj nij so' ca'ne' rá nij so' ga suun chi'ii nicaj nij so' mei. Inanj quij gaa nij so' ei. Ne inanj quinachri' nij so' ni'yaj nij so' rasuun sa' ei. <sup>4</sup> Ne inanj sí tihá' yu'unj tuvi' guun uún nij so' ei. Ne inanj ca'nej nimán nij so' qui'yaj nij so' chrej chi'ii ei. Ne yo'o ndaa raan rma'an cumán se nucu' rá nimán nij so', ne inanj nano' nij so' rasuun me rá ma'an nij so' a. Se nano' nij so' a doj man Diose a ma'. <sup>5</sup> Ase vaa yuvi' noco' Diose ro', danj gaa nij so', tzaj ne daj chihaa mij se ca'vej rá nij so' naqui'yaj sa' Diose nimán nij so' ma'. Naxuun yanij so' máan so' rihaan nij sí vaa danj ei.

<sup>6</sup> Atúj nij so' rá ve' tucua chana ne nicaj cuentá, ne tihá' yu'unj nij so' man nij chana atá daj a cacun' quij avii raá ma'an no' a. <sup>7</sup> Niganj tucu'yón nij chana yo' nu' nana sa', tzaj ne daj chihaa mij ne guun nucuaj nij no' xcaj nij no' cuentá che'é nana ya yo' a mei. <sup>8</sup> Ne xa' nij sí chi'ii yo', tzaj ne nda' rá se vaa quiran' 'o sí chruun cu'naj Janes ga sí chruun cu'naj Jambres gaa quitáá ri'yunj roj so' man sí cu'naj Moisés gaa naá ro', danj quiran' guee nij sí taj ri'yunj man inanj nana sa' ei. 'O se sí man inanj nana chi'ii raá me nij so' do', sí aj tanáj xcó man Diose do', me nij so' ei. <sup>9</sup> Tzaj ne se quisij nij so' xna'anj nana chi'ii yo' ndaa gan' ndo'o qui'yaj nij so' mei. 'O se cunudanj nij yuvi' man rihaan chumij xcaj cuentá se vaa sij nij snúu rma'an me nij so', ne se cuchumán rá nij yuvi' a doj ca'mii nij so' mei. 'O se nda' rá se vaa quiran' roj sí cu'naj Janes ga sí cu'naj Jambres gaa ne cuchuman rá yuvi' ca'mii roj so' ro', danj quiran' nij sí chi'ii yo' ei.

**Nana nihánj taj xna'anj se vaa nda' se quiran' ní sayuun, tzaj ne yo'o canoco' ní se-nana Diose a**

<sup>10</sup> Ne xa' ma'an so', tzaj ne xcaj ndo'o so' cuentá che'é nana tucu'yón 'unj man yuvi' do', che'é tucuaán noco' 'unj do', che'é se vaa guun raj qui'yaj rej rihaan ní' do' a. Ne'én so' se vaa nucuaj ndo'o raj man Diose do', se vaa nanaj rá 'unj caxrii yuvaa 'unj man yuvi' do', se vaa 'ee raj man tinúj do', se vaa yo'o nucuaj rá 'unj rihaan sayuun do' ei. <sup>11</sup> Ne aj ne'én so' daj vaa sayuun qui'yaj nii manj, ne aj ne'én so' nu' se vaa quirán' 'unj chuman' Antioquía do', chuman' Iconio do', chuman' Litra do', uún chuguanj. Tzaj ne sí 'nij ra'a man ní' me sí tinanii manj rihaan nu' sayuun quirán' 'unj ei. <sup>12</sup> Dan me se cunudanj uún nij yuvi' me rá canoco' man Diose yuvi' amán rá ni'yaj man Jesucristó ro', quiran' sayuun uún che'é Jesucristó ei. <sup>13</sup> Tzaj ne xa' nij sí tihá' yu'unj, tzaj ne tananj a doj a doj a ca'anj nij so' tihá' yu'unj nij so' man nij yuvi' do', tihá' yu'unj nij yuvi' man nij ma'an nij so' do' ei.

<sup>14</sup> Ne ma'an so', tzaj ne yo'o canoco' so' nana cuchumán rá so' nana nari' so' á. 'O se aj ne'én so' me ní' me roj chana tucu'yón nana yo' máan so' ei. <sup>15</sup> Ne aj ne'én so' se vaa asij ne'ej mé so', ne quene'én so' daj taj nij yanj guee, ne yanj yo' me se qui'yaj ca'vee xcaj ní' cuentá, ne che'é dan cuchumán rá so' ni'yaj so'

man Jesucristó, ne cavii sa' so' nu' cavii nu' ca'anj yaj adonj. <sup>16</sup> 'O se ma'an Diose qui'yaj cachrón nii nu' nana man rihaan yanj yo' adonj. Ne che'é dan vaa se guun ndo'o man nana yo' rihaan ní' adonj. 'O se vaa ndo'o rasuun nari' ní' uno ní' nana man rihaan yanj yo', ne taj xna'anj yo' rihaan ní' che'é cacun' tumé ní', ne axrij yuvaa yo' man ní' che'é cacun' 'yaj ní', ne tucu'yón yo' man ní' daj qui'yaj ní' ve'é qui'yaj ní' canoco' ní' man Diose, ne taj xna'anj yo' rihaan ní' daj gaa sa' nimán ní' uún a. <sup>17</sup> 'O se ní' sij noco' man Diose me se danj gaa ya, gaa ne yo'o ca'vee cunuú nana sa' nimán ní', ne yo'o qui'yaj ní' daj a rasuun sa' ei.

**Nana nihánj taj xna'anj se vaa se ca'ne' rá ní' ga suun a'mii natáj se-nana Diose rihaan yuvi' ma'**

**4** Cuanó nihánj me se me rá 'unj cunó Diose cunó Jesucristó sí ca'na' uún guun chij rihaan chumij nihánj sí ca'ne' cacun' che'é sí vaa i'na' do', che'é sí cavi' do', se vaa ca'ne' yá 'unj suun rihaan so' <sup>2</sup> ca'anj so' nata' so' nana sa' á. Taj se 'yaj sese vaa ya'núj rihaan so' do', se ne vaa ya'núj rihaan so' do', taj se 'yaj ma'. Maan se ca'mii natáj yá so' ei. Cataj xna'anj so' rihaan yuvi' che'é cacun' tumé nij yuvi', ne cataj so' se vaa nij ndo'o 'yaj nij so', ne nago' so' chrej nucuaj man nij so' qui'yaj nij so' inanj se sa' ei. Tzaj ne se gaa ra'yanj rá so' caxrii yuvaa so' man nij yuvi' mei. Tananj yo'o gaa inaj nimán so', ne ve'é tucu'yón so' man nij so' ei. <sup>3</sup> 'O se vaa güii, ne se ca'vej rá nij yuvi' cunó nij yuvi' nana 'yaj ca'vee cunuú sa' nimán nij so' man chuguanj. Maan se guun rá nij so' cunó nij so' yo'ó nana naca, ne che'é dan nano' nij so' que'ee sí tucu'yón yo'ó nana me rá ma'an nij so' man nij so' a. <sup>4</sup> Ne ca'anj nij so' rej nuvi' nana ya cunó nij so', ne nanj cuentó ne cunó nij so' a. <sup>5</sup> Tzaj ne so' me se ca'nej sa' inanj so' tucuaán sa', ne gaa inaj nimán so' gaa rán' so' sayuun, ne yo'o nata' so' se-nana Diose rihaan nij sí ataa xcaj cuentá á. Dan me se qui'yaj suun so' nu' suun ca'ne' Diose rihaan so' á.

<sup>6</sup> Xa' 'unj, tzaj ne nichrun' cavi' 'unj che'é Diose, ne quinaj chumij nihánj nanj ei. <sup>7</sup> 'Unj me se quisij qui'yaj suun uxrá yaj suun ca'ne' Diose rihanj, ne yo'o canoco' 'unj se-tucuanj Jesucristó, <sup>8</sup> ne cuanó nihánj me se maan se na'vij uún 'unj quisij güii ca'na' uún sí 'nij ra'a man ní' rihaan chumij nihánj, ne rque so' 'o cachriin yâ cunuú raá 'unj, ne cataj so' se vaa nuvi' cacun' taj xrá a. Dan me se cuese nica nimán ya me Jesucristó, ne nuveé che'e orún' 'unj me qui'yaj so' danj ma'. Ne veé danj qui'yaj so' che'é cunudanj nij yuvi' me ndo'o rá ca'na' uún so' rihaan chumij nihánj nanj adonj.

**Nana nihánj taj xna'anj se vaa cuchí' Timoteo rihaan Pabló a**

<sup>9</sup> Ra'yanj ca'na' so' rej nuu 'unj nihánj ca'na' so' ni'yaj so' manj ei. <sup>10</sup> 'O se tanáj sí cu'naj Demas manj, che'é se caran' doj rá so' ni'yaj so' rasuun man rihaan chumij nihánj, ne ca'anj so' chuman' Tesalónica nanj ei. Sí

cu'naj Crescente ca'anj estadó Galacia, ne síí cu'naj Titó ca'anj estadó Dalmacia ei. <sup>11</sup> Daj orún' síí cu'naj Lucas nicun' ga 'unj nihánj cuano nanj ei. Nícaj so' man síí cu'naj Marcos ca'ná' so' ei. 'O se vaa ndo'o suun qui'yaj suun 'unj, ne racuíj so' manj, raj a. <sup>12</sup> Ne síí cu'naj Tíquico me se ca'néj 'unj man so' ca'anj so' chuman' Efeso ei. <sup>13</sup> Tanáj 'unj se-roto 'unj tucua síí cu'naj Carpo síí ne chuman' Troas, ne nícaj so' man yo' ca'ná' so' doj ei. Dan me se nícaj so' nij dáán 'unj do', nij yanj nuj xcuu do', ca'ná' so', che'é se ra'yanj ndo'o achiin yo' manj nihánj ei.

**Nana nihánj taj xna'anj se vaa qui'yaj ndo'o síí cu'naj Alejandro sayuun man Pabló a**

<sup>14</sup> Dan me se xa' síí cu'naj Alejandro síí 'yaj suun aga', tzaj ne qui'yaj ndo'o so' sayuun manj, ne narque síí 'nij ra'a man ní' sayuun man so' che'é sayuun qui'yaj so' manj, raj a. <sup>15</sup> 'O se tadó so' ga so' se gaa nanj qui'yaj so' sayuun man so' á. 'O se na'vej uxrá rá so' cunq yuvij se-nana ní' a ma'.

**Nana nihánj taj xna'anj se vaa racuíj Jesucristó man Pabló ga canicun' Pabló rihaan cuesé a**

<sup>16</sup> Gaa ca'anj 'unj rihaan nij síí nicaj suun qui'yaj nii, ne nuvi' a 'ó tinúú ní' racuíj manj a ma'. Maan se tanáj

cunudanj nij so' man orún' 'unj rihaan nij síí nicaj suun, tzaj ne na'vej raj caraa Diose cacun' xraá nij so' a mei. <sup>17</sup> 'O se canicun' síí 'nij ra'a man ní' ga 'unj, ne so' me síí qui'yaj guun nucuáá 'unj natá' 'unj nu' se-nana Diose cuno cunudanj nij yuvij yanij, ne tinanii so' manj rihaan sayuun nocqo, <sup>18</sup> ne so' me síí tinanii manj rihaan daj a se nij me rá nii qui'yaj nii manj, ne so' me síí qui'yaj cavij sa' 'unj cayáán 'unj ga so' asa' nanij so' rej xta' ne guun chij so' rihaan chumij nihánj a. Ve'é inanj ca'mij ní' che'é so' nu' cavij nu' ca'anj á. Ve'é danj gaa ya ei.

**Nana nihánj taj xna'anj se vaa ve'é cumān nij tuvij Timoteo, rá nij tuvij Pabló a**

<sup>19</sup> Me rá 'unj se vaa ve'é cumān chana cu'naj Prisca do', nicā no' síí cu'naj Aquila do', nij tucua síí cu'naj Onesíforo do' ei. <sup>20</sup> Quináj síí cu'naj Erasto chuman' Corinto, ne síí cu'naj Trófimo me se ran' so' a. Che'é dan tanáj 'unj man so' chuman' Mileto nanj ei. <sup>21</sup> Ra'yanj ca'ná' so' nihánj yaj gaa ataa ca'ná' yavii acoj ndo'o a. Ve'é cayáán so', rá síí cu'naj Eubulo do', síí cu'naj Pudente do', síí cu'naj Lino do', chana cu'naj Claudia do', taran' nij tinúú ní' do' ei. <sup>22</sup> Me rá 'unj cayáán síí 'nij ra'a man ní' ga nimán so', ne qui'yaj ndo'o Diose se luj che'é nij soj a.

# Tito

**1** 'Unj ro', me síí cu'naj Pabló, síí 'yaj suun che'é Diose, ne cune' Jesucristó mán 'unj guún 'unj apóstol ca'anj rihaan nij yuvii narii Diose man che'é rej narí' nij so' se-tucuaj Jesucristó, ne narí' nij so' se-nānā Diose nana ya, ne ve'é uxrá canoco' nij so' man Diose, qui'yaj nana ya yo' a. <sup>2</sup> Gaa ne guun ya rá nij yuvii se vaa cayáán nij yuvii ga Diose nu' cavii nu' ca'anj, ndaa vaa cata' tu'va Diose asij naá ndo'o, ne xa' Diose, tzaj ne ne a'mii ne Diose ma'. <sup>3</sup> Gaa ne gaa quisij güii cachrón Diose, ne tihaan Diose rihaan ní' se vaa ca'vee cayáán ní' ga Diose nu' cavii nu' ca'anj a. Danj qui'yaj so' gaa ca'ne' so' suun rihanj se vaa ca'mii natáj 'unj se-nānā so', ne xa' so', tzaj ne so' me síí tinanii man ní' rihaan sayuun adonj.

<sup>4</sup> Dan me se qui'yáá 'unj yanj nihánj ca'nej 'unj rihaan so' sij cu'naj Titó a. Amán rá so' se-nānā Jesucristó nana cataj xna'anj 'unj rihaan so', ne cuyaan vaa nana amán rá ní', ne che'é dan ase vaa 'o ta'nij ro', danj vaa so' rihanj, tinuj. Me rá 'unj qui'yaj Rej ní' Diose do', qui'yaj Jesucristó síí tinanii man ní' rihaan sayuun do', se luj che'é so', ne gaa xej nimán so', qui'yaj roj so' a.

**Nana nihánj taj xna'anj se vaa cune' síí cu'naj Titó doj síí guun chij nicaj yu'unj man nij síí amán rá ni'yaj man Jesucristó yanj estadó cu'naj Creta a**

<sup>5</sup> Tanáj 'unj mán so' estadó Creta, che'é se vaa doj suun ataa tinavíí 'unj rej yo', ne me rá 'unj tinavíí so' suun yo' a. Dan me se me rá 'unj cune' so' doj síí guun chij nicaj yu'unj man nij síí amán rá ni'yaj man Jesucristó yanj 'o 'o chuman' yo' a. <sup>6</sup> Dan me se aj cataj xna'anj 'unj rihaan so' daj gaa nij síí uun chij cune' so' á. Inanj síí nuvi' cacun' tumé do', síí nicaj raan nica do', síí amán rá ta'níí ni'yaj man Jesucristó do', cune' so' á. Tzaj ne sese sij 'yaj cacun' ga chana do', sij tucuáá rihaan rej do', me ta'níí yo'o so', ne se cuné' so' man so' ma'. <sup>7</sup> Dan me se inanj síí nuvi' cacun' tumé guun síí uun chij, che'é se sij nicaj yu'unj man nij yuvii nocó' man Diose me síí uun chij yo' adonj. 'O se se ca'mii xtá' nij síí uun chij ma'. Se gaa ya'aan rá nij so' ma'. Se guun xnó nij so' ma'. Se go' nij so' tuvi' nij so' ma'. Se tiha' yu'unj nij so' tuvi' nij so' che'é yan ca'ne' nij so' sa'anj man tuvi' nij so' ma'. <sup>8</sup> Maan se ve'é qui'yaj nij so' ca'vej nij so' cotoj yuvii 'na' yo'ó chuman' tucua' nij so', ne rque nij so' chraa cha' nij yuvii á. Gaa niha' rá nij so' ni'yaj nij so' man yuvii 'yaj se sa', ne xcaj nij so' cuentá daj 'yaj ma'an nij so' uún á. Inanj ve'é qui'yaj nij so' rihaan tuvi' nij so' do', rihaan Diose do' a. Se gu-

un nij so' síí 'yaj canaán se chi'ii rihaan ma'. <sup>9</sup> Raan canoco' nij so' se-nānā Diose nana tucu'yón nuj rihaan nij síí nocó' man Diose a. Danj qui'yaj nij so', gaa ne guun nucuaj nij so' nago' nij so' se-tucuaj Diose tucuáán sa' man yo'ó nij yuvii, ne guun nucuaj nij so' tihaan nij so' rihaan nij síí tucu'yón yo'ó tucuáán ei.

**Nana nihánj taj xna'anj se vaa caráán síí cu'naj Titó chrej rihaan nij síí cuchumán rá ni'yaj man Jesucristó se vaa se canoco' nij so' yo'ó tucuáán a**

<sup>10</sup> Dan me se man ndo'o síí tucuáá do', síí tu'va rma'an do', síí tiha' yu'unj do', estadó Creta, ne síí chi'ii doj rihaan yo'ó nij so' me nij síí taj se vaa no xcúún nij snó'o nocó' man Jesucristó cata' ta'nga' man nij so', taj nij síí chi'ii yo' a. <sup>11</sup> Vaa che'é ndo'o ca'ne' rá nij so' ga nana vaa danj qui'yáá so' ei. 'O se ri' ndo'o rá que'ee nij tucua' yuvii, 'yaj nij so' gaa tucu'yón nij so' nana vaa danj nana ne nó xcúún nij so' tucu'yón nij so' nanj adonj. Ne inanj sa'anj quirí' uun nij so', rá nij so', don 'yaj chi'ii nij so' adonj.

<sup>12</sup> Dan me se yo'o tuvi' ma'an nij so' síí nata' se-nānā ya'anj nocó' nij so' ro', cataj so' se vaa xa' nij síí man Creta, tzaj ne síí ne me nij so', ne xcuu chi'ii me nij so', ne inanj síí rmii me rá caraa rque uún me nij so', taj ma'an tuvi' nij so' ni'yaj so' man nij so' a. <sup>13</sup> Ne dan me se ya uxrá cataj so' che'é nij tuvi' so' ei. Che'é dan sca' inanj cataj xna'anj so' che'é se-cacun' nij so' rihaan nij so', gaa ne ca'vee canicaj nij so' canoco' nij so' se-tucuaj ní' sij amán rá ni'yaj man Jesucristó, ne gaa sa' nij so' ei. <sup>14</sup> Dan me se danj qui'yáá so', gaa ne se gaa nanj xcaj nij so' cuentá che'é nij cuentó uun nanó nij yuvii israelitá ei. Ne se cuno nij so' se vaa taj nij yuvii na'vej rá canoco' man Diose man rihaan chumii nihánj rihaan nij so' ma'. Sese xcaj nij so' cuentá a'mii yuvii uún, ne tanáj nij so' tucuáán ya nanj adonj.

<sup>15</sup> Dan me se yuvii vaa sa' nimán, tzaj ne sa' vaa cunudanj rasuun rihaan nij so', ne xa' yuvii vaa chi'ii nimán, tzaj ne daj a rasuun ruvi' ni'yaj nij síí chi'ii síí na'vej rá cuchuman rá ni'yaj man Jesucristó ro', chi'ii vaa taran' rasuun rihaan nij so' nanj adonj. <sup>16</sup> Ne ne'en nij so' man Diose, taj ma'an nij so', tzaj ne ni'yaj ní' se vaa 'yaj nij so', ne xcaj ní' cuentá se vaa ne ne'en uxrá nij so' man Diose a ma'. Tananj síí chi'ii me nij so', ne síí ne uno me nij so', ne taj vaj a doj suun sa' ne ne'en nij so' qui'yaj suun nij so' man adonj.

Nana nihánj taj xna'anj che'é tucuáán cuchruj síf cu'naj Titó che'é nij síf cuchumán rá ni'yaj man Jesucristó  
a

2 Ne ma'án so' me se tucu'yón so' nu' nana sca' achiin man nij so' á. <sup>2</sup> Cataj xna'anj so' rihaan nij chii nga se vaa se guun xno' nij so' ma'. Gaa ni'yanj nij so' á. Xcaj nij so' cuentá daj qui'yaj nij so' á. Yo'o' cuchuman rá nij so' ni'yaj nij so' man Diose, ne gaa 'ee rá nij so' tuvi' nij so', ne daj chihaa mij se ca'ne' rá nij so' ga se-tucuanj Jesucristó che'é sayuun ma'. <sup>3</sup> Dan me se ve'e daj ve'e ndo'o qui'yaj nij chana' chij uún, gaa ne ca'vee xcaj yuvij cuentá se vaa chana' sa' noco' uxrá man Diose me nij no', guun rá nij yuvij a. Se quinano' nij chana' chij cuentó ne che'é tuvi' nij no' ma'. Se gaa niha' rá nij no' co'o' ndo'o nij no' na vinó ma'. Tananj guun nij no' chana' ve'e tucu'yón man tuvi', <sup>4</sup> gaa ne ca'vee nago' no' chrej sa' man nij chana' ta'aj se vaa gaa 'ee rá nij chana' ta'aj nica' no' do', ta'níí no' do' a. <sup>5</sup> Ne ve'e cutumé nij chana' ta'aj daj qui'yaj ma'an nij no' do', inanj nica' no' cotoj ga no' do', ve'e cutumé nij no' ve' tucua' nij no' do' á. Ne chana' sa' guun nij no', ne ve'e cunó nij no' rihaan nica' nij no' á. Daj qui'yaj nij no', cataj chana' chij rihaan nij no', gaa ne se gaa nanj ca'mii yuvij ne amán rá ni'yaj man Jesucristó nana' nij che'é se-nana' Diose a.

<sup>6</sup> Ne nago' so' chrej nucuaj man nij síf tachruu uún se vaa xcaj nij so' cuentá daj gaa qui'yaj nij so' á. <sup>7</sup> Ne ma'án so' ro', ve'e qui'yaj suun so' nu' suun sa', ne quene'en nij tinúú ní' daj 'yáá so', gaa ne cuyaan qui'yaj nij so' ga so' á. Inanj tucuáán sca' tucu'yón so' á. Ne guun so' 'o' síf ni'yanj a'mii a. <sup>8</sup> Inanj nana' sa' ca'mii so' á. Gaa ne guun na'aj nij síf taj ri'yunj man ní' che'é se se ca'vee ca'mii nij so' nana' nij che'é ní' a.

<sup>9</sup> Ne cataj xna'anj so' rihaan nij mozó se vaa ve'e cunó nij mozó rihaan se-ru'vee mozó, ne qui'yaj suun nij mozó nu' suun ca'ne' nij ru'vee rihaan nij so' á. Ne qui'yaj mozó guun niha' rá se-ru'vee mozó ni'yaj so' man mozó yo' á. Se ca'mii cunú' mozó ga se-ru'vee mozó ma'. <sup>10</sup> Se qui'yaj ituu mozó si'yaj se-ru'vee mozó ma'. Tananj ve'e qui'yaj mozó, ne xcaj se-ru'vee mozó cuentá se vaa ca'vee gaa nucuaj rá ru'vee man mozó se vaa me ma'an rasuun qui'yaj mozó, gaa ne ve'e inanj ca'mii yuvij che'é tucuáán tucu'yón ní' tucuáán che'é Diose síf tinanii man ní' rihaan sayuun adonj.

<sup>11</sup> Dan me se aj xcaj ní' cuentá se vaa qui'yaj ndo'o Diose se luj che'é cunudanj yuvij, se vaa ca'vee quinanii cunudanj nij yuvij rihaan chrej chi'ii uun chij nimán nij yuvij, <sup>12</sup> ne che'é dan xcaj ní' cuentá se vaa no' xcúún ní' ca'ne' rá ní' ga rasuun na'vej rá Diose qui'yaj ní' a. Ne se qui'yaj ní' inanj se vaa me rá nee man ní' qui'yaj yo' ma'. 'O se xcaj ní' cuentá daj qui'yaj ní', ne tucuáán nica' qui'yaj ní', ne qui'yaj ní' inanj se vaa me rá Diose qui'yaj ní' gaa yaj ne ní' rihaan chumii nihánj cuano' á. <sup>13</sup> Ne na'vij ndo'o ní' ca'na' uún Jesucristó síf tinanii man ní' rihaan sayuun, ne dan me se guun niha' uxrá rá ní' che'é se guun ya' rá ní' se vaa ca'na' uún so' a. Ne xa' so', tzaj ne quene'en ní' se vaa

ve'e uxrá vaa so', ne Diose uun chij ndo'o me ya' so' adonj. <sup>14</sup> Ne so' me síf ca'ne'e nimán cavii' che'é ní', che'é rej ca'vee ca'ne' rá ní' ga me ma'an tucuáán chi'ii canoco' ní' gaa rque, ne ca'vee cunuu sa' ní', ne guun ní' yuvij noco' man orún' so', ne guun niha' ndo'o rá ní' qui'yaj suun ní' suun sa' adonj. <sup>15</sup> Nana' nihánj me chrej sa' ya' nago' so' rihaan nij tinúú ní', ne sca' ndo'o ca'mii so', ca'ne' so' suun rihaan nij so', gaa ne ca'ne' rá nij so' ga se chi'ii á. Ne daj qui'yáá so' do', daj ca'mii so' do', gaa ne daj chihaa mij se guun cataj yuvij se vaa taj yu'vee nó so' do', nana' a'mii so' do' a.

**Nana' nihánj taj xna'anj se vaa ve'e qui'yaj ní' rihaan yuvij che'é se tinanii Diose man ní' rihaan sayuun a**

3 Cataj uún so' rihaan nij yuvij se vaa cara' cochroj nij yuvij rihaan nij síf nica' suun, ne cunó nij yuvij rihaan nij so' á. Ca'vej nij yuvij qui'yaj suun nij yuvij suun a'ne' nij síf nica' suun rihaan nij so', ne me ma'an suun sa' qui'yaj suun nij so' á. <sup>2</sup> Se ca'mii chi'ii nij so' ni'yaj nij so' tuvi' nij so' ma'. Se cunú' nij so' ga tuvi' nij so' ma'. Maan se ve'e inanj qui'yaj nij so', ne nica' ndo'o ca'mii nij so' rihaan cunudanj yuvij a.

<sup>3</sup> Dan me se asij rque, ne síf ni'yon rma'an me ma'an ní', ne ne cunó ní' rihaan tuvi' ní', ne canoco' ní' tucuáán tiha' yu'unj, ne qui'yaj ní' náá guun se vaa guun rá ní' qui'yaj ní' a. Dan me se quij me rá ní' ni'yaj ní' tuvi' ní', ne guun xcoj ruva' rá ní' ni'yaj ní' tuvi' ní', ne quitáá ri'yunj tuvi' ní' ni'yaj nij so' man ní', ne nachri' ní' man tuvi' ní' a.

<sup>4</sup> Tzaj ne gaa xcaj ní' cuentá che'é Diose síf tinanii man ní' rihaan sayuun, se vaa so' me síf me rá racu'ij man ní', gaa ne dan me se quene'en ní' se vaa cunuu 'ee rá so' man ní' a. <sup>5</sup> Dan me se tinanii Diose man ní' rihaan chrej chi'ii uun chij nimán ní' ei. Nuve'e che'e se sa' qui'yaj ma'an ní' me tinanii Diose man ní' rihaan sayuun ma'. Maan se cunuu 'ee rá ma'an Diose quene'en so' man ní', ne rque Diose Nimán Diose rihaan ní', don cunuu naca' nimán ní' ne cunuu sa' nimán ní' adonj. <sup>6</sup> Dan me se maan che'é Jesucristó síf tinanii man ní' rihaan sayuun me qui'yaj ndo'o Diose se luj rihaan ní', ne ndaa ayuu rma'an se luj, qui'yaj so' ei. <sup>7</sup> Se luj qui'yaj so' me se tinavij so' cacun' xráá ní', ne cunuu sa' ní', qui'yaj so', ne maan che'é dan ca'anj ní' cayáán ní' ga so' nu' cavii nu' ca'anj ndaa vaa me rá ya' ní' ei. <sup>8</sup> Ya' uxrá vaa nu' nana' nihánj adonj.

**Nana' nihánj taj xna'anj che'é nij yuvij 'yaj unu' nij síf cuchumán rá ni'yaj man Diose a**

Ne me rá 'unj sca' ca'mii so' nu' nana' nihánj rihaan nij yuvij amán rá ni'yaj man Diose, che'é rej xcaj nij so' cuentá se vaa no' xcúún nij so' qui'yaj suun nij so' suun sa' inanj á. Sese daj qui'yaj nij so', ne sij vaa sa' me nij so', ne cavii sa' doj yuvij, qui'yaj nij so' adonj. <sup>9</sup> Tzaj ne se canó tuvi' so' ga yuvij mei. Síf ni'yon me síf 'yaj daj chuguanj. Se nanó rá so' che'é xi' so' gaa naá daj sij me nij so' ma'. Se canó tuvi' so' che'é se-tucuanj



Moisés mei. 'O se qui'yaj rma'an dānj nānj ei. Taj cuentá ní 'yá' dānj ma'. <sup>10</sup> Sese vaa 'o síi 'yaj unu' ndo'o yuvij, ne cataj xna'anj so' rihaan so' se vaa ca'ne' rá so' ga suun 'yaj unu' yuvij a. Ndaa vij ca'mij so' rihaan so', ne sese se ca'vej rá so' cunō so', ne ca'anj yanij so' rihaan so' ei. <sup>11</sup> 'O se xa' síi 'yaj unu' yuvij, tzaj ne aj tanáj so' tucuáan ya, ne tumé so' cacun' ei. Ne maan che'é cacun' atā so' 'yaj tananj yuun che'e ri' so' nānj ei.

**Nana nihánj taj xna'anj che'é suun a'ne' síi cu'naj Pabló rihaan síi cu'naj Titó a**

<sup>12</sup> Ca'nej 'unj man síi cu'naj Artemas cuchí' so' rihaan so', ne sese se ca'vee cuchí' so', ne ca'nej 'unj man síi cu'naj Tíquico a. Asa' cuchí' so' rihaan so', ne ra'yanj cuchí' so' chuman' Nicópolis, ga ne nari' tuvi' ní' ei. 'O se guun rá 'unj cayáan 'unj chuman' yo' yavii acoj ndo'o adonj. <sup>13</sup> Raquí so' man síi cu'naj Zenas licencia-

do síi a'mii che'é yuvij rihaan cuese dō', man síi cu'naj Apolos dō', qui'yaj chuvij roj so' ca'anj roj so' ei. Taj se cachijin man roj so', qui'yáa so' ma'. 'O se me ma'an rasuun achiin man roj so', ne gō' so' ei.

<sup>14</sup> Ne me rá 'unj nari' yo'ó nij tinúú ní' qui'yaj suun ndo'o nij so' suun sa' che'é tuvi' nij so' síi achiin ya rasuun man uún chuguanj. Se taj, ne taj se gún' man nij so' ma'.

**Nana nihánj taj xna'anj se vaa ve'é cumān nij tuvi' Titó, rá nij tuvi' síi cu'naj Pabló a**

<sup>15</sup> Me rá cunudanj nij yuvij yanj ga 'unj cuano se vaa ve'é cayáan so' ei. Ne cataj so' rihaan nij síi 'ee rá man ní' nij síi nocō' man Diose se vaa ve'é cumān cunudanj nij so' ei. Me rá 'unj qui'yaj ndo'o Diose se luj che'é cunudanj nij soj ndaa cayuu rma'an se luj qui'yaj Diose ei.

# Filemón

**1** 'Unj ro', me síí cu'naj Pabló síí 'nij taga' cuano che'é se nocó' 'unj man Jesucristó, ne nicun' tinúú ní' Timoteo ga 'unj cuano, ne dan me se 'yáá 'unj yanj nihánj ca'nej 'unj rihaan so' sij cu'naj Filemoó a. 'Ee rá 'unj mán so', ne tuvi' ní' síí 'yaj suun ga 'unj mé so',<sup>2</sup> ne veé dānj vaa uún nu' nij síí nocó' man Diose nuu chre' tucua so' do', ra'vij ní' chana cu'naj Apia do', síí cu'naj Arquipo síí yo'q rquee che'é suun 'yaj suun ní' do', nu' rihaan nij so' 'yáá 'unj yanj nihánj ca'nej 'unj rihaan nij soj ei.

<sup>3</sup> Me rá 'unj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é nij soj, ne gaā xej nimán nij soj, qui'yaj roj so', raj ei.

**Nana nihánj taj xna'anj se vaa nago' Pabló graciá rihaan Diose che'é síí cu'naj Filemoó che'é se canoco' sa' síí cu'naj Filemoó man Diose a**

<sup>4</sup> Daj a güii ga tananj nanj achíín ni'yáá 'unj rihaan Diose, achíín ni'yáá 'unj che'é so', ne nagó' 'unj graciá rihaan Diose che'é so' ei. <sup>5</sup> Dānj 'yáá 'unj, che'é se ca'na' nana rihanj se vaa amán ndo'o rá so' ni'yaj so' man Jesucristó sij 'nij ra'a man ní', ne 'ee ndo'o rá so' man cunudanj nij síí sa' nocó' man so' vaa cunó 'unj ei. <sup>6</sup> Dan me se che'é se aj canocó' so' se-tucuanj Jesucristó ga yo'ó nij tinúú ní', ne che'é dan achíín ni'yáá 'unj se vaa ca'vee xcāj yo'ó nij so' cuentá che'é nu' se sa' nicaj nij tinuj nij soj qui'yáá so', gaā ne ca'vee cavii sa' doj Jesucristó qui'yaj taran' nij soj a. <sup>7</sup> 'Q se guun niha' uxrá rá 'unj, ne nari' nucuaj nimán 'unj, che'é se 'ee rá so' man tinúú so' ne nuu cuij rá nij síí sa' nocó' man Diose 'yáá so', tinuj.

**Nana nihánj taj xna'anj se vaa me rá Pabló ve'é nacaj uún síí cu'naj Filemoó man síí cu'naj Onésimo a**

<sup>8</sup> Ndā' se uun chij ndo'o 'unj ne ca'vee ca'ne' 'unj suun rihaan so' qui'yáá so' ndāa vaa suun qui'yáá so', tzaj ne taj ma'. <sup>9</sup> Maān se ve'é rquee 'unj mán so' qui'yáá so' ndāa vaa no xcuún so' qui'yáá so' ei. 'Unj sij cu'naj Pabló nihánj me se aj chii ngā mej ne 'nij 'unj taga' cuano che'é se nocó' 'unj man Jesucristó ei. 'Q se ne'én 'unj se vaa 'o 'ee rá so' tinúú so', ne che'é dan cachinj ni'yáá 'unj doj rihaan so' <sup>10</sup> che'é síí cu'naj Onésimo a. Dan me se ase vaa 'o ta'nij ro', dānj vaa so' rihanj cuano, che'é se gaā 'nij 'unj taga', ne cataj xna'anj 'unj rihaan so' che'é Jesucristó, ne guun che'e so' canoco' so' man Jesucristó nanj adonj. <sup>11</sup> Dan me se asij rque doj me se taj se gún' a doj man so' rihaan so'

ma'. Tzaj ne cuano nihánj me se cunuu sa' so', ne vaa se guun so' rihaan ní' cuano ei.

<sup>12</sup> Dan me se aj ca'neé 'unj man so' cuchij' uún so' rihaan so', ne ne'én so' se vaa 'ee uxrá raj man so' adonj. <sup>13</sup> Ne guun rá 'unj nayon so' rihaan so' quinaj so' nihánj rej 'nij 'unj taga' nihánj che'é se-nānā Jesucristó nana sa', ne qui'yaj suun so' rihaan 'unj nihánj che'é so', raj ei. <sup>14</sup> Tzaj ne ne ca'vej rá 'unj quinaj so' rej nihánj, che'é se ndāa tu'va ma'an yá so' cavii, gaā ne quinaj so', raj ei. 'Q se ne guun raj qui'yáá fuerzá mán so' qui'yáá so' se ndo'o che'ej ma'. Maān se inanj se rii nimán mā'án so' qui'yáá so' se ndo'o yo' che'ej, raj ei. <sup>15</sup> Dan me se maān che'é rej ca'vee cayáán so' ga so' nu' cavii nu' ca'anj ro', che'é dan ca'anj yanij so' doj rihaan so' doj güii ei. <sup>16</sup> Tzaj ne yaj me se se guun so' mozó uun rihaan so' nu' cavii nu' ca'anj yaj a ma'. Tananj a sa' doj gaā so' rihaan yo'q nij mozó rihaan so', ne 'o tinúú ní' síí 'ee rá ní' man guun so' ei. 'Q se 'ee uxrá raj man so', ne táá a so', ne doj a gaā 'ee rá mā'án so' man so' a ei. 'Q se sij 'yaj suun rihaan so' me so' rihaan chumii nihánj, ne sij nocó' man síí 'nij ra'a man ní' me uún so', ne doj a gaā ya rá so' man so' ei.

<sup>17</sup> Dan me se sese tinuj ya ní', ne ve'é na'mij sa' so' ga so', ne dāj se uun rá so' ne'én so' manj ro', dānj guun rá so' quene'én so' man so' ei. <sup>18</sup> Ne sese qui'yaj chí'ii so' mán so' do', sese vaa xcuún qui'yaj so' rihaan so' do', ne mā'án 'unj naruvee rihaan so' se vaa qui'yaj xcuún so' ei. <sup>19</sup> Mā'anj ra'aj sij cu'naj Pabló cachronj nana nihánj se vaa naruvee 'unj cunudanj se vaa qui'yaj xcuún so' rihaan so' ei. Veé dānj vaa xcuún rihaan so' do', tzaj ne taj che'é cataj xna'anj 'unj rihaan so' se vaa vaa xcuún rihaan mā'án so' se vaa quinanii so' rihaan sayuun nu' cavii nu' ca'anj, qui'yaj mā'anj gaā natá' 'unj se-nānā Jesucristó rihaan so' ma'. <sup>20</sup> Dan me se me inanj rá 'unj qui'yáá so' se ndo'o che'ej, che'é se sij nocó' man síí 'nij ra'a man ní' me ní', tinuj. 'Q se ndāa cunuu cuij rá 'unj, qui'yáá so' che'é Jesucristó ei.

<sup>21</sup> Dan me se gaā cachronj 'unj nana nihánj, ne nucuaj rá 'unj mán so' se vaa qui'yáá so' nu' nihánj, ne ndāa doj a qui'yáá so' rihaan se vaa cataj xna'anj 'unj rihaan so' chuguanj. <sup>22</sup> Ne me rá 'unj naquiyaj chuyii so' ve' cané 'unj doj ga so' á. 'Q se guun ya raj se vaa che'é se cachíín ni'yaj soj rihaan Diose che'ej ro', che'é dan racuíj Diose manj cuchij rihaan soj, raj adonj.

Nana nihánj taj xna'anj se vaa me rá nij tuvi' Pabló se vaa ve'é çayáán síi cu'naj Filemoó a

<sup>23</sup> Me rá síi cu'naj Epafra se vaa ve'é çayáán so' á. 'Nij so' taga' ga 'uj, che'é se sij nocõ' man Jesucristó me so' a. <sup>24</sup> Ne síi cu'naj Marcos do', síi cu'naj Aristarco

do', síi cu'naj Demas do', síi cu'naj Lucas do', me rá uún se vaa ve'é çayáán so' a. Taran' nij so' me síi 'yaj suun ga 'uj adõnj.

<sup>25</sup> Me rá 'uj qui'yaj ndo'o Jesucristó sij 'nij ra'a man ní' se luj che'é nimán nij soj adõnj.

# Hebreos

## Nana nihánj taj xna'anj se vaa sa' uxrá vaa ta'níí Diose síí cu'naj Jesucristó a

**1** Nata' uxrá Diose se-nana Diose rihaan nij síí nata' se-nana Diose gaa naá, ne nata' nij so' nana yo' rihaan xii ní' nij síí cumán gaa naá a. Dan me se do' do' cataj xna'anj Diose se-nana so' rihaan nij síí nata' yo', ne ino vaa qui'yaj Diose ga 'o 'o nij so', gaa cataj xna'anj Diose se-nana Diose rihaan 'o 'o nij so' a. <sup>2</sup> Tzaj ne yaj gaa nichrun' ca'anj ni'ya chumii nihánj me se cataj xna'anj ma'an ya ta'níí Diose se-nana Diose rihaan ní', qui'yaj Diose, ne ta'níí Diose me se so' me síí cune' Diose man se vaa guun chij so' rihaan cunudanj rasuun vaa güii, ne so' me síí qui'yaj cunudanj chumii, qui'yaj Diose ei. <sup>3</sup> Ne ase vaa ma'an Diose ro', danj vaa so' chuguanj. Dan me se ni'yaj ní' man so', ne xcaj ní' cuentá se vaa ve'é ndo'o vaa Diose, ne xcaj ya ní' cuentá daj vaa ma'an Diose ei. Ne che'é se sij nucuaj ndo'o me so' ro', che'é dan maan nana avii uun tu'va so', ne 'o mán chre' nu' rasuun, ne se quirí' a 'ó rasuun qui'yaj so' ma'. Che'é dan tinavij so' cacun' tumé ní', gaa ne ca'anj cayáán so' rej xta' ndo'o rej x'nuj Diose, ne rej nuva' Diose yáán so' cuano ei. <sup>4</sup> Dan me se guun so' síí sa' doj rihaan nij se-mozó Diose, ne nocoo uxrá doj vaa suun atá so' rihaan suun atá taran' nij se-mozó Diose nanj chuguanj. <sup>5</sup> 'O se aj ne'en soj nana nihánj nana ca'mii Diose che'é ta'níí so' a:

—Ta'níj mé so' á. Cuanó nihánj me se quene'en yuvii se vaa ta'níj mé so', qui'yaj a. —Danj ca'mii Diose che'é ta'níí Diose, tzaj ne nuveé rihaan se-mozó Diose ca'mii Diose nana vaa danj ma'.

Ne nihánj me nana ca'mii Diose che'é ta'níí Diose, cataj Diose:

—Guún 'unj rej so', ne guun so' ta'níj a —cataj uún Diose che'é ta'níí Diose a. Tzaj ne ne ca'mii so' nana vaa danj che'é se-mozó so' ma'. Maan che'é ta'níí so' ca'mii so' nana yo' adonj.

<sup>6</sup> Dan me se so' me síí guun síí chava' rihaan taran' ní' sij nocoo' man Diose a. Ne danj Diose taj se vaa asa' ca'na' uún so' rej cumán taran' nij yuvii gaa i'na' rihaan chumii nihánj qui'yaj Diose, ne quina'vij taran' nij se-mozó Diose rihaan so', taj danj Diose a.

<sup>7</sup> Ne a'mii uún danj Diose che'é nij se-mozó Diose, taj yo' se vaa nana uun do', nda' rá se vaa daa ya'an do', vaa se-mozó Diose, qui'yaj Diose a.

<sup>8</sup> Tzaj ne vaa doj nana nó rihaan danj Diose nana a'mii rihaan ma'an ta'níí Diose, ne nana yo' taj: "Diose mé so', ne quirí' ta'ngá' so' nu' cavii nu' ca'anj, ne nica

gaa rá so' nica' yu'unj so' man yuvii nu' cavii nu' ca'anj a. <sup>9</sup> Niha' inanj rá so' canoco' so' chrej sa', tzaj ne nachri' uxrá so' chrej chi'ii ei. Che'é dan Diose síí uun chij rihaan so' ro', cune' so' mán so', se vaa cavii sa' so' doj rihaan nij tuví' so' a", taj danj Diose a.

<sup>10</sup> Ne taj uún danj Diose: "Asij guun che'e chumii nihánj, ne so' me síí cune' man chumii nihánj, Señor. Ne ma'an so' ra'a ya so' qui'yáá so' nu' se man rej xta' adonj. <sup>11</sup> Ne vaa güii, ne quinavij nu' nihánj, tzaj ne daj chihaa mij se quinaví' so' ma'. Dan me se ase vaa yatzíj nga ro', danj gaa nu' chumii nihánj do', nu' rej xta' do' ei. <sup>12</sup> Ne ase vaa yatzíj ro', danj gaa narumii so' man roj yo', ne guun ino roj yo', qui'yáá so' ei. Tzaj ne se cunuu ino ma'an so' ma'. 'O veé danj gaa so', ne daj chihaa mij se caví' so' man chuguanj", taj uún danj Diose che'é ma'an ta'níí Diose a.

<sup>13</sup> Ne ca'mii uún Diose rihaan ta'níí Diose, cataj so':

—Cayáán so' rej x'núú 'unj rej nuva' 'unj, ne qui'yaj canaán 'unj rihaan nij síí taj ri'yunj mán so', ne quirí' ta'ngá' so' rihaan nij so' a —cataj Diose rihaan ta'níí Diose a. Tzaj ne a 'ó rihaan se-mozó so' ne ca'mii so' danj ma'.

<sup>14</sup> Dan me se xa' nij se-mozó Diose, tzaj ne nana uun me nij so' a. 'Yaj suun nij so' rihaan Diose, ne ca'née Diose man nij so' qui'yaj suun nij so' rihaan ní' sij cavii sa' ga Diose nu' cavii nu' ca'anj ei. Ne sa' doj vaa ta'níí Diose rihaan nij se-mozó Diose nanj chuguanj.

## Nana nihánj taj xna'anj se vaa no xcuún uxrá ní' cunó ní' se-nana Jesucristó a

**2** Che'é dan doj a nó xcuún ní' cunó sa' ní' nana aj nari' ní' ei. Sese se qui'yaj ní' danj, ne do' do' tanáj ní' chrej sa' yo', ne quinij ní' xrej Diose, ne ca'anj ni'ya ní' gaa nanj chuguanj. <sup>2</sup> 'O se ya uxrá vaa se-nana Diose nana cataj xna'anj nij se-mozó Diose rihaan síí cu'naj Moisés gaa naá ei. Tzaj ne nij yuvii me se ne cunó nij so' nana yo' ma'. Tzaj ne nica ya qui'yaj Diose sayuun man 'o 'o nij yuvii ne cunó nana yo' chuguanj. <sup>3</sup> Che'é dan, asa' ca'vee quinavii ma'an ní' rihaan sayuun, sese se xcaj sa' ní' cuentá che'é chrej sa' chrej qui'yaj naca Diose quinavii ní' rihaan sayuun, rá soj ga. Dan me se asino ma'an síí 'nij ra'a man ní' me síí cuchruj chrej sa' yo', gaa ne nij síí cunó nana ca'mii so' ro', cataj xna'anj nij so' se-nana so' nana sa' yo' rihaan ní', ne nari' sa' ní' nana yo', qui'yaj nij so' ei. <sup>4</sup> Ne qui'yaj ndo'o ma'an Diose suun sa' nocoo ni'yaj yuvii, ne rqué ndo'o so' Nimán so' cunuú nimán yuvii adonj.

Danj inanj guun rá Diosē qui'yaj Diosē, che'é se guun rá so' cunō ní' se-nānā sí' 'nij ra'a man ní' yo' ei.

**Nanā nihánj taj xna'anj che'é nū' se vaa quiran' Jesucristó che'é ní' a**

<sup>5</sup> Dan me se cataj xna'anj 'unj rihaan soj che'é güii guun chij Diosē rihaan chumii nihánj a. Ne ne cune' Diosē man nij se-mozó Diosē se vaa quirii ta'nga' nij so' rihaan chumii nihánj ma'. <sup>6</sup> Maan se vaa nanā nō rihaan danj Diosē nanā ca'mii yo'ō so' rihaan Diosē, ne cataj so' se vaa: "Taj yu'vee nó a doj yuvii ma'. Me che'é nuú uxrá rá so' man yuvii gā. Taj yu'vee nó a 'ó ta'níi yuvii ma'. Me che'é nuu 'eē rá so' man nij so' gā. <sup>7</sup> Tzaj ne sij nocō' doj tzin' me nij yuvii rihaan nij se-mozó so', qui'yáá so' chuguānj. Gāa ne ve'é uxrá cavii sá' nij yuvii, ne ve'é uxrá ca'mii nii che'é nij yuvii, qui'yáá so' asanj. <sup>8</sup> Ne quirii ta'nga' nij yuvii rihaan cunudanj rasuun, qui'yáá so' uún asanj", taj nanā nō rihaan danj Diosē yo' a. Ne dan me se yā quirii ta'nga' nij yuvii rihaan cunudanj rasuun adonj. Tzaj ne ne'en ní' se vaa yaj me se ataa quirii ta'nga' nij yuvii rihaan cunudanj rasuun a. <sup>9</sup> Tzaj ne ni'yaj ní' man Jesucristó, ne ndā' se yā sij nocō' doj guun so' rihaan nij se-mozó Diosē rque doj yo', tzaj ne yaj me se aj guun chij ndo'o so', ne ve'é ndo'o a'mii nii che'é so', qui'yaj Diosē a. Ne danj cavii sá' so', che'é se cavi' so' a. 'Q se sese ne cavi' so', ne ne ca'vee nayon so' rihaan cunudanj ní' a ma'. Tzaj ne yaj me se qui'yaj ndo'o Diosē se luj che'é ní' se vaa nayón Jesucristó rihaan ní' nanj adonj.

<sup>10</sup> Dan me se Diosē me síi qui'yaj nū' rasuun che'é ma'an inanj so' chuguānj. Dan me se vaa güii, ne nucu' ndo'o nij ta'níi Diosē rihaan Diosē rej xtā', qui'yaj Diosē, ne Jesucristó me síi narqué chrej sá' canocō' nij ta'níi Diosē, ne quinanii nij so' rihaan sayuun, ne cavii sá' nij so' chuguānj. Che'é dan vaa che'é quiran' Jesucristó sayuun rihaan yo'óo nihánj qui'yaj Diosē, ne maan che'é se quiran' Jesucristó sayuun ro', ne che'é dan me guun chij ndo'o so' ne ne achiin cavii sá' nū' so', qui'yaj Diosē nanj ei. <sup>11</sup> Dan me se ta'nij Diosē me Jesucristó, ne ta'nij Diosē me ní' yuvii cunuu sá' rihaan Diosē che'é Jesucristó, ne che'é dan ne guun na'aj Jesucristó cataj so' se vaa tinúú so' dō', ra'vij so' dō', me ní' ma'. <sup>12</sup> Dan me se cataj so': "Nata' 'unj rihaan nij tinúj che'é sō', ne ve'é cachraj chra' che'é sō' asá' cunuu chre' núj rihaan sō' a", cataj so', ca'mii so' nanā nō rihaan danj Diosē a. <sup>13</sup> Ne ca'mii uún so', cataj so': "Gāa nucuaj raj ni'yaj 'unj man Diosē adonj", taj so' a. Ne guun che'e uún so', cataj so': "Ni'yaj soj manj gā nij ta'níi Diosē síi rqué Diosē manj vij", taj uún Jesucristó a. Dan me se nū' nanā nihánj me nanā ca'mii Jesucristó che'é ní' sij tinúú Jesucristó dō', ra'vij Jesucristó dō', nanā nō rihaan danj Diosē adonj.

<sup>14</sup> Dan me se che'é se vaa nee vaa cúu vaa ton vaa man ní' sij ta'níi Diosē ro', che'é dan ase vaa ma'an ní' ro', danj gaa guee Jesucristó, ne ca'na' so', ne cavi' so' a. Ne gāa cavi' so' me se qui'yaj canaán so' rihaan síi 'yaj avi' ní' a. Dan me se síi chree me síi 'yaj avi' ní', ne

Jesucristó me síi ca'vee qui'yaj canaán che'é yan cavi' so' ei. <sup>15</sup> Ne guun nucuaj so' nacaj so' man ní' sij chée rihaan cacun', ne gāa rque me se ndāa chée chu'vi' cavi' rma'an ní' che'é se inanj cacun' qui'yaj ní' chuguānj. Tzaj ne che'é se vaa cavi' Jesucristó che'é ní', che'é dan güej sayuun yo' xráá ní' ne síi chée ma'an me ní' ei. <sup>16</sup> 'Q se ne ca'nā' Jesucristó tinanii so' man nij se-mozó Diosē rihaan sayuun ma'. Maan se ca'na' so' tinanii so' man ní' ta'nij ta'nij si'no síi cu'naj Abraham síi cane gāa naá rihaan sayuun adonj. <sup>17</sup> Che'é dan me naquiyaj so' man so', ne ndā' rá se vaa guee nij tinúú yā so' ro', vaa so' adonj. Danj qui'yaj so' che'é rej ca'vee cunuu 'eē rá so' man ní', ne guun so' xrej atā suun nocōo doj rihaan Diosē che'é ní', ne guun nucuaj rá ní' ni'yaj ní' man so', ne tinavij so' cacun' tumé ní' sij nocō' man Diosē adonj. <sup>18</sup> 'Q se che'é se quiran' ma'an yā so' sayuun se vaa guun rá síi chree caxrii síi chree chrej chi'ii rque so' ro', che'é dan guun nucuaj so' racu'ij so' man ní' asá' guun rá síi chree caxrii síi chree chrej chi'ii rque ma'an ní' adonj.

**Nanā nihánj taj xna'anj se vaa sá' doj vaa Jesucristó rihaan síi cu'naj Moisés síi cane gāa naá a**

**3** Dan me se sij sá' me soj rihaan Diosē, tinuj, nocōj. Ne nacúun Diosē síi nicun' xtā' man soj se vaa cavii sá' soj gā so' adonj. Che'é dan xcaj soj cuentá che'é Jesucristó, ne sij ca'née Diosē rihaan ní' me so', ne cataj xna'anj so' rihaan ní' nanā yā che'é Diosē, ne ase vaa xrej atā suun nocōo doj vaa uún so', tinavij yā so' cacun' tumé ní' rihaan Diosē ei. Inanj danj vaa nanā nocō' ní' nanj ei. <sup>2</sup> Ne ve'é 'yaj suun Jesucristó nū' suun ca'ne' Diosē rihaan so', ndā' rá se vaa ve'é qui'yaj suun síi cu'naj Moisés nū' suun ca'ne' Diosē rihaan so' qui'yaj suun so' che'é nij yuvii nocō' man Diosē adonj. <sup>3</sup> Dan me se xcaj sá' ní' cuentá che'é Jesucristó ei. 'Q se sá' uxrá doj vaa so' rihaan síi cu'naj Moisés yo' nanj chuguānj. Dan me se ne'en soj se vaa doj yu'vee nó síi cune' ve' rihaan ma'an ve' yo' ei. Ne ase vaa síi cune' ve' vaa Jesucristó, ne cavii sá' taran' ní' gā Diosē, qui'yaj so', ne ase vaa ve' yo' vaa ní' dō', vaa síi cu'naj Moisés dō', nanj ei. <sup>4</sup> Dan me se vaa 'o yā míj síi 'yaj daj a nij ve' ei. Tzaj ne orún' Diosē me síi qui'yaj daj a rasuun nanj ei. <sup>5</sup> Ne síi cu'naj Moisés me se ve'é yā qui'yaj suun so' nū' suun ca'ne' Diosē rihaan so' adonj. Tzaj ne nanj mozó me so' rihaan nij yuvii narii Diosē, ne cataj xna'anj so' rihaan nij yuvii che'é nij nanā nata' Diosē rihaan nij yuvii rej rihaan nij yuvii adonj. <sup>6</sup> Tzaj ne Jesucristó me se nuveé mozó me so' ma'. Tananj ta'níi síi tucua yā ve' me so' ei. Ne veé danj 'yaj suun so' nū' suun vaa rihaan so' rá ve', ne dan me se ma'an yā ní' me ve' yo', sese yo'ō guun yā rá ní' se vaa cavii sá' ní', qui'yaj Diosē, ne sese guun nihā' rá ní' cataj xna'anj ní' rihaan tuvi' ní', ne sese se cuchu'vi' ní' canocō' ní' man Diosē ei.

**Nana nihánj taj xna'anj se vaa se gaa nichraj nimán ní' nì'yaj ní' Diose a**

<sup>7</sup> Che'é dan cunò ní' nana nihánj nana ca'mii Nimán Diose á: "Cuan' ro', sese ya cuno soj nana ca'mii Diose, <sup>8</sup> ne se naqui'yaj nichraj soj nimán soj ndaa rá se vaa qui'yaj nij sí cumán gaa naá gaa cachée nij so' rej tacaan a. Dan me se cunu' nij so' ga Diose, ne guun rá nij so' xcaj nij so' cuentá sese ya qui'yaj Diose sayuun man nij so' a. <sup>9</sup> Veé danj qui'yaj xii soj nij sí cumán gaa naá rihaan Diose, ne quene'en nij so' nu' nij suun sa' nocoo qui'yaj suun 'unj che'é nij so' <sup>10</sup> vij chihaa ya yo' a. Che'é dan ca'maan raj ni'yaj 'unj man nij so', ne cataj 'unj se vaa ne ne'en uxrá nij so' a ma'. 'Q se ne quene'en uxrá nij so' daj qui'yaj nij so' canoco' nij so' manj a ma'. <sup>11</sup> Dan me se ca'maan raj, ne guun ya raj daj quirán' nij so', ne yo'ò cataj 'unj se vaa daj chihaa mij se quinaránj ya rá nij so' ga 'unj a man chuguanj", taj nana ca'mii Nimán Diose a.

<sup>12</sup> Dan me se cutumé uxrá soj man soj se gaa nanj gaa quij nimán yo'ò tuvi' soj cataj so' se vaa taj vaj Diose, man tinuj, man nocej. Dan me se se gaa nanj tanáj xco yo'ò tuvi' soj man Diose sí vaa i'na' ya ma'. <sup>13</sup> Cuanò nihánj me se nago' soj chrej nucuaj man tinúú soj daj a güii gaa vaa ya'núj rihaan soj ei. Danj qui'yaj soj, se gaa nanj guun nichraj rá tinúú soj qui'yaj nana ne chí'ii a. <sup>14</sup> 'Q se yaj me se guun ní' sí cavii sa' ga Jesucristó, ne cavii sa' ya ní' ga so' sese yo'ò cuchuman rá ní' cunò ní' nana ya, ndaa vaa qui'yaj ní' gaa guun che'e ní' canoco' ní' man Jesucristó chuguanj.

<sup>15</sup> Dan me se danj Diose taj: "Cuan' ro', sese ya cuno soj nana ca'mii Diose, ne se naqui'yaj nichraj soj nimán soj nda' rá se vaa qui'yaj nij sí cumán gaa naá a. Dan me se cunu' nij so' ga Diose a", taj danj Diose a. <sup>16</sup> Ne me sí ne ca'vej rá cunò se-nana Diose, ne cunu' nij so' ga Diose, rá soj ga. Ne taran' nij sí cavii Egiptó ga sí cu'naj Moisés me nij so' chuguanj. Veé ya nij so' ei. <sup>17</sup> Ne me sí me ca'maan rá Diose ni'yaj Diose rque vij chihaa ya yo', rá soj ga. Ne sij ca'maan rá Diose ni'yaj Diose me nij sí qui'yaj cacun', ne cavi' nij so' rihaan yo'óo tacaaan a. <sup>18</sup> Ne me rihaan nij sí cataj Diose se vaa daj chihaa mij se cachén nij so' naraan rá nij so' ga Diose, rá soj ga. Rihaan nij sí ne ca'vej rá cunò rihaan so' me yo' na'. Veé ya nij so' ei. <sup>19</sup> Ne ne'en ní' se vaa che'é se ne cuchuman rá nij so' ni'yaj nij so' man Diose ro', che'é dan ne guun nucuaj nij so' quinaráan rá nij so' ga Diose chuguanj.

**4** Che'é dan cutumé uxrá ní' man ní' ei. Tadó ní' se gaa nanj caráan ní' xréé ní' rihaan nana cataj xna'anj Diose rihaan ní' se vaa catuu ní' chrej ca'anj ní' naraan rá ní' ga Diose á. 'Q se adi' se vaa sí ne ruvi' rihaan ro', gaa ní', sese se cutumé ní' man ní' adonj. <sup>2</sup> Ne ase vaa catúj se-nana Diose xréé nij sí cumán gaa naá ro', danj vaa guée catúj se-nana Diose xréé ma'an ní' cuano ei. Gaa cuno nij so' se-nana Diose me se cuno uun nij so' nana yo', ne taj se gún' nana yo' rihaan nij so' a ma'. Dan me se nata' nii nana yo' rihaan nij so', tzaj ne ne cuchuman rá nij so' daj chihaa mij

nana yo' a man chuguanj. <sup>3</sup> 'Q se orún' ní' sij amán rá ni'yaj man Diose me nij sí ca'anj quinaráan rá ga Diose nanj ei. Inanj danj ca'mii Diose, cataj Diose: "Dan me se ca'maan raj, ne guun ya raj daj quirán' nij so', ne yo'ò cataj 'unj se vaa daj chihaa mij se quinaránj rá nij so' ga 'unj a mei", taj Diose a. Ne dan me se gaa naá gaa quisij qui'yaj Diose chumii nihánj, ne navij suun rihaan Diose, ne ca'ne' rá Diose a. <sup>4</sup> Ne vaa nana no rihaan danj Diose nana taj xna'anj che'é güii hij, ne taj nana yo': "Ne güii hij quinaránj rá Diose che'é yan quisij qui'yaj suun Diose nu' suun qui'yaj suun so' a", taj nana yo' a. <sup>5</sup> Ne vaa nana taj uún, ne: "Daj chihaa mij se quinaránj ya rá nij so' ga 'unj a man chuguanj", taj uún Diose a.

<sup>6</sup> Dan me se ataa ta'aj nij yuvii catuu quinaráan rá ga Diose adonj. Tzaj ne xa' nij sí aj cuno se-nana Diose gaa naá ne ne ca'vej rá nij so' cunò nij so' me se daj chihaa mij se quinaránj rá nij so' ga Diose ma'. Dan me se yo' me quirán' nij so' che'é se ne ca'vej rá nij so' cunò nij so' nana sa' adonj. <sup>7</sup> Che'é dan cachrón uún Diose yo'ó güii canoco' yuvii man so', ne cuano nihánj me güii cachrón Diose canoco' yuvii man so' ei. Ne ma'an sí cu'naj David ca'mii se-nana Diose nana yo' nana aj cachrón 'unj rihaan yanj nihánj, cataj so': "Yaj ro', sese ya catúj se-nana Diose xréé soj, ne se naqui'yaj nichraj soj nimán soj ma'", taj sí cu'naj David yo' a.

<sup>8</sup> Ne che'é se ne quinaráan rá nij sí cumán gaa naá, qui'yaj sí cu'naj Josué ro', che'é dan me cachén ndo'ó güii, gaa ne ca'mii sí cu'naj David che'é yo'ó güii canoco' yuvii man Diose, ne quinaráan rá nij yuvii ga Diose adonj. <sup>9</sup> Dan me se ne'en ní' se vaa ya uxrá vaa güii quinaráan rá ní' sij nocoo' man Diose adonj. <sup>10</sup> 'Q se nij sí naránj rá ga Diose me se aj quisij qui'yaj suun nij so', ne navij suun rihaan nij so' ei. Ase vaa qui'yaj Diose gaa navij se-suun Diose rihaan Diose ro', danj 'yaj nij so' chuguanj. <sup>11</sup> Che'é se nana' ní' daj qui'yaj ní' quinaráan rá ní' ga Diose, gaa ne se guun tumé a 'ó tuvi' ní' cacun' tumé nij sí cumán gaa naá ma'. Dan me se ve'é cunò taran' ní' rihaan Diose adonj.

<sup>12</sup> 'Q se vaa i'na' ya se-nana Diose adonj. Ne nucuaj uxrá yo', ne ase vaa yo'ò neê espadá sihaa nu' niha rihaan ro', vaa yo', tzaj ne nuveé inanj cúu do', nee do', me se a'ne' yo' ma'. 'Q se a'ne' yo' ndaa nimán ya ní', ne che'é se-nana Diose yo' ro', uun nucuaj Diose xcaj Diose cuentá daj vaa nimán ya ní' chuguanj. <sup>13</sup> Ne nu' nij rasuun vaa yuve ro', ruvi' nu' nij yo' rihaan Diose chuguanj. 'Q se ranga' uxrá rihaan Diose ei. Ne ruvi' nu' rasuun ni'yaj so', ne ya ruvi' sa' nu' rasuun ni'yaj Diose ei. Ne veé rihaan ma'an ya Diose ro', me ca'anj ní' nago' ní' cuentá adonj.

**Nana nihánj taj xna'anj se vaa ase vaa xrej ata suun nocoo doj ro', danj vaa Jesucristó rihaan ní' a**

<sup>14</sup> Tzaj ne vaa 'o xrej sa' xrej ata suun nocoo doj nicaj yu'unj man ní' adonj. Ne sij cavii xta' doj rihaan rej xta' me so', ne Jesucristó ta'ní Diose ya me uún so' nanj chuguanj. Che'é dan nıcaj raan ní' tucuáan nocoo' ní' ei.

<sup>15</sup> 'Q se nuveé xrej ne ne'en daj vaa sayuun ran' ní' me so' ma'. 'Q se aj ne'en so' daj vaa chrej chi'ij 'na' rihaan ní' adonj. Che'é dan cunuu 'eé rá so' man ní' gaa ninaj ní' rihaan sayuun adonj. Dan me se ase vaa ma'an ní' ro', vaa so', ne ase vaa sayuun 'na' rihaan ní' ro', danj vaa sayuun ca'na' rihaan so', tzaj ne ne qui'yaj so' a 'ó xco' cacun' ma'. <sup>16</sup> Che'é se xrej me so' che'é ní' ro', che'é dan se cuchu'vi' ní' a doj mei. Tananj quinichrun' ní' rihaan chrej sa', gaa ne ca'vee cunuu 'eé rá Diose man ní', ne asa' 'na' sayuun rihaan ní', ne ca'vee cata' tu'va ní' man so', ne nacaj so' man ní' rihaan sayuun chuguanj. Dan me se ya cunuu 'eé rá Diose man ní', ne sese vaa güii quiran' ní' sayuun, ne qui'yaj so' se luj che'é ní' adonj.

**5** 'Q se xa' nij xrej atá suun nocoo doj xrej une' yuvii, tzaj ne atá nij so' suun se vaa racuíj nij so' man yuvii me rá cunuu sa' rihaan Diose ei. Dan me se racuíj nij so' man nij yuvii rque yuvii xcuu cacaa rihaan Diose che'é cacun' tumé nij yuvii a. <sup>2</sup> Danj 'yaj nij so', che'é se nanj yuvii me nij so', ne che'é dan ne uun nucuaj nij so' qui'yaj nij so' inanj se sa' a man adonj. Che'é dan ca'vee guun 'eé rá nij so' ni'yaj nij so' man nij sí' ne ne'en do', man nij sí' vaj chrej chi'ij do' a. Ne che'é cacun' tumé ma'an nij so' ro', <sup>3</sup> che'é dan ase vaa uta' nij so' xcuu cacaa rihaan Diose che'é cacun' tumé yuvii ro', inanj danj no' xcúún nij so' cuta' nij so' xcuu cacaa rihaan Diose che'é cacun' tumé ma'an nij so' uún adonj.

<sup>4</sup> Ne taj sí' une' man ma'an cata suun nocoo yo' ma'. 'Q se inanj sí' nacúún Diose me sí' cata suun nocoo adonj. Danj quiran' sí' cu'naj Aarón sí' cane gaa naá, ne nacúún Diose man so' cata so' suun nocoo yo' gaa naá ei. <sup>5</sup> Ne ase vaa quiran' sí' cu'naj Aarón ro', danj quiran' Jesucristó chuguanj. Ne cune' so' man ma'an so' se vaa cavii sa' so' guun so' xrej atá suun nocoo doj ma'. 'Q se Diose cune' man so', cataj Diose: "Ta'nij mé so' á. Cuanq nihánj me se quene'en yuvii se vaa ta'nij mé so', qui'yaj nanj á", taj nana no' rihaan danj Diose nana ca'mii Diose rihaan Jesucristó a. <sup>6</sup> Ne vaa yo'ó nana uún nana ca'mii Diose rihaan Jesucristó, ne nana yo' taj se vaa: "Xrej mé so' nu' cavii nu' ca'anj a. Dan me se ase vaa xrej cu'naj Melquisedec xrej cane gaa naá ro', danj vaa ma'an so' nanj á", taj doj nana no' rihaan danj Diose nana ca'mii Diose rihaan Jesucristó a. <sup>7</sup> Dan me se gaa chéé Jesucristó rihaan chumii nihánj, ne cachíin ni'yaj uxrá so' rihaan Diose se vaa tinanii Diose man so' se cavi' so', ne che'é dan ndaa ta'vee ma'an so', ne che'é se sij aráj cochroj ya rihaan Diose me so', che'é dan cuno ya Diose ca'mii so', <sup>8</sup> ne ta'nij ya Diose me so', tzaj ne taj se qui'yá' quinanii so' rihaan sayuun a ma'. Che'é sayuun quiran' so' ro', che'é dan tananj a nari' sa' so' cunoo so' adonj. <sup>9</sup> Dan me se guun so' sí' uno nu' se-nana rej, ne che'é dan guun so' sí' tinanii man taran' ní' sij uno rihaan so' rihaan sayuun, ne dan me se cavii sa' ní' nu' cavii nu' ca'anj, qui'yaj so' ei. <sup>10</sup> Ne guun uún so' xrej atá suun nocoo doj, qui'yaj Diose, ne ase vaa xrej cu'naj Melquisedec vaa uún so' nanj adonj.

**Nana nihánj taj xna'anj se vaa no' xcúún ní' xcaj ní' cuentá sa' doj che'é se-nana Jesucristó a**

<sup>11</sup> Vaa uxrá yo'ó nana me rá 'unj cataj xna'anj 'unj rihaan soj che'é sí' cu'naj Melquisedec yo', ne sayuun uxrá vaa cataj xna'anj 'unj nana yo' rihaan soj, che'é se nuveé sij nihá' rá cunoo ra'yanj me soj mei. <sup>12</sup> Dan me se guun que'eé yo' noco' soj man Jesucristó, ne no' xcúún soj tucu'yón soj se-nana Jesucristó rihaan tuvi' soj, tzaj ne ne guun nucuaj soj qui'yaj soj danj man asan. 'Q se achiin 'o' sí' tucu'yón asij tacóo se-nana Diose man soj, rá soj, ne che'é dan ase vaa ne'ej vaa soj, ne ne'ej me se ne ne'en ne'ej cha ne'ej se chá ma'. Tihaj utzii ne'ej nanj adonj. Ne ta'nga' danj vaa soj, ne tihaj ndaa tacóo se-nana Diose guun nucuaj soj cunoo soj, rá soj nanj adonj. <sup>13</sup> Dan me se sí' utzii too ro', ase vaa ne'ej uun vaa so', ne ataa nari' so' daj qui'yaj so' ne cunuu sa' so' rihaan Diose ei. <sup>14</sup> Ne ase vaa sí' nocoo sí' chá nu' rasuun sca' ro', danj vaa sí' acaj ndo' o' cuentá, ne tucu'yón niganj so' nuchruj raa so' che'é rasuun, ne che'é dan ne'en so' nuchruj raa so' me se me se sa' do', me se me se nij do', ne xcaj so' cuentá che'é nu' rasuun yo' chuguanj.

**6** Che'é dan se guun rá ní' tucu'yón uún ní' nana aj nari' ní' gaa guun che'e ní' canoco' ní' man Jesucristó mei. Tzaj ne yo' o' tananj guun rá ní' nari' ní' nana chij doj nana cachíin rihaan ní' canoco' sa' ní' man Jesucristó ei. Dan me se aj nari' ní' nana se vaa canicaj nimán ní' tanáj ní' tucuaán chi'ij canoco' ní' asij rque á. Ne aj nari' ní' nana se vaa cuchuman rá ní' ni'yaj ní' man Diose ei. <sup>2</sup> Ne aj nari' ní' nana se vaa cata' ne ní' á. Ne aj nari' ní' nana se vaa cuta' ní' ra'a ní' raa tinúú ní' gaa nago' ní' suun man tinúú ní' á. Ne aj nari' ní' nana se vaa cunuu i'na' uún nij sí' cavi' á. Ne aj nari' ní' nana se vaa ca'ne' Diose cacun' che'é yuvii daj quiran' yuvii nu' cavii nu' ca'anj á. <sup>3</sup> Dan me se quisij tucu'yón ní' nana nihánj, ne cachén ní' tucu'yón ní' nana nocoo doj, sese ca'vej rá Diose qui'yaj ní' danj á.

<sup>4</sup> 'Q se sese aj xcaj ní' cuentá che'é se-nana Diose do', sese aj nicaj ní' nu' nij se sa' rque Diose rihaan ní' do', sese aj cayáán Nimán Diose ga' ní' do', <sup>5</sup> sese aj nari' ní' se vaa taj se-nana Diose che'é ní' do', sese aj ne'en ní' suun sa' qui'yaj suun Diose naquiyaj sa' Diose chumii nihánj do', <sup>6</sup> gaa ne sese cunuu ino' nimán ní' ne tanáj rma'an ní' se-tucuanj Jesucristó, gaa ne daj chihaa mij se guun nucuaj ní' canicaj uún nimán ní' canoco' uún ní' chrej sa' a man chuguanj. Maan se sí' 'yaj danj ro', me rá so' cavi' uún ta'nii Diose rihaan rcutze che'é so', ne me rá so' ca'nga' nacoo yuvii ni'yaj yuvii man Jesucristó che'é so', rá so' adonj. Dan me se nu' yo' me rá ní' quiran' uún Jesucristó, sese guun rá ní' canicaj uún nimán ní' canoco' uún ní' man so' adonj.

<sup>7</sup> 'Q se ase vaa yo'óo vaa ní' rihaan Diose, ne sese aman' uxrá maan rihaan yo'óo, ne sese sa' uxrá avii naa do', cuêj do', rihaan yo'óo yo' cha' nij sí' qui'yaj suun yo'óo yo', ne cavii sa' uxrá yo'óo yo', qui'yaj Diose ei. <sup>8</sup> Tzaj ne sese quixra' uxrá coj tanj uun do', tanj

ya'aa uun do', rihaan yo'óo yo', ne quiran' uxrá yo'óo yo' sayuun, qui'yaj Diose, ne cacaa nu' yo'óo yo', qui'yaj Diose nanj ei.

<sup>9</sup>Ee rá 'unj man soj, tinuj, nocoj. Ne nda' se nana nu-cuaj ca'mii 'unj rihaan soj nihánj, tzaj ne guun ya rá 'unj se vaa sa' uxrá qui'yaj soj, ne ya cavii sa' soj, qui'yaj Diose ei. <sup>10</sup>'Q se nuveé sij chi'ii me Diose ma'. Sij vaa nicá rá me Diose, ne yo'o cunuú rá Diose taran' nij suun sa' qui'yaj suun soj gaa canoco' soj man so' ei. Ne yo'o cunuú rá Diose se vaa aran' uxrá rá soj cunq soj nana a'mii Diose nanj chuguanj. Dan me se qui'yaj suun uxrá soj racuij soj man nij síi sa' noco' man Diose gaa rque, ne 'o danj qui'yaj ya soj ei. <sup>11</sup>Tzaj ne me uxrá rá 'unj se vaa 'o yaan guun ya rá taran' nij tinuj soj se vaa cavii sa' ya uxrá soj qui'yaj Jesucristó, ne guun ni-ha' rá soj canoco' raan soj man so' ndaa se quisij güii ca'na' uún so' ei. <sup>12</sup>Ne se gaa rmii soj ma'. Maan se ve'é xcáj soj cuentá daj 'yaj nij síi chumán sa' rá ni'yaj man Diose, ne ase vaa 'yaj nij so' ro', danj qui'yaj uún soj, gaa ne ca'vee chuguanj. Dan me se nij síi chumán sa' rá me se ne a'ne' rá nij so' ma'. 'Q se yo'o noco' nij so' man Jesucristó, gaa ne vaa güii nacaj nij so' nu' se sa' cataj xna'anj Diose se vaa rque Diose man ní' sij noco' man Diose adonj.

**Nana nihánj taj xna'anj daj qui'yaj Diose gaa cataj xna'anj Diose rihaan síi cu'naj Abraham daj qui'yaj Diose che'é so' a**

<sup>13</sup>Dan me se quisij cataj xna'anj Diose rihaan síi cu'naj Abraham daj qui'yaj Diose che'é so', gaa ne guun rá Diose cuta' Diose raq yo'o síi sa' ndo'o, ne cuchuman' rá síi cu'naj Abraham se vaa ya vaa nana cataj xna'anj Diose rihaan so' a. Tzaj ne ne nano' Diose yo'ó so' ma'. Maan se ma'an Diose cataj se vaa ya danj qui'yaj Diose adonj. <sup>14</sup>Dan me se cataj Diose rihaan síi cu'naj Abraham a:

—Ya uxrá cavii sa' so', qui'yaj, ne ya uxrá xna'anj ndo'o nij ta'nii ta'nij si'no so', qui'yaj nanj á —taj Diose rihaan síi cu'naj Abraham a.

<sup>15</sup>Ne ya danj quiran' síi cu'naj Abraham, gaa inaj nimán so', yo'o noco' so' man Diose, ne cavii sa' uxrá ya so', ndaa vaa cataj xna'anj Diose rihaan so' nanj ei. <sup>16</sup>Dan me se tananj nij yuvii, ne sese guun rá yo'o so' cano' tuvi' so' che'é 'o nana, ne cuta' so' raq 'o rasuun ca'mii so', gaa ne cuchuman' rá tuvi' so', qui'yaj so' chuguanj. Tzaj ne inanj raq yo'o rasuun sa' doj rihaan ma'an yuvii uta' yuvii adonj. <sup>17</sup>Ne gaa ca'mii Diose ga nij síi nacaj nu' se sa' rque so', ne guun rá so' cuchuman' sa' doj rá nij so' che'é nana ca'mii so', ne che'é dan cuta' ma'an ya Diose raq yo'o rasuun, ca'mii Diose a. <sup>18</sup>Dan me se asino ca'mii ya Diose, gaa ne cuta' Diose raq ma'an so' a. Dan me se quisij vij nana ca'mii so', ne daj chihaa mij se natuná Diose se-nana so' ma'. 'Q se ne uun nucaj Diose a'mii Diose nana ne ma'. Che'é dan me ndo'o rá ní' racuij Diose man ní', ne che'é dan vaa che'é ndo'o cuchuman' rá ní', ne guun ya rá ní' se vaa ya cavii sa' ní', ndaa vaa cataj xna'anj Diose rihaan ní' nanj adonj. <sup>19</sup>Ne sese yo'o guun ya rá

ní', ne gaa sca' nimán ní', ne se cuchu'vi' nimán ní' ma'. 'Q se ya uxrá vaa nana amán rá ní', ne che'é nana yo' ca'vee quinán' ní' rihaan ma'an Diose adonj. <sup>20</sup>Dan me se aj taj yaan Jesucristó rihaan ní' quinán' so' rihaan Diose qui'yaj suun so' che'é ní', ne so' me síi guun xrej atá suun noco' doj, ne ase vaa síi cu'naj Melquisedec gaa naá ro', danj gaa guee so' nu' cavii nu' ca'anj adonj.

**Nana nihánj taj xna'anj se vaa ase vaa xrej cu'naj Melquisedec vaa Jesucristó, ne xrej sa' uxrá me Jesucristó che'é ní' a**

**7** Dan me se xa' xrej cu'naj Melquisedec, tzaj ne síi nicaj suun rey guun chij rihaan chuman' cu'naj Salem me so', ne xrej me uún so' rihaan Diose síi nicun' xtá' adonj. Gaa nanicaj síi cu'naj Abraham 'na' nique so' gaa quisij qui'yaj canaán so' man yo'óo nij síi nicaj suun rey síi cunu' ga so', ne dan me se ca'anj caran' síi cu'naj Melquisedec man so' chrej 'na' nique so', ne ve'é cataj síi cu'naj Melquisedec se vaa me rá so' qui'yaj Diose se luj che'é síi cu'naj Abraham yo' a. <sup>2</sup>Gaa ne xa' nij rasuun qui'yaj canaán Abraham ro', rque so' 'o rasuun rihaan daj a chi' rasuun rihaan Melquisedec, ne diezmo cu'naj yo' a. Ne se-chuvii síi cu'naj Melquisedec taj se vaa síi nicaj suun rey síi 'yaj inanj se sa' me ma'an so' a. Ne síi nicaj suun rey ne chuman' Salem me uún so', ne nana Salem taj se vaa síi nicaj suun rey qui'yaj cuman dínj yuvii me so', taj nana yo' a. <sup>3</sup>Ne xa' so', tzaj ne taj rej so' taj nii so' taj tuvi' so' taj ma'. Ne taj güii ca'ngaa so', ne taj güii cavii so' do' a ma'. Dan me se ase vaa ma'an ta'nii Diose vaa so', gaa guun so', ne xrej guun so' nu' cavii nu' ca'anj nanj adonj.

<sup>4</sup>Dan me se xa' síi cu'naj Abraham, tzaj ne xii taran' ní' sij israelitá me so', ne rque so' diezmo rihaan síi cu'naj Melquisedec che'é nij rasuun qui'yaj canaán ma'an so' adonj. Che'é dan me xcáj soj cuentá daj sij me síi cu'naj Melquisedec yo', se vaa sij sa' uxrá me so' nanj ei. <sup>5</sup>Dan me se xa' nij ta'nii ta'nij si'no síi cu'naj Leví, tzaj ne cune' Diose man nij so' guun nij so' xrej che'é nij yuvii israelitá ei. Ne a'néj nij so' diezmo man nij síi israelitá, ndaa vaa taj se-tucuanj Moisés yo' adonj. Ne ase vaa tinúú nij yuvii israelitá vaa nij so', che'é se ta'nii ta'nij si'no síi cu'naj Abraham me nij so' ga yo'óo nij yuvii israelitá adonj.

<sup>6</sup>Tzaj ne nuveé tuvi' nij so' me síi cu'naj Melquisedec ma'. Tzaj ne so' me síi ca'néj diezmo man síi cu'naj Abraham chuguanj. Ne nda' se sij cavii sa' qui'yaj ma'an Diose me síi cu'naj Abraham, tzaj ne cuno so' se-nana síi cu'naj Melquisedec se vaa qui'yaj Diose se luj che'é so' adonj. <sup>7</sup>Dan me se ne'en taran' ní' se vaa síi a'mii nana sa' se vaa qui'yaj Diose se luj che'é tuvi' ro', so' me síi atá suun noco' doj rihaan tuvi' so' síi uno nana sa' yo' adonj. Che'é dan me sij atá suun noco' doj me síi cu'naj Melquisedec rihaan síi cu'naj Abraham adonj. <sup>8</sup>Ne xa' nij ta'nii ta'nij si'no síi cu'naj Leví, tzaj ne a'néj nij so' diezmo man yuvii, tzaj ne nanj yuvii me nij so', ne vaa güii cavii' nij so' ei. Ne xa' síi cu'



naj Melquisedec, tzaj ne danj Dioso taj se vaa yo' o vaa i'na' so' nanj adonj. <sup>9</sup> Ne nda' se a'ne'j nij ta'ni' ta'nij si'no Levi diezmo man yuvij, tzaj ne vaa che'e cataj ni' se vaa gaa rque Abraham diezmo rihaan si' cu'naj Melquisedec, gaa ne rque ma'an nij so' diezmo uun rihaan si' cu'naj Melquisedec adonj. <sup>10</sup> 'O se nicaj Abraham semilla guun nij ta'ni' ta'nij si'no Levi gaa nari' tuvi' so' ga si' cu'naj Melquisedec adonj.

<sup>11</sup> Dan me se nij ta'ni' ta'nij si'no si' cu'naj Levi ro', ta'ni' ta'nij si'no si' cu'naj Aaron me nij so', ne tucu'yon nij so' se-tucuanj Moises rihaan nij yuvij israelita, tzaj ne ne quisij guun sa' inanj nij yuvij israelita, qui'yaj nij so' ma'. 'O se danj Dioso taj se vaa ase vaa si' cu'naj Melquisedec ro', danj gaa yo' o xrej cune' Dioso, tzaj ne nuvee tuvi' si' cu'naj Aaron me xrej naca yo' a. <sup>12</sup> Ne che'e se nuu ino doj xrej, che'e dan nuu ino tucuaan tucu'yon xrej yo' rihaan nij yuvij, ne canoco' nij yuvij yo' yo' o tucuaan yo' adonj. <sup>13</sup> Ne danj Dioso taj se vaa xrej naca yo' ro', me tuvi' yo' o x'ne' nij yuvij israelita, ne taj tuvi' nij so' guun xrej rihaan Dioso gaa rque ma'.

<sup>14</sup> 'O se si' 'nij ra'a man ni' ro', so' me yo' o ta'ni' ta'nij si'no si' cu'naj Judá, ne ne cataj Moises se vaa guun ta'ni' ta'nij si'no si' cu'naj Judá yo' 'o xrej canicun' rihaan Dioso gaa rque ma'. <sup>15</sup> Dan me se ase vaa si' cu'naj Melquisedec vaa yo' o xrej naca yo' adonj. Ne che'e dan ya uxrá ino doj vaa tucuaan noco' ni', qui'yaj so' adonj. <sup>16</sup> Ne yo' o xrej naca yo', tzaj ne nuvee che'e se-tucuanj yuvij uun me guun so' xrej ma'. 'O se ase vaa ma'an yuvij vaa tucuaan noco' ma'an yuvij, ne che'e dan vaa guii quinavij tucuaan noco' nij yuvij nanj chuguanj. Tzaj ne xa' xrej naca yo', tzaj ne guun nucuaj so' gaa i'na' so' nu' cavii nu' ca'anj, ne daj chihaa mij se navij xrej yo' man adonj. <sup>17</sup> 'O se danj Dioso taj: "Xrej me so' nu' cavii nu' ca'anj a. Dan me se ase vaa xrej cu'naj Melquisedec xrej cane gaa naa ro', danj vaa ma'an so' á", taj danj Dioso a.

<sup>18</sup> Dan me se taj se uun tucuaan nga yo' a ma'. Ne ne guun nucuaj yo' racuj yo' man yuvij a man chuguanj. Che'e dan quinavij tucuaan nga yo', qui'yaj Dioso nanj adonj. <sup>19</sup> 'O se taj vaj a doj rasuun cunuu sa' qui'yaj se-tucuanj Moises ma'. Dan me se navij tucuaan nga, ne yo' o tucuaan sa' naca noco' ni' cuano, ne guun ya ra ni' se vaa cavii sa' ni', qui'yaj tucuaan naca yo' adonj. 'O se che'e tucuaan naca yo' qui'yaj ca'vee cuchij' ma'an ni' rihaan Dioso adonj.

<sup>20</sup> Ne xa' nij ta'ni' ta'nij si'no si' cu'naj Levi, tzaj ne taj ra a 'o rasuun cuta' Dioso gaa cune' Dioso man nij so' a ma'. Tzaj ne xa' Jesucristo me se vaa se cuta' Dioso ra gaa cune' Dioso man so' adonj. Dan me se danj Dioso taj: "Cuta' si' 'nij ra'a man ni' ra ma'an so', ne daj chihaa mij se nanicaj se-nana so', qui'yaj so' ma'. Dan me se cataj so' se vaa xrej guun so' nu' cavii nu' ca'anj a", taj danj Dioso a. Ne che'e se cuta' Dioso ra ma'an so' ro', <sup>22</sup> che'e dan ne'en ya ni' se vaa sa' doj vaa tucuaan noco' ni' sese sij noco' man Jesucristo me ni', ne sa' doj qui'yaj Dioso che'e ni' adonj. <sup>23</sup> Ne nij ta'ni' ta'nij si'no si' cu'naj Levi ro', yuvij cavij' vaa guii me nij so', ne che'e dan a 'o nij so' se cayaan guun xrej

nu' cavii nu' ca'anj ma'. Che'e dan aj cayaan que'ee nij so' a. <sup>24</sup> Tzaj ne Jesucristo me se daj chihaa mij se cavij' so' ma'. Che'e dan orun' so' me xrej qui'yaj suun rihaan Dioso che'e ni' nu' cavii nu' ca'anj adonj. Se gaa yo' o xrej rihaan so' ma'. <sup>25</sup> Dan me se yo' o vaa i'na' so', ne cachinj ni'yaj so' rihaan Dioso che'e ni' nu' cavii nu' ca'anj ei. Che'e dan nu' ni' sij cuchij' rihaan Dioso che'e so' me se guun nucuaj so' tinanii so' man ni' rihaan sayuun nu' cavii nu' ca'anj adonj.

<sup>26</sup> Dan me se vaa che'e ndo' o guun so' xrej ata suun noco' doj che'e ni' adonj. 'O se si' guee ya me so', ne taj vaj a doj cacun' tumé so' ma'. 'O se si' sa' inanj nimán me so', ne gan' uxrá yaan so' ga ni' sij tumé cacun' nanj adonj. Dan me se xta' doj yaan so' rihaan nu' rej xta' ei. <sup>27</sup> Ne nij xrej ata suun noco' doj man rihaan chumij nihánj ro', 'o 'o guii nó xcúun nij so' caxrij ya'an nij so' xcuu rihaan Dioso che'e cacun' tumé ma'an nij so' asino yaan, gaa ne caxrij ya'an uun nij so' xcuu rihaan Dioso che'e cacun' tumé nij yuvij nanj chuguanj. Tzaj ne Jesucristo me se ne nó xcúun so' qui'yaj so' danj ma'. 'O se xa' so', tzaj ne ca'neé nimán ma'an so' cavij' so' che'e cacun' tumé ni' nanj adonj. Taj che'e cavij' uun so' che'e ni' ma'. <sup>28</sup> Ne se-tucuanj Moises taj se vaa cune' yuvij man nanj yuvij cayaan nij yuvij xrej, ne che'e dan nanj si' tumé cacun' me nij xrej yo' nanj adonj. Tzaj ne quinavij tucuaan nga yo', gaa ne cuta' Dioso ra ma'an Dioso, ne cune' Dioso man ta'ni' Dioso, ne si' sa' inanj me so' nu' cavii nu' ca'anj nanj adonj.

#### Nana nihánj taj xna'anj se vaa sa' doj vaa se-tucuanj Jesucristo rihaan se-tucuanj Moises a

**8** Dan me se nihánj me nana noco' doj rihaan taran' nij nana cataj xna'anj 'unj rihaan soj nihánj, ne nana nihánj taj se vaa sa' inanj vaa Jesucristo si' guun xrej ata suun noco' doj xrej 'yaj suun rihaan Dioso che'e ni' ei. Ne rej xta' yaan so' rej nuva' Dioso, <sup>2</sup> ne 'yaj suun so' rihaan Dioso ra ve' ne rej xta', ne nuvee 'o ve' cune' yuvij uun me ve' yo' ma'. 'O se ve' cune' ma'an si' 'nij ra'a man ni' me ve' yo' adonj. <sup>3</sup> 'O se nij xrej ata suun noco' doj man rihaan chumij nihánj ro', no xcúun nij so' rque nij so' rasuun do', xcuu cacaa do', rihaan Dioso adonj. Che'e dan me nij so' xrej ei. Che'e dan no xcúun Jesucristo rque uun so' yo' o rasuun rihaan Dioso ei. <sup>4</sup> Dan me se nuvee xrej man rihaan chumij nihánj me Jesucristo ma'. 'O se sese sij man rihaan chumij nihánj me Jesucristo, ne taj che'e guun so' xrej ma'. Maan se rihaan chumij nihánj man xrej rque rasuun rihaan Dioso ndaa vaa taj Moises nanj ei. <sup>5</sup> Ne nij xrej man rihaan chumij nihánj ro', ne 'yaj suun nij so' ga ma'an nij rasuun man rej xta' ma'. Maan se ase vaa se tinanga' uun do', ase vaa se-cachun' nij rasuun man rej xta' do', vaa suun 'yaj suun nij so' nanj adonj. Che'e dan me asij ca'ne' Dioso suun rihaan si' cu'naj Moises cune' so' ve' mantá xij ve' na'vij nij yuvij israelita rihaan Dioso, ne nago' so' chrej rihaan Moises daj qui'yaj so', cataj so':

—Xcaj so' cuentá se vaa ase vaa ve' tihaán 'unj rihaan so' raá quij ro', danj gaa guee ve' cune' so' á —taj Diose rihaan Moisés a.

<sup>6</sup>Tzaj ne cuano ro', sa' doj vaa tucuáán noco' ní' gaa 'yaj suun ní' rihaan Diose a. 'O se sa' uxrá doj vaa síi tucu'yón rihaan ní' daj qui'yaj ní' ne cavii sa' ní' rihaan Diose, ne gaa cune' Diose man so', ne cataj xna'anj Diose rihaan ní' se vaa sa' doj qui'yaj Diose ga' ní' rihaan nij síi cumán gaa naá a. <sup>7</sup>'O se sese inanj sa' uxrá vaa nana cataj xna'anj Diose rihaan Moisés, ne taj che'é cataj xna'anj Diose yo'ó nana che'é ní' ma'. Tzaj ne cataj Diose se vaa ca'mii Diose yo'ó nana ei. <sup>8</sup>Dan me se cuta' Diose cacun' xráá nij síi man gaa naá, cataj Diose se vaa yo'ó nana cachiin uún rihaan nij so', cataj Diose:

—Ní'yaj so' 'na' güii, —taj síi 'nij ra'a man ní'— ne cataj xna'anj naca 'unj rihaan nij ta'níi ta'nij si'no síi cu'naj Israel do', rihaan nij ta'níi ta'nij si'no síi cu'naj Judá do', daj qui'yaj nij so', ne cavii sa' nij so' rihanj á. <sup>9</sup>Ne ino doj gaa nana naca yo' ga' nana cataj xna'anj 'unj rihaan xii nij so' sij cumán gaa naá, gaa quita'aa 'unj ra'a nij so', ne quirii 'unj man nij so' Egipto a. Tzaj ne tanáj xco' nij so' nana yo', gaa ne na'néj ra'a nij so' nanj adonj —taj síi 'nij ra'a man ní' a—. <sup>10</sup>Dan me se ino doj gaa nana naca yo' nana tucu'yonj rihaan nij ta'níi ta'nij si'no síi cu'naj Israel asa' quisij güii yo' adonj —taj síi 'nij ra'a man ní' a—. 'O se ca'nej 'unj se-nanaj nimán nij so', ne quene'en ma'an nij so' daj me rá 'unj qui'yaj nij so' adonj. Ne guún 'unj Diose canoco' nij so', ne guun nij so' yuvii cütumé 'unj adonj. <sup>11</sup>Ne se tucu'yón nij so' rihaan tuvi' nij so' do', rihaan tinúu nij so' do', daj qui'yaj nij so' canoco' nij so' manj a ma'. Se cataj nij so': "Xcaj so' cuentá che'é Diose vij", se cataj nij so' ma'. 'O se quene'en cunudanj nij so' manj nanj adonj. Dan me se quene'en síi cunij do', quene'en síi chij doj do', manj nanj adonj. Quene'en cunudanj nij so' manj, <sup>12</sup>che'é se cunuu 'ee raj man nij so', ne se qui'yaj sayuun man nij so' che'é cacun' tumé nij so' a ma'. Quinavij cacun' taj xráá nij so', qui'yaj nanj adonj —taj Diose a.

<sup>13</sup>Veé danj ca'mii Diose che'é nana naca yo', ne che'é dan ne'en ní' se vaa guun nga nana cataj xna'anj so' rihaan síi cu'naj Moisés, ne che'é dan taj se uun se-nana Moisés yo' a ma'. Nichrun' navij nana nga yo' nanj adonj.

**Nana nihánj taj xna'anj se vaa ase vaa cunuu sa' nee man nij yuvii israelitá rihaan Diose qui'yaj ton man xcuu ro', danj vaa cunuu sa' nimán ní' rihaan Diose, qui'yaj ton man Jesucristó a**

**9** Dan me se gaa ca'mii Diose rihaan Moisés asino yaan, ne cataj xna'anj Diose daj qui'yaj nij yuvii israelitá gaa na'víj nij so' rihaan Diose, ne cataj xna'anj Diose daj gaa ve' guee cune' nij yuvii israelitá rihaan chumii nihánj a. <sup>2</sup>Dan me se cune' nij yuvii israelitá ve' ne rihaan tuvi' ve', ne rá ve' yo' ro', nuú aga' taj aga' ya'an do', chruun mesá cuta' nii rachrúun rihaan Diose do', ne ve' cu'naj rej guee me ve' yo' a. <sup>3</sup>Ne vaa yo'ó

yatzij cortiná canoco' rej xco' rej guee yo', ne rej xco' yatzij cortiná yo' ne yo'ó ve' cu'naj rej guee doj a. <sup>4</sup>Ne rá ve' rej guee doj yo' nicun' aga' oró míi, ne aga' ca-caa squíi rihaan Diose me aga' oró míi tu'vee ndo'o yo' a. Ne vaa se-chrunj Diose chrúun guee, ne chrúun qui'yaj síi cu'naj Moisés gaa ca'mii Diose se-nana Diose rihaan so' me yo' a. Ne nu' xráá chrúun yo' nó aga' oró míi a. Ne rque chrúun yo' ro', nuú xruj oró, ne rque xruj oró cunuú se chá cu'naj maná a. Ne x'núu xruj oró yo' ro', naj xruún síi cu'naj Aarón chruun vará, ne chruun xra' ma'an coj rihaan me yo', ne x'núu chruun vará yo' ro', naj yahij no se-nana Diose nana guun rá Diose cunúo nij síi israelitá a. <sup>5</sup>Ne xráá chrúun guee yo' ro', táá vij aga', ne ase vaa se-mozó Diose ro', danj vaa curuvi' roj aga' yo', ne querubines cu'naj roj aga' yo' a. Dan me se táá roj aga' yo' che'é Diose, ne charáan xcóo roj yo' man chrúun guee yo', ne rej xráá chrúun guee yo' ro', me rej tinavij Diose cacun' che'é yuvii a. Tzaj ne se nataj doj che'é rasuun yo' cuano a mei.

<sup>6</sup>Dan me se nu' nij rasuun yo' man rque roj ve' yo' a. Ne daj a güii atúj nij xrej rá ve' rej guee yo', 'yaj suun nij xrej rihaan Diose che'é nij yuvii a. <sup>7</sup>Tzaj ne rque 'ó ve' rej guee doj yo' ro', orún' güii rque 'o yo' atúj xrej atá suun noco' doj rá ve' yo' nanj adonj. Ne dan me se rej guee doj yo' me se inanj ton nicaj xrej atúj xrej rej yo' adonj. Ne ton yo' me se yo' me ton che'é cacun' tumé ma'an xrej do', che'é cacun' qui'yaj nij yuvii gaa ne xcaj nij yuvii cuentá se vaa cacun' me se vaa qui'yaj nij so' do' adonj. <sup>8</sup>Inanj danj vaa tucuáán tihaan Nimán Diose a. Dan me se yo'ó ne ve' cu'naj rej guee yo', ne che'é dan ne nó xcuún yuvii catuu yuvii rej guee doj yo' ma'. <sup>9</sup>Ne ase vaa rej guee ro', vaa yo' yaj adonj. Dan me se se cunuu sa' inanj yuvii rihaan Diose qui'yaj rej guee yo' ma'. Ne yo' yaj me se rque yuvii rasuun do', xcuu cacaa do', rihaan Diose, tzaj ne taj se qui'yá' cunuu sa' inanj nimán yuvii rihaan Diose qui'yaj rasuun yo' a ma'. <sup>10</sup>Maan se ase vaa tucuáán noco' yuvii che'é se chá yuvii do', che'é se 'o yuvii do', che'é daj 'yaj yuvii na'ya' yuvii do', vaa tucuáán che'é rasuun rque yuvii rihaan Diose nanj á. Dan me se tucuáán noco' yuvii man yaj me tucuáán yo', ne taj xna'anj nana yo' rihaan yuvii daj qui'yaj yuvii ne cunuu sa' nee man yuvii rihaan Diose adonj. Tzaj ne asa' quisij nari' yuvii tucuáán naca cuchruj Diose, gaa ne ino uxrá qui'yaj nij yuvii canoco' nij yuvii Diose ei.

<sup>11</sup>Dan me se guun Jesucristó xrej atá suun noco' doj, ne cavii sa' uxrá ní', qui'yaj so', ne 'yaj suun so' yo'ó rej guee, tzaj ne nuveé ve' cune' yuvii rihaan chumii nihánj me yo'ó rej guee yo' ma'. <sup>12</sup>Ne orún' uun catúj so' rá rej guee yo', ne yuun che'e navij cacun' tumé ní' nu' cavii nu' ca'anj, qui'yaj so' nanj adonj. Tzaj ne nuveé nanj ton man tana do', ton man scúj le'ej do', me nicaj so' ma'. Maan se ton man ma'an ya' so' nicaj so' gaa catúj so' rihaan Diose, ne qui'yaj canaán ya' so' nanj adonj. <sup>13</sup>Dan me se sese ton man tana do', ton man scúj toró do', yaj man nij scúj vacá cacaa do', taman' xrej man nij yuvii, ne cunuu sa' nee man nij yuvii yo' rihaan Diose, <sup>14</sup>gaa ne táá a ton man Jesucristó,

ne sa' doj vaa yo' rihaan nu' nij rasuun yo' nanj chuguanj. Dan me se taj a doj cacun' tumé Jesucristó ma'. 'O se cayáan Nimán Diose ga so', ne che'é dan rqué so' man ma'an so' rihaan Diose chuguanj. Che'é dan me doj a cunu sa' nimán ní', qui'yaj ton man Jesucristó, ne quinavij cacun' tumé ní' che'é se chi'ij qui'yaj ní' asij rque doj a. 'O se daj chihaa míj se cavii sa' ní', qui'yaj ma'an ní' ma'. Maan se cavi' uun ní', qui'yaj ma'an ní' nanj ei. Tananj uún, ne taj che'é qui'yaj ní' se vaa 'yaj ní' nu' 'na' mei. Maan se yaj ro', qui'yaj ní' nu' rasuun rej rihaan ní', ne canoco' inanj ní' man Diose síf vaa i'na' yaj ei.

<sup>15</sup> Dan me se Jesucristó me se cavi' so' che'é rej quene'en so' se vaa ne guun nucuaj yuvi' canoco' nij yuvi' nu' tucuáan cataj xna'anj Diose asino yaan rihaan síf cu'naj Moisés chuguanj. Che'é dan Jesucristó me síf narqué tucuáan naca che'é ní', cataj xna'anj so' nana naca rihaan ní' daj qui'yaj ní', cavii sa' ní' rihaan Diose a. Che'é dan ní' sij canacúun Diose man ro', nacaj ní' nu' se sa' cataj xna'anj Diose se vaa rque so' rihaan ní' nu' cavii nu' ca'anj ei. <sup>16</sup> Dan me se sese vaa si'yaj yo' o so' rasuun guun si'yaj yo' o yuvi', ne asa' cavi' so', ne asino yaan cavi' so', ga ne guun ya rá yuvi' se vaa cavi' so', ga ne ca'vee guun rasuun yo' si'yaj yo' o yuvi' yo' adonj. <sup>17</sup> 'O se asa' quisij cavi' yo' o so', ga ne quisij ya nu' se-nana so' che'é si'yaj so' ei. Tzaj ne se guun quita'aa yuvi' si'yaj yo' o so' sese ataa cavi' so' mei. <sup>18</sup> Che'é dan ga cataj xna'anj Diose asino yaan rihaan síf cu'naj Moisés daj qui'yaj nij yuvi' israelita cavii sa' nij so' rihaan Diose, ne vaa xcuu cavi' che'é nana yo' nana cataj xna'anj Diose, ne dan me se che'é ton cayanj man xcuu yo' ro', che'é dan quisij ya nu' se-nana Diose che'é nij yuvi' yo' adonj. <sup>19</sup> Dan me se ga quisij cataj xna'anj síf cu'naj Moisés rihaan nij yuvi' nu' nana me rá Diose cun o nij yuvi', ga ne nicaj so' ton man scúj le'ej nicaj so' na nicaj so' cachij matzinj cachij marce nicaj so' coj cu'naj hisopo nicaj so', ga ne taman' so' ton yo' rihaan yanj no se-nana Diose do', rihaan taran' nij yuvi' do' adonj. <sup>20</sup> Ne cataj xna'anj so' rihaan nij yuvi' a:

—Che'é ton nihánj quisij ya nu' nij nana cataj xna'anj Diose rihaan ní' daj qui'yaj ní' cavii sa' ní' rihaan Diose adonj —taj Moisés rihaan nij yuvi' a.

<sup>21</sup> Ga ne taman' uún so' ton yo' rihaan ve' mantá guce do', rihaan nu' nij rasuun rasuun nij xrej ga na'víj nij xrej rihaan Diose do' a. <sup>22</sup> Dan me se inanj ton me se vaa achiin che'é rej nahuun sa' que'ee uxrá rasuun rihaan Diose, taj se-tucuanj Moisés a. Ne sese nuvi' ton, ne se caráj x'naa Diose ni'yaj Diose cacun' tumé yuvi' ma'.

<sup>23</sup> Dan me se xa' nij rasuun taman' Moisés ton rihaan, tzaj ne ase vaa nij rasuun man rej xtá' rej nicun' Diose vaa nij rasuun yo', ne achiin ton che'é rej cunu sa' nij rasuun yo' rihaan Diose, ne che'é dan avi' xcuu, 'yaj Moisés chuguanj. Tzaj ne sa' uxrá doj vaa ma'an nij rasuun man rej xtá' rihaan nij rasuun man rihaan chumii nihánj, ne che'é dan achiin se sa' doj rihaan ton man xcuu yan cunu sa' nij rasuun man rej xtá' rej

catuu ní' rihaan Diose ei. <sup>24</sup> Dan me se ma'an Jesucristó me síf rqué ton man ma'an so', che'é rej cunu sa' nij rasuun man rej xtá' che'é ní' ei. 'O se nuveé rej guce nuu rá ve' cune' ma'an yuvi' me rej catúj Jesucristó ma'. 'O se rej guce man rihaan chumii nihánj ro', ase vaa rej nicun' ma'an Diose rej xtá' vaa yo', tzaj ne nuveé ya ya rej nicun' Diose me yo' ma'. Tzaj ne yaj me se catúj ma'an Jesucristó rej xtá' yo', ne cuano nicun' so' rihaan ma'an Diose, ne achíin ni'yaj so' rihaan Diose che'é ní' adonj. <sup>25</sup> Tzaj ne se qui'yaj so' ndaa vaa 'yaj nij xrej atá suun nocoo doj man rihaan chumii nihánj ma'. Nij xrej me se nicaj nij xrej ton man xcuu atúj nij xrej rá rej guce doj yo' daj a yo' adonj. Tzaj ne ne cachíin niganj rque Jesucristó ton man ma'an so' rihaan Diose man adonj. <sup>26</sup> 'O se sese vaa che'é qui'yaj so' danj, ne no xcúun so' que'ee ndo'o quiran' so' sayuun asij ga qui'yaj Diose chumii nihánj ndaa cuano adonj. Tzaj ne yaj ro', nichrun' quinavij chumii nihánj, ne ndaa yaj ca'na' Jesucristó rihaan chumii nihánj, ne orún' uun cavi' so' che'é ní', ne navij nu' cacun' tumé ní' nanj adonj.

<sup>27</sup> Dan me se ne'en ní' daj quiran' 'o 'o ní' sij man rihaan chumii nihánj, ne dan me se ne'en ní' se vaa orún' uun cavi' 'o 'o ní', ga ne canicun' ní' rihaan Diose, ne ca'ne' so' cacun' che'é ní' nanj adonj. <sup>28</sup> Ne dan me se che'é se orún' uun cavi' Jesucristó, ne tinavij so' cacun' tumé que'ee yuvi' ro', vaa güii ca'na' uún so' rihaan chumii nihánj ei. Tzaj ne nuveé che'e rej cavi' uún so' che'é cacun' tumé yuvi' me ca'na' so' ma'. 'O se ca'na' so', ne ní' sij na'víj ndo'o man so' ro', cavii sa' ní' rihaan Diose, qui'yaj so' adonj.

**10** 'O se ase vaa nij se sa' quene'en ní' rej xraj vaa se-tucuanj Moisés, tzaj ne nuveé ma'an nij se sa' yo' me tucuáan yo' ma'. 'O se ticavi' nii man xcuu, ne rqué nii xcuu yo' rihaan Diose, ne inanj danj 'yaj nii 'o yo' 'o yo' nanj adonj. Dan me se taj güii yo' o cunu sa' ya nij síf rqué rasuun yo' rihaan Diose ma'. <sup>2</sup> Dan me se x'néj cacun' xraá nij síf rqué xcuu rihaan Diose, tzaj ne quene'en uún nij so' se vaa vaa doj cacun' tumé uún nij so', ne che'é dan se ca'ne' rá nij so' ga suun rqué xcuu cavi' rihaan Diose a ma'. <sup>3</sup> Dan me se che'é xcuu cavi' rqué nij so' rihaan Diose ro', che'é dan 'o yo' 'o yo' me se ne quini'yon nij so' se vaa sij tumé ya cacun' me nij so' a man adonj. <sup>4</sup> 'O se taj se qui'yá' quinavij cacun' tumé yuvi' qui'yaj ton man scúj toró do', ton man tana do' a ma'. <sup>5</sup> Che'é dan ca'na' Jesucristó rihaan chumii nihánj, ne ca'mii so' rihaan Diose, cataj so':

—Taj se uun xcuu rque nij yuvi' cavi' rihaan so' a ma'. Taj se uun nu' nij rasuun rque yuvi' rihaan so' a ma'. Tzaj ne nee manj ro', vaa se uun rihaan so', ne che'é dan qui'yáa so' nee manj adonj. <sup>6</sup> Dan me se ne niha' rá so' ni'yaj so' xcuu acaa che'é cacun' ma'. <sup>7</sup> Dan me se cataj 'unj: "Veé 'unj nicun' rihaan so' 'na'. Rihaan dáan so' yanj libró nó nana a'mii che'é 'unj, se vaa qui'yáa 'unj nu' se vaa me rá so' qui'yáj, Atáj", taj 'unj rihaan so' a —taj nana ca'mii Jesucristó rihaan Diose nana no rihaan danj Diose a.

<sup>8</sup> Dan me se cataj so' se vaa xcuu rqué yuvij rihaan Dioşe do', 'núú rqué yuvij rihaan Dioşe do', xcuu acaa do', xcuu avi' che'é cacun' do', ne achiin rihaan Dioşe ma'. Ne ne niha' rá Dioşe ni'yaj Dioşe rasuun yo' a man adonj. Ne nanj rasuun yo' me se rqué nij síf nocõ' se-tucuñj Moisés rihaan Dioşe nanj adonj.

<sup>9</sup> Gaa ne cataj uún so' a:

—Veé 'unj nicun' rihaan so', 'na' qui'yáá 'unj nu' se vaa me rá so' qui'yáá á —taj uún so' a.

Veé dan me tinavij so' tucuáán nga yo', ne vaa tucuáán naca cuchruj so' canocõ' ní' a. <sup>10</sup> Ne che'é se yuun che'e nago' Jesucristó man ma'an so' rihaan Dioşe ndaa vaa guun rá Dioşe qui'yaj so' ro', che'é dan aj cunuu sa' ní' rihaan Dioşe adonj.

<sup>11</sup> Ne xa' taran' nij xrej, tzaj ne yo'õ nicun' nij so' 'yaj suun nij so' rihaan Dioşe daj a güii, ne nanj xcuu do', 'núú do', rqué nij so' rihaan Dioşe, tzaj ne taj se qui'yáá x'nee cacun' xráá yuvij qui'yaj rasuun yo' ma'. <sup>12</sup> Tzaj ne Jesucristó me se orún' uun ca'vej so' cavi' so' che'é nij yuvij, ne yuun cavi' so' che'é ní' cacun' atá nij yuvij nanj adonj. Dan me se rqué ma'an so' man so' rihaan Dioşe che'é nu' cacun' tumé yuvij, gaa ne ca'anj cayáán so' x'núú Dioşe rej nuva' Dioşe ei. <sup>13</sup> Ne cuano nihánj me se na'vij uun Jesucristó ndaa se qui'yaj canaán Dioşe rihaan taran' nij síf taj ri'yunj man Jesucristó, gaa ne quirij ta'nga' Jesucristó rihaan taran' nij so' adonj. <sup>14</sup> 'O se orún' uun nago' so' man ma'an so' rihaan Dioşe, ne che'é dan yo'õ cunuu sa' nij síf sa' nocõ' man Dioşe nu' cavii nu' ca'anj ei. <sup>15</sup> Ne ma'an Nimán Dioşe taj xna'anj uún rihaan ní' daj quiran' ní' ei. Asino yaan cataj so':

<sup>16</sup> —Dan me se inõ doj gaa nana naca yo' nana tucu'yón 'unj rihaan nij so' asa' quisij güii yo' adonj. 'O se ca'nej 'unj xrej 'unj nimán nij so', ne cachron 'unj letrá nana yo' cúu raá nij so' daj qui'yaj nij so', ne quene'en ma'an nij so' qui'yaj nij so' rasuun sa' adonj —taj síf 'nij ra'a man ní' a.

<sup>17</sup> Gaa ne cataj uún so':

—Ne güej nu' cacun' tumé nij so' xráá nij so', qui'yáá á —taj uún Nimán Dioşe a.

<sup>18</sup> Ne che'é se aj caráj x'naa Dioşe che'é cacun' tumé ní' ro', che'é dan ca'ne' rá ní' ga suun rqué rasuun rihaan Dioşe che'é cacun' nanj adonj.

**Nana nihánj taj xna'anj se vaa nõ xcúún ní' canocõ' raan ní' man Dioşe a**

<sup>19</sup> Dan me se che'é se cayanj ton man Jesucristó ro', che'é dan taj che'é cuchu'vi' ní' catuu ní' rá rej guée xtá' a ma'. Dan me se taj che'é cuchu'vi' ní' canicun' ní' rihaan ma'an Dioşe, man tinuj, man nocõj. <sup>20</sup> 'O se cavii' nee man Jesucristó, ne inanj danj ca'núj so' chrej naca rihaan ní' catuu ní' rihaan Dioşe, ne gaa i'na' ní' rihaan Dioşe nanj adonj. <sup>21</sup> Ne xrej sa' uxrá me uún Jesucristó che'é ní' sij nocõ' man Dioşe nanj ei. <sup>22</sup> Che'é dan nõ xcúún ní' cuchij' ní' rihaan Dioşe, ne che'é se amán rá ní' ni'yaj ní' man Jesucristó, che'é dan guun ya uxrá rá ní' se vaa ca'vee canocõ' sa' ní' man Dioşe, ne 'õ cuyañ gaa rá taran' ní' ei. Dan me se 'õ cuyañ

gaa rá taran' ní', che'é yan quisij nanó rá ní' che'é cacun' tumé ní', ne cunuu sa' ya nimán ní', qui'yaj ní', gaa canoco' ní' man Jesucristó nanj chuguñj. Ne cata ne ní' rque na sa', ne cunuu sa' ya nee man ní' nanj adonj.

<sup>23</sup> Ne yo'õ cuchuman rá ní' se vaa ya cavij sa' ní', ne se guun vij rá ní' daj chihaa mij mei. 'O se vaa che'é gaa nucuaj rá ní' man síf cataj se vaa sa' qui'yaj so' che'é ní' á. <sup>24</sup> Ne xcaj ní' cuentá che'é tinúú ní' daj qui'yaj ní' ne sa' doj cunuu 'ee rá nij tinúú ní' man tuvi' so', ne doj a qui'yaj suun nij tinúú ní' suun sa' che'é Dioşe a. <sup>25</sup> Ne se tanáj ní' tucuáán nuu chre' ní' ga tinúú ní' ma'. 'O se vaa yuvij ne nocõ' tucuáán yo', tzaj ne nõ xcúún soj nago' soj chrej nucuaj man tinúú soj gaa nuu chre' soj ei. Ne yaj ro', me se doj a cunuu chre' soj, che'é yan ne'en soj se vaa nichrun' quisij güii ca'na' uún Jesucristó rihaan chumii nihánj nanj adonj.

<sup>26</sup> 'O se sese aj canoco' ní' nana ya nana nari' ní', gaa ne sese quirij nimán ní' qui'yaj ní' cacun', ne taj vaj yo'õ se vaa qui'yaj ní' gaa ne caraá x'naa Dioşe uún che'é cacun' tumé ní' a ma'. <sup>27</sup> Dan me se nique ní', ne vaa güii ca'ne' Dioşe cacun' che'é ní', ne gaa yo'õ ya'an, ne guun niha' uxrá rá ya'an yo' chá ya'an yo' man nij síf taj ri'yunj man Dioşe nanj adonj. <sup>28</sup> Xa' nij síf nocõ' se-tucuñj Moisés, tzaj ne sese 'yaj 'õ tuvi' nij so' cacun', ne sese vaa vij va'núj síf quene'en se vaa 'yaj so' cacun', ne se cunuu 'ee rá nii man so' a ma'. Mañ se avi' so' cuaj, 'yaj nii nanj á. <sup>29</sup> Ne nij uxrá doj gaa sayuun quiran' síf taj ri'yunj man ma'an ta'níí Dioşe adonj. 'O se ton man Jesucristó ro', qui'yaj cunuu sa' ní' rihaan Dioşe ne yo'õ canoco' ní' chrej sa' cuchruj Dioşe che'é ní' ei. Tzaj ne taj yu'vee nó ton yo', rá nij síf tanáj xõ se-nana Jesucristó a ma'. Ne quij a'mii nij so' rihaan Nimán Dioşe síf qui'yaj ndo'o se luj che'é ní' ei. <sup>30</sup> 'O se aj ne'en ní' daj ca'mii Dioşe, cataj Dioşe:

—'Unj me síf nõ xcúún qui'yaj sayuun man yuvij tumé cacun' a. Ya naru'vee 'unj nu' che'é se vaa qui'yaj nij so' rihaan chumii nanj á —taj Dioşe a.

Ne taj uún Dioşe:

—'Unj sij 'nij ra'a man soj ro', ca'nej cacun' che'é soj sij nocõ' manj adonj —taj uún Dioşe a.

<sup>31</sup> Dan me se cuchu'vi' ndo'o vaa me se vaa quiran' nij síf tanáj ra'a Dioşe vaa i'na' ya adonj.

<sup>32</sup> Dan me se cunuû rá soj daj qui'yaj soj gaa guun che'e soj canoco' soj man Jesucristó ei. Dan me se gaa guun che'e soj canoco' soj man Jesucristó, ne síf xcaj cuentá me soj, ne guun nucuaj soj quiran' soj sayuun, ne yo'õ raan canoco' soj man Jesucristó chuguñj.

<sup>33</sup> Ne quene'en yuvij daj sij me soj, ne nachri' nij yuvij ni'yaj nij yuvij man soj, ne qui'yaj nij yuvij sayuun man soj, ne guun tuvi' soj ga yo'õ nij síf ran' sayuun yo' a.

<sup>34</sup> 'O se cunuu 'ee rá soj man tinúú soj nij síf 'nij taga', ne guun niha' rá soj ni'yaj soj se vaa ca'néj yuvij si'yaj soj che'é se sij nocõ' man Jesucristó me soj a. 'O se ne'en soj se vaa sa' doj vaa si'yaj soj rasuun nicaj soj rej xtá', ne rasuun yo' me se daj chihaa mij se quinavij rasuun yo' a man adonj. <sup>35</sup> Dan me se se gaa cuchu'vi' soj canoco' soj man Jesucristó, ne se ca'ne' rá soj ma'.

Ne 'o veé danj gaa rá soj nu' cavii nu' ca'anj ei. Che'é yan a'née nucuaj nimán soj ro', vaa güii, ne nocoo ya vaa rasuun quirí' soj ei. <sup>36</sup> 'O se vaa che'é gaa inaj nimán soj, ne yo'o qui'yaj soj se vaa me rá Diose qui'yaj soj, ne vaa güii nacaj soj nu' se vaa cataj Diose nacaj soj chuguaj.

<sup>37</sup> Dan me se danj Diose taj se vaa nichrun' ca'na' síí ca'na', ne se guun raan so' ma'. <sup>38</sup> Ne síí sa' rihaan Diose ro', maan che'é se amán rá so' ro', che'é dan yo'o cayáan so' ga Diose adonj. Tzaj ne sese canicaj so' rej xcó so', ne se gaa niha' rá Diose quene'en Diose man so' a ma', taj danj Diose a.

<sup>39</sup> Tzaj ne nuveé sij anicaj rma'an rej xcó me ní' ma'. Che'é dan se quirí' ní' ma'. 'O se sij nucuaj rá man Diose me ní', ne che'é dan quinanií nimán ní' rihaan sayuun adonj.

### Nana nihánj taj xna'anj daj 'yaj síí amán rá ni'yaj man Diose a

**11** Vaa se ne ruvi' ni'yaj yuvii, tzaj ne guun ya rá ní' se vaa ya vaa nu' nij rasuun yo' ei. Tzaj ne orún' ní' sij amán rá ni'yaj man Diose me nij síí amán rá se vaa ya vaa nu' nij rasuun yo' chuguaj. <sup>2</sup> Ne nij síí man gaa naá ro', amán rá nij so' ni'yaj nij so' Diose, ne che'é dan gaa naá cataj Diose se vaa síí sa' me nij so' ei.

<sup>3</sup> Xa' ma'an ní', tzaj ne che'é se amán rá ní' ni'yaj ní' Diose ro', che'é dan xcaj ní' cuentá se vaa ca'mii Diose, gaa ne guun nu' nij chumii, qui'yaj so' adonj. Dan me se nicaj Diose rasuun ne ruvi', ne qui'yaj Diose nu' rasuun ruvi' ni'yaj ní' adonj.

<sup>4</sup> Xa' síí cu'naj Abel, tzaj ne che'é se cuchumán rá so' ni'yaj so' Diose ro', che'é dan sa' doj vaa se rqué so' rihaan Diose, ne tinúú so' Caín me se nij doj vaa rasuun rqué so' man Diose adonj. Che'é dan cataj Diose se vaa sa' vaa nimán síí cu'naj Abel, ni'yaj Diose che'é nij rasuun rqué síí cu'naj Abel rihaan Diose a. Dan me se che'é se cuchumán rá so' ni'yaj so' Diose ro', che'é dan yaj taj xna'anj yuvii che'é so' daj qui'yaj so' gaa naá nanj adonj.

<sup>5</sup> Xa' síí cu'naj Enoc, tzaj ne che'é se cuchumán ndo'o rá so' ni'yaj so' Diose ro', che'é dan vaa i'na' so' cavii so' ca'anj so' rej xtá' rej yanj Diose, ne ne ca'vej rá Diose cavi' so' ma'. Dan me se nano' ndo'o nii man so', tzaj ne ne nari' nii man so' a ma'. Maan se naxcaj nu' Diose man so' ca'anj so' rej xtá' nanj adonj. 'O se gaa ataa cavii so' rej xtá', ne cataj xna'anj Diose che'é so' se vaa guun niha' uxrá rá Diose ni'yaj Diose man so', che'é se síí sa' guun so' rihaan Diose ei. <sup>6</sup> Tzaj ne síí ne amán rá ni'yaj man Diose ro', daj chihaa mij se guun niha' rá Diose ni'yaj Diose man so' a ma'. 'O se síí me rá cuchí' rihaan Diose ro', no' xcúún so' cuchuman rá so' se vaa ya vaa Diose, ne vaa che'é cuchuman rá so' se vaa naru'vee ma'an Diose rihaan nij síí nano' ya man Diose ei.

<sup>7</sup> Dan me se síí cu'naj Noé, tzaj ne che'é se cuchumán ndo'o rá so' ni'yaj so' Diose ro', che'é dan, ndá' se ataa quene'en so' daj gaa sayuun qui'yaj Diose

man chumii nihánj, tzaj ne maan che'é se ve'é cuno so' nana cataj xna'anj Diose rihaan so', ne che'é dan qui'yaj so' rihoo xij chéé rihaan na, ne che'é dan me quinanií nij tuví' nij so' rihaan sayuun yo' adonj. Ne maan che'é se cuchumán ya rá so' ni'yaj so' Diose, che'é dan cuta' so' cacun' ya xraá nij yuvii man rihaan chumii se vaa ne ca'vej rá nij yuvii cuno nij yuvii se-na-na Diose, ne guun ma'an so' síí sa' ni'yaj Diose adonj.

<sup>8</sup> Dan me se síí cu'naj Abraham uún me se che'é se cuchumán ndo'o rá so' ni'yaj so' Diose ro', che'é dan cuno so' rihaan Diose gaa canacúún Diose man so', ne cavii so' ca'anj so' rej rqué Diose yo'óo guun to'oj so' vaa güii a. Dan me se a doj ne quene'en so' me rej cuchí' so', tzaj ne ne guun vij rá so' ma'. Maan se cavii so' ca'anj so' adonj. <sup>9</sup> Dan me se maan che'é se cuchumán rá so' ni'yaj so' Diose ro', che'é dan cavii so' chiháan so' ca'anj so' rej cataj xna'anj Diose se vaa guun to'oj so' ei. Ne gaa cuchí' so' yo'óo yo', ne to'oj yo'óo yuvii me yo'óo yo', tzaj ne veé danj quináj síí cu'naj Abraham yo', ne cuta' so' ve' mantá, ne yáan so' ga ta'níí so' síí cu'naj Isaac do', ta'nij si'no' so' síí cu'naj Jacob do' a. Taran' nij so' me síí guun to'oj yo', cataj Diose rihaan síí cu'naj Abraham a. <sup>10</sup> Danj qui'yaj síí cu'naj Abraham, cuno so' rihaan Diose, che'é se sij na'vij ndo'o cayáan yo'óo chuman' nocoo chuman' naj rej xtá' me so' a. Ne nuveé ve' mantá uun me chuman' yo' ma'. 'O se raan ndo'o vaa tacóo nu' ve' naj chuman' yo' ei. 'O se ma'an Diose cuchruj chuman' yo', ne ma'an Diose qui'yaj nu' chuman' yo' adonj.

<sup>11</sup> Dan me se che'é se cuchumán rá síí cu'naj Abraham ni'yaj so' Diose ro', che'é dan ndá' se chana ituun me nica so' chana cu'naj Sará, ne ndá' se chii nga me ma'an so', tzaj ne guun nucuaj rá so' man Diose se vaa ca'ngaa ta'níí so', che'é se cuchumán rá so' se vaa Diose me síí qui'yaj nu' se vaa cataj xna'anj ma'an Diose rihaan so' adonj. <sup>12</sup> Dan me se ndá' se daj doj cavi' síí chii nga yo', tzaj ne xna'anj ndo'o nij so', ne ase vaa que'ee ndo'o nij yati' man rej xtá' ro', danj vaa guun que'ee uxrá nij tuví' nij so' nij síí israelitá yo', ne dan me se ase vaa naj yo'óo chruy tu'va na ya'anj ro', cunudanj vaa xna'anj nij so' nanj adonj.

<sup>13</sup> Dan me se yo'o cuchumán rá taran' nij síí man gaa naá ni'yaj nij so' Diose ndaa se cavi' taran' nij so' ei. Ne ne quirí' ma'an nij so' se vaa cataj xna'anj Diose se vaa rqué Diose rihaan nij tuví' nij so' ma'. Tzaj ne quene'en nij so' se vaa vaa güii qui'yaj Diose cunudanj yo', ne che'é dan guun niha' rá nij so' nanj adonj. Ne cataj xna'anj nij so' se vaa nuveé chihanj nij so' me chumii nihánj ma'. Maan se vaj uun nij so' doj rihaan chumii nihánj, ne síí man yo'óo chumii me nij so', cataj ma'an nij so' nanj adonj. <sup>14</sup> Ne síí a'mii danj me se nata' nij so' se vaa nano' uxrá nij so' yo'óo chumii guun chihanj nij so' ei. <sup>15</sup> Ne sese guun rá nij so' se vaa sij chihanj chumii nihánj me nij so', ne gaa ya'núj rihaan nij so' nani-caj nij so' chiháan nij so' chuman' naj rihaan chumii nihánj, tzaj ne ne guun rá nij so' danj ma'. <sup>16</sup> 'O se guun ndo'o rá nij so' cané nij so' chuman' sa' doj chuman' naj rej xtá' ei. Ne sese taj vaj chuman' sa' cayáan nij so'

vaa güii, ne guun na'aj Diose gaa nanj ei. Tzaj ne taj che'é guun na'aj Diose ma'. 'O ya vaa chuman' nocoo cayáan nij so', qui'yaj Diose ei.

<sup>17</sup> Ne che'é se cuchumán rá síí cu'naj Abraham ni'yaj so' Diose ro', che'é dan gaa guun rá Diose quene'en Diose sese raan ya noco' so' man Diose, ne ca'vej rá síí cu'naj Abraham ticavi' so' rihaan Diose man orún' ta'níí so' Isaac síí rque ma'an Diose man so' a. Dan me se danj qui'yaj síí cu'naj Abraham yo', che'é se me ndo'o rá so' ni'yaj so' Diose a. Ne Isaac me síí rque Diose guun ta'nij síí cu'naj Abraham, ndaa vaa cataj xna'anj Diose rihaan so' se vaa gaa ta'níí so' a. <sup>18</sup> Dan me se cataj xna'anj Diose rihaan síí cu'naj Abraham se vaa cumán ndo'o ta'níí ta'nij si'no' síí cu'naj Abraham qui'yaj síí cu'naj Isaac yo' a. <sup>19</sup> Ne nda' se guun ndo'o rá síí cu'naj Abraham ca'ngaa ta'níí ta'nij si'no' so', tzaj ne ca'vej rá so' ticavi' so' man síí cu'naj Isaac rihaan Diose nanj chuguaj. 'O se guun rá so' se vaa guun nucuaj Diose cunuu i'na' uún yuvií qui'yaj Diose asa' cavi' yuvií, rá so' a. Dan me se ya uxrá, ne daj doj se cavi' síí cu'naj Isaac, qui'yaj Abraham, tzaj ne caráan Diose rihaan so', ne tanáj uún Diose man síí cu'naj Isaac rihaan síí cu'naj Abraham a.

<sup>20</sup> Dan me se síí cu'naj Isaac me se che'é se cuchumán rá so' ni'yaj so' Diose ro', che'é dan cataj so' se vaa qui'yaj Diose se luj che'é roj ta'níí so' síí cu'naj Jacob ga síí cu'naj Esaú a. Ne cataj xna'anj so' daj gaa quiran' roj ta'níí so' rej rihaan roj so' a.

<sup>21</sup> Dan me se síí cu'naj Jacob me se che'é se cuchumán rá so' ni'yaj so' Diose ro', che'é dan gaa nichrun' cavi' so', ne cataj so' se vaa qui'yaj Diose se luj che'é roj ta'níí síí cu'naj José, ne dan me se ru'maan so' se-garróte so' rihaan yo'óó, ne quina'víj ndo'o so' rihaan Diose a.

<sup>22</sup> Ne dan me se síí cu'naj José me se che'é se cuchumán rá so' ni'yaj so' Diose, che'é dan gaa nichrun' cavi' so', ne nuchruj raa so' daj qui'yaj nij yuvií israelitá ga cúú man so' asa' curihanj nij so' Egiptó vaa güii, ne che'é dan cataj xna'anj so' se vaa asa' cavii nij síí israelitá rej Egiptó, ne quirii' nij so' cúú man ma'an so' nicaj nij so' ca'anj nij so', cataj so' rihaan nij so' a.

<sup>23</sup> Dan me se Moisés me se che'é se cuchumán rá nij tuvi' síí cu'naj Moisés ni'yaj nij so' Diose ro', che'é dan va'nuj ya yavii caxrj yuve nij so' man Moisés gaa ca'n-gaa so' a. Danj qui'yaj nij so' che'é se quene'en nij so' se vaa ve'é ndo'o vaa ne'ej yo' a. Ne ne cuchu'vi' nij so' rihaan síí nicaj suun rey síí cataj xna'anj se vaa cavi' nu' ta'níí nij so' ne'ej snó'o cunii a ma'.

<sup>24</sup> Che'é se cuchumán rá ma'an síí cu'naj Moisés ni'yaj so' Diose ro', che'é dan gaa cachij so', ne ne ca'vej rá so' cataj yuvií se vaa ta'nij si'no' síí nicaj suun rey cu'naj Faraón me so' ma'. <sup>25</sup> 'O se ca'neé nimán so' quiran' so' sayuun ga nij yuvií nocó' man Diose nanj adonj. 'O se sa' a doj vaa canocó' man Diose, rá so', ne nij vaa guun niha' rá qui'yá' cacun' rihaan Diose yaj vaa i'na' rihaan chumií niháñj, rá so' a. <sup>26</sup> Dan me se vaa yu'vee ndo'o nó sayuun quiran' so' che'é síí ca'nej Diose tinanii man yuvií man rihaan chumií niháñj ri-

haan sayuun, ne taj yu'vee nó taran' nij rasuun sa' man rej cu'naj Egiptó, rá so', ne ve'é a doj canocó' man Diose, rá Moisés a. 'O se aj navij nu' nuchruj raa so' che'é nu' rasuun sa' rque Diose man so' ei. <sup>27</sup> Che'é se cuchumán rá so', che'é dan tanáj so' Egiptó ca'anj so', ne ne cuchu'vi' so' daj qui'yaj síí nicaj suun rey man so' ma'. Nda' se ne ruvi' Diose ni'yaj yuvií, tzaj ne ase 'yaj síí ruvi' nicun' Diose rihaan ro', danj qui'yaj síí cu'naj Moisés, yo'o canoco' so' man Diose adonj.

<sup>28</sup> Che'é se cuchumán rá so' ni'yaj so' Diose, che'é dan cuchruj so' cha'anj cu'naj pascuá navij rá nij yuvií israelitá, ne cataj xna'anj so' rihaan nij yuvií israelitá se vaa caxrii' nij so' ton matzinj tu'va ta'yaa rihaan tucuá nij so', gaa ne se gaa nanj cavi' ta'níí nij so' síí chava' qui'yaj se-mozó Diose síí 'yaj avi' ndo'o yuvií, taj Moisés rihaan nij so' a.

<sup>29</sup> Dan me se nij yuvií israelitá me se che'é se cuchumán rá nij so' ni'yaj nij so' Diose ro', che'é dan guun nucuaj nij so' cachén nij so' tanuu na ya'anj cu'naj Na Ya'anj Ve'ej a. Ne ca'ne' na ya'anj yo' man yo', ne quináj yo'óó nacoo inanj cachén nij so', qui'yaj Diose a. Tzaj ne gaa guun rá nij síí man Egiptó cachén nij so' rihaan yo'óó nacoo yo' me se caráan na xráá nij so', ne canó xráá nij so', qui'yaj na yo' a.

<sup>30</sup> Ne che'é se cuchumán rá nij yuvií israelitá ni'yaj nij so' Diose ro', che'é dan cachén chij ya güii gaa aman tucuachriin nij so' nu' anicaj chuman' cu'naj Jericó, ne canee nu' chingá nicun' nu' anicaj tu'va chuman' yo', qui'yaj Diose, che'é yan cuchumán rá nij so' ni'yaj nij so' Diose a.

<sup>31</sup> Dan me se che'é se cuchumán rá chana niha' rá ga chii chana cu'naj Rahab ni'yaj no' Diose ro', che'é dan ne cavi' no' ga yo'óo nij síí man chiháan no' síí ne ca'vej rá cunó rihaan Diose a. Maan se ve'é nacaj no' man roj síí israelitá síí me rá quene'en daj vaa nu' chiháan no', ne ne qui'yaj no' sayuun man roj so' a.

<sup>32</sup> Ne me yo'óo nana cataj xna'anj 'unj rihaan nij soj, rá soj ga. 'O se achén ndo'o orá, 'yáá 'unj, ne ataa cataj xna'anj 'unj che'é síí cu'naj Gedeón do', che'é síí cu'naj Barac do', che'é síí cu'naj Sansón do', che'é síí cu'naj Jefté do', che'é síí cu'naj David do', che'é síí cu'naj Samuel do', che'é yo'óo taran' nij síí nata' se-nana Diose gaa naá do', nanj chuguaj. <sup>33</sup> Dan me se che'é se cuchumán rá nij so' ni'yaj nij so' Diose ro', che'é dan qui'yaj canaán nij so' rihaan síí nicaj suun rey do', ca'ne' sa' nij so' cacun' che'é yuvií do', quiri' nij so' se vaa cataj xna'anj Diose quirj' ya nij so' do', guun nucuaj nij so' caráan nij so' tu'va chuvaá do', <sup>34</sup> tina'áj nij so' ya'an yuvaá se gaa nanj cacaa' nij so' qui'yaj ya'an do', quinanii nij so' rihaan yuvií nicaj neê espadá me rá ticavi' man nij so' do', nari' nucuaj nij so' qui'yaj Diose gaa ninaj nij so' do', guun nucuaj nij so' qui'yaj canaán nij so' rihaan síí man yo'óo chuman' síí cunu' ga nij so' do' ei. <sup>35</sup> Ne vaa nij chana' cuchumán rá ni'yaj man Diose se vaa ya cunuu i'na' uún tuvi' nij chana' síí cavi', ne ya uxrá cunuu i'na' uún tuvi' nij chana' yo' ei.

Ne yo'óo ta'aj nij síí cuchumán rá ni'yaj man Diose ro', quita'aa nii numij nii man nij so', ne go' uxrá nii man

nij so' ndaa se cavi' nij so' ei. Dan me se cavi' nij so' che'é se ne ca'vej rá nij so' cataj nij so' se vaa nij vaa Diose a. 'Q se sa' doj cavi' nij so' che'é Diose, ne ve'é doj cunyu i'na' uún nij so' vaa güii qui'yaj Diose, rá nij so' a. <sup>36</sup> Ne yo'ó ta'aj nij so' me se ca'nga' nacoo yuvi' ni'yaj yuvi' man yo'ó ta'aj nij so', ne go' yuvi' cuartá xráá nij so', ne yo'ó ta'aj nij so' me se numíj nii aga' ne' ra'a nij so', ne caxríj nii taga' man nij so' chuguaj. <sup>37</sup> Yo'ó ta'aj nij so' cavi', qui'yaj yuvi' gaa go' nij yuvi' yahij man nij so' a. Ne ta'aj nij so' ro', ca'ne' aga' seraa a'ne' chruun man nij so' a. Go' yuvi' neé espadá man ta'aj nij so' a. Ne dan me se taran' nij síj sa' yo' me se cachéé yun nij so' rej xraj rej rque rihaan chumi' nihánj, ne taj vaj ve' sa' cayáán nij so' ma'. Ne inanj nuj matzinj do', nuj tana do', cunuú nij so' ei. Ne síj nique uxrá me nij so', ne síj cachiin ndo'o rasuun rihaan guun uún nij so', ne síj nij uxrá quiran' guun uún nij so', qui'yaj yuvi' ei. <sup>38</sup> Dan me se sij sa' uxrá me nij so', ne ne nó xcúún nij yuvi' man rihaan chumi' nihánj cayáán nij so' ga' nij yuvi' nihánj a man adonj. Dan me se táá ri'yunj yuvi' man nij so' rihaan chumi' nihánj, ne dan me se unánj nij so' tucua' nij so', ne vaj nij so' rej tacaan do', rej quij do', atúj nij so' rque yu'uj taj yuvej do', rque yu'uj taj rque yo'ó do', 'yaj nij yuvi' yo' nanj adonj.

<sup>39</sup> Ne dan me se nda' se guun niha' rá Diose ni'yaj Diose man cunudanj nij so' che'é se cuchumán rá nij so' ni'yaj nij so' Diose, tzaj ne ne quirí' nij so' nu' se vaa cataj xna'anj Diose se vaa qui'yaj Diose che'é nij síj nocó' man so' ma'. <sup>40</sup> 'Q se aj ne'en Diose se vaa sa' doj gaa suun qui'yaj suun ní' che'é so', ne che'é dan ne ca'vej rá Diose cunyu sa' inanj nij síj cumán gaa naá yo' rihaan Diose, gaa ataa cunyu sa' ma'an ní' rihaan so' ma'. 'Q se che'é ní' me guun raan qui'yaj Diose nu' se sa' che'é nij síj cumán gaa naá yo' adonj.

**Nana' nihánj taj xna'anj se vaa se ca'ne' rá ní' ga' suun nocó' man Diose á**

**12** Dan me se sa' uxrá vaa nij síj man gaa naá, ne cuano' nihánj me se man nij so' nu' anicaj rej x'nuy ní' ni'yaj nij so' man ní' daj 'yaj ma'an ní' adonj. Che'é dan ne daj qui'yaj ní', rá soj ga'. Maan se tanáj xcó ní' nu' se vaa caráán chrej rihaan ní' qui'yaj suun ní', ne tanáj xcó ní' nu' chrej chí'ij ei. 'Q se sayuun ndo'o vaa tanáj xcó ní' chrej chí'ij yo' adonj. Ne dan me se yo'ó qui'yaj suun ní' nu' suun vaa rihaan ní' ei. Dan me se ase vaa síj unánj tico tuvi' ro', danj gaa ní', ne se ca'ne' rá ní' ca'anj ní' rej rihaan ní' ma'. <sup>2</sup> Tzaj ne yo'ó ni'yaj ní' rej nicun' Jesucristó, ne veé so' me síj cuchruj tucuaán amán rá ni'yaj man Diose ei. Dan me se cuchumán rá ma'an so' ni'yaj so' Diose, ne so' me síj quisíj qui'yaj ya nu' suun vaa rihaan so' che'é rej canocó' ní' man so' adonj. Dan me se guun rá Jesucristó se vaa cavi' sa' yuvi' qui'yaj so', ne quene'en so' se vaa guun niha' rá so' sese cavi' sa' nij yuvi', ne che'é dan guun nucuaj so' cavi' so' rihaan rcutze, ne ne xcaj so' cuentá che'é rej ca'nga' nacoo yuvi' ni'yaj yuvi' man so' ma'. Ne xcaj ní' cuentá se vaa x'núú Diose rej

nuva' Diose ro', ne so' cuano, uun chij so' ga' Diose chuguaj. <sup>3</sup> Che'é dan me nuchruj raa soj se vaa ase vaa taj ri'yunj yuvi' tumé cacun' man soj ro', danj táá ri'yunj yuvi' tumé cacun' man uún so' chuguaj. Tzaj ne ne ca'ne' rá so' ma'. Tananj soj uún, ne nuchruj raa soj, ne se ninaj nimán soj mei.

<sup>4</sup> Dan me se 'yaj ndo'o nij síj tumé cacun' sayuun man soj, tzaj ne aj ne'enj se vaa na'vej uxrá rá soj qui'yaj soj cacun' ga' nij so' ma'. Ne nda' se sayuun 'yaj nij so' man nij soj, tzaj ne ne cavi' nij soj, qui'yaj nij so' mei. <sup>5</sup> Ne aj ni'yón soj chrej nucuaj no' rihaan danj Diose, nanj raj a. Dan me se ase vaa ta'níí Diose vaa soj, taj nana' yo' chuguaj. Ne nihánj me se taj nana' yo' ei: "Cunó so' ca'mij, ta'nij ne'ej. Se guun nachri' so' chrej sa' rque síí 'nij ra'a man ní' mán so' ma'. Ne se quirí' rá so' asa' caxríj yuva' síí 'nij ra'a man ní' mán so' che'é cacun' 'yáá so' mei. <sup>6</sup> 'Q se síí 'nij ra'a man ní' me se tucu'yón so' man taran' ní' sij 'ee rá so', ne uun yuva' so' man taran' nij síí nacaj so' guun ta'nij so', sese qui'yaj nij so' cacun' adonj." Dan me se sese guun nucuaj soj gaa axríj yuva' Diose man soj, ne cunaj ndo'o vaa yo' ei. Dan me se ase 'yaj nij síj man nihánj ga' ta'níí so' ro', danj 'yaj Diose ga' soj chuguaj. Ne me sij ta'nij me yo'ó so' sese ne yuva' rej so' man so' ne ne narqué rej so' chrej rihaan so' ga'. Daj chihaa' míj se cavi' sa' síí vaa danj ma'. <sup>8</sup> 'Q se cunudanj yuvi' yuva' rej man sese qui'yaj nij so' cacun' ei. Tzaj ne sese ne yuva' rej ní' Diose man soj, ne nuveé ta'nij Diose me soj gaa a ma'. Dan me se taj vaj rej soj gaa mei.

<sup>9</sup> Dan me se vaa rej ní' síí ne rihaan chumi' nihánj, ne caráj cochroj ní' rihaan nij so' gaa narqué nij so' chrej rihaan ní' daj qui'yaj ní' adonj. Che'é dan táá a' doj sese cunó sa' ní' rihaan Diose chuguaj. 'Q se rej nimán ya ní' me Diose chuguaj. Dan me se yo'ó gaa i'na' nimán ní', qui'yaj so' ei. <sup>10</sup> Dan me se gaa me ní' xnii ro', doj güii me yo', ne güii yo' me se tucu'yón rej ní' rihaan ní' daj qui'yaj ní' cavi' sa' ní', ne narqué so' chrej man ní' adonj. Dan me se qui'yaj rej ní' ndaa vaa me rá ma'an so' ga' ní' ei. Dan me se Diose me se sa' uxrá doj cavi' sa' ní', qui'yaj xrej so' chrej sa' chuguaj. Dan me se ase vaa Diose, sa' inanj vaa so' ro', danj gaa sa' inanj ma'an ní', qui'yaj Diose ei. <sup>11</sup> Tzaj ne ya uxrá, ne gaa ti-haj narqué nii chrej man ní', ne sayuun uxrá vaa narí' ní' daj qui'yaj ní', ne ne niha' uxrá rá ní' ma'. 'Q se nanó rá ní', gaa sayuun vaa yo' adonj. Tzaj ne achén doj, ne nuu sa' nimán ní' 'yaj chrej sa' yo', ne nuu xej nimán ní', 'yaj yo' ei.

<sup>12</sup> Che'é dan ase 'yaj síí naqui'yaj nica' ra'a do', tacó do', danj qui'yaj soj, naqui'yaj nica' soj nimán soj sese vaa vij nimán soj ei. <sup>13</sup> Ne ase 'yaj síí naqui'yaj sa' chrej cachee yuvi' ro', danj qui'yaj soj, nuchruj raa soj daj qui'yaj nimán soj ei. Asa' quisíj qui'yaj soj danj, gaa ne ca'vee se nuveé sij nocó' sa' chrej sa' me soj, tzaj ne se tanáj nu' soj chrej sa' ma'. 'Q se cunyu sa' soj adonj.

<sup>14</sup> Dan me se tirquee soj gaa dínj cayáán soj ga' cunudanj yuvi' ei. Ne tirquee soj cunyu sa' soj ndaa vaa ma'an Diose ei. 'Q se sese taj vaj se sa' yo', ne daj

chihaa mij se quene'en ní man síi 'njj ra'a man ní' ma'.  
 15 Ne tumé soj man soj, gaa ne se gaa nanj tanáj yo'ó tinúú soj se luj qui'yaj Diose che'é ní' ei. Dan me se se guun nachri' yo'ó tinúú soj ni'yaj so' tinúú so' ma'.

Tadó uxrá soj che'é se 'o síi nachri' ni'yaj tinúú ro', qui'yaj quirí' rá que'ee tinúú soj ei. 16 Ne se guun cataj yo'ó tinúú soj se vaa taj se uun se-nana Diose mei. 'O se ase vaa síi cu'naj Esaú síi cane gaa naá vaa síi a'mii daj chuguanj. Dan me se síi chava' me síi cu'naj Esaú, tzaj ne nu' rasuun sa' tanáj rej so' rihaan so' me se cu-tu'vej so' nu' rasuun sa' yo' rihaan tinúú so', che'é se guun rá so' rque tinúú so' doj se chá cha so' chuguanj. 17 Ne aj ne'en soj se vaa cachén doj, gaa ne guun rá uún síi cu'naj Esaú cataj rej so' se vaa nacaj uún so' se sa' yo', tzaj ne quináj uun so' nanj ei. 'O se taj se qui'yá' tucua'anj ni'ya so' nana ca'mii so' a ma'. Nda' se ndaa ta'vee ma'an so' che'é yan guun rá so' quirí' so' se sa' yo', tzaj ne ne quirí' so' daj chihaa mij a ma'.

18 Dan me se tumé uxrá soj man soj ei. 'O se cavii sa' soj doj rihaan nij síi israelitá vaa nanj chuguanj. Nij so' me se cuchí' nij so' tacóo quij xcaan rej rque Diose se-nana Diose rihaan síi cu'naj Moisés, ne quene'en nij so' caco' ya'an raá quij quene'en nij so' rej rmi' ndo'o quene'en nij so' nana yuvaa quene'en nij so' do' ei.

19 Tananj uún, ne cuno nij so' chruun a'yánj cuno nij so' nana ca'mii ma'an Diose rihaan nij so' do' ei. Dan me se cuchu'vi' uxrá nij so', ne cachín ni'yaj nij so' rihaan Diose se vaa ne ca'vej rá nij so' ca'mii ma'an Diose se-nana Diose rihaan nij so' a. 20 'O se nana sayuun ndo'o me nana cataj xna'anj Diose rihaan nij so', rá nij so', ne dan me se cataj Diose rihaan nij so' se vaa sese ndaa xcuu cachee xraá quij yo', ne go' nij so' yahij man xcuu yo' ndaa se cavi' xcuu cuaj, taj Diose rihaan nij so' a. 21 Dan me se cuchu'vi' ndo'o nij yuvij ni'yaj nij yuvij quij yo', ne ndaa ma'an síi cu'naj Moisés cataj se vaa cuchu'vi' uxrá so' ne ndaa quirí'ij ma'an man so', taj so' a.

22 Tzaj ne ino uxrá quiran' nij soj ga' nij so' nanj ei. Dan me se xa' soj, tzaj ne ca'vee cuchí' ma'an soj chuman' Jerusalén chuman' naj rej xta' nanj chuguanj. Ne chuman' Jerusalén naj rej xta' me se ase vaa chuman' Jerusalén naj raá quij cu'naj Sion rihaan chumii nihánj ro', vaa chuman' yo' ei. Ne ma'an Diose síi vaa i'na' yáan chuman' Jerusalén naj rej xta' yo', ne yo' me rej man mij mij se-mozó Diose me rej yo', ne navij ndo'o rá nij se-mozó Diose cha'anj che'é Diose rej yo' adonj. 23 Ne dan me se cunyu chre' soj ga' taran' nij ta'níi Diose, ne ase vaa síi chava' vaa cunudanj nij ta'níi Diose yo', ne ne nij so' ga' ma'an ya Diose rej xta' yo', ne no se-chuvij nij so' rihaan yanj taj rej xta' yo' ei. Ne ca'vee cuchí' soj rihaan ma'an ya Diose síi a'ne' cacun' che'é cunudanj yuvij adonj. Ne ca'vee cuchí' soj rej ne nimán nij síi aj cunuu sa' inanj rihaan Diose ei. 24 Ne ca'vee guun tuvi' soj ga' Jesucristó, ne so' ro', me síi cuchruj tucuaán naca che'é ní' daj qui'yaj ní' canoco' ní' man Diose ei. Dan me se sa' a doj a'mii ton cayanj man Jesucristó vaa ton cayanj man síi cu'naj Abel qui'yaj tinúú so' síi cu'naj Caín nanj adonj.

25 Sa' uxrá ni'yaj soj sese se nachri' soj ni'yaj soj man síi narqué chrej sa' man soj ei. Dan me se ma'an ya Diose me so', ne tadó uxrá soj ei. Dan me se tananj nij síi ne ca'vej rá cunó rihaan síi cataj xna'anj se-nana Diose rihaan nij so' rihaan yo'óo nihánj gaa naá me se ne quinaniij nij so' mei. Táa a ní' sij man cuano, ne a'mii síi nicun' rej xta' rihaan ní', ne sese nachri' ní' ni'yaj ní' xrej so' chrej sa', ne daj chihaa mij se quinaniij ní' a ma'. 26 Dan me se gaa ca'mii Diose gaa naá, ne quinaan ya yo'óo, ne cuano nihánj me se taj xna'anj so' se vaa quinaan uún yo'óo, qui'yaj so' chuguanj. Tzaj ne nuvee inanj yo'óo me se quinaan ma'. 'O se yo'óo do', rej xta' do', quinaan, qui'yaj so' adonj. 27 Ne che'é se quinaan nu' yo', che'é dan ne'en ní' se vaa quinavij nu' nij rasuun, qui'yaj Diose ei. Ne rasuun qui'yaj Diose ruvi' ni'yaj ní' cuano me se quinaan adonj. Ne nij rasuun ne ruvi' rihaan ní' me se se quinaan rasuun yo' ma'. 'O se gaa rasuun yo' nu' cavii nu' ca'anj adonj. 28 Dan me se guun ní' sij chihanj rej sa' ndo'o rej guun chij ní' ga' Diose, ne daj chihaa mij se quinaan chuman' yo' a ma'. Che'é dan guun ni'yaj uxrá ní' rihaan Diose, ne che'é dan yo'ó qui'yaj suun ní' rihaan Diose, ne guun niha' rá Diose, qui'yaj ní' ei. Ne caraá cochroj uxrá ní' rihaan Diose nanj á. 29 'O se ase vaa 'o ya'an vaa Diose síi noco' ní', ne cacaa nu' se chi'ii, qui'yaj so' adonj.

#### Nana nihánj taj xna'anj daj qui'yaj ní', ne ve'é canoco' ní' man Diose a

13 Yo'ó gaa 'ee rá soj man tinúú soj ei. 2 Se tanáj xco soj suun a'mii sa' ga' yuvij 'na' yo'óo chuman' ma'. 'O se cunuú rá soj ndaa vaa qui'yaj síi ca'mii sa' ga' yuvij 'na' yo'óo chuman' asij rque ei. Ne ne quene'en nij so' se vaa se-mozó Diose me síi ca'mii ga' nij so' ma'. 'O se ndaa síj, gaa ne quene'en nij so' adonj. 3 Se ni'yón soj tinúú soj síi 'njj taga' ma'. Dan me se guun rá soj ndaa adi' se ma'an soj 'nij taga' ga' tinúú soj a. Ne se ni'yón soj tinúú soj síi ran' sayuun 'yaj yuvij ma'. Dan me se guun rá soj ndaa adi' se ma'an soj 'yaj yuvij sayuun man a. 4 Ne ve'é uxrá sese xcaj soj 'o chana adonj. Nuvee se na'aj me yo' ma'. Ne nuvee cacun' me sese otoj soj ga' nica ma'an soj ma'. Tzaj ne síi otoj ga' yo'óo chana do', síi otoj ga' nica tuvi' do', me se qui'yaj Diose sayuun man so' adonj. 5 Se guun soj síi 'ee rá ni'yaj sa'anj ma'. Maan se gaa xej nimán soj che'é doj rasuun man rihaan soj ei. 'O se ma'an Diose cataj xna'anj rihaan ní', ne:

—Daj chihaa mij se tanáj 'unj man soj ma' —taj Diose rihaan ní' a.

6 Che'é dan vaa che'é ca'mii ní' nana nihánj nana no rihaan danj Diose a: "Che'é se racuíj síi 'njj ra'a man ní' manj, che'é dan se cuchu'ví' 'unj ma'. 'O se nuvee se ya'anj tiha' me sayuun qui'yaj yuvij manj ma'", cataj ní' a.

7 Nuchruj raá soj daj 'yaj nij síi uun chij rihaan soj, nij síi cataj xna'anj se-nana Diose rihaan soj á. Xcaj uxrá soj cuentá daj 'yaj nij so' gaa yanj nij so' rihaan chumii nihánj, ne xcaj uxrá soj cuentá daj gaa quiran' nij so'



vaa güii a. Ne ase vaa nucaj uxrá rá nij so' ni'yaj nij so' Dioso ro', danj gaa qui'yaj soj uún, ne gaa nucaj rá soj ni'yaj soj Dioso ei.

<sup>8</sup> Dan me se orún' Jesucristó me síi nicún' asij rque, ne veé so' me síi nicún' cuano, ne veé so' me síi canicún' nu' cavii nu' ca'anj nanj adonj.

<sup>9</sup> Se ca'vej soj tihá' yu'unj nii man soj ga yo'ó tucuáan naca mei. 'Q se aj sa' uxrá vaa sese nari' nucaj nimán soj che'é se luj qui'yaj Jesucristó che'é ní' ei. Tzaj ne se nari' nucaj nimán soj qui'yaj se chá mei. 'Q se se cavii sa' nij síi noco' tucuáan yo' tucuáan che'é se chá ma'.

<sup>10</sup> Dan me se ase vaa síi nicún' mesá altar rihaan, ne man rasuun sa' rihaan 'yaj Dioso ro', danj vaa ní' chuguaj. Ne orún' ní' me síi no xcúún chá rasuun taj rihaan mesá altar yo' ei. Ne nij síi 'yaj suun che'é tucuáan nga tucuáan noco' nii rá nuvíi noco ro', ne no xcúún nij so' chá nij so' nij rasuun sa' taj rihaan se-mesa ní' a ma'. <sup>11</sup> Dan me se 'anj nicaj xrej atá suun noco doj ton man xcuu rá rej guéé doj che'é nij yuvii, ne ton che'é cacun' tumé yuvii me ton yo' a. Ne nu' nee man scúj yo' me se rii nii man nee yo' rej tu'va chuman', ne axríj ya'an nii nu' nee yo' nanj adonj.

<sup>12</sup> Che'é dan danj qui'yaj guéé Jesucristó cavi' so' tu'va chuman' rej atúj yuvii chuman', gaa ne cunuu sa' nij yuvii rihaan Dioso che'é ton cayanj man ma'an so' nanj adonj.

<sup>13</sup> Che'é dan me cuano nihánj me se no xcúún ní' curihanj ní' ne cuchí' ní' rihaan so' tu'va chuman' a. Dan me se ase qui'yaj so' ca'vej rá so' nachri' yuvii ni'yaj yuvii man so' ro', danj qui'yaj ní' ca'vej rá ní' nachri' yuvii ni'yaj yuvii man ma'an ní' á. <sup>14</sup> 'Q se rihaan chumii nihánj ro', taj vaj chiháan ní' chuman' quinaj nu' cavii nu' ca'anj mei. 'Q se nano' ní' yo'ó chuman' cané ní' vaa güii ei. <sup>15</sup> Che'é se vaa qui'yaj Jesucristó ro', che'é dan yo'q cataj ní' rihaan Dioso se vaa ve'é uxrá vaa qui'yaj Dioso nanj adonj. Ne dan me se nuveé inanj rasuun man rihaan chumii nihánj me se vaa nago' ní' man Dioso ma'. 'Q se nana sa' tu'va ní' me se vaa nago' ní' man so' ei. <sup>16</sup> Ne se tanáj soj suun sa' 'yaj soj, suun racuíj soj man tinúú soj síi nique mei. 'Q se yo'ó se sa' nago' ní' man Dioso me uún yo', ne uun nihá' rá Dioso ni'yaj Dioso man síi 'yaj danj adonj.

<sup>17</sup> Ve'é cunq soj rihaan nij síi uun chij rihaan soj á. 'Q se síi tumé man nimán soj me nij so', ne vaa güii

xna'anj Dioso man nij so' daj qui'yaj nij so' che'é soj adonj. Ne ve'é cunq soj, ne guun nihá' rá nij so' cataj xna'anj nij so' che'é soj chuguaj. Ne se rnúj soj rihaan nij síi guun chij mei. 'Q se sese rnuj soj rihaan nij so', ne rnuj nij so' rihaan Dioso che'é soj, ne se cavii sa' soj mei.

<sup>18</sup> Cachinj ni'yaj soj rihaan Dioso che'é núj á. 'Q se guun ya' rá núj se vaa taj vaj cacun' tumé núj ma'. 'Q se inanj me rá núj qui'yaj sa' núj gaa yáan núj rihaan chumii nihánj ei. <sup>19</sup> Ne cuano nihánj me se uxrá doj cataj xna'anj 'unj rihaan soj se vaa cachinj ni'yaj soj se vaa ca'vej rá Dioso ra'yanj cuchí' uún 'unj rihaan soj ei.

### Nihánj me taj síi 'yaj yanj nihánj se vaa ve'é cayáan nij síi nayaq yanj nihánj rá so' a

<sup>20</sup> Dan me se Dioso me síi 'yaj vaa xej nimán ní', ne so' me síi qui'yaj cunuu i'na' uún Jesucristó sij 'nij ra'a man ní' gaa cavi' so' a. Ne Jesucristó me se ase vaa síi tumé matzinj vaa so', ne ase vaa daán so' matzinj vaa ní', ne tumé so' man ní' sij noco' man so', ne síi sa' uxrá me so', ne che'é ton man so' me nicaj ní' yo'ó tucuáan cuchruj so' che'é ní' se vaa canoco' ní' man Dioso a. Ne me rá 'unj <sup>21</sup> guun nucaj soj qui'yaj suun soj nu' suun sa', ne qui'yaj soj nu' se vaa me rá Dioso qui'yaj soj, qui'yaj ma'an Dioso chuguaj. Ne dan me se guun ní' se nihá' rihaan Dioso, qui'yaj ma'an Dioso che'é Jesucristó ei. Ne ve'é ndo'o cayáan so' nu' cavii nu' ca'anj adonj. Veé danj gaa ya' ei.

<sup>22</sup> Cuano nihánj me se cataj xna'anj 'unj rihaan soj se vaa ve'é cunq soj nana nihánj, tinuj, nocoj. 'Q se chrej nucaj narqué 'unj man soj me nana nihánj, ne doj vaa nana nihánj nana cachrón 'unj rihaan yanj cartá nihánj nayaq soj ei.

<sup>23</sup> Xcaj soj cuentá se vaa curihanj tinú' Timoteo taga', ne sese ra'yanj ca'na' so' rihanj, ne cuchí' núj rihaan soj ra'yanj ei.

<sup>24</sup> Cataj soj rihaan taran' nij síi uun chij rihaan soj do', rihaan taran' nij síi sa' rihaan Dioso do', se vaa ve'é cayáan nij so' raj ei. Nij tinúú ní' nij síi man rej cu'naj Italia ro', ve'é cayáan nij soj, rá nij so' chuguaj.

<sup>25</sup> Me rá 'unj qui'yaj ndo'o Dioso se luj che'é taran' nij soj nanj adonj. Amén.

# Santiago

**1** 'Unj ro', me síf cu'naj Santiagó síf 'yaj suun rihaan Diose dɔ', rihaan Jesucristó sij 'nij ra'a man ní' dɔ', ne 'yáá 'unj yanj nihánj ca'nej 'unj rihaan taran' soj sij noco' man Diose sij ca'anj cayáán que'ee chuman' naj rihaan chumij a. Dan me se ase vaa chuvij nij x'ne' yuvij israelitá yuvij noco' man Diose gaa naá ro', danj vaa guee soj rihaan Diose nanj ei.

**Nana nihánj taj xna'anj se vaa rque Diose nana cuu sa' rihaan ní' a**

<sup>2</sup> Dan me se asa' ca'na' me ma'an sayuun rihaan soj, ne guun niha' rá soj, tinuj, nocoj. <sup>3</sup> 'O se ne'en soj se vaa asa' ca'na' sayuun rihaan soj che'é se me soj síf amán rá ni'yaj man Diose, ne tananj cunuu nucuaj doj nimán soj ei. <sup>4</sup> Maan se gaa nanaj uxrá nimán soj rihaan sayuun, gaa ne ca'vee cavij sa' nu' se-suun soj, ne síf cachij nu' nimán ya guun soj, ne se cachiin a doj se sa' man nimán soj a man adonj.

<sup>5</sup> Sese yo'o tuvi' soj me rá narí' nana cuu sa', ne cachinj ni'yaj so' rihaan Diose, ne rque Diose nana cuu sa' yo' man so' chuguanj. 'O se nuveé sij nachri' man síf achíin ni'yaj me Diose ma'. Tananj niha' rá so' gaa achíin ní' rasuun man so', ne rque so' nu' se sa' man cunudanj yuvij ei. <sup>6</sup> Tzaj ne yo'o cuchuman ya rá síf achíin ni'yaj rihaan Diose ni'yaj so' man Diose, gaa ne ca'vee, ne se guun vij rá so' mei. Tzaj ne sese guun vij nimán 'o so', ne ase chéé nuú na ya'anj gaa o' nana rihaan na ya'anj ro', danj vaa nimán síf uun vij nimán, chéé nuú uxrá nimán so' uún, <sup>7</sup> ne taj che'é guun rá so' sese rque Diose rasuun man so' a ma'. <sup>8</sup> 'O se síf vij vaa nimán me se daj chihaa míj se ca'vee yo'o qui'yaj suun so' a doj suun sa' a ma'.

**Nana nihánj taj xna'anj che'é ru'vee dɔ', che'é síf nique dɔ' a**

<sup>9</sup> Ne soj sij nique, tzaj ne gaa niha' rá soj che'é se sij cavij sa' rihaan Diose me soj ei. <sup>10</sup> Ne vaa nij soj sij ru'vee uún, ne gaa niha' rá soj che'é se nuu nica' nimán soj rihaan Diose á. 'O se ase vaa navij yucuan' yâj man tacaan ro', danj gaa quinavij nij ru'vee nucuaj rá ni'yaj sa'anj, vaa güii, nanj adonj. <sup>11</sup> Dan me se gaa uun xta' güii, ne uun ya'aan naán, gaa ne naco coj, ne uun che'e yâj yo' ayuu yo' raá coj a. Núj ayuu yo', ne taj se gún' man yo' gaa ma'. Ne veé danj vaa guee nij ru'vee uún, ne yo'o nuú rá nij so' rej qui'yaj canaán nij so' sa'anj, ne dan me se vaj caví' nij so' ei.

**Nana nihánj taj xna'anj se vaa nuveé sij 'yaj uun rá ní' qui'yaj ní' cacun' me Diose ma'**

<sup>12</sup> Síf nucuaj nimán rihaan sayuun ro', so' me síf cavij sa', ne cataj Diose se vaa:

—Che'é se raan noco' so' manj ro', che'é dan ca'vee cayáán so' gaj nu' cavii nu' ca'anj —cataj Diose, ndaa vaa cataj Diose se vaa ya qui'yaj Diose che'é nij síf aráj cochroj rihaan so' a.

<sup>13</sup> Sese me rá ní' qui'yaj ní' cacun', ne se guun cataj ní' se vaa Diose me síf qui'yaj guun rá ní' qui'yaj ní' cacun' ma'. A 'ó xco' na'vej rá Diose qui'yaj Diose cacun' mei. Ne nuveé Diose me síf axríj chrej chí'ij rque a 'ó yuvij a ma'. <sup>14</sup> 'O se ma'an inanj ní' me rá qui'yaj se chí'ij che'é se ve'é vaa se chí'ij yo' rihaan ní' nanj adonj. <sup>15</sup> Tzaj ne sese qui'yaj ní' ndaa vaa me rá ma'an ní' qui'yaj ní', ne qui'yaj ní' cacun', ne asa' quisíj qui'yaj ndo'o ní' cacun', gaa ne yuun che'e quirí' nu' nimán ní' vaa gaa nanj ei.

<sup>16</sup> Se cuchumán rá soj nana ne, man tinuj, man nocoj. <sup>17</sup> Xcaj soj cuentá se vaa daj a se sa' vaa rihaan ní' ro', Diose me se rque nij yo', ne dan me se maan rej yanj ma'an ya síf 'yaj avii ya'an chuguun ro', maan dan 'na' nu' se sa' dɔ', se luj dɔ', se ni'yanj dɔ' ei. Dan me se se ca'vee natuna se-nana so' nana sa' nana nica ya ya mei. Dan me se 'o vaa rá so', ne na'vee cunuu ino Diose a ma'. Yo'o sa' 'yaj so' ga ní' nanj adonj. <sup>18</sup> Guun rá so' guun ta'nij so' man ní', gaa ne cuno ní' se-nana so' nana ya, qui'yaj so', ne che'é dan asino ní', guun ta'nij so' man ní' gaa asino yaan, gaa ne vaa güii naqui'yaj sa' so' man cunudanj nij rasuun qui'yaj so' rihaan chumij nihánj a.

**Nana nihánj taj xna'anj me síf noco' ya man Diose a**

<sup>19</sup> Se quini'yón soj nana nihánj, man tinuj, man nocoj. Gaa niha' rá taran' ní' nanɔ xrej ní' se-nana Diose ei.

Tzaj ne se gaa niha' rá ní' ca'mij ní' dɔ', ca'maan rá ní' dɔ' mei. <sup>20</sup> 'O se sese a'maan ndo'o rá ní', ne se ca'vee qui'yaj sa' ní' ndaa vaa me rá Diose qui'yaj ní' ma'.

<sup>21</sup> Yuun che'e ca'ne' rá soj ga suun 'yaj se nij, ne gaa nica' nimán soj, ne cunɔ soj nana ca'neé Diose nimán soj, ne ca'vee quinanj nimán soj rihaan sayuun ei.

<sup>22</sup> Se guun catuu rma'an se-nana Diose xréé ní' ma'. Tzaj ne qui'yaj ní' ndaa vaa taj Diose ei. Sese se qui'yaj ní' danj, ne tiha' yu'unj ní' man ma'an ní' gaa nanj á.

<sup>23</sup> 'O se síf atúj rma'an se-nana Diose xréé ro', ase vaa síf ni'yaj rihaan espejo ro', danj vaa so', <sup>24</sup> ne síf ni'yaj rihaan espejo me se xcaj so' cuentá se vaa canó nacaj

rihaan so', tzaj ne 'anj so', gaa ne yuun che'e ni'yón so' nacaj no rihaan so' a. <sup>25</sup> Ne ase vaa espejo ro', danj vaa tucuaán sa' cuchruj Diose rihaan ní', ne xcaj ní' cuentá daj me rá Diose qui'yaj ní', 'yaj tucuaán sa' yo', ne ne sayuun vaa uno ní' rihaan Diose, 'yaj tucuaán yo' ma'. Se guun ní' sí tucuyón rma'an nana yo' ne ni'yón nana yo' ma'. Tzaj ne cavii ní' qui'yaj ní' ndaa vaa taj nana yo' ei. Ne sese se ca'ne' rá ní' ga nana yo', ne Diose me sí qui'yaj cavii sa' ní' adonj.

<sup>26</sup> Sij ve'é noco' man Diose me soj, rá soj na'. Sese nanó soj cuentó che'é tuvi' soj, ne nuveé sij noco' ya man Diose me soj ma'. Sij tiha' yu'unj man ma'an me soj nanj chuguanj. <sup>27</sup> Cataj xna'anj 'unj rihaan soj me sí me sí noco' ya man Rej ní' Diose a. Sí racuíj man xnii nique do', sí racuíj man chana nique do', sí ne noco' man sí chí'ij man rihaan chumii nihánj do', so' me sí noco' ya man Diose adonj.

**Nana nihánj taj xna'anj se vaa no xcúun ní' qui'yaj ní' se luj rihaan daj a yuvij a**

**2** Amán rá soj ni'yaj soj man Jesucristó sí uun chij ndo'o rihaan ní', tinuj, nocoj. Che'é dan se guun cataj soj se vaa sa' doj vaa sí ru'vee rihaan sí nique ma'. <sup>2</sup> Xcaj soj cuentá, ne gaa nuu chre' soj cachraa soj rihaan Diose, ne sese atúj 'o sí ru'vee nuu yatzíj sa' rej man soj, ne 'nij ra'a so' se'ej tu'vee ndo'o, ne aráya'anj ndo'o soj man so', ne taj soj se vaa quitaj so' chruun xlá sa' a. Ne sese atúj 'o sí nique nuu yatzíj tachrinj rej man soj, ne ne a'mii nocoj soj ga so' ma'. Ca'vee canicun' caya so' do', ca'vee cané so' rihaan yo'óo rej tacoj soj do', nanj ei. <sup>4</sup> Tzaj ne sese danj qui'yaj soj, ne sa' doj vaa ru'vee rihaan sí nique, rá soj, ne ase vaa cuese chí'ij nimán na'vej rá xcaj sa' cuentá che'é yuvij vaa soj nanj chuguanj.

<sup>5</sup> Nanó xrej soj nana ca'mij, tinuj, nocoj. Narii Diose man nij sí nique guun nij so' sí amán uxrá rá ni'yaj man so' ei. Nique nij so' rihaan yo'óo nihánj, tzaj ne aráj cochroj nij so' rihaan Diose, ne che'é dan cata' tu'-va Diose se vaa ya cayáan nij so' ga Diose asa' guun chij Diose rihaan chumii nihánj adonj. <sup>6</sup> Tzaj ne nij soj me se nij ndo'o 'yaj soj rihaan nij sí nique chuguanj. Xcaj soj cuentá se vaa ru'vee me sí 'yaj sayuun man soj, ne 'anj soj rihaan cuese, 'yaj nij ru'vee a. <sup>7</sup> Ne nana nij a'mii nij ru'vee che'é Jesucristó sí cata' ne soj che'é a.

<sup>8</sup> Dan me se vaa che'é qui'yaj ní' nana ca'mii sí cu'-naj Moisés nana no rihaan danj Diose nana ya, ne dan me se taj nana yo': "Gaa 'ee rá ní' man tuvi' ní' ndaa rá se vaa 'ee rá ní' man ma'an ní'", taj nana yo', ne sese qui'yaj soj nana yo', ne cunaj 'yaj soj ei. <sup>9</sup> Tzaj ne sese narii soj yuvij ru'vee inanj, gaa ne tumé ndo'o soj cacun' che'é se ne 'yaj ya soj se-tucuanj Diose adonj.

<sup>10</sup> Sese vaa 'o sí 'yaj nu' se-tucuanj Diose, ne sese vaa orún' nana na'vej so' qui'yaj so', ne ase vaa sí ne uno daj chihaa mij rihaan Diose ro', vaa so' ei. <sup>11</sup> 'O se cataj Diose se vaa se cotoj ní' ga nica tuvi' ní', ne veé cataj uún Diose se vaa se ticavi' ní' tuvi' ní' a. Vaa sí ne otoj ga nica tuvi', tzaj ne ticavi' so' tuvi' so', gaa ne sí 'yaj

danj ro', me se yuun che'e tiri' so' se-tucuanj Diose tucuaán noco' so' gaa nanj adonj. <sup>12</sup> Che'é dan ve'é ca'mii soj, ne ve'é qui'yaj soj, ne cunuú rá soj se vaa vaa güii ca'ne' Diose cacun' che'é ní', ni'yaj Diose se-tucuanj Diose chuguanj. 'O se ne sayuun vaa cunó ní' nana yo' ma'. <sup>13</sup> 'O se asa' ca'ne' Diose cacun' che'é yuvij, ne se gaa 'ee rá Diose ni'yaj Diose man sí ne 'ee rá man tuvi' ma'. Tzaj ne se ni'yanj rá me se yo' me qui'yaj canaán rihaan sayuun adonj.

**Nana nihánj taj xna'anj se vaa cuchuman rá ní' ni'yaj ní' Diose, ne qui'yaj ní' se luj uún a**

<sup>14</sup> Cuno soj ca'mij, tinuj, nocoj. Sese taj ní' se vaa amán rá ní' ni'yaj ní' Diose, ne sese ne 'yaj ní' a doj se luj rihaan tuvi' ní', ne ca'vee quinanií ní' rihaan sayuun, rá soj na'. Taj ma'. Se ca'vee a doj man adonj.

<sup>15</sup> Xcaj soj cuentá ei. Sese vaa tinúú ní' do', ra'vij ní' do', ne achiin se chá achiin yatzíj cunuú so' do', <sup>16</sup> ne sese cataj ní' rihaan sí achiin rasuun man, ne: "Ca'anj sa' so', ne dínj gaa nimán so' ei. Rque Diose yatzíj quitaj xráa so' do', rque Diose se chá chá so' do' ei", cataj ní' rihaan sí achiin man, gaa ne sese se quirii ní' se vaa achiin man tuvi' ní', ne taj se guun se-nana ní' gaa a ma'. <sup>17</sup> Veé danj vaa ya, ne sese taj ní' se vaa sí amán rá ni'yaj man Diose me ní', ne sese taj se luj 'yaj ní', gaa ne nuveé sij amán ya rá me ní' gaa a mei.

<sup>18</sup> Tzaj ne ta'aj nii cataj rihaan tuvi' se vaa so' me se sí amán rá ni'yaj man Diose mé so', ne 'unj nihánj me se sí 'yaj se sa' rihaan Diose mé 'unj, cataj nii chuguanj. Tzaj ne xcaj so' cuentá, ne asa' ca'vee xcaj yuvij cuentá se vaa sí amán rá ni'yaj man Diose mé so', sese nuvi' a 'o se sa' 'yáa so' ga. Tzaj ne 'unj nihánj me se che'é se sa' 'yáa 'unj ro', che'é dan ne'en yuvij se vaa sí amán rá ni'yaj man Diose mé 'unj chuguanj.

<sup>19</sup> Dan me se cunaj 'yáa so' se vaa amán rá so' se vaa oruun Diose, tzaj ne danj 'yaj guéé nij nana chree uún, ne che'é dan chu'vi' nij so' ndaa ri'ij ma'an man nij so' che'é sayuun qui'yaj Diose man nij so' vaa güii a. <sup>20</sup> Sí ni'yón mé so', sese uun rá so' se vaa taj che'é qui'yáa so' se luj, ne nihánj me se tiháan 'unj rihaan so' se vaa sese taj se luj 'yaj ní', ne amán rma'an rá ní' ni'yaj ní' Diose nanj chuguanj. <sup>21</sup> Dan me se xii ní' sí cu'naj Abraham me se ne'en so' se vaa ca'vej so' ticavi' so' ta'ní so' sí cu'naj Isaac rihaan mesá altar go' so' man ta'ní so' rihaan Diose a. Ne che'é se vaa qui'yaj so' danj ro', che'é dan cunuú sa' so' rihaan Diose ei. <sup>22</sup> Xcaj so' cuentá se vaa che'é se cuchumán rá Abraham ni'yaj so' man Diose ro', che'é dan me guun rá so' qui'yaj so' se luj che'é Diose, ne che'é se qui'yaj so' danj ro', che'é dan ne'en ní' se vaa cuchumán nu' rá so' ni'yaj so' man Diose chuguanj. <sup>23</sup> Ne quisj ya nu' se-nana Diose nana nihánj a: "Cuchumán rá Abraham ni'yaj so' man Diose, ne che'é dan cataj Diose se vaa sij sa' me Abraham a". Ne sí chéé ga Diose me uún Abraham, taj nii uún a.

<sup>24</sup> Xcaj soj cuentá se vaa che'é se luj 'yaj ní' ro', che'é dan nuu sa' ní' rihaan Diose, ne nuveé che'e se taj ní' se vaa amán rá ní' ni'yaj ní' man Diose doj me nuu sa'

ní' rihaan Diosē ma'. <sup>25</sup> Dan me se Rahab chana niha' rá me se cunuu sa' no' rihaan Diosē gaa qui'yaj no' se luj rihaan roj síi ca'néé Diosē man ca'mii nana sa' rihaan no' a. Cunuu sa' no' rihaan Diosē che'é se luj qui'yaj no', ne dan me se ve'é racuij no' man roj síi israelita ca'anj suun chiháan no' caxrij yuve no' man roj so' rihaan nij síi guun rá ticavi' man roj so', gaa ne ca'néé no' man roj so' yo'ó chrej vaa dínj nan' roj so' tucúá roj so' a.

<sup>26</sup> Dan me se sese nuvi' nimán 'o so', ne nuveé sij vaa i'na' me so' ma'. Maan cúu cavi' uun me so', ne ase vaa xnganá nuvi' nimán rque ro', danj vaa síi taj se vaa amán rá ni'yaj man Diosē, ne nuvi' a doj se luj 'yaj so', ne taj se gún' man nana tu'va uun so' a man adonj.

**Nana nihánj taj xna'anj se vaa 'yaj chi'ij ní' man tuvi' ní', sese ne tumé ní' nana avii tu'va ní' a**

**3** Tinuj. Nocoj. Se guun gaa que'ee síi narqué chrej man soj ma'. 'Q se núj sij narqué chrej ro', ne'en soj se vaa doj a caraa Diosē cacun' xráá núj sese se cuno núj rihaan Diosē ei. <sup>2</sup> 'Q taran' ní' avii nana chi'ij tu'va nanj adonj. Tzaj ne sese vaa 'o síi ne a'mii nana chi'ij, ne so' me síi ca'vee guun nucuaj guun chij rihaan nu' nee man so' chuguanj. <sup>3</sup> Xcaj soj cuentá ni'yaj soj man cuayó á. Nda' se xij vaa cuayó, tzaj ne anu' ní' aga' le'ej nii tu'va xo', gaa ne cunq xo' rihaan ní' ca'anj xo' me rej ma'an me rá ní' chuguanj. <sup>4</sup> Ne xcaj soj cuentá ni'yaj soj man rihoo chéé rihaan na uún á. Xij vaa rihoo, ne nucuaj ndo'o o' nana rihaan rihoo, ne rcuchra' le'ej nii vaa rásuun nii tuguáj nii rihoo, tzaj ne ca'anj yo' me rej ma'an me rá nii ca'anj yo' uún ei.

<sup>5</sup> Ne ta'nga' danj vaa guée daa ní' uún, ne tzin' vaa daa ní', tzaj ne nucuaj uxrá daa ní' nanj adonj. Dan me se ne'en soj se vaa orún' ya'an le'ej nii ro', ca'vee qui'yaj yo' cacaa cunu' quij ei. <sup>6</sup> Ne ase vaa ya'an vaa nana a'mii daa ní', ne ase vaa nu' chi'ij man rihaan chumij nihánj ro', danj vaa nana a'mii daa ní', ne ndaa ri' nu' nee man ní', 'yaj daa ní' nanj adonj. Unu' ní' ga tuvi' ní', 'yaj daa ní', che'é se síi chree me síi 'yaj a'mii daa ní' nana chi'ij nanj á. <sup>7</sup> A'vee uun chij yuvij rihaan me ma'an xcuu, ne dan me se rihaan xcuu man quij do', rihaan xtâj do', rihaan xcuáá do', rihaan xcuaj do', uun chij yuvij, <sup>8</sup> tzaj ne taj se 'yá' guun chij a doj yuvij rihaan daa ma'an yuvij ma'. Avii ndo'o nana chi'ij tu'va ní', ne taj se 'yá' guun dínj tu'va ní', 'yaj daa ní' ía ma'. Ase vaa na xnaj taj tu'va xcuáá yuvaá ro', danj vaa nana chi'ij avii tu'va ní', 'yaj daa ní', ne 'yaj chi'ij yo' man tuvi' ní' chuguanj. <sup>9</sup> Dan me se tu'va ní' me avii nana luj a'mii ní' che'é Rej ní' Diosē síi 'nij ra'a man ní', ne veé daa ní' a'mii nana chree che'é tuvi' ní' uún a. Ne dan me se ase vaa Diosē ro', danj vaa nij tuvi' ní' gaa qui'yaj Diosē man taran' ní' a. <sup>10</sup> Veé tu'va ní' avii nana luj ne veé tu'va ní' avii nana chree, 'yaj daa ní', ne nij uxrá vaa 'yaj ní' danj, nanj tinuj, nocoj. <sup>11</sup> Se ca'vee cavij na chihán' ga na 'ne' rque orún' curuj na ma'. <sup>12</sup> Taj rutzij' avii raá chruun rcoo ma'. Ne rcoo ne avii raá chruun rcue'é ma'. Ne danj nanj na uún, ne se ca'vee curihánj na chihán' rej nuu na 'ne', ne taj che'é

cavij nana chi'ij tu'va ní', sese rej nuu nana sa' me nimán ní' a man adonj.

**Nana nihánj taj xna'anj me síi me síi nicaj tucúáan sa' cavii rihaan Diosē a**

<sup>13</sup> Sese vaa ta'aj soj síi acaj cuentá ne avii ndo'o raá soj, rá soj, ne ve'é inanj qui'yaj soj sij vaa danj rá rihaan tuvi' soj, ne xcaj tuvi' soj cuentá se vaa che'é se avii raá soj ro', che'é dan síi ni'yanj nimán me soj, ne che'é dan me ve'é inanj 'yaj soj a. <sup>14</sup> Tzaj ne sese xcoj ruvaá rá soj, ne sese me inanj rá soj quirij ta'nga' soj rihaan tuvi' soj, gaa ne se guun ca'mii xtá' soj cataj soj se vaa síi acaj cuentá avii raá me soj a ma'. 'Q se nuveé sij acaj cuentá me síi 'yaj danj mei. <sup>15</sup> Sese sij xcoj ruvaá rá me soj, ne nuveé sij nicaj tucúáan sa' cavii rihaan Diosē me soj a ma'. Inanj tucúáan cavii raá nij síi man rihaan yo'óo nihánj uun me tucúáan nicaj soj, ne danj inanj 'yaj yuvij che'é se nana chree uno nij yuvij nanj adonj. <sup>16</sup> Rej yanj síi xcoj ruvaá rá me se taj se qui'yá' gaa dínj ma'. Me a' se chi'ij 'yaj nij so' nanj á. <sup>17</sup> Tzaj ne síi nicaj tucúáan sa' cavii rihaan Diosē me se yo'q vaa sa' nimán so', ne che'é dan 'o chij yaán so', ne ne unu' so' ga yuvij ma'. Yo'q luj a'mii so' ga tuvi' so', ne ne naquiyaj so'q so' xréé so' gaa a'mii tuvi' so' ga so' ma'. 'Ee rá so' ni'yaj so' tuvi' so', ne inanj se sa' 'yaj so', ne yo'q cuyaán ve'é 'yaj so' rihaan nu' nij yuvij, ne 'yaj so' nu' ndaa vaa taj so' a. Ne nij síi 'yaj danj ro', me síi nicaj ya tucúáan sa' cavii rihaan Diosē chuguanj. <sup>18</sup> Dan me se síi 'yaj dínj ne yuvij ga tuvi' yuvij ro', ma'an so' me síi ne dínj ga tuvi', ne che'é dan cunuu sa' nij tuvi' so' rihaan Diosē, qui'yaj so' nanj adonj.

**Nana nihánj taj xna'anj se vaa se guun rá ní' cavij sa' ní' rihaan chumij nihánj a**

**4** Me che'é unu' ndo'o nij soj ga tuvi' soj, rá soj ga. Nuveé che'e se me ndo'o rá soj cavij sa' soj rihaan chumij nihánj, ne che'é dan na'vee gaa xej nimán soj a. Ne nuveé che'e dan unu' soj ga tuvi' soj a a. <sup>2</sup> Me ndo'o rá soj gaa rasuun sa' rihaan soj, tzaj ne ne ca'vee quirij' soj rasuun yo' cumán yo' rihaan soj a a. Dan me se che'é dan unu' xcoj ruvaá ndo'o rá soj ni'yaj soj man síi vaa rasuun rihaan adonj. Tzaj ne soj me se taj se 'yá' quirij' soj, ne che'é dan unu' soj ga tuvi' soj ei. Tzaj ne nuvi' rasuun sa' rihaan soj, che'é se ne achíin ni'yaj soj rihaan Diosē adonj. <sup>3</sup> Ne nda' se achíin ni'yaj soj rihaan Diosē, tzaj ne ne rqué Diosē nij rasuun yo' rihaan soj, che'é se chi'ij ndo'o vaa nimán soj gaa achíin ni'yaj soj rihaan Diosē ei. Dan me se me inanj rá soj cavij sa' ma'an inanj soj rihaan chumij nihánj qui'yaj nij rasuun yo' ei.

<sup>4</sup> Ne ase vaa chana otoj ga yo'ó chii ro', danj vaa soj, ne ne noco' ya soj man Diosē a ma'. Xcaj soj cuentá se vaa síi me rá cavij sa' rihaan chumij nihánj ro', so' me síi taj ri'yunj man Diosē adonj. Ya uxrá ei. <sup>5</sup> Ne xcaj soj cuentá se vaa ne tu'va rma'an nana nihánj nana a'mii danj Diosē a: "Diosē qui'yaj nimán ní', ne me uxrá rá Diosē canoco' nimán ní' man orún' so'", taj danj Diosē

a. <sup>6</sup> Ne uxrá doj 'yaj Diose se luj che'é ní', ne che'é dan no nana nihánj rihaan danj Diose a: "Aráán Diose chrej rihaan nij síf xtá' nimán se cavii sa' nij so', tzaj ne 'yaj Diose se luj che'é nij síf vaa nicá' nimán", taj danj Diose a.

<sup>7</sup> Che'é dan cunō soj rihaan Diose á. Naqui'yaj so'ō soj xrée soj rihaan síf chree, ne cunānj síf chree rihaan soj á. <sup>8</sup> Quinichrun' soj rihaan Diose, gaa ne quinichrun' Diose rihaan soj á. Nij síf tumé cacun' ro', tanáj nij so' se-tucuānj nij so' tucuáán chí'ij, ne nij síf uun vij rá canoco' man Diose ro', naqui'yaj nicá' nij so' nimán nij so' á. <sup>9</sup> Se gaa niha' rá soj ca'nga' soj mei. Vaa che'é quinano rá soj ta'vee soj che'é cacun' tumé soj ei. <sup>10</sup> Naqui'yaj nicá' soj nimán soj rihaan síf 'nij ra'a man ní', gaa ne cavii sa' soj, qui'yaj so' chuguanj.

**Nana nihánj taj xna'anj se vaa se ca'mii ní' nana nij che'é tuvi' ní' ma'**

<sup>11</sup> Se guun nana soj cuentó ne che'é tuvi' soj, man tinuj, man nocoj. Síf nanó cuentó ne do', síf araa cacun' xráá tuvi' do', so' me síf taj se vaa taj che'é cunō ní' cunudanj se-tucuānj Diose chuguanj. Ne síf a'mii danj ro', nuveé sij uno se-tucuānj Diose me so' ma'. Maan se síf naqui'yaj cyu se-tucuānj Diose me uun so' nanj ei. <sup>12</sup> Dan me se orún' Diose ya me síf cuchruj se-tucuānj Diose, ne veé orún' Diose me síf ca'ne' cacun' che'é ní' vaa güii, ne so' me síf guun nucuaj tinanii man ní' rihaan sayuun, ne veé so' me síf guun nucuaj ca'nej man ní' rihaan ya'an ei. Tzaj ne ní' me se yuvij uun me ní', ne taj che'é caraa ní' cacun' xráá tuvi' ní' ma'.

**Nana nihánj taj xna'anj se vaa ne ne'en ní' daj quiran' ní' a'yuj a**

<sup>13</sup> Ne vaa soj sij a'mii nana nihánj uún a: "Cuan' se, a'yuj se, ca'anj núj 'o chuman' cayáán núj 'o yo', ne quirāan núj rasuun natu'vee núj, ne qui'yaj canaán ndo'o núj sa'anj", taj soj, ne nihánj me se cunō soj ca'mij á. <sup>14</sup> Nij soj me se ne ne'en uxrá soj daj quiran' soj a'yuj a ma'. 'O se ase vaa ngaa ya'aan ro', danj vaa soj rihaan chumii nihánj, ne nanij ngaa ya'aan 'o orá le'ej nii, ne ra'yanj nextun' uún ngaa ya'aan yo' nanj adonj. <sup>15</sup> Che'é dan no xcúún soj catāj soj: "Sese me rá síf 'nij ra'a man ní', ne ca'vee gaa i'na' ní', ne ca'vee qui'yaj suun ní' á", catāj soj á. <sup>16</sup> Tzaj ne soj me se a'mii xtá' ndo'o soj rihaan Diose, ne chí'ij ndo'o vaa nu' nana xtá' a'mii soj adonj. <sup>17</sup> Tzaj ne sese ne'en ní' daj me rá Diose qui'yaj ní', ne ne 'yaj ní' ndaa vaa me rá Diose qui'yaj ní', gaa ne guun ní' síf tumé ndo'o cacun' nanj adonj.

**Nana nihánj taj xna'anj se vaa quiran' ndo'o nij ru'vee sayuun a**

<sup>5</sup> Ne soj sij ru'vee me se yaj me se quene'en soj ei. Ta'vee uxrá soj che'é sayuun quiran' soj vaa güii chuguanj. <sup>2</sup> Ne rihaan Diose me se ase vaa se cuchruj vaa nu' si'yaj soj, ne ase vaa yatzij navij chá xcuu vaa

nu' sagan' soj, <sup>3</sup> ne ase vaa aga' navij qui'yaj tucunj yoo ro', danj vaa nu' se-sa'anj soj, ne tucunj yoo yo' ro', ni'yaj Diose, ne xcāj Diose cuentá se vaa síf yanu' me soj rihaan síf nique, ne che'é dan cacaa ma'an soj, qui'yaj tucunj yoo yo' adonj. Dan me se uxrá caraa sa' soj sa'anj rihaan chumii nihánj, tzaj ne nichrun' ca'anj ni'ya chumii nihánj nanj adonj. <sup>4</sup> Dan me se acāj ndo'o Diose cuentá se vaa ne naru'vee sa' soj tu'vee se-mozó soj síf rii xnaa soj a. Ne aguáj ndo'o nij mozó yo' rihaan Diose che'é se-sa'anj nij so' chuguanj. Ne catúj se-na-na nij so' xrée Diose sij uun chij ndo'o rej xtá' nanj ei. <sup>5</sup> Ne dan me se uun niha' uxrá rá soj rihaan chumii nihánj, ne inanj rasuun sa' uxrá mán rihaan soj, ne ase vaa xcáá namij ro', danj vaa soj, ne ne acāj soj cuentá se vaa nichrun' ca'na' sayuun rihaan soj a ma'. <sup>6</sup> Tzaj ne dan me se cuta' ndo'o soj cacun' xráá nij síf sa', ne ndaa ticavi' soj man ta'aj tuvi' nij so', ne ca'ne' sa' guee rá nij so' cavii tuvi' nij so', qui'yaj soj a.

**Nana nihánj taj xna'anj se vaa gaa inaj nimán ní' cachinj ni'yaj ní' rihaan Diose a**

<sup>7</sup> Che'é dan gaa inaj nimán soj na'vij soj ndaa se quisij güii ca'na' uún síf 'nij ra'a man ní', tinuj, nocoj. Xcāj soj cuentá daj 'yaj síf unō naa ei. Naj vaa nimán so' na'vij so' maan che'é rej cachij sa' ve'é xnaa so', gaa ne quirii so' tan' adonj. <sup>8</sup> Danj qui'yaj guee soj, ne gaa inaj nimán soj, ne ca'nej nucuaj soj nimán soj, che'é se nichrun' ca'na' síf 'nij ra'a man ní' ei. <sup>9</sup> Se ca'mii soj nana nij che'é tuvi' soj, ne se gaa nanj quitaj cacun' xráá ma'an soj, man tinuj, man nocoj. 'O se aj nicun' chruun síf ca'ne' cacun' che'é ní' rej ta'yaa ei. <sup>10</sup> Xcāj soj cuentá, ni'yaj soj nij síf nata' se-nana Diose gaa naa se vaa nucuaj nimán nij so' rihaan sayuun, ne ase vaa qui'yaj nij so' ro', danj gaa qui'yaj soj ei. <sup>11</sup> Ne uxrá cavii sa' nij síf nucuaj nimán rihaan sayuun, rá ní', ni'yaj ní' man nij so', ne aj cuno soj se vaa nucuaj nimán síf cu'naj Job rihaan sayuun gaa naa, ne aj ne'en soj se vaa avii sa' nu' nij síf vaa danj, 'yaj síf 'nij ra'a man ní', che'é se 'ee uxrá rá so' ni'yaj so' man ní' chuguanj.

<sup>12</sup> Dan me se nana nihánj me nana nocoj doj rihaan nu' nij nana, tinuj, nocoj. Se cuta' soj raā Diose ca'mii soj mei. Se catāj soj chumanj yo'óo man soj, sese se ca'mii ya soj mei. Ne me ma'an yo'óo rasuun, ne se ca'mii soj danj che'é ma'. Sese ca'vee qui'yaj soj, rá soj, ne: "Ca'vee ei", catāj uun soj, ne sese se ca'vee qui'yaj soj, rá soj, ne: "Se ca'vee ma", catāj uun soj, gaa ne se cuta' Diose cacun' xráá soj man chuguanj.

<sup>13</sup> Sese vaa 'o tuvi' soj ran' sayuun, ne cachinj ni'yaj so' rihaan Diose á. Sese vaa 'o tuvi' soj niha' rá, ne cachraā so' chra' rihaan Diose á. <sup>14</sup> Sese vaa 'o tuvi' soj ran', ne nacunj so' man nij síf chij nicāj yu'unj man nij síf noco' man Jesucristó ca'na' nij so', ne catā' tu'va nij so' se-chuvii síf 'nij ra'a man ní', ne cutāā nij so' casté raā síf ran', ne cachinj ni'yaj nij síf chij yo' rihaan Diose che'é síf ran' a. <sup>15</sup> Sese ya amán rá nij síf achíín ni'yaj rihaan Diose se vaa račuúj Diose man síf ran', ne nahuun síf ran' yo', qui'yaj síf 'nij ra'a man ní', ne sese tumé síf

ran' yo' cacun', ne quinavij cacun' xráá so' a. <sup>16</sup> Che'é dan ndaa 'o 'o ní' nata' ya rihaan tinúú ní' che'é cacun' tumé ní', ne ndaa 'o 'o ní' cachinj ni'yaj rihaan Diose che'é tuvi' ní', gaa ne nahuun ní', qui'yaj Diose a. Sese vaa 'o sí' vaa nicā ya nimán achíin ni'yaj uxrá rihaan Diose, ne cunō ya Diose, ne qui'yaj Diose ndaa vaa cachíin ni'yaj so' ei. <sup>17</sup> Nānj yuvij me sí' cu'naj Elías sí' cayáan gaa naá, ne ase vaa ma'an ní' vaa so', tzaj ne cachíin ni'yaj so' rihaan Diose se vaa se caman', ne quisij ndaa va'nuj ya yo' táá yanéé ne caman' qui'yaj so', qui'yaj Diose gaa cachíin ni'yaj so' rihaan Diose ei.

<sup>18</sup> Ndaa síj, gaa ne cachíin ni'yaj uún so' maan rihaan Diose, gaa ne caman' uún, qui'yaj Diose, gaa ne cavii sa' naa a.

<sup>19</sup> Cunō soj ca'mij, tinuj, nocoj. Sese tanáj xco 'o tuvi' soj se-tucuanj Diose tucuáan ya, ne sese guun nucuaj yo'ó tuvi' soj qui'yaj canaán so' canicaj uún sí' ca'anj yanij yo' canoco' so' tucuáan sa', <sup>20</sup> ne dan me se sí' qui'yaj canaán yo' me se so' me sí' tinanii man tuvi' rihaan sayuun adonj. Ne guun nucuaj so' tinanii so' man nimán tuvi' so' rihaan sayuun ei. Dan me se ca'néj noco ndo'o so' cacun' xráá tuvi' so' adonj.

# 1 Pedro

**1** 'Unj ro', me síí cu'naj Pedró, ne apóstol cune' Jesucristó ca'anj nata' rihaan yuvii che'é so' mej a. Ne qui'yáá 'unj yanj nihánj ca'nej 'unj rihaan soj sij narii Dioso man canoco' man so' sij cha'nuu ca'anj estadó Ponto do', estadó Galacia do', estadó Capadocia do', estadó Asia do', estadó Bitinia do', che'é sayuun quiran' soj a. <sup>2</sup> Asij naá quene'en Rej ní' Dioso se vaa canoco' soj man so', ne che'é dan quinarií so' man soj, gaa ne guun che'e soj canoco' soj man orún' Dioso, qui'yaj Nimán Dioso, che'é se me rá so' cunq soj rihaan so', ne me rá so' cunuu sa' nimán soj qui'yaj ton man Jesucristó ton cayanj man so' gaa cavi' so' che'é ní' a.

Me rá 'unj qui'yaj ndo'o Dioso se luj che'é soj, ne gaa xej ndo'o nimán soj qui'yaj Dioso a.

**Nana nihánj taj xna'anj se vaa na'vij ní' güii cayáán ní' rihaan Dioso a**

<sup>3</sup> Cunaj uxrá vaa Dioso Rej Jesucristó sij 'nij ra'a man ní', cataj ní' á. Dan me se cunuu 'ee uxrá rá so' ni'yaj so' man ní', ne che'é dan naqui'yaj i'na' so' man Jesucristó, ne che'é se cunuu i'na' uún Jesucristó ro', che'é dan guun ta'nij Dioso man ní', ne che'é se ta'nij Dioso me ní', che'é dan guun niha' rá ní' ne na'vij ní' quisij güii cayáán ní' rihaan Dioso nu' cavii nu' ca'anj ei. <sup>4</sup> Ne dan me se vaa se sa' nicaj Dioso rque Dioso man soj asa' nucuí' soj rihaan so', ne daj chihaa mij se quiri' se sa' yo', ne yo' o gaa sa' yo' nu' cavii nu' ca'anj nanj adonj. <sup>5</sup> Nucuaj ndo'o Dioso, ne che'é se amán rá soj ni'yaj soj man Jesucristó, che'é dan tumé Dioso man soj, che'é rej ca'vee cavii sa' soj asa' quisij güii ca'anj ni'ya chumii nihánj ne quene'en ní' nu' se vaa qui'yaj so' che'é ní' ei.

<sup>6</sup> Che'é dan guun niha' uxrá rá soj nanj á. Dan me se nda' se cuano nanó rá soj che'é sayuun 'na' rihaan soj doj güii nanj rihaan chumii nihánj cuano, tzaj ne aj guun niha' ndo'o rá soj, che'é se ne'en soj se vaa cavii sa' soj vaa güii, qui'yaj Dioso chuguaj. <sup>7</sup> Dan me se ne'en soj se vaa aga' oró míí me se se man yun rihaan chumii nihánj me yo', ne vaa güii ca'anj ni'ya yo' ga chumii nihánj, tzaj ne axrij ya'an nii man aga' oró míí yo', che'é rej me rá nii xcaj nii cuentá sese aga' sa' me yo' ni', ase aga' nij me yo' a. Ne ase vaa ya'an rihaan aga' oró míí yo' ro', danj vaa sayuun rihaan soj, ne che'é sayuun ran' soj ro', che'é dan acaj ní' cuentá sese ya ya amán rá soj ni'yaj soj man Dioso ni', ase 'yaj ma'an soj a. Tzaj ne sa' doj vaa soj rihaan aga' oró míí yo', ne daj chihaa mij se ca'anj ni'ya soj, sese amán ya rá soj

ni'yaj soj man Dioso mei. Dan me se uxrá cavii sa' Dioso, qui'yaj soj, ne uxrá ca'mii sa' yuvii che'é Dioso, asa' ca'na' uún Jesucristó rihaan chumii nihánj chuguaj.

<sup>8</sup> Ne Jesucristó me se nda' se ne quene'en rihaan soj man so', tzaj ne amán rá soj ni'yaj soj man so', ne ne'en xa' rihaan soj man so' nihánj cuano, tzaj ne che'é se cuchumán ya rá soj ni'yaj soj man so' ro', che'é dan guun niha' uxrá rá soj che'é se aj ne'en soj se vaa cavii sa' uxrá soj adonj. <sup>9</sup> Ne che'é se amán rá soj ni'yaj soj man Dioso ro', che'é dan cavii sa' nimán soj rihaan so' ei.

<sup>10</sup> Dan me se nij síí nata' se-nana Dioso gaa naá ro', nata' nij so' che'é se luj qui'yaj Dioso che'é soj, ne guun ndo'o rá nij so' xcaj nij so' cuentá daj gaa cavii sa' yuvii qui'yaj Dioso, ne naqui'yaj cuu nij so' cúu yave nij so' che'é nu' nij rasuyun sa' chuguaj. <sup>11</sup> Dan me se naqui'yaj cuu uxrá ya nij so' aman ca'na' síí ca'nej Dioso rihaan chumii a. 'O se nicaj yu'unj Nimán Jesucristó man nij so', ne ma'an Nimán Jesucristó cataj xna'anj rihaan nij so' daj quiran' ma'an Jesucristó asa' ca'na' so' do', che'é suun sa' cata' so' asa' quisij quiran' so' sayuun do' a. <sup>12</sup> Dan me se cataj xna'anj Dioso rihaan nij so' se vaa nuveé ma'an nij so' me nij síí quene'en ca'na' síí ca'nej Dioso ma'. Tananj nu' nij soj me nij síí quene'en man síí ca'nej Dioso, asa' ca'na' so', taj Dioso rihaan nij síí nata' se-nana Dioso gaa naá yo' a. Ne nihánj me se nij síí nata' se-nana Dioso nana sa' yo' yaj ro', ca'née Dioso Nimán Dioso rihaan nij so', ne aj nata' nij so' nu' se vaa qui'yaj Jesucristó síí ca'née Dioso rihaan chumii nihánj cuno soj a. Ne ndaa nij se-mozó Dioso síí yanj xta' me rá quene'en daj gaa cavii sa' ní' qui'yaj Jesucristó ei.

**Nana nihánj taj xna'anj se vaa nacúún Dioso man ní' guun ní' síí sa' inanj rihaan so' a**

<sup>13</sup> Che'é dan 'o ca'nej nimán soj qui'yaj soj ndaa vaa me rá Dioso ei. Gaa chij rá soj ga tuvi' soj, ne yo' o gaa nucuaj rá soj man Dioso se vaa qui'yaj ndo'o so' se luj che'é soj asa' ca'na' uún Jesucristó rihaan chumii nihánj ei. <sup>14</sup> Dan me se guun soj síí uno sa' rihaan Dioso ei. Gaa naá me se ne quene'en soj daj vaa Dioso, ne inanj guun rá soj qui'yaj soj se nij, tzaj ne yaj me se se guun qui'yaj uún soj danj mei. <sup>15</sup> Tananj che'é se síí sa' inanj me Dioso síí nacúún man soj canoco' soj, che'é dan ma'an soj ro', no xcuún guun síí sa' ei. <sup>16</sup> Che'é dan no nana nihánj rihaan danj Dioso a: "Síí sa' inanj

mé 'un̄j, ne che'é dan guun soj síi sa' in̄anj uún á", taj Diose rihaan nij síi canoco' man so' gaa naá a.

<sup>17</sup> Diose ro', me síi nicā in̄anj a'ne' cacun' che'é 'o 'o ní' ndāa vaa 'yaj 'o 'o ní', ne che'é se: "Ataj chij", taj soj rihaan Diose gaa achíin ni'yaj soj rihaan so' ro', che'é dan 'o carāā cochroj soj rihaan so' doj nij güii cayáán soj rihaan yo'óo nihánj á. <sup>18</sup> Aj ne'en soj daj qui'yaj Diose gaa tinanii so' man soj rihaan tucuáán nij rma'ān canoco' nij xij soj síi cumán gaa naá, ne nuveé sa'anj me se go' Diose gaa tinanii so' man soj ma'. Sa'anj me se se navij uun me yo' ei. <sup>19</sup> Tzaj ne ca'née Diose man Jesucristó cavi' ya so' cayanj ton man so' che'é ní', ne ase vaa avi' matzinj le'ej sa' in̄anj 'yaj nij síi israelitá che'é cacun' tumé nij so' ro', danj vaa cavi' Jesucristó che'é ní', ne so' me se vaa yu'vee ndo'o nó so' che'é se taj cacun' tumé so' man chuguānj. <sup>20</sup> Dan me se asij ataa qui'yaj Diose chumij, ne aj ne'en Diose se vaa cavi' Jesucristó che'é ní', ne cuano gaa nichrun' quinavij chumij nihánj me se curuvi' Jesucristó rihaan chumij nihánj che'é ma'ān nij soj ei. <sup>21</sup> Ne che'é se vaa qui'yaj Jesucristó che'é soj ro', che'é dan amán rá soj ni'yaj soj man Diose síi naqui'yaj i'na' man Jesucristó, ne cune' Diose man so' se vaa guun chij so' a. Ne che'é se danj qui'yaj Diose ro', che'é dan amán rá soj ni'yaj soj man Diose, ne na'vij soj quisij güii cavi' sa' ndo'o soj qui'yaj so' a.

<sup>22</sup> Dan me se uno soj se-nānā Diose nānā ya, ne che'é dan cunuu sa' nimán soj, ne che'é dan nō xcúún soj gaa 'ee rá soj man tuvi' soj adōnj. Se cataj rma'ān soj se vaa 'ee rá soj man tuvi' soj ma'. Ya gaa 'ee ndo'o rá soj man tuvi' soj ei. <sup>23</sup> 'O se cunuu i'na' nimán soj, qui'yaj se-nānā Diose, ne nuveé se cavi' me se-nānā Diose ma'. Tananj ase vaa 'o rasuun vaa i'na' vaa se-nānā Diose, ne daj chihāā mǐj se ca'anj ni'ya yo' mei. <sup>24</sup> Che'é dan nó nānā nihánj rihaan danj Diose a: "Ase vaa coj chrin' man tacaan ro', danj vaa taran' ní', ne ase vaa yā taj raā coj ro', danj vaa suun sa' 'yaj ní' a. Daj se vaa nacoō coj ne navij yā ayuu ro', danj vaa ní' navij ní' a. <sup>25</sup> Tzaj ne daj chihāā mǐj se navij se-nānā síi 'nij ra'a man ní' ma'". Danj taj nānā nō rihaan danj Diose, ne se-nānā Diose yo' me nānā sa' nata' núj rihaan soj adōnj.

**2** Che'é dan ca'ne' rá soj ga suun noco' tucuáán chi'ij ei. Se nachri' soj ni'yaj soj nu' tuvi' soj mei. Se tiha' yu'unj soj man tuvi' soj mei. 'O ndāa taj soj ro', veé danj qui'yaj guee soj ei. Se guun xcoj ruvāā rá soj ni'yaj soj tuvi' soj mei. Se nanó soj cuentó ne che'é tuvi' soj ma'. <sup>2</sup> Ase vaa me ndo'o rá leé nō cutziji leé nō too ro', danj guun ndo'o rá soj tycu'yón soj se-nānā Diose nānā ya, ne ase vaa racuǐj too man leé nō achij leé nō ro', danj gaa racuǐj se-nānā Diose man soj cunuu sca' nimán soj chuguānj. Dan, gaa ne cavi' sa' ndo'o soj, qui'yaj Diose ei. <sup>3</sup> 'O se aj ne'en soj se vaa ve'é ndo'o 'yaj síi 'nij ra'a man ní' che'é ní' adōnj.

**Nanā nihánj taj xna'anj se vaa ase vaa yuvej sa' vaa Jesucristó a**

<sup>4</sup> Ca'na' soj rihaan Jesucristó ei. Ase vaa 'o yuvej xij sa' uchruj nii asino yaān tacóo ve' gaa nachráj nii ve' ro', danj vaa so', tzaj ne nij síi man rihaan chumij nihánj me se nachri' nij so' ni'yaj nij so' yuvej yo', tzaj ne síi sa' ndo'o narii Diose me so' nanj adōnj. <sup>5</sup> Ne ase vaa nij yuvej le'ej nii nata' xráá yuvej xij ro', danj vaa taran' soj, sese canoco' raan soj man Jesucristó, ne ve'é cumān rcua'āān soj, qui'yaj Jesucristó, gaa ne cunuu sa' nimán soj, gaa ne ase vaa xrej ro', danj gaa soj rihaan Diose, ne ase vaa se sa' nago' nij xrej rihaan Diose ro', danj gaa se sa' qui'yaj soj che'é se me soj síi noco' man Jesucristó, gaa ne carān' rá Diose se vaa 'yaj soj ei.

<sup>6</sup> Che'é dan nó nanā nihánj rihaan danj Diose a: "Ni'yaj so' ei. Aj cuné' 'un̄j yo' o yuvij chuman' Jerusalén naj rej cu'naj Sion, ne ase vaa 'o yuvej vaa so', nucuaj ndo'o so' chuguānj. Sij sa' ndo'o me so', ne quinarii 'un̄j man so', ne ase vaa yuvej xij une' yuvij tacóo ve' ro', danj gaa so', ne sese cuchumān rá yo' o so' quene'en so' man síi cuné' 'un̄j, ne se guun na'aj so' ma'. Tananj cavi' sa' ndo'o so' adōnj". Danj cataj Diose, ca'mii so' che'é Jesucristó gaa naá a. <sup>7</sup> Vaa yu'vee ndo'o nó Jesucristó rihaan soj sij amán rá ni'yaj man so', tzaj ne xa' nij síi ne amán rá ni'yaj man Jesucristó me se quisij ya ndāa vaa taj nanā nihánj nānā nō rihaan danj Diose adōnj: "Yuvej quiri'ij nij síi cune' ve' ro', guun yuvej sa' doj rihaan taran' nij yuvej naj tacóo ve' yo' nanj adōnj", taj danj Diose a. <sup>8</sup> Ne: "Naxru' yuvij, qui'yaj yuvej yo', ne guun na'aj nij yuvij gaa quene'en nij yuvij man so'", taj yo' o nānā nō rihaan danj Diose a. Ne nij síi ne amán rá ni'yaj man Jesucristó me se che'é se ne cunō nij so' se-nānā Diose ro', che'é dan naxru' nij so' ne quirǐ' nij so' a. Dan me se ca'née ra'a Diose man nij so' quirān' nij so' danj nanj ei.

**Nanā nihánj taj xna'anj se vaa narii Diose man ní' sij noco' man Jesucristó a**

<sup>9</sup> Xa' soj, tzaj ne sij narii Diose me soj, ne xrej uun chij ya nuu rihaan Diose me soj, ne sij cunuu sa' nimán me soj, ne yuvij man chuman' nocoō sa' ndo'o ya uun chij Diose rihaan me soj, ne che'é se me rá Diose nata' soj che'é se sa' qui'yaj so' ro', che'é dan narii so' man soj ei. Dan me se sij noco' tucuáán rmi' me soj gaa naá, tzaj ne canacúún Diose man soj xcaj soj cuentá, ne cunāj uxrá vaa se-tucuānj Diose tucuáán noco' soj cuano ei. <sup>10</sup> Dan me se gaa naá me se nuveé yuvij 'nij ra'a Diose me soj, ne ne gaa 'ee rá Diose ni'yaj Diose man soj ma'. Tzaj ne yaj me se cunuu 'ee rá so' ni'yaj so' man soj, ne guun soj síi chéé ga ma'ān Diose, ne 'nij ra'a Diose man soj ei.



**Nana nihánj taj xna'anj se vaa qui'yaj suun ní rihaan  
Diose á**

<sup>11</sup> Dan me se 'eē ndo'o raj man soj, ne qui'yaj soj se ndo'o uxrá, ne cunō soj ei. Nuveé chihanj ní me chumij man ní cuano, man tinuj, man nocoj. Ase vaa 'o sí aran' me ma'an rej ro', danj vaa ní rihaan chumij nihánj cuano ei. Che'é dan se guun qui'yaj soj rasuun chi'ij me rá neē man soj qui'yaj soj ma'. 'O se unu' se chi'ij yo' ga nimán ní adonj. <sup>12</sup> Ne ve'é inanj qui'yaj soj rej ne soj sca'núj nij sí chi'ij man rihaan chumij nihánj, gaa ne sese guun rá nij so' cuta' nij so' cacun' rmi' xráá soj se vaa nij 'yaj soj, gaa ne xcaj nij so' cuentá se vaa ve'é inanj 'yaj soj ei. Gaa ne güii cuchí' Diose rihaan nij so' me se cataj nij so' se vaa sa' uxrá vaa Diose chuguanj.

<sup>13</sup> Che'é se sij noco' man sí 'nij ra'a man ní' me soj ro', che'é dan cunō soj rihaan taran' nij sí nicaj suun ei. Dan me se cunō soj rihaan sí nicaj suun nocōo emperador, che'é se sij uun chij doj me so' ei. <sup>14</sup> Ne dan me se cunō soj rihaan yo'ó nij sí nicaj suun gobernador noco' do' nij uún, che'é se sij a'ne' suun sí nicaj suun emperador rihaan me nij so', ne nō xcúún nij so' qui'yaj nij so' sayuun man nij sí chi'ij do', ca'mii sa' nij so' che'é nij sí sa' do' chuguanj. <sup>15</sup> Ne me rá Diose qui'yaj ní se sa', gaa ne cunū dínj tu'va nij sí ne acaj cuentá sí tu'va rma'an nana nij che'é Jesucristó chuguanj. <sup>16</sup> Ne'en ní se vaa sij chéé uun me ní, tzaj ne se guun cataj ní se vaa che'é dan me ca'vee qui'yaj ní me ma'an se chi'ij ma'. Tananj guun ní sí 'yaj suun rihaan Diose ei. <sup>17</sup> Dan me se ve'é ca'mii soj ga daj a yuvij, ne gaa 'eē rá soj man nu' nij sí amán rá ni'yaj man Jesucristó, ne cunō soj rihaan Diose, ne ve'é carā cochroj soj rihaan sí nicaj suun emperador ei.

**Nana nihánj taj xna'anj se vaa ase vaa ca'ne' sa' guee  
rá Jesucristó gaa quiran' so' sayuun ro', danj gaa  
qui'yaj ní a**

<sup>18</sup> Ve'é cunō soj rihaan se-ru'vee soj sij uun mozó á. Nuveé inanj rihaan nij ru'vee sa' ru'vee ni'yanj a'mii cunō soj ma'. Veé danj cunō uún soj rihaan nij ru'vee nij 'yaj do' uún nanj ei. <sup>19</sup> Ne sese quiran' ta'aj soj sayuun qui'yaj se-ru'vee ta'aj soj ru'vee chi'ij, che'é se ma'an se sij noco' man Diose me sí ran' sayuun yo', ne sese a'ne' sa' guee rá sí ran' sayuun yo' ga suun tucúá rihaan ru'vee, gaa ne cunaj uxrá 'yaj so' ni'yaj Diose adonj.

<sup>20</sup> Dan me se sí tumé ya cacun' ro', vaa che'é cayuun so', ne nda' se ca'vee ca'ne' guee rá so' ayuun so' do', ran' so' sayuun do', tzaj ne se cataj ní se vaa cunaj 'yaj so' ran' so' sayuun a ma'. Ma'an che'é cacun' tumé so' me ayuun so' nanj á. Tzaj ne sí inanj se sa' 'yaj me se sese ca'ne' sa' guee rá so' quiran' cachrij so' sayuun che'é Diose, ne cunaj uxrá qui'yaj so' nanj á. 'O se Diose ro', me sí naru'vee nu' sayuun quiran' so' che'é so' nanj adonj. <sup>21</sup> 'O se canacúún Diose man ní canoco' ní man so' ne quiran' ní sayuun adonj. Tananj

Jesucristó, tzaj ne quiran' so' sayuun che'é ní, ne ca'ne' sa' guee rá so' gaa quiran' so' danj adonj. Dan me se nda' rá se vaa ca'ne' rá Jesucristó gaa quiran' so' sayuun che'é ní ro', danj gaa guee ca'ne' rá ní quiran' ní sayuun, rá so' ei. <sup>22</sup> Ne Jesucristó me se a 'ó nana ne do', a 'ó cacun' do', ne nari' ní tu'va so' mei. <sup>23</sup> Ca'mii chree yuvij che'é so', tzaj ne ne ca'mii chree so' che'é nij yuvij ma'. Quiran' so' sayuun, tzaj ne ne ca'mii so' nana quij ma'. Tananj guun rá so' se vaa Diose sí a'ne' nica cacun' che'é ní ro', so' me sí ca'ne' cacun' che'é so' vaa güii a. <sup>24</sup> Cacun' tumé ní ro', nata' xráá Jesucristó gaa cavi' so' rihaan rcutze, che'é rej ca'ne' rá ní ga suun 'yaj cacun' ne inanj tucúáan sa' canoco' ní a. Ne che'é se go' nii xráá so' ro', che'é dan nahuun sa' nimán soj a.

<sup>25</sup> Dan me se ase vaa matzinj cha'nuu rco' ro', vaa soj gaa naá, ne ne canoco' soj man Diose gaa naá, tzaj ne yaj ro', canicaj nimán soj, ne guun che'e soj canoco' soj man Jesucristó, ne ase vaa sí ve'é ndo'o tumé daán matzinj ro', danj vaa so' ga soj cuano, ne ve'é nicaj yu'unj so' man soj cuano ei. Dan me se so' me sí uun chij rihaan nimán soj cuano chuguanj.

**Nana nihánj taj xna'anj daj qui'yaj yuvij ga nica yuvij a**

**3** Ase vaa nō xcúún mozó cunō mozó rihaan se-ru'vee mozó ro', danj vaa nō xcúún soj chana cunō soj rihaan nica soj á. Gaa ne ca'vee se na'vej rá nica ta'aj soj cunō nij so' se-nana Diose, tzaj ne che'é se ve'é ndo'o 'yaj soj rihaan nica soj ro', che'é dan guun rá nica soj canoco' nij so' man Diose ga soj chuguanj. Dan me se ca'vee se se guun rá nica soj ca'mii natáj soj rihaan nij so', tzaj ne che'é se ve'é ndo'o 'yaj ma'an soj, che'é dan guun rá nica soj canoco' nij so' man Diose ei. <sup>2</sup> Dan me se xcaj nij so' cuentá se vaa chana aráj cochroj rihaan nica me soj, ne nuveé chana niha' rá me soj a. <sup>3</sup> Se caraya'anj ndo'o soj chana che'é rej niquee sa' soj ma'. Se nanó rá soj che'é rej daj gaa yuvé raá soj do', che'é caquií canoco' xréé soj do', che'é ticuu cunuú chihá soj do', che'é yatzij tu'vee cunuú soj do' ma'. Se guun rá soj se vaa ve'é gaa soj qui'yaj rasuun danj ma'. <sup>4</sup> Dan me se xcaj soj cuentá che'é nimán ma'an soj che'é rej gaa sa' nimán soj á. 'O se ve'é gaa nimán soj, ne dínj gaa nimán soj, ne nimán soj me se daj chihaa mij se quiri' yo' ma'. Ne ve'é gaa soj, gaa ne caran' rá Diose ni'yaj Diose man soj adonj. <sup>5</sup> Danj qui'yaj nij chana canoco' man Diose cumán gaa naá, ne nucuaj rá nij no' man Diose, ne ve'é cuno nij no' rihaan nica nij no', che'é rej ve'é gaa nij no' a. <sup>6</sup> Ne danj qui'yaj chana cu'naj Sará, ne ve'é cuno no' rihaan nica no' sí cu'naj Abraham, ne: "Sí chij", cataj no' ni'yaj no' man so' a. Dan me se sese sa' inanj qui'yaj soj, ne sese a 'ó xco' se cuchu'vi' soj, gaa ne guun soj ta'nij si'nō ní cu'naj Sará uún chuguanj.

<sup>7</sup> Ne tananj soj sno'o uún, ne xcaj soj cuentá me se achiin man nica soj, ne ve'é cayáán soj ga no' ei. Xcaj soj cuentá se vaa nucuaj soj doj rihaan no', ne che'é dan ve'é qui'yaj soj ga no' á. Ne xcaj soj cuentá se vaa

'o cayaan cayáan chana rihaan Dioso nu' cavii nu' ca'anj a. Sese ve'é qui'yaj soj, ne se guun vij rá soj gaa achíin ni'yaj soj rihaan Dioso ma'.

**Nana nihánj taj xna'anj se vaa nda' se quirán' nij síf 'yaj se sa' sayuun cuano, tzaj ne vaa güii cavii sa' uxrá nij so' a**

<sup>8</sup> Daj yo'ó nana cataj xna'anj 'unj rihaan soj, ne dan me se cayaan gaa nimán taran' soj ga tuvi' soj, ne dan me se ase 'ee rá soj tinúu a'ngaa soj ro', danj gaa 'ee rá soj man tuvi' soj yo'ó nij síf amán rá ni'yaj man Jesucristó á. Raquíj soj man nij síf ran' sayuun, ne gaa nica' nimán soj ei. <sup>9</sup> Ca'vee se qui'yaj chi'ii yuvij man soj, tzaj ne se qui'yaj chi'ii soj man nij yuvii ma'. Ca'vee se ca'mii chree yuvii che'é soj, tzaj ne se ca'mii chree soj che'é nij yuvii ma'. Tananj ve'é ca'mii soj ga nij yuvii ei. 'Q se canacúun Dioso man soj, che'é rej qui'yaj soj danj, gaa ne ca'vee ca'mii luj Dioso che'é ma'an soj chuguanj. <sup>10</sup> 'Q se nana nihánj nó rihaan danj Dioso, taj yo' se vaa: "Sese me rá yo'ó so' guun niha' rá so' cayáan so', ne sese me rá so' cavii sa' so', ne se ca'mii so' nana nij se ca'mii so' nana ne se ca'mii so' nana chree do' ma'. <sup>11</sup> Naxuun so' man so' rihaan suun chi'ii, ne inanj se sa' qui'yaj so' á. Dan me se nana' ndo'o so' rej ca'vee cayáan dínj so' ga tuvi' so', ne yo'ó canoco' so' man chrej dínj yo' a. <sup>12</sup> 'Q se ni'yaj ndo'o Dioso daj ran' nij síf vaa sa', ne nanó xrej Dioso nu' nana achíin ni'yaj nij so' rihaan so', tzaj ne taj ri'yunj Dioso ni'yaj Dioso man nij síf 'yaj chi'ii a", taj nana no rihaan danj Dioso a.

<sup>13</sup> Ne se guun rá yuvii qui'yaj chi'ii yuvii man soj, sese sij niha' rá qui'yaj sa' me soj ma'. <sup>14</sup> Tzaj ne ca'vee se quirán' soj sayuun che'é se sij vaa sa' inanj me soj, tzaj ne vaa che'é guun niha' rá soj chuguanj. 'Q se vaa güii cavii sa' soj adonj. Che'é dan se nanó rá soj, ne se cuchu'vi' soj che'é se vaa qui'yaj yuvii man soj ma'. <sup>15</sup> Caraa cochroj soj ni'yaj soj man Jesucristó sij 'nij ra'a man ní' ei. Xcaj soj cuentá daj gaa ca'mii soj ga me ma'an síf xná'anj man soj me che'é me guun rá soj se vaa cavii sa' soj qui'yaj Dioso vaa güii a. <sup>16</sup> Ve'é nata' soj rihaan nij síf xná'anj man soj, ne se naqui'yaj xta' soj nimán soj asa' nata' soj se-nana Dioso ma'. A 'ó xco' se qui'yaj soj cacun' ma'. Gaa ne nij síf nachri' ni'yaj man soj sij noco' man Jesucristó che'é se ve'é inanj 'yaj soj me se guun na'aj nij so' che'é nana quij tu'va ma'an nij so' adonj. <sup>17</sup> Ne sese ca'vej rá Dioso ne sese quirán' ní' sayuun che'é se qui'yaj sa' ní', ne cunaj quirán' ní' sayuun ei. Tzaj ne sese maan che'é se qui'yaj ní' cacun' ne quirán' ní' sayuun, ne nij uxrá vaa quirán' ní' sayuun gaa ei.

<sup>18</sup> Tzaj ne Jesucristó me se nda' se taj cacun' tumé so', tzaj ne gaa cachéé so' rihaan chumii nihánj, ne quirán' ndo'o so' sayuun che'é cacun' tumé ní' sij tumé cacun', che'é rej ca'vee nucui' ní' rihaan Dioso chuguanj. Dan me se cavi' maan nee man Jesucristó, tzaj ne cunuu i'na' nimán so' adonj. <sup>19</sup> Gaa ne ca'anj so' ca'mii natáj so' rihaan nij nana chree 'nij taga' rmi' a. <sup>20</sup> Ne nij nana chree me se ne ca'vej rá nij so' cunó

nij so' rihaan Dioso gaa naá gaa cayáan síf cu'naj Noé adonj. Dan me se Noé me se 'yaj so' rihoo ne a'mii natáj so' se-nana Dioso se vaa caman' uxrá, tzaj ne ne cuchuman rá nij yuvii ma'. Tzaj ne caráj x'naa Dioso che'é nij yuvii, ne na'vij ndo'o Dioso canicaj nimán nij so', tzaj ne ne canicaj nimán nij so', ne canó xráá nij so' gaa ca'na' na ya'anj a. Ne daj yo'ó tunj guée yuvii catúj rque rihoo, ne quinanii nij so' rihaan na ya'anj, qui'yaj na yo' nanej adonj. <sup>21</sup> Ne veé na me se 'yaj nanii ní' rihaan sayuun yo' yaj ei. Na ata' ne ní' me yo' chuguanj. Nuveé che'e rej guun rá ní' güej nacaj xráá ní' cata' ne ní' ma'. Che'é rej cataj ní' rihaan Dioso se vaa guun rá ní' se vaa navij chrej chi'ii uun chij nimán ní' ne inanj se sa' guun rá ní' qui'yaj ní' rej rihaan ní' me se che'é dan cata' ne ní' adonj. Ne inanj che'é se cunuu i'na' uún Jesucristó gaa cavi' so' ro', che'é dan ca'vee quinanii ní' sij cata' ne rihaan sayuun chuguanj. <sup>22</sup> Dan me se quisij cunuu i'na' uún Jesucristó, gaa ne quinán' so' rej xta', ne x'núu Dioso rej nuva' Dioso yáán so' cuano, ne uun chij so' rihaan cunudanj nij se-mozó Dioso do', rihaan nu' nij nana uun chij rihaan nij rasuun man rihaan chumii nihánj do', rihaan yo'ó nij síf man rej xta' adonj.

**Nana nihánj taj xna'anj daj qui'yaj ní' yaj che'é se nichrun' ca'na' uún Jesucristó rihaan chumii nihánj a**

**4** Dan me se che'é se quirán' ndo'o Jesucristó sayuun gaa me so' yuvii ro', che'é dan no xcúun soj ca'nej nucaj soj nimán soj, gaa ne ca'vee guun nucaj soj rihaan sayuun quirán' soj ei. Ne'en soj se vaa síf quirán' nee sayuun che'é Dioso me se daj chihaa mij se qui'yaj canaán cacun' rihaan so' ma'. <sup>2</sup> Dan me se doj güii quinaj cayáan so' rihaan chumii nihánj me se se qui'yaj uún so' me ma'an se nij me rá nee man so' qui'yaj so' ma'. Tananj qui'yaj so' ndaa vaa me rá Dioso qui'yaj so' ei. <sup>3</sup> Dan me se gaa naá me se ya' qui'yaj ndo'o soj nu' nij rasuun nij ndaa vaa me rá nij síf yanij chuguanj. Dan me se cachéé soj chrej chi'ii do', chrej a'mii ga chana niha' rá do', chrej uun xno do', chrej a'mii chree do', yo'ó nij chrej chi'ii do', 'yaj soj chuguanj. Ne na'vij soj rihaan ya'anj cacój yuvii ndaa vaa na'vej rá Dioso qui'yaj soj ei. <sup>4</sup> Tzaj ne yaj me se ca'ne' rá soj ga suun chée ga nij síf chi'ii ne 'yaj ndo'o se nij ga nij so' chuguanj. Che'é dan yaj me se ma'anj rá nij so' ni'yaj nij so' man soj, ne a'mii chree nij so' che'é soj cuano ei. <sup>5</sup> Tzaj ne aj nicun' chruun Jesucristó ca'ne' so' cacun' che'é nij síf vaa i'na' do', che'é nij síf cavi' do', ne nij síf chi'ii yo' ro', no xcúun nij so' nata' nij so' rihaan Jesucristó che'é nu' nij se chi'ii qui'yaj nij so' ei. <sup>6</sup> Maan che'é dan me ca'mii natáj Jesucristó se-nana Dioso nana sa' ndaa rihaan nij síf cavi', che'é rej nda' se quirán' nij so' sayuun ga yo'ó nij yuvii che'é cacun' qui'yaj nij so' rihaan chumii nihánj, tzaj ne ca'vee cayáan nimán nij so' rihaan Dioso nu' cavii nu' ca'anj a. <sup>7</sup> Nichrun' un' ca'anj ni'ya chumii nanej ei. Che'é dan gaa chij inanj rá soj, ne yo'ó xcaj soj cuentá, gaa ne ca'vee cachinj ni'yaj soj rihaan Dioso chuguanj. <sup>8</sup> Ne suun sa' noco' doj qui'yaj soj me nihánj, ne gaa 'ee rá

soj man tuvi' soj nij síí amán rá ni'yaj man Jesucristó, ne sese 'eē rá ní' tuvi' ní', gaa ne quinavij ndo'o nij cacun' tumé tuvi' ní', qui'yaj ní' adonj. <sup>9</sup> Ca'vej soj caran' tuvi' soj síí amán rá ni'yaj man Jesucristó ve' tucua' soj, ne go' soj se chá chá nij so', ne se guun cataj soj se vaa sayuun uxrá vaa 'yaj soj danj ma'. <sup>10</sup> Dan me se qui'yaj Diose se luj che'é 'o 'o ní', rqué Diose suun rihaan 'o 'o ní' qui'yaj suun ní' che'é tinúú ní', ne ino doj vaa suun 'yaj suun 'o 'o ní' che'é tinúú ní', ne che'é dan no xcúún soj racuú soj man tinúú soj, ndaa vaa uun nucuaj soj chuguaj. <sup>11</sup> Sese ca'mii natáj yo'o tuvi' soj, ne yo'o cunuú rá so' se vaa se-nana Diose me nij nana a'mii natáj so' á. Sese qui'yaj suun yo'o tuvi' soj che'é soj, ne qui'yaj so' nu' ndaa vaa guun nucuaj so' qui'yaj so' qui'yaj Diose á. Gaa ne ca'vee ca'mii sa' yuvií che'é Diose ni'yaj nij yuvií man soj sij nocó' man Jesucristó ei. Ne Diose me se nu' cavii nu' ca'anj ca'mii sa' ní' che'é so', ne guun chij ndo'o so' adonj. Veé danj gaa ya ei.

**Nana nihánj taj xna'anj se vaa se nanó rá ní' che'é sayuun ran' ní' a**

<sup>12</sup> Se ca'anj rá soj che'é sayuun quiran' soj, man tinuj, man nocoj. Ya quiran' ndo'o soj sayuun, che'é rej ca'vee xcaj soj cuentá sese sij amán ya rá ni'yaj man Diose me soj chuguaj. Ne se guun rá soj se vaa orún' soj me síí ran' sayuun ma'. <sup>13</sup> Maan se guun niha' rá soj che'é se ase quiran' Jesucristó sayuun ro', danj vaa ran' guēe soj ga so', gaa ne güii ca'na' uún so' guun chij so' rihaan chumii nihánj me se ca'vee guun niha' doj rá soj ei. <sup>14</sup> Sese nachri' yuvií ni'yaj yuvií man soj che'é se sij nocó' man Jesucristó me soj, ne vaa che'é guun niha' rá soj adonj. 'O se yanj Nimán Diose ga soj, ne uun chij ndo'o Nimán Diose ei.

<sup>15</sup> A 'ó soj se guun síí ticavi' yuvií do', síí ituy do', síí chi'ii do', síí tiguíj man do' ma'. Tadó soj ei. Vaa che'é quiran' síí vaa danj sayuun ei. <sup>16</sup> Tzaj ne sese quiran' yo'o tuvi' soj sayuun che'é se sij nocó' man Jesucristó me so', ne taj che'é guun na'aj so' ma'. Tananj che'é se sij nocó' man Jesucristó me so' ro', che'é dan cataj so' se vaa sa' vaa Diose a. <sup>17</sup> 'O se yaj me se aj guun che'e Diose ca'ne' Diose cacun' che'é ní' sij tucua' Diose a. Che'é dan ne'en ní' se vaa nij doj quiran' nij síí na'vej rá cunó se-nana Diose nana sa' asa' ca'ne' Diose cacun' che'é nij so' chuguaj. <sup>18</sup> 'O se danj Diose taj: "Nanj síí nocó' ndo'o man Diose, tzaj ne sayuun ndo'o quinanií nij so' rihaan sayuun, ne táá a nij síí ne nocó' man Diose do', táá a nij síí chi'ii do', ne ca'anj ya nij so' rihaan ya'an ei". Danj taj nana no rihaan danj Diose a. <sup>19</sup> Che'é dan xa' soj sij ran' sayuun ndaa vaa me rá Diose quiran' soj, tzaj ne yo'o inanj qui'yaj sa' soj, ne dan me se ca'vej rá soj nicaj yu'unj Diose man nimán soj á. 'O se Diose me síí qui'yaj man soj, ne vaa che'é gaa nucuaj rá soj man so' ei.

**Nana nihánj taj xna'anj che'é chrej narqué Pedró rihaan nij síí cuchumán rá ni'yaj man Jesucristó a**

<sup>5</sup> Rihaan soj sij chij nicaj yu'unj man nij síí nocó' man Jesucristó man daj a chuman' ca'mij cuano a. 'O se síí chij mé 'unj ga soj, ne síí quene'en sayuun se vaa quiran' Jesucristó mé 'unj, ne dan me se ve'é guun chij 'unj ga Jesucristó asa' ca'na' uún so' rihaan chumii nihánj, raj a. <sup>2</sup> Ase vaa nicaj yu'unj yuvií man matzinj ro', danj gaa ve'é nicaj yu'unj soj man nij síí nocó' man Diose ndaa vaa ca'ne' Diose suun rihaan soj á. Se naqui'yaj 'eē soj man soj rihaan suun yo' ma'. Maan se ve'é qui'yaj suun soj che'é Diose ei. Ne se guun inanj rá soj qui'yaj canaán soj che'é suun 'yaj soj ma'. Tananj gaa niha' rá soj che'é ma'an suun yo' ei. <sup>3</sup> Ne se guun niha' rá soj quirii ta'nga' soj rihaan nij síí nocó' man Jesucristó ma'. Inanj ve'é qui'yaj suun soj ga nij so', ne quene'en nij so' daj qui'yaj soj, gaa ne xcaj nij so' cuentá daj qui'yaj ma'an nij so' uún a. <sup>4</sup> Gaa ne asa' curuvi' Jesucristó síí nicaj yu'unj man taran' ní' sij nicaj yu'unj man nij síí nocó' man Jesucristó me se ca'na' 'o cachriin corona sa' inanj cunuú raá ní', qui'yaj so', ne dan me se nu' cavii nu' ca'anj ve'é ndo'o gaa ní', qui'yaj Jesucristó chuguaj.

<sup>5</sup> Tananj soj sij tachruu, ne cunó soj rihaan nij síí chij, ne veé dan me taran' soj me se naqui'yaj nica' soj nimán soj rihaan tuvi' soj á. 'O se nana nihánj nó rihaan danj Diose, taj yo' se vaa: "Aráán Diose chrej rihaan nij síí xta' nimán se cavii sa' nij so', tzaj ne 'yaj Diose se luj che'é nij síí nica' nimán a", taj nana yo' a. <sup>6</sup> Che'é dan me yo'o naqui'yaj nica' soj nimán soj rihaan Diose síí nucuaj ndo'o, ne cunó soj rihaan so', gaa ne vaa güii, ne cavii sa' soj, qui'yaj so' adonj. <sup>7</sup> A 'ó xco' se nanó rá soj ma'. Diose ro', me síí nanó ndo'o rá daj ran' soj, ne che'é dan me 'o gaa nucuaj rá soj man so' ei.

<sup>8</sup> Gaa sca' rá soj, ne tumé soj man soj daj qui'yaj soj ei. 'O se vaa síí taj ri'yunj ni'yaj man soj, ne síí chree me so', ne ase 'yaj chuvaá aguáj chée nano' xcuu chá ro', danj 'yaj síí chree, chée so' nano' so' man síí ca'vee tirí' so' man chuguaj. <sup>9</sup> 'O raan canocó' soj man Diose, ne daj chihaa míj se cuno soj rihaan síí chree mei. Xcaj soj cuentá se vaa ase vaa sayuun ran' soj ro', danj vaa guēe sayuun ran' taran' nij síí nocó' man Jesucristó man rihaan chumii nihánj chuguaj. <sup>10</sup> Dan me se Diose ro', me síí 'yaj daj a se luj che'é soj, ne so' me síí canacúún man soj cavii sa' uxrá soj ga so' nu' cavii nu' ca'anj che'é Jesucristó, ne asa' quisíj quiran' soj sayuun doj güii rihaan chumii nihánj, gaa ne cune' sa' Diose man soj, ne naqui'yaj sca' so' man soj, ne gaa nucuaj inanj rá soj, qui'yaj so' adonj. <sup>11</sup> Ne guun chij ndo'o Diose nu' cavii nu' ca'anj, ne daj a güii ve'é cayáán so' nanj adonj. Amén.

Nanā nihánj taj xna'anj se vaa ve'é cayáán nij sí ca'anj  
 yanj cartá nihánj rihaan, rá nij tuvi' Pedró a

<sup>12</sup>Veé dānj sij natá' 'ujj doj nij nanā nō rihaan yanj  
 nihánj, nē tinú' Silvano me sí cachrón se-nānj rihaan  
 yanj nihánj, nē dan me se tinúú ní' sí nucuaj rá ní'  
 man me so', nē dan me se nanā nihánj me se narquej  
 chrej nucuaj rihaan soj, nē cataj xna'anj 'ujj rihaan soj  
 se vaa tucuáán nocō' ní' ro', ma'an yā tucuáán yo' me  
 rej 'yaj Diose se luj che'é ní' chuguanj. Raan canocō'

soj tucuáán yo' ei. <sup>13</sup>Dan me se nij tinúú ní' sí man  
 chuman' nihánj chuman' cu'naj Babilonia ro', me rá nij  
 so' se vaa ve'é cumān soj a. Narii Diose man nij so' gā  
 soj canocō' taran' nij soj man Diose, nē vaa tinú' Mar-  
 cos, nē ase vaa 'ō ta'nij ro', vaa so' rihanj, nē ve'é  
 cayáán soj, rá so' uún a.

<sup>14</sup>Ve'é uxrá ca'mij soj nanā luj gā tinúú soj sí amán  
 rá ni'yaj man Jesucristó gā nari' tuvi' soj á.

Nē me ndo'o rá 'ujj gā xej nimán cunudānj soj sij  
 nocō' man Jesucristó qui'yaj Diose nanj chuguanj.

## 2 Pedro

**1** 'Unj ro', me síí cu'naj Simón Pedró síí 'yaj suun rihaan Jesucristó, ne apóstol cune' so' nata' rihaan yuvii che'é so' mej, ne qui'yáá 'unj yanj nihánj ca'nej 'unj rihaan soj sij nocó' man Jesucristó, ne dan me se cyağan yu'vee nó soj gā núj rihaan Diose ei. Dan me se síí nicā nimán me Jesucristó, ne amán rá soj gā núj ni'yaj soj man Diose, qui'yaj Jesucristó, ne so' ro', me Diose síí nocó' ní', ne so' me síí tinanii man ní' rihaan sayuun adonj.

<sup>2</sup> Me rá 'unj xcaj ndo'o soj cuentá che'é Diose do', che'é Jesucristó sij 'nij ra'a man ní' do', gāa ne ca'vee quirí' ndo'o soj se luj ne gāa xej nimán soj, qui'yaj roj so' ei.

**Nanā nihánj taj xna'anj daj qui'yaj ní' ne canocó' raan ní' man Jesucristó a**

<sup>3</sup> Dan me se canacúún Diose man ní' cavii sa' uxrá ní' ne guun chij ní' gā ma'an so', ne Jesucristó me se ya'anj ndo'o rá so', ne so' me síí qui'yaj xcaj ní' cuentá che'é Diose, ne che'é dan ca'vee cayáán sa' ní' gā Diose, ne ve'é canocó' ní' man Diose, ne taj a doj rasuun cachijn man ní', qui'yaj so' ma'. <sup>4</sup> Ne che'é dan cata' tu'va so' che'é nij se luj qui'yaj ndo'o so' che'é ní', che'é rej ca'vee quinaniij soj rihaan se chi'ij nuu nimán nij síí man rihaan chumii nihánj, ne ase vaa ma'an Diose ro', danj gāa soj ei.

<sup>5</sup> Ne che'é dan soj sij amán rá ni'yaj man Jesucristó me se yo'ó naqui'yaj cuu soj che'é se-tucuanj Diose, ne naqui'yaj sca' ndo'o soj nimán soj, ne asa' guun sca' nimán soj, gāa ne terquee soj xcaj soj cuentá sa' doj che'é se-nanā Diose, <sup>6</sup> ne asa' quene'en sa' soj se-nanā Diose, gāa ne terquee soj guun soj síí tumé sa' man ma'an daj qui'yaj ma'an, ne asa' quisij tumé sa' soj man ma'an soj, gāa ne terquee soj guun nucuaj nimán soj rihaan sayuun, ne asa' quisij guun nucuaj nimán soj rihaan sayuun, gāa ne terquee soj qui'yaj soj ndāa vaa me rá Diose qui'yaj soj, <sup>7</sup> ne asa' quisij nari' soj qui'yaj soj ndāa vaa me rá Diose, gāa ne terquee soj cunu ni'yanj nimán soj, ne asa' quisij cunu ni'yanj nimán soj, gāa ne terquee soj cunu 'ee rá soj ni'yaj soj tuvi' soj ei.

<sup>8</sup> Dan me se sese doj a nari' soj qui'yaj soj nu' danj daj a güii, gāa ne se ca'vee guun soj síí ni'yon síí ne ne'en qui'yaj suun che'é Diose a ma'. Tananj sa' uxrá doj quene'en soj man Jesucristó sij 'nij ra'a man ní' adonj. <sup>9</sup> Tzaj ne síí ataa nari' qui'yaj nu' ndāa vaa taj 'unj nihánj me se ase vaa síí ne ruvi' gan' ni'yaj vaa so', se vaa síí tuchrij vaa so', ne nichrun' yaj tacúún so' ru-

vi' ni'yaj so', ne taj se 'yá' xcaj so' cuentá che'é nij rasuun nocó doj a man adonj. Ne dan me se quini'yon so' nu' cacun' naruvii xráá so' gāa rque nanj adonj.

<sup>10</sup> Che'é dan me doj a tananj terquee ndo'o soj canocó' raan soj man Diose, tinuj, nocó. Dan, gāa ne quene'en ya soj se vaa nacúún Diose man soj ne narii Diose man soj cavii sa' soj gā so', ne daj chihāa mij se quirí' soj rihaan Diose ma'. <sup>11</sup> Gāa ne Jesucristó sij 'nij ra'a man ní' síí tinanii man ní' rihaan sayuun ro', ve'é uxrá nucuí' sa' soj rej guun chij so' nu' cavii nu' ca'anj, qui'yaj so' chuguanj.

<sup>12</sup> Che'é dan ndā' se aj ne'en soj nanā nihánj, ne ndā' se aj guun che'e soj canoco' soj se-nanā Diose nanā ya vaa rihaan soj, tzaj ne nanō niganj 'unj nanā nihánj rihaan soj se gāa nanj quini'yon soj ei. <sup>13</sup> Vaa che'é ndo'o nanō nanā nihánj rihaan soj yaj gāa vaa i'na' 'unj rihaan chumii nihánj, raj chuguanj. <sup>14</sup> 'O se aj ne'enj se vaa nichrun' caví' 'unj, ndāa vaa cataj Jesucristó sij 'nij ra'a man ní' rihanj, <sup>15</sup> ne che'é dan yo'ó qui'yaj ndāa daj a ca'vee ma'an, gāa ne ndā' se cavij, tzaj ne yo'ó cunuú rá soj nanā sa' nihánj ei.

**Nanā nihánj taj xna'anj se vaa quene'en nij tuvi' Pedró se vaa síí uun chij me Jesucristó a**

<sup>16</sup> 'O se gāa cataj xna'anj núj rihaan soj se vaa ca'na' uún Jesucristó sij 'nij ra'a man ní' rihaan chumii nihánj ne gāa nucuaj ndo'o so' asa' ca'na' so', ne nuveé cuentó avii raā ma'an núj me yo' ma'. Rihaan ma'an núj quene'en núj se vaa síí sa' uxrá me so' adonj. <sup>17</sup> Ya sij uun chij me so', cataj Diose, gāa ca'mii Diose nanā nihánj rihaan so' a: "Ta'níí 'unj síí 'ee ndo'o raj man mé so', ne niha' ndo'o raj ni'yaj man so' adonj", taj Diose rihaan so' adonj. <sup>18</sup> Xrée ma'an núj cuno núj nanā nihánj nanā cavii rej xtā' gāa cumán núj xráá quij guee gā so' ei.

<sup>19</sup> Che'é se quene'en núj ndāa vaa guun chij Jesucristó qui'yaj Diose, che'é dan doj a cuchumán rá núj nanā cahrón nij síí nata' se-nanā Diose gāa naá chuguanj. Ne sa' qui'yaj soj, sese xcaj ma'an soj cuentá che'é nanā ca'mii nij so' ei. 'O se ase vaa ya'an chuguun racuíj man nij síí yanj rej rmi' ro', danj vaa se-nanā nij so', racuíj yo' man ní' gāa yáán ní' chumii nihánj adonj. Tzaj ne vaa güii quene'en soj man ma'an Jesucristó, ne se cachiin uún se-nanā nij síí man gāa naá rihaan soj ma'. 'O se ase vaa yati' xta'ngaa chuguun gāa rej nichrun' rá rangā' ro', danj gāa so', quene'en nimán soj rej sa', qui'yaj so' a. <sup>20</sup> Maan se asi-no yaan xcaj soj cuentá che'é se-nanā nij síí nata'

se-nanā Diose gaa naá, ne nuveé raā ma'an nij so' cavii nanā cacrón nij so' rihaan yanj ma'. <sup>21</sup> 'O se a 'ó yuviī qui'yaj ca'na' se-nanā Diose rihaan chumiī nihánj cunō yo'ó nij yuviī ma'. Maān se Nimán Diose me síi qui'yaj ca'mii nij yuviī nanā cavii rihaan ma'an ya Diose adonj.

**Nanā nihánj taj xna'anj che'é nij síi nago' tucuáán ne a**

**2** Tzaj ne cumán uxrá nij síi ne nata' se-nanā Diose gaa naá rihaan nij síi israelitá, ne ndāa rá se vaa nij síi ne gaa naá ro', ta'nga' danj vaa nij síi ne cuchī' rihaan soj narque tucuáán ne rihaan soj adonj. Ne sese cuchuman rá soj, ne ca'anj soj rihaan ya'an gā nij so' a. Dan me se Jesucristó sij 'nij ra'a man ní' ro', cavi' so' che'é rej ca'vee quinaniī nij so' rihaan sayuun, tzaj ne ma'an nij so' me se inanj nanā ne a'mii nij so' che'é Jesucristó, ne che'é dan quirān' ra'yanj ya nij so' sayuun, qui'yaj Diose a. <sup>2</sup> Tzaj ne canoco' que'ee nij síi amán rá ni'yaj man Jesucristó man nij síi ne yo', ne qui'yaj ndo'o nij so' nu' tucuáán chi'ii, ne che'é tucuáán chi'ii 'yaj nij so' ro', che'é dan ca'mii nij síi ne amán rá ni'yaj man Diose nanā nij che'é se-tucuānj Diose tucuáán ya ei. <sup>3</sup> Gyun rá nij síi narque tucuáán ne yo' qui'yaj canaán ndo'o nij so' sa'anj, ne che'é dan nang' nij so' nanā ne ca'mii nij so' rihaan nij soj, tzaj ne asij naá cataj Diose se vaa quirān' ndo'o nij so' sayuun vaa güii, ne ya uxrá quirān' nij so' sayuun ei.

<sup>4</sup> Dan me se aj ne'en soj se vaa ne carāa x'naa Diose a rihaan ma'an nij se-mozó so' gaa qui'yaj nij so' cacun' a ma'. Ya ca'née Diose man nij so' rej quirān' nij so' sayuun, ne numij Diose aga' ne' man nij so', nago' Diose man nij so' rej rmi' quirān' nij so' sayuun, ne dan me se danj gaa cumān nij so' ndāa güii ca'ne' Diose cacun' che'é nij so' adonj. <sup>5</sup> Ne aj ne'en soj se vaa ne carāa x'naa Diose a rihaan nij síi cumán gaa naá ma'. Maān tunj guēe nij tuvi' síi cu'naj Noé síi ca'mii natáj nanā sa' rihaan yuviī se vaa ca'vee cunūu sa' nij yuviī rihaan Diose ro', inanj nij so' me nij síi quinaniī rihaan sayuun qui'yaj Diose, gaa ca'ne' rá Diose ca'na' na ya'anj, ne canó xráá nij síi chi'ii man rihaan chumiī nihánj, che'é se ne cunō nij so' rihaan Diose adonj.

<sup>6</sup> Tanānj uún, ne ne'en soj se vaa yuūn che'e cacaa nu' roj chuman' cu'naj Sodoma gā Gomorra, qui'yaj Diose uún, ne dan me se cataj Diose se vaa daj chihāa mij se cumán uún yuviī roj chuman' yo', ne danj qui'yaj Diose che'é se guun rá Diose xcāj ní' cuentá daj quirān' nu' nij síi na'vej rá cunō rihaan Diose a. <sup>7</sup> Tzaj ne tinaniī Diose man síi cu'naj Lot rihaan sayuun yo', che'é se síi nicā nimán me síi cu'naj Lot yo', ne quiri' rá síi cu'naj Lot che'é se chi'ii qui'yaj nij síi tucuáá rihaan Diose nij síi cumán roj chuman' yo' a. <sup>8</sup> Dan me se gaa cayáán síi nicā nimán yo' chiháán nij so', ne daj a güii quene'en so' se chi'ii qui'yaj nij síi chi'ii yo', ne cunō so' nu' nanā chi'ii ca'mii nij so' a. Veé dan, ne quiri' ndo'o rá so' a.

<sup>9</sup> Tzaj ne síi 'nij ra'a man ní' me se nacaj so' man nij síi noco' man so', ne tinaniī so' man nij so' rihaan sayuun, ne veé danj guun nucuaj so' tumé so' man nij

síi chi'ii, ne yo'ō quirān' nij síi chi'ii yo' sayuun ndāa se quisij güii ca'ne' so' cacun' che'é nij so' adonj. <sup>10</sup> Dan me se táá a qui'yaj so' man nij síi chée se-tucuānj ma'an, ne 'yaj nij so' ndāa vaa me rá nee man ma'an nij so', ne nachri' nij so' ni'yaj nij so' man Jesucristó sij 'nij ra'a man ní', ne síi a'mii xtā' ndo'o me nij so', ne a 'ó xco' ne na'aj nij so' a ma'. Ne ne chu'vi' nij so' ca'mii nij so' nanā nij che'é nij ya'anj uun chij rihaan nij rasuūn man rihaan chumiī nihánj a ma'. <sup>11</sup> Ne nanj sij nucuaj doj me nij se-mozó Diose nij síi noco' sa' man so', tzaj ne ne quisij rá nij so' cuchī' nij so' rihaan síi 'nij ra'a man ní' ne cutā' nij so' cacun' xráá nij ya'anj yo' ma'.

<sup>12</sup> Tzaj ne ase vaa xcuu ne acāj cuentá, ne ta'aa nii, ne ticavi' nii man ro', danj vaa nij síi narqué tucuáán ne yo' ei. Ne acāj nij so' cuentá daj vaa nij ya'anj, tzaj ne a'mii nij so' nanā nij che'é nij ya'anj yo', ne che'é dan quirān' nij so' sayuun ndāa vaa quirān' ma'an nij ya'anj yo' vaa güii, qui'yaj Diose, <sup>13</sup> ne dan me se naru'vee Diose sayuun rihaan nij so' che'é sayuun qui'yaj nij so' man tuvi' nij so' adonj. Niha' rá nij so' qui'yaj nij so' se nij rej rangā', ne veé danj niha' ndo'o rá nij so' gaa chá nij so' chraa gā soj, ne che'é dan tiri' nij so' man soj gaa nuu chre' soj chá soj chraa adonj. <sup>14</sup> Inanj me rá nij síi narqué tucuáán ne ni'yaj nij so' man chana niha' rá, ne ne a'ne' rá nij so' gā suun 'yaj cacun' a ma'. Tiha' yu'unj nij so' man nij síi ne nicāj raan se-tucuānj Diose, ne yo'ō vaa nimán nij so' me rá nij so' quiri' ndo'o nij so' sa'anj ei. Ase vaa xnii mañá ndo'o ro', danj vaa nij so', ne ya quirān' ndo'o nij so' sayuun vaa güii chuguānj.

<sup>15</sup> Tanáj nij so' se-tucuānj Diose tucuáán nicā, ne canoco' nij so' tucuáán ne, ne ase vaa qui'yaj síi cu'naj Balaam ta'níi Beor gaa naá ro', danj qui'yaj nij so' ei. Ne síi cu'naj Balaam me se che'é se guun rá so' ni'yaj so' sa'anj, ne qui'yaj so' cacun', <sup>16</sup> tzaj ne ase vaa a'mii yuviī ro', danj ca'mii daán so' burró rihaan so', ne cutā' daán so' burró cacun' xráá so', ne dan me se caráán daán so' burró chrej rihaan so' qui'yaj chi'ii rma'an so' rihaan Diose, qui'yaj Diose adonj.

<sup>17</sup> Ne ase vaa curuj na utun' ro', danj vaa nij so', ne ase vaa ngaa achén rma'an 'yaj nanā ne ne aman' maān 'yaj ro', danj vaa nij síi narqué tucuáán ne yo', ne gyun na'aj ndo'o nij yuviī nucuaj rá man nij so' ei. Aj cataj Diose se vaa cunē' Diose man nij so' rej rmi' ndo'o nu' cavii nu' ca'anj adonj.

<sup>18</sup> Dan me se a'mii xtā' ndo'o nij so' nanā nij rma'an, ne uno nij síi cuchumán nacā rá ni'yaj man Jesucristó, ne ndā' se tihaj guun yanij nij so' rihaan nij síi ne acāj cuentá man rihaan chumiī nihánj, tzaj ne naničaj nij so', ne tanáj nij so' chrej sa', ne 'yaj uún nij so' se chi'ii ndāa vaa me rá ma'an nij so' qui'yaj nij so', <sup>19</sup> ne taj nij síi narqué tucuáán ne rihaan yuviī, ne: "Ca'vee qui'yaj soj me ma'an se me rá soj ei", taj nij síi narqué tucuáán ne rihaan nij síi cuchumán nacā rá yo', tzaj ne ma'an nij so' ro', me mozó 'yaj suun che'é rej quiri' nu' nimán yuviī adonj. 'O se me ma'an rasuūn 'yaj canaán rihaan ní' ro', yo' me rasuūn 'yaj suun ní' rihaan, ne mozó me

ní' rihaan yo' adonj. <sup>20</sup> 'O se gaa rque me se xcaj nij so' cuentá che'é Jesucristó sij 'nij ra'a man ní' sí tinanii man ní' rihaan chrej chi'ii uun chij nimán ní' do', rihaan cunudanj chrej chi'ii man rihaan chumii nihánj do', tzaj ne yaj me se nanicaj nij so' qui'yaj uún nij so' chi'ii, ne ndaa qui'yaj canaán chrej chi'ii yo' rihaan nij so', ne dan me se asino yaan me se maan ta'nga' nij vaa nij so', tzaj ne yaj me se chi'ii doj vaa nij so' adonj. <sup>21</sup> Cavii sa' nij so' doj sese ne quene'en nij so' se-tucuanj Diose tucuáán nica se vaa yaj quene'en nij so' se-tucuanj Diose, gaa ne nanicaj uún nij so' tanáj nij so' tucuáán sa' nago' Diose man nij so' saj adonj. <sup>22</sup> Ase vaa 'yaj nij so' vaa nana ya nihánj a: "Uchráan chuvee, gaa ne anicaj uún xo' chá xo' se-cuchranj xo' a", ne vaa se-nana xcáá uún taj: "Quisij cane xcáá na sa', gaa ne anicaj uún xo' natúj xo' rá sigui' a", vaa yo'ó nana taj xna'anj daj 'yaj nij sí narqué tucuáán ne yo' a.

### Nana nihánj taj xna'anj se vaa taj ni'yón ca'na' uún Jesucristó rihaan chumii nihánj a

**3** Nihánj me yanj vij ca'nej 'unj rihaan soj, tinuj, nocoj. Rihaan roj yanj nihánj nanos se-nana Diose rihaan soj che'é se me raj xcaj soj cuentá che'é rej sa' ei. 'O se sij me ya rá canoco' man Diose me soj, <sup>2</sup> ne me raj ninuj rá soj nana ca'mii nij sí vaa sa' rihaan Diose sí nata' se-nana Diose gaa naá, ne me raj ninuj rá soj se-nana Jesucristó sij 'nij ra'a man ní' sí tinanii man ní' rihaan sayuun nana narqué núj sij apóstol cune' so' man rihaan soj a.

<sup>3</sup> Tzaj ne vaa che'é ndo'o xcaj nij soj cuentá, ne ca'na' sí a'nga' naco n'iyaj man soj asa' nichrun' ca'na' uún Jesucristó rihaan chumii nihánj, ne naá guun se nij guun rá nij so' qui'yaj nij so' a. <sup>4</sup> Gaa ne cataj nij so' nana nihánj rihaan soj a: "Cataj nij sí nata' se-nana Diose ga naá rihaan xij ní' se vaa ca'na' uún Jesucristó rihaan chumii nihánj, tzaj ne ne ca'na' uún so' chihá'. Veé danj vaa cavi' xij ní', ne taj vaj so' ca'na' man asanj. Veé ase vaa chumii ga asino curuvi' chumii ro', veé danj vaa guéé chumii ndaa cuano nanj asanj", cataj nij so' ca'nga' naco nij so' rihaan soj a.

<sup>5</sup> Dan me se danj cataj nij so' che'é se na'vej rá nij so' xcaj nij so' cuentá ndaa vaa curuvi' chumii gaa naá qui'yaj Diose ei. Tzaj ne ca'mii Diose, ne guun rej xta', ne curihanj yo'ó naco rque na ya'anj chuguanj.

<sup>6</sup> Gaa ne gaa naá me se ca'anj ni'ya nij yuvij man rihaan chumii, qui'yaj maan do', na ya'anj do' ei. <sup>7</sup> Tzaj ne xta' ga yo'ó man ní' cuano me se ma'anj Diose ca'mii, ne cataj Diose se vaa quinaj roj yo' ndaa se quisij güii ca'ne' Diose cacun' che'é nij sí chi'ii, gaa ne nu' che'é cacaa nij so' chuguanj. Ne güii yo' me se ca'nej Diose ya'an, ne cacaa nu' xta' ga yo'ó man ní' cuano, ne ca'anj ni'ya uún yo' adonj.

<sup>8</sup> Se quini'yón soj nana nihánj, man tinuj, man nocoj. Ase vaa 'o mij yo' vaa orún' güii rihaan sí 'nij ra'a man ní', ne ase vaa orún' güii vaa 'o mij yo' rihaan so' ei.

<sup>9</sup> Ta'aj nij yuvij me se guun raan ndo'o Diose qui'yaj Diose ndaa vaa cataj so' gaa naá, rá nij so', tzaj ne se guun raan Diose mei. Maan se inaj nimán Diose ni'yaj Diose man soj, ne na'vej rá Diose cavi' nimán a doj tu-vi' soj mei. Tananj me rá so' canicaj nimán taran' soj ne tanáj xco soj tucuáán chi'ii chuguanj.

<sup>10</sup> Tzaj ne taj ni'yón quisij güii ca'ne' Diose cacun' che'é yuvij ei. Dan me se carin ndo'o ca'anj ni'ya xta', ne quinavij nu' nij se man rej xta' cacaa, ne ca'anj ni'ya yo'ó ga nu' se man rihaan yo'ó adonj. <sup>11</sup> Che'é se ca'anj ni'ya chumii, che'é dan se guun nana rá soj che'é rasuun man rihaan chumii nihánj ma'. Tananj xcaj soj cuentá che'é rej daj qui'yaj soj canoco' raan soj man Diose ei. <sup>12</sup> Na'vij soj quisij güii yo', ne ve'é canoco' soj man Diose che'é rej ra'yanj doj quisij güii yo' chuguanj. Ne güii yo' me se quinavij nu' xta' cacaa, ne nacuné nu' nij rasuun man rej xta' yo' ei. <sup>13</sup> Tzaj ne aj cataj Diose se vaa ya gaa yo'ó yo'ó naca, ne gaa yo'ó rej xta' naca, ne inanj se sa' qui'yaj nij sí cumán rej yo' asa' quisij ei. Dan me se na'vij ndo'o ní' quisij güii yo' cuaj ei.

<sup>14</sup> Che'é se na'vij ní' güii yo' ro', che'é dan terquee soj doj qui'yaj soj se sa' inanj rihaan Diose, ne se gaa nanj cutumé soj cacun' asa' ca'na' uún Jesucristó ei. Ne dínj gaa nimán soj, tinuj, nocoj. <sup>15</sup> Xcaj soj cuentá se vaa na'vij Diose nanj che'é se me rá so' quinani'ij nij yuvij rihaan sayuun chuguanj. Veé danj taj uún nij nana cachron tinú' Pabló rihaan yanj ca'neé so' rihaan soj, ndaa vaa chrej cuo narqué Diose rihaan so' a. <sup>16</sup> Dan me se daj a nij yanj cartá qui'yaj Pabló ro', ca'mii so' che'é rasuun nihánj, ne vaa doj nana cuo sayuun cunó' nó rihaan yanj qui'yaj so', ne dan me se nij sí ne ne'en do', nij sí uun vij rá me se tinicaj nij so' se-nana Pabló, ne a'mii ne nij so' che'é Pabló, taj nij so' se vaa ino vaa tucuáán tucu'yón so' a. Ne danj 'yaj nij so' ga yo'ó nij nana no rihaan danj Diose uún, ne che'é dan quiran' ndo'o nij so' sayuun vaa güii adonj.

<sup>17</sup> Aj cataj xna'anj 'unj rihaan soj che'é nij sí narqué tucuáán ne ca'na' rihaan soj vaa güii, tinuj, nocoj. Che'é dan tadó uxrá soj se gaa nanj canoco' soj tucuáán ne narque nij sí na'vej rá cuo rihaan Diose yo' ei. Sese canoco' soj se-nana nij so', ne guun vij rá soj, qui'yaj nij so' ei. <sup>18</sup> Che'é dan yo' o guun rá soj ni'yaj soj se luj rque Diose rihaan soj, ne yo' o guun rá soj xcaj soj cuentá sa' doj che'é Jesucristó sij 'nij ra'a man ní' sí tinanii man ní' rihaan sayuun adonj. Vaa che'é ndo'o cataj ní' se vaa sij sa' ndo'o me so' ne sij sa' ndo'o guun so' nu' cavii nu' ca'anj adonj. Veé danj gaa ya ei.

# 1 Juan

**Nana nihánj taj xna'anj se vaa cataj xna'anj síí cu'naj Juan che'é se vaa quene'en rihaan ma'án so' a**

**1** Dan me se núj me se cataj xna'anj núj rihaan nij soj che'é 'o síí cane gaa naá asij guun che'e Diose qui'yaj Diose chumij, ne inanj se vaa cuno ma'án núj do', se vaa quene'en rihaan ma'án núj do', se vaa cuta' núj ra'a núj xráá do', che'é inanj rasuun vaa danj cataj xna'anj núj rihaan soj a. Dan me se cataj xna'anj núj che'é se-nana Diose, ne so' me síí qui'yaj cayáán ní' gá Diose nu' cavii nu' ca'anj adonj. <sup>2</sup> Dan me se so' me síí qui'yaj cayáán ní' gá Diose nu' cavii nu' ca'anj, ne ca'na' so', ne quene'en núj man so', ne nihánj me se nata' núj rihaan nij soj che'é so' se vaa asino canicun' so' gá Diose rej yanj Diose gaa naá, gaa ne yaj me se ca'na' so' rej ne ní' a. <sup>3</sup> Dan me se nata' núj rihaan ma'án nij soj che'é se vaa quene'en núj do', che'é se vaa cuno núj do', che'é rej ca'vee cunuu rcua'áan soj gá núj, ne dan me se cunuu rcua'áan ní' gá Rej ní' Diose, gá ta'níí so' Jesucristó a. <sup>4</sup> Ne achrón núj nana nihánj rihaan yanj nayaá soj, che'é rej ca'vee guun niha' uxrá rá taran' ní' adonj.

**Nana nihánj taj xna'anj se vaa ase vaa ya'an chuguun ro', danj vaa Diose, ne ca'vee cunuu sa' nimán ní' qui'yaj so' a**

<sup>5</sup> Ne nihánj ro', me nana cataj xna'anj Jesucristó cuno núj, ne nata' núj nana nihánj rihaan soj, ne dan me se ase vaa 'o ya'an chuguun vaa Diose, ne rej vaj Diose me se nuvi' rej rmi' rej vaj so' ma'. <sup>6</sup> Che'é dan sese cataj ní' se vaa sij chéé gá Diose me ní', ne sese chéé ní' rej rmi', gaa ne tu'va rma'án ní' vaa gaa nanj ei. Ne ne noco' ní' tucuáán ya yo' gaa a ma'. <sup>7</sup> Tzaj ne sese chéé ní' rej chuguun sa' rej vaj ma'án Diose, ne ve'é sa' mán taran' ní', ne quinavij nu' cacun' tumé ní', qui'yaj Jesucristó síí cavi' che'é ní', ne yo'o cunuu sa' nimán ní' ei. <sup>8</sup> Dan me se sese cataj ní' se vaa a doj cacun' ne tumé ní', ne dan me se tiha' yu'unj ní' vaa gaa nanj adonj. Ne nuveé sij a'mii nana ya me ní' gaa a ma'. <sup>9</sup> Tzaj ne sese nata' ya ní' rihaan Diose che'é cacun' tumé ní', ne Diose me se vaa che'é gaa nucaj rá ní' se vaa nica qui'yaj so' che'é ní', ne dan me se cataj so' se vaa navij cacun' tumé ní', ne tinavij so' nu' se chi'ij man nimán ní' adonj. <sup>10</sup> Dan me se sese cataj ní' se vaa a doj ne qui'yaj ní' cacun', ne sij tu'va rma'án me ní', ne 'yaj ní' síí ne man ndaa ma'án Diose vaa gaa nanj chuguanj. Dan me se aj cataj ya Diose se vaa

tumé ní' cacun' nanj ei. Ne sese ca'mii ní' danj, ne nuveé sij uno se-nana Diose me ní' gaa mei.

**Nana nihánj taj xna'anj che'é nana no xcuún ní' cunog ní' a**

**2** Ase vaa ta'níí 'unj ro', danj vaa soj, tinuj, nocoj. Ne achrón 'unj nu' nana nihánj rihaan yanj nihánj, che'é rej se qui'yaj soj cacun' mei.

Dan me se sese qui'yaj ní' cacun', ne vaa 'o síí nica nimán a'mii yu'unj che'é ní' rihaan Rej ní' Diose, ne Jesucristó me síí a'mii yu'unj che'é ní' ei. <sup>2</sup> Ne so' me síí cavi' che'é rej ca'vee quinavij cacun' tumé ní' adonj. Tzaj ne nuveé che'e doj se-cacun' ní' me cavi' so' ma'. Cavi' so' che'é cacun' tumé cunudanj nij yuvií man rihaan chumij adonj.

<sup>3</sup> Dan me se nihánj me rej ne'en ní' se vaa sij noco' man Jesucristó me ní' a. Dan me se sese 'yaj ní' ndaa vaa cataj xna'anj Jesucristó rihaan ní', ne sij noco' ya man so' me ní' adonj. <sup>4</sup> Tzaj ne sese taj yo'o so' se vaa sij noco' man Jesucristó me so' ne ne 'yaj so' ndaa vaa cataj xna'anj Jesucristó rihaan ní', ne síí ne me so', ne nuveé sij a'mii nana ya me so' mei. <sup>5</sup> Tzaj ne síí uno se-nana Jesucristó ro', so' me síí ya ya aráj cochroj rihaan Diose chuguanj. Che'é dan, sese qui'yaj ní' danj, ne ca'vee guun ya rá ní' se vaa sij noco' man Jesucristó me ní' ei. <sup>6</sup> Ne síí taj se vaa yo'o noco' man Jesucristó ro', ase vaa qui'yaj Jesucristó ro', danj inanj nó xcuún so' qui'yaj ma'án so' uún adonj.

<sup>7</sup> Dan me se 'ee raj man soj, tinuj, nocoj. Ne nihánj me se cachron 'unj 'o nana naca rihaan yanj nihánj cunog soj chuguanj. Tzaj ne nuveé nana naca me nana nihánj ma'. Veé nana cuno soj asij guun che'e soj canoco' soj man Jesucristó me nana nihánj nanj adonj. <sup>8</sup> Dan me se cachron uún 'unj nana naca nihánj cunog soj, ne ya ya nana naca tucu'yón Jesucristó me nana nihánj, ne cuno soj nana naca nihánj adonj. 'O se vaj navij rej rmi' rihaan chumij nihánj, ne Jesucristó ro', me ya'an chuguun, ne dan me se guun che'e se-nana so' chuguun se-nana so' rihaan chumij nihánj ei. <sup>9</sup> Ne xa' síí taj se vaa vaj so' rej chuguun gá se-nana Jesucristó ne nachri' so' ni'yaj so' man tinúú so', ne sij vaj guue rej rmi' me ya so' nanj chuguanj. <sup>10</sup> Ne síí 'ee rá man tinúú me se so' me síí chéé rej chuguun gá se-nana Jesucristó, ne se ca'vee quirj' so' ma'. <sup>11</sup> Ne xa' síí nachri' man tinúú, tzaj ne so' me síí vaj rej rmi', ne 'o chéé guue so' rej rmi' nanj á. Ne ne'en so' me rej vaj so' a ma'. 'O se caráán rihaan so', qui'yaj rej rmi' vaj so' nanj adonj. Na'vee a doj xcaj so' cuentá a ma'.



<sup>12</sup> Dan me se achrón 'unj nu' nanā nihánj nayaā soj xnji, ne 'o se che'é se noco' soj man Jesucristó ro', che'é dan quinavij cacun' tumé soj rihaan Diose ei.

<sup>13</sup> Achrón 'unj nu' nanā nihánj nayaā soj sij vaa ta'níi, ne 'o se aj ne'en soj man síi cayáán gā Diose gāa guun che'e Diose qui'yaj Diose chumií nihánj a.

Achrón 'unj nu' nanā nihánj nayaā soj sij tachruu, ne 'o se aj qui'yaj canaán soj rihaan síi chree ei.

<sup>14</sup> Achrón 'unj nu' nanā nihánj nayaā soj xnji, ne 'o se aj ne'en soj man Rej ní' Diose adonj.

Achrón 'unj nu' nanā nihánj nayaā soj sij vaa ta'níi, ne 'o se aj ne'en soj man síi cayáán gā Diose gāa guun che'e Diose qui'yaj Diose chumií nihánj ei.

Achrón 'unj nu' nanā nihánj nayaā soj sij tachruu, ne 'o nucuaj ndo'o nimán soj rihaan sayuun, ne yo'o uno soj se-nanā Diose, ne aj qui'yaj canaán soj rihaan síi chree ei.

<sup>15</sup> Se guun rá soj ni'yaj soj chumií nihánj do', nij rasuun man rihaan chumií nihánj do' mei. 'O se xā' síi me rá ni'yaj chumií nihánj, tzaj ne nuveé sij aráj cochroj rihaan Rej ní' Diose me so' man chuguānj. <sup>16</sup> 'O se rihaan chumií nihánj vaa ndo'o se me rá yuvií qui'yaj yuvií do', vaa ndo'o se me rá yuvií ni'yaj yuvií do', vaa ndo'o rasuun 'yaj uun xta' nimán yuvií do', tzaj ne nuveé rasuun cavii rihaan Rej ní' Diose me nu' nij rasuun vaa danj ma'. 'O se nanj rasuun man rihaan chumií nihánj me nij rasuun yo' nanj adonj. <sup>17</sup> Ne vaj navij chumií nihánj ei. Ne vaj navij nu' se vaa me rá nij yuvií man rihaan chumií nihánj qui'yaj nij so' ei. Tzaj ne síi 'yaj ndāa vaa me rá Diose me se cayáán so' nu' cavii nu' ca'anj gā Diose chuguānj.

**Nanā nihánj taj xna'anj che'é síi tu'va rma'an se vaa sij tjanii man yuvií rihaan sayuun me so' a**

<sup>18</sup> Dan me se ase vaa ta'nij vaa soj, ne me raj cunō soj nanā nihánj ei. 'O se nichrun' quinavij chumií nihánj, ne aj cunō soj nanā se vaa ca'na' 'o síi quitaj yu'unj, ne cataj so' se vaa sij ca'née Diose tjanii man yuvií rihaan sayuun me so', ne nihánj me se aj ca'na' que'ee síi tu'va danj, ne che'é dan ne'en ya ní' se vaa ya nichrun' quinavij chumií nihánj ei. <sup>19</sup> Dan me se ase vaa tinúu ní' vaa nij so' asij rque, tzaj ne ca'anj yanij nij so' rihaan ní', ne nuveé ya ya tinuj ní' me nij so' a ma'. 'O se ca'anj yanij nij so' rihaan ní' che'é rej ca'vee xcaj ní' cuentá se vaa nuveé tinuj ní' me taran' nij so' a man adonj.

<sup>20</sup> Ne xā' soj, tzaj ne cune' Diose man soj, ne guun nucuaj soj xcaj soj cuentá, qui'yaj Diose, ne ne'en soj cunudanj rasuun ei. <sup>21</sup> Nuveé che'e se ne ne'en soj nanā ya me cachrón 'unj nanā nihánj nayaā soj ma'. Tzaj ne achrón 'unj nanā nihánj nayaā soj che'é se sij ne'en nij nanā ya me soj, ne aj ne'en soj se vaa inō doj vaa nanā ne gā nanā ya nanā noco' ní' adonj.

<sup>22</sup> Ne síi ne me se so' me síi taj se vaa nuveé sij ca'née Diose tjanii man yuvií rihaan sayuun me Jesucristó chuguānj. Dan me se taj so' se vaa ma'an so' me Cristó ca'née Diose, taj so' chuguānj. Ne dan me se ne aráj cochroj so' rihaan Rej ní' Diose do', rihaan ta'níi

Diose do' ma'. <sup>23</sup> Dan me se xā' síi ne aráj cochroj rihaan ta'níi Diose, tzaj ne sij ne noco' man Rej ní' Diose me so' ei. Tzaj ne síi nata' ya se vaa ve'é noco' so' man ta'níi Diose ro', so' me síi noco' ya man Rej ní' Diose uún adonj.

<sup>24</sup> Ne xā' soj, tzaj ne yo'o cunō soj nanā cunō soj gāa guun che'e soj canoco' soj man Jesucristó ei. Sese qui'yaj soj danj, ne sij noco' man ta'níi Diose do', man ma'an ya Rej ní' Diose do', me soj chuguānj. <sup>25</sup> Ne nihánj me nanā cata' tu'va ma'an Jesucristó rihaan ní', se vaa ca'vee cayáán ní' gā Diose nu' cavii nu' ca'anj ya ei.

<sup>26</sup> Dan me se cachrón 'unj nu' nanā nihánj nayaā soj che'é rej xcaj soj cuentá che'é nij síi me rá tihā' yu'unj man soj adonj. <sup>27</sup> Ne xā' soj, tzaj ne che'é se cune' Diose man soj ro', che'é dan yo'o noco' soj man Diose, ne taj che'é tucu'yón nii doj nanā man soj a ma'. Tananj che'é se cune' Diose man soj, che'é dan aj nari' soj nanā che'é nu' rasuun, ne inanj nanā ya nari' soj ei. Nuveé nanā ne me nanā nari' soj, qui'yaj Diose ma'. Dan me se yo'o noco' soj man Diose, ndāa vaa tucu'yón ya so' man soj adonj.

**Nanā nihánj taj xna'anj se vaa ta'nij Diose me ní' a**

<sup>28</sup> Dan me se ase vaa ta'nij vaa nij soj rihanj, ne me rá 'unj se vaa yo'o canoco' raan soj man Jesucristó, che'é rej asa' ca'na' uún so' rihaan chumií nihánj, ne se guun na'aj soj a doj ma'. Tananj guun niha' rá soj ca'mij soj gā so' ei. <sup>29</sup> Dan me se ne'en soj se vaa síi sa' inanj me Jesucristó, ne che'é dan ne'en soj se vaa nu' nij síi 'yaj sa' ro', taran' nij so' me síi cunuu sa' nimán qui'yaj so' adonj.

**3** Dan me se xcaj soj cuentá se vaa cunuu 'ee uxrá rá Rej ní' Diose ni'yaj so' man ní', ne ndāa ta'níi Diose guun ní', qui'yaj Diose chuguānj. Ne ta'nij Diose me xā' ní' adonj. Che'é dan ne ne'en nij síi man rihaan chumií nihánj man ní' daj sij me ní' man chuguānj. 'O se tananj uún, ne ne ne'en nij so' man ma'an Diose uún a man adonj. <sup>2</sup> Dan me se 'ee raj man nij soj, tinuj, nocoj, ne cuano nihánj me se ta'nij Diose me ní', ne ataa xcaj ní' cuentá daj sij guun ní' qui'yaj Diose vaa güii ei. Māan se ne'en ní' se vaa asa' ca'na' so', ne ase vaa so' ro', danj gāa ma'an ní' uún adonj. 'O se quene'en ní' man so', ne xcaj ya ní' cuentá daj vaa xā' so' nanj adonj. <sup>3</sup> Ne nij síi nucuaj rá man nanā nihánj se vaa ya vaa nanā nihánj me se ya cunuu sa' nimán nij so' qui'yaj nij so', ne ase vaa sa' nimán Jesucristó ro', danj gāa sa' nimán nij so' uún adonj.

<sup>4</sup> Dan me se nu' nij síi 'yaj cacun' ro', nij so' me nij síi na'vej rá cunō rihaan Diose, <sup>5</sup> ne ne'en nij soj se vaa ca'na' Jesucristó rihaan chumií nihánj, che'é rej ca'vee tinavij so' cacun' tumé yuvií, ne a doj cacun' taj tumé so' ma'. <sup>6</sup> Ne taran' nij síi yo'o noco' man so' ro', ne 'yaj nij so' cacun' ma'. Ne nij síi noco' tucuáán 'yaj cacun' ro', nuveé sij ne'en man Jesucristó me nij so' man adonj. <sup>7</sup> Dan me se ase vaa ta'nij vaa soj rihanj, tinuj, nocoj, ne se guun tihā' yu'unj a doj yuvií man soj man chuguānj. Síi 'yaj sa' ro', síi sa' me so', ne ase vaa

ma'an Jesucristó vaa so' adonj. <sup>8</sup> Ne sí 'yaj cacun' me se sí noco' se-tucuanj sí chree me so' ei. 'O se asij guun che'e Diose qui'yaj Diose chumij nihánj, ne sij 'yaj inanj cacun' me sí chree nanj adonj. Ne ca'na' ta'ní Diose rihaan chumij nihánj, che'é rej ca'vee tirí' so' nu' se vaa 'yaj sí chree yo' ei. <sup>9</sup> Ne taran' nij sí cunuu sa' nimán qui'yaj Diose ro', ne 'yaj nij so' cacun' a ma'. 'O se Diose me sí qui'yaj cunuu sa' nimán nij so', ne se ca'vee yo' o qui'yaj so' cacun', ése ma'an Diose qui'yaj ca'ngaa naca' nij so' nanj adonj. <sup>10</sup> Ne nihánj me xcaj ní' cuentá ni'yaj ní', gaa ne cunuu yaan ní' ta'ní Diose do', ta'ní sí chree do' ei. Dan me se nij sí ne 'yaj se sa' ro', nuveé sij noco' man Diose me nij so' ma'. Dan me se nuveé sij 'ee rá man tinúú me nij so' a man adonj.

**Nana nihánj taj xna'anj se vaa no xcuún ní' cunuu 'ee rá ní' man tuvi' ní' a**

<sup>11</sup> 'O se nana nihánj me nana cuno soj asij guun che'e soj canoco' soj man Diose, ne nana nihánj taj se vaa no xcuún ní' cunuu 'ee rá ní' man tuvi' ní' chuguanj. <sup>12</sup> Dan me se se qui'yaj ní' ndaa vaa qui'yaj sí cu'naj Caín gaa naá ma'. 'O se sij noco' tucuaán chi'ii me so', ne ticavi' so' tinúú so' adonj. Ne me che'é qui'yaj so' danj, rá soj ga. 'O se nu' rasuun qui'yaj so' me se inanj chi'ii ndo'o qui'yaj ma'an so', ne tinúú so' me se sa' inanj vaa rasuun qui'yaj tinúú so', ne che'é dan guun xcoj ruvaa rá so' ni'yaj so' tinúú so' adonj.

<sup>13</sup> Dan me se se ca'anj rá soj sese quitaj ri'yunj nij sí man rihaan chumij nihánj ni'yaj nij so' man soj, man tinuj, man nocoj. <sup>14</sup> 'O se che'é se cunuu 'ee rá ní' man tinúú ní' ro', che'é dan ne'en ní' se vaa aj tanáj xco ní' chrej chi'ii chrej qui'yaj cavi' ní', ne aj cunuu sa' nimán ní', ne ca'vee cayáan ní' ga Diose ei. Ne sí ne 'ee rá man tuvi' me se adi' se vaa nij sí cavi' ro', vaa nij so' nanj adonj. <sup>15</sup> Dan me se xa' taran' nij sí nachri' ni'yaj man tinúú me se ase vaa sí ticavi' man tinúú ro', vaa nij so', ne ne'en soj se vaa daj chihaa míj se ca'vee gaa i'na' sí vaa danj rihaan Diose nu' cavii nu' ca'anj ma'. <sup>16</sup> Ne Jesucristó ro', me sí ca'vej rá cavi' che'é ní', ne che'é dan ne'en ní' se vaa 'ee rá so' man ní' adonj. Ne che'é dan no xcuún ní' ca'nej nimán ní' cavi' ní' che'é tinúú ní' chuguanj.

<sup>17</sup> Dan me se sese vaa ndo'o rasuun man rihaan chumij nihánj nica' yo' o so', ne nda' se ne'en so' se vaa achiin ndo'o rasuun man tinúú so' tzaj ne na'vej rá so' racu'ij so' man tinúú so', ne nuveé sij aráj cochroj rihaan Diose me so' a man adonj. <sup>18</sup> Dan me se ase vaa ta'nij vaa soj chuguanj. Dan me se se guun cataj uun ní' nana uun se vaa aráj cochroj ní' rihaan Diose chuguanj. Qui'yaj ya ya ní' se sa' ndaa vaa me rá Diose qui'yaj ní', ne ya ya sij aráj cochroj rihaan Diose me ní' adonj.

**Nana nihánj taj xna'anj se vaa taj che'é guun na'aj ní' ni'yaj ní' Diose ma'**

<sup>19</sup> Dan me se sese qui'yaj ní' danj, ne quene'en ní' se vaa sij noco' ya nana ya me ní', ne dan me se guun ya

ya rá nimán ní' rihaan Diose ei. <sup>20</sup> 'O se nda' se ca'vee quinano rá ní' che'é cacun' tumé ní', tzaj ne sa' doj vaa Diose rihaan nimán ní', ne Diose me sí ne'en cunudanj adonj. <sup>21</sup> Dan me se 'ee raj man nij soj, tinuj, nocoj. Ne sese nuvi' cacun' tumé ní', ne se cuhu'vi' ní' ca'mii ní' ga Diose ma'. <sup>22</sup> Dan me se me ma'an rasuun cachinj ní' rihaan Diose, ne rque Diose cunudanj se vaa cachinj ni'yaj ní' rihaan so', che'é se sij uno se-nana so' me ní', ne uun niha' rá so' ni'yaj so' se sa' 'yaj ní' ei. <sup>23</sup> Dan me se nihánj me se vaa me rá Diose qui'yaj ní' a. Me rá Diose cuchuman rá ní' ni'yaj ní' man ta'ní so' Jesucristó, ne me rá Diose cunuu 'ee rá ní' ni'yaj ní' man tuvi' ní' ndaa vaa ca'ne' Diose suun rihaan ní' a. <sup>24</sup> Ne sí uno se-nana Diose ro', so' me sí yo' o noco' man Diose, ne yo' o ne Diose ga so' adonj. Ne nihánj me rej ne'en ní' se vaa yo' o ne Diose ga ní' ei. Che'é se xcaj ní' cuentá se vaa 'yaj suun Nimán Diose nimán ní', che'é dan ne'en ní' se vaa ne Diose ga ní' adonj.

**Nana nihánj taj xna'anj me nana ca'vee cunó ní' a**

**4** 'Ee raj man nij soj, tinuj, nocoj. Ne se guun cunó soj me ma'an nana ma'. Asino xcaj soj cuentá sese nana rque Nimán Diose me nana ca'mii yo' o so', ne sese Nimán Diose me sí rque nana yo', ne ca'vee cunó soj nana yo' ei. 'O se aj ca'na' ndo'o sí ne, ne taj nij so' se vaa sij nata' se-nana Diose me nij so', tzaj ne tu'va rma'an nij so' nanj ei. Dan me se danj tu'va nij so' rihaan nij sí man rihaan chumij nihánj che'é se me rá nij so' cuchuman rá nij sí man rihaan chumij nihánj chuguanj. <sup>2</sup> Tzaj ne nihánj me se vaa qui'yaj soj, gaa ne ca'vee xcaj soj cuentá me nana me nana ca'mii Nimán Diose ei. Sese cataj yo' o so' se vaa Jesucristó me sí ca'née Diose tinanii man yuvi' rihaan sayuun, ne guun Jesucristó yuvi' ca'na' so', cataj yo' o so', ne nana yo' me se-nana Nimán Diose adonj. <sup>3</sup> Tzaj ne nu' nij sí taj se vaa nuveé sij ca'née Diose man me Jesucristó me se nuveé nana rque Nimán Diose me yo' ma'. 'O se se-nana nij sí ne tu'va rma'an me yo', ne dan me se aj cuno soj se vaa ca'na' nij so', ne cataj nij so' se vaa sij ca'née Diose tinanii man yuvi' rihaan sayuun me ma'an nij so' ei. Ne yaj nihánj me se aj man ndo'o nij so' rihaan chumij nihánj yaj cuano chuguanj.

<sup>4</sup> Tzaj ne yaj nihánj me se sí cunuu sa' nimán qui'yaj Diose me nij soj, tinuj, nocoj. Ne aj qui'yaj canaan soj rihaan nij sí ne cuano ei. 'O se nuu Nimán Diose nimán soj, ne nucuaj doj Nimán Diose rihaan sí chree vaj rihaan chumij nihánj chuguanj. <sup>5</sup> Ne nij sí ne yo', tzaj ne sí man rihaan chumij nihánj me nij so', ne che'é dan inanj a'mii nij so' ndaa vaa nari' nij so' rihaan chumij nihánj, ne uno nij sí man rihaan chumij nihánj se-nana nij so' ei. <sup>6</sup> Tzaj ne sí cunuu sa' nimán qui'yaj Diose me ní', ne nij sí ne'en man Diose ro', uno nij so' se-nana ní' adonj. Ne xa' sí ne cunuu sa' nimán qui'yaj Diose, tzaj ne ne uno nij so' se-nana ní' a ma'. Che'é dan ne'en ní' me sí nuu Nimán Diose nimán, ne ne'en ní' me sí nuu nana tiha' yu'unj nimán chuguanj.

**Nana nihánj taj xna'anj se vaa no xcúún ní' cunuú 'ee rá ní' man tuvi' ní', che'é se 'ee rá Diose man ní' a**

<sup>7</sup> 'Ee raj man nij soj, tinuj, nocoj. Ne no xcúún ní' cunuú 'ee rá ní' man tuvi' ní' adonj. 'O se Diose me sí rqué rej nucuaj rihaan ní' cunuú 'ee rá ní' man tuvi' ní' a. Che'é dan nu' sí 'ee rá man tuvi' me se sí cunuú sa' nimán qui'yaj Diose me nij so' adonj. Ne ne'en nij so' man Diose adonj. <sup>8</sup> Ne sí ne 'ee rá man tuvi' me se ataa xcaj nij so' cuentá che'é Diose ei. 'O se ataa xcaj nij so' cuentá se vaa Diose me sí 'ee inanj rá man ní' adonj. <sup>9</sup> Ne nihánj me cataj xna'anj 'unj rihaan soj me che'é ne'en ní' se vaa 'ee rá Diose man ní' a. Dan me se nda' se orún' ya ta'ní Diose, tzaj ne ca'née Diose man ta'ní ma'an ya Diose rihaan chumij nihánj, che'é rej ca'vee gaa i'na' nimán ní' nu' cavii nu' ca'anj qui'yaj so' a. <sup>10</sup> Ne vaa che'é xcaj ní' cuentá se vaa ne caraa cochroj ní' rihaan Diose asino yaan ma'. Tananj asino yaan me se cunuú 'ee rá Diose ni'yaj Diose man ní', gaa ne ca'née so' man ta'ní so' che'é rej cavi' ta'ní so' ne tinavij ta'ní so' cacun' tumé ní' a. <sup>11</sup> Ne che'é se cunuú 'ee rá Diose man ní' ro', che'é dan no xcúún ní' cunuú 'ee rá ní' man tuvi' ní', tinuj, nocoj. <sup>12</sup> A doj yuvij ne quene'en rihaan man Diose nu' cavii nu' ca'na' ma'. Tzaj ne sese gaa 'ee rá ní' man tuvi' ní', ne ya ne Diose ga ní', ne aj cunuú sa' nimán ní' ndaa vaa guun rá Diose gaa cunuú 'ee rá Diose man ní' a.

<sup>13</sup> Dan me se che'é se rqué Diose Nimán Diose rihaan ní' ro', che'é dan ne'en ní' se vaa sij noco' man Diose me ní' ne yo' o ne so' nimán ní' a. <sup>14</sup> Ne aj ne'en núj se vaa ca'née Rej ní' Diose man ta'ní so' rihaan chumij nihánj che'é rej tinanii so' man nij sí man rihaan chumij nihánj rihaan sayuun, ne aj nata' núj nana yo' rihaan yuvij ei. <sup>15</sup> Ne sí taj rihaan tuvi' se vaa ta'ní Diose me Jesucristó ro', so' me sí 'o noco' man Diose, ne 'o ne Diose ga so' chuguanj. <sup>16</sup> Ne aj ne'en núj se vaa 'ee rá Diose man ní', ne amán rá núj se vaa 'ee rá so' man ní' ei.

Diose me sí 'ee rá man ní' ei. Ne sij 'o 'ee rá man tuvi' ro', so' me sí 'o noco' man Diose, ne 'o ne Diose ga so' ei. <sup>17</sup> Ne che'é dan sese 'ee rá ní' man tuvi' ní', ne asa' quisj güii ca'ne' Diose cacun' che'é yuvij, ne se cuhu'vi' ní' ma'. 'O se quene'en ní' se vaa ase vaa qui'yaj Jesucristó gaa vaj so' rihaan chumij nihánj ro', danj qui'yaj ma'an ní' uún adonj. <sup>18</sup> Che'é dan sí ya ya 'ee rá man tuvi' ro', a doj ne chu'vi' so' ma'. Sí chu'vi' me sí uun rá se vaa qui'yaj Diose sayuun man so', ne nuveé sij ya ya 'ee rá man tuvi' me sí guun danj rá ma'. <sup>19</sup> Dan me se 'ee rá ní' man tuvi' ní' che'é se asino cunuú 'ee rá ma'an Diose man ní' a. <sup>20</sup> Ne sese cataj yo' o so' se vaa aráj cochroj so' rihaan Diose, ne sese nachri' so' ni'yaj so' tinúú so', ne sí ne me so' ei. 'O se sese ruvi' ya tinúú so' ni'yaj so' tzaj ne ne 'ee rá so' man tinúú so', ne asa' ca'vee caraa cochroj so' rihaan Diose, sese ne ruvi' Diose ni'yaj so' ga. <sup>21</sup> Ne nihánj me nana cataj xna'anj Jesucristó rihaan ní', ne cataj so' se vaa sí aráj cochroj rihaan Diose ro', no xcúún so' gaa 'ee rá so' man tuvi' so' uún adonj, taj Jesucristó a.

**5** Cunudanj nij sí amán rá se vaa me Jesucristó sí ca'née Diose tinanii man yuvij rihaan sayuun ro', aj cunuú sa' nimán nij so', qui'yaj Diose chuguanj. Ne che'é dan sese aráj cochroj ní' rihaan Diose, ne no xcúún ní' gaa 'ee rá ní' man nij sí cunuú sa' nimán yo' ei. <sup>2</sup> Ne sese aráj cochroj ní' rihaan Diose, ne sese uno ní' nana cataj xna'anj Diose rihaan ní', ne veé sí aráj cochroj rihaan ta'ní Diose me uún ní' adonj. <sup>3</sup> Ne sese uno ní' nana cataj xna'anj Diose rihaan ní', ne sij aráj cochroj rihaan Diose me ní' chuguanj.

**Nana nihánj taj xna'anj se vaa sese cuchuman rá ní' ni'yaj ní' man Jesucristó, ne qui'yaj canaán ní' rihaan se nij man rihaan chumij nihánj a**

Ne ne sayuun vaa cunó ní' rihaan Diose ma'. <sup>4</sup> 'O se cunudanj nij sí cunuú sa' nimán qui'yaj Diose ro', qui'yaj canaán nij so' rihaan se nij man rihaan chumij nihánj, ne che'é se amán rá ní' ni'yaj ní' man Jesucristó ro', che'é dan aj qui'yaj canaán ní' rihaan chumij nihánj nanj ei. <sup>5</sup> Dan me se sí amán rá se vaa Jesucristó me ta'ní Diose ro', so' me sí 'yaj canaán rihaan se nij man rihaan chumij nihánj adonj.

<sup>6</sup> Nihánj me Jesucristó sí ca'na' cata' ne, ne 'o se ne ca'na' so' cata' ne uun so' ma'. Dan me se ca'na' so' cata' ne so', ne ca'na' so' cavi' so' che'é ní' uún adonj. 'O se Nimán Diose me se taj xna'anj Nimán Diose rihaan ní', ne amán ya rá ní', ése ya uxrá a'mii Nimán Diose adonj. <sup>7</sup> 'O se va'núj nij rasuun taj xna'anj rihaan ní' che'é Jesucristó ei. <sup>8</sup> Dan me se Nimán Diose taj xna'anj rihaan ní' che'é Jesucristó, ne che'é se cata' ne Jesucristó, che'é dan xcaj ní' cuentá che'é so', ne che'é se cavi' Jesucristó, che'é dan xcaj ní' cuentá che'é so', ne cuyaan a'mii va'núj nij rasuun yo' a. <sup>9</sup> Dan me se uno ní' nana nata' tuvi' ní' sí man rihaan chumij nihánj rihaan ní', ne che'é dan vaa che'é cunó ní' nana nata' Diose rihaan ní' a. 'O se sa' doj vaa Diose rihaan yuvij, ne nata' so' rihaan ní' che'é ta'ní so' a. <sup>10</sup> Dan me se sí amán rá ni'yaj man ta'ní Diose ro', so' me sí cuno se-nana Diose a. Tzaj ne sí na'vej rá cuchuman rá se-nana Diose ro', so' me sí uun rá se vaa sí ne me Diose a. 'O se ne cuchuman rá so' nana nata' Diose rihaan so' che'é ta'ní Diose ma'. <sup>11</sup> Ne nana nata' Diose rihaan ní' taj se vaa ca'vee cayáán ní' ga Diose nu' cavii nu' ca'anj, qui'yaj Diose, che'é rej cavi' ta'ní Diose che'é ní' a. <sup>12</sup> Sí noco' man ta'ní Diose me sí cayáán ga Diose nu' cavii nu' ca'anj ya ei. Tzaj ne sí na'vej rá canoco' man so' taj ma'. Se cayáán so' ga Diose ma'.

**Nana nihánj taj xna'anj se vaa xcaj ní' cuentá se vaa ca'vee cayáán ní' ga Diose nu' cavii nu' ca'anj a**

<sup>13</sup> Dan me se aj cachronj nana nihánj nayaaj nij soj, che'é rej quene'en soj se vaa cayáán soj ga Diose nu' cavii nu' ca'anj, che'é rej me soj sí amán rá ni'yaj man ta'ní Diose ei. <sup>14</sup> Ne cuano nihánj me se a doj ne chu'vi' ní' cachinj ni'yaj ní' 'o rasuun rihaan Diose a ma'. 'O se aj ne'en ya ní' se vaa sese ca'vej rá so' nıcaj ní' rasuun cachín ni'yaj ní' rihaan so', ne rqué so'

adonj. <sup>15</sup> Ne che'é se ne'en ní' se vaa cunō so' me ma'ān nanā cachin̄j ni'yaj ní' rihaan so', che'é dan ne'en ní' se vaa qui'yaj so' ndāa vaa cachin̄j ni'yaj ní' rihaan so' ei.

#### Nanā nihánj taj xna'anj che'é cacun' a

<sup>16</sup> Dan me se sese ne'en ní' tinúú ní' 'yaj so' me ma'ān cacun', ne cachin̄j ni'yaj ní' che'é so' rihaan Diose, ne Diose me sí carāā x'naa che'é cacun' qui'yaj so' adonj. Tzaj ne sese ne'en ní' man tinúú ní' 'yaj so' cacun' nocōo ndo'o cacun' qui'yaj cavi' nū' so' rihaan Diose, ne taj che'é cachin̄j ni'yaj ní' rihaan Diose che'é so' ā ma'. Dan me se vaa cacun' uun, ne vaa cacun' nocōo ndo'o qui'yaj cavi' nū' ní' rihaan Diose adonj. Tzaj ne che'é cacun' nocōo yo' me se se cachín ni'yaj soj mei. <sup>17</sup> Dan me se me ma'ān se nij 'yaj ní' me cacun' chuguanj. Tzaj ne se cavi' nū' ní' rihaan Diose qui'yaj me ma'ān cacun' yo' ma'. 'Q se ca'vee tinavij Diose cacun' yo' ei.

<sup>18</sup> Dan me se ne'en ní' se vaa nū' nij sí ca'ngaa nimán qui'yaj Diose ro', daj chihāā m̄j ne chéé nij so' xrej sí chree ma'. 'Q se tumé ta'níí Diose man nij so', ne se ca'vee qui'yaj chí'ij sí chree man nij so' a. <sup>19</sup> Ne ne'en ní' se vaa sí nocō' man Diose me ní' adonj. Tzaj ne cunudanj nij yuvīj mān rihaan chumīj nihánj nocō' man sí chree ei. <sup>20</sup> Ne ne'en ní' se vaa aj ca'na' ta'níí Diose, ne qui'yaj suun so' che'é ní', che'é rej ca'vee xcaj ní' cuentá che'é Diose yā, ne ne'en ní' se vaa me ní' sí nocō' man ma'ān yā ta'níí so' Jesucristó, ne Jesucristó ro', me ma'ān yā Diose, ne so' me sí qui'yaj cayáán ní' gā Diose nū' cavii nū' ca'anj adonj.

<sup>21</sup> Ase vaa ta'níj vaa nij soj rihanj, tinuj, nocoj. Dan me se cataj 'un̄j rihaan soj, ne cūtumé ndo'o soj man soj rihaan ya'anj acóy yuvīj mān rihaan chumīj nihánj ei. Ne se guun guun rá soj ni'yaj soj ā 'ó rasuun vaa danj ma'.

## 2 Juan

**1** Síi chii ngá mej, ne achrón 'unj yanj nihánj nayaa taran' nij soj sij narii Diose man sij nuu chre' rej achíin ni'yaj soj rihaan Diose a. Dan me se 'ee raj man soj, che'é rej sij noco' nana ya me taran' ní' a. Ne nu-veé orún' 'unj me síi 'ee rá man soj ma'. 'O se taran' nij síi ne'en nana ya 'ee rá man soj adonj. <sup>2</sup> 'Ee rá núj man soj che'é se nuy nana ya nimán ní', ne yo'ó cunuú nana ya yo' nimán ní' nu' cavii nu' ca'anj ruguanj. <sup>3</sup> Ne me rá 'unj qui'yaj Rej ní' Diose do', ta'níi so' Jesucristó do', se luj che'é nij soj, ne me rá 'unj cunuú 'ee rá roj so' ni'yaj roj so' man soj, ne me rá 'unj gaa xej nimán soj qui'yaj roj so', ne yo'ó canoco' soj nana ya ne gaa 'ee rá soj man tuvi' soj ei.

**Nana nihánj taj xna'anj se vaa yo'ó qui'yaj ní' nana cataj xna'anj Diose rihaan ní', ne gaa 'ee rá ní' man tuvi' ní' a**

<sup>4</sup> Guun niha' uxrá raj, che'é se xcaj 'unj cuentá se vaa ta'aj nij soj me síi yo'ó noco' tucuaán ya, ndaa vaa cataj xna'anj Rej ní' Diose rihaan ní' chuguanj. <sup>5</sup> Ne nihánj me se achíin ni'yaa 'unj rihaan soj se vaa qui'yaj nij soj ndaa vaa cataj xna'anj Diose rihaan ní' a. Ne nu-veé nana ca'na' naca rihaan ní' me nana nihánj ma'. Maan se nana cataj xna'anj Diose rihaan ní' asij guun che'e ní' canoco' ní' man so' me nana nihánj adonj. Ne nana nihánj taj se vaa cunuú 'ee rá ní' man tuvi' ní' a. <sup>6</sup> Sese gaa 'ee rá ní' man tuvi' ní', ne síi 'yaj ndaa vaa cataj xna'anj Diose rihaan ní' me ní' ei. Ne yo' me nana cataj xna'anj so' rihaan ní' asij guun che'e ní' canoco'

ní' man so', ne me rá so' yo'ó qui'yaj ní' nana yo' adonj. <sup>7</sup> 'O se yaj me se curihanj ndo'o nij síi tiha' yu'unj rihaan chumií nihánj, ne cataj nij so' se vaa nu-veé sij guun yuvií me Jesucristó a. Che'é dan me nij so' síi tiha' yu'unj a'mii nana ne, ne taj nij so' se vaa ma'an nij so' me síi ca'née Diose tinanii man yuvií rihaan sayuun a. <sup>8</sup> Cytumé ndo'o soj man soj se gaa nanj ca'anj ni'ya nu' nij rasuun sa' qui'yaj canaán soj ma'. Tzaj ne yo'ó canoco' soj nana ya, gaa ne ve'é naru'vee Diose rihaan soj ei. <sup>9</sup> Ne me ma'an síi tanáj se-tucuanj Jesucristó ro', nuvi' Diose yáan ga so' ma'. Tzaj ne síi noco' raan se-tucuanj Jesucristó me se so' me síi yo'ó yáan roj ta'nij Diose ga so' adonj. <sup>10</sup> Ne sese ca'na' 'o síi a'mii yo'ó nana rej yanj soj, ne se ca'vej rá soj catuy so' rihaan soj, ne se ca'mii sa' soj ga so' ma'. <sup>11</sup> 'O se síi a'mii sa' ga so' me síi racuíj man so' qui'yaj so' se chi'ij adonj.

**Nana nihánj taj xna'anj se vaa cuchí' Juan rej yanj nij so' a**

<sup>12</sup> Vaa ndo'o nana me rá 'unj cataj xna'anj 'unj rihaan soj, tzaj ne na'vej rá 'unj cachron 'unj cunudanj nij nana rihaan yanj nihánj, che'é se que'ee ndo'o nana me yo' ei. Tzaj ne cuchij rihaan soj, raj, gaa ne ca'vee ca'mii rihaan ma'an tuvi' ya ní', gaa ne guun niha' uxrá rá ní' gaa nari' tuvi' ní' chuguanj. <sup>13</sup> Ne nij síi narii Diose yanj chuman' nihánj ro', me rá taran' nij so' se vaa ve'é cayáan taran' soj ei.

## 3 Juan

**1** Síí chii ngá mej, ne achrón 'unj yanj nihánj nayaa so' sij cu'naj Gayo a. 'Ee raj mán so', che'é se sij noco' nana ya me ní' a. <sup>2</sup> Dan me se me rá 'unj se vaa cavii sa' so' ne gaa nucuáa so' á. 'O se ya ya vaj avii sa' nimán so' nanj adonj. <sup>3</sup> 'O se guun niha' uxrá rá 'unj, che'é se ca'na' doj tinúú ní' rihanj nihánj, ne nata' nij so' rihanj se vaa yo'ó noco' so' tucuáán ya ei. <sup>4</sup> Ne taj vaj yo'ó rasuun ca'vee qui'yaj guun niha' raj a ma'. Maan se orún' nana cunó 'unj se vaa ve'é noco' nij soj sij guun ta'níí 'unj man tucuáán ya, ne che'é nana yo' ro', uun niha' uxrá raj nanj adonj.

**Nana nihánj taj xna'anj se vaa ve'é racuíj síí cu'naj Gayo man nij síí chéé nata' se-nana Jesucristó a**

<sup>5</sup> Dan me se 'ee raj mán so', ne ve'é 'yáá so' racuíj so' man nij tinúú ní' nij síí 'na' yo'ó chuman', ne che'é dan síí ve'é noco' man síí 'nij ra'a man ní' mé so', raj adonj. <sup>6</sup> Ne aj nata' nij so' rihaan nij síí amán rá yanj chuman' nihánj se vaa cunuu 'ee rá so' man nij so' chuguanj. Ne cunaj uxrá sese yo'ó racuíj so' man nij so' gaa chéé nij so' que'ee chuman' yo' ei. 'O se síí 'yaj suun rihaan ma'an Diosé me nij so' adonj. <sup>7</sup> 'O se cavii nij so' nata' nij so' se-nana síí 'nij ra'a man ní', ne taj vaj a 'ó rasuun ne quirí' nij so' ra'a nij síí na'vej rá cunó se-nana Jesucristó a man chuguanj. <sup>8</sup> Che'é dan no xcúún ní' racuíj ní' man taran' nij síí chéé che'é Diosé, gaa ne guun ní' tuvi' nij so' síí nata' nana ya rihaan yuvií ei.

**Nana nihánj taj xna'anj che'é 'o síí chí'ii nimán a**

<sup>9</sup> Dan me se qui'yáj 'o yanj cartá ca'néé 'unj rihaan cunudanj nij síí amán rá ni'yaj man Jesucristó yanj chiháán so' a. Tzaj ne vaa yo'ó tuvi' nij so' síí cu'naj Diótrefes, ne so' me síí me rá guun chij rihaan nij so', ne na'vej rá so' cunó so' se-nanaj ma'. <sup>10</sup> Che'é dan, sese cuchí' uún 'unj rihaan so', ne cataj xna'anj 'unj ri-

haan so' che'é se nij 'yaj so' gaa tu'va so' nana nij che'é núj ei. Ne nuveé inanj nana nij a'mii so' ma'. Dan me se gaa uchi' nij tinúú ní' chiháán so', ne ne a'mii so' ga nij tinúú ní' ma'. Tananj uún, ne me ma'an síí me rá ca'mii ga nij tinúú ní', ne aráán so' chrej rihaan nij yuvií se gaa nanj ca'mii nij yuvií ga nij tinúú ní', ne ndaa rii so' xe' man nij yuvií chuguanj. Danj 'yaj síí cu'naj Diótrefes ei.

**Nana nihánj taj xna'anj se vaa ve'é qui'yaj ní' a**

<sup>11</sup> Dan me se 'ee rá 'unj mán so', tinuj. Ne se guun qui'yáá so' ndaa vaa 'yaj nij síí chí'ii ma'. Maan se qui'yáá so' ndaa vaa 'yaj nij síí vaa sa' á. 'O se síí 'yaj se sa' ro', me síí noco' man Diosé adonj. Ne síí 'yaj se chí'ii ro', ne ne'en so' man Diosé a ma'.

**Nana nihánj taj xna'anj che'é síí cu'naj Demetrio a**

<sup>12</sup> Cunudanj nij tinúú ní' taj xna'anj che'é síí cu'naj Demetrio se vaa síí vaa sa' me so', ne ya ya síí sa' me so' adonj. Yo' me nana taj xna'anj núj rihaan so', ne aj ne'éen so' se vaa nana ya me nij nana ataj xna'anj núj rihaan so' a.

**Nana nihánj taj xna'anj se vaa cuchí' Juan rej yanj Gayo a**

<sup>13</sup> Vaa ndo'o nana guun rá 'unj cataj xna'anj 'unj rihaan so', tzaj ne na'vej rá 'unj cachron 'unj nu' nana yo' rihaan yanj nihánj a man chuguanj. <sup>14</sup> Tzaj ne cuchij rihaan so', gaa ne ca'vee ca'mii ní' me ma'an nana rihaan tuvi' ní' ei. <sup>15</sup> Dínj gaa nimán so' á. Me rá nij tinúú ní' se vaa ve'é cayáán so' á. Cataj so' rihaan 'o 'o nij tinúú 'unj yanj chiháán so' se vaa ve'é cumán nij so' raj a.

# Judas

**1** 'Unj ro', me síí cu'naj Judas síí 'yaj suun rihaan Jesucristó, ne tinúú Santiagó mej a. Cachronj nana nihánj rihaan yanj ca'nej 'unj rihaan soj sij canacúun Dioso man canocó' man so' a. Dan me se 'ee rá Rej ní' Dioso man soj, ne nicaj yu'unj Jesucristó man soj se gaa nanj tanáj soj se-nanā Dioso a.

<sup>2</sup> Me raj gaa 'ee ndo'o rá Dioso man soj ne gaa xej nimán soj qui'yaj Dioso ne gaa 'ee ndo'o rá soj tuvi' soj qui'yaj Dioso a.

**Nanā nihánj taj xna'anj che'é nij síí narqué tucuáán ne a**

<sup>3</sup> Dan me se guun ndo'o raj cachronj nanā rihaan yanj ca'nej 'unj rihaan soj che'é daj gaa cavii sa' ndo'o taran' ní' vaa güii qui'yaj Dioso, tinuj, nocoj. Tzaj ne yaj me se nō xcúnj cachronj yo'ó nanā rihaan yanj, ne cataj xna'anj 'unj rihaan soj se vaa terquee ndo'o soj canocó' raan soj se-tucuanj Dioso tucuáán tucuachén nij síí nata' se-nanā Jesucristó rihaan soj sij cunuu sa' rihaan Dioso a. <sup>4</sup> 'O se aj catúj yuve doj nij síí narqué tucuáán ne sca'núj soj, ne asij naá ndo'o nó nanā rihaan danj Dioso che'é nij so' se vaa vaa güii quirān' nij so' sayuun, qui'yaj Dioso adonj. Sij na'vej rá cunō rihaan Dioso me nij so', ne aj nari' nij so' nanā se vaa me rá Dioso ca'nee Dioso cacun' xráá nij so', ne che'é dan taj nij so' se vaa ca'vee qui'yaj nij so' me ma'an se nij gā nij chanā nihā' rá a. Dan me se grún' Jesucristó me síí 'nij ra'a man ní', tzaj ne taj che'é cunō nij so' rihaan Jesucristó, rá nij so' a.

<sup>5</sup> Ndā' se aj ne'en soj nu' nanā nō rihaan danj Dioso, tzaj ne na'vej raj quini'yōn soj nanā yo', ne che'é dan noná uún 'unj nanā nihánj xrée soj, ne dan me se síí 'nij ra'a man ní' ro', tinanii so' man taran' nij síí israelitá rihaan nij síí man Egiptó gaa naá, tzaj ne ta'aj nij so' ro', ne cuchuman rá ni'yaj man Dioso, ne che'é dan cachén doj yo', gaa ne cavi' nij so', qui'yaj Dioso a. <sup>6</sup> Ne aj ne'en soj se vaa ta'aj nij se-mozó Dioso ro', ne ca'vej rá nij so' caṭa nij so' suun ca'ne' Dioso rihaan nij so', ne curihanj nij so' rej guun rá Dioso cumān nij so', ne che'é dan numij nii man nij so', ne yo'ō veé danj gaa numij nij so' cayáán nij so' rej rmi' ndāa se quisij güii guee güii ca'ne' Dioso cacun' che'é nij so', ne daj chihāā mij se ca'vee quinaniij nij so' ma'. <sup>7</sup> Dan me se quirān' nij so' ndāa vaa quirān' nij síí man roj chuman' cu'naj Sodoma gā Gomorra gā yo'ó nij chuman' naj nichrun' a. Dan me se ase vaa se chi'ii qui'yaj ta'aj se-mozó Dioso yo' ro', danj vaa se chi'ii qui'yaj nij síí man nij chuman' yo', ne ndāa guun rá nij so' cotoj nij

so' gā chii chanā do', gā xcuu do', ne che'é dan yuun che'e tucuayuu Dioso ya'an chiháán nij so', ne che'é dan me ca'vee xcaj ní' cuentá se vaa sese qui'yaj ní' se chi'ii, ne cacāa ní' rihaan ya'an nu' cavii nu' ca'anj, qui'yaj Dioso adonj.

<sup>8</sup> Ndā' se ne'en nij síí narqué tucuáán ne rihaan soj daj vaa sayuun quirān' nij síí israelitá do', nij se-mozó Dioso do', nij síí man Sodoma do', tzaj ne taj se qui'yá' xcaj nij so' cuentá ma'. 'O danj 'yaj nij so' se nij, ne ase vaa síí a'nu' vaa nij so', che'é se amán rma'an rá nij so' nanā ne nanj ei. Ne che'é dan 'yaj ndo'o nij so' se chi'ii, ne tucuáá nij so' rihaan Dioso, ne a'mii nij so' nanā chi'ii che'é nij se-mozó Dioso a. <sup>9</sup> Tzaj ne ndāa síí cu'naj Miguee síí 'nij ra'a man nu' nij se-mozó Dioso ro', gaa naá gaa cavi' Moisés ne canó tuvi' Miguee gā síí chree che'é cúu man Moisés, ne ne quisij rá Miguee ca'mii so' nanā nij rihaan síí chree ma'. Māān se cataj Miguee rihaan síí chree se vaa síí 'nij ra'a man ní' me síí caxrii yuvaā man síí chree, cataj Miguee a. <sup>10</sup> Tzaj ne inō 'yaj nij síí narqué tucuáán ne gā síí cu'naj Miguee yo', ne ndā' se ne ne'en nij so' daj vaa nij se-mozó Dioso, tzaj ne ne chu'vi' nij so' ca'mii nij so' nanā nij che'é nij se-mozó Dioso ma'. Ne ase vaa xcuu ne acāj cuentá 'yaj náá guun se vaa me rá qui'yaj ro', danj vaa nij síí narqué tucuáán ne, ne che'é dan quiri' nij so' vaa güii adonj. <sup>11</sup> Niquee nij so' che'é sayuun quirān' nij so' nanj adonj. 'O se ase vaa qui'yaj síí cu'naj Caín gaa ticavi' so' man tinúú so' gaa naá ro', danj vaa 'yaj nij so', ne xcoj ruvaā rá nij so' gā tuvi' nij so' a. Ne ase vaa qui'yaj síí cu'naj Balaam gaa naá ro', danj vaa 'yaj nij so', ne me ndo'o rá nij so' qui'yaj canān nij so' sa'anj, ne che'é dan tiha' yu'unj nij so' man tuvi' nij so' a. Ne ase vaa qui'yaj síí cu'naj Coré ro', danj vaa 'yaj nij so', ne dan me se tucuáá Coré rihaan Moisés, ne che'é dan chumanj yo'óo man nij tuvi' nij so', qui'yaj Dioso a. Ne danj quirān' guee nij síí narqué tucuáán ne, quirān' uxrá nij so' sayuun vaa güii, qui'yaj Dioso ei.

<sup>12</sup> Gaa nuu chre' soj chá soj chraa, ne ne chu'vi' nij síí narqué tucuáán ne yo' qui'yaj nij so' se nij, ne che'é dan ase vaa luj chi'ii ro', danj vaa nij so' rihaan soj ei. Síí taj ya'anj man ma'an me nij síí narqué tucuáán ne yo', ne ne racuij nij so' man tuvi' nij so' ma'. Ase vaa ngāa nō rma'an xta' ne ne aman' 'yaj ro', vaa nij so', ne vaj nij so' rej rque do', rej xraj do' adonj. Ne ase vaa chruun nuvi' vaj chruj mán raā gā sij dió cumān chruj raā ro', vaa nij so', ne chruun nacōo me nij so', ne chruun quiriháj nii quiri'ij nii rihaan yo'óo me uún nij so' adonj. Ase vaa ngāa gā chruun ro', danj vaa nij síí narqué tucuáán ne yo' ei. Asino yaān guun rá yuvi' se

vaa síi sã' me nij so', tzaj ne nuvi' suun sã' síj, 'yaj nij so' ma'. <sup>13</sup> Ase vaa rii ndo'o na ya'anj yatan' chi'ij rej tu'va na ya'anj ro', danj vaa rii ndo'o nij so' se chi'ij 'yaj nij so' quene'en yuvij, ne ase vaa yati' natuná rej chée 'o 'o yavii ro', danj vaa uún nij so', ne taj che'é gaa nu-cuaj rá ní' man nij so' ma'. Vaa güii, ne ca'nej Diose man nij so' cayáán nij so' rej rmi' ndo'o nu' cavii nu' ca'anj nanj ei.

<sup>14</sup> Síi cu'naj Enoc me se aj síj vatã' xii so' cachén, ne dan me se ta'níi ta'nij si'nõ síi cu'naj Adán me so', ne dan me se nata' so' che'é nij síi narque tucuáán ne rihaan soj cuano, ne dan me se cataj síi cu'naj Enoc a: "Cunõ soj ca'mij á. Vaa güii, ne ca'na' síi 'nij ra'a man ní' ga que'ee mij nij se-mozó so' nij síi guee, <sup>15</sup> ne ca'ne' so' cacun' che'é cunudanj yuvij, ne catãj so' se vaa tumé nij síi ne noco' man Diose cacun' che'é nu' cacun' qui'yaj nij so' do', che'é nu' nanã nij ca'mii nij so' che'é Diose do' a." Danj ca'mii Enoc che'é nij síi narque tucuáán ne rihaan soj nihánj cuano a. <sup>16</sup> Nij so' me se taj se qui'yá' carãn' rá nij so' ni'yaj nij so' se vaa 'yaj Diose do', se vaa 'yaj tuvi' nij so' do' ma'. Inanj 'yaj nij so' se nij ndaa vaa me rá ma'an nij so', ne inanj danj 'yaj nij so' nanj chuguãnj. Síi xtã' inanj a'mii me nij so', ne ve'é ndo'o a'mii nij so' ga ru'vee che'é se inanj me rá nij so' quirí' nij so' sa'anj man nij ru'vee adõnj.

**Nanã nihánj taj xna'anj che'é tucuáán narqué Judas rihaan nij síi cuchumán ya rá ni'yaj man Jesucristó a**

<sup>17</sup> Tzaj ne soj ro', yo'o cunuû rá soj nanã cataj xna'anj nij apóstol cune' Jesucristó sij 'nij ra'a man ní' man nata' rihaan yuvij che'é so', tinuj, nocoj. <sup>18</sup> Nihánj me nanã ca'mii nij so' rihaan soj a: "Asã' nichrun' ca'anj ni'yã chumij, ne ca'na' síi ca'ngã' nacõõ ni'yaj man nij síi amán rá ni'yaj man Jesucristó, ne inanj qui'yaj nij so' se nij, ne guun rá nij so' cachee nij so' ndaa vaa me rá

ma'an nij so', ne se canoco' nij so' man Diose a man adõnj". Danj vaa nanã cataj nij apóstol che'é nij síi narqué tucuáán ne a.

<sup>19</sup> Nij síi narqué tucuáán ne yo' ro', 'yaj uun yanij nij síi noco' man Jesucristó rihaan tuvi' nij so' ei. Inanj che'é nee man nij so' acaj nij so' cuentá, ne che'é yo'ó rasuun ne acaj nij so' cuentá a ma'. Ne ase vaa xcuu vaa nij so', ne nuvi' nimán nij so' nuu a ma'. <sup>20</sup> Tzaj ne soj me se yo'o raan canoco' soj se-tucuãnj Diose tucuáán guee, tinuj, nocoj. Ne ca'vej rá soj racuáj Nimán Diose man soj cachinj ni'yaj soj rihaan Diose ei. <sup>21</sup> Yo'o qui'yaj soj ndaa vaa me rá Diose, gaa ne yo'o gaa 'ee rá Diose man soj chuguãnj. Na'vij soj güii cayáán ní' rihaan Diose nu' cavii nu' ca'anj qui'yaj Jesucristó sij 'nij ra'a man ní', che'é se 'ee rá so' man ní' ei.

<sup>22</sup> Xã' nij síi uun vij rá, tzaj ne naquiyaj nicã soj nimán nij so' canoco' nij so' Diose ei. <sup>23</sup> Nagõ' soj chrej nucuaj man yo'ó ta'aj nij síi tumé cacun' che'é rej quinaniij nij so' rihaan ya'an a. Ne gaa 'ee rá soj man nij síi aj cuno se-nãnj nij síi narqué tucuáán ne ei. Tzaj ne chuchuví' soj se gaa nanj qui'yaj soj ndaa vaa 'yaj nij so', ne quinachri' soj ni'yaj soj se chi'ij 'yaj nij so' ei.

**Nanã nihánj taj xna'anj se vaa sã' uxrã vaa Diose daj a güii a**

<sup>24</sup> Sã' uxrã vaa orún' Diose síi tinanii man ní' rihaan sayuun, ne guun nucuaj so' caráán so' rihaan ní' se qui'yaj ní' cacun' man chuguãnj. Guun nucuaj so' tumé so' man ní' ndaa se quisij güii cayáán ní' rihaan so' rej guun chij so', ne gaa nicã nimán ní' güii yo', qui'yaj so', ne guun niha' uxrã rá ní', qui'yaj so' adõnj. Ne Jesucristó sij 'nij ra'a man ní' me síi racuáj man ní', ne che'é dan catãj ní' se vaa sã' uxrã vaa Diose nu' cavii nu' ca'na', ne sã' uxrã 'yaj so' yaj, ne sã' uxrã qui'yaj so' nu' cavii nu' ca'anj, ne yo'o guun chij so' chuguãnj. Veé danj gaa ya ei.



# Apocalipsis

**1** Nihánj me nij rasuun tihaan naça Jesucristó rihaan nij síi 'yaj suun rihaan so', ndaa vaa cataj xna'anj ma'an Dioso rihaan so', ne rasuun guun ra'yanj ya vaa güii me nij rasuun yo' ei. Ne Jesucristó ro', so' me síi ca'née se-mozó rihaan síi cu'naj Juan síi nuu 'yaj suun rihaan so', ne dan me se xcaj síi cu'naj Juan cuentá che'é nu' nij rasuun nihánj, qui'yaj Jesucristó ei. <sup>2</sup> Ne síi cu'naj Juan me síi ataj xna'anj nihánj rihaan nu' nij yuvij che'é nu' se-nana Dioso ndaa vaa cataj xna'anj Jesucristó rihaan so', ne rasuun quene'en ma'an so' me nu' nij rasuun nihánj adonj. <sup>3</sup> Ne cavii sa' uxrá nij síi nayaa nana nihánj rihaan tuvi', ne tananj uún ne cavii sa' nij síi a'née sa' nana nihánj, sese ya 'yaj nij so' ndaa vaa taj nana no rihaan yanj nihánj chuguanj. 'O se daj doj quisij ya güii ca'na' nij rasuun yo' ei.

<sup>4</sup> Dan me se 'unj sij cu'naj Juan me síi 'yaj yanj nihánj, ca'nej 'unj rihaan cunü' chij ya x'ne' nij soj sij man estado Asia sij amán rá ni'yaj man Jesucristó a. Dan me se me rá 'unj qui'yaj ndo'o Dioso qui'yaj ndo'o Nimán Dioso qui'yaj ndo'o Jesucristó qui'yaj ndo'o se luj che'é nij soj, ne me rá 'unj gaa xej nimán soj, qui'yaj nij so' adonj. Ne Dioso ro', me síi nicun' yaj, ne asij naá nicun' so', ne vaa güii ca'na' so' adonj. Ne Nimán Dioso ro', vaa guée inanj, ne chij ya se nucuaj nicaj so', ne nicun' so' rihaan xrúun Dioso chruun xlá rej rii ta'nga' Dioso ei. Ne dan me se Jesucristó me síi nata' nana ya rihaan ní', ne so' me síi cunuu i'na' uún asino yaan rihaan cunudanj nij síi cavi' síi cunuu i'na' uún vaa güii, ne uun chij so' rihaan cunudanj nij síi nicaj suun rey man rihaan chumií nihánj adonj.

Ne Jesucristó me síi 'ee rá man ní', ne aj tinanii so' man ní' rihaan cacun' tumé ní' gaa cavi' so' a. <sup>6</sup> Ne cune' so' man ní' guun ní' síi nicaj suun rey ne guun ní' xrej nuu rihaan Rej so' Dioso a. Ne ve'é guun chij so' nu' cavii nu' ca'anj adonj. Veé daj gaa ya ei.

<sup>7</sup> Dan me se ca'na' so' xráa ngaa, ne quene'en cunudanj nij yuvij man so', ne ndaa nij síi qui'yaj sayuun man so' quene'en man so', ne go' cunudanj nij yuvij man rihaan chumií cuxru' nimán nij so', che'é rej quinano ndo'o rá nij so' che'é cacun' tumé nij so' adonj. Veé daj gaa ya ei.

<sup>8</sup> Ne Dioso síi 'nij ra'a man ní' taj:

—'Unj me se ase vaa letrá A ga letrá Z vaa 'unj a. Dan me se veé 'unj nicun' asij rque, ne veé 'unj canicun' nu' cavii nu' ca'anj adonj. Dan me se veé 'unj nicun' yaj, ne veé 'unj nicun' asij naá, ne vaa güii cuchí' yá 'unj rihaan soj a. Ne 'unj me síi guun nucuaj qui'yaj cunudanj a —taj Dioso síi 'nij ra'a man ní' a.

**Nana nihánj taj xna'anj daj vaa Jesucristó gaa curuvi' so' rihaan síi cu'naj Juan a**

<sup>9</sup> 'Unj sij cu'naj Juan ro', tinúú soj mé 'unj, ne síi ran' sayuun ga soj mé 'unj, ne síi nucuaj nimán rihaan sayuun mej ga soj, ne daj ran' ní' che'é se sij me rá guun chij Dioso rihaan chumií nihánj me nu' ní' a. Dan me se yáan 'unj yo'óo naj tanuu na ya'anj yo'óo cu'naj Patmos, ne yo' me rej ca'née nii manj che'é se sij nata' se-nana Dioso mej ne sij taj xna'anj nana che'é Jesucristó mej a. <sup>10</sup> Ne 'o güii na'víj ní' rihaan síi 'nij ra'a man ní' me se quene'en nimanj rasuun, ne dan me se rej xcoj ro', nucuaj ndo'o ca'mii yo'o so' cunoj, ne daj se uun rá' gaa a'yánj nii chruun a'yánj ro', daj guun raj gaa cunoj se-nana so' adonj. <sup>11</sup> Ne cataj so':

—'Unj ro', me ya síi canicun' asij rque, ne veé 'unj canicun' nu' cavii nu' ca'anj adonj —taj so' a. Dan me se cataj so'— Cachron so' nana che'é nu' nij rasuun quene'en so' rihaan yanj, ne ca'nej so' rihaan nij síi amán rá ni'yaj manj yanj chij chuman' á. Dan me se rihaan nij síi man Efeso do', rihaan nij síi man Esmirna do', rihaan nij síi man Pérgamo do', rihaan nij síi man Tiatira do', rihaan nij síi man Sardis do', rihaan nij síi man Filadelfia do', rihaan nij síi man Laodicea do', ca'nej so' yanj yo' á —taj so' cunoj a.

<sup>12</sup> Gaa ne canicaj 'unj ni'yaj 'unj man síi ca'mii nana dan rihanj, ne quene'enj chij aga' oró míi aga' taj aga' ya'an a. <sup>13</sup> Ne tanuu nij aga' taj aga' ya'an ro', quene'enj 'o síi nicaj yu'unj man yuvij, ne nuu so' yatzij xcaan, ne 'nij catuun so' merque caxra' anó ndaa rucuaa so' a. Ne merque aga' oró míi me yo' a. <sup>14</sup> Ne raá so' do', yuvé raá so' do', me se catzii ndo'o vaa yo' a. Dan me se ase vaa cachij xráa matzinj catzii do', ase vaa yu've' do', daj vaa raá so' a. Ne rlij rihaan so' ro', ase vaa ya'an vaa yo', chuguun yo' a. <sup>15</sup> Ne tacóo so' ro', ase vaa aga' bronce marée axríj ya'an nii man rque chrúun hornó vaa tacóo so' a. Ne daj se uun rá' unó' cayuj vaj chráa xij ro', daj guun raj cunoj nana ca'mii so' a. <sup>16</sup> Ne ra'a so' rej nuva' so' ro', coró' so' chij yati', ne neê espadá sihaa nu' niha rihaan curihanj tu'va so', ne ase vaa nucuaj ndo'o chuguun güii ro', daj vaa chuguun nu' so' ni'yaj 'unj man so' a.

<sup>17</sup> Dan me se gaa quene'en 'unj man so', ne naxrú' 'unj ca'anj quináa 'unj rihaan yo'óo tacóo so', ne ase vaa síi cavi' ro', daj vaa 'unj a. Dan me se cuta' so' ra'a so' rej nuva' so' xráj, ne cataj so':

—Se cuchu'ví' so' ma'. 'Unj ro', me síi táa yaan rihaan cunudanj, ne veé 'unj me síi nocó' xco rihaan cunudanj

adonj. <sup>18</sup> Ne síí vaa i'na' mej a. Dan me se cavi' 'unj, tzaj ne cuano nihánj me se vaa i'na' uún 'unj, ne dan me se yo' o gaa i'na' 'unj nu' cavii nu' ca'anj adonj. Ne 'unj ro', me síí no xcúún cataj me síí cavi' ne me síí ca'anj rej man nij síí cavi' adonj.

<sup>19</sup> "Che'é dan me cachron so' nana rihaan yanj che'é nu' se vaa quene'én so' nihánj, ne dan me se cachron so' che'é rasuun man cuano, ne cachron so' che'é rasuun ca'na' rej rihaan ní' a. <sup>20</sup> Ne nihánj me se cataj xna'anj 'unj che'é chij nij yati' taj ra'aj ne'én so' do', che'é chij nij aga' oró míí aga' taj aga' ya'an do' a. Dan me se chij nij yati' do', nij aga' taj aga' ya'an do', ma'an nij yuvií amán rá ni'yaj manj yanj chij nij aman' me nij rasuun yo' a —taj so' rihanj a.

### Nana nihánj me nana ca'anj rihaan nij síí amán rá ni'yaj man Jesucristó ne chuman' Efeso a

**2** Gaa ne cataj so' rihanj a:

—Nana nihánj me nana cachron so' ca'nej so' rihaan nij síí amán rá ni'yaj manj ne chuman' Efeso á: "Dan me se nihánj me nana ca'mii 'unj sij nicaj chij yati' ra'a rej nuva' ei. Ne sij vaj sca'núj chij nij aga' oró míí taj aga' ya'an mej ei. Dan me se cunq soj sij ne chuman' Efeso a. <sup>2</sup> Aj ne'én 'unj daj 'yaj soj se vaa 'yaj suun uxrá soj ne nucuaj ndo'o vaa nimán soj rihaan sayuun adonj. Ne aj ne'enj se vaa na'vej uxrá rá soj ni'yaj soj man nij síí chi'ii mei. Ne xa' nij síí tiha' yu'unj tu'va rma'an se vaa sij cune' Jesucristó nata' rihaan yuvií che'é so' me nij so', tzaj ne aj nuchruj raq soj che'é nij so', ne aj xcaj soj cuentá se vaa nuveé sij a'mii ya me nij so' a man adonj. <sup>3</sup> Ne nucuaj ndo'o vaa nimán soj rihaan sayuun quiran' soj che'é rej sij nocq' manj me soj, ne ne ca'ne' a doj rá soj a ma'. <sup>4</sup> Tzaj ne vaa 'o cacun' tumé soj rihanj se vaa asij rque doj me se caráj cochroj ndo'o soj rihanj, tzaj ne yaj me se do' do' ca'ne' rá soj aráj cochroj soj rihanj ei.

<sup>5</sup> "Che'é dan nanuj rá soj daj qui'yaj soj gaa ataa ca'anj yanj soj rihanj, ne canicaj nimán soj, ne guun rá soj ndaa vaa guun rá soj asino yaan á. Sese se canicaj nimán soj, ne cuchí' 'unj rihaan soj, ne ca'nee 'unj se-aga' soj aga' taj aga' ya'an rej nicun' yo' nanj adonj. <sup>6</sup> Tzaj ne nihánj me se sa' qui'yaj soj, se vaa na'vej uxrá rá soj ni'yaj soj se vaa 'yaj nij síí nicolaíta, ne veé danj vaa guqe, ne na'vej rá ma'anj ni'yaj 'unj se vaa 'yaj nij so' uún ma'. <sup>7</sup> Dan me se sese taj yu'uj xréé soj, ne no xcúún soj cunq soj nana nihánj nana taj xna'anj Nimán Diose rihaan nij síí amán rá ni'yaj manj ne 'o 'o chuman' a. Dan me se rihaan síí 'yaj canaán rihaan nu' sayuun me se rque 'unj chruj man raq chruun qui'yaj gaa i'na' yuvií nu' cavii nu' ca'anj ga Diose cha so', ne chruun yo' ro', nicun' rej sa' ndo'o rej rihaan ma'an Diose ei." Veé danj sij nana cachron so' ca'nej so' rihaan nij síí amán rá ni'yaj manj ne chuman' Efeso a —taj so' rihanj a.

### Nana nihánj me nana ca'anj rihaan nij síí amán rá ni'yaj man Jesucristó ne chuman' Esmirna a

<sup>8</sup> Gaa ne cataj uún so' rihanj a:

—Nana nihánj me nana cachron so' ca'nej so' rihaan nij síí amán rá ni'yaj manj ne chuman' Esmirna a: "Dan me se nihánj me nana ca'mii 'unj sij nicun' asij rque do', sij canicun' nu' cavii nu' ca'anj do', ne sij cavi' mej, tzaj ne cunuu i'na' ya uún 'unj ei. <sup>9</sup> Ne'én 'unj daj vaa sayuun ran' nij soj sij man chuman' Esmirna, ne ne'én 'unj se vaa nique ndo'o soj adonj. Tzaj ne rihaan Diose me se síí ru'vee me ya soj ei. Ne vaa nij síí tu'va rma'an taj se vaa yuvií israelitá me nij so', tzaj ne nuveé sij israelitá me ya nij so' ma'. Maan sij tucu'yón se-nana Satanás me nij so' nanj á. Ne ne'én 'unj se vaa a'mii nij so' nana nij che'é soj ei.

<sup>10</sup> "Tzaj ne a doj se cuchu'vi' soj che'é sayuun quiran' soj ma'. Dan me se síí chree ro', me se caxrii so' taga' man ta'aj soj, che'é rej cuchu'vi' soj ne tanáj soj tucuáán sa' ei. Ne chi' güii quiran' soj sayuun danj chuguanj. Dan me se nda' se ticavi' nii man soj, tzaj ne yo' o canoco' soj manj, ne vaa güii rque 'unj 'o cachriin cunuú raq soj, che'é rej sij gaa i'na' nu' cavii nu' ca'anj ga Diose guun soj ei. <sup>11</sup> Dan me se sese taj yu'uj xréé soj, ne no xcúún soj cunq soj nana nihánj nana taj xna'anj Nimán Diose rihaan nij síí amán rá ni'yaj manj ne 'o 'o chuman' a. Dan me se se quiran' síí qui'yaj canaán yo' sayuun asa' cavi' uún nij síí tumé cacun' a ma'." Veé danj sij nana cachron so' ca'nej so' rihaan nij síí amán rá ni'yaj manj ne chuman' Esmirna a —taj uún so' rihanj a.

### Nana nihánj me nana ca'anj rihaan nij síí amán rá ni'yaj man Jesucristó ne chuman' Pérgamo a

<sup>12</sup> Gaa ne cataj uún so' rihanj a:

—Nana nihánj me nana cachron so' ca'nej so' rihaan nij síí amán rá ni'yaj manj ne chuman' Pérgamo a: "Dan me se nihánj me nana ca'mii 'unj sij nicaj neé espadá sihaq nu' niha rihaan rihaan soj sij ne chuman' Pérgamo a. <sup>13</sup> Ne'én 'unj rej ne nij soj, se vaa uun chij ndo'o Satanás rej yo' ei. Tzaj ne yo' o noco' soj manj, ne ne tanáj xcq soj se-tucuanj 'unj ma'. Dan me se vaa síí cu'naj Antipas síí yo' o nata' rihaan yuvií che'é 'unj, ne nda' se ticavi' nii man so' rej ne soj rej ne ma'an Satanás, tzaj ne ne ca'ne' rá soj ga se-nanaj ma'. <sup>14</sup> Tzaj ne vaa doj cacun' tumé soj rihanj, se vaa maan sca'núj soj 'nij síí nocq' se-nana síí cu'naj Balaam síí tucu'yón rihaan síí cu'naj Balac se vaa ca'nej so' tucuáán chi'ii nimán nij síí israelitá se vaa cha' nij síí israelitá rasuun rque nii rihaan nij ya'anj cacq' nij tuvi' Balac ne qui'yaj nij so' cacun' ga chana, ne dan me se quiri' nij síí israelitá rihaan Diose, qui'yaj cacun' yo' ei. <sup>15</sup> Ne tananj uún, ne man ta'aj nij síí nicaj se-tucuanj nij síí nicolaíta sca'núj soj uún ei. Dan me se nachrí' 'unj ni'yaj 'unj tucuáán yo' ei.

<sup>16</sup> "Che'é dan canicaj nimán soj, tanáj soj chrej chi'ii yo' ei. Se taj, ne ra'yanj cuchí' 'unj rihaan soj, ne nicaj

'unĵ neê espadá nuŷ tu'vaj cunuĵ 'unĵ ĝa nij soĵ adonĵ.  
<sup>17</sup> Sese taj yu'uj xréé soĵ, ne no xcúún soĵ cunĵ soĵ nana nihánĵ nana taj xna'anĵ Nimán Dioŝe rihaan nij sí amán rá ni'yaj manĵ ne 'o 'o chuman' a. Rihaan sí 'yaj canaán ro', rque 'unĵ se cu'naj maná se 'nij yuve cha so', ne caxriĵ 'unĵ 'o yahij catziĵ ston so', ne quino naca 'o se-chuviĵ yo'o so' niĵaj sí qui'yaj canaán, ne dan me se taj a 'ó sí ca'vee nayaá nana yo' a ma'. Maan se orún' sí niĵaj yahij catziĵ yo' me sí quene'en me taj yo' nanĵ adonĵ." Veé danĵ síj nana cachron so' ca'nej so' rihaan nij sí amán rá ni'yaj manĵ ne chuman' Pérgamo a —taj so' rihanĵ a.

**Nana nihánĵ me nana ca'anĵ rihaan nij sí amán rá ni'yaj man Jesucristó ne chuman' Tiatira a**

<sup>18</sup> Ĝaa ne cataĵ uún so' rihanĵ a:

—Ĝaa ne cachron so' nana nihánĵ ne ca'nej so' rihaan nij sí amán rá ni'yaj manĵ ne chuman' Tiatira a: "Dan me se nana nihánĵ me nana ca'mii 'unĵ ta'nij Dioŝe cunĵ soĵ, ne 'unĵ ro', ase vaa ya'an vaa rliĵ rihanĵ, ne ase vaa aga' bronce maree vaa tacóĵ a. <sup>19</sup> Ne'én 'unĵ daj 'yaj nij soĵ se vaa 'ee rá soĵ tinúú soĵ ne yo'o amán rá soĵ ni'yaj soĵ manĵ ne 'yaj suun soĵ che'é tinúú soĵ ne yo'o nucuaj vaa nimán soĵ rihaan sayuun a. Dan me se doj a 'yaj suun soĵ yaj adonĵ. Ĝaa guun che'e soĵ canoco' soĵ manĵ me se doj doj 'yaj suun soĵ nda' rá se 'yaj soĵ yaj ei. <sup>20</sup> Tzaj ne vaa cacun' tumé soĵ rihanĵ se vaa a'vej rá soĵ cayáán chana cu'naj Jezabel ĝa soĵ a. Ne no' me níĵ taj se vaa chana nata' se-nana Dioŝe me no', ne tucu'yón no' man yuviĵ, ne tiha' yu'unĵ no' man nij sí 'yaj suun rihaan ma'anĵ ei. Ndaa síj, ĝaa ne 'yaj nij so' cacun' ĝa chana ne chá nij so' rasuun rque nii rihaan ya'anĵ cacóĵ nii uún adonĵ. <sup>21</sup> Ne ca'ne' raj cachon doj ĝüii che'é rej guun raj se vaa canicaj nimán no' ne tanáj no' chrej chi'ii ne canoco' no' chrej sa' adonĵ. Tzaj ne na'vej rá no' canicaj rá no' ne tanáj no' se chi'ii 'yaj no' ma'. <sup>22</sup> Che'é dan nihánĵ me se quiri'ij 'unĵ man no' rihaan chruun camá, ne nij sí qui'yaj cacun' ĝa no' ro', quiran' uxrá nij so' sayuun, qui'yaj adonĵ. Danĵ quiran' nij so' sese se canicaj nimán nij so' ne se tanáj xcoĵ nij so' se vaa 'yaj nij so' ĝa no' ei. <sup>23</sup> Ne yo'o cavi' ta'níĵ chana yo', qui'yaj, ĝaa ne quene'en cunudanĵ nij sí amán rá ni'yaj manĵ ne 'o 'o chuman' se vaa 'unĵ me sí acaĵ ndo'o cuentá daj vaa raĵ yuviĵ do', daj vaa nimán yuviĵ do', ne naru'vee 'unĵ rihaan 'o 'o nij soĵ che'é se vaa 'yaj 'o 'o nij soĵ chuguanĵ.

<sup>24</sup> "Ne nihánĵ me se ca'mii 'unĵ rihaan yo'ó nij soĵ sij man chuman' Tiatira sij ne noco' tucuáán chi'ii yo' a. 'O se tucuáán sca' yuve ndo'o me tucuáán noco' yo'ó nij so', rá ma'an nij so', tzaj ne se-tucuanĵ Satanás me yo' rihaan soĵ, ne ne nari' soĵ tucuáán yo' a ma'. Dan me se taj che'é cuta' 'unĵ doj suun xráá soĵ a ma'.

<sup>25</sup> Maan se yo'o noco' soĵ tucuáán nicaj soĵ ndaa se quisij ĝüii cuchí' 'unĵ rihaan soĵ ei. <sup>26</sup> Ne sí 'yaj canaán yo'o 'yaj suun suun ca'ne' 'unĵ rihaan ndaa se cuchí' 'unĵ rihaan soĵ ro', guun chij so' rihaan nij chuman' na'vej rá canoco' manĵ, qui'yaj adonĵ. <sup>27</sup> Ne niĵaj so' vará aga' hierró, ne tumé so' man nij so', ne dan me se

ndaá rá se vaa 'yaj nii ĝaa uxra' nii xruĵ ro', danĵ ĝaa qui'yaj sí guun chij yo' chuguanĵ. <sup>28</sup> Dan me se ase vaa guun chij ma'anĵ qui'yaj Réj Dioŝe ro', danĵ ĝaa guun chij so', ne rque 'unĵ yati' xta'ngaa urihanĵ rej nichrun' rá ranga' rihaan so' adonĵ. <sup>29</sup> Sese taj yu'uj xréé soĵ, ne no xcúún soĵ cunĵ soĵ nana nihánĵ nana taj xna'anĵ Nimán Dioŝe rihaan nij sí amán rá ni'yaj manĵ ne 'o 'o chuman' a." Veé danĵ síj nana cachron so' ca'nej so' rihaan nij sí amán rá ni'yaj manĵ ne chuman' Tiatira a —taj so' rihanĵ a.

**Nana nihánĵ me nana ca'anĵ rihaan nij sí amán rá ni'yaj man Jesucristó ne chuman' Sardis a**

**3** Ĝaa ne cataĵ uún so' rihanĵ a:

—Nana nihánĵ me nana cachron so' ca'nej so' rihaan nij sí amán rá ni'yaj manĵ ne chuman' Sardis a: "Dan me se nihánĵ me nana ca'mii 'unĵ sij nicaj Nimán Dioŝe do', chij nij yati' do', rihaan soĵ sij man chuman' Sardis, ne Nimán Dioŝe ro', vaa guĝe so', ne chij ya se nucuaj nicaj so' a. Ne'én 'unĵ daj 'yaj nij soĵ, ne dan me se sí vaa i'na' ya nimán me soĵ, rá yuviĵ, tzaj ne ase vaa sí cavi' nimán vaa soĵ rihanĵ nanĵ adonĵ. <sup>2</sup> Dan me se nariĵ soĵ neĵ rihaan soĵ ruguanĵ. Tumé soĵ man ma'an soĵ, ne ca'nej soĵ se nucuaj nimán tinúú soĵ nij sí daj doj cavi' nimán á. 'O se xcaĵ 'unĵ cuentá se vaa nu' se 'yaj soĵ, nuveé se aran' rá Dioŝe me nij yo' ma'. Tadó soĵ ei.

<sup>3</sup> "Che'é dan nanuj rá soĵ nana tucu'yón nii man soĵ do', nana cuno soĵ do', ne yo'o qui'yaj soĵ ndaa vaa taj nana yo', ne canicaj nimán soĵ canoco' soĵ chrej sa' ei. Sese se tumé soĵ man soĵ, ne ase vaa 'na' sí ituy ro', danĵ ĝaa cuchij rihaan nij soĵ, ne se quene'en uxrá soĵ me orá me cuchij rihaan soĵ man adonĵ. <sup>4</sup> Tzaj ne man ta'aj tuvi' soĵ sij man chuman' Sardis ne qui'yaj cacun' mei. Ne che'é dan ase vaa sí nuŷ yatzíĵ naruvii ro', danĵ vaa nij so' cuano rihanĵ chuguanĵ. Ne nij so' ro', vaa ĝüii cunuú nij so' yatzíĵ catziĵ, ne cacheeĵ nij so' ĝaj adonĵ. 'O se no xcúún nij so' qui'yaj nij so' danĵ adonĵ. <sup>5</sup> Dan me se cunudanĵ nij sí 'yaj canaán ro', vaa ĝüii rque nii yatzíĵ catziĵ cunuú so', ne daj chihaa míj se tirí' 'unĵ se-chuviĵ so' no rihaan yanĵ no se-chuviĵ nij sí ĝaa i'na' ĝa Dioŝe nu' cavii nu' ca'anĵ ma'. Ne nata' 'unĵ rihaan Réj Dioŝe, rihaan nij se-mozó so' do', se vaa me nij so' sí noco' manĵ adonĵ. <sup>6</sup> Sese taj yu'uj xréé soĵ, ne no xcúún soĵ cunĵ soĵ nana nihánĵ nana taj xna'anĵ Nimán Dioŝe rihaan nij sí amán rá ni'yaj manĵ ne 'o 'o chuman' a." Veé danĵ síj nana cachron so' ca'nej so' rihaan nij sí amán rá ni'yaj manĵ ne chuman' Sardis a —taj so' rihanĵ a.

**Nana nihánĵ me nana ca'anĵ rihaan nij sí amán rá ni'yaj man Jesucristó ne chuman' Filadelfia a**

<sup>7</sup> Ĝaa ne cataĵ uún so' rihanĵ a:

—Nana nihánĵ me nana cachron so' ca'nej so' rihaan nij sí amán rá ni'yaj manĵ ne chuman' Filadelfia a: "Dan me se nihánĵ me nana ca'mii 'unĵ sij vaa sa' inanĵ sij ca'néeĵ ya Dioŝe rihaan chumiĵ cunĵ soĵ a. Ne 'unĵ

ro', me sí uun chij ndo'o ndaa vaa guun chij sí cu'naj David gaa naá adonj. Dan me se sese ca'núj 'unj ta'yaa, ne taj sí quisij naráan ta'yaa yo' ma'. Ne sese caráan 'unj ta'yaa, ne taj sí quisij ca'nuu uún ta'yaa yo' ma'.<sup>8</sup> Dan me se aj ne'én 'unj daj 'yaj nij soj a. Ne nihánj me se xcaj soj cuentá se vaa aj ca'núj 'unj ta'yaa rej rihaan soj, ne taj sí quisij naráan ta'yaa yo' ma'. Ne nij soj me se nda' se nuveé sij nucuaj ndo'o nimán me soj, tzaj ne yo' o 'yaj soj se-nanaj, ne ne cataj soj se vaa nuveé sij noco' manj me soj ma'. Yo' o taj soj se vaa sij noco' manj me soj adonj.<sup>9</sup> Ne vaa nij sí tu'va rma'an se vaa sij israelitá me nij so', tzaj ne nuveé sij israelitá ya me nij so' ma'. Maan se sí ne me nij so', ne sí tu-cu'yón se-nana Satanás me uún nij so' ei. Dan me se nagoj man nij so' rihaan soj, ne cuchí' nij so' rihaan soj, ne canicun' ruj nij so' rihaan soj, ne quene'en nij so' se vaa sij cunuu 'ee raj man me soj adonj.<sup>10</sup> Che'é se aj qui'yaj soj nu' se-nanaj nana taj se vaa no xcúún soj gaa nucuaj nimán soj rihaan sayuun ro', che'é dan tñanii 'unj man soj rihaan sayuun ca'na' rihaan nu' chumii nihánj vaa güii, asa' xcaj 'unj cuentá daj vaa nimán cunudanj nij yuvií man rihaan chumii adonj.

<sup>11</sup> "Dan me se daj doj cuchij rihaan soj chuguaj. Nij-caj raan soj tucuaán nicaj soj, gaa ne se ca'vee ca'nee nii cachriin cunuú raaj soj cachriin qui'yaj canaán soj rihaan soj ei.<sup>12</sup> Ne sí qui'yaj canaán ro', me se ase vaa 'o chraan xcaan nicun' tacóo nuví noco' rej na'víj yuvií rihaan Diosé ro', danj gaa so' rihanj, qui'yáj, ne se curihanj uún so' rej ne 'unj ma'. Ne rihaan so' ro', cachron 'unj va'nuy nana, ne dan me se cachron 'unj se-chuvii Diosé sí noco' 'unj, ne cachron 'unj se-chuvii chuman' ne Diosé noco' 'unj chuman' cu'naj chuman' Jerusalén chuman' naca nanij rihaan chumii nihánj, ne cachron 'unj se-chuvii ma'anj nana naca ya cachron 'unj rihaan so' adonj.<sup>13</sup> Sese taj yu'uj xrée soj, ne no xcúún soj cunog soj nana nihánj nana taj xna'anj Nimán Diosé rihaan nij sí amán rá ni'yaj manj ne 'o 'o chuman' a." Veé danj síj nana cachron so' ca'nej so' rihaan nij sí amán rá ni'yaj manj ne chuman' Filadelfia a —taj so' rihanj a.

**Nana nihánj me nana ca'anj rihaan nij sí amán rá ni'yaj man Jesucristó ne chuman' Laodicea a**

<sup>14</sup> Gaa ne cataj uún so' rihanj:

—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Laodicea a: "Dan me se nana nihánj me nana ca'mii 'unj sij qui'yaj nu' nana cataj xna'anj 'unj rihaan soj a. Dan me se 'unj me sí nata' ya se-nana Diosé rihaan soj ndaa vaa me rá Diosé qui'yáj, ne 'unj me sí qui'yaj nu' se man rihaan chumii nihánj ei. Ne qui'yáj nu' se vaa me rá Diosé qui'yáj ei.<sup>15</sup> Dan me se ne'enj nu' se vaa 'yaj soj, ne nuveé se acoj ne nuveé se ya'gan me soj mei. Ca'vee doj a sese guun soj se acoj inanj ni', ase se ya'gan inanj ni' a.<sup>16</sup> Dan me se che'é se ase vaa na guun vaa soj ne nuveé se acoj nuveé se ya'gan nuveé me soj, ne che'é dan ne se uun soj rihanj ma'. Dan me se maan che'é se danj vaa soj ro', che'é dan tñamanj

man soj rihaan yo'óo nanj adonj.<sup>17</sup> Dan me se taj soj se vaa ru'vee inanj soj, ne taj vaj a doj rasuun ne achiin rihaan soj, rá soj a. Tzaj ne ne ne'en soj sese ase vaa sí nique ndo'o vaa soj, ne ase vaa sí achiin caridad rihaan vaa soj, ne ase vaa tuchrii vaa soj, ne ase vaa sí canj nuvi' sagan' ro', vaa nu' soj nanj adonj.

<sup>18</sup> "Che'é dan narquej rej nucuaj man soj se vaa quiraan soj aga' oró míi rihanj aga' cachén ya'an ne cunuu sa' inanj, gaa ne ca'vee cunuú ru'vee ya ya soj rihanj ei. Ne quiraan soj yatzij catzii rihanj, ne ca'vee cunuú soj, ne se quene'en yuvií se vaa nuvi' sagan' soj ne se guun na'aj soj se vaa nuvi' sagan' soj ma'. Ne quiraan soj rmedió sa' rihanj, ne caxrii soj rlij rihaan soj, gaa ne ca'vee quene'en soj, ne xcaj sa' soj cuentá ei.<sup>19</sup> Dan me se 'unj ro', taj xna'anj 'unj rihaan nu' nij sí 'ee raj man daj qui'yaj nij so', ne qui'yáj sayuun man nij so' sese se cunog soj rihanj chuguaj. Che'é dan guun nihá' rá soj cunog soj rihanj, ne canicaj nimán soj canoco' soj chrej sa' doj á.<sup>20</sup> Nihánj me se ase vaa 'o sí nicun' ta'yaa ne tica'mii ta'yaa ro', vaa 'unj a. Ne sese vaa yo' o so' cunog se-nanaj, ne sese ca'nuu so' ta'yaa, ne catuu 'unj rihaan so', ne chaj chraa ga so', ne so' cha chraa ga 'unj, ne ve'é qui'yaj núj ei.<sup>21</sup> Ne sí qui'yaj canaán ro', cayáan so' rihaan xrúún 'unj chruun xlá sa' ga 'unj, ne guun chij so' gaj, qui'yáj, ndaa vaa qui'yaj Réj Diosé gaj ei. Dan me se gaa qui'yaj canaán ma'anj, ne cayáan 'unj rihaan xrúún Réj Diosé chruun xlá sa' ga so', ne guun chij 'unj ga so', qui'yaj so' chuguaj.

<sup>22</sup> Sese taj yu'uj xrée soj, ne no xcúún soj cunog soj nana nihánj nana taj xna'anj Nimán Diosé rihaan nij sí amán rá ni'yaj manj ne 'o 'o nij chuman' adonj." Veé danj síj nana cachron so' ca'nej so' rihaan nij sí amán rá ni'yaj manj ne chuman' Laodicea a —taj so' rihanj a.

**Nana nihánj taj xna'anj se vaa quene'en Juan ma'an chruun xlá sa' rej uun chij Diosé a**

**4** Quisij ca'mii so' nu' nana dan, gaa ne quene'én 'unj 'o ta'yaa taj ya'núj rej xta' a. Gaa ne cunog 'unj ca'mii uún sí ca'mii asino yaan rihanj, ne se-nana so' ro', daj se uun rá' unog a'yánj nii chruun a'yánj ro', danj guun raj gaa cunog se-nana so' a. Ne cataj so' rihanj a:

—Cavii so' ca'na' so' nihánj, gaa ne tñanj rihaan so' nu' se vaa guun rej rihaan so' á —taj so' rihanj a.

<sup>2</sup> Ne ra'yanj quene'en nimanj rasuun, ne quene'enj chruun xlá sa' ndo'o rej xta', ne vaa sí taj chruun xlá yo' sí uun chij ndo'o,<sup>3</sup> ne ase vaa yahij jaspe do', ase vaa yahij cornalina do', danj vaa so' curuvi' so' a. Ne ase vaa xcuáa cu'lúú ro', danj vaa nu' anicaj chruun xlá sa' yo', ve'é chuguun yo', ne ase vaa chuguun yahij esmeralda ro', danj vaa chuguun yo' a.<sup>4</sup> Ne nu' anicaj chruun xlá sa' yo' ro', nicun' yo'óo icog ca'anj chruun xlá sa', ne taj icog ca'anj sí uun chij rihaan nij chruun xlá sa' yo', ne nuu nij sí uun chij yatzij catzii, ne nuu raaj nij so' cachriin aga' oró míi a.<sup>5</sup> Ne rej nicun' chruun xlá nicun' tanuu tuvi' me se raan ndo'o, ne cariin ndo'o, ne caguáj ndo'o tu'vii a. Ne chij aga' chuguun táa ya'an ro', nicun' rihaan chruun xlá sa', ne chij aga'

chuguun yo' ro', me Nimán Dioso sí guëe inanj sí nicaj chij ya se nucuaj a. <sup>6</sup> Ne rej rihaan chruun xlá sa' yo' ro', nuu 'o na ya'anj, tzaj ne nuveé na ya me yo' ma'. Maan scuraan inanj me yo', ne ase vaa yahij cristal danj vaa yo' a.

Ne nu' anicaj chruun xlá sa' yo' ne tanuu yo'ó nij chruun xlá me se nicun' ca'anj xcuu, ne nu' anicaj man nij xcuu man rlij rihaan nij xo' a. <sup>7</sup> Ne yo'ó xcuu ro', ase vaa chuvaá vaa xo' a. Ne xcuu vij ro', ase vaa scúj le'ej vaa xo' a. Ne xcuu va'nuj ro', ase vaa rihaan snó'o vaa rihaan xo' a. Ne xcuu ca'anj ro', ase vaa xtaa vaj rej xtá' vaa xo' a. <sup>8</sup> Ne vaa vatán' scachee 'o 'o nij xo' taj xráá nij xo', ne ase vaa scachee xtâj vaa scachee nij xo' yo' a. Ne nu' xráá xo' nu' rque xo' nu' man rlij rihaan xo' adonj. Ne nuvii nigan' me se ne a'ne' rá nij xo' ga suun taj: "Sij guëe ndo'o me Dioso sí 'nij ra'a man ní' sí uun nucuaj 'yaj cunudanj a. Ne so' me sí nicun' yaj, ne asij naá nicun' so', ne vaa güii cuchí' so' rihaan chumii a", taj ca'anj nij xcuu yo' a. <sup>9</sup> Ne gaa ca'mii sa' nij xcuu che'é Dioso sí taj rihaan chruun xlá sa' yo' sí cayáán nu' cavii nu' ca'anj, ne gaa nago' nij xo' graciá rihaan so', <sup>10</sup> ne canicun' ruj icó ca'anj nij sí uun chij yo' rihaan sí taj rihaan chruun xlá sa' yo', ne quina'víj nij so' rihaan so', che'é rej me so' sí cayáán nu' cavii nu' ca'anj, ne tagüej nij so' cachriin nuu raá nij so' rej rihaan chruun xlá sa' yo' a. Gaa ne cataj nij so':

<sup>11</sup> —Nó xcúun ndo'o so' Dioso sij 'nij ra'a man núj ca'mii sa' núj che'é so' ne guun chij ndo'o so' á. 'O se so' me sí qui'yaj cunudanj rasuun, ne maan che'é se guun rá so' cumán nij rasuun yo' ro', che'é dan guun cunudanj nij rasuun, qui'yáá so' adonj —taj icó ca'anj nij sí uun chij yo' rihaan Dioso a.

**Nana nihánj taj xna'anj che'é yanj do', che'é matzinj le'ej nó xcúun nuxra' yanj do' a**

**5** Ne rej nuva' sí taj rihaan chruun xlá sa' yo' ro', quene'enj 'o yanj, ne nó nana nu' rej rque yanj nu' rej xraj yanj nu' a. Ne nó chij selló yánj tu'va yanj yo', ne aráán selló yo' nu' anicaj tu'va yanj yo' a. <sup>2</sup> Gaa ne quene'én 'unj yo'ó se-mozó Dioso sí nucuaj ndo'o, ne nucuaj ndo'o xná'anj so', cataj so', ne:

—Me sí nó xcúun ca'neë nij selló nó aráán tu'va yanj ne nuxra' so' yanj ga —taj so', xná'anj so' a.

<sup>3</sup> Ne taj vaj a 'ó sí ne rej xtá' do', sí ne rihaan chumii do', sí ne rej rque chumii do', guun nucuaj nuxra' yanj ne ni'yaj so' yanj yo' a ma'. <sup>4</sup> Che'é dan ta'vee uxraj che'é se ne nari' nii man a 'ó sí ni'yanj nimán nuxra' yanj yo' ni'yaj man yanj yo' a man adonj. <sup>5</sup> Gaa ne yo'ó tuvi' nij sí uun chij cataj rihanj a:

—Se ta'vee so' ma'. Xcaj so' cuentá, ne aj qui'yaj canaán sí chuvaá ta'níi ta'nij si'nó sí cu'naj Judá sí cayáán gaa naá, ne yo'ó ta'níi ta'nij si'nó David me uún so', ne che'é dan ca'vee ca'neë so' chij nij selló nó tu'va yanj ne nuxra' so' yanj yo' nanj adonj —taj so' rihanj a.

<sup>6</sup> Gaa ne quene'én 'unj se vaa tanuu nij chruun xlá sa' do', tanuu ca'anj nij xcuu do', tanuu nij sí uun chij do', nicun' 'o matzinj le'ej, ne matzinj aj ticavi' nii man

asij rque me yo' a. Ne chij cúu taj raá xo', ne chij nij rlij rihaan xo', ne nij rlij rihaan xo' ro', nij yo' me Nimán Dioso sí guëe inanj sí nicaj chij ya se nucuaj sí aj ca'née Dioso rihaan nu' chumii a. <sup>7</sup> Dan me se cuchí' xo' rihaan sí taj rihaan chruun xlá sa' yo', ne quita'aa xo' yanj oro' ra'a sí taj rihaan chruun xlá rej nuva' so' a. <sup>8</sup> Ne gaa quita'aa xo' yanj, ne canicun' ruj ca'anj nij xcuu do', icó ca'anj nij sí uun chij do', rihaan matzinj le'ej yo' a. Ne nicaj 'o 'o nij so' ya'ánj sa' do', co'oo aga' oró míi caraa squíi xlá rque do', ne squíi xlá yo' ro', me nij nana achíin ni'yaj nij sí sa' nocó' man Dioso rihaan ma'an Dioso a. <sup>9</sup> Gaa ne achráá nij so' chra' naca' rihaan matzinj le'ej, cataj nij so', ne:

—Nó xcúun so' nıcaj so' yanj ne ca'neë so' selló yánj aráán nó tu'va yanj yo' á. 'O se ticavi' nii man so', ne dan me se nicaj so' ton man so' quiránj so' man 'o 'o nij yuvii man rihaan chumii nihánj, ne dan me se quiránj so' man nij yuvii a'mii nu' yo'ó xna'ánj, ne quiránj so' man nij yuvii man daj a chuman' man daj a yo'óo nocoo do', quiránj so' che'é Dioso á. <sup>10</sup> Gaa ne guun chij Dioso rihaan nij so', qui'yáá so', ne guun nij so' xrej nuu rihaan Dioso, qui'yáá so', ne vaa güii guun chij nij so' rihaan chumii adonj —taj chra' achráá nij so' a.

<sup>11</sup> Gaa ne quene'en uún 'unj, ne cunó 'unj se-nana que'ëe mij mij se-mozó Dioso nicun' nu' anicaj chruun xlá sa' do', nij xcuu do', nij sí uun chij do' a. <sup>12</sup> Ne nucuaj ndo'o ca'mii nij se-mozó Dioso yo', cataj nij so' a:

—Nó xcúun ndo'o matzinj le'ej ticavi' nii man guun nucuaj ndo'o so' do', nıcaj so' nu' rasuun sa' do', cavii ndo'o raá so' do', ca'mii sa' taran' ní' che'é so' do', guun chij ndo'o so' do' adonj —taj nij se-mozó Dioso ni'yaj nij so' matzinj le'ej yo' a.

<sup>13</sup> Gaa ne cunó 'unj se vaa ca'mii cunudanj nij rasuun qui'yaj Dioso rasuun man rej xtá' do', rasuun man rihaan chumii do', rasuun man rque chumii do', rasuun man rihaan na ya'anj do', rasuun man rque na ya'anj do' a. Ne cataj nij rasuun:

—Rihaan sí taj rihaan chruun xlá sa' do', rihaan matzinj le'ej do', ca'mii sa' taran' ní' nu' cavii nu' ca'anj, ne guun chij roj so' nu' cavii nu' ca'anj ei —taj cunudanj nij rasuun a.

<sup>14</sup> Gaa ne:

—Veé danj gaa ya ei —taj ca'anj nij xcuu yo' a.

Gaa ne canicun' ruj nij sí uun chij, ne na'víj nij so' rihaan Dioso a.

**Nana nihánj taj xna'anj se vaa ca'néj matzinj le'ej chij nij selló yánj caráán tu'va yanj yo' a**

**6** Gaa ne quene'én 'unj se vaa ca'néj matzinj le'ej yo' yo'ó tuvi' nij chij selló caráán tu'va yanj libró yo', gaa ne cunój ca'mii yo'ó tuvi' ca'anj nij xcuu, ne ase uun rá' gaa aguáj tu'vii ro', danj guun raj gaa ca'mii xo' a. Ne:

—Cuvá' so' ni'yaj so' ei —taj xcuu yo' a.

<sup>2</sup> Gaa ne quene'én 'unj se vaa cavii 'o cuayó catzji, ne sí taj xráá cuayó yo' ro', nicaj so' curuvej, ne rque nii

cachriin cunuû raq so' man so', ne sij 'yaj canaán ndo'o me so', ne cavii so' qui'yaj canaán so' a.

<sup>3</sup> Ne gaa ca'néj matzinj le'ej selló vij nq tu'va yanj yo', ne cunó 'unj ca'mii xcuu vij a. Ne xcuu vij cataj:

—Cuvá' sq' ni'yaj sq' ei —taj xo' a.

<sup>4</sup> Gaa ne cavii yo'ó cuayó, ne cuayó marée me xo' a. Gaa ne ca'ne' nii suun rihaan síj taj xráá cuayó yo' se vaa quisij cayáán dínj yuvii rihaan chumii, qui'yaj so', ne ticavi' ndo'o yuvii tuvi' yuvii, qui'yaj so' a. Ne rque nii 'o neê espadá xij rihaan so' a.

<sup>5</sup> Gaa ne gaa ca'néj matzinj le'ej selló va'núj, gaa ne cunoj ca'mii xcuu va'núj a. Ne cataj xo':

—Cuvá' sq' ni'yaj sq' ei —taj xo' a.

Gaa ne quene'enj se vaa cavii cuayó maruu, ne síj taj xráá cuayó ro', 'nij ra'a so' aga' romaná aga' a'neé ta'nga' nij rasuun a. <sup>6</sup> Gaa ne cunó 'unj nana cavii rej tanuu ca'anj nij xcuu, ne nana yo' cataj:

—Nu' sa'anj 'yaj canaán yuvii rque 'o güii ro', nu' yo' me quino vij kiló 'núú trigó do', vatan' kiló 'núú cebada do', qui'yáá sq' á. Tzaj ne se tiri' sq' casté chá do', na vinó do' ma' —taj nana yo' a.

<sup>7</sup> Gaa ne gaa ca'néj matzinj le'ej yo' selló ca'anj nq tu'va yanj me se cunó 'unj ca'mii xcuu ca'anj yo' a. Ne cataj xo':

—Cuvá' sq' ni'yaj sq' ei —taj xo' a.

<sup>8</sup> Gaa ne quene'én 'unj, ne dan me se cavii cuayó daj, ne síj taj xráá cuayó daj ro', ta'naj 'yaj avi' yuvii cu'naj so', ne rej xcq so' ro', nocq' rej ca'anj nij síj cavi' a. Gaa ne ca'ne' nii suun rihaan roj so' se vaa guun chij roj so' rihaan 'o ta'aj nij yuvii man rihaan chumii, ne nıcaj roj so' neê espadá nıcaj roj so' x'naa na'aan rque nıcaj roj so' chi'ii yuvaa nıcaj roj so' xcuu quij nıcaj roj so', ticavi' roj so' man nij yuvii yo' a.

<sup>9</sup> Gaa ne gaa ca'néj matzinj le'ej selló 'un' nq tu'va yanj yo', ne quene'én 'unj rej rque mesá altar, ne rque mesá altar me se naj nij nimán nij síj cavi' che'é se-nā Diose che'é yan nata' nij so' nana ya rihaan yuvii a.

<sup>10</sup> Ne nucuaj ndo'o aguáj nij so', cataj nij so', ne:

—Ndāa me güii ca'ne' sq' cacun' che'é nij síj man rihaan chumii, ne qui'yáá sq' sayuun man nij so' che'é ton cayanj man núj qui'yaj nij so' ga. 'Q se sq' me síj vaa sa' inanj, ne síj uun chij ya rihaan núj mé sq' á —taj nij nimán, aguáj nij so' a.

<sup>11</sup> Gaa ne rque nii yatzij xcaan catzji rihaan 'o 'o nij so', gaa ne cataj xna'anj nii rihaan nij so' se vaa gaa in-aj nimán nij so' doj ndāa se quisij cavi' nu' nij tinúú nij so' síj 'yaj suun ga nij so' síj cavi' ndāa vaa cavi' ma'an nij so' a.

<sup>12</sup> Gaa ne quene'én 'unj se vaa ca'néj matzinj le'ej yo' selló vatan' nq tu'va yanj yo', gaa ne cachén ndo'o yuún, ne guun maruu rihaan güii, ne ndā' rá se vaa maruu yatzij maruu ro', danj vaa güii a. Ne ase vaa ton ro', danj vaa rihaan yavii a. <sup>13</sup> Ne cayuu nij yati' man xtā' rihaan yo'óo, ne ndā' rá se vaa ayuu chruj higó rihaan yo'óo gaa o' nana yuvaa raq chruun man chruj higó ne tinasqui' ndo'o nana raq chruun yo' ro', danj vaa ayuu yati' a. <sup>14</sup> Ne quixra' rej xtā', ne ase vaa yanj gaa nacué nii yanj ro', danj guun rej xtā' yo' a. Ne

nasqui' nu' quij nu' yo'óo taj rihaan na ya'anj do' a.

<sup>15</sup> Gaa ne dan me se nij síj nicaj suun do', nij síj sa' do', nij síj uun chij rihaan tanuu do', nij síj ru'vee do', nij síj nucuaj do', nu' nij mozó do', nu' nij síj ne uun mozó do', catúj yuve nij so' rque yu'uj yuvej do', rque nij yuvej naj quij do' a. <sup>16</sup> Gaa ne cataj nij so' rihaan nij quij rihaan nij yuvej rihaan:

—Cayuu nij soj xráá núj, ne caxrii yuve soj man núj, ne se gaa nanj quene'én síj taj rihaan chruun xlá sa' yo' man núj, ne se caxrii yuvaa matzinj le'ej yo' man núj ruguanj. <sup>17</sup> 'Q se aj quisij güii guee güii caxrii yuvaa roj so' man núj, ne se quisij rá núj canicun' núj a ma' —taj nij so' rihaan quij do', rihaan yuvej do' a.

### Nana nihánj taj xna'anj che'é nij síj israelitá cata' ta'nga' caan rihaan che'é Diose a

**7** Veé dan, gaa ne quene'én 'unj ca'anj se-mozó Diose nicun' ca'anj nij scúj chumii nihánj, ne caráán nij so' chrej rihaan ca'anj nij nana avii rihaan chumii, se cavii nij nana rihaan yo'óo rihaan na ya'anj rihaan a doj chruun rihaan a. <sup>2</sup> Ne ca'anj nij se-mozó Diose ro', aj ca'ne' Diose suun rihaan nij so' qui'yaj nij so' sayuun man yo'óo do', man na ya'anj do' a. Dan me se quene'én 'unj yo'ó se-mozó Diose cavii rej síj güii, ne nicaj so' selló nq se-ta'nga' Diose a. Dan me se caguáj so' rihaan ca'anj nij se-mozó Diose, cataj so', ne:

<sup>3</sup> —Se guun qui'yaj soj sayuun man yo'óo do', man na ya'anj do', man chruun do' ma'. Ca'ne' rá soj doj tz-in', ne ndāa quisij cuta' núj ta'nga' caan rihaan nij síj 'yaj suun che'é Diose, ne ca'vee ei —taj so', caguáj so' a.

<sup>4</sup> Gaa ne cunó 'unj me daj nij so' cuta' nii ta'nga' caan rihaan, ne cientó táá yavij chihaa ca'anj mįj yuvii me nij so', ne sij man 'o 'o x'ne' nij yuvii israelitá me uún nij so' a.

<sup>5</sup> Dan me se chuvij mįj nij so' me ta'níi ta'nij si'nq síj cu'naj Judá a. Ne chuvij mįj nij so' me ta'níi ta'nij si'nq síj cu'naj Rubén a. Ne chuvij mįj nij so' me ta'níi ta'nij si'nq síj cu'naj Gad a. <sup>6</sup> Ne chuvij mįj nij so' me ta'níi ta'nij si'nq síj cu'naj Aser a. Ne chuvij mįj nij so' me ta'níi ta'nij si'nq síj cu'naj Neftalí a. Ne chuvij mįj nij so' me ta'níi ta'nij si'nq síj cu'naj Manasés a. <sup>7</sup> Ne chuvij mįj nij so' me ta'níi ta'nij si'nq síj cu'naj Simeón a. Ne chuvij mįj nij so' me ta'níi ta'nij si'nq síj cu'naj Leví a. Ne chuvij mįj nij so' me ta'níi ta'nij si'nq síj cu'naj Isacar a. <sup>8</sup> Ne chuvij mįj nij so' me ta'níi ta'nij si'nq síj cu'naj Zabulón a. Ne chuvij mįj nij so' me ta'níi ta'nij si'nq síj cu'naj José a. Ne chuvij mįj nij so' me ta'níi ta'nij si'nq síj cu'naj Benjamín a.

### Nana nihánj taj xna'anj che'é nij síj man 'o 'o chuman' a

<sup>9</sup> Veé dan, gaa ne quene'én 'unj que'ee ndo'o yuvii, ne taj vaj síj guun nucuaj qui'yaj contá man nij yuvii a man chuguanj. Ne síj man cunudanj chuman' naj rihaan chumii me nij so', ne síj man 'o 'o x'ne' yuvii me

nij so', ne sí a'mii nu' xna'ánj a'mii yuvij me uún nij so', ne dan me se canicun' nij so' rihaan chruun xlá sa' yo' do', rihaan matzinj le'ej yo' do' a. Ne yatzij xcaan catzii nuú nij so', ne oro' nij so' ra'a chruun yuun a.

<sup>10</sup> Ne nucuaj ndo'o caguáj nij so', cataj nij so', ne:

—Diose sí noco' ní' man sí taj rihaan chruun xlá sa' do', matzinj le'ej do', me roj sí tinanii man ní' rihaan sayuun adonj —taj nij so' a.

<sup>11</sup> Gaa ne cunudanj nij se-mozó Diöse ro', canicun' nij so' nu' anicaj xruún Diöse chruun xlá sa' do', nij sí uun chij do', ca'anj nij xcuu do', gaa ne canicun' ruj nij so' rihaan chruun xlá sa' yo', ne toco' nij so' rihaan nij so' rihaan yo'óo, ne na'víj nij so' rihaan Diöse a. <sup>12</sup> Ne cataj nij so':

—Veé danj gaa ya ei. Ve'é inanj ca'mii ní' rihaan Diöse sí noco' ní' man nu' cavii nu' ca'anj á. So' me sí avii ndo'o raá, ne nago' ní' graciá rihaan so', ne so' me sí nucuaj ndo'o nu' cavii nu' ca'anj adonj. Veé danj gaa ya ei —taj nij so' ni'yaj nij so' Diöse a.

<sup>13</sup> Gaa ne xna'anj yo' o' tuvi' nij sí uun chij manj, cataj so':

—Ne nij sí nuu yatzij xcaan catzii ro', me sij me nij so', ne me rej cavii nij so', rá so' ga —taj so', xna'anj so' manj a.

<sup>14</sup> Gaa ne cataj 'unj rihaan so' a:

—Ne ne'én 'unj me sí me nij so', man señor. Tzaj ne so' me sí ne'en, raj a —taj 'unj rihaan so' a.

Gaa ne cataj so' rihanj a:

—Nij sí nihánj ro', me nij sí cachén rihaan que'ee ndo'o sayuun, gaa guun sayuun nocoo rihaan chumii adonj. Ne cavi' matzinj le'ej che'é nij so', ne cayanj ton man matzinj le'ej che'é nij so', ne canoco' nij so' man matzinj le'ej, ne che'é dan naruvii sagan' nij so', ne cunuu catzii sagan' nij so', qui'yaj ton cayanj man matzinj le'ej adonj. <sup>15</sup> Che'é dan me nicun' nij so' rihaan xruún Diöse chruun xlá sa', ne nuvii nigan' nicun' nij so' rá nuví nocoo ne rej xta' 'yaj suun nij so' rihaan Diöse, ne Diöse sí taj rihaan chruun xlá sa' yo' ro', ma'an so' cayáan ga nij so', ne caráan so' rihaan sayuun che'é nij so' a. <sup>16</sup> Ne daj chihaa mij se quina'aan uún rque nij so' do', se canacoo nij so' na do', se go' naán xráa nij so' do', se cunuu cachi' rá nij so' do', a ma'. <sup>17</sup> 'Q se ma'an matzinj le'ej nicun' ma'an rej rihaan chruun xlá sa' yo' ro', cütumé man nij so', ne ca'anj nicaj so' man nij so' rej xra' na sa', ne co' o' nij so', gaa ne yo' o' gaa i'na' nimán nij so', qui'yaj na yo' a. Ne ma'an Diöse ro', me sí tinacoo na ayanj rihaan nij so' ei —taj sí uun chij yo' rihanj a.

**Nana nihánj taj xna'anj che'é selló yánj chij do', che'é aga' nuu squíí do' a**

**8** Gaa ne gaa ca'néj matzinj le'ej selló chij no' tu'va yanj yo', gaa ne yuun che'e cunuu dínj rej xta' 'o' yanéj orá a. <sup>2</sup> Gaa ne quene'én 'unj chij nij se-mozó Diöse nij sí nicun' rihaan Diöse, se vaa rqué nii chij chruun a'yánj rihaan nij so' a. <sup>3</sup> Gaa ne ca'na' yo' o' se-mozó Diöse uún, ne canicun' so' rihaan mesá altar aga' oró míí nicun' rihaan xruún Diöse chruun xlá sa'

a. Ne noco' ra'a so' aga' acaa squíí, ne aga' oró míí me aga' yo' a. Gaa ne rqué ndo'o nii squíí man so' che'é rej ricatze' so' squíí rihaan mesá altar che'é nij sí vaa sa' rihaan Diöse gaa achíín ni'yaj nij so' rihaan Diöse a. <sup>4</sup> Gaa ne cavii yachruu squíí noco' ra'a se-mozó Diöse yo' rihaan ma'an Diöse, gaa cachíín ni'yaj nij so' rihaan Diöse a. <sup>5</sup> Gaa ne dan me se ca'anj nicaj se-mozó Diöse yo' aga' acaa squíí yo' rihaan mesá altar, gaa ne caraa ndo'o so' ru'vi' ya'an man rihaan mesá altar yo' rá aga', gaa ne tagüéj so' ya'an yo' rihaan chumii a. Gaa ne caguáj tu'vii, ne cariin ndo'o, ne quiraan ndo'o, ne cachén ndo'o yuún, qui'yaj se-mozó Diöse yo' gaa tagüéj yo' squíí rihaan chumii a.

**Nana nihánj taj xna'anj daj guun gaa ca'yánj nij se-mozó Diöse chij nij chruun a'yánj a**

<sup>6</sup> Gaa ne chij nij se-mozó Diöse nicaj chij nij chruun a'yánj ro', yuun che'e guun rá nij so' ca'yanj nij so' nij chruun a'yánj yo' a.

<sup>7</sup> Gaa ne ca'yánj yo' o' so' xruún so', gaa ne maan yahij do', ya'an do', nachej ga ton me se caman' yo' rihaan chumii a. Gaa ne cacaa nu' 'o' va'nuy scuj yo'óo man rihaan chumii, ne cacaa 'o' va'nuy scuj nij chruun nicun' rihaan chumii, ne nu' coj chrin' ya'lij cacaa uún a.

<sup>8</sup> Gaa ne ca'yánj se-mozó Diöse mozó vj chruun a'yánj, gaa ne cayuu 'o' ya'an xij rque na ya'anj a. Ne ase vaa quij xcaan vaa ya'an xij yo' a. Gaa ne 'o' va'nuy scuj na ya'anj yo' ro', cunuu ton a. <sup>9</sup> Ne cavi' 'o' xcuu rihaan daj a va'nuy xcuu man rque na ya'anj, ne quiri' 'o' va'nuy scuj nij rihoo chéé rihaan na ya'anj, qui'yaj ya'an yo' a.

<sup>10</sup> Gaa ne ca'yánj se-mozó Diöse mozó va'nuy chruun a'yánj, gaa ne cavii 'o' yati' xij ndo'o rej xta', ne yati' yo' ro', ya'an inanj me yo', ne chuguun yo', ne adi' chuguun aga' taj ya'an raá ro', danj chuguun yo' a. Ne quiniy yati' yo' rque 'o' va'nuy scuj nij chráa man rihaan chumii do', rque nij na yu'uj man rihaan chumii do' a.

<sup>11</sup> Ne se-chuvij yati' yo' ro', me "yati' e'", ne cunuu e' nu' na quiniy yati' yo' rque, gaa ne cavi' que'ee yuvij, qui'yaj na e' yo', che'é se cunuu e' na yo', qui'yaj yati' a.

<sup>12</sup> Gaa ne ca'yánj se-mozó Diöse mozó ca'anj chruun a'yánj, gaa ne quiran' chi'ij 'o' va'nuy scuj rihaan güii do', 'o' va'nuy scuj rihaan yavii do', 'o' va'nuy scuj nij yati' do', ne dan me se yo' o' cunuu rmi' 'o' va'nuy scuj nij yo', ne dan me se ne cuchuguun nij yo' 'o' va'nuy scuj rej ranga' do', ne ne cuchuguun nij yo' 'o' va'nuy scuj rej nii do', a ma'.

<sup>13</sup> Gaa ne quene'én 'unj, ne cunó 'unj caguáj yo' o' xtaa vaj tanuu rihaan risca' xta', ne dan me se cunó 'unj se vaa nucuaj ndo'o caguáj xtaa yo', taj xo', ne:

—Ai. Ai. Ai. Nique nij sí ne rihaan chumii che'é sayuun quiran' nij so' asa' quisíj ca'yánj ya'núj nij se-mozó Diöse sí nichrun' ca'yanj chruun a'yánj á —taj xtaa, caguáj xo' a.

**9** Gaa ne ca'yánj se-mozó Diöse mozó 'un' chruun a'yánj, gaa ne quene'én 'unj se vaa cavii yo' o' yati'

rej xta' quinij yo' rihaan yo'óó, gaa ne rque' nii raga' rihaan so' nuxra' so' tu'va yu'uj cunuy ndo'o rej man nij nana chree a. <sup>2</sup> Gaa ne nuxra' so' tu'va yu'uj cunuy ndo'o, gaa ne curihanj ndo'o catze' tu'va yu'uj yo', ne ase vaa catze' avii chruun hornó xij ro', danj vaa catze' cavii tu'va yu'uj yo' a. Gaa ne caráán rihaan güii, ne guun rmi' rihaan chumii, qui'yaj catze' yo' a. <sup>3</sup> Gaa ne curihanj ndo'o rqui' rque catze' yo', ne ca'anj nij rqui' rihaan nu' chumii, gaa ne guun nucuaj nij rqui' yo' qui'yaj nij xo' ndaa vaa 'yaj nij xcuun, qui'yaj nii a. <sup>4</sup> Gaa ne cataj xna'anj nii rihaan nij xo' se vaa se qui'yaj sayuun nij xo' man coj chrin' do', man coj do', man cuêj do', man nij chruun do' a. Maan se qui'yaj nij xo' sayuun man inanj nij yuvii nuvi' se-ta'nga' Diose cata' caan rihaan a. <sup>5</sup> Ne ne nó xcúun nij xo' ticavi' nij xo' man nij yuvii ma'. Maan se 'un' ya yavii qui'yaj ndo'o nij xo' sayuun man nij yuvii a. Ne a'ngaj ndo'o man yuvii rej xtaj nij xo' a. Ne ase vaa sayuun 'yaj xcuun gaa xtaj xcuun man yuvii vaa sayuun qui'yaj nij rqui' man yuvii yo' a. <sup>6</sup> Ne güii vaj nij rqui' yo' rihaan chumii me se guun ndo'o rá nij yuvii cavi' nij yuvii, tzaj ne se ca'vee cavi' nij yuvii a ma'.

<sup>7</sup> Ne nij rqui' me se ase vaa cuayó taj sí ca'anj cunuy' ro', danj vaa nij xo' curuvi' uun nij xo', ne ase vaa cachriin aga' oró mí ro', danj vaa se nuu raaj nij xo' a. Ne ase vaa rihaan yuvii ro', danj vaa rihaan nij xo' a.

<sup>8</sup> Ne vaa yuvé raaj nij xo', ne ase vaa yuvé raaj chana vaa yuvé raaj nij xo', ne ase vaa cúu yan' chuvaaj vaa cúu yan' nij xo' a. <sup>9</sup> Ne caráán aga' hierró nu' rucuaja nij xo' a. Ne daj se uun rá' gaa unó' que'ee cuchri' xcuun cuayó 'anj rej cunuy' nii ro', danj guun raj gaa cunoy cariin scachee nij xo' gaa chéé nij xo' xta' a. <sup>10</sup> Ne ase vaa tane' xcuun vaa tane' nij xo', ne guun nucuaj nij xo' xtaj nij xo' man yuvii, ne che'é dan guun nucuaj nij xo' qui'yaj nij xo' sayuun man yuvii 'un' ya yavii a. <sup>11</sup> Ne se-mozó Diose sí tumé yu'uj cunuy ro', uun chij so' rihaan nij rqui' yo' a. Ne se-chuvii se-mozó Diose yo' me Abaddón xna'ánj hebreo, ne Apolión cu'naj so' xna'ánj griego, ne nana yo' taj se vaa sij tiri' rasuun me so' a.

<sup>12</sup> Dan me se navij 'o tuvi' nij sayuun quiran' nij yuvii, ne ataa ca'naj yavij roj sayuun quiran' yuvii a.

<sup>13</sup> Gaa ne dan me se ca'yánj se-mozó Diose mozó vatán' chruun a'yánj, gaa ne cunoy nana ca'mii 'o so' rej tanuy nij xcúu mesá altar aga' oró mí nicun' rihaan Diose a. <sup>14</sup> Gaa ne ca'mii so' rihaan se-mozó Diose mozó nicaj chruun a'yánj vatán', cataj so':

—Nache so' man ca'anj nij se-mozó Diose sí numij tu'va chraá xij cu'naj Eufates á —taj so' rihaan se-mozó Diose yo' a.

<sup>15</sup> Gaa ne nache so' ca'anj nij se-mozó Diose sí cune' Diose cavii maan orá yo', maan güii yo', maan yavii yo', maan yo' ya yo', che'é rej ticavi' nij so' 'o yuvii rihaan daj a va'nuy yuvii man rihaan chumii nanj adonj. <sup>16</sup> Ne vij cientó mij sí taj xraá cuayó me nij sí noco' man ca'anj nij se-mozó Diose yo', taj nii cunoy a. <sup>17</sup> Ne dan me se gaa naqui'yaa nu' rasuun nihánj rihaan 'unj, qui'yaj se-mozó Diose yo', ne quene'én 'unj man nij cuayó do', man nij sí taj xraá nij cuayó do', ne nij so'

ro', me se nicaj nij so' aga' caráán rucuaja nij so', ne dan me se no' se maree ndo'o, ne no' se maree riscá', ne no' se míi, ndaa vaa chuguun yo'óó azufré acaa a. Ne ase vaa raaj chuvaaj vaa raaj nij cuayó, ne curihanj ya'an curihanj catze' curihanj yo'óó azufré curihanj tu'va nij xo' a. <sup>18</sup> Ne che'é ya'an do', catze' do', yo'óó azufré do', curihanj tu'va nij cuayó ro', che'é dan cavi' 'o yuvii rihaan daj a va'nuy yuvii man rihaan chumii, qui'yaj nij xo' a. <sup>19</sup> 'O se guun nucuaj nij cuayó ticavi' nij xo' man yuvii che'é rasuun cavii tu'va nij xo' do', che'é tane' nij xo' do' a. 'O se ase vaa xcuáá vaa tane' nij xo', ne vaa raaj xcuáá yo', ne chá nij xo' man yuvii, quene'enj a.

<sup>20</sup> Ne vaa yuvii quinanii rihaan nij cuayó yo', tzaj ne ne canicaj nimán nij so' tanáj xco' nij so' chrej chi'ii ma'. Tananj yo' na'víj nij so' rihaan nij nana chree do', rihaan ya'anj cacój yuvii do', ne ya'anj cacój nij yuvii me se aga' oró mí do', aga' platá catzii do', aga' cobre maree do', yahij do', chruun do', me uun nij yo' a. Ne dan me se nuvi' rihaan yo' ni'yaj yo' do', nuvi' xréé yo' cunoy yo' do', a ma'. Ne chéé nij yo' do', a ma'. <sup>21</sup> Dan me se ne canicaj nimán nij yuvii ca'ne' rá nij yuvii ga suun ticavi' tuvi' do', ga suun a'mii ga sí chruun do', ga suun 'yaj cacun' ga chana do', ga suun 'yaj ituu si'yaj tuvi' do', a man adonj.

#### Nana nihánj taj xna'anj che'é yanj rque se-mozó Diose cha sí cu'naj Juan a

**10** Gaa ne quene'én 'unj yo'ó se-mozó Diose sí nucuaj ndo'o cavii rej xta' ne nanij rihaan yo'óó, ne nu' anicaj man so' niquee so' ngaa, ne nda' rá se vaa nicun' xcuáá cu'lúu ro', danj vaa nicun' raaj so', ne chuguun nu' anicaj raaj so', ne chuguun rihaan so', ndaa vaa chuguun güii a. Ne ase vaa chraan acaa vaa tacóó so' a. <sup>2</sup> Ne nicaj so' 'o yanj cunii a. Ne cuta' so' 'o tacóó so' rej nuva' so' rihaan na ya'anj, ne cuta' so' yo'ó tacóó so' rej nichruun so' rihaan yo'óó a. <sup>3</sup> Ne nucuaj ndo'o caguaj so', nda' adi' se aguaj chuvaaj aguaj so' a. Ne gaa caguaj so' me se chij ya caguaj tu'vii cunoy a. <sup>4</sup> Ne gaa quisij chij caguaj tu'vii, gaa ne guun raj cachronj nana caguaj tu'vii rihaan yanj, tzaj ne cunoy nana cavii rej xta', ne nana cunoy taj:

—Ca'nej yuve so' nana caguaj tu'vii, ne se cachron so' nana yo' rihaan yanj ma' —taj nana cavii rej xta' cunoy a.

<sup>5</sup> Gaa ne se-mozó Diose sí nicun' tacóó rihaan na ya'anj do', rihaan yo'óó do', me se naxcaj ra'a so' rej nuva' so' rej xta', <sup>6</sup> ne cuta' so' raaj Diose sí cayáán nu' cavii nu' ca'anj sí qui'yaj rej xta' ga nu' se man rej xta', sí qui'yaj chumii ga nu' se man rihaan chumii, sí qui'yaj na ya'anj ga nu' se man rque na ya'anj, se vaa se ca'vee guun raan a doj a ma'. <sup>7</sup> Dan me se asa' quisij güii ca'yánj se-mozó Diose mozó chij chruun a'yánj me se quisij nu' se vaa guun rá Diose qui'yaj so', ndaa vaa nata' so' rihaan nij sí nata' se-nana so' sí 'yaj suun che'é so' a, taj se-mozó Diose yo' a.

<sup>8</sup> Gaa ne cavii doj nana rej xta', rej cavii nana cunoy asij rque doj, ne cataj nana yo' a:



—Cavii sɔ' nɪcɔj sɔ' yanj nicaj se-mozó Diose síf taj tacó rihaan na ya'anj dɔ', rihaan yo'óo dɔ' á —taj nana yo' rihanj a.

<sup>9</sup> Gaa ne cavii 'unj rihaan se-mozó Diose yo', ne cataj 'unj rihaan so' se vaa rque so' doj yanj cunii yo' rihanj a. Gaa ne cataj so' rihanj a:

—Veé yanj nihánj nɪcɔj sɔ', ne chá nɪ' sɔ' man yo' a. Dan me se tu'vá sɔ' ro', gaa tzi' ndo'o nda' adi' catzi' xtaan, tzaj ne rque sɔ' me se guun e', qui'yaj yanj yo' adonj —taj se-mozó Diose yo' rihanj a.

<sup>10</sup> Gaa ne dan me se nicaj 'unj yanj cunii rque se-mozó Diose yo' rihanj, ne chá nɪ' 'unj man yo', ne ase tzi' catzi' xtaan ro', danj vaa tzi' yo' tu'vaj a. Ne gaa quisij chay man yo', ne cunuu e' rquej, qui'yaj yo' a.

<sup>11</sup> Gaa ne cataj nii rihanj a:

—Vaa che'é ca'mii natáj uún sɔ' che'é yuvii man que'ee chuman' man que'ee yo'óo nocɔo dɔ', che'é yuvii a'mii que'ee xna'ánj a'mii yuvii dɔ', che'é que'ee síf nicaj suun rey dɔ' ei —taj nii rihanj a.

### Nana nihánj taj xna'anj che'é vij síf nata' rihaan yuvii che'é Diose a

**11** Gaa ne rque nii 'o rihaa ase vaa 'o vará a'néé ta'nga' manj, ne cataj Diose rihanj a:

—Cavii sɔ' ne xcaj ta'ngá' sɔ' nuví nocɔo rej ne Diose, ne xcaj ta'ngá' sɔ' mesá altar, ne qui'yaj contá sɔ' nij síf na'víj rihaan Diose dɔ' á. <sup>2</sup> Tzaj ne xa' rej rihaan nuví, tzaj ne se xcaj ta'ngá' sɔ' man yo' ma'. 'O se ca'vee ca'na' nij síf yanij rej yo', ne vij chihaa vij yavii yuun che'e ru'maan che'é nij so' nɪ' chuman' guee yo' adonj. <sup>3</sup> Ne cune' 'unj man vij roj síf nata' rihaan yuvii che'é 'unj, ne 'o mij táá yavij cientó ne táá ya'núj chihaa güii me se ca'mii natáj roj so' rihaan yuvii, ne cɪnuú roj so' yatzij ya' a —taj Diose rihanj a.

<sup>4</sup> Roj so' ro', me roj chruun man chruj olivó raá dɔ', roj aga' taj aga' ya'an nicun' rihaan síf 'nij ra'a chumii nihánj dɔ' a. <sup>5</sup> Ne sese guun rá yo'o so' qui'yaj chi'ii so' man roj so', ne avii ya'an tu'va roj so', ne acaa síf taj ri'yunj man roj so', qui'yaj ya'an avii tu'va roj so', ne yuun che'e cavi' síf 'na' guun rá qui'yaj chi'ii man roj so' a. <sup>6</sup> Ne guun nucuaj roj so' caráán roj so' rej xtá', che'é yan se caman' a doj maan nɪ' güii ca'mii natáj roj so' a. Ne guun nucuaj roj so' naqui'yaj roj so' ton man na a. Ne guun nucuaj roj so' qui'yaj chi'ii roj so' man chumii ndaa vaa me rá ma'an roj so' qui'yaj roj so' a.

<sup>7</sup> Ne asá' quisij ca'mii natáj roj so' se-nana roj so', gaa ne cavii xcuu yuvaa yu'uj cunuu ndo'o yo' a. Ne cunú' xo' ga roj so', ne qui'yaj canaán xo', ne ticavi' xo' man roj so' a. <sup>8</sup> Gaa ne cúú man roj so' ro', quinaj uun yo' rihaan callé rá chuman' nocɔo a. Ne chuman' nocɔo yo' me se sese ca'mii cachron ní', ne Sodoma dɔ', Egiptó dɔ', cu'naj chuman' yo' a. Ne yo' me rej cachron nii rihaan rcutzé man ma'an síf 'nij ra'a man roj síf nata' yo' asij rque doj a. <sup>9</sup> Ne cunudanj nij yuvii man daj a chuman' dɔ', cunudanj nij yuvii a'mii nɪ' nij xna'ánj dɔ', cunudanj nij yuvii man daj a yo'óo nocɔo dɔ', ni'yaj man roj síf cavi' va'núj güii táá yanéé yo' a.

Ne ne ca'vej rá nij yuvii yo' cachin' nii man roj so' rihaan yo'óo santó ma'. <sup>10</sup> Ne nɪ' nij síf man rihaan chumii me se guun nihá' ndo'o rá nij so' che'é se cavi' roj síf nata' yo', ne ndaa narque nij yuvii rasuun rihaan tu'vi' nij yuvii che'é se cavi' roj so' a. Dan me se gaa vaa i'na' roj so' me quiran' ndo'o nij yuvii sayuun, qui'yaj roj so' a.

<sup>11</sup> Ne gaa quisij va'núj güii táá yanéé yo', gaa ne catúj uún nana rque roj so', qui'yaj Diose, ne cunuu i'na' uún roj so', ne canicun' caya roj so', ne dan me se nɪ' nij yuvii quene'en man roj so' me se cuchu'vi' ndo'o nij so' a. <sup>12</sup> Gaa ne cuno roj so' nana nucuaj sca' ndo'o cavii rej xtá', ne nana yo' cataj:

—Cavii roj soj ca'na' roj soj nihánj á —taj nana yo' cuno roj so' a.

Gaa ne catúj roj so' rque ngaa, cavii roj so' xtá', ne ca'anj roj so' a. Dan me se nij síf taj ri'yunj man roj so' me se quene'en nij so' se vaa cavii roj so' rej xtá' a.

<sup>13</sup> Ne maan orá dan cachén ndo'o yuún, ne canee 'o ve' rihaan daj a chi' ve' ne chuman' yo', ne cavi' chij mij yuvii, qui'yaj yuún, ne cuchu'vi' ndo'o yo'óo nij yuvii, ne guun che'e nij so' ca'mii sa' nij so' che'é Diose síf nicun' rej xtá' a. <sup>14</sup> Dan me se quisij vij sayuun yo', ne nichrun' quisij sayuun va'núj a.

### Nana nihánj taj xna'anj daj guun gaa ca'yánj se-mozó Diose mozó chij chruun a'yánj a

<sup>15</sup> Gaa ne dan me se ca'yánj se-mozó Diose mozó chij chruun a'yánj, gaa ne ca'mii ndo'o nij síf man rej xtá', cataj nij so':

—Nihánj me yuun che'e guun chij síf 'nij ra'a man ní', ne guun chij síf ca'néé so' tinanii man yuvii rihaan sayuun, ne dan me se guun chij roj so' rihaan chumii, ne dan me se yo'o guun chij Diose nɪ' cavii nɪ' ca'anj nanj adonj —taj nij síf man rej xtá' a.

<sup>16</sup> Ne icɔ ca'anj nij síf uun chij taj rihaan chruun xlá sa' rej rihaan Diose me se ca'anj canicun' ruj nij so' rihaan Diose, ne toco' nij so' rihaan nij so' rihaan yo'óo, ne quina'víj nij so' rihaan Diose a. <sup>17</sup> Dan me se cataj nij so':

—Narque núj graciá rihaan sɔ', Diose sijn 'nij ra'a man núj á. Sɔ' me síf guun nucuaj qui'yaj cunudanj a. Ne síf nicun' yaj mé sɔ', síf nicun' asij naá mé sɔ' á. Dan me se guun ni'yaj ní' se vaa yaj me se guun nucuaj ndo'o sɔ', qui'yáá sɔ', ne guun chij sɔ' rihaan chumii a.

<sup>18</sup> Dan me se ca'maan rá nij síf man rihaan chumii ni'yaj nij so' man sɔ', gaa ne ca'na' sɔ', ne caxrij yuvaa sɔ' man nij so' a. Ne quisij güii ca'ne' sɔ' cacun' che'é nij síf cavi' ne naru'vee sɔ' rihaan nij síf 'yaj suun rihaan sɔ' nij síf ca'mii natáj se-nana sɔ' dɔ', rihaan nij síf vaa sa' rihaan sɔ' dɔ', rihaan nij síf aráj cochroj rihaan sɔ' dɔ' a. Dan me se ca'vee se síf nique me nij so' ni', ca'vee se síf sa' atá suun me nij so' ni', tzaj ne naru'vee sɔ' rihaan nij so' a. Ne tiri' sɔ' man nij síf tiri' chumii a —taj icɔ ca'anj nij síf uun chij rihaan Diose a.

<sup>19</sup> Gaa ne naxra' ta'yaa rihaan nuví nocɔo rej ne Diose rej xtá', ne rá nuví nocɔo me se curuvi' se-chrunj Diose chruún guee qui'yaj nii gaa ca'mii

Diose se-nanā Diosē rihaan síí cu'naj Moisés gaa naá a. Gaa ne quiraan ndo'o, ne cariin ndo'o, ne canuu ndo'o, ne cavii ndo'o nana yuvaa, ne caguáj tu'vii, ne cachén yuún, ne caman' ndo'o maan yahij nanj adonj.

**Nana nihánj taj xna'anj che'é chana do', che'é xcuáa tu'vii do', curuvi' rej xtá' a**

**12** Gaa ne dan me se naqui'yaa 'o rasuun nocoo curuvi' rej xtá' rihaan 'unj, qui'yaj Diosē, ne chana me yo', ne sagan' chana yo' ro', me güii, ne táa tacóo no' xráa yavii a. Ne nuu raá no' 'o cachriin no' chuvij yati' a. <sup>2</sup> Ne chana yo' ro', nuu rque, ne ve'ee uxrá rque no' che'é se me rá no' cuchruj no' ne'ej, ne che'é dan ta'vee ndo'o no' a. <sup>3</sup> Ne naqui'yaa uún yo'ó rasuun rej xtá' rihaan 'unj, qui'yaj Diosē, ne xcuáa tu'vii xij marēe me yo' a. Ne vaa chij raá xo', ne chi' cúu táa raá xo', ne chij cachriin nuu raá xo' a. <sup>4</sup> Ne tane' xo' me se cuxuun yo' yo' va'nuy scuj nij yati' man rej xtá', ne cayuu nij yati' rihaan yo'óo, qui'yaj xo' a. Ne canicun' xcuáa tu'vii yo' rihaan chana cuchruj ne'ej, che'é rej chá nu' xo' man ne'ej cuchruj chana yo' a. <sup>5</sup> Gaa ne cuchruj no' ne'ej sn'o, ne so' ro', me síí nicaj vará hierró ne cutumé man cunudanj nij yuvii man rihaan chumii a. Gaa ne ca'néj nii ta'níi chana yo', ne ca'anj nicaj nii man ne'ej rihaan Diosē rej táa so' rihaan chruun xlá sa' yo' uun chij so' a. <sup>6</sup> Gaa ne cunanj chana ndaa rej tacaan rej qui'yaj ma'an Diosē canē no', che'é rej ca'vee cayáan no', ne ca'vee rque Diosē se chá no' 'o mij táa yavij cientó ne táa ya'núj chihaa güii a.

<sup>7</sup> Gaa ne guun che'e nij síí man rej xtá' cunu' nij so' a. Dan me se se-mozó Diosē síí cu'naj Migueé gá yo'óo nij se-mozó Diosē nuu rihaan so' me se cunu' ndo'o nij so' gá xcuáa tu'vii a. Ne tananj xcuáa tu'vii do', nij se-mozó ma'an xcuáa tu'vii do', cunu' ndo'o nij so' gá nij tuví' se-mozó Diosē Migueé, <sup>8</sup> tzaj ne ne guun nucuaj nij so' qui'yaj canaan nij so' man Migueé a man adonj. Ne taj rej cumān nij so' rej xtá', qui'yaj nij tuví' Migueé a man chuguanj. <sup>9</sup> Ne xcuáa tu'vii yo' ro', xcuáa cayáan asij naá tempó me xo', ne síí chree do', Satanás do', cu'naj xo', ne síí tihá' yu'unj man cunudanj nij yuvii man rihaan chumii me uún xo' nanj adonj. Ne go' nii man xcuáa tu'vii xij yo' rihaan chumii gá nij se-mozó so' a. <sup>10</sup> Gaa ne cunó 'unj nana nucuaj ca'mii yo'ó so' rej xtá', ne cataj so':

—Nihánj me se guun che'e Diosē tinanii Diosē man yuvii rihaan sayuun, ne guun nucuaj ndo'o so', ne guun chij ndo'o so' adonj. Ne guun chij síí ca'néé so' tinanii man yuvii rihaan sayuun a. 'O se síí cuta' cacun' xráa tinúu ní' nuvii nigan' rihaan Diosē ro', quirii yanij nii man so' nanj adonj. <sup>11</sup> Ne qui'yaj canaan nij tinúu ní' man xcuáa tu'vii che'é ton cayanj man matzinj le'ej yo' che'é nij tinúu ní', ne che'é se nata' nij so' nana ya sa' rihaan yuvii ro', che'é dan qui'yaj canaan nij so' rihaan xcuáa tu'vii yo' nanj ei. Ne nij so' me se ne chuchuvi' nij so' sese cavi' nij so' che'é nana sa' nata' nij so' ma'. <sup>12</sup> Che'é dan guun nihá' rá nij soj rej xtá' do', sij ne rej xtá' do' ei. Tzaj ne nique ndo'o soj sij man rihaan chumii do', na ya'anj do', nanj adonj. 'O se quirii'ij nii man

síí chree rihaan roj soj, ne che'é dan nuu yuvaa uxrá rá so' nanj chuguanj. 'O se ne'en síí chree se vaa nichruun' ca'na' sayuun quirān' so' nanj ei —taj nana ca'mii yo'ó so' rej xtá' a.

<sup>13</sup> Gaa ne dan me se gaa xcaj xcuáa tu'vii yo' cuentá se vaa quirii'ij nii man xo' rihaan chumii, gaa ne canoco' ndo'o xo' man chana cuchruj ne'ej yo' a.

<sup>14</sup> Tzaj ne rque nii vij scachee xtaa xij man chana, che'é rej ca'vee cavii no' ca'anj no' rej tacaan rej ne no' qui'yaj Diosē, ne yo' me rej rque Diosē se chá no' va'nuy yo' táa yanéé, ne gan' ndo'o cunanj no' rihaan xcuáa tu'vii a. <sup>15</sup> Tzaj ne quirii ndo'o xcuáa yo' na tu'va xo' rej vaj chana, ne ase vaa chráa vaa na ca'néé xo' rej vaj chana, che'é rej guun rá xo' rnuu chana qui'yaj chráa yo', rá xo' a. <sup>16</sup> Gaa ne racuíj yo'óo man chana, ne dan me se nuxra' yo'óo tu'va yo'óo, ne chumánj yo'óo nu' chráa quirii xcuáa tu'vii tu'va yo' a. <sup>17</sup> Gaa ne ca'maan ndo'o rá xcuáa tu'vii ni'yaj xo' man chana, gaa ne cavii xo' cunu' xo' gá yo'óo nij ta'níi no' síí uno rihaan Diosē síí nata' se-nanā Jesucristó rihaan yuvii a. Gaa ne canicun' xo' rihaan yo'óo chruu naj tu'va na ya'anj a.

**Nana nihánj taj xna'anj che'é xcuu yuvaa cavii na ya'anj a**

**13** Gaa ne quene'én 'unj se vaa cavii 'o xcuu yuvaa rque na ya'anj, ne chij ya raá xo', ne chi' cúu raá chij cúu yave xo', ne táa chi' cachriin raá nij cúu taj raá xo' a. Ne quij ndo'o vaa se-chuvii xo' nó rihaan xo' a. <sup>2</sup> Ne ase vaa sni'yó vaa xo', ne ase vaa tacóo xcuu osó vaa tacóo xo', ne ase vaa tu'va chuvaa vaa tu'va xo' a. Ne xcuu yuvaa cavii rque na ya'anj ro', guun nucuaj ndo'o xo' guun chij xo', qui'yaj xcuáa tu'vii a. <sup>3</sup> Ne yo'óo raá xo' ro', aj quirān' chi'ii ndaa se daj doj se cavi' xo', tzaj ne quinahuun sa' uún man xo' a. Ne caráya'anj nij yuvii man nu' rihaan chumii ni'yaj nij yuvii man xcuu yuvaa yo', <sup>4</sup> ne quina'vii nij yuvii rihaan xcuáa tu'vii yo', che'é se guun nucuaj xcuu yuvaa yo' guun chij yo', qui'yaj ma'an xcuáa tu'vii yo' a. Ne quina'vii uún nij yuvii rihaan xcuu yuvaa uún, cataj nij yuvii:

—Me 'ó síí ca'vee qui'yaj ndaa vaa 'yaj xcuu yuvaa nihánj gá. Taj vaj a doj síí guun nucuaj cunu' gá xo' ma' —taj nij yuvii ni'yaj nij yuvii man xcuu yuvaa yo' a.

<sup>5</sup> Gaa ne ca'vej rá Diosē guun nucuaj xo' ca'mii xtá' ndo'o xo' ndaa rihaan ma'an Diosē a. Ne ca'vej rá Diosē guun chij xo' vij chihaa vij yavii a. <sup>6</sup> Gaa ne dan me se ca'mii ndo'o xo' nana chi'ii ni'yaj xo' man Diosē do', ve' mantá rej ne Diosē do', che'é nij síí ne rej xtá' gá Diosē do' a. <sup>7</sup> Ne ca'vej rá Diosē cunu' xo' gá nij síí vaa sa' nimán rihaan Diosē, ne dan me se qui'yaj canaan ya xo' man nij so' a. Ne ca'vej rá Diosē guun chij xo' rihaan 'o 'o ta'aj yuvii do', rihaan nij yuvii man cunudanj chuman' naj rihaan chumii do', rihaan nij yuvii a'mii cunudanj nij xna'ánj a'mii yuvii do', rihaan nij yuvii man nu' nij yo'óo nocoo do' a. <sup>8</sup> Ne quina'vii cunudanj nij yuvii man rihaan chumii rihaan xo' a. Ne nij síí quina'vii rihaan xo' me se nuvi' se-chuvii nij so' no' rihaan danj matzinj le'ej síí cavi' rihaan rcutze, ne

che'é dan se gaa i'na' nij so' rihaan Diose nu' cavii nu' ca'anj ma'. Ne nij síí ne quina'vij rihaan xcuu yuvaa yo' me se aj nó se-chuvijí nij so' rihaan yanj yo' asij ataa qui'yaj Diose chumii nanj adonj.

<sup>9</sup> Dan me se sese taj yu'uj xréé yo' o so', ne no xcúun so' cunō so' nanā nihánj adonj. <sup>10</sup> Dan me se síí 'yaj atúj yuvij taga' ro', vaa güii catuy ma'an so' uún nanj adonj. Ne síí o' neē espadá man tuvi' me se cavi' ya ma'an so', qui'yaj neē espadá nanj adonj. Nihánj me se xcaj ní' cuentá che'é nij síí vaa sa' rihaan Diose, se vaa yo' o Diose gaa nucuaj rá nij so', ne yo' o Diose cuchuman rá nij so' ni'yaj nij so', ne yo' o gaa nucuaj nimán nij so' rihaan sayuun ei.

### Nanā nihánj taj xna'anj che'é xcuu yuvaa cavii rque yo'óo a

<sup>11</sup> Gaa ne quene'én 'unj yo' o xcuu yuvaa cavii rque yo' oó, ne táá vij cúu raā xo', ne ase vaa cúu taj raā matzinj le'ej ro', danj vaa cúu taj raā xo' a. Ne a'mii xo' ndaa vaa a'mii ma'an xcuáá tu'vijí a. <sup>12</sup> Ne dan me se ca'na' xo' rihaan xcuu yuvaa cavii rque na ya'anj, ne guun chij xo' rihaan yuvij ndaa vaa uun chij ma'an xcuu cavii rque na ya'anj yo' a. Dan me se quina'vijí nij yuvij man nu' rihaan chumii rihaan xcuu yuvaa cavii rque na ya'anj xcuu nahuun sa' gaa daj doj se cavi', qui'yaj xcuu yuvaa cavii rque yo' oó yo' a. <sup>13</sup> Ne qui'yaj suun ndo' o xo' suun nocōo quene'en nij yuvij, ne ndaa cavii ya'an rej xtā' ne quinij ya'an rihaan yo' oó, qui'yaj xo' a. <sup>14</sup> Dan me se qui'yaj suun xo' suun nocōo rihaan xcuu yuvaa cavii rque na ya'anj yo', qui'yaj ma'an xo', ne che'é suun nocōo yo' me se tiha' yu'unj ndo' o xo' man nij síí man rihaan chumii, ne cataj xo' rihaan nij so' se vaa qui'yaj nij so' 'o se-tinangā' xcuu cavii rque na ya'anj yo' xcuu quiran' chi'ii qui'yaj neē espadá ne cunuu i'na' uún a. <sup>15</sup> Dan me se guun nucuaj xo' qui'yaj xo' nayón nanā nimán se-tinangā' xcuu cavii rque na ya'anj yo', ne qui'yaj uún xo' ca'mii se-tinangā' yo', ne taran' nij síí na'vej rá na'vij rihaan se-tinangā' yo' ro', me se ticavi' xo' man taran' nij so' a. <sup>16</sup> Gaa ne qui'yaj xcuu cavii rque yo' oó yo' fuerzá man cunudanj yuvij se vaa cutā' nii ta'nga' ra'a nij yuvij rej nuva' nij yuvij, ne se taj, ne caan rihaan nij yuvij catā' ta'nga' a. Dan me se danj qui'yaj nii man nij síí atā suun do', man nij síí chéé ma'an do', man nij síí nique do', man nij síí ru'vee do', man nij mozó do', man nij síí ne uun mozó do' a. <sup>17</sup> Ne dan me se sese nuvi' ta'nga' yo' ra'a yo' o so' do', rihaan yo' o so' do', ne ne ca'vee quiraan so' rasuun do', cutu'vee so' rasuun do', qui'yaj se-tinangā' xcuu yo' a man adonj. Ne ta'nga' yo' ro', me se-chuvijí xcuu cavii rque na ya'anj, ne dan me se número me yo' ei.

<sup>18</sup> Ne nihánj me se cavii raā soj sij nayaā nanā nihánj, ne sese cuu raā soj, ne nuchruj raā soj daj taj se-número xcuu yuvaa cavii rque na ya'anj yo' ei. 'O se número yo' ro', me se-chuvijí yo' o snó' o nanj chuguanj. Ne vatan' cientó táá ya'núj chihāā vatan' me número yo' ei.

### Nanā nihánj taj xna'anj che'é cientó táá yavij chihāā ca'anj mīj nij síí vaa sa' rihaan Diose a

**14** Gaa ne quene'én 'unj se vaa nicun' matzinj le'ej yo' raā quij cu'naj Sion, ne nicun' 'o cientó táá yavij chihāā ca'anj mīj nij so' gā so', ne no se-chuvijí matzinj le'ej do', se-chuvijí Rej matzinj le'ej do', caan rihaan nij so' a. <sup>2</sup> Gaa ne cunó 'unj se vaa ca'mii nanā cavii rej xtā', ne ase vaa uun ayuj vaj chráá xij do', ase uun aguáj ndo' o tu'vijí do', danj vaa nanā yo', ne ase vaa chra' achráá nii ya'ánj vaa nanā yo' a. <sup>3</sup> Ne achráá nij so' chra' naca inanj rihaan síí taj chruun xlá sa' yo' do', rihaan ca'anj nij xcuu nicun' nu' anicaj chruun xlá sa' do', rihaan nij síí uun chij do' a. Ne taj vaj a 'o nij síí ca'vee nari' cachraā chra' yo' ma'. Maan se orún' cientó táá yavij chihāā ca'anj mīj nij síí vaa sa' yo' ro', me nij síí guun nucuaj nari' chra' yo' nanj adonj. Nij so' ro', me nij síí narii Diose rihaan chumii, ne nij so' me síí tinanii matzinj le'ej man rihaan sayuun gaa cavi' so' a. <sup>4</sup> Ne ne cunuu chi'ii nij so' rihaan Diose che'é chanā ma'. 'O se síí vaa sa' inanj me taran' nij so' nanj adonj. Ne síí canoco' xcó matzinj le'ej me rej ma'an vaj xo' me uún nij so' a. Ne nij so' me nij síí táá yaan rihaan taran' yo' o nij síí man rihaan chumii síí cunuu sa' rihaan Diose do', rihaan matzinj le'ej do', gaa cavi' matzinj le'ej yo' a. <sup>5</sup> Ne dan me se taj vaj a doj nanā ne ne ca'mii nij so' ma'. 'O se sij vaa sa' inanj me nij so' nanj ei.

### Nanā nihánj taj xna'anj daj ca'mii va'núj nij se-mozó Diose a

<sup>6</sup> Gaa ne quene'én 'unj yo' o se-mozó Diose vaj tanuu rihaan risca' xtā', ne nicaj so' nanā sa' nanā che'é se vaa quiran' yuvij nu' cavii nu' ca'anj nata' so' rihaan nij síí man cunudanj nij yo' oó nocōo man rihaan chumii do', rihaan nij síí man cunudanj nij chuman' do', rihaan nij síí a'mii cunudanj nij xna'ánj a'mii nij yuvij do', rihaan 'o 'o ta'aj nij yuvij man rihaan chumii do' a. <sup>7</sup> Gaa ne dan me se nucuaj ndo' o ca'mii so', cataj so', ne:

—Carāā cochroj nij soj rihaan Diose, ne ve'é ca'mii soj che'é so' ei. 'O se aj quisij orá ca'ne' so' cacun' che'é yuvij nanj adonj. Dan me se na'vij soj rihaan so', che'é se so' me síí qui'yaj rej xtā' do', yo' oó do', na ya'anj do', rej avii na do' a —taj se-mozó Diose yo' cunoj a.

<sup>8</sup> Gaa ne canoco' yo' o se-mozó Diose xcó tuvi' so', ne cataj so':

—Aj quiri' nu' chuman' nocōo chuman' cu'naj Babilonia, ne qui'yaj ndo' o nij síí man rihaan chumii cacun' chi'ii, qui'yaj chuman' yo', ne nihánj me se caxrii yuvaa Diose man nij so' che'é cacun' chi'ii qui'yaj nij so' chuguanj —taj yo' o se-mozó Diose yo' a.

<sup>9</sup> Gaa ne canoco' se-mozó Diose mozó va'núj rej xco roj tuvi' so', ne nucuaj ndo' o ca'mii so', cataj so', ne:

—Sese na'vij yo' o so' rihaan xcuu yuvaa yo' do', rihaan se-tinangā' xcuu yuvaa yo' do', ne sese ca'vej rá

yo'ó so' cata' ta'nga' caan rihaan so' do', ra'a so' do',  
 10 ne ya co'ó so' na vinó sayuun nucuaj caraa Diose  
 rque tazá, ne na vinó yo' ro', me sayuun qui'yaj Diose  
 man so' asa' caxrij yuvaa Diose man so', ne dan me se  
 cacaa so' rihaan ya'an do', rihaan yo'ó azufré acaa  
 do', ni'yaj nij se-mozó Diose mozó vaa sa' do', ni'yaj  
 matzinj le'ej do' a. 11 Ne dan me se nu' cavii nu' ca'anj  
 cavii catze' rej quiran' nij so' sayuun, ne yo'ó danj  
 quiran' nij so' nuvii nigan' nanj adonj. Danj quiran' nij  
 sí na'vij rihaan xcuu yuvaa yo' do', rihaan se-tinanga'  
 xcuu yuvaa yo' do', sí ca'vej rá cata' ta'nga' se-chuvii  
 xcuu yo' do' a —taj se-mozó Diose mozó va'nuj yo' a.

12 Ne nihánj me rej xcaj ní' cuentá che'é nij sí vaa sa'  
 rihaan Diose, se vaa yo'ó vaa nucuaj nimán nij so' ri-  
 haan sayuun ei. 'O se nij so' me sí yo'ó uno nana taj  
 xna'anj Diose, ne yo'ó amán rá nij so' ni'yaj nij so' Jesu-  
 cristó a.

13 Gaa ne cunó 'unj yo'ó nana cavii rej xtá', ne nana  
 yo' cataj rihanj a:

—Cachron so' nana nihánj rihaan yanj á. Cachron so'  
 se vaa nij sí nocó' man sí 'nij ra'a man soj me se sese  
 cavii' nij so' rej rihaan yaj, ne vaa che'é guun niha' rá  
 nij so' ei. 'O se cavii sa' nij so' nanj á. Ne Nimán Diose  
 taj se vaa ca'ne' rá nij so' ga suun 'yaj suun, ne naraan  
 rá nij so' a. 'O se yuun che'e cavii sa' nij so' che'é suun  
 sa' aj qui'yaj suun nij so' adonj, cachron so' á —taj  
 nana cavii rej xtá' yo' a.

#### Nana nihánj taj xna'anj che'é sayuun quiran' nij sí man rihaan chumii nihánj a

14 Gaa ne quene'én 'unj se vaa curuvi' 'o ngaa catzii  
 rej xtá', ne táá 'o sí nicaj yu'unj man yuvii xráá ngaa,  
 ne nuu raá so' 'o cachriin aga' oró míí, ne nocó' ra'a  
 so' 'o aga' seraa cuyuu a'ne' coj, ne sihaa uxrá seraa  
 yo' a. 15 Gaa ne yo'ó se-mozó Diose curihanj rque nuví  
 nocóo, ne nucuaj ndo'o caguáj so' rihaan sí taj xráá  
 ngaa yo' a. Dan me se cataj so', ne:

—Tacuachén so' sagá' so' aga' sihaa tacóo nij rasuun  
 man rihaan yo'óo, ne cutá so' se man rihaan yo'óo  
 cuaj ei. 'O se quisij orá cutá ní' se man rihaan yo'óo  
 nanj adonj. 'O se aj cachij nu' se man rihaan yo'óo  
 nanj á —taj se-mozó Diose rihaan sí taj xráá ngaa yo'  
 a.

16 Gaa ne sí taj xráá ngaa yo' ro', me se tacuachén  
 so' saga' so' tacóo nij rasuun man yo'óo, ne dan me se  
 cuta so' nu' rasuun cachij man rihaan yo'óo yo' a.

17 Gaa ne curihanj yo'ó se-mozó Diose uún rque nuví  
 nocóo ne rej xtá', ne ma'an so' nicaj yo'ó aga' seraa  
 cuyuu sihaa uún a. 18 Gaa ne curihanj yo'ó se-mozó  
 Diose uún rej nicun' mesá altar, ne sí guun chij rihaan  
 ya'an me so', ne nucuaj ndo'o caguáj so' rihaan sí  
 nicaj yo'ó aga' sihaa yo' a. Dan me se cataj so', ne:

—Tacuachén so' sagá' so' aga' seraa sihaa tacóo nij  
 rasuun man rihaan yo'óo, ne naqui'yaj chre' so' nij  
 chruj uvá cachij rihaan yo'óo á. 'O se aj cané nu' nij  
 chruj uvá nanj ei —taj so' rihaan tuvi' mozó so' a.

19 Gaa ne dan me se tacuachén se-mozó Diose yo'  
 saga' so' aga' seraa tacóo nij rasuun man rihaan

yo'óo, gaa ne naqui'yaj chre' so' nij chruj uvá cachij  
 man rihaan chumii, gaa ne caraa sa' so' nij chruj uvá  
 yo' rque 'o xruj xij rej rii nii na man nij chruj uvá, ne  
 dan me se rej yo' me rej quiran' uxrá nij chruj uvá yo'  
 sayuun qui'yaj Diose vaa nanj adonj. 20 Gaa ne dan me  
 se rej tu'va chuman' quirii nii man chruj uvá, ne rej yo'  
 me canuu nii man chruj uvá yo', ne curihanj ndo'o ton  
 rque xruj xij yo', ne quisij ton yo' ndaa tu'va nij cuayó  
 yo' rej nuu rtá, ne va'nuj cientó táá yo'ó icó kilómetro  
 ya cunanj ton yo' rej gan' rihaan yo'óo a.

#### Nana nihánj taj xna'anj che'é chij se-mozó Diose nij sí nicaj sayuun a

15 Gaa ne quene'én 'unj yo'ó rasuun curuvi' rej  
 xtá' qui'yaj Diose, ne se xij ndo'o me yo', ne ra-  
 suun caraya'anj yá' me yo' a. Dan me se quene'enj chij  
 se-mozó Diose, ne chij sayuun ca'na' me nicaj nij  
 se-mozó Diose yo' a. Ne asa' quisij guun sayuun yo' ri-  
 haan chumii qui'yaj Diose, gaa ne ca'ne' rá Diose ga  
 suun axrij yuvaa man chumii a.

2 Gaa ne quene'én 'unj na ya'anj, ne ndaa raan  
 ma'an rihaan na ya'anj yo', ne ase vaa raan vidrió ro',  
 danj vaa raan yo', ne ase vaa ya'an vaa yo', ne nij sí  
 qui'yaj canaán rihaan xcuu yuvaa yo' do', rihaan  
 se-tinanga' xcuu yuvaa yo' do', rihaan número uun  
 se-chuvii xcuu yuvaa yo' do', nij so' me nij sí nicun' ri-  
 haan na ya'anj vidrió yo', ne nicaj nij so' ta'ánj Diose  
 nicun' nij so' yo' a. 3 Ne achraá nij so' chra' qui'yaj sí  
 cu'naj Moisés sí qui'yaj suun che'é Diose gaa naá, ne  
 xra' matzinj le'ej me chra' yo' a. Ne nihánj me nana  
 cahráá nij so' a:

—Xij ndo'o ne ya'anj ndo'o vaa nu' suun qui'yaj suun  
 so', Diose sij ne'en qui'yaj cunudanj sij 'nij ra'a man  
 núj á. Tucuáán nicá ne tucuáán ya me nu' tucuáán  
 cuchruj so', ne sí nicaj suun rey uun chij rihaan  
 cunudanj yuvii mé so' á. 4 Me sí se ca'vej rá caraa  
 cochroj rihaan so', ga man Señor. Ve'é ca'mii cunudanj  
 yuvii ni'yaj nij yuvii mán so' a. 'O se orún' so' me sí sa'  
 inanj, ne ca'na' cunudanj nij yuvii man rihaan chumii,  
 ne na'vij nij yuvii rihaan so' á. 'O se quene'en nij so'  
 nu' nij suun nicá qui'yaj suun so' adonj —me chra'  
 cahráá nij sí qui'yaj canaán yo' a.

5 Gaa ne quene'én 'unj se vaa naxra' ta'yaa rihaan  
 nuví nocóo rej ne Diose rej xtá' rej xcaj yuvii cuentá  
 che'é so' a. 6 Gaa ne curihanj chij nij se-mozó Diose nij  
 sí nicaj sayuun rque nuví nocóo yo', ne nuu nij so'  
 yatzij linó sa' inanj naruvii chuguun, ne 'nij catuun nij  
 so' merque caxra' anó ndaa rucuaa nij so', ne merque  
 aga' oró míí inanj me nij merque yo' a. 7 Gaa ne yo'ó  
 tuvi' ca'anj nij xcuu ro', rqué xo' chij co'oo aga' oró míí  
 rihaan chij nij se-mozó Diose, ne sayuun qui'yaj Diose  
 caxrij yuvaa Diose man nij sí man rihaan chumii ro',  
 maan ndaa araa ma'an sayuun yo' rque nij co'oo a. Ne  
 Diose, tzaj ne so' me sí gaa i'na' nu' cavii nu' ca'anj  
 adonj. 8 Ne che'é se ve'é ndo'o 'yaj Diose ne che'é se  
 nucuaj ndo'o Diose, che'é dan caraa catze' rá nuví no-  
 cóo yo', ne taj vaj sí guun nucuaj catuu rque nuví no-

coo yo' ndaa se quisij chij nij sayuun nicaj chij nij se-mozó Dioso tagüéj nij so' rihaan chumij a.

**Nana nihánj taj xna'anj che'é sayuun man rque co'oo nicaj chij nij se-mozó Dioso a**

**16** Gaa ne cunó 'unj se vaa nucuaj ca'mii 'o síf ne rá nuví nocoo yo' rihaan chij nij se-mozó Dioso, cataj so':

—Cavij nij soj, tucuayuu soj se man rque se-co'oo soj rihaan yo'óo, che'é rej caxrij yuvaa Dioso man nij síf man rihaan yo'óo á —taj síf ne rá nuví nocoo yo' a.

<sup>2</sup> Gaa ne guun yaan 'o se-mozó Dioso, cavii so' ca'anj so', ne tucuayuu so' se nuu rque se-co'oo so' rihaan yo'óo a. Gaa ne dan me se canó ndo'o luj ri'yuj chi'ij man nij síf no se-ta'nga' xcuu yuvaa síf na'vij rihaan se-tinanga' so' a.

<sup>3</sup> Gaa ne se-mozó Dioso mozó vij, ne tucuayuu so' se man rque se-co'oo so' rihaan na ya'anj yo', ne ase vaa ton man xngá ro', danj vaa nu' na ya'anj yo' a. Gaa ne cunudanj nij xcuu do', xcuaj do', cavi' rque na ya'anj yo' a.

<sup>4</sup> Gaa ne se-mozó Dioso mozó va'nuy, ne tucuayuu so' se man rque se-co'oo so' rihaan nij chráa do', rihaan nij rej avii na do' a. Gaa ne guun ton man nu' nij na yo' a.

<sup>5</sup> Gaa ne cunó 'unj ca'mii se-mozó Dioso síf tumé na, se vaa cataj so':

—Cunaj uxrá 'yáa so' sij nicun' yaj sij nicun' asij naá, ne sij sa' inanj mé so' á. 'O se ma'án so' me síf cataj xna'anj se vaa guun nu' nij rasuun nihánj nanj adonj.

<sup>6</sup> 'O se nij síf man rihaan chumij ro', tucuayuu nij so' ton man nij síf sa' do', ton man nij síf nata' se-nana so' do', rihaan yo'óo, ne nihánj me se rque so' ton rihaan nij so' co'oo ma'an nij so' yaj adonj. Dan me se yaj me nayon ya cuentá ndaa vaa qui'yaj nij so' gaa naá ei —taj se-mozó Dioso síf tumé na yo' a.

<sup>7</sup> Gaa ne cunó 'unj se vaa ca'mii mesá altar, ne cataj yo':

—Veé danj vaa, Dioso sij 'nij ra'a man núj sij guun nucuaj qui'yaj cunudanj a. Nana ya ne nana nicá me nu' nana cataj xna'anj so' gaa ca'ne' so' cacun' che'é nij yuvij yo' —taj yo' uún a.

<sup>8</sup> Gaa ne se-mozó Dioso mozó ca'anj ro', me se tucuayuu so' se man rque se-co'oo so' rihaan güii a. Gaa ne guun nucuaj güii cacaa nij yuvij qui'yaj güii a. <sup>9</sup> Gaa ne cacaa ndo'o nij yuvij, gaa ne dan me se nda' se Dioso me síf uun chij rihaan nu' nij sayuun yo', tzaj ne ca'mii chi'ij nij yuvij ni'yaj nij yuvij man Dioso, ne ne canicaj nimán nij yuvij ca'mii sa' nij yuvij che'é Dioso a ma'.

<sup>10</sup> Gaa ne se-mozó Dioso mozó 'un' ro', me se tucuayuu so' se man rque se-co'oo so' rihaan chruun xlá rej taj xcuu yuvaa a. Gaa ne yuun che'e cunuu rmj' nu' rej quirii ta'nga' xo' rihaan, ne dan me se que'ee ndo'o man nij síf guun chij xo' rihaan, ne ndaa chá ruj ma'an nij so' tu'va nij so' che'é yan a'ngaj man nij so' a. <sup>11</sup> Gaa ne dan me se ca'mii chi'ij nij so' che'é Dioso, che'é se que'ee ndo'o man nij so' ne canó luj chi'ij ri'yuj man nij

so' a. Tzaj ne ne canicaj nimán nij so' tanáj nij so' se chi'ij qui'yaj nij so' a ma'.

<sup>12</sup> Gaa ne se-mozó Dioso mozó vatan' ro', me se tucuayuu so' se man rque se-co'oo so' rihaan chráa xij cu'naj chráa Eufrates, gaa ne canacoo nu' na man rque chráa yo', qui'yaj so' a. Ne dan me se guun chráa yo' chrej cachén nij síf nicaj suun rey cavii rej síf güii ca'na' nij so' a. <sup>13</sup> Gaa ne quene'én 'unj se vaa curihanj va'nuy nana chi'ij tu'va xcuáa tu'vij do', tu'va xcuu yuvaa do', tu'va síf nata' nana ne do', ne ase vaa riquij vaa va'nuy nij nana chi'ij yo' a. <sup>14</sup> 'O se nana chree me nij so', ne vaj nij so' 'yaj suun nij so' suun nocoo ne'en nij yuvij, ne dan me se cavii nij so' ca'anj nij so' rej ne nij síf nicaj suun rey uun chij rihaan nu' nij yuvij man rihaan chumij a. Gaa ne cunuu chre' cunudanj nij síf nicaj suun rey, qui'yaj nij nana chree, che'é rej cunuu' nij síf nicaj suun rey yo' ga Dioso asa' quisij güii ca'ne' Dioso cacun' che'é yuvij a. Ne Dioso me síf guun nucuaj qui'yaj cunudanj ei.

<sup>15</sup> Ne nihánj me se-nana síf 'nij ra'a man ní' a:

—Dan me se ase vaa 'na' yuve síf ituu ro', danj gaa cuchí' 'unj rihaan soj á. Ne cavii sa' síf ne otoj, ne ni'yaj rangá' nij so', ne tumé sa' nij so' sagan' nij so' yatzij catzij á. Dan me se se gaa canj nij so' cachee' nij so', ne se cunó chrej na'aj rihaan nij so' ni'yaj yuvij man nij so' ma' —taj síf 'nij ra'a man ní' ni'yaj so' man nij síf ne tumé cacun' a.

<sup>16</sup> Gaa ne dan me se cunuu chre' nij síf nicaj suun rey yo' rej cu'naj Armagedón xna'anj hebreo, qui'yaj va'nuy nij nana chree yo' a. <sup>17</sup> Gaa ne se-mozó Dioso mozó chij me se tucuayuu so' se man rque se-co'oo so' rihaan nana a. Gaa ne nucuaj ca'mii síf taj chruun xlá sa' nicun' rá nuví nocoo, cataj so', ne:

—Quisij guun yo' á —taj so' a.

<sup>18</sup> Gaa ne quiraan, ne cariin ndo'o, ne caguáj ndo'o tu'vii, ne cachén uxrá yuún yuvaa, ne nucuaj doj yuún yo' rihaan nu' nij yuún cachén rihaan chumij nihánj asij guun che'e yuvij cayáan yuvij rihaan chumij nihánj a. <sup>19</sup> Dan me se quixra' ta'aj chuman' xij nocoo yo', ne cunuu va'nuy ta'aj chuman' xij yo', ne canee cunudanj yo'óo nij chuman' naj rihaan chumij, qui'yaj yuún a. Dan me se na'nuy rá Dioso chuman' nocoo cu'naj Babilonia se vaa rque so' 'o aga' na vinó 'na' sayuun co'oo chuman' yo', ne na vinó yo' ro', me se vaa caxrij yuvaa Dioso man chuman' yo' a. <sup>20</sup> Gaa ne cunánj cunudanj nij yo'óo naj tanuu rihaan na ya'anj do', cayuu cunudanj nij quij xcaan do', ne ne curuvi' a 'o'óo nij quij a ma'. <sup>21</sup> Ne caman' ndo'o maan yahij xráa nij yuvij, ne vij chihaa chí' kiló me 'o' 'o' chraan yu've' yo' cayuu xráa nij yuvij a. Gaa ne guun che'e nij so' ca'mii chi'ij nij so' ni'yaj nij so' man Dioso che'é maan yahij go' xráa nij so' qui'yaj Dioso a. 'O se sayuun uxrá vaa sayuun quiran' nij so' nanj adonj.

**Nana nihánj taj xna'anj che'é chana' niha' rá ga chii a**

**17** Gaa ne dan me se ca'na' yo'óo tuvi' chij nij se-mozó Dioso nicaj chij nij co'oo, gaa ne cataj so' rihanj a:

—Cuvá' sɔ' nihánj, ne tijaán 'unj rihaan sɔ' daj gaa sayuun quiran' chana niha' rá gá chii chana taj rihaan que'ee nij na ya'anj ei. <sup>2</sup> Dan me se qui'yaj chi'ii nij sí nicaj suun rey uun chij rihaan chumij gá no', gaa ne ase 'yaj nij sí xno' ro', danj qui'yaj nij sí man rihaan chumij, che'é se qui'yaj chi'ii nij so' gá no' chuguanj —taj se-mozó Diose rihanj a.

<sup>3</sup> Gaa ne ca'anj nimán 'unj rej tacaan, qui'yaj uún se-mozó Diose a. Gaa ne dan me se quene'én 'unj 'o chana taj xráa xcuu yuvaa maree, ne nó ndo'o se-chuvij xo' xráa xo', ne nij nana yo' me se inanj nana chi'ii me nij yo', ne vaa chij raá xo', ne táa chi' cúu raá xo' a. <sup>4</sup> Ne chana yo' ro', nuú no' yatzij tintá gá yatzij maree, ne nó aga' oró míi dɔ', yahij chuguun tu'vee ndo'o dɔ', rmii raan perlá tu'vee ndo'o dɔ', nó rihaan sagan' no' a. Ne nicaj ra'a no' yo'o aga' tazá aga' oró míi, ne ndaa araa ananj ma'an inanj nij se chi'ii rque aga' oró yo', ne dan me se inanj se chi'ii qui'yaj ma'an no' me se vaa araa man rque sagan' no' a. <sup>5</sup> Ne caan rihaan no' ro', nó se-chuvij no', ne nana yuve me se-chuvij no', ne dan me se chuman' nocɔo cu'naj Babilonia cu'naj no', ne nii taran' nij chana niha' rá gá chii me no', ne nii cunudanj nij se chi'ii man rihaan chumij me uún no' a. <sup>6</sup> Gaa ne quene'én 'unj se vaa xno' chana yo', che'é se aj co'o ndo'o no' ton man nij sí vaa sa' rihaan Diose dɔ', ton man nij sí nata' se-nana Jesucristó dɔ' a. Ne ca'anj ndo'o raj ni'yaj 'unj man no' a. <sup>7</sup> Gaa ne xná'anj se-mozó Diose manj, cataj so', ne:

—Me che'é ca'anj rá sɔ' gá. 'O se cataj xna'anj 'unj rihaan sɔ' nana yuve nana che'é chana dɔ', che'é xcuu yuvaa atá man no' xcuu taj chij cúu yave dɔ', che'é chi' cúu taj raá chij cúu yave xo' dɔ' a. <sup>8</sup> Xcuu yuvaa ne'én sɔ' ro', me sí cayáan asij rque doj, tzaj ne taj vaj so' rihaan chumij cuano ma'. Ne rej rihaan ní' me se vaa cavii uún so' yu'uj cunuu ndo'o, gaa ne ca'anj so' rej quiri' nu' so' ei. Tananj uún, ne vaa nij sí man rihaan chumij sí ne no' se-chuvij rihaan yanj no' se-chuvij nij sí gaa i'na' nu' cavii nu' ca'anj asij ataa qui'yaj Diose chumij, ne ca'anj rá nij so' ni'yaj nij so' xcuu yuvaa yo', che'é se quene'én nij so' se vaa asij rque doj cayáan xo', ne taj vaj xo' cuano ma'. Ne rej rihaan ní' me se ca'na' uún xo' adonj. <sup>9</sup> Ne nihánj me xcaj sí avii raá cuentá a. Dan me se chij nij raá xcuu yuvaa yo' ro', me chij quij, ne ne chana yo' xráa nij quij yo' a. Ne chij sí nicaj suun rey me uún chij nij raá xcuu yuvaa yo' a. <sup>10</sup> Dan me se 'un' nij so' ro', aj quiri' ne aj navij cachén nij so' suun a. Ne yo'ó so' ro', ne cuano, ne ataa quisij yo'ó so' uún, ne asa' ca'na' yo'ó so', ne doj cayáan so' rihaan suun nanj á. <sup>11</sup> Ne ma'an xcuu yuvaa yo' me se sí cayáan asij rque me so', ne taj vaj so' ne cuano ma'. Ne sí nicaj suun rey tunj me so', tzaj ne yo'o tuvi' yo'ó chij nij sí nicaj suun rey me uún so', ne cavii so', ne quiri' nu' so' nanj adonj.

<sup>12</sup> Ne chi' nij cúu taj nij raá xcuu yuvaa ro', me chi' nij sí nicaj suun rey uún a. Dan me se ataa cayáan nij so' qui'yaj nij so' suun a. Tzaj ne asa' qui'yaj nij so' suun rey me se orún' orá nii guun nij so' sí nicaj suun rey ne guun chij nij so' gá ma'an xcuu yuvaa yo' ei. <sup>13</sup> Dan me

se yo'o cuyaan gaa rá taran' nij so', ne nayon xcuu yuvaa rihaan nij so' guun chij ma'an xcuu yuvaa, qui'yaj ma'an nij so' adonj. <sup>14</sup> Gaa ne cunu' taran' nij so' gá matzinj le'ej, tzaj ne qui'yaj canaán nij tuvi' matzinj le'ej rihaan nij so' ei. 'O se matzinj le'ej ro', me sí 'nij ra'a man nu' sí uun chij, ne sí nicaj suun rey uun chij rihaan nu' sí nicaj suun rey me uún so' adonj. Ne nij tuvi' so' ro', me nij sí canacúun so' canocɔ' man so', ne dan me se aj narii so' man nij so', ne yo'o amán rá nij so' ni'yaj nij so' man so' ei —taj se-mozó Diose rihanj a.

<sup>15</sup> Gaa ne cataj uún so':

—Nij na quene'én sɔ' rej ne chana niha' rá gá chii ro', me que'ee yuvij dɔ', yuvij man que'ee chuman' dɔ', yuvij a'mii que'ee xna'anj a'mii yuvij dɔ' a. <sup>16</sup> Ne xcuu yuvaa yo' dɔ', chi' nij cúu taj raá xcuu yuvaa dɔ', nachri' ndo'o nij so' ni'yaj nij so' man chana niha' rá gá chii yo' a. Ne quiri' nu' no', qui'yaj nij so', ne cánj uun gaa no', qui'yaj nij so', ne cha' nij so' man no', ne cacaa nu' no', qui'yaj nij so' nanj ei. <sup>17</sup> 'O se ma'an Diose caxrij chrej rque nij so' se vaa qui'yaj nij so' ndaa vaa me rá ma'an so' qui'yaj nij so', ne che'é dan yo'o vaa rá taran' nij so', ne nayon xcuu yuvaa rihaan nij so' guun chij xo', qui'yaj nij so', ne veé danj guun chij ya xo' ndaa se quisij ya nu' se-nana Diose ei. <sup>18</sup> Ne ma'an chana quene'én sɔ' ro', no' me chuman' nocɔo 'nij ra'a man nij sí nicaj suun rey uun chij rihaan chumij a —taj se-mozó Diose rihanj a.

#### Nana nihánj taj xna'anj se vaa canee nu' chuman' Babilonia a

**18** Veé dan, gaa ne quene'én 'unj yo'ó se-mozó Diose cavii rej xta' nanij rihaan yo'óo, ne sí nu-cuaj ndo'o me so' a. Ve'é ndo'o curuvi' so', ne chuguun rihaan yo'óo, qui'yaj so' a. <sup>2</sup> Gaa ne nucuaj ndo'o caguaj so', cataj so', ne:

—Canee nu' chuman' nocɔo cu'naj Babilonia, ne guun chihanj nana chree man yo', ne taga' nuu' nij nana chi'ii dɔ', yachruú dɔ', me yo' yaj ei. <sup>3</sup> 'O se chuman' yo' me se rque ndo'o no' na vinó co'o cunudanj nij yuvij man rihaan chumij, ne na vinó yo' ro', me sayuun quiran' nij so' che'é cacun' chi'ii qui'yaj nij so' gá no' a. Dan me se qui'yaj ndo'o nij sí nicaj suun rey cacun' gá no', ne nij sí naránj natu'vej ro', guun ru'vee ndo'o nij so' che'é rej ca'néj nu' nij so' nu' se sa' man chuman' yo' nanj adonj —taj se-mozó Diose yo' a.

<sup>4</sup> Gaa ne cunó 'unj nana ca'mii yo'ó so' rej xta', ne dan me se cataj so':

—Curihanj soj sij nocɔ' manj chuman' yo' ei. Se guun qui'yaj soj cacun' ndaa vaa 'yaj nij sí man chuman' yo' mei. Curihanj soj dɔ', se quiran' soj sayuun ndaa vaa quiran' nij so' ei. <sup>5</sup> 'O se aj ne'en Diose se vaa nocɔo ndo'o cacun' taj xráa nij so', ne nihánj me se qui'yaj Diose sayuun man nij so' chuguanj. <sup>6</sup> Dan me se ase vaa qui'yaj chuman' yo' sayuun man yuvij ro', danj gaa qui'yaj guee soj sayuun man chuman' yo', ne vij naru'vee soj sayuun man chuman' yo' ei. Dan me se rque ma'an aga' tazá tinachej chuman' yo' na co'o yu-

vij ro', veé maan rque aga' tazá yo' ro', vij guun che'e soj caraa soj na co' o ma'an chuman' yo' á. <sup>7</sup> Dan me se ca'mii xta' ndo'o no', ne nano' ndo'o no' se sa' gaa rihaan no', ne che'é dan qui'yaj ndo'o soj sayuun ndaa ca'ngaj ma'an nimán no', qui'yaj soj, ne ndaa que'ee ndaa cúu man no', qui'yaj soj, gaa ne xri' ndo'o rá no' ei. Dan me se taj nimán no': "Ne amán raj daj chihaa míj mei. Ma'anj me chana reiná uun chij ya, ne ne chu'vij ma'. Nuveé chana cavi' nicá mej, ne se quirán' 'unj sayuun daj chihaa míj ma'", taj no' a. <sup>8</sup> Ne che'é dan rque orún' güii me se ca'na' nu' nij sayuun quirán' no', ne dan me se cavi' ndo'o yuvij rque no' do', quinano ndo'o rá nij yuvij do', cachén ndo'o x'naa rque no' do', cacaa nu' no', qui'yaj ya'an do', nanj ei. 'O se nucuaj ndo'o Diose síi 'nij ra'a man soj síi ca'ne' cacun' che'é chuman' yo' nanj chuguanj —taj nana ca'mii síi ca'mii rej xta' a.

<sup>9</sup> Dan me se ta'vee ndo'o nij síi nicaj suun rey uun chij rihaan chumii ni'yaj nij so' man chuman' yo' asa' quene'en nij so' se vaa avii ndo'o catze' rej acaa chuman' yo' a. 'O se nij so' me síi qui'yaj ndo'o cacun' chi'ij ga no', ne cutun' ndo'o nij so' se sa' ga no' a.

<sup>10</sup> Ne dan me se gan' canicun' nij so' rej naj chuman' yo', che'é rej cuchu'vi' nij so' quene'en nij so' sayuun quirán' no' a. Ne cataj nij so':

—Ai. Ai. Ná'unj. Ni'qué so' chuman' nocoo chuman' nucuaj chuman' cu'naj Babilonia ei. 'O se rque orún' orá ca'na' sayuun rihaan so' che'é cacun' tumé so' a —cataj nij síi nicaj suun rey yo', ni'yaj nij so' man chuman' Babilonia yo' a.

<sup>11</sup> Ne nij síi naránj natu'vej rihaan chumii ro', ta'vee ndo'o nij so', ne quinano ndo'o rá nij so' ni'yaj nij so' chuman' yo' a. 'O se se ca'vee cane' a doj si'yaj nij so' rasuun, <sup>12</sup> aga' oró míi do', aga' platá catzii do', yahij chuguun tu'vee ndo'o do', rmii raan perlá do', yatzij linó do', yatzij sedá do', yatzij tintá do', yatzij maree do', nu' chruun gun' daj do', nu' rasuun rii nii man cúu marfil do', nu' rasuun rii nii man chruun sa' do', nu' rasuun rii nii man aga' bronce maree do', nu' rasuun rii nii man aga' hierró ndo'o do', nu' rasuun rii nii man yahij mármol do', <sup>13</sup> quíi canelá do', coj gun' daj do', na gun' daj do', squíi cu'naj mirra do', squíi xlá do', na vinó do', casté do', hariná do', 'núu trigó do', scúj do', matzinj do', cuayó do', cuchri' do', ndaa ma'an yuvij guun mozó do', se cane' daj chihaa míj uún rasuun yo', qui'yaj nij so' a ma'. <sup>14</sup> Ne nij síi naránj natu'vej ro', ca'mii nij so' rihaan chuman' yo', cataj nij so', ne:

—Ne nij chruj niha' ndo'o rá so' cha so' ro', navij nu' chruj yo', ne nu' se tu'vee ndo'o do', nu' se chuguun do', ca'anj ni'ya nij yo' rihaan so', ne daj chihaa míj se nari' uún so' man nij rasuun sa' vaa danj yaj a ma' —cataj nij síi naránj natu'vej rasuun a.

<sup>15</sup> Ne nij so' ro', me nij síi cunuu ru'vee qui'yaj chuman' yo', ne gan' canicun' nij so' ga no', che'é se cuchu'vi' nij so' ni'yaj nij so' sayuun quirán' no' a. Dan me se ta'vee nij so', ne quinano ndo'o rá nij so', <sup>16</sup> ne cataj nij so':

—Ai. Ai. Nique ndo'o so' chuman' nocoo nanj á. Chuman' nuu yatzij linó mé so', ne yatzij tintá do', yatzij maree do', nuú so', ne aga' oró míi do', yahij chuguun tu'vee ndo'o do', rmii raan perlá do', nó rihaan so', <sup>17</sup> tzaj ne rque orún' orá navij nu' nij yo' quiri' tananj —cataj nij síi naránj natu'vej yo' a.

Ne cunudanj nij síi tuguáj rihoo chéé rihaan na ya'anj do', nu' nij síi 'yaj suun rihaan rihoo chéé rihaan na ya'anj do', canicun' nij so' rej gan' a. <sup>18</sup> Dan me se gaa quene'en nij so' rej avii catze' yan acaa chuman', gaa ne caguaj nij so', cataj nij so':

—Me rej naj yo' o chuman' nocoo doj rihaan chuman' nihánj, rá soj yaj onj —cataj nij so' a.

<sup>19</sup> Dan me se caraa nij so' yo' o tachruu raaj nij so', ne ta'vee ndo'o nij so', ne quinano rá nij so', ne cataj uún nij so', ne:

—Ai. Ai. Ni'qué so' chuman' nocoo nanj á. Dan me se guun ru'vee taran' núj sij si'yaj rihoo chéé rihaan na ya'anj, qui'yaj rasuun sa' tu'vee man rque so' tzaj man. Tzaj ne nihánj me se rque orún' orá navij nu' so' nanj asuun. <sup>20</sup> Tzaj ne guun niha' rá nij soj sij ne rej xta' do', sij vaa sa' rihaan Diose do', sij ca'neé Jesucristó nata' rihaan yuvij che'é so' do', sij nata' se-nana Diose do', ni'yaj soj chuman' yo' á. 'O se qui'yaj Diose sayuun man chuman' yo' che'é cacun' qui'yaj chuman' yo' rihaan soj ei —cataj uún nij síi tuguáj rihoo chéé rihaan na a.

<sup>21</sup> Gaa ne yo' o se-mozó Diose síi nucuaj ndo'o ro', naxcaj so' yo' o yuvej xij, ne yuvej xij caxra' ndo'o me yo', ne quiri'ij so' man yo' rque na ya'anj, ne cataj so':

—Veé danj gaa quirán' guee so' chuman' nocoo cu'naj Babilonia ei. Dan me se quiri'ij nii man so' rque na ya'anj, ne daj chihaa míj se nari' uún nii man so' rque na ya'anj a ma'. <sup>22</sup> Ne daj chihaa míj se cuno nii chra' rque se-callé so' chuman' a ma'. Se cuno nii cachraa ya'anj do', cachraa rihuu do', cachraa chruun a'yánj do', rque so' a ma'. Ne se gaa síi qui'yaj me ma'an suun do', se gaa máquina váj nihaj do', se gaa a' o rasuun rque so' a ma'. <sup>23</sup> Ne se cuchuguun a' o aga' ya'an rej náa so' do', se nara'aa yuvij rej náa so' do', se cuno nii ca'mii cachraa yuvij do', rque so' a ma'. 'O se nij síi naránj natu'vej ne rque so' ro', me se nij síi ru'vee doj rihaan cunudanj nij ru'vee man rihaan chumii me nij so' adonj. Ne nij rmedió chi'ij cane' rque so' ro', me se tiha' yu'unj yo' man cunudanj nij yuvij man rihaan chumii chuguanj. <sup>24</sup> Ne ma'an so' tumé cacun' se vaa cavi' nij síi nata' se-nana Diose cavi' nij síi vaa sa' rihaan Diose cavi' cunudanj nij síi ticavi' nii rihaan chumii adonj —taj se-mozó Diose yo', ca'mii so' rihaan chuman' nocoo cu'naj Babilonia a.

**19** Veé dan, gaa ne cunó 'unj nana ca'mii nucuaj que'ee yuvij nicun' rej xta', ne cataj nij yuvij:

—Caraa guee ní' rihaan Ya'anj ei. Diose síi nocoo ní' man ro', so' me síi tinanii man ní' rihaan sayuun, ne guun chij ndo'o so', ne síi nucuaj ndo'o me so' adonj. <sup>2</sup> 'O se nana ya nana nicá inanj me nu' nana a'mii so' gaa a'ne' so' cacun' che'é yuvij adonj. 'O se yaj me naru'vee Diose rihaan nij yuvij che'é nu' cacun' qui'yaj

nij yuvij rihaan Diose a. Che'é dan qui'yaj so' sayuun man chuman' nocoo chuman' guun chana niha' rá ga chii, che'é se quiri' nu' chumij, qui'yaj no' do', che'é nu' nij síi nuu rihaan ma'an Diose síi cavi' qui'yaj chuman' nocoo yo' do' a —taj nij yuvij yo' a.

<sup>3</sup> Gaa ne cataj uún nij síi ca'mii rej xta' yo':

—Caraa guee ní' rihaan Ya'anj ei. Ne nu' cavii nu' ca'anj me se yo'o cavii catze' rej acaa chuman' yo' a —taj uún nij so' a.

<sup>4</sup> Gaa ne canicun' ruj icoo ca'anj nij síi uun chij do', ca'anj nij xcuu do', rihaan Diose síi taj rihaan chruun xla sa' yo', ne na'víj nij so' rihaan so', cataj nij so':

—Veé danj gaa ya ei. Caraa guee ní' rihaan Ya'anj ei —taj nij so' a.

### Nana niháñj taj xna'anj che'é cha'anj nara'aa matzinj le'ej yo' a

<sup>5</sup> Gaa ne cunó 'unj doj nana cavii rej nicun' chruun xla sa', ne cataj nana yo':

—Ca'mii sa' inanj soj rihaan Diose síi nocoo ní' man á. Dan me se soj sij 'yaj suun rihaan so' sij aráj cochroj rihaan so' ro', ta'aj soj me síi nique, ne ta'aj soj me síi sa' atá suun, ne ca'mii sa' taran' soj che'é so' á —taj nana cavii rej nicun' chruun xla sa' yo' a.

<sup>6</sup> Gaa ne cunó 'unj doj nana ca'mii que'ee ndo'o yuvij, ne ase uun rá' unó' cayuj vaj chraá xij do', ase uun rá' unó' aguáj ndo'o tu'vii do', danj guun raj gaa cunoo se-nana nij so', ne cataj nij so':

—Caraa guee ní' rihaan Ya'anj ei. 'O se guun che'e Diose síi 'nij ra'a man ní' guun chij so' ei. Síi uun nucaj qui'yaj cunudanj me so' adonj. <sup>7</sup> Dan me se guun niha' uxrá rá ní', ne ca'mii sa' ní' che'é so' á. 'O se niháñj me se anuú cha'anj nara'aa matzinj le'ej, ne chana xcaj so' man ro', aj quisij qui'yaj chuvii no' man no' nara'aa no' ga so' ei. <sup>8</sup> Ne rque níi yatzij linó sa' inanj cunuú no', ne ndaa too chuguun ma'an yatzij yo', ne naruvii sa' ndo'o yatzij yo' a. Ne yatzij yo' ro', me nu' se sa' qui'yaj nij síi vaa sa' rihaan Diose adonj —cataj nij yuvij yo' a.

<sup>9</sup> Gaa ne cataj yo'o so' rihanj a:

—Cachron so' nana niháñj rihaan yanj á. Dan me se vaa che'é gaa niha' rá nij síi canacúun nii man cha xti'no cha'anj nara'aa matzinj le'ej yo', cachron so' á —taj so' rihanj, ne cataj uún so' — Nana niháñj me nana ya ca'mii ma'an Diose adonj —taj uún so' a.

<sup>10</sup> Gaa ne canicun' ruj 'unj rihaan so' quina'vij 'unj rihaan so' a. Tzaj ne cataj uún so' rihanj a:

—Se qui'yáa so' danj ma'. 'O se 'unj ro', me síi 'yaj suun ga nij tinuj nij soj sij nata' se-nana Jesucristó rihaan yuvij a. Rihaan orún' Diose na'vij so' ei. 'O se nu' nana ca'mii nij síi nata' se-nana Diose ro', me nana rque Nimán Diose rihaan nij so', ne se-nana Jesucristó me nana yo' adonj —taj so' rihanj a.

### Nana niháñj taj xna'anj che'é síi taj xraá cuayó catzii a

<sup>11</sup> Gaa ne quene'én 'unj se vaa naxra' rej xta', gaa ne cavii 'o cuayó catzii, ne síi taj xraá cuayó yo' ro', me síi

cu'naj síi sa' a'mii nana ya a. Ne síi no xcuún atá suun cu'naj uún so', ne a'ne' nicá so' cacun' che'é yuvij, ne sa' uxrá unu' so' a. <sup>12</sup> Ne ase vaa ya'an chuguun vaa rlij rihaan so', ne que'ee ndo'o cachriin nuú raá so' a. Ne nó se-chuvij so' xraá so', tzaj ne dan me se orún' so' me síi ne'en daj cu'naj so' a. <sup>13</sup> Ne nuu so' yatzij quixij ndo'o ton man, ne tucu'náj nii se-nana Diose man so' a. <sup>14</sup> Ne canoco' nij tanuu man rej xta' xcó so', ne táa nij so' xraá cuayó catzii, ne nuu taran' nij so' yatzij linó sa' catzii naruvii sa' a. <sup>15</sup> Ne 'nij tu'va so' neê espadá sihaa, ne yo' me se vaa go' so' xraá nij yuvij man rihaan chumij, ne nicaj so' vará aga' hierró, ne tumé ma'an so' man nij yuvij a. Ne ma'an so' me síi ca'ne' cacun' che'é yuvij, ne quirii so' nu' cacun' atá yuvij, ne nda' rá se vaa ru'maan che'é nii chruj uvá ne rii nii nu' na uvá ro', veé danj gaa guee qui'yaj so', ne cavii nu' cacun' atá yuvij, qui'yaj so' a. Dan me se racuíj so' man Diose síi uun nucaj qui'yaj cunudanj axrj yuvaa Diose man nij síi tumé cacun' a. <sup>16</sup> Ne rihaan sagan' so' ne rihaan ta'maan so' do', nó se-chuvij so', ne síi 'nij ra'a man nu' nij síi uun chij, ne síi nicaj suun rey uun chij rihaan nu' nij síi nicaj suun rey me se-chuvij so' a.

<sup>17</sup> Gaa ne quene'én 'unj se vaa nicun' 'o se-mozó Diose tanuu rihaan güii, ne nucaj ndo'o caguáj so' rihaan cunudanj nij xtaa do', rihaan cunudanj yachrúu do', cataj so', ne:

—Ca'na' cunudanj soj cunu chre' soj, ne qui'yaj chuvii Diose cha xti'no soj ei. <sup>18</sup> Ne dan me se nee man síi nicaj suun rey do', nee man tanuu uun chij doj do', nee man síi nucaj do', nee man cuayó do', nee man nij síi taj xraá cuayó do', nee man mozó do', nee man síi ne uun mozó do', nee man síi nique do', nee man síi sa' atá suun do', cha soj á —cataj se-mozó Diose rihaan nij xo' a.

<sup>19</sup> Gaa ne quene'én 'unj man xcuu yuvaa yo' ga nij síi nicaj suun rey uun chij rihaan chumij ga nij tanuu nuu rihaan nij so', ne dan me se aj nuu chre' nij so' cunu' nij so' ga síi taj xraá cuayó catzii do', ga nij tanuu nuu rihaan so' do' a. <sup>20</sup> Tzaj ne quita'aa nii man xcuu yuvaa yo' do', man síi nata' nana ne síi qui'yaj suun nocoo rihaan xcuu yuvaa do' a. Ne suun nocoo qui'yaj so' me se veé danj tiha' yu'unj ndo'o so' man nij síi ca'ne' rá quino se-ta'nga' xcuu yuvaa yo' man do', síi quina'vij rihaan se-tinanga' xcuu yuvaa che'é suun nocoo quene'en nij so' do' a. Gaa ne dan me se quiri'ij nii man roj so' rque na ya'anj rej acaa ndo'o yo'óo azufre, ne veé danj vaa i'na' roj so' quiri'ij nii man roj so' rihaan na ya'anj yo' a. <sup>21</sup> Gaa ne neê espadá nuu tu'va síi taj xraá cuayó catzii yo' ro', me se cavi' yo'óo nij síi nocoo xcó roj so', qui'yaj neê espadá yo' a. Dan me se chá nij xtaa do', chá nij yachrúu do', man nee man nij síi cavi' yo' ndaa daj quisij caraa ma'an rque nij xo' a.

### Nana niháñj taj xna'anj che'é míj nij yo' numji xcuáa tu'vij a

**20** Gaa ne quene'én 'unj yo'o se-mozó Diose cavii rej xta', ne nanij so' 'na' so', ne oro' so' aga' ne' ga raga' yavé 'nij tu'va yu'uj cunu rmi' ndo'o yo' a.



<sup>2</sup> Gaa ne quita'aa so' xcuáa tu'vii xcuáa cayáan gaa naa a. Ne xcuáa tu'vii yo' ro', me sí chree, ne Satanás cu'naj so' a. Gaa ne dan me se nicaj se-mozó Diose aga' ne' numij se-mozó Diose man so' rque 'o mij ya yo' a.

<sup>3</sup> Gaa ne quiri'ij se-mozó Diose man so' rque yu'uj cunuu rmi' ndo'o, ne caxrij so' raga', ne cachron so' 'o ta'nga' selló ya tu'va yu'uj cunuu rmi' ndo'o yo', che'é rej yo' o qui'nij yuve xcuáa yo', gaa ne se gaa nanj tihá yu'unj uún xcuáa tu'vii yo' doj man nij yuvii man rihaan chumii rque 'o mij ya yo' a. Dan me se gaa quisij mij nij yo' yo', gaa ne naché uún xcuáa tu'vii yo' doj tzin' a.

<sup>4</sup> Gaa ne dan me se quene'én 'unj chruun xlá sa', ne vaa nij sí taj nij chruun xlá sa' yo' a. Dan me se ca'ne' Diose suun rihaan nij so' se vaa ca'ne' nij so' cacun' che'é nij yuvii a. Ne quene'én 'unj man yo' o nij sí ne rej yo' a. Ne nij so' ro', me nij sí sa' cavi' che'é se-nana Jesucristó nana nata' nij so' do', che'é se-nana Diose do' a. Ne nij so' ro', ne na'vij nij so' rihaan xcuu yuvaa do', rihaan se-tinanga' xcuu yuvaa do' ma'. Ne ne ca'vej rá nij so' cata' se-ta'nga' xcuu yuvaa yo' caan rihaan nij so' do', ra'a nij so' do' ma'. 'O se cunuu i'na' uún nij so', ne 'o mij yo' cayáan nij so' ne guun chij nij so' ga Jesucristó a. <sup>5</sup> Ne xa' yo' o nij sí cavi', tzaj ne ne cunuu i'na' uún nij so' ndaa se quisij ya nu' mij yo' yo' a. Tzaj ne nij sí taj rihaan chruun xlá sa' yo' ro', nij so' me nij sí cunuu i'na' uún asino yaan rihaan cunudanj nij yuvii a. <sup>6</sup> Dan me se sí vaa sa' inanj me se sí cavii sa' ndo'o me nij so', che'é se sí cunuu i'na' uún asino yaan me nij so' ei. Se ca'vee daj chihaa mij cavi' uún nij so' a ma'. Tzaj ne guun nij so' xrej cayáan rihaan Diose do', rihaan Jesucristó do', ne guun chij nij so' ga Jesucristó nu' mij ya yo' yo' ei.

<sup>7</sup> Gaa ne asa' quisij mij nij yo', gaa ne curihanj uún sí cu'naj Satanás taga' nuu so', <sup>8</sup> gaa ne cavii so' tihá yu'unj so' man nij sí man rihaan nu' cachra' chumii adonj. Dan me se tihá yu'unj so' man nij sí ne chuman' Gog do', man nij sí ne chuman' Magog do', gaa ne cunuu chre' taran' nij so', qui'yaj so', che'é rej cunuu nij so' a. Ne ase vaa que'ee ndo'o nij yo' o chruu naj tu'va na ya'anj ro', danj gaa que'ee nij tuvi' nij so' nanj ei. <sup>9</sup> Dan me se cavii nij so' rihaan taa, ne tucuachriin nij so' man rej ne nij tanuu sa' nij sí vaa sa' rihaan Diose do', man ma'an chuman' 'ee rá Diose man do' a. Gaa ne maan orá yo' cavii ndo'o ya'an rej xta' nanij yo' rihaan yo' o, gaa ne cacaa nu' nij sí chi'ii yo', qui'yaj ya'an yo' nanj adonj. <sup>10</sup> Gaa ne dan me se sí chree sí tihá yu'unj man nij so' ro', quiri'ij nii man so' rque na ya'anj rej acaa ndo'o yo' o azufre, ne yo' me rej nuu xcuu yuvaa do', sí nata' nana ne do' a. Gaa ne dan me se nuvi nigan' quiran' ndo'o nij so' sayuun nu' cavii nu' ca'anj nanj adonj.

**Nana nihánj taj xna'anj che'é chruun xlá xij catzii rej ca'ne' Diose cacun' che'é yuvii a**

<sup>11</sup> Gaa ne dan me se quene'én 'unj 'o chruun xlá xij catzii, ne quene'én 'unj 'o sí taj chruun xlá yo', ne cuchu'vi' ndo'o nu' chumii do', nu' rej xta' do', ni'yaj

roj yo' man so' a. Dan me se naxuun roj yo' man roj yo' rihaan sí taj chruun xlá, ne 'o se ne nari' roj yo' rej quinaj roj yo' a ma'. <sup>12</sup> Gaa ne quene'én 'unj man nij sí cavi' uún a. Dan me se sí sa' atá suun do', sí nique do', sí noco do', sí cunii do', quene'én 'unj, ne nicun' nij so' rihaan sí taj chruun xlá xij catzii yo' a. Gaa ne nuxra' nii nij yanj libró a. Dan me se nuxra' nij so' man yo' o yanj libró no se-chuvii nij sí gaa i'na' nu' cavii nu' ca'anj ga Diose a. Dan me se ca'ne' Diose cacun' che'é nij sí cavi' yo', ne ni'yaj so' nana no rihaan nij yanj libró yo' nana taj xna'anj ndaa vaa qui'yaj nij so' gaa vaa i'na' nij so' rihaan chumii a. <sup>13</sup> Dan me se narqué na ya'anj nu' nij sí cavi' rque na ya'anj, ne me rej ma'an naj nij sí cavi' yo' nurihanj nij so' canicun' nij so' rihaan sí taj chruun xlá xij catzii yo' a. Dan me se ni'yaj Diose rihaan yanj libró, ne ca'ne' Diose cacun' che'é 'o 'o nij so' ndaa vaa qui'yaj 'o 'o nij so' a. <sup>14</sup> Dan me se ma'an ta'naj 'yaj avi' yuvi do', nu' rej naj nimán nij sí cavi' do', quiri'ij Diose man nij yo' rihaan ya'an cacaa nij yo' a. Ne rihaan ya'an yo' ro', me rej yo' o cavi' ya uún nii nu' cavii nu' ca'anj a. <sup>15</sup> Ne xa' taran' nij sí nuvi se-chuvii rihaan yanj no se-chuvii nij sí gaa i'na' nu' cavii nu' ca'anj, tzaj ne quiri'ij nii man nij so' rihaan ya'an, ne yo' o cacaa nij so' ei.

**Nana nihánj taj xna'anj che'é rej xta' naca do', che'é yo' o naca do' a**

**21** Dan me se cachén nu' rasuun nga, gaa ne quene'én 'unj rej xta' naca do', yo' o naca do' a. 'O se aj navij nu' rej xta' nga do', yo' o naca do', ne na ya'anj me se nuvi yo' naj a ma'. <sup>2</sup> 'O se 'unj sij cu'naj Juan me quene'en se vaa cavii chuman' guee chuman' Jerusalén naca rej xta' rej ne Diose, ne nanij yo', ne ase uun rá ni'ya' chana nara'aa ro', danj guun raj ni'yaj 'unj man chuman' yo' a. <sup>3</sup> Gaa ne dan me se cunó 'unj nana ca'mii sí taj chruun xlá sa', cataj so', ne:

—Ni'yaj soj ei. Nihánj me rej cayáan Diose ga yuvii a. Dan me se cayáan so' ga nij yuvii, ne taj ya'anj so' man nij yuvii, ne dan me se cayáan rcua'aa Diose ga nij so', ne Diose sí noco' nij so' man me so' nanj adonj. <sup>4</sup> Ne ma'an Diose ro', na've nu' na ayanj rihaan nij so', ne se cavi' uún nij so' a ma'. Ne se nanó rá nij so' do', se ta'vee nij so' a doj do', se quiran' nij so' a doj sayuun do', a ma'. 'O se aj cachén nu' rasuun nga yo' nanj adonj —taj sí taj rihaan chruun xlá sa' yo' a.

<sup>5</sup> Gaa ne cataj uún so':

—Ni'yaj soj ei. Nihánj me se qui'yaj naca uún 'unj man cunudanj nij rasuun nanj ei —taj so', gaa ne cataj uún so'— Cachron so' nana nihánj rihaan yanj á. 'O se nana ya me nana nihánj, ne vaa che'é gaa nucuaj rá soj manj se vaa qui'yaj nu' rasuun nihánj ei —taj so' a. <sup>6</sup> Gaa ne cataj uún so' rihanj— Aj quisij qui'yaa 'unj nu' rasuun nanj á. Ne ase vaa letrá A do', ase vaa letrá Z do', vaa 'unj, ne dan me se sij nicun' asij rque mej, ne veé 'unj canicun' nu' cavii nu' ca'anj nanj adonj. Ne rihaan sí naco na me se rque 'unj na co' o so', ne gaa i'na' so' nu' cavii nu' ca'anj, qui'yaj na yo' ei. Ne dan me se co' o uun so' na, ne se ca'nej 'unj a doj sa'anj

man so' a ma'. <sup>7</sup> Ne sí 'yaj canaán ro', me se guun so' sí nicaj cunudanj rasuun si'yáá 'unj, ne 'unj ro', me se guun Diose taj ya'anj man nij so', ne nij so' ro', guun ta'nij ne'ej adonj. <sup>8</sup> Tzaj ne xa' nij sí cunanj rihaan sayuun do', nij sí ne noco' raan manj do', nij sí 'yaj se chi'ij do', nij sí ticavi' tuvi' do', nij sí 'yaj chi'ij ga chana do', nij sí chruun do', nij sí na'víj rihaan ya'anj acóy yuvi' do', taran' nij sí ne do', me se vaa rej cacaa' nij so' rihaan ya'an, ne rej acaa ndo'o yo'ó azufré me yo' ei. Yo' me rej cavi' uún nij so' nu' cavii nu' ca'anj nanj chuguanj —taj sí taj rihaan chruun xlá sa' yo' a.

### Nana nihánj taj xna'anj che'é chuman' Jerusalén naca a

<sup>9</sup> Gaa ne ca'na' yo'o tuvi' chij nij se-mozó Diose sí nicaj chij nij co'oo araa ndaa ayanj ma'an chij nij sayuun a. Gaa ne cataj so' rihanj a:

—Cuva' so' nihánj, ne tiháan 'unj chana xcaj matzinj le'ej man rihaan so' á —taj so' rihanj a.

<sup>10</sup> Gaa ne dan me se ca'anj nicaj so' nimanj raá quij xcaan, gaa ne tiháan so' chuman' guéu cu'naj Jerusalén rihanj, ne cavii chuman' yo' rej xta' rej ne Diose, ne nanij yo' rihaan yo'ó a. <sup>11</sup> Ne chuman' yo' ro', me se ma'an ta'an Diose me 'yaj chuguun cunudanj chuman' yo' nanj adonj. Ne chuguun yo' ndaa vaa chuguun yahij chuguun tu'vee ndo'o a. Dan me se ase vaa yahij jaspe vaa yo', chuguun ndo'o yo' a. <sup>12</sup> Dan me se nicun' 'o chingá chraan xij xcaan nu' anicaj tu'va chuman' yo', ne taj chuvij ta'yaa tu'va chingá yo', ne nicun' se-mozó Diose tu'va 'o 'o ta'yaa yo' a. Ne nó se-chuvij chuvij nij x'ne' nij yuvij israelitá rihaan chuvij nij ta'yaa yo' a. <sup>13</sup> Dan me se rej síj güii rihaan chingá chraan ro', táa va'núj nij ta'yaa, ne rej norte rihaan chingá ro', táa ya'núj nij ta'yaa, ne rej sur rihaan chingá chraan ro', táa ya'núj nij ta'yaa, ne rej ata' güii rihaan chingá chraan ro', táa ya'núj nij ta'yaa yo' a. <sup>14</sup> Ne vaa chuvij yujej xij naj tacóo che'é chingá chraan yo', ne rihaan chuvij nij yujej yo' ro', nó se-chuvij chuvij nij apóstol cune' matzinj le'ej man nata' se-nana so' rihaan yuvij a.

<sup>15</sup> Ne se-mozó Diose sí ca'mii ga 'unj ro', nicaj so' 'o vará aga' oró míi, che'é rej xcaj ta'nga' so' chuman' do', nij ta'yaa do', nu' chingá do' a. <sup>16</sup> Ne dan me se cuyaán vaa rej xcaan ga rej caxra' man chuman' yo' a. Gaa ne xcaj ta'nga' so' chuman' yo', ne vij míj táa yavij cientó kilómetro vaa chuman' yo' rej xcaan do', rej caxra' do', rej xta' uún do' a. Dan me se cuyaán vaa rej xcaan do', rej caxra' do', rej xta' do', man chuman' yo' a. <sup>17</sup> Gaa ne dan me se xcaj ta'nga' so' rej xcaan xta' chingá yo', ne va'núj chihaa' ca'anj metró taj doj vaa chraan chingá yo' xta' a. Dan me se ase vaa xcaj ta'nga' yuvij rasuun ro', danj vaa xcaj ta'nga' se-mozó Diose yo' nu' chingá yo' a. <sup>18</sup> Ne inanj yahij jaspe me nu' chraan yo', ne inanj aga' oró míi sa' me nu' chuman' yo', ne ase vaa vidrió ro', danj vaa nu' aga' oró míi sa' yo' a. <sup>19</sup> Ne canó me a' yahij chuguun tu'vee ndo'o ro', nó rihaan tacóo chuman' yo' a. Dan me se yo'o yujej xij naj tacóo chraan ro', me yahij jaspe, ne

yo'ó yujej ro', me yahij zafiro, ne yo'ó yujej ro', me yahij ágata, ne yo'ó yujej ro', me yahij esmeralda a. <sup>20</sup> Ne yo'ó yujej ro' me yahij ónice, ne yo'ó yujej ro', me yahij cornalina, ne yo'ó yujej ro', me yahij crisólito, ne yo'ó yujej ro', me yahij berilo, ne yo'ó yujej ro', me yahij topacio, ne yo'ó yujej ro', me yahij crisopraso, ne yo'ó yujej ro', me yahij jacinto, ne yo'ó yujej ro', me yahij amatista a. Ne nu' nij yahij yo' ro', nó rihaan 'o 'o nij yujej xij naj tacóo chingá chuman' yo' a. <sup>21</sup> Ne chuvij nij ta'yaa taj rej atúj yuvij rque chuman' ro', me rmii perlá nanj a. Dan me se orún' rmii perlá yo' me 'o 'o ta'yaa a. Ne inanj aga' oró míi sa' me nu' nij callé taj rque chuman' yo', ne ase vaa raan vidrió ro', vaa nu' aga' oró míi yo' a.

<sup>22</sup> Ne nuvi' nuvíi nocoo quene'én 'unj rque chuman' yo' ma'. 'O se ma'an Diose sí 'nij ra'a man ní' sí uun nucuaj qui'yaj cunudanj ga ma'an matzinj le'ej me roj sí guun nuvíi rque chuman' yo' nanj adonj. <sup>23</sup> Ne ne achiin güii do', yavii do', chuguun rihaan chuman' yo' a ma'. 'O se ma'an Diose chuguun rihaan chuman' yo', ne ma'an matzinj le'ej yo' guun aga' chuguun rque nu' chuman' yo' nanj chuguanj. <sup>24</sup> Ne cunudanj nij yuvij man rihaan chumii, curuvi' ni'yaj nij so' cachee' nij so', qui'yaj ma'an chuman' yo' a. Ne nij sí nicaj suun rey ro', me se nicaj nij so' nu' si'yaj nij so' rasuun sa', 'na' nij so' rque chuman' yo' a. <sup>25</sup> 'O se inanj rej rangá' gaa yo', ne daj chihaa' míj se caráan nii ta'yaa taj tu'va chuman' yo' ma'. 'O se taj vaj rej ni' chuman' yo' ma'. <sup>26</sup> Ne nu' rasuun sa' nicaj cunudanj nij yuvij man rihaan chumii me se ca'anj nicaj nii nu' rasuun sa' yo' rque chuman' yo' a. <sup>27</sup> Tzaj ne taj vaj a doj se chi'ii catuu rque chuman' yo' ma'. 'O se sí 'yaj se chi'ii do', sí a'mii ne do', se catúj nij so' daj chihaa' míj rque chuman' yo' a man adonj. Tzaj ne orún' nij sí no se-chuvij rihaan danj matzinj le'ej yanj libró no se-chuvij nij sí gaa i'na' ga Diose nu' cavii nu' ca'anj ro', orún' nij so' me nij sí catuu rque chuman' yo' nanj adonj.

**22** Gaa ne tiháan se-mozó Diose yo' 'o chráa' rihanj, ne chráa' nuu na 'yaj vaa i'na' yuvij ga Diose nu' cavii nu' ca'anj me chráa' yo' a. Ne ndaa chuguun raan ma'an chráa' yo' a. Ne chráa' yo' ro', me avii tacóo chruun xlá sa' xruún Diose do', xruún matzinj le'ej do' a. <sup>2</sup> Ne tanuu callé nocoo taj rque chuman' yo' nicun' chruun 'yaj vaa i'na' yuvij ga Diose nu' cavii nu' ca'anj a. Dan me se nu' niha' tu'va chráa' yo' nicun' chruun yo' a. Ne vaa chuvij chruj rii chruun yo', ne dan me se ino' vaa chruj rii chruun yo' 'o 'o yavii, ne dan me se cuny' yo' man chruj raá chruun yo' a. Ne coj man ra'a chruun yo' ro', 'yaj nahuun sa' cunudanj nij yuvij man rihaan chumii a. <sup>3</sup> Ne taj vaj a doj rasuun chree man yo' a ma'. Ne chruun xlá sa' xruún Diose do', xruún matzinj le'ej do', nicun' chuman' yo', ne yo' me rej man nij sí 'yaj suun rihaan so' a. <sup>4</sup> Ne rihaa' ya quene'én nij so' rihaan ma'an ya Diose, ne quino' se-chuvij Diose caan rihaan nij so', <sup>5</sup> ne taj vaj rej nij quene'én nij so' rej yo' a ma'. Ne se cachiin aga' chuguun do', naán güii do', rihaan nij so' a ma'. 'O se ma'an Diose sí 'nij ra'a man ní' chuguun rihaan nij so',

ne dan me se guun chij nij so' nu' cavii nu' ca'anj ga Diose nanj chuguanj.

**Nana nihanj taj xna'anj se vaa nichrun' ca'na' uun Jesucristó a**

<sup>6</sup> Gaa ne cataj uun se-mozó Diose yo' rihanj a:

—Vaa che'é gaa nucaj rá so' man nana ya nihanj ei. Ne Diose síi 'nij ra'a man ní' síi uun chij nimán nij síi nata' se-nana so' ro', ca'neé so' man se-mozó so' rihaan nij síi 'yaj suun rihaan so', che'é rej tijaan se-mozó so' rihaan nij so' rasuun nichrun' guun adonj —taj se-mozó Diose yo' rihanj a.

<sup>7</sup> Dan me se:

—Nichrun' cuchij rihaan soj ei —taj Jesucristó rihaan ní' a.

Dan me se cavii sa' síi uno nu' nana no rihaan yanj nihanj nana taj xna'anj daj guun rej rihaan ní' a. <sup>8</sup> 'Unj sij cu'naj Juan ro', me síi cuno nu' nana nihanj, ne 'unj me síi quene'en nu' rasuun nihanj a. Dan me se gaa quisij cunó 'unj do', quene'én 'unj do', gaa ne canicun' ruj 'unj na'vij 'unj rihaan se-mozó Diose síi tijaan nu' rasuun nihanj rihanj a. <sup>9</sup> Tzaj ne cataj so' rihanj a:

—Se qui'yáa so' danj ma'. 'O se síi 'yaj suun rihaan Diose ga so' do', ga taran' nij tinúu so' nij síi nata' se-nana Diose síi 'yaj nu' nana no rihaan yanj nihanj do', mej nanj adonj. Rihaan orún' Diose na'vij so' á —taj so' rihanj a. <sup>10</sup> 'O se cataj uun so'— Se caráan yuve so' se-nana Diose nana taj xna'anj daj guun rej rihaan ní' nu' nana no rihaan yanj nihanj ma'. 'O se nichrun' quisij güii guun nu' nij rasuun nihanj nanj adonj. <sup>11</sup> Che'é dan nij síi 'yaj cacun' ro', yo'ó qui'yaj nij so' cacun', ne síi chi'ii nimán ro', yo'ó gaa chi'ii nimán so' á. Ne síi vaa nica nimán, tzaj ne yo'ó naqui'yaj sa' so' nimán so', ne síi vaa sa' rihaan Diose ro', yo'ó gaa sa' so' rihaan Diose á —taj se-mozó Diose yo' a.

<sup>12</sup> Dan me se Jesucristó taj:

—Nichrun' cuchij rihaan soj ei. Ne nica 'unj se naru'vee 'unj rihaan soj chuguanj. Dan me se naru'vej rihaan 'o' o' soj ndaa vaa rasuun qui'yaj 'o' o' soj adonj.

<sup>13</sup> Dan me se ase vaa letrá A do', ase vaa letrá Z do', vaa 'unj a. Dan me se 'unj ro', me síi taj yaan rihaan cunudanj, ne veé 'unj me síi noco' xcó cunudanj a. Ne veé 'unj me síi nicun' asij gaa guun chumii, ne veé 'unj ro', me síi canicun' nu' cavii nu' ca'anj a.

<sup>14</sup> "Cavii sa' uxrá nij síi na'nu' sagan' ne navij cacun' atá so' a. 'O se cuno xcúun nij so' chá nij so' chruj man raá chruun 'yaj gaa i'na' yuvii ga Diose nu' cavii nu' ca'anj, ne catuun nij so' ta'yaa taj tu'va chuman' yo' a.

<sup>15</sup> Tzaj ne xa' nij síi 'yaj ndaa vaa 'yaj chuvee, tzaj ne xe' ro', quinaj nij so' do', nij síi chruun do', nij síi 'yaj se chi'ii ga chana do', nij síi ticavi' man tuvi' do', nij síi na'vij rihaan ya'anj cacóy yuvii do', nij síi niha' rá ca'mii nana ne do' a.

<sup>16</sup> "O se 'unj Jesucristó ro', me se ca'neé 'unj se-mozó 'unj cuchii so' rihaan nij soj nata' so' nana nihanj rihaan soj, che'é rej ca'anj soj cataj xna'anj soj nana nihanj rihaan cunudanj nij síi amán rá ni'yaj manj ne 'o' 'o' chuman' adonj. 'Unj ro', me ta'níi ta'nij si'no síi cu'naj David, ne noco' xna'anj tuvi' so' gaj ei. Ne ase vaa yati' xta'ngaa avii nichrun' rá ranga' ro', vaa 'unj rihaan chumii adonj —taj Jesucristó a.

<sup>17</sup> Ne dan me se Nimán Diose do', chana guun nica Jesucristó do', taj roj so': "Cuvá' so' ei", taj roj so' a. Ne síi uno nana nihanj ro', cataj so': "Cuvá' so' á", cataj so' rihaan tuvi' so' a.

Ne síi nacoó na ro', ca'na' so', ne co'ó so' na 'yaj vaa i'na' yuvii ga Diose nu' cavii nu' ca'anj, sese me rá so' a. Se naru'vee so' a 'ó cha'aa che'é na yo' ma'. 'O se co'ó uun so' na yo' nanj adonj.

<sup>18</sup> Dan me se 'unj ro', me síi nata' nu' nana no rihaan yanj nihanj rihaan nij soj, ne nana taj xna'anj daj guun rej rihaan ní' me nana nihanj chuguanj. Ne sese nutá' yo'ó so' doj yo'ó nana uun rihaan yanj nihanj, ne quiran' so' nu' sayuun taj xna'anj yanj nihanj, qui'yaj Diose adonj. <sup>19</sup> Ne sese tiri' yo'ó so' ta'aj nij nana no rihaan yanj nihanj nana taj xna'anj daj guun rej rihaan ní', gaa ne daj chihaa mij se chá so' chruj man raá chruun 'yaj gaa i'na' yuvii ga Diose nu' cavii nu' ca'anj ndaa vaa taj xna'anj yanj nihanj, qui'yaj Diose ma'. Ne se cayáan so' chuman' guue, ndaa vaa taj xna'anj yanj nihanj, qui'yaj Diose ma'.

<sup>20</sup> Dan me se Jesucristó síi nata' ya nana nihanj me se taj so', ne:

—Ra'yanj cuchij rihaan soj ei —taj so' rihaan ní' a.

"Veé danj gaa ya ei. Cuvá' so' Jesucristó, cuvá' so' sij 'nij ra'a man núj á", taj ní' rihaan Jesucristó adonj.

<sup>21</sup> Dan me se me rá 'unj qui'yaj ndo'o Jesucristó sij 'nij ra'a man ní' se luj che'é nij soj nanj ei. Veé danj gaa ya ei.